

Bëngbe Bëtsa  
Cabëngaftaca  
Entsoyebuambna



New Testament in Camsá

# Bëngbe Bëtsa Cabëngaftaca Entsoyebuambna New Testament in Camsá

copyright © 2009 Wycliffe Bible Translators, Inc.

Language: Camsá

Translation by: Wycliffe Bible Translators, Inc.

## Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### The New Testament

in Camsá

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-05-05

---

PDF generated using Haiola and XeLaTeX on 18 Apr 2025 from source files dated 29 Jan 2022

19104c0e-9046-5ff3-82fb-eb838c88dcf9

## Contents

San Mateo . . . . .	1
San Marcos . . . . .	100
San Lucas . . . . .	159
San Juan . . . . .	259
Hechos . . . . .	334
Romanos . . . . .	430
1 Corintios . . . . .	482
2 Corintios . . . . .	532
Gálatas . . . . .	565
Efesios . . . . .	584
Filipenses . . . . .	602
Colosenses . . . . .	614
1 Tesalonicenses . . . . .	626
2 Tesalonicenses . . . . .	636
1 Timoteo . . . . .	642
2 Timoteo . . . . .	657
Tito . . . . .	667
Filemón . . . . .	673
Hebreos . . . . .	676
Santiago . . . . .	717
1 San Pedro . . . . .	729
2 San Pedro . . . . .	743
1 San Juan . . . . .	752
2 San Juan . . . . .	764
3 San Juan . . . . .	766
San Judas . . . . .	768
Apocalipsis . . . . .	772

## San Mateo

*Jesusbe bēts taitanga*

*(Lc 3.23-38)*

<sup>1</sup> Quemēnga imnamna Jesucristbe bēts taitanga: Jesucristna Rey David y Abrahám bentšana entšá inamna.

<sup>2-6</sup> Abraham yojamna Isaacbe taitá;

Isaacna Jacobēbe taitá

y Jacob, Judá y chabe catsátangbe taitá.

Judá, Fares y Zarabe taitá; y chatbe mamá Tamar yojamna;

Fares Esrombe taitá

y mua Arambe taitá.

Aram Aminadabēbe taitá;

Aminadab Naasonbe taitá

y Naasón Salmonbe taitá.

Salmón Boozbe taitá y muabe mamá Rahab yojamna;

Booz Obedbe taitá y muabe mamá Rut yojamna;

y Obedna Isaibe taitá.

Isaí Rey Davidbe taitá;

David Salomonbe taitá y muabe mamá yojamna chē Uríasbe shema inamná.

<sup>7-11</sup> Salomón Roboambe taitá;

Roboam Abíasbe taitá

y Abíasna Asabe taitá;

Asa Josafatbe taitá;

Josafat Jorambe taitá

y Joramna Uzíasbe taitá.

Uzías Jotambe taitá,

Jotam Acazbe taitá

y Acazna Ezequíasbe taitá.

Ezequías Manasesbe taitá;

Manasés Amonbe taitá

y Amón Josíasbe taitá.

Josíasna Jeconías y chabe catsátangbe taitá yojamna.

Chē Babilonioca entšanga chē israelitēnga tmojánishēche y choca imojanētámena ora, Josías chē básenga yojánabamna.

<sup>12-16</sup> Ya Babilonioca ndutámenēnga ora;

Jeconías Salatielbe taitá;

Salatiel Zorobabelbe taitá.

Zorobabel Abiudbe taitá;

Abiud Eliaquimbe taitá

y Eliaquimna Azorbe taitá.

Azor Sadocebe taitá;

Sadoc Aquimbe taitá

y Aquimna Eliudbe taitá.

Eliud Eleazarbe taitá;  
 Eleazar Matanbe taitá  
 y Matán Jacobëbe taitá.

Jacob Josebe taitá yojamna y Josena Mariybe boyá.

María Jesusbe mamá, Jesús chë Bëngbe Bëtsabe Uámana  
 Uabuayaná, chë Cristo ca uabainá.

17 Chcasna, Abrahámbentšana Davidbentscoñe bnëtsana  
 canta bëts pamíllanga imojëftsemna. Davídbentšana y chë is-  
 raelitënga Babilonioca imojanëtamenëntscuana inye bnëtsana  
 canta bëts pamíllanga; y inye bnëtsana canta bëts pamíllanga  
 chë Israeloca entšanga imojanëtamenentšana, chë Cristo to-  
 janonÿnántscöñe.

### *Jesucristo tojanonÿná*

*(Lc 2.1-7)*

18 Jesucristo jónÿnanamna mëntšá tojanopasá: María tbo-  
 jansbuachená Joséftaca jobouamayama, pero cabá ndoñe  
 cánÿiñe ibontsiyena ora, tojanopasá Mariyna ngomamaná  
 jojoquéda chë Uámana Espíritbe obenánaca.

19 José, Mariybe boyá, canÿe nÿetsca soyënguiñe tšabá ja-  
 mama bošá inamna. Cha ndoñe yontseboše entšangbe de-  
 lante cha mal jaquédana; chíyecna tojanjuabó nÿe iytëcana  
 Mariybentšana jtsojuánañana.

20 Y chca yojtsejuabnantscuana, mo otjenayoquéca canÿe  
 Bëngbe Bëtsabe ángel tbojáninÿe y chana Josébioye tbojaniyana:  
 “José, Davídbentšana entšá, ndoñe matenócochinÿenana  
 Maríaftaca jobouamayama, er chë bochántsebmna šešona  
 chë Uámana Espíritbe obenánaca cha bochántsebmna.

21 María canÿe šešona bochántsebmna y cha Jesús ca  
 cochjuabaye. Chca echantsabaina er cha chabe entšanga  
 chëngbe bacna soyënguentšana echanjátsebacaye ca” —chë  
 ángel tbojaniyana.

22 Lempe chca tojanochnëngo, cachcá chaotsemnana  
 ntšamo Bëngbe Bëtsá chabe juabna oyebuambnayëngbiajana  
 tojanayancá. Chë oyebuambnayá mëntšá tojánayana:

23 Chë cabá boyabása nduabuatmá ngomamaná echanjo-  
 quéda

y canÿe šešona boyabásetema bochántsebmna,  
 y cha mochanjuabaye Emanuel ca.

(Emanuel endayana “Bëngbe Bëtsá bëngaftaca ca”).

24 José chë otjénayentšana tojanofšená ora, tojanma ntšamo  
 chë Bëngbe Bëtsabe ángel tbojanmandacá y Maríaftaca to-  
 janobouamá.

25 Pero ndoñe cánÿiñe ibontsaniyena, sinó nÿe chë  
 šešonatema tojanonÿná orscana. Chë šešonatema  
 tojanonÿná orna, José chábioye Jesús ca tbojanabaye.

## 2

*Reyes Magos Jesúsbioye tmojána*

<sup>1</sup> Herodes judiëngbe rey yojamna ora, canÿe pueblo Judeoca, Belén ca uabáinentše Jesús tojanonÿná. Chentšana, báseftanga, estrellënga uatsjëndayënga, magos ca uabáinënga, canÿe bëts pueblöye Jerusalén ca uabáinoye tmojánashajjna. Chënga tmojánabo shinÿe bocanöye luarëngocana.

<sup>2</sup> Jerusalenocna chënga, Heródesbioye tmojána y tmojanënoticiá: “¿Ndayentše yojtsemna chë judiëngbe rey jtsemnama tojonÿná cha ca? Bëngbe luarëngoca shinÿe bocanöye chabe onÿnana estrella fsënjinye y as muentše cha jaboadorama tifjabo ca.”

<sup>3</sup> Rey Herodes chca tojanuena ora, corente yojt-senócochinÿena, y nÿetsca chë Jerusalenentše oyenëngnaca.

<sup>4</sup> Chentšana chë rey tojánachembo nÿetsca chë judiëngbe bachnangbe amëndayënga y chë judiëngbe ley abuátambayënga jenöyeunayëngama. Mëntšá tojanatjá: — ¿Ndayentše chë Bëngbe Bëtsabe Uámana Uabuayaná, chë Cristo ca uabainá, jónÿnama ibomna ca?

<sup>5</sup> Chënga tmojanjuá: —Judeoca, Belén pueblentše ca. Bayté entsemna chë Bëngbe Bëtsabe juabna oyebuambnayá Miqueas mëntšá tojanábema:

<sup>6</sup> Y tsëngaftanga, Judeoca Belenentše oyenënga, canÿe mandayá tsëngaftangbentšana echanjabo. Cha nÿetsca chë Judeoca mándayëngbiana más uamaná echántsemna, y atšbe entšanga Israeloca echántsanÿena.

Chíyeca tsëngaftangbe pueblo ndoñe nÿe batšá uámana pueblo quenátsmëna ca.

<sup>7</sup> Chora Herodes iytëcana chë maguënga tojánachembo y cuedádoca tojanatjá ntseco ora chë estrella tmojáninÿama.

<sup>8</sup> Herodes chë soyënga yojtsetátšëmbo ora, Belenöye chë maguënga tojanichamó, y mëntšá tojanëyana: “Chöye mot-sajna y tšabá chë šešona šmochjúanguo. Chašmójinÿena ora, šmochjabëuenaye, as átšnaca chayobená jama chë šešona jadórama ca.”

<sup>9</sup> Rey Herodes chë soyënga tojánëyanentšana, chë maguënga tmojtsatanoñe. Chora cachiñe tmojtaninÿe chë chëngbe luarëngoca tmojáninÿe estrella y yojtsanebnatsana chë šešona yojtsemnëntscoñe. Chentša juatsbuacá chë estrella yojójjayiye.

<sup>10</sup> Chë maguënga chë estrella tmojáninÿe orna, corente oye-juayënga imojtsemna.

<sup>11</sup> Chë yebnoye tmojánamashjna ora, chë šešona tmojáninÿe chabe mamá Mariáftaca. Chorna, tmojanoshamentšé y chë

šešonatema tmojanadorá. Chora chëngbe cajontémënga tmojanëtsécaca y tmojanatštá castellano, inciense y canye botamana uanguëtse soye, mirra ca uabániye.

<sup>12</sup> Chentsana, mo canye otjenayoquécá Bëngbe Bëtsá chë maguënga tojanabuayená rey Herodesbiajana ndoñe chamondesshëcuanama. As chënga chentsana inye benachëjana cachëngbe luarëngoye tmojësanshëcuanama.

### *Egiptó luaroye tmojtsanachá*

<sup>13</sup> Chë maguënga tmojtsatanoñe ora, otjénayoca José canye Bëngbe Bëtsabe ángelbioye tbojáninye y cha mëntšá tbojaniana: “Motsbaná, chë šešonatema y chabe mamá mesëbiatše y Egiptoye motsachá. Herodes chë šešonatema bochanjúanguango jtsóbama, chíyeca choca cochtsoquedañe atše chacbochjábuaenantscuana ca.”

<sup>14</sup> As José tojantsbaná, chë šešonatema y chabe mamá tojesanëbiatše y ibeta Egiptó benache tojéftsanbocna.

<sup>15</sup> Y choca imojtsanomñe Herodes tojanóbanëntscuana. Chca tojanopasá, cachcá chaotsemnana ntšamo Bëngbe Bëtsá chabe juabna oyebuambnayabiajana tojanayancá. Chë oyebuambnayá mëntšá tojánayana: “Egiptocana atšbe uaquiñá sënjanchembo ca.”

### *Herodes tojanmandá basetémënga jtsëbáyama*

<sup>16</sup> Chë maguënga tmojtsaningñema Herodes tojántatsëmbona ora, puerte tbojánetna, y tojanmandá lempe jtsëbáyama base boyabásetemënga uta uata bomnënga y cabá uta uata nd-bomnënga, Belén y chë juachañe pueblënguentsënga. Uta uatama cha tojanjuabó, er uta uata yojtsemna chë maguënga chë estrella tmojáninyama.

<sup>17</sup> Ntšamo chë Bëngbe Bëtsabe juabna oyebuambnayá Jeremías tojanoyebuambacá, cachcá tojanochnëngo:

<sup>18</sup> Ramá ca uabaina pueblentše canye oyebuambnayana tmojanuena,

ngménaca ošachiyana y becá tsetšanánaca oyebuambnayana. Raquel yojamna chabe básengbiama ošachiyiñe, pero ndoñe yontseboše chamuatebiajuama, chabe básenga ya obanënga causa ca —cha tojanábema.

<sup>19</sup> José cabá Egiptoca yojtsomñe ora, Herodes tojanóbana. Chentsana, otjénayoca José canye Bëngbe Bëtsabe ángelbioye tbojáninye y cha mëntšá tbojaniana:

<sup>20</sup> “Motsbaná, chë šešonatema y chabe mamá mesëbiatše y Israeloye cochtá. Chë šešonatema jóbama bošënga ya obanënga montsemna ca.”

<sup>21</sup> As José tojantsbaná y chë šešonatema y chabe mamá Israel luaroye tojtésanëbiatše.

<sup>22</sup> Arquelao Judeoca yojanmánda chabe taitá Heródesbe cuentiñe, y José chca tojántatšëmbona orna, yojtsauatja choye jama. Pero otjénayoca Bëngbe Bëtsá Josébioye tbojanbuayená; chíyeca Josena Galilea ca uabaina luaroye tojána.

<sup>23</sup> Choye tojánashjango ora, José tojána canye pueblo Nazaret ca uabáinoye chentše joyéname. Chca tojanochnëngo cachcá chaotsemnama ntšamo chë Bëngbe Bëtsabe juabna oye-buambnayënga tmojanayancá. Chënga tmojánayana: “Nazaretocá ca Jesús mochantsábobaina ca.”

### 3

*Juan chë Ubayaná entsanga yojanabuayiná  
(Mc 1.1-8; Lc 3.1-9, 15-17; Jn 1.19-28)*

<sup>1</sup> Chë tempo, Juan chë Ubayaná, entsanga ndoyena luaroye Judeoca tojánbocna, Bëngbe Bëtsabe soyëngama jábuayenama.

<sup>2</sup> Mëntšá cha yojanëtsësnaye: “Bëngbe Bëtsabe amëndayana ya echanjóshjango. Ngménaca šmochtenójuaboje tšëngaftangbe bacna soyëngama y chca amana šmochtsajbaná y Bëngbe Bëtsabe benache šmochtishache ca.”

<sup>3</sup> Juan yojamna canya ndabiama chë Bëngbe Bëtsabe juabna oyebuambnayá Isaías mëntšá tojánayana:

Entsanga ndoyena luaroca canya enduáyebuache:

“Bëngbe Utabná echanjabo ca;

mo nda canye benache tojtseprontacá canye uámana entšá jashjanguama,

tšëngaftángnaca cachcá, Bëngbe Utabná jabama ainaniñe tšabe juabnéngaca šmochtseprontana ca” —cha tojánayana.

<sup>4</sup> Juanbe entsayá inauapormana camellbe stjénasheca y bobache yojanasnana. Cha inasaye chapulinatémënga y tjoca tjouangbe méloye.

<sup>5</sup> Jerusalemoca entsanga, nyetsca Judea luarentša entsanga y chë Jordán ca uabaina béjaye béconana oyenënga imojánbocana Juan joyeunayama.

<sup>6</sup> Bëngbe Bëtsábioye chëngbe bacna soyëngama jaimpáda chentšana, Juan chë Jordán béjayiñe chënga yojanëbáyana.

<sup>7</sup> Pero Juan tojáninye ba fariseunga y saduceunga cha chaubáyama tmojánama. Chënga imojamna chë judiëngbeñe uánatsanënga Bëngbe Bëtsá ndoñe corente ntseyeunanama; as chora tojanëyana: “¡Mëtšcuaye entsanga! ¿Nda tcmënjáuyana chë echanjóshjango uabouana castigüentsana šmochjotsbocá ca?”

<sup>8</sup> Bëngbe Bëtsabeñe ndegombre ošbuáchiyënga šmochtsemna, as chca chaotsinýna chë bacna soyëngama amana tšëngaftanga ndegombre šmojtsajbanama.



9 Y ndoñe šmattsejuabnaye cach tšëngaftangbiamaya jayanama: ‘Abrahám bentšana entšanga fsëndmëna ca’. Er atše šcuayana, Bëngbe Bëtsá quem ndëtšbëngacnaca Abrahám bentšana entšanga nanjábiamaya.

10 Chë tatsnía ya entsaprontana chë betiyeshënga tbëtëjëngocana jtseshatëtsetšama. Ndaye betiye ndoñe tontseshajo, jtseshatëtšana y iñoye jtsatmetšana. Tšëngaftangaftácnaca cachcá, tšabe soyënga ndoñe šmontsamëse, Bëngbe Bëtsá cmochanjácastigaye.

11 “Ndegombre, atšna béjayeca cbondubáyana Bëngbe Bëtsabe benache chašmuatishachama. Pero chë atšbe ústonoye echanjabá, atšbiamaya más obenana bomná comna, y atše merecido taitatobuajoñe ni mo chabe shecochëtjonëshe jtsámabñama. Chë chabe benache aiñe chamojtishachëngbiamaya Bëngbe Bëtsá echanjama chë echanjabábeyeca, chë Uámana Espiritu chëngbe ainaniñe cháumashënguama. Pero chë benache ndoñe chamontishachëngbiamna, Bëngbe Bëtsá echanjama chë echanjabábeyeca, corente castigánënga chamotsemnaya, mo iñeshequécá.

12 Canyë entšá chabe mëtštá cucuatšíñe jiyëbana, chabe trigo jtsóbobemana y chë ndoservena shácuanënga jtsejashtsëtsana. Chabe trigo chë grano uaquëcjnaye tsañe jtsabuájua, y chë ndoservena shácuanëngna iñoye jtsatmetšana. Cachcá, chë atšbe ústonoye echanjabana, chë tšabe entšanga echanjúbuaja, y chë bacna entšangna canyë iñeshiñe echantsacastígaye, y chë iñe ndocna te queochátsfsana ca” —cha tojanëyana.

*Juan, Jesúsbiyë tbojanabaye*

*(Mc 1.9-11; Lc 3.21-22)*

13 As Jesús, Galileocana tojána Jordán béjayoye, Juan yojtsemnoye, cha chabuábayama.

14 Pero Juan ndoñe yontseboše Jesús juabáyama, y mëntšá tbojaniyana: —Atše šontsemna aca chašcuabayey, y ¿más atše aca chochjuabayey ca?

15 Chora Jesús tbojanjuá: —Morna chca chaotsemna. Entsemna lempe ntšamo Bëngbe Bëtsá tojamandacá jobedésana ca.

As Juan yojouena Jesús juabáyama.

16 Jesús ya uabainá yojtsemna ora, chë buyeshoicana tojtanshëbëbocna. Chorna Jesús tsbanánoye yojontješiyey y tojáninÿe chë celoca atëfjniñe y chë Uámana Espiritu mo canyë palomatemcá chábiyey yojtsastjajuana.

17 Chora celocana Bëngbe Bëtsá mëntšá tojánayana: “Mua atšbe bonshana uaquíñá endmëna. Chabiamaya corente šëntsoyëjuá ca.”

## 4

*Jesús tojanobená Satanás jayēnjanama*  
(Mc 1.12-13; Lc 4.1-13)

<sup>1</sup> Chentšana chē Uámana Espiritu entšanga ndoyena luaroye Jesús tbojanánatse, as Satanás chauábama cha jisháchichiyama.

<sup>2</sup> Chentše canta bnětsana te y canta bnětsana ibeta ntjascá tbojanjétana; chíyeca chora tbojaneshěntsena.

<sup>3</sup> As Satanás tbojanobobeconá y tbojanianyana: —Aca ndegombre Běngbe Bětsabe Uaquiñá tcomněse, momandá quem ndětsbenga tanděse chaobiama ca.

<sup>4</sup> Pero Jesús tbojanjuá: —Běngbe Bětsabe uabemana palabrěnguiñe měntšá endayana: “Entšá nye tanděseca ndoñe vida ntsebomnana, sinó entšá endobena jtsiyenana lempe ntšamo Běngbe Bětsá tojayancá tbojtseyeunaněse ca.”

<sup>5</sup> Chentšana Satanás, Jerusalén, chē uámana běts pueblo ca uabáinoye Jesús tbojanánatse, y chē Běngbe Bětsabe běts yebnentše chē más tsbanánoca tbojanatsá.

<sup>6</sup> Chentše Satanás měntšá tbojanianyana: —Aca ndegombre Běngbe Bětsabe Uaquiñá tcomněse, muentšana fshantsoye montsěnja, er Běngbe Bětsabe uabemana palabrěnguiñe endayana:

Běngbe Bětsá chabe angelěnga echanjichamuá, chacmotsinýenama.

Chěnga buacuatšěngaca cmochanjishache, shecuatše ndětsbeñe ndocá chacondomama ca —cha tbojanianyana.

<sup>7</sup> Chora Jesús tbojanjuá: —Cach Běngbe Bětsabe uabemana palabrěnguiñe měntšá endayana: “Ndoñe matsbošana acbe Bětsá chē Utabná bacna soyěngama jacočěnguama ca.”

<sup>8</sup> Cabana, Satanás tbojanánatse canye běts tjoye y betscó nýetsca quem luarentša aměndayěngbenache y chentša nýetsca uámana soyěnga Jesúsbioye tbojaninýinýe.

<sup>9</sup> As Satanás tbojanianyana: —Aca chacojoshěntsamentšé y chaščojadorase, lempe chē soyěnga cbochjatštaye ca.

<sup>10</sup> Y Jesús tbojanjuá: —¡Satanás, átšbentšana mojuaná! Běngbe Bětsabe uabemana palabrěnguiñe měntšá endayana: “Běngbe Bětsá cochtsadorana y nye cha cochtseservenena ca.”

<sup>11</sup> As Satanás cachcá tbojanonýá. Cachora Běngbe Bětsábiocana angelotéměnga tmojánabo Jesús jtseservénama.

*Jesús tojanontšé Galileoca chabe trabajo jamana*  
(Mc 1.14-15; Lc 4.14-15)

<sup>12</sup> Juan chē Ubayaná cárceloje tmojanětámiamama Jesús tojanuena ora, Galilea luaroye cha tojtaná.

13 Pero ndoñe tonjano quedá Nazaret pueblentše, sinó Capernaumoca, uafjónaye tsachañe; choye tojána joyé nanama, chë uámana bëts taitata Zabulón y Neftalibe luariñe.

14 Chca tojanochñengo, cachcá chaotsemnama ntšamo chë Bëngbe Bëtsabe juabna oyebuambnayá Isaías tojanayancá. Isaías tojánayana:

15 Zabulón y Neftalibe luare, Jordán bėjaye chenguánoica, uafjónaye tsachañe;

Galilea luariñe, ndoñe judío entsanga oyenentše.

16 Chë mo ibetiñe cuaftsiyencá imojyena entsanga, Bëngbe Bëtsabe soyënga nduabuatma causa, tmojinýe canýa entsangbe juabñenga binýnayá.

Chë chëngbe juabñenga binýnayá entsebuashinýinýana chë Bëngbe Bëtsábioye nduabuatmëngbiama, y chë causa chabiama imomna mo obanëngcá, ndoñe binýniñe jtsiyenëse ca —cha tojanábema.

17 Cach orscana Jesús tojanontsé entsanga jábuayenama: “Bëngbe Bëtsabe amëndayana ya echanjóshjango. Ngménaca šmochtenójuaboye tšëngaftangbe bacna soyëngama y chca amana šmochtsajbaná ca.”

*Jesús tojánachembo canta boyabásenga beonga ashebuánayënga cha chamuastama*

*(Mc 1.16-20; Lc 5.1-11)*

18 Canýe te, Jesús chë Galilea uafjónaye tsachajana yotsaye y ndeolpe uta boyabásata tojanýe: canýa yojamna Simón, chë Pedro cánaca uabainá, y chabe uabentsá Andrés. Chatna atarraiëshangá ibnetsashbuétsetšañe, er beonga ashebuánayata ibnamna.

19 Jesús tojanëyana: “Atšeftaca mabata; atše cbochanjábiama Bëngbe Bëtsabiama entsanga anguayata, y morscana nýe beonga ashebuánayata ya ndoñe quešochátsmëna ca.”

20 Cachora chatbe atarraiëshangá cachcá tbojésanaboshjuana y Jesús tmojanasto.

21 Y más chcoye, Jesús inýe uta catšátata tojánanýe: Santiago y Juan, chë Zebedeobe uaquiñata. Chata ibojsomñe canýe barquëshañe, chatbe taitáftaca, chëngbe atarraiëshangá atapórmayinýe. Jesús tojánachembo,

22 y cachora chë barquëshata tbojésanaboshjona, chë taitá cachentše imojéseboshjona y Jesús tmojanasto.

*Jesús ba entsanga yojanabuatambá y yojánashnaye*

*(Lc 6.17-19)*

23 Jesús nýets Galilea luarëjana yojánana, chentše judiëngbe enefjuana yebñënguenache abuátambaye. Chë tšabe noticiënga

Bëngbe Bëtsabe amëndayama entsānga yojanabuayiyná y nÿetsca šocanēngama y tsetšanēngama yojánashnaye.

<sup>24</sup> Nÿets Siria luarējana entsānga cha imojtsebáyana. As entsānga nÿetsca šocana bomnēnga Jesúsbiöye imojtsēnachaye: šoquēnga y tsetšanana bomnēnga, bacna bayējbe juabna uambayēnga, ataque osháchichanēnga y jama ndobenēnga. Jesús nÿetscanga yojánashnaye.

<sup>25</sup> Mallajta entsānga Galileocana, Decápolis luarocana, Jerusalenocana, Judeocana y chē Jordán bėjaye chengvanoicana Jesús imojústona.

## 5

### *Ndayá Jesús tjoca tojanabuatambá*

<sup>1</sup> Jesús chē mallajta entsānga tojánanyē ora, batsjoye tojántsjuu y tojanótbema. Chabe ústonēnga tmojanobobeconá y

<sup>2</sup> Jesús tojanontsé mēntšá jabuátambana:

*Ndēmuanÿenga imomna chē ndegombre oyejuayana bomnēnga*

*(Lc 6.20-23)*

<sup>3</sup> “Puerte oyejuayēnga mochántsemna chē Bëngbe Bëtsabe soyēnga tša imuajaboto ca juabnayēnga. Chca entsānga mochántsemna chē Bëngbe Bëtsabe amëndayoca mochtsiyenēnga.

<sup>4</sup> “Puerte oyejuayēnga mochántsemna chē mondbétsošachiyēnga; chēnga Bëngbe Bëtsá entsējabuáchana ngménaca ndoñe chamondétsemnama.

<sup>5</sup> “Puerte oyejuayēnga mochántsemna chē uámanēnga ndoñe mondbétsenobiamnayēnga, er chēnga mo chēngbe otocana soycá quem luare mochanjóyēngacñe.

<sup>6</sup> “Puerte oyejuayēnga mochántsemna chē nÿetsca soyēnguiñe tšabá jamama bošēnga. Chēngbe bošana entsemna mo chē oshēntsiyá y uajuendayabe bošancá. Chē nÿetsca soyēnguiñe tšabá jamama bošēnga mochanjobenaye jēftsinÿana lempe ntšamo tmojtsebošcá.

<sup>7</sup> “Puerte oyejuayēnga mochántsemna chē ínÿengbiamma ongmiayēnga, er Bëngbe Bëtsá chēngbiamma bochanjóngmia.

<sup>8</sup> “Puerte oyejuayēnga mochántsemna chē nÿe tšabe juabnēnga ainaniñe bomnēnga; chēnga Bëngbe Bëtsá mochanjinÿe.

<sup>9</sup> “Puerte oyejuayēnga mochántsemna chē nÿetscanga natjēmbana chamotsiyenama amēnga, er chēnga Bëngbe Bëtsabe básēnga ca mochantsabaina.

<sup>10</sup> “Puerte oyejuayēnga mochántsemna chē ínÿenga tmojama chamotsesufrínēnga, ntšamo Bëngbe Bëtsá yobošcá

bétsamama; chca entsanga mochántsemna chë Bëngbe Bëtsabe amëndayoca mochtsiyenënga.

11 “Puerte oyejuayënga tšëngaftanga šmochtsemna, entsanga chacmojoyánguango y chacmojtsécamena ora y nyetscna soyëngaca chacmojtsëbuayatsenaye ora, atšbe ústonënga bétsemnama.

12 Móyejuanga, puerte móyejuanga, tšëngaftanga celoca becá šmochanjóyëngacñe. Er ntšamo entsanga tšëngaftanga cmécamena, cachcá chë Bëngbe Bëtsabe juabna oyebuambnayëngbioye, chë tšëngaftangbe natsana monjanienëngbioye entsanga monjanécamena ca” —Jesús tojánayana.

*Ošbuáchiyënga jtsemnana mo tamocá y binÿnayënga quem luarentša entsangbiana*

*(Mc 9.50; Lc 14.34-35)*

13 “Tšëngaftanga, quem luarentša entsanga jtsëjabuáchanëse šmojtsiyena, Bëngbe Bëtsabe soyënga chamotsetatšëmbuama, as chëngbiana šmochántsemna mo chë mëntšena ndoñe chaondónbemama tcojatboto tamocá. Pero chë tamó fténana tojtsóbemëse, ndoñe ntšopodénana tempcá sanana cachiñe jtëtšmënana. Chca, ya tondayama ntšoservénana; chíyeca chë tamó tsáshenoye jtsëtšenana y entsanga jtsebotájayana.

14 “Tšëngaftanga, ntšamo tšabá yomncá šmojtsiyenëse, as quem luarentša entsangbiana šmochántsemna mo chë ibetiñe tojtsebínÿna soycá. Canÿe bëts pueblo batsjo juatsbuañe tomnëse, ndoñe ntšopodénana iytëmencá jtsemnama.

15 Canÿe uajuinÿanësha tcojuajuinÿena ora, ndoñe cajonëshe tajsoye jtsabuájuama, sinó tsbanánoca juajájuama, chca, nyetsca entsanga chë yebnentše tmojtsemnëngbiana chaotsebínÿnama.

16 Cachcá tšëngaftanga, entsangbe delante mo binÿnayëngcá šmochtsemna, as chënga tšëngaftanga tšabe soyënga šmuamama chamuinÿama, y chca, chënga chamuinÿanyë chë Taitá, Bëngbe Bëtsá celoca endmëná, corente uamaná y obená bétsemnama ca” —Jesús tojánayana.

*Chë Moisesbe leyama Jesús tojanabuatambá*

17 “Ndoñe šmattsejuabnaye, ntšamo Moisesbe leyinë iuayancá y chë Bëngbe Bëtsabe juabna oyebuambnayënga tmojanayancá jabëtsepochoyama atše tijabo ca. Atše ndoñe chiyátabo chë soyënga jabëtsepochoyama, sinó jabábuayenama ndayá chë soyënga ndegombre bétsayanama.

18 Ndegombre šcuayana: Celoca y quem luare chaojëftsemnëntscuana, ndocná queochatobenaye ni canÿe

punto, ni canye letra chë leyënguentsana jtsejuánana, lempe ntšamo jochnënguama yomncá chaojtsemnëntscuana.

19 Chíyeca, nda nye mo canye mando chë leyënguine ndoñe tonjoyeuná cha, masque nye base soye chë mando tojtsemna, y chë inyenga cachcá tojtsabuatambá, cha Bëngbe Bëtsabe amëndayoca chë más nduamaná echántsemna. Pero ndëmuanyenga tmojtsama ntšamo Bëngbe Bëtsá tojamëndacá y chë inyenga cachcá chamotsamama tmojtsabuátambase, chënga Bëngbe Bëtsabe amëndayoca uámanënga mochántsemna.

20 Chë soyëngamna mëntšá šcuayana: Tšëngaftanga chë ley abuátambayënga y fariseúngbioye ndoñe šmontsayëñjanase, jt-samama ntšamo Bëngbe Bëtsá tcmojamëndacá, ndocna te Bëngbe Bëtsabe amëndayoye quešmochátamashjna.

### *Ndayá chë inyëngaftaca tbojetnama Jesús tojanabuatambá*

21 “Tšëngaftanga šmojouena ntšamo Bëngbe Bëtsá tšëngaftangbe bëts taitanga tojanamëndacá: ‘Ndoñe catjóba ca. Chca ochjajnayá bontsemna jobuambayana chë entšangbiana tšabá o ndoñe tšabá tmonjamama endbayanabe delante, ndáyeca chca ca.’

22 Pero atše šcuayana, nda cachabe catšátaftaca tbojetna, chánaca bontsemna jobuambayana chë entšangbiana tšabá o ndoñe tšabá tmonjamama endbayanabe delante, ndáyeca chca ca. Nda cachabe catšátbioye puerte tbojtsáboyënja, cha bontsemna chë Sanedrín ca uabaina mándayëngbe delante jobuambayana ndáyeca chca ca; y nda cachabe catšatbiana opjema ca tojayana, ntšamo cha bétsamama, cha bontsemna chë infiernoca iñeshoye jama.

23 “Chíyeca, nderado ndayá Bëngbe Bëtsabe bëts yebnoye tcojuamba Bëngbe Bëtsá jëtschuayama y chora tcojenojuabó acbe catšata ácaftaca etonaná yojtsemna ca,

24 as chë tcojiyëbo soye chë altarentša natsanoica cochjéseboshjona, cochtá y acbe catšátaftaca cochtenoyántsia. Chentšana cocayé altaroye cochjá y chë tcojuamba sóyeca Bëngbe Bëtsá cochjëtschuaye.

25 “Nderado nda tcmojademanda y cabildoye jotsánama cmojtsemna, cabá choye ndáshjango ora, betscó cháftaca cochtenoyántsia. Chca ndóñese, chë demandayá mandádbioye cmochanjúshjango, chë mandado josticiëngbe cucuatšíñe cmochanjáboshjona y chënga cárceloye cmochanjutame.

26 Ndegombre cbëyana: Chentšana ndoñe que-cochtétsbocna lempe candesopagantscuana ca” —Jesús tojánayana.

*Chë boyá o shémbioye ínÿaftaca íngñayama Jesús tojanabu-atambá*

<sup>27</sup> “Tšëngaftanga šmojouena ntšamo Bëngbe Bëtsá tojanmandacá: ‘Acbe boyá o acbe shémbioye ínÿaftaca ndoñe catjaíngña.’

<sup>28</sup> Pero atše cbëyana: Nderado canÿe boyabása ndëmuanÿe shembásabioye tbojinÿe y tojajuabó ‘malaye cha ca’, chë boyabása chca tojajuabose, ainanoca ya chë inÿe shembásaftaca cachabe shémbioye tbojtseingñé.

<sup>29</sup> “Chíyeca, nderado acbe catšbioica bomínÿeca bacna soye tcojinÿe y cachca soye tcojamëse, más tšabá nántsemna chë bomínÿe cochtsenobuchjatsëca y cochtsëtšena. Nÿets cuerpo jtsebomnana y lémpca infiernoye jama chacmotsëtšenamna, acbiamá más tšabá nántsemna nÿe canÿe soye acbe cuerpentšana chacoperdé.

<sup>30</sup> Nderado acbe catšbioica cucuatšeca bacna soye tcojamëse, más tšabá nántsemna chë cucuatše cochtsenástjango y cochtsëtšena. Nÿets cuerpo jtsebomnana y lémpca infiernoye chacmotsëtšenamna, acbiamá más tšabá nántsemna nÿe canÿe soye acbe cuerpentšana chacoperdé ca” —Jesús tojánayana.

*Chë bouamnata enëtšanama Jesús tojanabuatambá*  
(Mt 19.9; Mc 10.11-12; Lc 16.18)

<sup>31</sup> “Mëntsánaca leyíñe enduábemana: ‘Ndëmuanÿe boyá chabe shémaftaca tbojtsenëtšena, chë boyá bontsemna chabe shema canÿe tsbuanácha juiiyana, ndayéchañe chaotsayana cha ya ndoñe chabe shema yontsemna ca.’

<sup>32</sup> Pero atše cbëyana: Nda chabe shémaftaca tbojtsenëtšena y chca tojopasá ndoñe chë shema ínÿaftaca tbontseingñé causa, as chë boyá jtsamana cha chabotseingñema, chë shema ínÿaftaca tojtóbouamase. Y nda chë útšena shémaftaca tojtobouamá, chana canÿe uabuatmá jtsebomnana, y chca, chë tsëm boyánaca canÿe bacna soye jamana ca” —Jesús tojánayana.

*Chë entšanga júrayama Jesús tojanabuatambá*

<sup>33</sup> “Tšëngaftanga šmojouena ntšamo tšëngaftangbe bëts taitángbioye tmojanëyancá: ‘Nderado tcojayana: De Dios chë soye chanjama ca; ojal chë soye ndoñe catjama ca.’

<sup>34</sup> Pero atše cbëyana: Todayama šmattsejúraye; ni celocama, er chocha Bëngbe Bëtsabe tbemaniñe endmëna.

<sup>35</sup> Ni quem luarama, er Bëngbe Bëtsabiamá mo tšenëtemcá endmëna, chiñe chabe shecuatšënga jacjayama; ni Jerusalemá, er chë pueblo endmëna Bëngbe Bëtsá chë Bëts Reybe bëts pueblo.

36 Ni tšëngaftangbe bestšašama cach ndoñe, er tšëngaftanga ndoñe quešmátobena ni mo canye stjénashe ftsenguëshe o fjantsëshe jabemana.

37 Tšëngaftanga aíñe ca jayanama šmojtsebošëse, nye aíñe ca šmochjayana, y ndoñe casna nye ndoñe. Ndayá chentšana más šmojatichamo soye, Satanásbiocana jtsóbocanana ca” — Jesús tojánayana.

*Chë entsanga mondbátenachnënguama Jesús tojanabuatambá (Lc 6.29-30)*

38 “Tšëngaftanga šmojouena ntšamo tšëngaftangbe bëts taitángbioye tmojanëyancá: ‘Nderado nda tcmojtsebuchjatsëca, ácnaca derecho contsebmna canyëbé cha jëtsbuchjatsëcama ca; y nderado nda canye juatsaše tcmojtsásiye, ácnaca derecho contsebmna cányëšë cha jtašiyama ca.’

39 Pero atše cbëyana: Ndoñe matsbošana chë ndayánaca tcmojaborlábioye jtachnënguama; chamna, ndánaca catšbioica tcmojajuebjantšetase, cochjomiye chë ínjoica cachcá chacmomama.

40 Nderado nda tcmojademanda y tojtseboše acbe shabuan-guanëjua jtsabocñama, cha molesenciá acbe quëfsaíyanaca chauetsácñama.

41 Nderado nda tcmojuasmá y tcmojamanda bnëtsana cuadroca juyambama, inye bnëtsana cuadro cochjuyamba.

42 Nda ndaye soye tcmojotjañëse, cochjatštaye; y nda ndaye soye tcmojuatjase, cha ndoñe stëtšoye catjaquëda ca” — Jesús tojánayana.

*Chë uayayëngbiana bonshánana jtsebmna (Lc 6.27-28, 32-36)*

43 “Tšëngaftanga šmojouena ntšamo tšëngaftangbe bëts taitángbioye tmojanëyancá: ‘Acbe amigo cochtsebobonshana y acbe uayayá cochtsaboyënja ca.’

44 Pero atše cbëyana: Tšëngaftangbe uayayënga šmochtsababuányëshana, y chë cmëcamenëngbiana Bëngbe Bëtsá šmochtseimpadana.

45 Chca tšëngaftanga, chë Taitá, Bëngbe Bëtsá, chë celoca endmënabe básenga šmochántsemna; Bëngbe Bëtsá endbétsama tšabe y bacna entšángbeñe chabe shinye chaotsebinýnayama, y endbétsama chë nyetsca soyënguiñe tšabá jamama bošënga y ndoñe chca entšángbeñe chauaftema.

46 Tšëngaftanga nye chë tšëngaftanga tcmojtsababuányëshanënga šmojttsababuányëshanëse, ¿Bëngbe Bëtsábiocana ndayá šmochjuacaná? Romocama crocénana entšángbioye atjanayëngnaca chca monduamana.



47 Y n̄ye ch̄e amiguēngbioye šmojsacheuanase, ¿ndaye b̄ets soye šmojsama? Ch̄e ndoñe judiēngnaca chca mondb̄etsama.

48 T̄šēngaftangbe Taitá, Bēngbe B̄etsá celoca endm̄ená, n̄yetsca t̄šabe soyēnga bomná y amá endm̄ena. T̄šēngaftāngnaca cachcá šmochtsemna ca” —Jesús tojánayana.

## 6

*Jesús tojanabuatambá nt̄samo t̄šabe soyēnga ín̄yēngbiamama ja-*  
*mana*

1 “Cuedado šmochtsebomna ndoñe nt̄samama ent̄šāngbeñe t̄šēngaftangbe t̄šabe soyēnga, n̄ye chēnga chca chamuin̄yama. Chca šmojam̄ese, t̄šēngaftangbe Taitá, Bēngbe B̄etsá, celoca endm̄ená ndocna uacanana soye quecmocht̄t̄at̄šataye.

2 “Chcasna, nderado nda caridá tcojábem̄ese, chca ndoñe šmatjama ch̄e nt̄samo šmojsamama n̄yetscanga chamotset̄t̄šēmbuama, mo can̄ye trompet̄f̄jua cuaftsajat̄etancá, ch̄e caridá šmojábemama chaotsót̄t̄šēmbuama; chca monduamana ch̄e bacna ent̄šanga ch̄e nt̄samo ndegombre tmojuabnacá ndin̄yin̄yayēnga, ch̄e judiēngbe enefjuana yebn̄ēnguenache y tsáshenañe. Ndegombre cb̄eyana, ch̄e chca amēnga ya chēngbe uacanana soye tmojóyēngac̄ñe, nt̄samo chēnga tmojamama ent̄šanga t̄šabá chēngbiamama tmojtsoyebuambná ora.

3 Chcasna, nda caridá tcojábema ora, ndocná más chaond̄t̄set̄t̄šēmb̄o, mo ch̄e uañicuayoica cucuat̄še ndoñe queondbat̄stat̄šēmbcá ndayá ch̄e cat̄šbioica cucuat̄še tojtsamama,

4 chca, acbe caridá iyt̄ēcana chaotsemnama. As, t̄šēngaftangbe Taitá, nda bomin̄ye endb̄etsequēcn̄yaye ch̄e iyt̄ēmencá tcojtsama soye, acbe uacanana soye cmochánt̄t̄šat̄yaye ca” —Jesús tojánayana.

*Jesús tojanabuatambá nt̄samo Bēngbe B̄etsáftaca jencuéntana*  
*(Lc 11.2-4)*

5 “Bēngbe B̄etsáftaca šmojtsencuénta ora, ndoñe šmattsama ch̄e bacna ent̄šanga nt̄samo ndegombre tmojuabnacá ndin̄yin̄yayēngcá. Chēnga corente jtsogusetánana ch̄e judiēngbe enefjuana yebn̄ēnguenache tsanana y tsashená tsēntsaca Bēngbe B̄etsáftaca jtsencuéntayana, chca, n̄ye ent̄šanga ch̄e soye chamuin̄yama. Ndegombre šcuayana: chēnga n̄ye morscama ya montsábouacanana, chēnga t̄šabá imojtsama ca ent̄šanga tmojayana ora.

6 Pero aca Bēngbe B̄etsáftaca jencuéntama orna, acbe tsoye cochtamáshēngo, b̄esháša cochtatame y cháftaca cochjencuénta. Chánaca ch̄e iyt̄ēmenent̄še ácaftaca echántsemna. Bēngbe Taitá lempe bomin̄ye endetsequēcná, masque cán̄yēnga šmojtsemna ora šmojtsama soyēngnaca. As Bēngbe B̄etsá,

chca cháftaca chacojtsencuénta ora, cachá acbe uacanana soye cmochántatštaye.

<sup>7</sup> “Bëngbe Bëtsáftaca šmojtsencuénta ora, ndoñe nÿe cachcá ndoservena palabrënga ba soye šmattsichamo. Chca mondbëtsama chë Bëngbe Bëtsábioye nduabuátmënga. Chënga jtsejuabnayana becá chca tmojtsichámësna, Bëngbe Bëtsá chënga más yochjóyaunaye ca.

<sup>8</sup> Ndoñe chëngcá šmattsemna. Cabá nduyana ora, Bëngbe Bëtsá ya jtsetatšëmbuana ntšamo tšëngaftanga cmojtsëjabotcá.

<sup>9</sup> Chamna tšëngaftanga mëntsá cmontsëtocana Bëngbe Bëtsáftaca jencuéntana:

Bëngbe Taitá, celoca icotsomñe.

Acbe uabaina chë más uámana uabainana chauesomñe.

<sup>10</sup> Acbe amëndayana chaóshjango.

Celoca yojtsemna ntšamo icobošcá;

quem luaríñnaca cachcá chaotsemna.

<sup>11</sup> Mënté šmiyatšatá cada te šnetsëjaboto tandëse.

<sup>12</sup> Bacna soyënga bënga fsënjama: šmotsaperdónaye;

cachcá ntšamo chë bëngbiama bacna soyënga amënga fsëndbetsaperdonaycá.

<sup>13</sup> Bacna soyënga jamama šojocochëngo ora, šcochjujabuache chca ndenobuíyama.

Nÿetsca bacna soyënguentsána šmatsebacaye.

<sup>14</sup> “Chë tšëngaftangbiama bacna soyënga amënga šmojtsaperdónasna, Bëngbe Taitá chë celoca endëtsomñá, tšëngaftanga cmochanjáperdonaye.

<sup>15</sup> Pero chë tšëngaftangbiama bacna soyënga amënga ndoñe šmotsaperdónasna, Bëngbe Taitá cachcá, tšëngaftanga ndoñe quecmochátaperdonaye ca” —Jesús tojánayana.

### *Chë Bëngbe Bëtsáftaca jencuéntama tondaye ntjascá*

<sup>16</sup> “Y nderado tšëngaftanga inÿe ora tondaye ntjascá šmojtsemna Bëngbe Bëtsáftaca jencuéntama, juebëngmënënga ndoñe šmattsemna, ntšamo chë bacna entšanga chë ndegombre tmojuabnacá ndinÿinÿnayënga mondbetsamcá, as chca, chënga imojtsayúnama entšanga chamuinÿama. Ndegombre šcuayana, chëngbe uacanana soye ya tmojóyëngacñe, chënga tmojayunáyeca entšanga tšabá chëngbiama tmojtsoyebuambná ora.

<sup>17</sup> Aca nderado tcojtsayúna ora, cochtsojuebjabebiyey aceitíyeca botamana cochtenochquëca,

<sup>18</sup> as chca, entšanga ndoñe chamondëtsetatšëmbo aca tondaye ntjascá cojtsemnama. Nÿe acbe Taitá, lempe chë mo iytëmencá yomna soyëngama tatšëmbuá, chama echántsetatšëmbo. Y cha, chë iytëmencá tcojama soye bominÿe

endbetsequëcjnaya, acbe uacanana soye cmochántatštaye ca”  
—Jesús tojánayana.

*Chë celoca bomnana*  
(Lc 12.33-34)

19 “Bomnana quem luarentše ndoñe šmattsëjuabaye. Muentšna chë mejojón y inye pochócaye soyënga lempe jtsendbiamana, chë atbëbanënga jtsamashjnana y chë juabana soyënga jesatbëbana.

20 Más tšabá tšëngaftangbiamana entsemna, mora quem luar-entše tšabe soyënga šmojtsamamna, uacanana soyënga celoca chaotsójuabaye. Chentše ni chë mejojón, ni chë inye pochócaye soyënga acbe soyënga quemochatspochóca, ni atbëbanënga quemochátamashjna jatbëbama.

21 Er chë ndayentše acbe bomnana tojtsemnentša soyëngama acbe ainánaca cochántsejuabnaye ca” —Jesús tojánayana.

*Chë cuerpama uajuinñanësha*  
(Lc 11.34-36)

22-23 “Acbe bominñe tšabá totsomñëse, mo canñe uajuinñanëshacá acbe cuerpama jtsemnana, chíyeca aca jtsobenana ntšamo tcojtsamcá chë bominñeca jtsonñayana. Chë bominñe ndoñe tšabá tontsemnëšna, chë bominñe tondaye ntsoebenana jamana, ntšamo tcojtsamcá chacobená jinñama. Cachcá, acbe ainaniñe tšabe juabnënga tcojtsebomnëse, lempe ntšamo chacojtsamcá tšabá echántsemna. Y acbe ainaniñe ndocna tšabe juabnënga tcontsebomnëšna, lempe ntšamo chacojtsamcá ndoñe tšabá queochátsmëna. Y chca, aca cochantsiyena soyënga jtsamëse mo puerte ibetiñcá ca” —Jesús tojánayana.

*Chë Bëngbe Bëtsabiamana bonshánana o chë nñe quem luarentša soyënga jtsebošana*  
(Lc 16.13)

24 “Ndocná ntsoebenana uta mandayata jtsaservénana: cánñabioye bochantsáboyënja y chë ínñabioyna bochántsebobonshana, o cánñabiamana tšabá echántsetrabajaye y chë ínñabiamna ndoñe tšabá. Ndoñe quecátobena Bëngbe Bëtsá jtsebobonshánana, nñe quem luarentša soyënga jtsebomnana yapa tcojtsebošëse ca” —Jesús tojánayana.

*Bëngbe Bëtsá chabe básenga jtsanñenana*  
(Lc 12.22-31)

25 “Chcasna atše šcuayana: Ndoñe šmattsenócochinñena ndayá šmochjase o šmochjofšiye vida jtsebomnana, ni ndaye entšayá šmochjuichëtjuama cach ndoñe. Ndegombre, vida chë sanama más enduámama y cuerpo chë entšayama más.

26 Smochjanÿe chë shloftšënga jtsongüefjnayana. Chënga tondaye ntjájena, ni jaja saná ntjátbanana, ni chë grano uaquëcñnaye yebnënguifne quemnatsquëcñná; pero Bëngbe Bëtsá, celoca endmëná, chënga saná jtsatšatnayana. ¡Y tšëngaftanga chë shloftšetëmëngbiama puerte más šmonduámana!

27 Masque chca endmëna, canÿa masque tša tojtsenócochinÿena, ¿ntšamo nanjobenaye jamana chë ntsachetšá vida yochtsebomnentšana, canÿe hora vida más jabotiyana?

28 “Y ndayá šmochjuíchëtjuama, ¿ndáyeca šmojtsenócochinÿena? Smochjinÿe chë jajañe lirio uantšefjushangá jtsajuajnana: ndoñe ntsetrabájayana, ni ntseshabiamnayana.

29 Pero atše cbëyana, ndegombre ni mo Rey Salomón nÿetsca chabe bomnánaca nÿetšá botamana mo chë lirio uantšefjushangacá quenjatspormana.

30 Bëngbe Bëtsá tša botamana shácuana tojuama, y chë shácuana mënté jajoca jtsamnana, yëfsana iñoca. Chca chë shácuana cha tojamëse, ndegombre tšëngaftangbiámñaca Bëngbe Bëtsá echanjama entšayá chašmotsábomnama, jentšanga nÿe batšá Bëngbe Bëtsábeñe ošbuáchiyënga!

31 Ndoñe šmattsenócochinÿena, mëntšá jtsichámëse: ‘¿Ndayá mochjase?’ o ‘¿Ndayá mochjofšiy?’ o ‘¿Ndayá mochtichëtjo ca?’

32 Chë soyëngama, chë Bëngbe Bëtsábioye nduabuátmënga mondbétsenocochinÿena, pero tšëngaftanga ndoñe. Tšëngaftangbe Taitá, Bëngbe Bëtsá, ndayá cmojtsëjabotama endëtatšëmbo.

33 Chíyeca, tšëngaftangna natsana šmochjshétseboše Bëngbe Bëtsá tšëngaftangbe ainaniñe chaotsemándama y lempe ntšamo cha tojamandacá šmochtsama. Chca šmojamëse, Bëngbe Bëtsá lempe ntšamo cmojtsëjabotcá cmochanjátšataye.

34 Ndoñe matenócochinÿenana ndayá yëfse yochjochnënguama. Yëfse luare cochántsebonna chë soyënga jinÿama y jamama. Cada tescama endbétsemna yapa totcá soyënga jájandmanama ca” —Jesús tojánayana.

## 7

*Ndoñe ntsichámuana chë ínÿenga tšabá o ndoñe tšabá tmonjama*

*(Lc 6.37-38, 41-42)*

1 “Ndocá ínÿengbiama šmattsichamo chë ndoñe tšabá tmontsamama. Chca, Bëngbe Bëtsá ndoñe queochátichamo tšëngaftanga ndoñe tšabá šmonjama ca.

2 Chë ntšamo tšëngaftanga ínÿengbiana šmojtsichamcá tšabá o ndoñe tšabá tmontsamama, cachcá Bëngbe Bëtsá tšëngaftangbiana chë ntšamo šmojamama echántichamo. Y ntšamo ínÿengbioye chašmojábiana, uabouana o ndoñe jabuache soyënga, cachcá Bëngbe Bëtsá tšëngaftangbioye cmochanjábiana.

3-5 “Nderado canÿa chabe bominjïñe canÿe niñëfja tojtse-bomnëse, cha ndoñe ntsoobenana chabe catšata jauyanama: ‘Acbe bominjëntšana canÿe polvështema jtsebuchjâtsëcama šmolesenciá ca’. Natsana cha bontsemna cachabe bominjëntšana chë niñëfja jtsebuchjâtsëcana tšabá jinÿama jobenayama, chabe catšatbe bominjëntša polvështema jtsebuchjâtsëcama. Cachcá entsemna acbiana, jbaena entšá chë ntšamo ndegombre tcojuabnacá ndinÿinÿayál, chë tša bacna soye cojtsama ca acbe catšata tcojauyana ora, cach aca tša bëts bacna soyënga cojtsamama ntjenojuaboycá; y chca, aca jamana canÿe bacna soye. Natsana cmontsemna chë cach aca ndoñe tšabe soyënga cojtsamama ngmënaca jshatenójuaboyana y chca amana jtsajbanana, y chentšana cocayé cochantsobena acbe catšata juajabuáchana ntšamo tšabá yomncá chaotsamama.

6 “Chë Bëngbe Bëtsabe soyëngama josértama ndëboše entšanga ndoñe šmattsabuayiyaye. Aíñese nántsemna mo chë Bëngbe Bëtsabe bëts yebnoca uátšëmbona mëntšena quešënga cuaftsëbuajocá; chorna chënga jobuértanana, jobotjajuana y jtsáshantsana. O mo chë uámana ndëtsëtémënga cotšëngbioye cuaftsëtšancá, chënga nÿe jtsebotájayana ca” —Jesús tojánayana.

*Smochjotjañe, šmochjánguango y smochjachembo*  
(Lc 11.9-13; 6.31)

7 “Smochjotjañe y Bëngbe Bëtsá cmochanjátšataye; šmochjánguango y smochanjínÿena; šmochjachembo y bëšáša cmochanjébëtafjo.

8 Er ndánaca tojtsotjanañá, jójëngacñana; y nda tojtsenguá cha, jónÿenana; y nda tojtsechembuanábioye jebiatëfjuana.

9 “¿Ndëmuanÿe boyabása tšëngaftanguentsá, canÿe tandëse chabe uaquiñá tbojtsotjanañe ora, canÿe ndëtsbé chábioye buanjatštaye?

10 ¿O canÿe mëtscuaye buanjatštaye, beona tbojtsotjanañe ora?

11 Y chca, tšëngaftanga, bacna soye amënga, tšëngaftangbe basetémënga tšabe soyënga jatšatayama šmojtsamanëse, jímás tšëngaftangbe Taitá, Bëngbe Bëtsá celoca endmëná, chë tmojtsotjanañënga tšabe soyënga echanjátšataye!

12 “Inyengaftaca šmochtsama ntšamo chë ínýenga tšëngaftangaftaca chamotsamama šmojtsebošcá. Chca endmëna ntšamo Moisesbe leyiñe y chë Bëngbe Bëtsabe juabna oyebuambnayëngbe buatëmbana soyënguñe endayancá ca” —Jesús tojánayana.

*Chë base utëntśá bësásá*  
(Lc 13.24)

13 “Chë base utëntśá bësásájana šmochjámashjna. Chë utëntśá bësásájana y chë paselo jóyename benache, infiernoye mochanjuánatse y banga chëjana mondámashjuana.

14 Chë tšabe vida binýnoye jamna base utëntśá bësásájana endmëna y ndoñe paselo jóyename benache, y chiñe báseftanga mondbínýena.

*Chë Bëngbe Bëtsabe ndoñe ndegombre juabna oyebuamb-nayënga*

(Lc 6.43-44)

15 “Cuedado šmochtsebonna chë Bëngbe Bëtsabe ndoñe ndegombre juabna oyebuambnayëngbiama. Chëngna mo oveshëngcá tšëngaftangbioye mochanjabo, pero ndegombre chënga mondmëna mo tšátjaye tjañe quešëngcá.

16 Tšëngaftanga betiyënga jtsabuatumana ntšamo cada ona tojtseshajcá; cachcá tšëngaftanga chcanga šmochantsëbuatma, ndayá chënga mochtsamama. Uchmasëshe betiyentsana ndoñe uvas ntjuátatabebiana, ni higuëbé cardo betiyentsana.

17 Chca, nyetsca tšabe betiyiñe tšabe soye jashájonana; y chë ndoñe tšabeshiñna podesca soye.

18 Canýe tšabe betiyiñe quenátopodena podesca soyënga jashájonana, ni canýe ndoñe tšabe betiyiñe tšabe soyënga jashájonana.

19 Ndaye betiye podesca shajuanëshe jtseshatëtšana y iñoye jtsatmetšana.

20 As chca tšëngaftanga chënga šmochantsëbuatma, ndayá chënga mochtsamama ca” —Jesús tojánayana.

*Bëngbe Bëtsabe amëndayoye ndoñe nyetscanga jamashjnana*  
(Lc 13.25-27)

21 “Ndoñe nyetscanga chë ‘¡Utabná! ¡Utabná ca!’ atše šmojtsatsëtsnanga, Bëngbe Bëtsabe amëndayoye quemochátamashjna. Nýe ntšamo atšbe Taitá, celoca endmëná, tojtsebošcá amëngna aíñe.

22 Quem luare jopochócama te banga atše šmochanjauyana: ‘¡Bëngbe Utabná! ¡Bëngbe Utabná! Aca jótšëmbonëse, ácbefñe betsošbuáchema, bënga fsëndoyebuambná, y ácbeyeca bacna bayëjëngbe juabna entsángbentsana fsëndëtabocana, y ácbeyeca bëts soyënga fsëndama ca.’

23 Chora atše chanjójuaye: ‘Ndocna te checbaisëbuátmana. Atšbentšana mojuánanga, bacna soye ama entšanga ca’ ” — Jesús tojánayana.

*Chë uta ucuatjoniñe*  
(Mc 1.22; Lc 6.47-49)

24 “Chcasna, nda atše šojoyeuná y chë ntšamo sentsichamcá tojtsama, endmëna mo canye tšabá juabnaye boyabasacá. Chë boyabásana ndëtsbeñe chabe yebna yojajebo.

25 Uaftena yojuáshjango, chë béjayënga yojóftjajna, chë yebnoye puerte yojtsebinýiaye, pero chë yebna ndoñe ntjuáshajayana, chë yebna ndëtsbeñe inajéboyeca.

26 Pero nda atšbe palabra tojouena y ntšamo sentsichamcá ndoñe tontsama, endmëna mo canye ndëjuabnaye boyabasacá. Chë boyabásana chabe yebna cascajuiñe yojajebo.

27 Uaftena yojuáshjango, chë béjayënga yojóftjajna, chë yebnoye puerte yojtsebinýiaye y chë yebna uabouancá yojtsáshajaye ca” —Jesús tojánayana.

28 Jesús chë soyënga jóyebuambayama tojanpochocá ora, chë entšanga ojnanánënga imojtsemna ntšamo cha tojánabuatambama.

29 Jesús tojanabuatambá nyëts obenánaca, mo canya mando bomnacá y ndoñe nyë mo chë ley abuatambayëngcá.

## 8

*Jesús, canya bacna nguayanánaca šocábioye tbojanshná*  
(Mc 1.40-45; Lc 5.12-16)

1 Jesús tjoicana tojtantsmá ora, ba entšanga tmojanasto.

2 Chora canye boyabása bacna nguayanánaca šocá Jesúsbioye tojanobeconá, chabe delante yojshamentšiye y tbojaniyana: —Utabná, aca tcojtsebošëse, catjobenaye atšbe šocana jtsebojuánana ca.

3 As Jesús tojanacuenyanëjaná, chë boyabásabioye tbojánbojajo y tbojaniyana: —Aíñe, sëntseboše. Socana cbotsebojuaná ca.

Y cachora chabe šocana tbojtsanóbojuanañe.

4 Jesús chë shnanábioye tbojaniyana: —Mouena, ndocnábeñe cattsecuëntaye; nyë chë Jerusalenoca báchnëbioye motsa, y cha cochjinýinýiye mora aca ya tšabá cojtsatsmënama. Bayá cochtsambaye, Bëngbe Bëtsá chama jëtschuayama, ntšamo Moisés tojëftsanmandacá, as chca nyëtscanga chamotatsëmbona mora aca ya ndoñe šocá contsemnama ca —Jesús tbojaniyana.

*Jesús canÿe Romano soldadëngbe amëndayabe bochich-nayábioye tbojanshná*

*(Lc 7.1-10)*

<sup>5</sup> Jesús Capernaumoye tojánamashëngo ora, canÿe Romano soldadëngbe amëndayá Jesúsbioye tojanobeconá canÿe pavorama jaimpádama.

<sup>6</sup> Jesúsbioye tbojaniyana: —Utabná, atšbe bochichnayá yebnoca šocá entsemna, jama ndoñe quenátobena y jabuache tsetšanánaca entsobësná ca.

<sup>7</sup> Chora Jesús tbojanjuá: —Cha jáshnama chanjá ca.

<sup>8</sup> As chë soldadëngbe amëndayá tbojaniyana: — Señor, atše merecido taitatobuajoñe atšbe yebnentše chacuamashënguama; nÿe mayana y atšbe bochichnayá tšabá echántatsmëna.

<sup>9</sup> Atšbioye mándayënga atše sëndábamna y átšnaca soldadëngbe amëndayá sëndmëna. Atše canÿe soldado stjauyana “motsa ca”, cha cachora jana; y inÿa stjauyana “mabo ca”, cha cachora jabana; y nderado atšbe bochichnayá ndayánaca chaomama stjamánda, chánaca cachora chë soye jamana ca — cha tojánayana.

<sup>10</sup> Jesús chca tojanuena ora, tojanenjnaná y chë ústonënga tojanëyana: —Ndegombre cbëyana, ni mo nÿets Israelentše ni canÿa quem boyabasacá Bëngbe Bëtsábeñe nÿetšá ošbuachiyá chiyátinÿena.

<sup>11</sup> Y šcuayana, shinÿe bocanoicana y shinÿe uenatjëmbambanoicana bëtscá entšanga mochanjabo, y Abraham, Isaac y Jacob, chë judiëngbe tempsca uámana bëts taitángaftaca mochanjotbiamá Bëngbe Bëtsabe amëndayoca, cánÿiñe juasama.

<sup>12</sup> Ba Israeloca entšanga, chë ndëmuanÿengbiamá Bëngbe Bëtsabe amëndayana natsana yochtsanmëna, chocana mochantëbuacana chë ndëbinÿna luaroye, infiernoye. Chentše puerte mochanjenóbošachna y chë tsetšanama juatsašënga mochantsenoftëšjojnaye ca —Jesús tojánayana.

<sup>13</sup> Chora Jesús chë soldadëngbe amëndayábioye tbojaniyana: —Ache yebnoye motsatá y chë ntšamo cojtsošbuachecá cachcá chaotsemna ca.

Cachora chë bochichnayá tšabá yojtsatsmëna.

*Jesús, Pédrëbe uambén mamábioye tbojanshná*  
*(Mc 1.29-31; Lc 4.38-39)*

<sup>14</sup> Chentšana Jesús, Pédrëbe yebnoye tojána. Chentše Pédrëbe uambén mamá šocá calentóraca yojtsejutsnajona.

<sup>15</sup> Chora Jesús chë uambén mamabe cucuatše tojánbojajo y cachora chë calentora tbojtsanóbojuanañe. Chorna



chë uambén mamá tojtantsbaná y tojanontsé chënga jobuácuedana.

*Jesús ba šoquënga tojanashná*

*(Mc 1.32-34; Lc 4.40-41)*

16 Chë te jaibétatama ora, Jesús yojtsemnoye banga bacna bayëjëngbe juabna uambaye entsanga tmojanënatse. Chora, nÿe canÿe Jesús jóyebuambayëse chë bacna bayëjënga imojt-saisebocana y nÿetsca šoquënga tojanashná.

17 Chca Jesús tojanma, cachcá chaotsemnama ntšamo chë Bëngbe Bëtsabe juabna oyebuambnayá Isaías tojanayancá. Cha mëntšá tojánayana: “Cha bëngbe šocanënga tonjaftsanca y bëngbe nÿetsca tsetšanana chábeñe tonjanoquedá ca.”

*Chë Jesús juastama bošënga*

*(Lc 9.57-62)*

18 Jesús tojánanÿe mallajta entsanga chabe šhëconana; as tojanmandá uafjajónaye chenguana jama.

19 Chorna, canÿe ley abuatambayá Jesúsbioye tbojanobobconá y tbojaniyana: —Buatëmbayá, atše sëntseboše aca juastama, ndëmoye chacojtsá choye ca.

20 As Jesús tbojaniyana: —Chë zorrënga mondbomna cuevëshënga ndayentše jtsiyenama y chë shloftšëngna uajajonëshangá, pero chë Bëngbe Bëtsá Entšá tbojanbemá ndoñe quenátsbomna ndayentše jóchnama ca.

21 Chora inÿa, cach uatsjendayënguentsá, Jesúsbioye tbojaniyana: —Bëngbe Utabná, šmolesenciá atšbe taitá chjsh-esabotbontsañe ca.

22 Chora Jesús tbojanjuá: —Nÿe šmasto. Chë Bëngbe Bëtsabiama mo obanëngcá, ntšamo Bëngbe Bëtsá yomandacá ndoñe tmontsama causa, chënga cachëngbe obanënga chamotsétebuantsañe ca.

*Jesús chë binÿia y chë béjaye bonguana yojëtsbema*

*(Mc 4.35-41; Lc 8.22-25)*

23 Chentsana Jesús canÿe barquëshoye tojánamashëngo y chabe uatsjëndayënga imojtsetjëmbambnaye.

24 Ndeolpe tša jabuache binÿia chë uafjajónaye béjayiñe yojóshjango; nÿetšá jabuachana yojtsemna, chë olëshënga barquësha imojtsétsbotsana. Y Jesús chora inétsomañe.

25 As chabe uatsjëndayënga tmojána Jesús jetsefšenama y tmojaniyana: —¡Bëngbe Utabná, šmatsebacá. Montsen-atjëmbambana ca!

26 Chora Jesús tojanëyana: —¿Ndáyeca tša šmojtsauatja? ¿Tša batšatema šmojtsošbuaché, Bëngbe Bëtsá tšëngaftanga jujuabuáchama yobenama ca?

Chca tojaněyana y tojantsbaná. Chora tojanmandá chë binÿia y chë búyeshe bonguana chaotsatsmënema, y lempe natjěmbana yojtsatsmëna.

<sup>27</sup> Chabe uatsjéndayěnga ojnanáněnga imojtsemna y mëntšá imojtsichamo: “¿Nda quem boyabása yomna? Cha tonjayana y chë binÿia y chë búyeshe tmonjoyeuná ca.”

*Chë Gadara luaroca entsata, bacna bayějbe juabna uambayata*

(Mc 5.1-20; Lc 8.26-39)

<sup>28</sup> Jesús uafjónaye chenguana tojánashjango, canÿe luare Gadara ca uabáinentše. Chorna chë utabuantsáněngbentšana útata, bayějbe juabna uambayata, tbojánbocna y Jesúsbioye tbojanobobéconata. Puerte tšatjayata ibnamna, chíyeca entsānga ndoñe ntsobenana chějana jtsachnějuanana;

<sup>29</sup> y chora tbojanontsé chë bacna bayějěngbeyeca mëntšá uayebuáchana: —¿Ndayá bēngaftaca cojtseboše, Jesús, Bēngbe Bētsabe Uaquiñá? ¿Moye tcojabo bēnga chafsufriima, chama cabá ndoñe chë tempo yontsemna ora ca?

<sup>30</sup> Chentša béconana ba cotšěnga imnajena y chěnga imnėtsosañe.

<sup>31</sup> Y chë bayějěnga Jesús tmojanimpadá: —Muentšana jésebocanama aca tcojaměse, cochjama bēnga chë cotšěngbeñe fchayamashjnama ca.

<sup>32</sup> Y Jesús tojaněyana: —Motsajna ca.

Chora chë bayějěnga chë boyabásatbentšana tmojésanbocana y chë cotšěngbeñe tmojánamashjna; cachora chë cotšěnga bat-sjocana peněšějana uafjónayoye imojtsoshbuetše y yojtsatajo.

<sup>33</sup> Chora chë cotšěnga anÿeněnga tmojtsanacheta, y chë puebloye tmojánashjajna ora, tmojanontsé lempe ntšamo yo-jochněngcá jacuéntana y ntšamo chë bayějbe juabna uambayáftaca tojanopasámnaca.

<sup>34</sup> Chora nÿetsca entsānga chë pueblentšana tmojánbocana y Jesús yojtsemnoye tmojána. Chë entsānga Jesús tmojáninÿe ora, tmojanimpadá chë luarentšana chauese bocnama.

## 9

*Jesús, canÿe jama ndobenábioye tbojanshná*

(Mc 2.1-12; Lc 5.17-26)

<sup>1</sup> Chca tojanopasá chentšana, Jesús canÿe barquěshoye tojánamashěngo, uafjónaye chenguana tojána y cachabe puebloye Capernaumoye tojtashjango.

<sup>2</sup> Chora, canÿe jama ndobená, tjuashiñe jajoná, Jesús yojtsemnoye bāsefta boyabásenga tmojanamba. Jesús tojáninÿe chěnga tša imojtsošbuáchema chë šocábioye jáshnama cha

bétsobenama; as chë šocábioye tbojanijana: “Sobreno, añemo matsca; acbe bacna soyënga tcbontseboperdoná ca.”

<sup>3</sup> Chca causa, báseftanga ley abuatambayënga chentše imojtsemnënga imojtsejuabnaye: “Chca jayanëse, ndoñe tšabá quenátichamo Bëngbe Bëtsabiama; mo chábioye cuafjoyenguangcá entsemna ca.”

<sup>4</sup> Pero Jesús yojtsetátšëmbo ntšamo chënga imojtsejuabnaycá; chíyeca tojanéyana: “¿Ndáyeca nyetsá bacna juabnënga ainaniñe šmojtsebmna ca?

<sup>5</sup> ¿Tšëngaftangbiama ndayá más paselo nántsemna tšëngaftangbe delante jayanama: ‘Acbe bacna soyënga tcbontseboperdoná’ o ‘Matëtsbaná y motsa ca’?

<sup>6</sup> Atše cbochanjínÿanÿiye ntšamo chë Bëngbe Bëtsá Entšá tbojanbemá quem luarentše mando yobomnama, entšanga bacna soyëngama jáperdonama ca” —Jesús tojanéyana.

As chë jama ndobenábioye tbojanijana: “Matëtsbaná, acbe tjuashe mesocñe y acbe yebnoye motsatoñe ca.”

<sup>7</sup> Chorna chë jama ndobená tojtantsbaná y cachabe yebnoye yojsatoñe.

<sup>8</sup> Chca tmojáninÿama chë entšanga auatjanánënga imojtsemna y Bëngbe Bëtsá imojtsatschuanaye, cha chca obenana entšanga tojánatšatama.

*Jesús, Matéobioye tbojanchembo chabuastama*  
(Mc 2.13-17; Lc 5.27-32)

<sup>9</sup> Jesús chentšana tojtsanoñe y canÿe entšábioye tbojáninÿe, Mateo ca uabainá, chë Romocama impuesto entšángbioye atjanayentše inétsofbemañe. Chora Jesús tbojanijana: “Smasto ca.” As Mateo chentšana tojëftsantsbaná y tbojanasto.

<sup>10</sup> Jesús cach Mateobe yebnentše yojtsesaye ora, banga Romocama impuesto entšángbioye atjanayënga y ínÿenga bacna soye amënga tmojánashjajna y mesëshentše Jesús y chabe uatšjëndayëngaftaca imojotbiama.

<sup>11</sup> Chë fariseunga chca tmojáninÿe ora, Jesusbe uatšjëndayëngbioye tmojanatjá: —¿Ntšamo chca yojtsemna, tšëngaftangbe buatëmbayá chë impuesto atjanayënga y bacna soye amëngaftaca entsesá ca?

<sup>12</sup> Jesús chca tojanuena y chë fariseunga tojanéyana: — Chë salud bomnënga ashnayá ndoñe ntšëjabótana, pero chë šoquënga aiñe.

<sup>13</sup> Smochjá y ntšamo ndegombre iuayancá šmochjuatsjinÿe quem Bëngbe Bëtsabe uabemana palabrenguiñe: Atše sëntseboše tšëngaftanga lastemadënga chašmotsemna, y ndoñe nÿe bayënga chašmotsëbánaye Bëngbe Bëtsá jëtschuayama ca.

Atše ndoñe chiyátabo chë Bëngbe Bëtsabe bominjïñe tšabá amënga jabáchembuama, sinó chë bacna soye amënga imomna ca juabnayënga jabáchembuama ca —Jesús tojánayana.

*Jesús tmojantjá chë Bëngbe Bëtsáftaca jencuéntama tondaye saytescama*

*(Mc 2.18-22; Lc 5.33-39)*

<sup>14</sup> Chentsana, Juan chë Ubayanabe ústonënga tmojanobconá y Jesús tmojantjá: —Bënga y chë fariseunga fsënduamana ba soye tondaye ntjascá jtsemnana, Bëngbe Bëtsáftaca jencuéntama. ¿Ndáyeca acbe uatsjëndayënga ndoñe chca ca?

<sup>15</sup> As Jesús tojanëjua: —Chë casamentoye ófjanënga chë boyabása bouamná chëngaftaca tojtsemnëntscuana, chëngbioye saná ndoñe ntsabuáshebenana y ngménaca ndoñe ntsemnëngana. Pero ora echanjobuache y chë boyabása bouamná chentsana mochantsánatseñe; chora cocayé chë ófjanënga tondaye más jasama quemochátsbomna. Ntšamo chë tojobouamá cha y chë ofjanëngaftaca endmëncá, cachcá endmëna atše y atšbe uatsjëndayëngaftacnaca.

<sup>16</sup> “Ndocná canye uatanguá entsáyá base tsëm entsëjuaca jtarmëndana. Er chë tsëm entsëjua jtsabéconana y chë uatanguá entsáyá más jtsatanëcanana, y chca chë uátanëcniñe más bëtsiñe jtsabemana.

<sup>17</sup> Y cach ndoñe chë tojtseshayana vínoye tanguá jasabenguiñe ntjataftsúamayana. Tcojuaftsuamasna, chë jasabenga jtseshébëfjuana y chë vínoye jtsabuáshanana, y chë vínoye y chë jasabenga tondayama ntjatoservénana. Chíyeca comna, chë tojtseshayana vínoyna tsëm jasabenguiñe juaftsúamana; y chca, chë jasabenga y chë vínoye jtsoservénana ca” —Jesús tojánayana.

*Jesús canye shembásabioye tbojanshná y tojanma Jairëbe be-mbetema cháuatayenama*

*(Mc 5.21-43; Lc 8.40-56)*

<sup>18</sup> Jesús entsanga yojtsëtsëntsantscuana, chë judiëngbe enefjuana yebnentša canye mandayá tojánashjango y Jesusbe shecuatšentše yojshamentšiyë. Chë mandayá tbojaniyana: “Atšbe bembe tontsóbana. Diosmanda atšbe yebnoye mabo; cochjabojajo y cha echántayena ca.”

<sup>19</sup> Chentsana Jesús y chabe uatsjëndayënga chë mandayá tmojanasto.

<sup>20-21</sup> Imojtsaye ora, canye shembása stëtšoicana Jesúsbioye yojobeconá. Bnëtsana uta uatama oboftjajuanánaca cha inapadecena. Chë šocá Jesúsbioye yojobeconá ora, yojtsejuabnaye: “Masque nÿe mo chabe entsáyá sibiájua chaijuábojajo,

salud chantinjena ca.” Chentšana chë šocá Jesusbe entšayá tojanábojajo.

<sup>22</sup> Tojanábojajo ora, Jesús tojanobuértana, chë shembásabioye tbojáninjë y tbojanijana: “Añemo matsca, shembása. Bëngbe Bëtsábeñe icošbuachéyeca, mora tšabá contsatsemëna ca.” Y cach orscana cha tšabá yojtsatsemëna.

<sup>23</sup> Chënga tmojtëtanontsé ayana y chora chë mandayábioca chënga tmojánashajna. Chentše Jesús tojánanjë, ínÿengna chë veloriamama imojtsanflautaye y ínÿengna tša imojtsošachiye.

<sup>24</sup> Chora Jesús tojanëyana: “Muentšana mobocnënga. Chë shembássetema cabá ndoñe obaná quenátsemëna; ñÿe endëtsomañe ca.”

Pero chë entšanga Jesúsbioye ñÿe imojtsáfchaye.

<sup>25</sup> Pero Jesús pronto chënga chë yebnentšana tojanëbuacna. Chora Jesús tojánamashëngo chë shembássetema yojtsemnoye; cucuatše tbojanábuacueshache y cachora chë shembássetema tojtantsbaná.

<sup>26</sup> Y ñÿets chë luarëjana ndayá Jesús yojamama ñÿetsca entšanga imojátatšëmbona.

### *Jesús uta jtanata tojanashná*

<sup>27</sup> Jesús chentšana tojëftsanbocna ora, uta jtanata tbojanasto y mëntšá ibojtsaiuáyebuache: —¡Davídbentšana Entšá, bëndata šmotsalastemá ca!

<sup>28</sup> Jesús chë yebnoye tojánamashëngo ora, chë jtanata tbojanóbobeconata. As Jesús tojanatjá: —¿Tsëndata šojtsošbuaché atše chca jamama chjobenaye ca?

Y tmojanjuá: —Arseñor. Aíñe ca.

<sup>29</sup> Chora Jesús tojánabuchbojajo y tojanëyana: —Ntšamo tsëndatbe ošbuáchijana yomncá, cachcá chaotsemna ca.

<sup>30</sup> Y cachora jinÿama ibojtsobena. Jesús bëts cá chata mëntšá tojanamëndá: —Ndocná más quem soye chaondëtsetatšëmbo ca.

<sup>31</sup> Pero chata chentšana tbojëftsanbocna y cachora tbojanontsé ndayá Jesús chátaftaca tojanmama ñÿets chë luarëjana jacúntana.

### *Jesús, canÿe ndëbiábioye tbojanshná*

<sup>32</sup> Chë jtanata ibojtsebocanëntscuana, básefta entšanga canÿe ndëbiá, bacna bayëjbe juabna uambayá, Jesúsbioye tmojanamba.

<sup>33</sup> Jesús chë bacna bayëja chábentšana tbojtanábocna y cachora chë ndëbiá tojtanontsé oyebuambnayana. Entšanga ojnanánënga imojtsichamo: “¡Ndocna te Israelentše chca bëts soye chemuáisinÿe ca!”

34 Pero chë fariseunga imojtsichamo: “Cach bacna bayëjëngbe amëndayá, Satanás, muábioye obenana tbojatštá chë bayëjënga entsángbentsána jtëbuacanama ca.”

### *Jesús entsángbiama tbojanongmé*

35 Jesús nÿetsca pueblënguëjana y luarënguëjana yojtsachnëjuana y chë judiëngbe enefjuana yebnënguenache entsanga yojtsabuátambaye. Yojanabuayiyná chë tšabe noticiënga Bëngbe Bëtsabe amëndayama, y nÿetsca šocanëngama y tsetšanama yojánashnaye.

36 Y chë entsanga tojánanyë ora, puerte tbojanongmé. Er chënga imojtsemna mo abujajënyá ndbomna oveshëngcá, puerte uamëntšnayënga ba soyëngama padecena causa, y chaujabuachama ndocná ntsebmncá.

37 Chora chabe uatsjëndayënga tojanëyana: “Canÿe bëts jajañe bëtscá játbanama entsemna, pero peonga nÿe báseftanga. Cachcá quem luarentše, bëtscá entsanga Bëngbe Bëtsábioye nduabuátmënga montsemna, y chëngbioye chabiamu abuyiynayënga nÿe báseftanga.

38 Peonga tmojtsashbenëse chë nduiñbioye jaimpádana ba peonga chauichamoma chë jaja saná játbanama. Cachcá, Bëngbe Bëtsábioye moimpadanga ba abuyiynayënga chauichamoma, quem entsanga chábioye chamúbuajama ca” —Jesús tojanëyana.

## 10

### *Jesús chë bnëtsana uta uatsjëndayënga tojanabacacá*

*(Mc 3.13-19; Lc 6.12-16)*

1 Chentšana Jesús tojánachembo chabe bnëtsana uta uatsjëndayënga, y obenana tojanatšatá bacna bayëjëngbe juabna entsángbentsána jtabocnama y nÿetsca šocanëngama y tsetšanama jashnayama.

2 Chë bnëtsana uta uatsjëndayënga mëntšá imojanabaina: chë natsaná Simón, Pedro cánaca uabainá y chabe uabentsá Andrés; Santiago y chabe uabentsá Juan, Zebedeobe uaquiñata;

3 Felipe y Bartolomé; Tomás y Mateo, chë Romocama impuesto entsángbioye atjanayá; Santiago, Alfeobe uaquiñá y Tadeo;

4 Simón, chë celote ca uabobainá y Judas Iscariote, chë uayayëngbe cucuatšíñe Jesúsbioye boshjuaná.

*Jesús, chabe bnëtsana uta uatsjëndayënga tojanichamó, Bëngbe Bëtsabe amëndayama jábuayenama*

*(Mc 6.7-13; Lc 9.1-6)*

5 Jesús chë bnëtsana uta boyabásenga tojanichamó chë tšabe noticiënga entšanga jabuátambama, y mëntšá tojanabuayená: “Chë ndoñe judiëngbeñe ndoñe šmattsana y ndaye pueblentše Samaria luaroca ndoñe šmatjéftsamashjna.

6 Nye Israeloca pueblëngoye šmochjá. Choca entšanga mo ótsena oveshëngcá montsemna, Bëngbe Bëtsábioye corente nduabuatma causa.

7 Smochjá y entšanga šmochjábuayenaye Bëngbe Bëtsabe amëndayana echanjóshjanguama.

8 Chë šoquënga šmochjáshnaye, šmochjama chë obanënga chámuatayenama, bacna nguayanánaca šoquënga šmochjáshnaye y bacna bayëjëngbe juabna entšángbentšana šmochtábocna. Chë obenana šmonjóyëngacñe tondaye ntjëtšajjuacá; cachcá, chë soyënga šmojtšamama tondaye entšanga šmattsayëngacaye.

9 “Ndoñe šmattsambaye crocénana uasnanëchiñe.

10 Ni shecnaja sanaca benachiñama, ni inye entšayá jtsenomódama, ni shecochëtjonëshënga, ni jatjonëfja, er chë tšabe trabajayá jtsomerecénana ntšamo tbojtsajabotcá jóyëngacñama.

11 “Nderado canye bëts pueblentše o base pueblentše chašmojášhjajna ora, šmochjánguango canye tšabe entšá, ínÿengbioye ndaingñayá, y chabe yebnentše šmochtsoquedañe, inye puebloye játantscuana.

12 Canye yebnoye chašmojámashjna ora, nyëtsca chentša oyenënga mëntšá šmochjácheuaye: ‘Chë bëngbe ainaniñe tšabe ebionana tšëngaftangbe ainaniñe chaotsemna ca.’

13 Chë yebnentša entšanga ainaniñe tšabe ebionana jtsebomnama merecido tmojtsebuajonëse, chë tšëngaftangbe ainaniñe tšabe ebionana chëngaftaca chaotsemna. Ndoñesna, nye cach tšëngaftangftaca chaotsomñe.

14 Y nderado canye pueblentše o bëts pueblentše chë entšanga ndoñe tmonjúbujaja y ndoñe tmonjóyaunase, chentšana šmochjésebocana y chë shecuatšentša polvëshe šmochjésenstoto. Chca, chë entšanga mochántsetatšëmbo chënga tšëngaftangftaca ndoñe tšabá tmonjamama.

15 Ndegombre šcuayana, quem luare jopochócama te, chë ndoñe chacmonjúbujaja y ndoñe chacmonjoyauná entšanga Bëngbe Bëtsá puerte jabuache echantsacastígaye, y chë bacna entšanga Sodoma y Gomorra luaroquëngna ndoñe nya nyëtšá jabuache queochatacastígaye ca” —Jesús tojánayana.

*Ntšamo chë uatsjëndayënga mochjansúfria*

16 “Smochjouena. Atše cbontsachamná mo oveshënga cuenta tjañe quešëngbeñe. Chíyeca studio bomnënga

mo mētšcuayēngcá šmochtsemna y uamanēnga mo palomatemēngcá.

17 Entšangbiamá cuedado šmochtsebomna, chēngbe pueblentša amēndayēngbe cucuatšīne tšēngaftanga cmochanjábashejuana y chēngbe enefjuana yebnēnguenache cmochanjátsetšenaye.

18 Atšbe ústonēnga bétsemnama, mandadēngbioye y reyēngbioye cmochanjunatse. Y chca, tšēngaftanga šmochanjobenaye chēngbeñe y chē ndoñe judiēngbeñe ntšamo atšbiamá šmotatšēmbcá jóyebuambayama.

19 Pero chē mandadēngbe cucuatšīne chacmojábashejuana ora, ntšamo o ndayá šmochjayanama ndoñe šmattsenócochinýena. Chca orna, Bēngbe Bētsá tšēngaftanga cmochanjabuayená ntšamo o ndayá jóyebuambayama.

20 Tšēngaftanga ndoñe chē oyebuambnayēnga quešmochátsmēna, sinó chē tšēngaftangbe Taitá, Bēngbe Bētsabe Espíritu, tšēngaftangbiajana echantsóyebuambnaye.

21 “Y canýe entšá cachabe catšátbioye uayayēngbe cucuatšīne bochanjáboshjona chamotsóbama; y canýe taitá cachabe uaquiñábioynaca. Y chē básenga chēngbe bētsétsangbe contra mochántsemna y uayayēngbe cucuatšīne mochanjábashejuana chamotsēbáyama.

22 Tšēngaftanga atšbe ústonēnga bétsemnama, nýetsca entšanga cmochantsēbuayēnja; pero nda nýets tempo átšbeñe ošbuachiyá chaotsomñá, atsbocaná echántsemna.

23 Canýe pueblentše chacmojtsēcama ora, inýe puebløye šmochtsacheta. Ndegombre cbéyana, Israelentša nýetsca pueblēngoye cabá nda ora, chē Bēngbe Bētsá Entšá tbojanbemá ya quem luaroye echanjabáshjango.

24 “Ni canýe uatsjendayá chabe buatēmbayabiamá más uamaná ntsemnana, ni chē oservená chabe nduiñbiamá más uamaná.

25 Chē uatsjendayá ya cachabe buatēmbayacá jtsemnama tojashjáchēse, ndayá más nanjátsboše. Cachcá endmēna chē oservenáftaca, cachabe nduiñcá tojtsemnēse. Atše sēndmēna mo canýe yebnentša taitacá y tšēngaftangna mo cach yebnentša basengcá. Entšanga jtsichámuana atšna Beelzebú o chē bacna bayējēngbe amēndayá tsmēna ca. ¿Ntšamo chēnga tšēngaftanga cmochtsēbobuatma ca?” —Jesús tojanéyana.

*Nda ndegombre cuantsebiauatja*  
(Lc 12.2-7)

26 “Chíyeca entšangbiamá ndoñe matauatjēngana. Chē yoiytēmena soyentšana tondaye ntjinýcá queochaisoquéda, y chē ndótatšēmbo soye, ntsotatšēmbcá queochaisoquéda.



27 Chë mora cbontsëtsësná soyënga, chë entsangbiana mo ibetiñe cuaftsemncá soyënga, tšëngaftanga šmochjama entsanga botamana chama chamotsetatšëmbuama. Y chë iyëcana cbontsëtsësná soyënga nyetsca entsanga šmochtsabuayiynaye, mo nda canye yebnentša tsbanánocana noticiënga tojtsayebuachcá.

28 Ndoñe matauatjëngana nye chë tšëngaftangbe cuerpo japochócama imobenëngbiana y ainana jtsepochoócama ndoñe ntsobenana. Más šmochtsebiauatja chë nda endobena tšëngaftangbe cuerpo y tšëngaftangbe ainana jtsepochoócama, nyetsca tescama infiernoca.

29 “Uta jaja shloftsetémata nye canye denario crocenánama mondbétsena. Masque chca, ni cányetema obanatema fshantsoye jotsatšana, tšëngaftangbe Taitá, Bëngbe Bëtsá ndoñe tontsebošëse.

30 Y tšëngaftangbiana, Bëngbe Bëtsá botamana jtsantješnana, y chca, cha lempe tšëngaftangbiana jtsetatšëmbuana, bueta stjënashënga tšëngaftangbe bestšašiñe yomnámna.

31 Chiyeca ndoñe matauatjëngana, tšëngaftanga ba jaja shloftsetëmëngbiana corente más šmonduámana ca” —Jesús tojánayana.

*Ndabiana Jesucristo yochjayana chabe entsá yomna ca*  
(Lc 12.8-9)

32 “Nda atšbe entsá yomna ca entsangbe delante tojyanabiama, átsnaca, atšbe Taitá, chë celoca endmënabe delante chanjayana cha atšbe entsá yomna ca.

33 Pero nda entsangbe delante atšbe entsá ndoñe yondmëna ca tojyanabiama, átsnaca, atšbe Taitá, chë celoca endmënabe delante chanjayana cha atšbe entsá ndoñe yondmëna ca” —Jesús tojanëyana.

*Jesusbe causa, entsángbeñe más jtsentsjanayana*  
(Lc 12.51-53; 14.26-27)

34 “Ndoñe šmattsejuabnaye atšbe quem luaroye tijabo nyetsca entsanga natjëmbana chamotsiyenama. Atšbe chama ndoñe chiyátabo; atšbe sënjabo causa, entsanga más mochántsejtsjanaye.

35 Atšbe sënjabo chë uaquiñá cachabe taitabe contra chaotsemnana, chë bembe cachabe mamabe contra y chë bebin-cuá chabe uambén mamabe contra chaotsemnana.

36 Y chca, ba entsangbe uayayënga cachëngbe pamíllanga mochántsemna.

37 “Nda cachabe taitá o mamábioye atšbiana más tbojtsebobonshánëse, cha ndoñe ntsomerecénana atšbe entsá jtsemnana. Nda cachabe uaquiñá o bémbëbioye atšbiana más tbojtsebobonshánëse, cha cach ndoñe.

38 Y nda nÿetsca chabe quem luare soyënga ndoñe tonjëseboshjona atše juastama, y atšbiamá jasúfriama ndoñe tontseprontana y cruciñe jobanámnaca, cha ndoñe ntsomerecénana atšbe entšá jtsemnama.

39 Nda tojtsentšena quem luarentše bëtscá soyënga jtse-bomnama y atšbiamá jasúfriama ndoñe tontseprontana, chë nÿetsca tescama yomna tšabe vida echanjobuetše. Pero nda quem luarentša soyënga cachcá tojesonÿá atše juastama, masque chaóbana, chë nÿetsca tescama yomna tšabe vida echántsebomna ca” —Jesús tojánayana.

*Chë uacanana soyënga*

*(Mc 9.41)*

40 “Nda tšëngaftanga chacmojúbuaja, átšnaca cha sochanjofja; y nda atše chašojofja, chë nda šojichmóbioynaca cha bochanjofja.

41 Nda canÿe Bëngbe Bëtsabe juabna oyebuambnayábioye tbojoyeuná, cha chca bëtsemnama, chábioye Bëngbe Bëtsá canÿe uacanana soye bochántatšetaye, mo cach Bëngbe Bëtsabe juabna oyebuambnayabe uacanana soycá. Y nda canÿe nÿetsca soyënguñe tšabá amábioye tbojofja, cha chca uamanama, chábioye Bëngbe Bëtsá canÿe uacanana soye bochántatšetaye, mo cach nÿetsca soyënguñe tšabá amabe uacanana soycá.

42 Y ndánaca, tšëngaftanguentšá canÿe nduamanábioye masque nÿe mo base búyesh tema tbojuabuatšetá, atšbe ustoná bëtsemnayeca, ndegombre Bëngbe Bëtsá canÿe uacanana soye chábioye bochántatšetaye ca” —Jesús tojánayana.

## 11

*Juan chë Ubayanabe ichmónënga*

*(Lc 7.18-35)*

1 Jesús tojanpochocá chabe bnëtsana uta uatsjëndayënga jábuayenama, y chentšana tojtsanoñe chë luariñe pueblënguenache oyena entšanga Bëngbe Bëtsabe palabra jabuátambama y jábuayenama.

2 Chë tempo Juan chë Ubayaná cárceloye tmojanëtame. Choca cha yojouena ndayá Jesús yojtsamama. Y as, Jesús yojtsemnoye, básefta chabe ústonënga tojanichamó,

3 mëntšá jatjayama: —¿Aca ndegombre cojtsemna chë jabama ibojanmëná, chë Uámána Uabuayaná, o šojtsamna ínÿabiamá jatobátmama ca?

4 Chca tmojantjá orna, Jesús tojanëjua: —Smochjá y Juan šmochjauyana ntšamo šmojouena y šmojinÿcá.

5 Cha šmochjacuénta: Chë jtanënga tšabá entsatëbinÿna, chë coshetënga tšabá montsatana, chë bacna nguayanánaca

šoquënga shnánënga montsatsmëna y chë tësmënga montsue-nana, chë obanënga tmontayena y chë ndbomnëjëmëngbioye chë tšabe noticiënga montsabuaiyná ca.

<sup>6</sup> ¡Puerte oyejuayá chaotsemna chë nda atše bacna soye ndoñe stsama ca jtsejuabnayëse, átšbeñe ošbuáchiyana ndoñe tontsajbaná cha ca! —Jesús tojanëyana.

<sup>7</sup> Chënga tmojtsatanoñe ora, Jesús tojanontsé Juanbiamá chë entšanga jáuyanana, mëntšá: “Juan jinýama šmojánbocana ora, ¿ndayá jinýama chë entšanga ndoyena luaroye šmojánbocana? ¿Canýe entšá ainaniñe tondaye añemo ndbomná, mo canýe šëše bínýiaca shatiyeynëšcá?

<sup>8</sup> Y ndoñese, ¿ndayá jinýama choye šmojánbocana? ¿Canýe boyabása uámana entšayaca bopormaná? Ndoñe. Tšëngaftanga šmondétatsëmbo chë boyabásenga uámana entšayaca bopormánëngna chë mándayëngbe yebnënguiñe mondbétsiyenama.

<sup>9</sup> Y asna, ¿ndayama choye šmojánbocana? ¿Canýe Bëngbe Bëtsabe juabna oyebuambnayá jinýama? Ndegombre, aíñe; y cbëyana, ndegombre cha canýe Bëngbe Bëtsabe juabna oye-buambnayabiamá más bëtsá endmëna.

<sup>10</sup> Cha, Juan, endmëna ndabiamá Bëngbe Bëtsá chabe uabe-mana palabrenguiñe tojánayana mo chabe ichmonacá, mëntšá tojánayana ora:

Cristo, atšbe entšá natsana sënjichmó acbiamá  
chaóyebuambama,

entšanga jábuayenama aca jabama ainaniñe tšabe  
juabnëngaca chamotseprontánama ca.

<sup>11</sup> Ndegombre cbëyana: Nýets tempo entšángbeñe, ndocná quenátsmëna Juan chë Ubayanabiamá más bëtsá; masque chca, Bëngbe Bëtsabe amëndayoca chë más batšá uamaná, más bëtsá echántsemna ntšamo mora Juan yomnama.

<sup>12</sup> “Juan chë Ubayaná tojánabo orscana mëntscoñama, bëtscá entšanga tša mondboše Bëngbe Bëtsabe amëndayoye jamashënguama, y chë Bëngbe Bëtsabe amëndayama con-tra imomnëngna, chëngbe nýets añémoca montseboše chë mándayana jtsepochócama.

<sup>13</sup> Juan candabëntscuana, nýetsca Bëngbe Bëtsabe juabna oyebuambnayënga y Moisesbe Ley nýe Bëngbe Bëtsabe amëndayama tmonjanobuambá.

<sup>14</sup> Y tšëngaftanga chë soyënga jóyëngacñama šmojtsebošëse, Juan entsemna chë Bëngbe Bëtsabe juabna oyebuambnayá Eliascá, chë jabama ibojamná.

<sup>15</sup> Chë joudenama tmojtsobenënga, chamouena ca” —Jesús tojánayana.

16 Měntšánaca Jesús tojánayana: “¿Ndayacá morsca entsānga imomna? Chēnga mondmēna mo chē plazēngoca mondbetsetbiámana basetemēngcá; chēnga chēngbe enutēngbioye jt-sayebuáchana

17 y mēntšá jtsichámuana: ‘Tšēngaftangbiana fsēnjaflautá y ndoñe chešmatslantsá; ngmēnaca fsēnjaversiá y ndoñe chešmatošachna ca.’

18 Juan tonjánabo, y bētscá entsāngbeñe ndoñe quenjata-mana ni jasana, ni jofšiyana, y entsānga montsanichamo chana bacna bayējbe juabna uambayá yojamna ca.

19 Morna, chē Bēngbe Bētsá Entšá tbojanbemá tonjabo, y chana aīñe entsamana bētscá entsāngbeñe jtseyayana y jtsofšēšnayana, y entsānga montsichamo chana yapa uasayá y vínoye tmoyá entsemna ca y Romocama impuesto entsāngbioye atjanayēnga y bacna soye amēngbe amigo ca. Pero Bēngbe Bētsá endbētsinŷanŷnaye cha nŷets osertánana bomná yomnama, chē ndayá cha tojama ora ndayá chentšana tojóbcna soyēngaca ca” —Jesús tojánayana.

### *Chē nduauenana entsānga*

*(Lc 10.13-15)*

20 Chentšana Jesús tojanontšé jucacánana chē entsānga, ndēmuanŷenga imojoyena chē pueblēnguiñe ndayenache ba chabe bēts soyēnga tojanma, chēnga bacna soyēnga amana ndoñe tmontsanajbanama y Bēngbe Bētsabe benache ndoñe tmontanishachama. Mēntšá yojtsichamo:

21 “¡Tša lastema, Corazín puebloca entsāngbiana! ¡Tša lastema, Betsaida puebloca entsāngbiámna! Chē chentše sēnjama bēts soyēnga, Tiro y Sidón bēts pueblēnguentše matēnjochnēnguse, chentša bacna entsānga ya tempo ngmēnaca matmētenojuabó chēngbe bacna soyēngama y Bēngbe Bētsabe benache matmēntishache; y chca tmojamama chaotsótatsēmbuama uajojēsha entsayangaca matmēntopormanga y chēngbe bestšašīñe jatinyá matmēnjenotbótoto.

22 Pero ndegombre cbēyana, ntšamo entsānga tmojamama, tšabá o ndoñe tšabá bētsemnama jayanama chaojobuache ora, tšēngaftanga más bēts castigo šmochántsebmna, chē Tiro y Sidonoca bacna entsāngbe castiguama.

23 Y tšēngaftanga, Capernaumoca entsānga, ¿šmojtsejuabná celóntscoca atsebánanēnga šmochtsemna ca? ¡Chē uabouana infernoye cmochantsēsetjango! Chē muentše sēnjama bēts soyēnga Sodomoca matēnjochnēnguse, choca entsānga ya tempo ngmēnaca chēngbe bacna soyēngama matmētenojuabó y Bēngbe Bētsabe benache matmēntishache, y chē bēts pueblo cabá cachcá mēntscuana mantsomñe.

24 Pero ndegombre cbëyana, quem luare jopochócama te, Bëngbe Bëtsá puerte jabuache cmochantsacastígaye, y chë Sodoma luaroca entsángbioye ndoñe nÿetsá jabuache quemochatacastígaye ca” —Jesús tojánayana.

*“Atsbioye mabënga y smochjóchna”*

*(Lc 10.21-22)*

25 Chë tempo, Jesús tojánayana: “Atše cbatschuá, Taita, ce-  
loca y quem luarentša Utabná. Aca, chë nÿe batsá tatsëmbënga  
tcojanÿanÿé, chë tša tatsëmbënga y osertánëngbiama tco-  
jaiytëme soyënga.

26 Aíñe, chama cbontsadorana, Taita, chca chaotsemnama  
tcojábosenayeca.

27 “Atsbe Taitá lempe chca šonjatštá. Chë Uaquiñábioye  
ndocná corente quebnatábuatma; nÿe chë Taitá aíñe. Y  
chë Taitábioye ndocná corente quebnatábuatma; nÿe chë  
Uaquiñá aíñe, y ndábioye chë Uaquiñá tojtseboše nda  
chë Taitá yomnama jinÿanÿiyama, chánaca chë Taitábioye  
bochantsábuatma.

28 “Atsbioye mabënga nÿetsca tsëngaftanga uamëntšnayënga  
y bëtscá trabajo uangménënga, y atše chanjama tsëngaftanga  
chašmochnama.

29 Ntšamo canÿe entsá, uacná yuguëšiñe juabatsëcana  
juanatsama, cachcá, tsëngaftanga atše smochjaleséncia job-  
natsayama y jabuátambama. Atsbentsana smochjuatsjinÿe:  
atše uantado mëná sëndmëna y ndoñe quetsatamana  
yapa uamaná jatenobiamnayana. Y chca, tsábá jóchnama  
smochantsobena y ainaniñe más añemo smochántsebozna.

30 Mo canÿe uacnacá, ndoñe tishuta yuguëšeca o  
ndoñe uauta uasmanëshaca, paselo jama jobenayana,  
cachcá tsëngaftanga smochántsemna atše cbojtsabnatsana  
y cbojtsabuátambase; y chca, tsëngaftanga más oyejuayënga  
smochántsemna y más paselo nÿetsca soyënga jamama  
echántsemna ca” —Jesús tojánayana.

## 12

*Jesube uatsjéndayënga ochnayté trigo tmojanátabebe*

*(Mc 2.23-28; Lc 6.1-5)*

1 Chë tempo, Jesús canÿe ochnayté canÿe jajajana yojt-  
sachñëjuana. Chabe uatsjéndayëngna shëntseca imojtsemna,  
chíyeca tmojanontsé trigo juatabebiana y chë meshënga  
jasana.

2 Chë fariseunga chca tmojáninÿe ora, Jesús tmojanianayana: —  
Minÿe, acbe uatsjéndayënga canÿe soye montsama y chë soye  
ochnayté jamama ndoñe quenátslesenciana ca.

<sup>3</sup> As Jesús tojanéyana: —¿Ndoñe šmëndualía y šmondétatšëmbo ndayá David y chabe enutënga tmojanmama, shëntseca imojtsemna ora?

<sup>4</sup> Chca orna, David, Bëngbe Bëtsabe bëts yebnoye yojámashëngo y chë Bëngbe Bëtsá chentše yojamnama inýinýnaye tandëšënga yojase. Chë tandëse nýe ndánaca jasama ndoñe yonjalesenciana, ni Davidbiana, ni chabe enutëngbiana. Nýe bachnangbiana belesenciana chë tandëse jasama. Masque David chca tojanma, Bëngbe Bëtsá chora ndoñe tonjánayana David canýe bacna soye tojanma ca.

<sup>5</sup> ¿O ndoñe šmëndualía y šmondétatšëmbo, Moisesbe leyiñe, chë bachnanga ochnayté Bëngbe Bëtsabe bëts yebnentše jtsetrabájayana, pero ndoñe bacna soye ntsemnana chë bachnanga ochnayté ndoñe mondbóchnama?

<sup>6</sup> Y atše šcuayana: Muentše canýa entsemna, cha chë Bëngbe Bëtsabe bëts yebnentša bachnangbiana más uamaná endmëna y chabe amëndayoca soyënga más entsámána chë bachnangbe mándayentša soyëngama.

<sup>7</sup> Bëngbe Bëtsabe uabemana palabrenguiñe mëntšá en-dayana:

Atše sëntseboše tšëngaftanga lastemadënga chašmotsemna, y ndoñe nýe bayënga chašmotsëbánaye Bëngbe Bëtsá jëtschuayama ca.

Ntšamo chiñe entsayancá ndegombre cmojtsësertánëse, tšëngaftanga ndoñe chëngbe contra šmattsichamo, chë ochnayté chca tmojtsamëngbiana.

<sup>8</sup> Chë Bëngbe Bëtsá Entšá tbojanbemá, chë entšá ochnayté tojtsama sóynaca jtsemándayana ca —Jesús tojánayana.

*Chë buashana cucuatše bomna entšá*  
(Mc 3.1-6; Lc 6.6-11)

<sup>9</sup> Chentšana Jesús tojtsanoñe y chentša judiëngbe enefjuana yebnoye tojánamashëngo.

<sup>10</sup> Chentše yojtsemna canýe boyabása buashana buacuatše bomná. Chë fariseunga imojtsenguaye ndayánaca, as chca chënga jtsebomnama ndaye sóyeca Jesús mal jaquédama. Chcasna, chora chënga Jesús tmojantjá: —¿Queojtselesenciana canýe ochnayté šocá jáshnama ca?

<sup>11</sup> Y Jesús tojanëjua: —¿Nda tšëngaftanguentšá, canýe oveshá tbojtsebomna y nýa chë ochnayté canýe fshantsentše atëfjnoye chë oveshá tojtsótsatše, chora chë boyabása nanjá o ndoñe chë oveshá jatábocnama?

<sup>12</sup> ¡Entšá oveshabiana puerta más uamaná endmëna! Chcasna, entselesenciana chë ochnayté tšabe soye jamama ca —Jesús tojanéyana.

13 Chora Jesús chë buashana buacuatše bomnábioye tbojanianana: “Macuenyanëjaná ca.” Y chë boyabásana tojanacuenyanëjaná y chora chëtša tšabá yojtsatamna mo cach inyetsacá.

14 Pero chë fariseunga tmojésanbocana ora, tmojanontsé juabnayana ntšamo jamëse Jesús jóbama.

*Ndayá chë Bëngbe Bëtsabe juabna oyebuambnayá Jesus-biama tojánayana*

15 Jesús chë soye tojántatsëmbona ora, chentšana tojtsanoñe y ba entsanga tmojanasto. Nyetsca šoquënga tojanashná,

16 y tojanamëndá chabiama entsángbeñe ndoñe chamondëtsóyebuambnama.

17 Chca tojanamëndá, cachcá chaotsemnama ntšamo chë Bëngbe Bëtsabe juabna oyebuambnayá Isaías tojanayancá. Cha mëntšá tojánayana:

18 Muentše atšbe oservená entsemna. Atše cha sënjabocacá, atšbe bonshaná, y atše corente chabiama sëntsoyejuá.

Atše chanjama atšbe Espíritu chabe ainaniñe chaotsemnama y entsanga echanjabuayená, Bëngbe Bëtsá nyetsca luarënguentsana entsangbiama yochjayanama chënga tšabá o ndoñe tšabá tmonjamama.

19 Cha ndoñe queochátayajuatsana, ni queochátschembumbuana. Chabe oyebuambnayana tsáshenañe ndocná queochatuena.

20 Mo nda chë atcana šëse ndoñe más jatsndbemana, chë ndobenënga cha ndoñe queochátapochocaye.

Mo nda chë quinýenëfjua nýe uabojátšena uajuinýnëfjua ndoñe ntsafsanana,

chë Bëngbe Bëtsabeñe jtšošbuáchiyama imojtsebojátšangbe obatmanana chábeñe, cha ndoñe queochátabuajuanaye.

Cha nyets añémoca echanjëftsetrabája, entsanga chëngbe ainaniñe Bëngbe Bëtsabe ndegombre soyënga chamóyëngacñëntscuana.

21 Y nyetsca luarënguentsana entsanga chábeñe mochantsobátmana ca —cha tojánayana.

*Fariseunga tmojánayana Jesús Satanásbentsana obenana tojanóyëngacñe ca*

*(Mc 3.20-30; Lc 11.14-23; 12.10)*

22 Chora, Jesús yojtsemnoye canýe boyabása jtaná y ndëbiá tmojanánatse. Chana bacna bayëjbe juabna uambayá inamna; y Jesús chábioye tbojanshná, chabuatabinýnama y chabuatauénama.

23 Y nyetsca entsanga ojnanánënga imojtsichamo: “¿Mua yojtsemna chë Davídbentsana Uámana Entšá, chë Cristo ca?”

24 Pero chë fariseunga chca tmojanuena ora, imojtsichamo: “Beelzebú, cach Satanás, chë bacna bayëjëngbe amëndayá,

quem boyabásabioye obenana tbojatstá chë bayëjënga chau-atëbuacnama ca.”

25 Y Jesús yojtsetátësëmbo ntšamo chënga imojtsejuab-nayama; as tojanëyana: “Canë amëndayentše entsänga tmojtsenojatá y tmojtšenáyase, cachënga jenpochócana. Cachcá, canë bëts pueblentša entsänga o canë yebnentša pamíllanga tmojtsenojatá y ndoñe tmontsenëyeunanëse, chënga ndoñe tšabá nÿets tempo quemochátsmëna.

26 Cachcá, Satanás cachabe bayëjënga jtëbuacnama tojtse-bošëse, chana tojtsenojatá y cachabe contra yojtsemna. Y chca, ¿ntšamo nantsobena chabe mándayana quem luarentše jëftsebomnana?

27 Tšëngaftanga šmontsichamo atše Beelzebube obenánaca chë bayëjënga stsatëbuacana ca; pero chca ndegombre tojtsemnëse, ¿ndábeyeca tšëngaftangbe usetonënga obenana imojtse-bomna chë bacna bayëjënga jtëbuacnama? Chíyecna, chënga montsinÿinÿná ntšamo ndegombre yomnana y tšëngaftanga ndoñe ndegombre soye šmontsichámuama.

28 Y atšna, chë Bëngbe Bëtsabe Espíritbeyeca chë bayëjënga entsängbentšana sëndëtëbuacana; y chë soye entsinÿinÿná Bëngbe Bëtsabe amëndayana tšëngaftangbioye tojóshjanguama.

29 “¿Ntšamo nda nanjobenaye canë corente añemo bomna entsabe yebnoye jamashënguana y chabe soyënga jtsebo-cana, ndoñe natsana chábioye tconjshétsebatsëquëse? Nÿe tcojshétsebatsëquësna aíñe cuanjobenaye cha jefcana. Atše ya chca Satanásoftaca sënjama.

30 “Nda ndoñe átšeftaca tontsemná, atšbe uayayá jtsemnana. Ynda átšeftaca ndoñe tontsetrabája, chana atšbe contra jtsetrabájayana.

31 “Chíyecna chëyana, Bëngbe Bëtsá entsänga echanjáperdonaye nÿetsca chëngbe bacna soyënga y chë Bëngbe Bëtsabiama puerte bacá oyebuambnayana, mo chábioye cuafjoyenguangcá; pero ndoñe queochátaperdonaye chë Uámana Espíritbiama puerte bacá ichámënga.

32 Bëngbe Bëtsá bochanjaperdóna chë Cha Entšá tbojanbemabiama ndoñe tšabá ichamuábioye; pero chë Uámana Espíritbiama ndoñe tšabá ichamuábioyna, ni quem luarentše, ni ndocna te quebochatsperdóna ca” —Jesús tojánayana.

*Tšabe betiye o ndoñe tšabe betiye tondmënama, jtsoatšëmbuana ntšamo tojashajoncá*

*(Lc 6.43-45)*

33 “Canë betiye tšabá mobocuedanga y botamana echan-jashájona; ndoñe tšabá matscuedánana y tšabe shajuana ndoñe queochátbomna. Chë betiye tšabe betiye o ndoñe tšabe



betiye tondmënama, jtsotatšëmbuana ntšamo chëshe tojasha-joncá.

34 ¡Mëtscuaye entšanga! ¿Ntšamo šmattsobena tšabe soyëngama jtsóyebuambnayana, cach tšëngaftanga bacna entšanga šmojtsemnëse? Er ndayá ainanoca becá tomnama entšá jtsóyebuambnayana.

35 Chë tšabe entšá, chë ainanoca tšabe juabnënga bomnentsana jtsóyebuambnayana, y chë bacna entšana chë ainanoca bacna juabnënga tobomnentsana jtsóyebuambnayana.

36 Y ndegombre cbëyana, chë entšangbiana tšabá o ndoñe tšabá tmonjamama jayanama tempo chaojobuache ora, ndaye ndoservena palabra šmojóyebuambama, Bëngbe Bëtsabe delante šmochanjayana ndáyeca chca ca.

37 Er ntšamo tcojtsóyebuambnama Bëngbe Bëtsá echanjayana tšabá o ndoñe tšabá tconjamama, y cmochanjauyana aíñe o ndoñe cmontsemna castiganá jtsemnana ca” —Jesús tojánayana.

*Chë bacna entšanga Jesús tmojanimpadá canye bëts soye chaoma, chabe obenana jinÿama*

*(Lc 11.29-32)*

38 Chentsana, básefta fariseunga y Moisesbe ley abuátambayënga Jesús tmojantjá: —Buatëmbayá, bënga fsëntseboše aca canye bëts soye chacoma, acbe obenana chašcuinÿanÿema ca.

39 As Jesús tojanëjua: —Quem puerte bacna entšanga y ndošbuáchiyënga montseboše atše canye bëts soye chaima, atšbe obenana jinÿanÿiyama; pero chca soye ndoñe quemochátinÿe, sinó nÿe chë ndayá yomna mo chë Bëngbe Bëtsabe juabna oyebuambnayá Jonásoftaca tojanopasá soycá.

40 Ntšamo Jonás unga te y unga ibeta chë bëts beonbe uafsbioye yojëftsemncá, cachcá chë Bëngbe Bëtsá Entšá tbojanbemá unga te y unga ibeta fshantse jashenoye echanjëftsemna.

41 Morsca entšanga tšabá o ndoñe tšabá tmonjamama Bëngbe Bëtsá yochjayana te, Nínive bëts puebloca entšanga mochanjotsaye y morsca entšangbiana mochanjayana ndoñe tšabá tmonjama ca; er chënga, Jonás vojtsabuayiynaye ora, tmojanoyeuná y chë tšabe benache tmojtanishache, y chë mora muentše entsemnana, Jonasbiana más uamaná endmëna.

42 Morsca entšanga tšabá o ndoñe tšabá tmonjamama Bëngbe Bëtsá yochjayana te, chë Sur luaroca reinánaca echanjotsaye y morsca entšangbiana echanjayana ndoñe tšabá tmonjama ca; er chana chë quem luare iuajbana luarëngocana

tojánabo Salomonbe osertanánaca palabrënga jouenama, y chë mora muentše entsemnana, Salomonbiama más uamaná endmëna ca —Jesús tojánayana.

*Ndayá inopása chë bacna entsángaftaca  
(Lc 11.24-26)*

<sup>43</sup> Jesús mëntsánaca tojánayana: “Canÿe bacna bayëja canÿe entsábentsana tojësebocna ora, chë bayëjna bojojo luarënguenache jtsanana ndayentše jóchnama onguayinë, y canÿe luare ndoñe tonjínÿena ora cha jenójuaboyana:

<sup>44</sup> ‘Atšbe oyenoye, chë ndayentsana sënjëftsebocnoye chanjeshëcona ca’. Y choye tojtashjango orna, jinÿenana lempe tšabá cha jtesamashënguama, mo chentše ndocná tontsiyencá, tsajjniñe y lempe botamaniñe cuaftsemncá.

<sup>45</sup> Chorna chë bayëjna jana y inÿe canÿsëfta bayëjenga chabiama más opëjenga jobiatšana y nÿetscanga choye jamashjnana chë boyabásabeñe joyénanama. Y chca, chë boyabása temp-scama más bacna entsá jtsemnana, chora chë natsanama más bayëjenga abamna causa. Morsca puerte bacna entsángaftaca cachcá echanjochnëngo ca” —Jesús tojánayana.

*Chë Jesusbe ndegombre pamillanguentsënga  
(Mc 3.31-35; Lc 8.19-21)*

<sup>46</sup> Jesús cabá entsanga yojtsëtsëtsnaye ora, chabe mamá y catšátanga tmojánashjajna y imojtseboše Jesúseftaca jóyebuambayama. Nÿe shjoca imojtsemna;

<sup>47</sup> asna, canÿe boyabása Jesúsbioye tbojanbuayená: —Acbe mamá y acbe catšátanga shjoca montsemna y montseboše ácaftaca jóyebuambayama ca.

<sup>48</sup> Pero Jesús chë jauenayama tojánabioye tbojanianya: —¿Nda atšbe mamá yomna, y ndëmuanÿenga atšbe catšátanga ca?

<sup>49</sup> Y cachora chabe cucuatše tojanatsbaná, chabe uatsjëndayënga tojanëñyanÿé y tojánayana: —Quemënga montsemna mo atšbe mamacá y mo atšbe catšatangcá.

<sup>50</sup> Er ndánaca, ntšamo atšbe Taitá, celoca endmëná yobošcá tojtsama, jtsemnana atšbe catšata, atšbe uabena y atšbe mamá, atšbe ndegombre pamillanguentsá ca —Jesús tojánayana.

## 13

*Chë jenabe cuento  
(Mc 4.1-9; Lc 8.4-8)*

<sup>1</sup> Cach te, Jesús yebnentsana tojëftsanbocna y uafjajónaye tsachoca tojanótbema.

<sup>2</sup> Mallajta entšanga choye tmojanobeconá; as Jesús, chë uafjajónayentše yojanamna canýe barquëshoye tojánasëngo, tojanótbema; y chë entšangna tsachoca imojtsemna.

<sup>3</sup> Chorna ba soyëngama cuentëngaca chënga tojanabu-atambá.

Mëntšá tojanëyana: “Canýe jená chë jénaye jaujquëshama vojéftsebocna.

<sup>4</sup> Yojtsëjquëshaye orna, básefta jénaye benache juachañe yojuatquécjana, pero chë jaja shloftšënga imojástjajna y lempe imojtsósañe.

<sup>5</sup> Inýe meshëngna ndëtsbenguiñe yojuatquécjana, ndoñe yapa fshantse binýnentše. Chiñna betscó yojuábocna, fshantse ndoñe jashenocana yonjanmëna causa,

<sup>6</sup> pero shinýe yojábocna ora, puerte yojojënyána y yojt-sancta; y yojtsábojo, bëtscá tbëtëjënga tondaye causa.

<sup>7</sup> Inýe meshëngna uchmëshangañe yojuatquécjana, y chë uchmëshangá yojuájua orna, lempe yojtsatscué.

<sup>8</sup> Y inýe meshëngna, uanguanëshiñe yojuatquécjana y puerte botamana chiñe yojuashajo: ínýenache nýe canýe jénayentšana mo patse meshënga yojuashájona, ínýeñna mo chnënguana bnëtsana meshe y ínýeñna mo unga bnëtsana meshe.”

<sup>9</sup> Jesús chca jacuéntama tojanpochocá ora, mëntšá tojánayana: “Chë jouenama tmojtsobenënga, šmochjouena ca.”

*Ndáyeca Jesús cuentëngaca yojánabuatambaye  
(Mc 4.10-12; Lc 8.9-10)*

<sup>10</sup> Chora chë uatsjëndayënga tmojanobeconá y Jesús tmojan-tjá: —¿Ndáyeca entšanga cuentëngaca cojtsabuatambá ca?

<sup>11</sup> As Jesús tojanëjua: —Bëngbe Bëtsá tšëngaftanga cmontsinýanýná nýetsca chë mo iytëmencá yomna soyënga chabe amëndayama, pero chë ínýengbioyna ndoñe.

<sup>12</sup> Nda tojtsebomnábioye más jatštayana y chca cha corente bëtscá jtsebomnana; pero chë tondaye tondbomnábioyna, chë batšatema tobomna sóynaca mochántseboca.

<sup>13</sup> Chíyeca atše cuentëngaca chënga sëntsëtsëtsná. Chca, masque corente chamotsafšna, ndoñe chamondobená Bëngbe Bëtsabe soyënga jinýama; y masque becá chë soyënga chamouena, ndoñe tšabá quemochátuenana, ni queochátësertana.

<sup>14</sup> Chcáyecna, chëngbeñe entsemna cachcá ntšamo chë Bëngbe Bëtsabe juabna oyebuambnayá Isaías tojanayancá:

Masque becá chamouena, ndoñe queochátësertana.

Masque puerte chamotsantješna, ndoñe quemochátinýe

15 Quem entšanga ndoñe quemátsboše botamana jajuaboyana;

chënga uamatsáchtoneŋga montsemna

y chëngbe bomínŷnaca cachcá.

Chca ndóñesna, chënga muantsobena jinŷama, jouenama y ainaniñe josértama;

y chca, chënga bacna soyënga amana muantsajbaná y atšbe benache muantishache,

as atše chënga chayatsebacama ca —cha tojéftsanbema.

16 “Tšëngaftangna oyejuayënga šmochanjoyena, er šmondobomna bominŷe y matscuašënga Bëngbe Bëtsabe soyënga jinŷama y jouenama.

17 Ndegombre cbëyana, banga Bëngbe Bëtsabe juabna oyebuambnayënga y nŷetsca soyënguiñe tšabá amënga tmonjánbošena chë tšëngaftanga šmontsonŷá soyënga jinŷama, y ndoñe chemátaninŷe; tmonjánbošena chë tšëngaftanga šmontsuenana soyënga jouenama, y ndoñe chemátanuena ca” —Jesús tojanëyana.

*Jesús chë jenabe cuentama tojanabuayená*

*(Mc 4.13-20; Lc 8.11-15)*

18 “Chcasna, oído šmochjajajo; chë jenabe cuento mëntšá endayana:

19 Chë Bëngbe Bëtsabe amëndayama tmojouena y ndoñe tontsésertana entšanga mondmëna mo chë benache juachañe yojuatquécjana jenaycá; Satanás jabana Bëngbe Bëtsabe palabra chëngbe ainanentšana jabétsabuajuanama, chënga chiñe ndoñe chamondëtsošbuáchema.

20 Y chë ndëtšbenguiñe yojuatquécjana jénaye entsemna mo chë aiñe Bëngbe Bëtsabe palabra tmojouena y Bëngbe Bëtsábeñe jtsošbuáchiyama oyejuayënga tmojtsemna entšangcá;

21 pero ndoñe nŷets tempo chana jocochájuana, y chca, ndoñe bayté Bëngbe Bëtsáftaca ntjéftsemnëngana, ndoñe yapa tmontsašbuaché causa. Inŷenga chëngbioye mochantsëbuayënja y Bëngbe Bëtsábeñe betsošbuáchiyama mochanjasúfrianga; chíyeca chënga Bëngbe Bëtsabe palabra cachcá mochanjesonŷaye.

22 Chë uchmëshangañe yojuatquécjana jénaye entsemna mo chë Bëngbe Bëtsabe palabra tmojouena entšangcá, pero quem luarentša soyëngaca oyejuayënga jtsemnana yapa mochántsenojuabnaye y mallajta crocénana y ba soyënga jtsebomnana mochántseboše. Chíyeca chënga Bëngbe Bëtsabe palabra jtsebnëtjombana y ntšamo cha tojayancá ndoñe ntšamana.

23 Pero chë uanganëshiñe yojuatquécjana jénaye entsemna mo chë Bëngbe Bëtsabe palabra tmojouena y botamana

jósertana entsāngcá. Mo canye betiye puerte tšabá tojtse-shajuancá, chēnga bētscá tšabe soyēnga Bēngbe Bētsabiama mochāntsama. Inyēngna ínēngbiama más bētscá soyēnga mochāntsama, y chca, ínēnga jtsemnana mo chē patse meshēnga tojanshajo jenaycá, ínēnga mo chē chnēnguana bnētsancá y ínēngna mo chē unga bnētsana meshēnga tojan-shajo jenaycá ca” —Jesús tojanabuayená.

### *Chē tríguañe bacna shacuanama cuento*

<sup>24</sup> Jesús mēntsánaca tojanacuntá: “Bēngbe Bētsabe amēndayana endmēna mo chē tšabe jenaycá, canye boyabása chabe jajañe yojáje.

<sup>25</sup> Pero nyetscanga imojtsomañe orna, chabe uayayá yojáshjango y chē trigo jeniñe bacna shácuaana yojesejé y yojtsatoñe.

<sup>26</sup> Y chē trigo yojuájua y ya yojtseshajuana orna, chē bacna shácuanēnaca yojuábocna.

<sup>27</sup> As chē peonga imojá chē nduiño jauyanama: ‘Bacó, chē jajañe tšabe jénaye tconjanjé y as, ¿ndáyeca chē bacna shácuaana chiñe tojuábocna ca?’

<sup>28</sup> Y chē nduiño yojáuyana: ‘Atšbe uayayá chca tojama ca.’ Chora chē peonga imojatjaye: ‘¿Quectseboše bēnga fchayá chē bacna shácuaana jetsejashtsētsama ca?’

<sup>29</sup> Pero chē nduiño yojáuyana: ‘Ndoñe. Chē bacna shácuaana šmojtsejashtsētsana ora, chē trínaca šmattsejashtse ca.

<sup>30</sup> Más tšabana, cachcá mochjonjaye cányiñe chaójuama, chē jaja saná játbanama tempo chaojobuáchēntscuana. Chora chē trabájayēnga chanjichamuá y chanjámēndaye natsana chē bacna shácuaana chamotsejashtsētse y chamotsentsacuacjuá jtsejuinjiyama, y chentsana chē shajuana chamuatbaná y atšbe grano uaquēcjnaye yebniñe chamotsatsuumá ca’ ” —Jesús tojánayana.

### *Chē mostaztiye jenayama cuento*

(Mc 4.30-32; Lc 13.18-19)

<sup>31</sup> Jesús mēntsánaca tojanacuntá: “Bēngbe Bētsabe amēndayana endmēna mo canye mostaza betiye jenaycá, canye boyabása chabe jajañe yojáje.

<sup>32</sup> Ndegombre, nyetsca jenayēngama chē mostaza jénaye chē más bāsetema endmēna, pero tojójua orna, chē jajañentše chē más bēts betiye jóbemana. Tša bēts betiye jtsemnana, chíyeca ba buacuashangá jtsabomnana y chē jaja shloftšēnga jana y chiñe uajajonētemēngá jauábopormana ca” —Jesús tojánayana.

### *Chē levadurama cuento*

(Lc 13.20-21)

33 Quem inye cuéntnaca tojanéyana: “Bëngbe Bëtsabe amëndayana endmëna mo lewadurcá; canye shembása chana jenájua bana unga medida arninýañe, nyetsana chauabochama ca.”

*Ndáyeca Jesús entšanga cuenténgaca yojanabuayiyná  
(Mc 4.33-34)*

34 Jesús nyetsca chë soyëngama lempe cuenténgaca entšanga jtsëtsëtsnayana, y cuenténgaca ndoñesna ndoñe yonjanoyebuambná.

35 Chca yojamna ndayá cachcá chaochnënguama ntšamo chë Bëngbe Bëtsabe juabna oyebuambnayá tojanayancá, mëntšá:

Jabuátambamna cuenténgaca chanjóyebuambaye;

chanjayana chë iytemena soyëngama y chë entšanga ndoñe  
mondétatsëmbo soyëngámnaca;

Bëngbe Bëtsá quem luare tojanma orscana chë soyënga yomna  
ca —cha tojánayana.

*Chë tríguañe bacna shácuana cuentama Jesús tojanabuayená*

36 Chentšana Jesús chë entšanga tojtanichamó y yebnoye tojtanamáshëngo. Chentšna chabe uatsjédayënga tmojanimpadá ndayá chë bacna shacuanama cuento betsayancá chauabuayenama.

37 As Jesús tojanéyana: “Chë tšabe jénaye jená endmëna chë Bëngbe Bëtsá Entšá tbojanbemá,

38 y chë jajaña, quem luare. Chë tšabe jénaye entsemna chë Bëngbe Bëtsabe amëndayoye mochjámashjna entšanga, y chë bacna shácuana entsemna chë bacna bayëjëngbe amëndayabe entšanga,

39 y chë uayayá, chë bacna shácuana yojáje chana, Satanás. Chë jaja saná atbanayana entsemna chë quem luare jopochócama chaojobuache ora, y chë trabájayëngna chë angelotëmënga.

40 Ntšamo chë bacna shácuana jtsejashtsëtsana y iñoie jtsatmetšana jtsejuinýiyama, cachcá echántsemna quem luare jopochócama te.

41 Chorna, chë Bëngbe Bëtsá Entšá tbojanbemá chabe angelotëmënga echanjichamuá chë ínýënga bacna soye chamomama amënga y chë bacna soyënga amënga chabe amëndayentšana chamotsajuanayama.

42 Y chora chëngbioye chë uabouana íñeshoye mochantsësetjango y chentše puerte mochanjenóbošachna y chë tsetšanama juatsašënga mochantsenoftëšjojnaye.

43 Chora, chë ntšamo Bëngbe Bëtsá yomandacá amëngna corente mo shinýcá mochantsebuashinýinýana chëngbe Taitá,

Bëngbe Bëtsabe amëndayoca. Chë jouenama tmojtsobenënga, smochjouena ca” —chora Jesús tojánayana.

*Chë fshantsiñe uaiytëmena bomnanama cuento*

44 “Bëngbe Bëtsabe amëndayana endmëna mo chë fshantsiñe uaiytëmena bomnancá. Canÿe boyabása chë bomnana yojuinÿena y chentšana iytëcana cachentse yojesatbontsá. Corente oyejuayá yojtá, nÿetsca chabe bomna soyënga yojetsatobuiye y chentšana chë fshantse yojtobuámiñe ca” —Jesús tojánayana.

*Chë corente uámana fjantse ndëtsëtémama cuento*

45 “Mo canÿe entśá uámana fjantse ndëtsëtémënga obuamañacánaca endmëna chë Bëngbe Bëtsabe amëndayana.

46 Chana, canÿe corente uámana ndëtsëtëma yojinÿena ora, yojtá y lempe chë inabomna soyënga yojetsatobuiye y chë ndëtsëtëma yojtobuámiñe ca” —Jesús tojánayana.

*Chë atarraiëshama cuento*

47 “Bëngbe Bëtsabe amëndayana endmëna mo canÿe atarraiëshacá, buyeshoye jutšenana y nÿetsca beonga jashebuáyana.

48 Chë atarraiëshasha jútjena tojtsamna orna, chë beonga ashebuánayënga jtsashëbjátsëcana, tsachoye juyambana y chentše juatbemana chë beonga jabocacayama; chë tśábënga sbarëquënguiñe juatsuámana y chë ndoñe tśábënga jtsëtšanana.

49 Cachcá echanjochnëngo quem luare jopochócama tempo chaojobuache ora. Chë angelotémënga mochanjábocana chë tśabe entśángbentšana bacna entśanga jaluárama,

50 y chë bacna entśangna chë uabouana íñeshoye mochántsatquëcjaye, y chentše puerte mochanjenóbošachna y chë tsetšanama juatsašënga mochantsenoftëšjojnaye ca” —Jesús tojanacuntá.

*Anteo y tsëm uámana bomnana*

51 Chora chabe uatsjëndayënga Jesús tojanatjá: —¿Lempe chama quecmojtsësertana ca?

Y chënga tmojanjuá: —Arseñor, aíñe ca.

52 As Jesús tojanéyana: —Canÿe ley abuatambayá jtsetatšëmbuana ndayá Bëngbe Bëtsá tempo Moisesbiajana yojanoyebuambná soyëngama. Ntšamo Bëngbe Bëtsabe amëndayana bëtsemnama cha tojtsatsjendá orna, mo canÿe yebnentša nduiñcá cha jtsemnana. Chë nduiñna chabe grano uaquëcjnaye yebnocana anteo y tsëm uámana bomnana juabocnana. Cachcá chë ley abuatambayá, Bëngbe Bëtsabe soyëngama jtsabuátambayana chë tempo Bëngbe Bëtsá

tojanoyebuambá soyëngama y chë tsëm soyëngnaca Bëngbe Bëtsabe amëndayama ca –tojanëyana.

*Jesús Nazaretoca*

*(Mc 6.1-6; Lc 4.16-30)*

<sup>53</sup> Jesús chë soyënga jacuéntama tojanpochocá ora, chentšana tojtsanoñe.

<sup>54</sup> Y cachabe luaroye tojtanashjango y chentša judiëngbe enefjuana yebnentše tojanontšë jabuátambama. Entšanga ojanánënga imojtsichamo: –¿Chë lempe yojtsetatšëmbcá ndëmoca mua tojuatsjinÿe ca? ¿Ntšamo nantsobena chca bëts soyënga jamama ca?

<sup>55</sup> ¿Mua ndoñe yondmëna chë calpinterbe uaqiñá y chabe mamá ndoñe María? ¿Mua ndoñe yondmëna Santiago, José, Simón y Júdasbe catšata,

<sup>56</sup> y chabe uabénanga ndoñe muentše bëngaftaca mon-doyena? ¿Ndayentšana lempe chca mua yojtsebomna ca? – chënga imojtsichamo.

<sup>57</sup> Y chë causa chë entšanga tmojanotjayaná y ndoñe imontseboše cha joyeunayana. Pero Jesús tojanëyana: – Nÿetsquénache canÿe Bëngbe Bëtsabe juabna oyebuambnayá bëtsá jabemëngana, pero cachabe luarentše, cachabe yebnentše ndoñe ca.

<sup>58</sup> Chíyeca chentše Jesús ndoñe tonjëftsanma ba bëts soyënga Bëngbe Bëtsabe obenánaca, chë entšanga chábeñe ndoñe montsanošbuaché causa.

## 14

*Ntšamo Juan chë Ubayaná tojanóbana*

*(Mc 6.14-29; Lc 9.7-9)*

<sup>1</sup> Chë tempo, Rey Herodes, chë Galileoca mandayá tojanu-ena ntšamo nÿetsca entšanga Jesucristbiamá imojtsichamcá.

<sup>2</sup> As cha chabe oservënënga tojanëyana: “Mua Juan chë Ubayaná ctsemna, obanënguentšana tojtayena, chíyeca chca obenana bëts soyënga jamama yojtsebomna ca.”

<sup>3</sup> Juan cabá ainá ora, Herodes tojanmandá cha chamishache, cadenëjuangaca chamobátsëca y chca cárceloye jutámiamá. Herodes chca tojanma Herodíasbe causa, chabe catšata Felipbe shema.

<sup>4</sup> Juan Heródesbioye mëntšá ibnauácacana: “Ndoñe quenátslesenciana aca acbe catšatbe shémaftaca jobouamayama, acbe catšata cabá ainá yotsomñe ora ca.”

<sup>5</sup> Y chama Herodes yojtseboše Juan jóbana, pero entšangbiamá yojtsauatja, er chënga imnajuabnaye Juan ndegombre Bëngbe Bëtsabe obenánaca yojanoyebuambná ca.



6 Pero Heródesbe cumpleaños oboyejuaye ora, Herodíasbe bembé entšangbe delante tojanlantsá y Herodes puerte chama yojtsóyejuaye.

7 Chíyeca Herodes, jajúrase, tbojanšbuachená ndayánaca jatšetayana, ntšamo tbojotjañcá.

8 Y Herodíasna lempe bémbëbioye ibojabuayená ntšamo Herodes jojuama. As chë bembé tbojaniyana: “Canÿe šcneniñe Juan chë Ubayanabe bestšaše šmatšetá ca.”

9 Herodes chë soyama tbojanongmé, pero chë ófjanëngbe delante jajúrase tbojanšbuachená causa, yojamánda chca chaotsemnama.

10 Y as tojanmandá chë Juan yojanëtámenoca chabe bestšaše chamuetséstjanguama.

11 Chentšana, canÿe šcneniñe chë bestšaše tmojanamba y chë tobiáše tmojanëntšabuaché y chana, chabe mamábioye.

12 Chentšana, Juanbe ústonënga tmojánashhajna, chabe cuerpo tmojésanocñe y tmojána jauábtontsama. Y chora, Jesús yojtsemnoye chënga tmojána y chë soyëngama tmojancuentá.

*Jesús shachna uaranga boyabásenga saná tojanacaredadó  
(Mc 6.30-44; Lc 9.10-17; Jn 6.1-14)*

13 Jesús chca tojanuena ora, canÿe barquëshañe tojtsanoñe canÿe bën luaroye, entšanga ndoyena luaroye. Pero entšanga chama imojátatšëmbona y chë pueblënguentsana tmojánbocana shecuátšeca cha juastama.

14 Chentšana, chë barquëshoicana tojtanastjango ora, Jesús ba entšanga tojánanye, chë cha tmojánguanguënga. Chëngbiamá tbojanongmé y chë entšanguentsana ba šoquënga tojanashná.

15 Ya jetiñe yojtsemna, chíyeca chë uatsjëndayënga Jesúsbioye tmojanobeconá y tbojaniyana: —Ya jetiñe entsemna y quem luariñe ndocná quenatiyena. Entšanga cuantichamuá, pueblotëmëngoye chamotsoñama, saná chamobuámiñama ca.

16 As Jesús tojanëjua: —Ndoñe quenátsiyta chënga chamot-satoñama. Tšëngaftanga saná šmochjacaredádaye ca.

17 Y chënga tmojanjuá: —Muentše tondaye queftsátsbomna; nyë shachna tandëse y uta beónata ca.

18 As Jesús tojanëyana: —Chë soyënga moye miyëbo ca.

19 Chentšana Jesús tojanmandá entšanga chamoshëntsjatbiamama. Chorna, chë shachna tandëse y chë uta beónata tojanca, celoye tojanontješé y Bëngbe Bëtsábioye chama tbojtanchuá. Chora chë saná tojanjatá, chabe uatsjëndayënga tojanëjåtaye, y chëngna nyëtsca entšanga tmojanacaredadó.

20 Nyëtsca entšanga tmojanse jtoshachaye nyëtsá y cabá chë ojamnëtëmëngaca bnëtsana uta sbarëcua tmojanajutjé.

21 Chë tmojansënga imojamna mo shachna uaranga boy-abásenga, shembásenga y básenga ntjacuntacá.

*Jesús béjaye juatsbuacá yojtsaye*  
(Mc 6.45-52; Jn 6.16-21)

22 Chentsana, Jesús chabe uatsjédayënga tojanamëndá chë barquëshoye jtamashjna y chë uafjajónaye chenguánoica chabe natsana jashjajnana. Chëntscuana Jesús entšanga yojtichamuá.

23 Njëtscanga tojtanichamó orna, Jesús canye tjoye tojántsjua canya jtsemnama, Bëngbe Bëtsáftaca jencuéntama. Yojaibétata ora, cha canya chentše yojtsemna,

24 y chë barquëshana tsachocana bënoca yojtsamna. Y chë olëshënga chë barquëshu yojtsájantšetaye, chë binýia chëngbe contra yojtsemna causa.

25 Ya bínýanoyna, Jesús chëngbioye yojobeconá; béjaye juatsbuacá yojtsaye.

26 Chabe uatsjédayënga chca cha tmojáninýe orna, tša imojochauatjaná y puerte auatjanánënga tmojanoyó: —¡Canyë añemëse entsemna ca!

27 Pero chora Jesús tojanéyana: —¡Añemo šmochtsebonna, atše Jesús sëndmëna; ndoñe matauatjëngana ca!

28 Chora Pedro, Jesúsbioye tbojaniyana: —Bëngbe Utabná, ndegombre aca tcojtsemnëse, momandá atše béjaye juatsbuacá ácbioye chayá ca.

29 Y Jesús tbojaniyana: —Mabo ca.

Chora Pedro chë barquëshoicana tojánastjango y tojanontšé béjaye juatsbuacá Jesúsbioye jama.

30 Pero chë binýia tša jabuache yojtsemnama tojáninýe ora, Pedro puerte yojtsauatja y tbojanontšé jtsenatjëmbambana. Chýyeca cha jabuache tojanchembo: —¡Bëngbe Utabná, šmatsbocá ca!

31 Y cachora Jesús tbojtano buácuëtëntsiye y tbojaniyana: —¡Tša batsatema ošbuachiyá! ¿Ndáyeca ndoñe bëtscá átšbeñe contsošbuaché ca?

32 Chentsana chë barquëshoye chata tbojtanamáshëngo y cachora chë binýia bonguana yojtsatsmëna.

33 Y chora, chë barquëshoye imojtsemnënga Jesusbe shecuatšentše tmojanoshamentšé y tmojaniyana: —¡Aca ndegombre Bëngbe Bëtsabe Uaquiñá comna ca!

*Genesaret ca uabáinoca, Jesús ba šoquënga tojanashná*  
(Mc 6.53-56)

34 Chë uafjajónaye tmojánenashbuachengo y canye luare Genesaret ca uabáino y tmojánashjajna.

<sup>35</sup> Chentša entšanga Jesús tmojantëmbá ora, chë luarentša nyetsca entšanga chama tmojántatsëmbona. As chë entšanga chëngbe šoquënga Jesúsbioye tmojanënatse.

<sup>36</sup> Y imojtseimpadana nÿe mo chabe entšayá sibiájuanaca juabojajuama chë šoquënga chaualesenciama. Y nÿetscanga chabe entšayá sibiájua tmojanábojajënga, shnánënga imojt-satoquédaye.

## 15

*Ndáyeca canÿe entsá Bëngbe Bëtsabe delante ndoñe tšabia nántsemna*  
(Mc 7.1-23)

<sup>1</sup> Chora básefta fariseunga y judiëngbe ley abuátambayënga, Jerusalenocana tmojánabënga, Jesúsbioye tmojanobeconá y tmojaniana:

<sup>2</sup> —¿Ndáyeca acbe uatsjëndayënga ndoñe montsama chë ntšamo bëngbe bëts taitanga monjanamancá ca? ¿Ndáyeca ndoñe ntsacuentšabiana ndayá jasama ora, ntšamo bënga chë judiënga fsënduamancá, Bëngbe Bëtsabe delante tšábënga jtsatsmënama ca?

<sup>3</sup> As Jesús tojanëjua: —¿Y ndáyeca tšëngaftanga ndoñe šmontsama ntšamo Bëngbe Bëtsá tojanmandacá, nÿe cach tšëngaftangbe bëtsëtsanga imnétsama soyënga jtsamama ca?

<sup>4</sup> Bëngbe Bëtsá mëntšá tojanmandá: “Acbe bëtsëtsata stëtšoye ndoñe catjáquedaye”, y “nda cachabe bëtsëtsabiama podësca tojóyebuambase, chana jóbanama jtsemnana ca.”

<sup>5</sup> Pero tšëngaftanga šmondbétsichamo canÿe entsá canobena chabe taitá o chabe mamá jauyanana: “Lempe ntšamo sëndbomncá Bëngbe Bëtsá jaserviama entsemna, chíyeca ton-daye quetsátsbomna aca juajabuáchama ca”;

<sup>6</sup> y šmondbétsichamo nÿe ndánaca chca tojayanëse, ya ndoñe ntsemnana chabe taitá o chabe mamá stëtšoye ndoñe ntjaquédana, ni ntjuajabuáchana ca. Y chca, tšëngaftangbiama ton-daye ntsámanana ntšamo Bëngbe Bëtsá tojanmandacá, y aíñe šmontsama ntšamo tšëngaftangbe bëtsëtsanga imojanamancá.

<sup>7</sup> ¡Bacna entšanga, ntšamo ndegombre šmojuabnacá ndinÿinÿnayënga! Nÿe tšabá chë Bëngbe Bëtsabe juabna oye-buambnayá Isaías tšëngaftangbiama tojanoyebuambá, mëntšá tojánayana ora:

<sup>8</sup> Bëngbe Bëtsá tonjayana: “Quem entšanga mondbétsichamo Bëngbe Bëtsá tša tšabia yomna ca; chca nÿe uayásaca, pero chëngbe ainanentše atšbiama ndocna tšabe juabnéngaca.

<sup>9</sup> Chënga nÿe bonamente mondbétsichamo: Bëngbe Bëtsá tša tšabia yomna ca;

chënga nÿe entsãngbe mandënga jtsabuátambayana y Bëngbe Bëtsabe mandënga ndoñe ca” —cha tojánayana.

10 Chentsana Jesús entsãnga tojánachembo y tojanëyana: —Smochjouena y chacmësertá.

11 Ndayá entsá tojtsesacá, ndoñe quebochátsbema Bëngbe Bëtsabe delante ndoñe tšabia. Inÿetšá comna: ndayá entsá tojtsejuabná y tojtsoyebuambnacá endobena cha jabemana Bëngbe Bëtsabe delante ndoñe tšabia ca.

12 Chora chë uatsjëndayënga Jesúsbioye tmojanobeconá y tmojanianyana: —¿Quéctsetatsëmbo, ntšamo tconjayanama chë fariseunga ndoñe tšabá chenatëuénana ca?

13 As Jesús tojanëjua: —Ndaye betiye atšbe Taitá celocá ndoñe tonjájese, tbëtëjocana mochántsejashtse. Cachcá echanjama chë nÿe entsãngbe buatëmbana soyëngaca.

14 Cachcá mónÿaye; chënga montsemna mo jtanënga inÿe jtanënga unachayëngcá. Y canÿe jtaná inÿe jtaná tbojtsánachase, nÿets útata canÿe tbuabentše bochanjetsótsatše ca —Jesús tojánayana.

15 Chora Pedro, Jesúsbioye tbojanianyana: —Ntšamo chë cuento bétsayanama šmabuayená ca.

16 As Jesús tojanëjua: —¿Tšëngaftángnaca cabá ndoñe cmontsësertana ca?

17 ¿Cabá ndoñe cmontsësertana lempe ntšamo šmojascá uafsbioye jomashënguana y chentsana cuerpentšana jtabocnana?

18 Pero ntšamo šmojtsoyebuambnacana lempe ainanocana jtsóbocanana y chë soye endobena tšëngaftangbioye Bëngbe Bëtsabe delante ndoñe tšábenga jábiamana.

19 Ainanocana jtsóbocanana bacna juabnënga: jenóbama, shema o boyábioye ínÿaftaca jaíngñama, shembása o boyabásaftaca bacna soye jamama, jatbëbama, jobostërama y ínÿabiamana jtsayátsenayama.

20 Chë soyënga cocayé jtsobenana entsábioye Bëngbe Bëtsabe delante ndoñe tšabia jabemama; pero chë ndoñe ntsacuentšabiana ndayá jasama ora, ndoñe ntsobenana Bëngbe Bëtsabe delante ndoñe tšabia jabemama ca —Jesús tojánayana.

*Canÿe shembása inÿe luarocana ashjanganá Jesúsbeñe yojtsošbuaché*

*(Mc 7.24-30)*

21 Jesús chentsana, Tiro y Sidón luarëngoye tojtsanoñe.

22 Canÿe shembása Caná luarocá chentše inoyena; cha Jesúsbioye yojobeconá y mëntšá yojtšáyebuache: —¡Utabná, Rey Davídbentšana Entšá, šmotselastemá! ¡Atšbe bembe puerte entsesufrina, bacna bayëjbe juabna entsebmoma causa ca!

<sup>23</sup> Jesús ndocá tbonjanjuá. As chabe uatsjéndayënga tmojanobobconá y tmojanimpadá: —Chë shembása mëyana chaotsatoñe; bëngbe ústonoye yapa entsáyebuache ca.

<sup>24</sup> As Jesús tojánayana: —Bëngbe Bëtsá atse šonjichmó jt-sanÿenama nÿe chë entsanga, chë mo ótsena oveshëngcá imomnënga Israeloquënga, y chë ndoñe judiëngna ndoñe ca.

<sup>25</sup> Pero chë shembása tojána, Jesusbe shecuatšentše tojanoshamentšé y tbojaniyana: —¡Utabná! Diosmanda pavor šmotsebema. ¡Šmotsajabuache ca!

<sup>26</sup> Y Jesús tbojanjuá: —Chë judiënga mondmëna mo Bëngbe Bëtsabe basengcá y atse ácbioye tbojuajabuache y chëngbioye ndoñesna, nántsemna mo chë básengbe saná chënga cuaftsëbaquëcá y quešënga ftsëbuajocá. Chca jamana ndoñe tšabá quenátsmëna ca.

<sup>27</sup> As cha tbojanjuá: —Arseñor. Pero chë quešëngnaca chëngbe nduiñëngbe mesëshentšana tmojatquëcjanatemënga mondbase, chë nduiñënga tmojtsesá ora. Chcasna, Diosmanda šmotsajabuache ca.

<sup>28</sup> Chora Jesús tbojaniyana:

—¡Shembása, Bëngbe Bëtsábeñe tša ošbuachiyá comna! Ntšamo cojtsebošcá chca chaotsemna ca.

Y cach orscana chabe bembe tšabá yojtsatsmëna.

### *Jesús ba šoquënga tojanashná*

<sup>29</sup> Jesús chentšana tojëftsanbocna y chë Galilea uafjónaye tsachoye tojána. Chentšana, canÿe batsjoye tojántsjua y choca tojanótbema.

<sup>30</sup> Mallajta entsanga Jesús yojtsemnentše tmojánashjajna, y coshetënga, jtanënga, tšabá jobónjuama ndobenënga, ndëbianga y ba šocana bomnënga imojtsënachaye. Jesusbe shecuatšentše tmojanëshejango y cha nÿetscanga tojanashná.

<sup>31</sup> Y chca orna, chë entsanga tmojáninÿe: chë ndëbianga imojtsatoyebuambná, chë tšabá jobónjuama ndobenënga tšabá imojtsatsmëna, chë coshetënga tšabá imojtsatana y chë jtanëngna yojtsëbinÿna; y chama chënga corente ojananänënga imojtsemna. Chora chënga tmojanontšé jëtschuayana chë Israelentša entsanga imojánadorana Bëngbe Bëtsá.

### *Jesús canta uaranga boyabásenga saná tojanacaredadó* (Mc 8.1-10)

<sup>32</sup> Chentšana Jesús, chabe uatsjéndayënga tojánachembo y tojanëyana: —Quem entsangbiamá šontsengmena, er ya unga te chënga átšeftaca muentše montsemna y jasama tondaye quemátsbomna. Atse ndoñe quetsátsboše ntjascá cachëngbe yebnoye chënga jtichamuana, er benachiñe shëntsama nantsabuatëcja ca.

<sup>33</sup> As chabe uatsjéndayënga tmojantjá: —¿Ntšamo muatjobe-naye quem luarentše, ndocna entšá ndoyenentše, chëfta entšangbiana saná jinÿenama ca?

<sup>34</sup> Y Jesús tojanatjá: —¿Bueta tandëse šmojtsebmna ca?

Y chënga tmojanjuá: —Canÿsëfta tandëse y básefta beonatëmënga ca.

<sup>35</sup> Chora Jesús tojanamëndá nÿetsca entšanga fshantsiñe chamotbiamama.

<sup>36</sup> As chë canÿsëfta tandëse y chë beonatëmënga tojanca; Bëngbe Bëtsábioye chama tbojtanchuá, chë saná tojanjatá y chabe uatsjéndayënga tojanëjatá. Chentšana nÿetsca entšangbioye tmojanacaredadó.

<sup>37</sup> Nÿetsca entšanga tmojanse jtoshachaye nÿetšá. Y chentšana cabá canÿsëfta bëts sbarëcua tmojanajutjé chë tojanójamëtemëngaca.

<sup>38</sup> Chë tmojansënga imojamna canta uaranga boyabásenga, shembásenga y básenga ntjacuntacá.

<sup>39</sup> Chentšana Jesús, chë entšanga tojtanichamó, barquëshoye tojánamashëngo y Magadán luaroye tojtsanoñe.

## 16

*Chë fariseunga y saduceunga tmojánbošena Jesús chaoma canÿe bëts soye*

*(Mc 8.11-13; Lc 12.54-56)*

<sup>1</sup> Fariseunga y saduceunga tmojána Jesús jinÿama, y jisháchichiyama imojtseimpadana canÿe bëts soye chaoma, as jtsetatšëmbuama Jesusbe obenana ndegombre Bëngbe Bëtsábiocana tainóbocanama.

<sup>2</sup> Pero Jesús tojanëjua: “Tšëngaftanga jetiñoye šmondbétsichamo: ‘Yëfse tšabe te echántsemna, er celoca buánganiñe entsemna ca.’

<sup>3</sup> Y cachëse šmondbétsichamo: ‘Mënté echanjuafté, er celoca buánganiñe y ibetiñe entsemna ca.’ Tšëngaftanga celoye jontješiyëse, ntšamo chë tempo yochtsemnama tša tšabá jayanama šmojtsobenëse, ¿ndáyeca ndoñe šmontsobena jtsetatšëmbuana ndaye bëts soye Bëngbe Bëtsá quem tempo cmojtsinÿanÿnama?

<sup>4</sup> Quem puerte bacna entšanga y ndošbuáchiyënga montseboše atše canÿe bëts soye chaima, obenana jinÿanÿiyama; pero ndoñe chca quemochátinÿe, sinó nÿe chë ndayá yomna mo chë Bëngbe Bëtsabe juabna oyebuambnayá Jonásoftaca tojanopasá soycá ca” —Jesús tojánayana.

Chora Jesús tojésanabashejuana y chentšana tojtsanoñe.

*Jesús tojanabuayená chë fariseungbe buatëmbana soyëngama (Mc 8.14-21)*

<sup>5</sup> Chë uafjónayē chenguanoicana chēnga tmojtanabo ora, chë uatsjéndayēnga yojésebnētjomba tandēše jesocñana.

<sup>6</sup> Chora Jesús tojanēyana: —Smochtsantješna; cuedado šmochtsebomna chë fariseunga y saduceungbe levadurama ca.

<sup>7</sup> Pero chë uatsjéndayēngna imojtsenatsētsnaye: —Chca entsichamo, bēnga tandēše ndoñe tmonjesocñama ca.

<sup>8</sup> Jesús chë soye yojtsetátšēmbo; chíyeca mēntšá tojanēyana: —¿Ndáyeca tandēšama šmojtzenatsētsná ca? ¡Tša batšatema ošbuáchiyana šmobomna!

<sup>9</sup> ¿Cabá ndoñe cmontsēsertana y ndoñe šmontsabouínŷna chë shachna tandēsentsana shachna uaranga entšanga sēnjanējuatšema y bnētsana uta sbarēcua šmonjánajutjema?

<sup>10</sup> ¿Y ndoñe šmontsabouínŷna chë canŷsēfta tandēsentsana canta uaranga entšanga sēnjanējuatšema y canŷsēfta sbarēcua šmonjánajutjema?

<sup>11</sup> ¿Ndáyeca ndoñe cmontsēsertana atše tandēšama ndoñe sēntsóyebuambnama? Cuedado šmochtsebomna fariseunga y saduceungbe levadurama ca —Jesús tojanēyana.

<sup>12</sup> As chora chë uatsjéndayēnga tojanēsertá, Jesús ndoñe tonjánayana chë tandēsentsana levadurama cuedado jtsebomnana ca, sinó ndayá chë fariseunga y saduceungbe buatēmbana soyēngama.

*Pedro tojánayana, Jesús chë Cristo bétsemnama  
(Mc 8.27-30; Lc 9.18-21)*

<sup>13</sup> Jesús, Cesarea de Filipo luaroye tojánashjango ora, chabe uatsjéndayēnga tojanatjá: —¿Nda ca entšanga imojtsichamo chë Bēngbe Bētsá Entšá tbojanbemá yojtsemna ca?

<sup>14</sup> Chēnga tmojanjuá: —Báseftanga montsichamo Juan chë Ubayaná ca, ínŷengna Elías ca, ínŷengna Jeremías y ínŷengna tempsca inŷe Bēngbe Bētsabe juabna oyebeuambnayá ca.

<sup>15</sup> As Jesús tojanatjá: —Y tšēngaftangna, ¿nda atše bétsemnama ntšamo šmochjayana ca?

<sup>16</sup> Chora Simón Pedro tbojanjuá: —Acna chë Bēngbe Bētsabe Uámana Uabuayaná condmēna, chë Bēngbe Bētsá Ainabe Uaquiñá ca.

<sup>17</sup> Y Jesús tbojanayana: —Simón, Jonasbe uaquiñá, oyejuayá cochanjoyena. Ndocna quem luarentša entšá chë soye checmatinŷinŷé, sinó atšbe Taitá, celoca endmēná.

<sup>18</sup> Y mēntšánaca cbēyana: Mora acna Pedro o chë ndētšbecá contsemna, y chë ndētšbeñe atšbe bēts yebna chanjajebo, y ni Satanás, chabe obenánaca entšá jóbanama, queochatobenaye jtseepochóca.

<sup>19</sup> Atše cbochanjátšetaye obenana, mo llavēfjá, entšanga Bēngbe Bētsabe amēndayoye jamashēnguama chamobenama.

Bëngbe Bëtsáftaca chacojtsencuénta ora, canÿe soye ndoñe chaondëtsemna ca chacojayanëse, Bëngbe Bëtsá cachcá echanjayana. Y cháftaca chacojtsencuénta ora, canÿe soye aíñe chaotsemna ca chacojayanëse, Bëngbe Bëtsá echanjayana aíñe chca chaotsemna ca —Jesús tbojaniana.

<sup>20</sup> Chentšana chabe uatsjéndayënga tojanamëndá ndocnábeñe ntsecuéntayana cha, Jesús, chë Bëngbe Bëtsabe Uámana Uabuayaná, chë Cristo bëtsemnama.

*Jesús tojánayana cha ibojamna jóbanana y jtayenana ca*  
(Mc 8.31-9.1; Lc 9.22-27)

<sup>21</sup> Chorscana Jesús tojanontsé chabe uatsjéndayënga jábuayenana cha ibojtsemna Jerusalenoye jama, y chocna chë bëtsëjemëngcá mándayënga, chë judiëngbe bachnangbe amëndayënga y chë ley abuatambayënga mochjanma cha puerte chaopadecema ca. Tojanëyana cha mochjanóba, pero unga tianoye yochtanayena ca.

<sup>22</sup> Chora Pedro, Jesúseftaca tojanoluaré y tojanontsé mëntśá uatsëtsnayana: —¡Atšbe Utabná, Bëngbe Bëtsá ndoñe chaondëlesenciá chca chaopasama! ¡Ndocna te quenaisopodena chca ácaftaca jopásana ca!

<sup>23</sup> As Jesús tojanobuértana y Pédrëbioye tbojaniana: — ¡Satanás, átšbentšana mojuaná! ¡Aca contseboše atše canÿe bacna soye chašócochënguama! Pedro, acbe juabnënga Bëngbe Bëtsábiocana ndoñe quenatóbocana, sinó nÿe entšángbentšana ca.

<sup>24</sup> Chentšana Jesús chabe uatsjéndayënga tojanëyana: — Nda atšbe uatsjendayá jtsemnama tojtseboše, cháuyana nÿe Bëngbe Bëtsá yobena sempre chabe vidiñe jtsemándayana ca, chabe quem luarentša soyënga cachcá chauesonÿá atše juastama, y atšbiana jasúfriama chaotseprontana y cruciñe jobanámnaca.

<sup>25</sup> Nda tojtsama quem luarentše bëtscá soyënga jtsebomnama y atšbiana jasúfriama ndoñe tontseprontana, chë nÿetsca tescama yomna tšabe vida echanjopérdia. Pero nda quem luarentša soyënga cachcá tojëftsonÿá atše juastama, masque chaóbana, chë nÿetsca tescama yomna tšabe vida echántsebomna.

<sup>26</sup> ¿Ndayama entśá buanjósërvia nÿetsca quem luarentša soyënga jtsebomnana, chë nÿetsca tescama yomna tšabe vida tojtsoperdese? Ndegombre, canÿe entśá chë nÿetsca tescama yomna tšabe vida tojtsoperdese, ndocna soye quenátsmëna cha chaobená joyiyama, chë nÿetsca tescama yomna tšabe vida jtsebomnama.



27 Chë Bëngbe Bëtsá Entśá tbojanbemá, chabe Taitabe obenánaca y puerte buashinÿinÿaniñe echanjabo chabe angelotémëngaftaca, y chora cada cánÿabioye bochantatsetaye cachcá ntśamo cada ona tojëftsemcá.

28 Ndegombre ŝcuayana: Báseftanga muentŝe montsemnënga ndoñe quemochatóbana, Bëngbe Bëtsá Entśá tbojanbemá amëndayacá jabana ntjëftsinÿcá ca —Jesús tojánayana.

## 17

*Jesús inÿetśá tojanobinÿná*  
(Mc 9.2-13; Lc 9.28-36)

1 Chentśana chnënguana tianoye, Jesús tojëftsanëbiatŝe Pedro, Santiago y chabe catśata Juan, y ínÿoye tojanënatse nÿe chënga, canÿe bëts tjoye.

2 Chentŝe, chëngbe delante inÿetśá cha tojanobinÿná. Chabe jubiá shinÿcá yojtsebuashinÿinÿana, y chabe uichëtjonëjuangana mo binÿniñcá uafjantsëjuangá yojtsamna.

3 Chca orna, chabe uatsjëndayënga tmojáninÿe Moisés y Elías tbojanobinÿná, Jesúseftaca encuëntaye.

4 Chora Pedro, Jesúsbioye tbojanianya: “Bëngbe Utabná, jtśa tśabá bëngbiana cuanmëna muentŝe jtsemnana ca! Tcojtseboŝe, unga tambotémënga atŝe chjapórma: cánÿetema acbiana, ínÿetema Moisesbiana y ínÿetemna Elíasbiana ca.”

5 Pedro chca yojtsóyebuambnantscuana, canÿe buashinÿinÿana jantŝetëshe nÿetscanga yojáutsbotse. Y chë jantŝetëshoicana canÿe oyebuambnayana tmojanuena mëntśá: “Mua atŝbe bonshana Uaquiñá endmëna, atŝe chabiana sëntsoyejuá. Cha ŝmochtseyeunana ca.”

6 Y chë uatsjëndayënga chca tmojanuena ora, tmojanoshamentŝé y jubiaca fshantsóntscoñe tmojanotŝejbëna, puerte auatjanánënga.

7 Chora Jesús chabe uatsjëndayëngbioye tojanobeconá, tojánabojajo y tojanëyana: “Matëtsbananga; ndoñe matauatjëngana ca.”

8 Y tŝbanánoye tmojanontjeŝé ora, Jesús nÿe canÿa tmojáninÿe, ndocná inÿa más.

9 Chë tjocana imojtsatstsmaye ora, Jesús tojanamëndá: —Bëngbe Bëtsá Entśá tbojanbemá obanënguentshana candëtayenëntscuana, ndocnábeñe chë ŝmonjinÿe soyama ŝmattsecuëntaye ca.

10 As chë uatsjëndayënga Jesús tmojantjá: —¿Ndáyeca chë ley abuátambayënga mondbëtsichamo, canmëna Elías jabana chë Bëngbe Bëtsabe Uámana Uabuayanabe natsana ca?

11 Chora Jesús tojanějua: —Ndegombre canĵa Eliascá natsana echanjabo y ntšamo jtsemnama yomncá, lempe echánjabatsma ca.

12 Pero atše cběyana, canĵa mo Eliascá ya tonjabo, entšanga ndoñe chematanotěmbá y cháftaca entšanga tmonjanma lempe ntšamo tmojanbošencá. Y cachcá, chě Běngbe Bětsá Entšá tbojanbemá entšangbe cucuatšiñe echanjasúfria ca — Jesús tojánayana.

13 Chora chě uatsjéndayěnga tojaněsertá, Juan chě Ubayan-abiana Jesús chca yojtsětsětsnama.

*Jesús, canĵe bacna bayěja tbojanbojuaná*  
(Mc 9.14-29; Lc 9.37-43)

14 Entšanga imojtsemnoye chěnga tmojtashajna ora, canĵe boyabása tojanobeconá, Jesusbe natsanoica vojoshamentšiye y tbojaniana:

15 —Utabná, atšbe uaquiñá motselastemá. Cha ataque bontsěsháchichana y puerte entsesufrina, er cha inĵe ora inĵe ytseshajayana y inĵe orna, buyeshoye jtsoshbuetšana.

16 Acbe uatsjéndayěngbioye cha sěnjuánatse y ndoñe chema-tobená jtseboshnama ca —cha tbojaniana.

17 As Jesús tojánayana: —¡Nĵetšá ndošbuáchiyěnga y bacna entšanga ca! ¿Buetayté šojtsemna tšěngaftangaftaca jěftsemnana? ¿Buetayté uantado tšěngaftangaftaca chjěftsemna? Moye chě básetema mánatse ca.

18 Chora Jesús, chě basetěmbeñe bacna bayějbioye tbojanácacana y chábentšana cha tojěsanbocna. Cach orscana chě básetema tšabá yojtsatsměna.

19 Chentšana, chě uatsjéndayěnga luaroca Jesúseftaca tmojanoyebuambá y tmojaniana: —¿Ndáyeca běnga ndoñe fsěnjobená chě bacna bayěja jtabocnama ca?

20 Y Jesús tojaněyana: —Tšěngaftanga tša batšatema ošbuáchiyana bomna causa. Ndegombre šcuayana: tšěngaftanga batšatema ošbuáchiyana šmojtsebomněse, masque nĵe mo canĵe mostaza betiye jenaycá, quem tjoye šmatjayana: “Muentšana mojuaná y choye motsa ca”, quem tjañe chca nanjama, y tšěngaftanga lempe jamama šmattsobena.

21 Pero chca bayějěnga jtěbuacnamna jobenayana nĵe Běngbe Bětsáftaca jencuéntase y chama tondaye ntjascá jtsemněse ca —Jesús tojaněyana.

*Jesús cachiñe tojánayana cha ibojamna jóbanana y jtayenana*  
ca  
(Mc 9.30-32; Lc 9.43-45)

<sup>22</sup> Jesús y chabe uatsjéndayënga cánÿiñe Galilea luaroye imojétsaye ora, cha tojanéyana: “Chë Bëngbe Bëtsá Entšá tbojanbemá entšangbe cucuatšïñe mochanjáboshjona,

<sup>23</sup> mochanjóba, pero unga tianoye echántayena ca.” Chë causa chë uatsjéndayënga puerte ngménaca imojtsemna.

*Chë Bëngbe Bëtsabe bëts yebnama impuesto jtsat-squëcjnayama*

<sup>24</sup> Jesús y chabe uatsjéndayënga Capernaumoye tmojánashjajna ora, chë Bëngbe Bëtsabe bëts yebnama entšangbioye impuesto atjanayënga Pédrëbioye tmojána y tmojantjá: —¿Acbe buatëmbayá Bëngbe Bëtsabe bëts yebnama impuesto queonÿbetsatsquëcjnaye ca?

<sup>25</sup> Y Pedro tojanéjua: —Aíñe, cha endbetsatsquëcjnaye ca.

Chentsana, Pedro chë yebnoye tojánamashëngo ora, Jesús natsana mëntšá chábioye tbojaniyana: —Simón, ¿ntšamo catjájuaboje? ¿Quem luarentša reyënga ndëmuanÿengbioye impuesto inménétsayëngacaye y crocénana inménétsatjanaye: cach luarentše oyenëngbioye o chë inÿe luarocana ashjajnëngbioye ca?

<sup>26</sup> As Pedro tbojanjúá: —Chë inÿe luarocana ashjajnëngbioye ca.

Y Jesús tbojaniyana: —Chcasna, ndoñe quešnátsmëna chë atšbe Taitabe bëts yebnama impuesto jtsatsquëcjnayana ca.

<sup>27</sup> Pero ndocná mal chabonduínÿnanamna uafjajónayoye motsa, anzuelëfjua cochjútšena y chë natsana chaojuásjana beona cochjuábocna. Cochjuayetëfjoná y choye crocénana cochanjínÿena y chánaca echanjoshjache atšbiana y acbiana jëtsjájuama. Cochjëftsejatsëca y cochjatsboshjona ca —Jesús tbojaniyana.

## 18

*¿Nda chë más uamaná yomna?*

*(Mc 9.33-37; Lc 9.46-48)*

<sup>1</sup> Chentsana chë uatsjéndayënga Jesúsbioye tmojanobeconá y tmojantjá: —¿Chë Bëngbe Bëtsábeyeca mandánëngbeñe nda chë más uamaná yomna ca?

<sup>2</sup> Chora Jesús canÿe basetémbioye tbojanchembo y chëngbe tsëntsaca tbojanatsá.

<sup>3</sup> Y tojánayana: —Ndegombre cbëyana, nda mo basetemcá ndoñe tontóbema y ndoñe chacá Bëngbe Bëtsabe soyënga tonjóyëngacñe, cha ndocna te queochatobenaye Bëngbe Bëtsabe amëndayoye jamashënguama.

<sup>4</sup> Chca, nda tojtsejuabná canÿe nduamaná yomna y quem basetemcá yomna ca, cha chë Bëngbe Bëtsabe amëndayoca chë más uamaná echántsemna.

<sup>5</sup> Y nda átsbeñe ošbuachiyá bétsemnayeca, tbojofja canya mo quem basetembioycá, chana atše jofjana ca —Jesús tojánayana.

*Resjo yomna, nderado bacna soyënga cuanjama*

*(Mc 9.42-48; Lc 17.1-2)*

<sup>6</sup> “Nda canye básetema átsbeñe ošbuachiyábioye tbojaingñé bacna soye jamama, chabiamá más tšabá nántsemna canye bëts nantsnëbé chamotsetamošëntšbua y chë mar bėjaye shbuatsëntsoye chamotsashbuetše chabotsenatjëmbama.

<sup>7</sup> ¡Tša lastema quem luarentša entšangbiamá, chë ínÿenga bacna soye jamama chaócochënguama tmojtsamëngbiamá! Nÿets tempo chca amënga mochanjëftsemna. Pero, ¡payajema chë inÿa bacna soye chaomama tojtsamá ca!

<sup>8</sup> “Chíyeca, acbe cucuátšeca o acbe shecuátšeca bacna soye tcojamëse, cochtsenástjango y bënöye cochtsëtšena. Acbiamá más tšabá nántsemna celoye jamashënguana chë nÿetsca tescama yomna tšabe vida jtsebomnama, cucuatše ndbomná o cosheto, y ndoñe nÿets uta cucuátšeca o shecuátšeca chë nÿets tempo echanjesomñe ññeshoye chacmotsëstjango.

<sup>9</sup> Nderado acbe bomínÿeca bacna soye tcojinÿe y cachca soye tcojama, chë bominÿe cochtsenobuchjatsëca y bënöye cochtsëtšena. Acbiamá más tšabá nántsemna, celoye jamashënguana nÿe canye bomínÿeca, y ndoñe nÿets uta bomínÿeca infernoye chacmotsëstjango, chë bëts ññeshoye ca” —Jesús tojánayana.

*Chë ótsëna oveshabiamá cuento*

*(Lc 15.3-7)*

<sup>10</sup> Mëntšánaca Jesús tojánayana: “Ni mo cánÿabioye quem tsëm ošbuáchiyënguentshana, chë mo basetemëngcá mondmënënga, mo nduamanacá šmattsonÿaye. Ndegombre cbëyana, chëngbe angelotëmënga celoca, sempre atšbe Taitá celocáftaca mondetsemna ca.

<sup>11</sup> Er chë Bëngbe Bëtsá Entšá tbojanbemá tonjabo chë pochocánënga jtsemnama imojtsajnënga jabátsebacama.

<sup>12</sup> “¿Ntsámo tsëngaftanga šmatjájuaboye? Canye boyabása patse oveshënga tojtsabamna y ndeolpe canye chentša oveshá tojtsotše. ¿Chë boyabása ndoñe chë inÿe esconëfta bnëtsana y esconëfta oveshënga tjoca cachcá nanjesëñÿaye, jama chë ótsëna oveshá jetsenguanguama?

<sup>13</sup> Y chë oveshá jetsinÿenama tojobenase, ndegombre chë boyabása más oyejuayá jtsemnana chë ótsëna oveshabiamá, y ndoñe nÿa chca chë inÿe esconëfta bnëtsana y esconëfta oveshëngbiamá chë ndoñe tmonjanotšëngbiamá.

<sup>14</sup> Cachcá, tsëngaftangbe Taitá, Bëngbe Bëtsá, chë celoca endmëná, ndoñe quenátšboše ni canya quem basenguentshana

mo otšenacá chaotsemna, bacna soyënga jtsamëse oyena causa ca” —Jesús tojánayana.

*Ntšamo cuanjama inÿa japerdónama  
(Lc 17.3)*

15 “Nderado acbe catšata, bacna soye tcmojaborlase, cochjá, cánÿata šochjencuénta y cochjama cha chauenójuaboma, ndegombre bacna soye tcmojaborlama. Cha chacmojóyeunasna, acbe catšata cachiñe tšabá ácaftaca echántatsmëna.

16 Pero ndoñe tcmojóyeunasna, inÿe útata cochjáchembo chacmotjëmbambama, chca, chata chabouena ntšamo cochjauyanama y chamuayana ndegombre chca yomnama.

17 Y chata ndoñe tonjóyaunase, chentša Bëngbe Bëtsábeñe ošbuáchiyënga macuntá. Y chënga ndoñe tonjóyaunasna, cochjayana cha yomna mo canÿa Bëngbe Bëtsábioye nduabuatmacá, mo canÿe ndoñe judiyca ca o canÿe bacna entšá mo canÿa Romocama impuesto entšángbioye atjanayacá yomna ca.

18 “Ndegombre cbëyana: Tšëngaftanga Bëngbe Bëtsáftaca chašmojtsencuénta ora, chašmojayana canÿe soye ndoñe chaondëtsemna ca, Bëngbe Bëtsá cachcá echanjayana. Y cháftaca chašmojtsencuénta ora, chašmojayana canÿe soye aíñe chaotsemna ca, Bëngbe Bëtsá echanjayana aíñe chca chaotsemna ca.

19 “Mëntšánaca cbëyana: Nderado útata tšëngaftanguentšana quem luarentše tbojenoyeuná Bëngbe Bëtsáftaca jencuéntama ndayánaca jótjañama, Bëngbe Bëtsá chë celoca endmëná pronto chë soye cmochanjátataye.

20 Ndayentše útata o únganga tmojénéfjna, átšbeñe ošbuáchiyënga bëtsemnama, chentše atše chëngbe tsëntsaca chántsemna ca” —Jesús tojánayana.

21 As Pedro tojána y Jesúsbioye tbojantjá: —Bëngbe Utabná, ¿atšbe catšata bacna soye šojaborlase, bueta soye šojtsemna cha japerdónana? ¿Canÿsëfta soye ca?

22 Y Jesús tbojanjuá: —Ndoñe nÿe canÿsëfta soyama quec-batatsëtsná, sinó canÿsëfta bnëtsana soye canÿsëfta ca.

*Ndayá inopása chë japerdónama ndëbošëngaftaca*

23 Mëntšánaca Jesús tojanëyana: “Cbochanjáuyana ntšamo Bëngbe Bëtsabe amëndayana yomnana. Endmëna ntšamo canÿe réyëftaca tojanopasacá. Cha yojábošena chabe oservénënga crocénana jtsëtjañana.

24 Jtsëtjañama yojóntša orna, canÿe boyabása imojuánatse, chë réybioye mallajta crocénana ibnandebena.

25 Chë oservená tondaye yonjábomna chë ndebënana jëtsjájuama; asna chë rey yojamánda cha chamotsiye nÿets

tempo nÿe ínÿabiama chaotsoservénama, chabe shema y chabe básengnaca, y lempe ntšamo yojanbomncánaca, y chca chë ndebénama jtopágama.

26 Chora chë oservená chë reybe shecuatšentše vojoshamentsiye y ibojtseimpáda: “Taita, Diosmanda šmotsëuantajema. Atše lempe cbochanjétséntšabuachiye ca.”

27 Chë reyna chë boyabásabiama ibojóngmia; as chë ndebénana ibojtseperdóna y ibojétsboshjona.

28 “Chë oservenana chentšana yojésebozna y benachiñe inÿe oservenáftaca ibojenbetše, cach mandadbiama trabajayá. Chë inÿe oservenana nÿe batšatema crocénana chábioye ibnandebena. Chora chë oservená chë enutábioye tamošajentšana ibojishache y ibojóntša jtsëtajuashbebiana y mëntšá ibojauyana: ‘¡Ndebénana šmatséntšabuaché ca!’

29 Chora cha chë oservenabe shecuatšentše vojoshamentsiye y ibojtseimpáda: ‘Diosmanda šmotsëuantajema. Atše lempe cbochanjétséntšabuachiye ca.’

30 Pero chë oservená ndoñe yonjábosena, sinó yojama chë inÿe oservenábioye cárceloje chamotsétámíama, chë ndebénana candëtsjájëntscuana.

31 Chë inÿe oservénënga chca imojinÿe ora, puerte yojóngmia y imojá lempe ntšamo yojopasacá chëngbe rey jacuéntama.

32 As chë rey yojamánda chë boyabása jobetšana, y ibojauyana: ‘¡Puerte bacna oservená! Sconjaimpadáyeca, nÿets ndebénana tcbontseperdoná.

33 Acnaca cachcá cmondmëna chë cach aquécá muentša trabájayabiama jóngmiana, ntšamo atše acbiama šonjongmecá ca.’

34 Y tša chë rey ibojtsetna; as yojamánda jabuache chamotsetsetšená nÿets ndebénana candëtsjájuantscuana ca” —Jesús tojanacuntá.

35 Chora Jesús tojánayana: “Atšbe Taitá, celoca endmëná, cachcá tšëngaftangaftaca echanjama, tšëngaftangbe catšata ndoñe ndegombre nÿets ainánaca šmonjaperdonase ca.”

## 19

*Ndayá Jesús tojanabuatambá chë bouamnënga tmojtsenëtšenama*

*(Mc 10.1-12; Lc 16.18)*

1 Chë soyënga tojánayanentšana, Jesús Galilea luarentšana tojtsanoñe y Judeoye tojánashjango, Jordán chenguánoica.

2 Ba entšanga tmojanasto y chentše šoquënga tojanashná.

3 Básefta fariseunga Jesúsbioye tmojanobconá y jisháchichiyama mëntšá tmojantjá: —¿Queojtselesenciana canÿe

boyá n̄ye ndayám̄naca chabe shémbioye cachcá jeson̄yayama ca?

<sup>4</sup> As Jesús tojanéjua: —¿Tšëngaftanga ndoñe chë Bëngbe Bëtsabe uabemana palabrenguiñe šmëndualía, Bëngbe Bëtsá, chë entsanga tojanabiamá, quem luare jobojátšama ora “boyá y shema tojánabiamama”?

<sup>5</sup> Y Bëngbe Bëtsá tojánayana: “Chíyeca boyabása chabe taitá y chabe mamá echanjésabashejuana, chabe shémaftaca jenútanama, y chë útata mo can̄yáca bochántsemna ca.”

<sup>6</sup> Y chca, ya ndoñe útata quebochátsmëna, sinó mo n̄ye can̄yáca. Chcasna, entsá ndoñe chaondëndbema ndayá Bëngbe Bëtsá mo can̄yiñcá tojéftsema soye ca —Jesús tojánayana.

<sup>7</sup> Chora chë fariseunga tmojanianyana: —¿As, ndáyeca Moisés tojanmandá, chë shémbioye can̄ye uabemana tsbuanácha juiyiyana jtsenëtsenama y cachcá jeson̄yayana ca?

<sup>8</sup> Y Jesús tojanéyana: —Tšëngaftanga Bëngbe Bëtsabe mandënga jóyëngacñama ndoñe quešmátsboše causa, Moisés tmojanalesenciá shémbioye jesëtsenana. Pero quem luare jobojátšama orna, ndoñe chca quenjatsmëna.

<sup>9</sup> Atše cbëyana, nda chabe shémaftaca tbojtsenëtsena y chca tojopasá ndoñe chë shema chabe boyábioye ín̄yáftaca tbontseingñé causa, y chë boyá ín̄yáftaca tojtóbouamasna, cha chë natsana shémbioye ín̄yáftaca jtseingñayana ca —Jesús tojánayana.

<sup>10</sup> Chora chabe uatsjëndayënga tmojanianyana: —Chca chë boyá y shémaftaca tojtsemnësna, ndoñe tšabá yontsemna jobouamayana ca.

<sup>11</sup> Y Jesús tojanéyana: —N̄yetscanga ndoñe quemátobena chë palabrenga jóyëngacñana, n̄ye chë Bëngbe Bëtsá tojama jóyëngacñama chamobenama, chëngna aiñe.

<sup>12</sup> Ba soyënga comna ndaye causa chë boyabásenga ndoñe ntsobenana jobouamayana. In̄yënga jón̄ynana jobouamayama ndobenënga, ín̄yëngbioye cach entsanga jábiamana jobouamayama ndobenënga y ín̄yëngna, n̄yets tempo n̄ye Bëngbe Bëtsabe amëndayama oservena causa ca —tojanéyana.

*Jesús, basetémëngbiama Bëngbe Bëtsábioye tbojanimpadá  
(Mc 10.13-16; Lc 18.15-17)*

<sup>13</sup> Entšanga basetémënga Jesúsbioye tmojanënatse, cha chauabojajuama y Bëngbe Bëtsábioye chëngbiama chaboimpadama. Pero chë uatsjëndayëngna tmojanontšé chë basetémënga unachayënga jtsëcácanana.

<sup>14</sup> Chora Jesús tojanéyana: “Cachcá món̄yaye chë basetémënga átšbioye chamuabo y ndoñe matëuyanana;

er Bëngbe Bëtsabe amëndayana endmëna mo quem basetemëngcá imomnëngbiamca.”

<sup>15</sup> As chë basetemënga tojánabojajo, Bëngbe Bëtsá jaimpádase; y chentšana cha tojtsanoñe.

*Canÿe bomna bobontse Jesúsbiöye tojána  
(Mc 10.17-31; Lc 18.18-30)*

<sup>16</sup> Chentšana, canÿe boyabása tojána Jesús jinÿama y mëntšá tbojantjá: —Buatëmbayá, ¿ndaye tšabe soye chjama chë nÿetsca tescama yomna tšabe vida jtsebonnama ca?

<sup>17</sup> Y Jesús tbojanjuá: —¿Ndáyeca chë tšabe soye ndayá bétsemnama šcojtsetjaná ca? Tšabia nÿe canÿa endmëna: Bëngbe Bëtsá. Aca chë nÿetsca tescama yomna tšabe vida jtsebonnama tcojtsebošëse, mandënga cochtsobedecena ca.

<sup>18</sup> Chora chë bobontse tbojantjá: —¿Ndaye mandënga ca?

Y Jesús tbojanjuá: —“Ndoñe catjóba, acbe shema ínÿaftaca ndoñe cattseingñaye, ndoñe catjatbëba, ndoñe catjuaboínÿena.

<sup>19</sup> Acbe bëtsétsata stëtsoye ndoñe catjáquedaye y ndëmua entšánaca cochtsebobonšana ntšamo cach aca cuenobobonshancá ca” —Jesús tbojanijana.

<sup>20</sup> Chora chë bobontse tbojanjuá: —Atše lempe chca nÿets tempo sëndocumplina. ¿Ndayá más šcojtsebuáshbena ca?

<sup>21</sup> As Jesús tbojanijana: —Aca lempe tšabá jamama tcojtsebošëse, motsa, acbe bomna soyënga cochjetsatobuiye y chë crocénana, ndbomnëjmënga cochtsatšataye; chca, bëts uacanana soye celoca cochántsebonna. Chentšana cochjabo y šcochjuasto ca.

<sup>22</sup> Chë bobontse chca tojanuena ora, ngménaca yojtsatoñe, cha corente bomná bemna causa.

<sup>23</sup> Chora Jesús chabe uatsjëndayënga tojanëyana: —Ndegombre cbëyana, puerta totcá entsemna canÿe bomnabiamca Bëngbe Bëtsabe amëndayoye jamashënguama ca.

<sup>24</sup> Chë bomnabiamca cachiñe šcuatayana: Más paselo entsemna canÿe camello chë coshufjentša atëfjnëjana chauachnëngo, y ndoñe canÿe bomná Bëngbe Bëtsabe amëndayoye jamashënguana ca.

<sup>25</sup> Chabe uatsjëndayënga chca tmojanuena ora, puerta ojanánënga imojtsemna y imojtsichamo: —As, ¿nda yochjobenaye atsbocaná jtsemnama ca?

<sup>26</sup> Jesús chënga tojanënÿanÿé y tojanëyana: —Entšanga ndoñe quemátobena jamama canÿa atsbocaná chaotsemnama, pero Bëngbe Bëtsá aíñe, er cha nÿetsca soyënga jamama endobena ca.

<sup>27</sup> Chora Pedro tbojanijana: —Aca contsonÿá, bënga lempe chë fsëndbomna soyënga fsënjésebošjona y ácaftaca fsëntsajna. As, ¿ndayá bënga fchjóyëngacñe ca?



28 As Jesús tojanéyana: —Ndegombre cbéyana, nýetsca quem luarentša soyëngama mo tsmécá jtsemnama tempo chaojobuache ora, chë Bëngbe Bëtsá Entšá tbojanbemá chabe buashinýinýana bëts tšenëšiñe reycá echanjót'bema jtsemándayama; y tšëngaftanga, chë atše šmëstonëngna, chora bnëtsana uta uámana tbemaniñe šmochanjot'biana mo reyëngcá, chë Israeloca bnëtsana uta bëts pamillentša entšangbiana jayanama tšabá o ndoñe tšabá tmonjamama.

29 Y ndëmuanýenga, atše jaserviama tmojëftsebošhona cachëngbe yebna, catšátanga o uabénanga, befta o bebmá, básenga o fshantsënga, chë soyëngama patse soye más mochanjójyëngacñe y chë nýetsca tescama yomna tšabe vídnaca.

30 Pero banga mora uámanënga imomnënga, nduámanënga mochántsemna; y banga mora nduámanënga imomnëngna, uámanënga mochántsemna ca —Jesús tojánayana.

## 20

### *Chë trabájayëngbiana cuento*

1 Mëntsánaca Jesús tojánayana: “Bëngbe Bëtsabe amëndayana endmëna mo canýe bëts jajañe nduiñcá. Chë nduiña canýe te cabá cachëse yojábocna peonga janguanguama, chabe uvas betiyënga jajañe chamotrabajama.

2 Chë nduiño peonga yojánýena orna, imojenóyeunaye canýe tescama canýe denario crocénana jtëbuénayama. As chora yojichamuá chë uvas betiyënga jajoye jatrabájama.

3 Mo base mošenana ora, chë nduiño cachiñe yojábocna y plazoca atsanënga ínýenga yojanýe, tondaye ntsamcá.

4 As yojáuyana: ‘Tšëngaftángnaca atšbe uvas betiyënga jajoye motsajna jatrabájama y ntšamo chašmojamcá cbochtëbuénaye ca.’ Y chë entšanga imojá.

5 Nýetsto ora y bëts mošenana ora, chë nduiño cachiñe yojábocna y cachiñe cachcá yojopása.

6 Mo la cinco ora, chë nduiño cachiñe yojábocna y chenache ínýenga yojánýena, tondaye ntsamcá. As yojátjaye: ‘¿Ndáyeca tšëngaftanga nýets día ntjatrabajacá muentše šmotsomñe ca?’

7 Y chënga imojojuá: ‘Ndocná bënga chešnataimpadá causa ca.’ As chë nduiño yojáuyana: ‘Tšëngaftángnaca atšbe uvas betiyënga jajoye motsajna jatrabájama y cbochtëbuénaye ca.’

8 “Y ya bien jetiñe yojtsemna orna, chë nduiño chabe caporálbioye ibojauyana: ‘Peonga metsachembo y cochtëbuénaye. Chë ústonoye tmojáshjajnënguentsana cochjabojátša y chë natsana tmojáshjajnënga ústonoye ca.’

9 Y chë mo la cinco ora imojáshjajnënga imojobeconá, y cada ona canýe denario crocénana yojtáyentsbuachiye.

10 Chentshana, chë natsana jatrabájama imojáshjajnënga yojsamna jobéconama y chënga imojétsejuabnaye más crocénana mochanóyëngacñe ca. Pero chëngnaca cach canye denario crocénana yojtëbuénaye.

11 Chca imojóyëngacñe orna, chënga imojóntsa chë nduiñbiama bacá ichámuana,

12 mëntšá: ‘Quemënga chë ústonoye tmonjášhajnënga nye canye horatema tmonjatrabajá; ntšamo bënga šcontëbuenacá, cachcá chënga contëbuená y bëngna nýets día jabuache fsënjatrabajá y corente jënýá fsënjauantá ca.’

13 “Pero chë nduiño canya chca yojsichamuábioye ibojojuá: ‘Sobreno, acbiamana ndocna ndoñe tšabe soye chiyatsma. ¿Ndoñe canye denario crocénana canye tescama tbonjenoye-uná ca?’

14 Chcasna, acbe uacanana crocénana mesocñe y motatoñe. Atše sëntseboše chë ústonoye jatrabájama tojashjan-guá jtabuénayana, cachcá ntšamo aca tchojtabuenacá.

15 Chca entsemna, er atše sëndobena atšbe crocénanaca nye ndayánaca jamana. ¿O aca envidia cojtsebojna, atše tšabia tsmënana ca?” —cha vojayana.

16 Chora Jesús tojánayana: “Y chca, chë mora nduámanënga imomnënga, uámanënga mochántsemna; y chë mora uámanënga imomnëngna, nduámanënga mochántsemna ca.”

*Jesús cachiñe tojánayana cha jóbanama y jtayenama*

*(Mc 10.32-34; Lc 18.31-34)*

17 Chënga Jerusalenoye imojtsaye ora, Jesús barie tojánachembo chabe bnëtsana uta uatsjëndayënga y tojanéyana:

18 “Tšëngaftanga šmontsonýá mora bënga Jerusalenoye montsajnama. Chocna chë Bëngbe Bëtsá Entšá tbojanbemá, chë bachnangbe amëndayënga y ley abuátambayëngbe cucuatšifne mochanjáboshjona, y chënga mochanjayana jóbanama cha ibojtsemna ca,

19 y chë ndoñe judiëngbe cucuatšifne mochanjáboshjona chënga chamotsáboyejuanama, chamotjanjama y chamocru-cificama. Pero unga tianoye cha echántayena ca” —Jesús tojánayana.

*Chë Santiago y Juanbe mamabe impadana soye*

*(Mc 10.35-45)*

20 Chentshana, Zebedeobe uaquiñatbe mamá chabe uaquiñátaftaca Jesúsbioye tojanobeconá, chabe shecuatšentše vojoshamentšiyë canye pavorama jaimpádama.

21 As Jesús tbojantjá: —¿Ndayá cojtseboše ca?

Y chë shembása tbojanianana: —Aca reycá chacojtsemánda ora, cochjamánda atšbe uaquiñata chabótbema canya acbe

catšbioica y chë inÿa acbe uañicuayoica, ácaftaca chabotsemándama ca.

<sup>22</sup> Y Jesús tojanējua: —Ntšamo šmontsotjanañama, tsëndata ndoñe quešnátstatsëmbo ca. Ntšamo atše chjasufriacá, ¿tsëndátnaca cachcá jasúfriama tašatjobenaye ca?

Y chata tbojanjuá: —Aíñe, fchanjobenaye ca.

<sup>23</sup> Chora Jesús tojanējua: —Ndegombre, tsëndátnaca atšcá šochanjasúfria, pero atše ndoñe quetsátobena jamándana atšbe catšbioica o atšbe uañicuayoica chašótbemama. Chë útentše entsemna ndëmuanÿengbiana atšbe Taitá tojaprontacá ca.

<sup>24</sup> Chë inÿe bnětsana uatsjéndayënga chca tmojanuena ora, chë uta catšátaftaca tmojanotjayaná.

<sup>25</sup> Chora Jesús chë uatsjéndayënga tojánachembo y tojanējyana: —Tšëngaftanga šmondětatsëmbo, chë ndoñe judiëngbeñe chë reyënga lempe jtsemándayana nÿa mo nduiñënga cuaftsemncá; y chë bětsětsa entšangna chëngbe obenánaca jtsemándayana, ndayánaca jtsaměse, chë inÿe entšanga sempre chamotsayaunanama.

<sup>26</sup> Pero tšëngaftangbeñna ndoñe chca chaondětsemna. Inÿetšá; masna, nda tšëngaftanguentše chë más uamaná jtsemnama tojtsebošá bontsemna chë ínÿyenga jtsaservénana.

<sup>27</sup> Y ndánaca tšëngaftanguentšá chë más uamaná jtsemnama tojtsebošá bontsemna jtsemnana mo nÿe ínÿabiana nÿets tempo oservenacá.

<sup>28</sup> Cachcá, chë Bëngbe Bětsá Entšá tbojanbemá ndoñe chenátabo cha chamotseservénama, ndayá ínÿyenga jabáserviama. Y mo nda ínÿyenga játsebacama cuařjětsajocá, cha echanjóbana, ba entšanga atsebácanënga chamotsemnana ca —Jesús tojánayana.

### *Jesús uta jtanata tojanashná*

*(Mc 10.46-52; Lc 18.35-43)*

<sup>29</sup> Chënga, Jericó běts pueblentšana tmojánbocana ora, ba entšanga Jesús imojtsěstona.

<sup>30</sup> Uta jtanata benache juachañe ibnatbemana. Jesús chějyana yojtsachnějuanama chata tbojanuena ora, tbojanontšé uayebuáchana: —¡Utabná, Davídbentšana Entšá, šmotsalastemá ca!

<sup>31</sup> Entšanga chë jtanátbioye tmojtsaněcácana iytěca chabotsemnana, pero chatna más ibojtsáyebuache: —¡Utabná, Davídbentšana Entšá, šmotsalastemá ca!

<sup>32</sup> As Jesús yojotsaye, chë jtanata tojánachembo y tojanatjá: —¿Ndayá šojtseboše atše tsëndatbiana chjamama ca?

<sup>33</sup> Y chata tbojanjuá: —Utabná, bëndata chabuatěbínÿyana ca.

<sup>34</sup> Jesús chatbiamá tbojanongmé y tojánabuchbojajo. Cachora chë jtanata tšabá yojtëbinÿna y Jesús tmojanasto.

## 21

*Jesús Jerusalenoye tojánashjango*  
(Mc 11.1-11; Lc 19.28-40; Jn 12.12-19)

<sup>1</sup> Ya Jerusalenoca béconana imojtsemna y canÿe pueblo Betfagé ca uabáinoca tmojánashjango, canÿe tjashe Olivos ca uabáinentše. Chora Jesús uta chabe uatsjédayata tojanichamó,

<sup>2</sup> y mëntšá tojanëyana: “Tsëndatbe natsana entsemna base pueblotémoye motsata. Cachora canÿe burrá utsbuaná šochanjínÿena y cháftaca canÿe burrotema echántsemna. Sochjuajafjoná y šochjuánatse.

<sup>3</sup> Nderado nda ndayánaca chacmojáuyanëse, šochjauyana: ‘Bëngbe Utabná bontsájaboto y chentšana camuentše echanjabáisabashejuana ca.’ ”

<sup>4</sup> Chca tojanopasá, cachcá chaotsemnama ntšamo chë Bëngbe Bëtsabe juabna oyebuambnayá tojanayancá. Cha mëntšá tojanábema:

<sup>5</sup> Jerusalén bëts pueblentše oyenënga mëyana:

“Minÿënga, tšëngaftangbe Rey chentše tšëngaftangbioye entsabó, ndoñe mo canÿa cachá bëtsá enobiamnayacá; canÿe búrrbeñe enjaquená;

canÿe burrotémiñe, canÿe uatrabájaye bayabe šešónbeñe ca.”

<sup>6</sup> Chora chë uatsjédayata tbojána y tbojanma ntšamo Jesús tojanamëndacá.

<sup>7</sup> Chë uatsjédayatna chë burrá y chë burrotema tmojanënatse, entšayëjuangá chátbeñe tbojanájatse y chora Jesús chábeñe tojanenoyayé.

<sup>8</sup> Bëtscá entšanga chëngbe entšayá chë benachëjana imojtsëtëtsatsana, y ínÿengna betiyeshënguiñe buacuafjënga imojtsetcoye y chiñe imojtsequëcñá.

<sup>9</sup> Y chë natsana imojtsajñënga y chë ústonoyënga mëntšá imojtsaiuáyebuache: “¡Rey Davídbentšana Entšá matschuanga ca! ¡Corente bendición bomná, chë Bëngbe Utabnabe obenánaca tojabá! ¡Bëngbe Bëtsá celocá matschuanga ca!”

<sup>10</sup> Jesús Jerusalenoye tojánamashëngo ora, nÿetsca entšanga imojtsenbouenana y banga imojtsenotíciaye: —¿Nda mua yojtsemna ca?

<sup>11</sup> Y chë entšanga imojtsëjuana: —Chë Bëngbe Bëtsabe juabna oyebuambnayá Jesús, chë Galileoca pueblo Nazaretocá ca.

*Jesús, Bëngbe Bëtsabe bëtsyebnentšana enënga y obuámnayënga tojtanëbuacna*

(Mc 11.15-19; Lc 19.45-48; Jn 2.13-22)

12 Chentšana Jesús, Bëngbe Bëtsabe bëts yebnoye tojánamashëngo y chë entšanga chentše imojtsena y imojtsobuámnañënga chentšana tojtanëbuacna. Chéntšnaca imojtsemna entšanga canye crocénana enënga, y chë crocénana nÿe Bëngbe Bëtsabe bëts yebnentšama inoservenana. Chëngbe mesëshangá tojtsanenásatajchquëca y chë palomatema enëngbe tšenëšëngnaca.

13 Y tojanëyana: “Bëngbe Bëtsabe uabemana palabrenguiñe cha mëntšá tojánayana: ‘Atšbe bëts yebna echantsabaina átšeftaca encuéntaye yebna ca’; pero tšëngaftangna, atbëbanëngbe oyeniñe chë yebna šmojtsebema ca” —Jesús tojanëyana.

14 Chentšana, Jesús yojtsemnoye Bëngbe Bëtsabe bëts yebnentše, jtanënga y coshetënga tmojanobeconá, y cha tojanashná.

15 Chë bachnangbe más uámana amëndayënga y ley abuátambayënga, Jesús bëts soyënga yojtsamama tmojáninÿe ora, y chë basetëmënga Bëngbe Bëtsabe bëts yebnentše imojtsayebuáchama tmojanuena ora, tša tmojanotjáyananga. Chë basetëmënga mëntšá imojtsáyebuache: “¡Chë Rey Davídbentšana Entšá matschuanga ca!”

16 As Jesús tmojanianana: —¿Ntšamo chë basetëmënga montsichamcá quectsuenana ca?

Y Jesús tojanëjua: —Aíñe, sëntsuenana. Pero, ¿tšëngaftanga Bëngbe Bëtsabe uabemana palabrenguiñe chë soyama ndoñe šmëndualía? Chiñe mëntšá endayana:

Chë basetëmënga y ochóchaye šëšonatëmëngbe cantëngaca aca tcojama entšanga chacmotsatschuanama ca.

17 Chora Jesús chënga tojésanabashejuana y Jerusalenentšana Betania puebloye tojtsanoñe; y chentše chë ibeta tbojánbobinÿna.

*Jesús tojánayana canÿe higo betiye ndoñe más chaondëshájona ca*

*(Mc 11.12-14, 20-26)*

18 Chë te cachëse, Jesús cach bëts puebloye yojtésa ora, tbojánishëntsena.

19 Chora canÿe higo betiye benache juachaca yojinÿe; as choye yojobeconá, pero nÿe ena tsbuanáchënga chiñe yojínÿena. As Jesús chë higo betiyoye tojánayana: “¡Ndocna te más chaondëshájona ca!” Y betesco chë higo betiye tojtsanbuashá.

20 Chë uatsjëndayënga chca tmojáninÿe ora, imojenjnaná y Jesús tmojantjá: —¿Ntšamo chca chë higo betiye canÿe ora tojtsebuashá ca?

21 Y Jesús tojanějua: —Ndegombre cběyana, tšëngaftanga Bëngbe Bětsábeñe ošbuáchiyana šmojtsebomna y chabiamana ainaniñe ndoñe inyetsá šmonjásjuabnase, šmochantsobena jamama ndoñe nye ntšamo atše quem higo betiyeca sënjamcá, sinó quem tjoye, “muentšana mojuaná y uafjájónayoye moshbuetsé ca” šmojayaněse, chca jochnënguana.

22 Y Bëngbe Bětsáftaca chašmojtsencuénta ora, chábeñe jtsošbuáchiyěse, lempe ntšamo chašmojtjañca šmochanjóyëngacñe ca —Jesús tojánayana.

### *Jesusbe obenana*

(Mc 11.27-33; Lc 20.1-8)

23 Chca tojanopasá chentšana, Jesús Bëngbe Bětsabe bėts yebnoye tojánamashëngo. Chentše yojtsabuátambantscuana, bachnangbe amëndayënga y judiëngbeñe bėtsëjemëngcá amëndayënga tmojanobobconá y tmojantjá: —¿Ndaye deréchoca chë contsama soyënga aca cojtsama ca? ¿Chca jtsamama nda mando tcmënjatštá ca?

24 As Jesús mēntšá tojanějua: —Atšnaca canye soye sēntsebomna tšëngaftanga jatjayama, y quešmojojuase, átšnaca cbochjáuyana ndaye deréchoca atše chca stsama.

25 ¿Nda Juan chë Ubayaná tbojanichmó entšanga jubáyama, Bëngbe Bětsá o entšanga ca? —Jesús tojanějua.

Chama chënga tmojanontsé mēntšá enatsėtsnayana: “ ‘Bëngbe Bětsá ca’ chamojojuase, cha šochanjáuyana: ‘As, ¿ndáyeca chë tmojanabuayená soyënguiñe ndoñe šmonjanošbuaché ca?’

26 Pero ndoñe quemuátobena jayanana ‘entšanga ca’; muentša entšangbiama bënga montsauatja, er nyetscanga mondějuabná Juan ndegombre Bëngbe Bětsabe juabna oyebuambnayá yomna ca.”

27 Chcasna chënga Jesús tmojanjuá: —Bënga ndoñe queftsátstatšëmbo ca.

Y as Jesús tojanějua: —Atše cach ndoñe quebochatěyana ndaye deréchoca chca stsama ca.

### *Chë uta uaquiñátbiama cuento*

28 Chora Jesús entšanga tojanatjá: —¿Ntšamo tšëngaftanga quem soyama šmatjayana? Canye boyabása uta uaquiñata yojánabamna, y cánjábioye ibojauyana: “Uaquiñá, mēnté motsa atšbe uvas betiyënga jajoye jatrabájama ca.”

29 Chë uaquiñá ibojojuá: “¡Jama ndoñe quetsátsoše ca!” Pero botamana yojenójuaboye y pronto choye yojá.

30 Chentšana chë taitá chë inye uaquiñábioye cachcá ibojauyana. As cha ibojojuá: “Arseñor, aiñe chanjá ca.” Pero ndoñe yonjá.

31 ¿Chë útatentšana ndëmuanyá tojanma ntšamo chë taitá yojabošcá ca? —Jesús tojanatjá.

Y chënga tmojanjuá: —Chë natsaná ca.

Chora Jesús tojanëyana: —Ndegombre cbëyana, chë Romocama entšángbioye impuesto atjanayënga y chë bacna vida bomna shembásenga, tšëngaftangbiana más montseprontana Bëngbe Bëtsabe amëndayoye jamashënguama.

32 Juan chë Ubayaná tonjánabo tšëngaftanga jábuayenama ntšamo jtsiyenana cmamnama, ntšamo Bëngbe Bëtsá yobošcá, y tšëngaftanga chë tmojanabuayená soyënguiñe ndoñe chešmatanošbuaché; y chë cuenta, chë Romocama entšángbioye impuesto atjanayënga y bacna vida bomna shembásengna aiñe chábeñe montsanošbuaché. Y tšëngaftanga, masque ntšamo chënga Bëngbe Bëtsábeñe imojtsošbuáchema lempe šmojinýese, chë juabnayana ndoñe šmonjatrocá, chábeñe jtsošbuáchiyama ca —cha tojanëyana.

*Chë puerte bacna trabájayëngbiana cuento  
(Mc 12.1-12; Lc 20.9-19)*

33 Mëntšánaca Jesús tojánayana: “Inýe cuento šmochjatuena chašmuatsjínýama: Canýe jajañe nduiño uvas betiyënga yojáje y chë shëconana yojajétja. Chë uvasëšangá juantšëtetjamna canýe base luare yojajutjo y canýe tsbanana jebna soye yojapórma chentše jtsaishanýama. Chentšana, inýe trabájayënga chë jajañe yojárrendaye y chana inýe luaroye yojtsoñe.

34 Chë uvasëšangá juashacama tempo yojobuache orna, chë jajañe nduiño básefta oservénënga yojichamuá chë arréndayënga jáuyanama ntsachetšá chë nduiño ibojtsotocánama.

35 Pero chë arréndayënga chë oservénënga imojishëche: ínýengbioyna imojtsajantšetaye, ínýengbioye imojtsëbaye y chë ínýengbioyna ndëtšbéngaca imojtsatëchënganja.

36 As chë jajañe nduiño chë natsanama más ba oservénënga yojichamuá. Pero chë arréndayënga, ntšamo chë natsanëngaftaca imojamcá, cachcá chora imojama.

37 “Cabana, chë jajañe nduiño cachabe uaquiñá ibojíchmua; as mëntšá yojtsejuabnaye: ‘Atšbe uaquiñá cocayé mochanjóyeunaye ca.’

38 Pero chë arréndayënga chë uaquiñá imojinýe orna, imojeniayana: ‘Mua chë fshantse nduiñbe uaquiñá entsemna. Lempe chabe soyënga mua echanjóyëngacñe. Cuajna, motsóbanga y lempe chabe otocana soyënga bëngbiana echanjoquéda ca.’

39 As chë uaquiñá imojishache, chë uvas betiyënga jajañentšana imojtsábocna y imojtsóba.”

40 Chca jacuéntama tojanpochocá orna, Jesús tojánayana: —Y morna, chë jajañe nduiño chaojabo ora, ¿ntšamo šmojtsejuabná chë arrendayëngaftaca cha yochjama ca?

41 Y chënga tmojanjuá: —Chë puerte bacna arrëndayënga ni mo batšatema ntjalastemaycá echantsëbaye. Chë jajañe ínÿenga echanjárrendaye y chë uvasëšangá juashacama tempo chaojobuache ora, ntšamo chë nduiño chabojsotocancá chënga mochantíyie ca.

42 Chora Jesús tojánayana: —¿Tšëngaftanga ndocna te Bëngbe Bëtsabe uabemana palabra šmëndualía? Chiñe mëntšá endayana:

Chë yebna jebuanënga tmojtsanaboté ndëtsbé, mora chë más bëts uashacuanëšentše entsejájona. Chë soye Bëngbe Utabná, Bëngbe Bëtsá chca tojama, y bënga chama ojnánänënga fsëntsemna ca.

43 Ntšamo chë nduiño chë arrëndayënga chë fshantse echántsabaca y ínÿenga echantsatšataye y chënga chabiamá bëtscá shajuana mochanjatbanacá, cachcá, Bëngbe Bëtsabe amëndayana tšëngaftangbentsána mochantsejuána y ínÿengbiöye mochántsatšataye. Chënga Bëngbe Bëtsabe soyëngama mochanjouena y chë soyëngama ínÿengbiöye mochanjabuayená, Bëngbe Bëtsabe amëndayoye jamashënguama.

44 Ndánaca chë ndëtsbeñe chaojotsatšá, chëbé bochántsatcacaye; y chë ndëtsbé ndábeñnaca chaojótsatše, polvëshe bochántsebema ca —Jesús tojánayana.

45 Chë bachnangbe amëndayënga y fariseunga, Jesús chë jabuátambama cuentënga yojtsëtsësnama, tmojanenótatšëmbona chëngbiamá chca yojtsóyebuambnama.

46 Chora chënga tmojánbošena Jesús jishachana, pero entšangbiamá imojtsauatja; chënga imojanjuabná Jesús Bëngbe Bëtsabe juabna oyebuambnayá yojamna ca.

## 22

### *Chë casamento fiestama cuento*

*(Lc 14.15-24)*

1 Chentšana Jesús tojanontsé cachiñe cuentëngaca chënga jabuátambana. Mëntšá tojánayana:

2 “Cbochanjáuyana ntšamo Bëngbe Bëtsabe amëndayana yomnana. Endmëna mo ntšamo canÿe réyefatca tojanopasacá. Chë rey yojamánda canÿe bëts fiesta jamama, chabe uaquiñabe casamentama.

3 Chora chë rey chabe oservënënga yojichamuá chë ófjanënga jobiatšama, pero chë ófjanëngna ndoñe imonjouena jama.



4 As chë rey inÿe oservénënga yojichamuá y mëntšá yojámëndaye: ‘Chë ófjanënga šmochjúyana, ya saná stseboprontana ca. Sënjamandá, atšbe uacnënga y uamna bayënga minÿicánënga jobáyama y lempe entseprontana; y chamuabo chë casamento fiestama ca.’

5 “Pero chë ófjanënga ndoñe imonjouena. Canÿa, cachabe fshantse inabomnoye yojtsoñe; ínÿana chabe obuámnayinë trabajuama yojtsoñe;

6 y ínÿengna, chë reybe oservénënga imojishëche, jabuache imojtsatsetšenaye y imojtsëbaye.

7 Y chë rey chë soyama yojouena ora, corente ibojtsetna. As chabe soldadënga yojichamuá chë oservénënga obánayënga chamuetsëbáyama y chëngbe bëts pueblo jetsángbotjuama.

8 Chora chabe oservénënga yojáuyana: ‘Lempe entseprontana chë casamento fiestama, pero chë ófjanënga ndoñe quenjatëmerecena moye jabama.

9 Motsajna tsashenangoye y ndëmuanÿéngnaca chašmojánÿenënga, chë casamento fiestama šmochjúbuaja ca.’

10 As chë oservénënga tsashenangoye imojábocana y nÿetscanga imojánÿenënga imojáchembo, cánÿinë tšabe y bacna entšanga, y chca, chë tsbocnanoica jútjena yojtsemna entšángaca.

11 “Chë ófjanënga jánÿama chë rey yojámashëngo ora, chentše cánÿabioye ibojinÿe y chana ndoñe yontsemna ntšamo canÿe casamento fiestama endbetsemncá uichëtjoná.

12 As chë rey ibojauyana: ‘Sobreno, ntšamo canÿe casamento fiestama endbetsemncá ndoñe quecatichëtjona. ¿Ntšamo chca moye tcojamáshëngo ca?’ Pero chë boyabásana nÿe iytëca yojtsemna.

13 As chë rey chë fiestentše ujuatšnayënga yojámëndaye: ‘Shecuatše y cucuatše motsebatsëca y chë ndëbinÿna luaroye, infernoye motsábocna. Chentše puerte echanjenóbošachna y chë tsetšanama juatsašënga echantsenoftëšjojnaye ca’ —cha yojayana.”

14 Jesús chca jacuéntama tojanpochocá ora, mëntšá tojánayana: “Chë fiestama ófjanënga banga montsemna, pero chë bocacánënga choca jtsemnama nÿe báseftanga. Er Bëngbe Bëtsá banga jáchembuana chabe amëndayoye jamashënguama, pero nÿe báseftanga choca mochántsemna ca.”

*Chë Romoca bëts mandadbiama impuesto jtsat-squëcñayama*

*(Mc 12.13-17; Lc 20.20-26)*

15 Chentsana chë fariseunga tmojtsatanoñe y tmojanenoye-uná ntšamo Jesús tojayaniñe cha jisháchichiyana, as chca, mandadëngbeñe cha mal jaquédama.

16 Chama chënga tmojanichamó básefta cachëngbe use-tonënga y ínÿengna Heródesbe ústonënga, Jesús jauyanama: — Buatëmbayá, bënga fsëndëtatsëmbo aca ndegombre soyënga cnetsabuátambama y contsabuatambá ndegombre tšabe vida jtsebomnama, ntšamo Bëngbe Bëtsá yomandacá, y ndoñe jat-uenanana nÿe ntšamo entšanga tmojatichamcá, er acbiama tondaye quenatámana nda más uamaná o nduamaná tomnana.

17 Chcasna, ¿ntšamo catjájua boye? ¿Tšabá tayojtsemna, César, chë Romoca bëts mandadbiama, bënga impuesto jtsat-squëcjayana o ndoñe ca?

18 Jesús yojtsetátšëmbo chëngbe bacna juabnëngama; chíyeca tojanëyana: —Bacna entšanga, ntšamo ndegombre šmojuabnacá ndinÿinÿayënga. ¿Ndáyeca tšëngaftanga šmojtseboše chë sóyeca atše jisháchichiyama?

19 Chë šmatsquëcjná crocénana šminÿinÿé ca.

As canÿe crocénana tmojanoyé.

20 Jesús tojanatjá: —¿Ndabe jubiá quem crocenániñe yojtsemna, y ntšamo muentše entsabemancá nda chca iuabaina ca?

21 Y chënga tmojanjuá: —Césarbe jubiá; cha chca enduabaina ca.

As Jesús tojanëyana: —Césarbioye šmochtoyiye cha ibotocana soye; y Bëngbe Bëtsana cha ibotocana soye ca.

22 Chënga chca tmojanuena ora, ojnánänënga imojtsemna. As chënga cachcá Jesús tmojanonÿá y tmojtsatanoñe.

### *Obanënga jtayenama Jesús tmojantjá*

*(Mc 12.18-27; Lc 20.27-40)*

23 Báseftanga judiëngbe amëndayënga, saduceos ca uabáinënga, imojanjuabná chë obanënga ndocna te ntayenana ca. Cach te, chë impuestama Jesús tojanoyebuambá te, básefta saduceunga tmojána y mëntšá tmojantjá:

24 —Buatëmbayá, Moisés tojánayana nderado canÿe boyá tojóbana básenga ntjëftasabashejuancá, ana chabe uabentsá jtsemnana chë shémaftaca jtobouamayana, chca, chabe uabochená obanabiama básenga jtsabamnana ca.

25 Chcase, canÿe bëngbentše canÿsëfta catšátanga monjamna. Chë natsaná tonjanobouamá y tontsanóbana. Básenga ndoñe quenjátabamna, chíyeca chë shemna chë uabentsáftaca tontanobouamá.

26 Y cháftaca cachcá tonjanopasá, chë inÿe uabentsáftaca cachcá, y cachcá chë ínÿengaftaca y chë ústonoca uabentsáftacnaca.

27 Y chentšana chë shembásanaca tontsanóbana.

28 Y morna, chë obanënga chamojtayena ora, ¿ndabe chë canÿsëfta catsatanguentsabe shema chë shembása yochtsemna, nÿetscanga cháftaca tmojanobouamase ca? —chënga tmojantjá.

29 As Jesús tojanéjua: —Ntšamo tšëngaftanga šmonjayancá ndmëncá šmontsoyebuambná, Bëngbe Bëtsabe uabemana palabra, ni chabe obenanama ndoñe quecmátësertana causa.

30 Chë obanënga chamojtayena ora, ni boyabásenga, ni shembásenga quemochatóbouamnaye, y chca, chënga mochántsemna mo celoca angelotemëngcá.

31 Y chë obanënga jtayenamna, ¿ndoñe šmëndualía ntšamo cach Bëngbe Bëtsá chabe uabemana palabrenguiñe tojánayanama? Cha tonjánayana:

32 “Atše sëndmëna Abraham, Isaac y Jacobëbe Bëtsá ca.” Bëngbe Bëtsá chca jayanëse entsichamo cha ndoñe yondmëna obanëngbe Bëtsá, sinó aina entsangbe Bëtsá ca, er masque chënga tmojanóbana, chënga cabá Bëngbe Bëtsáftaca mondoyena ca —Jesús tojánayana.

33 Chë entsanga chca tmojanuena ora, ojnánánënga imojtsemna ntšamo Jesús yojtsabuátambama.

*Chë más bëts uámana mando*  
(Mc 12.28-34)

34 Jesús chë saduceúngbioye iytëca tojánabiamama fariseunga tmojántatšëmbona ora, chënga tmojánenefjna,

35 y canÿa chënguentsá, ley abuatambayá, Jesúsbioye jisháchichiyama tbojantjá:

36 —Buatëmbayá, ¿Moisesbe leyiñe ndayá chë más bëts uámana mando yomna ca?

37 As Jesús tbojanjuá: —“Utabná Bëngbe Bëtsá cochtsebobonshana nÿets acbe ainánaca, nÿets espíritoca y nÿets juábnaca.”

38 Chë soye endmëna chë más bëts uámana mando y nÿetsca mandëngama chë natsanoca entsemna.

39 Y quem inÿe soye, chë natsana mandcá endenoparecena. Endayana: “Ndëmua entsánaca cochtsebobonshana, ntšamo cach aca cuenobobonshancá ca.”

40 Chë uta mandentšana endóbocana lempe ntšamo Moisesbe leyiñe endayancá y ntšamo chë Bëngbe Bëtsabe juabna oyebuambnayënga mondbetsabuatambacá ca —Jesús tbojaniyana.

*¿Cristo, ndabe entsábentšana yomna?*  
(Mc 12.35-37; Lc 20.41-44)

41 Chë fariseunga cabá cachentše imojtsemnëntscuana,

42 Jesús tojanatjá: —¿Ntšamo šmojtsejuabná chë Bëngbe Bëtsabe Uámana Uabuayanabiamana, chë Cristo? ¿Ndábentšana cha iuabó ca?

Y chënga tmojanjuá: —Davídbentšana ca.

43 As Jesús tojanëyana: —¿Ntšamo chca nántsemna, cach David, chë Uámana Espíritbe mándoca, Crístbioye Utabná ca tbojtsabobuátmëse? David mëntšá tojánayana:

44 Bëngbe Bëtsá, atšbe Utabná Crístbioye tbojanianyana:

atšbe catšbioica mótbema,

atšbe obenánaca acbe uayayënga acbe cucuatšíñe chamonedama chjamëntscuana ca.

45 ¿Ntšámose Cristo, Davídbentšana Entšá nántsemna, cach David “Utabná ca” chábioye tbojtsabobuátmëse ca? —Jesús tojanatjá.

46 Chora ndocná tonjanobená ni mo canýe palabra jojuana. Y chë tescana ndocná yonjenñémua Jesús más jatstjanayama.

## 23

*Jesús chë fariseungbiamana y ley abuátambayëngbiamana tojánayana, chënga ndoñe tšabá montsama ca*

*(Mc 12.38-40; Lc 11.37-54; 20.45-47)*

1 Chora Jesús, entšanga y chabe uatsjëndayënga mëntšá tojanëyana:

2 “Chë fariseunga y chë ley abuátambayënga cmondbétsabuatambaye ntšamo Moisesbe leyënguñe iuayancá.

3 Chcasna, tšëngaftanga cmontsamna chënga joyaunayana y ntšamo tmojauyancá, cachcá jtsamana. Pero ndoñe šmattsama ntšamo chënga mondbetsamcá, er chënga ndoñe ntsamana ntšamo mondbetsabuatambacá.

4 Mo canýe entšá, couáybioye uauta uasmanësha juasmayana y cachá tondaye tontsasmancá, chënga entšanga jtsamëndayana bëtscá mandënga chamotsocumplínama, pero cachënga ni mo batšatema ntsamana chë mandënga jtsocumplínama.

5 Chënga lempe jtsamana nýe entšanga chamotsënyama. Chënga chë ínýengbiamana más Bëngbe Bëtsá imobobonshana ca chamotsejuabnama, chënga monduamana tëntša sëndachëjënguñe juabemana ntšamo Bëngbe Bëtsabe uabemana palabrënguñe endayancá, y juentsaca y buacuatsíñe chëjënga jenábatsécana y sibiajana nýa tëntša uasebtotonanëjuangá jtsichëtjonana.

6 Chënga jtsebošana chë fiestënguiñe nÿa quëfseroca jtsetbiámanama, y chë judiëngbe enefjuana yebnënguenache chë más uámana luarënguiñe.

7 Chënga jtsebošana tsáshenañe entsanga nÿa respétoca chamotsacheuanama, y ‘abuátambayënga ca’ chamotsachembuanámnaca chënga jtsebošana.

8 “Pero tsëngaftangna ndoñe smattseboše entsanga ‘abuátambayënga ca’ chacmotsachembuanama, er nÿetsca tsëngaftanga mo catšatangcá šmondmëna, Bëngbe Bëtsábeñe betsošbuachéyeca, y nÿe canÿa endmëna tsëngaftangbe Buatëmbayá.

9 Tsëngaftanga ‘taitá ca’ chë ley abuátambayënga šmondbëtsachembuana, pero tsëngaftanga ndocna quem luarentsá ‘taitá ca’ smattsechembuana; tsëngaftanga nÿe canÿe Taitá šmondbomna, chë celoca endmëná.

10 Ndoñe smattseboše entsanga ‘mándayënga ca’ chacmotsachembuanama; er nÿe canÿe Mandayá endmëna y cha Cristo endmëna.

11 Nda tsëngaftangbeñe chë más uamaná tojtsemná bontsemna chë ínÿenga jtsaservénana.

12 Nda cachá bëtsá tojtisenobiamná, nduamaná mochántsebema; y nda cachá nduamaná tojtisenobiamnana, más bëtsá mochanjábema.

13 “¡Tša lastema tsëngaftangbiana, bacna entsanga ntšamo ndegombre šmojuabnacá ndinÿinÿnayënga fariseunga y ley abuátambayënga! Tsëngaftanga smontsama entsangbiana puerta totcá chaotsemna Bëngbe Bëtsabe amëndayoye jamashënguama, mo bësása cuaftsebiatamiancá. Pero ni cach tsëngaftanga choye quešmátamashjuana, ni ínÿenga choye jamashënguama bošëngbioye chama quešmátalesenciana.

14 ¡Tša lastema tsëngaftangbiana, ntšamo ndegombre šmojuabnacá ndinÿinÿnayënga fariseunga y ley abuátambayënga! Tsëngaftanga chë viudángbioye chë tmobomna soyënga jtsabacayana, y entsangbe delante tšabá chacmotsëñÿama y chënga šmojtsaíngñayama ndoñe chamondëtsetatsëmbuamna, Bëngbe Bëtsáftaca tša jtsencuéntayana. Chë causa, Bëngbe Bëtsá tsëngaftanga más jabuache ínÿengbiana cmochanjácastigaye.

15 “¡Tša lastema tsëngaftangbiana, bacna entsanga ntšamo ndegombre šmojuabnacá ndinÿinÿnayënga fariseunga y ley abuátambayënga! Tsëngaftanga ba luarënguenache jtsajnana canÿa tsëngaftangbe ustoná onguayiñe, y šmojinÿena ora, tsëngaftanga jamana cha chaotsemna tsëngaftangbiana uta soye más merecido buajoná infierno ye chaotsama.

16 “¡Tša lastema tšëngaftangbiamia; tšëngaftanga šmondmëna mo jtanënga entšanga unachayëngcá! Tšëngaftanga šmondbëtsichamo: ‘Nda ínÿabioye tbojašbuachená ndayánaca jamama y tojayana chë Bëngbe Bëtsabe bëts yebnama chca jamama ca, cha ndoñe ntsemnana chë tbojašbuachená soye jamama ca. Pero chë Bëngbe Bëtsabe bëts yebnentša castellanama cha tojajurasna, aíñe jtsemnana chë tbojašbuachená soye jamama ca.’

17 ¡Obëjëmënga y nduabínÿnënga! ¿Ndayá más uámana soye yomna, chë castellano o Bëngbe Bëtsabe bëts yebna? Chë castellano Bëngbe Bëtsabiamia josérviamia jtsemnana, nÿe Bëngbe Bëtsabe bëts yebnocá chë castellano tojtsemnayeca.

18 Tšëngaftanga mëntšánaca šmondbëtsichamo: ‘Nda ínÿabioye tbojašbuachená ndayánaca jamama y tojayana chë altarama chca jamama ca, cha ndoñe ntsemnana chë tbojašbuachená soye jamama ca. Pero chë Bëngbe Bëtsabiamia altaroca tojtsejájona soyëngama tojajurasna, aíñe jtsemnana chë tbojašbuachená soye jamama ca.’

19 ¡Nduabínÿnënga! ¿Ndayá más uámana soye yomna, chë Bëngbe Bëtsabiamia tmojacjá soyënga o chë altar? Chë tmojacjá soyënga Bëngbe Bëtsabiamia josérviamia jtsemnana, nÿe chë altaroca chë soyënga tmojacjáyeca.

20 Nda chë altarama tojajurá, ndoñe nÿe chë altarama ntsejúraryana. Lempe chë altar juatsboca tojtsemnámnaca cha jtsejúraryana.

21 Nda Bëngbe Bëtsabe bëts yebnama tojajurá, ndoñe nÿe Bëngbe Bëtsabe bëts yebnama ntsejúraryana. Bëngbe Bëtsabiamia cha jtsejúraryana, cha chë chentše oyená.

22 Y nda celocama tojajurá, chentše reycá Bëngbe Bëtsabe tbemaniñama cha jtsejúraryana y cachora Bëngbe Bëtsabiámncá, chentše yotbemanabiamia.

23 “¡Tša lastema tšëngaftangbiamia, bacna entšanga ntšamo ndegombre šmojuabnacá ndinÿinÿnayënga fariseunga y ley abuátambayënga! Tšëngaftanga Bëngbe Bëtsabiamia jtsequëcjnyana chë jajañentša sananga bnëtsanentšana canÿe soye; chë binche matatëmënga menta, anis y chë cominentša sanágnaca. Pero tšëngaftanga nÿe batšá jtsamana chë leyentša más uámana soyënga, mo chë nÿetsca entšanga cachca derechënga chamotsebomnama, ínÿenga jtsalastemánana y chë tšabe soyënguiñe jtseyenana, chca, entšanga tšëngaftangbeñe chamotsošbuáchema. Chë soyënga cocayé cmontsamna jtsamama, chë inÿe tšabe soyënga amana ntjajbanacá.

24 ¡Jtanënga entšanga unachayënga! Tšëngaftanga chë base soyënga jamama puerte jtseñócochinÿenana, pero

jtsebnětjombana uámana soyënga jamama, Bëngbe Bëtsá tojanmandá soyënga. Y chca, tšëngaftanga šmontsemna mo canye entšá ndayá tojtsabuchetjácá bayëfja jtsejuánama, ndoñe ntjasama, jasama ndoñe yondëlesenciana ca chë leyiñe iuayana causa. Pero šmondmëna mo entšangcá ndëmuanyënga camellbe mëntšena jasana, y chë leyiñe endayana chcana jasama ndoñe yondëlesenciana ca.

25 “¡Tša lastema tšëngaftangbiana, bacna entšanga ntšamo ndegombre šmojuabnacá ndinjinynayënga fariseunga y ley abuátambayënga! Tšëngaftanga šmondmëna mo entšangcá ndëmuanyënga platillëjënga y tazëšënga shjoicajana jtsóbojabiana, pero tsoyna nye cachcá jonýayana. Tšëngaftanga tša jtsentšénana entšangbiana mo tšabengcá jtsinynama, pero tšëngaftangbe ainanentše jútjena entsemna nye jtsatbëbanama y nye bëtscá soyënga jésebomnana juabnëngaca.

26 ¡Nduabinyna fariseo! Cochshetsajbaná ainaniñe bacna soyënga bomnana. Chamna nye tšabe juabnënga chentše cochtsebomna, y lempe ntšamo chacojtsamcá y entšanga chamojtsonýacá tšabá echántsemna.

27 “¡Tša lastema tšëngaftangbiana, bacna entšanga ntšamo ndegombre šmojuabnacá ndinjinynayënga fariseunga y ley abuátambayënga! Tšëngaftanga šmondmëna mo obanëngbe cuevëshënga botamana uafjantsenëshëngcá; shjoicajana puerta botamanëshënga, pero tsoyna jútjena obanëngbe betashëngaca y janjuana soyëngaca.

28 Tšëngaftanga chca šmondmëna: entšangbe delante tšëngaftanga jtsinynana mo nyetsca soyënguiñe tšabá amëngcá, pero ndoñe chca quešmátsmëna. Tšëngaftangbe ainanentšna chë bacna entšanga ntšamo ndegombre tmojuabnacá ndinjinynayëngcá y chë bacna soye amëngcá šmontsejuabná.

29 “¡Tša lastema tšëngaftangbiana, bacna entšanga ntšamo ndegombre šmojuabnacá ndinjinynayënga fariseunga y ley abuátambayënga! Tšëngaftanga jtsamana chë Bëngbe Bëtsabe juabna oyebuambnayënga tempsquënga bëtsëtsa entšanga chamotsemnana, chëngbe cuevëshënga jtsatspórmayëse. Tšëngaftanga cachcá jtsamana chë nyetsca soyënguiñe tšabá amëngaftaca, chë chëngbiana jtenójuaboyama pormániñe jtsatsbótamnyëse;

30 y chentšana šmondbëtsichamo: ‘Bënga chë bëngbe bëtsëjëmëngbe tempo maftsjanienëse, chëngbioye ndoñe matmënjanejabuache chë Bëngbe Bëtsabe juabna oyebuambnayënga jobáyama ca.’ Pero mo chëngcá canye buayenana sóyeca tmojabëngbioyna ndoñe ntsayaunanana.

31 Pero ntšamo šmojtsamcá jtsamëse, tšëngaftanga šmontsinyanyná ndegombre chë Bëngbe Bëtsabe juabna

oyebuambnayëngbioye tmojanëbayëngbe entšanguentšana šmomnana. Y mora cach tšëngaftangbe bëts taitangcá tšëngaftanga šmontsana.

<sup>32</sup> ¡Mopochocanga jamama chë bacna soyënga, chë tšëngaftangbe bëts taitanga tmojanbojatsé jamama soyënga!

<sup>33</sup> “¡Mëtšcuayënga, mëtšcuaye entšanga! ¿Ndayá šmochjama chë infernoca uabouana castigüentšana jótsbocama?

<sup>34</sup> Chíyeca atše tšëngaftangbioye chanjichamuá Bëngbe Bëtsabe juabna oyebuambnayënga, tšabe soye tatšëmbënga y abuátambayënga. Pero tšëngaftangna, ínÿengbioye šmochantsëbaye y šmochanjácrucificaye; ínÿengbioyna chë enefjuana yebnënguenache šmochanjátsetšenaye y nÿetsca bëts pueblënguenache chënga šmochandúcmena.

<sup>35</sup> Chíyeca, tšëngaftangbiana nÿets castigo echántsemna chë nÿetsca soyënguife tšabá amënga tmojëftsóbanama; Abel, chë jóbanama chabotsemnana tondaye tonjanmá, tmojanóba orscana y Zacarías tmojanóbantscoñe. Zacarías, Berequíasbe uaquiñana, Bëngbe Bëtsabe bëts yebnentše tmojanóba, altar y chë entšanga Bëngbe Bëtsábioye imojánadorana luariñe.

<sup>36</sup> Ndegombre cbëyana, lempe chë soyëngama castigo morsca entšangbiana echántsemna ca” —Jesús tojánayana.

*Jesús tojanošachna Jerusalemoca entšangbiana  
(Lc 13.34-35)*

<sup>37</sup> Mëntšánaca Jesús tojánayana: “¡Jerusalenentša entšanga, Jerusalementša entšanga! Tšëngaftanga chë Bëngbe Bëtsabe juabna oyebuambnayënga jtsëbáyana y chë Bëngbe Bëtsabe ichmónënga ndëtsbéngaca jtsatëchënganjana jtsëbáyama. Bueta soye atše sënjábošena tšëngaftanga átšbioye júbuajana, mo canÿe tuamba chabe bolletotémënga chabe juatëngmiásha tajsoye cuaftajayecá, pero tšëngaftanga ndoñe chešmátsbošena.

<sup>38</sup> Y šmochjinÿe, atše mora cachcá cbochanjesënÿaye, y chca, atšna enánanga cbochanjésabashejuana, mo canÿe yebna cachcá tcojesonÿá y énañe tcojeseboshjoncá.

<sup>39</sup> Y atše cbëyana, ndegombre tšëngaftanga morscana atše ndoñe más quešmochátinÿe; y atše šmochántinÿe mëntšá chašmojtsichamo ora: ‘¡Corente bendición bomná, Bëngbe Utabnabe obenánaca tojabá ca!’ ”

## 24

*Jesús tojánayana chë Bëngbe Bëtsabe bëts yebna lempe  
mochjánpochocama  
(Mc 13.1-2; Lc 21.5-6)*



<sup>1</sup> Jesús Bëngbe Bëtsabe bëts yebnentšana tojëftsanbocna y ya yojtsaye. Chorna chë uatsjëndayënga chábioye tmojanobeconá y tmojanontsé nyetsca chentša bëts yebnënga cha jinÿinÿiyana.

<sup>2</sup> Chora Jesús tojanëyana: “Tšëngaftanga lempe šmontsonÿá. Ndegombre šcuayana, quem Bëngbe Bëtsabe bëts yebnentše ndoñe queochaisoquéda ni mo canÿe ndëtsbé inÿe ndëtsbé juatsboye. Lempe mochantsepochoća ca.”

*Ntšamo yochtsemna quem luare jopochócama tempo chaojt-sobeco ora*

*(Mc 13.3-23; Lc 21.7-24; 17.22-24)*

<sup>3</sup> Chentšana chënga Olivos tjashoye tmojána. Jesús choca yojtsetbemana; as, chë uatsjëndayënga tmojanobobeconá nyë chëngbiama jatjayama, mëntsá: –Smëyana. ¿Mocna ora chë soyënga Bëngbe Bëtsabe bëts yebnocá yochjochnëngo ca? ¿Ndayá yochjochnëngo bënga jinÿanÿiyama aca jésabama ora ya yojtsemnama y quem luare jopochócama tempo yojtsobecuama ca?

<sup>4</sup> As Jesús tojanjuá: –Cuedado šmochtsebomna ndocná chacmondáingñema.

<sup>5</sup> Banga mochanjabo y mochantsabíchamo chënga atše imomna ca. Mochántsihomo: “Atše chë Cristo sëndmëna ca” y chca, ba entšángbioye mochanjáingñaye.

<sup>6</sup> Tšëngaftanga šmochanjouena canÿe luarentša entsanga inÿe luaroca entšángaftaca imojtsentsjanama y nderado mochjentsjámna. Ndoñe matauatjëngana, er chca jochnënguama endmëna; pero masque chcase, quem luare jopochócama cabá ndoñe queochásmëna.

<sup>7</sup> Canÿe luarentša entsanga inÿe luaroca entšángaftaca mochántsientsjanaye, y canÿe amëndayábentša entsanga inÿe amëndayábioća entšángaftácnaca; y ba luarënguñe shëntsana echanjóshjango y chentša fshantsënga echanjuangmëmana.

<sup>8</sup> Masque chca jasúfriase, más chcoye cabá más mochanjatssúfria.

<sup>9</sup> “Chora, entsanga inÿengbe cucuatšiñe cmochanjábashejuana chacmatsetsenama y cmochantsëbaye; y atšbe ústonënga bëtsemnayeca nyetsca luarënguentsha entsanga cmochantsëbuayënja.

<sup>10</sup> Chë tempo, banga mora átšbeñe ošbuáchiyënga, ošbuáchiyana mochantsajbaná y mochantsenáboyënja y jóbanama inÿengbe cucuatšiñe mochántsenboshjuana.

<sup>11</sup> Banga Bëngbe Bëtsabe ndoñe ndegombre juabna oyebuambnayënga mochanjábocana y ba entsanga mochanjáingñaye.

12 Njětšá bacna juabnënga entšangbe ainaniñe echanjésemna, y chë causa banga ndoñe quemochátenbobonshana.

13 Pero nda njëts tempo átšbeñe ošbuachiyá totsomñe, ats-bocaná echántsemna.

14 Y quem tšabe noticiënga Bëngbe Bëtsabe amëndayama njëts quem luariñe entšangbioye mochántsabuyaiynaye, chca, chë ndegombre soyënga Bëngbe Bëtsabiamama chënga chamot-setatšëmbuama. Chentšana cocayé quem luare jopochócama tempo echántsemna.

15 “Chë Bëngbe Bëtsabe juabna oyebuambnaya Daniel chë puerte uabouana soye tojëftsanabema chë pochócaye soyama. Tšëngaftanga chë puerte uabouana soye chë uámana ca uabaina luarentše chašmojinýe ora (nda tojtsalía, chabosertá), šmochántsetatšëmbo chë puerte ngménana tempo tojóshjanguama;

16 entšanga Judeoca chamojtsemnënga, batsjabengoye chamotsacheta.

17 Y nda cachabe yebnentša tsbanánoca chaojtsemna, chaotsachá chocana ntjtastjangcá ndayá tsoicana jëftsábocnama.

18 Y nda jajoca chaojtsemna, yebnoye ndoñe chaondëta ni mo chabe quëfsaiya jesácñama.

19 ¡Tša lastema chë tempo ngomámanënga chamojtsemnëngbiama o ochóchaye šešonga chamojtsabamnëngbiama!

20 Bëngbe Bëtsá šmochtseimpadana chë tšëngaftanga jachetama, uaftena tempo ora o canýe ochnayté ndoñe chaondëtsemnama.

21 Chca, chora puerte ngménana echántsemna. Tša jabuache ngmenancá, quem luare jaborjásama orscana y méntscoñama y más chcoye, cachcá ngménana ndoñe ntjamnana.

22 Chë puerte ngménana tempo yapa bën ndoñe chaondëtsemnama Bëngbe Bëtsá ndoñe tonjalesenciase, ndocná quentatsbocá; pero chabe ubuáyanënga cha corente endábabuanýeshanayeca, echanjama yapa bën tempo ndoñe chaondëtsemnama.

23 “Chora nderado nda cmochanjáuyana: ‘Minýënga, muentše chë Cristo entsemna’, o ‘Choca cha entsemna ca’, chë soyëngama ndoñe šmattsayaunana.

24 Chora mochanjábocana ndoñe ndegombre uámana ubuáyanënga, chënga Cristo imomna ca jtsichámëse, y Bëngbe Bëtsabe ndoñe ndegombre juabna oyebuambnayëngnaca; y chënga mochanjama bëts soyënga chëngbe obenana jinýanýiyama, entšanga jáingñama, y tmojobenase, chë Bëngbe Bëtsabe bocacánëngnaca.

25 Atše ya chama tbonjabuayená chë tempo cabá ndóshjango ora.

26 Chiyeca, nderado chënga chacmojáuyana: ‘Minyënga, chentše chë Cristo entsemna, entšanga ndoyenoca ca’, choye ndoñe šmatjá; o chacmojáuyana: ‘Cha canye tsoca entsemna ca’, chama ndoñe šmattsayaunana.

27 Er ntšamo chë tojatcuinye ora, shinye bocanoicana y shinye uenatjëmbambanëntscoñe jabuashinÿinÿenancá y ba luarënguenache entšanga jobenayana jinÿama, cachcá, Bëngbe Bëtsá Entšá tbojanbemá quem luaroye chaojésabo te, entšanga nyets luarentše mochanjobenaye cha jinÿama.

28 Canye obanabe cuerpo tojtsemnama chë gallinacënga tmojátatšëmbona y cachora chë béconana jojtana. Cachcá, chë castigo echántsemna nÿa chama chë tempo chaojtsemna ora ca” —Jesús tojánayana.

*Bëngbe Bëtsá Entšá tbojanbemá quem luaroye echanjésabo  
(Mc 13.24-37; Lc 21.25-33; 17.26-30, 34-36)*

29 Mëntšánaca Jesús tojánayana: “Chë puerte ngménana tempo chaojochnëngüentšana, shinye ndoñe queochátsbuashinÿinÿana, juashcona ndoñe queochátsbinÿnaye, celocana estrellënga echanjatquécjana y quem luarentša tsbanánoca espíritënga obenana bomnënga echanjángmëmana.

30 Chora canye soye celoca echanjónÿna entšanga jinÿanÿiyama Bëngbe Bëtsá Entšá tbojanbemá ya iuaisaboma, y nyets luarenache entšanga mochanjenóbošachna, y Bëngbe Bëtsá Entšá tbojanbemábioye mochanjinÿe celoca jantšetëshiñe echántsaboye, puerte obenánaca y corente buashinÿinÿaniñe.

31 Y canye trompetëfjua jabuache chaojuénana ora, cha chabe angelotëmënga echanjichamuá Bëngbe Bëtsabe ubuáyanënga júbuajama, nyets luarëngocana, celoca cánÿoica juachoicana y chë ínÿoica juachóntscoñe.

32 “Ntšamo higo betíyeca endbëtsopasanama šmochjuatsjinÿe: Tojtsaisabuacuana y tojtsaisëjotsana ora, chë tšabe tempo ya tojtsaisobecuama jtsotatšëmbuana.

33 Cachcá, lempe chë ndayama tšëngaftanga tbonjauyancá chašmojinÿe ora, šmochántsetatšëmbo Bëngbe Bëtsá Entšá tbojanbemá ya jésabama yojtsemnama.

34 Ndegombre cbëyana, lempe chca echanjochnëngo, morsca entšanga cabá ndóbana ora.

35 Celoca y quem luare echanjopochóca, pero atšbe palabra ndocna te queochaisopochóca.

36 “Pero ndayté y ntseco ora Bëngbe Bëtsá Entśá tbojanbemá yochjésabama, ndocná quenátstatśëmbo, ni chë celoca angelotëmënga, ni Bëngbe Bëtsabe Uaquiñá. Nye chë Taitá chama yotátśëmbo.

37 “Ntšamo Noé yojëftsiyena ora tojanopasacá, cachcá echanjopása chë Bëngbe Bëtsá Entśá tbojanbemá chaojésabo ora.

38 Noebe tempo, chë uabouana uaftena cabá nduáshjango ora, entšanga imnasaye, innofšësnaye y innóbouamnaye; natjëmbana imojtsiyëne, y chca imojtsomñe Noé chë barquëshoye tojánamashënguentscuana.

39 Chënga tondaye imonjántatśëmbo, nje chë uabouana uaftena tojánashjango y nyetscanga tojtsanëyamba ora cocayé. Cachcá echántsemna Bëngbe Bëtsá Entśá tbojanbemá chaojésabo ora; ya chaojochnëngo ora, entšanga chama mochanjátatśëmbona.

40 Chora uta boyabásata jajoca bochántsemna; canya mochanjesbetse y chë ínÿana ndoñe.

41 Uta shembásata bochántsejanÿcoye; canya mochanjesbetse y chë ínÿana ndoñe.

42 “Chíyeca cuedado šmochtsebomna y yejuana šmochtsantješna, er ndoñe quešmátstatśëmbo ndayté tšëngaftangbe Utabná yochjésabama.

43 Pero quem soye tšabá chacmësertá: Chë yebnentša nduiño, ntseco ora ibeta atbëbaná yochjabama tojtsetatśëmbëse, cha nantsefšna y ndocnábioye buanjaleséncia jushañe chaotsendbemama tsoye jtsamashënguama y jtsatbëbama.

44 Chíyeca, tšëngaftángnaca šmochtseprontana, er Bëngbe Bëtsá Entśá tbojanbemá echanjésabo, entšanga chama tondaye chamontsejuabná ora ca” —Jesús tojánayana.

*Chë tšabe oservená y chë ndoñe tšabe oservená  
(Lc 12.41-48)*

45 “¿Nda yomna chë oservená ntšamo chë nduiño tojtsebošcá amá y nyets juábnaca amá? Cha jtsemnana nda chë nduiño bochjëftsebošhona chë yebnentšënga chaotsanÿenama y jasama tojtsemna ora chaújuatšëma.

46 Chë nduiño tojtashjango ora, chë oservenábioye tbojínÿena ntšamo ibomncá jtsamëse, chë oservená puerte oyejuayá echántsemna.

47 Ndegombre cbëyana, chë nduiño chábioye bochanjaimpáda lempe chabe soyënga chabotsinÿëñama.

48 Pero chë oservená bacna entśá tomñëšna, jajuaboyana chë nduiño ndoñe betseco yochantabo ca,

49 y as, cha jóntšana chë inye oservénënga jtsajantsetayana, beca jtsesana y jtsetmuana inye tëmiëngaftaca.

50 Y chabe nduiño jtashjanguama ndoñe tontsejuabná te y ndoñe tontsetátšëmbo ora, cha echántashjango.

51 Chora chë nduiño jabuache bochantsecastíga, y ntšamo chë bacna entsanga ndayá ndegombre tmojuabnacá nd-inyïnynayënga jasúfriama entsamncá, cha echanjasúfria. Chora cha puerte echanjenóbošachna y chë tsetšanama juatsašënga echantsenoftšëjonnaye ca” —Jesús tojánayana.

## 25

### *Chë bnëtsana tobiasëngbiama cuento*

1 Mëntšánaca Jesús tojánayana: “Chë te chaojóshjango ora, Bëngbe Bëtsabe amëndayana echántsemna mo ntšamo canye casamento fiestentše tojanopasacá. Mëntšá yojopása: Bnëtsana tobiasënga chëngbe querosine uajuinyanëshangá imojëftsájaca y imojábocana chë casamento boyabása jajébenguama.

2 Chë bnëtsana tobiasënguentsana, shachnënga sempre enójuabnayënga imnamna, y chë inye shachnënga, ndenójuabnayënga.

3 Chë ndenójuabnayëngna chëngbe uajuinyanëshangá imojëftsájaca, pero querosine ndoñe imonjuabuyamba chë uajuinyanëshangañe cachiñe jtaftsuámama.

4 Pero chë sempre enójuabnayëngna chëngbe uajuinyanëshangá imojëftsájaca y querosinënaca botellësënguiñe imojuabuyamba.

5 Chë casamento boyabásana ndoñe betscó yonjabo, chíyeca nyetsca tobiasënga ocnayana yojubuache y imojtso-maná.

6 Mo tsëntseto orna, chënga imojouena mëntšá uayebuáchana: ‘¡Chë casamento boyabása ya endabó! ¡Jajébenguama mobocana ca!’

7 Asna, nyetsca tobiasënga imojotsbaná y imojóntša chë uajuinyanëshangá juabopróntana.

8 Chorna, chë shachna ndenójuabnaye tobiasënga chë inye shachnënga siempre enójuabnayëngbiöye imojáuyana: ‘Diosmanda tšëngaftangbe querosinentšana baseytema smëbuatšatá, bëngbe uajuinyanëshangá tojontsé jtsafsanana ca.’

9 Pero chë siempre enójuabnayëngna imojayana: ‘Ndoñe. Tcojubuatšatase, tšëngaftangbiama y bëngbiámnaca querosine echántasashbe. Más tšabá entsemna, chë querosine mondbétsenoye chašma y tšëngaftangbiama chašmauábuamiñe ca.’

10 “Chorna, chë shachna ndenójuabnaye tobiasënga imojá chë querosine jauabuámiyama; pero chëntscuana chë casamentero boyabása yojáshjango y chë sempre enójuabnayënga cháftaca chë casamento fiestoye imojámashjna, y chentša bësása imojtatame.

11 Chentšana chë inye tobiasënga imojáshjajna y mëntsá imojtsichamo: ‘¡Taita, Taita, šmebëtafjo ca!’

12 Pero chë casamentero boyabása yojójua: ‘Ndegombre cbëyana, tsëngaftanga ndoñe quecbatëbuatma ca.’

13 “Cachcá echántsemna Bëngbe Bëtsá Entsá tbojanbemá chaojésabo ora; chíyeca šmochtseprontana, tsëngaftanga ndoñe quešmátstatšëmbo ndayté, ni mocna ora chca yochjopásama ca” —Jesús tojánayana.

### *Chë crocenánama cuento* (Lc 19.11-27)

14 “Bëngbe Bëtsabe amëndayana endmëna mo ntšamo canye boyabásaftaca tojanopasacá. Cha ibojtsemna inye luaroye jtsoñama; as chabe oservënga yojáchembo y yojaimpádaye chabe crocénana chamotsinýenama.

15 Cánýabioye ibojántšabuachiye shachna uaranga crocénana, ínýabioyna uta uaranga y ínýabioyna canye uaranga. Chca yojamna ntšamo cada ona ibojobiashjachcá. Y as chë boyabása yojtsoñe.

16 Cachora chë shachna uaranga yojoyëngacñá yojá trato jabemama, y chca, inye shachna uaranga crocénana yojábotiye.

17 Chë uta uaranga yojoyëngacñá cachcá yojama y inye uta uaranga yojábotiye.

18 Pero chë canye uaranga yojoyëngacñana, yojá, fshantsiñe yojajutjo y chabe mandayabe crocénana chentše yojtseitëme.

19 “Chentšana baytese chë oservëngbe amëndayá yojtashjango y yojóntša chë crocenánama chënga jatjayana.

20 Natsana yojáshjango chë shachna uaranga yojoyëngacñá y chabe mandayábioye inye shachna uaranga crocénana ibojántšabuachiye y mëntsá ibojauyana: ‘Taita, aca shachna uaranga šconjanoyé y muentše entsemna inye shachna uaranga sënjaboté ca.’

21 As chë mandayá ibojauyana: ‘Tša tšabá, tšabe oservená y ntšamo tsbošcá amá. Aca quem base soyiñe lempe ntšamo tbojamandacá tcojámayeca, atše cbochanjaimpáda más bëtscá chašcotsinýeñama. Mamáshëngo y átšeftaca cochjóyejuaye ca.’

22 Chentšana chë uta uaranga yojoyëngacñá yojáshjango y chë mandayábioye ibojauyana: ‘Taita, aca uta uaranga

šconjanoyé y muentše entsemna inýe uta uaranga sēnjaboté ca.’

<sup>23</sup> As chē mandayá ibojauyana: ‘Tša tšabá, tšabe oservená y ntšamo tsbošcá amá. Aca quem base soyiñe lempe ntšamo tchojamandacá tcojámayeca, atše cbochanjaimpáda más bētscá chašcotsinýeñama. Mamáshēngo y átšeftaca cochjóyejuaye ca.’

<sup>24</sup> “Pero chē canýe uaranga yojoyēngacñe oservená yojáshjango orna, chabe mandayábioye ibojauyana: ‘Taita, atše sēndētatsēmo aca canýe tšátjaye entšá comnama; acna chē ndoñe tconjajé chentše saná jocñana y chē ndoñe tconjujqēshe luarentše jobuátbanana.

<sup>25</sup> Chama atše uatjana šjuábuache, chíyeca atše sēnjá y fshantsiñe chē crocénana sēnjetseitēme. Pero muentše acbe crocénana entsatsmēna ca.’

<sup>26</sup> As chē mandayá ibojuuá: ‘¡Bacna oservená y oyēnjayá! Chē ndayentše ndoñe tijajé chentše saná jocñana y chē ndoñe tijujqēshe luarentše jobuátbanana atše tsuamanama icojátatsēmbēse,

<sup>27</sup> aca cmonjamna atšbe crocénana bancoca jetsobuájuana y atše matijtabo ora, atšbe crocénana matijtóyēngacñe y chē chentšana tojoboté crocénanēnaca ca.’

<sup>28</sup> Y as yojamēnda: ‘Chē uaranga motseboca y chē bnētsana uaranga entsebomnábioye chana motsatšetá ca.

<sup>29</sup> Er nda tojtsebomnábioye, más jatsetayana, y chca cha corente bētscá jtsebomnana; pero tondaye tondbomnábioyna, chē batšatema tobomna sóynaca jtsebocana ca.’

<sup>30</sup> “Y chora cha yojayana: ‘Quem ndoservena trabajayá shjoca ibetoye matábocna; choca puerte echanjenóbošachna y chē tsetšanama juatsašēnga echantsenoftěšjojnaye ca’ ” — Jesús tojanéyana.

*Ntšamo chē quem luare jopochócama ora, nyetsca entsangbiama mochjayana*

<sup>31</sup> Mēntšánaca Jesús tojánayana: “Chē Bēngbe Bētsá Entšá tbojanbemá chabe obenánaca, buashinýinýaniñe y nyetsca chabe angelotémēngaftaca chaojésabo ora, chē reybiama puerte buashinýinýana tbemaniñe echanjót bema.

<sup>32</sup> Chora nyets luarēngoca entšanga chabe natsanoica mochanjénefná, y cha, entšanguentšana ínýenga echanjábacacaye, mo chē oveshēnga abujājēnyá oveshēnga chivēngbentšana endbetsabacacnáyca.

<sup>33</sup> Chē abujājēnyana, oveshēnga chabe catsbioica echanjáchembo y chivēngna chabe uañicuayoica. Bēngbe Bētsá Entšá tbojanbemá cachcá echanjama: chē ubuáyanēnga

chabe catšbioica echanjúbuaja y chë bacna entšangna chabe uañicuayoica echanjátsaye.

34 “Chorna chë Rey, Bëngbe Utabná, chabe catšbioica chamojtsemna entsanga echanjáuyana: ‘Tšëngaftanga, Atšbe Taitá tšábeñe cmëtabna, mabënga ca; atšbe amëndaye luare mo tšëngaftangbiana otocana soycá mosháchiñënga; tšëngaftangbiana endëprontana, Bëngbe Bëtsá quem luare tonjanma orscana.

35 Er atše šonjanishëntsana y tšëngaftanga saná šmonjancaredadó; šonjanajuendá y tšëngaftanga šmonjanafsé; inÿe luarocana ashjanganonacá sënjánana y posada šmonjanántšame.

36 Enašá sënjánana y entšayá šmonjanëtšetá jtichëtjuama; šocá sënjanájona y šmonjanatsëtsaye; cárce loca sënjanëtámëna y jabëuatsëtsayama šmonjánabo ca.’

37 “As chë Bëngbe Bëtsá chabe bominÿiñe tšábënga tojábiamënga mochanjatjaye: ‘Bëngbe Utabná, ¿ntseco shëntseca tcbënjáninÿe y tcbënjajuatšé? ¿Ntseco uajuendayá tcbënjáninÿe y tcbënjanafsé?

38 ¿O ntseco inÿe luarocana ashjanganonacá tcbënjáninÿe y posada tcbënjánantšame, o enašá y entšayá jtichëtjuama tcbënjánëtšetá?

39 ¿O ntseco šocá o cárce loca utamená tcbënjáninÿe y jauatsëtsayama tifjána ca?’

40 “As chë Utabná echanjóju: ‘Ndegombre cbëyana, lempe ntšamo chë atšbe catšátanguentsana chë más batšá uámanëngaftaca šmojamcá, cach átšeftaca šmonjanma ca.’

41 “Chentšana chë Utabná chabe uañicuayoica chamojtsemna entsanga echanjáuyana: ‘Atšbentšana mojuánanga atšbe Bëtsabe uabotëñënga. Infiernoye motsajna, chë ndocna te queochátsfsana iñeshoye; choca endëprontana Satanás y chabe ustonëngbiana.

42 Er atše shëntseca sënjánana y tšëngaftanga saná ndoñe chešmatancaredadó; šonjanajuendá y ndoñe chešmatanafsé;

43 inÿe luarocana ashjanganonacá sënjánana y ndoñe posada chešmatanántšame. Enašá sënjánana y ndoñe entšayá chešmatanëtšetá; šocá sënjanájona y cárce loca sënjanëtámëna y ndoñe chešmatanatsëtsá ca.’

44 “As chënga mochanjatjaye: ‘Bëngbe Utabná, ¿ntseco tcbënjáninÿe shëntseca o uajuendayá, o inÿe luarocana ashjanganonacá, o enašá, o šocá o cárce loca utamená y ndoñe tcbënjánajabuache ca?’

45 “Y chë Utabná echanjóju: ‘Ndegombre cbëyana, tšëngaftanga ntšamo chë atšbe catšátanguentsana chë más



batśá uámanëngaftaca, ndoñe šmonjanmcá, átšeftaca cach ndoñe chešmátanma ca.'

<sup>46</sup>“Chëngna infernoye nÿetsca tescama mochantsësetjango, y chë Bëngbe Bëtsá chabe bominjïñe tšábenga tojábiamëngna chë nÿetsca tescama yomna tšabe vida mochántsebomna ca” — Jesús tojánayana.

## 26

*Entsanga tmojanjuabó ntšamo jamëse Jesús jishachama*  
(Mc 14.1-2; Lc 22.1-2; Jn 11.45-53)

<sup>1</sup> Lempe chca tojánayanentsana, Jesús chabe uatsjëndayënga tojanëyana:

<sup>2</sup>“Tšëngaftanga šmondëtatšëmbo, uta te y chë Bashco fiesta echántsemna y Bëngbe Bëtsá Entśá tbojanbemá ínÿengbe cucu-atšïñe mochanjáboshjona chamocrucificama ca.” Chë fiesta inamna jtenójuaboyama Bëngbe Bëtsá chë judiëngbe bëts taitanga Egiptocana tojánatsebacama.

<sup>3</sup> Chëntscuana, chë bachnangbe amëndayënga y chë judiëngbeñe bëtsëjemëngcá mándayënga tmojánenefjna, Caifás, chë bachnangbe más uámana amëndayabe bëts yebnentše.

<sup>4</sup> Tmojanenuabó y tmojanenoyeuná jtseíngñase Jesús jishachama, y jtsóbama.

<sup>5</sup> Pero imojtsichamo: “Quem fiestëntscuana ndoñe, entsanga yapa muanjóntša enbouenanana ca.”

*Canÿe shembása botamana uanguëtše béjaye Jesusbe bestšašïñe tbojanbuešcja*  
(Mc 14.3-9; Jn 12.1-8)

<sup>6</sup> Jesús Betania pueblentše yojtsemna, Simón chë bacna nguayanánaca šocá ca uabobuatmabe yebnentše.

<sup>7</sup> Chëntscuana canÿe shembása Jesúsbiöye tojanabeconá. Chë shembásana tojanamba canÿe alabastro jarrëtema, jútjena canÿe puerte uámana botamana uanguëtše béjayeca. Jesús mesëshentše yojtsemnëntscuana, chë shembása chabe bestšašïñe chë botamana uanguëtše béjaye tbojanbuešcja.

<sup>8</sup> Chë uatsjëndayënga chca tmojáninÿe orna, tmojanotjayaná y tmojanontsé ichámuana: —¿Ndáyeca nÿe bonamente chë soye chca yojtsemna ca?

<sup>9</sup> Chamna, matmënjobenanga chë béjaye becá crocenánama juiyana y chánaca ndbomnjëmënga matmënjújabuache ca.

<sup>10</sup> Jesús chë soye tojanuena; as tojanëyana: —¿Ndáyeca ndoñe cachcá quem shembása šmochanjonÿaye ca? Ntšamo tonjamcá tšabá entsemna.

<sup>11</sup> Er chë ndbomnjëmëngna nÿets tempo tšëngaftangbeñe mochanjëftsemna, pero atše tšëngaftangaftaca ndoñe nÿets tempo quichásemna.

12 Ntšamo chë shembása tojamcá, chë botamana uanguëtše bėjaye atšbe cuerpiñe jabuěscjěse, cha šontsepróna atše juatbontsa tescama.

13 Ndegombre cběyana, quem luariñe ndayéntšnaca Běngbe Bětsabe soyěngama chamojtsabuayiyná chentše, ntšamo quem shembása tojamámna becá mochanjěftsóyebuambaye, chca, entšanga chabiamama chamotsenójuabnama ca —Jesús tojaněyana.

*Judas tojána bachnangbe aměndayěngbioye, Jesús chamuishachama*

(Mc 14.10-11; Lc 22.3-6)

14 Canya chë bnětsana uta uatsjendayěnguentšá, Judas Iscariote ca uabainá, tojána bachnangbe aměndayěngaftaca jencuéntama.

15 Y tojanatjá: “¿Ntsachetšá šmatjtabuénaye y Jesús tšěngaftangbe cucuatšiče cbochjayentšbashejuana ca?”

As chěngna, unga bnětsana ralbenga tmojtanabuená.

16 Y cach orscana Judas yojtsenguaye ntšámose y ntseco ora, Jesús chěngbe cucuatšiče jayentšbashejuanama.

*Jesús chabe uatsjěndayěngaftaca Bashco saná tojanse*

(Mc 14.12-25; Lc 22.7-23; Jn 13.21-30; 1 Co 11.23-26)

17 Chë Bashco fiesta bojatšenté, chë levadúraca nděpormana tanděse jasama fiestěntscuana, chë uatsjěndayěnga Jesúsbioye tmojanobeconá y tmojtantjá: —¿Ndémoca aca cojtseboše běnga fchajprontama Bashco saná chacosama ca?

18 Y Jesús tojaněyana: —Chë běts puebloye motsajna canye bacobe yebnoye y cha šmochjauyana: “Buatěmbayá tonjayana: ‘Atšbe ora ya echanjobuache, y atše acbe yebnoye sěntsá, Bashco fiesta jamama atšbe uatsjěndayěngaftaca ca.’”

19 As chë uatsjěndayěnga tmojanma ntšamo Jesús tojanaměndacá y chë Bashco fiesta saná tmojanprontá.

20 Y tojanibétata orna, Jesús chë bnětsana uta uatsjěndayěngaftaca mesěshentše yojtsemna.

21 Y imojtsesantscuana, Jesús tojaněyana: —Ndegombre cběyana, canya tšěngaftanguentšá uayayěngbe cucuatšiče sochanjáboshjona ca.

22 Chora chë uatsjěndayěnga puerte ngmėnaca imojtsemna y tmojanontšé canyánya Jesús jatjayama: —Běngbe Utabná, ¿nderado atše cha chtsemna ca?

23 As Jesús tojanějua: —Canya nda chabe tanděse entsefchecuacná cach atše sěntsefchecuacná šcnenentše, cha uayayěngbe cucuatšiče sochanjáboshjona.

24 Ndegombre, Běngbe Bětsá Entšá tbojanbemáftaca echanjopása ntšamo Běngbe Bětsabe uabemana palabrenguiñe chabiamama iuayancá; pero, itša lastema chë

bochjáboshjonabiama! Más tšabá chabiama manjamna ndoñe ntjónyana ca.

25 As Judas, chë boshjuaná, Jesúsbiöye tbojantjá: —Buatëmbayá, ¿nderado atše chtsemna ca?

Y Jesús tbojanjuá: —Ndegombre tcjayana ca.

26 Imojtsesantscuana, Jesús tandëse tojanca, Bëngbe Bëtsábioye chama tbojtanchuá, tojanjatá y chë uatsjëndayënga tojanatšatá. Y mëntsá tojánayana: “Mocñënga, mosënga. Atšbe cuerpo entsemna ca.”

27 Chentšana, canye coptema vínoyeca tojanaca, Bëngbe Bëtsábioye tbojtanchuá y chë uatsjëndayënga tojanëššá. Y mëntsá tojánayana: “Nyëtscanga quem coptémentšana mofšenga.

28 Quem vínoye atšbe buiñe entsemna. Atšbe buiñe echanjuábuashana entšanga chamotsetatšëmbuama ntšamo Bëngbe Bëtsá entšanga tojanašebuachenacá aiñe yochjochnënguama. Chë buiñe bëtscá entšangbiama echanjuábuashana, chëngbe bacna soyëngama perdonánënga chamotsemnama.

29 Y ndegombre cbëyana, morscana atše ya ndoñe más chë uvasentšana obocniye quichaisofšiyë. Chë tsëm vínoye tšëngaftangaftaca chanjofšiyë, atšbe Taitabe amëndayoca chamojtsemna ora ca” —Jesús tojánayana.

*Jesús tojánayana, chábioye ndoñe bonjanabuátma ca Pedro yochjánayanama*

*(Mc 14.26-31; Lc 22.31-34; Jn 13.36-38)*

30 Bëngbe Bëtsá jëtschuayama tmojancantá chentšana, Olivos tjashoye tmojëftsanbocana.

31 Choca Jesús tojanëyana: —Tšëngaftanga nyëtscanga quem ibeta átšbeñe ošbuáchiyana šmochantsobuetše y šmochantsacheta, er Bëngbe Bëtsabe uabemana palabrënguiñe, cha mëntsá tojánayana: “Chë oveshëngbe abuajënña chanjóba y chë oveshënga mochantsáshana ca.” Chca tšëngaftangaftaca echanjopása, uayayënga chašmojishache ora.

32 Pero obanënguentšana chaitayenentšana, tšëngaftangbe natsana Galileoye chanjá ca —cha tojanëyana.

33 Chora Pedro tbojanjuá: —Masque nyëtscanga ácebeñe ošbuáchiyana chamotsobuetše y chamotsacheta, ntšamo ácaftaca yochjopása causa, atše ndocna te ca.

34 As Jesús tbojanayana: —Ndegombre cbëyana, cam ibeta, ngallo cabá ndëcánta ora, aca unga soye cochanjayana ndoñe šconduabuatma ca.

35 Pero Pedro tbojanayana: —Masque chašotsemna ácaftaca jóbanama, atše ndoñe quichátayana ndoñe chonduabuatma ca.

Y nyëtsca uatsjëndayëngnaca cachcá imojtsichamo.

*Getsemaní luarentše Jesús Bëngbe Bëtsáftaca tbojanencuentá*  
(Mc 14.32-42; Lc 22.39-46)

<sup>36</sup> Chentsana, Jesús chabe uatsjéndayëngaftaca canye luare Getsemaní ca uabáinoye tojána. Choca tojanëyana: “Muentse motbiamá, chëntscuana atše choye chanjá Bëngbe Bëtsáftaca jencuéntama ca.”

<sup>37</sup> Y Pedro y chë Zebedeobe uta uaquiniñata tojëftsanëbiatše. Choca yojóntša puerte ngménaca y corente cochtsetšenaná jtsemnana.

<sup>38</sup> Jesús tojanëyana: “Atsbe ainana puerte ngménaca entsemna, mo jobanamcá. Muentse moquedanga y átšeftaca šmochtsefsna ca.”

<sup>39</sup> Chora Jesús más natsanoye tojána, tojanoshamentsé y fshantsóntscoca yojotsejbéna, y mëntšá Bëngbe Bëtsáftaca tbojanencuentá: “Atsbe Taitá, jopódianëse moma atše japadésama ndoñe chašondëtsemnana. Pero ntšamo atše štsebošcá ndoñe chaondëtsemna, sinó ntšamo aca cojtsebošcá ca.”

<sup>40</sup> Chentsana, Jesús chabe unga uatsjéndayëngbioye tojtanabo y chëngna inmëtsomañe. Chca tojánanyena ora, Pédrëbioye tbojaneyana: “¿Ni mo canye horatema tšëngaftanga šmonjobená átšeftaca jtsefsnana ca?”

<sup>41</sup> Smochtsefsna y Bëngbe Bëtsáftaca šmochtsencuéntaye, chca, bacna soye jamama ndoñe chacmondócochënguama. Tšëngaftanga ndegombre šmontseboše espíritoca Bëngbe Bëtsá joyeunayama, pero cuerpiñe añemo ndoñe quešmátsbomna ca” —Jesús tojanëyana.

<sup>42</sup> Uta soyama tojtesaná y mëntšá Bëngbe Bëtsáftaca tbojanencuentá: “Atsbe Taitá, atše japadésama ndoñe chašondëtsemnana jamama ndoñe jopódianësna, nye ntšamo aca cojtsebošcá chaotsemna ca.”

<sup>43</sup> Y tojtanabo ora, chë uatsjéndayënga cachiñe inmëtsomañe; yapa ocnyaye causa nye imojtsefshétana.

<sup>44</sup> As Jesús cachcá yojëftsënyaye, y ungama cachiñe tojtesaná Bëngbe Bëtsáftaca jencuéntama, y cach palabrënga tojánayana.

<sup>45</sup> Chora chë uatsjéndayëngbioye tojtanabo y tojanëyana: “¿Cabá šmotsomañe y šmotsochnañe ca? Ya ora tocjobuache, Bëngbe Bëtsá Entšá tbojanbemá bacna soye amëngbe cucu-atšinë mochanjáboshjona.

<sup>46</sup> Motsbananga, cuajna. Minyënga, chë boshjuaná ya entsebeconá ca.”

*Uayayënga Jesús tmojánishache*  
(Mc 14.43-50; Lc 22.47-53; Jn 18.2-11)

<sup>47</sup> Jesús cabá yojtsóyebuambnantscuana, Judas, canye chë bnëtsana uta uatsjëndayënguentšá, tojánashjongo,

y cháftaca imojtsemna ba entšanga espadějangaca y ngarotbėngaca prontánėnga. Chėnga imojamna chė bachnangbe amėndayėnga y chė judiėngbeñe bėtsėjemėngcá amėndayėngbe ichmónėnga.

48 Judas, chė boshjuaná, tojanjuabó ntšamo jamana entšanga jinŷanŷiyama ndėmua Jesús bėtsemnana. Chíyeca yojáuyana: “Nda chajjauámocho, cha echántsemna. Smochjishache ca.”

49 Cachora Judas Jesúsbioye tojanobeconá y tbojanchuá: — Buajtana, Buatėmbayá ca.

Y tbojtanámocho.

50 Jesús tbojaniyana: —Enutá, moma chė ndayá jabomama tcojabo ca.

Chorna, chė entšanga tmojanobeconá, Jesús tmojánishache y tmojanánatse.

51 Chca orna, canŷe enutá Jesúseftaca yojtsemná, chabe espaděja tojanenosėngbotėntšena, y chė bachnangbe más uámana amėndayabe oservenábioye canŷe matscuaše tbojt-sanėštjango.

52 As Jesús tbojaniyana: “Espaděja matosėngbuajonŷá. Nda espadějaca tbojóba chana, cach espadějaca echanjóbana.

53 ¿Aca ndoñe condėtátšėmbo, atše atšbe Taitábioye stjajimpádase, cha cachora atšbiana nanjichamuá bnėtsana utama más ejėrcitėnga angelotėmėngaca?

54 Pero chcasna, ¿ndayá Bėngbe Bėtsabe uabemana palabrenguiñe endayancá ntšamo nanjochnėngo? Chiñe endayana ntšamo entsopasancá jochnėnguama canmėna ca.”

55 Cachora Jesús entšanga tojanatjá: “¿Ndáyeca šmojabo espadějjangaca y ngarotbėngaca atše jishachama, mo atše canŷe bacá uamana entšá cuaftsemncá ca? Atše cada te Bėngbe Bėtsabe bėts yebnoca tšėngaftangaftaca sėnjántbemana abuátambaye, y choca ndoñe chešmátanishache.

56 Pero lempe quem soyėnga chca entsopasana, cachcá chaotsemnama ntšamo Bėngbe Bėtsabe uabemana palabrenguiñe chė Bėngbe Bėtsabe juabna oyebuambnayėnga tmojanayancá ca” —Jesús tojánayana.

Cachora nŷetsca uatsjėndayėnga tmojtsanėuatjaná y tmojtsanacheta, y Jesús chė uayayėngaftaca cachcá tmojesanonŷá.

*Jesús tmojanánatse chė judiėngbe más uámana amėndayėngbioye*

*(Mc 14.53-65; Lc 22.54-55, 63-71; Jn 18.12-14, 19-24)*

57 Chė Jesús tmojánishachėnga, tmojanánatse, Caifás chė bachnangbe más uámana amėndayabe yebnoye. Chentše chė ley abuátambayėnga y chė judiėngbeñe bėtsėjemėngcá amėndayėnga tmojánenefjna.

58 Pedro bēnocana Jesús tbojanasto, chē bachnangbe más uámána amēndayabe chashjónscoñe; choye tojánamashēngo y chē Bēngbe Bētsabe bēts yebnoca josticiēngaftaca yojótbema, chca, jtsetatšēmbuama ntšamo yochjopásama.

59 Chē bachnangbe amēndayēnga, chē bētsējemēngcá amēndayēnga y ínŷenga judiēngbe amēndayēnga imojtsenguaye ndánaca masque uayátsenaye soye Jesusbe contra cháuyanama, as chēnga jobenayama cha chaóbana ca jayanama,

60 pero ndoñe tmonjáninŷena, masque banga tmojánashjajna Jesusbe contra uayátsenaye soyēnga jayanama. Cabana, útata tbojánashjango,

61 y chata tbojánayana: “Quem boyabása tonjayana canobena Bēngbe Bētsabe bēts yebna jtšenásatajchcana y nŷe unga tese jtētsjebuana ca.”

62 As chē bachnangbe más uámána amēndayá tojantsá y Jesúsbioye tbojantjá: —¿Ndocá cochanjayana? ¿Ndayase yojtsemna chē acbe contra montsichamo soye ca?

63 Pero Jesús nŷe iytēca yojtsemna. Chíyeca chē bachnangbe más uámána amēndayá tbojanियana: —Bēngbe Bētsá Ainabe mándoca cbomandá chašcuyana aca ndegombre chē Cristo, chē Bēngbe Bētsabe Uaquiñá comna o ndoñe ca.

64 Chora Jesús tbojanjuá: —Aca ndegombre yomncá tchayana. Y quem sóynaca chēyana: Tšēngaftanga šmochanjinŷe, atše, Bēngbe Bētsá Entšá tbojanbemá, chē nŷets obenana bomnabe catšbioica jtsetbemanana y celoca jantšetēshiñe jtsaboyana ca.

65 Chora chē bachnangbe más uámána amēndayá chabe uichētjonējuangá yojtsenántšajatanēca, puerte ibojtsetna causa, y tojánayana: —¡Ntšamo quem boyabása tonjoyebuambacá, Bēngbe Bētsabiama entsemna mo cha cuafjoyenguangcá, chē chabe Uaquiñá yomna ca cha tonjayana ora! ¿Ndayama más entšanga šochjátējaboto Jesusbe contra chamuayanama?

66 ¿Ntšamo šmatjayana ca? —cha tojanatjá.

As chē entšanga tmojanjuá: —Ndegombre cha bēts bacna soye entsebomna; jóbanama bontsemna ca.

67 Chora tmojanontšé Jesús juebēbuashētjnayana, jabuache jantšetayana y ínŷengna imojtsejuébjantšetaye,

68 y imojtsatsētsnaye: “Cristo, aca ndegombre Bēngbe Bētsabe juabna oyebuambnayá tcomnēse, ¡momalisiá nda tcmēnjantšetá ca!”

*Pedro tojánayana Jesúsbioye ndoñe bonjanabuátma ca  
(Mc 14.66-72; Lc 22.55-62; Jn 18.16-18, 25-27)*

69 Chëntscuana Pédrëna shjoca yojtsemna, chashjoca yojtsetbemana. Chora, canÿe shembása chentša oservená tbojanobobeconá y tbojaniyana: —Acnaca, Jesús chë Galileocáftaca conjánana ca.

70 Pero Pédrëna, nÿetscangbe delante tojánayana chábioye ndoñe bonjanabuátma ca, mëntsá jayanëse: —Ntšamo consichamcá, ndoñe quešnátësertana ca.

71 Chora Pedro bësoye yojábocna. Chentšna, inÿe shembása oservená chábioye tbojáninÿe y chë inÿe entsanga tojanëyana: —Cha, Jesús chë Nazaretocáftaca enjánana ca.

72 Pedro cachiñe tojánayana ndoñe bonjanabuátma ca, y mëntsá yojtsejúrayera: —¡Chë boyabása ndoñe quetsatabuatma ca!

73 Chentšana, chë chentše imojtsemnënga Pédrëbioye tmojanobeconá y tmojaniyana: —Ndegombre, ácnaca chë uat-sjendayënguentšá condmëna. Chë contsoyebuambnacá contsoyátëmbana ca.

74 Chora Pedro tojanontšé ichámuana, Bëngbe Bëtsá chašotsecastigá ndoñe ndegombre soye stsichámëse ca; yojtsejúrayera y yojtsichamo: —¡Chë boyabása ndoñe quetsatabuatma ca!

Y cachora canÿe ngallo yojacánta.

75 Y Pedro yojenójuaboye ntšamo Jesús tbojanianama. Cha mëntsá tbojaniyana: “Cabá ngallo ndëcánta ora, aca unga soye cochanyayana ndoñe šconduabuatma ca.” Y chentšana tojésanbocna y corente ngmënaca yojtsenóbošachna.

## 27

*Jesús, Pilátbioye tmojanánatse*  
(Mc 15.1; Lc 23.1; Jn 18.28-32)

1 Tojanbinÿna ora, nÿetsca chë bachnangbe amëndayënga y judiëngbeñe bëtsëjemëngcá amëndayënga tmojánenefjna jenóyeunayama ntšamo jamëse Jesús chaóbanama.

2 As, Jesús tmojanëcuébatsëca y tmojanánatse, y chca, Pilato, chë Judeoca Romano mandadbe cucuatšinë tmojánboshjona.

*Ntšamo Judas tojanóbana*

3 Judas, chë boshjuaná, Jesús jóbanama ibojtsemnama tojanuena ora, puerte yojtsenócochinÿena ntšamo tojánchjanguama, y chë unga bnëtsana ralbenga chë bachnangbe amëndayënga y bëtsëjemëngbioye tojtanamba,

4 y mëntsá tojanëyana: —Puerte bacna soye tijama. Atše canÿe bacna soye ndbomná tšëngaftangbe cucuatšinë tijáboshjona chaóbanama ca.

Pero chënga tmojanjuá: —¿Chë soye ndayá bëngbiana? Cach aca cochátotatšëmbñe ca.

<sup>5</sup> As Judas chë ralbenga Bëngbe Bëtsabe bëts yebnentše yojesëtsana, y yojá y yojétsentsesäye.

<sup>6</sup> Chë bachnangbe amëndayëngna chë ralbenga tmojtanatbaná y tmojánayana: —Quem crocenánama buiñe echanjuábuashana; ntšamo leyiñe endayancá, bënga ndoñe quemuátobena chë Bëngbe Bëtsabiama soyënga quëcjnayetëmiñe chana jasegórana ca.

<sup>7</sup> Chcasna, chënga tmojanenoyeuná, chë crocenánacna chë Alfarerbe Luare ca uabaina fshantse jabuámiyana, y chca, canye luare jtsebomnama ndayentše chë inye luarëngocana entšanga áshjajnënga jutabuantsama.

<sup>8</sup> Chiyeca, chë fshantse mëntscoñama Buiñe Luare ca iuabaina.

<sup>9</sup> Chca, tojanochnëngo ntšamo Jeremías, chë Bëngbe Bëtsabe juabna oyebuambnayá, tempscá tojanayancá, ndayá yochjanchnënguama. Chana mëntsá tojánayana: “Y chë unga bnëtsana ralbenga tmonjanca, ntsachetšá chë Israeloca entšanga cha tmojanamananacá,

<sup>10</sup> y chánaca chë Alfarerbe Luare tmonjanbuamé, ntšamo Bëngbe Bëtsá šonjanmandacá ca.”

### *Jesús Pilatbe delante*

*(Mc 15.2-5; Lc 23.2-5; Jn 18.33-38)*

<sup>11</sup> Chentšana Jesús, chë mandado Pilátbioye tmojanánatse y cha mëntsá tbojantjá: —¿Aca chë judiëngbe rey cojtsemna ca?

Y Jesús tbojanjuá: —Aíñe, aca ndegombre yomncá tcjayana ca.

<sup>12</sup> Chë bachnangbe amëndayënga y chë bëtsëjëmënga Jesús mal imojtsequédantscuana, cha ndocá ntjojuana.

<sup>13</sup> Chiyeca Pilato tbojantjá: —¿Ndoñe contsuenana lempe ntšamo acbe contra montsichamcá ca?

<sup>14</sup> Pero Jesús ni canye palabra ndoñe ntjojuana. Chë causa, chë mandado ndoñe yontsetátšëmbo ntšamo jajuaboyana.

### *Jesús chaóbana ca tmojánayana*

*(Mc 15.6-20; Lc 23.13-25; Jn 18.38-19.16)*

<sup>15</sup> Bashco fiesta ora, chë mandado yojanamana canye utamená jëtsboshjonana, nda entšanga tmojuabuayaná.

<sup>16</sup> Chë tempo canye uachuana utamená inamna, Jesús Barrabás ca uabainá.

<sup>17</sup> Njetsca entšanga chentše imojtsemna ora, Pilato tojanatjá: “¿Tšëngaftanga nda šmojtseboše atše chjëtsboshjonama, Jesús Barrabás o Jesús, chë Cristo ca monduabobuatmá ca?”

<sup>18</sup> Er chë mandado yojtsetátšëmbo, entšangna envidia causa Jesús chabe cucuatšinë tmojánboshjonama.

<sup>19</sup> Pilato chë tribunal ca uabáinentše yojtsetbemanëntscuana, chabe shema canya tbojanichmó mëntsá cha jauyanama:



“Chë nÿetsca soyënguiñe tšabá ama entšábioye ndocá matsborlánana; chabe causa ibeta otjénayoca puerte sënjasufrí ca.”

<sup>20</sup> Pero chë bachnangbe amëndayënga y chë bëtsëjémënga entšanga tmojanayënjaná, Barrabás jëtsboshjonama y Jesús chaóvana ca chamuayanama.

<sup>21</sup> Chora chë mandado cachiñe tojanatjá: —¿Chë útatentšana nda šmojtseboše atše chjëtsboshjonama ca?

Y chënga tmojánayana: —¡Barrabás ca!

<sup>22</sup> Pilato tojanatjá: —¿As, ndayá Jesús, chë Cristo ca uabobu-atmáftaca atše chjama ca?

Y nÿetscanga tmojanjuá: —¡Motsecrucificá ca!

<sup>23</sup> Chora Pilato tojtëtanatjá: —¿Ndáyeca? ¿Ntšamo cha tojobuachjanguá ca?

Pero chënga cachiñe tmojanáyebuachena: —¡Motsecrucificá ca!

<sup>24</sup> Ndocá jamama yontsobenama y entšanga más jabuache enbouenanama tmojanontšema Pilato tojáninÿe ora, cha tojanmandá búyeshe juabuíyëboñana y nÿetscangbe delante yojtsenacuentšabiá. Mëntšá tojánayana: —Atše ndocá chiyátayana, ni chiyatsma quem boyabása chaóvanama. Tšëngaftanga lempe šmonjama ca.

<sup>25</sup> Chora nÿetsca entšanga tmojanjuá: —¡Quemuá yochjóvanama, bënga y bëngbe básengbiana castigo chaotsemna ca!

<sup>26</sup> As Pilato, Barrabás tbojtanboshjona; tojanmandá soldadënga Jesús jabuache chamotsetsetšenama y chentšana entšangbe cucuatšinë tbojánboshjona chamocrucificama.

<sup>27</sup> Chentšana, chë mandadbe soldadënga Jesús tmojanánatse chë mandadbe bëts yebnentša chashjoye y choca nÿetsca soldadënga chabe shëconana tmojanóhoto.

<sup>28</sup> Chorna, entšayá tmojtsanabotsca y shbuenda uafjat-senga entšayá mo reycá tmojanichëtjo.

<sup>29</sup> Canÿe coronësha tmojanapormá uchmašëfjangaca y tmojanabestšajó, y catsbioica cucuatšinë canÿe niñëfja. Chorna, chabe shecuatšentše imojtsofshëntsaméntšenaye y imojtsáboyejuana. Mëntšá imojtsichamo: “¡Bayté judiëngbe Rey cochtsemna ca!”

<sup>30</sup> Chëngnaca imojtsanbuashëtjnaye y cach niñëfjaca bestšašentše imojtsëtsjanjnaye.

<sup>31</sup> Y chca imnaftsáboyejuanentšana, chë shbuenda uafjat-senga entšayá tmojtsanabotsca y cachabe entšayá tmojtanichëtjo, y chora, jacrucificama tmojanánatse.

*Jesús tmojanrucificá*

*(Mc 15.21-32; Lc 23.26-43; Jn 19.17-27)*

<sup>32</sup> Chë entšanga chentšana tmojánbocana ora, tmojánenbetše canye bacóftaca, Simón ca uabainá, Cirene pueblócá. As, cha tmojanmandá Jesusbe cruz chauetsocutsama.

<sup>33</sup> Canye luare Gólgota ca uabáinoca tmojánashjajna ora (hebreo biyañe chca endayana “Obanabe Bestšashe Luare ca”),

<sup>34</sup> Jesúsbioye vínoye hiéloyeca enájuabniye tmojanabuiyé chaofšema; pero yojaftántia y ndoñe yonjábošena chiye jofšiyama.

<sup>35</sup> Ya tmojancrucificá orna, chë soldadënga Jesusbe entšayamna, tsbanánoye tmojanëtsena, chca, jtsetatšëmbuama ndabiama yochjanáquedama.

<sup>36</sup> Y chora chënga chentše tmojanotbiamá Jesús jtsebojanýama.

<sup>37</sup> Y chabe bestšaše juatsboicna canye uabemana soye tmojanajo. Chiñe yojétsayana ndáyeca cha tmojancrucificama, mëntšá: MUA JESÚS ENDMËNA, CHË JUDIËNGBE REY ca.

<sup>38</sup> Utata bacna soye ochjajnayátnaca chënga chentše tmojanacrucificá, canya Jesusbe catšbioica y chë ínýana chabe uañicuayoica.

<sup>39</sup> Y chëjana imojtsachnějuana entšangna, Jesús imojtsóyenguaye, imojtsobestšfshanenaye

<sup>40</sup> y imojtsatsaye: “¡Aca chë icobena Bëngbe Bëtsabe bëts yebna jtsenásatajchcana y nýe unga tese jëtsjebuana, cach aca mentsbocá! ¡Ndegombre Bëngbe Bëtsabe Uaquiñá tcomněse, chë cruzocana matastjango ca!”

<sup>41</sup> Chë bachnangbe amëndayënga, ley abuátambayënga y chë judiëngbeñe bëtsëjemëngcá mándayënga cachcá imojtsóyenguaye. Mëntšá imojtsichamo:

<sup>42</sup> “Cha ínýenga tojëftsatsëbacá, pero cachá jétsbocama ndoñe quenátobena. Cha Israeloca entšangbe Rey tojtsemněse, chë cruzocana chauatastjango, y chca, bënga chábeñe fchtsošbuáchiye.

<sup>43</sup> Cha tojayana Bëngbe Bëtsábeñe puerte yojtsošbuaché ca. ¡Mora Bëngbe Bëtsá chabuatsbocá, cha ndegombre muábioye tbobobonshánese!, er cha tonjánayana Bëngbe Bëtsabe Uaquiñá canmëna ca” —chënga imojtsichamo.

<sup>44</sup> Y chë bacna soye ochjajnayata, Jesúsëftaca ibojtsecrucificanátnaca cachcá ibojtsóyenguaye.

*Jesús tojanóbana*

*(Mc 15.33-41; Lc 23.44-49; Jn 19.28-30)*

<sup>45</sup> Nýetsto orscana las tresëntscoñe, nýets quem luare yojtseibétata.

<sup>46</sup> Chca orna, Jesús chabe biyañe tojanáyebuachena: “Elí, Elí, ¿lema sabactani ca?” (Chca endayana “Atšbe Bëtsá, atšbe Bëtsá, ¿ndáyeca cachcá šcojonýa ca?”)

47 Chca tmojanuena ora, báseftanga chentše imojtsemna entsanguentsana imojtsichamo: “Cha Elías, chë Bëngbe Bëtsabe juabna oyebuambnayá, bontsechembuana ca.”

48 As chora, chentša canya tojéftsánótjajo canye esponjéshe janguanguama, untja vinyeca chéshe tojanfchecuacúa, canye niñefjiñe tojananguésétjo y Jesúsbioye tojanbeconá chaofšema.

49 Pero ínÿengna tmojánayana: “Cachcá mochjonÿaye, er Elías tayochjabo jabátsbocama ca.”

50 Pero Jesús cachiñe jabuache tojanoyó y tojanóbana.

51 Y cachora, Bëngbe Bëngbe Bëtsabe bëts yebnoca yojújonÿana entsšjua tséntsaca yojtsenájataye, tsbanánocana fshantsoye. Chëjua bënëjua inauamna y chë tsatséntsaca inaujonÿana. Fshantse yojuangmëmana, ndëtsbenga yojtsashtëtšana,

52 y chë cuevëshënga obanëngaca yojtsëtëfjo y banga Bëngbe Bëtsabe entsanga tmojtanayena.

53 Y chënga, Jesús tojtanayenentsana, chë cuevëshënguentsana tmojánbocana, y Jerusalén, chë uamana bëts pueblo ca uabáinoye tmojánamashjna y ba entsángbioye tmojánebëbuacana.

54 Chë soldadëngbe amëndayá y chë ínÿenga, Jesús jtsebojanÿama cháftaca tmojanoquedanga, chë fshantse yojuangmëmanama tmojáninÿe ora, y nyetsca chë yojtsëchnëjuana soyëngama, puerte auatjanánënga imojtsemna y tmojánayana: “¡Ndegombre quem boyabása Bëngbe Bëtsabe Uaquiñá yomna ca!”

55 Ba shembásengnaca chentše imojtsemna y bënocana imojtserreparana. Chëngna, Galileocana Jesús tmojanasto y cha imojanájabuachana.

56 Chë shembásengbeñe imojtsemna María Magdalena; María, Santiago y Josebe mamá; y Zebedeobe uaquiñatbe mamá.

### *Jesús tmojanatbontsá*

*(Mc 15.42-47; Lc 23.50-56; Jn 19.38-42)*

57 Ya yojtseibétatana ora, canye bomna boyabása, José ca uabainá, tojánashjango. Cha inamna Arimatea luarocá y Jesusbe ustoná.

58 José tojána Pilato jinÿama, Jesusbe cuerpo jotjañama. As Pilato tojanmandá chë cuerpo chamontšabuáchema.

59 José chë cuerpo tojanca y canye nduatsenga lino entsšjuaca tbojanandmaná.

60 Y canye chabe tsëm cuevëshiñe tbojanajó. Tempo cha inamánda chë cuevëshna ndëtsbenguñe chamopormama.

Canÿe bëts ndëtsbé tojansjoná y chë cuevëshoye amashjuanentše tojánachto; y chentšana José yojtsatoñe.

<sup>61</sup> Pero María Magdalena y chë inÿe Mariyna chentše tbojt-sanoquedañe y chë cuevëshe ndirichiñe tbojanótbema.

*Soldadënga tmojána Jesús yojtsatbontsánentše jtsebojanÿama*

<sup>62</sup> Yëfsana, chë ochnayté, chë bachnangbe amëndayënga y chë fariseunga cánÿiñe tmojána Pilato jinÿama.

<sup>63</sup> Tmojaniana: —Taita, bënga fsëntsejuabná ntšamo chë bostero cabá ainá ora tonjánayanama, chë unga tianoye cha tjayenama ca.

<sup>64</sup> Chíyeca, momandá chë cuevëshe soldadënga chamotsashanÿá unga tentscuana. Chca, chabe uatsjédayënga ndoñe ibeta chamondabo chabe cuerpo jabétsatbëbama, y chentšana chënga entsanga chamúyana, Jesús tojtayena ca. Y chca, chabiamama quem ústonoye bostero soye, chë cachabiamama tojánayana soyëngama puerte más bacá nántsemna ca —chënga tmojaniana.

<sup>65</sup> As Pilato tojanëyana: —Tšëngaftanga cach tšëngaftangbiamama soldadënga šmondábamna. Motsajna y chë cuevëshe cuedádoca šmochtsashanÿá, ntšamo šmondëtatšëmbcá ca.

<sup>66</sup> Chora chënga tmojána chë cuevëshe jtsashanÿama; chë ndëtsbena, tsengájašeca imojuinÿaná, ntšotatšëmbcá ndocná choye chaondámashënguama, y soldadënga chentše tmojëftsanashejuana.

## 28

*Jesús tojtayanena*

*(Mc 16.1-8; Lc 24.1-12; Jn 20.1-10)*

<sup>1</sup> Ochmayté chentšana, chë inÿe semana bojatšenté yojtsebínÿana ora, María Magdalena y chë inÿe María tbojána cuevëshoye jarrepárama.

<sup>2</sup> Ndeolpe fshantse tojanangmëmmana, er Bëngbe Bëtsabe canÿe ángel celocana tojántsma, chë cuevëshoye tojanobeconá, chë atamiana ndëtsbé tojtsanjuaná y chiñe tojanótbema.

<sup>3</sup> Chë ángelna mo canÿe tcuinÿejcá yojtsebuashinÿinÿana, y chabe uichëtjonëjuangá uafjantsëjuangá mo jantšetëshcá yojtsamna.

<sup>4</sup> Chë soldadënga chca tmojáninÿe ora, de auatja yojtsangmëmnyaye y mo obanëngcá imojtsemna.

<sup>5</sup> Chora chë ángel chë shembásatbioye tojanëyana: “Ndoñe batauatjana. Atše sëntsetatšëmbo tšëngaftanga Jesús, chë tmonjancrucificá cha šmojtsenguama.

<sup>6</sup> Cha muentše ndoñe quenátsmëna; cha tontayena, ntšamo cachá tonjanayancá. Mabata y šochjinÿe cha endëtsesegoranentše.

<sup>7</sup> Betsco motsata y chë uatsjéndayënga šochjáuyana: ‘Jesús tontayena y tšëngaftangbe natsana Galileoye echanjá; chocha šmochanjinýe ca.’ ” Y chora cha tojánayana: “Chca šondmëna tšëngaftanga jauyanana ca.”

<sup>8</sup> Cachora chë shembásata chë cuevëshentšana tbojésanbocna, auatjanánata pero puerte oyejuayata, y tbojéftsantotjajo chë soye chë uatsjéndayëngbeñe jobuambayama.

<sup>9</sup> Y ndeolpe Jesús chata tojánëbëbuacna y tojanacheuá. Chatna, chábioye tbojanobéconata, tbojtandorata y chabe shecuatše shëconana imojtobojcjuá.

<sup>10</sup> Y Jesús tojanéyana: “Ndoñe batauatjana. Motsata atšbe uatsjéndayënga, atšbe catsátanga jáuyanama Galileoye chamotsá y chocha atše šmochjinýe ca.”

*Ntsamo chë soldadënga tmojánayana ndayá tojanochñënguama*

<sup>11</sup> Chë shembásata ibojtsayëntscuana, básefta soldadënga chë bëts puebloye tmojána y ntsamo tojanopasacá lempe chë bachnangbe amëndayëngbeñe tmojanobuambá.

<sup>12</sup> As chë bachnangbe amëndayënga, chë judiëngbeñe bëtsëjemëngcá mandayëngaftaca tmojánenefjna jenóyeunayama. Chëngna chë soldadëngbiroye bëtscá crocénana tmojtanatšatá,

<sup>13</sup> y mëntšá tmojanabuayená: “Tšëngaftanga šmochjayana, ibeta šmotsomáñëntscuana, Jesusbe uatsjéndayënga tmojabo y chabe cuerpo tmojabétsatbëba ca.

<sup>14</sup> Y chë mandado chë soyama chaojátatšëmbonëse, bënga lempe cháftaca fchjenóyeunaye, chca, tšëngaftangaftaca ndocá chaondopasama ca” –chënga tmojanéyana.

<sup>15</sup> As chë soldadënga chë crocénana tmojanóyëngacñe y tmojanma ntsamo chë mándayënga tmojanabuayenacá. Ba entšanga chë cuento tmojanuena y mëntscóñama judiënga cachcá mondbétsichamo.

*Jesús chë uatsjéndayënga tojanichamó, Bëngbe Bëtsabe soyëngama nyëtsquénache jábuayenama*

*(Mc 16.14-18; Lc 24.36-49; Jn 20.19-23)*

<sup>16</sup> Chentšana, chë bnëtsana canýe uatsjéndayënga Galileoye tmojána, chë ndëmua tjoye Jesús chënga tojanabuayená choye.

<sup>17</sup> Y Jesús tmojáninýe ora, tmojtandorá. Pero báseftangna imojétsejuabnaye nderado cha ndoñe Jesús yontsemna ca.

<sup>18</sup> Jesús chëngbiroye tojanobeconá y tojanéyana: “Bëngbe Bëtsá nyëts mando atše šonjatšetá celoca y quem luarentše.

<sup>19</sup> Chcasna, motsajna, nyëts luarënguenache oyenënga atšbe uatsjéndayënga šmochjábiana. Entšanga šmochjubaye atšbe

Taitá, atše chabe Uaquiñá y chë Uámana Espíritbe uabaina jayanëse, átšbeñe šmošbuachéyeca,  
<sup>20</sup> y šmochjabuatambá lempe ntšamo atše tchojamëndacá chënga chamóyeunama. Y ndegombre atše nýets tempo tšëngaftangaftaca chanjëftsemna, quem luare jopochócantscuana ca” —Jesús tojanéyana.

## San Marcos

*Juan chë Ubayaná entsanga yojanabuayiná  
(Mt 3.1-12; Lc 3.1-9, 15-17; Jn 1.19-28)*

<sup>1</sup> Mëntšá tojanobojatsé chë tšabe noticiënga Bëngbe Bëtsabe Uaquiñá Jesucristbiamá.

<sup>2</sup> Ntšamo bayté entsemna, chë Bëngbe Bëtsabe juabna oyebuambnayá Isaiás chabe librëšañe yojëftsayancá, ntšamo Bëngbe Bëtsá chabe Uaquiñábioye ibojauyanama cha tojanábema ora:

Minýe, atšbe abuayiyayá acbe natsana sëntsichamná, chë aca jabama lempe echanjaprónta cha.

<sup>3</sup> Entšanga ndoyena luaroca cha enduáyebuache mëntšá:

“Bëngbe Utabná echanjabo ca;

mo nda canýe benache tojtseprontacá canýe uámana entšá jashjanguama,

cachcá tšëngaftanga, cha jabama ainaniñe tšabe juabnëngaca šmochtseprontana ca” —cha tojanábema.

<sup>4</sup> Chcase, Bëngbe Bëtsá Juan tbojanichmó, y cha tojánbocna entsanga ndoyena luaroca, Bëngbe Bëtsabe soyëngama abuayiyayé y entsanga ubáyana. Cha entsanga yojanëtsëtsnaye: “Tšëngaftangbe bacna soyëngama ngmënaca šmochtenójuaboýe, chca amana šochtsajbaná, y Bëngbe Bëtsabe benache šmochtishache. Chora cbochjúbaye, y Bëngbe Bëtsá tšëngaftangbe bacna soyëngama cmochanjáperdonaye ca.”

<sup>5</sup> Nýets Judea luarocana chábioye entsanga imojánbocana, y Jerusalenentsana nýetsca entságnaca, y Bëngbe Bëtsábioye chëngbe bacna soyëngama jaimpáda chentšana, Juan Jordán ca uabaina béjajiñe chënga yojanëbáyana.

<sup>6</sup> Juanbe entsayá inauapormana camellbe stjënasheca y bobache yojanasnana; chapulinatémënga y tjañe méloye inasaye.

<sup>7</sup> Y mëntšá entsanga yojanëtsëtsnaye: “Atšbe ústonoye inýa echanjabo, atšbiamá más obenana bomná; chíyeca atše mercedo taitatobuajoñe, ni mo jotsejbiyana chabe she-cochëtjonëshentša corriëja jajafjonama.

<sup>8</sup> Atšna búyeshca cbondëubáyana, pero chë echanjabábeyecna, Bëngbe Bëtsá bochanjíchmuá chë Uámana Espiritu tšëngaftangbe ainaniñe cháumashënguama ca.”

*Juan, Jesúsbioye tbojanabaye  
(Mt 3.13-17; Lc 3.21-22)*

<sup>9</sup> Chë tempo, Galilea luarocana Nazaret pueblentšana Jesús yojéftsebocna, y Juan yojtsemnoye tojána; y Jordán béjajiñe Jesúsbioye cha tbojanabaye.

<sup>10</sup> Bejajoicana yojtashëbëbocna orna, tojáninÿe celoca atëfjniñe, y chë Uámana Espíritu chábioye mo palomatemcá yojtsastjajuana.

<sup>11</sup> Y celocana Bëngbe Bëtsá mëntšá tbojaniyana: “Acna atšbe bonshana Uaquiñá condmëna; acbiama corente sëntsoyejuá ca.”

*Jesús tojanobená Satanás jayënjanama*

*(Mt 4.1-11; Lc 4.1-13)*

<sup>12</sup> Chentšana chë Uámana Espíritu Jesúsbioye entšanga ndoyena luaroye tbojanánatse.

<sup>13</sup> Canta bnëtsana te chë entšanga ndoyena luaroca tbojanjëtana, y Satanasma yojanabó jisháchichiyama. Chë luar-entše tšátjaye bayënga imnajena; chentšana, Bëngbe Bëtsabe angelënga cha imojtseserverna.

*Jesús tojanontšé Galileoca chabe trabajo jamana*

*(Mt 4.12-17; Lc 4.14-15)*

<sup>14</sup> Juan cárceloye tmojanëttámëntšana, Jesús Galileoye toje-saná; y chiñe cha yojanabuayiyiná chë tšabe noticiënga Bëngbe Bëtsabiamana.

<sup>15</sup> Jesús entšanga yojanëtsëtsnaye: “Ora tocbobuache, Bëngbe Bëtsabe amëndayana echanjóshjango. Tšëngaftangbe bacna soyëngama ngmënaca šmochtenójuaboye, y chca amana šmochtsajbaná y Bëngbe Bëtsabe benache šmochtishache; y ainaniñe chë tšabe noticiënga Bëngbe Bëtsabiamana šmochjójyëngacñe ca.”

*Jesús tojánachembo canta boyabásenga beonga ashebuánayënga cha chamuastama*

*(Mt 4.18-22; Lc 5.1-11)*

<sup>16</sup> Galilea uafjajónaye tsachajana Jesús yojtsaye ora, cha tojánanÿe Simón y chabe uabentsá Andrés; chatna atarraiëshangá ibnetsashbuëtsetšañe, er beonga ashebuánayata chata ibnamna.

<sup>17</sup> Chora Jesús tojanëyana: “Atšeftaca mabata. Atše cbochanjábiamana Bëngbe Bëtsabiamana entšanga anguayata; y morscana, nÿe beonga ashebuánayata ndoñe quešochátsmëna ca.”

<sup>18</sup> Y cachora chatbe atarraiešhangá cachcá tbojésanaboshjuana y Jesús tmojanasto.

<sup>19</sup> Más chcoye yojátaye orna, Jesús tojánanÿe Santiago y chabe uabentsá Juan, Zebedeobe uaquiñata; chatna barquëshañe ibnetsotbemañe, chatbe atarraiešhangá atapórmayañe.



20 Chora Jesús chë útata tojánachembo; as chatna, chatbe taitá Zebedeo chë barquëshañe tmojésanboshjona chabe peóngaftaca y Jesúseftaca tbojtsanoñe.

*Jesús, bacna bayëjbe juabna cánjábioye tbojanbojuaná  
(Lc 4.31-37)*

21 Chentšana, Jesús y chabe uatsjéndayënga Capernaum ca uabaina puebloca tmojánashajna. Chë ochnayté, Jesús chë judiëngbe enefjuana yebnentşe tojánamashëngo y yojóntša entsanga jabuátambama.

22 Entsanga imojtsenjnanaye ntšamo Jesús yojtsabuatambacá, er chama mo canye mando bomnacá yojtsóyebuambnaye, ndoñe nye ntšamo Moisesbe ley abuatambayënga imojanabu-atambacá.

23 Chë pueblentşe judiëngbe enefjuana yebnentşe yojtsemna canye entsá bacna bayëja uambayá, y chábeyeca chë boyabása yojóntša mëntšá uayebuáchana:

24 —¿Ndayama bëngbioye təcjabo, Jesús Nazaretocá? ¿Tcojabo bënga jabétsapochocama? Atşe sëndétatšëmbo nda aca comnama, aca chë Bëngbe Bëtsabe Uamaná ca.

25 Chora Jesús chë bayëjbioye tbojtsanácacana, y tbojaniyana: —¡Iytëca móbema y chábentšana maisebocna ca!

26 Chora chë bacna bayëjna tojanma chë boyabása ataque chaboshachama, jabuache tojanoyó y chábentšana tojésanbocna.

27 Chama, nyetsca entsanga ojanánënga imojtsemna, y mëntšá imojtsentjanaye: “¿Ndayá chca yojtsemna? ¿Canye tsëm buatëmbana soye? ¡Quem boyabása mando bomnacá y obenacá entsabuatambá, y chca, chë bayëjënga cha jt-samëndayana y chëngnaca joyeunayana ca!”

28 Y betscó nyets Galilea luarentša pueblënguenache Jesusbiana yojtsótatšëmbo.

*Jesús, Simón Pédrëbe uambén mamábioye tbojanshná  
(Mt 8.14-15; Lc 4.38-39)*

29 Chentšana, chë enefjuana yebnentšana tmojánbocana y Santiago y Juánoftaca Jesús tojána, Simón y Andresbe yebnoye.

30 Simonbe uambén mamá šocá inajájona, jabuache calentóracá, y Jesúsbioye chë šocabiana tmojaniyana.

31 As chora, Jesús tojanobeconá, chë šocábioye tbojanábuacueshache y tbojanatsbaná. Cachora chë calentora tbojtsanóbojuañe; y cachora cha tojtantsbaná y tojanontšë chënga jobuácuedana.

*Jesús ba šoquënga tojanashná  
(Mt 8.16-17; Lc 4.40-41)*

<sup>32</sup> Chë te jetiñe, shinÿe ya yojuenatjëmba ora, chë luarentša nyetsca šoquënga y bacna bayëjënga uambayënga Jesúsbioye tmojanënatse;

<sup>33</sup> y nyetsca entsanga bëšoye imojobeconá.

<sup>34</sup> Jesús banga tojanashná, nyetsca šocana bomnënga, y ba bacna bayëjënga entsanguentsana tojtanëbuacna; y ndoñe tonjanalesenciá chë bayëjënga chamóyebuambama, er chënga imnatátšëmbo cha chë Cristo bëtsemnama.

*Chë judiëngbe enefjuana yebnënguenache Bëngbe Bëtsabe soyëngama Jesús yojanabuayiyná*

*(Lc 4.42-44)*

<sup>35</sup> Yëfsana cabá cachëse, cabá ibetcá, Jesús tojëftsantsbaná, chë pueblentsana tojëftsanbocna y entsanga ndoyena luaroje tojtsanoñe, choca Bëngbe Bëtsáftaca jencuëntama.

<sup>36</sup> Pero Simón y chabe enutëngna tmojána jetsenguan-guama;

<sup>37</sup> y tmojtsaninÿena ora tmojanियana: —Nyetscanga cmontsenguá ca.

<sup>38</sup> Y Jesús tojanëyana: —Inÿoye cuajna, cam béconana pueblëngoye, chíñnaca Bëngbe Bëtsabe soyëngama entsanga chayábuayenama; er chama atše sënjabo ca.

<sup>39</sup> Y chentsana, Jesús yojánana Bëngbe Bëtsabiamama entsanga abuayiyenaye chë judiëngbe enefjuana yebnënguenache, nyets Galileiñe, y entsángbentsana bacna bayëjënga yojtëbuacana.

*Jesús, canÿa bacna nguayanánaca šocábioye tbojanshná*

*(Mt 8.1-4; Lc 5.12-16)*

<sup>40</sup> Chentsana, canÿe boyabása bacna nguayanánaca šocá Jesúsbioye tojanobeconá; y joshaméntšase mëntšá tbojanimpadá: —Aca tcojtsebošëse, aca catjobenaye atšbe šocana jtsebojuánama ca.

<sup>41</sup> Jesús chabiamama tbojanongmé; cucuátšeca tbojánbojajo y tbojanियana: —Aíñe sëntseboše. ¡šocana cbotsebojuaná ca!

<sup>42</sup> Y cachora chë šocana tbojtsanóbojuanañe y tšabá yojtsatsmëna.

<sup>43</sup> Chora Jesús chábioye tbojtanichmó, pero puerte mëntšá tbojanmandá:

<sup>44</sup> —Mouena; ndocnábeñe quem soye cattsecuëntaye; nÿe Jerusalenoca báchnëbioye motsa y cha cochjinÿinÿiye aca mora ya tšabá cojtsatsmënama. Chora cochjuátšëmbona ntšamo Moisés chabe leyiñe tojanmandacá, Bëngbe Bëtsábioye chama jëtschuayama, chca, nyetsca entsanga chamotatšëmbona mora ya tšabá cojtsatsmënama ca.

<sup>45</sup> Pero chë boyabásana, chentsana tojëftsanbocna y cachora yojóntša nyetsquënache entsanga yapa acúntayana Jesús tbojanshnama. Chë causa, Jesús ndoñe yontsobena

entšangbe delante pueblënguenache jtsanana, ndayá nÿe chë pueblënga béconana y nÿetsca chë entšanga ndoyena luarënguifne yojánana; pero nÿets luarëngocana chábioye entšanga imojánashjuana.

## 2

*Jesús, canÿe jama ndobenábioye tbojanshná*  
(Mt 9.1-8; Lc 5.17-26)

1 Chentšana, Jesús Capernaumoye tojtanashjango; y entšanga imojátatsëmbona, Jesús yebnentše yojsatsmënama.

2 Mallajta entšanga chentše tmojanójoto; chë causa chë yebnentše ya tondaye más luare entšangbiana yontsemna, ni mo chë amashjuanentše, y Jesús Bëngbe Bëtsabe soyëngama yojsabuayiynaye.

3 Chora tojanopasá, canta boyabásenga tmojánashjango, canÿe entšá jama ndobená imojtsaismana.

4 Pero ndoñe tmonjanobená Jesús yojtsemnoye cha juambana, tša entšanga causa. Chcasna, chë canta boyabásenga yebna tsbanánoca, Jesusbe tatsëtsoca batšá tmojánatëfjo y chëjana chë jama ndobená tjuashiñe tmojanëstjango.

5 Jesús tojáninÿe chënga tša imojtsošbuaché chë šocá jáshnama cha yojanobenama; as chë jama ndobenábioye tbojaniyana: “Sobreno, mouena; acbe bacna soyënga tcbontseboperdoná ca.”

6 Chentše báseftanga judiëngbe ley abuátambayënga imnatbema; chënga chora mëntšá imojtsejuabnaye:

7 “¿Ntšámoyeca quem boyabása chca yojsichamo? Jesús ndoñe tšabá Bëngbe Bëtsabiana quenátichamo; mo chábioye cuafjoyenguangcá entsemna. Ndocna entšá quenátobena ínÿabioye bacna soyëngama japerdónana; nÿe Bëngbe Bëtsana aíñe ca.”

8 Pero Jesús cachora lempe yojtsetátšëmbo ntšamo chënga ainanoca imojtsejuabnacá; as tojanëyana: “¿Ndáyeca chca tšëngaftanga ainaniñe šmojtsejuabná?”

9 ¿Tšëngaftangbiana ndayá más paselo nántsemna tšëngaftangbe delante chë jama ndobenábioye atše jauyanana: ‘Acbe bacna soyënga tcbontseboperdoná’, o ‘Matëtsbaná, acbe tjuashe mesocñe y motsa ca’?

10 Y chca, mora atše cbochanjínÿanÿiye Bëngbe Bëtsá Entšá tbojanbemá quem luariñe obenana yobomnama, entšanga bacna soyëngama jáperdonama ca” —Jesús tojánayana.

Y chë jama ndobenábioye tbojaniyana:

11 “Atše cbëyana, matëtsbaná, acbe tjuashe mesocñe y acbe yebnoye motsatoñe ca.”

12 Cachora chë jama ndobená tojtantsbaná, chabe tjuashe yojesocñe, y entšangbiajana chentšana yojésebcna. Chama nyetsca entšanga imojenjaná y Bëngbe Bëtsábioye imojtsatschuanaye, y mëntšá imojtsichamo: “Nÿa ndocna te tša bëts soye chemuáisinÿe ca.”

*Jesús, Levíbioye tbojanchembo chabuastama*  
(Mt 9.9-13; Lc 5.27-32)

13 Chentšana, Jesús cachiñe chë uafjónaye tsachoye tojesaná; ba entšanga chábioye imojobeconá, y Jesús yojtsabuátambaye.

14 Chentšana yojtsataye orna, Jesús tbojáninÿe Levíbioye, Alfeobe uaquiñá, yojtsanotbemañe, entšanga impuesto atjanayacá inétsotrabajañe. Chora Jesús tbojaniana: “Smastoca.”

Y Leví tojantsbaná y tbojanasto.

15 Tojanopasá, Jesús Levibe yebnentše yojtsesaye, y banga Romocama entšanga impuesto atjanayënga y inÿe bacna entšanga, mesëshentše cánÿiñe imojtsetbiámana, Jesús y chabe uatsjéndayëngaftaca; er ba entšanga cha imojústona.

16 Chë fariseunga y chë ley abuátambayënga, chë entšangaftaca Jesús yojtsesama tmojáninÿe ora, chabe uatsjéndayëngbioye tmojanatjá: —¿Ndáyeca tšëngaftangbe buatëmbayá, entšanga impuesto atjanayëngaftaca y bacna soye amëngaftaca yojtsesá ca?

17 Jesús chca tojanuena; as mëntšá tojanëjua: —Chë salud tmotsobomñënga, ashnayá ndoñe ntsëjabótana, pero chë šoquënga aiñe. Y atše ndoñe chiyátabo chë Bëngbe Bëtsabe bominiñe tšabá amënga jabáchembuama, ndayá chë bacna soye amënga imomna ca juabnayënga átsbioye jabáchembuama ca.

*Jesús tmojantjá chë Bëngbe Bëtsáftaca jencuéntama tondaye saytescama*

(Mt 9.14-17; Lc 5.33-39)

18 Canÿe, Juan chë Ubayanabe ústonënga y chë fariseungbe usetonënga, Bëngbe Bëtsáftaca jencuéntama tondaye ntjascá imojtsemna ora, básefta entšanga Jesúsbioye tmojanobeconá y mëntšá tmojaniana: —Juanbe ústonënga y chë fariseungbe usetonënga monduamana tondaye ntjascá jtsemnana Bëngbe Bëtsáftaca jencuéntama. ¿Ndáyeca acbe uatsjéndayënga ndoñe chca ca?

19 As Jesús tojanëjua: —Chë casamento fiestentše, chë ófjanënga saná ndoñe ntsabuáshebenana. ¿Ntšamo chca ndoñe nántsemna? Chë tojobouamá entšá chëngaftaca tojtsemnëntscuana, chë ófjanënga bëtská jasana y cháftaca oyejuayënga jtsemnana.

20 Pero ora echanjobuache y chë boyabása chëngbentšana mochantsánatseñe; chora cocayé chë ófjanënga echántsamna tondaye ntjascá jtsemnana. Ntšamo chë tojobouamá boyabása y chë ofjanëngaftaca endmëncá, cachcá endmëna atše y atšbe uatsjendayëngaftacnaca.

21 “Ndocná, canye tanguá entšayá, base tsëm entšëjuaca jtarmëndana; chca tcojamëse, chë tsëm entšëjua jtsabéconana y chë tanguá entšayá más jtsatanëcanana, y chca, chë uátanëcniñe más bëtsiñe jtsabemana.

22 Y cach ndoñe, chë tojtseshayana vínoye tanguá jasabenguiñe ntjataftsuámayana; er chë jasabenga jtseshébëfjuana y chë vínoye jtsabuáshanana, y chë vínoye y chë jasabenga tondayama ntjatoservénana. Chíyeca comna, chë tojtseshayana vínoyna tsëm jasabenguiñe juaftsuámana; chca, chë jasabenga y chë vínoye josérviana ca” —Jesús tojánayana.

*Jesusbe uatsjëndayënga canye ochnayté trigo tmojanátabebe (Mt 12.1-8; Lc 6.1-5)*

23 Canye ochnayté, Jesús canye jajajana yojtsaye; y chabe uatsjëndayënga chëjana imojtsachñëjuana ora, tmojanontšë trigo juatabebiana.

24 Chë fariseunga chca imojinye ora, Jesúsbioye tmojanianana: —Minye. ¿Ntšamo acbe uatsjëndayënga montsamcá, ndoñe quenátslesenciana ochnayté jtsamama ca?

25 Pero cha tojanëjua: —¿Ndoñe šmëndualía y šmondëtatšëmbo ntšamo Rey David y chabe enutënga tmojanmama shëntseca imojtsemna ora y jasama yojtsëjaboto ora?

26 Chca ora, Abiatar chë judiëngbe bachnangbe más uámana amëndayá inamna ora, David Bëngbe Bëtsabe yebnoye yojámashëngo, y chë luarentše Bëngbe Bëtsá yojamnama inyinynaye tandëšënga yojase; y chë cháftaca imojánajna entšágnaca yojátšataye. Y chë tandëšna nye bachnangbiana belesenciana jasama. Masque David chca tojanma, Bëngbe Bëtsá ndoñe tonjánayana David canye bacna soye tojanma ca.

27 Y Jesús más tojánayana: —Bëngbe Bëtsá ochnayté entšabiana tojama y entšá ndoñe tbonjábema nye chë ochnayté ndoñe chaondëtrabajama.

28 Chíyeca, Bëngbe Bëtsá Entšá tbojanbemá, ndayá entšá ochnayté tojtsama sóynaca jtsemándayana ca.

### 3

*Chë buashana cucuatše bomna entšá (Mt 12.9-14; Lc 6.6-11)*

<sup>1</sup> Chentšana, Jesús cachiñe chë judiëngbe enefjuana yebnoye tojésanamashëngo; y chentše canye boyabása yojtsemna, buashana cucuatše bomná.

<sup>2</sup> Chë fariseunga chiñe imojtserrondana jinýama nderado Jesús chë ochnayté chábioye tabuanjashnama, as chca chënga jtsebomnama ndaye sóyeca cha mal jaquédana.

<sup>3</sup> Chora Jesús chë buashana cucuatše bomnábioye tbojaniana: —Chentše, entšangbe delante motsa ca.

<sup>4</sup> Y chë fariseunga tojanatjá: —¿Ndayá yojtselesenciana ochnayté jamama, tšabe soye o ndoñe tšabe soye? ¿Jatsbocama o jtsepochoćama ca?

Pero chënga ndocá tmonjanjuá, nýe iytëca imojjobiama.

<sup>5</sup> Chora Jesús rábiaca y ngménaca chë fariseunga tojanënyänýé, chënga ainaniñe josértama ndoñe montseboše causa; y chë buashana cucuatše bomnábioye tbojaniana: —Macuenyanëjaná ca.

As chë boyabása tojanacuenyanëjaná, y chora tšabá chëtša yojtsatamna cach inýetšacá.

<sup>6</sup> Pero chë fariseungna, chentšana tmojésanbocana ora, Rey Heródesbe ustonëngaftaca tmojanenoyeuná Jesusbe contra, y tmojanontsé juabnayana ntšamo jamëse Jesús jóbama.

### *Mallajta entšanga Jesúsbioye tmojanobeconá*

<sup>7</sup> Chentšana, Jesús chabe uatsjëndayëngaftaca tojanoluaré mar béjaye tsachoye, y Galileocana bëtscá entšanga tmojanasto.

<sup>8</sup> Inýe entšágnaca chábioye tmojanobeconá Judeocana, Jerusalenocana, Idumea ca uabaina luarocana, Jordán béjaye chenguanocana, Tiro y Sidón pueblëngocana. Chënga tmojanobeconá, Jesús tša bëts soyënga yojtsamama tmojanuena ora.

<sup>9</sup> Jesús chabe uatsjëndayënga tojanëyana: “Motsajna y canye barquësha atšbiamá šmochjuaprónta, tša entšanga ndoñe chašmondëtsatsëntšnama ca.”

<sup>10</sup> Er cha banga tojanashná, y chë causa, nýetscanga šocana bomnënga chábioye tmojanajuatsëntšená cha jabojuama.

<sup>11</sup> Y chë bacna bayëjënga uambayëngna, Jesús tmojinýe ora, betscó chabe shecuatšentše imojtsofshëntsamëntšenaye, y chë bacna bayëjëngbeyeca mëntšá imojtsáyebuache: “¡Aca Bëngbe Bëtsabe Uaquiñá condmëna ca!”

<sup>12</sup> Pero Jesús puerte tojanamëndá, nda cha bëtsemnama entšangbe delante ndoñe chamondëtsichámuama.

*Jesús chë bnëtsana uta uatsjëndayënga tojanabacacá  
(Mt 10.1-4; Lc 6.12-16)*

13 Chentšana, Jesús canye batsjoye tojánatsjua, y ndēmuanyenga tšabá tbojanínynanenga tojánachembo. Y chëngna chábioye tmojanobeconá.

14 Chora, chënguentšana bnëtsana útata tojanëbuáyana, chamotsetjëmbambnama, y Bëngbe Bëtsabe soyëngama entšanga chámabuayenama;

15 y chënga obenana tojanatšatá entšángbentšana bacna bayëjënga jtëbuacanama.

16 Mënga mondmëna chë bnëtsana uta bocacánënga: Simón, chë ndábioye Pedro ca Jesús tbojanabaye;

17 Santiago y chabe uabentsá Juan, Zebedeobe uaquiñata, chata tojanëbaye “boanerges ca”, y chca endayana “uajue-sayabe uaquiñata ca”;

18 Andrés, Felipe, Bartolomé, Mateo, Tomás, Santiago, Alfeobe uaquiñá; Tadeo, Simón chë celote ca uabobainá;

19 y Judas Iscariote, chë chentšana ndoñe baytesna, Jesús uayayëngbe cucuatšinë bochjanboshjoná.

*Ley abuátambayënga tmojánayana, Jesús Satanásbentšana obenana tojanóyëngacñe ca*

(Mt 12.22-32; Lc 11.14-23; 12.10)

20 Chentšana, Jesús yebnoye tojtanamáshëngo, y tša entšanga chentše tmojanójoto; chë causa, ni cha ni chabe uatsjëndayënga, ni mo jasama luare ndoñe imontsebmoma.

21 Jesusbe pamíllanga ntšamo cha yojtsepásama tmojántatšëmbona ora, tmojána cha jetsbetšama, er entšanga imojtsencuëntaye cha opá tojtsanóbema ca.

22 Y chë ley abuátambayënga Jerusalenocana tmojánashjajnëngna Jesusbiamama mëntšá imojtsichamo: “Chabe ndegombre mandayá Beelzebú, cach Satanás yojtsemna. Cha, chë bacna bayëjënga amëndayá, Jesúsbioye obenana tbojatšetá entšángbentšana bacna bayëjënga chauatëbuacnama ca.”

23 Chënga chca imojtsichámuama, Jesús chënga tojánachembo, y cuentëngaca tojanontšé jáuyanana, jinyanýiyama chënga canye ndoñe ndegombre soyinë imojtsemnana, mëntšá: “¿Ntšamo Satanás nantsobena cachá jtenábocnama ca?”

24 Canye amëndayábentše entšanga tmojtsenojatá y tmojtsenáyase, chë amëndayana ndoñe ntjatotonana.

25 Cachcá, canye yebnentše pamíllanga tmojtsenojatá y tmojtsenáyase, chë pamíllanga ndoñe tšabá nyets tempo quemochátsmëna.

26 Y cachcá, Satanás y chábënga ndoñe tmontsenëyeunana y cachabe contra tojtsemnëse, chabe amëndayana ndoñe más queochátstotona; y cha ya ndoñe más chëngbe amëndayá queochátsmëna.

27 “Ndocná quenátobena canÿe corente añemo bomna entšabe yebnoye jamashënguana y chabe soyënga jtsebocana, ndoñe natsana tconjshétsebatsëquëse. Nÿe tcojshétsebatsëquëse cocayé cuanjobenaye cha jefcana.

28 “Ndegombre cbëyana, Bëngbe Bëtsá entsangbe nÿetsca bacna soyënga echanjáperdonaye, y ntšamo Bëngbe Bëtsabiamia y ínÿengbiama ndoñe tšabá tmonsichamo soyëngnaca;

29 pero chë Uámana Espíritbiamia ndoñe tšabá ichámëngna ndocna te queochátaperdonaye, er nÿetsca tescama castigánënga jtsemnama chënga jtsamnana ca” —Jesús tojánayana.

30 Jesús chca tojanëyana, er chënga imojtsichamo cha bacna bayëja ibojtsambá ca.

### *Chë Jesusbe ndegombre pamillanguentsënga*

*(Mt 12.46-50; Lc 8.19-21)*

31 Chëntscuana, Jesusbe mamá y catšátanga choye tmojánashajna, pero nÿe shjoca imojtsemna; y canÿa tmojanichmó cha jachembuama.

32 Chë ba entsanga chentše chabe shëconana imojtsetbiámanëngna, chora tmojanियana: —Acbe mamá, acbe catšátanga y uabënanga shjoca montsemna; aca cmontsenguá ca.

33 Chora cha tojanëjua: —¿Nda atšbe mamá yomna, y ndëmuanÿenga atšbe catšátanga ca?

34 Chentšana, chë chabe shëconanana tbiamanëngbioye jarrepárase, tojánayana: —Quemënga mondmëna atšbe mamá y atšbe catšátanga.

35 Er ndánaca, ntšamo Bëngbe Bëtsá yobošcá tojtsamá, jtsemnana atšbe catšata, atšbe uabena y atšbe mamá, atšbe ndegombre pamillanguentsá ca.

## 4

### *Chë jenabe cuento*

*(Mt 13.1-9; Lc 8.4-8)*

1 Chentšana, uafjónaye tsachoca Jesús tojtëtanontsé Bëngbe Bëtsabe soyëngama jabuátambama. Mallajta entsanga tmojanobeconá causa, chë uafjónayentše yojanamna canÿe barquëshoye Jesús tojánasëngo y tojanótbema; y chë entsanga tsachoca imojtsemna.

2 Chora cuentëngaca ba soyëngama tojanabuatambá.

Mëntsá tojanëyana:

3 “Smochjouena; canÿe jená chë jënaye jaujqüëshama vojëftsebocna.



<sup>4</sup> Yojsějquëshaye orna, básefta jénaye benache juachañe yojuatquécjana; pero jaja shloftšënga imojástjajna y lempe imojtsósañe.

<sup>5</sup> Inye meshëngna ndëtsbenguíne yojuatquécjana, ndoñe yapa fshantse binÿnentše. Chiñna betscó yojuábocna, ndoñe yapa jashenocana fshantse yojanmëna causa;

<sup>6</sup> pero yojuábocna orna, puerte yojojënÿána y yojsancta; y yojsábojo yapa tbëtëjënga tondaye causa.

<sup>7</sup> Inye meshëngna uchmëshangañe yojuatquécjana; chë uchmashá yojuájua ora, lempe yojsatscué, y chca, chë jénayentsana tondaye yonjuashájona.

<sup>8</sup> Pero inye meshëngna, uanguaniñe yojuatquécjana, y bëtscá tšabe shajuanënga chiñe yojóbocna: ínÿenache, canÿe meshentsana unga bnëtsana meshënga yojóbocna; ínÿenachna, chnënguana bnëtsana meshënga; y ínÿenachna patse meshënga ca” —cha tojánayana.

<sup>9</sup> Y chentšana, Jesús más tojánayana: “Chë jouenama tmojt-sobenënga, šmochjouena ca.”

*Ndáyeca Jesús cuentëngaca yojánabuatambaye  
(Mt 13.10-17; Lc 8.9-10)*

<sup>10</sup> Chentšana, Jesús canÿa yojoquéda ora, chë chabe béconana imojtsemnënga chabe bnëtsana uta uatsjëndayëngaftaca, tmojantjá ndayá chë cuento bétsayanama.

<sup>11</sup> As Jesús tojanëjua: “Bëngbe Bëtsá tšëngaftanga cmontsinÿanÿná nÿetsca chë mo iytëmencá yomna soyënga chabe amëndayama, pero chë ínÿëngbioye ndoñe; chë soyëngama chënga lempe cuentëngaca sentsëtsëtsná.

<sup>12</sup> Chca, masque beca chamotsafšna, ndoñe chamondobená chë Bëngbe Bëtsabe soyënga jinÿama; y masque beca chë soyënga chamouena, ndoñe queochátësertana, chënga Bëngbe Bëtsábioye ndoñe chamondëtobéconama, y cha ndoñe chaondáperdonama ca.”

*Jesús chë jenabe cuentama tojanabuayená  
(Mt 13.18-23; Lc 8.11-15)*

<sup>13</sup> Chentšana, Jesús tojanëyana: “¿Quem cuentama ndoñe tcmonjósertase, ntšamo chcase nÿetsca cuentëngama cmochjóserta ca?

<sup>14</sup> Chë jená endmëna chë tšabe noticiëngama abuyaiynayá.

<sup>15</sup> Básefta entsanga mondmëna mo chë benache juachañe yojuatquécjana jenaycá. Chëngna Bëngbe Bëtsabiama soyënga jouenana; pero chora Satanás betscó jabana, chëngbe ainaniñe yojtsemna Bëngbe Bëtsabe palabra jabëtsabuajuanama, chënga chiñe ndoñe chamondëtsošbuáchema.

16 Inye entšanga mondmëna mo chë ndëtšbenguiñe yojuatquécjana jenaycá; chëngna Bëngbe Bëtsabe palabra jouenana y oyejuayënga jtsemnana;

17 pero ndoñe nyets tempo chana jochohájuana; y chca, ndoñe bayté Bëngbe Bëtsáftaca ntjéftsemnëngana, ndoñe yapa tmontsašbuaché causa. Inyënga mochantsëbuayënja, y Bëngbe Bëtsábeñe betsošbuáchiyama mochanjasúfrianga; chíyeca chënga Bëngbe Bëtsabe palabra cachcá mochanjesonýaye.

18 Inyënga mondmëna mo chë ucmëshangañe yojuatquécjana jenaycá. Chënga Bëngbe Bëtsabe palabra mochanjouena,

19 pero quem luarentša soyëngaca oyejuayënga jtsemnana yapa mochántseboše, y nye bomnana jéftsebomnana yapa mochanjésenojuabnaye. Chë soyama y inye ba soyëngama yapa enócochinýena causa, Bëngbe Bëtsabe soyëngama echantsebnëtjomba, y ndoñe quemochátama ntšamo Bëngbe Bëtsá tojayancá.

20 Pero ínýënga mondmëna mo chë uanguaniñe yojuatquécjana jenaycá. Chëngna Bëngbe Bëtsabe palabra botamana mochanjouena; nyets ainánaca mochántseprontana chiñe jtsošbuáchiyama. Mo canye betiye becá tšabá tojtseshajuancá, chënga bëtscá tšabe soyënga Bëngbe Bëtsabiama mochántsama. Inyënga ínýëngbiama más bëtscá soyënga mochanjama; y chca, ínýënga mochántsemna mo chë unga bnëtsana meshe tojanshajo jenaycá, ínýënga mo chë chnënguana bnëtsancá, y ínýëngna mo chë patse meshënga tojanboté jenaycá ca” —Jesús tojánayana.

### *Chë uajuinýanëshama cuento*

*(Lc 8.16-18)*

21 Mëntšánaca Jesús tojánayana: “Ndocná juiyëbana canye uajuinýanëshama cajonësho o jutsnësho tajsoye juajájuama. Ndoñe; uajuinýanësho juiyëbana tsbanánoca juajájuama, lempe chaotsebínýnama.

22 Ndocna yoiytëmena soye ntjinýencá queochaisoquéda, y chë ndótatsëmbo soye ntsotatsëmbcá queochaisoquéda.

23 Chë jouenama tmojtsobenënga, šmochjouena ca.”

24 Y mëntšánaca Jesús tojanéyana: “Tšabá šmochjájuaoye ntšamo šmojtsuenanama. Nye batšatema šmojouenëse, nye batšatema cmochanjósertaye; pero aíñe tšabá šmojouenëse, chama corente cmochanjósertaye; y Bëngbe Bëtsá echanjama tšëngaftanga más soyëngama chacmósertama.

25 Er nda Bëngbe Bëtsabe soyëngama tšabá tbojosertá, Bëngbe Bëtsá echanjama cha más ba soyëngama chabosertama; pero nda chë soyëngama josértama ndoñe tontsebošá, chë nye

batšá ibosertana soyëngama bochántsebnatjëmba ca” —cha tojánayana.

*Chë ojuajna jenayama cuento*

<sup>26</sup> Jesús mëntšánaca tojanéyana: “Bëngbe Bëtsabe amëndayana endmëna mo ntšamo canye boyabása jénaye tojuatbontsá ora echandbopasacá:

<sup>27</sup> masque cha cada ibeta jtsojájuana y bnëtë jotsbanama, ibeta o bnëtë, chë jénayentšana juabocnana y juájuana, ntšamo chca yojtsájuajnama chë boyabása ntjatstatšëmbcá.

<sup>28</sup> Chë fshantse cachabe ponto jamana ndayánaca chiñe chaójuama; natsana tsbuanachëtema jóbocnana, chentšana chë espiga, y chentšana chë meshënga jashájonana.

<sup>29</sup> Y chë meshënga ya tojtsebóchichna orna, játbanama jabocnana, chë saná josháchiñama ora ya tojobuácheyeca ca” —Jesús tojánayana.

*Chë mostaztiye jenayama cuento*

*(Mt 13.31-32; Lc 13.18-19)*

<sup>30</sup> Jesús mëntšánaca tojanéyana: “¿Ndayacá Bëngbe Bëtsabe amëndayana yomna, o ndaye sóyeca nanjopódia chama jábuayenama?

<sup>31</sup> Endmëna mo canye mostaza jénaye jajoca tcojajecá. Ndegombre, nyetsca quem luarentša jenayëngama, mostaza jénaye chë más básetema endmëna;

<sup>32</sup> pero tcojajé orna, jójuana, y jajañe chë más bëts betiye jóbemana, ba bëts buacuashëngaca; chíyeca chë jaja shloftšënga jana y chiñe uajajonëtemëngá jauábopormana ca.”

*Ndáyeca Jesús cuentëngaca entsanga yojanabuayiyná*

*(Mt 13.34-35)*

<sup>33</sup> Chca Jesús Bëngbe Bëtsabe soyëngama entsanga yojanabu-atambá, ba cuentënguentsana, mo chë tmonjouena cuentcá, ntsachetšá chë entsanga josértama tmojobenacá.

<sup>34</sup> Tondaye yonjanabuatambá ndoñe cuentëngaca ntsemëncá; pero chabe uatsjëndayëngna lempe yojanabuayiyná, cánjenga tmojtsemna ora.

*Jesús chë binýia y chë béjaye bonguana yojëtsbema*

*(Mt 8.23-27; Lc 8.22-25)*

<sup>35</sup> Cach te, yojtseibétatana ora, Jesús chabe uatsjëndayënga tojanéyana: “Uafjajónaye chenguana cuajna ca.”

<sup>36</sup> Chorna, chë entsanga jesabáshejuanëse, chë uatsjëndayënga Jesús tmojtsanántseñe, cach yojánenjaquena barquëshañe; y inýe entsángnaca inýe barquëshangañe tmojanasto.

<sup>37</sup> Chentšana, chë uafjajónaye bėjayiñe tša jabuache binjia vojóshjango; olëshënga chë barquëshha imojtsétsbotsana, y chë causa chë barquëshha yojóntša búyeshca jtsobuajútjiana.

<sup>38</sup> Y chëntscuana, barquëshha stëtšoica, tsëntšenëshañe Jesús vojtsomañe. Chora chë uatsjéndayënga tmojtsanfšená y tmojaniyana: —¡Buatëmbayá! ¿Tondayana cmontsentšamna bënga chašotsënatjëmbama ca?

<sup>39</sup> As Jesús tojantsbaná, chë binjia tbojanácacana, y chë bëts uafjajónayoye tojánayana: —¡Natjëmbana cochtsemna! ¡Bonguana ca!

Y cachora chë binjia yojëtstëcja, y lempe bonguana yojtsatsmëna.

<sup>40</sup> Chora chabe uatsjéndayënga tojanëyana: —¿Ndáyeca tša šmojtsauatja? ¿Bëngbe Bëtsá tšëngaftanga jujabuáchama yobënama cabá ndoñe šmontsošbuaché ca?

<sup>41</sup> Chama, chënga puerte auatjanánënga imojtsemna y mëntšá imojtsenatsësnaye: “¿Nda quem boyabása yomna? Cha tonjayana y chë binjia y chë bėjaye tmonjoyeuná ca.”

## 5

### *Chë Gerasa luaroca bacna bayëja uambayá (Mt 8.28-34; Lc 8.26-39)*

<sup>1</sup> Chentšana, uafjajónaye chenguánoica tmojánashjajna, Geraseno ca uabaina entšangbe luaroye.

<sup>2</sup> Jesús barquëshoicana tojánastjango, y cachora, chë obanëngbe cuevëshënguentshana canyë entšá, bacna bayëjbe juabna uambayá, tojánbocna y tbojanjébengo.

<sup>3</sup> Chë boyabásana, obanëngbe cuevëshënguenache inoyena, y ndocná yonjobena cha jtsebátsëcana, ni mo cadenëjuangaca;

<sup>4</sup> er ba soye cadenëjuangaca y inyë soyëngaca cha nyëtsá tmojanbatsëca, pero cha nyëtsca soye yojtsátabebe y yojtsenájaca, y ndocná yonjobenaye cha bonguana chaotsemnama.

<sup>5</sup> Nyëts tempo, bnëtë y ibeta, obanëngbe cuevëshënguenache y tjañenache yojánana yoye, y ndëtšbéngaca enotsetšenaye.

<sup>6</sup> Jesúsbioye bënocana tbojáninýe ora, chábioye tojanótjajo y chabe natsanoica yojoshëntsamentšiyë;

<sup>7</sup> y mëntšá yojtsáyebuache: —¿Ndayá átšeftaca cojtseboše, Jesús, celoca Bëngbe Bëtsabe Uaquiñá? ¡Bëngbe Bëtsabe delante cboimpadá, ndoñe šcatjatsetšená ca!

<sup>8</sup> Chca tbojaniyana, er Jesús chábioye tbojaniyana: —¡Bacna bayëjbe juabna, chábentšana maisebocna ca!

<sup>9</sup> Chentšana Jesús tbojantjá: —¿Ntšamo cabaina ca?

Y chë bacna bayëjëngbe juábnaca cha tbojanjuá: —Atšna Legión ca sënduabaina, bëtscanga fsëndmëna causa ca.

10 Y tša Jesús ibojtserruana chë luarentšana ndoñe chaondëtëbuacanama.

11 Chentša béconana ba cotšënga imnajena, batsjoca imnétsosañe;

12 as chë bacna bayëjënga Jesúsbioye tmojanimpadá: —Chë cotšëngbioye šmichamó, chëngbeñe fchayamashjna ca.

13 Y Jesús aĩne tojanalesenciá; as chë bacna bayëjënga chë entšábentšana tmojésanbocana y chë cotšëngbeñe tmojánamashjna. Cachora chë mo uta uaranga cotšënga batsjocana peñëšëjana uafjajónayoye imojtsoshbuetše y vojtsatajo.

14 Chora, chë cotšënga anjënënga tmojtsanacheta auatjanánënga, y tmojána chama jacuéntama chë pueblaca y chabuenache; y entšanga tmojánabo ntšamo tojanopasacá jinjama.

15 Jesús yojtsemnoye chë entšanga tmojánashjajna ora, tmojáninje chë tempo bacna bayëjënga uambayá, inétsotbemañe, entšayá uichëtjoná y chabe njets juábnaca. Y chë entšanga chama imojtsëuatjaná.

16 Chë tmojáninjënga imojtsecuéntaye, ntšamo chë bayëjbe juabna uambayáftaca tojanopasama, y chë cotšëngaftaca ntšamo tojanopasámñaca.

17 Chora chë entšanga tmojanontsé Jesús impadánana chë luarentšana chaotsatoñama.

18 Jesús chë barquëshoye tojtanášëngo ora, chë tempo bacna bayëjbe juabna uambayá tbojanimpadá chabolesenciá cháftaca jama ca.

19 Pero ndoñe tbonjanlesenciá, sinó mëntšá tbojaniyana: “Acbe yebnoye motsatoñe, acbe pamíllangbioye, y cochjácuntaye ndayá Bëngbe Utabná ácaftaca tojamama, y ntšamo cha ácbioye tcmojalastemama ca.”

20 Chentšana, chë entšá vojtsatoñe y tojanontsé Decápolis uabaina pueblënguenache jacúntana lempe ntšamo Jesús cháftaca tojanmca; y njetscanga imojtsenjanaye.

*Jesús canje shembásabioye tbojanshná y Jairëbe bembetémbioye tbojtanayená*  
(Mt 9.18-26; Lc 8.40-56)

21 Chentšana, Jesús cachiñe chë uafjajónaye chenguana tojésaná barquëshañe. Chocna ba entšanga tmojanobuashconá, y Jesús chë uafjajónaye tsachañe yojtsemna.

22 Chorna, tojánashjango chë judiëngbe enefjuana yebnentša canje mandayá, Jairo ca uabainá. Jesúsbioye tbojáninje ora, chábtentše tojanoshëntsamentšé,

23 y tša ibojtseimpadana, mēntšá: —Atšbe bembetema ya echantsóbana; Diosmanda mabo, acbe cucuatšēnga chábeñe cochjájua, salud chauatinyēnama y cháuatayenama ca.

24 As Jesús cháftaca tojána; pero bētschá entšanga imojtsēstona, chábioye imojtsenatsēntšenaye.

25 Chē entšanguentše yojtseye canye shembása šocá; cha ya bnētsana uta uata oboftjajuanánaca inapadecena.

26 Cha puerte tojansufrí, ba ashnayēngbe cucuatšīne, y lempe ntsachetšá inabomncá tojanpochocá jenóshnama; pero ndoñe ibontsatstēcacjana, nye más peor ibojtsobiamnaye.

27 Chē shembása yojouena ntšamo Jesús ba šoquēnga tojánashnama, y as stētšoicana entšangbe tsēntsajana yojobconá, y Jesusbe entšayá yojauábojajo.

28 Cha chca tojanma, er yojtsejuabnaye: “Masque nye mo chabe entšayá sibiájua chaijuábojajo, y salud chantsatsbomna ca.”

29 Y cachora chē oboftjajuanana ibojtsobojuána; y chabe cuerpiñe ibojebiónana ya tšabá yojtatsmēnama.

30 Chora Jesús yojaséntia chá bentšana obenana yojóbocnama, mo ndábioye tbojashná orcá; as cha tojanobuértana entšangbeñe y tojanatjá: —¿Nda atšbe entšayá tojuabojajo ca?

31 Chabe uatsjéndayēnga tmojanjuá: —Aca contsonyá chē entšanga cmontsatsēntšená, y cabá cochjátsnoticiaye nda entšayá tojuabojajo ca.

32 Pero Jesús cátoye yojtserreparana jinýama nda tbojánbojajuama.

33 As chē shembása, chē ntšamo cháftaca yojopásama jtsetatšēmbēse, tojanobeconá ngmēmnyá y auatjananá, chabe natsanoica tojanoshēntsamentšé, y lempe ntšamo ndegombre cháftaca tojanopasacá Jesúsbioye tbojaniyana.

34 Chora Jesús tbojaniyana: —Bembe, Bēngbe Bētsábeñe icošbuachéyeca shnaná contsatsmēna. Natjēmbana motatoñe; acbe šocana tontsopochocá ca.

35 Jesús cabá yojtsoyebuambnantscuana, báseftanga tmojánashjajna chē judiēngbe enefjuana yebnentša mandayabe yebnocana, y chē shembásetembe taitá tmojaniyana: —Acbe bembe tontsóbana; ¿ndayama más Buatēmbayá chama cochjátebēyaboma ca?

36 Y Jesús, ntšamo chēnga imojtsichamcá ntjatuenancá chē judiēngbe enefjuana yebnentša mandayábioye tbojaniyana: —Ndoñe matauatjana. Nye Bēngbe Bētsábeñe cochtsošbuáchiye cha tšabá chaotsatsmēnama ca.

37 Y Jesús ndoñe tonjanalesenciá Jairēbe yebnoye banga chamuastama; nye Pedro, Santiago y Juan, Santiagbe uabentsana, aíñe.

<sup>38</sup> Chentšana, chë mandayabe yebnoye tmojánashjajna ora, Jesús tojánanÿe entšanga tša imojtsenbouenana, entšanga imojtsošachiye y puerte ngménaca imojtseyoye.

<sup>39</sup> As chë yebnoye tojánamashëngo y chë entšanga tojanëyana: “¿Ndayama tša šmojtsenbouenana y tša šmojtsendëntjana? Chë shembásetema ndoñe chenatóbana, nÿe endëtsomañe ca.”

<sup>40</sup> Pero entšanga nÿe imojtsáfchaye. As Jesús nÿetsca entšanga shjoye tojtanëbuacna, y tojëftsanëbiatše chë basetembe bëtsëtsata y chabe enutënga; y chë shembásetema yojtsemnoye tojánamashëngo.

<sup>41</sup> Chora Jesús tbojanábuacueshache y cachëngbe biyañe tbojaniana: “Talita, cum ca.” (Chca endayana “Shembásetema, matëtsbaná ca”).

<sup>42</sup> Cachora, chë bnëtsana uta uata bomna shembásetema tojtantsbaná y yojtsobena jama. Y chë entšanga chama imojtsenjnanaye.

<sup>43</sup> Pero Jesús corente tojanamëndá ndocnábeñe chama ntse-cuéntayana ca, y tojanamëndá chë bássetema saná chamuiyë chaosama.

## 6

### *Jesús Nazaret puebloca*

*(Mt 13.53-58; Lc 4.16-30)*

<sup>1</sup> Chentšana Jesús tojëftsanbocna y cachabe luaroye tojtashjango, y chabe uatsjëndayënga cháftaca tmojána.

<sup>2</sup> Ochnayté tojanobuache ora, Jesús tojanontsé chë judiëngbe enefjuana yebnentše entšanga jabuátambana.

Chë ba entšanga cha jóyebuambayama tmojanuenënga, imojenjnaná y tmojánayana: “¿Ndëmoca quem boyabása lempe chca tojuatsjinÿe? ¿Ndaye osertánana mua tmojatšetá, y ntšámoyeca cha yojtsobena chca bëts soyënga jtsamana ca?”

<sup>3</sup> ¿Mua ndoñe chë calpintero yondmëna, Mariybe uaquiñá, y chabe catšátanga ndoñe mondmëna Santiago, José, Judas y Simón; y chabe uabënanagnaca muentše ndoñe bëngaftaca mondoyena ca?” —chënga imojtsichamo.

Chë causa chënga tmojanotjayaná, y ndoñe montseboše joyeunayana.

<sup>4</sup> As Jesús tojanëyana: “Nÿetsca luarënguenache canÿe Bëngbe Bëtsabe juabna oyebuambnayábioye bëtsá jabemana, pero ndoñe chca cachabe luarentše, ni cachabe pamílangbenache, ni cachabe yebnentše ca.”

<sup>5</sup> Chë entšanga chentše chábeñe ndoñe montsanošbuaché causa, Jesús ndoñe tonjanobená ni canÿe bëts soye

Bëngbe Bëtsabe obenánaca chentše jëftsemana; nÿe básefta šoquëngbeñe cucuatšënga tojanjajó y tojanashná.

<sup>6</sup> Jesús ojnananá yojtsemna cachábentša entsanga chábeñe ndoñe montsanošbuaché causa.

*Jesús, chabe uatsjédayënga tojanichamó Bëngbe Bëtsabe amëndayama jábuayenama*

*(Mt 10.5-15; Lc 9.1-6)*

Chentšana, chë chaboye base pueblënguenache Jesús vojánana, Bëngbe Bëtsabe soyëngama abuatambaye.

<sup>7</sup> Y chë bnëtsana uta uatsjédayënga Jesús tojánachembo, y utáta ínÿoye tojanichamó, entsángbentšana bacna bayëjënga jtëbuacnama obenana jatšatayëse;

<sup>8</sup> y mëntšá yojáuyana: “Benachiñama tondaye šmattsambaye, nÿe canÿe jatjonëfja; ndoñe šmattsambaye saná, ni shecnaja, ni crocénana uasnanëchiñe.

<sup>9</sup> Nduámanëshe šmochjesóshecochëtjo, y nÿe canÿájua šmochjesíchëtjo ca.”

<sup>10</sup> Mëntšánaca tojanëyana: “Posada chacmojúyentsame yebnentše šmochtsoquedañe inÿe puebloye játantscuana.

<sup>11</sup> Canÿe luaroye chašmojáshjajna y ndocná posada chacmonjuyentsame, y joyeunayama ndoñe chamontsebošëse, chentšana šmochjësebocana, y shecuatšentša polvëshe šmochjésenstoto, chca, chëngbioye jinÿanÿiyama chënga ndoñe tšabá tšëngaftangaftaca tmonjamama ca.”

<sup>12</sup> Chentšana, chë uatsjédayënga tmojëftsanbocana y entsanga imojánabuayiynaye, chë tšabe benache chámuatishachama, bacna soyënga amana jtsajbanase.

<sup>13</sup> Entsángbentšana ba bacna bayëjënga tmojtanëbuacna, y ba šoquënga aceitíyeca tmojananëttojo y tmojanashná.

*Ntšamo Juan chë Ubayaná tojanóbana*

*(Mt 14.1-12; Lc 9.7-9)*

<sup>14</sup> Rey Herodes Jesusbiamá yojátatšëmbona, er nÿetsquénache nÿetsca entsanga chabiamá imojtsóyebuambnaye. Entsanga Jesusbiamá imojtsichamo: “Juan chë Ubayaná obanënguentsana tojtayena, chíyeca cha chca obenana yojtsebomna ca.”

<sup>15</sup> Inÿengna imojtsichamo: “Cha entsemna chë Bëngbe Bëtsabe juabna oyebuambnayá Elías ca.”

Y ínÿengna: “Muana canÿa Bëngbe Bëtsabe juabna oyebuambnayá, mo chë tempsquëngcá ca.”

<sup>16</sup> Heródesna ntšamo entsanga Jesusbiamá imojtsichamcá tojanuena ora, tojánayana: “Mua Juan entsemna, chë atše sënjanmandá bestšaše chamotsëstjanguamá, mora obanënguentsana tojtayena ca.”



17 Juan cabá ainá ora, Herodes tojanmandá cha chamishache, cadenějuangaca chamobátsěca y chca cárceloye jutámíama. Herodes chca tojanma Herodíasbe causa, chabe uabentsá Felipebe shema. Herodes chě shémaftaca tojanobouamá, Felipe cabá ainá ora.

18 Y chama, Heródesbioye Juan ibojánbuayiynaye: “Ndoñe quenátslesenciana acbe uabentsabe shema acbe shema chaotsemnama ca.”

19 Chě causa, Herodías Juánbioye puerte ibojuáya, y yojánboše jtsóbama; pero ndoñe yontsobena,

20 er Herodes yojántatsěmbo, Juan canye nyetsca soyěnguiñe tšabá amá, nye Běngbe Bětsábioye sempre oservená inamnama. Chama cha yojánauatja y ndoñe yonjanaleséncia cha chamóbama. Y Juan Běngbe Bětsabe soyěngama Heródesbioye tbojtsebuayiyná ora, ntšamo jajuaboyana ndoñe yontsetátšěmbo, pero masque chca, oyejuayá Juánbioye ibnayeunana.

21 Pero Herodías tojáninýena mocna ora Juan chamóbama. Heródesbe cumpleañ oboyejuaye ora, bětscá saná tmojanprontá, y Herodes yojúbuaja chabe aměndayěnga, soldaděngbe aměndayěnga y Galileoca uámana entšanga.

22 Chora, chě oboyejuaye luaroye Herodíasbe bembe tojánamashěngo, tojanlantsá, y Herodes y nyetsca ófjaněnga chama tša imojtsóyejuaye. As chě rey, chě tobiášbioye tbojaniyana: —Ndayánaca šmotjañe y atše cbochjátšetaye ca.

23 Y jajúrase, měntsá tbojanšbuachená: —Ntšamo chašcojotjañcá cbochjátšetaye, masque atšbe aměndayentša bomnanentšana tsěntsañnaca ca.

24 Chentšana, chě tobiáše yojěftsebcna y chabe mamábioye ibojatjaye: —¿Ndayá chjotjañe ca?

Y chabe mamá ibojojuá: —Juan chě Ubayanabe bestšaše ca.

25 Cachora chě tobiáše betscó chě rey yojtsemnoye tojanamáshěngo, y tbojaniyana: —Atše sěntseboše, cam ora Juan chě Ubayanabe bestšaše canye šcneněšiñe chašcuatšetá ca.

26 Herodes chama corente tbojanongmé, pero chě entšangbe delante y jajúrase tbojanšbuachená causa, ndoñe yonjobenaye ntšamo tbojaniyancá jeběbuetámenana.

27 Cachora chě rey canye soldado ibojíchmua, Juanbe bestšaše chauiyěbama.

28 As chě soldado cárceloye tojána, Juánbioye bestšaše tbojtšaněštjango, y canye šcneněšiñe tojanamba. Chě tobiášbioye tbojaněntšabuaché, y chana, chabe mamábioye.

29 Juanbe ústonënga chama imojátatšëmbona ora, choye tmojánashjajna, chabe cuerpo tmojésanocñe y jauátbontsama tmojána.

*Jesús shachna uaranga boyabásenga saná tojanacaredadó  
(Mt 14.13-21; Lc 9.10-17; Jn 6.1-14)*

30 Chë Jesús tojánichamonga chábioye tmojtanashjajna ora, lempe ntšamo tmojanmama y tmojanabuatambama cha tmojancuentá.

31 Chora Jesús tojanëyana: “Cuajna ínÿoye, entšanga ndoyena luaroye, batšatema jóchnama ca.” Cha chca tojánayana, er tša entšanga imojtsaye y imojtsabëbana; ni mo jasama ndoñe luare imontsebmna.

32 As cánÿenga barquëshañe tmojtsanoñe, entšanga ndëbínÿnoye.

33 Pero chënga imojtsoñama entšanga tmojánanÿe, y ndëmuanÿenga imojamnama imojtsetátšëmbo; chcasna, chë entšanga shecuátšeca betscó tmojána, nÿetsca pueblënguentsana, y chëngbe natsana choye tmojánashjajna.

34 Chentsana, chë barquëshoicana tojánastjango ora, Jesús ba entšanga tojánanÿe; chëngbiamá tbojanongmé, er imojtsemna mo abujënÿa ndbmna oveshëngcá; y tojanontsé ba soyëngama jabuátambana.

35 Ya jetiñe yojtsemna orna, chabe uatsjëndayënga tmojanobobconá y tmojanianyana: —Ya jetiñe entsemna, y quem luariñe ndocná quenatiyena.

36 Entšanga cuantichamuá, pueblotémëngoye y inÿe luarëngoye chamotsoñama, ndayánaca jasama chamobuámiñama ca.

37 Y Jesús tojanëyana: —Tšëngaftanga saná chëngbioye šmochjacaredádaye ca.

Chora chënga tmojanianyana: —Crocénana queftsátsbmna, uta patse denario nÿetšá, chëfta entšangbiamá saná jabuámiyama ca.

38 As Jesús tojanëyana: —¿Bueta tandëse šmojtsebmna? Marrepáranga ca.

Ya imojtsetátšëmbo ora, tmojanianyana: —Shachna tandëse y uta beónata fsëntsebmna ca.

39 Chora Jesús entšanga tojanamëndá ínÿoca ínÿoca chamoshëntsjatbiamama.

40 As chënga tmojanotbiamá patse patsënga y shachna bnëtsátsanënga.

41 Chora Jesús chë shachna tandëse y chë uta beónata tojanca, y cloye jontjesiyëse, Bëngbe Bëtsábioye chama tbojtanchuá. Chentšana chë tandëšënga tojanjatá y chabe uatsjëndayënga tojanayentsbuaché chë entsanga jatšatayama. Y chë uta beónatnaca nyetscanga tojanëjåtaye.

42 Nyetscanga tmojanse jtoshachaye nyetšá.

43 Y chentšana, chë tandëse y chë beonentsana ojamnëtmënga tmojanatbaná, y bnëtsana uta sbarëcua tmojanajutjé.

44 Chë saná tmojansënga imojamna shachna uaranga boyabásënga, shembásënga y básënga ntjacuntacá.

*Jesús béjaye juatsbuacá yojtsaye*  
(Mt 14.22-27; Jn 6.16-21)

45 Chentšana, Jesús chabe uatsjëndayënga tojanamëndá chë barquëshoye jtašjnama, chë uafjajónaye chenguana jangana y chabe natsana Betsaida ca uabaina puebloca jashajajana. Chënga imojtsebocanëntscuana, Jesús chë entsanga yojtichamuá.

46 Nyetscanga tojtanadiošoftá ora, tjoye cha tojtsanoñe Bëngbe Bëtsáftaca jencuëntama.

47 Yojtseibétatana ora, chë barquëshu uafjajónaye tsëntsaca yojtsamna, y Jesús, canya fshantsoca.

48 Jesús tojáninye chëngbiamá totcá yojtsemna, chë barquëshaca natsanoye jtsayana, er binýia chëngbe contra yojtsemna. Ya binýana ora, chëngbioye yojobeconá, béjaye juatsbuacá yojtsaye, y ya chëngbiajana nye ndericho jachnënguama yojtsemna.

49 Y chënga, chë béjaye juatsbuacá cha yojtsayama tmojáninye ora, tmojanjuabó cha canye añemëse yojtsemna ca, y tmojanontšé yoyana;

50 er nyetscanga chca tmojáninye y cochauatjanánënga imojtsemna. Pero Jesús cachora tojanëyana: “¡Añemo šmochtsebomna; atše Jesús sëndmëna; ndoñe matauatjëngana ca!”

51 Chorna, chënga imojtsemna barquëshoye cha tojánášëngo, y chë jabuache binýia tojanëjbana, y nyetscanga puerte auatjanánënga y ojnánánënga imojtsemna.

52 Chënga tmojáninye chëfta entsanga tandëse jujátayana, pero chëngbe ainanoca cabá ndoñe imontsobena josértana, Jesús lempe jamama obená bëtsemnama.

*Genesaret ca uabáinoca Jesús ba šoquënga tojanashná*  
(Mt 14.34-36)

53 Chë uafjajónaye tmojánenashbuachengo ora, Genesaret ca uabaina luaroye tmojánashjajna, y chë uafjajónaye tsachoca chë barquëshsha tmojanëtsbua.

54 Chë barquëshhoicana tmojánastjajna y cachora entsanga Jesús tmojantëmbá.

55 Chíyeca, chë luariñe yebnënguenache betesco chënga tmojána, y tmojanontsé chë šoquënga tjuashënguiñe juyambana, chë ndëmoye tmojanuena Jesús yojtsemna luaroye.

56 Y ndayentše cha tojámashëngüentše, pueblënguiñe, bëts pueblënguiñe y base pueblotémënguiñnaca, chë šoquënga benachoye imojtsëbuacana, y Jesús corente imojtseimpadana chë šoquënga chaualesenciá, nÿe mo chabe entsáyá sibuájua juabojajuana. Y nÿetscanga tmojuábojajënga tšabá imojtsatsmëna.

## 7

*Ndáyeca canÿe entsá Bëngbe Bëtsabe delante ndoñe tšabia nántsemna*  
(Mt 15.1-20)

1 Chentšana, fariseunga Jesúsbioye tmojanobeconá y báseftanga ley abuátambayëngnaca, Jerusalenocana áshjajnënga.

2 Chënga tmojáninÿe básefta Jesusbe uatsjëndayënga, cabá ndase ora, ndoñe montsacuentšabiá ntšamo chë judiënga imojuanamancá.

3 Er chë fariseunga y nÿetsca judiënga imojuanamana jtsacuéntšabiana ba soye, ndayá jasama ora, ntšamo chëngbe bëts taitanga imojuanamancá. Chënga imojuanjuabná, chca jtsamëse Bëngbe Bëtsabe delante tšábënga jtsatsmënama ca.

4 Chë sananga enocana tmojtashjango ora, ba soye ndoñe tmontsácuentšabese, tondaye ntjasana; y ba soyëngnaca imojánama, pero nÿe chëngbe bëts taitanga chca jamana imojuanamánayeca, mo chë béjayeca juabáyana tazëšënga, matbajënga, calderëshënga y jutsnëshangá.

5 Chë causa, chë fariseunga y chë ley abuátambayënga Jesús tmojantjá: —¿Ndáyeca acbe uatsjëndayënga ndoñe montsama ntšamo bëngbe bëts taitanga monjuanamancá, y montsesá ntsacuéntšabiase, ndoñe ntšamo bënga judiënga fsënduamancá, Bëngbe Bëtsabe delante tšabá jtsatsmënama ca?

6 Chora Jesús tojanëyana: —Nÿe tšabá chë Bëngbe Bëtsabe juabna oyebuambnayá Isaías tšëngaftangbiana tojánayana, bacna entsanga chë ntšamo ndegombre šmojuabnacá ndinÿinÿayënga ca, mëntšá enduabemanentše:

Quem entsanga mondbëtsichamo Bëngbe Bëtsá tša tšabia yomna ca; chca nÿe uayásaca,

pero chëngbe ainanentše ndocna tšabe juabnëngaca.

<sup>7</sup> Pero chënga nÿe bonamente mondbëtsichamo Bëngbe Bëtsá tša tšabia yomna ca;

chënga nÿe entsangbe mandënga jtsabuátambayana, y Bëngbe Bëtsabe mandënga ndoñe ca —cha tojánayana.

<sup>8</sup> Chora Jesús tojanëyana: —Ntšamo Bëngbe Bëtsá tojanmandacá stëtšoye tšëngaftanga šmojtsequedá, nÿe ntšamo entsanga monduamancá jtsamama ca.

<sup>9</sup> Y mëntšánaca tojanëyana: “Tšëngaftanga ntšamo Bëngbe Bëtsá tojanmandacá stëtšoye jtsequédana, nÿe ntšamo tšëngaftangbe anteunga imojanamancá jtsamama. Tšëngaftanga jtsejuabnayana tšabá šmojtsama ca chca šmojtsama ora.

<sup>10</sup> Moisés tonjánayana: ‘Acbe bëtsëtsata ndoñe stëtšoye catjáquedaye’, y ‘nda chabe bëtsëtsatbiama ndoñe tšabá tonjoyebuambá chana, jóbanama jtsemnana ca.’

<sup>11</sup> Pero tšëngaftanga šmondbëtsichamo, canÿe entsá yobena chabe taitá o chabe mamá jáuyanana: ‘Lempe sëndbomna soyënga corbán entsemna, chíyeca ndoñe quetsátobena juajabuáchana ca’ (corbán endayana “Bëngbe Bëtsabiama uátšëmbona soyënga ca”).

<sup>12</sup> Tšëngaftanga šmondbëtsichamo, nda chca tojayanëse, ya ndoñe obligaciönaca ntsemnana chabe taitá o mamabiama ndayánaca jamama ca.

<sup>13</sup> Chca, tšëngaftanga šmontsama entsanga Bëngbe Bëtsabe palabra stëtšoye chamoquedama, mo tondaye tontsamancá, chë cuenta jtsamama ntšamo anteunga imojanamancá, ntšamo entsángbeñe tempscana y mëntscoñama yochnëjuancá. Y ba soyënga tšëngaftanga cachcá šmontsama ca” —Jesús tojánayana.

<sup>14</sup> Chora Jesús, cachiñe entsanga tojtanachembo y tojanëyana: “Nÿetscanga šmochjouena y chacmësertá.

<sup>15</sup> Ndayá entsá tojtsesacá, ndoñe ntjábemana ndoñe tšabia Bëngbe Bëtsabe delante. Inÿetsá comna: ntšamo entsá tojtsejuabná y tojtsoyebuambnacá endobena jabemana ndoñe tšabia Bëngbe Bëtsabe delante.

<sup>16</sup> Chë jouenama tmojtsobenënga, šmochjouena ca” —cha tojánayana.

<sup>17</sup> Jesús entsanga tojëftsanabashejuana y yebnoye tojtanamáshëngo ora, chabe uatsjëndayënga tmojantjá ntšamo cha tojánayanama.

<sup>18</sup> As cha tojanëyana: “¿Tšëngaftángnaca cabá ndoñe cmontsësertana ca? ¿Cabá ndoñe cmontsësertana, lempe ntšamo entsá tojascá ndoñe ntsobenana chábioye jabemana ndoñe tšabia Bëngbe Bëtsabe delante;

19 er ainanoye ndoñe ntjómashënguana, sinó uafsbioye, y chentšana cuerpentšana jtabocnana ca?”

Y chca, Jesús tojánayana nyetsca sananga tšabá jasama yomna ca y chë saná ndoñe ntjamana canye entšá bacna soye chaotsamama ca.

20 Y mëntšánaca tojánayana: “Ntšamo chë entšá tojtsejuabná y tojtsoyebuambnacá, chë soye cocayé endobena entšá jabe-mana ndoñe tšabia Bëngbe Bëtsabe delante.

21 Er ainanocana jtsóbocanana bacna juabnënga: shembásaftaca o boyabásaftaca bacna soye jamama, jatbëbama, jóbama,

22 bacna juabnënga boyá o shémbioye ínÿaftaca jaíngñama, jtsatbomnayama, nyetsca bacna soyënga jamama, ínÿenga jáingñama, nÿe cachá jenomándama ntso-bencá jtsiyenama, ínÿabioye jtsántšabošama, ínÿabiama jtsayát-senayama, jtsenábotamnayama y nÿe opënga jtsobiamnayama.

23 Nyetsca quem bacna soyënga entšabe ainanocana jóbocnana, y cha jabemana ndoñe tšabia Bëngbe Bëtsabe delante ca” —cha tojánayana.

*Canye shembása inÿe luarocana ashjargoná Jesúsbeñe yojt-sošbuaché*

*(Mt 15.21-28)*

24 Jesús chentšana, Tiro ca uabaina luaroye tojtsanoñe, y canye yebnentše tojánamashëngo. Cha yojtseboše ndocná chama chaondëtsetatšëmbuama; pero ndoñe yonjobenaye iytëmenana jatsmënana.

25 Y betsko, canye shembása, canye bembe bacna bayëjbe juabna uambayá ibnabomná, Jesusbiama oyebuambnayana yojouena ora, chábioye tojánabo y chabe shecuatšentše tojanoshëntsamentšé.

26 Chë shembása ndoñe yonjamna judiá, sinó Sirofenicia luarocá. Tojánabo y Jesúsbioye tbojanimpadá chabe bembetémbentšana bacna bayëja chabuatábocnama.

27 Pero Jesús tbojaniyana: —Atše šondmëna natsana judío entšangbiama chë soyënga jamana; chentšana cocayé chanjobenaye chca inÿe entšangbiama jamana. Atše acbiama, canye ndoñe judiá, soyënga stjamëse, nántsemna mo chë básengbe saná quešënga cuaftsëbuajocá ca.

28 Y cha tbojanjuá: —Arseñor, chca jtsemnana. Pero chë quešëgnaca mondbase chë básenga tmojtšesá ora tmojatquécjanatemënga. Chcasna, Diosmanda átšnacá šmotsajabuache ca.

29 As Jesús tbojaniyana: —Tšabá tcjayana; chcasna, acbe yebnoye motsatoñe. Chë bacna bayëja acbe bembetémbentšana tonjësebcna ca.

<sup>30</sup> Chentšana, chë shembása chabe yebnoye tojtaná, y tbojáninyena chë bembetema jutsněshentše yojtsojájõe, y chë bacna bayėja ya ndõe chábeñe yontsemna.

*Jesús, canye boyabása těsmá y nděbiábioye tbojanshná*

<sup>31</sup> Tiro pueblentšana Jesús tojěftsanbocna, y Sidón y Decápolis luarentša pueblěnguějana jachněnguse, Galilea uaf-jajónayoye tojánashjango.

<sup>32</sup> Cha chentše yojtsemna ora, chábioye tmojanánatse canye entśá těsmá y nděbiá, y tmojanimpadá chabe cucuatšěnga chë šocábeñe chaojájoma, chaboshnama.

<sup>33</sup> Chorna Jesús entśangbentšana luaroye tbojanánatse, cányata. Chora chë šocabe matscuašoye ntšabuafjěnga yojajué, cucuatšiñe yojabuashětjo, y chë šocabe bichtaja yojábojajo.

<sup>34</sup> Chentšana, Jesús celoye tojanontješé, jabuache yojáshachna, y hebreo palabriñe tbojanianyana: “¡Efata ca!” (Chca endayana “¡Chacmotsauenana ca!”)

<sup>35</sup> Cachora, chë boyabásabe matscuaše tšabá yojtsatsměna y tšabá yojtsuenana; chë bichtaja tšabá yojtóbema y tšabá yojtsóyebuambnaye.

<sup>36</sup> Y Jesús chë entśanga tojanaměndá chama ndocnábeñe ntsecuéntayana. Pero masque tša chama yojtsaměndaye, entśanga más chabiamama imojtsencuéntaye.

<sup>37</sup> Chama chë entśanga puerte imojtsenjnayana, y měntśá imojtsichamo: “¡Lempe tšabá entsama! Chë těsměnga chamouenama, y chë nděbianga chamóyebuambama entsama ca.”

## 8

*Jesús canta uaranga entśanga saná tojanacaredadó*  
(Mt 15.32-39)

<sup>1</sup> Chë tempo, ba entśanga Jesúsbioye cachiñe tmojanobconá, y jasama tondaye imontsebomna. As Jesús chabe uatsjěndayěnga tojánachembo y tojaněyana:

<sup>2</sup> —Quem entśangbiamama šontsengmena, er ya unga te átšeftaca montsemna y mora jasama tondaye quemátsbomna.

<sup>3</sup> Cachěngbe yebnoye tondaye ntjascá stichamuase, shěntsama benachějana nantsabuátěcja; y báseftanga bën luarocana tmojabo ca.

<sup>4</sup> As chabe uatsjěndayěnga tmojanianyana: —¿Ntšamo nda nanjobenaye quem luarentše, ndocna entśá ndoyenentše, chěfta entśangbiamama saná jinýenama ca?

<sup>5</sup> Chora cha tojanatjá: —¿Bueta tanděše šmojtsebomna ca?

Y chěnga tmojanjuá: —Canýšěftaše ca.

6 Chentsana, Jesús tojanamëndá entsanga chamoshentsjatbiamama. Chorna, chë canÿsëfta tandëse tojanca y Bëngbe Bëtsábioye chama tbojtanchuá. Chentsana tojanjatá, chabe uatsjéndayënga tojanëjatá, y chëngna chë entsãngbioye.

7 Básefta beonatémëngnaca imnabomna; as Jesús, Bëngbe Bëtsábioye chama tbojtanchuá y chabe uatsjéndayënga tojanamëndá entsanga jujátayama.

8 Nÿetscanga tmojanse jtoshachaye nÿetsá. Chentsana cabá canÿsëfta bëts sbarécua tmojanajutjé chë ojamnëtémëngaca.

9 Chë tmojansënga imojamna mo canta uaranga nÿetsá. Chentsana Jesús chë entsanga tojtanadiošoftá.

10 Chora Jesús barquëshañe tojánenojayiye chabe uatsjéndayëngaftaca, y tmojtsanoñe Dalmanuta ca uabaina luaroye.

*Chë fariseunga tmojánbošena, Jesús chaoma canÿe bëts soye, chabe ndegombre obenana jinÿyama*

*(Mt 16.1-4; Lc 12.54-56)*

11 Chentsana, fariseunga tmojánabo y tmojanontsé Jesúseftaca enatsëtsnayana. Y jisháchichiyama, imojtseimpadana canÿe bëts soye chaoma, as jtsetatšëmbuama Jesusbe obenana Bëngbe Bëtsábioyana ndegombre tainóbocanama.

12 Y Jesús ngmënaca, jabuache yojáshachnëse, mëntšá tojánayana: “¿Ndáyeca tšëngaftanga, chë mora oyenënga, šmojtseboše canÿe bëts soye chaimama tšëngaftanga atšbe obenana jinÿanÿiyama ca? Ndegombre chëyana, quem entsanga ndocna chca soye quemochátinÿe ca.”

13 Chorna chë entsanga cachcá tojesanënÿá, chë barquëshoye yojtamáshëngo, y uafjónayey chenguana yojtsoñe.

*Jesús tojanabuayená fariseungbe buatëmbana soyëngama*  
*(Mt 16.5-12)*

14 Chë uatsjéndayënga yojésebnëtjomba ndaye soye jasama jesocñama, y chë barquëshoye nÿe canÿe tandëse imojtsebomna.

15 Jesús tojanëyana: –Smochtsantješna; cuedado smochtsebomna fariseunga y Heródesbe lewadurama ca.

16 Chora chë uatsjéndayënga tmojanontsé enatsëtsnayana: –Chca entsichamo, bënga tandëse ndoñe tmonjesocñama ca.

17 Jesús yojtsetátšëmbo, chabe uatsjéndayënga imojtsejuabnaye chana tandëšama yojtsëtsësnaye ca; pero ndegombre chana yojtsóyebuambnaye ndayá ntšamo fariseunga y Herodes bacna soyënga jtsamëse imojoyenama. Chcasna, mëntšá tojanëyana: –¿Ndáyeca tandëšama šmojtsoyebuambná? ¿Cabá ndoñe cmontsësertana, ni šmontsetátšëmbo? ¿Ainanoca ndoñe smontseboše chacmësertama?



18 Bominÿe šmondobomna, pero ndoñe quešmátobena jinÿana; joudenama šmondobena, y ndoñe quešmátuenana, y ndayá tijamama ndoñe quešmatsjuabná.

19 Chë shachna uaranga entšanga shachna tandësentšana sënjanëjatá chentšana, ¿bueta sbarëcua chë ojamnëtemëngaca šmënjanajutjé ca? —cha tojanatjá.

Y chënga tmojanjuá: —Bnëtsana utácua ca.

20 —Y chë canÿsëfta tandësentšana canta uaranga entšanga sënjanëjatá chentšana, ¿bueta bëts sbarëcua chë ojamnëtemëngaca šmënjanajutjé ca?

Y chënga tmojanjuá: —Canÿsëftácua ca.

21 As Jesús tojanëyana: —¿Y cabá ndoñe cmontsësertana ca?

*Jesús canÿe jtanábioye tbojanshná, Betsaida puebloca*

22 Chentšana tmojánashjajna Betsaida puebloca; y chora, entšanga canÿe boyabása jtaná Jesúsbioye tmojanánatse, y tmojanimpadá cha jabojuana chabotseshnama.

23 As, chë jtanábioye tbojanábuacushache, y chë pueblo chaboye tbojanánatse. Chorna, yebuáyeca ibojabuchanëtjo, y chábeñe cucuatšënga yojajájua, y tbojantjá nderado ndayá jinÿama tayojsanobena ca.

24 As chë jtaná yojontješiye y tojánayana: —Boyabásenga sentsënÿa; mo betiyëngcá montsemna, pero montsobonjná ca.

25 Chora Jesús, chë jtanabe fšnëbeñe cachiñe cucuatšënga yojajájua. Y chë boyabása yojtsobena lempe tšabá jinÿama; ya shnaná yojtoquéda. Y yojtsobena nÿetsca soyënga botamana jinÿana.

26 Chentšana, Jesús cachabe yebnoye tbojtanicmó y mëntšá tbojanianana: —Chë puebloye ndoñe catjëftsamashëngo ca.

*Pedro tojánayana, Jesús chë Cristo bétsemnama*

*(Mt 16.13-20; Lc 9.18-21)*

27 Chentšana, Jesús tojánbocna chabe uatsjëndayëngaftaca Cesarea de Filipino luaroca pueblëngoye, y benachiñe chabe uatsjëndayënga tojanatjá: —¿Nda atše bétsemnama ca entšanga imojtsichamo ca?

28 Y chënga tmojanianana: —Inÿenga montsichamo Juan chë Ubayaná ca, ínÿengna Elías ca, y ínÿengna, canÿe Bëngbe Bëtsabe juabna oyebuambnayá ca.

29 As Jesús tojanatjá: —Y tšëngaftangna, ¿nda atše bétsemnama ntšamo šmochjayana ca?

Y Pedro tbojanjuá: —Acna chë Cristo condmëna, chë Bëngbe Bëtsabe Uámana Uabuayaná ca.

30 Chentšana Jesús corente chënga tojanamëndá, chë nda cha yojamnama ndocnábeñe ntsecuëntayana.

*Jesús tojánayana cha ibojamna jóbanana y jtsayenana ca  
(Mt 16.21-28; Lc 9.22-27)*

31 Y Jesús tojanontsé chabe uatsjéndayënga jabuátambana, cha, chë Bëngbe Bëtsá Entśá tbojanbemá, ibojamna puerte jasúfriana ca; chë judiëngbeñe bëtsëjemëngcá amëndayëngbiama, chë judiëngbe más uámana bachnangbe amëndayënga y ley abuatambayëngbiama uabotená jtsemnana ca. Entśanga mochjanóba, pero unga tianoye yochtanayena ca.

32 Njëtscanga catafjosertaycá chama yojtsoyebuambnaye. As Pedro, Jesúsbioye luaroye tbojanánatse, y tojanontsé jtsáuyanana.

33 Pero Jesús yojobuértana, chabe uatsjéndayënga tojanëñyanýé, y Pédrëbiyoye mëntsá tbojtsanbochembo: “¡Satanás, átšbentšana mojuaná! Pedro, acbe juabnënga Bëngbe Bëtsábiocana ndoñe quenatóbocana, sinó nýe entśángbentšana ca.”

34 Chentšana, Jesús chabe uatsjéndayënga y chë inýe entśanga tojánachembo chamouenama, y tojanëyana: “Nda atšbe uatsjendayá jtsemnama tojtseboše, cháuyana nýe Bëngbe Bëtsá yobena sempre chabe vidiñe jtsemándayana ca, chabe quem luarentša soyënga cachcá chauesonýá atše juastama, y atšbiama jasúfriama chaotseprontana y cruciñe jobanámnaca.

35 Nda tojtsama quem luarentše bëtscá soyënga jtsebomnama y atšbiama jasúfriama ndoñe tontseprontana, chë njëtscá tescama yomna tšabe vida echanjopérdia. Pero nda quem luarentša soyënga cachcá tojëftsonýá atše juastama, y chë tšabe noticiënga atšbiama abuatambaye causa, masque chaóbana, chë njëtscá tescama yomna tšabe vida echántsebomna.

36 ¿Ndayama entśá buanjosérvia njëtscá quem luarentša soyënga jtsebomnana, chë njëtscá tescama yomna tšabe vida tojtsoperdese?

37 Er canýe entśá chë njëtscá tescama yomna tšabe vida tojtsoperdese, ndocna soye quenátsmëna cha chaobená joyiyama, chë njëtscá tescama yomna tšabe vida jtsebomnama.

38 Chcasna, nda mora atšbiama y atšbe buayenana soyëngama tojtsëuatja entśángbeñe, chënga chë Bëngbe Bëtsabiama nduauenanënga y bacna soye amënga, chë Bëngbe Bëtsá Entśá tbojanbemánaca chabiama echantsëuatja, chabe Taitabe bëtš obenánaca y chabe angelëngaftaca chaojésabo ora ca” —cha tojanëyana.

## 9

<sup>1</sup> Měntšánaca Jesús tojaněyana: “Ndegombre cběyana, báseftanga muentše montsemnënga ndoñe quemochatóbana, Bëngbe Bětsá entsángbeñe chabe obenánaca jabomándama jabana ntjětsinýcá ca.”

*Jesús inýetsá tojanobinýná  
(Mt 17.1-13; Lc 9.28-36)*

<sup>2</sup> Chentšana chnënguana tianoye, Jesús tojěftsanëbiatše Pedro, Santiago y Juan, y ínýoye tojanënatse nýe chënga, canýe běts tjoye. Y chëngbe delante Jesús inýetsá tojanobinýná;

<sup>3</sup> chabe uichětjonëjuangá tša yojtsabuashinýinýana; corente uafjantsëjuangá yojtsamna; nýa chca juafjantsama ndocná quem luarentše quentatobenaye.

<sup>4</sup> Chca orna, chë uatsjëndayënga tmojáninýe, Moisés y Elías tbojanobinýná Jesúseftaca encuéntaye.

<sup>5</sup> Chora Pedro, Jesúsbioye tbojanियana: “¡Buatëmbayá, tša tšabá bëngbiana cuanmëna muentše jtsemnana ca! Mora fchanjapórma unga tambotémënga: cánýetema acbiana, ínýetema Moisesbiana y ínýetema Elíasbiana ca.”

<sup>6</sup> Chca tojánayana, chë uatsjëndayënga yapa auatjanánënga imojtsemna causa, y Pedro ndoñe yontsetátšëmbo ntšamo jayanana.

<sup>7</sup> Chora canýe jantšetëshe yojóbema, y chëngbioye yojáutsbotse; y chë jantšetëshoicana canýe oyebuambnayana tojanóbozna, mēntšá: “Mua atšbe bonshana Uaquiñá endmëna; cha šmochtseyeunana ca.”

<sup>8</sup> Y ndeolpe, chëngbe shëconana tmojanrrepará ora, ya ndocná más tmonjáninýe; nýe Jesús canýa chëngaftaca yojtsemna.

<sup>9</sup> Chë tjocana imojtsatstsmaye ora, Jesús chë uatsjëndayënga tojanamëndá: —Bëngbe Bětsá Entšá tbojanbemá obanënguentsana candětayenëntscuana, chë mēnté tjoca šmonjinýe soyama ndocnábeñe šmattsecuéntaye ca.

<sup>10</sup> Chë uatsjëndayënga aíñe chca tmojanuena; pero chënga imojtsentjanaye ndayá cha yojtsentšáyana, cha yochtanayena ca cha tojánayana ora.

<sup>11</sup> Y Jesúsbioye imojtsetjanaye: —¿Ndáyeca chë ley abuátambayënga mondbétsichamo, canmëna Bëngbe Bětsabe Uámana Uabuayanabe natsana Elías jabana ca?

<sup>12</sup> As cha tojanějua: —Ndegombre, canýa Eliascá natsana echanjabo, y ntšamo jtsemnama yomncá lempe echánjabatsma. Pero ntšamo Bëngbe Bětsabe uabemana palabrënguifñe endayancana, Bëngbe Bětsá Entšá tbojanbemá puerte caochjasúfria, y ínýenga puerte camochtsáboyënja ca.

13 Ndegombre cbéyana, canya Eliascá ya tonjabo, y cháftaca entsanga tmonjanma lempe ntšamo tmojabošencá, ntšamo chaochnënguama Bëngbe Bëtsabe uabemana palabrënguñe endayancá.

*Jesús, canye basa bayëjbe juabna uambayábioye tbojanshná (Mt 17.14-21; Lc 9.37-43)*

14 Chentsana, chënga tmojtaná chë inye uatsjëndayëngbioye. Chora, Jesús tojáninye ba entsanga chë uatsjëndayëngbe shëconana imojtsemnama, y básieta ley abuátambayëngna chëngaftaca imojtsenatsëtsnaye.

15 Nyetsca entsanga cha tmojáninye ora, imojenjnaná y tmojanótjajo cha jachuayama.

16 Chora Jesús chënga tojanatjá: —¿Ndayama chëngaftaca šmenatsëtsná ca?

17 Y canya entsanguentsá tbojanjuá: —Buatëmbayá, muentše ácbioye sënjuánatse atšbe uaquiñá; bacna bayëjbe juabna entsambá, y chë causa, jóyebuambayama ndoñe quenátobena.

18 Nye ndayéntšnaca cha tojtsemnentše, chë bayëja chábioye jishachana y jtsenajuáchesënjana; chentše uayoicana shashiye jtsabocanana, jtsenoftëšfojnayana y obanacá jtsatsjájonana. Acbe uatsjëndayënga sënjaimpadá chë bacna bayëja chamu-atábocnama, pero ndoñe chematobená ca —cha tbojaniana.

19 As Jesús tojánayana: —¡Nyetsá ndošbuáchiyënga ca! ¿Buetayté šojtsemna tšëngaftangaftaca jëftsemnana? ¿Buetayté uantado tšëngaftangaftaca chjëftsemna? ¡Moye chë básetema mánatse ca!

20 Chora chë básetema chábioye tmojanánatse; y chë bayëja Jesúsbioye tbojáninye ora, tojanma chë basa ataque chaboshachama, y chë basa fshantsoye yojashajaye, yojtsojandounaye y uayoicana shashiye yojtsábocana.

21 As Jesús chë básabe taitábioye tbojantjá: —¿Buetayté chca yojtsepása ca?

Y cha tbojanjuá: —Básetema orscana chca;

22 ba soye, chë bayëja chábioye iñoye jtsatmetšana y buyeshoye jtashbuetšana, jtsóbama. Chíyeca, nderado ndayá chabiamama jamama tcojtsobenëse, bënga šmotsalastemá y šmotsëjabuache ca.

23 Chora Jesús tbojaniana: —¿Ndáyeca “ndayá jamama tcojtsobenëse ca” šcjauyana? Nda Bëngbe Bëtsábeñe tojtsošbuáchebiamama lempe endopodena ca.

24 Y cachora chë básabe taitá tojanáyebuachena: —Aíñe, Bëngbe Bëtsábeñe sëntsošbuaché; Diosmanda, ¡más jtošbuáchiyama šmajabuache ca!

25 Y bëtscá entšanga imojtsógotoma Jesús tojáninÿe ora, chë bacna bayëja tbojtsanbochembo mëntšá: —¡Bacna bayëja, chë básetema tësmá y ndëbiá biamnayá; chábentšana maisebocna y ndocna te más chábeñe catjésamashëngo ca!

26 Y chë bayëja chábentšana yojésebocna, yojtseyoye y chë básabioye jabuache ibojeshatiyiyé; y chë básana mo obanacá tojanoquedá, y chë causa banga imojtsichamo cha obaná yojtsemna ca.

27 Pero Jesús tbojanábuacueshache y tbojtanatsbaná; y chë básana yojtëtsaye.

28 Chentšana, Jesús canÿe yebnoye tojánamashëngo, y chabe uatsjéndayëngna luaroca cha tmojantjá: —¿Ndáyeca bënga ndoñe fsënjobená chë bayëja jtabocnana ca?

29 Y Jesús tojanëjua: —Chca bayëjenga jtëbuacanamna jobenayana nÿe Bëngbe Bëtsáftaca jencuéntase, chabuájabuachama jaimpádase ca.

*Jesús cachiñe tojánayana cha ibojamna jóbanana y jtayenana ca*

*(Mt 17.22-23; Lc 9.43-45)*

30 Chentšana tmojëftsanbocna ora, Galilea luarëjana imojtsajna; y Jesús yojtseboše chama ndocná chaondëtsetatšëmbuama,

31 er cha chabe uatsjéndayënga yojtsabuátambaye. Mëntšá cachabiama yojanëtsëtsnaye: “Bëngbe Bëtsá Entšá tbojanbemá entšangbe cucuatšiñe mochanjáboshjona; mochanjóba, pero chentšana unga tianoye echántayena ca.”

32 Pero chënga ndoñe yontsósertana ntšamo Jesús yojtsanëtsëtsnacá, y chama jatstjanayamna chënga imojtsauatja.

*¿Nda chë más uamaná yomna?*

*(Mt 18.1-5; Lc 9.46-48)*

33 Chora Capernaum puebløye chënga tmojánashjajna; y cach yebnentše imojtsemna ora, Jesús chë uatsjéndayënga tojanatjá: “¿Ndayama benachiñe šmabáyenatsëtsnaye ca?”

34 Chëngna nÿe iytëca tmojanobiama, er benachëjana chënga imnayénatsëtsnaye, chënguentsá nda chë más uamaná bëtsemnama.

35 As Jesús tojanótbema, chabe bnëtsana uta uatsjéndayënga tojánachembo y tojanëyana: “Ndánaca nÿetscangbiama chë más uamaná jtsemnama tojtsebošëse, cha chë más nduamaná chaóbema y nÿetscanga chaotsaserverna ca.”

36 Chora Jesús canÿe básetema tbojánishache, chëngbe tsëntsaca tbojanatsá, tbojantbá y chënga tojanëyana:

37 “Ndánaca, átšbeñe ošbuachiyá bëtsemnayeca, tbojofja canÿa mo quem basetemcá, chana atše jofjana; y nda atše

šojofja, chora cha n̄ye atše ndoñe ntjofjana, sinó chē šojichmó chábioynaca jofjana ca.”

*Nda ndoñe bēngbe contra tontsemná, bēngaftaca jtsemnana (Mt 10.42; Lc 9.49-50)*

38 Juan, Jesúsbioye tbojaniana: —Buatēmbayá, bēnga fsēnjinye can̄ye boyabása, y cha aca jótšēmbonēse, bacna bayējbe juabna entšángbentšana endētēbuacana; pero cha bēngaftaca ndoñe quenátsmēna causa, chama fsēnjesauyaná ca.

39 As Jesús tbojanjuá: —Ndoñe šmatjuauyaná; er ndocná quenátobena can̄ye bēts soye jamana Bēngbe Bētsabe obenánaca, atše jótšēmbonēse, y chentšana atšbe contra jatóyebuambnayana.

40 Ndegombre, nda ndoñe bēngbe contra tontsemná, bēngaftaca jtsemnana.

41 Y ndánaca, masque n̄ye búyeshtema tšēngaftanga tcmojubuatšatá, tšēngaftanga átšbenga bétsemnayeca, chábioye Bēngbe Bētsá can̄ye uacanana soye bochántatšetaye, cha chē tšabe soye tojamama ca.

*Resjo yomna, nderado bacna soyēnga cuanjama (Mt 18.6-9; Lc 17.1-2)*

42 Chentšana Jesús tojánayana: “Can̄ya átšbeñe ošbuachiyábioye mo quem basetemcá, nda tbojaingñé atše ustonama chaotsajbanama, más tšabá chabiama nántsemna can̄ye bēts nantsnēbé chamotsetamošēntšbua y mar bėjayoye asentoye chamotsashbuetše chabotsenatjēmbama.

43 Nderado acbe cucuatšeca bacna soye tcojama, más tšabá nántsemna chē cucuatše chacotsenacuéstjango. Acbiama más tšabá endmēna celaye jamashēnguana n̄yetsca tescama vida jtsebomnama, n̄ye can̄ye cucuatše bomná, y ndoñe n̄yets útátšeca infiernoye chacmotocá jama, chē ndocna te yochanjáfsana íñeshoye;

44 choca útšenēnga puerte n̄yetsca tescama mochanjasúfria. Chēngbioye mochtsasaye mamanga ndocna te quemochatóbana, y chē íñeshe ndocna te queochátšfsana.

45 “Nderado acbe shecuátšeca bacna soye tcojama, acbiama más tšabá nántsemna chē shecuatše chacotsenashecuástjango. Acbiama más tšabá endmēna cosheto celaye jamashēnguana n̄yetsca tescama vida jtsebomnama, y ndoñe n̄yets útátšeca infiernoye chacmotsētšena;

46 choca útšenēnga puerte n̄yetsca tescama mochanjasúfria. Chēngbioye mochtsasaye mamanga ndocna te quemochatóbana, y chē íñeshe ndocna te queochátšfsana.

47 “Nderado acbe bomínÿeca bacna soye tcojinÿe y cachca soye tcojama, más tšabá nántsemna chë bominÿe chacot-senobuchjátsëca. Acbiama más tšabá endmëna Bëngbe Bëtsabe amëndayoye jamashënguana nÿe canÿe bominÿe bomná, y ndoñe nÿets útabeca infiernoye chacmotsëtšena;

48 choca útšenënga puerte nÿetsca tescama mochanjasúfria. Chëngbioye mochtsasaye mamanga ndocna te quemochatóbana, y chë ñheshe ndocna te queochátsfsana.

49 “Tamó tšabe soye endmëna. Ntšamo chë tamó canÿe tšabe soye endmëncá, Bëngbe Bëtsá echanjama nÿetsca tšëngaftangbiana tšábenga chašmotsemnama, chë átšbeñe betsošbuáchema šmojtsepadecena ora šmojauantase.

50 Tamó tšabe soye endmëna. Pero chë tamó fténana tojtsóbemëse, ndoñe quešmátobena jamana cachiñe chabe tempsca sanana chaotsatsbomnama, ni saná jatamuama. Mo tšabe tamocá entšangbiana šmochtsemna, chëngbeñe jtsiyenëse ntšamo Bëngbe Bëtsá yobošcá, y nÿetscángaftaca natjëmbana šmochtsiyena ca” —cha tojánayana.

## 10

*Ndayá Jesús tojanabuatambá bouamnënga tmojt-senëtšenama*

*(Mt 19.1-12; Lc 16.18)*

1 Chentšana, Jesús chë luarentšana tojëftsanbocna y tojána Judea luaroye y Jordán chenguana. Entšanga cachiñe chábioye tmojánabo, y cha chënga yojtsabuátambaye, chë ntšamo jamana yojanamancá.

2 Básefta fariseunga chábioye tmojanobeconá, y jisháchichiyama mëntšá imojtsetjanaye: —¿Queojtselesenciana canÿe boyá chabe shémbioye cachcá jesonÿayama ca?

3 Chora cha tojanëjua: —¿Ntšamo Moisés chë soyëngama tcmëjnamëndaye ca?

4 Y chënga tmojánayana: —Moisés tojanalesenciá chë boyá chabe shémbioye chabuiyé canÿe tsbuanácha, ndayëchañe chaotsayana cha ya ndoñe chabe shema yontsemna ca, y chora cachcá chabe shema chabuesonÿá ca.

5 Chora Jesús tojanëyana: —Tšëngaftanga Bëngbe Bëtsabe mandënga ainaniñe jóyëngacñama ndoñe quešmátsboše causa, Moisés chca tšëngaftanga tcmojëftsanamëndá.

6 Pero quem luare jobojátšama orna, “Bëngbe Bëtsá canÿe boyabása y canÿe shembása tonjánabiana.

7 Chíyeca, chë boyabása chabe taitá y chabe mamá echanjésabashejuana, chabe shémaftaca jenútanama,

8 y chë útatna mo canÿacá bochántsemna.” Y chca, ya ndoñe útata quebochátsmëna, sinó nÿe mo canÿacá.

<sup>9</sup> Chcasna, entšá ndoñe chaonděndbema ndayá Běngbe Bětsá mo canýiñcá tojěftsema soye ca —cha tojánayana.

<sup>10</sup> Ya cach yebnoca imojtsatsmēna ora, chabe uatsjédayēnga cach soyama imojtětstjaye.

<sup>11</sup> Y Jesús tojanéyana: “Nda chabe shémbioye cachcá tbojesonýá y ín्याftaca tojtóbouamase, cha chē natsana shémbioye inýe shembáaftaca jtseíngñayana; chana canýe uabuatmá jtsebomnana.

<sup>12</sup> Y chē shema chabe boyábioye cachcá tbojesonýá, y ín्याftaca tojtóbouamase, chánaca chē natsana boyábioye ín्याftaca jtseíngñayana; canýe uabuatmá jtsebomnana ca” —Jesús tojánayana.

*Jesús, basetémēngbiama Běngbe Bětsábioye tbojanimpadá*  
(Mt 19.13-15; Lc 18.15-17)

<sup>13</sup> Entšanga, basetémēnga Jesúsbioye tmojanēnatse, chauabájajuama y Běngbe Bětsábioye chēngbiama chaboimpadama; pero chabe uatsjédayēngna tmojanontsé chē basetémēnga unachayēnga jtsēcácanana.

<sup>14</sup> Jesús chca tojáninýe ora, tbojánetna y chē uatsjédayēnga tojanéyana: “Cachcá mónýaye chē basetémēnga átšbioye chamuabo y ndoñe matéuyanana; er Běngbe Bětsabe amēndayana endmēna chē mo quem basetēmēngcá imomnēngbiama.

<sup>15</sup> Ndegombre cbéyana, nda Běngbe Bětsabe soyēnga ndoñe tonjóyēngacñe mo canýe basetemcá jtsošbuáchiyēse, cha ndoñe queochatobenaye Běngbe Bětsabe amēndayoye jamashēnguama ca.”

<sup>16</sup> Y chē basetémēnga tojanchebá, y chēngbeñe cucuatšēnga jajájuase, Běngbe Bětsábioye tbojanimpadá tšabe bendicionēnga chēngbeñe chaotsemnana.

*Canýe bomna entšá Jesúsbioye tojana*  
(Mt 19.16-30; Lc 18.18-30)

<sup>17</sup> Jesús jama tojtētanontsé ora, canýe boyabása chábioye tojanótjajo, chabe shecuatšentše tojanoshěntsamentšé, y mēntšá tbojantjá: —Tšabe Buatēmbayá, ¿ndayá šojtsemna jamana chē nýetsca tescama yomna tšabe vida jtsebomnana ca?

<sup>18</sup> Y Jesús tbojanjuá: —¿Ndáyeca “tšabia ca” šcjauyana? Tšabia nýe canýa endmēna: Běngbe Bětsá.

<sup>19</sup> Aca icotátšēmbo Běngbe Bětsá tojanmandacá: “Ndoñe catjóba, acbe shema ín्याftaca ndoñe cattseíngñaye, ndoñe catjatbēba, ndoñe catjuaboínýena, ínýengbioye ndoñe catjáingñaye ndayánaca jabacama, y acbe bētsětsata ndoñe stětšoye catjáquedaye ca.”

<sup>20</sup> Chora chē boyabása tbojanjuá: —Buatēmbayá, atše lempe chē mandēnga básetema orscana sēndocumplina ca.



<sup>21</sup> Jesús bonshanánaca tbojanonjinyé y mēntšá tbojaniyana: —Canye soye cmontsebuáshbena jamana: Motsa, lempe ntšamo icobomncá cochjetsatobuiye, y chē crocénana, nd-bomnjémēnga cochtsatšataye; chca, celoca canye bēts bomnana cochántsebomna. Chentšana, cochjabo y šcochjuasto ca.

<sup>22</sup> Pero chē bobóntsbiolye injētšá ibojtsínynana Jesús chca tbojaniyanama; y puerte ngménaca yojtá, cha puerte bomná inamna causa.

<sup>23</sup> Chora Jesús cátoye tojanrrepará y chabe uatsjéndayēnga tojanéyana: —¡Puerte totcá entsemna bomnēngbiama Bēngbe Bētsabe amēndayoye jamashēnguama ca!

<sup>24</sup> Chca imojouena ora, chē uatsjéndayēnga ojnánānēnga imojtsemna, pero Jesús cachiñe tojanoyebuambá y mēntšá tojanéyana: —Atšbe básēnga; ¡puerte totcá entsemna Bēngbe Bētsabe amēndayoye jamashēnguama!

<sup>25</sup> Ndegombre, más paselo endmēna chē coshufjentša atēfnējana canye camello chauachnēngo, y ndoñe canye bomná Bēngbe Bētsabe amēndayoye jamashēnguana ca.

<sup>26</sup> Pero chē uatsjéndayēnga nje más imojtsenjnanaye y imojtsentjanaye: —¿As, nda yochjobenaye atsbocaná jtsemnana ca?

<sup>27</sup> Chora Jesús tojanēnyānyé y tojanéyana: —Entšanga ndoñe quemátobena jamana canya atsbocaná chaotsemnana, pero Bēngbe Bētsá añe; er Bēngbe Bētsá lempe jamama endobena ca.

<sup>28</sup> Chora Pedro tbojaniyana: —Aca contsonyá, bēnga lempe chē fsēndbomna soyēnga fsēnjéseboshjona y ácaftaca fsēntsajna ca.

<sup>29</sup> As Jesús tojánayana: —Ndegombre cbēyana, ndánaca átšbiolye jaserviama y chē tšabe noticiēnga jábuayenama, tojéseboshjona chabe yebna, catšátanga o uabēnanga, bebmá o befta, o básēnga, o fshantsēnga,

<sup>30</sup> cha mora quem luarentše echanjójyēngacñe chama patse soye más yebnēnga, catšátanga, uabēnanga, bebmanga, básēnga y fshantsēnga, masque puerte chaosufrima inyēnga mochántsama; y chē inye luarocna, chē nyetsca tescama yomna tšabe vida echanjónyēna.

<sup>31</sup> Pero banga, mora uámanēnga imomnēnga, nduámanēnga mochántsemna; y banga, mora nduámanēnga imomnēnga, uámanēnga mochántsemna ca —Jesús tojánayana.

*Jesús cachiñe tojánayana cha jóbanama y jtayenama  
(Mt 20.17-19; Lc 18.31-34)*

<sup>32</sup> Chentšana Jerusalenoye imojtsaye, y Jesús yojtsebnat-sana. Chē uatsjéndayēnga puerte ojnánānēnga imojtsemna, Jesús ndauatjácá choye yojsayama; y inye becá entšanga ústonoye imojtsajnēngna, imojtsayáuatja. Jesús cachiñe chabe

bnětsana uta uatsjédayënga barie tojánachembo y tojanontsé jáuyanana ntšamo cháftaca jopásama yojtsemnana.

33 Měntsá tojaněyana: “Tšëngaftanga šmontsonjá, Jerusalenoye bënga mora montsajnama. Chocna, chë Bëngbe Bětsá Entśá tbojanbemá, chë bachnangbe amëndayënga y ley abuatambayëngbe cucuatšiče mochanjáboshjona, y chënga mochanjayana cha chaóbana ca; y ndoñe judiëngbe cucuatšiče mochanjáboshjona.

34 Chënga mochantsáboyejuana, mochántsebuashětoto, mochántsetjanja y mochanjóba, pero chentšana unga tianoye cha echántayena ca.”

*Santiago y Juan, Jesús tmojanimpadá canye pavor cháuabiamama*  
(Mt 20.20-28)

35 Chora, Santiago y Juan, Zebedeobe uaquiñata, Jesúsbioye tbojanobeconá y tmojaniyana: —Buatëmbayá, bëndata fsěntseboše pavor chašcuabiamama ntšamo chacbojaimpadacá ca.

36 Y Jesús tojanatjá: —¿Ndayá šojtseboše atše tsëndatbiamama ca?

37 Y chata tbojaniyana: —Aca reycá chacojtsemánda ora, cochjaleséncia bëndata fchayobená jótbemana, canya acbe catšbioica y inya acbe uañicuayoica ca.

38 As Jesús tojanějua: —Ntšamo šmontsotjanañama tsëndata ndoñe quešnátstatšëmbo. ¿Ntšamo atše chaitsesufrincá, tsëndátnaca cachcá jasúfriama tašatjobenaye? ¿Y entšanga puerte bacá chacmojtšëbuatsená ora, tašochjauánta, ntšamo atše chjauantacá ca?

39 Y chata tbojaniyana: —Aíñe fchanjobenaye ca.

Y Jesús tojaněyana: —Ndegombre tsëndátnaca atšcá šochanjasúfria, y atšbe causa cmochántsamna bětscá soyëngama jasúfria.

40 Pero atše ndoñe quetsátobena jamándana nda atšbe catšbioica y atšbe uañicuayoica chaótbemama. Chë útentse entsemna ndëmuanyëngbiamama atšbe Taitá tojaprontacá ca.

41 Chë inye bnětsana uatsjédayënga chca tmojanuena ora, tmojanontsé Santiago y Juánoftaca jotjáyanana.

42 Pero Jesús nyetsca uatsjédayënga tojánachembo y tojaněyana: “Tšëngaftanga šmondětatsšëmbo, quem luarentša amëndayënga lempe jtsemándayana, nya mo nduiñënga cuaftsemncá; y chë bětsětsa entšanga chëngbe obenánaca jtsemándayana, ntšámnaca jtsaměse, chë inye entšanga sempre chamotsayaunanama.

43 Pero tšëngaftangbeñe ndoñe chca chaondětsemna. Inyětśá; masna, nda tšëngaftangbeñe chë más uamaná

jtsemnana tojtseboše, cha bontsemna chë ínÿenga jtsaservénana;

<sup>44</sup> y ndánaca tšëngaftanguentsá chë más uamaná jtsemnana tojtsebošá, bontsemna jtsemnana nÿetscangbiama, mo nÿe ínÿabiama nÿets tempo oservenacá.

<sup>45</sup> Cachcá, Bëngbe Bëtsá Entšá tbojanbemá ndoñe chenátabo cha chamotseservénama, ndayá ínÿenga jabáserviama. Y mo nda, ínÿenga játsebacama cuafjopagacá, cha echanjóbana ba entšanga atsebácanënga chamotsemnana ca” –cha tojánayana.

*Jesús canÿe jtanábioye tbojanshná*

*(Mt 20.29-34; Lc 18.35-43)*

<sup>46</sup> Chentsana, Jesús y chabe uatsjéndayënga Jericó uabaina pueblöye tmojánashjajna. Y Jesús chabe uatsjéndayëngaftaca y bëtscá entšángaftaca Jericó pueblentsana yojtsaisebocana ora, Timeobe uaquiñá, Bartimeo ca uabainá, canÿe jtaná lemošna otjanañá, benache juachañe yojtsetbemana.

<sup>47</sup> Y Jesús Nazaretocá chëjana yojtsachnëjuanama cha yojátatsëmbona ora, tojanontsé mëntsá uayebuáchana: –¡Jesús, Davídbentsana Entšá, šmotselastemá ca!

<sup>48</sup> Chorna, banga chë jtaná imojtsácacana iytëca chaóbemama. Pero cha más yojtsáyebuache: –¡Davídbentsana Entšá, šmotselastemá ca!

<sup>49</sup> Chora Jesús tojantsá y chë ínÿenga tojanëyana: –Chë jtaná mochembo ca.

As chë jtaná tmojanchembo, y mëntsá tmojanियana: – ¡Añemo cochtsebonna; motsbaná! Jesús cmontsechembuana ca.

<sup>50</sup> Y chë jtaná, quefsaíya jtsenátsejquëse, yojontsënja y betscó Jesúsbioye yojobeconá.

<sup>51</sup> Chora, Jesús chë jtanábioye tbojantjá: –¿Ndayá cojtseboše atše acbiama chjamama ca?

Y chë jtaná tbojanjuá: –¡Buatëmbayá, šmolesenciá atše chašuatábínÿnama ca!

<sup>52</sup> As Jesús tbojanियana: –Motsatoñe. Tšabá jtsatsmënana Bëngbe Bëtsábeñe icošbuachéyeca, tšabá contsatsmëna ca.

Y cachora cha tšabá ibojtabinÿna, y Jesúsbioye benachëjana ibojtsëstona.

## 11

*Jesús Jerusalenoye tojánashjango*

*(Mt 21.1-11; Lc 19.28-40; Jn 12.12-19)*

<sup>1</sup> Ya Jerusalenoye imojtsebeconá ora, Betfagé y Betania pueblënga béconana, Olivos ca uabaina tjashe juachañe, Jesús uta chabe uatsjéndayata tojanichamó,

<sup>2</sup> y mēntšá tojaněyana: “Tsēndatbe natsana entsemna base pueblotémoye motsata. Chašojáshjango y cachora šochanjíněyena caněe burrotema utsbuaná; chábeñe cabá ndocná tonjenojayé. Sochjuajafjoná y šochjuánatse.

<sup>3</sup> Nderado nda, ¿ndáyeca šmojtsanachá ca? chacmojátjase, šochjojuá: ‘Bēngbe Utabná bontsájaboto y chora bochantabáiseboshjona ca.’ ”

<sup>4</sup> As chata tbojána, y tbojániněyena chē burrotema tsášehañañe, caněe bēsášañañe utsbuaná, y imojuajafjoná.

<sup>5</sup> Y básefta entšanga chiñe imojtsemnēnga, chátbioye tmojaněyana: “¿Ndayá šojtsama? ¿Ndayeca chē burrotema šojtsajafjná ca?”

<sup>6</sup> As chata tbojanjuá ntšamo Jesús tojaněyancá; y chē entšanga tmojanalesenciá chē burrotema chamuánatsama.

<sup>7</sup> Chentšana, chē burrotema Jesúsbioye tmojanánatse; chē burrotémbeñe chatbe entšayá tbojanájatse, y Jesús chábeñe tojanenojayé.

<sup>8</sup> Bētscá entšanga chēngbe entšayá chē benachějana imojtsanētétsatsana, y íněyengna chē jajoca imojuatétsetse buacuashangá chiñe imojuacjaye.

<sup>9</sup> Y chē natsana imojtsajněnga y chē ústonoyēnga mēntšá imojtsaiuáyebuache: “¡Bēngbe Bētsá matschuanga! ¡Corente bendición bomná, chē Bēngbe Utabnabe obenánaca tojabá!

<sup>10</sup> ¡Tša tšabá chē echanjóshjango amēndayana, bēngbe bēts taitá David yojéftsemánda orcá! ¡Bēngbe Bētsá celocá matschuanga ca!”

<sup>11</sup> Jesús Jerusalenoye tojánashjango, y Bēngbe Bētsabe bēts yebnoye tojánamashēngo. Chabe shéconana lempe yojéftserrepárase, y ya yojtseibétatana causa, chabe bnětsana uta uatsjéndayēngaftaca tojéftsanbocna, Betania puebloye.

*Jesús tojánayana caněe betiye ndoñe más chaonděshájona ca (Mt 21.18-19)*

<sup>12</sup> Yěfsana, Betaniocana Jerusalenoye chēnga imojtėsajna ora, Jesús tbojánishěntsena.

<sup>13</sup> Bēnocana caněe higo betiye yojiněe; as tojána jontješiyama tainashajo o ndoñe. Pero něe tsbuanáchēnga chiñe yojíněyena, chora ndoñe shajo tempo bétsemna causa.

<sup>14</sup> As Jesús chē higo betiyoye tojánayana: “¡Ndocna te más chaconděshájona entšanga chamosama ca!”

Y chabe uatsjéndayēnga imojjouena ntšamo cha tojanayancá.

*Jesús, Bēngbe Bētsabe bētsyebnentsana enēnga y obuámnayēnga tojtanébuacna*

*(Mt 21.12-17; Lc 19.45-48; Jn 2.13-22)*

15 Jerusalenoye tmojánashjajnentšana, Jesús Bëngbe Bëtsabe bëts yebnoye tojánamashëngo, y tojanontsé chentšana jtëbuacnana chë chentše imojtsena y imojtsobuámnañënga. Chéntšnaca imojtsemna entšanga canye crocénana enënga, y chë crocénana nÿe Bëngbe Bëtsabe bëts yebnentšama inoservena. Chë entšanga crocénana atrocayëngbe mesëshangá tojtsanenásatajchquëca, y chë palomatémënga enëngbe tšenëšëngnaca;

16 y ndoñe tonjanalesenciá ndocná Bëngbe Bëtsabe bëts yebnëjana chë soyënga chaotsëchnëjuanama.

17 Y tojanontsé entšanga mëntšá jabuátambana: “Ndegombre, Bëngbe Bëtsabe uabemana palabrenguiñe cha mëntšá tojánayana: ‘Atšbe bëts yebna echantsabaina nÿetsca luar-entša entšangbiana átseftaca encuéntaye yebna ca’; pero tšëngaftangna atbëbanëngbe oyeniñe chë yebna šmojtsebema ca” —Jesús tojanëyana.

18 Chë bachnangbe más uámana amëndayënga y chë ley abuátambayënga tmojántatšëmbona ntšamo yojochnënguama; as tmojanontsé enójuabnayana ntšamo jobenayana cha jóbana, cha imojtsebiauatja causa, er nÿetsca entšanga imojtsenjanaye ntšamo cha yojanabuátambama.

19 Pero yojtseibétatana ora, Jesús chabe uatsjëndayëngaftaca chë bëts pueblentšana yojesóbocñe.

### *Chë higo betiye tojtsanbuashá*

*(Mt 21.20-22)*

20 Yëfsana cachëse, cachëjana imojtésachnëjuana ora, tmojáninÿe chë higo betiye parejo tbëtëjëngaca yojtsebuashá.

21 Chora Pedro yojenójuaboye ntšamo yojopásama; as Jesúsbiroye tbojaniyana: —¡Buatëmbayá, minÿe; chë tconjayana ndocna te más tšabe betiye chaotsemnama betiye tojtsebuashá ca!

22 Y Jesús tbojaniyana: —Bëngbe Bëtsábeñe šmochtsošbuáchiye.

23 Ndegombre cbëyana, nderado nda quem tjoye tojayana, “¡chentšana mojuaná y bëts uafjajónayoye motsëshbuetše ca!” y chca tojayana ainaniñe inÿetšá juabna ntjatsbomncá, y ainaniñe puerte tojtsošbuaché ntšamo tojayancá aiñe yochjochnënguama, ndegombre chca echanjochnëngo.

24 Chíyeca cbochanjáuyana, lempe ntšamo Bëngbe Bëtsáftaca chašmojtsencuénta ora chašmojtsotjanañama, ainaniñe corente šmochtsejuabnaye ya šmojóyëngacñe ca, y ndegombre chca šmochántsebomna.

25 Y Bëngbe Bëtsáftaca chašmojtsencuénta ora, šmochjenójuaboye nderado nda ndaye bacna soye tšëngaftangbiana tojamama, y cháftaca cabá etonánënga

šmojtsemnëse, šmochtseperdóna; chca, Bëngbe Bëtsá, celoca endmëná, tšëngaftangbe bacna soyëngama chacmotsaperdonama.

<sup>26</sup> Pero inÿa ndoñe šmonjaperdonasna, Bëngbe Taitá, celoca endmëná, cach ndoñe tšëngaftanga quecmochátaperdonaye ca —cha tojánayana.

### *Jesusbe obenana*

(Mt 21.23-27; Lc 20.1-8)

<sup>27</sup> Chca tojanopasá chentšana, Jerusalenoye chënga tmojesaná. Jesús Bëngbe Bëtsabe bëts yebnëjana yojtsobuertanëntscuana, chábioye tmojanobeconá bachnangbe amëndayënga, ley abuátambayënga y chë judiëngbeñe bëtsëjemëngcá amëndayënga,

<sup>28</sup> y mëntšá tmojantjá: —¿Ndaye deréchoca chë contsama soyënga aca cojtsama ca? ¿Chca jtsamama nda obenana tcmënjatšeta ca?

<sup>29</sup> As Jesús tojanëyana: —Atšnaca sëntsebomna canÿe soye tšëngaftanga jatjayama. Chašmojojuase, átšnaca cchochjáuyana ndaye deréchoca atše chca stsama.

<sup>30</sup> ¿Nda Juan chë Ubayaná tbojanichmó entšanga jubáyama, Bëngbe Bëtsá o entšanga? Smëyana ca.

<sup>31</sup> Chora chënga tmojanontšé mëntšá enatsëtsnayana: “‘Bëngbe Bëtsá ca’ chamojojuase, cha šochanjáuyana: ‘As ¿ndáyeca chë cha tmojanabuayená soyënguiñe ndoñe šmonjanošbuaché ca?’

<sup>32</sup> Pero ndoñe quemuátobena jayanana ‘entšanga ca.’” Chca tmojánayana, er chënga entšangbiama imojánauatja, er nÿetscanga imojanjuabná, Juan ndegombre Bëngbe Bëtsabe juabna oyebuambnayá yojamnama.

<sup>33</sup> Chcasna, chënga tmojanjuá: —Bënga ndoñe queftsátstatšëmbo ca.

Y Jesús tojanëyana: —As atše cach ndoñe quechocatéyana ndaye deréchoca atše chca stsama ca.

## 12

### *Chë puerta bacna trabájayëngbiama cuento*

(Mt 21.33-46; Lc 20.9-19)

<sup>1</sup> Chora Jesús tojanontšé cuentëngaca jabuátambana. Mëntšá tojanëyana: “Canÿe entšá bëtscá uvas betiyënga yojáje, y chë shëconana yojajëtja. Chë uvasëšangá juantsëtetjamna canÿe base luare yojajutjo; y canÿe tsbanana jebna soye yojapórma chiñe jtsashanÿama. Chentšana, inÿe trabájayënga chë jajañe yojúyentšame, y chana inÿe luaroye yojtsoñe.

<sup>2</sup> Chë uvasësangá juashacama tempo yojobuache orna, chë jajañe nduiño canýe oservená ibojíchmua chë arréndayënga jáuyanama ntsachetsá chë nduiño ibojtsotocánama.

<sup>3</sup> Pero chëngna, cha imojishache, imojtsejantsetaye, y ton-daye ntajatacá imojtichmuá.

<sup>4</sup> Chentšana, chë nduiño inýe oservená ibojíchmua; pero chana, bestsaše imojtselisia y podesca imojtsóyenguango.

<sup>5</sup> Chentšana inýa ibojatichmuá, y chana chë arréndayënga imojtsóba. Y bángnaca yojichamuá; pero chëngna, ínýengna imojtsajantsetaye y ínýengna imojtsëbaye.

<sup>6</sup> “Chë nduiño cabá canýa ibojtsábojamna jíchmuama: cachabe bonshana uaquiñá. Cabana, cha ibojíchmua y mëntsá yojtsejuabnaye: ‘Atsbe uaquiñá cocayé mochanjóyeunaye ca.’

<sup>7</sup> Pero chë arréndayënga cha imojinýe ora, imojeniyana: ‘Mua chë fshantse nduiñbe uaquiñá entsemna. Lempe chabe soyënga mua echanjóyëngacñe. Cuajna, motsóbangá, y lempe chabe otocana soyënga bëngbiama echanjoquéda ca.’

<sup>8</sup> Chcasna, cha imojishache, imojtsóba y chë uvas betiyënga jajañentsana más chcoye imojetsëtšena ca” —Jesús tojan-cuentá.

<sup>9</sup> Jesús chca jacuéntama tojanpochocá ora, tojánayana: “Y asna, ¿ndayá chë fshantse nduiño yochjama ca? Cha co echanjá y chë trabájayënga echanjetsëbaye, y inýe trabájayënga chë uvas betiyënga jajañe echanjárrendaye.

<sup>10</sup> “¿Tšëngaftanga ndocna te Bëngbe Bëtsabe uabemana palabra šmëndualía? Chiñe mëntsá endayana:

Chë yebna jebuanënga tmojtsanaboté ndëtšbé, mora chë más bëts uashacuanëšentše entsejájona.

<sup>11</sup> Chë soye Bëngbe Utabná, Bëngbe Bëtsá chca tojama, y bënga chama ojanánënga fsëntsemna ca.”

<sup>12</sup> Chora, chë bachnangbe amëndayënga y chë bëtsëjemëngcá mándayënga tmojánbošena Jesús jishachana, er chënga tmojanenótatsëmbona cha chca tojancuentá jinýanýiyama chënga mo chë puerta bacna trabájayëngcá imojanmënama. Pero entsangbiama imojtsauatja, chíyeca cachcá tmojanonýa y chentšana imojtsóñënga.

*Chë Romoca bëts mandadbiama impuesto jtsat-squëcjnayama*

*(Mt 22.15-22; Lc 20.20-26)*

<sup>13</sup> Chentšana chënga, básefta fariseunga y Heródesbe ústonënga Jesúsbioye tmojanichamó, ndayá cha tojayaniñe jisháchichiyama, as chca jtsebomnama ndaye sóyeca mandadëngbeñe cha mal jaquédana.

<sup>14</sup> Chënga tmojána y Jesús tmojaniyana: —Buatëmbayá, bënga fsëndëtatsëmbo aca ndegombre soyënga cnetsabuátambama,

y ndoñe jatuenanana n̄ye ntšamo entšanga tmojatichamcá, er achiamo tondaye quenatámána nda más uamaná o nduamaná tomnana; y contsabuatambá ndegombre tšabe vida jtsebomnama, ntšamo Bēngbe Bētsá yomandacá. Chcasna, ¿tšabá tanántsemana, César, chē Romoca bēts mandadbiama bēnga impuesto jtsatsquēcjnayana? ¿Fchtsatsquēcjnaye o ndoñe ca? —chēnga tmojantjá.

<sup>15</sup> Jesús yojtsetátšēmo, chēnga bacna entšanga ntšamo ndegombre tmojuabnacá ndin̄in̄yayēnga imojamna; chíyeca tojanēyana: —¿Ndáyeca tšēngaftanga šmojtseboše chē sóyeca atše jisháchichiyama? Can̄ye denario crocénana šmiyēboñe, atše chayobená jin̄yama ca.

<sup>16</sup> As can̄ye crocénana tmojanoyé y Jesús tojanēyana: —¿Ndabe jubiá quem crocenániñe yojtsemna, y ntšamo muentše entsabemancá nda chca iuabaina ca?

Y chēnga tmojanjuá: —Césarbe jubiá; cha chca enduabaina ca.

<sup>17</sup> Chora Jesús tojanēyana: —Chcasna, César šmochtoyiye cha ibotocana soye; y Bēngbe Bētsana cha ibotocana soye ca.

Y n̄yetscanga chama imojenjaná.

*Obanēnga jtayenama Jesús tmojantjá*  
(Mt 22.23-33; Lc 20.27-40)

<sup>18</sup> Chentšana, báseftanga saduceo ca uabaina entšanga tmojána Jesús jin̄yama. Chēnga imojanjuabná obanēnga ndocna te ntayenana ca. Chíyeca, Jesús mēntsá tmojanianana:

<sup>19</sup> —Buatēmbayá, Moisés tojēftsanabema, nderado can̄ye boyá tojóbana y básenga ndoñe tonjēftsabáshejuanēsna, canmēna chē uabentsá chē shēmaftaca jtobouamayana, chca, chabe uabochená obanabiama básenga jtsabamnana ca.

<sup>20</sup> Y chcase, can̄ye, can̄ysēfta catšátanga monjamna. Chē natsaná tonjanobouamá y tontsanóbana básenga ntjēftsabashejuancá.

<sup>21</sup> Chentšana, chē ústona uabentsá chē shēmaftaca tonjanobouamá, pero chana tontsanóbana, básenga ntjēftsabashejuancá; chē in̄ye uabentsáftaca cachcá tonjanopasá.

<sup>22</sup> Chca, n̄yetsca can̄ysēfta catšátangaftaca cha tonjanobouamá, pero ndocná básenga ntjēftsabáshejuanana. Y chentšana chē shembásanaca tontsanóbana.

<sup>23</sup> Y morna, chē obanēnga chamojtayena ora, ¿ndabe chē can̄ysēfta catšatanguentšabe shema chē shembása yochtsemna, n̄yetscanga cháftaca tmojanobouamase ca? —chēnga tmojantjá.

<sup>24</sup> As Jesús tojanēyana: —Ntšamo Bēngbe Bētsabe uabemana palabrēnguñe endayancá ndoñe tmonjosertá, ni Bēngbe



Bëtsabe obenanama. Chíyeca ntšamo ndoñe yondmëncá šmontsichamo.

25 Er obanënga chamojtayena ora, ni boyabásenga ni shembásenga quemochatóbouamnaye, y chca, chënga mochántsemna mo celoca angelotemëngcá.

26 Y chë obanënga jtayenama, ¿Moisesbe librëšañe ndoñe šmëndualía ntšamo Bëngbe Bëtsá tbojaniyanama, chë betiyetema yojtšángbototjuana ora? Bëngbe Bëtsá mëntšá tbojaniyana: “Atše sëndmëna Abraham, Isaac y Jacobëbe Bëtsá ca.”

27 Bëngbe Bëtsá chca tojánayana ora, entsichamo cha ndoñe yondmëna obanëngbe Bëtsá, sinó aina entsangbe Bëtsá ca, er masque chënga tmojanóbana, chënga cabá Bëngbe Bëtsáftaca mondoyena. Tšëngaftanga canye ndoñe ndegombre soyiñe šmontsemna ca –tojanëyana.

*Chë más bëts uámana mando  
(Mt 22.34-40)*

28 Chentše yojtsemna canye ley abuatambayá. Cha yojouena ntšamo Jesús y chënga imojtsenatsëtsnayana, y yojtsetátšëmbo Jesús tšabá tojanëjuama. As, tojanobeconá y Jesúsbiye tbojantjá: –¿Ndayá chë más bëts uámana mando yomna ca?

29 Y Jesús tbojanjuá: –Chë más uámana mando mëntšá endmëna: “Israeloquënga šmochjouena, Utabná, Bëngbe Bëtsá endmëna, y nje canye Bëngbe Utabná endmëna, ndocná más.

30 Utabná Bëngbe Bëtsá cochtsebobonshana nyets acbe ainánaca, nyets espírituca, nyets juábnaca y nyets añémoca.”

31 Y chentšana quem inye mándnaca: “Ndëmua entšánaca cochtsebobonshana, ntšamo cach aca cuenobobonshancá.” Ndocna mando quem uta mandama más quenatámana ca – Jesús tojánayana.

32 Chora, chë ley abuatambayá Jesúsbiye tbojaniyana: –Buatëmbayá, puerte tšabá tcjayana. Ndegombre yomncá contsichamo, nje canye Utabná endmëna y ndocná más.

33 Y cha jtsebobonshánana nyets ainánaca, juábnaca y añémoca, y ndëmua entšánaca jtsebobonshánana cachá cuenobobonshancá, puerte cuámana. Cach nyetsá ndoñe quenatámana bayënga jtsëbánayana, ni chë uátšëmbona soyënga Bëngbe Bëtsá jëtschuayama ca.

34 Cha nyets juábnaca tbojanjuama Jesús tojáninje ora, tbojaniyana: –Batšatema cmontsebuáshbena jtseprontánama, Bëngbe Bëtsá chacolesenciama acbe ainanentše jtsemándayama ca.

Y chentšana, ya ndocná yonjenñëmua Jesús más jatstjanayama.

*¿Cristo ndabe entsábentšana yomna?*

*(Mt 22.41-46; Lc 20.41-44)*

<sup>35</sup> Jesús Bëngbe Bëtsabe bëts yebnentše yojsabuátambaye ora, tojánayana: “¿Ndáyeca chë ley abuátambayënga mondbétsichamo chë Uámana Uabuayaná Davidbentšana iuabó ca?

<sup>36</sup> Cach David, chë Uámana Espíritbe mándoca mëntšá tojánayana:

Bëngbe Bëtsá, atšbe Uabná Crístbioye tbonjaniana:

atšbe catšbioica mótbema,

atšbe obenánaca, acbe uayayënga acbe cucuatšinë chamo-  
quedama chjamëntscuana ca.

<sup>37</sup> ¿Ntšámose Cristo Davidbentšana Entšá nántsemna, cach David ‘Uabná ca’ chábioye tbojsabobuátmëse ca?” —cha tojanéyana.

Y chë bëtská entsanga, oyejuayënga imojtsuenana.

*Jesús chë ley abuátambayëngbiama tojánayana, chënga ndoñe tsabá montsama ca*

*(Mt 23.1-36; Lc 11.37-54; 20.45-47)*

<sup>38</sup> Mëntšánaca Jesús chënga yojsabuátambaye: “Cuedado šmochtsebonna y ndoñe šmattsama chë ley abuatambayëngcá. Chënga jtsogusetánana bënëna entsayangaca jtsajnana y jtsebošana tsáshenañe entsanga nÿa respétoca chamotsacheuanama.

<sup>39</sup> Chë judiëngbe enefjuana yebnënguenache, chë más uámana luarënguiñe jtsetbiámanana, y chë fiestënguenache nÿa quëfseroca.

<sup>40</sup> Pero chënga, viudángbioye chë tmobomna soyënga jtsabacayana, y entsangbe delante tsabá chamotsënyama, y chëngbioye imojtsaíngñama ndoñe chaondëtsótatsëmbuamna, Bëngbe Bëtsáftaca tša jtsencuëntayana. Chë causa, Bëngbe Bëtsá ínÿengbiama más chënga echanjácastigaye ca” —Jesús tojánayana.

*Jesús yojsënyaye chë crocénana quëcnyayënga*

*(Lc 21.1-4)*

<sup>41</sup> Jesús jabuátambama tojanpochocá ora, tojanótbema Bëngbe Bëtsabe bëts yebnentše, chë crocénana quëcnyayëtema ndirichiñe; y chë crocénana quëcnyayënga yojsënyaye. Bëtská bomnëngna becá crocénana imojtsequëcnyaye.

<sup>42</sup> Chora, canÿe viudá ndbomnëjémnaca vojobeconá y nÿe uta crocénana chëtëmiñe yojaftsesegóra.

<sup>43</sup> Chora Jesús chabe uatsjëndayënga tojánachembo chamobéconama, y mëntšá tojanéyana: “Ndegombre cbëyana, quem viudá ndbomnëjema, Bëngbe Bëtsabiama nÿetscangbiama más tonjëftsesegóra.

44 Chë bomnëngna chë yojtsóyentsjamentšana tmonjëftsesegorá, y cabá bomnana imotsóbomñe; y chë viudana tonjëftsesegorá lempe ntsachetšá yobomncá; masque tša ndbomñjema, chë vida jtsebomnama lempe ntsachetšá yobomncá tonjëftsesegorá ca.”

## 13

*Jesús tojánayana chë Bëngbe Bëtsabe bëts yebna lempe mochjánpochocama*

(Mt 24.1-2; Lc 21.5-6)

<sup>1</sup> Jesús Bëngbe Bëtsabe bëts yebnentsšana tojëftsanbocna ora, canye chabe uatsjendayá tbojanianyana: —Buatëmbayá, minye, jtša bëts ndëtšbenga, y tša botamana bëts yebnënga ca!

<sup>2</sup> Chora Jesús tbojanianyana: —Tšabá cochjinye tša botamana bëts yebnënga. Pero muentše ndoñe queochaisoquéda ni mo canye ndëtšbé inyebé juatsboye. Lempe mochantsepochóca ca.

*Ntšamo yochtsemna quem luare jopochócoma te chaojt-sobeco ora*

(Mt 24.3-28; Lc 21.7-24; 17.22-24)

<sup>3</sup> Chentsšana, Olivos tjashoye chënga tmojána. Bëngbe Bëtsabe bëts yebnentsša ndirichiñe yojamna; y Jesús tojanótbema ora, Pedro, Santiago, Juan y Andrés iytëcana tmojantjá,

<sup>4</sup> ntšamo cha tojanayancá ntseco yochjanopásama, y chca jopásama ya tojtsobecuama entsanga chamotsetatšëmbuama, ndayá Bëngbe Bëtsá yochjanma ca.

<sup>5</sup> Chora Jesús tojanjúa: “Cuedado šmochtsebomna ndocná chacmondáingñema.

<sup>6</sup> Banga mochanjabo y mochantsabíchamo chënga Jesús imomna ca. Mochántsihomo: ‘Atše chë Cristo sëndmëna ca’, y chca, ba entsanga mochanjáingñaye.

<sup>7</sup> “Entsanga tmojtsentsjanama y nderado mochjentsjámnaca tšëngaftanga chašmojouena ora, ndoñe šmattsauatja; er chca chaochnënguama entsemna, pero masque chca, chora chë quem luare jopochócoma tempo cabá ndoñe queochátmëna.

<sup>8</sup> Canye luarentša entsanga inye luaroca entšàngaftaca mochántsihomo, y canye amëndayábentsha entsanga inye amëndayábioca entšàngaftácnaca; ba luarënguenache fshantse echanjuangmëmmana y bëts shëntsana echanjóshjango. Masque chca jasúfriase, más chcoye cabá más mochanjatsúfria.

<sup>9</sup> “Pero tšëngaftangna cach tšëngaftangbiana šmochtsantješna; entsanga cmochanjishëche y amëndayëngbe cucuatšiñe cmochanjábashejuana, judiëngbe enefjuana yebnënguenache cmochanjátsetšenaye. Atšbe

ústonënga bétsemna causa, mandadëngbioye y reyëngbioye cmochanjunatse, choca, chëngbe delante ntšamo atšbiana šmotatšëmbcá chašmuayanama.

<sup>10</sup> Er entseyta, quem luare cabá ndopochóca ora, Bëngbe Bëtsabe tšabe noticiënga nyetsca luarënguentša entšángbioye chaóshjanguama.

<sup>11</sup> Y ínÿengbe cucuatšinë jabáshejuanama chacmojtsënachá ora, ndoñe šmattsenócochinÿena ntšamo chora šmochjayanama. Chora šmochjayana ntšamo Bëngbe Bëtsá yochjamcá tšëngaftanga chašmuayanama, er tšëngaftanga cánÿenga ndoñe chora quešmochátoyebuambnaye, ndayá chë Uámana Espíritu tšëngaftangbiajana echantsóyebuambnaye.

<sup>12</sup> “Canÿe catšata cachabe catšata ínÿengbe cucuatšinë bochanjáboshjona chamotsóbama, y bëtšetsanga cachëngbe básenga mochanjábashjuana chamotsëbáyama; y chë básengna chëngbe bëtšetsangbe contra mochántsemna y chamotsëbáyama mochanjábashjuana.

<sup>13</sup> Atšbe ústonënga bétsemna causa, nyetsca luarënguentša entsanga cmochantsëbuayënja; pero nda nyets tempo átšbeñe ošbuachiyá totsomñe, atsbocaná echántsemna.

<sup>14</sup> “Chë Bëngbe Bëtsabe juabna oyebuambnayá Daniel, chë puerte uabouana soye quem luare jopochócama tojéftsanabema. Chë puerte uabouana soye, chca jtsemnama ínÿoca tšëngaftanga chašmojinÿe ora (nda tojtsalía, chabosertá), šmochántsetatšëmbo chë puerte ngménana tempo tojóshjanguama; chorna, chë Judeoca chamojtsemna entsanga, batsjabengoye chamotsacheta;

<sup>15</sup> chama, nda cachabe yebnentša tsbanánoca chaojtsemna, chocana ndoñe chaondétastjango, ni chaondétamashëngo tsoicana ndayá jesábocnama;

<sup>16</sup> y nda jajoca chaojtsemna, yebnoye ndoñe chaondëta ni mo chabe quëfsaíya jesácñama.

<sup>17</sup> ¡Tša lastema chë tempo ngomámanënga o ochóchaye šësonga chamojtsabamna shembásengbiana!

<sup>18</sup> Bëngbe Bëtsá šmochtseimpadana chë ngménana tempo ndoñe chaondóshjango uaftena tempo ora,

<sup>19</sup> er chora puerte ngmenancá echántsemna. Tša jabuache ngmenancá, quem luare jobojátšama orscana y mentscoñama y más chcoye, cachcá ngménana ndoñe ntjamnana.

<sup>20</sup> Chë puerte ngménana tempo, yapa bën ndoñe chaondëtsemnama Bëngbe Bëtsá ndoñe tonjalesenciase, ndocná quentatsbocá; pero cha, chabe ubuáyanënga, chabe bocacánënga corente endábabuanÿeshanayeca, echanjama yapa bën tempo ndoñe chaondëtsemnama.

21 “Chora nderado nda chacmojáuyana: ‘Minÿe, muentše chë Cristo entsemna’, o ‘Choca cha entsemna ca’, chë soyëngama ndoñe šmattsayaunana.

22 Er mochanjábocana ndoñe ndegombre uámana ubuáyanënga, chënga Cristo imomna ca jtsichámëse, y Bëngbe Bëtsabe ndoñe ndegombre juabna oyebuambnayëngnaca; y chënga mochanjama bëts soyënga chëngbe obenana jinÿanÿiyama, entšanga jáingñama, y tmojobenase, chë Bëngbe Bëtsabe bocacánëngnaca.

23 ¡Cuedado šmochtsebmna! Cabá chca ndochnëngo ora, lempe tcbonjabuayená ca” —Jesús tojanëyana.

*Bëngbe Bëtsá Entšá tbojanbemá quem luaroye echanjésabo  
(Mt 24.29-44; Lc 21.25-36)*

24 Mëntsánaca Jesús tojanëyana: “Pero chë tempo, entšanga puerte chamojasufrí chentšana, shinÿe ndoñe queochátsbuashinÿinÿana, juashcona ndoñe queochátsbinÿnaye,

25 celocana estrellënga echanjatquécjana, y quem luarentša tsbanánoca espíritënga obenana bomnënga echanjángmëmana.

26 Y chora, entšanga mochanjinÿe, Bëngbe Bëtsá Entšá tbojanbemá jantšetëshiñe echántsaboye, corente obenánaca y corente buashinÿinÿaniñe.

27 Chora cha chabe angelënga echanjámëndaye chë Bëngbe Bëtsabe ubuáyanënga júbuajama, nyets luarëngocana, quem fshantsoca cánÿoica juachoicana, celoca inÿoica juachóntscoñe.

28 “Chë higo betiyama šmochjuatsjinÿe: Tsëm buacuafjënga tojtsebmna ora y tojtsaisëjotsana, jtsotatsëmbuana chë tsabe tempo ya tojtsaisobecuama.

29 Cachcá, chë soyënga ndayama tsëngaftanga tcbonjauyancá chašmojinÿe ora, šmochántsetatsëmbo Bëngbe Bëtsá Entšá tbojanbemá ya jésabama yojtsemnama.

30 Ndegombre cbëyana, lempe chca echanjochnëngo, morsca entšanga cabá ndóbana ora.

31 Celoca y quem luare echanjopochóca, pero atšbe palabra ndocna te queochaisopochóca.

32 “Pero Bëngbe Bëtsá Entšá tbojanbemá ndayté y ntseco ora yochjésabama, ndocná quenátstatsëmbo, ni chë celoca angelënga, ni Bëngbe Bëtsabe Uaquiñá. Nÿe chë Taitá chama yotátšëmbo.

33 “Chíyeca, cuedado šmochtsebmna y yejuana šmochtsantješna, er ndoñe quešmátstatsëmbo mocna ora yochtsemna Bëngbe Bëtsá Entšá tbojanbemá jésabama tempo.

34 Echántsemna mo canÿe entšacá; chana inÿe luaroye ya jëftsebmocna ora, chabe oservënënga jëftsamëndana

chabe yebna chamotsinjenama. Cada ona canje trabajo jëftsebónjijana, y chë shanjá jëftsemándana botamana chaotsantješnama.

<sup>35</sup> Chcasna, cuedado šmochtsebomna, šmochtsantješna, er ntšamo chë trabajayëngcá chë yebna nduiño ntseco jtashjanguama, ndoñe ntsetatšëmbuana, mo nderado jétatana, tséntseto ora, binjanoye o cachëse, tšëngaftanga cachcá, Bëngbe Bëtsá Entšá tbojanbemá ntseco jésabama ndoñe quešmátstatšëmbo;

<sup>36</sup> ndoñe cuedado šmontsebomnëse, nderado cha nje ndeolpe nántashjango, tšëngaftanga ndëprontánënga šmojtsemna ora, mo ftsomañe cuenta.

<sup>37</sup> Chíyeca, ntšamo tšëngaftanga cbochanjauyancá, nyetscanga chanjáuyana: ¡Puerte cuedado šmochtsebomna ca!” —Jesús tojánayana.

## 14

*Entšanga imojtsejuabnaye ntšamo jamëse Jesús jishachama (Mt 26.1-5; Lc 22.1-2; Jn 11.45-53)*

<sup>1</sup> Bashco fiestama uta te yojetsájamna, chë Bëngbe Bëtsá Egiptocana judiëngbe bëts taitanga tojánatsebacama jtenójuaboyama fiesta, chë levadúraca ndëpormana tandëse sayora. Chë judiëngbe bachnangbe amëndayënga y chë ley abuátambayënga imojtsenguaye ntšamo Jesús jishachana jtseíngñase, y jtsóbama.

<sup>2</sup> Báseftanga imojtsichamo: “Quem fiestëntscuana ndoñe, er nderado entšanga yapa muanjóntša enbouenanana ca.”

*Canje shembása botamana uanguëtse béjaye Jesusbe bestšašiñe tbojanbuešcja (Mt 26.6-13; Jn 12.1-8)*

<sup>3</sup> Jesús Betanioca yojtsemna, Simón chë bacna nguayanánaca šocá ca uabobuatmabe yebnentše; mesëshentše Jesús yojtsemna ora, canje shembása tojánashjango. Chë shembása yojúshjango canje alabastro jarrëtema jútjena canje becá uámana y botamana uanguëtse béjayeca, ena nardana uanguëtšiye; chana chë jarrëtema yojátsba y chë béjaye Jesusbe bestšašiñe tbojanbuešcja.

<sup>4</sup> Chca tmojáninje ora, báseftanga chentše imojtsemnënga tmojanotjayaná y mëntsá imojtsenatsëtsnaye: —¿Ndáyeca nje bonamente chë soye yojtsemna ca?

<sup>5</sup> Chamna, matmënjobenanga chë béjaye unga patse denario crocánama juiyana, y chánaca ndbomnëjëmënga matmënjújabuache ca.

Y chë shembásabiama podesca imojtsichamo.

<sup>6</sup> Chora Jesús tojanéyana: —¿Ndáyeca quem shembása ndoñe cachcá šmochanjonýaye ca? ¡Ndocá matatsana! Atšbiamá tšabe soye tonjama.

<sup>7</sup> Er ndbomnjémēnga nyets tempo tšēngaftangbeñe mochanjēftsemna, ndayténaca šmojábošena ora, šmatjobenaye tšabe soye chēngbiamá jamana; er atše tšēngaftangaftaca ndoñe nyets tempo quichásemna.

<sup>8</sup> Quem shembása lempe ntšamo tojobenacá atšbiamá tonjama. Chca tonjama ora, atšbe cuerpo tonjaprontá atše juatbontsa tescama, cabá ndoñe obaná sēntsemna ora.

<sup>9</sup> Ndegombre cbéyana, quem luaroca ndayéntsñaca Bēngbe Bētsabe noticiēnga chamojtsabuayiyá chentše, ntšamo quem shembása tojamámñaca becá mochanjēftsóyebuambaye, chca, entšanga chabiamá chamotsenójuabnama ca —cha tojanéyana.

*Judas tojána bachnangbe amēndayēngbiöye, Jesús chamuishachama*  
(Mt 26.14-16; Lc 22.3-6)

<sup>10</sup> Chentšana, Judas Iscariote, canýe chē bnētsana uta uatsjēndayēnguentšá, tojána chē bachnangbe amēndayēngaftaca jencuéntama, Jesús chēngbe cucuatšiñe jaboshjonama.

<sup>11</sup> Chca tmojanuena ora, chēnga imojóyejuaye y tmojanšbuachená crocénana jtabuénayana. Y cach orscana Judas yojtsenguaye ntšamo jamana y ndēmua ora, Jesús chēngbe cucuatšiñe jaboshjonana.

*Jesús chabe uatsjēndayēngaftaca Bashco saná tojanse*  
(Mt 26.17-29; Lc 22.7-23; Jn 13.21-30; 1 Co 11.23-26)

<sup>12</sup> Chē Bashco fiesta bojatšenté, chē levadúraca ndēpormana tandēse sayté, chē uatsjēndayēnga Jesús tmojantjá: —¿Ndēmoca cojtseboše bēnga fchaiprontama, Bashco saná chacosama ca?

Chca te chē judiēnga imojanamana, Bēngbe Bētsá jētschuayamna canýe oveshá jóbana chora jasama, chē Egiptocana chēngbe bēts taitanga Bēngbe Bētsá tojánatsebacama jtenójuaboyama.

<sup>13</sup> As Jesús uta chabe uatsjēndayata tojanichamó y mēntšá tojanéyana: —Chē bēts puebloye motsata. Chašojáshjango ora, canýe bacó cmochanjóbiatše, matbajiñe búyeshe echantsabuyambaye; cha šochjuasto y šochtserreparana ndēmuanýe yebnentše yochjámashēnguama;

<sup>14</sup> y chē yebna nduiño šochjauyana: “Buatēmbayá tonjayana: ¿Ndayentše chē tsañe yojtsemna, Bashco saná atše atšbe uatsjēndayēngaftaca jasama ca?”

15 As cha cmochanjínÿanÿiye canÿe bëts tsañe, tsbanana pisoca, lempe prontániñe; chentše šochjaprónta bënga mochjasama ca.

16 As chë uatsjéndayata tbojána y tbojáninÿena lempe ntšamo Jesús tojanëyancá; y chentše chë Bashco saná tbojanprontata.

17 Tojanibétata ora, Jesús chë yebnoca tojánashjango, chabe bnëtsana uta uatsjéndayëngaftaca.

18 Y mesëshentše imojtsesaye ora, Jesús tojanëyana: — Ndegombre cbëyana, canÿa tšëngaftanguentsá, átšeftaca entsesá cha, uayayëngbe cucuatšíñe šochanjáboshjona ca.

19 Chorna chë uatsjéndayënga ngménaca imojtsemna, y tmojanontšé canÿánÿa cha jatjayana: —¿Atše chtsemna ca?

20 Y Jesús tojanëjua: —Canÿa chë bnëtsana utatentsá entsemna. Chabe tandëse cach atše sëntsefchecuacná šcnenentše cha entsefchecuacná.

21 Ndegombre, Bëngbe Bëtsá Entšá tbojanbemáftaca echanjopása ntšamo chabiamá Bëngbe Bëtsabe uabemana palabrénguiñe endayancá. Pero, jtša lastema chë bochjáboshjonabiamá! Chabiamá más tšabá manjamna ndoñe ntjónÿnana ca —Jesús tojánayana.

22 Imojtsesantscuana, tandëse tojanca, Bëngbe Bëtsábioye chama tbojtanchuá, tojanjataye y chabe uatsjéndayënga tojanëjatá, y mëntsá tojánayana: “Mocñënga, mosënga, atšbe cuerpo entsemna ca.”

23 Chentšana, canÿe coptema vínoyeca tojanaca, Bëngbe Bëtsábioye tbojtanchuá, chabe uatsjéndayënga tojanëfsašé, y nÿetscanga tmojanofšé.

24 Mëntsá tojánayana: “Quem vínoye atšbe buiñe entsemna. Atšbe buiñe echanjuábuashana entsanga chamotsetatšëmbuama ntšamo Bëngbe Bëtsá entsanga tojašebuachenacá ndegombre yochjochnënguama. Chë buiñe bëtská entsangbe tšabiamá echanjuábuashana.

25 Y ndegombre cbëyana, morscana ya ndoñe más chë uvasëšentsana obocniye quichaisofšiyë. Chë tsëm vínoye tšëngaftangaftaca chanjofšiyë, Bëngbe Bëtsabe amëndayoca chamojtsemna ora ca” —tojánayana.

*Jesús tojánayana, chábioye ndoñe bonjanabuátma ca Pedro yochjánayanama*

*(Mt 26.30-35; Lc 22.31-34; Jn 13.36-38)*

26 Bëngbe Bëtsábioye jëtschuayama tmojancantá chentšana, Olivos tjashoye tmojëftsanbocana.

27 Jesús tojanëyana: —Nÿetsca tšëngaftanga quem ibeta átšbeñe ošbuáchiyana šmochantsobuetše y šmochántsacheta, er Bëngbe Bëtsabe uabemana palabrénguiñe, cha mëntsá tojánayana: “Chë oveshënga abujënÿa chanjóba y chë



oveshënga mochantsáshana ca.” Chca tšëngaftangaftaca echanjopása, uayayënga chašmojishache ora.

<sup>28</sup> Pero obanënguentsana chaitayenentsana, tšëngaftangbe natsana Galileoye chanjá ca —cha tojanëyana.

<sup>29</sup> Chora Pedro tbojaniyana: —Masque nÿetscanga ácebeñe ošbuáchiyana chamotsobuetše y chamotsacheta, atše nÿa ndocna te ca.

<sup>30</sup> Chora Jesús tbojaniyana: —Ndegombre cbëyana, cam ibeta, ngallo cabá uta soye ndécánta ora, aca unga soye cochanjaryana ndoñe šconduabuatma ca.

<sup>31</sup> Pero Pedro más yojtsichamo: —Masque chašotsemna ácaftaca jóbanama, atše ndoñe quichátayana ndoñe cbonduabu-atma ca.

Y nÿetscanga cachcá imojtsichamo.

*Getsemaní luarentše Jesús, Bëngbe Bëtsáftaca tbojanencuentá (Mt 26.36-46; Lc 22.39-46)*

<sup>32</sup> Chentsana, canÿe luare Getsemaní ca uabáinoye tmojána. Chocna Jesús tojanëyana: “Muentše motbiamá, chëntscuana atše choye chanjá, Bëngbe Bëtsáftaca jencuéntama ca.”

<sup>33</sup> Y tojëftsanëbiatše Pedro, Santiago y Juan. Choca cha yojóntša puerte ngménaca jtsemnama y corente cocht-setšenaná.

<sup>34</sup> Chëngbiyoye tojanëyana: “Atšbe ainana puerte ngménaca entsemna, mo jobanamcá. Muentše moquedanga y šmochtsefšna ca.”

<sup>35</sup> Chentsana, Jesús más natsanoye tojána, tojanoshëntsamentšé y fshantsóntscoca tojanotsejbéna y Bëngbe Bëtsábioyoye tbojanimpadá, jopódianëse, chë tša japadésa ora ndoñe chaondóshjanguama.

<sup>36</sup> Mëntšá yojtsichamo: “Atšbe Taitá, aca lempe jamama condobena; tojopodese, cochjama atše japadésama ndoñe chašondëtsemnama. Pero ntšamo atše stsebošcá ndoñe chaondëtsemna, sinó ntšamo aca cojtsebošcá ca.”

<sup>37</sup> Chentsana, chabe unga uatsjéndayëngbiyoye tojtano, y chëngna imnétsomañe. Chca tojánanÿena ora, Pédrëbiyoye tbojaniyana: “Simón, ¿cotsomañe? ¿Ni mo nÿe canÿe hora jtsefšnama ndoñe tconjobená?”

<sup>38</sup> Smochtsefšna y Bëngbe Bëtsáftaca šmochtsencuéntaye, bacna soye jamama ndoñe chacmondócochënguama. Tšëngaftanga ndegombre šmontseboše espíritoca Bëngbe Bëtsá joyeunayana, pero cuerpiñe ndoñe añemo quešmátsbomna ca.”

<sup>39</sup> Jesús cachiñe tojesaná y Bëngbe Bëtsáftaca tbojanencuentá, cach palabrénga jayanëse.

40 Yojtabo orna, chë uatsjédayënga cachiñe immétsomañe; chënga imojtsefshétana ocnae causa, y ndoñe imontsobena ntšamo jojuana.

41 Chentšana, tojtesaná y tojtanabo ora tojanëyana: “¿Cabá šmotsomañe y šmotsचना? Nye nyetsá; hora tocjobuache, Bëngbe Bëtsá Entšá tbojanbemá bacna soye amëngbe cucuatsiñe mochanjáboshjona.

42 Motsbananga, cuajna. Minyënga, atše boshjuaná ya entsebeconá ca.”

*Uayayënga Jesús tmojánishache*

*(Mt 26.47-56; Lc 22.47-53; Jn 18.2-11)*

43 Jesús cabá yojtsóyebuambnantscuana, Judas, canye chë bnëtsana uta uatsjendayënguentsá, tojánashjango y cháftaca ba entšanga espadëjangaca y ngarotbéngaca prontánënga. Chënga imojamna chë bachnangbe amëndayënga, ley abuátambayënga y judiëngbeñe bëtsëjemëngcá mándayëngbe ichmónënga.

44 Judas, chë boshjuaná, tojanjuabó ntšamo jamana entšanga jinyanjyama ndëmua Jesús bëtsemnana. Chiyeca, yojáuyana: “Nda chajauámocho, cha echántsemna; šmochjishache y cuedádoca šmochjuánatse ca.”

45 Chcasna, Judas Jesúsbioye tojanobeconá y tbojanianyana: “¡Buatëmbayá ca!”

Y tbojanámocho.

46 Chora chë entšanga tmojánishache y tmojanánatse.

47 Pero canya chentše Jesúsftaca yojtsemná, chabe espadëja yojenosëngbotëntšena, y chë bachnangbe más uámana amëndayabe oservená canye matscuaše tbojtsanëštjango.

48 Y Jesús chë entšanga tojanatjá: “¿Ndáyeca šmojabo espadëjangaca y ngarotbéngaca atše jishachama, mo atše canye bacá uamana entšá cuaftsemncá ca?”

49 Atše cada te tšëngaftangbeñe sëndëtsemna Bëngbe Bëtsabe bëts yebnoca abuátambaye, y ndocna te chocha chešmátanishache. Pero tšëngaftanga chca átšeftaca šmontsama, cachcá ntšamo Bëngbe Bëtsabe uabemana palabrënguiñe endayancá chaotsemnama ca” —tojánayana.

50 Chorna, nyetsca uatsjédayënga tmojtsanëuatjaná y tmojtsanacheta, y Jesús cachcá chë uayayëngaftaca tmojesanonjá.

51 Canye bobontse Jesúsbioye ibojtsëstona, nye canye uafjantse entšëjua uichëtjoná. Cha chë entšanga tmojánishache,

52 pero chëngbe cucuatsiñe chë entšëjua jesáboshjonëse, chë bobontsna enašá yojtsachá.

*Jesús tmojanánatse chë judiëngbe uámana amëndayëngbioye*

*(Mt 26.57-68; Lc 22.54-55, 63-71; Jn 18.12-14, 19-24)*

53 Chentšana, Jesús tmojanánatse chë bachnangbe más uámana amëndayábioye; y chocna, nýetsca chë bachnangbe amëndayënga, bëtsëjemëngcá amëndayënga y ley abuátambayënga tmojánenefjna.

54 Pedro bënocana Jesús tbojanasto, chë bachnangbe más uámana amëndayabe yebnentša chashjóntscoñe; y chentše tojanoquedá. Chë Bëngbe Bëtsabe bëts yebnoca josticiëngaftaca yojtsetbemana; iñe juachaca yojtsešbonena.

55 Chë bachnangbe amëndayënga y chë judiëngbe uámana mándayënga imojtsenguaye canya, nda ndayánaca Jesusbe contra cháuayana, as jobenayama cha chaóbana ca jayanama; pero ndoñe montsaninýana.

56 Er masque banga Jesusbe contra uayátsenaye soyënga imojtsichamo, nýetscanga ndoñe cachca soye montsanichamo.

57 Báseftanga imojtsaye y mëntšá Jesusbe contra, ndoñe ndegombre betsemncá tmojánayana:

58 “Bënga cha fsënjoyeuná mëntšá: ‘Atše quem Bëngbe Bëtsabe bëts yebna, entšangbe pormana yebna, chantsepochóca; y unga tese inye Bëngbe Bëtsabe bëts yebna, entšángbeyeca ndëpormana yebna chanjëtsjebo ca.’ ”

59 Pero masque chca imojtsichamo, nýetscanga ndoñe cachca soye montsanichamo.

60 Chorna, chë bachnangbe más uámana amëndayá yojotsbaná, nýetscangbe tsëntsaca yojtsaye, y Jesúsbioye tbojantjá: —¿Ndocá cochanjayana? ¿Ndayase yojtsemna chë acbe contra montsichamo soye ca?

61 Pero cha nýe iytëca yojtsemna y ndocá ibontsëjuana. Chë bachnangbe más uámana amëndayá cachiñe tbojtëtantjá, mëntšá: —¿Aca chë Cristo icomna, Bëngbe Bëtsá chë nda fsëndadoranabe Uaquiñá ca?

62 Y Jesús tbojanjuá: —Arseñor, atše cha sëndmëna; y tšëngaftanga šmochanjinye, atše, Bëngbe Bëtsá Entšá tbojanbemá, chë nýets obenana bomnabe catsbioica chantsetbemana, y celoca jantšetëshiñe chántsaboye ca.

63 Chora, chë bachnangbe más uámana amëndayá chabe uichëtjonëjuangá yojtsenántšajatanëca, puerte ibojtsetna causa, y tojánayana: —¿Ndayama más entšanga šochjátëjajoboto Jesusbe contra chamuayanama ca?

64 Tšëngaftanga šmonjouena ntšamo chë entšá entsichamcá, y chca Bëngbe Bëtsabiana entsemna mo cha cuafjoyenguangcá, chë chabe Uaquiñá yomna ca cha tonjayana ora. ¿Ntšamo tšëngaftanga šmatjayana ca? —cha tojanëyana.

Y nýetscanga tmojánayana, cha ndegombre bacna soye yojtsebomna y jóbana ibojtsemna ca.

<sup>65</sup> Chorna báseftanga tmojanontsé Jesús buashëtjnayana; jubíá imojútsbotse, imojtsejantšetaye y imojtsetjanaye: “¡Momalisiá nda tcmējajantšetá ca!” Y chë Bëngbe Bëtsabe bëts yebnoca josticiëngna imojtsajuebiantšetaye.

*Pedro tojánayana Jesúsbioye ndoñe bonjanabuátma ca  
(Mt 26.69-75; Lc 22.56-62; Jn 18.15-18, 25-29)*

<sup>66</sup> Pédrëna, tsmanoca yojtsemna chashjoca. Chora, canÿe shembása, chë bachnangbe más uámana amëndayabe oservená yojáshjango;

<sup>67</sup> y Pédrëbioye tbojáninÿe ora, cha iñe juachaca yojtsanšbonena, yejuana ibojonÿinÿiye y tbojanianana: —Acnaca, Jesús Nazaretocáftaca conjánana ca.

<sup>68</sup> Pero Pedro tojánayana chábioye ndoñe bonjanabuátma ca; y mēntšá tojánayana: —Ndayama cojtsichámuama ndoñe quetsátstatšëmbo, ni quešnátësertana ca.

Y shjoye, amashjuanóntscoñe yojábocna; y chora canÿe ngallo yojacánta.

<sup>69</sup> Chë oservená cachiñe Pédrëbioye tbojáninÿe y tojanontsé chë ínÿenga jauyanana: —Muánaca Jesusbe uatsjendayënguentsá entsemna ca.

<sup>70</sup> Pero chana cachiñe tojánayana Jesúsbioye ndoñe bonjanabuátma ca. Chentšana, chë chentše imojtsemnënga Pedro tmojátaniana: —Ndegombre aca chënguentsá contsemna; ácnaca Galileocá contsemna ca.

<sup>71</sup> Pero Pedro tojanontsé ichámuana: —¡Bëngbe Bëtsá chašotsecastigá ndoñe ndegombre soye stsichámëse ca! — y yojóntša júrayana— ¡Atše chë entsá ndoñe quetsatabuatma, ndabiana tšëngaftanga šmontsatsëtsná ca!

<sup>72</sup> Y cachora chë ngallo uta soyama yojacánta, y Pedro yojenójuaboye ntšamo Jesús tbojanianama: “Ngallo cabá uta soye ndécánta ora, aca unga soye cochanjayana ndoñe šconduabuatma ca.” Y tojanontsé enóbošachiana.

## 15

*Jesús Pilátbioye tmojanánatse  
(Mt 27.1-2, 11-14; Lc 23.1-5; Jn 18.28-38)*

<sup>1</sup> Tojanbinÿna ora, chë bachnangbe amëndayënga, chë judiëngbeñe bëtsëjemëngcá amëndayënga y ley abuátambayënga cánÿentše tmojánenefjna, nÿetsca chë luarentša más uámana mandayëngaftaca, jenóyeunayama ntšamo jamëse Jesús jóbama. Jesús tmojanëcuébatsëca y tmojanánatse, y Pilato, chë Judeoca mandadbe cucuatšinë tmojánboshjona.

<sup>2</sup> Pilato Jesúsbioye tbojantjá: —¿Aca chë judiëngbe rey cojtsemna ca?

Y Jesús tbojanjuá: —Aíñe, aca ndegombre yomncá tcjayana ca.

<sup>3</sup> Chë bachnangbe amëndayënga bëtscá soyënga Jesusbe contra imojtsichamo;

<sup>4</sup> chíyeca Pilato cachiñe Jesúsbioye tbojantjá: —¿Ndocá scochanjojuá ca? Minÿe; bëtscá soyënga acbe contra montsichamo ca.

<sup>5</sup> Pero Jesús ndoñe más tbonjanjuá; chë causa, Pilato ndoñe yontsetátšëmbo ntšamo jajuaboyana.

*Jesús chaóbana ca tmojánayana*

*(Mt 27.15-31; Lc 23.13-25; Jn 18.38-19.16)*

<sup>6</sup> Cada Bashco fiesta ora, Pilato yojanamana canÿe utamená jëtsboshjonana, ndánaca entšanga tmojuabuayaná.

<sup>7</sup> Chë tempo yojamna canÿa Barrabás ca uabainá; cárceloye inautámena chabe enutëngaftaca. Chëngna entšanga tmojt-sanëbaye, mandadëngbe entšángaftaca imojentsjaná ora.

<sup>8</sup> Chora, entšanga tmojánashjajna y tmojanontsé Pilátbioye jauyanana, ntšamo Bashco fiesta ora jamama yojanamancá chaomama.

<sup>9</sup> Y Pilato tojanëjua: —¿Tšëngaftanga šmojtseboše tšëngaftangbe rey atše chjëtsboshjona ca?

<sup>10</sup> Chca tojánayana, er Pilato yojtsetátšëmbo, chë bachnangbe amëndayëngna envidia causa Jesús chabe cucuatšïñe tmojánboshjonama.

<sup>11</sup> Pero chë bachnangbe amëndayëngna entšanga tmojanañemó chamuenbouénanama, Pilato jauyanama chëngbiama Barrabás chabuatsboshjona ca.

<sup>12</sup> Y Pilato tojanatjá: —¿Y ntšamo chjama chë “judiëngbe Rey ca” šmonduabobuatmáftaca ca?

<sup>13</sup> Y chënga tmojanáyebuachena: —¡Motsecrucificá ca!

<sup>14</sup> Y Pilato entšanga tojanëyana: —¿Ndáyeca? ¿Ntšamo cha tojobuachjanguá ca?

Pero chëngna más añémoca tmojtëtanayebuachena: — ¡Motsecrucificá ca!

<sup>15</sup> As Pilato, entšángaftaca tšabá joquédama yojtsebóseyecna, Barrabás tbojtanboshjona. Yojámëndaye soldadënga jabuache Jesús chamotsetšenama; y chentšana soldadëngbe cucuatšïñe tbojánboshjona, chamocrucificama.

<sup>16</sup> Chentšana, chë soldadënga Jesús tmojanánatse chë mandadbe bëtš yebnentša chashjoye, y nÿetsca soldadënga tmojánachembo chamobéconama.

<sup>17</sup> Shbuenda uafjatsenga uinÿna entšayá mo reycá tmojanichëtjo; canÿe coronësha tmojanapormá uchmašëfjangaca y tmojanabestšajó.

<sup>18</sup> Y chentšana tmojanontsé jachuayana: “¡Bayté judiëngbe Rey cochtsemna ca!”

19 Canÿe niñěfjaca Jesús bestšašiñe imojtsětsjanjnaye, imojtsebuashětjnaye, y chabe delante imojtsofshěntsaměntšenaye.

20 Y chca innaftsáboyejuanentšana, chě shbuenda uafjat-senga entšayá tmojtsanabotsca y cachabe entšayá tmojtanichětjo, y pueblo chaboye tmojanánatse jacrucificama.

*Jesús tmojanancrucificá*

*(Mt 27.32-44; Lc 23.26-43; Jn 19.17-27)*

21 Chora, canÿe entšá chějana yojtsatashjajuana, Simón ca uabainá, Cirene pueblócá, Alejandro y Rufbe taitá; jajocana yojtsatachnějuana; y chě soldaděngna imojuatária Jesusbe cruz jěftsocutsayama.

22 Jesús tmojanánatse Gólgota ca uabaina luaroye (hebreo biyañe endayana “Obanabe Bestšashe Luare ca”);

23 y tmojanabuiyé vínoye míraca enájuañe, pero Jesús ndoñe yonjuáyěngacñe.

24 Y chentšana tmojanancrucificá; y chabe entšayangamna, tsbanánoye tmojanětšena jinÿama ndayá cada ona yochjěftsanácñama.

25 Cachěse, base mošenana ora Jesús tmojanancrucificá.

26 Y chabe bestšaše juatsboicna canÿe uabemana soye tmojananjo. Chiñe yojětsayana ndáyeca cha tmojanancrucificama, měntšá: MUA CHĚ JUDIĚNGBE REY ENDMĚNA ca.

27 Y cháftaca útata bacna soye ochhajnayátnaca tmojanancrucificá, canÿa chabe catšbioica, y ínÿana chabe uañicuayoica.

28 Chca cháftaca tmojanma, chaochněnguama ntšamo Běngbe Bětsabe uabemana palabrenguiñe chabiamana iuayancá, měntšá: “Y chábioye tmonjáninÿe mo chě puerte bacna soye aměnguentšá canÿa cuaftsemncá ca.”

29 Y chějana imojtsachnějuana entšanga, Jesús imojtsóyenguaye, imojtsobestšshanenaye y imojtsatsaye: “¡Aca chě Běngbe Bětsabe běts yebna cochtsánenasatajchca y nÿe unga tese cochtanjebo,

30 cach aca mentsbocá y cruzocana matastjango ca!”

31 Cachcá chě bachnangbe aměndayěnga y chě ley abuátambayěnga imojtsáboyejuana, y chěnga imojtsenatsětsnaye: “Chá ínÿenga tojěftsatsebacá, pero cachá jěntsbecama ndoñe quenátobena.

32 ¡Chě Cristo, chě Israeloca Rey! ¡Cruzocana chauatastjango, běnga jinÿama y chábeñe chaftsošbuachema ca!”

Y cháftaca ibojtsecrucificanátnaca ibojtsóyenguaye.

*Jesús tojanóbana*

*(Mt 27.45-56; Lc 23.44-49; Jn 19.28-30)*

33 Nÿetsto orscana y las tresěntscoñe, nÿets quem luare yojtseibétata.

34 Chca orna, Jesús chabe biyañe tojanáyebuachena: “Eloi, Eloi, ¿lema sabactani ca?” (Chca endayana “Atšbe Bětsá, atšbe Bětsá, ¿ndáyeca cachcá šcojonýa ca?”)

35 Chca tmojanuena ora, báseftanga chentše imojtsemnēnga imojtsichamo: “Mouenēnga, chē Bēngbe Bětsabe juabna oye-buambnayá Elías bontsechembuana ca.”

36 As chora, canya tojanótjajo, untja vínoyeca canye esponjēshe tojanfchecuacuá, canye niñēfjiñe tojananguēsētjo y Jesúsbioye tojanbeconá chaofšema; y tojánayana: “Cachcá mochjonýaye, er Elías tayochjabo jabátēstjanguama ca.”

37 Pero Jesusna, jabuache tojanoyó y tojanóbana.

38 Y chē Bēngbe Bětsabe bēts yebnocca yojújonýana entšējua tsēntsaca yojtsenájataye, tsbanánocana fshantsoye. Chējua bēnjua inauamna y chē tsatsēntsaca inaújonýana.

39 Chē romano soldadēngbe amēndayá, Jesusbe ndirichiñe yojtsemna; y ntšamo cha tojanobancá tbojáninýe ora, tojánayana: “¡Ndegombre quem boyabása Bēngbe Bětsabe Uaquiñá yomna ca!”

40 Básefta shembásengnaca chentše imojtsemna, bēnocana imojtserreparana; chēnguentše imojtsemna María Magdalena; María, Santiago chē más basa y Josebe mamá; y Salomé.

41 Chē shembásengna Jesús tmojanasto y tmojanájabuache cha Galileoca yojamna ora; y inýe ba shembásengnaca chentše imojtsemna, chē cháftaca Jerusalenoye tmojánanga.

### *Jesús tmojanatbontsá*

*(Mt 27.57-61; Lc 23.50-56; Jn 19.38-42)*

42 Chē yěfsana ochnayté yojtsémnayeca, cach te yojánamna saná japróntana chē yěfsana jasama. Ya yojtseibétatana ora,

43 Pilato yojtsemnoye tojána canye boyabása, José ca uabainá, Arimatea pueblócá; cha inamna canye chē luarentša uámana mandayēnguentšá. Cha Bēngbe Bětsábeñe yojtsošbuáchiye y yojanobátmana chabe amēndayana chaóshjanguama. Ndauatjca Pilátbioye Jesusbe cuerpo tbojanotjañe.

44 Pilato yojenjnaná Jesús tša betscó yojóbanama; as tojanmandá chē soldadēngbe amēndayá chamuachembo, jat-jayama Jesús ya bēn obaná tayojétsemnama.

45 Chē soldadēngbe amēndayana Pilátbioye ibojauyana Jesús ya obaná yojtsemna ca; y as chora, Josébioye tbojanlesenciá Jesusbe cuerpo chabotsámbañama.

46 Chora, José canye uafjantse lino entšējua tojanabuamé, Jesusbe cuerpo cruzocana tbojanéstjango, chē lino entšējuaca tbojanandmaná, y canye cuevēshiñe ndětsbeñe

pormánëshiñe tbojanjajó; chentšana canye ndëtšbé tojansjoná, y chë cuevēshoye amashjuanentše tojánachto.

<sup>47</sup> María Magdalena y María, chë José y Santiagbe mamá, tbojáninye ndayentše Jesusbe cuerpo tbojanjájoma.

## 16

*Jesús tojtanayena*

(Mt 28.1-10; Lc 24.1-12; Jn 20.1-10)

<sup>1</sup> Ochnayté tojanopasá ora, María Magdalena, María Santiagbe mamá, y Salomé, botamana uanguëtše bėjaye tmojanabuamé, chíyeca jama Jesusbe cuerpo janëtjuama;

<sup>2</sup> y tmenguse, chë semana bojatséntena, cabá cachëse, shinye yojábocna ora, chë cuevēshoye tmojána.

<sup>3</sup> Imojtsaye ora imojtsayénatsëtsnaye: “¿Chë cuevēshoye amashjuanentša ndëtšbé nda bochtsabuajuána ca?”

<sup>4</sup> Pero imojontješiyey ora, tmojáninye chë cuevēshoye amashjuanentša bëts ndëtšbé, chentšana juanániñe.

<sup>5</sup> As chënga choye tmojánamashjna y choye tmojáninye canye bobontse bën uafjantse entsëjua uichëtjoná, chë cuevēshentša catšbioica inétsotbemañe; y chë shembásenga imojouatjaná.

<sup>6</sup> Pero chë bobontse tojanëyana: “Ndoñe matauatjëngana; tšëngaftanga šmondënguá Jesús Nazaretocá, chë tmonjancrucificá cha. Cha ya tontayena; muentše ndoñe quenátsmëna. Minyënga cha enjëftsejajonentše.

<sup>7</sup> Motsajna, y Pedro y chë inye uatsjëndayënga šmochjáuyana: ‘Jesús tšëngaftangbe natsana Galileoye echanjá. Choca cha šmochanjinye, ntšamo cachá tmojanëyancá ca.’ ”

<sup>8</sup> As chë shembásenga betscó chë cuevēshentšana tmojésanbocana, er puerte auatjanánënga imojtsemna y ngmëmnyënga imojtsemna; y chë causa, chë soyama ndocná tmonjaniyana.

*Jesús, María Magdalénbioye tbojáneböcna*

(Jn 20.11-18)

<sup>9</sup> Jesús tojtanayenentšana, chë semana bojatsénté, Jesús natsana María Magdalénbioye tbojáneböcna. Tempo Jesús chábertšana canysëfta bacna bayëjënga tojtanëbuacana.

<sup>10</sup> Cha Jesúsbioye ainá tbojáninýentšana, tojána Jesúsëftaca imojánajnënga chama jaúnayama; chëngna ngmënaca y šachénaca imojtsemna.

<sup>11</sup> Pero chënga tmojanjuabó nderado mo ndoñe ndegombre yontsemna ca, chë Jesús ainá yojtsemna ca, y María Magdalena chábioye tbojáninye ca tmojanuena ora.

*Uta ustonata Jesúsbioye tbojáninye*

(Lc 24.13-35)



<sup>12</sup> Chentšana, uta ustonátbioye, básefta yebnënga yojamna luaroye ibojétsaye ora, Jesús tojánëbëbuacna, mo inÿa cuaftsemncá.

<sup>13</sup> Chora chata tbojésanshëcona chë ínÿenga chama jacúntama; pero chëngna cach ndoñe ndegombre ca tmojanjuabó.

*Jesús chë uatsjéndayënga tojanichamó, Bëngbe Bëtsabe soyëngama nÿetsquénache jábuayenama*

*(Mt 28.16-20; Lc 24.36-49; Jn 20.19-23)*

<sup>14</sup> Cabana, Jesús chë bnëtsana canÿe uatsjéndayënga tojánëbëbuacna, chënga imojtsesaye ora; y tojanëcácana chë cha ainá yojtsemnama ndoñe ndegombre yontsemna ca tmojánjuaboma y nÿets ainánaca chábeñe ndoñe montsanošbuachema, er cha ainá tmojáninÿënga chama tmojanacuntá ora, chca ndoñe ndegombre yontsemna ca chë uatsjéndayënga tmojánayana.

<sup>15</sup> Chentšana Jesús tojanëyana: “Nÿets luarëngoye motsajna, y nÿetsca entšanga chë tšabe noticiëngama šmochtsabuayiyaye.

<sup>16</sup> Nda chiñe chaojtsošbuaché y tšëngaftanga chašmojuabaye, cha atsbocaná echántsemna; pero nda ndoñe tontsošbuaché, cha nÿets tempo castiganá echántsemna.

<sup>17</sup> Chë átšbeñe ošbuáchiyënga ndegombre soyënga imojtsabuayiyama, entšanga mëntšá mochántsetatšëmbo: atše jótšëmbonëse, átšbeñe betsošbuachéyeca, entšángbentšana bacna bayëjëngbe juabna mochantábocna; tempo chënga ndmabiyañe mochantsóyebuambnaye.

<sup>18</sup> Masque nderado cucuatšiče mëtšcuayënga tmojishache o veneno tmojofšenga, ndocá quemochatšpása; y šoquëngbeñe cucuatšënga chamojacjá ora, chënga shnánënga mochántatsmëna ca” —Jesús tojanëyana.

*Jesús Bëngbe Bëtsábioye tojtana*

*(Lc 24.50-53)*

<sup>19</sup> Bëngbe Utabná Jesús jóyëbuambayama tojanpochocá chentšana, celoye cha tmojtanatsbaná, y uámana luarentše, Bëngbe Bëtsabe catšbioica yojtót'bema jtsemándayama.

<sup>20</sup> Y chë uatsjéndayëngna tmojánbocana y Bëngbe Bëtsabe soyëngama nÿetsquénache entšanga tmojanabuayená. Cach Bëngbe Utabná chënga yojanëjabuáchana, y yojánama entšanga chamotsetatšëmbuama chë buayenana soye ndegombre Bëngbe Bëtsabe soyënga bëtsemnama, chë uatsjéndayënga bëtš soyënga jamama obenana chamotsebomnama cha jtsamëse.

## San Lucas

### *Jabojátšama*

<sup>1</sup> Ba entšanga Jesusbe historia tmojuábema, ntšamo bēngbeñe ndegombre tojopasacá.

<sup>2</sup> Chē historia juabemamna, chēnga tmojanuena ntšamo Jesusbe uatsjéndayēnga y inye entšanga chabiamna imnencuentaycá. Chē entšangna tmojáninye y tmojanuena ndayá Jesús tojanmama y ntšamo tojanayancá, y chentšana chabe tšabe noticiēnga entšángbioye tmojanabuayená.

<sup>3</sup> As, átsnaca sēnjontsé cuedádoca juanotíciana lempe ntšamo Jesusbiamna imojtsichamcá, tojanobojatšentšana mēntscoñe. Mora šontsinýana tšabá yojtsemna acbiamna juabemana ntšamo ndegombre yomncá, uámana taitá Teófilo, chē tijuannoticiá soyēngama, ntšamo ndegombre bēngbeñe tojopasacá.

<sup>4</sup> Ba soyēnga Jesusbiamna tmojabuátēmbanga, y atše sēntseboše aca chacotsetátšēmo, ntšamo tcojouencá ndegombre yomnana.

### *Canye ángel tojanabuayená Juan chē Ubayaná jónýnama*

<sup>5</sup> Herodes Judea luaroca rey inamna ora, yojamna canye judiēngbe bachna, Zacarías ca uabainá. Cha yojamna Abíasbe bachnanguentša pamillo. Chabe shemna, Isabel ca yojanabaina, y chana Aarónbentšana entšá inamna (Aarón, chē más uámana bachnangbe natsana amēndayá).

<sup>6</sup> Chatna tšabá amata ibnamna Bēngbe Bētsabe bominyiñe, y ntšamo Bēngbe Bētsá yomandacá ibojoyena; y chca, ndocná yonjanobena jayanana chata ndoñe tšabá ibonjánama ca.

<sup>7</sup> Básenga tondaye ibonjánabamna, Isabel šešona jtsebomnama ndobena causa, y chatna ya bētsanánata ibojtsemna.

<sup>8-9</sup> Chē bachnanga Bēngbe Bētsabe bēts yebnentše tmojtsoservena ora, sempre imojanamana jabocacayana, nda tšabá tbojtsonyená, Bēngbe Bētsábioye atschuanaye luaroye cháuama incienso jajuinýiyama. Canye, Zacaríasbe entšanga Bēngbe Bētsabe bēts yebnoca, Bēngbe Bētsábentše imojtsoservena orna, Zacaríasbioye tšabá ibojonýena; y chca, cha ibojtóca jana incienso jajuinýiyana.

<sup>10</sup> Zacarías, incienso yojtsejuinýnantscuana, ba entšanga shjoca imojtsemna, Bēngbe Bētsáftaca encuéntaye.

<sup>11</sup> Nye ndeolpe, Bēngbe Utabnabe canye ángel tojanonýná chē incienso jajuinýiyama altarentša catsbioica.

<sup>12</sup> Zacarías chábioye tbojáninye ora, tojanenjaná y corente uatjana tbojanábuache.

13 Chora chë ángel tbojaniyana: —Zacaría, ndoñe matauatjana. Bëngbe Bëtsá tonjouena ntšamo tconjaimpadacá. Acbe shema Isabel canye šešona bochántsebomna, boyabásetema, y chana Juan ca cochjuabaye.

14 Chama aca corente oyejuayá cochántsemna, y bëtsá entšanga mochanjóyejuaye acbe uaquiñá tojonýnama.

15 Er cha, Bëngbe Bëtsabiama canye uámana entšá echántsemna. Ndocna te queochaisofsiye vínoye, ni jabuáchiye. Chë Uámana Espiritu chabe ainaniñe echantsemándaye, cha cabá ndonýna orscana.

16 Banga Israeloca entšanga, ntšamo cha chaojayanama mochanjontsé joyeunayana Bëngbe Bëtsá, chëngbe Utabná.

17 Cha echanjáshjango chë Bëngbe Bëtsabe Uámana Uabuayanabe natsana, y echántsebomna obenana y canye espíritu ntšamo chë Bëngbe Bëtsabe juabna oyebuambnayá Elías inabomncá. Chabe natsana echanjáshjango, bëtsétsanga chëngbe básengaftaca ndoñe chamondétsentsjanama, y chë nduauenanënga cachiñe chamotsatsjuabnama ntšamo chë Bëngbe Bëtsabe bominýiñe tšabá amënga mondbetsejuabnaya. Y chca, entšanga cha echantsapróntaye Bëngbe Utabná jabama orscama ca —chë ángel tbojaniyana.

18 As Zacaría chë ángelbioye tbojantjá: —¿Ntšamo atše stjobenaye jtsetatšëmbuana chë šcontsatsá soye ndegombre bëtsemnama? Er atše ya bëtsëjema sëntsemna y atšbe shémnaca cachcá ca.

19 Chora chë ángel tbojanjuá: —Zacaría, atše ángel Gabriel sëndmëna; atše Bëngbe Bëtsábioca sëndoservena. Cha šonjichmó chë tšabe noticiënga aca jauyanama y juenayama.

20 Morna, chë cbontsatsá soyiñe ndoñe quecatošbuaché causa, ndëbiá cochanjoquéda, y ntšamo cbontsatsacá chaojopasá ora, chama tempo chaojtsemna ora, chora jóyebuambayama cochantobenaye ca.

21 Chë ángel Zacaría seftaca yojtsóyebuambnantscuana, entšanga shjoca Zacaría biama imojtsobátmana, y mëntšá imojtsejuabnaye: “¿Ndáyeca tša bën Bëngbe Bëtsabe bëts yebnentše ibojtsobianná ca?”

22 Zacaría tojtanbocna ora, ndoñe yontsobena chë entšángaftaca jóyebuambayana. Chënga tmojántatšëmbona, chë Bëngbe Bëtsábioye atschuanayentše Zacaría mo otjenayoquécá Bëngbe Bëtsábiocana canye soye tojáninýama, er chëngbioye jatšëmbombonana yojáuyana, ndëbiá yojoquéda causa.

23 Chabe tempo, chë Bëngbe Bëtsabe bëts yebnentše jtse-trabájayama tojanpochocá ora, Zacaría cachabe yebnoye tojtaná.

24 Chentšana baseftaytese, chabe shema Isabel ngomaná yojoquéda, y chë causa, chë shema shachna ishinÿe cach tsoca yebnentše totanoquedá.

25 Cha mëntšá yojttsichamo: “Bëngbe Utabná mora atšbiamá tojtenojuabó, entsángbentše atšbe ngménana jtsebojuánama, básenga tondaye béntsabamna causa ca.”

*Canÿe ángel tojanabuayená Jesús jónÿnama*

26 Isabel chnënguana ishinÿe ngomamaná yojtsemna ora, Bëngbe Bëtsá, ángel Gabriel tbojanichmó Galilea luaroye, Nazaret ca uabaina puebloye,

27 canÿe shembása María ca uabainá jauatsëtsayama. Mariyna cabá boyabása nduabuatmá inamna, pero Joséftaca jobouamayama tbojanšbuachená. Y Josena, rey Davídbentšana entsá inamna.

28 Chë ángel Mariybioye tojána y mëntšá tbojanчуá: — ¡Mouena. Bëngbe Bëtsá tšabe bendición acbiamá tonjama! ¡Bëngbe Utabná ácaftaca entsemna ca!

29 Chca tojanuena ora, María yojenjnaná chë soyama, y yojtsejuabnaye ndáyeca chë ángel chca tbojanчуama.

30 Chora chë ángel tbojaniyana: —María, ndoñe matauatjana, Bëngbe Bëtsá entsama tšabe bendicionënga chacotse-bomnama.

31 Aca ngomamaná cochanjoquéda y canÿe šešona boyabásetema cochántse-bomna, y chana Jesús ca cochjuabaye.

32 Cha puerta echantsámana, y entsangna Bëngbe Bëtsabe Uaquiñá ca chábioye mochantsábobuatma. Y Bëngbe Bëtsá chë Utabná, chábioye canÿe rey bochanjábema, ntšamo David yojamncá,

33 y Jacóbëbentšana entsanga nÿetsca tescama echántsamëndaye, y chabe mándayana ndocna te queochaisopochóca ca —chë ángel tbojaniyana.

34 Chentšana María chë ángelbioye tbojantjá: —¿Ntšamo chca yochjopása, cabá ndoñe boyá sëntse-bomnëse ca?

35 Y chë ángel tbojanчуá: —Chë Uámana Espíritu echanjabo nÿets ábeñe, y Bëngbe Bëtsabe obenánaca ngomamaná cochanjoquéda. Chabe obenana mo jantsetëshcá cmochanjabouútsbotse; chíyeca chë echanjónÿna šešona Uamaná echántsemna, y chábioye Bëngbe Bëtsabe Uaquiñá ca mochantsábobuatma.

36 Mouena, Isabel, acbe primá, canÿe šešona bochántse-bomna, masque ya bëtsananá cha entsemna; chë “šešona ndbomná ca” monjanabobuatmá, mora ya chnënguana ishinÿe ngomamaná entsemna,

37 er Bëngbe Bëtsá lempe jamama endobena ca —cha tojánayana.

<sup>38</sup> Chora María chë ángelbioye tbojaniyana: —Bëngbe Bëtsabe oservená atše sëntsemna. Bëngbe Bëtsá átšeftaca chaoma ntšamo šcojauyancá ca.

Y chentšana chë ángel tojtsatanoñe.

*María tojána Isabel jabuáchama*

<sup>39</sup> Chentšana, María tojanoprontá y tojanochëmo canyë puebioye, Judeoca tjañenache luariñe.

<sup>40</sup> Chocna cha, Zacaríasbe yebnentše tojánamashëngo y Isabelbioye tbojanchuá.

<sup>41</sup> Isabel ntšamo María tbojanchuama tojanuena ora, Isabelbe šešona chabe uafsbioye tojanobonjó, y chë Uámana Espiritu Isabelbeñe tojánamashëngo chabe ainaniñe jtsemándayama.

<sup>42</sup> Chcasna, Isabel jabuache tojánayana: —¡Bëngbe Bëtsá acbiamá más tšabe bendicionënga entsama nyetsca shembásengbiama, y chë cochántsebmna šešonbiámnaca cachcá!

<sup>43</sup> Atše merecido taitatobuajoñe, atšbe Utabnabe mamá chašuabobuáchama;

<sup>44</sup> er atše sënjouena ntšamo šconjachuá, y cachora atšbe šešona oyejuayá atšbe uafsbioye tonjobonjó.

<sup>45</sup> ¡Aca Bëngbe Bëtsábeñe tcojošbuaché; cojtsetátšëmbo Bëngbe Bëtsá ntšamo tcmojašbuachenacá yochjamama; chíyeca puerte oyejuayá cochántsemna ca!

<sup>46</sup> Chora María tojánayana:

“Nyets ainánaca Bëngbe Utabná chantsadorana,

<sup>47</sup> y Bëngbe Bëtsá, atšbe Atsbocayabiamá corente chanjóyejuaye.

<sup>48</sup> Bëngbe Bëtsá atšbiama tojtenojuabó, atše chabe oservénëjema.

Er morscana muentša entšanga nyetscanga puerte oyejuayá ca šmochantsábobuatma.

<sup>49</sup> Bëngbe Bëtsá, chë nyets obenana bomná, chabe obenánaca bëts soyënga atšbiama tonjama.

¡Bëngbe Bëtsá puerte Uamaná ca entsabaina!

<sup>50</sup> ¡Morsca entšanga y más chcoyënga, chábioye yeunanëngbiama, cha sempre bochántsengmena!

<sup>51</sup> Cha, chabe obenánaca bëts soyënga tojama, y chë nye cachënga bëtsëtsanga enobiamnayëngbe juabna tojtsepochojá;

<sup>52</sup> reyëngbioye chëngbe mándayentšana tojtsatsatše; pero chë nye cachënga bëtsëtsanga ndenobiamnayëngbioye, uámanënga tojábiamá.

<sup>53</sup> Chë shëntseca imomnëngbioye, chamosama bëtscá cha tojatsatá,

pero chë bomnëngbioyna tondaye tonjatšatá.

<sup>54</sup> Cha tojanëjabuache chabe entsanga Israeloca, chabe os-  
ervénënga,

y ndoñe tbonjánebnatjëmbe jtsalastemánana,

<sup>55</sup> nÿetsca tescama chë Abraham y chábensana entsángbioye,  
ntšamo bëngbe bëts taitanga Bëngbe Bëtsá to-  
janašebuachenacá ca” —cha tojánayana.

<sup>56</sup> Mariyna unga ishinÿe Isabélaftaca tojanoquedá, y  
chentsana cachabe yebnoye tojtaná.

*Juan chë Ubayaná tojanonÿná*

<sup>57</sup> Isabel jtsesócanama tojanóntsabuache ora, canÿe šešona  
boyabásetema tojanonÿná.

<sup>58</sup> Isabelbe juachañe oyenënga y chabe pamíllanga  
tmojántatšëmbona ntšamo Bëngbe Bëtsá chábioye ibo-  
jalastemama, y chama corente Isabélaftaca tmojanoyejuanga.

<sup>59</sup> Chë šešona posuftayté yojtsebomna ora, tmojánashjango  
y chëtémbioye chë más delicadentše base bobachtema  
tmojantëtše, ntšamo chë judiënga imojanamancá. Chënga  
imojëtseboše chë šešónbioye Zacarías ca juabáyana, cach beftcá;

<sup>60</sup> pero chabe mamá tojanëyana: —Ndoñe. Quem šešona  
echantsabaina Juan ca.

<sup>61</sup> As chënga Isabélbioye tmojaniyana: —Acbe pamíllangbeñe  
ndocná chca quenatabaina ca.

<sup>62</sup> Chora chënga jatšëmbombonana Zacaríasbioye tmojantjá,  
ntšamo chë šešona chaotsabainama cha yojtseboše ca.

<sup>63</sup> Zacaríasna jatšëmbombonana canÿe tablëbé tojanëyá y  
chiñe tojanábema: “Cha entsabaina Juan ca”. Y chë causa,  
nÿetscanga ojnánënga imojtsemna.

<sup>64</sup> Y cachora Zacarías jóyebuambayama yojtobenaye, y yo-  
jontšë Bëngbe Bëtsábioye jëtschuayana.

<sup>65</sup> Chë juachañe oyenënga nÿetscanga tmojanëuatjaná,  
y Judeoca nÿetsca chë tjañenache luariñe entsanga chë  
soyëngama imojtsencuëntaye.

<sup>66</sup> Nÿetscanga chë soyëngama tmojántatšëmbona ora,  
chëngnaca corente chama imojtsejuabnaye y mëntšá  
imojtsichamo: “¿Chë básetema, bëtsá ora nda yochtsemna ca?”  
Y ndegombre, Bëngbe Bëtsabe obenana cháftaca yojtsemna.

*Zacarías, Bëngbe Bëtsábioye jëtschuayama*

<sup>67</sup> Chë Uámana Espiritu tbojanmandá ora, Zacarías, chë  
basetembe taitá, Bëngbe Bëtsabe mándoca jtsóyebuambnayëse,  
mëntšá tojánayana:

<sup>68</sup> “¿Chë Utabná, chë Israeloca entsangbe Bëtsá matschuanga,  
er cha tonjabo chabe entsanga jabújabuachama y  
jabátsebacama!

69 Cha bochanjíchmuá canye atsebacayá puerte obenana bomná,  
y cha echántsemna Bëngbe Bëtsabe oservená Davidbentšana entšá;

70 ntšamo Bëngbe Bëtsá bayté entsemna, chë chabe juabna oyebuambnayëngbiajana,  
chë chábenga imomnëngbiajana bënga šojanašebuachenacá, mëntšá:

71 Cha canya bochjanichmuá bëngbe uayayënga y nyetsca uaboyënjëngbiama bënga jabátsebacama;

72 bëngbe bëtsétsangbioye jálastemama,  
y jenójuaboyama y jamama chabe uámana trato,

73 ntšamo Bëngbe Bëtsá, bëts taitá Abrahámbioye tbojanšbuachenacá.

74 Cha tbojanšbuachená bëngbe uayayëngbiama bënga jabátsebacama,

chca, bënga ndauatjá Bëngbe Bëtsá jasérviamá,

75 y chabe entšangcá, nyetsca soyënguiñe tšabá amënga, Bëngbe Bëtsabe delante nyetsca te bëngbe vidënguiñe jëftsiyenama.

76-77 Y aca, atšbe básetemna, Bëngbe Bëtsabe juabna oyebuambnáyá ca cmochantsábobuatma,

entšangbioye Bëngbe Bëtsabe soyëngama cochtsabuayiynama, Bëngbe Utabná cabá ndáshjango ora, bacna soyënga amana chamuajbanama;

as Bëngbe Bëtsá chëngbe bacna soyënga echanjáperdonaye, y Bëngbe Utabná jabama mochantsopróntaye.

78-79 Bëngbe Bëtsá bënga puerte šualastemánayeca, canya bëngbe juabnënga binynáyá bochanjíchmuá, bënga chë bacna soyënga causa mo ibetiñcá y obanëngbe luarentscá vida bomnëngbioye jabátsebacama, y jabuátambama ntšamo natjëmbana jtsiyenana ca” –cha tojánayana.

80 Chë básetema yojontsé jobóchana y chabe espíritnaca puerte. Bayté, entšanga ndoyena luarënguenache cha yojëftsiyena, Bëngbe Bëtsá Israeloca entšangbioye cha tojáninyanjentscuana. Chentšana, chamuábuatmanamna tojanontsé Israeloca entšangbeñe jóyebuambayana.

## 2

### *Jesucristo tojanonyná* (Mt 1.18-25)

<sup>1</sup> Chë tempo yojamna canye Romoca bëts mandado, Augusto ca uabainá; y cha, chë natsanama tojanmandá nyetsca entšanga chamuenábemama.

<sup>2</sup> Chë soye tojanochnëngo Cirenio ca uabainá Sirioca mandado yojamna ora.

<sup>3</sup> Chamna, nÿetscanga tojanotocá jtangana jenábemëngama, cada ona ndëmoca chëngbe bëts taitanga imojëftsiyena puebloye.

<sup>4</sup> As, Josénaca Galilea luarentšana Nazaretocana yojëftsebozna y Judeoye, Belén puebloye, tojtaná. Tempo, Josebe bëts taitá rey David, Belenoca inoyena. Y José, Davídbentšana entšá inámnayecna, choye jenábemama tojtaná.

<sup>5</sup> Mariáftaca tojána jenábemama, y muana tbojanšbuachená Joséftaca jobouamayama. María ngomamaná yojtsemna,

<sup>6</sup> y Belenoca ibojtsemnëntscuana, chë ora tbojanóntšabuache jtsešócanama.

<sup>7</sup> Y chentše María ibojtsebozna chabe natsana šešona, canÿe boyabásetema. Posadoca tondaye luare yontsemna causna, chata nÿe uacnëngbe átana tambuentše tbojanoquedá. Y Jesús tojanonÿná orna, María tbojtanëntsacjuá y canÿe bachetémiñe tbojanjajó.

*Chë angelotémënga y chë oveshënga abuajëñyanga*

<sup>8</sup> Belén béconana, chë ibeta, oveshënga abuajëñyanga shëntsjoa cachëngbe oveshëngaftaca imojtsemna.

<sup>9</sup> Nÿe ndeolpe, Bëngbe Bëtsábíocana canÿe ángel tojánebëbuacna, y Bëngbe Bëtsábentšana corente yojtsebuashinÿinÿana chëngbe shëconániñe. Chama chënga puerte imojocochauatjaná.

<sup>10</sup> Chora chë ángel tojanëyana: “Ndoñe matauatjëngana. Sënjabo tšabe soyënga tonjopasama jábuayenama, nÿetscanga chamóyejuama.

<sup>11</sup> Mora chë David tonjanonÿná pueblentše canÿe šešona tonjonÿná. Cha tšëngaftangbe atsebacayá echántsemna y tšëngaftangbe entšangbiámnaca. Cha endmëna chë Bëngbe Bëtsabe Uámana Uabuayaná, Cristo ca uabainá, y Bëngbe Utabná.

<sup>12</sup> Ndegombre chca entsemnama mëntšá šmochanjátatsëmbona: canÿe šešona ntsacjuaná y uacnëngbe bachetémiñe jajoná šmochanjínÿena ca” —cha tojanëyana.

<sup>13</sup> Cachora, celocana mallajta angelënga chë natsana ángelbentše tmojánbocana y Bëngbe Bëtsábíoye mëntšá imojtsatschuanaye:

<sup>14</sup> “¡Bëngbe Bëtsá, celoca entsemná matschuanga!

Bëngbe Bëtsábíoye yeunanëngbiama, Bëngbe Bëtsá corente entsoyejuá; quem luariñe chëngbeñe puerte tšabá chaotsemna ca.”

<sup>15</sup> Chentšana chë angelënga celoye tmojésanshëcuana. Y chora chë oveshënga abuajëñyanga tmojanontsé jeniyanana:



“Belenoye cuajna, chë quem tojopasá soye jinýama. Ndegombre, Bëngbe Bëtsá chë soye šojanýanyé ca.”

16 As betesco tmojána y tmojánanyena María, José y chë šešonatema bachetemiñe jajoná.

17 Chë šešona tmojáninye ora, chënga tmojanacuntá Jesusbe bëtsetsata y chë ínýengbioye, ntšamo chë šešonbiama chë ángel tojanëyancá.

18 Nýetscanga chë tmojanuenënga tmojanenjnana ndayá chë oveshënga abujënyënga imojtsacúntama.

19 Pero Mariyna nýe cachabe ainanoca quem soyëngama más bën inétsenojuabnañe.

20 Chentsana, chë oveshënga abujënyënga tmojtana Bëngbe Bëtsá atschuanaye, ndayá tmojáninyama y tmojanuena. Nýetsá tojanopasá lempe ntšamo chë ángel tojanëyancá.

### *Bëngbe Bëtsabe bët yebnoye Jesús tmojanamba*

21 Posufta te tojánashjache ora, chë basetémbioye chë más delicadentše base bobachtema tmojantëtše, Bëngbe Bëtsabe entšá bëtsemnama chaotsinyënama, ntšamo judiënga imojanamancá; y Jesús ca tmojanabaye, ntšamo chë ángel tbojaniyancá, María cabá ndoñe ngomamaná yontsemna ora.

22 Y chë tempo tojanóshjango, ndaye ora José y María yojtsamna jamana ntšamo Moisesbe leyiñe iuayancá, ndayá jamama yojanmëncá, canýe shembása Bëngbe Bëtsabe delante tšabia jtsatsmënama, canýe šešona tbojtsebonnentšana. Asna, Jerusalenoye tbojánata y chë básetema tmojanamba, Bëngbe Bëtsabe bët yebnoca jinýinyiyama,

23 ntšamo chë Bëngbe Utabná Moisésbioye tbojaniyë leyënguiñe iuayancá, mëntšá: “Canýe yebnentše chë natsana šešona boyabása tojtsemnësna, Bëngbe Bëtsábioye cha jinýinyiyana chábioye chabotseservënna ca.” Chcasna, chë básetema Bëngbe Bëtsabe bët yebnoye tmojanamba.

24 Y tmojanamba janshana uta shloftše, Bëngbe Bëtsá jëtschuayama, ntšamo Bëngbe Utabnabe leyiñe yomandancá. Chiñe mëntšá endayana: “Chë natsana šešona chaojonyá ora, boyabásetema tojtsemnëse, janshana šmochjuamba uta fchetnatémata o uta šešona palomatémata, Bëngbe Bëtsá jëtschuayama ca.”

25 Jerusalenoca inamna canýe bacó, Simeón ca uabainá; cha inamna nýetsca soyënguiñe tšabá amá, y yojaniyena ntšamo Bëngbe Bëtsá yomandacá. Cha yojanobátmana chë tempo ndaye ora, Bëngbe Bëtsá bochjanichmuá canýa Israe-loca entšanga cháuatsebacama. Y chë Uámana Espiritu chabe ainaniñe yojtsemna;

<sup>26</sup> chíyeca, cabá lempe chca ndopása ora, cha yojtsetátšëmbo cha ndoñe yochjanóbanama, chë Bëngbe Bëtsabe Uámana Uabuayaná ntjéftsinyá.

<sup>27</sup> Chë Uámana Espíritu tbojanmandáyeca, Simeón Bëngbe Bëtsabe bëts yebnoye tojána; y Jesusbe bëtsétsata chë básetema tmojanamba ora, ntšamo Moisesbe leyiñe iuayancá chabiama jamama ora,

<sup>28</sup> Simeón tbojanocutsá y Bëngbe Bëtsábioye tbojtanchuá. Cha mëntšá tojánayana:

<sup>29</sup> “Bëngbe Utabná, mora šmolesenciá, atše acbe oservená natjëmbana jóbanana,

er ya tconjama ntšamo šconjanšbuachenacá;

<sup>30</sup> atše chë entšangbe Atsebacayá sënjinýe.

<sup>31</sup> Aca cha tcojichmó nyets luarenache entšangbiama.

<sup>32</sup> Cha chë ndoñe judiëngbe juabnënga binýnayá echántsemna; y chábeyeca, nyets quem luarentše mochanjátatšëmbona, chë acbe entšangbiama, Israeloquëngbiama ca” —cha tojánayana.

<sup>33</sup> José y María ibojenjnanata ntšamo Simeón Jesusbiama yojtsichámuama.

<sup>34-35</sup> Chentšana, Simeón Bëngbe Bëtsábioye tbojanimpadá tšabe bendicionënga chata chabotsebomnama chaomama; y María, chë Jesusbe mamábioye tbojanianyana: “Quem soyënga corente cmochanjacochtsetšenaná, mo ainana espadéjaca cuafjenëchnëngcá. Cha Israeloca banga echanjápochocaye y banga echanjátsebacaye; y chca, ntšamo banga ainaniñe imojuabnacá echantsótatšëmbo. Israeloca banga quem básetema mochantsábotena y chabe palabrengnaca ca” —cha tbojanianyana.

<sup>36</sup> Chéntšnaca yojtsemna canýe shembása Bëngbe Bëtsabe juabna oyebuambnayá, Ana ca uabainá; cha yojamna Fanuelbe bembe y Aserbe pamillentšá; ya bëtsananá cha inamna. Nýe canýsëfta uata cha yojéftsebouamna;

<sup>37</sup> y chabe boyá tojanóbanentšana, cha posufta bnëtsana y canta uata viudá inamna. Ndocna te Bëngbe Bëtsabe bëts yebnentšana yonjábocana, y chentše tojanoquedá bnëtë y ibeta, Bëngbe Bëtsáftaca encuëntaye y cha atschuanaye; y chama, ba soye yojanamana tondaye ntjascá jtsemnana.

<sup>38</sup> Simeón, María y Josébioye yojtsëtsësnaye ora, Ana chëngbioye yojobeconá, y chë Atsebacayá tojanonýnama Bëngbe Bëtsábioye tbojtanchuá chentšana, Jerusalenoca entšangbioye, chë canýe atsebacayá Israeloca entšangbiama imojanobatmanëngbioye tojanéyana, chana Jesús yojétsemna ca.

*Jesús Nazaret puebloca*

39 José y María lempe ntšamo chë Utabnabe leyënguine iuayancá tbojanma ora, Galilea luaroye tbojtanata, cachëngbe puebloye, Nazaretoye.

40 Y chë básetema yojtsobóchaye, y más añemo yojtsejacana y más osertánana yojtsebomna. Y Bëngbe Bëtsá yojánama cha bëtscá tšabe bendicionënga chaotsebomnama.

### *Jesús Bëngbe Bëtsabe bëts yebnoca*

41 Chabe bëtsetsata ibojanamana cada uata Jerusalemoye jana Bashco fiestama, chë Bëngbe Bëtsá chë judiëngbe bëts taitángbioye Egiptocana tojánatsebacama jtenójuaboyama fiesta.

42 Jesús bnëtsana uta uata tojánashjache ora, Jerusalemoye tmojána, ntšamo imojanamancá.

43 Chë fiesta tojanopochocá chentšana, chabe bëtsetsata yebnoye ibojtsataye, y chata ntsetatšëmbcá, Jesusna Jerusalemoca yojtsoquedañe.

44 Chata ibojétsejuabnaye Jesús chë inye entsángaftaca yojtsataboye ca; chcasna, canye te nyetsá benachëjana tbojánata ora, tbojanontsé chabe pamílangbeñe y ubuatmëngbeñe jtsenguanguana,

45 pero ndoñe ibonjobenaye jtsinyenana. As, chata chora Jerusalemoye tbojésanshëcona choca cha jetsenguanguama.

46 Unga tianoye chata tbojanobená Bëngbe Bëtsabe bëts yebnentše cha jetsinyenana. Chana chë Moisesbe ley abuatambayëngbe tsëntsaca inétsotbemañe, chëngbioye inayaunana, inatjanaye.

47 Nyetsca ouenanënga imojtsenjnanaye Jesús tša osertaná inamnana, y tša tšabá jojuama cha yojtsobenama.

48 Chabe bëtsetsata chca tbojáninye ora, chátnaca ibojenjnaná. Chora, chabe mamá tbojanianyana: —Uaquiñá, ¿ndáyeca chca bëndátaftaca tcojama? Taitá y atše corente enócochinyenata cbondëngú ca.

49 As Jesús tojanëyana: —¿Ndáyeca atše šmonguá? ¿Ndoñe šondëtatsëmbo atše šomna atšbe Taitabe yebnentše jtsemnana ca?

50 Pero chë bëtsetsata ndoñe tonjanësertá ntšamo cha tojanëyancá.

51 Chentšana Jesús chë bëtsetsataftaca Nazaretoye tojtaná y chata yojtsayaunana. Y chabe mamana nye cachabe ainanoca chë soyëngama más bën inétsenojuabnañe.

52 Jesús yojtsobóchaye y más juabna yojtsebomna; y Bëngbe Bëtsá y nyetsca entsanga corente oyejuayënga chabiamana imojtsemna.

## 3

*Juan chë Ubayaná entsanga yojanabuayiná  
(Mt 3.1-12; Mc 1.1-8; Jn 1.19-28)*

<sup>1</sup> Bnëtsana shachna uatama Tiberio César Romoca bëts mandado yojamna ora, Poncio Pilato yojamna Judeoca mandado, Heródesna Galileoca rey, chabe catšata Felipe Iturea y Traconitoca rey, y Lisániasna Abilinioca rey.

<sup>2</sup> Anás y Caifás chë bachnangbe más uámana amëndayata ibojamna. Cach tempo, canye luare entsanga ndoyenentše Bëngbe Bëtsá tbojanatsëtsá Juánbioye; Juan, Zacaríasbe uaquiñá.

<sup>3</sup> As Juan nÿetsca luarënguëjana Jordán béjaye béconana tojánachnëngo, entsanga mëntšá utsëtsnaye: “Tšëngaftangbe bacna soyëngama ngménaca šmochtenójuaboye, chca amana šmochtsajbaná y Bëngbe Bëtsabe benache šmochtishache. Chora cbochjúbaye, y Bëngbe Bëtsá tšëngaftangbe bacna soyëngama cmochanjáperdonaye ca.”

<sup>4</sup> Chë soye tojanopasá, cachcá ntšamo chë Bëngbe Bëtsabe juabna oyebuambnyá Isaías chabe librëšaňe yojëftsabemcá. Cha mëntšá tojanábema:

Entsanga ndoyena luaroca canya enduáyebuache:

“Bëngbe Utabná echanjabo ca; mo nda canye benache tojtseprontacá canye uámana entsá jashjanguama, cachcá, tšëngaftángnaca, Bëngbe Utabná jabama ainanentše tšabe juabnëngaca šmochtseprontana.

<sup>5</sup> Nÿetsca jachaňe echantojútjia, y tjaňe y batsjabenga mochantenájachibiaye.

Chë scundma benachënga ndirichëjënga echántatsmëna, y chë bacá mana benachënga mochantenájachibiaye.

Mo chë chca tmojtsamëngcá, canye benache japróntana canye rey cháuashjanguama,

tšëngaftángnaca bëtscá šmochtseprontana tšëngaftangbe ainaniňe, Bëngbe Utabná jabama.

<sup>6</sup> Y nÿetsca entsanga mochanjinÿe chë Atsebacayá Bëngbe Bëtsábentšana jabana ca” —cha tojanábema.

<sup>7</sup> Chë entsanga Juan chaubáyama imojánbocana ora, Juan yojanëtsëtsnaye: “¡Mëtscuaye entsanga! ¿Nda tcmënjáuyana chë echanjóshjango uabouana castigüentšana šmochjotsbocá ca?

<sup>8</sup> Bëngbe Bëtsabeňe ndegombre ošbuáchiyënga šmochtsemna, as chca chaotsinÿna, tšëngaftanga chë bacna soyënga amana ndegombre šmojtsajbanama. Y ndoňe šmattsejuabnaye cach tšëngaftangbiama jayanama: ‘Bëngna Abrahábentšana entsanga, Bëngbe Bëtsabe entsanga

fsëndmëna ca'. Er atše chanjayana, Bëngbe Bëtsá quem ndëtsbéngacnaca Abrahábentšana entsanga nanjábiamana.

<sup>9</sup>Tatšniá ya entsaprontana chë betiyeshënga tbëtëjëngocana jtseshatëtsetšama. Ndaye betiye ndoñe tonjashájona, jtseshatëtšana y iñoye jtsatmetšana; tšëngaftangaftácna cachcá, tšabe soyënga ndoñe šmontsamëse, Bëngbe Bëtsá cmochanjácastigaye ca" —cha yojanëtsëtsnaye.

<sup>10</sup>—¿Y as, ndayá jamama šojtsamna ca? —chora chë entsanga tmojantjá.

<sup>11</sup>Y Juan tojanëjua: —Chë uta quëfsáiya uabomná bontsemna canyiyá jutštayana chë tondaye tonduabomná. Saná bomná bontsemna juajatayana chë tondaye saná tondbomnábioye ca.

<sup>12</sup>Romocama entšángbioye impuesto atjanayëngnaca jenábayama tmojánabo. Chënga Juánbioye tmojantjá: —Buatëmbayá, ¿ndayá jamama šojtsamna ca?

<sup>13</sup>Y Juan tojanëyana: —Nye ntšamo chë leyiñe yomandancá entšángbioye crocénana šmochtsayëngacaye ca.

<sup>14</sup>Básefta soldadëngnaca chábioye tmojantjá: —¿Ndayá jamama šojtsamna ca?

Y Juan tojanëyana: —Ndocnábioye tondaye šmatjáboca, ni jauátjanase, ni nye ndayámnaca bonamente jobuáchëse; y nye ntsachetšá šmacaná crocenánaca oyejuayënga šmochtsomñe ca.

<sup>15</sup>Entsanga chë Bëngbe Bëtsabe Uámana Uabuayanabiamana imojtsobátmana, y chëngna Juanbiamana imojëtsejuabnaye nderado cha chë Bëngbe Bëtsabe Uámana Uabuayaná nanjamna ca;

<sup>16</sup>pero Juan tojanëyana: "Ndegombre, atše béjayeca cbondubáyana. Pero chë echanjabá atšbiamana corente más obenana endbomna, y atše merecido taitatobuajoñe ni mo jotsejbiyana chabe shecochëtjonëshentša corriëja jajafjonama. Chë Bëngbe Bëtsabe benache chamojtishachëngbiamana, Bëngbe Bëtsá echanjama chë echanjabábeyeca, chë Uámana Espiritu chëngbe ainaniñe cháuamashënguama. Pero chë ndoñe chamontishachëngbiamna, Bëngbe Bëtsá echanjama chë echanjabábeyeca, chënga corente castigánënga chamotsemnama, mo iñeshequécá.

<sup>17</sup>Canye entšá chabe mëtštá cucuatšifne jiyëbana, chabe trigo jtsóbobemama, y chë ndoservena shácuanënga jtsejashtsëtsana. Chabe trigo chë grano uaquëcjnaye tsañe jtsabuájua, y chë ndoservena shácuanëngna iñeshoye jtsatmetšana. Cachcá, chë átšbentšana echanjabá, chë tšabe entsanga echanjúbuaja, y chë bacna entsangna iñeshiñe echantsacastigaye, y chë iñe ndocna te queochátsfsana ca" —cha tojanëyana.

18 Chca y inÿe palabréngaca Juan chë tšabe noticiëngama yojanabuayiná.

19 Tempo, Juan Heródesbioye tbojanácacana, cha tojanouboua-mama cachabe catšata Felipbe shémaftaca, Felipe cabá oyena ora; chana Herodías ca uabainá. Chama Juan tbojanácacana y nÿetsca bacna soyënga Herodes tojanmámna.

20 Pero Herodes Juánbioye joyeunaye luariña, cabá inÿe más bëts bacna soye tojatanma: Juánbioye cárceloje tbojt-sanëtame.

*Juan, Jesúsbioye tbojanabaye*  
(Mt 3.13-17; Mc 1.9-11)

21 Pero Herodes Juánbioye cabá ndutame ora, Juan ba entšanga tojanëbaye, y Jesúsnaca tojánabo jenábayama. Ibojtsabayanëntscuana, Jesús Bëngbe Bëtsáftaca ibojtsencuëntaye; y chora celoca yojotëfjo,

22 y chë Uámana Espíritu mo canÿe palomatemcá Jesúsbioye yojtsastjajuana; y celocana Bëngbe Bëtsá tbojaniyana: “Acna atšbe bonshana Uaquiñá condmëna. Achiamama corente sëntsoyejuá ca.”

*Jesusbe bëts taitanga*  
(Mt 1.1-17)

23-38 Jesús unga bnëtsana uata yojtsebomna, entšángbeñe Bëngbe Bëtsabe soyëngama jóyebuambayama yojontsé ora. Entšanga imojanjuabná Jesús Josebe uaquiñá yojamna ca. José yojamna Elibe uaquiñá.

Elí Matatbe uaquiñá

y Matatna Levibe uaquiñá.

Leví yojamna Melquibe uaquiñá,

Melqui Janabe uaquiñá

y Jana Josebe uaquiñá.

José yojamna Matatíasbe uaquiñá,

Matatíasna Amosbe uaquiñá.

Amós Nahumbe uaquiñá,

Nahúm Eslibe uaquiñá

y Esli yojamna Nagaiibe uaquiñá.

Nagai yojamna Maatbe uaquiñá,

Maatna Matatíasbe uaquiñá.

Matatías Semeibe uaquiñá,

Semei Joseche uaquiñá

y Josec yojamna Judabe uaquiñá.

Judá yojamna Joananbe uaquiñá

y Joanán Resabe uaquiñá.

Resa Zorobabelbe uaquiñá,

Zorobabel Salatielbe uaquiñá,

y Salatielna Neribe uaquiñá yojamna.

Neri yojamna Melquibe uaquiñá,  
Melqui Adibe uaquiñá.  
Adi Cosambe uaquiñá,  
Cosam Elmadambe uaquiñá,  
y Elmadamna yojamna Erbe uaquiñá.  
Er yojamna Jesusbe uaquiñá  
y Jesús Eliezerbe uaquiñá.  
Eliezer Jorimbe uaquiñá  
y Jorimna Matatbe uaquiñá.  
Matat yojamna Levibe uaquiñá,  
Leví Simeonbe uaquiñá  
y Simeón Judabe uaquiñá.  
Judá Josebe uaquiñá,  
José Jonambe uaquiñá,  
y Jonamna yojamna Eliaquimbe uaquiñá.  
Eliaquim yojamna Meleabe uaquiñá,  
Melea Menabe uaquiñá.  
Mena Matatbe uaquiñá,  
y Matata yojamna Natanbe uaquiñá.  
Natán yojamna Davidbe uaquiñá,  
David Isaíbe uaquiñá  
y Isaína Obedbe uaquiñá.  
Obed Boozbe uaquiñá,  
Booz Salabe uaquiñá  
y Sala yojamna Naasonbe uaquiñá.  
Naasón yojamna Aminadabëbe uaquiñá,  
Aminadab Adminbe uaquiñá  
y Admin Arnibe uaquiñá.  
Arni Esrombe uaquiñá,  
Esrom Fáresbe uaquiñá  
y Fáresna yojamna Judabe uaquiñá.  
Judá yojamna Jacobëbe uaquiñá,  
Jacob Isaacbe uaquiñá  
y Isaacna Abrahambe uaquiñá.  
Abraham Tarebe uaquiñá  
y Taré yojamna Nacorbe uaquiñá.  
Nacor yojamna Serugbe uaquiñá,  
Serug Ragaube uaquiñá  
y Ragauna Pelegbe uaquiñá.  
Peleg Heberbe uaquiñá,  
y Heber yojamna Salabe uaquiñá.  
Sala yojamna Cainanbe uaquiñá,  
Cainán Arfaxadbe uaquiñá  
y Arfaxadna Sembe uaquiñá.  
Sem Noebe uaquiñá

y Noé yojamna Lamecbe uaquiñá.  
 Lamec yojamna Matusalenbe uaquiñá,  
 Matusalén Enoche uaquiñá  
 y Enocna Jaredbe uaquiñá.  
 Jared Mahalaleelbe uaquiñá,  
 y Mahalaleelna yojamna Cainanbe uaquiñá.  
 Cainán yojamna Enosbe uaquiñá,  
 Enós Setbe uaquiñá,  
 Set Adanbe uaquiñá  
 y Adán Bëngbe Bëtsabe uaquiñá.

## 4

*Jesús tojanobená Satanás jayëñjanama*  
 (Mt 4.1-11; Mc 1.12-13)

<sup>1</sup> Juan, Jesúsbioye tbojanabáyentšana, chë Uámana Espíritu Jesusbe ainaniñe yojtsemándaye. Jesús Jordán bejayoícana tojtaná y chë Uámana Espíritna entšanga ndoyena luaroye tbojanánatse.

<sup>2</sup> Chentše canta bnëtsana te tbojanjétana, y Satanasma yojanabó Jesús jisháchichiyama. Chë canta bnëtsana tentscuana Jesús tondaye tonjanse, y cabana ibojeshëntsena.

<sup>3</sup> Chora Satanás tojésanabo y tbojaniyana: —Aca ndegombre Bëngbe Bëtsabe Uaquiñá tcomnëse, momandá quem ndëtsbenga tandëse chaobiama ca.

<sup>4</sup> As Jesús tbojanjuá: —Bëngbe Bëtsabe uabemana palabrénguiñe mëntsá endayana: “Entsá nÿe tandëseca ndoñe vida ntsebomnana ca.”

<sup>5</sup> Chentšana, Satanás canÿe bëts tjoye tbojanánatse y betscó nÿetsca quem luarentša amëndayëngbenache tbojaninÿinÿé.

<sup>6</sup> Chora Satanás tbojaniyana: —Atše nÿets obenana cbochjátsetaye y lempe quem amëndayëngbenache yobinÿna soyëngnaca. Atše lempe chca sënjóyëngacñe y sëntsobena jatsetayama nda stsebošábioye.

<sup>7</sup> Aca chacojoshëntsamentšé y chašcojadorase, lempe nÿetšá acbiama echántsemna ca.

<sup>8</sup> Chora Jesús tbojanjuá: —Bëngbe Bëtsabe uabemana palabrénguiñe mëntsá endayana: “Acbe Bëtsá, chë Utabná cochtadorana y nÿe cha cochtseservena ca.”

<sup>9</sup> Chentšana, Satanás Jerusalenoye tbojanánatse y Bëngbe Bëtsabe bëts yebnentše chë más tsbanánoca tbojanatsá, y tbojaniyana: —Aca ndegombre Bëngbe Bëtsabe Uaquiñá tcomnëse, muentšana fshantsoye montsënja,

<sup>10</sup> er Bëngbe Bëtsabe uabemana palabrénguiñe endayana: Bëngbe Bëtsá chabe angelënga echanjichamuá, chacmotsinÿenama.



11 Chënga buacuatšëngaca cmochanjishache, shecuatše ndocá ndëtsbeñe chacondomama ca —cha tbojaniyana.

12 Chora Jesús tbojanjuá: —Bëngbe Bëtsabe uabemana palabrenguiñe mëntsá endayana: “Ndoñe matsbošana acbe Bëtsá chë Utabná bacna soyëngama jacobhënguama ca.”

13 Cabana, Satanás tojanajbaná bošana Jesúsbioye bacna soyëngama jacobhënguama, y bënama Jesús bentsána tojtsanojuánañe.

*Jesús tojanontsé Galileoca chabe trabajo jamana*

*(Mt 4.12-17; Mc 1.14-15)*

14 Chentsána, Jesús Galileoye tojesaná chë Uámana Espíritbe obenánaca, y nyetsca entšanga chë luariñe chabiamama imojtsencuéntaye.

15 Jesús yojtsabuátambaye chë judiëngbe enefjuana yebnënguenache, y nyetscanga cha imojtsatschuanaye.

*Jesús Nazaret puebloca*

*(Mt 13.53-58; Mc 6.1-6)*

16 Chentsána Jesús Nazaretoye tojtanashjango, chë pueblentše cha tojanoboché, y ochnayté, ntšamo cha yojanamancá, chë judiëngbe enefjuana yebnentše tojánamashëngo. Y chocna tojantsbaná Bëngbe Bëtsabe palabra jualiáma.

17 Chë Bëngbe Bëtsabe juabna oyebuambnayá Isaíasbe librëša tmojaniyé chauliamama. Chë librëša yojutëfjona orna, tojáninýena mëntsá uábemanentše:

18 “Chë Utabnabe Espiritu átšeftaca entsemna, er atše uabuayaná stsemna chë Bëngbe Bëtsabe tšabe noticiënga chë ndbomnëngbeñe jóyebuambayama.

Cha šonjichmó jábuayenama, chë utámenënga chentsána ya chamuáisebocanama;

jamama chë jtanënga chamobenama tšabá jubínýnama;

jamama chë ínýengbe causa imosufrínënga, tempcá cachcá tšabá chamotsatsmënama;

19 y entšanga jáuyanama ndëmua ora chë Utabná chabe entšanga yochjatsebacaye ca.”

20 Jesús jualiáma tojanpochocá y chora chë uajabuachanábioye chëša tbojtaniyé y tojtanótbema. Nyetsca entšanga chë enefjuana yebnentše imojtsemnënga Jesúsbioye imojtsobuáuatja.

21 Chora Jesús tojanontsé mëntsá jayanana: —Camënté tšëngaftangbeñe tonjopasá ntšamo quem librëšanañe iuabemancá ca.

22 Nyetscanga Jesusbiamama tšabá imojtsencuéntaye y ojanánënga imojtsemna tša botamana cha yojtsóyebuambnama.

Y chënga imojtsentjanaye: —¿Quem boyabása ndoñe Josebe uaquiña yondmëna ca?

23 Jesús yojtsetátšëmbo ntšamo cha tojánayaniñe chënga ndoñe tmonjanósbuachema. As tojanëyana: —Ndegombre tšëngaftanga ntšamo entšanga mondëntšayancá atše šmochanjauyana: “Ashnayá, cach aca menoshná ca”. Y tšëngaftanga šmojtsejuabná atše jauyanama: “Bënga fsënjouena chë bëts soyënga Bëngbe Bëtsabe obenánaca Capernaumoca tcojamama. Ntšamo contsichamcá ndegombre tojtsemnëse, cach acbe puebléntšnaca cachcá moma ca”.

24 Y cachora Jesús más tojanoyebuambá, mëntšá: “Ndegombre cbëyana, ni canye Bëngbe Bëtsabe juabna oyebuambnáyabioye cachabe pueblentše tšabá quematonjá.

25 Ndegombre cbëyana, Elías, chë Bëngbe Bëtsabe juabna oyebuambnayá, Israeloca inamna ora, ba viudanga chentše imojamna. Chë tempo, unga uata y tsëntsañe nyëtšá ndoñe tonjanafté y bëts shëntsana chë luariñe yojtsebinýna.

26 Pero Bëngbe Bëtsá, Elíasbioye ndoñe tbonjanichmó ni mo canye Israelentša viudábioye, y aiñe tbojanichmó ínjoye, Sarepta ca uabáinoye, Sidón béconana, canye chentša viudábioye.

27 Eliseo, chë Bëngbe Bëtsabe juabna oyebuambnayá, Israeloca inamna ora, chentše banga imojamna bacna nguayanánaca šoquënga, y ni mo canya chentša šocábioye tbonjanshná, pero aiñe canye šocábioye, Naamán ca uabainá, cach bacna nguayanánaca, Sirocá ca” —cha tojánayana.

28 Chë judiëngbe enefjuana yebnentše imojtsemna entšanga chca tmojanuena ora, puerte tojánetëna.

29 As, chora chënga tmojantsbaná, chë pueblentšana Jesús imojtábocna y más tsjuanoye canye peñëšëjana imojuánatse. Chënga imojanajebna cach peñëšiñe, y chë entšanga imojtseboše Jesús chocana jtsajuatsëntšana.

30 Pero Jesusna chëngbe tsëntsajana tojánachnëngo y ínjoye tojtsanoñe.

*Jesús, bayëjbe juabna cánýabioye tbojanbojuaná  
(Mc 1.21-28)*

31 Chentšana, Jesús cach Galileoye tojesaná, Capernaum puebloye, y choca tojanontsé, chë ochnayté, chë judiëngbe enefjuana yebnentše entšanga jabuátambana.

32 Entšanga imojtsenjnanaye ntšamo Jesús yojtsabuátambama, er chamna mo canye mando bomnacá yojtsóyebuambnaye.

33 Chë enefjuana yebnentše, canye boyabása bacna bayëja uambayá yojtsemna, y chabe causa chë boyabása tojanontšë mëntšá uayebuáchana:

34 —¡Cachcá šmonyá! ¿Ndayama bëngbioye təcjabo, Jesús Nazaretocá? ¿Tcojabo bënga jabétsapochocama? Atše sëndétatsëmbo nda aca comnama, aca chë Bëngbe Bëtsabe Uamaná ca.

35 Chora Jesús chë bacna bayëjbioye tbojtsanácacana y tbojanianyana: —¡Iytëca móbema y chábentšana maisebocna ca!

As chora chë bayëja entsanguentše chë boyabásabioye tbojanshajayé, y ndocá ntjëftsemcá chábentšana yojésebocna.

36 Chë soyama nyetsca entsanga imojénjnanaye y mëntšá imojtsenatsëtsnaye: “¡Tša chca palabrénga! ¡Quem entsá mandayacá y obenacá chë bayëjënga entsamënda, y chënga montsaisebocana ca!”

37 Y Galileoca nyetsca pueblënguiñe Jesusbiamá yojtsótatsëmbo.

*Jesús, Simón Pédrëbe uambén mamábioye tbojanshná*  
(Mt 8.14-15; Mc 1.29-31)

38 Chentšana, Jesús chë judiëngbe enefjuana yebnentšana tojëftsanbocna y Simonbe yebnentše tojánamashëngo. Simonbe uambén mamá šocá inajájona jabuache calentóraca, y chë chentše imojtsemna entsanga chabiamá Jesúsbioye tmojanimpadá.

39 Chora Jesús chë šocábioye yojotsejbéna y tojánayana: “¡Calentora mojuaná ca!” Y chë calentora tbojtsanóbojuanañe. Y cachora, cha tojtantsbaná y tojanontšë chënga jobuácuedana.

*Jesús ba šoquënga tojanashná*  
(Mt 8.16-17; Mc 1.32-34)

40 Shinye yojuenatjëmba ora, banga inye y inye šocana bomnënga Jesúsbioye tmojanënatse, y cha nyetsca šoquëngbeñe cucuatšënga tojanajájó y tojanashná.

41 Chora, ba šoquëngbentšana bacna bayëjënga imojtsaisebocana y mëntšá imojtsanchembumbuana: “¡Aca chë Bëngbe Bëtsabe Uaquiñá condmëna ca!” Pero Jesusna yojtsëcácana y ndoñe tonjanalesenciá chamóyebuambama, er chë bayëjënga imnatátsëmbo cha chë Cristo bëtsemnama.

*Chë judiëngbe enefjuana yebnënguenache, Bëngbe Bëtsabe soyëngama Jesús entsanga yojanabuayiyiná*  
(Mc 1.35-39)

42 Yëfsana tojanbinýna ora, Jesús chë pueblentšana tojëftsanbocna, y canye luaroye, entsanga ndoyenoye tojtsanoñe. Pero entsanga tmojána cha jetsenguanguama, y cha yojtsemnoye tmojánashajjna. Chënga imojétseboše Jesús cach pueblentše chaotsoquedáñama,

<sup>43</sup> pero Jesús tojanéyana: “Atše šontsemna chë tšabe noti-ciënga Bëngbe Bëtsabe amëndayama inýe pueblënguenáchnaca jábuayenana. Chama Bëngbe Bëtsá šonjichmó ca.”

<sup>44</sup> Y chentsana, Jesús yojánana Bëngbe Bëtsabiama entšángbioye abuyiynaye, chë judiëngbe enefjuana yebnënguenache Judeoca.

## 5

*Canýe te mallajta beonga ashebuánaye te*

*(Mt 4.18-22; Mc 1.16-20)*

<sup>1</sup> Canýe te, Jesús, Genesaret ca uabaina uafjajónaye tsachañe yojtsemna ora, ba entšanga tmojánashjaina, y chënga tša imojsenajuatsëntšnaye Bëngbe Bëtsabe palabra jouenama.

<sup>2</sup> Jesús, chë uafjajónaye tsachañe bécoñe tojáninýe uta ena barquësha; chë beonga ashebuánayëngna barquëshanguentsana tmojëftsanbocna atarraïëshangá jetsáboshabiama.

<sup>3</sup> Jesús canýe barquëshañe tojánamashëngo; chësha Simónbeshia inauamna. Chora Simónbioye mëntšá tbojaniyana: “Quem tsacháñentsana chcoye mëyamba ca.”

<sup>4</sup> Tojanótbema ora, Jesús chë barquëshoicana tojanontsé entšanga jabuátambama. Jabuátambama tojanpochocá orna, Simónbioye tbojaniyana: —Shbuatsëntsoye barquësha mëyamba y tšëngaftangbe atarraïëshangá šmochjushbuetše, beonga jashebuáyama ca.

<sup>5</sup> Pero Simón tbojanjuá: —Buatëmbayá, nýets ibeta fsëndanguá y tondaye chibiátashebuaye. Pero aca chca tcjayánayecna, cachiñe atarraïëshia chantëtëshbuetše ca.

<sup>6</sup> Tmojanëshbuetše orna, bëtsá beonga tmojánishëche y chëngbe atarraïëshangá tojanontsé jtsatanëcanana.

<sup>7</sup> As, chë inýe barquëshañe imojtsemna enutëngbioye tmojánefjatsëmbo, jabújabuachama chamuábama. Chora chënga tmojánabo, y nýets uta barquësha beóngaca tmojanajutjé. Tša chëftanga causa, tojanontsé chë uta barquësha jtsen-atjëmbambana.

<sup>8</sup> Simón Pedro chca tojáninýe ora, Jesús bentše tojanoshëntsamentsé y tbojaniyana: —¡Bëngbe Utabná, atše bacna soye amá sëndmëna, chíyeca átsbentsana mojuaná ca!

<sup>9</sup> Chë tša beonga jashebuáyama Jesús tojanmama, Simón y chë cháftaca imojtsemnënga imojouatjana.

<sup>10</sup> Santiago y Juan, chë Zebedeobe uaquiñata y Simonbe enutata, chátnaca auatjanánata ibojtsemna. Chora Jesús Simónbioye tbojaniyana: —Ndoñe matauatjana. Morscana, entšanga Bëngbe Bëtsabiama cochántsanguae, y nýe beonga ashebuanayá ndoñe quecochátsmëna ca.

11 As chora chë barquëshangá tsachoye tmojtanëyamba y lempe jéseboshjonëse, Jesús tmojanasto.

*Jesús, canya bacna nguayanánaca šocábioye tbojanshná*  
(Mt 8.1-4; Mc 1.40-45)

12 Jesús canye pueblentše yojtsemna ora, chentše tojánashjango canye entšá bacna nguayanánaca šocá. Chë šocá Jesúsbioye tbojáninýe ora, tojanoshëntsamentšé y jubiaca fshantsóntscoñe yojotsejbéna y tbojanimpadá: —Bëngbe Utabná, aca tcojtsebošëse, aca catjobenaye atšbe šocana jtsebojuánana ca.

13 As Jesús cucuatšeca tbojánbojajo y tbojanianyana: —Aíñe, sëntseboše. ¡šocana cbotsebojuaná ca!

Y cachora chë šocana tbojtsanóbojuanañe.

14 Chora Jesús tbojanmandá: —Ndocnábeñe chë soye cattsecuéntaye; nýe Jerusalemoca báchnëbioye motsa, y cha cochjinýinýiye aca mora ya tšabá cojtsatsmënama; y chora cochjuátšëmbona ntšamo Moisés chabe leyiñe tojanmandacá, Bëngbe Bëtsábioye chama jëtschuayama, chca, nýetsca entšanga chamotatšëmbona mora ya tšabá cojtsatsmënama ca.

15 Pero ndayá Jesús yojtsamama más entšanga imojátatšëmbona, y ba entšanga imojtsótotoye chábioye joyeunayama y chëngbe šocanëngama chauashnama.

16 Pero Jesús yojanamana jtsoñana entšanga ndoyena lularëngoye y choca Bëngbe Bëtsáftaca ibnéncuentaye.

*Jesús, canye jama ndobenábioye tbojanshná*  
(Mt 9.1-8; Mc 2.1-12)

17 Canye te, Jesús yojtsabuatambá ora, chentše básefta fariseunga y ley abuatambayënga imojtsetbiámama, Galileoca nýetsca pueblënguentshana áshjajnënga, Judeoquënga y Jerusalemocquënga. Y chora Jesús šoquënga yojtsashnaye, Bëngbe Bëtsabe obenánaca.

18 Chora tojanopasá, básefta boyabásenga canye šocá, jama ndobená, tjuashiñe choye imojuamba. Chënga imojétseboše tsoye cha juambana, Jesús yojtsemnoye,

19 pero jamashjnama ndoñe tmonjanobená, tša entšanga causa. Chcasna, gradasëšënguëjana chë yebnentša tsbanánoye tmojánasëngo y batšá tejëshe tmojtsanjuaná. Chorna, chë atëfjnëjana chë šocá tjuashiñe tmojanëštjango, entšangbe tsëntsaca, Jesusbe natsanoica.

20 Jesús tojáninýe cha chë šocá jáshnama bëtsobenama chënga puerta imojtsošbuáchema. As, chë jama ndobenábioye tbojanianyana: “Bacó, acbe bacna soyënga tcbontsebojperdoná ca.”

21 Chora chë ley abuatambayënga y chë fariseunga mëntšá tmojanontšé juabnayana: “Quem boyabása ndoñe

tšabá Běngbe Bětsabiana quenátichamo; mo chábioye cuafjoyenguangcá entsemna. Ndocna entšá quenátobena bacna soyəngama inya japerdonana; nye Běngbe Bětsá aíñe ca.”

22 Pero Jesús yojtsetátšēmo ntšamo chēnga imojtsejuabnayama; as tojaněyana: “¿Ndáyeca tšēngaftangbe ainaniñe chca šmojtsejuabná?

23 ¿Tšēngaftangbiana ndayá más paselo nántsemna tšēngaftangbe delante jayanama: ‘Acbe bacna soyēnga tcbontseperdoná’, o jayanana: ‘Matětsbaná y motsa ca’?

24 Y chca, morna atše cbochanjínyanñiye, chē Běngbe Bětsá Entšá tbojanbemá quem luariñe obenana yobomnama, entšanga bacna soyəngama jáperdonama ca” —Jesús tojánayana.

As Jesús chē jama ndobenábioye tbojaniana: “Atše cběyana, matětsbaná, tjuashe mesocñe y acbe yebnoye motsatoñe ca.”

25 Cachora chē jama ndobená tojtantsbaná entšangbe delante, chē cha inajájona tjuashe yojesocñe y Běngbe Bětsábioye atschuanaye chentšana yojtsatoñe.

26 Chama nýetsca entšanga imojénjanaye y Běngbe Bětsá imojtsatschuanaye. Y corente auatjanánēnga imojtsichamo: “Měnté běts soyēnga tmonjinñe ca.”

*Jesús, Levíbioye tbojanchembo chabuastama*

*(Mt 9.9-13; Mc 2.13-17)*

27 Chca yojochnēngüentšana, Jesús chentšana tojěftsanbocna y canye entšábioye tbojáninñe, Leví ca uabainá, chē entšángbioye impuesto Romocama atjanayentše inétsotbemañe. Chora Jesús tbojaniana: “Smasto ca.”

28 Y Leví lempe tojěsanboshjona, tojtantsbaná y Jesús tbojanasto.

29 Chentšana, Levina běts fiesta chabe yebnentše Jesusbiana yojama. Y chē fiestentše imojtsemna banga impuesto atjanayēnga; y inye entšángnaca mesěshentše imojtsetbiámana.

30 Chora, chē fariseunga y chē ley abuátambayēnga tmojanontšé chē Jesusbe uatsjéndayēngbiana podescas oyebuambnayana; y chēngbioye mēntšá tmojaněyana: — ¿Ndáyeca tšēngaftanga impuesto atjanayēngaftaca y bacna soye amēngaftaca šmojttesá y šmojtsofšěšná ca?

31 Y Jesús tojanějua: —Salud bomnēnga ashnayá ndoñe ntšějabótana, pero šoquēngna aíñe.

32 Y atše ndoñe chiyátabo chē Běngbe Bětsabe bominñiñe tšabá amēnga jabáchembuama, sinó chē bacna soye amēnga imomna ca juabnayēnga Běngbe Bětsábioye jabáchembuama ca.

*Jesús tmojantjá chē Běngbe Bětsáftaca jencuéntama tondaye saytescama*

*(Mt 9.14-17; Mc 2.18-22)*

<sup>33</sup> Chora chënga Jesúsbiöye tmojanianyana: —Juan chë Ubayanabe uatsjëndayënga y chë fariseungbe usetonënga monduamana ba soye Bëngbe Bëtsáftaca jtsencuéntayana, y chama ba soye tondaye ntjascá jtsemnana; pero acbe uatsjëndayënga nyë nyëts tempo jesosañana y jesofšëšnañana ca.

<sup>34-35</sup> Chora Jesús tojanëjua: —Chë boyabása bouamná chë ofjanëngaftaca tojtsemnëntscuana, chëngbiöye saná ndoñe ntsabuáshebenana. ¿Ntsamo chca ndoñe nántsemna? Chë tojobouamá cha chëngaftaca tojtsemnëntscuana, chë ófjanënga bëtscá jasana y cháftaca oyejuayënga jtsemnana. Pero ora echanjóshjango y chë boyabása chëngbentšana mochantsánatseñe; chora cocayé chë ófjanënga echántsamna tondaye ntjascá jtsemnana. Ntsamo chë tojobouamá cha y chë ofjanëngaftaca endmëncá, cachcá endmëna atše, atšbe uatsjëndayëngaftacnaca ca —cha tojanëjua.

<sup>36</sup> Jesús mëntsánaca tojanacuntá jabuátambama: “Ndocná queonÿbatatëtše basájua tsëm entšayañe, tanguá entšayá jtarmëndama. Chca tcojamëse, chë tsëm entšayá jtsandbemana, y chë tcojuatëtše entšëjua chë tanguájuañe ndoñe tšabá ntsinÿnana.

<sup>37</sup> Y cach ndoñe, chë tojtseshayana vínoye tanguá jasabenguiñe ntjataftsuámayana. Tcojuaftsuamasna, chë jasabenga jtseshébëfjuana y chë vínoye jtsabuáshanana; y chca, chë vínoye y chë jasabenga tondayama ntjatoservénana.

<sup>38</sup> Chíyeca co, chë tojtseshayana vínoyna tsëm jasabenguiñe juaftsuámama.

<sup>39</sup> Ndocná, chë bóchena vínoye tojatëmo y chentšana játsbošana chë tojtseshayana vínoye jatofšiyana; cha jayanana: ‘Chë bóchena vínoye tša tšabeye ca.’”

## 6

*Jesusbe uatsjëndayënga ochnayté trigo tmojanátabebe*  
(Mt 12.1-8; Mc 2.23-28)

<sup>1</sup> Canÿe ochnayté, Jesús canÿe jajajana yojtsaye; chabe uatsjëndayënga trigo imojtsaiuatabnaye, imojtsaiúshenëcaye, y imojtsaiuasaye.

<sup>2</sup> Chë causa, básefta fariseunga tmojanatjaye: —¿Ndáyeca šmojtsama chë ochnayté jamama ndoñe quenátslesenciana soye ca?

<sup>3</sup> Y Jesús tojanëjua: —¿Ndoñe šmëndualía y šmondëtatšëmbo, ntsamo rey David y chabe enutënga tmojanmama shëntseca imojtsemna ora y jasama yojtsëjaboto ora?

<sup>4</sup> Chca orna, David Bëngbe Bëtsabe bëts yebnentše yojámashëngo y chë Bëngbe Bëtsá chentše yojamnana inÿinÿnaye tandëšënga yojase, y chë cháftaca imojánajna

entsángnaca yojátsataye. Y chë tandëšna nÿe bachnanga belesenciana jasama. Masque David chca yojama, Bëngbe Bëtsá chora ndoñe tonjánayana David canÿe bacna soye tojanma ca —Jesús tojanëjua.

<sup>5</sup> Y Jesús más tojanëyana: “Chë Bëngbe Bëtsá Entšá tbojanbemá, chë entšá ochnayté tojtsama sóynaca jtsemándayana ca.”

*Chë buashana cucuatše bomna entšá  
(Mt 12.9-14; Mc 3.1-6)*

<sup>6</sup> Inÿe ochnayté, chë judiëngbe enefjuana yebnoye Jesús tojánamashëngo y tojanontšé jabuátambana. Y chentše yojtsemna canÿe entšá, catšbioica cucuatše buashanëtše bomná;

<sup>7</sup> y chë ley abuatambayënga y fariseunga chiñe imojtserrondana jinÿama nderado Jesús chë ochnayté chábioye tabuanjashna, as chca chënga jtsebomnama ndaye sóyeca Jesús mal jaquédana.

<sup>8</sup> Pero Jesús chëngbe juabna yojtsetátšëmbo; asna chë buashana cucuatše bomna boyabásabioye tbojaniyana: “¡Motsbaná y chentše tsëntsaca motsa ca!” Y chë entšá yojotsbaná y entsangbe tsëntsaca yojotsaye.

<sup>9</sup> Chora Jesús chë ínÿengbioye tojanëyana: “¿Ndayá yojtselesenciana ochnayté jamana, canÿe tšabe soye o canÿe ndoñe tšabe soye? ¿Jatsbocana o jtsepochócana ca?”

<sup>10</sup> Y nÿetscanga chabe chabuajana imojtsemnënga tojanëñyanÿé, y chë buashana cucuatše bomnábioye tbojaniyana: “Macuenÿanëjaná ca.” Y chë boyabása tojanacuenÿanëjaná, y tšabá chëtša yojtsatamna.

<sup>11</sup> Pero chë ínÿengna puerte tmojanotjayaná, y tmojanontšé enatsëtsnayana ndayá muanjobenaye Jesusbe contra jamana ca.

*Jesús chë bnëtsana uta uatsjëndayënga tojanabacacá  
(Mt 10.1-4; Mc 3.13-19)*

<sup>12</sup> Chë tempo, Jesús tjoye tojána Bëngbe Bëtsáftaca jencuéntama; y nÿets ibeta cháftaca tbojanencuentá.

<sup>13</sup> Tojanbinÿna ora, chabe ústonënga tojánachembo, y chënguentšana tojanëbuáyana bnëtsana uta uatsjëndayënga, chë ndëmuanÿenga “chabe ichmónënga cánaca” tojanëbobaye.

<sup>14</sup> Chënga imojamna: Simón, chë Pedro cánaca Jesús tbojanabobayá; Andrés, Simonbe catšata; Santiago y Juan, Felipe y Bartolomé,

<sup>15</sup> Mateo y Tomás, Santiago, Alfeobe uaquiñá; Simón, chë celote ca uabobainá;

<sup>16</sup> Judas, Santiagbe uaquiñá; y Judas Iscariote, chë más chcoye, Jesús uayayëngbe cucuatšiče bochjanboshjoná.



*Jesús ba entšanga yojanabatambá y yojánashnaye  
(Mt 4.23-25)*

17 Chentšana, Jesús chëngaftaca chë tjocana tojtantsmá y canye jachañe tojanoquedá ba chabe ustonëngaftaca y ba inye entšangaftaca. Ba entšanga choye tmojánabo Judeocana, Jerusalenocana y Tiro y Sidón, chë mar béjaye béconana pueblënguentsana, Jesúsbioye oído jabaújuama y chëngbe šocanëngama chauashnama.

18 Y chábeyeca chë bacna bayëjbe juabna uambayënga tšabá imojtsatsmëna.

19 Njetsca entšanga tša imojtseboše y ndayánaca imojtsama Jesús jabojuama, er chábensana bëts obenana yojtsóbocana y njetscanga yojtsashnaye.

*Chë ndegombre oyejuayana bomnënga y ndëmuanyëngbiama  
tša lastema yochtsemna  
(Mt 5.1-12)*

20 Jesús chabe uatsjëndayëngbioye tojanontješé y tojanëyana: “Puerte oyejuayënga tšëngaftanga, chë quem luarentša soyënga ndbomnënga, er Bëngbe Bëtsabe amëndayentša soyënga tšëngaftangbiama entsemna ca.

21 “Puerte oyejuayënga tšëngaftanga chë mora oshëntsiyënga, er becá šmochantóshachaye ca.

“Puerte oyejuayënga tšëngaftanga chë mora šmošachenga, er chentšana šmochántsaténbiajuaye ca.

22 “Puerte oyejuayënga šmochtsemna, entšanga chacmojtšëbuayënja ora, chacmojtšatëbuacana ora, chacmojtšëyanguá ora, y tšëngaftanga ndoñe tšabá šmontsama ca chënga chamojtsichamo ora, tšëngaftanga atšbe ústonënga bëtsemnama.

23 Chë te puerte šmochjóyejuaye, er celoca canye bëts uacanánana šmochántsebomna. Chëngbe bëts taitanga, cachcá chë Bëngbe Bëtsabe juabna oyebuambnayëngaftaca tmonjanma ca.

24 “Pero itša lastema tšëngaftanga bomnëngbiama, er mora oyejuayënga jtsemnama ya bëtscá šmojóyëngañe ca!

25 “¡Tša lastema tšëngaftanga chë mora shachanëngbiama, er shëntsana šmochántsebomna ca!

“¡Tša lastema tšëngaftanga chë mora oyejuayëngbiama, er ngmënama šmochanjenóbošachna ca!

26 “¡Tša lastema tšëngaftangbiama njetsca entšanga tšabá chamojtsoyebuambná ora; er cachcá chëngbe bëts taitanga monjánama chë Bëngbe Bëtsabe ndoñe ndegombre juabna oyebuambnayëngaftaca ca!” —Jesús tojanëyana.

*Chë uayayëngbiama bonshánana jtsebomnana  
(Mt 5.38-48; 7.12)*

27 “Pero tšëngaftanga, átšbioye ouenanënga cbëyana: Tšëngaftangbe uayayënga šmochtsababuányëshana; chë tcmojtsëbuayënjëngbiana tšabe soyënga šmochtsama;

28 chë tšëngaftangbiana bacna soyënga bošëngbiana, Bëngbe Bëtsá šmochtseimpadana tšabe bendicionënga chamóyëngacñama; chë tcmojóyanguanguëngbiana, Bëngbe Bëtsá šmochtseimpadana.

29 Nderado ndánaca cányoica tcmojajuebjantšetase, cochjomiye chë ínyoica cachcá chacmomama; nderado ndánaca quëfsaíya tcmojuábocana, cachcá cochjonýaye acbe shabuanguanëjuanaca chauetsácñama.

30 Ndánaca chacmojtjañábioyna, jatšetayana; y nda ndayánaca chacmojefcábioyna, ndoñe catjontšínýena chacmatoyema.

31 Inyëngaftaca šmochtsama, ntšamo chë ínýenga tšëngaftangftaca chamotsamama šmojtsebošcá.

32 “Tšëngaftanga, nýe chë tcmojtsababuányëshanënga šmojttsababuányëshanëse, ¿ndaye tšabe soye chca šmattsama?; er chë bacna entšágnaca chca mondbëtsama.

33 O nderado, nýe chë tšëngaftangbiana tšabe soyënga tmojtsamëngbiana tšabe soyënga šmojtsamëse, ¿ndaye tšabe soye chca šmattsama?; er bacna entšágnaca chca mondbëtsama.

34 O nýe chë cmochtëchenanguama šmojtsejuabnángbioye šmojúyentsamëse, ¿ndaye tšabe soye chca šmattsama?; er chë bacna entšágnaca mondbetsenántšamiana, chëngbentsana cachcá jtóyëngacñama jtsobátmanëse.

35 Pero tšëngaftangna cmontsamna chë uayayënga jtsababuányëshanana; y tšabe soyënga chëngbiana jtsamana y júyentsamiana, chëngbentsana ndayánaca jtóyëngacñama ntjatobatmancá. Chca, tšëngaftanga uacanánana cuenta canýe bëts soye šmochanjóyëngacñe, y celoca endmëna Bëngbe Bëtsabe básenga šmochántsemna; Bëngbe Bëtsá chë ndochuanayëngaftaca y bacna entšangftácnaca tšabia comna.

36 Inyëngbiana lastemadënga šmochtsemna, ntšamo tšëngaftangbe Taitá yomncá ca” —Jesús tojánayana.

*Ndoñe ntsichámuana chë ínýenga tšabá o ndoñe tšabá tmonjama*

*(Mt 7.1-5)*

37 “Ndocá ínýengbiana šmattsichamo chë ndoñe tšabá tmontsamama, y Bëngbe Bëtsá ndoñe queochátichamo tšëngaftanga ndoñe tšabá šmonjama ca. Inyëngbiana ndoñe šmattsichamo ndoñe tšabá tmonjama ca, y Bëngbe Bëtsá ndoñe queochátichamo tšëngaftanga ndoñe tšabá

šmonjama ca. Inyenga šmochjáperdonaye y Bëngbe Bëtsá cmochanjáperdonaye.

38 Inyengbioye šmochjatšataye y Bëngbe Bëtsá cmochántatšataye. Mo nda canye biaco medidiñe bëtská tojajutjé, uashëshe y cmojtiyecá, Bëngbe Bëtsá cachcá cmochántatšataye. Ntšamo tšëngaftanga ín'yengbioye chašmojábiamá, uabouana o ndoñe jabuache soyënga, Bëngbe Bëtsá cachcá tšëngaftangbioye cmochanjábiamá ca" —Jesús tojánayana.

39 Jesús quem cuétnaca tojánayana jabuátambama: "¿Canye jtaná nantsobena inye jtaná jtsanachayama? ¿Chca ndoñe nyets útata ndaye tbuabentše buanjótsatše?

40 Chë uatsjendayá ndoñe ntsemnana chë buatëmbayabiama más bëtsá. Pero chabe uatsjëndayana chaojapochocá ora, cach buatëmbayacá jtsemnana.

41-42 "Canya chabe bominyiñe canye niñëfja tojtsebomñese, cha ndoñe ntsobenana chabe catšátbioye jauyanana: 'Acbe bominyëntšana canye polvështema jtsebuchjátsécama šmolesenciá ca'. Natsana cha bontsemna cachabe bominyëntšana chë niñëfja jtsenobuchjátsécana, tšabá jin'yama jobenayama, chabe catšatbe bominyëntšana chë polvotema jtsebuchjátsécama. ¡Cachcá entsemna acbiama, bacna entšá chë ntšamo ndegombre tcojuabnacá ndin'in'yayá! Chë tša bacna soye cojtsama ca acbe catšátbioye tcojauyana ora, cach aca tša bëts bacna soyënga cojtsamama ntjenojuaboycá; y chca, aca jamana canye bacna soye. Natsana cmontsemna chë cach aca ndoñe tšabe soyënga cojtsamama ngmënaca jshatenójuaboyana y chca amana jshétsajbanana, y chentšana cocayé cochantsobena acbe catšata juajabuáchana ntšamo tšabá yomncá chaotsamama ca" —Jesús tojánayana.

*Tšabe betiye o ndoñe tšabe betiye tondmënama, jtsotatšëmbuana ntšamo tojashajoncá*

*(Mt 7.17-20; 12.34-35)*

43 "Ndoñe queon'ybatšmëna, chë canye tšabe betiyiñe podesca soye jashájonana; ni canye ndoñe tšabe betiyiñe tšabe soye jashájonana.

44 Betiyënga jtsabuatmana ntšamo cada betiye tojtsesha-jcá. Uchmašshentšana quenátopodena higuëbé jocñana; ni uvašëša, shëshëntša betiyëntšana.

45 Chë tšabe entšana, chabe ainanoca tšabe juabnënga bomnentšana jtsóyebuambnayana; y chë bacna entšana, chabe ainanoca ndoñe tšabe juabnënga bomnentšana jtsóyebuambnayana. Er ndayá becá ainanoca tomnama entšá jtsóyebuambnayana ca" —Jesús tojánayana.

*Chë uta ucuatjoniñe**(Mt 7.24-27)*

<sup>46</sup> “¿Ndáyeca tšëngaftanga atše šmnétsatsaye, ‘Utabná, Utabná ca’, y ntšamo atše stsicamcá ndoñe ntsamana?

<sup>47</sup> Cbochanjáuyana ndacá yomna nda átšbioye tojabo, atšbe palabra tojouena y ntšamo stsicamcá tojtsama:

<sup>48</sup> Cha endmëna mo canýe entšacá, nda canýe yebna jaje-buamna becá fshantse jashenoye yojajutjo y ndëtsbenguíñe yojúcuatjoye. Bëjayënga yojtsóftjajna ora, chë yebnëjana yojobuachnëngo, pero ndoñe yonjobenaye juashajayana, er chë ndëtsbenguíñe jabuache yojaúcuatjona.

<sup>49</sup> Pero nda atšbe palabra tojouena y ntšamo stsicamcá ndoñe tontsama, endmëna mo canýe entšacá, nda canýe yebna yojajebo nýe fshantsiñe, tondayiñe ntjucuatjoycá. Bëjaye yojóftjango y jabuache chë yebnoye yojobuá ora, chë yebna yojtsáshajaye y lempe yojtsopochóca ca” —Jesús tojánayana.

**7**

*Jesús canýe Romano soldadëngbe amëndayabe bochich-nayábioye tbojanshná*

*(Mt 8.5-13)*

<sup>1</sup> Entšángbioye chca jáuyanana tojanpochocá ora, Jesús Capernaum puebloye tojána.

<sup>2</sup> Chentše yojoyena canýe romano soldadëngbe amëndayá. Cha ibnabomna canýe bochichnayá puerte bonshaná, y chora cha šocá yojtsemna, ya jtsóbanama.

<sup>3</sup> Jesús ba šoquëngbioye yojáshnama encuéntayana chë amëndayá yojouena ora, báseftanga bëtsëjemëngcá amëndayënga cha tojanichamó, chauábama Jesús jaimpádama y chabe bochichnayábioye chabotseshnáñama.

<sup>4</sup> Chënga Jesúsbioye tmojánashjango y tša imojtseimpadana, mëntšá: “Quem soldadëngbe amëndayá merecido entse-buájona chacotsájabuachama;

<sup>5</sup> er cha bëngbe luarentša entšángbioye corente endábabuanýeshana, y cachá chë bëngbe enefjuana posada šonjayentšjebo ca.”

<sup>6</sup> Jesús chëngaftaca tojána. Pero chë mandayabe yebnoye imojtsebeconá ora, chë soldadëngbe amëndayá básefta amiguënga yojichamuá, Jesúsbioye mëntšá chamuauyanama: “Atšbe Utabná, ndoñe yapa matenócochinýenana átšbioye jabama. Atše merecido taitsatobuajoñe aca atšbe yebnoye chacuamashënguama;

<sup>7</sup> chíyeca ni mo añemo chiyatentšetá jama aca jajébenguama. Morna nýe cochjayana y atšbe bochichnayá tšabá echántatsmëna.

<sup>8</sup> Er atše sëndábamna átšbioye mándayënga y átšnaca soldadëngbe amëndayá sëndmëna. Atše canýe soldádbioye stjauyana ‘motsa ca’, cha cachora jana; y ínýabioye stjauyana ‘mabo ca’, cha cachora jabana; y nderado atšbe bochichnayábioye ndayánaca chaomama stjamánda, chánaca cachora chë soye jamana ca” —cha yojáuyana.

<sup>9</sup> Jesús chca tojanuena ora, chë mándayabiama yojenjnaná, y jobuértanëse chë ba entšanga cha ustonëngbioye tojanëyana: “Ndegombre cbëyana, ni mo nýets Israelentše, ni canýa quem boyabasacá tša ošbuachiyá chiyátinýena ca.”

<sup>10</sup> Y chë ichmónënga yebnoye tmojtaná orna, tmojáninýena chë bochichnayá ya tšabá yojtsatsmëna.

*Jesús tojanma canýe viudabe uaquiñá cháuatayenama*

<sup>11</sup> Chca tojanopasá chentšana, Jesús yojétsaye Naín ca uabaina puebloye, y cháftaca chabe uatsjëndayënga y ba entšanga imojtsaye.

<sup>12</sup> Chë pueblo amashjuanoye yojtsebeconá orna, entšanga chë pueblentšana canýe obaná imojtsábocana jauátbontsama; chë obaná canýe viudabe uaquiñá inamna y nýe cha uaquiñá. Bëtská entšanga chë obanabe mamá imojtsetjëmbambnaye.

<sup>13</sup> Bëngbe Utabná chë viudábioye tbojáninýe ora, chabiamá tbojanongmé y tbojanianyana: “Ndoñe matošachena ca.”

<sup>14</sup> Y jobéconase, chë ataúse tojánbojajo, y chë obaná atambayënga tmojantsá. Y Jesús chë obanábioye tbojanianyana: “Bobontse, atše cbëyana: ¡Matëtsbaná ca!”

<sup>15</sup> Chora chë obaná tojtantsbaná y tojanontsé oyebuambnayana; y chabe mamábioye Jesús chë bobontse tbojtánátse.

<sup>16</sup> Nýetsca entšanga tša uatjana yojubuache chca tmojáninýe ora, y Bëngbe Bëtsá imojtsatschuanaye, mëntsá jayanëse: “Bëngbentše canýe Bëngbe Bëtsabe juabna oyebuambnayá cuatënjonýná ca.” Y mëntsánaca: “Bëngbe Bëtsá tojabo chabe entšanga jabújabuachama ca.”

<sup>17</sup> Y nýets Judea luarëjana y chë chábuañe luarenache entšanga imojátatšëmbona ndayá Jesús tojanmama.

*Juan chë Ubayanabe ichmónënga  
(Mt 11.2-19)*

<sup>18</sup> Juan, lempe ntšamo Jesús yojtsamama yojátatšëmbona; er chabe ústonënga chama tmojancuentá. As Juan, chënguentšana útata tojánachembo,

19 y Jesúsbioye yojichamuá jatjayama cha tayojamna chë Cristo, chë jabama ibojanmëná, chë Uámana Uabuayaná, o ínÿabiama jatobátmama tajojétsamna ca.

20 As chë Juanbe ichmónënga Jesúsbioye tmojanobeconá y tmojaniana: —Juan chë Ubayaná šonjichamo jatjayama, aca ndegombre cojtsemna chë Cristo, chë jabama ibojanmëná, o šojtsamna ínÿabiama jatobátmama ca.

21 Chë ichmónata tbojánashjango ora, Jesús banga yojtsash-naye, šocanëngama y tsetšanëngama; bacna bayëjbe juabna uambayënga tšabá imojtsatsmëna, y jtanënga tšabá yojt-satëbinÿna.

22 Chora Jesús mëntšá tojanëjua: —Motsata y Juánbioye šochjauyana ntšamo šojinÿe y šojouencá: Chë jtanënga tšabá entsatëbinÿna, chë coshetënga tšabá montsatana, chë bacna nguayanánaca šoquënga shnánënga montsatsmëna, chë tësmënga montsuenana, chë obanënga tmontayena, y chë ndbomnjémëngbioye chë tšabe noticiënga montsabuyaiyná.

23 ¡Puerte oyejuayá chaotsemna, nda atše ndoñe bacna soye stsama ca jtsejuabnayëse, átšbeñe ošbuáchiyana ndoñe tontsajbaná cha ca! —Jesús tojanëyana.

24 Chë Juanbe ichmónata chentšana tbojésanbocnentšana, Jesús tojanontsé Juanbiana entšanga jáuyanana, mëntšá: “Juan jinÿama šmojánbocna ora, ¿ndayá jinÿama šmojánbocana entšanga ndoyena luaroye? ¿Canÿe entšá ainaniñe tondaye añemo ndbomná, mo canÿe šëše bínÿiaca shatiyeynëšcá?

25 Y ndóñese, ¿ndayá jinÿama choye šmojánbocana? ¿Canÿe boyabása uámana entšayaca bopormaná? Ndoñe. Tšëngaftanga šmondëtatšëmbo chë uámana entšayaca bopormánënga y chë bëtscá bomnánaca nÿe tondayama ntsecochinÿencá vida bomnëngna, reyëngbe yebnënguiñe mondbëtsiyenama.

26 Asna, ¿ndayá jinÿama choye šmojánbocana? ¿Canÿa Bëngbe Bëtsabe juabna oyebuambnayá? Ndegombre; y cbëyana, canÿa Bëngbe Bëtsabe juabna oyebuambnayabiama más bëtsá.

27 Cha, Juan, endmëna ndabiama Bëngbe Bëtsá chabe uabe-mana palabrénguiñe tojánayana mo chabe ichmonacá, mëntšá tojánayana ora:

Cristo, atšbe entšá natsana sënjichmó acbiama chaóyebuambama,

entšanga jábuayenama aca jabama ainaniñe tšabe juabnëngaca chamotseprontánama ca.

28 Ndegombre cbëyana: Nÿets tempo entšángbeñe, ndocná quenátsmëna Juan chë Ubayanabiama más bëtsá; masque chca, Bëngbe Bëtsabe amëndayoca chë más batšá uamaná, cha

más bëtsá echántsemna ntšamo mora Juan yomnama ca” – Jesús tojánayana.

<sup>29</sup> “Nÿetsca entsanga chca Juánbioye tmojanóyeunanga y chë Romocama entsángbioye impuesto atjanayëngnaca, nÿets ainánaca tmojánayana Bëngbe Bëtsá nÿetsca soyënguiñe tšabá amá yomna ca; er tmojánenabaye ntšamo jubáyama Juan yojanamancá.

<sup>30</sup> Pero chë fariseunga y ley abuatambayënga, ntšamo jubáyama Juan yojanamancá jóyëngacñama ndoñe tmonjánbošena ora, tmojtsanaboté ndayá Bëngbe Bëtsá chëngbiama jamama yojanjuabnacá.”

<sup>31</sup> Jesús mëntšánaca tojánayana: “Cbochanjáuyana ndayacá morsca entsanga imomna, y ndayëngcá chënga imomna.

<sup>32</sup> Chënga mondmëna mo chë plazëngoca mondbetsetbiámana basetemëngcá; chëngna mëntšá jabuache jtseatsayana: “Tšëngaftangbiama fsënjaflautá y ndoñe chešmatslantsá; ngmënaca fsënjaversiá y ndoñe chešmatenóbošachna ca.”

<sup>33</sup> Juan chë Ubayaná tonjánabo y ndoñe quenjatamana bëtscá entsángbeñe jtsemnana, ni tandëse jasana, ni vínoye jofšiyana; y tšëngaftanga šmontsichamo chana bacna bayëjbe juabna uambayá inamna ca.

<sup>34</sup> Morna, chë Bëngbe Bëtsá Entšá tbojanbemá tonjabo y chana aiñe entsamana bëtscá entsángbeñe jtseayana y jtsofšëšnayana, y tšëngaftanga chabiama šmontsichamo: ‘Chana yapa uasayá y vínoye tmoyá entsemna y Romocama entsángbioye impuesto atjanayënga y bacna soyënga amëngbe amigo ca’.

<sup>35</sup> Pero Bëngbe Bëtsá endbétsinÿinÿnaye cha nÿets osertánana bomná yomnama, chë ndayá cha tojama ora ndayá chentsana inobocna soyëngaca ca” – cha tojánayana.

### *Jesús, chë fariseo Simonbe yebnentše*

<sup>36</sup> Canÿe fariseo Jesúsbioye tbojanofja saná jauasama, y Jesús chabe yebnoye tojána y mesëshentše yojótbema.

<sup>37</sup> Chë pueblentše yojamna canÿe shembása, bacna vida bomná. Jesús chë fariseobe yebnentše yojtsesama chë shembása yojátatsëmbona; as cha chë yebnoye tojánashjango y tojanamba canÿe alabastro botellëše, jútjena canÿe botamana uanguëtše bëjayeca.

<sup>38</sup> Jesusbe shecuatšentše yojoshëntsamentsiye, šachénaca; shëchbuíyeca chabe shecuatšënga yojtsefchecuacná y cachabe stjënashaca ibojtsatsshëcbojuaye. Chabe shecuatšënga yojtonguëtsëntsiye y chë botamana uanguëtše bëjaye ibojtashecbuéscacja.

39 Chë fariseo Jesúsbioye ofjaná chca tojáninÿe ora, mëntšá Jesusbiana yojtsejuabnaye: “Cha ndegombre canÿe Bëngbe Bëtsabe juabna oyebuambnayá tojtsemnëse, nantsetátšëmbo nda y mocna shembása yomna chë bontsebana shembása: canÿe bacna vida bomna shembása ca.”

40 As Jesús chë fariséobioye tbojaniana: —Simón, cuentado palabra šmotsoyeuná ca.

Y chë fariseo tbojanjuá: —Arseñor, Buatëmbayá ca.

41 Y Jesús tojánayana: —Canÿe entšá crocénana uyentšamianá, uta ndebénata yojánabamna. Canÿa shachna patse denario crocénana ibojandebena, y chë ínÿana, shachna bnëtsana.

42 Pero chë útata tondaye ibontsebomna ndayentšana cha jëtsëntšabuáchiyama; as chë uyentšamianá nÿets útata chë ndebénana yojtsaperdónaye.

Chora chë fariséobioye tbojaniana: —Mora šmëyana, ¿chë útatentšana nda más chë uyentšamianábioye buantsebobonshana ca?

43 Y Simón tbojanjuá: —Atše šontsinÿana chë más bëtsca ndebená ca.

Y Jesús tbojaniana: —Ndegombre, ntšamo endmëncá t-jayana ca.

44 Jesús, chë shembásabioye jontješiyëse, Simónbioye tbojaniana: —Minÿe quem shembása. Atše acbe yebnoye sënjámashëngo y aca búyeshe ndoñe chešcatabuatsëtá atšbe shecuatšëngama. Y quem shembásana, cachabe shëchbuíyeca šontseshecjabe y chabe stjënashaca šontseshecbojó.

45 Ndoñe chešcatámocho, pero cha tonjámashëngo orscana ndoñe ntjájbanana atšbe shecuatšënga onguëtsëntšnaye.

46 “Aca bestšašaiñe aceitiye ndoñe chešcatsbuešcja, y chana aiñe botamana uanguëtše béjaye šonjashecjbuešcja.

47 Chcasna atše cbëyana, cha šonjinÿanÿé atšbiana corente bonshánana yojtsebomna, er atše chabe bëtsca bacna soyënga sëntseboperdoná; pero nda nÿe básefta bacna soyëngama stjaperdóna chana, nÿe batšatema bonshánana jtsebomnana ca.”

48 Y chora Jesús chë shembásabioye tbojaniana: “Acbe bacna soyëngama perdonaná contsemna ca.”

49 Chora chë ofjanënga chentše imnatbiámanëngna tmojanontsé enatsëtsnayana: “¿Nda quem entšá yojtsemna, chë bacna soyëngámna entšángbioye jtsaperdónayana ca?”

50 Y Jesús más chë shembásabioye tbojaniana: “Aca átšbeñe icošbuachéyeca, atsbocaná cochántsemna; natjëmbana motatoñe ca.”



## 8

*Chë Jesúsbioye imojanájabuachana shembásenga*

<sup>1</sup> Chca tojanopasá chentšana, Jesús bêts y base pueblënguëjana yojánana, tšabe noticiënga Bëngbe Bëtsabe amëndayama entšanga abuátambaye y abuayiynaye. Chë bnëtsana uta uatsjëndayëngna cháftaca imojtsajna.

<sup>2</sup> Básefta shembásengnaca imojtsetjëmbambnaye; chëngbentšana Jesús bacna bayëjënga tojtanëbuacna y šocanëngama tojanashná. Chënga imojamna, María chë Magdalena ca uabobainá, ndábentšana Jesús canÿsëfta bacna bayëjënga tojtanëbuacna;

<sup>3</sup> Juana, Cuzbe shema (Cuza yojamna rey Heródesbe canÿe uajabuachaná); Susana y inÿe shembásenga; chëngna chë imojánbomna soyëngaca chëngbioye imojanëjabuáchana.

*Chë jenabe cuento*

(Mt 13.1-9; Mc 4.1-9)

<sup>4</sup> Ba pueblënguentsana mallajta entšanga tmojánbocana Jesús jinÿama. Ba entšanga jouenama tmojanobeconá ora, Jesús mëntsá tojanacuntá:

<sup>5</sup> “Canÿe, canÿe jená jénaye jaujqüëshama yojëftsebcna. Yojtsëjqüëshaye orna, básefta jénaye benache juachañe yojuatquëcjana; chiñna entšanga imojtsebotájaye, y jaja shloftšënga imojástjajna y imojtsósañe.

<sup>6</sup> Inÿe meshëngna ndëtšbenguiñe yojuatquëcjana. Yojuábocna orna, betscó yojtsábojo, chë fshantsiñe ndoñe yapa búyeshe yonjamna causa.

<sup>7</sup> Inÿe meshëngna ucmëshangañe yojuatquëcjana y chë ucmëshangá lempe yojtsatscué, chë jénayeca cánÿiñe yojuábocna ora.

<sup>8</sup> Inÿe meshëngna, uanguaniñe yojuatquëcjana. Yojuájua orna, bëtscá yojuashájona; canÿe jénayentsana nÿa mo patse meshënga yojuashájona.”

Jesús chca jacuéntama tojanpochocá ora, tojanáyebuachena: “Chë jouenama tmojtsobenënga, šmochjouena ca.”

*Ndáyeca Jesús cuentëngaca yojánabuatambaye*

(Mt 13.10-17; Mc 4.10-12)

<sup>9</sup> As chora chabe uatsjëndayënga tmojantjá: —¿Ntšamo chë cuento yojtsayana ca?

<sup>10</sup> Y Jesús tojanëyana: —Bëngbe Bëtsá tšëngaftanga cmontsinÿanÿná nÿetsca chë mo iytemencá yomna soyënga chabe amëndayama, pero chë inÿëngbioyna ndoñe; chë soyëngama chënga lempe cuentëngaca sëntsëtsëtsná. Chca, masque corente chamotsafšna, ndoñe chamondobená

Bëngbe Bëtsabe soyënga jinÿama; y masque becá quem soyënga chamouena, ndoñe queochátësertana ca.

*Jesús chë jenabe cuentama tojanabuayená*  
(Mt 13.18-23; Mc 4.13-20)

11 “Chë cuento mëntšá endayana: Chë jénaye Bëngbe Bëtsabe palabra entsemna.

12 Chë benache juachañe yojuatquécjana básefta jénaye endayana chë básefta entšanga Bëngbe Bëtsabiama soyënga tmojouenënga; pero chora Satanás betscó jabana chënga Bëngbe Bëtsabe palabra jabëtsabuajuanama, chca, chënga ndoñe chamondëtsošbuáchema y bacna soyënguentsana ndatsebácanënga chamotsemnana.

13 Inÿe entšanga mondmëna mo chë ndëtšbenguinë yojuatquécjana jenaycá. Chë entšangna Bëngbe Bëtsabe palabra jouenana y oyejuayënga jtsemnana. Pero ndoñe nÿets tempo chana jocochájuana; y chca, ndoñe bayté Bëngbe Bëtsáftaca ntjëftsemnëngana, cha ndoñe yapa tmontsašbuaché causa. Inÿenga mochantšëbuayënja y Bëngbe Bëtsábeñe betsošbuáchiyama mochanjasúfrianga; chë causa, Bëngbe Bëtsabe palabra cachcá chënga mochanjesonÿaye.

14 Inÿe entšanga mondmëna mo chë uchmëshangañe yojuatquécjana jenaycá. Chëngna Bëngbe Bëtsabe palabra jouenana, pero quem luarentša soyëngaca oyejuayënga jtsemnana yapa jesenójuabnayana, y mallajta crocénana y ba soyënga jtsebomnana yapa jésebošana; chama y ba soyëngama yapa enócochinÿena causa, Bëngbe Bëtsabe soyëngama echantsebnëtjomba y ndoñe quemochátama ntšamo Bëngbe Bëtsá tojayancá.

15 Inÿe entšangna mondmëna mo chë uanguaniñe yojuatquécjana jenaycá. Chëngna Bëngbe Bëtsabe palabra botamana mochanjouena; tšabe ainánaca Bëngbe Bëtsabe palabriñe jtsošbuáchiyama jtseprontánëngana. Mo canÿe betiye puerta tšabá tojtseshajuancá, chënga bëtscá tšabe soyënga Bëngbe Bëtsabiama mochántsama. Chca mochántsama, Bëngbe Bëtsábeñe jtsošbuáchiyëse y nÿetsca soyënguinë puerta uantadënga jtsemnëse ca” —Jesús tojanabuayená.

*Chë uajuinÿanëshama cuento*  
(Mc 4.21-25)

16 “Ndocná canÿe uajuinÿanëshama juajuinÿenana, chentšana ndaye sóyeca chësha jtsëstama o jutsnëshama tajsoye jtsajájuama; juajuinÿenana ndayá tsbanánoca juajájuama, chë luarentše amashjuanëngbiama chaotsebínÿnana.

17 Er ndocna yoiytémena soye, ntjinýcá queochaisoquéda, y chë entšangbiana ndótatšëmbo soye, ntsotatšëmbcá queochaisoquéda.

18 “Chcasna, botamana šmochjouena, er nda Bëngbe Bëtsabe soyëngama tšabá tbojosertá, Bëngbe Bëtsá echanjama cha más ba soyëngama chabosertama; pero nda chë soyëngama ndoñe tontsebošá, chë nýe batšá ibosertana soyëngama bochántsebnatjëmba ca” —Jesús tojánayana.

*Chë Jesusbe ndegombre pamíllanguentsënga*  
(Mt 12.46-50; Mc 3.31-35)

19 Chora, chabe mamá y chabe catšátanga chë Jesús yojtsemnentše tmojánashjajna, pero ndoñe imontsobena chábioye jobéconana, yapa entšanga causa.

20 As canýa Jesúsbioye mëntšá tbojaniyana: —Acbe mamá y acbe catšátanga shjoca montsemna y montseboše aca jinýama ca.

21 As Jesús tojánayana: —Chë Bëngbe Bëtsabe palabra tmojouenënga y ntšamo tmojouencá tmojtsamënga jtsemnana atšbe mamá y atšbe catšátanga, atšbe ndegombre pamíllanguentsënga ca.

*Jesús chë binýia y chë béjaye bonguana yojëtsbema*  
(Mt 8.23-27; Mc 4.35-41)

22 Canýe te, Jesús chabe uatsjéndayëngaftaca canýe barquëshoye tojánamashëngo y chënga tojanëyana: “Uafjajónaye chenguana cuajna ca.”

As tmojána;

23 y imojtsenachnëjuanëntscuana Jesús yojtsomaná. Ndeolpe, chë béjayiñe corente jabuache binýia yojóshjango y yojontsé béjaye chë barquëshoye jtsobuajútjiana. Y chca, chëngbiana puerte resjo yojtsemna.

24 Chora chë uatsjéndayënga tmojána Jesús jetsefšenama y mëntšá tmojaniyana: —¡Buatëmbayá! ¡Buatëmbayá! ¡Montsenatjëmbambana ca!

Chora Jesús tojantsbaná y chë binýia y chë bëts olëshëngoye tojanmandá: “Bonguana šochtsemna ca.” Y chë binýiayana tojanëjbana y lempe bonguana yojtsatsmëna.

25 Chentšana Jesús chabe uatsjéndayënga tojanëyana: —¿Bëngbe Bëtsá tšëngaftanga jujabuáchama yobenama, cabá ndoñe šmontsošbuaché ca?

Y chënga auatjanánënga y ojanánënga mëntšá imojtsenatsëtsnaye: —¿Nda quem boyabása yomna? ¡Cha tojamandá ora, masque chë binýia y chë béjaynaca joyeunayana ca!

*Chë Gerasa luaroca bacna bayëja uambayá*  
(Mc 8.28-34; Mc 5.1-20)

26 Chentšana Gerasa ca uabaina luaroye tmojánashjajna, Galilea ndirichiñe.

27 Jesús fshantsoye tojánastjango ora, chë pueblcana canÿe entśá chábioye tojánabo. Cha ya bayté bayëjbe juabna yojtse-bomna, ndocna entśayá yonjanichëtjona; y yebniñe ndoñe yonjanियena, sinó obanëngbe cuevēshënguenache.

28 Chë entśá, Jesúsbioye tbojáninÿe ora, chabe natsanoica yojshëntsamentšiye y mëntśá yojtsáyebuache: —¿Ndayá átšeftaca cojtseboše, Jesús chë celoca Bëngbe Bëtsabe Uaquiñá? ¡Dios-manda ndoñe šcatjatsetšená ca!

29 Chca tbojanियana, er Jesús tojanmandá chë bacna bayëjbe juabna chábentšana chauesebocnama. Ba soye chë bayëja yojánama chë entśá ndoñe tšabá chaotsemnama. Chë entśanga imojuamana cucuatšentšana y shecuatšentšana cha jtsëtsbuayana bonguana chaotsemnama, pero chana jtsa-tabebiana, y chë bacna bayëjbe mándoca entśanga ndoyena luarëngoye yojánachana.

30 Jesús chë boyabásabioye tbojantjá: —¿Ntšamo cabaina ca?

Y cha tbojanjuá: —Atše sënduabaina Legión ca.

Cha chca tojánayana, er chábeñe ba bacna bayëjenga tmojánamashjna.

31 Y chë bayëjenga Jesús tmojanimpadá, chë corente uabouana tboye ndoñe chaondíchamuama.

32 Chentša béconana ba cotšënga imnajena, tjoca imnétsosañe; as chë bayëjenga Jesús tmojanimpadá chë cotšëngbeñe jamashjnama chaualesenciama, y Jesús aiñe chca tojanalesenciá.

33 As chë bayëjenga chë entśábentšana tmojésanbocana y chë cotšëngbeñe tmojánamashjna; y chentšana, chë cotšënga batsjocana peñëšëjana uafjajónayoye imojtsoshbuetše y yojt-satajo.

34 Chë cotšënga anÿenënga chca yojopásama tmojáninÿe ora, chentšana tmojtsanacheta y tmojána chë soye jacuéntama chë puebloca y chiñe luarenache.

35 Entśanga tmojánbocana ndayá tojanopasacá jinÿama, y Jesús yojtsemnoye tmojánashjajna ora, tmojáninÿe chë entśá chë ndábentšana bayëjenga tmojtanbocna, Jesusbe shecu-atšentše yojtsótbemañe, entśayá uichëtjoná y chabe nÿets juábnaca. Y chë entśanga chama corente imojouatjaná.

36 Ntšamo yojopasacá tmojáninÿëngna entśángbioye tmojanacuntá ntšamo chca chë bacna bayëjbe juabna uambayá chora ya tšabá yojtsatsmënana.

37 Chentšana, nÿetscanga chë Gerasa luarentše oyenënga Jesúsbioye imojtseimpadana chë luarentšana ínÿoye chaot-

soñama, er chënga corente imojtsauatja. As Jesús chë barquëshoye tojtanamáshëngo y chentsana tojtsanoñe.

38 Chë entsá chë ndábentsana bacna bayëjënga tmojtan-bocana, Jesúsbioye tbojanimpadá cháftaca jama chabolesenciama; pero cha ndoñe tbonjanlesenciá. Jesús tbojanmandá chauatoquedama y mëntsá tbojaniana:

39 “Acbe yebnoye motsatoñe y cochjácuntaye lempe ntšamo Bëngbe Bëtsá acbiama tojamcá ca.”

Chentsana chë boyabása vojtsatoñe, y nyëts pueblëjana tojanacuntá ntšamo Jesús chabiama tojanmcá

*Jesús canye shembásabioye tbojanshná y tojanma Jairëbe bembetema cháuatayenama*

*(Mt 9.18-26; Mc 5.21-43)*

40 Jesús chë uafjajónaye chenguánoica tojtanashjango ora, nyëtsca entsanga oyejuayënga tmojtanofja, er nyëtscanga chabiama imojanobátmana.

41 Chora tojánashjango canye entsá, Jairo ca uabainá. Cha inamna chë pueblentse chë judiëngbe enefjuana yebnentša mandayá. Jesusbe shecuatšentse vojshëntsamentsiye y ibojtseimpadana chabe yebnoye cháuama;

42 er chë nye canye bembe cha ibnabomná, bnëtsana uta uata bomná, chora ya jóbanama yojtsemna.

Y Jesús vojtsayëntscuana, chë entsanga chábioye imojtsojuatsëntšenaye.

43 Chë entsanguentse vojtsaye canye shembása, oboftjajuanánaca šocá; cha ya bnëtsana uta uata chca inapadecena. Lempe ntšamo yojanbomncá ashnayëngbioye atóbocayifne yojtsepochóca, y ndocná yonjobenaye cha jáshnana.

44 Chë shembásana stëtšoicana Jesúsbioye vojjobeconá y chabe entsayá sibuájua tojanábojajo. Y cachora chë oboftjajuanana ibojtsobojuána.

45 Chora Jesús tojanatjá: —¿Nda šjabojajo ca?

Nyëtscanga imojtsichamo ndoñe ca; as Pedro tojánayana: —Buatëmbayá, entsanga cmontsatsëntšená y cmontsayájuatsëntšenaye ca.

46 Pero Jesús cachiñe tojánayana: —Pronto nda šojábojajo, er atše sënjasenté obenana átšbentsana jóbocnana, mo nda stjashna orcá ca.

47 Chë shembása tojáninye Jesús yojtsetátšëmbo cha tbojánbojajuama. As chora, ngmëmnyá tojána y Jesusbe shecuatšentse vojshëntsamentsiye; y nyëtscangbe delante tojanobuambá, ndáyeca tbojánbojajuama, y ntšamo cachora tšabá tojtanoquedama.

48 Chora Jesús tbojanianana: —Bembe. Bëngbe Bëtsábeñe icošbuachéyeca shnaná contsatsmëna. Natjëmbana mot-satoñe ca.

49 Jesús cabá yojsóyebuambnantscuana, chë judiëngbe ene-fjuana yebnentša mandayábiocana canya tojánashjango, y chë mandayábioye tbojanianana: —Acbe bembe ya tontsóvana; ndoñe más chë Buatëmbayábioye matébëyabomana ca.

50 Pero Jesús chë soye tojanuena; as chë mandayábioye tbojanianana: —Ndoñe matauatjana. Nye Bëngbe Bëtsábeñe cochtsošbuáchiye y acbe bembe tšabá echántsatsmëna ca.

51 Chë yebnoye tmojánashjajna ora, Jesús ndoñe tonjanales-enciá banga choye jamashjna, nye Pedro, Juan y Santiago y chë shembásetembe bëtsëtsatna aíñe.

52 Nyetscanga imojsenóbošachiye y ngménaca imojsóyebuambnaye, pero Jesús tojanëyana: “Ndoñe matenóbošachengana. Cha ndoñe chenatóvana; cha nye endëtsomañe ca.”

53 Chë entšanga Jesúsbioye nye imojsáfchaye, er chënga imo-jtsetátšëmbo chë shembásetema obaná yojetsemnama.

54 Chora Jesús chábioye tbojanábuacueshache y jabuache tbo-janianana: “¡Shembásetema, matëtsbaná ca!”

55 Y cha tojtanayena y cachora tojtantsbaná; y Jesús to-janamëndá chë shembásetema saná chamuajuatšé, chaosama.

56 Chë shembásetembe bëtsëtsata puerte ojanánata ibojtsemna; y Jesús tojanamëndá, ndayá tojanopasama ndocnábeñe ntsecuëntayana.

## 9

*Jesús, chabe uatsjëndayënga tojanichamó, Bëngbe Bëtsabe amëndayama jábuayenama*

*(Mt 10.5-15; Mc 6.7-13)*

1 Chentšana, Jesús chabe bnëtsana uta uatsjëndayënga tojánachembo, y mando y obenana tojanatšatá bacna bayëjënga entšángbentšana jtëbuacanama y šocanëngama jashnayama.

2 Tojanichamó Bëngbe Bëtsabe amëndayama jábuayenama y entšángbioye jashnayama.

3 Y mëntšá tojanëyana: “Benachiñama tondaye šmattsambaye: ni jatjonëfja, ni shecnaja, ni saná, ni crocénana; ni inye entšëjua jenotrócama cach ndoñe.

4 Canye yebnentše posada chacmojúyentšame ora, chentše šmochjoquéda inye puebløye játantscuana.

5 Nderado ndayentše posada ndoñe chacmonjuyentšame, chentšana šmochjësebocana y shecuatšentša polvëshe šmochjësenstoto, chca, chëngbioye jinyanjyama chënga

ndoñe tšabá tšëngaftangaftaca tmonjamama ca” —Jesús tojanabuayená.

<sup>6</sup> Asna chë uatsjéndayënga tmojëftsanbocana y tmojána, nyetsca chë base pueblotémënguenache chë tšabe noticiënga abuayiynaye y entšanga šocanëngama áshnaye.

### *Herodes y Jesús*

*(Mt 14.1-12; Mc 6.14-29)*

<sup>7</sup> Jesusbiamá y ntšamo yojtsanopasánama rey Herodes tojántatšëmbona; y ndoñe yontsetátšëmbo ntšamo jtsejuabnayana, er báseftanga imojtsanichamo Juan chë Ubayaná obanënguentsána tojtanayena ca,

<sup>8</sup> Ínyënga imojtsanichamo chë Bëngbe Bëtsabe juabna oye-buambnayá Elías cachiñe tojánbocna ca, y ínyëngna canya chë tempo imojanmëna Bëngbe Bëtsabe juabna oyebuamb-nayënguentsá obanënguentsána tojtanayena ca.

<sup>9</sup> Pero Heródesna tojánayana: “Cach atše sënjanmandá Juanbe bestšaše chamotsëstjanguama. ¿As, nda cha nántsemna, chë ndabiamá chca soyënga jtsóyebuambnayana sëntsuenana ca?”

Chíyeca Herodes yojtsenguaye ntšamo jamëse Jesús jinýama.

### *Jesús shachna uaranga boyabásenga saná tojanacaredadó*

*(Mt 14.13-21; Mc 6.30-44; Jn 6.1-14)*

<sup>10</sup> Chë Jesús tojánichamonga chábioye tmojtanashjango ora, lempe ntšamo chënga tmojanmama tmojancuentá. Y Jesús, nýe chënga jëftsëbiatšese ínyoye tojtsanoñe, Betsaida ca uabaina puebloye.

<sup>11</sup> Pero chë entšanga chë soye tmojántatšëmbona, y as tmojanasto; y Jesusna tšabá chënga tojanëbuaja, y Bëngbe Bëtsabe amëndayama yojtsëtsësnaye, y chë šoquënga imojtsemnëngbioye tojanashná.

<sup>12</sup> Ya jetiñe yojtsobiamná orna, chë bnëtsana uta uatsjéndayënga Jesúsbioye tmojanobeconá y mëntšá tmojaniyana: —Chë entšanga cuantichamuá, jóchnama y saná jonguangoñama chamotsama chë béconana pueblotémënguenache y luarënguenache; er quem luariñe ndocná quenatiyena ca.

<sup>13</sup> Jesús chora tojanëyana: —Tšëngaftanga saná chëngbioye šmochjacaredádaye ca.

Pero chënga tmojanjuá: —Nýe shachna tandëse y uta beónata fsëntsebmna; nýetscangbiamá saná jabuámiyama nderado nda tojasna, aíñe cuanjacaredádaye ca.

<sup>14</sup> Er mo shachna uaranga boyabásenga innamna. Pero Jesusna chabe uatsjéndayënga tojanëyana: —Mamëndá nýetscanga chamotbiamama shachna bnëtsátsanënga ca.

<sup>15</sup> As chënga chca tmojanma y nýetsca entšanga tmojanotbiamá.

16 Chora, Jesús chë shachna tandëse y chë uta beónata tojanca, y celoye tojanontjesé, Bëngbe Bëtsábioye chama tbojtanchuá, tojanjatá y chabe uatsjéndayënga tojanantregá entšángbioye chamuatšatama.

17 Nÿetsca entšanga tmojanse jtoshachaye nÿetsá, y cabá bnëtsana uta sbarëco tmojanajutjé chë ojamnëtëmëngaca.

*Pedro tojánayana, Jesús chë Cristo bétsemnama*  
(Mt 16.13-19; Mc 8.27-29)

18 Canÿe te, Jesús canÿa Bëngbe Bëtsáftaca ibojtsencuéntaye ora, chabe uatsjéndayënga cháftaca imojtsemna. Chora tojanatjá: —¿Nda atše bétsemnama entšanga imojtsichamo ca?

19 Y chënga tmojanjuá: —Báseftanga montsichamo Juan ca, ínÿengna Elías ca, y ínÿengna canÿe Bëngbe Bëtsabe juabna oyebuambnayá tempscá mora tojtayena ca.

20 As Jesús tojanatjá: —Y tšëngaftangna, ¿nda atše bétsemnama ntšamo šmochjayana ca?

Y Pedro tbojanjuá: —Acna chë Cristo condmëna, chë Bëngbe Bëtsabe Uámana Uabuayaná ca.

*Jesús tojánayana cha ibojamna jóbanana y jtayenana*  
(Mt 16.20-28; Mc 8.30-9.1)

21 Pero Jesús corente chënga tojanamëndá ndocnábeñe chama ntsecuéntayana.

22 Y mëntšá cachabiana tojánayana: —Chë Bëngbe Bëtsá Entšá tbojanbemá bontsemna puerte jasúfriana, chë judiëngbeñe bëtšëjemëngcá amëndayëngbiama, chë judiëngbe bachnangbe más uámana amëndayëngbiama y ley abuátambayëngbiama uabotená jtsemnana. Entšanga mochanjóba, pero unga tianoye cha echántayena ca.

23 Chentšana nÿetsca entšanga tojanëyana: “Nda atšbe uatsjendayá jtsemnama tojtseboše, cháuyana nÿe Bëngbe Bëtsá yobena sempre chabe vidiñe jtsemándayama, chabe quem luarentša soyënga cachcá chauesonÿá atše juastama, y cada te chaotseprontana átšbeyeca jasúfriama, y cruciñe jobanámnaca.

24 Nda tojtsama quem luarentše bëtscá soyënga jtsebomnama y atšbiana jasúfriama ndoñe tontseprontana, chë nÿetsca tescama yomna tšabe vida echanjobuetše. Pero nda quem luarentša soyënga cachcá tojëftsonÿá atše juastama, masque chaóbana, chë nÿetsca tescama yomna tšabe vida echántsebonna.

25 Er ¿ndayama entšá buanjóservia nÿetsca quem luarentša soyënga jtsebomnana, cha pochocaná jtsemnama tojtsá y chë nÿetsca tescama yomna tšabe vida tojtsoperdese?

26 Er ndëmuanÿe entšá, atšbiana o atšbe buayenana soyëngama tojtsëuatja, chë Bëngbe Bëtsá Entšá tbojanbemánaca



chabiamá echantsëuatja, cha chabe bëts buashinÿinÿaniñe chaojésabo ora, chabe Taitabe bëts obenánaca y chabe angelotémëngaftaca adoraná.

<sup>27</sup> Ndegombre cbëyana, báseftanga muentse montsemnënga quemochatóbana, Bëngbe Bëtsá chabe obenánaca entsángbeñe jabomándama jabana ntjëttsinÿcá ca” —cha tojánayana.

*Jesús inÿetšá tojanobinÿná*  
(Mt 17.1-8; Mc 9.2-8)

<sup>28</sup> Mëntšá tojanopasá: Chca palabrënga tojanoyebuambá chentsana posuftaytese, Jesús tojëttsanëbiatse Pedro, Santiago y Juan, y canÿe tjoye tojántsjua, Bëngbe Bëtsáftaca jencuéntama.

<sup>29</sup> Bëngbe Bëtsáftaca ibojtsencuéntantscuana, chabe jubíá inÿetšá yojtsinÿna, y chabe uichëtjonëjuangá tša uafjantsëjuangá yojtsamna y tša yojtsabuashinÿinÿana.

<sup>30</sup> Chora uta boyabásata tbojanonÿná, Jesúseftaca ibojtsencuéntaye. Chata ibojamna Moisés y Elías;

<sup>31</sup> corente buashinÿinÿaniñe ibojtsemna, y chënga imojtsencuéntaye ntšamo Jesús Jerusalenoca jasúfria y jóbanana.

<sup>32</sup> Masque Pedro y chabe enutata tša ocnayënga imojtsemna, nÿe imojtsefsna y tmojáninÿe Jesusbe juachañe tša yojtsebuashinÿinÿana y chë uta boyabásata cháftaca ibojtsemna.

<sup>33</sup> Chë uta boyabásata Jesús bentsana ibojoluára ora, Pedro, Jesús bioye tbojaniana: “Buatëmbayá, itša tšabá bëngbiama cuanmëna muentse jtsemnana ca! Mora fchanjapórma unga tambotémënga: cánÿetema acbiama, ínÿetema Moisesbiama y ínÿetemna Elíasbiama ca.”

Pero Pedro ndoñe yontsetátšëmbo ntšamo yojtsichámuama.

<sup>34</sup> Y chca yojtsóyebuambnantscuana, canÿe jantšetëshe yojóbema, y chëngbioye yojáutsbotse, y chënga chë tsoye imojtsemnama tmojáninÿe ora, chë uatsjëndayënga chama imojtsauatja.

<sup>35</sup> Chora chë jantšetëshoicana canÿe oyebuambnayana tojanóbocna, mëntšá: “Mua atšbe Uaquiñá endmëna, atšbe uabuayaná; cha šmochtseyeunana ca.”

<sup>36</sup> Chë oyebuambnayana tmojanuenentšana, tmojáninÿe Jesús canÿa yojtsemna. Chë uatsjëndayënga iyteca imojtsemna, y chë tempo ndocnábioye chama imonjueyaye.

*Jesús, canÿe basa bacna bayëjbe juabna uambayábioye tbojanshná*

(Mt 17.14-21; Mc 9.14-29)

<sup>37</sup> Yëfsana, chë tjocana tmojtantsmá ora, ba entsanga tmojánbocana Jesús jajëbenguama.

38 Chora, chë entsanguentsana canÿe boyabása tojanontsé mëntsá uayebuáchana: —Buatëmbayá, Diosmanda atšbe uaquiñá minÿe. Nÿe cha atšbe uaquiñá endmëna;

39 y mora, bayëjbe juabna chábioye bontsësháchichana, y nÿe ndeolpe jóntsana yoyana, ataque joshachana y uayoicana shashiye jtsabocanana. Y chábentsana chë bayëja ndoñe betscó ntjësebochnana, y cuerpiñe corente maltrataná jeseboshjonana.

40 Acbe uatsjédayënga sënjaïmpadá chë bayëja chábentsana chamuatábocnama, pero ndoñe chematobená ca.

41 As Jesús tojánayana: —¡Nÿetsá ndošbuáchiyënga y bacna entsanga! ¿Buetayté šojtsemna tšëngaftangaftaca jëftsemnana y jtsëuantánana ca?

Chora chë boyabásabioye tbojanianana: —Moye chë uaquiñá mánatse ca.

42 Chë basa yojtsebeconá ora, chë bacna bayëja chábioye tbojanshajayé y inÿe ataque tbojanëshache. Pero Jesús chë bayëjbioye tbojanácacana, chë basetémbioye tbojanshná y chabe taitábioye tbojtánëntregá.

43 Y nÿetscanga puerte ojnánënga imojtsemna, Bëngbe Bëtsá tša obenana bomná inamnana.

*Jesús cachiñe tojánayana cha ibojamna jóbanana y jtayenana ca*

*(Mt 17.22-23; Mc 9.30-32)*

Nÿetsca entsanga, ndayá Jesús yojtsamama ojnánënga imojtsemnëntscuana, chabe uatsjédayënga cha tojanëyana:

44 “Quem soye tšabá šmochjouena y ndoñe chacmondébnëtjomba: Chë Bëngbe Bëtsá Entsá tbojanbemá entsangbe cucuatšinë mochanjáboshjona ca.”

45 Pero chënga ndoñe yontsósertana ntšamo Jesús yojtsëtsësnacá, er Bëngbe Bëtsá ndoñe tonjanalesenciá chama chaósertama; y imojtsauatja Jesús jaimpádana chama chauabuayenama.

*¿Nda chë más uamaná yomna?*

*(Mt 18.1-5; Mc 9.33-37)*

46 Chë tempo, chë uatsjédayënga tmojanontsé enatsëtsnayana, nda chë más uamaná bëtsemnana.

47 Jesús yojtsetátšëmbo ntšamo chënga imojtsejuabnayama; asna, canÿe básetema tbojánishache, chabe juachaca tbojántbema,

48 y chëngbioye tojanëyana: “Nda átšbeñe ošbuachiyá bëtsemnana, quem basetémbioye tbojofja, chana atše jofjana; y nda atše šojofja, chana chë nda šojichmó chábioynaca jofjana. Chíyeca, tšëngaftanguentše chë más nduamaná, cha chë más uamaná entsemna ca.”

*Nda bēngbe contra ndoñe tontsemná, bēngaftaca jtsemnana  
(Mc 9.38-40)*

<sup>49</sup> Juan, Jesúsbioye tbojaniana: —Buatēmbayá, bēnga fsēnjinye canye boyabása y cha aca jótšēmbonēse, entšāngbentšana bacna bayējbe juabna endētēbuacana; pero cha bēngaftaca ndoñe quenátsmēna causa, chama fsēnjesauyaná ca.

<sup>50</sup> As Jesús tbojanjuá: —Ndoñe šmatjuauyaná; er nda bēngbe contra ndoñe tontsemná, bēngaftaca jtsemnana ca.

*Santiago y Juánbioye Jesús tojanēcácana*

<sup>51</sup> Jesús celoye jtama yojtsobeco ora, nyets añémoca cha yojtsejuabnaye Jerusalemoye jama.

<sup>52</sup> Natsana báseftanga tojanichamó, y chēnga tmojána canye base pueblotémoye Samaria luaroca, posada chabiana janguangoñama;

<sup>53</sup> pero chē luarentša entsānga ndoñe tmonjánbošena posada juantšamiana, er tmojántatšēmbona cha Jerusalemoye yojétsayama, chē chēngbe uayayēngbe uámana puebloye.

<sup>54</sup> Chabe uatsjéndayata, Santiago y Juan, chē soye tbojáninye ora, Jesús tmojaniana: “Bēngbe Utabná, ¿quectseboše bēndata fchaimandá celocana iñeshe chaótsatše y quem entsānga chaotsapochócaye ca?”

<sup>55</sup> Pero Jesús yojobuértana y chátbioye tojtsanēcácana, chca juabna bomna causa.

<sup>56</sup> Chentšana chēnga inye pueblotémoye tmojtsanoñe.

*Chē Jesús juastama bošēnga  
(Mt 8.19-22)*

<sup>57</sup> Benachējana imojtsajna ora, canye boyabása Jesúsbioye tbojaniana: —Atšbe Utabná, atše sēntseboše aca juastana ndémoye chacojtsá choye ca.

<sup>58</sup> Y Jesús tbojanjuá: —Chē zorrēnga cuevēshēnga mondbomna ndayentše jtsiyenama y chē shloftšetēmēngna uajajonēshangá; pero chē Bēngbe Bētsá Entšá tbojanbemá ndoñe quenátšbomna ndayentše jóchnama ca.

<sup>59</sup> Jesús inye entšábioye tbojaniana: —Smasto ca.

Pero cha tbojanjuá: —Atšbe Utabná, šmolesenciá atšbe taitá chjshesabotbontsañe ca.

<sup>60</sup> As Jesús tbojaniana: —Chē Bēngbe Bētsabiana mo obanēngcá imomnēnga, ntšamo Bēngbe Bētsá yomandacá ndoñe tmontsama causa, chēnga cachēngbe obanēnga chamotsétebuantsañe. Acna, motsa y Bēngbe Bētsabe amēndayama entsānga cochjabuayená ca.

<sup>61</sup> Inÿana Jesúsbioye tbojanियana: —Atšbe Utabná, atše sěntseboše aca juastama, pero šmolesenciá natsana atšbe pamíllangbiana jaisodiósoftama ca.

<sup>62</sup> As Jesús tbojanियana: —Nda cachabe soyěngama tbojtsen-gmena, Běngbe Bětsabe aměndayocama ndoñe ntsoservénana; er cha jtsemnana mo canÿe arayacá, chě tojtsetrabája ora, stětšoye tojtsaisantješncá ca.

## 10

*Jesús canÿsěfta bnětsana y uta entšanga tojanichamó Běngbe Bětsabe soyěngama jábuayenama*

<sup>1</sup> Chě soyěnga chentšana, Běngbe Utabná Jesús inÿe canÿsěfta bnětsana y útatnaca tojanabacacá, y utáta chabe natsana tojanichamó, chě cha ibojtsemna jama pueblěngoye y lu-arěngoye.

<sup>2</sup> Měntšá chěnga tojaněyana: “Canÿe běts jajañe bětscá játbanama entsemna, pero peonga báseftanga; chíyeca, chentša nduĩñbioye jaimpádana ba peonga chauichamó chě jaja saná játbanama. Cachcá, quem luarentše bětscá entšanga montsemna Běngbe Bětsábioye nduabuátměnga, y chěngbioye chabiana abuayiyayěnga nÿe báseftanga. Chíyeca, Běngbe Bětsá moimpadanga ba abuayiyayěnga chauichamó quem entšanga chábioye júbuajama.

<sup>3</sup> Motsajna; šmochjinÿe, atše tšěngaftanga cbontsichamná mo oveshěnga cuenta, tjañe quešěngbeñe.

<sup>4</sup> Ndoñe šmattsambaye shecnaja, ni crocénana šmattsaiuábuenana, ni shecochětjoněshe; y nda chacmo-jacheuá ora, ndoñe yapa bën chentše šmatjáisenobiamnaye.

<sup>5</sup> “Ndaye yebnentše chašmojámashjna ora, natsana šmochjayana: ‘Lempe tšabá quem yebnentše chaotsomñe ca’.

<sup>6</sup> Y chě yebnentše chca juabna bomna entšanga tmomněsna, chě tšabiana ndegombre chentše echántsemna; pero ndoñese, chca tšabiana chentše ndoñe queochátsměna.

<sup>7</sup> Canÿe yebnentše šmochjoquėda, y šmochjase y šmochjofšiye ntšamo chentše chacmojacaredadaycá; er chě trabajayá mercedo jtsebuájonana chca juácánama. Canÿe pueblentše nÿe inÿe y inÿe yebněnguenache ndoñe matajnana.

<sup>8</sup> “Ndaye pueblentše chašmojámashjna y tšabá chacmojúbuajentše, šmochjase ntšamo chentše chacmo-jacaredadaycá;

<sup>9</sup> chentša šoquěnga šmochjáshnaye y šmochjáuyana: ‘Běngbe Bětsabe aměndayana tšěngaftangbeñe entsemna ca’.

10 Pero canÿe pueblentſe chaſmojáſhjango y ndoñe chacmonjúbuaja, chentſa tsashenangoye ſmochjábocana y mēntſá ſmochjayana:

11 ‘¡Chē tſēngaftangbe pueblentſa polvēshe, chē bēngbe shecuatſēnguifñe tojuanjēshe, camuentſe fſcuesenſtētoná, chca, tſēngaftanga chaſmotſetatſēmbuama ndoñe tſabá ſmonjamama! Pero masque chca, ſmochtſetatſēmboc chē Bēngbe Bētsabe amēndayana tſēngaftangbeñe entſemnama ca.’

12 Ndegombre chēyana, quem luare jopochócama te, chē luarentſa entſángbioye Bēngbe Bētsá puerte jabuache echantsacastígaye, y Sodoma puebloca bacna entſángbioye ndoñe nÿa nÿetſá jabuache ca” —Jesús tojánayana.

### *Chē nduauenana entſanga*

(Mt 11.20-24)

13 “¡Tſa lastema Corazín puebloca entſangbiamama! ¡Tſa lastema Betsaida puebloca entſangbiamama! Er chē muentſe Bēngbe Bētsabe obenánaca ſēnjama soyēnga, chē bēts pueblēnga Tiro y Sidonoca chca matēnjochnēnguse, chentſa bacna entſanga ya tempo chēngbe bacna soyēngama ngmēnaca matmēntenójuabonga y Bēngbe Bētsabe benache matmēntiſhache, y chca tmojamama chaotsótatſēmbuama, uajojēsha entſayangaca matmēntopormanga y jatinÿaſhiñe matmēnjotbiamama.

14 Pero ntſamo entſanga tmojamama, tſabá o ndoñe tſabá bētsemnama jayanama chaojobuache ora, tſēngaftanga más bēts castigo ſmochántſebomna, chē Tiro y Sidonoca bacna entſangbe castiguama.

15 Y tſēngaftanga, Capernaum pueblentſa entſanga, ¿celóntſcoca atſebánanēnga ſmochtſemna ca ſmojtſejuabnanga? ¡Chē uabouana infiernoye cmochantsēsetjango!

16 “Nda tſēngaftanga tcmojoyauná, chana atſe joyeunayana; y nda tſēngaftanga tcmojtſēbaté, chana atſe jtsabotena; y nda atſe ſojtsaboté, chana chē nda ſojichmó chábioye jtsabotena.”

### *Chē canÿſēfta bnētsana y uta entſanga tmojtanaſhajjna*

17 Chē canÿſēfta bnētsana y útatna Jesús yojtsemnoye tmojtanaſhajjna, puerte oyejuayēnga; y chábioye mēntſá tmojanianana: —¡Bēngbe Utabná, aca jótſēmbonēse, chē bacna bayējēngnaca ſonjoyauná ca!

18 Y Jesús tojanēyana: —Ndegombre. Y tſēngaftanga Satanásbioye chca ſmونتſeyēnjaná ora, entſemna mo Satanás celocana canÿe tcuinÿá jtsotsatſana ſtjinÿá.

19 Atſna obenana tcbonjatſatá mētſcuayēnga y alacranēngbeñe chaſmotsajnama, y bēngbe uayayá

Satanasbe n̄yets obenana jáyënjanama, tšëngaftanga ndocá ntjapasacá.

<sup>20</sup> Pero móyejuanga, ndoñe chë bacna bayëjenga chacmóyaunama obenana šmojtsebomnama, sinó tšëngaftangbe uabaina celoca ya yojtsábemanama, er tšëngaftanga chë n̄yetsca tescama yomna tšabe vida šmochántsebomna ca —cha tojanëyana.

*Jesús puerte tojanoyejuá*

(Mt 11.25-27; 13.16-17)

<sup>21</sup> Chora Jesús, chë Uámana Espíritbeyeca, corente oyejuayá tojánayana: “Atše cbatschuá, Taita, celoca y quem luar-entša Utabná. Aca, chë n̄ye batsá tatsëmbënga tconjan̄yan̄yë, chë tša tatsëmbënga y osertánëngbiam tcojaiytëme soyënga. Aíñe, chama cbontsadorana, Taita, aca chca chaotsemnama tcojábosenayeca.

<sup>22</sup> “Atšbe Taitá lempe chca šonjatšetá. Chë Uaquiñábioye ndocná corente quebnatábuatma; n̄ye chë Taitá aíñe. Y chë Taitábioye ndocná corente quebnatábuatma; n̄ye chë Uaquiñá aíñe, y ndémuan̄yëngbioye chë Uaquiñá tojtseboše nda chë Taitá yomnama jin̄yan̄iyama, chëngnaca chë Taitábioye mochantsábuatma ca.”

<sup>23</sup> Chentšana, Jesús chabe uatsjéndayëngbioye tojanobuértana y n̄ye chëngbioye tojanëyana: “¡Puerte oyejuayënga chë ntšamo tšëngaftanga šmontson̄yacá jin̄yama tmojtsoobenënga!

<sup>24</sup> Er atše cbëyana, banga Bëngbe Bëtsabe juabna oyebuamb-nayënga y reyënga tmojánbošena chë tšëngaftanga šmontson̄yá soyënga jin̄yana, pero ndoñe tmonjánín̄yë; y tmojánbošena chë šmontsuenana soyënga jouenana, pero ndoñe tmonjanuena ca” —cha tojánayana.

*Chë Samarioca tšabe entšabiam cuento*

<sup>25</sup> Can̄ye judiëngbe ley abuatambayá yojontšé Jesúseftaca jóyebuambayama, y jisháchichiyamna mëntšá tbojantjá: —Buatëmbayá, ¿ndayá šojtsemna jamana chë n̄yetsca tescama yomna tšabe vida jtsebomnama ca?

<sup>26</sup> Y Jesús tbojanjuá: —¿Ntšamo leyíñe iuábemana? ¿Ndayá chiñe condbétsaliaye ca?

<sup>27</sup> Chë ley abuatambayá tbojanjuá: —“Chë Utabná Bëngbe Bëtsá cochtsebobonshana n̄yets ainánaca, n̄yets espíritoca, n̄yets añémoca y n̄yets juábnaca”; y “ndémua entšánaca cochtsebobonshana, ntšamo cach aca cuenobobonshancá ca.”

<sup>28</sup> Chora Jesús tbojanian̄yana: —Tšabá šconjojuá. Chca cocht-sama y chë n̄yetsca tescama yomna tšabe vida cochántsebomna ca.

29 Pero chë ley abuatambayá tšabá jenoquédamna Jesúsbioye tbojantjá: —Y ¿ndase chë ndëmua entšánaca yomna ca?

30 As Jesús tbojanjuá: —Canÿe, Jerusalenocana Jericó benache canÿe entšá yojtsetsamá, y básefta salteadorënga imojébëbocna. Lempe imojtsefca, chë entšayánaca; imojtsejantšetaye y chentšana imojtsatóñënga, y chë entšá batsá obaná imojéseboshjona.

31 Ndeolpe, chë benachëjana canÿe judiëngbe bachna yojtsachñëjuana. Chë entšábioye ibojinÿe ora, nÿe chabuacá yojtsëchnënguañe.

32 Cachcá, canÿe Levita, chë canÿe Bëngbe Bëtsabe bëts yebnoca trabajayá chëjana yojtsachñëjuana; y chë entšábioye ibojinÿe orna, nÿe chabuacá yojtsëchnënguañe.

33 “Chorna, cach benachëjana canÿe samaritano ináboye. Chë entšábioye ibojinÿe orna, ibojóngmia.

34 Chábioye yojobeconá, aceitiye y vínoyeca ibojáshna, y lisianënguiñe entšëjuaca ibojuantsacjuá. Chabe couayiñe ibojëftsenjaye, canÿe yebnoye posada uyentsamianoye ibojuánatse, y chentše chábioye ibojëftsinyëna.

35 Yëfsana, chë samaritano uta denario crocénana yojenóbojatsëca, chë mo uta tesca trabajuama crocénana nÿetšá, y chë posada nduíñbioye ibojesabuenaye, y mëntšá ibojauyana: ‘Quem boyabása cochtsinyëna, y nderado más crocénana muabiana chacojenábojafjonasna, mëjana chaitísachñëjuana ora, cbochjabáisabuenaye ca.’

36 Y chcasna, ¿chë unganguentsana nda cmojtsinyëna chë entšabiama yojtsejuabnaye cha cachacá entšá inamnama ca?”

37 Y chë ley abuatambayá tbojanjuá: —Chë entšabiama tbojanongmé cha ca.

Y Jesús tbojaniana: —Asna, motsa y cachcá cochjama ca.

### *Jesús, María y Martbe yebnentse*

38 Chentšana, Jesús benachëjana yojtsaye y canÿe base pueblotémoye tojëftsanamashëngo; y canÿe shembása Marta ca uabainá, chabe yebnentse tbojanofja.

39 Martna canÿe quenata ibnabomna, María ca uabainá. Cha Jesusbe shecuatšentše yojótbema chabe palabra jouenamá;

40 y chëntscuana Marta ba soyënga yojtsama. Cha Jesúsbioye tojanobeconá y tbojaniana: —Útabná, ¿tondayana cmontsentšamna, atšbe quenata nÿe canÿa chašonÿá lempe jamama ca? Mëyana chašuájabuache ca.

41 Chora Jesús tbojanjuá: —Marta, Marta, bëtská soyëngama contsenócochinÿena y contsenomantšná;

<sup>42</sup> pero n̄ye can̄ye soye endm̄ena ch̄e yoiyta soye jamama. María chca jamama tojobuáyana, ch̄e más t̄sabe soye, y ndocná queochatsma cha chaotsajbanama ca.

## 11

*Nt̄samo B̄engbe B̄etsáftaca cuanjencuénta*

*(Mt 6.9-15; 7.7-11)*

<sup>1</sup> Can̄ye, Jesús B̄engbe B̄etsáftaca ibojtsencuéntaye can̄ye luar-ent̄se. Tojanpochocá orna, can̄ya chabe uatsjendaȳenguents̄á tbojaniyana: —B̄engbe Utabná, B̄engbe B̄etsáftaca jencuéntama šmabuatambá, nt̄samo Juan chabe uatsj̄endaȳengaftaca tojan-  
mcá ca.

<sup>2</sup> Y Jesús tojan̄yana: —B̄engbe B̄etsáftaca chašmojt̄sencuénta ora, šmochjayana:

B̄engbe Taitá, acbe uabaina ch̄e más uámana uabainana chaue-  
somñe.

Acbe am̄endayana chaóshjango.

<sup>3</sup> M̄enté smiyatsatá, cada te šnets̄ejaboto tand̄ese.

<sup>4</sup> Bacna soȳenga fs̄enjama: šmotsaperdónaye;

er b̄engnaca n̄yetscanga ch̄e b̄engbiamá bacna soȳenga  
am̄engbioye fs̄endbetsaperdónaye.

Bacna soȳenga jamama šojocoh̄engo ora, šcochjujabuache  
chca ndenobuíyama.

<sup>5</sup> Jesús m̄ent̄sánaca tojan̄yana: “Nderado aca acbe bacóbioye ts̄entseto ora tcojá y tcojauyana: ‘Bacó, Diosmanda unga tand̄ese šmotsemná,

<sup>6</sup> er can̄ye at̄sbe amigo yebnoca tonjášhjango y tondaye quetsátsbomna cha jonánjama ca.’

<sup>7</sup> Ndegombre, cha tsocana tcmojojuá: ‘Ndoñe šmatébeyabomana. B̄esáša ya entsatámena y at̄se y at̄sbe básenga ya fs̄entsocjá; ndoñe quetsátobena mora jotsbanana y ch̄e tand̄ese jámnana ca.’

<sup>8</sup> Ndegombre, ch̄e bacó ndoñe tonjotsbaná ch̄e tand̄ese jámnama, cháftaca šuenats̄etsnámase, cha pronto jotsbanana chca uéb̄eyabomana ndoñe tconjajbaná causa, y lempe nt̄samo cmojt̄sajabotcá cha cmochanjoyiye.

<sup>9</sup> Chcasna, at̄se cb̄eyana: Šmochjotjañe y B̄engbe B̄etsá cmochanját̄sataye; šmochjánguango y šmochanjín̄yena; šmochjachembo y cmochanjéb̄etafjo.

<sup>10</sup> Er ndánaca ndayá tojt̄sotjanañá, j̄oȳengacñana; y tojt̄sen-  
guá cha, jón̄yenana; y nda tojt̄sechembuanáb̄ioye jebiat̄ēfjuana  
ca.

<sup>11</sup> “¿Nda t̄š̄engaftanguents̄ana nantsobena, taitá tojt̄semn̄ese, cachabe uaquiniáb̄ioye can̄ye m̄et̄scuaye jat̄stayana, beona tbojt̄sotjanañe ora;



12 o canye alacránashe joyiyana, shëmnëbé tbojtsotjanañe ora?

13 Y chca, tšëngaftanga, bacna soyënga amënga, tšëngaftangbe basetemëngbioye tšabe soyënga jatsatayama šmojtsamanëse, jmás chë celoca Taitá, chë Uámana Espíritu echanjátsataye, chca tmojtsotjanañëngbioye ca!” —Jesús tojánayana.

*Fariseunga tmojánayana Jesús Satanásbentšana obenana tojanóyëngacñe ca*

*(Mt 12.22-30; Mc 3.20-27)*

14 Jesús canye entšábentšana canye bacna bayëja tbojtánábocna. Chë bayëja ndëbiá chë entšábioye tbojánbema, y chábentšana tojésanbocna ora, chë ndëbiá tojtantonšé oye-buambnayana. Y chë entšanga chama imojenjnaná;

15 pero báseftanga imojtsichamo: “Beelzebú, cach Satanás, chë bacna bayëjëngbe amëndayá, quem boyabásabioye obenana tbojatšetá chë bayëjënga chauatëbuacnama ca.”

16 Y ínÿenga, Jesús jisháchichiyamna tmojanimpadá canye bëts soye chaoma, jinÿanÿiyama cha celoca obenana in-abomna o ndoñe.

17 Pero Jesús yojtsetátšëmbo ntšamo chëngbe juabna bétsemnana. As tojanëyana: “Canye amëndayábentše entšanga tmojtsenojatá y tmojtsenáyase, cachënga jtsenpochócana; y canye yebnentše oyenënga tmojtsenojatá y tmojtsenáyase, chë pamíllanga tšabá nyets tempo ndoñe quemochátsmëna.

18 Cachcá, Satanás tojtsenojatá y cachabe contra tojtsemnëse, ¿ntšamo nantsobena chabe mándayana quem luarentše jëftsebmomnana? Chca sentsichamo, er tšëngaftanga šmontsichamo Beelzebube obenánaca chë bayëjënga stsatëbuacana ca;

19 pero chca ndegombre tojtsemnëse, ¿ndábeyeca tšëngaftangbe usetonënga obenana imojtsebmomna chë bacna bayëjënga jtëbuacnama? Chíyecna, cachënga montsinÿinÿná ntšamo ndegombre yomnana, y tšëngaftanga ndoñe ndegombre soye šmontsichámuama.

20 Y atšna, Bëngbe Bëtsabe obenánaca entšángbentšana chë bayëjënga sëndëtëbuacana; y chë soye entsinÿinÿná, Bëngbe Bëtsabe amëndayana tšëngaftangbioye tojóshjanguama.

21 “Canye corente añemo bomna entšá, bëts cá ármangaca chabe yebna tojtsinÿenëse, chë tsoca tomna soyënga ndoñe ntjotšana.

22 Pero inÿa chabiamá más añemo bomná tojabo y tbojabetseyëñaná, chë cha yojanašbuaché armangá jtsabocana y chë tobomna sóynaca; y ntšamo chë inÿa tojtsebošcá chë soyëngaca jamana.

23 “Nda ndoñe átšeftaca tontsemná, atšbe uayayá jtsemnana. Y nda átšeftaca ndoñe tontsetrabája, chana atšbe contra jtsetrabájayana ca” —Jesús tojánayana.

*Ndayá inopása chë bacna entsángaftaca  
(Mt 12.43-45)*

24 “Canye bacna bayëja canye entsábentšana tojësebcna ora, bojojo luarënguenache chë bayëja jtsanana, ndayentše jóchnama onguayiñe. Ndoñe tonjinýena ora, jenójuaboyana: ‘Atšbe oyenoye, chë ndayentšana sënjëftsebcnoye chanjesshécona ca.’

25 Y choye tojtashjango ora, jinýenana lempe tšabá cha jtesamashënguama, mo tsjainiñe y prontániñe cuaftsemná.

26 Chora chë bayëja jana y inýe canýsëfta bayëjenga, chabiama más opëjenga jobiatšana, nýetscanga choye jamashjnama, chë boyabásabeñe joyéanama. Y chca, chë boyabása tempscama más bacna entsá jtoquédana, chora chë natsanama más bayëjenga abamna causa ca” —Jesús tojánayana.

*Chë ndegombre oyejuayana*

27 Jesús chë soyënga yojsichamëntscuana, entsanguentše canye shembása yojuayebuáchena: —¡Puerte oyejuayá chë quem luaroye tcmojúshjango y tcmojëftseboché shembása ca!

28 As Jesús tbojaniyana: —Más oyejuayana bomnëngna, chë Bëngbe Bëtsabe palabra tmojouena y chca tmojtsamënga ca.

*Chë bacna entsanga Jesús tmojanimpadá canye bëts soye chaoma, chabe obenana jinýama  
(Mt 12.38-42; Mc 8.12)*

29 Entsanga más imojtsójoye Jesús yojtsemnentše, y Jesús tojanontšé jáuyanana: “Morsca entsanga puerte bacna entsanga; chënga montsotjanañe atše canye bëts soye chaima atšbe obenana jinýama, pero ndoñe chca quemochátinýe, sinó nýe chë ndayá yomna mo chë Jonásoftaca tojanopasá soycá.

30 Er chca, ntšamo Jonás Nínive puebloca entsanga canye bëts soye tojaninýanýé Bëngbe Bëtsá obená yomnama chamotsetatsëmbuama, chë Bëngbe Bëtsá Entšá tbojanbemánaca entsinýanýná morsca entsángbioye, Bëngbe Bëtsabe amëndayana tojóshjanguama.

31 Bëngbe Bëtsá ntšamo morsca entsanga tmojanmama yochjayana te, chë Sur luaroca reiná echanjotsaye y morsca entsángbiana echanjayana ndoñe tšabá tmonjama ca; er chana chë quem luare iuajbana luarëngocana tojánabo Salomonbe osertanána palabrenga jouenama, y chë mora muentše entsemnana, Salomonbiana más uamaná endmëna.

32 Chë entšanga tšabá o ndoñe tšabá tmonjamama jayanama te, chë Nínive bëts pueblaca entšágnaca mochanjotsaye y mochanjayana morsca entšanga ndoñe tšabá tmonjama ca; er chënga, Jonás yojtsabuayiynaye ora, tmojanoyeuná y chë tšabe benache tmojtanišache, y chë mora muentše entsemnana, Jonasbiana más uamaná endmëna ca” —Jesús tojánayana.

*Chë cuerpama uajuinÿanësha*  
(Mt 5.15; 6.22-23)

33 “Ndocná canÿe uajuinÿanësha juajuinÿenana, canÿe iytëmena luaroye juajájuama, ni canÿe cajonëshe tajsoye, sinó canÿe tsbanana luaroca juajájuama, chca, chë luaroye amashjuanëngbiana chaotsebínÿnama.

34 Acbe bominÿe tšabá totsomñëse, acbe cuerpama mo canÿe uajuinÿanëshacá jtsemnana; chíyeca aca jtsobenana, ntšamo tcojtsamcá chë bominÿeca jtsonÿayana. Chë bominÿe ndoñe tšabá tontsemnëсна, chë bominÿe tondaye ntsobenana jamana, ntšamo tcojtsamcá chacobená jinÿama. Cachcá, acbe ainaniñe tšabe juabnënga tcojtsebomnëse, lempe ntšamo chacojtsamcá tšabá echántsemna. Y acbe ainaniñe ndocna tšabe juabnënga tcontsebomnëсна, lempe ntšamo chacojtsamcá ndoñe tšabá queochátsmëna.

35 Cuedado šmochtsebomna, tšëngaftangbe ainaniñe nÿe tšabe juabnënga chaotsemnana, chca, lempe ntšamo chašmojtsamcá tšabá chaotsemnana, y bacna juabnënga ndoñe chaondëtsemnana.

36 Chcasna, lempe ntšamo šmojtsamcá tšabá tojtsemnëse y ndocna bacna sóyesna, tšëngaftanga bëtscá tšabe soyënga šmochántsama; y chca, tšëngaftanga šmochántsemna mo canÿe uajuinÿanësha puerte tšabá tojtsebinÿnacá ca” —Jesús tojánayana.

*Jesús chë fariseungbiana y ley abuátambayëngbiana tojánayana, chënga ndoñe tšabá montsama ca*  
(Mt 23.1-36; Mc 12.38-40; Lc 20.45-47)

37 Jesús chca jayanama tojanpochocá ora, chábioye canÿe fariseo tbojanofja chabe yebnoye jauasama. As Jesús tojánamashëngo y mesëshentše tojanótbema.

38 Chë fariseo tojanëuatjaná, Jesús ntsacuentšabiacá jasama yojontsé causa, ndoñe ntšamo chë judiënga imojanamancá, Bëngbe Bëtsabe delante tšábënga jtsatsmënama.

39 Pero Bëngbe Utabná tbojaniana: “Tšëngaftanga fariseunga šmondmëna mo entšangcá ndëmuanÿënga chë tazëšënga y šcnenënga shjoicajana jtsóbojabiana, pero tsoyna nÿe cachcá jonÿayana. Tšëngaftanga becá jtsamana entšangbiana mo tšabëngcá jtsinÿnama; pero tšëngaftangbe ainanentše jútjena

entsemna n̄ye jtsatbēbanama y bacna soyēnga jtsamama juabnēngaca.

40 ¡Juabna ndbomnēnga! Tšēngaftanga ndoñe šmondētatsēmbo, chē tšēngaftangbentsana entšanga ndayá jin̄yama imobencá tojamá, chē tšēngaftangbe tsoye yomna soyēngnaca tojamama; y chíyeca, chabiamana cachcá enduámana ndayá tšēngaftangbe ainanoye yomna soyēnga, y chē entšangbe delante šmojama soyēnga.

41 Tšēngaftanga cmontsamna, chē soyēnguiñe ndayá ainaniñe yomnentsana ín̄yengbioye jatšatayana, y chca, lempe ntšamo chašmojtsamcá Bēngbe Bētsabe delante tšabá echántsemna ca.

42 “¡Tša lastema tšēngaftangbiamana fariseunga! Tšēngaftanga Bēngbe Bētsabiamana jtsequēcnayana chē jajañentša sananga bnētsanentsana can̄ye soye n̄yetsá, y chē binche matatēmēnguentšana menta, ruda y n̄yetsca binche matatemēnguentšanēnaca; pero n̄ye batšá jtsamana chē n̄yetscanga cachca derechēnga chamotsebomnama y cha jtsebobonshánama. Quem soyēnga cocayé cmontsamna jtsamana, chē in̄ye tšabe soyēnga ntjajbanacá ca.

43 “¡Tša lastema tšēngaftangbiamana fariseunga! Tšēngaftanga tša jtsebošana chē judiēngbe enefjuana yebnēnguenache chē más uámana luarēnga jtsebomnama, y benachiñe n̄ya puerte respétoca entšanga chacmotsacheuanayama ca.

44 “¡Tša lastema tšēngaftangbiamana! Smondmēna mo obanēnga uatbontsaniñcá, ndoñe ntsin̄yana, y entšanga ntsetatsēmbcá chiñe jtsebotájayana. Chca šmondmēna, er tšēngaftangbe ainana entsemna jútjena bacna juabnēngaca, pero entšangbiamana ndoñe chca quešmátin̄yana ca.”

45 Jesús chca tojánayana ora, can̄ye ley abuatambayá tbojaniyana: —Buatēmbayá, chca palabrenga contsoyebuambná ora, bēngbiámna ndoñe tšabá quecátichamo ca.

46 Pero Jesús tojánayana: —¡Tša lastema tšēngaftangbiámna, chē ley abuátambayēnga! Mo can̄ye entšá, couáybioye can̄ye uauta uasmanēsha tbojuasmá, y chēsha ndoñe yapa chaondētsautama tondaye tontsamcá, tšēngaftanga entšangbioye jtsamēndayana bētscá mandēnga chamotsocumplínama, pero cach tšēngaftanga ni mo batšatēmnaca jtsamana chē mandēnga jtsocumplínama ca.

47 “¡Tša lastema tšēngaftangbiamana! Tšēngaftanga jtsamana chē Bēngbe Bētsabe juabna oyebuambnayēnga tempsquēnga bētsētsa entšanga chamotsemnama, chēngbe cuevēshēnga jtsatspórmayēse; pero chē mo chēngcá, can̄ye buayenana sóyeca tmojabēngbioye ndoñe ntsayaunanana. Y chē tempsquēnga

chca oyebuambnayéngbioye tšëngaftangbe bëts taitanga tmojtsanëbaye.

<sup>48</sup> Chca jtsamëse, tšëngaftanga šmontsinÿanÿná, ntšamo chë bëts taitanga tmojanmcá tšabá yomna ca tšëngaftanga šmojtsejuabnama, er chënga chë oyebuambnayéngbioye tmojtsanëbaye y tšëngaftangna chëngbe cuevëshënga jtsatspórmayana.

<sup>49</sup> “Chíyeca, Bëngbe Bëtsá chabe bëts osertanáca tojánayana: ‘Atše chëngbioye chanjichamuá atšbe juabna oyebuambnayënga y atšbiana abuayinyayënga, y báseftangbioye mochantsëbaye y ínÿengbioyna mochantsëcamiye ca.’

<sup>50</sup> Y chca, nÿets castigo morsca entšángbeñe echántsemna, nÿetsca Bëngbe Bëtsabe juabna oyebuambnayënga tmojóbanama, Bëngbe Bëtsá quem luare tojanma orscana;

<sup>51</sup> Abëlbioye tbojanóba orscana, Zacarías tmojanóbantscoñe. Zacaríasna Bëngbe Bëtsabe bëts yebnentše tmojanóba, altar y chë entšanga Bëngbe Bëtsábioye imojánadorana luariñe. Chcasna, Bëngbe Bëtsá echanjama chë oyebuambnayënga tmojanóbanama, morsca entšángbeñe nÿets castigo chaotsemnama ca.

<sup>52</sup> “¡Tša lastema tšëngaftangbiana, chë ley abuátambayënga! Tšëngaftanga jtsamana, Bëngbe Bëtsabe soyëngama jtsetatšëmbuama entšangbiana yapa totcá chaotsemnama. Cach tšëngaftanga ndoñe quešmátobena chë soyëngama tšabá jtsetatšëmbuana, y chama jtsetatšëmbuama tmojtsebošëngbioyna ndoñe quešmatalesénciaye ca” —Jesús tojánayana.

<sup>53</sup> Jesús chë soyënga tojánayanama, chë ley abuátambayënga y fariseunga puerte tojánëtëna, y cha chentšana yojtsaisebocana ora, tmojanontsé chábioye becá tjanayana, y imojtsama ba soyëngama chaóyeuambama,

<sup>54</sup> chca, jisháchichiyama jtsebošëse, cachá ntšamo tojayana sóyeca chënga jtseboznama ndáyeca chábioye mal jaquédana.

## 12

*Jesús, chë bacna entsanga ntšamo ndegombre tmojuabnacá ndinÿinÿnayëngbiana tojanabuatambá*

<sup>1</sup> Chëntscuana, ba uaranga entsanga chentše tmojanójoto; tša entsanga causa, nÿetscanga imojtsenatsëntšenaye. Chora Jesús tojanontsé jóyeuambayama, y natsana chabe uatsjëndayëngbioye tojanëyana: “Chë fariseungbe buatëmbana soyëngama cuedado šmochtseboznana, chënga mondmëna bacna entsanga, ntšamo ndegombre tmojuabnacá ndinÿinÿnayënga. Ntšamo chë levadura jamana nÿetsana chauábochema, cachcá chëngbe buatëmbana soyëngaca, chë

fariseunga montsobena jamana bêtscá entšanga ntšamo ndoñe tšabá tontsemncá chamotsamama.

<sup>2</sup> Er ndocna yoiytémēna soye, ntjinýcá queochaisoquéda; y chē ndótatsēmbo soye, ntsotatsēmbcá queochaisoquéda.

<sup>3</sup> Chíyeca, chē mora nýe tšēngafangbiana šmojtsichamo soyēnga, chē entšangbiana mo ibetiñcá cuaftsemna soyēnga, entšanga chama botamana mochanjátatsēmbona. Y chē iytēcana šmojtsichamo soyēnga, nýetsca entšángbioye mochántabuayiyayē, mo nda canýe yebnentša tsbanánocana noticiēnga tojtsayebuachcá ca” —cha tojanýana.

*Nda ndegombre cuantsebiauatja*  
(Mt 10.26-31)

<sup>4</sup> “Tšēngafanga, atšbe amiguēnga, cbochjáuyana: Ndoñe matauatjēngana nýe chē tšēngafangbe cuerpo japochócama imobenēngbiana, pero chentšana más jamana ndoñe ntsoberana.

<sup>5</sup> Cbochanjabuayená ndábioye cmojtsamna jtsebiauatjana: šmochtsebiauatja chē nda vida jtsabuajuánama y chentšana infernoye jtsichámuama obenana endbomnábioye; chábioye cocayé šmochtsebiauatja ca.

<sup>6</sup> “¿Shachna jaja shloftšetēmēnga ndoñe nýe uta denario crocénánama mondbétsena? Pero masque chca, Bēngbe Bētśa chēngbiana sempre jesenójuabnayana.

<sup>7</sup> Y tšēngafangbiana Bēngbe Bētśa lempe endētatsēmbo, y bueta stjēnjēnga tšēngafangbe bestšašifne yomnámna. As ndoñe matauatjēngana; tšēngafanga ba jaja shloftšēngbiana corente más šmonduámana ca” —Jesús tojánayana.

*Ndabiana Jesucristo yochjayana chabe entśa yomna ca*  
(Mt 10.32-33; 12.32; 10.19-20)

<sup>8</sup> “Atse cbēyana, nda atšbe entśa yomna ca entšangbe delante tojyanabiama, chē Bēngbe Bētśa Entśa tbojanbemánaca, Bēngbe Bētśabe angelēngbe delante echanjayana chē entśa chabia yomna ca;

<sup>9</sup> pero nda entšangbe delante, atšbe entśa ndoñe yondmēna ca tojyanabiama, chē Bēngbe Bētśa Entśa tbojanbemá, Bēngbe Bētśabe angelēngbe delante echanjayana, cha chabe entśa ndoñe yondmēna ca.

<sup>10</sup> “Bēngbe Bētśa bochanjaperdóna, nda chē Bēngbe Bētśa Entśa tbojanbemabiama ndoñe tšabá tontsichamuábioye, pero chē Uámana Espíritbiana ndoñe tšabá tontsichamuábioyna ndoñe.

<sup>11</sup> “Tšēngafanga chē judiēngbe enefjuana yebnēngoye, ntšamo entšanga bétsamama ichámēngbioye y mandadēngbioye chacmojunatse ora, ndoñe šmattsenócochinýena

ntšamo o ndáyeca šmochjenéuyanama, o ndayá šmochjayanama;

12 er chë Uámana Espíritu cmochanjabuayená ntšamo jayanama tojtsemncá, jóyebuambayama chacmojtsamna ora ca” —Jesús tojánayana.

*Entsabiama resjo yomna, nýe yapa bomnana jesejuabayana*

13 Chentšana, canýa entsanguentšá Jesúsbioye tbojaniyana: —Buatëmbayá, atšbe catšata momandá chë átšbioye otocana soyënga chašuatoyé ca.

14 Y Jesús tbojaniyana: —Bacó, ¿nda atše šojábema tsëndatbe ujatanayá ca?

15 Y entsángbioye tojanéyana: —Smochjinýe y cuedado šmochtsebomna chë nýe yapa soyënga jtsebomnana bošama; er masque bëtscá soyënga chašmotsóbomñe, chca ndoñe quešmochátstatsëmbo aíñe tšabe vida taišmochjónýenama ca.

16 Y chora mëntšá tojanacuntá: “Inamna canýe bomna entsá, y chabe fshantsënguñe tša jaja saná yojtsopodena.

17 Chë bomná chora mëntšá yojtsejuabnaye, ‘¿Y morna, ntšamo chjama? er ndoñe quetsátsbomna ndayentše atšbe jaja saná jtsobocjayama ca.’

18 Y mëntšá yojeniyana: ‘Chë grano uaquëcjnaye yebnënga chantsendbiama, y inýe más bëtš yebnënga chanjëtšjebo, y chiñe nýetsca atšbe jaja saná chantsóbcocjaye y nýetsca atšbe soyëgnaca.

19 Y chora atše chjeniyana: Bacó, bëtscá soyënga contse-bocjana, ba uatama cmochanjuáshjache. Morna, cochjóchna, cochjase, cochjatëmo, cochjóboyejuaye ca.’

20 Pero Bëngbe Bëtšá chábiyoye ibojauyana: ‘Obëjema, cach quem ibeta cochanjóbana; y asna, chë contsebocjana soye, ¿ndabiama yochtsemna ca?’ ”

21 Y Jesús chora tojánayana: “Chca endbopása chë nýe chabi-ama bomnana tojtsejuabá y bëtscá Bëngbe Bëtšabe soyënga ndoñe tonjëftsashjáftaca ca.”

*Bëngbe Bëtšá chabe básënga jtsanýenana*

*(Mt 6.25-34)*

22 Chentšana, Jesús chabe uatsjëndayënga tojanéyana: “Quem soye cbéyana: Ndoñe šmattsenócochinýena ndayá šmochjase o šmochjofšiye vida jtsebomnana, ni ndaye entsáyá šmochjuíchëtjuama cach ndoñe.

23 Ndegombre, vida chë sanama más enduámana y cuerpo chë entsáyama más.

24 Chë ftsënga shloftšënga šmochjanýe: tondaye ntjájena, ni jaja saná ntjátbanana, ni grano uaquëcjnaye yebnënga ntsebomnana; pero Bëngbe Bëtšá chënga saná jtsatšatnayana.

¡Y tšëngaftanga chë ftsenga shloftšëngbiana puerte más šmondúamana!

25 Masque chca endmëna, masque canya tša tojesenócochinÿena, ¿ntšamo nanjobenaye jamana, chë ntsachetšá vida yochtsebomnentsana canÿe hora vida más jabotiÿana?

26 Chcasna, nÿe chë base soye jamama ndoñe šmontsobenëse, ¿ndayama chë inÿe soyëngama šmochjatenócochinÿena?

27 “Šmochjuinÿe chë lirio uantšefjushangá jtsajuajnana: ndoñe ntsetrabájayana, ni ntshabiamnayana. Pero atše cbëÿana, ndegombre ni mo rey Salomón, nÿetsca chabe bomnánaca, chë lirio uantšefjushangacá nÿetšá botamana quenjatspormana.

28 Bëngbe Bëtsá tša botamana shácuana tojuama, y chë shácuana mënté jajoca jtsamnana y yëfsana iñoca. Cha chë shácuana chca tojamëse, ndegombre tšëngaftangbiámna Bëngbe Bëtsá echanjama entšayá chašmotsábomnama, jentšanga Bëngbe Bëtsábeñe nÿe batšá ošbuáchiÿenga!

29 Chiyeca, ndoñe šmattsenócochinÿena ndayá jasama o jofšiyama onguayíne;

30 er chë soyëngama quem luarentša entšanga mondbétsenocochinÿena, pero tšëngaftanga ndoñe. Tšëngaftangna canÿe Taitá šmondbomna, y cha endëtatšëmbo ndayá cmëjabótama.

31 Más tšabana, tšëngaftanga šmochtseboše Bëngbe Bëtsá tšëngaftangbe ainaniñe chaotsemándama, y chë cmojtsëjaboto soyënga nÿe šmochanjóÿëngacñe ca” —Jesús tojánayana.

### *Chë celoca bomnana (Mt 6.19-21)*

32 “Ndoñe matauatjëngana atšbe ústonënga, atšbe básefta oveshënga, er Bëngbe Bëtsá tšabá tbonjuinÿnana chabe amëndayana tšëngaftanga jatšatayama.

33 Lempe ntšamo šmobomncá šmochtsatobuiye y chë ujabotëngbioye šmochtsatsataye. Mo ndotanguánaye shecnajiñe crocénana cuafjacjacá, celoca tšabe soyënga šmochjobuajo. Choca ndocna te queochaisopochóca, atbëbanënga choye ndoñe quemochátamashjna jatbëbama, y mejojón ndoñe queochatspochóca;

34 er chë ndayentše tšëngaftangbe bomnana tojtsemnentša soyëngama, ainánaca tšëngaftanga šmochántsejuabnaye ca” —Jesús tojánayana.

### *Bëngbe Utabná yochjésabama jtseprontánana*

35 “Mo chë oservënënga, chë entšayá uichëtjonënga y uajuinÿananëshangaca chëngbe nduiño yochtashjanguama



cuafstobatmancá, tšëngaftanga šmochtseprontana Bëngbe Utabná yochjésabama.

<sup>36</sup> Chca, tšëngaftanga šmochántsemna mo chë oservénënga, tšabe entšayaca bopormánënga y uajuinýananëshangaca chëngbe amëndayá casamentocana yochtashjanguama cuafstobatmancá; y chca, chë nduiño tojabochembo ora, cachora chë oservénënga jtebiatëfjuama.

<sup>37</sup> Puerte oyejuayënga chë oservénënga, chë nduiño tojtashjango ora tmojtsefšnënga. Ndegombre cbëyana, chora chë mandayá sëndorëche echantásnaye, mesëshentše chë oservénënga echanjábïama, y saná echanjuuatšïye.

<sup>38</sup> Puerte oyejuayënga chënga, chë tmojtsefšnënga cha tojtashjango ora, masque tsëntseto ora o bínýanoye.

<sup>39</sup> Quem soye tšabá chacmësertá: chë yebnentša nduiño, ntseco ora atbëbaná yochjabama tojtsetatšëmbëse, cha ndoñe nanjaleséncia ndocná jushañe chaondbemama, chë yebnoye jtsamashënguama y jtsatbëbama.

<sup>40</sup> Tšëngaftángnaca šmochtseprontana, er chë Bëngbe Bëtsá Entšá tbojanbemá echanjésabo, entšanga chama tondaye tmontsejuabná ora ca” —Jesús tojánayana.

*Chë tšabe oservená y chë bacna oservená  
(Mt 24.45-51)*

<sup>41</sup> Pedro, Jesúsbioye tbojanïyana: —Utabná, ¿chë tconjayana cuento nýe bëngbïama o nýetscangbïama yochtsemna ca?

<sup>42</sup> Y Bëngbe Utabná tbojanjuá: —¿Nda yomna chë oservená, ntšamo chë nduiño tojtsebošcá amá y nýets juábñaca amá? Cha jtsemnana nda chë nduiño bochjëftsebošhona chë yebnentšënga chaotsanýenama, y jasama tojtsemna ora chaújuatšëma.

<sup>43</sup> Puerte oyejuayá chë oservená, chë nduiño tojtashjango ora, cha tbojínýena jtsamëse ntšamo tbojtsemncá.

<sup>44</sup> Ndegombre cbëyana, chë nduiño chábïoye bochanjaimpáda nýetsca chabe soyënga chabotsinýeñama.

<sup>45</sup> Pero chë oservená, chabe nduiño betseco ndoñe yochantabo ca tojtsejuabná, y tojontsé chë inýe oservénënga, boyabásenga y shembásenga jtsajantšëtayana, becá jtsesana, jofšïyana y jtsótmenana,

<sup>46</sup> cha ndoñe tontsejuabná te y tontsetátšëmbo ora, chabe nduiño echántashjango y puerte jabuache bochantsecastíga, y echanjama cha jasúfriama chabotsemnana, mo chë Bëngbe Bëtsábeñe ndošbuáchïyënga mochanjasufriacá.

<sup>47</sup> “Chë oservená, nda tojtsetátšëmbo ndayá chë nduiño tojtsebošama, pero ndoñe tontseprontana y ndoñe tontsobedecena, cha ba soye mochántsetjanja.

48 Y chë oservená, ntsetatšëmbcá ntšámnaca tojabuachjuanguá, y chë causa chamotsetjanjama tbojtsemnësna, chana más batšá mochántsetjanja. Nda bëtscá soyënga tmojatštábioye jauyanana, bëtscá soyënga chaoma ca; y nda bëts trabajo tmojabonýébioyna jauyanana, más bëts trabajo chaoma ca.”

*Jesusbe causa, entšángbeñe más jtsentsjanayana*  
(Mt 10.34-36)

49 “Atše sënjabo quem luariñe jabojuinýiyama, y jtša sëntseboše malaye ya ctsangbototjuana!

50 Atše šontsemna puerte jasúfriana, y ¡puerte ngménaca sëntsobátmana chca chaotsemnama!

51 ¿Tšëngaftanga šmojtsejuabná atše tijabo quem luar-entše entsanga natjëmbana chamotsiyenama? Ndegombre ndoñe chca queochátsmëna; atše sënjabo causa, entsanga más mochántsestsjanaye.

52 Er mëntescana, canýe yebnentše, shachnënga ndoñe quemochátenëyeunana, únganga útatbe contra y útata úngangbe contra mochántsemna.

53 Taitá uaquiñabe contra echántsemna, y uaquiñá taitabe contra; bebmá, bembëbe contra, y bembe bebmabe contra; uambén mamá, bebincuabe contra, y bebincuá uambén mamabe contra ca” —cha tojánayana.

*Ndaye tempo yochtsemnama ntšamo inétsotatšëmbo*  
(Mt 16.1-4; Mc 8.11-13)

54 Mëntšánaca Jesús entsanga tojanëyana: “Tšëngaftanga, chë jantšetëshënga shinýe uenatjëmbambanoicana tojóboचना smojinýe ora šmondbétsichamo ‘echanjuafté ca’, y ndegombre chca jopásana.

55 Y tsmanoicana tojtsebínýia orna, tšëngaftanga šmondbétsichamo ‘echanjojënýana ca’, y ndegombre chca jopásana.

56 ¡Bacna entsanga, chë ntšamo ndegombre šmojuabnacá ndinýinýayënga! Ntšamo quem luarentše yochtsemnama, ndayá celoca smojinýama tša tšabá smojtsetatšëmbëse, ¿ndáyeca ndoñe šmontsobena jtsetatšëmbuana ndaye bëts soye quem tempo Bëngbe Bëtšá cmojtsinýanýnama ca?” —Jesús tojánayana.

*Chë uayayáftaca natjëmbana jtenbemana*  
(Mt 5.25-26)

57 “¿Ndáyeca cach tšëngaftanga ndoñe šmondbáyana ndayá tšabá bëtsemnana?

58 Nderado nda tmojtsedemandá y cabildoye jotsánama cmojtsemna, cabá choye ndáshjango ora, betscó cháftaca cochtenoyántsia. Chca ndóñese, chë demandayá mandádbioye

cmochanjúshjango, chë mandadna josticiëngbe cucuatšiñe cmochanjáboshjona, y chënga cárceloye cmochanjutame.

<sup>59</sup> Ndegombre cbëyana, chentšana ndoñe que-cochtétšbocna, nyets ndebénana candesopagantscuana ca” —Jesús tojánayana.

## 13

### *Bëngbe Bëtsabe benache jtishachana*

<sup>1</sup> Cach ora, báseftanga tmojána Jesús jinýama, y tmojan-cuentá ndayá chë mandado Pilato tojanmama; chana básefta Galileoca boyabásenga tojtsanëbaye, y chëngbe buiñe yojenajuabó chë Bëngbe Bëtsábioye jëtschuayama tmojanóba bayëngbe buiñeca.

<sup>2</sup> Y Jesús chënga tojanëyana: “¿Tšëngaftanga šmojtsejuabná, chë Galileoca entšanga chca tmojapasá, chë luarentša inýe boyabásengbiana chënga más bacna soye amënga imojamna causa ca?”

<sup>3</sup> Ndegombre cbëyana, ndoñe. Y cach tšëngaftanga, bacna soyënga amama ndoñe šmontsajbaná y Bëngbe Bëtsabe benache ndoñe šmontishachëse, tšëngaftágnaca šmochanjóbana.

<sup>4</sup> O, ¿tšëngaftanga šmnétsejuabnaye, chë Jerusalenentša bnëtsana posufta entšanga tmojanóbanënga, chë Jerusalenoca binche uafjajónaye Siloé béconana tsbanana jebna soye tojtsanáshajaye ora, chënga imojamna chë inýenga Jerusalenentše oyenëngbiana más bacna soyënga amënga ca?”

<sup>5</sup> Ndegombre cbëyana, ndoñe. Y cach tšëngaftanga, bacna soyënga amama ndoñe šmontsajbaná y Bëngbe Bëtsabe benache ndoñe šmontishachëse, tšëngaftágnaca šmochanjóbana ca” —Jesús tojanëyana.

### *Chë ndëshajona higo betiyama cuento*

<sup>6</sup> Jesús mëntšá tojanacuntá jabuátambama: “Canýe entšá jajoca canýe higo betiye inabomna, y yojá nderado nantse-shájonama, pero tondaye yonjínýena.

<sup>7</sup> Chcasna, chë jajañe bojanýábioye cha ibojauyana: ‘Mouena, ya unga uata tsabó quem higo betiyoje jaborrepárama, nderado nantseshájonama, pero ndocna te tondaye chiyátinýena; chíyeca, motsetëtše. ¿Ndayama quem jajañe yochjátsjena ca?’

<sup>8</sup> Pero chë jajañe inýená ibojauyana: ‘Bacó, inýe uata cachcá monýá, fshantse chanjáboplojua y uanguanëshe chanjabot-boto.

<sup>9</sup> Nderado chca jamëse, nanjashájona; y ndóñesna, chora cocayé cuantsetëtše ca.’ ”

*Jesús canye ochnayté, canye tséštjona shembásabioye tbojan-shná*

10 Canye, canye ochnayté Jesús yojontsé entsanga jabuátambana, chë judiëngbe enefjuana yebnentše,

11 y chentše yojtsemna canye shembása; cha ya bnëtsana posufta uata yojtsešoca. Canye bacna bayëja chábeñe tojánamashëngo y chca tseštjoná tbojtsanbema, y tondayama yontsobena jtondiríchana.

12 Jesús chábioye tbojáninÿe ora, tbojanchembo y mëntšá tbojanियana: “Batá, mora ya ndoñe šocá quecátsmëna ca.”

13 Chora Jesús chabe cucuatšënga chábeñe tojanjajó, y cachora chë shembása yojtondirícha, y tojanontsé Bëngbe Bëtsábioye jëtschuayama.

14 Pero chë enefjuana yebnentša mándayana tbojánëtna, Jesús chë shembása ochnayté tbojanshnama, y entsanga tojanëyana: —Chnënguana te comna jatrabájama; chora šmochjabo jenóshnama; ochnaytese ndoñe ca.

15 Y Bëngbe Utabná tbojanjuá: —¡Bacna entsanga, ntšamo ndegombre šmojuabnacá ndinÿinÿayënga! ¿Tšëngaftanguentšá ndocná chë ochnayté chabe uacná o chabe burrotema buanjuajafjoná, juanatsama béjaye chaofšema?

16 Chcasna, quem shembása, canÿa Abrahábentšana entsá, y Satanasbe causa bnëtsana posufta uata šocá yojtsemna, ¿ndoñe tšabá yondmëna canÿe ochnayté chë bayëja jtsebojuánana ca?

17 Jesús chca tojánayana ora, chabe uayayënga imojtsëuatja, y nÿetsca entsanga imojtsóyejuaye Jesús tša bëts soyënga yojtsamana.

### *Chë mostaztiye jenayama cuento*

*(Mt 13.31-32; Mc 4.30-32)*

18 Jesús mëntšánaca tojánayana: “¿Ndayacá Bëngbe Bëtsabe amëndayana yomna, o ndaye sóyeca nanjopódia chama jábuayenana ca?

19 Endmëna mo canÿe mostaza jénaye, canÿe entsá jajañe tojajecá; chiyna jójuana y canÿe bëts betiye jóbemana; tša bëtsashe jóbemana, chíyeca chë jaja shloftšënga chë buacuashënguñe uajajonëtemëngá jauábopormana ca.”

### *Chë levadurama cuento*

*(Mt 13.33)*

20 Mëntšánaca Jesús tojánayana: “¿Ndaye sóyeca chjobenaye Bëngbe Bëtsabe amëndayama jábuayenana ca?

21 Endmëna mo levadurcá; canÿe shembása chana jenájubana unga medida arninÿañe, nÿetsana chauabochama ca.”

*Chë base utëntśá bësásá**(Mt 7.13-14, 21-23)*

22 Jerusalenoye benache, Jesús entśanga yojsabuátambaye bëts pueblënguiñe y base pueblotëmënguiñe.

23 Canya chábioye tbojantjá: —Bëngbe Utabná, ¿nyë báseftanga imomna chë atsebácanënga mochtsemnënga ca?

Y Jesús tbojanjúá:

24 —Puerte śmochtsentsëna chë base utëntśá bësásájana jamashjna; er ndegombre cbéyana, banga mochántseboše chëjana jamashjna, pero ndoñe quemochatobenaye.

25 Chë yebnentśa nduiño chaojotsbaná y chë bësásá chaojtatámentśana, tšëngaftanga chë shjoca chašmojtsemnënga, śmochántsechembuana, mëntśá jtsichámëse: “Utabná, śmëbëtafjo ca.” Pero cha cmochanjáuyana, “Atše ndoñe quetsátstatšëmbo ndëmoquënga tšëngaftanga śmomnama ca.”

26 Chora tšëngaftanga śmochanjontśé ichámuana: “Acaftaca cányiñe fsënjase y fsënjofśé, y aca bëngbe tsáshënañe tconjabu-atambá ca.”

27 Pero cha cmochanjójuaye: “Ya tcbonjáuyana, ndëmoquënga śmomnama ndoñe tstátšëmbo ca. ¡Atšbentśana mojuánanga, bacna soyënga amënga ca!

28 “Chora chentše puerte śmochanjenóbošachna y tsetśanama juatsašënga śmochantsenoftëšjojnaye, Abraham, Isaac, Jacob y nyëtscanga Bëngbe Bëtsabe juabna oyebuambnayënga Bëngbe Bëtsabe amëndayoca imojtsemnama chašmojinye ora, y tšëngaftanga chentśana cmochtëbuacanama.

29 Y shinye bocanoicana y uenatjëmbambanoicana, tsmanoicana y tsjuanoicana entśanga mochanjabo y juasama mochanjotbiana Bëngbe Bëtsabe amëndayentše.

30 Y banga mora nduámanënga imomnënga, chora uámanënga mochántsemna; y banga mora uámanënga imomnënga, chora nduámanënga mochántsemna ca” —Jesús tojánayana.

*Jesús tbojanongmé Jerusalenentśa entśangbiana**(Mt 23.37-39)*

31 Jesús chë soyënga tojanëyana ora, básefta fariseunga tmojánashjajna y tmojaniyana: —Muentśana motsatoñe; Herodes entseboše aca jtsóbama ca.

32 Y Jesús tojanëjua: —Motsajna y śmochjauyana chë corente studio bomná, mo tjañe mesetcă: “Minye, mënté y yëfse entśángbentśana bacna bayëjënga sëndëtëbuacana y šoquënga sëndáshnaye, y baseftaytesna chanjapochóca ca.”

33 Pero atše šontsemna mënté y yëfse jtsayana, y baseftaytesna Jerusalenoye jana, er ndoñe tšabá ntsemnana

canÿa Bëngbe Bëtsabe juabna oyebuambnayá Jerusalenentša chábuañe chaóbana ca.

<sup>34</sup> “¡Jerusalenentša entšanga, Jerusalenentša entšanga, tšëngaftanga chë Bëngbe Bëtsabe juabna oyebuambnayënga jtsëbáyana, y chë Bëngbe Bëtsabe ichmónëngbioye ndëtsbéngaca jtsatëchënganjana jtsëbáyama! ¡Bueta soye atše sënjábošena tšëngaftanga átšbioye júbuajama, mo canÿe tuamba chabe bolletotémënga juatëngmiáša tajsoye cuaftajayecá, pero tšëngaftanga ndoñe chešmátsbošena!

<sup>35</sup> Y šmochjinÿe, mora atše cachcá cbochanjesënyaye, y chca, atšna enánanga cbochanjésabashejuana, mo canÿe yebna cachcá tcojesonÿá y éaña tcojeseboshjoncá. Y ndegombre, tšëngaftanga morscana ndoñe más atše quešmochátinÿe; y atše šmochántinÿe, chë: ‘¡Corente bendición bomná, Bëngbe Utabnabe obenánaca tojabá ca!’ chašmojtsichamo ora ca” — Jesús tojánayana.

## 14

*Jesús, canÿe uafshachanánaca šocábioye tbojanshná*

<sup>1</sup> Canÿe ochnayté, Jesús tojána jasama fariseungebe canÿe amëndayabe yebnoye; y chë fariseunga yejuana imojtserreparana, er ndayá Jesús nanjama.

<sup>2</sup> Chéntšnaca, chabe delante yojtsemna canÿe entšá uafshachanánaca šocá.

<sup>3</sup> As Jesús chë ley abuátambayënga y fariseunga tojanatjá: “¿Quenlesenciana canÿe ochnayté canÿe šocá jáshnama o ndoñe ca?”

<sup>4</sup> Chëngna ndocá tmonjanjuá. As Jesús chë šocábioye tbojánishache, tbojanshná y tbojaniyana chaotsatoñe ca.

<sup>5</sup> Y chë fariseunga tojanëyana: “¿Nda tšëngaftanguentšá, nderado chabe uaquiñá o uacná canÿe tboye tojtsótsatše, cachora ndoñe nanjá jetsejátsëcama, masque ochnayté totsomñëse ca?”

<sup>6</sup> Y chënga ndocá tmonjanobená cha jojuana.

*Chë casamentoye ofjanënga*

<sup>7</sup> Jesús tojáninÿe ntšamo chë ofjanënga quëfseroye imojtsachnëjuana jotbiamama; as mëntšá chënga tojanabuayená:

<sup>8</sup> “Canÿe casamentama nda chacmojojfa ora, quëfseroca ndoñe catjót'bema, er nderado inÿe ofjaná acbiama más uamaná ústonoye nandaboye;

<sup>9</sup> y nderado chë tsëndatbe ofjajaná nanjabo y cmatjauyana: ‘Mua chentše chaótbema, maluaré ca’, y chora cmatjotóca ouatjentše chafjoca jana jatótbemana.

<sup>10</sup> Chamna, nda chacmojojfa ora, chafjoca cochjót'bema, chca, chë ofjajaná chaojabo ora chacmëyana: ‘Taita,

quëfseroye motsëchnëngoñe ca'. Y chca, aca chë chentše tmojtsetbiámanëngbiama uamaná cochántsemna.

11 Er nda cachá bëtsá tojtsenobiamná, nduamaná mochántsebema; y nda cachá nduamaná tojtsenobiamná, aíñe bëtsá mochanjábema ca."

12 Y chë tbojanofja entšábioynaca Jesús mëntšá tbojaniyana: "Fiesta chacojama o sananga chacojtsebomna ora, ndoñe cattšëbuájajana acbe amiguënga, catšátanga, ni pamíllanga, ni acbe juachañe oyenënga bomnënga; er chëngnaca, fiesta chamojtsebomna ora, aca cmochantëtofja, y chca ya acbe uacanana soye cochántsebomna.

13 Chamna, canye fiesta chacojama ora, cochjúbuaja nd-bomnjémënga, jama ndobenënga, coshetënga y jtanënga,

14 y aca corente oyejuayá cochántsemna; er chënga ndoñe quemochatobenaye cachcá aca jtëtofjana, pero acna acbe uacanana soye cochántsebomna, chë Bëngbe Bëtsabe bominjyñe tšábënga imomnënga chamojtayena ora ca" —cha tbojaniyana.

### *Chë bëts sanama cuento (Mt 22.1-10)*

15 Chca tojanuena ora, canya chë mesëshentše tbemaná tojánayana: —¡Puerte oyejuayá echántsemna Bëngbe Bëtsabe amëndayoca juasama chaojtsemná ca!

16 Chora Jesús tbojaniyana: —Canye bacó canye bëts saná vojaprónta y ba entšanga vojúbuaja.

17 Juasama ya vojobuache ora, canye oserverná ibojíchnua chë ófjanënga jáuyanama chamotsajna, ya lempe yojtseprontana ca.

18 Pero chorna nyëtscanga imojontšé jtsoyátšëmbuana. Canya vojayana: "Cabá mora canye fshantse sënjobuámiñe, y šontsemna jana jarrepárama. Chcasna, aslëpaye šmotsepacenciá ca."

19 Inya vojayana: "Bnëtsana toronga sënjobuámiñe, y šontsemna jana jányama, jáarama taimochjosérvia. Chcasna, aslëpaye šmotsepacenciá ca."

20 Y inya vojayana: "Cabá mora sëntsobouamá, y chë causa, ndoñe quichatobenaye jama ca."

21 Chora chë oserverná yojesshëcona y lempe chabe nduíñbioye ibojauenaye. Chë nduíño tša ibojtsetna, y chë oservernábioye ibojauyana: "Cam ora motsa tsashenangoye y benachëngoye, y moye cochjunatse ndbomnjémënga, jama ndobenënga, jtanënga y coshetënga ca."

22 Chentša bënëntscose, chë oserverná chë nduíñbioye ibojauyana: "Bacó, ya sënjama ntšamo šconjamandacá, y cabá ínÿengbiama luare entsemna ca."

23 As chë nduiño ibojauyana: “Motsa benachëngoye y betiyetemëngaca jetjaniñëngoye, y entšanga cochjautáriaye moye chamuábama, atšbe yebna chaojutjiana;

24 er ndegombre cbëyana, chë natsana sënjobuajënguentsá ndocná atšbe saná queochatsse ca.”

*Ntšamo yomna Cristbe ustoná jtsemnama*

*(Mt 10.37-38)*

25 Mallajta entšanga Jesús imojtsëstona; as cha tojanobuértana y tojanéyana:

26 “Nderado nda átšbioye tojabo, y ntšamo chabe taitá, chabe mamá, chabe shema, chabe básenga, chabe catšátanga y uabénanga tuababuánjëshanama, y ntšamo cachá tuenobobonshánama, atše ndoñe más corente šontsebobonshánëse, cha ndoñe ntsobenana atšbe uatsjendayá jtsemnana.

27 Y nda, atšbiana ndoñe tontseprontana jasúfriama y cruciñe jobanámna, y nyetsca chabe quem luare soyënga ndoñe tonjëseboshjona atše juastama, cha ndoñe ntsobenana atšbe uatsjendayá jtsemnana.

28 “Nderado nda tšëngaftanguentsá tojtsejuabná canye tsbanana jebna soye japórmama, ¿cha natsana ndoñe nanjót'bema jinjyama ntsachetšá crocénana chentše yochjuába, y japochócama nyetsá crocénana tayojtsebomnama?

29 Chca ndóñese, nderado chë uajatsana ucuatjoniñe tojapormá y lempe jajebuama ndoñe tonjobenase, nyetscanga chca tmojinjyënga, muantsáfchaye y mëntsá muantsichamo:

30 ‘Quemëjema jajebuama tonjontšé, y japochócama ndoñe chenatobená ca.’

31 “O ¿ndaye rey inje réyefata jéntsjava tbojotocase, natsana ndoñe nanjót'bema jajuaboyama, nderado nanjobenaye bnëtsana uaranga soldadëngaftaca chë injyabioye jayëñjanana, chë inya uta bnëtsana uaranga soldadëngaftaca tojtsabose?

32 Y ndóñesna, chë inje rey cabá bënoca tojtsemna ora, básefta entšanga echanjichamuá, cha jauyanama más tšabá yomna ndoñe jatentsjanayana ca.

33 “Chcasna, ndánaca tšëngaftanguentsá, lempe ntšamo to-bomncá ndoñe cachcá tonjesonjá, cha ndoñe ntsobenana atšbe uatsjendayá jtsemnama ca” —Jesús tojánayana.

*Chë tamó fténana tojtsebocna ora*

*(Mt 5.13; Mc 9.50)*

34 “Tamó tšabe soye endmëna; pero chë tamó fténana tojtsóbemëse, tšëngaftanga ndoñe quešmátobena jamana tempcá sanana cachiñe chaotsatsmënama, ni saná jatamuama. Chë ftëna tamó tondayama ntsoservënana,



cachcá, chë atšbe uatsjëndayënga jtsemnana tmojtsebošënga, pero lempe jéseboshjonama ndoñe tmontseboše, cach ndoñe chama ntoservénana.

<sup>35</sup> Chë ftëna tamó ndoñe ntoservénana ni fshantsama, ni uanguanëshama. Nÿe jtsëtšëna. Chë jouenama tmojt-sobenënga, šmochjouena ca” —Jesús tojánayana.

## 15

### *Chë ótsëna oveshabiamana cuento* (Mt 18.10-14)

<sup>1</sup> Nÿetsca chë Romocama impuesto entšángbioye atjanayënga y inÿe bacna soyënga amënga, Jesúsbioye imojánajna chabe palabra jouenama;

<sup>2</sup> y chë fariseunga y ley abuátambayënga chama Jesusbiamana podësca imojtsoyebuambná, mëntšá: —Mua bacna soyënga amëngaftaca entsenuta y chëngaftaca entsesá ca.

<sup>3</sup> As Jesús mëntšá tojanacuntá, chënga jabuátambama:

<sup>4</sup> —¿Nda tšëngaftanguentšá, canÿe patse oveshënga tojtsabamna, y canÿa tbojtsobuétšëse, chë inÿe esconëfta bnëtsana y esconëfta oveshënga shëntsjañe ndoñe cachcá nanjesënyaye, y nanjá chë otšená jetsenguanguama candëtsónÿeñëntscuana?

<sup>5</sup> Y tbojtsinÿëna ora, oyejuayá chë oveshá jesotantšájuana;

<sup>6</sup> y yebnoye tojtashjango orna, chabe amiguënga y juachañe oyenënga jáchembuana y mëntšá jáuyanana: “Atšëftaca móyejuanga, er chë sëntsanobuetše oveshá sëntsinÿëna ca.”

<sup>7</sup> Atšë cbëyana, cachcá, celócnaca más oyejuayana jtsebínÿnana, canÿe bacna soyënga amá tšabe benache tojtishachabiamana, y ndoñe nÿa yapa, esconëfta bnëtsana y esconëfta tšabe soyënga amëngbiamana, chë ndoñe yondujaboto bacna soyënga amana jtsajbanana ca.

### *Chë crocénana tojtsónÿëna shembásabiamana cuento*

<sup>8</sup> “O mëntšá, ¿ndëmua shembása, bnëtsana uámana crocénana tojtsebmna y cánÿana tojtsobuétšëse, chora ndoñe canÿe uajuinÿanëshana nanjuajuinÿená, y cuedádoca chë yebna nantsetsjajo y botamana chë crocénana nantsenguango candëtsónÿeñëntscuana?

<sup>9</sup> Y tojtsinÿëna ora, chabe amiguënga y juachañe oyena shembásënga jáchembuana, y mëntšá jáuyanana: ‘Atšëftaca móyejuanga, er chë sëntsanobuetše crocénana sëntsinÿëna ca.’

<sup>10</sup> Atšë cbëyana, cachcá, chë Bëngbe Bëtsabe angelotëmëngbeñe oyejuayana jtsebínÿnana, nÿe canÿe bacna soyënga amá chë tšabe benache tojtishachabiamana ca” —Jesús tojánayana.

### *Chë uaquiñá bacna benachiñe ayá*

11 Jesús mēntšánaca tojanacuntá: “Canýe entšá uta uaquiñata yojánabamna;

12 y canýe, chē ngomēnche uaquiñá chabe taitábioye ibojauyana: ‘Taita, atšbe otocana soyēnga šmatatšetá ca.’ As chē befta lempe chē uta uaquiñata yojtējátaye.

13 “Chentšana baseftaytesna, chē más bobontse uaquiñá lempe ntšamo ibojobuachcá yojsatobuiye y chē crocenánaca bēn luaroye yojtsoñe, y choca, cha nýe ntšamo ibojocochēngcá, mocá yojenobuiye, y chca, lempe yojtseepochóca.

14 Lempe crocénana yojsoshañe orna, bēts shēntsana chē luarentše yojóshjango, y chē causa cha ibojotóca shēntseca jtsejétanana.

15 As, cha yojá trabajo jonguangoñama y yojínýena chē luarentša canýe entšábentše; chana, chabe jajoye ibojíchmu cotšēnga jtsanýenama.

16 Chē bobontsna yojtseboše chē cotšbe saná jtsesana, pero ndocná tondaye ibonjanájuatšnaye.

17 “Cabana, botamana yojinýe ntšamo yojtsepasacá, y mēntšá yojenójuaboye: ‘¡Bueta trabájayēnga atšbe taitabe yebnentše bētsca saná mondētsóbomñe, y atše muentše shēntsama chanjóbana ca!

18 Chantá atšbe taitabe yebnoye y mēntšá cha chanjauyana: Taita, šmotseperdoná. Atše tijama ndayá Bēngbe Bētsá ndoñe yondbošcá, y ntšamo aca ndoñe condbošcá.

19 Mora ya merecido taitatobuajoñe acbe uaquiñá jtsabáinama; nýe canýe acbe trabajayacá Diosmanda šmatofja ca.’

20 Chca jēftsenójuaboyēse, yojontsé cachabe yebnoye jtana.

“Cabá bēnoca yojtsemna ora, chabe taitá chábioye ibojinýe, y chabe uaquiñabiamia ibojóngmia, y jajébenguama betscó yojá; ibojajebengo, ibojtotsejcuá y tša yojsóyejuayayama chē uaquiñábioye ibojtámochó.

21 Chora chē uaquiñá ibojauyana: ‘Taita, šmotseperdoná. Atše tijama ndayá Bēngbe Bētsá ndoñe yondbošcá, y ntšamo aca ndoñe condbošcá; mora ya merecido taitatobuajoñe acbe uaquiñá jtsabáinama ca.’

22 Pero chē Taitana chabe oservénēnga yojámēndaye: ‘Betscó chē más tšabe entšayá mauaca y matspormanga, montšabuechētjo y matsshecochētjo.

23 Mora chē más minýica uacná šmochjuánatse y šmochjášhua. ¡Mochjase y mochjóboyejuaye ca!

24 Quem atšbe uaquiñá mo obanacá endánmēna y mora bēnga montsetátšēmbó cha ainá yotsomñama. Quem atšbe uaquiñá mo otšenacá endánmēna y mora tmontsinýena ca.’ Y chentšana imojontsé joboyeuayama.

25 “Chë yebnoca fiesta yojtsemnëntscuana, chë mayor uaquiñana jajoca inétsomñe. Yebnoye yojtsataye y ya béconana yojtsemna orna, cha yojouena imojtsabuastoye y imojtselántsaye.

26 As chora cha canye oservenábioye ibojachembo y mëntsá ibojatjaye: ‘¿Ndayá bēngbe yebnentse yojtsopasana ca?’

27 “As chë oservená ibojojuá: ‘Acbe uabentsá tontashjango y chama acbe taitá šonjutarié chë más minyica uacná jáshbuama, cha tšabá tojtashjanguama ca.’

28 Pero chë uabóchena catšatna corente ibojtsetna y ndoñe yontseboše tsoye jtamashēnguana. As cach befta yojábocna chë catšátbioye jaimpádama chauatamashēnguama.

29 Chora cha chë taitábioye ibojauyana: ‘Taita, aca condětatsēmbo bueta uata cbetsajabuáchanama, nyets tempo cbetseyeunanama, pero ndocna te ni mo canye chivotema chešcaisatštá atšbe amiguēngaftaca joboyejuayama.

30 Y masna, acbe uaquiñá chë bacna vida bomna shembásengaftaca acbe crocénana pochocayá tojtashjango ora, chë más minyica uacná chabiama tcojášhbua ca’ —chë uaquiñá ibojauyana.

31 “Chora chë befta ibojojuá: ‘Atšbe uaquiñá, aca sempre átšeftaca condětsemna y lempe ntšamo atše tsbomncá acbiámnaca endmēna.

32 Pero mora tšabá entsemna joboyejuayama y joyejuayēngama; er acbe uabentsá mo obanacá endánmēna, y mora bēnga montsetátšēmbo cha ainá yotsomñama; mo otšenacá endánmēna, y mora tmontsinyēna ca.’ ”

## 16

### *Chë nduiñbe ndoñe tšabe uajabuachanábiama cuento*

1 Jesús mēntšánaca chabe uatsjéndayēnga tojanacuntá: “Inamna canye bomna entšá, y cha ibnabomna canye uajabuachaná chabe soyēnga chaotsinyenama; y chë nduiño imojuenaye chë uajabuachaná chabe soyēngaca ndoñe tšabá yontsamama.

2 Asna, chë nduiño ibojachembo y mëntsá ibojauyana: ‘¿Ntšamo acbiama šmontsatsētsnacá ndegombre yojtsemna ca? Mora cuenta šmatatštá ntšamo atšbe soyēngaca tcojamama, er morscana ya ndoñe atšbe soyēnga inyēná quecochátsmēna ca.’

3 Chë uajabuachaná yojontsé jenójuaboyana, y mëntsá yojenyana: ‘¿Y mora ntšamo chtsemana, chë nduiño atšbe trabajuentšana šojtabocna ora? Ndoñe añemo quetsátsbomna fshantse jatrabájama, y lemošna jótjañamna sēntsēuatja.

4 Ya sěntsetatšēmbo ndayá chjama, chca, atšbe trabajuentšana chašojtábocna ora, atše jtsabamnana ndēmuanŷenga chěngbe yebnentše chašmofjama ca.’

5 “Chentšana, canŷánŷa chě chabe nduiñbioye ndebénēnga vojáchembo. Cánŷabioye ibojatjaye: ‘¿Ntsachetšá atšbe nduiño icondebena ca?’

6 Y cha ibojojuá: ‘Canŷe patse barrilěšangá aceitiye ca.’ As cha ibojauyana: ‘Muentše acbe reciběcha entsamna; mora mótbema y inŷácha nŷe shachna bnětsana barrilěšangama matapormá ca.’

7 Chentšana ínŷabioye ibojatjaye: ‘Y acna, ¿Ntsachetšá icondebena ca?’ Y cha ibojojuá: ‘Canŷe patse medida trigo ca.’ As cha ibojauyana: ‘Muentše acbe reciběcha entsamna; chiñe nŷe posufta bnětsanama mábema ca.’

8 Chentšana, chě nduiño tšabá vojayana chě ndoñe tšabá ama mayordombiama, cha stúdioca yojamama. Chě nŷe quem luarama enójuabnaye entšanga, cachěngbe soyěngaca puerte studio bomnēnga mondmēna; y chě entšangbe juabnēnga binŷnayábenga ndoñe nŷa yapa ca.

9 “Atše cbabuayená, quem luarentše, chě bacna soyēnga aměngbe luarentša bomnánaca amiguēnga šmochjábiamia, ínŷenga jtsějabuáchaněse. Chca, chě bomnana tojtsopochocá ora chašmotsabamna ndēmuanŷenga chě nŷetsca tescama oyenoye chacmúbujama ca.

10 “Nda básefta soyěnguiñe lempe tšabá tojama, bětscá soyěnguiñnaca lempe tšabá echanjama; y nda básefta soyěnguiñe ndoñe tšabá tonjama, bětscá soyěnguiñnaca cach ndoñe tšabá queochatsma.

11 Chcasna, quem luarentše, chě bacna soyēnga aměngbe luarentša bomnánaca ndoñe tšabá šmonjaměse, ¿nda chě ndegombre bomnana, chě Běngbe Bětsabe soyēnga cmochjábanŷiye?

12 Y chě ndoñe tšěngaftangbe sóyeca ndoñe tšabá šmonjaměse, ¿nda cmochjantšabuáchiye ndayá tšěngaftangbiama yomncá ca?

13 “Ndocná ntsoybenana uta mandayata jtsaservénana; er cánŷabioye bochantšáboyěnja y chě ínŷabioyna bochantšebobonshana, o cánŷabiamia tšabá echántsetrabajaye, y chě ínŷabiamna ndoñe tšabá. Ndoñe quecátobena Běngbe Bětsá jtsebobonshánana, nŷe quem luarentša soyēnga jtsebomnana tojtsebošěse ca” —Jesús tojánayana.

14 Chě fariseunga, becá crocénana jtsebomnana bošěnga imnamna, lempe chca chěnga tmojanuena, y Jesúsbioye imo-jtsáboyejuana.

15 As Jesús tojaněyana: “Tšěngaftanga entšangbe delante mo tšábenga cuaftsemncá jtsenobiamnayana, pero Běngbe Bětsá endětatsěmbo ndayá tšěngaftangbe ainaniñe yomnama; er ndayá entšanga más tojtsebošcá, Běngbe Bětsá jtsáboyěnjana ca.

*Moisesbe ley y Běngbe Bětsabe aměndayana*

16 “Moisesbe ley y chě Běngbe Bětsabe juabna oyebuambnayěnga tšěngaftanga cmonjanabuayiyńá, Juan chě Ubayaná quem luaroye tonjánaběntscuana. Cha tonjánabo orscana montsabuayiyńá chě tšabe noticiěnga Běngbe Bětsabe aměndayocama, y nyětscanga tša montseboše choye jamashěnguama ca.

17 “Más paselo endměna, celoca y quem luare chaopochocá, y ndoñe chě ntšamo leyiñe iuayancá, chě ndayá jopásama yomnama, ni mo canye punto ndoñe chca chaondětsemnama ca” —Jesús tojánayana.

*Ndayá Jesús tojanabuatambá chě bouamněnga tmojtsenětšenama*

*(Mt 19.1-12; Mc 10.1-12)*

18 “Nda chabe shěmbioye cachcá tbojesonýá y ín्याftaca tojtóbouamase, cha chě natsana shěmbioye ín्याftaca jtseingñayana; y nda chě útšena shembásaftaca tojobouamá chana, canye uabuatmá jtsebomnana, y chca, chana canye bacna soye jtsamana ca” —Jesús tojánayana.

*Chě bomná y chě ndbomnějema Lázaro*

19 “Canye bomna entšá inamna; cha yojanamana uámana y botamana shbuenda uafjatsenga y lino entšayangá jtichětjuana, y cada te běts fiestěnga yojánama.

20 Canye ndbomnějěmnaca inamna, Lázaro ca uabainá, bacna nguayanánaca šocá; y cha yojanamana chě bomnabe běšásentše fshantsiñe jótbemana.

21 Quem ndbomnějema yojtseboše chě bomná yojtsesayentšana yojatquěcjana sanángaca jtoshachayana; y chě quešěnga imnaboye chabe nguaye cuerpo jajáfjuama.

22 Canye te Lázaro yojtsóbana, y Běngbe Bětsabe angelěnga Abrahámioye cha imojtamba, chě nyětscanga oyejuayěnga mondměna luaroye. Chě bomnánaca yojóbana y imojuátbontsa.

23 “Chě bomná infernoca puerte ngmėniñe yojtsesufrina ora, tsbanánoye yojontješiye y bėnoca Abraham ibojinye, y Lázaro cháftaca yojtsemna.

24 As chě bomná yojuayebuáchena: ‘¡Taita Abraham, šmolastemá! Lázaro michmó chabe ntšabuafja chaofchecuacué y atšbe bichtaja chauabofchecuacuaye, er quem iñeshoca tša sěntsesufrina ca.’

25 Pero Abraham ibojauyana: ‘Uaquiñá, menojuabó, aca fshantsoca vida conjánbomna ora, lempe ntšamo icojabošcá tconjanóyëngacñe, y Lázaro chë cuenta tondaye quenjátsbomna; pero morna, cha tšabá y oyejuayá entsemna, y aca jabuache ngménana contsebomna.

26 Y inye soye, canye bëts tũañe entsemna tšëngaftangbiocana mëntscoñe; chca, chë tšëngaftangbioye muentšana jenachnënguama tmojtsebošënga ndoñe chamondëtsobena, ni chocana bëngbioye cach ndoñe ca.’

27 “Y chë bomná ibojauyana: ‘Masque chca, Taita Abraham, Diosmanda Lázaro michmó atšbe taitabe yebnoye;

28 choca sëndábamna shachna catšátanga; as chaúyana ntšamo moca atše stsepasana y ntšamo jamëse chënga ndoñe chaondëtsamna quem ngménënga luaroye jabama ca.’

29 Chora Abraham ibojauyana: ‘Chënga ya mondbomna ndayá Moisés y chë Bëngbe Bëtsabe juabna oyebuambnayënga tmojëftsaná bema soyënga; ¡chëngbioye chamoyauná ca!’

30 Chë bomná ibojojuá: ‘Ndoñe, Taita Abraham; nderado obanënguentshana canya chëngbioye tojase, añe chë tšabe benache muantishache ca.’

31 Pero Abraham ibojauyana: ‘Chënga ni mo Moisés, ni chë Bëngbe Bëtsabe juabna oyebuambnayëngbioye ndoñe tmonjóyaunase, Bëngbe Bëtsábeñe ndoñe quemochatošbuáchiye, masque canye obaná chauatayenëse, chëngbioye jábuayenama ca’ ” —Jesús tojancuentá.

## 17

*Resjo yomna, nderado bacna soyënga cuanjama*

*(Mt 18.6-7, 21-22; Mc 9.42)*

1 Jesús chabe uatsjëndayënga tojanëyana: “Sempre echanjëftsemna juabnënga bacna soyënga jamama; pero, ¡tša lastema chë entšabiana ndabe causa ínënga bacna soyënga tmojama!

2 Más tšabá chabiana nántsemna canye nantsnëbé chamotsetamošëntsbua y mar béjayoye chamotsashbuetše, y ndoñe chë canya Bëngbe Bëtsábeñe ošbuachiyá bacna soye chaomama juanatsana.

3 Cuedado šmochtsebomna.

“Acbe catšata bacna soye tojamëse, cochjuácacana; y yocht-sajbaná ca cha tojayanëse, cochtseperdóna.

4 Masque nye canye te, canyëšfta soye ntšámnaca tmojaborlá, y canyëšfta soye ‘chca ndoñe más quebochatsbórla ca’ tmojauyanëse, aca cmontsemna cha jtseperdónana ca” —Jesús tojánayana.

*Bëngbe Bëtsábeñe jtsošbuáchiyëse, corente obenana jtsebomnana*

<sup>5</sup> Chë uatsjëndayënga Bëngbe Utabnábioye tmojaniana: — Ošbuáchiyana šmababaté ca.

<sup>6</sup> Y chë Utabná tojanëjua: —Tšëngaftanga ošbuáchiyana, batšatema masque nÿe mo mostaza jenaycá šmojtsebomnëse, quem sicomoro betiyoye šmatjauyana: “quemuentšana mojashtse y mar béjayoca mojó ca”, y quem betiye chca nanjama ca.

*Chë oservená ndayá ibomna jamana*

<sup>7</sup> “Nderado canÿa tšëngaftanguentsá canÿe bochichnayá tbojtsebomna, cha jajocana tojtashjango jajañe arayocana o uacnënga anÿenocana, ¿chábioye bochjauyana: ‘Matabo y mabose ca’?”

<sup>8</sup> Ndoñe, chamna mëntšá bochanjauyana: ‘Jetiñe juasama cochjuábua, y moprontá atše jaserviama atše candëse y candofšentscuana; y chentšana aca cochjase y cochjofsiye ca.’

<sup>9</sup> Y chë bochichnayábioye ndoñe quebochtëtschuaye ndayá tbojuatarieca cha tojamama.

<sup>10</sup> Tšëngaftán gnaca cachcá, lempe ntšamo Bëngbe Bëtsá tmojutarieca chašmojama ora, cmontsamna jayanana: ‘Nduámana oservénënga fsëndmëna; er nÿe ntšamo jamama šuamncá tifjama ca’ ” —Jesús tojánayana.

*Jesús, bnëtsanënga bacna nguayanánaca šoquënga tojanashná*

<sup>11</sup> Jerusalenoye benache, Jesús tojánachnëngo Samaria y Galilea luarëjana.

<sup>12</sup> Y canÿe pueblotémoye tojánashjango ora, bnëtsana boyabásenga bacna nguayanánaca šoquënga chábioye tmojána; chábertšana bënoca chënga tmojanoquedá,

<sup>13</sup> y mëntšá imojtsáyebuache: —¡Jesús, Buatëmbayá, šmotsalastemá ca!

<sup>14</sup> Jesús chënga tojánanÿe ora, tojanëyana: —Jerusalenoca bachnángbioye motsajna, y chënga šmochjínÿanÿiye tšëngaftanga mora ndëšoquënga šmojtsemnana ca.

Y tojanopasá, chë bnëtsanënga cabá imojétsayëntscuana, ya shnánënga imojtoquédaye.

<sup>15</sup> Canÿa chënguentsá, shnaná yojtsemnana tojáninÿe ora, yojeshëcona Bëngbe Bëtsábioye jabuache atschuanaye;

<sup>16</sup> y Jesusbe delante yojoshëntsamentsiye, jubiaca fshantsóntscoñe yojotsejbéna, y chábioye ibojtsatschuanaye; y chë boyabásana Samarioca entšá inamna.

<sup>17</sup> Chora Jesús tbojaniana: —Bnëtsanënga mondmëna chë shnánënga tmontoquédanga. ¿Ndayentšë chë inÿe esconëftanga imojtsemna?

18 ¿Nÿe quem boyabása, inÿe luarocana ashjanganá, tojesshécona Bëngbe Bëtsá jëtschuayama? ¿Ndáyeca chë ínÿenga ndoñe ca?

19 Y chë entsábioye tbojaniyana: —Matëtsbaná y motsatoñe; Bëngbe Bëtsábeñe aca icošbuachéyeca shnaná contsatsmëna ca.

*Ntšamo Bëngbe Bëtsabe amëndayana yochjóshjango  
(Mt 24.23-28, 36-41)*

20 Canÿe, chë fariseunga Jesús tmojantjá, mocna ora chë Bëngbe Bëtsabe amëndayana yochjanóshjanguama; y cha tojanéjua: “Bëngbe Bëtsabe amëndayana chaojóshjango ora, tšëngaftanga ndoñe quešmochatobenaye chca jinÿana.

21 Chora ndoñe quemochátichamo ‘Muentše entsemna’ o ‘Choca entsemna ca’; er Bëngbe Bëtsabe amëndayana ya tšëngaftangbeñe entsemna ca” —cha tojánayana.

22 Jesús chabe uatsjëndayënga tojanéyana: “Canÿe tempo echanjóshjango, y chora tšëngaftanga šmochántseboše canÿe te jtsebomnana, ntšamo chë Bëngbe Bëtsá Entšá tbojanbemá tšëngaftangbeñe enjëftsemna orcá; pero chora ndoñe chca queochatóshjango.

23 Chora báseftanga mochántsicamo: ‘Muentše entsemna’ o ‘Choca entsemna ca’; pero choye ndoñe šmatjá, ni šmatjúseto.

24 Er chë tojatcuinÿe ora, ntšamo celoca catoica juachoica tojabuashinÿinÿenacá, chca echántsemna chë Bëngbe Bëtsá Entšá tbojanbemá quem luaroye chaojésabo te.

25 Pero natsana cha bontsemna puerte jasúfriana, y morsca entsangbiana uabotená jtsemnana.

26 “Ntšamo Noé yojaniyena ora tojanopasacá, cachcá echanjopása chë Bëngbe Bëtsá Entšá tbojanbemá quem luaroye chaojésabo ora.

27 Chë tempo, entsanga imnasaye, imnofšëšnaye, imnóbouamnaye; natjëmbana imojtsiyeñe, y chca, natjëmbana imojtsomñe, Noé chë barquëshoye tojánamashënguëntscuana; pero chora uabouana uaftena tojánashjango y chë entsanga tojtsanapochocá.

28 Cachcá ntšamo Lot yojaniyena ora tojanopasacá: entsanga imnasaye, imnofšëšnaye, imnóbouamnaye, imojtsena, sananga imnajena y imnajebuana;

29 pero Lot Sodoma bëts pueblentsana tojëftsanbocna ora, Bëngbe Bëtsá tojanma celocana iñeshe y azufre chauaftema, y chentša entsanga tojtsanapochocá.

30 Cachcá echántsemna chë Bëngbe Bëtsá Entšá tbojanbemá chaojtonÿná ora.

31 “Chë tena, nda cachabe yebnentša tsbanánoca chaojsemna, y chabe soyënga cach tsoca tojtsebomñese, chocana



ndoñe chaondétastjango chë soyënga jesabobocnama; y nda jajoca chaojtsemna, yebnoye ndoñe chaondëta.

<sup>32</sup> Menójuabonga ntšamo Lotbe shémaftaca tojanopasama.

<sup>33</sup> Nda tojtsentsena quem luarentše bëtscá jtsebomnama y atšbiama jasúfriama ndoñe tontseprontana, chë nÿetsca tescama yomna tšabe vida echanjobuetše. Pero nda quem luarentša soyënga cachcá tojonÿá atše juastama, masque chaóbana, chë nÿetsca tescama yomna tšabe vida echántsebomna.

<sup>34</sup> “Atše cbéyana, chë ibeta, chë Bëngbe Bëtsá Entšá tbojanbemá chaojttonÿná ora, útata canÿe jutsnëshañe bochántsemna; canÿa mochanjesbetše y chë ínÿana ndoñe.

<sup>35</sup> Uta shembásata cánÿiñe bochántsejanÿcoye; canÿa mochanjesbetše y chë ínÿana ndoñe.

<sup>36</sup> Uta boyabásata jajoca bochántsetrabajaye; canÿa mochanjesbetše y chë ínÿana ndoñe ca” —cha tojanéyana.

<sup>37</sup> Chora chë uatsjédayënga Jesús tmojantjá: —Utabná, ¿ndëmoca chca yochjopása ca?

Y cha tojanjuá: —Chë obanabe cuerpo tojtsemnentše chë gallinacënga jojotana ca.

## 18

### *Chë viudá y chë mandadbiama cuento*

<sup>1</sup> Jesús mëntšá tojanacuntá, entšanga jabuátambama, Bëngbe Bëtsáftaca nÿets tempo jtsencuéntayana yomnama, ainaniñe añemo jtsebomnama ndocna te ntjajbanacá.

<sup>2</sup> Mëntšá tojánayana: “Canÿe pueblentše canÿe mandado inamna; chana ni Bëngbe Bëtsábioye ndoñe bonjánebiauata, ni entšanga yonjánayaunana.

<sup>3</sup> Chë pueblentše canÿe viudánaca inamna; chana canÿe demanda yojánbomna. As chë mandádbioye yojobeconá y mëntšá ibojauyana: ‘Diosmanda atšbe uayayá motsecastigá ndayá šojaborlama ca.’

<sup>4</sup> Bayté chë mandado ndoñe yonjábosena chë viudábioye joyeunayama; pero chentšana cha yojenójuaboye: ‘Masque Bëngbe Bëtsá ndoñe quetsátebiauata, ni entšanga ndoñe quetsátayaunana,

<sup>5</sup> pero quem viudá cada ora endabó causa, aiñe chanjóyeunaye, chabe uayayá chanjacastíga; ndóñesna cada te nandaboye y cabana ya šochanjanamëntša ca.’ ”

<sup>6</sup> Chentšana Bëngbe Utabná tojánayana: “Smonjouena ntšamo chë ndoñe tšabá ama mandado yojayancá.

<sup>7</sup> Y chca, ¿Bëngbe Bëtsá chabe bocacánënga ndoñe yochanjátsebacaye? Chënga mora ínÿengbe causa

montsesufrina y cada te Bëngbe Bëtsá mondbétseimpadana chaújabuachama. ¿Más chamuatobatmá ca yochjáuyana?

8 Atse cbëyana, Bëngbe Bëtsá betscó tšëngaftanga cmochanjátsebacaye, tšëngaftanga chë ínÿengbe causa mora šmojtsesufrínënga. Pero chë Bëngbe Bëtsá Entšá tbojanbemá chaojésabo ora, ¿cabá Bëngbe Bëtsábeñe ošbuáchiyënga quem luarentše entšanga yochjánÿena ca?” —Jesús tojánayana.

*Chë fariseo y chë Romocama impuesto atjanayabiamá cuento*

9 Báseftanga imojtsanjuabná chënga tšabe entšanga imnamna ca, pero chë ínÿengbiye imojtsëbuayënja; chíyeca Jesús mëntšá tojanacuntá jabaúatambama:

10 “Uta boyabásata Bëngbe Bëtsabe bëts yebnoye tbojána Bëngbe Bëtsáftaca jencuéntama: canÿa yojamna fariseo, y chë ínÿana, canÿe Romocama entšángbiye impuesto atjanayá.

11 Chocna chë fariseo, tsanana Bëngbe Bëtsábíoye mëntšá ibojtsecuéntaye: ‘Bëngbe Bëtsá, cbontsatschuaná atse chë ínÿengcá ndoñe quetsatsmënama: atbëbanënga, puerte bacna soye amënga y shémbíoye ínÿaftaca íngñayënga; y ni quem Romocama impuesto atjanayacá ndoñe quetsatsmënama.

12 Atse sënduamana, ácaftaca jencuéntamna, canÿe semaniñe uta soye tondaye ntjascá jtsemnana; y lempe stjonÿenentšana, bnëtsanentšana canÿe soye acbiamá sëndëquécjná ca.’

13 Pero chë Romocama impuesto atjanayana, bënoca yojtsemna, ni celoye ntjontješiyá, yojtsenócochjantšetaye y mëntšá yojtsichamo: ‘¡Atšbe Bëtsá, šmotselastemá, atšajema bacna soye amá tsmëna causa ca!’ ”

14 Chentšana Jesús tojánayana: “Atse cbëyana, quem Romocama impuesto atjanayá chabe yebnoye tojtaná chabe bacna soyëngama perdonaná, pero chë fariseo ndoñe. Er nda cachá bëtsá tojtsenobiamná, nduamaná mochántsebema; y nda cachá nduamaná tojtsenobiamná, aíñe bëtsá mochanjábema.”

*Jesús, basetëmëngbiamá Bëngbe Bëtsábíoye tbojanimpadá (Mt 19.13-15; Mc 10.13-16)*

15 Entšanga imojanamana Jesúsbiye basetëmënga junatsana chauabájajuama, y Bëngbe Bëtsábíoye chëngbiamá chaboimpadama; pero chë uatsjëndayënga chca tmojáninÿe ora, tmojanontsé chë basetëmënga unachayënga jtsécácanana.

16 Pero Jesusna chë basetëmënga tojánachembo, y mëntšá tojánayana: “Cachcá mónÿaye chë basetëmënga átšbíoye chamuabo, y ndoñe matëuyanana; er Bëngbe Bëtsabe amëndayana endmëna chë mo quem basetëmëngcá imomnëngbiamá.

17 Ndegombre cbëyana, nda Bëngbe Bëtsabe soyënga ndoñe tonjóyëngacñe mo canÿe basetëmá jtsošbuáchiyëse,

cha ndoñe queochatobenaye Bëngbe Bëtsabe amëndayoye jamashënguama ca.”

*Canÿe bomna entsá Jesúsbioye tojána  
(Mt 19.16-30; Mc 10.17-31)*

18 Canÿe mandayá Jesúsbioye tbojantjá: —Tšabe Buatëmbayá, ¿ndayá šojtsemna jamana chë nÿetsca tescama yomna tšabe vida jtsebomnama ca?

19 Y Jesús tbojanjuá: —¿Ndáyeca šcjauyana “tšabia ca”? Tšabia nÿe canÿa endmëna: Bëngbe Bëtsá.

20 Aca condétatsëmbo ntšamo Bëngbe Bëtsá tojanmandacá: “Acbe shema ínÿaftaca ndoñe cattseíngñaye, inÿa ndoñe catjóba, ndoñe catjatbëba, ndoñe catjuaboínÿena y acbe bëtsëtsata ndoñe stëtšoye catjáquedaye ca.”

21 Chora chë boyabása tbojanjuá: —Atše lempe chca básetema orscana sëndocumplina ca.

22 Jesús chca tojanuena ora, tbojaniyana: —Cabá canÿe soye cmontsebuáshbena jamana: lempe ntšamo icobomncá cochjetsatobuiye, y chë crocénana, ndbomnjémënga cocht-satšataye; chca, celoca canÿe bëts bomnana cochántsebomna. Chentšana, cochjabo y šcochjuasto ca.

23 Chë entsá chca tojanuena ora, puerte ngménaca yojtsemna, er cha corente bomná inamna.

24 Chca ngmená tbojáninÿe ora, Jesús tojánayana: —¡Yapa totcá bomnëngbiama entsemna Bëngbe Bëtsabe amëndayoye jamashënguama!

25 Ndegombre, más paselo endmëna canÿe camello chë coshufjentša atëfjnëjana chauachnëngo, y ndoñe canÿe bomná Bëngbe Bëtsabe amëndayoye jamashënguana ca.

26 Chora, chë chca imojouenënga tmojánayana: —¿As nda yochjobenaye atsbočaná jtsemnana ca?

27 Y Jesús tojanëjua: —Ndayá entsanga ndoñe mondobena jamana, Bëngbe Bëtsá aíñe endobena jamana ca.

28 Chora Pedro, Jesúsbioye tbojaniyana: —Bëngbe Utabná, aca contsonÿá, bënga lempe chë fsëndbomna soyënga fsënjëseboshjona, y ácaftaca fsëntsajna ca.

29 Jesús chora tojanëyana: —Ndegombre cbëyana, ndánaca Bëngbe Bëtsábioye jaserviama, chabe amëndayama jtsabuayiyayëse, cachcá tojëftseboshjona chabe yebna, shema, catšátanga, bëtsëtsanga o básenga,

30 cha mora quem luarentše chë soyëngama más echanjóyëngacñe, y chë inÿe luarocna, chë nÿetsca tescama yomna tšabe vida ca.

*Jesús cachiñe tojánayana cha jóbanama y jtayenama  
(Mt 20.17-19; Mc 10.32-34)*

31 Jesús chabe bnětsana uta uatsjéndayěnga barie tojánachembo, y měntsá tojaněyana: “Smontsetátšěmbo mora Jerusalenoje běnga montsajnama, y chocha lempe echanjochněngo ntšamo chě Běngbe Bětsabe juabna oyebuambnayěnga, chě Běngbe Bětsá Entšá tbojanbemabiana tmojanabemcá;

32 er chocha cha chě ndoñe judiěngbe cucu-atšiñe mochanjáboshjona, y mochantsáboyejuana, mochanjójyenguango, mochántsebuashětotjo;

33 y chamojátjanjentsana, mochanjóba, pero unga tianoje cha echántayena ca.”

34 Chě uatsjéndayěnga tondaye tonjaněsertá, ni montsetátšěmbo ndayá bétsemnana ntšamo Jesús yojsětsětsnacá, er chěngbiana yojamna josértama ndopodena soyěnga.

*Jesús, Jericó pueblota canye jtanábioje tbojanshná*  
(Mt 20.29-34; Mc 10.46-52)

35 Tojanopasá, Jesús Jericó pueblote yojtsebéconaje ora, canye jtaná benache juachañe inatbemana, lemošna otjanañe.

36 Entšanga chějana imojtsachnějuanama tojanuena ora, yojanotícia ndayá yojsopasana ca,

37 y chě entšanga tmojaniyana, —Jesús Nazaretocá entsebeconá ca.

38 As cha yojontsé uayebuáchana: —¡Jesús, Davídbentšana Entšá, šmotselastemá ca!

39 Chě natsana imojtsajněnga chě jtaná imojtsácacana, iytěca chaóbemama; pero cha más yojsáyebuache: —¡Davídbentšana Entšá, šmotselastemá ca!

40 As Jesús tojantsá y tojanmandá cha chamobetšama. Cha ya bécoñe yojtsemna ora, Jesús tbojantjá:

41 —¿Ndayá cojtseboše atše acbiana chjamama ca?

Y chě jtaná tbojanjuá: —Atšbe Utabná, atše sěntseboše chašuatabínynama ca.

42 Chora Jesús tbojaniyana: —Matinje, Běngbe Bětsábeñe betsošbuachéyeca shnaná contsatměna ca.

43 Y cachora cha tšabá ibojtabinyna, y Jesúsbioje ibojtsěstona, Běngbe Bětsá atschuanaje. Y nyětsca entšanga, chca tmojaninje ora, Běngbe Bětsá imojtsatschuanaje.

## 19

*Jesús y Zaqueo*

<sup>1</sup>Jesús Jericó pueblota tojánashjango ora, chě pueblějana cha yojsachnějuana.

2-3 Chora, canÿe bomna entšá, chë Romocama entšanga impuesto atjanayëngbe amëndayá, Zaqueo ca uabainá, yojtseboše Jesús jinÿama. Pero ndoñe yontsobena jinÿama, bëtscá entšanga causa y cha becuca inamna causa.

4 Chcasna, cha betscó natsanoye tojaftsantójtajo y canÿe sicomoro betiyeshoye tojánashëngo, chca, Jesús chëjana tojt-sachnëjuana ora, jinÿama jobenayama.

5 Jesús chë betiyeshoye tojánashjango ora, tsbanánoye tojanontješé y Zaquéobioye tbojáninÿe. As Jesús tbojaniyana: “Betsco chocana matastjango, Zaqueo, er mënté chanjá acbe yebnoye jatema ca.”

6 Chora Zaqueo betscó tojtastjango y chentšana puerte oyejuayá Jesúsbioye tbojanofja.

7 Entšanga chca tmojáninÿe ora, tmojanontšé Jesusbe contra mëntšá ichámua: “Jesús tonjá canÿe bacna soyënga amabe yebnentše jatema ca.”

8 Chora Zaqueo tojantsá, Bëngbe Utabná Jesús bentše, y mëntšá tbojaniyana: —Mouena, atšbe Utabná, atšbe bomna soyënguentsana tsëntsañe ndbomnëjëmënga chanjátšataye y nda más crocénana tijëftseyëngacá, chë ntsachetšá tijëftsefcama canta soye más chantoyiye ca.

9 As Jesús tbojaniyana: —Mënté, aca acbe bacna soyënguentsana atsbocaná contsemna, er Zaqueo, ácnaca Abrahábentšana entšá condmëna.

10 Er chë Bëngbe Bëtsá Entšá tbojanbemá tojabo chë pochocánënga jtsemnama imojtsajnënga jabëtsanguanguama y jabátsebacama ca.

### *Chë crocenánama cuento* (Mt 25.14-30)

11 Entšanga chë soyënga imojtsuenana, y Jesús inÿe soye tojanacuntá jabuátambama, er cha ya Jerusalén béconana yojtsemna, y entšanga imojtsejuabnaye chë Bëngbe Bëtsabe amëndayana ya yochjanóshjango ca.

12 Jesús tojanëyana: “Canÿe luarentša uámana entšá inÿe bën luaroye yojá, cachabe luarentša rey chamobemama y chentšana cachábioye jtama.

13 Cabá nda ora, chabe bnëtsana oservénënga yojáchembo y bëtscá crocénana cada cánÿabioye yojëftsayentsbuachiye, y mëntšá yojëftsëyana: ‘Quem crocenánaca trato šmochjábema atše candëtabëntscuana ca.’

14 Pero cachabe luarentša entšanga cha imojuáya, as chëngna básefta entšanga imojichamuá chë inÿe bën luaroca mëntšá chamuayanama: ‘bënga ndoñe queftsátsboše cha bëngbe rey chaotsemnama ca’.

15 “Pero pronto chë luarentša rey cha imojábema. Y chë luaroye yojtá orna yojamánda chë crocénana yojéftsayentsbuáchenga chamobéconama, jtsetatšëmbuama ntsachetšá cada ona chë crocenánaca yojongánama.

16 Chë natsaná yojáshjango y yojayana: ‘Taita, acbe crocénana bnëtsana soye más tonjoboté ca.’

17 Y chë rey ibojojuá: ‘Tša tšabá, tšabe oservená. Aca quem base soyiñe ntšamo tchojamandacá tšabá tcojámayeca, bnëtsana pueblentša mandado chacotsemnama cbojayé ca.’

18 Chentšana inýa yojáshjango y yojayana: ‘Taita, acbe crocénana shachna soye más tonjoboté ca.’

19 Y chë rey ibojauyana: ‘Acnaca shachna pueblentša mandado cochántsemna ca.’

20 “Chorna inýa yojobeconá y mëntšá yojayana: ‘Taita, muentše acbe crocénana entsatsmëna; canýe pañuelëjuañe bonguana sëntsejajo.

21 Atše acbiana uatjana šonjuábuache, er aca canýe tšátjaye entšá condmëna; aca chë ndoñe condbuajonentšana jocñana y chë ndoñe tconjajé luarentšana jaja saná jobuátbanana ca.’

22 As chë rey ibojauyana: ‘Bacna oservená, cach acbe palabrëngaca chanjínýanýiye aca ndoñe tšabá tconjamama. Atše chë ndoñe sëndbuajonentšana jocñana y chë ndoñe sënjajé luarentšana jobuátbanana tsuamanama icojátatšëmbëse,

23 ¿ndáyeca ndoñe tconjá chë crocénana bancoca jetsobuájuama, y atše camoye matijtabo ora, mašctoyé chë crocénana y chë chentšana tojoboté crocénanënaca ca?’

24 Y chë chentše imojtsemna entšanga yojáuyana: ‘Chë crocénana motseboca y chë bnëtsana soye más tojabotébioye chana motsatšetá ca.’

25 As chënga imojojuá: ‘¡Pero cha ya bnëtsana soye más entsebomna ca!’

26 Y chë rey yojójua: ‘Atše chéyana, nda tojtsebomnábioye, más mochanjátšetaye; pero nda tondaye tondbomnábioye, chë tojtsejuabná batšatema yobomna sóynaca mochántseboca ca.

27 Y chë atše uayayënga, chë chëngbe rey atše chaitsemnama ndoñe monjánbošëngna, moye mënátse y atšbe delante šmochtsëbaye ca’ ” —cha chora yojayana.

*Jesús Jerusalenoye tojánashjango*

*(Mt 21.1-11; Mc 11.1-11; Jn 12.12-19)*

28-29 Chca tojéftsanayana chentšana, Jerusalenoye yojétsaye ora, Jesús tojánashjango canýe tjashoye, Olivos ca uabáiniñe, Betania y Betfagé pueblënga béconana. Chora, uta chabe uatsjëndayata tojanichamó,

30 mëntšá jáuyanëse: “Tsëndatbe natsana entsemna base pueblotémoye motsata. Chašojáshjango ora, canýe burrotema

utsbuaná šochanjínjēna. Chábeñe cabá ndocná tonjenojayé. Sochjuajafjoná y šochjuánatse.

31 Y nderado nda ndáyeca šojtsajafjná ca chacmojátjasna, šochjauyana: ‘Bēngbe Utabná bontsájaboto ca.’ ”

32 Chē uatsjéndayata tbojána y lempe ntšamo Jesús tojanēyancá tbojáninjēna.

33 Y chē burrotema imojtsajafjná orna, chē burrotema nduiñēnga tmojanéyana: —¿Ndáyeca chē burrotema šojtsajafjná ca?

34 Chora chata tbojánayana: —Bēngbe Utabná bontsajabótoyeca ca.

35 Chentsana Jesúsbioye chē burrotema tmojanánatse, y chē burrotémbeñe chatbe entšayá tbojanájatse, y chábeñe Jesús tmojanenjáyé.

36 Y cha yojtsachnējuana ora, entšanga chēngbe entšayá benachējana imojtsētétsatsana.

37 Olivos tjashe tsmanoye yojtsebeconá ora, chē bētská entšanga, Jesúsbeñe ošbuáchiyēnga, tmojanontšé uayebuáchana y Bēngbe Bētsá oyejuayēnga jētschuayana, Bēngbe Bētsabe obenánaca bēts soyēnga Jesús tojanmama.

38 Chēnga mēntšá imojtsichamo: “¡Corente bendición bomná chaotsemna, chē Bēngbe Utabnabe obenánaca tojabo Rey ca! ¡Celoca tšabá entsemna! ¡Bēngbe Bētsá matschuanga ca!”

39 Chē entšanguentše básefta fariseunga imojtsemnēnga, Jesús tmojaniyana: —Buatēmbayá, acbe ústonēnga mēcácana chca ndoñe chamondétsáyebuachama ca.

40 Pero Jesús mēntšá tojanējua: —Ndegombre cbēyana, mēnga iytēca tmojobiamēse, chē ndētšbenga muanjuayebuáchena ca.

41 Jesús Jerusalén béconana tojánashjango, y chē bēts pueblo tojáninjē ora, chentsa entšangbiama tojánenobošachna.

42 Y mēntšá tojánayana: “¡Malaye šmēntsetátšēmo, nje mo mēnténaca, ndayá yojtseita tšēngaftangbeñe lempe tšabá chaot-somñama! Pero mora chē soye tšēngaftangbe bominjama entsēitēmena.

43 Er Jerusalemoca bacna tenga echanjóshjango; chora uayayēnga chentsa shēconánējana canye tapiēse mochantsepórma, mochantsejétja y njetzca juachoicana mochanjontšé tšēngaftanga jtsatsejana,

44 y lempe mochantsepochóca. Muentša oyenēnga mochantsēbaye, y ni mo canye ndētšbé injebé juatsboca quemochaiseboshjona, chē Bēngbe Bētsá tšēngaftanga jātsebacama tojabo ora, ndoñe chešmatoyeuná causa ca” —Jesús tojánayana.

*Jesús, Bëngbe Bëtsabe bëts yebnentšana enënga y obuámnayënga tojtanëbuacna*

*(Mt 21.12-17; Mc 11.15-19; Jn 2.13-22)*

<sup>45</sup> Chentšana, Bëngbe Bëtsabe bëts yebnoye Jesús tojánamashëngo y tojanontsé chë chentše imojtsenënga chentšana jtëbuacnana,

<sup>46</sup> y tojanëyana: “Bëngbe Bëtsá chabe uabemana palabrënguiñe tojayana: ‘Atsbe bëts yebna echántsemna átseftaca encuéntaye yebna ca’, pero tsëngaftangna, atbëbanëngbe oyeniñe chë yebna šmojtsebema ca.”

<sup>47</sup> Y cada te, Bëngbe Bëtsabe bëts yebnentše Jesús entsanga yojtsabuátambaye; y bachnangbe amëndayënga, ley abuátambayënga y chë pueblentša mandayëngnaca imojtsenguaye ntšamo jamëse cha jóbana.

<sup>48</sup> Pero ndoñe tmonjáninÿena ntšamo, er nyetsca entsanga corente imojtseyeunana ntšamo cha yojtsoyebuambnacá.

## 20

*Jesusbe obenana*

*(Mt 21.23-27; Mc 11.27-33)*

<sup>1</sup> Canÿe te, Bëngbe Bëtsabe bëts yebnentše Jesús yojtsabuátambaye, y chë tsabe noticiëngama yojtsabuayiyná ora, tmojánashjajna bachnangbe amëndayënga, ley abuátambayënga, judiëngbeñe bëtsëjemëngcá mandayëngaftaca cánÿiñe;

<sup>2</sup> y Jesús tmojanianya: —Smëyana; ¿ndaye deréchoca chë contsama soyënga aca cojtsama ca? o ¿chca jtsamama nda obenana tcmënjatšetá ca?

<sup>3</sup> Chora Jesús tojanëjua: —Atšnaca canÿe soye sëntsebmna tsëngaftanga jatjayama. Smochjojuanga.

<sup>4</sup> ¿Nda Juan chë Ubayaná tbojanichmó entsanga jubáyama, Bëngbe Bëtsá o entsanga ca?

<sup>5</sup> Chora chënga tmojanontsé enatsëtsnayana: “ ‘Bëngbe Bëtsá ca’ chamojojuase, cha šochanjáuyana: ‘As ¿ndáyeca chábeñe ndoñe šmonjanošbuaché ca?’

<sup>6</sup> Y ndoñe quemuátobena jayanana ‘entsanga ca’; entsanga ndëtsbéngaca buattsëbaye, er nyetscanga becá mondëjuabná Juan ndegombre Bëngbe Bëtsabe juabna oyebuambnayá yojamnama.”

<sup>7</sup> Chcasna, chënga tmojanjuá ndoñe monjántatsëmbo nda Juan tbojanichmó entsanga jubáyama ca.

<sup>8</sup> Y Jesús tojanëyana: —Asna atše cach ndoñe quebochatëyana ndaye deréchoca chca stsama ca.

*Chë puerte bacna trabájayëngbiam a cuento*

*(Mt 21.33-44; Mc 12.1-11)*



<sup>9</sup> Chentšana Jesús tojanontšé entšanga jáuyanana, y quem cuéntoca tojanabuatambá: “Canýe entšá uvas betiyënga yojáje y chë fshantse inýe trabájayënga yojúyentšame, y baytescama bën luaroye yojtsoñe.

<sup>10</sup> Chë uvasëšangá juashacama tempo yojobuache orna, chë jajañe nduiño canýe oservená ibojíchmuá chë trabájayënga jáuyanama ntsachetšá cha ibojtsotocánama. Pero chëngna cha imojtsejantšetaye, y tondaye ntoyiyá imojtichmuá.

<sup>11</sup> Chentšana inýa ibojíchmuá; pero chë trabájayënga cha imojtsejantšetaye, imojtsóyenguango, y tondaye ntoyiyá imojtichmuá.

<sup>12</sup> Chë nduiño inýa ibojatichmuá; pero chánaca chënga imojtsejantšetaye, imojtselísia, y chentšana imojtábocna.

<sup>13</sup> “Chora chë nduiño yojeniyana: ‘¿Y mora ntšamo chjama ca? Cach atšbe bonshana uaquiñá chanjíchmuá; nderádose cha aiñe mochanjóyeunaye ca.’

<sup>14</sup> Pero chë trabájayënga, chë uaquiñá imojinýe orna imojeniyana: ‘Mua chë fshantse nduiñbe uaquiñá entsemna. Lempe chabe soyënga mua echanjóyëngacñe; motsóbanga y nyetsca chabe otocana soyënga bëngbiana echanjoquéda ca.’

<sup>15</sup> Chcasna, chë uvas jajañentšana cha imojtsábocna y imojtsóba.”

Chora Jesús tojanatjá: —Y asna, ¿ntšamo šmojtsejuabná, ndayá chë jajañe nduiño chë trabájayëngaftaca yochjama ca?

<sup>16</sup> Cha co echanjá y chë trabájayënga echanjetsëbaye, y chë uvas betiyënga jajañe inýe trabájayënga echanjárrendaye ca.

Chë entšanga chca tmojanuena ora, tmojánayana: — ¡Bëngaftaca ndocna te chca chaondopasá ca!

<sup>17</sup> Pero Jesús tojanënyanyé y tojánayana: —As ¿ndayama Bëngbe Bëtsabe uabemana palabrenguiñe iuayana?:

Chë yebna jebuanënga tmojtsanaboté ndëtsbé, mora chë más bëts uashacuanësentše entsejájona ca.

<sup>18</sup> Ndánaca chë ndëtsbeñe chaojotsatšá, chëbé bochantšacacaye; y chë ndëtsbé ndábeñnaca chaojótšatše, polvëshe bochantšebema ca —Jesús tojánayana.

<sup>19</sup> Chë bachnangbe amëndayënga y ley abuátambayënga tmojanenótatšëmbona Jesús chca tojanacuntá jinýanýiyama, chënga mo chë puerte bacna trabájayëngcá imojamnana; asna tmojánbošena cachora jishachana, pero entšangbiana imojtsauatja.

*Chë Romoca bëts mandadbiana impuesto jtsat-squëcñayama*

*(Mt 22.15-22; Mc 12.13-17)*

<sup>20</sup> Chentšana chënga báseftanga tmojanichamó, mo ndegombre tšabe entšanga cuaftsemncá chamobiamëse, Jesús

jisháchichiyama, nderado ndayá cha tojayaniñe; y chca chënga jobenayama cha jishachana y chëngbe mandádbioye juanat-sama.

<sup>21</sup> As chënga tmojantjá: —Buatëmbayá, bënga fsëntsetatsëmbo ntšamo aca cojtsoyebuambná y cojtsabuatambacá ndegombre tšabá yomnama, ntšamo ndegombre Bëngbe Bëtsá yobošcá, y acbiama tondaye quenatámana nda más uamaná o nduamaná tomnana. Aca contsabuatambá ndegombre tšabe vida jtsebomnama, ntšamo Bëngbe Bëtsá yomandacá.

<sup>22</sup> Chcasna, šmëyana, žtšabá tayojtsemna bënga, César, chë Romoca bëts mandadbiama, impuesto jtsatsquécjnayana o ndoñe ca?

<sup>23</sup> Jesús yojtsetátšëmbo, ntšamo cha tojayaniñe jisháchichiyama chënga imojtsebošama; as tojanëyana:

<sup>24</sup> —Chë šmatsquécjná crocénana šminÿinÿenga ca; žndabe jubiá chë crocenániñe yojtsemna, y ntšamo muentše entsabemancá nda chca iuabaina ca?

Y chënga tmojanjuá: —Césarbe jubiá; cha chca enduabaina ca.

<sup>25</sup> Y Jesús tojanëyana: —César šmochtoyiye cha ibotocana soye; y Bëngbe Bëtsana cha ibotocana soye ca.

<sup>26</sup> Y chca, chë ichmónënga ndoñe imonjobenaye jisháchichiyana, ndayá cha entsangbe delante tojayaniñe. Maska, ntšamo tojanëjuama, ojnánënga iyteca imojbiama.

### *Obanënga jtayenama Jesús tmojantjá*

*(Mt 22.23-33; Mc 12.18-27)*

<sup>27</sup> Chentšana, báseftanga saduceo ca uabaina entsanga tmojána Jesús jinÿama. Chënga imojanjuabná obanënga ndocna te ntayenana ca. Jesús mëntšá tmojantjá:

<sup>28</sup> —Buatëmbayá, Moisés bëngbe leyënguiñe tojëftsanabema, nderado canÿe boyá tojtsóbana y básenga ndoñe tonjëftsabáshejuanëšna, canmëna chë uabentsá chë shémaftaca jtobouamayana, chca, chë chabe uabochená obanabiama básenga jtsabamnama ca.

<sup>29</sup> Chcase, canÿe bëngbentše canÿsëfta catsátanga monjamna. Chë natsaná tonjanobouamá y tontsanóbana, básenga ntjëftsabashejuancá;

<sup>30</sup> chentšana chë inÿa chë shémaftaca tonjanobouamá, y cachcá tonjanopasá.

<sup>31</sup> Chë inÿe uabentsá chora cháftaca tonjanobouamá, pero tontsanóbana básenga ntjëftsabashejuancá; y cachcá, chë inÿe uabentsëgnaca cháftaca tmonjanobouamá, pero nÿetscanga tmonjanóbana básenga ntjëftsabashejuancá.

<sup>32</sup> Cabana, chë shembásanaca tontsanóbana.

33 Y chcasna, chë obanënga chamojtayena ora, ¿ndabe chë canÿsëfta catšatanguentsabe shema chë shembása yochtsemna, nÿetscanga cháftaca tmojanobouamase ca? —chënga tmojantjá.

34 Chora Jesús tojanëjua: —Quem luarentše boyabásenga y shembásenga mondbétsobouamnaye;

35 pero chë echanjóshjango luaroye jama y obanënguentsana jtayenama merecido jtsebuájonama chamojobenangna, masque boyabásenga o shembásenga, ya ndoñe quemochatóbouamnaye,

36 ni queochátopodena chënga chamóbanama, y chca, chënga mochántsemna mo angelëngcá, y Bëngbe Bëtsabe básenga mochántsemna, obanënguentsana mochtayénayeca.

37 Y Moisésnaca, chë yojtsángbototjuana betiyetémama tojanábementše, bënga šontsinÿanÿná chë obanënga imnátayenama; chentše Bëngbe Bëtsá tojánayana cha yomna Abraham, Isaac y Jacobëbe Bëtsá ca.

38 Bëngbe Bëtsá chca tojánayana ora, entsichamo cha ndoñe yondmëna obanëngbe Bëtsá, sinó aina entsangbe Bëtsá ca, er masque chënga tmojanóbana, chënga cabá Bëngbe Bëtsáftaca mondoyena ca —Jesús tojánayana.

39 Chora básefta ley abuatambayënga Jesús tmojanayana: —Buatëmbayá, tšabá tcjayana ca.

40 Y ya ndoñe más montsenñémua inÿe soyëngama jatstjanayana.

*¿Cristo ndabe entsábentšana yomna?*

*(Mt 22.41-46; Mc 12.35-37)*

41 Jesús tojanatjá: “¿Ndáyeca tšëngaftanga šmnétsichamo chë Uámana Uabuayaná, chë Cristo, Rey Davídbentšana iuabó ca?”

42 Er cach David, chabe librëšañe Salmos ca uabainëšañe, tojánayana:

Bëngbe Bëtsá, atšbe Utabná Crístbioye tbojanayana:

‘Atšbe catšbioica mótbema,

43 atšbe obenánaca, acbe uayayënga acbe cucuatšinë chamoquedama chjamëntscuana ca.’

44 ¿Ntsámose, Cristo, Davídbentšana nántsemna, cach David ‘Utabná ca’ chábioye tbojtsabobuátmëse ca?” —cha tojanatjá.

*Jesús chë ley abuatambayëngbiama tojánayana chënga ndoñe tšabá montsama ca*

*(Mt 23.1-36; Mc 12.38-40; Lc 11.37-54)*

45 Nÿetsca entsanga imojtsuenana, y Jesús chabe uatšjëndayënga tojanëyana:

46 “Cuedado šmochtsebmna, y ndoñe šmattsama chë ley abuatambayëngcá; chënga jtsogusetánana bënëna entsayangaca jtsajnana, y jtsebošana tsáshenañe entsanga

becá respétoca chamotsacheuanayama. Chënga chë judiëngbe enefjuana yebnënguenache chë más uámána luarëngüiñe jtsetbiámanana, y fiestëngüiñe nÿa quëfseroca.

<sup>47</sup> Pero chë viudángbioye chë tmobomna soyënga jtsabacayana; y entsangbe delante tšabá chacmotsënyama y chënga imojtsaíngñama ndoñe chaondëtsótatsëmbuamna, Bëngbe Bëtsáftaca tša jtsencuéntayana. Chë causa, Bëngbe Bëtsá ínÿengbiama más chënga echanjácastigaye ca” —Jesús tojánayana.

## 21

*Jesús yojtsënyaye chë crocénana quëcjnyënga*  
(Mc 12.41-44)

<sup>1</sup> Bëngbe Bëtsabe bëts yebnentse, Jesús yojtsënyaye chë bomnënga crocénana jtsequëcjnyana chë crocénana quëcjnyëtémiñe;

<sup>2</sup> y canÿe viudá ndbomnjëjmna tbojáninÿe, uta crocénana chëtémiñe yojaftsesegóra.

<sup>3</sup> Chora Jesús tojánayana: “Ndegombre cbëyana, quem viudá ndbomnjëjema, Bëngbe Bëtsabiama nÿetscangbiama más becá tonjëftsesegorá;

<sup>4</sup> er nÿetscanga tmonjëftsesegorá chë yojtsóyentsjamentšana, pero chana, masque tša ndbomnjëjema, cha vida jtsebonama lempe ntsachetšá yobomncá tonjëftsesegorá ca.”

*Jesús tojánayana Bëngbe Bëtsabe bëts yebna lempe mochjápochocama*  
(Mt 24.1-2; Mc 13.1-2)

<sup>5</sup> Báseftanga imojtsichamo chë Bëngbe Bëtsabe bëts yebnama, tša yojtsebotamanana puerte uámána ndëtsbéngaca y chë entsanga imojanamana juambana Bëngbe Bëtsábioye uátšëmbona soyëngaca ca. As Jesús tojánayana:

<sup>6</sup> —Canÿe tempo echanjóshjango, y lempe ntšamo mora muentse šmontsonÿacá tondaye queochatoquéda, ni mo canÿe ndëtsbé inÿebé juatsboye. Lempe mochantsepochóca ca.

*Ntšamo yochtsemna quem luare jopochóca te chaojt-sobeco ora*  
(Mt 24.3-28; Mc 13.3-23)

<sup>7</sup> Chora chënga tmojantjá: —Buatëmbayá, ¿ntseco chca yochjopása? ¿Y ndayá Bëngbe Bëtsá yochjama, chca jopásama yojtsobecuama entsanga chamotsetatsëmbuama ca?

<sup>8</sup> Y Jesús tojánayana: —Cuedado šmochtsebonna ndocná chacmondáingñema. Er banga mochanjabo y mochantsabíchamo chënga atše imomna ca. Mochántsihamo:

“Atše chë Cristo sëndmëna”, y “Mora chë tempo entsemna ca”. Pero ndoñe šmatjóyaunaye.

<sup>9</sup> Y tšëngaftanga, entšanga imojtsentsjanama y entšanga mandadëngbe contra imojtsemnama chašmojtſuenana ora, ndoñe šmattsauatja, er entseyta natsana chë soyënga chaochnëngo; pero masque chca, chë quem luare jopochócama tempo cabá ndoñe queochátsmëna ca.

<sup>10</sup> Y mëntšánaca Jesús tojanëyana: “Canÿe luarentša entšanga, inÿe luaroca entšàngaftaca mochántſentsjanaye; y canÿe amëndayábentša entšanga, inÿe amëndayábioca entšàngaftácnaca.

<sup>11</sup> Ba luarënguiñe jabuache echanjuangmëmëmana, bëts shëntsana, y entšanga pochócaye šocanënga echanjóshjango; y celoca echántsemna puerta uabouana soyënga y bëts soyënga, entšanga jinÿanÿiyama quem luare ya yochtsopochócama.

<sup>12</sup> “Pero cabá ndoñe chca chaondochnëngo ora, tšëngaftanga cmochanjíshëche y chašmosufrima mochántſama; bënga judiëngbe enefjuana yebnëngoye cmochanjunatſe játsetšënama y cárceloyñaca cmochanjáutame, y reyënga y mandadëngbióynaca cmochanjunatſe, atšbe ústonënga bëtsemna causa.

<sup>13</sup> Chca šmochanjapása, ntšamo atšbiamá šmotatšëmbcá chënga chašmëyanama.

<sup>14</sup> Natsana ndoñe šmatjátſjuabnaye jenëuyanama ntšamo chora jóyebuambayana,

<sup>15</sup> er atše chanjama puerta tšabá y osertanáñaca tšëngaftanga chašmóyebuambama; y chca, tšëngaftangbe uayayënga ndoñe quemochatobenaye jayanana ndoñe tšabá šmontſichamo ca, y ndocá jojuama quemochatobenaye.

<sup>16</sup> Pero uayayëngbe cucuatšične cmochanjábashejuana cach tšëngaftangbe bëtsëtsanga, catšátanga, pamíllanga y amiguënga; y tšëngaftanguentšana báseftanga cmochantsëbaye.

<sup>17</sup> Y nÿetsca entšanga cmochantsëbuayënja, atšbe ústonënga bëtsemna causa.

<sup>18</sup> Pero tšëngaftangbe bestšaſentšana ni mo canÿe stjënëja quecmochátabajajo.

<sup>19</sup> Tšëngaftanga nÿets tempo átšbeñe ošbuáchiyënga chašmojtſemñëse, chë nÿetsca tescama yomna tšabe vida šmochántſebomna ca.

<sup>20</sup> “Jerusalén nÿets shëconana soldadënga chašmojanÿe ora, šmochtſetátšëmbo Jerusalén jopochócama tojobuáchama.

<sup>21</sup> Chorna, chë Judeoca oyenënga batsjabengoye chamotſacheta; Jerusalenentše chamojtſemñënga, chentšana chamuaisebocana; y chë jajenache chamojtſemñënga, Jerusalenoye ndoñe chamondésamashjna.

22 Er chora echántsemna chë entsangbe jabuache castigo; lempe ntšamo Bëngbe Bëtsabe uabemana palabrengüiñe endayancá chora echanjochnëngo.

23 ¡Tša lastema chë tempo shembásenga ngomámanëngbiama o ochóchaye básenga chamojtsabamnëngbiama! Er chora corente ngménana quem luarentse echántsemna, y quem luarentša entsangbiama chë uabouana castigo.

24 Inyenga espadějaca mochanjóbana, y ín्यengbioye nyetsca luarënguējana utámenënga mochanjunatse; y chë ndoñe judiëngna, Jerusalenoca entsángbioye mochántsatsejaye y mochantsëbaye, chca chaotsemnama Bëngbe Bëtsá tojalesenciantscuana ca” —Jesús tojánayana.

*Bëngbe Bëtsá Entšá tbojanbemá quem luaroye echanjésabo  
(Mt 24.29-35, 42-44; Mc 13.24-37)*

25 Mëntsánaca Jesús tojánayana: “Chora bëts soyënga echantsinýna shinýiñe, juashconiñe y estrellënguñe; y quem luarentša entsanga tša mochántsaumatja, ndayá jamama ntsetatšëmbcá, chë mar béjaye y olëshënga corente echantsefshauenana causa.

26 Entsanga echantsabuatëcja tša auatja causa y ndayá quem luariñe yochjopásama enócochinýena causa; er chë quem luarentša tsbanánoca espíritënga obenana bomnënga echanjángmëmmana.

27 Y chora entsanga mochanjinýe, chë Bëngbe Bëtsá Entšá tbojanbemá jantšetëshiñe echántsaboye, puerta obenánaca y corente buashinýinýaniñe.

28 Chë soyënga jochnënguama chaojobojatsé ora, añemo smochjentsetaye y bestšaše játsbanase smochjarrepára, er chora echántsemna chë tšëngaftangbe atsebacayana ca” —Jesús tojánayana.

29 Mëntsánaca Jesús tojanéyana jabuátambama: “Smochjinýe canýe higo betiye o ndaye inýe betíynaca.

30 Tojtsaisëjotsanama šmojinýe ora, jtsetatšëmbuana chë tšabe tempo ya yojtsaisobecuama.

31 Cachcá, chë soyënga yojtsëchnëjuanama chašmojinýe ora, smochtsetátšëmbo chë Bëngbe Bëtsabe amëndayana ya yojtsobecuama.

32 “Ndegombre cbëyana, lempe chca echanjochnëngo, morsca entsanga cabá ndóbana ora.

33 Celoca y quem luare echanjopochóca, pero atšbe palabra ndocna te queochaisopochóca.

34-35 “Cuedado smochtsebomna y ndoñe šmatjaleséncia tšëngaftangbe ainana bacna juabnëngaca chaotsemnama, jenomándama ntšobencá mocá enobuena causa, tmoye causa y nýe quem luarentša soyëngama enócochinýena causa; y

tšëngaftanga prontánënga šmochtsemna, nÿe ndeolpe chë te chaojobuache ora; y tšëngaftanga ndëprontánënga ndoñe chašmondëtsemna, mo tšëngaftangbiana canÿe uachmaniñe cuaftsemncá. Er nÿetsca quem luarentša entsangbiana chca echántsemna.

<sup>36</sup> Cuedado šmochtsebomna y yejuana šmochtsantješna; nÿe ntseco órnaca Bëngbe Bëtsáftaca šmochtsencuéntaye, chca, chë echanjopása soyëngama jótsbocama chašmobenama, y chë Bëngbe Bëtsá Entšá tbojanbemabe delante jashjanguama ca” —Jesús tojanëyana.

<sup>37</sup> Jesús, bnëtë Bëngbe Bëtsabe bëts yebnentše yojánabuatambaye, y ibetna, Olivos uabaina tjashoye yojánaye joquédama.

<sup>38</sup> Y nÿetsca entsanga cabá cachëse Bëngbe Bëtsabe bëts yebnoye imojánajna Jesús joyeunayama.

## 22

*Entsanga tmojanjuabó ntšamo jamëse Jesúsbioye jishachama*

*(Mt 26.1-5, 14-16; Mc 14.1-2, 10-11; Jn 11.45-53)*

<sup>1</sup> Ya yojétsobeco Bashco fiesta, chë levadúraca ndëpormana tandëse saye fiesta, chë Bëngbe Bëtsá Egiptocana judiëngbe bëts taitanga tojánatsebacama jtenójuaboyama.

<sup>2</sup> Chë bachnangbe amëndayënga y ley abuatambayënga imojtsenguaye ntšamo jamëse Jesús jóbana, pero entsangbiana imojtsauatja.

<sup>3</sup> Chora Satanás, Judas chë Iscariote ca uabobuatmabe ainaniñe bacna juabnënga tojanajó. Chánaca yojamna chë bnëtsana uta uatsjendayënguentšá;

<sup>4</sup> y tojána, chë bachnangbe amëndayënga y Bëngbe Bëtsabe bëts yebnoca soldadëngbe amëndayëngaftaca jencuéntama, ntšamo Jesús chëngbe cucuatšinë jayentšbáshejuanama.

<sup>5</sup> As chënga imojóyejuaye, y Judas tmojanšbuachená crocénana chama jtatšetayana.

<sup>6</sup> Y Júdasna aíñe ca tojánayana; y cach orscana cha yojtsenguaye ntšamo jamana y ndëmua ora Jesús chëngbioye jayentšbáshejuanama, ndocna entsanga ora.

*Jesús chabe uatsjédayëngaftaca Bashco saná tojanse*

*(Mt 26.17-29; Mc 14.12-25; Jn 13.21-30; 1 Co 11.23-26)*

<sup>7</sup> Chë Bashco fiesta ora tojanóshjango, chë levadúraca ndëpormana tandëse sayté; chë te yojamna, Bëngbe Bëtsá jëtschuayamna canÿe oveshá jóbana chora jasama.

<sup>8</sup> As Jesús, Pedro y Juánbioye tojanëyana: —Motsata y saná sochjapróna Bashco fiestama bënga mochjasama ca.

<sup>9</sup> Chora chata tbojantjá: —¿Ndémoca cojtseboše chë saná fchjapróntama ca?

<sup>10</sup> Y Jesús tojanējua: —Jerusalenentše chašojámashëngo ora, canye bacó cmochanjóbiatše, matbajiñe búyeshe echantsabuyambaye. Cha šochjuasto, y šochtsonyaye ndëmuanye yebnentše cha yochjámashënguama;

<sup>11</sup> y chentša nduiño šochjauyana: “Chë Buatëmbayá šonjichamó aca jauyanama: ‘¿Ndayentše chë tsañe yojtsemna, Bashco saná atše atšbe uatsjéndayëngaftaca jasama ca?’ ”

<sup>12</sup> As cha cmochanjínyanýiye canye bëts tsañe, tsbanana pisoca; ya lempe echántseprontana, y chentše, Bashco fiestama saná šochjaprónta ca.

<sup>13</sup> As chë útata tbojána, y tbojáninýena lempe ntšamo Jesús tojanëyancá, y chentše chë Bashco saná tbojanprontata.

<sup>14</sup> Jasama tojanobuache ora, Jesús mesëshentše tojanótbema chabe uatsjéndayëngaftaca, chë cachënga más chcoye chabe ichmónënga ca uabáinënga.

<sup>15</sup> Chora Jesús tojanëyana: “Tša sëndánboše quem Bashco saná tšëngaftangftaca jasama, atše cabá ndoñe chandësufri ora.

<sup>16</sup> Muentšana ndoñe más quemëntša saná quicháise, Bëngbe Bëtsabe amëndayana candóshjanguëntscuana. Chora echantsótatšëmbo ntšamo quem fiesta ndegombre iuayancá ca.”

<sup>17</sup> Chorna canye coptema vínoyeca tojanaca, Bëngbe Bëtsábioye tbojtanchuá y mëntšá tojánayana: “Quem coptema vínoye menáfšenga; y cbëyana,

<sup>18</sup> chë uvas betiyentša shajuanentšana obocniye ndoñe más quichaisofšiyë, Bëngbe Bëtsabe amëndayana candóshjanguëntscuana ca.”

<sup>19</sup> Chentšana, tandëse tojanca y Bëngbe Bëtsábioye tbojtanchuá; tojanjatá, tojanatšatá y mëntšá tojánayana: “Quem soye, atšbe cuerpo entsemna, y chanjóbana tšëngaftangbe tšabiama. Ntšamo mora bënga montsamcá šmochtsama, atšbiana jtenójuaboyama ca.”

<sup>20</sup> Tmojansentšana, chë coptémaca tojanma cachcá ntšamo chë tandëseca tojanmcá y mëntšá tojánayana: “Quem coptema vínoye entsemna chë Bëngbe Bëtsabe tsëm trato entšangftaca. Atšbe buiñe echanjuábuashana, tšëngaftanga chašmotsetatšëmbuama ntšamo Bëngbe Bëtsá entšanga tojanašebuachenacá ndegombre yochjochnënguama. Chë buiñe tšëngaftangbe tšabiama echanjuábuashana.

<sup>21</sup> Pero chë uayayëngbe cucuatšiñe šochjaboshjoná, mesëshentše átšeftaca entsemna.

<sup>22</sup> Ndegombre, chë Bëngbe Bëtsá Entšá tbojanbemáftaca echanjopása, ntšamo Bëngbe Bëtsá chabiama tojanjuabocá.



¡Pero tša lastema chë bochjáboshjonabiama ca!” —Jesús tojánayana.

23 Chorna chë uatsjéndayënga tmojanontsé entjanayana, chënguentšá nda chë boshjuaná bétsemnana.

*Nda chë más uamaná yomna*

24 Chë uatsjéndayënga imojtsenatsëtsnaye chënguentšá nda chë más uamaná bétsemnana.

25 As Jesús tojanëyana: “Chë ndoñe judiëngbeñe, chë reyënga chëngbe entšángbioye nÿe ntšámnaca jtsamëndayana, y chentša amëndayënga jtsamana, entšanga chëngbioye tšabe soye amënga ca chamotsëbobuátmama.

26 Pero tšëngaftangbeñe ndoñe chca chaondëtsemna; chamna, tšëngaftangbeñe chë más uamaná mo chë más basacá chaóbema, y chë mandayá mo chë oservenacá.

27 Er, ¿ndase chë más uamaná yomna, chë mesëshentse jasama tojotbemá o chë uajuatšnayá? Ndegombre co chë mesëshentse tojotbemá; pero atšna tšëngaftangbeñe sëntsemna mo chë oservenacá.

28 “Atšbe padecëniñe tšëngaftanga sempre átšeftaca šmondëtsemna.

29 Chíyeca, atšbe bariëna, canÿe amëndayana cbochanjátšataye, ntšamo atšbe taitá canÿe amëndayana šojatštacá;

30 chca, atšbe amëndayoca mesëshentse átšeftaca šmochanjase y šmochanjofšiyë, y uámana tbemaniñe mo reyëngcá šmochanjotbiama, chë Israeloca bnëtsana uta pamállanga entšángbiama chašmuayanama tšabá o ndoñe tšabá chënga tmonjamama ca” —Jesús tojánayana.

*Jesús tojánayana, chábioye ndoñe bonjanabuátma ca Pedro yochjánayanama*

*(Mt 26.31-35; Mc 14.27-31; Jn 13.36-38)*

31 Jesús mëntšánaca tojánayana: —Simón, Simón; cocht-setátšëmbo, Satanás obenana tonjotjañe tšëngaftangftaca nÿe ntšámnaca jamama, mo chë trigo matënga tcojtsashatiyey-nacá;

32 pero atšna Bëngbe Bëtsá sënjaimpadá, átšbeñe ošbuáchiyana ndoñe chacmondëtsebuáshbenama. Y aca, nÿets ošbuáchiyana átšbeñe chacojtsatsbomna ora, chë inÿe ošbuáchiyënga cochjújabuache átšbeñe sempre chamotsošbuáchema ca.

33 Chora Simón tbojaniyana: —Bëngbe Utabná, atše sëntseprontana ácaftaca cárceloye jámnaca y jobanámnaca ca.

34 Y Jesús tbojanianya: —Pedro, atše cbëyana, cam ibeta bínyanoye, ngallo cabá ndécánta ora, aca unga soye cochanjanyana ndoñe šconduabuutma ca.

*Chë más jabuache ora yojtsobeco*

35 Chentšana Jesús tojanatjá: —¿Chë ni shecnájaca, ni crocenánaca, ni shecochëtjonësheca tcbonjanichamó ora, nderado ndayá tcmoianabuáshebena ca?

Y chënga tmoianjuá: —Tondaye ca.

36 Chora tojanéyana: —Mora ndoñe chca; shecnaja tobomná, chëja chauescocñe y crocenánama shecnëbénaca; y nda ndoñe espadëja tondbomna, chabe quëfsaiya chaotsatábuiye y canye espadëja chauatobuámiñe.

37 Er cbëyana, entseyta átseftaca chaopasá, ntšamo Bëngbe Bëtsabe uabemana palabrenguiñe atšbiana iuayancá, mëntšá: “Y chábioye tmonjáninye mo chë puerte bacna soye amënguentsá canya cuaftsemncá ca.” Y lempe ntšamo atšbiana iuabemancá, mora ya echanjochnëngo ca —Jesús tojanéyana.

38 As chënga tmoianianya: —Bëngbe Utabná, muentše uta espadëja entsemna ca.

Y japochócamna cha tojánayana: —Nye nyetsá ponto ca.

*Getsemani luarentše, Jesús Bëngbe Bëtsáftaca tboianencuentá (Mt 26.36-46; Mc 14.32-42)*

39 Chentšana, Jesús tojánbocna y ntšamo yojanamancá Olivos tjashoye tojána, y chabe uatsjëndayënga tmoianasto.

40 Choca tmoianashajjna ora, Jesús tojanéyana: “Bëngbe Bëtsá moimpadanga, bacna soye jamama ndoñe chacmondócochënguama ca.”

41 Y chë uatsjëndayëngbentsána yojoluára, mo canye ndëtsbé jutšenëntscoca nyetsá, y yojoshëntsamentsiye Bëngbe Bëtsáftaca jencuéntama.

42 Jesús mëntšá tojánayana: “Taita, aca tojtsebošëse, moma atše ndoñe chašondëtsemna chca jasúfriana. Pero ntšamo atše stsebošcá ndoñe chaondëtsemna, sinó ntšamo aca cojtsebošcá ca.”

43 Chca orna celocana canye ángel tbojánebëbocna, añemo chaotsebomnama juajabuáchama.

44 Jesús tša ngmëniñe yojtsemna, y Bëngbe Bëtsáftaca más ibojtsencuëntaye. Y chabe bosese yojtsemna mo fshantsiñe buiñe cuaftsebuastëtjuancá.

45 Bëngbe Bëtsáftaca jencuéntama tojanpochocá ora, tojtantsbaná y chabe uatsjëndayënga imojtsemnoye tojána; y chënga innëtsomañe, tša ngmëñaca imojtsemna causa.

46 Chora tojanéyana: “¿Ndáyeca šmotsomañe? Mots-bananga y Bëngbe Bëtsá šmochtseimpadana, bacna soye jamama ndoñe chacmondócochënguama ca.”

*Uayayënga Jesús tmojánishache  
(Mt 26.47-56; Mc 14.43-50; Jn 18.2-11)*

47 Jesús cabá yojtsóyebuambnantscuana, ba entšanga chentše tmojánashjajna. Chë Judas ca uabainá, canya chë bnëtsana uta uatsjendayënguentsá, chë entsangbe natsana yojtsaye. Cha vojobeconá Jesús juamóchama;

48 pero Jesús tbojanianyana: “Judas, ¿canye juamochëse chë Bëngbe Bëtsá Entšá tbojanbemá uayayëngbe cucuatšinë coch-jaboshjona ca?”

49 Chë Jesúseftaca imojtsemnënga tmojáninye ntšamo chora yochjanopásama; as tmojanianyana: —Bëngbe Utabná, ¿es-padējaca fšcotsatsejaye ca?

50 Y canya chënguentsá, chë bachnangbe más uámana amëndayabe bochichnayábioye catšbioica matscuaše tbojtsantëtše, y tbojtsanëštjango.

51 Chora Jesús tojanéyana: —Cachcá monyá; nye nyetšá ponto ca.

Y chë bochichnayábioye chë matscuaše tbojánbojajo y tbo-janshná.

52 Chentšana, chë bachnangbe amëndayënga, chë Bëngbe Bëtsabe bëts yebnentša soldadëngbe amëndayënga y chë judiëngbeñe bëtsëjemëngcá amëndayënga, chë cha juanatsama tmojánabënga, Jesús tojanéyana: “¿Ndáyeca espadëjangaca y ngarotbéngaca šmojabo atše jishachama, mo atše canye bacá uamana entšá cuaftsemncá ca?”

53 Atše cada te tšëngaftangaftaca sënjamna Bëngbe Bëtsabe bëts yebnentše, y ni chešmánanbojajo. Pero ora tocjobuache tšëngaftanga chca chašmomama, y Satanás ntšamo yojtsebošcá tšëngaftangbeñe echantsemándaye ca” —Jesús tojanéyana.

*Pedro tojánayana Jesúsbioye ndoñe bonjanabuátma ca  
(Mt 26.57-58, 69-75; Mc 14.53-54, 66-72; Jn 18.12-18, 25-27)*

54 Chentšana Jesús tmojánishache, y chë bachnangbe más uámana amëndayabe yebnoye tmojanánatse. Y Pedro bënocana ibojtsëstona.

55 Choca, chashja tsëntsaca, canye íñeshe tmojanangbotjó y entšanga chë shëconana imojtsetbiámana; y Pédrënaca chentše chëngaftaca yojótbema.

56 Chora, canye shembása chentša oservená, Pédrëbioye tbojáninye chë iñe juachaca yojtsetbemana; tbojanonýinýe y tojánayana: —Muánaca cháftaca endánmëna ca.

57 Pero Pedro ndoñe ca tojánayana, y chë shembásabioye mēntšá tbojaniana: —Sobrená, atše cha ndoñe quetsatabu-atma ca.

58 Ndoñe yapa bēn y inya chábioye tbojataninye y tbojaniana: —Acnaca chë uatsjendayēnguentsá condmēna ca.

Pero Pedro tbojanjuá: —Bacó, atše ndoñe quetsátsmēna ca.

59 Chentša benēntscosna, inya más yojátayana: —Ndegombre, muánaca cháftaca enjánana; muánaca Galileocá entsemna ca.

60 Y Pedro tojánayana: —Bacó, ndayama cojtsichámuama ndoñe quetsátstatšēmbo ca.

Cachora, y Pedro cabá yojtsóyebuambnantscuana, canye ngallo yojacánta.

61 Chora Bēngbe Utabná yojobuértana y Pédrēbioye tbojanonñinye; y Pedro chora yojenójuaboye ntšamo Bēngbe Utabná tbojanianama: “Cam ibeta bínyanoye, ngallo cabá ndécánta ora, aca unga soye cochanjayana ndoñe šconduabuatma ca.”

62 As Pedro shjoye tojánbocna, y corente ngménaca yojtsenóbošachna.

*Jesús imojtsáboyejuana*

*(Mt 26.67-68; Mc 14.65)*

63 Chë Jesús imojtsebojanjá entšanga cha imojtsáboyejuana y imojtsejantšetaye;

64 y jtsabuchēntsacjuase, imojtsetjanaye: “¡Momalisiá, nda tcmēnjajantšetá ca!”

65 Y imojtsóyenguaye, nye mocá soyēnga jtsatsētsnayēse.

*Jesús, chë judiēngbe uámana mándayēngbe delante*

*(Mt 26.59-66; Mc 14.55-64; Jn 18.19-24)*

66 Tojanbinyna ora, chë bētsējemēngcá amēndayēnga, bachnangbe amēndayēnga y ley abuatāmbayēnga tmojánenefjna, y chēngbioye Jesús tmojanánatse. Choca tmojantjá:

67 —Smēyana, ¿aca Bēngbe Bētsabe Uámana Uabuayaná, chë Cristo comna ca?

Y Jesús tojanējua: —Aíñe ca tcojáuayanēse, tšēngaftanga chama átsbeñe ndoñe quešmochatošbuáchiye.

68 Y nderado tcojátjasna, tšēngaftanga ndoñe quešmochatojuá ca.

69 Pero cam orscana, chë Bēngbe Bētsá Entšá tbojanbemá, chë Bēngbe Bētsá nyets obenana bomnabe catšbioica echántatsbemana ca.

70 Chora nyetscanga tmojantjá: —¿As, aca chë Bēngbe Bētsabe Uaquiñá comna ca?

Y Jesús tojanējua: —Cach tšēngaftanga chca šmontsichamo; atše cha sēndmēna ca.

<sup>71</sup> As chora chënga tmojánayana: —¿Ndayama más entšanga šochjátëjabeto Jesusbe contra chamuayanama? Er cach bënga chabe uayásentšana chca tmonjouena ca.

## 23

### *Jesús, Pilatbe delante*

(Mt 27.1-2, 11-14; Mc 15.1-5; Jn 18.28-38)

<sup>1</sup> Nýetsca mándayënga tmojëftsantsbaná, y Pilátbïoye, chë Judeoca mandádbïoye Jesús tmojanánatse.

<sup>2</sup> Y chentše tmojanontsé cha mal jaquédana, mëntšá: — Bënga fsënjínýena mua entsabuatambá bacna soyënga, quem luarentša entsangbe amëndayëngbïoye ndëtsayaunanama. Cha entsichamo bënga ndoñe šontsamna Césarbiama impuesto jt-satsquëcjayana ca; y entsichamo cha yomna chë Cristo, chë Bëngbe Bëtsabe Uámana Uabuayaná, mo canýe reycá ca.

<sup>3</sup> Chora Pilato Jesúsbiyoye mëntšá tbojantjá: —¿Aca chë judiëngbe Rey cojtsemna ca?

Y Jesús tbojanjuá: —Aíñe, aca ndegombre yomncá tcjayana ca.

<sup>4</sup> As Pilato, chë bachnangbe amëndayënga y entšanga tojanýana: —Atše ni mo canýe soye chiyátinýena, quem boy-abása castiganá chaotsemnama jayanama ca.

<sup>5</sup> Pero chënga más tmojanáyebuachena: —Nýets Israel luarëjana entsabuatambá, Galilea entsangbe amëndayëngbe contra jtsemnama. Galilea luaroca chca tonjabojatšé y mora moca Judeócnaca cachcá entsama ca.

### *Jesús Rey Heródesbe delante*

<sup>6</sup> As Pilato, Galilea luarama vojouena ora, tojanatjá Jesús Galileocá tayojamnama.

<sup>7</sup> Y Jesús aíñe Galileoca yojamnama cha tojántatšëmbona ora, Rey Heródesbiyoye cha tbojanichmó. Herodes inamna Galileoca mandado y chora Jerusalenentše cha yojtsemna.

<sup>8</sup> Herodes Jesúsbiyoye tbojáninýe ora, corente tojanoyejuá. Chana tempscana inaboše Jesús jinýama. Cha ba soyënga Jesusbiama tojanuena, y yojtseboše jinýama Jesús jamana canýe bëts soye, Bëngbe Bëtsabe obenánaca.

<sup>9</sup> Heródesna ba soyënga tbojantjá, pero cha ndocá tbonjanjuá.

<sup>10</sup> Y chéntšnaca, chë bachnangbe amëndayënga y judiëngbe ley abuátambayënga imojtsemna, y Jesús corente mal imojtsequédaye.

<sup>11</sup> Chora, Herodes y chabe soldadënga Jesúsbiyoye corente imojtsáboyënja, y jtsaboyejuanamna, botamana entšayangá tmojanichëtjo, mo canýe reycá; chentšana cachiñe Pilátbiyoye tmojesanichmó.

12 Cach te Herodes y Pilato tbojtanenatsëtsaye; tempna chata ibojenáyata.

*Jesusbiana chaóbana ca tmojánayana*  
(Mt 27.15-26; Mc 15.6-15; Jn 18.39-19.16)

13 Chentsana Pilato, chë bachnangbe amëndayënga, chë pueblentša amëndayënga y nyëtsca entsanga tojánachembo,

14 y mëntsá tojanéyana: —Tšëngaftanga quem entsá átsbioye šmojuánatse, mo bacna soye entsángbeñe abuatambayacá, mandadënga ndëtsayaunanama ca; tšëngaftangbe delante lempe sënjatjá, tšëngaftanga ba soyënga muabiana šmonjayana, pero atšna ni mo canye soye chiyátinýena, quem boyabása castiganá jtsemnama ibojtsemna ca jayanama.

15 Herodes cach ndoñe, chíyeca cachiñe bëngbioye cha tbojesichmó. Quem boyabása ni mo canye ndoñe tonjobuachjanguá jóbanama chabotsemnama.

16 Chcasna, jabuache chamotsecastigá y chentsana chanjëtsboshjona ca —cha tojánayana.

17 Yojamna canye utamená jëtsboshjonana, ntšamo Bashco fiesta ora jamana imojanamancá.

18 Pero chora entsanga cánýiñe tmojanáyebuachena: —¡Jesús chaóbana! ¡Barrabás matsboshjona ca!

19 Barrabás inautámena, mandadëngbioye ndëtsayaunanama chë bëts pueblentše entsanga tojánenautanama y entsá óbanaye causa.

20 Pilato cachiñe tojánayana Jesúsbioye jëtsboshjonama yojtsanboše ca;

21 pero entsangna más tmojtëtanayebuachena: — ¡Motsecrucificá! ¡Motsecrucificá ca!

22 Pilato ya unga soyama tojtëtanayana: —¿Ntšamo bacna soye mua tojobuachjanguá ca? Ni mo canye bacna soye chiyátinýena, mua jóbanama chabotsemnama. Chcasna, chanjacastíga y chora chanjëtsboshjona ca.

23 Pero chëngna más imojtsechembumbuana Jesús chamotsecrucificama. Cabana, chë bachnangbe amëndayënga y chë entsangbe jabuache chembumbuanánaca, Pilato tmojanëyëñaná Jesús chamóbama.

24 As Pilato tojanmandá ntšamo chë entsanga imojtsotjanañcá chaotsemnama;

25 as chora Pilato, Barrabásbioye cachcá tbojtanboshjona, chë nda inautámena mandadëngbioye ndëtsayaunanama entsángbioye tojánenautanama y entsá óbanaye causa. Y Jesusna entsangbe cucuatšíñe tbojánboshjona, ntšamo chënga tmojtsebošcá chamomama.

*Jesús tmojanecrucificá*  
(Mt 27.32-44; Mc 15.21-32; Jn 19.17-27)

26 As jacrucificama Jesús tmojanánatse. Chora jajocana inátaboye canye boyabása, Simón ca uabainá, Cirene luarocá; y cha Jesusbe cruz tmojancutsá, Jesusbe ústonoye chaotsambama.

27 Y banga chë pueblentša entsanga imojtséstona; y chë shembásenga imojtséstonëngna imojtsayošachiye y ngménaca imojtsanioye, Jesús chca yojtsepásama.

28 As Jesús chëngbiyoye tojanobuértana y tojanëyana: “Jerusalenentša shembásenga, atšbiana ndoñe matošachena; cach tšëngaftangbiana y tšëngaftangbe básengbiana šmochjenóbošachna.

29 Canye te echanjóshjango y chë te šmochántschamo: ‘Tša tšabá chë shembásenga šešona ndbomnëngbiana, chë quem luaroye šešonga ndoñe tmonjëftsšeshejajnëngbiana, y chë šešonga ndoñe tmonjëftsabachengbiana ca.’

30 Chora entsanga jetsóitanama mochántseboše y mochanjontšé ichámuana: ‘¡Tjashënga šmotsëtebuantsá y batsjabenga šmotsaitame ca!’

31 Atše, chë ndocna bacna soye amá, chíyeca puerte obená, chca šmojaborlase, ¿ntšamo mochjama chë ndegombre bacna soye amëngaftaca, chíyeca ndobenënga? O mëntšá, ¿chë nguëfshna betíyeca chca tmojtsamëse, ntšamo chë tojtsebuashá betíyeca mochjama ca?” —cha tojanëyana.

32 Jesúseftaca cruciñe jóbanama, útata bëts bacna soyënga ochjajnayátnaca imojtsënachaye.

33 Chë “Obanabe Bestšashe ca” uabaina luaroye tmojánashjajna ora, Jesús tmojancrucificá y chë bëts bacna soyënga ochjajnayátnaca, canya chabe catšbioica y chë ínÿana chabe uañicuayoica.

34 Chora Jesús mëntšá tojánayana: “Taita, mëngbe bacna soye motsaperdónaye, er ntšamo montsamama chënga ndoñe quemátstatšëmbo ca.”

Chë soldadënga Jesusbe entsayamna, tsbanánoye tmojanëtšena, chënga jtenájatayama.

35 Entšanga chentše imojtsemnënga chca imojtsonÿaye, y chë pueblentša mandayëngnaca Jesús imojtsáboyejuana y mëntšá imojtsenatsëtsnaye: “Inÿengna aíñe tojëftsatsebacá; mora cachá chauentsbocá, cha ndegombre Cristo, chë Bëngbe Bëtsabe Uámana Uabuayaná tomnëse ca.”

36 Soldadëngnaca Jesús imojtsáboyejuana; tmojanobeconá y untja vínoye imojtsefšësnaye,

37 y mëntšá imojtsatsaye: “¡Chë judiëngbe Rey tcomnësna, cach aca mentsbocá ca!”

38 Jesusbe bestšaše juatsboicna canje uabemana soye tmojananjo; chiñe mēntšá yojtsanábemana: MUA CHĚ JUDIĚNGBE REY ENDMĚNA ca.

39 Canje bēts bacna soyēnga ochjajnayá yojtsecrucificaná, Jesúsbioye mēntšá tbojanóyenguango: —Chě Bēngbe Bētsabe Uámana Uabuayaná tcomnēsna, mentsbocá y bēndátnaca šmatsebocá ca.

40 Pero chě inje bēts bacna soyēnga ochjajnayana mēntšá tbojanácacana: —¿Ni mo Bēngbe Bētsá ndoñe condērrespetana? Bēndátnaca bontsamna chacá jóbanama.

41 Ndegombre bēndata muentše bontsemna bēts bacna soyēnga ochjajnaye causa, y chíyeca chca jasúfriama bontsamna. Pero quem boyabása ni mo canje bacna soye ndoñe tonjobuachjanguá ca.

42 Y chorna, quem bēts bacna soyēnga ochjajnayá Jesúsbioye tbojaniyana: —Jesús, atšbiama cochtenójuaboye aca reycá jabomándama chacojtabo ora ca.

43 Y Jesús tbojanjuá: —Ndegombre cbēyana, mēnté átšeftaca celoca, chě njetscanga oyejuayēnga mondbetsemnoca, aca cochantsatsmēna ca.

### *Jesús tojanóbana*

*(Mt 27.45-56; Mc 15.33-41; Jn 19.28-30)*

44 Njetsto orscana las tresēntscōñe njetš quem luare yojtseibétata.

45 Y shinje yojtsajbaná binjñayana, y Bēngbe Bētsabe bēts yebnentše yojújonjāna entšējua tsēntsaca yojtsenájataye. Chējua bēñjua inauamna y chě tsatsēntsaca inaújonjāna.

46 As Jesús tojanáyebuachena: “Taita, atšbe espíritu acbe cucuatšiče šcoboshjona ca.”

Y chca jayanama tojanpochocá ora, tojanóbana.

47 Chě romano soldadēngbe amēndayá chca tojáninje ora, Bēngbe Bētsábioye tbojtanadorá, mēntšá jayanese: “Ndegombre, quem boyabása ainaniñe tšabe juabnēnga bonná inamna ca.”

48 Njetšca entšānga chě soye jinjāna tmojánabēnga, chca tojanopasama tmojáninje ora, tmojanontšé jtangana enochjantšetaye, ngmēnama.

49 Pero Jesusbe njetšca ubuátmēnga y chě shembásēnga Galileocana tmojanastēngna, chaboca tmojanoquedá chě soyēnga onjāyiñe.

### *Jesús tmojanatbontsá*

*(Mt 27.57-61; Mc 15.42-47; Jn 19.38-42)*

50 Yojanmēna canje boyabása, José ca uabainá, canje Judeoca pueblócá, Arimatea ca uabaina; cha inamna canjā



chë pueblentša uámana amëndayënguentsá y canye tšabe entsá y nyetsca soyënguiñe tšabá amá.

<sup>51</sup> Chánaca yojanobátmana chë Bëngbe Bëtsabe amëndayana chaóshjanguama, y tondaye tbonjanogustá ntšamo chë inye amëndayënga tmojanjuabó y Jesúseftaca tmojanmcá.

<sup>52</sup> Cha Pilátbioye tojána y Jesusbe cuerpo tbojanotjañe.

<sup>53</sup> José chë cruzocana Jesusbe cuerpo tbojtaneštjango, canye lino entsëjuaca tbojanandmaná y canye cuevēshiñe, peñëshiñe pormániñe, tbojanjajó. Chentše cabá ndocná mondējajo.

<sup>54</sup> Yëfsana ochnayté bëtsemnayecna, cach te yojanotocana saná japróntana chë yëfsana jasama; y chë ochnayté ya yojtsebínýana.

<sup>55</sup> Chë shembásenga, Galileocana Jesús tmojantjëmbambanga, tmojána y chë cuevēshe tmojáninye, y tmojanrrepará ntšamo Jesusbe cuerpo tmojanjajoma.

<sup>56</sup> Yebnoye tmojtaná orna, tmojanprontá botamana uanguëtše béjayënga y soyënga chë cuerpiñe janëtjuama.

Chë ochnaytena chënga tmojanochná, ntšamo Moisesbe leyíñe yojanmandancá.

## 24

### *Jesús tojtanyena*

(Mt 28.1-10; Mc 16.1-8; Jn 20.1-10)

<sup>1</sup> Y tmengo, chë inye semana bojatséntena, cabá cachëse, Jesús tmojanatbontsá cuevēshoye chë shembásenga tmojána, y tmojanamba chë tmojanprontá botamana uanguëtše soyënga.

<sup>2</sup> Pero choye tmojánashjajna orna, tmojáninyena chë cuevēshoye amashjuanentša ndëtšbé chentšana juanániñe,

<sup>3</sup> y choye tmojánamashjna ora, Bëngbe Utabná Jesusbe cuerpo ndoñe tmonjáninyena.

<sup>4</sup> Chë shembásengna ndoñe imontsetátšëmbo ntšamo jajuaboyana chë soyama; chora, uta boyabásata, uabuashinýinýana entsáyá uichëtjonata chentše tbojabántsaye.

<sup>5</sup> Y chë shembásenga tmojanëuatjanama y fshantsoye imojtsetsejbénama, chata tbojanéyana: “¿Ndáyeca obanëngbentše chë vida totsobomñá šmojtsenguá ca?

<sup>6</sup> Muentše cha ndocná quenátsmëna, er cha ya tontayena. Menójuabonga ndayá cha tmojanéyanama, cha cabá Galileoca enjamna ora. Cha tonjánayana:

<sup>7</sup> ‘Chë Bëngbe Bëtsá Entsá tbojanbemá bontsemna bacna soye amëngbe cucuatšíñe chamoboshjonama, chamocrucificama y unga tianoye cháuatayenama ca’ ” —chata tbojánayana.

8 Chora chë shembásenga Jesusbe palabréngama imojtenójuaboye,

9 y chë cuevëshentsana tmojtaná ora, chë tsabe noticiénga chë bnétsana canye uatsjédayénga y inye entšángbioye tmojanacuntá.

10 Chë uatsjédayéngbioye chca cuentayéngna imojamna María Magdalena, Juana, y María, chë Santiagbe mamá, y chë inye shembásenga chéngaftaca imojamnénga.

11 Pero chë uatsjédayéngna méntšá chë shembásengbiana imojétsejuabnaye: “Chénga montsoyebuambná mo corente juabna ndbomnéngcá ca.” Y chca, chénga chë soyiñe ndoñe montsanošbuaché.

12 Pero chentšana, Pedro tojéftsantsbaná y ochamanana chë Jesús tmojanajó cuevëshoye tojána. Y choca yojtsemna ora, yojtsejbéna tsoye jontješiyama, pero nye ena entšéjuangá yojuinye, chë Jesús tmojanbochméjuangá. As Pedro ojnananá yebnoye yojtá, chca tojanopasama.

*Chë Emaús pueblöye benachiñe*  
(Mc 16.12-13)

13 Cach te, uta uatsjédayata Emaús pueblöye ibojtsaye. Emaús yojamna Jerusalenocana bnétsana canye kilómetroca.

14 Chata ibojtsayencuéntaye lempe ntšamo tojanopasama.

15 Y tojanopasá, ibojtsencuéntaye y ibojtsenatsétsnayéntscuana, cach Jesús tojanobeconá y chátaftaca cányiñe yojtsaye;

16 masque imojtsonyaye, ndoñe ibontsobena cha jótëmbana.

17 Jesús tojanéyana: —¿Ndayama benachiñe šuabanencuéntaye ca?

As chata ngménaca ibojtsaye,

18 y canya, Cleofás ca uabainá, tbojaniyana: —¿Nye aca cojtsemna, inye luarocana ashjanganá Jerusalenentše oyená, ndayá chentše quem diénga yopasánama ndétatsëmbuá ca?

19 Chora cha tojanéyana: —¿Ndaye soyénga ca?

Y chata tbojaniyana: —Chë Jesús Nazaretocáftaca tonjopasá soyéngama. Cha enjamna canye Bëngbe Bëtsabe juabna oyebuambnayá, puerte obenana bomná ndayá jamama y jayanama, Bëngbe Bëtsabe delante y nyetsca entšangbe delante.

20 Y ntšamo, chë bachnangbe amëndayénga y chentša mandadénga ínýengbe cucuatšiñe tmonjáboshjona, jóbanama ibojtsemna ca entšanga chamuayanama y chamocrucificama.

21 Bënga chabiana fsëñjanobátmana, Césarbe cucuatšentsana Israeloca entšangbe atsebacayá chaotsemnana; pero morna ya unga te entsemna chca tonjopasá.

22 Y mora ndayá, básefta shembásenga bēngbe enutēnga ójnanana soyēnga šonjáuyana. Chēnga cabá cachēse chē Jesúsbe cuerpo tmonjanjajó cuevēshoye tmonjá,

23 y chabe cuerpo ndoñe tmonjínýena; as chora chēnga bēngbioye tmontabo y montsabíchamo angelēnga tmojëftsanyē y chēnga catmēnjayana cha ainá yojtsatsmēna ca.

24 Bēngbentšana baseftángnaca chentšana chē cuevēshoye tmonjá, y tmojínýena ntšamo chē shembásenga tmonjayancá, pero Jesús ndoñe tmojëftsinyē ca —chata ibojtsichamo.

25 As Jesús chata tojanéyana: —¡Tša juabna ndbomnēnga y tša uenana jošbuáchiyama, chē Bēngbe Bētsabe juabna oye-buambnayēnga tmojánayana soyēngama!

26 ¿Mo ndoñe yonjamna chē Uámana Uabuayaná chē soyēnga chaosufrima, y chentšana nýetsca entšanga corente cha chamuatschuama ca?

27 Chentšana Jesús tojanontsé chata jábuayenana, lempe ntšamo chabíama yojanoyebuambnacá chē Bēngbe Bētsabe uabemana palabrēnguiñe; yojontsé Moisesbe librēšangañe y chē Bēngbe Bētsabe juabna oye-buambnayēngbe librēšangáñnaca.

28 Chē ibojétsaye puebloye imojtsebeconá ora, Jesús tojanma mo más chcoye cuaftsacá.

29 Pero chatna tmojanatarié chentše chaotsoquedáñama, mēntšá jauyanēse: —Bēndátaftaca motsoquedañe; ya jetiñe entsemna y ya echanjaibétata ca.

As Jesús chátaftaca tojtsanoquedañe.

30 Chentšana tojanopasá, juasama mesēshentše imojtsetbiámana ora, Jesús chē tandēse tojanca, Bēngbe Bētsábioye tbojtanchuá, chē tandēse tojanjatá, y chata tojanatšatá.

31 As, chora chē uatsjéndayata ibojobenaye Jesús jótēmbana; pero chana nýe ndeolpe yojuenatjēmba.

32 Chora chata ibojtsenatsētsnaye: “Chē benachiñe Bēngbe Bētsabe uabemana palabrēngama šondabuayiyná ora, ndegombre bēngbe ainaniñe más bontseboše cha más chašotsabuayiynama, ¿ndoñe chca ca?”

33 As, cachora tbojëftsantsbanata y Jerusalenoye tbojtanata; choca tmojáninýena chē bnētsana canýe uatsjéndayēnga cánýentše imojtsemna y chēngbe enutēngnaca;

34 y mēntšá imojtsichamo: —¡Ndegombre Bēngbe Utabná tojtayena; Simónbioye tbojébēbocna ca!

35 As chata tbojanontsé jacúntana, ntšamo benachiñe tbojanpasacá, y ntšamo Jesúsbioye imojótēmba, chē tandēse tojanjatá ora.

*Jesús chabe uatsjéndayēnga tojánēbēbuacna  
(Mt 28.16-20; Mc 16.14-18; Jn 20.19-23)*

36 Chë uatsjéndayënga chë soyëngama cabá imojtsencuëntantscuana, Jesús chëngbe tsëntsaca tojabántsaye y mëntśá tojanëyana: “Chë atšbe ainaniñe tšabe ebionana tšëngaftangaftaca chaotsemna ca.”

37 Pero chënga tša auatjanánënga imojtsemna, y canyë añemëse imojétsonyaye ca imojtsejuabnaye.

38 Pero Jesús tojanëyana: “¿Ndáyeca auatjanánënga šmojtsemna? y ¿ndáyeca tšëngaftangbe ainaniñe chca šmojtsejuabná ca?”

39 Atšbe cucuatšënga y atšbe shecuatšënga minyënga; šmobjajo y šmochanjinyë. Cach atše sëntsemna. Canyë añemëna, ni mëntšena ni betašënga ntsebmomnana; pero tšëngaftanga šmontsonyá, atšna aíñe ca” –tojanëyana.

40 Chca yojtsichámëse, chabe cucuatšënga y chabe shecuatšënga tojaninyänyé.

41 Y chënga cabá ndoñe montsanošbuaché, chca noticiama corente imojtsóyejuama y tša ojnanánënga imojtsemna causa; as Jesús tojanatjá: “¿Muentše ndayá jasama quešmëbmomna ca?”

42 As canyë tabena buana beonbiana tmojanoyé;

43 Jesús tojanocñe y chëngbentše tojanse.

44 Chentšana Jesús tojanëyana: “Quem palabrënga entsemna ntšamo cabá tšëngaftangaftaca sënjamna ora tcbonjanëyancá: Entsemna, lempe chaopasá ntšamo atšbiana iuabemancá, Moisesbe leyënguiñe, chë Bëngbe Bëtsabe juabna oyebuambnayëngbe uabemana librëšangañe y Salmos librëšañnaca ca.”

45 Y chora chë uatsjéndayënga, Jesúsbeyeca tmojanobená chë Bëngbe Bëtsabe uabemana palabrëngama josértana.

46 Chentšana Jesús tojanëyana: “Ntšamo atšbiana iuabemancana yomna, chë Bëngbe Bëtsá Entśá tbojanbemá chaosufrí y unga tianoye chauatayena ca.

47 Y morna atšbe uabaina jayanëse, átšbeñe betsošbuáchema, nyets quem luarentše šmochjontša entšanga atšbiana jábuayenama, bacna soyënga amana chamuajbanama, as chca, Bëngbe Bëtsá chëngbe bacna soyëngama cháuaperdonama; chë soyënga Jerusalenentše chaobojatšé.

48 Tšëngaftanga atšbiana soyënga šmonjinnye y šmondëtatšëmbo.

49 Atšbe Taitabe šbuachenaná, tšëngaftangbiana chanjíchmuá. Pero morna camuentše Jerusalenentše moquedanga, Bëngbe Bëtsabe obenana chašmóyëngacñëntscuana ca” –cha tojanëyana.

*Jesús celoye tojtantsjuá  
(Mc 16.19-20)*

<sup>50</sup> Chentsana, Jesús chabe uatsjédayënga ínÿoye tojanënatse, Betania pueblo béconana. Y chabe buacuatšënga játsbanase, Bëngbe Bëtsá tbojanimpadá chë uatsjédayënga tšabe bendicionënga chamóyëngacñama.

<sup>51</sup> Chca yojtsamëntscuana, cha chëngbentsana tojanoluaré y tojanontsé celoye játsjuana.

<sup>52</sup> Chë uatsjédayëngna, Jesús tmojtánadorá chentsana, Jerusalenoye oyejuayënga tmojtaná;

<sup>53</sup> y cada te, Bëngbe Bëtsabe bëts yebnoye imojánajna, Bëngbe Bëtsá jëtschuayama.

## San Juan

*Cristo, chë Bëngbe Bëtsabe Uámana Oyebuambnayana ca Uabainá*

<sup>1</sup> Quem luare ndobojátša ora, Cristo, chë Bëngbe Bëtsabe Uámana Oyebuambnayana ya yojtsemna; chora cha, chë chca uabainá, Bëngbe Bëtsáftaca yojtsanmëna, y cachá Bëngbe Bëtsá inamna.

<sup>2</sup> Ndegombre cha, chë tempscana Bëngbe Bëtsáftaca yojtsanmëna.

<sup>3</sup> Cháftaca, Bëngbe Bëtsá lempe tojanma; cháftaca ndóñesna, lempe ntšamo mora yomncá, Bëngbe Bëtsá tondaye matënjanma.

<sup>4</sup> Cachábeñe nyets vida inamna, y quem vídaca tojánabo quem luarentša entšangbe juabnënga jabuábinÿnayama.

<sup>5</sup> Cha tonjánabo moye, chë entšangbe juabnënga ndoñe binÿniñe yonjamnoye, chiñe jacobínÿnayama. Cha sempre chca yobínÿna, y Satanás chë entšangbe juabnënga ndoñe binÿniñe chaondëtsemnama amá, ndoñe yondobena chë binÿnayabe obenana jtsejuánana.

<sup>6</sup> Inamna canÿe boyabása, Juan ca uabainá; y Bëngbe Bëtsá tbojanichmó,

<sup>7</sup> binÿnayabiama chaóyebuambama; entšángbeñe binÿnayabiama cháuyanama, chca, ntšamo Juan chë binÿnayabiama tojayana soyëngaca, nyetscanga Jesúsbeñe chamotsošbuáchema.

<sup>8</sup> Juan ndoñe yonjamna chë binÿnayá. Cha inamna canÿe ichmoná, chë nda binÿnayá yomnabiama entšángbeñe chauabáyanama.

<sup>9</sup> Chë ndegombrá quem luaroye tonjánabo chë entšangbe juabnënga jabuábinÿnayama.

<sup>10</sup> Chë Bëngbe Bëtsabe Uámana Oyebuambnayana quem luriñe yojtsanmëna; masque cháftaca Bëngbe Bëtsá quem luare tojanma, nda cha yojamnama muentša oyenënga ndoñe monjántatšëmbo.

<sup>11</sup> Cachabe luare entšángbioye tonjánabo, y entšanga ndoñe tmonjánbošena cha jofjana.

<sup>12</sup> Nyetscanga, ndëmuanÿenga cha tmojanëbuaja y chábeñe tmojtsošbuáchenga, cha derecho tonjanatsatá jtsobenama Bëngbe Bëtsabe básenga ca jtsabáinama.

<sup>13</sup> Quem ošbuáchiyëngna, chca jtsemnama ndoñe tmonjanobená entšangbe buiñentšana tmojanonÿnáyeca, o ndaye entšabe juabnentšana. Nÿe Bëngbe Bëtsábeyeca chca chabe básenga imojtsabaina.

14 Cha, chë Bëngbe Bëtsabe Uámana Oyebuambnayana, entsá tojanóbema, y quem luare bëngaftaca yojëftsiyena. Cha yomna chë Bëngbe Bëtsabe nÿe canÿe Uaquiñá; chíyeca bënga tifjáninÿe chabe bëts obenana y chabe tšabe juabna, chë Bëngbe Bëtsábentsana tojanóyëngacñana. Cha corente jtsababuánÿeshanëse šojánanÿena y yojëftsiyena ntšamo ndegombre inamncá.

15 Juan mëntsá chabiamá yojanáyebuache: “Chabiamá sënjanoyebuambná, chë ndabiamá chora atše sënjánayana, chë átšbentsana jabamana atšbiamá más uamaná endmëna, er atše cabá ndonÿna orna, cha ya yojtsemna ca.”

16 Cha tša tšabe ainana bómnyeca, bënga nÿetscanga mallajta tšabe bendicionënga tmojóyëngacñe.

17 Moisesbiajana tifjanóyëngacñe chë Bëngbe Bëtsá tojanmandá soyënga. Pero Jesucristbeyeca, Bëngbe Bëtsá tšabe bendicionënga bëngbiamá tojama y chë ndegombre soyënga bënga tmojëftsashjache.

18 Ndocná, ndocna te Bëngbe Bëtsábioye tbonjinÿe. Chë nÿe canÿe Uaquiñá ibobomná, cach Bëngbe Bëtsá yomna; y cha, Bëngbe Bëtsá chë Taitáftaca cánÿiñe mo canÿacá yomna. Mua, chë Uaquiñá, bëngbiamá tojama, Bëngbe Bëtsá juabuátmanama chaotsopodënama.

*Juan chë Ubayaná Jesucristbiamá tojanabuayaná*

*(Mt 3.11-12; Mc 1.7-8; Lc 3.15-17)*

19 Canÿe te, Jerusalenoca judiënga tmojanichamó básefta chëngbe bachnanga y levitënga, chë Bëngbe Bëtsabe bëts yebnoca trabájayënga, Juan yojtsemnoye, cha nda bëtsemnama chamuatjayama.

20 Chocna, Juan chëngbeñe ndegombre tojanobuambá: —Atše, chë Bëngbe Bëtsabe Uámana Uabuayaná ndoñe quetsátsmëna ca.

21 As chora, cachiñe tmojantjá: —As, ¿ndase cojtsemna? ¿Chë Bëngbe Bëtsabe juabna oyebuambnayá Elías ca?

Y Juan tojanëjua: —Atše cha ndoñe quetsátsmëna ca.

Chora chënga tmojantjá: —As, ¿chë Bëngbe Bëtsabe juabna jabóyeubambayama jabamá ca?

Y Juan tojanëjua: —Ndoñe ca.

22 Chora chënga tmojanianya: —Asna, ¿aca ndase cojtsemna? Bënga šontsamna nda aca cojtsemnama jtsetatšëmbuana, as chë šonjadespachenga jacúntama. ¿Ndayá cojtsoyena cach acbiamá jayanama ca?

23 Y Juan mëntsá tojanëjua: —Atše sëntsemna chë ndabiamá Bëngbe Bëtsabe juabna oyebuambnayá Isaías mëntsá tojanábema: “Entšanga ndoyenoca canÿe abuayiynayá echántsemna, y entšanga mëntsá echántsabuyiynaye: Bëngbe

Utabná echanjabo ca. Mo nda canye benache tojtseprontacá, tšëngaftángnaca cachcá, cha jabama tšabe juabnëngaca šmochtseprontana ca.”

<sup>24</sup> Chorna, báseftanga chë fariseungbe ichmónënguentšana,

<sup>25</sup> Juan tmojantjá: —Chë Bëngbe Bëtsabe Uámana Uabuayaná, Cristo ca uabainá, ndoñe tcontsemnësna, ni Elías, ni chë Bëngbe Bëtsabe juabna jabóyebuambayama jabamá ndóñesna, ¿ndáyeca entšanga cojtsëbayana ca?

<sup>26</sup> Chora Juan tojanëjua: —Atšna, béjayeca entšanga sëndëubáyana. Pero tšëngaftangbeñe canya entsemna; cha ndoñe quešmatábuatma;

<sup>27</sup> y cha atšbe ústonoye echanjášhango. Atše mercedo tait-satobuajoñe, ni mo jotsejbiyama, chabe shecochëtjonëshentša corriëja jajafjonama ca.

<sup>28</sup> Chca tojanopasá, canye pueblo Betania ca uabáinentše, Jordán béjaye chenguana. Cach béjayiñe, Juan entšanga yojanëbáyana.

### *Jesús chë Bëngbe Bëtsabe Oveshatema ca uabainá*

<sup>29</sup> Yëfsana, Juan yojtsemnoye Jesús yojtsebëconaye, y chë cháftaca imojtsemna entšanga tojanëyana: “Smochjinye. Chë nda Bëngbe Bëtsá tbojichmó y iytanana Oveshatemcá entsobi-amná cha, entsashjajuana ca. Cha jóbanëse, quem luarentša entšanga bacna soyëngama perdonánënga mochántsemna.

<sup>30</sup> Atše chabiamá cbonjutsëtsná, mëntsá sënjanayana ora: ‘Atšbe ústonoye canya echanjášhango. Cha atšbiamá más uamaná endmëna, er atše cabá ndonyä ora, cha ya yojtsemna ca.’

<sup>31</sup> Tempna, cach atše ndoñe quetsjátantatšëmbo nda cha bëtsemnana. Pero atšna ínÿenga béjayeca ubáyana sëndabó, Israeloca entšanga quem boyabása chamuábuatmanama ca” — Juan tojanëyana.

<sup>32</sup> Chentšana Juan mëntsánaca tojanobuambá: “Chabiamá mëntsá bominye sënjanjajó: chë Uámana Espíritu, mo canye palomatemcá, celocana tonjánastjango y quem boyabásabe juatsbuañe tonjanototoná.

<sup>33</sup> Atše cabá ndoñe quetsjátantatšëmbo nda cha bëtsemnana, pero chë béjayeca jubáyama šonjanichmó cha, mëntsá šonjaniyana: ‘Nda chacojinye, chë Uámana Espíritu jastjanguana y chabe juatsbuañe jototonana, chábeyeca atše chanjíchmuá chë Uámana Espíritu entšangbe ainaniñe cháuamashënguama ca.’

<sup>34</sup> Y morna, atše aíñe chca tijinye, y ndegombre tšëngaftanga cbëyana, cha chë Bëngbe Bëtsabe Uaquiñá entsemna ca” —cha tojanëyana.



*Chë Jesusbe natsana ústonënga*

<sup>35</sup> Yëfsana, Juan chabe uatsjéndayënguentsana útataftaca cachoca yojtésemna.

<sup>36</sup> Jesús yojtsachnëjuanama, Juan tbojáninÿe ora, tojanëyana: “Sochjinÿe. Mua entsemna nda Bëngbe Bëtsá tbojichmó y itanana Oveshatemcá entsobiamná cha ca.”

<sup>37</sup> Chora chë Juanbe uta uatsjéndayata, chca tbojanuena ora, Jesús tmojanasto.

<sup>38</sup> Jesús tojesanontješé y tojánanÿe chata imojétsëstonama. As, tojanatjá: —¿Ndayá šojtsenguá ca?

Y chata tbojanianyana: —¿Rabí, ndayentše icoyena ca? (Rabí endayana “Buatëmbayá ca”.)

<sup>39</sup> Chora Jesús tojanëjua: —Mabo y sochjinÿe ca.

As chata tbojána y tbojáninÿe ndayentše cha yojaniyenana. Y chentše cháftaca tojéftsanajetana, ya jetiñe mo las cuatro ora yojtsemna causa.

<sup>40</sup> Chë Jesusbiana oyebuambnayana Juánbioye tbojanóyeunata y Jesús tbojanasto útatentšana cánÿana Andrés ca yojanabaina; cha yojamna Simón Pédrëbe catšata.

<sup>41</sup> Andrés, cabá ndocna inÿe soye ndëma ora, tojána chabe catšata Simón janguanguama. Y tbojáninÿena ora, Simónbioye tbojanianyana: “Chë Bëngbe Bëtsabe Uámana Uabuayaná, Cristo, fsënjinÿena ca.”

<sup>42</sup> Chentšana Andrés, Simónbioye tbojanánatse Jesús yojtsemnoye. Jesús, Simónbioye tbojáninÿe ora, tbojanianyana: “Aca condmëna Simón, Jonasbe uaquiñá, pero Cefas ca cochantsabaina ca.” (Chcana endayana “Pedro o ndëtšbë ca”.)

*Jesús, Felipe y Natanael tojánachembo chamuastama*

<sup>43</sup> Yëfsana, Jesús tojanjuabó Galilea luaroye jama. Benachiñe Felípbioye tbojáninÿena y tbojanianyana: “Smasto ca.”

<sup>44</sup> Chë boyabása Felipe, Betsaida pueblócá inamna. Andrés y Pédrëna cach pueblócata ibnamna.

<sup>45</sup> Chentšana Felipe tojána Natanael janguanguama; y tbojanianyana: —Chë ndabiama leyënga librëšangañe Moisés tojanábema cha fsënjinÿena ca. Cachabiama, Bëngbe Bëtsabe juabna oyebuambnayëngnaca tmojanábema. Cha Jesús entsemna, Josebe uaquiñá, chë Nazaretocá ca.

<sup>46</sup> Chora Natanael tbojanianyana: —¿Ndaye tšabe soye Nazaretocana nanjopódia jóbocnama ca?

Y Felipe tbojanjuá: —Mabo y cochjinÿe ca.

<sup>47</sup> Natanael yojtsebëconama, Jesús tbojáninÿe ora tojánayana: —Moye canÿe entšá entsabó; cha ndegombre endomerecena Israelbentšana entšá jtsemnama. Cha tšabe entšá endmëna; ndocnábioye quebnatsingña ca.

48 Chora Natanael Jesúsbioye tbojantjá: —¿Ntšamo atše šcuabuatma ca?

Y Jesús tbojanjuá: —Felipe cabá aca ndëchembo ora, atše tcbonjinÿe, chë higo betiye tëchetšoye condëtsomñe ora ca.

49 As, Natanael tbojaniana: —Buatëmbayá, jaca chë Bëngbe Bëtsabe Uaquiñá comna! ¡Aca, chë Israeloca entšangbe Rey ca!

50 Chora Jesús tbojanjuá: —¿Aca átšbeñe cojtsošbuaché, nÿe chë higo betiye tëchetšoye tcbonjinÿe ca tcbouayanama? Ndegombre, chë soyama más bëts soyënga cochanjinÿe ca.

51 Chentšana Jesús tojanëyana: —Ndegombre šcuayana: Tšëngaftanga šmochanjinÿe celoca atëfjniñe, y Bëngbe Bëtsabe angelotëmënga jtsetsjuajnana y jtsastjajuanana Bëngbe Bëtsá Entšá tbojanbemabe tatsëtsoca.

## 2

### *Canÿe casamento Galilea luaroca, Caná pueblentše*

1 Chentšana unga tianoye, canÿe casamento inamna, canÿe pueblentše Caná ca uabáinentše, Galileoca. Chë oboyejuayoca Jesusbe mamá yojtsemna.

2 Jesús y chabe uatsjëndayëngnaca chë casamentoca ófjanënga imojtsemna.

3 Chë oboyejuayentše, vínoye yojtsopochóca y Jesusbe mamá tbojaniana: —Ya tondaye vínoye quemátsbomna ca.

4 As, Jesús tbojanjuá: —Mama, ¿ndáyeca chca atše šcojtsatsá? Atšbe ora cabá ndoñe ntjoshjanguana ca.

5 Chentšana, chabe mamá, chentša oservénënga tojanëyana: —Lempe šmochjama, ntšamo cha chacmojuayancá ca.

6 Chocna, chnënguana ndëtsbé matbaja inamna. Chca matbajënguentša béjayeca, judiënga imojanamana jtsacuéntšabiana cabá ndëse ora, ntšamo tempo entšanga imojanamancá, Bëngbe Bëtsabe delante tšábënga jtsatsmënama. Cada matbajiñe, mo shachna o canÿsëfta bnëtsanájuá béjaye yojanába.

7 Chora Jesús chë oservénënga tojanamëndá: “Quem matbajënga béjayeca mobuajutetjé ca.” Y chënga, chora lempe tmojanbuajutetjé.

8 Y Jesús tojanëyana: “Morna, báseye mobuatsjo y chë fiesta otocanábioye mabuyamba ca.” Y chënga chca tmojanma.

9 Chora, chë fiesta otocaná, chë béjaye Jesús vínoye tojanbemiye tojanftantiá, ndëmocana yojóbocnama ntsetatšëmbcá. Pero chë oservénëngna aíñe imojtsetatšëmbo ndëmocana, er cachënga chë béjaye tmojanbuatsjo. As, chë fiesta otocanana, chë bobontse bouamnábioye tbojanchembo,

10 y tbojaniyana: “Nÿetscanga monduamana natsana chë más uámana vínoye jushebëcana, y chë ófjanënga becá tmojatëmo ora, chë más batšá uámaniye. Pero acna, chë más uámana vínoye morscama tcojtsabofjajó ca.”

11 Ntšamo Jesús tojanmcá Caná pueblentše, Galileoca, yojamna chabe natsana bëts soye Bëngbe Bëtsabe obenánaca. Y chca, chabe bëts obenana y uámanana cha tojaninÿanÿé; y as, chabe uatsjëndayënga chábeñe imojtsošbuaché.

12 Chca tojanopasá chentšana, Jesús canÿe pueblo, Capernaum ca uabáinoye tojtsanoñe. Chorna, chabe mamá, chabe catšátanga y chabe uatsjëndayënga cha tmojantjëmbambá, y choca baseftatescama tmojanoquedá.

*Jesús Bëngbe Bëtsabe bëts yebnentšana bacna entsanga tojtanëbuacna*

*(Mt 21.12-13; Mc 11.15-18; Lc 19.45-46)*

13 Ya canÿe judiëngbe bëts fiesta, chë Bashco fiesta yojétsobeco, chë ntšamo Bëngbe Bëtsá chëngbe bëts taitanga Egiptocana tojánatsebacama jtenójuaboyama. Chë fiestama Jesús Jerusalenoye tojána.

14 Jerusalenoca, Bëngbe Bëtsabe bëts yebnentše, Jesús tojánanÿena uacnënga, oveshënga y paloma enënga, y entsángbioye crocénana atrócayënga, chëngbe luarënguenache imojtsetbiámana.

15 Jesús chca tojánanÿe ora, biajënga tojanaca, tjanjanëja tojanobopormá, y Bëngbe Bëtsabe bëts yebnentšana nÿetscanga tojtanëbuacna, chëngbe oveshënga y uacnëngaca. Chentšana Jesús, Bëngbe Bëtsabe bëts yebnentšama yojanoservena crocénana atrocayëngbe crocénana tojtsanëjquësheshe, y chë mesëshangá tojtsanenásatajchquëca.

16 Chë paloma enëngna Jesús tojanëyana: —¡Quem soyënga lempe muentšana matábocana! ¡Ndoñe matsbuamnana ni mátenana atšbe Bëtsabe yebnentše, mo cánÿentše jiyama luarëntše cuaftsemncá ca!

17 Y as, chabe uatsjëndayënga tmojanenojuabó ntšamo Bëngbe Bëtsabe uabemana palabrënguiñe iuayanama: “Bëngbe Bëtsabe yebna jtseboguianama juabna, nÿets átšbeñe entsemna ca.”

18 Chora, judiënga Jesús tmojantjá: —¿Ndaye bëts soye cochjama bënga chašcuinÿanÿema, aca ndaye deréchoca bëngaftaca chca cojtsobenama ca?

19 As Jesús tojanëjua: —Quem Bëngbe Bëtsabe yebna menásatajchca, y atše unga tese chtëtsbaná ca.

20 Chora chë judiënga tmojaniyana: —Canta bnëtsana chnënguana uatiñe, quem Bëngbe Bëtsabe yebna tmojanjebo. ¿Y aca, nÿe unga tese lempe cochtëtsjebo ca?

21 Pero Bëngbe Bëtsabe yebna, ndayama chora cha chca tojánayana, cachabe cuerpo yojtsemna, ndoñe chë jebna soye.

22 Chama, Jesús obanënguentšana tojtanayena ora, chabe uatsjëndayënga tmojanenujubó ntšamo muentše cha tojanéyanama. Chca ora, Bëngbe Bëtsabe uabemana palabrénguiñe y Jesús chora tojánayana palabrénguiñe más chënga imojtsošbuaché.

### *Jesús nyetsca entsangbe juabna iuábuatma*

23 Jesús Jerusalenoca chë Bashco fiestama yojtsemnëntscuana, entsanga tmojáninye Jesús jamana bëts soyënga Bëngbe Bëtsabe obenánaca. Chíyeca, ba entsanga chábeñe imojtsošbuaché.

24 Pero Jesús chëngbeñe ndoñe yontsošbuaché, cha nyetscanga yojanëbuatma causa.

25 Y Jesús ndoñe bonjanájaboto chë entsangbe soyëngama chabotsebuayiynama, er cachá entsangbe ainaniñe nyetsca juabnénga yojanábuatma.

## 3

### *Jesús y Nicodemo*

1 Inamna canye boyabása Nicodemo ca uabainá. Cha yojamna fariseungentšá y judiëngbe canye amëndayá.

2 Chana ibeta Jesúsbioye tojána y tbojaniyana: —Buatëmbayá, bënga fsëntsetatšëmbo aca canye buatëmbayá comnama, Bëngbe Bëtsabe ichmoná. Ndocná quenátobena jamana quem bëts soyënga, aca contsama soyënga, Bëngbe Bëtsá cháftaca ndoñe tontsemnëse. Chíyeca bënga chca fsëntsetatšëmbo ca —cha tbojaniyana.

3 Chora Jesús tbojanjuá: —Ndegombre cbëyana, nda ndoñe cachiñe tontonyná, cha ndoñe quenátobena Bëngbe Bëtsabe amëndayana jinýama ca.

4 Y Nicodemo tbojantjá: —¿Ntšamo, canye entsá ya bëtsá tojtsemna ora, nantsobena cachiñe jtónýnama ca? Ndegombre, cha ndoñe ntsohenana cachabe mamabe cuerpiñe jtmashënguana cachiñe jtónýnama ca.

5 Chora Jesús tbojanjuá: —Ndegombre cbëyana, béjayeca y chë Uámana Espíritbeyeca ntjonýnacá, ndocná quenátobena Bëngbe Bëtsabe amëndayoye jamashënguama.

6 Nda bëtsëtsabentshana tojonýná cha, quem luarentša entsangcá jtsemnana; pero chë Uámana Espíritbeyeca tojonýná chana, jtsemnana canya chë Uámana Espíritu ainaniñe bomná.

7 Ndoñe matenjnanana ntšamo tcbonjauyanama: “Nyetscanga entsamna cachiñe jtónýnama”.

<sup>8</sup> Chë binÿia ndëmuajana tojtseboše jtsemnana, chëjana jtsanana. Masque entsanga, chë binÿiayama jtsuenanana, ndoñe ntsetatšëmbuana ndëmocana yobama y ndëmoye yojtsoma. Cachcá, tšëngaftanga ndoñe quešmátstatšëmbo ntšamo entsanga chë Uámana Espíritbeyeca tmojtsónÿnama; pero tšëngaftanga šmontsetátšëmbo aíñe chca yomnama ca —Jesús tbojaniana.

<sup>9</sup> Chora Nicodemo tbojantjá: —¿Ntšamo chca nántsemna ca?

<sup>10</sup> Y Jesús tbojanjuá: —Aca, canÿe Israeloca abuatambayá, ¿chë soyëngama ndoñe condétatšëmbo ca?

<sup>11</sup> Ndegombre cbëyana, bëngna chë fstátatšëmbo soyëngama fsëntsoyebuambná, y chë tifjinÿe soyëngama ndegombre bétsemnana fséntsichamo. Pero tšëngaftangna, chë cbontsëtsësná soyënguiñe ndoñe quešmatošbuaché.

<sup>12</sup> Atše, quem luarentša soyëngama sënjoyebuambá y tšëngaftanga átšbeñe ndoñe chešmatošbuaché. Y as, ¿ntšamo átšbeñe šmochtsošbuáchiye, celoca soyëngama cbojtsëtsësnase?

<sup>13</sup> “Ndocná, nÿe cachábeyeca Bëngbe Bëtsábioye tonjátsjua. Nÿe chë celocana tojabá aíñe, chë Bëngbe Bëtsá Entšá tbojanbemá.

<sup>14</sup> Y chcase, ntšamo Moisés entsanga ndoyenoca bronce mëtšcuaye tšbanánoca tbojananguësëtjca, šoquënga tšabá chamotsatsmënana; cachcá entsemna, Bëngbe Bëtsá Entšá tbojanbemá entsanga chamuatsbanama;

<sup>15</sup> chca, nÿetscanga chábeñe tmojtssošbuáchenga, chë nÿetsca tescama yomna tšabe vida chamotsebomnama ca” —Jesús Nicodémioye tbojaniana.

### *Ntsachetšá Bëngbe Bëtsá entsanga iuababuánÿeshana*

<sup>16</sup> Mëntšánaca Jesús tojánayana: —Bëngbe Bëtsá quem luare entšangbioye tša yojánababuanÿeshanayeca, chë nÿe canÿe Uaquiñá ibobomná, bëngbioye tbojichmó, nÿetsca chábeñe ošbuáchiyënga ndoñe chamondóbanama, y aíñe chë nÿetsca tescama yomna tšabe vida chamotsebomnama.

<sup>17</sup> Er Bëngbe Bëtsá chabe Uaquiñá quem luaroye ndoñe tbonjichmó quem luare entšangbiamama jabáyanama ntšamo tmojamama castigánënga chaotsamnana ca, sinó, entsanga chábeyeca atsebácanënga chamotsemnana.

<sup>18</sup> “Nda Bëngbe Bëtsabe Uaquiñábeñe tojtsošbuáchebiamama, Bëngbe Bëtsá ndoñe queochátayana ntšamo cha tojamama, castigana chaotsemna ca. Pero chë Uaquiñábeñe ndoñe tontsošbuáchebiamama, mora Bëngbe Bëtsá ya tojayana, ntšamo tojamama cha castigana chaotsemna ca, chë Bëngbe Bëtsá nÿe canÿe Uaquiñá ibobomnábeñe ndoñe yontsošbuaché causa.

19 Chca, chë ndoñe tmontsošbuáchengbiamna cha ya to-jayana, ntšamo tmojamama castigánënga chamotsemna ca; er chë entšangbe juabnënga binÿnayá quem luaroye tojabo, pero ba entšanga tmojábošena jtsomñana, chë entšangbiamna bacna juabnëngaca chamotsebomnama amáftaca. Chënga sempre bacna soyënga jtsamana; chíyeca chënga jtsebošana cháftaca jtsomñama.

20 Chë bacna soyënga tojtsamá ndoñe ntsebošana, chë binÿnayá chabe bacna soyënga chabuinÿinÿema, ni chabe bacna soyëngama chabuácacanama. Chíyeca, chë bacna soyënga jtsamëse oyená, chë binÿnayábioye jtsáboyënjana, y chë binÿnayábioye ndoñe ntjabana.

21 Pero nda sempre tojtsiyena ntšamo ndegombre yomncá jtsamëse, chana aifne chë binÿnayábioye jabana, chë binÿnayá chabiamna chabuinÿinÿema, chë tojama soyëngna, ntšamo Bëngbe Bëtsá tojtsebošcá tojamama ca” —Jesús tojánayana.

*Juan chë Ubayaná cachiñe Jesucristbiamna tojanabuayená*

22 Chca tojanopasá chentšana, Jesús chabe uat-sjéndayëngaftaca básefta Judeoca pueblëngoye tojtsanoñe. Chiñe, baseftatescama chë uatsjéndayëngaftaca tojanoquedá, entšanga ubáyana.

23 Cach tempo, Juanënaca entšanga yojanëbáyana Enonoca, Salim béconana, er choca bëtscá bėjaye inabinÿna. Ba entšanga choye imojtsaye, y Juan chënga yojanëbáyana.

24 Chca tojanopasá, chë Heródesbe soldadënga Juan cabá ndutame ora.

25 Chë tempo, básefta Juanbe ústonënga tmojanontšë inÿe judíoftaca enatsëtsnayana ntšamo tempo judiënga chë jtsacuéntšabiamna imojanámanama.

26 Chora, chënga Juánbioye tmojánabo y tmojanियana: —Buatëmbayá, chë Jordán chenguánoica ácaftaca enjamná, ndabiamna tša tšabá conjanoyebuambná, mora entšanga entsëbayana y nÿetscanga cha montsëstona ca.

27 As Juan tojanéyana: —Ndocná quenátobena tondaye ntse-bomnana, Bëngbe Bëtsá ndoñe tbonjatsetase.

28 Cach tšëngaftanga tšabá šmonjanuena y šmontsobena ndegombre yomnana jayanana, atše ndoñe chë Bëngbe Bëtsabe Uámana Uabuayaná tsjanmëna ca sënjánayanama; sinó, Bëngbe Bëtsá atše šojanichmó chë Uabuayanabe natsana, chabiamna entšanga jabábuayenama.

29 Chë tobiaše tojtsobouamá ora, chë bobontse chábioye jtsebomnana; y chabe amigna, chabiamna jtsobátmanana y chë bobontse bouamnabe oyebuambnayana jtsuenanana; y chca tojtsuenana ora, tša oyejuayá cha jtsemnana. Cachcá, ntšamo

chë Uabuayaná yojtsamama y yojtsóyebuambnama sëntsuenana ora, átšnaca corente oyejuayá sëntsemna.

<sup>30</sup> Cha bontsemna más uamaná jtsemnana, pero atše šontsemna más nduamaná jtsemnana ca —Juan tojanéyana.

### *Ntšamo yomna chë celocana tojabá*

<sup>31</sup> Mëntšánaca Juan tojánayana: “Chë tsbanánocana tojabá, nýetsca entšangbiana más uamaná endmëna. Chë quem luare oyená quem luare entšangcá jtsemnana y quem luar-entša soyëngama jtsóyebuambnayana, pero chë celocana tojabana, nýetsca entšangbiana más uamaná endmëna.

<sup>32</sup> Cachá ntšamo tojinýe y tojouencá entsoyebuambná, pero chë entsichamo soyënguiñe ndocná quenatošbuaché.

<sup>33</sup> Nda ntšamo cha tojtsóyebuambnañe tojtsošbuaché y chca tojtsama, jtsinýanýayana Bëngbe Bëtsá ndegombre soyënga inetsichámuama.

<sup>34</sup> Chcasna, Bëngbe Bëtsabe ichmonana, jtsóyebuambnayana ntšamo Bëngbe Bëtsá tojtsichamcá. Bëngbe Bëtsana chë ichmonábioye tbojichmó chë Uámana Espíritu, nýets tempo corente chabotsájabuachanama, ntšamo cach Bëngbe Bëtsá tojtsichamo y cachcá chaotsichámuama.

<sup>35</sup> Chë Taitá Uaquiñábioye bondbobonshana, y chë Uaquiñábioye obenana tbojatšetá nýetsca soyënguiñe jtsemándayama.

<sup>36</sup> Nda chë Uaquiñábeñe tojtsošbuaché, chë nýetsca tescama yomna tšabe vida echántsebmoma; y nda chë Uaquiñábioye ndoñe tbontsašbuaché, chana chë vida ndoñe queochátsbmoma, y chë Bëngbe Bëtsabe uabouana castigo nýetsca tescama chábeñe echántsemna ca” —cha tojánayana.

## 4

### *Jesús y chë Samaria luaroca shembása*

<sup>1</sup> Chë fariseunga tmojanuena Jesús, Juanbiana más ústonënga yojtsabamnana, y más entšanga yojtsëbáyana.

<sup>2</sup> Pero ndegombre, cach Jesús ndocnábioye bonýanábayana, sinó chabe uatsjëndayënga.

<sup>3</sup> Bëngbe Utabná Jesús, ntšamo chë fariseunga tmojanuena tojántatšëmbona ora, Judea luarocana tojéftsanbocna y Galileoye tojtaná.

<sup>4</sup> Choye jtamna ibojamna Samaria luarëjana jachnënguana.

<sup>5</sup> Samariocna, canýe pueblo Sicar ca uabáinoye Jesús tojánashjango. Chë pueblo yojamna, chë Jacob chabe uaquiñá Josébioye tbojéftsanlargá fshantse béconana.

<sup>6</sup> Choca yojamna cánýentše atëfjóniñe, búyeshe jobuat-sjuama, Jacobëbe atëfjóniñe ca uabáiniñe. Mo nýetsto ora,

chentše Jesús yojtsemna, aniñe uamëntšnaya, chë atëfjóniñe batsjaca yojótbema.

7-8 Chabe uatsjëndayëngna chë puebloye tmojána saná jobuámiñama. Chora, canye shembása Samariocá, chë atëfjónoye tojánashjango, býyeshe jauafcama; as Jesús tbojaniana: —Býyeshrema šmabuatšetá ca.

9 Y chë shembása tbojanjuá: —Aca canye judío condmëna y atšna canye samaritaná. ¿Ntšamo cojtsobena atše býyeshe juabuátjañama ca? (Cha chca tojánayana, er canjanopasana, judiëngna samaritanëngaftaca ndoñe monjanenatsëtsná.)

10 Chora Jesús tbojanjuá: —Aca mo cojtsetátšëmbo nye ntšamo Bëngbe Bëtsá aca jatšetayama yojtsebošcá, y nda chë býyeshe cmojtsábuatjanañama, acna más cha catjuábuatjañe, y chana béjaye vida bomniye cmatjuabuátšetaye ca.

11 Y chë shembása tbojaniana: —Señor, tondaye quecátsbomna nye mo ndayecnaca býyeshe jabuatsjuama, y chë atëfjóniñe corente tboca endmëna; y as, ¿ndayentšana cochjobenaye béjaye vida bomniye atše juabuátšetayama?

12 Bëngbe tempsca bëts taitá Jacob, quem atëfjóniñe bëngbiama tojëftsanboshjona. Cachá, chabe básenga y chabe bayënga muentšana býyeshe tmojëftsanofšé; y ¿aca chabiana más bëtsá comna ca? —chë shembása yojtsichamo.

13 As Jesús tbojanjuá: —Nýetscanga chë quem býyeshentšana tmojofšenga, chënga cachiñe echantëtëjuendaye.

14 Pero chë chanjuabuátšetaye býyeshentšana tojofšé chana ndocna te cachiñe quebochëtajuendaye. Cha chanjuabuátšetaye býyeshna, chábeñe echántsemna mo cánýentše béjaytema obocaniñcá, chë nýetsca tescama yomna tšabe vida jtsebomnama ca —cha tbojaniana.

15 Chora chë shembása tbojaniana: —Señor, chca býyeshe šmabuatšetá, as atše ndoñe cachiñe chašondetsajuendama, ni býyeshe juafcama moye jtšaboyama ndoñe chašondëtsemnama ca.

16 As Jesús tbojaniana: —Motsa acbe boyá jachembuama y cochjésabo ca.

17 Chora chë shembása tbojanjuá: —Boyá ndoñe quetsátsbomna ca.

As Jesús tbojaniana: —Tšabá tcjayana boyá ndoñe cond-bomna ca.

18 Er, aca shachna boyanga conjánabamna, y chë mora contsebomnana, acbe boyá ndoñe quenátsmëna. Ntšamo tconjayancá ndegombre entsemna ca.

19 Chë shembása chca tojanuena ora, Jesúsbioye tbojaniana: —Señor, mora atše sëntsetatšëmbo, aca canya Bëngbe Bëtsabe juabna oyebuambnayá comnama.



20 Bëngbe tempsca bëts taitanga quem tjoca Bëngbe Bëtsá monjánadorana; pero tsëngaftanga, judiënga šmondbëtsichamo, bënga Bëngbe Bëtsá jadóramna, Jerusalenoca chë luare canmëna ca.

21 Chora Jesús tbojanjuá: —Shembása, šmoyeuná; canÿe tempo echanjóshjango y chora tsëngaftanga ndoñe quecmochátamna Bëngbe Bëtsá jadóramna, ni quem tjoye jabana, ni Jerusalenoye jana.

22 Tsëngaftanga samaritanënga ndoñe quešmatábuatma nda šmetsadoránama; pero bënga aiñe fsënduábuatma, er chë atsebacayá judiënguentsana endabó.

23 Pero ora entsoshjajuana, ya chë tempo tocjobuache, ndaye ora chë Bëngbe Bëtsá chë Taitá ndegombre atschuanayënga, chë Espíritbeyeca y ndegombre juabnëngaca chábioye mochántadorana. Er chë Taitá entseboše chë chábioye adórayënga chca chamotsamama.

24 Bëngbe Bëtsá, Espíritu endmëna; y chë chábioye adórayënga entsamna, chë Uámana Espíritbeyeca y ndegombre juabnëngaca cha jtsadoránana ca —Jesús tbojaniana.

25 Chora chë shembása tbojaniana: —Atše sëndétatšëmbo, canmëna chë Bëngbe Bëtsabe Uámana Uabuayaná, chë Cristo jabana ca; y cha chaojáshjango orna, cha nyetsca soyëngama cašochjabuayená ca.

26 As Jesús tbojaniana: —Atše, chë ácaftaca entsoyebuambná cha, cha entsemna ca.

27 Chëntscuana, Jesusbe uatsjëndayënga tmojtanashjajna, y tmojtsanëuatjaná, Jesús canÿe shembásaftaca yojtsoyebuambná causa. Pero ndocná Jesús tbonjantjá: ¿Ndayá cháftaca cojtseboše? o ¿Ndáyeca cháftaca cojtsoyebuambná ca?

28 Chorna, chë shembása chabe uafcanëja tojésanboshjona, y chë puebloye betesco tojtaná. Chocna, entsanga tojanëyana:

29 “Mabënga canÿe boyabása jinÿama ca. Cha atše šonjauyana lempe ntšamo tijamcá. ¿Chë boyabása, chë Cristo tanántsemna ca?” —cha yojtsichamo.

30 As chë entsanga chë pueblcana tmojánbocana y Jesús yojtsemnoye tmojánashjajna.

31 Chca yojtsopasánëntscuana, chë uatsjëndayënga Jesúsbioye imojtseimpadana: —Buatëmbayá, batšatema mose ca.

32 Pero cha tojanëyana: —Atše canÿe soye jasama sëntsebmna. Tsëngaftanga chë soyama ndoñe quešmátstatšëmbo ca.

33 Chora chë uatsjëndayënga tmojanontsé entjanayana: —¿Nderado nda jasama chabiamna tojiyëbo ca?

34 Y Jesús tojanëyana: —Chë šonjichmó cha ntšamo yojtsebošcá jamana, y chabe trabajo japochócana, chë soyënga mo sanacá atšbiana entsemna.

35 Tšëngaftanga šmondbétsichamo: “Cabá canta ishinÿe entsashbena jaja saná chaotsebínÿnama ca”; pero atše cbëyana: Minÿënga tša entšanga moye montsabëbana; chënga montsemna mo jajañe saná játbana tojtseprontancá.

36 Tšëngaftanga šmontsemna mo chë saná atbanayëngcá. Chëngna jajañe jtsetrabájayana, y chëngbe uacanánana jtsësháchina. Cachcá, tšëngaftanga cmontsamna atšbiana entšanga júbuajana, chë nÿetsca tescama yomna tšabe vida chamotsebmoma. Chë jaja saná átbanaye ora, jenënga y chë atbanayënga cánÿiñe oyejuayënga jtsemnana. Cachcá, chë entšanga átšbeñe chamojtsošbuaché ora, nÿetscanga, chë atšbiana obuájajanënga y chë atšbiana trabájayëngnaca cánÿiñe oyejuayënga mochántsemna.

37 Quem entšangbe ichámuana, canÿe ndegombre soye endmëna: “Chë jená canÿa jtsemnana, y atbanayana inÿa ca.”

38 Atše tšëngaftanga cbonjichamó canÿe soye játbana, y tšëngaftanga tondaye chešmatsma chca chaotsebínÿnama. Inÿenga chiñe bëtscá tmonjëftsetrabája, y tšëngaftangna, chëngbe trabajënguentšana šmojograñe ca —Jesús tojánayana.

39 Bëtscá entšanga, Samarioca pueblentšënga Jesúsbeñe imojtsanošbuaché, ntšamo chë shembása tojanëyanama. Chë shembása tojanëyana: “Lempe ntšamo atše tijamcá cha šonjauyana ca.”

40 As chë samaritanënga, Jesús yojtsemnentše tmojánashajna ora, tmojanimpadá chëngaftaca chaotsoquedáñama. Y as Jesús, uta te chentše tbojëftsanjétana.

41 Y más entšanga, cach ntšamo Jesús yojtsanëtsëtsnacá tmonjanuena ora, chábeñe imojtsanošbuaché.

42 Y chë shembása chë entšanga tmojanianyana: “Mora cocayé fsëntsošbuaché, ndoñe nÿe ntšamo aca šcojáuyanama, sinó cach bënga chábioye oído fsënjabuajóyeca; y mora fsëntsetatšëmbo ndegombre cha yojtsemna chë quem luare entšangbiana Atsebacayá ca.”

*Jesús, canÿe mandado uajabuachanabe básabioye tbojanshná*

43 Uta te chentšana, Jesús Samariocana tojáisanbocna y Galileoye tojataná.

44 Cach Jesús mëntšá tojánayana: “Canÿa Bëngbe Bëtsabe juabna oyebuambnayá, cachabe luarentše oyenënga ndoñe bëtsá ntjabemëngana ca.”

45 Galileoca oyenënga Jerusalenoye tmojána, y tmojáninÿe nÿetsca bëts soyënga ntšamo Jesús Bashco fiesta ora choca

tojanmcá. Chíyeca, Jesús Galileoye tojtashjango ora, chënga tšabá tmojtanoſja.

<sup>46</sup> Galileocna, Jesús cachiñe Caná puebloye tojésanashjango, chë béjayeca vínoye cha tojánbementše. Choca yojtsemna canye mandadbe uajabuachaná, y chabe uaquiñana Capernaum puebloca šocá yojtsejájona.

<sup>47</sup> Jesús Judeocana Galileoye tojánashjanguama, chë uajabuachaná tojanuena ora, Jesúsbioye tojána y ibojtseimpadana chabe yebnoye cháuama, chabe uaquiñá chabuetsešhnáñama, er ya jtsóbanama yojtsemna ca.

<sup>48</sup> As Jesús tbojaniyana: —Tšëngaftanga, Bëngbe Bëtsabe obenana jinñanyiyama bëts soyënga atše jamama ndoñe šmonjinýëse, átšbeñe ndocna te ntšošbuáchiyana ca.

<sup>49</sup> Chora, chë mandadbe uajabuachaná Jesúsbioye tbojaniyana: —Taita, betsko mabo, atšbe uaquiñá cabá ndóbana ora ca.

<sup>50</sup> As Jesús tbojaniyana: —Acbe yebnoye motsatá. Acbe uaquiñá ainá endëtsomñe ca.

Chë boyabásana tojanošbuaché ntšamo Jesús tbojaniyancá y tojtaná.

<sup>51</sup> Cha yojtsataye orna, chabe oservénënga tmojánbocana jajébenguama y tmojaniyana: —Acbe uaquiñá tšabá entsatsmëna ca.

<sup>52</sup> As cha tojanatjá: —¿Ntseco orscana tbënjatëcja ca?

Y chënga tmojanjuá: —Tonjopasá yëfse, mošenana orscana chë calentora tbonjábosana ca.

<sup>53</sup> Chora chë taitá tojanenojuabó, cachca ora Jesús tbojaniyana: “Acbe uaquiñá ainá endëtsomñe ca”. Y cha y nyëtscanga chabe yebnentše oyenënga Jesúsbeñe imojtsanošbuaché.

<sup>54</sup> Ntšamo Jesús chora, chë uajabuachanabe uaquiñabiama tojanmcá, Judeocana Galileoye yojtsataye orna, yojamna chabe utama chca bëts soye jamama, Bëngbe Bëtsabe obenana jinñanyiyama, Galilea luaroca.

## 5

### *Jesús canye jama ndobenábioye tbojanshná*

<sup>1</sup> Baseftayté chentšana, chë judiënga canye oboyejuaye te imojtsebmna ora, Jesús Jerusalenoye tojána.

<sup>2</sup> Choca, chë Oveshëngbe amashjuana ca uabáinentše yojamna canye binche uafjónaye, entšangbe pormániñe. Chë béjayna judiëngbe biyañe Betzata ca inauabaina. Chë béjaye juachañe shachna amashjuana otsbojebniñe inamna.

<sup>3</sup> Chiñna ba šoquënga jtanënga, coshetënga y jama ndobenënga imojtsecjana; chë béjaye chamobonjoma imojtsobátmana.

<sup>4</sup> (Nderado nderado, Bëngbe Bëtsábioca canye ángel yojanama jastjanguana chë béjaye jabónjuama. Chca ora, chë béjayoye natsana tojamashënguá, chabe šocanama tšabá jtsatsmënana.)

<sup>5</sup> Chë šoquënguñe canye boyabása inamna, unga bnëtsana y posufta uatama jama ndobená.

<sup>6</sup> Jesús chë jajonábioye tbojáninýe ora y ba uatama chca yojamnama tojántatšëmbona ora, tbojantjá: —¿Quecojtseboše tšabá jtsatsmënana ca?

<sup>7</sup> Y chë šocá tbojanjuá: —Taita, ndocná quetsátsbomna nda chašuájabuache béjayoye jamashënguama, chë béjaye tojtsobonjná ora. Y atše béjayoye jamashënguama stseboše ora, inýa atšbe natsana jtsamashënguana ca.

<sup>8</sup> Y Jesús tbojaniyana: —Matëtsbaná, acbe tjuashe mesocñe y matontšé jóyenana ca.

<sup>9</sup> Cach ora chë boyabása tšabá yojtsatsmëna, chabe tjuashe tojésanocñe y tojanontšé jtsanana. Chca tojanopasá ora, chë ochnayté inamna.

<sup>10</sup> Chíyeca, chë tbojanshnábioye chë judiënga tmojaniyana: —Mëntena ochnayté. Mënté ndoñe quenátopodena aca tjuashe jtsecutsnana ca.

<sup>11</sup> Y chë boyabása tojanéyana: —Chë šonjashná cha mëntšá šonjauyana: “Acbe tjuashe mesocñe y montšé jóyenana ca”.

<sup>12</sup> As chënga tmojantjá: —¿Nda yojtsemna chë “acbe tjuashe mesocñe y montšé jóyenana ca” tcmojauyaná ca?

<sup>13</sup> Pero chë shnaná ndoñe yontsetátšëmbo nda tbojanshnama. Chocna bëtsacá entšanga imojtsemna; chcasna, Jesús chëngbe tsëntsajana tojanenatjëmbe.

<sup>14</sup> Chentšana, Jesús Bëngbe Bëtsabe bëts yebnentše chë boyabásabioye tbojáninýena y tbojaniyana: —Mouena; mora aca ya ndoñe šocá quecátsmëna; bacna soyënga ndoñe cachiñe cattsama. Aíñese, acbiama puerte mal echanjopása ca.

<sup>15</sup> Chë boyabása tojtsanoñe y chë judiënga tojanéyana: —Chë šonjashná cha Jesús entsemna ca.

<sup>16</sup> Chë causa, chë judiënga imojtsenguaye ntšamo Jesús ndayánaca jabórlana, cha ochnayté chë soyënga tojanmama.

<sup>17</sup> Pero Jesús tojanéyana: “Atšbe Taitá nýets tempo tšabe soyënga endbëtsama; cachcá, átšnaca tšabe soyënga sëntsama ca.”

<sup>18</sup> Jesús tojanma ntšamo ochnayté ndoñe yonjanapodencá, y Bëngbe Bëtsabiama tojánayana “Atšbe Taitá ca”. Mëntšá Jesús yojtsanobiamná cach Bëngbe Bëtsacá. Chama, chë judiënga más imojtseboše Jesús jóbama.

19 Chentšana Jesús tojanéyana: “Ndegombre šcuayana: Bëngbe Bëtsabe Uaquiñá, nýe cachabe cuenta tondaye quenátobena jamana. Cha jtsonýayana ntšamo chabe Taitá tojtsamcá. Ntšamo chë Taitá tojtsamcá, chë Uaquiñánaca jtsamana.

20 Er Bëngbe Taitá chabe Uaquiñábioye bondbobonshana, y lempe ntšamo cha tojtsamcá chábioye bondinýinýná; y más bëts soyënga bochanjinýinýiye, chë soyëngama tšëngaftanga chašmenjanama.

21 Chë Taitá endama obanënga chámuatayenama y tšabe vida chamotsebomnama; cachcá, chë Uaquiñá entsama tšabe vida chamotsebomnama, ndëmuanýenga cha tojtsebošcá.

22 Chë Taitá ndocnabiana jatichámuana tšabá o ndoñe tšabá yontsama ca. Chabe Uaquiñábioye nýets obenana tbonjatšetá nýetscangbiana jayanama tšabá o ndoñe tšabá tmontsamama.

23 Chca, chënga chamuinýinýé Bëngbe Bëtsabe Uaquiñá puerte uamaná yomnama, ntšamo Bëngbe Bëtsá puerte uamaná yomnama nýetscanga mondbetsinýinýaycá. Nda chë Uaquiñábioye ndoñe más uamaná tbontsebianná, cach ndoñe más uamana ntsebiannayana chë Taitábioye, nda chë Uaquiñá tbojichmóbioye.

24 “Ndegombre šcuayana: Nda ntšamo atše sëntsichamcá šojoyeuná, y chë muentše šonjichmó chábeñe tojtsošbuaché, chë nýetsca tescama yomna tšabe vida jtsebomnana. Chabiana chë Uaquiñá ndoñe queochátayana castiganá chaotsemna ca. Chca, Bëngbe Bëtsabiana cha ya ndoñe más mo obanacá queochátsmëna, chábeñe ndošbuáchiye causa; y ya ndoñe nýetsca tescama castiganá queochátsmëna. Y aíñe, chë nýetsca tescama yomna tšabe vida echántsebomna.

25 “Ndegombre šcuayana: Chë jobuáchama te ya tocjobuache. Chë te, chë Bëngbe Bëtsabiana mo obanëngcá imomnënga mochanjouena Bëngbe Bëtsabe Uaquiñá jtsóyebuambnayana. Nda chca tšabá chašojoyeuná cha, tšabe vida echántsebomna.

26 Er ntšamo Bëngbe Taitá obenana endbomncá, cachá jamama entšanga vida chamotsebomnama, chabe Uaquiñábioynaca obenana tbojatšetá entšanga vida chamotsebomnama jamama.

27 Chë Uaquiñá endmëna nda Bëngbe Bëtsá Entšá tbojánbema; chíyeca chë Taitá chábioye obenana tbojatšetá nýetscangbiana jayanama tšabá o ndoñe tšabá tmontsamama.

28 Chama ndoñe matenjanana. Er canýe tempo echanjobuache, y chora chë Uaquiñá obanënga echántsachembuana; chënga mochanjouena y cach ora, chëngbe oyenocana mochanjésebocana.

29 Tšabe soyënga tmojëftsemënga, obanënguentshana mochántayena, chë nyetsca tescama yomna tšabe vida jtseboamna. Pero bacna soyënga tmojëftsemëngna obanënguentshana mochántayena nyetsca tescama castigánënga jtsemnama ca” —Jesús tojanëyana.

*Jesús, ndegombre Bëngbe Bëtsabe ichmoná inamna*

30 Mëntšánaca Jesús cachatbiamá tojánayana: “Nye átsbeyeca tondaye quetsátobena jamama. Chë Taitá šontsemánda ntšamo nyetscangbiamá jayanama tšabá o ndoñe tšabá tmontsamama. Nye chca atše sentsobena chë soye jamama. Ndoñe quetsátsboše jamana nye ntšamo cach atše stsebošcá; pero sempre sëndbétseboše jamama, ntšamo Taitá, chë šonjichmó cha tojtsebošcá. Chíyeca atše nyetscangbiamá sentsichamo tšabá o ndoñe tšabá tmontsamama; y ntšamo nyetscangbiamá sentsichamcá, ndegombre endmëna.

31 “Ntšamo cach atšbiamá tijayanama, ndegombre entsemna ca stsichámëse, ntšamo stsichamcá, nyetscangbiamá tondaye ntsámanana.

32 Pero inya entsemna. Cha endëtatšëmbo y entsichamo ntšamo ndegombre atšbiamá yomncá; y sëntsetatšëmbo ntšamo cha atšbiamá yojtsichamcá, nyetscangbiamá aíñe yojtsámanama.

33 Tšëngaftanga ínÿenga šmojanichamó atšbiamá Juan jat-jayama; y ntšamo cha tcmojauyancá ndegombre endmëna.

34 Masque chë soyënga cha tcmojáuyana, ndoñe quešnatájaboto ndocna entšá atšbiamá chaotsichamo ‘cha aíñe chca endmëna ca’. Atše quem soyënga sentsichamo ndayá nye tšëngaftanga atsebácanënga chašmotsemnama.

35 Juan enjamna mo canÿe uajuinÿanësha tojtsajuinÿana y tojtsabuashinÿinÿancá. Tšëngaftanga chabe buashinÿinÿanana šmonjinÿe, y šmonjábóšena rato cháftaca oyejuayënga jtsemnama.

36 Pero chë atše sënjama soyëngacna más entsinÿinÿena ntšamo atšbiamá ndegombre yomncá, chë ntšamo Juan atšbiamá tojánayanama. Ndayá atšbe Taitá šojabonyé jamama, ntšamo atše sentsamcá, entsinÿinÿná ndegombre chë Taitá šojichmoma.

37 Atšbe Taitá, chë šojichmó chánaca entsichamo ntšamo atšbiamá ndegombre yomncá, masque ndocna te chabe oyebuambnayana chešmatuena, ni ntšamo cha yomncá chešmátinÿe.

38 Pero tšëngaftangbe ainanoye chabe palabra ndoñe tonjómashëngo, cha tbojichmóbeñe tšëngaftanga ndoñe quešmatošbuaché causa.

39 Tšëngaftanga, Bëngbe Bëtsabe palabra tša jtsatsjëndayana, er šmondobátmana, chca jtsamëse chë nyetsca tescama yomna tšabe vida jónyënama. Y Bëngbe Bëtsabe uabemana palabrënguiñe atšbiana endayana ntšamo ndegombre yomncá; 40 pero masque chca, tšëngaftanga ndoñe quešmátsboše atše jtsëstonana, y chca, tšabe vida jtsebomnama.

41 “Atše ndoñe quetsátsboše entšanga yapa tšabá atšbiana chamotsichámuama.

42 Y inye soye, atše puerte cbondëbuatma, y sëndëtatšëmbo tšëngaftanga Bëngbe Bëtsá ndoñe šmondobonshánama.

43 Atšna atšbe Taitabe cuenta sënjabo, y tšëngaftanga ndoñe quešmátsboše atše jofjana. Pero inya, cachabe cuenta tojabábioye cocayé aíñe šmatjofja.

44 Tšëngaftanga corente jésebošana, ínÿenga tšëngaftangbiana tšabá chamotsichámuama, y ínÿengbiana tšabá jtsichámuama; pero ndoñe ntsebošana chë nye canye Bëngbe Bëtsá tšëngaftangbiana cachcá chaotsichámuama. Chca šmojtsamëse, ¿ntšamo šmochtsovena Bëngbe Bëtsábeñe jtsošbuáchiyana?

45 Ndoñe šmattsejuabnaye, atšbe Taitabe delante tšëngaftangbe contra atše chjayana ca ntšamo tšëngaftanga šmojtsamama. Tšëngaftanga tša jtsobátmanana atsebácanënga jtsemnama, chë ntšamo Moisesbe leyíñe endayancá šmojtsamama; pero ndegombre, ntšamo cha tojayancá, cach tšëngaftangbe contra entsemna.

46 Tšëngaftanga, chë Moisés tojéftsanabema soyíñe šmojtsošbuachese, átšbeñnaca šmattsošbuáchiye, er cha atšbiana tojanábema.

47 Pero chë tojanábema soyíñe tšëngaftanga ndoñe šmontsošbuachesna, ¿ntšamo šmochjobenaye chë atše sentsichamo soyënguiñe jtsošbuáchiyana ca?” —Jesús tojanéyana.

## 6

*Jesús shachna uaranga boyabásenga saná tojanacaredadó (Mt 14.13-21; Mc 6.30-44; Lc 9.10-17)*

1 Chë soyënga tojanopasá chentšana, Jesús chabe uatšjëndayëngaftaca tojana Galilea uafjajónaye chenguana. Chë uafjajónayna Tiberias cánaca inauabaina.

2 Ba entšanga imojtsëstona, er chënga tmojáninÿe cha bëts soyënga jtsamana, šoquënga jtsashnayëse.

3 As Jesús tjoye tojánatsjua, y choca chabe uatsjëndayëngaftaca tojanótbema.

4 Ya judiëngbe canye fiesta, chë Bashco fiesta, yojétsobeco.

5 Jesús tojanótbema ora, tojanontješé y tojánanÿe ba entšanga chábioye imojetsebëconaye. As Felípbioye

tbojaniyana: —¿Ndayentše saná cuanjabuámiye nyetsca quem entšanga chamosama ca?

<sup>6</sup> Jesús chca tbojaniyana, ana Felípbioye jinýama ntšamo cha tabuanjojuama; er cach Jesús tšabá inatátšëmbo ndayá jamama.

<sup>7</sup> Y Felipe tbojanjuá: —Ni mo uta patse denario crocenánaca nanjopódia tanděše jabuámiyama, nyetsca entšanga nye mo batšatémnaca chamuétsesama ca.

<sup>8</sup> Chorna, Jesusbe canýe uatsjendayá, Andrés ca uabainá, Simón Pédrébe catšata, Jesúsbioye tbojaniyana:

<sup>9</sup> —Muentše entsemna canýe básetema y cha shachna cebada tanděše y uta beónata entsebomna. Pero, ¿ndayase nye nyetšatema chěfta entšangbiama ca?

<sup>10</sup> As Jesús tojánayana: —Entšanga mýana chamotbiama ca.

Becá shácuana chě luariñe inamna, y nyetsca entšanga chiñe tmojanoshěntsijatbiama. Chě entšanguentše shachna uaranga boyabásenga imojtsemna.

<sup>11</sup> Chora Jesús, chě tanděše chabe cucuatšiñe tojanca, y Běngbe Bětsábioye chě tanděšama tbojtanchuá; y chabe uatsjédayěnga tojanějató, y chě uatsjédayěngna nyetsca entšanga imojtsetbiámaněnga tmojanatšatá. Cachcá Jesús chě beónaca tojanma, y ntšamo entšanga imojanbošcá tmojanatšatá.

<sup>12</sup> Nyetscanga tmojanse y tmojtanoshachá ora, Jesús chabe uatsjédayěnga tojanéyana: —Chě ojamnětéměnga šmochtsatbananga, tondaye nye cachcá ntjěftsonýayama ca.

<sup>13</sup> As chěnga tmojanatbaná, y chě tmojanse shachna cebada tanděsentšana tojanójaměteměngaca, bnětsana uta sbarěcua tmojanajutjé.

<sup>14</sup> Chě entšanga quem běts soye Jesús jamama tmojáninýe ora tmojánayana: “Ndegombre quem boyabása, chě quem luaroye jabama Běngbe Bětsabe juabna jabóyebuambayama cha entsemna ca.”

<sup>15</sup> Jesús yojtsetátšëmbo entšanga chěngbe rey jabemama imojetsebošama. Chíyeca cach tjoye tojtsaisanoñe canýa jt-somñama.

*Jesús bėjaye juatsbuacá yojtsaye*

*(Mt 14.22-27; Mc 6.45-52)*

<sup>16</sup> Tojanibétata ora, Jesusbe uatsjédayěnga chě uafjajónayoye tmojantsmá;

<sup>17</sup> barquěshañe tmojtanenojayé, y tmojanontšé jenash-buachénguana, chca, Capernaumoca jenbocnama. Ya ibeta yojtsemna, y Jesús cabá ndoñe chěngbioye ntashjanguana.

<sup>18</sup> Chca imojtsenashbuachnějuana orna, chě bėjayiñe jabuache binýia tojanóshjango y běts olěshěnga chě barquěshoye yojtsójantšetaye.



19 Shachna o chnënguana kilómetro chënga tmojána ora, tmojáninÿe Jesús chëngbioye yojtsebéconaye, béjaye juatsbuacá yojtsaye. Chënga chca tmojáninÿe ora tša tmojanocochauatjaná,

20 pero Jesús tojanëyana: “Atše sëndmëna; ndoñe matauatjëngana ca.”

21 Chora chë uatsjëndayënga oyejuayënga imojtseboše Jesús chë barquëshoye jofjana, y ndoñe bënëntscose ya chë imojtsaye luaroye tmojánashjajna.

### *Entsanga Jesús tmojánanguango*

22 Yëfsana, nÿetsca entsanga, chë uafjajónaye chenguánoica tmojanoquedanga tmojáninÿe, chë inÿe yëfsana chë nÿe canÿe barquëshsha yojuamnëshañe Jesusbe uatsjëndayënga tmojt-sanoñama, y Jesús chëngaftaca ndoñe tonjánama.

23 Pero chëntscuana, Tiberias pueblentsana inÿe barquëshangá tojanáshjajna canÿe luarentše, chë Bëngbe Utabná Jesús chabe Taitábioye tbojtanchuá chentsana, entsanga saná tmojanse luare béconana.

24 Asna, ni Jesús ni chabe uatsjëndayënga chentše ndoñe montsemnama chë entsanga tmojáninÿe ora, chë barquëshangañe tmojtanenojayé y Capernaumoye tmojána Jesús jetsenguanguama.

### *Jesús, chë nÿetsca tescama yomna tšabe vida jtsebomnama tandëse*

25 Chë uafjajónaye chenguánoye tmojánashjajna ora, Jesús tmojáninÿena y mëntšá tmojantjá: —¿Buatëmbayá, ntseco ora muentše tcojášhango ca?

26 Y Jesús tojanëyana: —Ndegombre cbëyana, tšëngaftanga ndoñe atše quešmatsnguá, chë bëts soyënga tijamama, sinó nÿe chë jtoshachaye nÿetšá tandëse šmojasama.

27 Ndoñe matenángmenana chë nÿe ndoñe bën y jopochócana sanama; chë ndmopochócaye saná, chë nÿetsca tescama yomna tšabe vida jtsebomnama saná šmochjánguango. Chë saná, Bëngbe Bëtsá Entšá tbojanbemá cmochanjátšataye, er Bëngbe Bëtsá chë Taitá tonjinÿanÿé, tšabe soyëngaca, cha chábioye tbojuábuayanama ca —tojánayana.

28 Chora chë entsanga tmojantjá: —¿Ndayá fchjama ntšamo Bëngbe Bëtsá yojtsebošcá chaotsemnama ca?

29 Chca tmojantjá ora, Jesús tojanëyana: —Chë Taitá entseboše tšëngaftanga chabe ichmonábeñe chašmotsošbuáchema ca.

30 Chora chënga tmojaniyana: —¿Ndaye tšabe soye cochjama acbe obenana bënga jinÿanÿiyama ca? Chë soye chaftsjinÿëse, ácbeñe fchantsošbuáchiye. ¿Bëngbiama taicochjama ca?

31 Bëngbe tempsca bëts taitanga entsanga ndoyenoca maná ca uabaina saná tmojanse. Bëngbe Bëtsabe uabemana palabrënguiñe mëntśá endayana: “Cha celoca tandëse tonjanatśatá chamosama ca” —chënga tmojánayana.

32 Chora Jesús tojanëyana: —Ndegombre cbëyana, Moisés chënga ndoñe chë celoca tandëse tonjanatśatá; Bëngbe Bëtsá Bëngbe Taitá chëngbiöye tojanatśatá chë maná ca uabaina tandëse; y cha endmëna nda celocana chë ndocna te nd-mopochócaye tandëse ndegombre cmondatsatná.

33 Er Bëngbe Bëtsábiocana tandëse entsemna chë celocana tojastjanguá; y cha quem luare entsangbiana entsama chë nyetsca tescama yomna tśabe vida chamotsebomnama ca —cha tojanëyana.

34 Chora chënga tmojanimpadá: —Taita, chë tandëse sempre şcochtsatśatnaye ca.

35 Y Jesús tojanëjua: —Atşe sëndmëna entsanga chë nyetsca tescama yomna tśabe vida jtsebomnama tandëse. Nda atşe chaşojtsëstona, sempre oyejuayá echanjëftsemna y Bëngbe Bëtsabe soyënga nyets tempo echanjesóbomñe, mo nda nyets tempo saná totsobomñcá, y ndocna te tbontsishëntsancá.

36 Pero ntşamo ya tcbonjauyancá, tşëngaftanga atşe şmonjinÿe y cabá ndoñe átşbeñe queşmatoşbuaché.

37 Nda atşbe Taitá atşbiana tbojabocacá, cha atşe şochantsëstona; y nda átşbiöye şojtsëstona, átşbentsana quichtëtábocna.

38 Er atşna celocana sënjabo chë şojichmó cha ntşamo yojtseboşcá jamama, y ndoñe nyë ntşamo atşe stseboşcá.

39 Y chë şojichmó cha entseboşe, ni mo canÿa chë atşbiana tojabacacá chentşana, atşe chailesenciá pochocaná chaotsemnama; y quem luare jopochócama tena, nyetscanga atşbiana tojábacacangbiana chámuatayenama atşe chaimama.

40 Er atşbe Taitá entseboşe, nda chabe Uaquiñábioye tbojinÿe y chábeñe tojtsoşbuaché, chë nyetsca tescama yomna tśabe vida chaotsebomna, y quem luare jopochócama tena, cha cháuatayenama atşe chaimama ca —Jesús tojanëyana.

41 “Atşe sëntsemna chë celocana tojóshjango tandëse ca” Jesús tojanëyana causa, chë judiënga tmojanontśé chabiana podesca ichámuana.

42 Chënga mëntśá imojtsichamo: —¿Mua ndoñe Jesús yondmëna, chë Josebe uaquiñá? Chabe bëtsëtsata bënga tmotsábuatmñe. ¿Ntşamo cha mora yochjátichamo celocana tojástjango ca?

43 As Jesús tojanëyana: —Atşbiana ndoñe podesca matichámuana.

44 Ndocná quenátobena atše juastana, chë Taitá, chë šojichmó cha, ainaniñe chca chaotsebošama ndoñe tbonjuajabuáchese; y atše chanjama cha cháuatayenama quem luare jopochócama te.

45 Chë tempsquënga Bëngbe Bëtsabe juabna oyebuamb-nayënga mëntšá tmojanábema: “Cach Bëngbe Bëtsá nyëtsanga echanjabuatambá ca.” Chcasna, nda atšbe Taitábioye tbojoye-uná, y ntšamo chë Taitá tbojabuatëmbacá tojuatsjinÿe, cha atše sochanjuasto.

46 “Ndocná atšbe Taitá tbonjinÿe. Nÿe chë Bëngbe Bëtsábiocana tojabá aíñe.

47 Ndegombre šcuayana: Nda átšbeñe tojtsošbuaché, chë nyëtsca tescama yomna tšabe vida echántsebomna.

48 Atše sëndmëna entšanga chë nyëtsca tescama yomna tšabe vida chamotsebomnana tandëse.

49 Masque tšëngaftangbe bëts taitanga, entšanga ndoyenoca chë maná ca uabaina saná tmojanse, pronto tmojanóbana.

50 Pero atše sëntsoyebuambná ndayá chë celocana tojóshjango tandëšama. Nda chë tandëse tojase, ndoñe queochatóbana.

51 Atše sëntsemna entšanga chë nyëtsca tescama yomna tšabe vida jtsebomnana tandëse, chë celocana tojóshjanguëse. Nda quem tandëse tojase, nyëtsca tescama nÿe ainá echanjesomñe. Chë chanjátšataye tandëšna, cach atšbe cuerpo entsemna. Chca chanjama quem luare entšanga chë nyëtsca tescama yomna tšabe vida chamotsebomnana ca” —Jesús tojánayana.

52 Chora chë judiënga tmojanontšé enatsëtsnayana: — ¿Ntšamo cha yochjobenaye cachabe cuerpo jatšatayana bënga jasama ca?

53 As Jesús tojanëyana: —Ndegombre šcuayana: Tšëngaftanga Bëngbe Bëtsá Entšá tbojanbemabe cuerpo ndoñe šmonjase y chabe buiñe ndoñe šmonjofšese, ndegombre tšabe vida ndoñe quešmochátsbomna.

54 Nda atšbe cuerpo tojase y atšbe buiñe tojofšé, chë nyëtsca tescama yomna tšabe vida echántsebomna, y quem luare jopochócama te atše chanjama cha cháuatayenama.

55 Atšbe cuerpo ndegombre saná endmëna, y atšbe buiñe ndegombre ofšëšnaye.

56 Nda atšbe cuerpo tojase y atšbe buiñe tojofšé, átšeftaca cánÿiñe mo canÿacá echántsemna, y átšnaca cháftaca.

57 Atšbe Taitá, chë šojichmó cha, vida endbomna, y atše chábeyeca vida sëndbomna; cachcá, nda atšbe cuerpo tojase, chana átšbeyeca vida jtsebomnana.

58 Chë ndaye soyama atše sëntsoyebuambná, atšbe cuerpo y atšbe buiñe, entsemna chë celocana tojóshjango tandëse.

Masque tšëngaftangbe bëts taitanga chë maná ca uabaina tandëse tmojanse, pronto tmojanóbana; pero quem tandëse ndoñe cachcá quenátsmëna. Nda quem tandëse tojase, nÿe nÿets tempo vida echanjesóbomñe ca —Jesús tojánayana.

<sup>59</sup> Chë soyëngna Jesús tonjanabuatambá Capernaum pueblentse, chë judiëngbe enefjuana yebnentse.

*Chë nÿetsca tescama yomna tšabe vida jtsebomnana palabrënga*

<sup>60</sup> Chca tmojanuena ora, banga Jesusbe ústonënga imojtsichamo: —Ntšamo cha entsichamcá yapa totcá entsemna mo ndegombre cuaftsemncá joyeunayama. ¿Nda buanjóyeunaye ca?

<sup>61</sup> Jesús yojtsetátšëmbo chënga ndoñe tšabá imontsichámuama; as, chënga tojanatjá: —¿Ntšamo cbontsëtsëtsnacá ndoñe tšabá cmontsëuenana ca?

<sup>62</sup> Y chcasna, Bëngbe Bëtsá Entšá tbojanbemá, chë cha tempo inamna luaroye tojëtstsjuama šmojinÿese, ¿ntšamo šmattsejuabnaye?

<sup>63</sup> Bëngbe Bëtsabe Espíritu entsama entsanga chë tšabe vida chamotsebomnama. Chë cuerpo ndoñe uámana soye quenátsmëna; chë tcbonjáuyana soyënguiñe entsemna chë Uámana Espíritbe uajabuáchenana y chë tšabe vida.

<sup>64</sup> Pero masque chca entsemna, tšëngaftangbentsana banga átšbeñe ndoñe quešmatošbuaché ca —Jesús tojánayana.

Er Bëngbe Bëtsabe soyëngama entsanga jábuayenama Jesús tojanbojatšë orscana, cha inatátšëmbo ndëmuanÿenga chábeñe ndoñe mochanjanošbuáchiye, y nda chë uayayëngbe cucu-atšíñe yochjëftsayentšbashejuanana.

<sup>65</sup> Y Jesús yojtëtóntša oyebuambnayana: —Chíyeca, atše tšëngaftanga tcbonjáuyana: “nda atše juastama ainaniñe chaotsebošama atšbe Taitá ndoñe tbonjuájabuache, cha ndoñe quešochatasto ca”.

<sup>66</sup> Chë causa, chentšana, ba chabe ústonënga cachcá tmojesanonÿá, y cháftaca ya ndoñe imontsajna.

<sup>67</sup> Chora Jesús, chë bnëtsana uta uatsjëndayënga tojanëyana: —¿Y tšëngaftángnaca, jtsoñama y atše jéseboshjonama šmojtseboše ca?

<sup>68</sup> Chora Simón Pedro tbojanjuá: —Bëngbe Utabná Jesús, ¿chcasna ndábioye fchjanga ca? Nÿe aca šcontsëtsëtsná chë nÿetsca tescama yomna tšabe vida jtsebomnana palabrënga.

<sup>69</sup> Acbeñe fsëntsošbuaché, y mora fsëntsetatšëmbo aca chë Bëngbe Bëtsabe Uamaná comnama ca.

<sup>70</sup> Chora Jesús tojanëyana: —Atše tcbonjabacacá, chë bnëtsana útata; pero canÿa tšëngaftanguentsana, mo Satanasbe canÿe trabajyacá entsemna ca.

<sup>71</sup> Judas Iscariote, chë Simonbe uaquiñabiama chca Jesús tojánayana. Er chana masque canya chabe bnëtsana uta uatsjendayënguentsá inamna, Jesús uayayëngbe cucuatšifne yochjáftsayentšbashejuana.

## 7

### *Jesusbe catšátanga chábeñe ndoñe montsanošbuaché*

<sup>1</sup> Chë soyënguentsana, Jesús Galilea luarëjana yojánana. Chë tempo, judiënga imojtsanjuabnaye ntšamo jamëse cha jóbama. Chíyeca, Jesús ndoñe yontseboše Judeoye jama.

<sup>2</sup> Chora, judiëngbe canye bëts fiesta semana yojtsobeco. Quem fiestënguentscuana, chë judiënga imojanamana tambënguiñe jtsiyenana.

<sup>3</sup> As chora Jesusbe catšátanga tmojaniana: —Muentše ndoñe catjoquéda; Judeoye motsa, choca condbomna ústonënga, ntšamo contsamcá chócnaca chaminýama.

<sup>4</sup> Er nda tojtseboše chamotsábuatmama, chabe soyënga ndoñe iytëcana ntsamana. Aca bëts soyënga Bëngbe Bëtsabe obenánaca contsamësna, motsa y nyetscangbe delante chca cochjama ca —chënga tmojaniana.

<sup>5</sup> Er ni mo cach Jesusbe catšátanga chábeñe ndoñe montsanošbuaché. Chíyeca chënga chca tmojaniana.

<sup>6</sup> Chora Jesús tojanëjua: —Atšbe ora cabá ndoñe quentóshjango, pero tšëngaftangbiana mocna órnaca tšabá endëtsomñe.

<sup>7</sup> Chë nye quem luarama enójuabnaye entšanga ndoñe quemátobena tšëngaftanga jtsëbuayënjana, pero átšbioyna aíñe, er atše puerte tšabá sëntsinýanýná ntšamo chënga imojtsamcá ndoñe tšabá yontsemnama.

<sup>8</sup> Tšëngaftanga chë fiestama šmochjá. Atšbe ora cabá ndoñe quentóshjango. Chíyeca atše choye ndoñe quicháta ca —cha tojánayana.

<sup>9</sup> Jesús chë soyënga tojanëyana y cach Galileoca tojt-sanoquedañe.

### *Chë tambënguiñe jtsiyenama fiesta*

<sup>10</sup> Chabe catšátanga chë fiestoye tmojána chentšana, Jesúsna tojána, masque ndoñe entšángbeñe, sinó mo iytëcana cuenta.

<sup>11</sup> Chë fiestocna, judiënga Jesús imojtsenguaye y imojtsichamo: —¿Ndayentše chë boyabása yojtsemna ca?

<sup>12</sup> Entšángbeñe ba soyënga chabiana iytëcana imojtsichamo. Inyënga chabiana imojtsichamo: “Cha tšabia endmëna ca”; pero ínýengna: “Cha entšanga entsaíngña ca”.

13 Pero ndocná Jesusbiamá becá añémoca yontsoyebuambná, chë judiëngbe amëndayëngbiamá imojtsauatja causa.

14 Chë fiesta semana tsëntsañe yojtsó ora, Jesús Bëngbe Bëtsabe bëts yebnentse tojánamashëngo, y tojanontšë jabuátambana.

15 Chentse chë judiënga, ntšamo Jesús tojanabuatambacá tmojanuena ora, ojnánënga imojtsichamo: —Bëtscá ntjuatšjinýcá, ¿ntšamo nýetsá nantsetátšëmbo ca?

16 As Jesús tojanëjua: —Atšbe buatëmbayana ndoñe nýe átšbentšana quenatóbocana, ndayá chë šonjichmó chábertšana.

17 Nda tojtseboše jamama ntšamo chë šojichmó cha yojtsebošcá, cha echántsetatšëmbo atšbe buatëmbayana Bëngbe Bëtsábocana yóbocanama o nýe átšbentšana.

18 Nda nýe cachabe juábnaca tojtsoyebuambná, jtsebošana entšanga más bëtsá chamobemama; pero nda bëtscá tojtsama, chë tbojichmóbioye entšanga más bëtsá chamobemama, cha cocayé ntšamo ndegombre yomncá jtsóyebuambnayana, y ndocnábioye ntseíngñayana.

19 “Ndegombre, Moisés tšëngaftangbiamá ley tojëftsanaboshjona. Pero masque chca, tšëngaftanguentšá ndocná quenátama ntšamo cha tojëftsanmandacá. Y ¿ndáyeca šmojtseboše atše jóbama ca?” —Jesús tojanatjá.

20 Chora entšanga tmojanjuá: —¡Ndegombre aca bacna bayëjbe juabna contsambá! ¿Nda yojtseboše aca jóbama ca?

21 Chora Jesús tojanëyana: —Nýetsca tšëngaftanga ojnánënga atše šmontsonýá, atše canýe ochnayté canýe entšá tijashnama.

22 Pero, Moisés tcmojjanamëndá básetema base bobachtema chë más delicadentse jatëtšana, chaotsinýnama (ndoñe nýe Moisésbeyeca chca, sinó Moisesbiamá más tempsca bëts taitanga chca jamama imojanamánayeca); y tšëngaftanga canýe básetema base bobachtema chë más delicadentse jatëtšana, masque chë te canýe ochnayté totsomñëse.

23 Y mora, ntšamo Moisés tcmojjëftsanamëndacá ndoñe cachcá ntjonýayama, canýe básetema chca jatëtšana masque ochnayté; as, ¿ndáyeca atše šmojtsayaná, atše ochnayté canýe entšabe nýets cuerpo tijashnama?

24 Nýe batšá jinýëse, ínýengbiamá ndoñe matichámëngana tšabá o ndoñe tšabá tmonjama ca. Ntšamo chë soyënga ndegombre bëtsemnama natsana lempe tšabá jshëtsetatšëmbëse, šmochjayana tšabá o ndoñe tšabá tmonjama ca —Jesús tojánayana.

*Jesús tojánayana ndēmocana cha tojánabama*

<sup>25</sup> Chora báseftanga Jerusalenoca oyenënga tmojanontsé ichámuana: —¿Mua ndoñe yontsemna chë jóbama montsenguá cha ca?

<sup>26</sup> Masque ba entsangbe delante entsoyebuambná, ndocná chábioye ndocá ntjauyanana. ¿Nderado mo chë bëngbe amëndayënga imojtsejuabná cha chë Cristo, chë Uámana Uabuayaná yojtsemna ca?

<sup>27</sup> Pero bënga mondétatsëmbo ndēmocá quem boyabása yomnana; y chë cuenta, chë Cristo chaojabo ora, ndocná queochátstatsëmbo ndēmocana cha yochjabama ca —chënga imojtsichamo.

<sup>28</sup> Chca tojanuena ora, Bëngbe Bëtsabe bëts yebnentse Jesús yojtsabuátambayëntscuana, cha jabuache tojánayana: —¡Tšëngaftanga šmojtsejuabná atše ndegombre šmabuatma, y ndēmocana tijabama šmojtsetátšëmbo ca! Pero nÿe atšbe cuenta, ndoñe chiyátabo, ndayá canÿa šojichmóyeca, nda ntšamo ndegombre yomncá nÿetsca soyëngama endbétsoyebuambnaye; y tšëngaftanga cha ndoñe quešmatábuatma.

<sup>29</sup> Atšna aíñe cha sënduábuatma, er atše chábentsana sënjabo y cha quem luaroye šonjichmó ca —Jesús tojánayana.

<sup>30</sup> Jesús chca tojánayana ora, chënga tmojánbošëna cha jishachama, pero ndocná tbonjánishache, er cha chca japásama cabá ndoñe ora tonjanóshjango.

<sup>31</sup> Banga chentše Jesúsbeñe imojtsanošbuaché y tmojánayana: “Chë Uámana Uabuayaná chaojabo ora, ¿quem boyabásabiama más tšabe soyënga yochjama ca?”

*Chë fariseunga tmojánbošëna Jesús jishachama*

<sup>32</sup> Chë fariseunga tmojántatsëmbona ntšamo entsanga Jesusbiana iytëcana imojtsencuëntaye. As, chënga y chë bachnangbe amëndayënga tmojanichamó báseftanga Bëngbe Bëtsabe bëts yebnocá josticiënga, Jesús chamuishachama.

<sup>33</sup> Chora Jesús tojánayana: “Muentšana nÿe baseftayté tšëngaftangaftaca chanjëftsemna; chentšana, chë šojichmó chábioye chanjëtspadésa.

<sup>34</sup> Chora tšëngaftanga atše šmochántseguaye, pero ndoñe quešmochátinÿëna; y ndayentše chántsemnocá ndoñe quešmochatobenaye jashjanguama ca.”

<sup>35</sup> Chora chë judiënga tmojanontsé entjanayana: “¿Ndëmoye quem boyabása yochjá, y bënga ndoñe mochanjobenaye jinÿënama ca? ¿Inÿe fshantsëngoye, judiënga tmojuashanëngbioye yochjá, y choca chë ndoñe judiënga yochjabuatambá?

36 ¿Ntšamo yojtsentšáyana cha šonjauyancá, chë 'tšëngaftanga atše šmochántseguaye, pero ndoñe quešmochátinýena; y ndayentše chántsemnoca ndoñe quešmochatobenaye jashjanguama ca?' —chënga imojtsichamo.

*Béjayënga vida bomniye*

37 Chë fiesta jopochócama te yojamna chë más uámana te. Chë te, Jesús entšángbentše tojantsá y jabuache tojánayana: “¡Nda tbojtsajuendá, átšbioye chauabo y chaofšé!

38 Ntšamo Bëngbe Bëtsabe uabemana palabrenguiñe endayancá: ‘Nda átšbeñe tojtsošbuaché, cha echántsemna mo ndabe ainanentšana vida bomna béjayënga tojtsobocancá.’ Chca echántsemna átšbeñe ošbuáchiyëngbiamca —cha tojánayana.

39 Chë sóyeca, Jesús yojtseboše jayanana, chábeñe ošbuáchiyënga chë Uámana Espíritu mochjanóyëngacñe ca; er chë Uámana Espíritu cabá ndoñe tonjánabo, Jesús corente bëtsá yojamnca cabá ndoñe tmonjaninýinýe causa.

*Nýetsca entšanga ndoñe cachcá Jesusbiamca imontsejubnaye*

40 Chca tmojanuena ora, ínýenga imojtsichamo: —Quem boyabása ndegombre chë Bëngbe Bëtsabe juabna oyebuambnáyá entsemna, chë Cristbe natsana jabamá ca.

41 Inýenga imojtsichamo: —Ndegombre cha chë Cristo, chë Uámana Uabuayaná entsemna ca.

Pero ínýengna: —Ndoñe, er chë Cristo Galileocana ndoñe queochátabo.

42 Ndegombre, Bëngbe Bëtsabe uabemana palabrenguiñe endayana, chë Cristna rey Davídbentšana entšá canmëna, y Belenocana caochjabo ca, cach pueblcana ndayentšá David inamna ca —chënga imojtsichamo.

43 Y chca, ínýengna Jesusbe pavor imojtsemna, y ínýengna chabe contra.

44 Inýenga imojtseboše Jesús jishachama, pero ndocná tbonjánishache.

*Chë amëndayënga Jesúsbeñe ndoñe montsanošbuaché*

45 Chë fariseunga y bachnangbe amëndayënga imojtsemnoye chë Bëngbe Bëtsabe bëts yebnoca josticiënga tmojtanashjajna ora, tmojanatjá: —¿Ndáyeca ndoñe Jesús šmonjuánatse ca?

46 Chora chë josticiënga tmojanëjua: —Ndocná quenatoyebuambná ntšamo chë boyabása tonjoyebuambacá ca.

47 Chora chë fariseunga tmojanëyana: —¿Tšëngaftágnaca šmojalesenciá cha chacmaingñema ca?



48 ¿Nderado bēngbe amēndayēnguentšá o bēnga fariseunguentšá n̄ye mo can̄ya chábeñe tayojtsošbuaché?

49 Pero quem entšanga, ntšamo leyiñe iuayancá ndu-abuátmēnga, bacna soyēngaca sempre mochanjēftsemna ca —chēnga imojtsichamo.

50 Chora Nicodemo, can̄ya fariseunguentšá, chē Jesúseftaca jencuéntama ibeta tojána cha, tojánayana:

51 —Ntšamo bēngbe leyiñe endayancá, bēnga ndoñe quemuátobena jayanana can̄ye entšá castiganá jtsemnama ibojtsemna ca, cha cabá ntjoyeunaycá, ndayá cha tojamama jtsetatšēmbuama ca.

52 Chora chēnga Nicodemo tmojanjuá: —¿Acnaca chábeñe cojtsošbuaché y mo can̄ye Galileoca entšacá cojtsejuabná ca? Bēngbe Bētsabe uabemana palabrenguiñe cochjuatsjin̄ye, y cochanjin̄ye ni can̄ya Bēngbe Bētsabe juabna oyebuambnayá Galileocana yochjabo ca.

### *Chē shema boyábioye ín̄yáftaca ingñayá*

53 Fariseunga y bachnangbe amēndayēnga chē josticiēngbioye tmojanēcácanentšana, cada ona cachabe yebnoye imojtsatónēnga.

## 8

1 Pero Jesusna can̄ye tjoye, Olivos ca uabáinoye tojtsanoñe.

2 Y chē yēfsana cachēse, Jesús cachiñe Bēngbe Bētsabe bēts yebnoye tojesaná. N̄yetsca entšanga tmojanobeconá jouenama, y Jesús tojanótbema y tojanontšé jabuátambama.

3 Chorna, báseftanga ley abuátambayēnga y fariseunga tmonjānashjajna, y can̄ye shembása tmojanēshjango. Chana tmojanin̄yena chabe boyábioye ín̄yáftaca ibnetsoingñañēntscuana; n̄yetscangbe tsēntsaca tmojanatsá,

4 y Jesús tmojanianyana: —Buatēmbayá, quemuá fsēnjín̄yena chabe boyábioye ín̄yáftaca bondētsoingñañēntscuana.

5 Leyiñe Moisés šonjanamēndá mēntšá uamana shembásengna ndētšbéngaca jtsēbáyama. ¿Aca ntšamo catjayana ca?

6 Jesús chca tmojanianyana ana jisháchichiyama, chca chēnga jtsebomnama ndáyeca chabe contra jayanana. Pero Jesús n̄ye fshantsoye yojotsejbéna y yojóntša ntšabuáfjaca fshantsiñe juabemama.

7 Chēnga n̄ye imojtsetjanaye causa, Jesús tojantsbaná y tojanēyana: —Nda tšēngaftanguentšá tondaye bacna soyēnga tondbomná, chaobojatšē ndētšbeca jatēchēnjama ca.

8 Chentšana Jesús cachiñe fshantsoye yojtotsejbéna, y yojtētóntša fshantsiñe jtētabemama.

<sup>9</sup> Chca tmojanuena ora, entšanga tmojanontsé canýänÿa chentšana jésebocanana; natsana chë más bëtsanánënga y chë ínÿengna ústonoye. Canÿa Jesús tonjanoquedá y chë shembásanaca.

<sup>10</sup> As, Jesús tojtantsá y tbojantjá: —¿Shembása, ndayentše chë acbe contra ichámënga imojtsemna? ¿Ndocná acbiama tonjayana castigáná chacotsemna ca?

<sup>11</sup> Ndoñe, Taita, ndocná ca —chë shembása tbojanjuá.

Chora Jesús tbojaniana: —Atše cach ndoñe acbiama quichátayana castigáná chacotsemna ca. Morna, motsatoñe, pero ndoñe más bacna soye cattsama ca.

*Jesús yomna quem luarentša entsangbe juabna binÿnayá*

<sup>12</sup> Jesús cachiñe Bëngbe Bëtsabe bëts yebnentše yojtsabuátambaye, y entšanga mëntšá tojanëyana: —Atše sëndbínÿna quem luare entsangbe juabnënga. Nda atše chašojsëstona, cha echantsiyena atše chë binÿnayáftaca; y ndoñe mo ibetiñcá queochátaye, y chca, tšabe vida echántsebomna ca.

<sup>13</sup> Chora chë fariseunga Jesús tmojaniana: —Aca nÿe cach acbiama chca contsoyebuambná; chcana, chë ntšamo consichamcá tondaye quenatámana ca.

<sup>14</sup> As chora Jesús tojanëjua: —Ntšamo cach atšbiana sentsichamcá aiñe entsámána, masque nÿe atše stsichamo ntšamo atšbiana ndegombre yomncá. Er atše sëndëtatšëmbo ndëmocana tijabo y ndëmoye tstsá. Pero tšëngaftanga ndoñe chca quešmátstatšëmbo.

<sup>15</sup> Tšëngaftanga šmondbétsichamo ínÿengbiana tšabá o ndoñe tšabá tmontsamama, chca, nÿe ntšamo entšanga mondbetsejuabnaycá. Pero atšna ndocnabiama chca quetsátichamo.

<sup>16</sup> Atše ndoñe nÿe canÿa quetsátsmëna ínÿabiana jayanama tšabá o ndoñe tšabá tontsamama; ndayá atšbe Taitá, chë šonjichmó cha, átšeftaca chca jayanana. Chíyeca, atše ínÿabiana tšabá o ndoñe tšabá tonjama ca stsichamo ora, ntšamo stsichamcá ndegombre jtsemnana.

<sup>17</sup> Tšëngaftangbe leyiñe enduábemana, uta entšata ndayámnaca cachcá tbojayanëse, ntšamo chata tbojayancá puerte jtsámanana ca.

<sup>18</sup> Y morna, atše sentsichamo chë ntšamo cach atšbiana ndegombre yomncá, y atšbe Taitá, chë šonjichmó chánaca entsichamo ntšamo atšbiana ndegombre yomncá ca —Jesús tojánayana.

<sup>19</sup> Chora chënga tmojantjá: —¿Ndayentše acbe Taitá yojtsemna ca?

Y Jesús tojanějua: —Tšëngaftanga ndoñe quešmatábuatma ni atše ni atšbe Taitá. Atše šmojtsábuatmësna, atšbe Taitánaca šmattsábuatma ca.

<sup>20</sup> Bëngbe Bëtsabe bëts yebnoca, chë crocénana jacjayama luarentše yojtsabuátambaye ora, Jesús chca tojánayana. Pero masque cha chentše yojtsemna, ndocná tbonjánishache, er chca japásama cabá ndoñe ora tonjanóshjango.

*“Chë chanjá luaroye, tšëngaftanga ndoñe quešmátobena jama”*

<sup>21</sup> Chora Jesús yojtëtóntša oyebuambnayana: —Atše chantá, y chora tšëngaftanga atše šmochántseguaye. Masque chca, šmochanjóbana tšëngaftangbe bacna soyëngama ndëperdonánënga. Chë chanjá luaroye, tšëngaftanga ndoñe quešmátobena jama ca —Jesús tojánayana.

<sup>22</sup> Chora chë judiënga tmojanontšé enatsëtsnayana: —¿Morderado yojtsejuabná jtsenóitanama, y chíyeca yojtsichamo chë cha yochjá luaroye bënga ndoñe montsobena jama ca?

<sup>23</sup> Chora Jesús tojanějyana: —Tšëngaftanga quem luaroquënga šmondmëna; atšna tsbananocá, celocá sëndmëna. Tšëngaftanga nÿe quem luarama enójuabnayënga šmondmëna, pero atše ndoñe.

<sup>24</sup> Chíyeca atše chca tbonjáuyana, chë “tšëngaftangbe bacna soyëngama ndëperdonánënga šmochanjóbana ca”. Er, nda atše ndegombre bétsemnama ndoñe chašmontsošbuachese, tšëngaftangbe bacna soyëngama ndëperdonánënga šmochanjóbana ca.

<sup>25</sup> Chora chënga tmojantjá: —¿As aca ndase cmëna ca?

Y Jesús tojanějyana: —Entšanga jabuátambama sënjanbojatšé orscana chama tbonjáuyana.

<sup>26</sup> Atše ba soyënga sëntsebmoma tšëngaftangbiama jayanama, tšëngaftangbe contra jayanama; pero chë šonjichmó cha nÿetsca soyëngama ndegombre endbëtsichamo, y atšna ntšamo chábensana tijouencá, cachcá quem luare oyenënga sentsëtsëtsná ca —cha tojanějyana.

<sup>27</sup> Pero chënga ndoñe tonjanësertá Jesús cachabe Taitabiama chca tojanějyana.

<sup>28</sup> As Jesús tojanějyana: —Bëngbe Bëtsá Entšá tbojanbemá chašmojatsbaná ora, šmochántsetatšëmbo nda sëndmëná atše bétsemnama. Cachcá, tšëngaftanga šmochántsetatšëmbo, nÿe cach atšbe juábnaca atše tondaye jamama sëndobenama. Nÿe ndayá atšbe Taitá šojabuatëmbacá atše sëndoyebuambná.

<sup>29</sup> Y chë šonjichmó cha ndoñe nÿe canÿa quešnátsboshjuana. Chca endmëna, er atše sempre sëndbëtsama ntšamo cha oyejuayá jabemama tojtsemncá ca —Jesús tojánayana.

<sup>30</sup> Jesús chca tojánayana ora, banga chábeñe imojtsanošbuaché.

*Bëngbe Bëtsabe básenga y chë nÿe bacna soye jtsamama vida bomnënga*

31 Chora Jesús, chë chábeñe imojtsošbuaché judiënga tojanëyana: —Ntšamo cbontsëtsëtsnacá tšëngaftanga sempre šmojtsamëse, ndegombre atšbe uatsjëndayënga šmochántsemna.

32 Ntšamo ndegombre yomncá šmochántsetatšëmbo; y ntšamo ndegombre yomncá jtsetatšëmbëse, atsebácanënga šmochántsemna ca.

33 Chora chënga tmojanjuá: —Bëngna Abrahámbentšana entsanga fsëndmëna, y ndocná ndocna te chešnáisishëche nÿe chabiana nÿets tempo jtsošservénama. As, ¿ndáyeca šcojtsëtsëtsná bënga atsebácanënga fchtsemna ca?

34 Chora Jesús tojanëyana: —Ndegombre šcuayana: Nda bacna soyënga tojtsama, cha nÿe bacna soyënga jamama juabnëngaca mandaná jëftsemnana.

35 Canÿe oservená ndoñe nÿets tempo chë pamillentsá ntjëftsemnana, ntšamo canÿe uaquiñá sempre chë pamillentsá jesomñancá.

36 Y chca, Bëngbe Bëtsabe Uaquiñá chacmojátsebacase, tšëngaftanga ndegombre atsebácanënga šmochántsemna bacna soyënga juabnënguentsana.

37 Atše sëndëtatšëmbo tšëngaftangna Abrahámbentšana entsanga šmomnana; pero tšëngaftanga šmontseboše atše jóbama, ntšamo atše cbontsëtsëtsnacá ainaniñe jýëngacñama ndoñe quešmátsboše causa.

38 Ntšamo atšbe Taitábioca tijinÿcá, cach soyëngama atše sëntsoyebuambná. Tšëngaftangnaca, cachcá ntšamo tšëngaftangbe taitábentšana šmojouencá šmontsama ca —tojanëyana.

39 Chora chënga tmojanjuá: —Bëngbe uámana bëts taitá, Abraham endmëna ca.

As Jesús tojanëyana: —Tšëngaftanga Abrahambe básenga ca jtsabáinama merecido šmojtsebuajónëse, chë ntšamo Abraham tojëftsema y cachcá tšëngaftanga šmattsama.

40 Atšna ntšamo ndegombre yomncá sëndoyebuambná, ntšamo Bëngbe Bëtsábentšana tsouenancá. Pero mora tšëngaftanga šmontseboše atše jóbama; Abraham ndocna te chca chenaisobuachjanguá.

41 Tšëngaftangna, ntšamo tšëngaftangbe taitá tojëftsemcá y cachcá jtsamana ca —Jesús tojánayana.

Chora chënga tmojanijana: —Bënga nÿe enaquëcana básenga ndoñe queftsátsmëna. Chë nÿe canÿe taitá fsëndbomná, Bëngbe Bëtsá endmëna ca.

42 Chora Jesús tojanëyana: —Bëngbe Bëtsá ndegombre tšëngaftangbe taitá tojtsemnëse, tšëngaftangna atše

šmattsebobonshana. Er atšna, Bëngbe Bëtsábiocana sënjabo y muentše sëntsemna. Nýe atšbe ponto ndoñe chiyátabo; Bëngbe Bëtsá šonjichmó.

43 ¿Ndáyeca tšëngaftanga ndoñe šmontsobena atšbe palabrénga josértana? Co, ntšamo cbontsëtsëtsnacá joyeunayama ndoñe quešmátsboše causa chca.

44 Tšëngaftangbe taitá Satanás endmëna. Tšëngaftangna chabe entsanga šmondmëna; chíyeca, tšëngaftanga šmontseboše jamama cachcá ntšamo cha tojtsebošcá. Quem luare jobojátšama orscana, Satanás entsá obanayá endmëna. Satanasbe juabnoqa, ndocna tšabe soyënga ni ndegombre soyënga ntsebínýnana. Chíyeca, ndocna te cha ntšamo ndegombre yomncá ntsamana. Cha canýe bostero endmëna, y chá bentšana nýetsca bostero soyënga jtsóbocanana. Chíyeca, cha tojtsebostero ora, nýe ntšamo cachá yomnama jtsichámuana.

45 Atšna sempre ntšamo ndegombre yomncá cbondutsëtsná; chíyeca, chë sëntsichamo soyiñe tšëngaftanga ndoñe quešmatošbuaché.

46 ¿Nda tšëngaftanguentsá nanjobenaye jinýanýiyana atše ndaye bacna soye tijamama? Y atše, nýe ntšamo ndegombre yomncá stsichámëse, ¿ndáyeca chë tijayaniñe ndoñe šmontsošbuaché?

47 Nda Bëngbe Bëtsabe entsá tomna, ntšamo Bëngbe Bëtsá tojtsichamcá jtsuenanana. Pero tšëngaftangna ndoñe Bëngbe Bëtsabe entsanga quešmátsmëna. Chíyeca, ntšamo Bëngbe Bëtsá entsichamcá ndoñe quešmátsboše jouenama ca —Jesús tojanéyana.

### *Cristo Abrahambiana más natsana ya yojtsemna*

48 Chora chë judiënga tmojanियana: —Ajá, bënga co ndegombre fstsichamo, aca nýe samaritano y bacna bayëjbe juabna uambayá comna ca fstsichamo ora ca.

49 Y Jesús tojanéjua: —Atše ni mo canýe bayëjbe juabna quetsatambá. Ntšamo atše sëntsamcá, endmëna jinýanýiyama atšbe Taitá Bëngbe Bëtsá uamaná yomnama; pero tšëngaftangna, atše chca tsmënama ndoñe quešmatinýinýná.

50 Atše ndoñe quetsátsboše ínýenga atše más uamaná chašmobemama. Pero ínýa endmëna; cha aiñe endboše atše bëtsá bëtsemnama chaminýanýema. Y chánaca endmëna chë ínýengbiana tšabá o ndoñe tšabá tmontsamama endbet-sichamuá.

51 Ndegombre šcuayana, nda ntšamo atše sëntsichamcá tojouena y chca tojama, ndocna te queochatóbana ca —Jesús tojanayana.

52 Chora chë judiënga tmojanियana: —Mora cocayé fsëntsetatsëmbo aca ndegombre bacna bayëjbe juabna uambayá comnama. Abraham tojanóbana, y cachcá, nyetscanga Bëngbe Bëtsabe juabna oyebuambnayëngnaca. ¿Y mora aca cochjätichamo, “Nda ntšamo atše sëntsichamcá tojouena y chca tojama, cha ndocna te queochatóbana ca”?

53 ¿O aca, bëngbe bëts taitá Abrahambiana más bëtsá comna? Cha tojanóbana, y Bëngbe Bëtsabe juabna oyebuambnayëngnaca. ¿Ndase cojätsmëna ca aca cojatsjuabná ca? — chënga imojtsichamo.

54 Chora Jesús tojanëjua: —Atše nye cach atše más bëtsá stsenobiamnasna, chë soye tondaye nantsámama. Pero chë más bëtsá šojtsebiamná cha, atšbe Taitá endmëna, cach ndabiana tsëngaftanga šmondbétsichamo tsëngaftangbe Bëtsá canmëna ca.

55 Pero tsëngaftanga cha ndoñe quešmatábuatma; atše aiñe. Y atše, “cha ndoñe quetsatabuatma ca” stsichámëse, átšnaca cach tsëngaftangcá canye bostero stsemna. Pero ndegombre atše cha sënduábuatma, y ntšamo cha tojtsichamcá, atše sëndouenana y cachcá sëndbëtsama.

56 Tsëngaftangbe uámama bëts taitá Abraham, chë atše jabama te jinýama yojtsejuabnaye ora, puerte oyejuayá yojtsemna. Y pronto tojëftsandinýe, y puerte tojanoyejuá ca —Jesús tojánayana.

57 Chora chë judiënga tmojanियana: —Aca cabá ndoñe shachna bnëtsana uata quecátsbomna; y as, ¿ntšamo cochjätichamo, Abraham tcojëftsinye ca?

58 Chora Jesús tojanëjua: —Ndegombre cbëyana, Abraham cabá ndoñe ainá quenjatsmëna ora, atše ya sënjetsemna ca.

59 Jesús chca tojanëjua ora, chënga ndëtsbenga tmojanájaca cha jtsatëchënganjama. Pero Jesusna oitanánana, Bëngbe Bëtsabe bëts yebnentšana tojésanbocna.

## 9

*Jesús tojanma, canye boyabása jtaná onýnaná chabuabínýnama*

1 Canye luarëjana yojtsachnëjuana ora, Jesús canye boyabásabioye tbojáninye. Chë boyabásana jtaná inónýna.

2 Chë uatsjëndayënga Jesús tmojantjá: —Buatëmbayá, ¿ndáyeca quem boyabása jtaná inónýna? ¿Camuá bacna soyënga tojamama, o chabe bëtsëtsangbe bacna soyënga causa ca?

3 Chora Jesús tojanëjua: —Ni cachabe bacna soyëngama, y ni chabe bëtsëtsangbe bacna soyënga causa. Chca endmëna ndayá entsanga jinýanýiyama ntšamo Bëngbe Bëtsá yobencá.

4 Cabá yojtsësháchena ora, šontsamna jamana ntšamo chë šonjichmó cha yojtsebošcá. Ndoñe usháchena tempo echanjóshjango; chora ndocná tondaye jamama queochatobeyane.

5 Quem luariñe chjëftsemnëntscuana, atše quem luare entsangbe juabñenga binñayá chanjëftsemna ca – tojanéyana.

6 Chca tojánayanentsana, Jesús fshantsiñe tojanbuashëtjo, y chë yebuáyeca batšá ngüiche tojábema, y chë jtaná chë ngüicheca tbojanbucharëtjo.

7 Chora chë jtaná tbojaniyana: –Motsa y metsobúchjabebiyé, chë binche uafjájónaye entsangbe pormániñe, Siloé ca uabáiniyoca ca. (Siloé, judiëngbe biyañe endayana “Ichmoná ca”).

Y chë jtaná tojána; choca yojetsobúchjabebiyé, y yebnoye tojtaná ora, ya ibojtsabinñya.

8 Chë juachañe oyenënga y chë jtaná tempo lemošna otjanañana tmojáninñyënga, imojtsentjanaye: –¿Mua ndoñe yondmëna chë enjanamana jótbemana lemošna jótjañama ca?

9 Inñyënga imojtsichamo: –Cha entsemna ca.

Y inñyënga: –Cha ndoñe quenátsmëna, pero chacá entsábona ca.

Y cach shnaná yojtsichamo: –Atše cha sëndmëna ca.

10 As chë entsánga tmojantjá: –¿Ntšamo chca mora cmojtsabinñya ca?

11 Y cha tojanějua: –Chë boyabása, Jesús ca uabainá, ngüiche yebuáyeca tonjábema, šonjabucharëtjo y šonjauyana: “Motsa y Siloé uafjájónayiñe metsobúchjabebiyé ca”. Chcasna, atše sënjá, sënjetsobúchjabebiyé y cachora šontsabinñya ca.

12 Chora chënga tmojantjá: –¿Ndayentše cha yojtsemna ca?

Y chana: –Atše ndoñe quetsátstatšëmbo ca –tojanějua.

### *Chë jtana shnanábioye fariseunga imojtsetjanaye*

13 Chora chë entsánga, chë jtaná inamnă fariseúngbioye tmojanánatse.

14 Chë Jesús batšá yebuáyeca ngüiche tojábema, y chë jtaná tojanma te, canñe ochnayté inamna.

15 As chë fariseunga chë boyabása tmojantjá: –¿Ntšámoyeca mora cmojtsabinñya ca?

Chora cha tojanějua: –Cha ngüiche yebuáyeca tonjábema y šonjabucharëtjo. Sënjetsobúchjabebiyé, y cachora šonjuabinñya ca.

16 As chora básefta fariseunga imojtsichamo: –Chë jtaná chabotsabinñyama tojamá ndoñe tonjochná, y ochnayté tojatrabajá. Chíyeca cha Bëngbe Bëtsabe entsá ndoñe quenátsmëna ca.

Ínyenga imojtsichamo: —Cha canye bacna soyenga amá tojtsemnëse, ¿ntšamo nantsobena canye bëts soye Bëngbe Bëtsabe obenánaca jamama ca?

Y chca, ínyenga Jesusbe pavor imojtsemna, y ínyengna chabe contra.

17 Chama chënga cachiñe chë jtaná inamná tmojtëtantjá: —Er aca mora chacmotsabinýnama cha tojamëse, ¿chabiamana ntšamo catjayana ca?

Chora cha tojanëjua: —Chana canya Bëngbe Bëtsabe juabna oyebuambnayá entsemna ca.

18 Pero chë judiënga ndoñe montsanošbuaché, cha chë jtaná inamnana y chora ibojtsabinýnama. As chënga, ínyenga tmojanichamó chë boyabásabe bëtsëtsata jobiatšama.

19 Chë bëtsëtsata tbojánashjango ora, chë judiënga tmojanatjá: —¿Quem boyabása tsëndatbe uaquiñá yomna ca? ¿Ndegombre tašojtsichamo cha jtaná inonýnama? Chcase, ¿ntšamo mora cha ibojtsabinýna ca?

20 Chora chë bëtsëtsata tmojanëjua: —Aíñe fsëndëtatšëmbo cha bëndatbe uaquiñá endmënana y jtaná tonjanonýnama.

21 Pero ndoñe queftsátstatsëmbo ntšámoyeca mora chca ibojtsabinýnama, ni bëndatbe uaquiñá chabotsabinýnama nda tojamama cach ndoñe. Cachá motjanga. Ya bëtsá entsemna, y cachá entsobena tšëngaftanga razón jatšatayama ca —chata tbojánayana.

22 Tempo, chë judiënga imojenóyeunaye, chëngbe enefjuana yebnënguentsana jtëbuacanana chë Jesús ndegombre chë Uámana Uabuayaná, chë Cristo yojamna ca tmojayanënga. Chë bëtsëtsatna chama ibojtsauatja;

23 chíyeca tmojanëyana: “Cha ya bëtsá entsemna. Cachá motjanga ca”.

24 As cachiñe chë judiënga chë jtaná inamná tmojanchembo y tmojaniana: —Bëngbe Bëtsabe delante cach acbiamana ndegombre mobuambá. Bënga fsëndëtatšëmbo chë boyabása canye bacna soyenga amá yomnama ca.

25 Chora cha tojanëjua: —Cha canye bacna soyenga amá o ndoñe tondmënana, atše ndoñe quetsátstatsëmbo. Atše nýe mëntšá sëntsetatšëmbo: Atše jtaná sënjanmëna, pero mora šontsabinýna ca.

26 Chora chënga cachiñe tmojatantjá: —¿Ntšamo tcmënjama? ¿Ntšamo cha tënjama chacmotsabinýnama ca?

27 Y cha tojanëjua: —Ya tcbonjáuyana y ndoñe chešmatoyeuná. ¿Ndáyeca cachiñe šmojtseboše jatuenama? ¿Tšëngaftángnaca šmojtseboše chabe ústonënga jtsemnama ca?



28 Chora chënga cha tmojtsanóyenguango y tmojaniyana: —Acna canye chabe ustoná cojtsemna, pero bënga ndoñe; bëngna Moisesbe ústonënga fsëndmëna.

29 Bënga fsëndëtatšëmbo, Bëngbe Bëtsá Moisésbioye tbojanatsëtsama, pero chë boyabásabiama ndoñe queftsátstasčëmbo ni mo ndëmocana cha tojabama ca —chënga imojtsichamo.

30 Chora chë boyabása tojanëjua: —¡Ntšamo chca nántsemnal! Tšëngaftanga ndoñe šmontsetátšëmbo ndëmocana cha tojabama; pero chašuabinýnama cha tonjama.

31 Bënga tšabá mondëtatšëmbo, bacna soyënga amënga Bëngbe Bëtsá ndoñe queondbátayaunanama. Chana, nýe chábioye adorayá y ntšamo cha tojtseboščá amábioye joyeunayana.

32 Quem luare jobojátšama orscana ndocna te quenaisótatšëmbo canye jtaná onýnanabiama ndánaca cha chabotsabinýnama tojëftsemama.

33 Quem boyabása, Bëngbe Bëtsabe ichmoná chabe soyënga jamama ndoñe tontsemnëse, tondaye nantsobena jamama ca —chë entšá tojánayana.

34 As chë fariseunga tmojaniyana: —¡Ndayá! Aca tcojanonýná orscana, corente bacna soyënga amá tcomnëse, ¿ntšamo mora bënga šcochjátatuatambaye ca?

Y chora chë judiëngbe enefjuana yebnentsana cha tmojtanábocna.

*Chë Bëngbe Bëtsabe soyëngama mo jtanëngcá imomnënga*

35 Chë jtaná tmojtanábocnama Jesús tojanuena ora, tojána cha janguanguama. Tbojáninýena ora tbojaniyana: —¿Aca Bëngbe Bëtsá Entšá tbojanbemábeñe quecojtsošbuaché ca?

36 Y cha tbojanjuá: —¿Taita, nda cha yojtsemna, as atše chábeñe jtsošbuáchiyama ca?

37 As Jesús tbojaniyana: —Aca ya tconjinýe; chë ácaftaca entsoyebuambná cha entsemna ca.

38 Chora, chë boyabása Jesús bentše tojanoshamentšë jëtschuayama y tbojaniyana: —Atšbe Utabná, aínë sëntsošbuaché ca.

39 Chora Jesús chë entšanga tojanëyana: —Atše quem luaroye tijabo ndayá entšanga jinýanýiyama ntšamo cachënga Bëngbe Bëtsabe soyëngama imojuabnama. Chë Bëngbe Bëtsabe soyëngama ndosertánënga, chë soyënga atše chanjínýanýiye ora, mo jtanëna shnanëngcá mochántsemna; y chë Bëngbe Bëtsabe soyëngama corente imotátšëmbo ca juabnayënga chanjínýanýiye, nýe batsá Bëngbe Bëtsabe soyëngama imotatšëmbuama. Y chca, chënga, masna mo jtanëngcá mochántsemna y ndoñe mo chë jinýama obenëngcá.

40 Básefta fariseunga Jesúseftaca imojtsemnënga chca tmojanuena ora, cha tmojanियana: —Ndegombre bënga ndoñe mo jtanëngcá queftsátsmëna ca.

41 Chora Jesús tojanëjua: —Tšëngaftanga Bëngbe Bëtsabe soyëngama ndëtatšëmbënga šmojtsemna ca, y ndegombre chë soyëngama ndoñe cmontsësertana ca šmojobuambase, ndayá šmojtsamcá Bëngbe Bëtsá mo bacna soyënga cuenta ndoñe queochátönyaye. Pero tšëngaftanga corente Bëngbe Bëtsabe soyëngama cmojtsësertana ca šmojtsichámësna, Bëngbe Bëtsá ndoñe queochatobenaye tšëngaftangbe bacna soyëngama jáperdonana ca —Jesús tojanëyana.

## 10

### *Chë oveshënga abujënyä y chabe oveshënga*

1 As Jesús tojanëyana: “Ndegombre šcuayana: Nda chë oveshëngbe luaroye bëšáshajana ndoñe tonjámashëngo, pero aíñe inyajana tojtsamáshëngo, chana canye atbëbaná y abacayá jtsemnana.

2 Pero chë bëšáshajana tojamashënguana, chë oveshënga anyená jtsemnana.

3 Chë bëšásha ebtafjuaná, chë bëšásha jebëtafjuana, y chë oveshënga abujënyä ntšamo cada ona tmabaincá chë oveshënga jáchembuana. Y chë oveshënga jtsetatšëmbuana chëngbe abujënyä yojtsachembuanama; y chë luarentšana cha jubuacnana.

4 Njetsca oveshënga tmojábocana ora, chë abujënyä chënga jtsebënantsanana, y chë oveshënga jtsëstonana, er chabe oye-buambnayana chënga joyátëmbana.

5 Pero chë tmonduabuatmábioyna chë oveshënga ndoñe ntjuastana; nye chábentšana jtsachetëngana, chë oveshënga chabe oye-buambnayana ndoñe ntjoyátëmbana causa ca” — Jesús tojánayana.

6 Jesús entšanga chca tonjanacuntá, pero chënga ndoñe ntjosértana ntšamo yojtsentšayancá.

### *Jesús, chë oveshënga tsabe abujënyä*

7 As Jesús cachiñe tojanëyana: “Ndegombre cbëyana: Atše sëndmëna chë bëšásha oveshënga mondbëtsamashjuanëjana.

8 Njetscanga chë atšbe natsana tmojánabënga, atbëbanënga y abacayënga imnamna, pero chë oveshënga ndoñe chëngbioye ntjóyaunayana.

9 Atše chë bëšásha sëndmëna. Nda quem bëšáshajana tojamashënguá, atsbocaná echántsemna. Canye oveshá jamashënguana y jabocnana, y shácuana jónyënanana. Cachcá, chë quemëjana tojamashënguá, lempo echanjónyëna.

10 “Chë atbëbaná jabana nÿe jatbëbama, jóbama y lempe jtse-pochócama; pero atšna, entšanga vida chamotsebomnama y átšeftaca bëtscá tšabe vida chamotsebomnama tijabo.

11 “Atše sëndmëna chë oveshënga tšabe abujänÿa. Chë oveshënga tšabe abujänÿa sempre jtseprontánana chëngbiana jóbana, chabe oveshënga ababuánÿeshanayeca.

12 Pero nda nÿe crocenánama totrabája y chë oveshënga ndoñe chábenga tmontsemna, cha nderado tojinÿe canÿe tjañe queše chë oveshëngbioye tojtšobécocnama, cachora nÿe cachcá jesënyayana y jtsachana. Chë tjañe queše oveshënga jtsacamiyana, y chë oveshëngna nÿe cátoye jtsachetana.

13 Cha jtsemnana nÿe crocenánama trabajayá; chabiama nÿe chë uacanánana más uámana soye jtsemnana, y chë oveshëngbiana tondayana ntsentšamnana; chíyeca cha jtsachana.

14 “Atše sëndmëna chë oveshënga tšabe abujänÿa. Atše chënga sëndëubuatma, y chëngnaca atše šmonduábuatma.

15 Cachcá, chë Taitá Bëngbe Bëtscá atše šonduábuatma y atše chábioye. Atše sempre sëndétseprontana jóbana, atšbe oveshënga sëndababuanÿeshánayeca.

16 Atše inÿe oveshënga sëndábamna, pero chënga ndoñe quem luariñe oveshënga quemátsmëna. Atše šontsemna chëngnaca moye junatsana. Chëngnaca atšbe oyebuambnayana mochanjouena, y muentša oveshëngaftaca cánÿiñe mochántsemna, y atšna nÿetsca chë oveshëngbiana chë abujänÿa chántsemna.

17 “Atše sempre sëndétseprontana jóbana, chora jtayenama. Chíyeca chë Taitá šondbobonshana.

18 Ndocná atšbe vida quešochatsbojuána, pero chënga sëndababuanÿeshánayeca sempre sëndétseprontana jóbana, cach atše chca sëndbošeyeca. Derecho sëndétsóbomñe chëngbiana jóbana, y chora jtayenama. Chca endmëna ntšamo atšbe Taitá šonjamandacá ca” —Jesús tojánayana.

19 Chë soyënga chë judiënga tmojanuena ora, cachiñe banga Jesusbe contra y inÿengna Jesusbe pavor imojtsemna.

20 Banga imojtsichamo: —Chana bacna bayëjbe juabna uambayá y corente juicio ndbomná entsemna. Y as ¿ndáyeca cha mochjátsyeunana ca?

21 Pero inÿengna imojtsanichamo: —Ndocna bacna bayëjbe juabna uambayá ntsobenana chca jóyebuambayama. ¿Canÿe bayëja nantsobena jamama canÿe jtaná chabotsabinÿanama ca?

*Chë judiënga ndoñe imontsošbuáchiye Jesús Bëngbe Bëtscabe Uaquiñá bëtsemnama*

22 Canÿe uaftena tempo inamna, y Jerusalenentſe canÿe fiesta imojtsebomna. Chë fiesta inamna cada uata, Bëngbe Bëtsabe bëts yebna tempo cachiñe tmojtanjebuama entſanga jtenójuaboyama.

23 Jesús Bëngbe Bëtsabe bëts yebnoca yojétsana, canÿe amashjuana otsbojebniñe, Salomonbe Amashjuana ca uabáinentſe.

24 Chora, chë judiënga tmojanóbobuashcona, y tmojantjá: —¿Buetaytentscuana bënga fchjëftsemna acbiama ndegombre soye ntsetatſëmbcá? Aca chë Cristo cojtsemnëse, chama lempe tſabá ſmanÿanÿé ca.

25 As Jesús tojanëjua: —Ya tcbonjáuyana y tſëngaftanga átſbeñe ndoñe ntsoſbuáchiyana. Chë atſe sëndama soyënga, atſbe Taitá Bëngbe Bëtsabe obenánaca, cmontsinÿanÿná nda atſe bëtsemnana.

26 Pero tſëngaftanga átſbeñe ndoñe queſmatoſbuaché, er tſëngaftanga atſe ndoñe queſmatëstona, ntſamo chë oveshënga chë tſabe abuajënÿa mondbetsëstoncá.

27 Chë atſe ſmondústonënga, atſe ſmondbóyeunaye y ſmondbëuasto. Atſe chënga sëndëubuatma.

28 Atſe chanjama, quem entſanga chë nÿetsca tescama yomna tſabe vida chamotsebomnama; chënga ndocna te pochocánënga quemochásmëna, y ndocná quenátobena átſbentſana chënga jefcana.

29 Atſbe Taitá Bëngbe Bëtsá, chë entſanga atſe chaſmuastama tojamá, nÿetscangbiama más bëtsá endmëna, chíyeca ndocná quenátobena chábentſana chënga jefcana.

30 Chë Taitá y atſe canÿa fsëndmëna ca —Jesús tojánayana.

31 Chora, chë judiënga cachiñe ndëtsbënga tmojanájaca Jesús jtsatëchënganjama.

32 Pero Jesús tojanëyana: —Atſe tſëngaftangbeñe, ba bëts soyënga sënjama atſbe Taitá Bëngbe Bëtsabe obenánaca. ¿Ndëmua chentſa soyama atſe ſmochtsatëchënganja ca?

33 Chora chë judiënga tmojanjúá: —Ni canÿe quem bëts soyëngama bënga queftsátſboſe aca jtsatëchënganjama. Aca Bëngbe Bëtsabiama ndoñe tſabá quecátichamo; mo chábioye cuafjoyenguangcá entsemna. Aca nÿe canÿe entſá condmëna, pero acna contſichamo cach aca Bëngbe Bëtsá comna ca; chíyeca bënga fsëntſeboſe ndëtsbéngaca aca jtsatëchënganjama ca —chënga tmojanianyana.

34 Chora Jesús tojanëyana: —Bëngbe Bëtsabe uabemana palabrënguñe mëntſá endayana: “Atſe sënjayana tſëngaftanga diosënga ſmomna ca.”

35 Bëngbe Bëtsá chca tojánayana chë chabe palábraca y cha chamotseservénama tojánamandangbiama; ndocná

quenátobena jinÿanÿiyana ni mo canÿe soye Bëngbe Bëtsabe uabemana palabrenguiñe, ndoñe ndegombre soye yomnama.

<sup>36</sup> Y atšbiamá, Bëngbe Bëtsabiacá uabuayaná y quem luare ichmoná, ĩntšamo tšëngaftanga šmojtsobena jayanama, “aca Bëngbe Bëtsabiamá ndoñe tšabá quecátichamo ca”, chë Bëngbe Bëtsabe Uaquiñá sëndmëna ca atše tijayanama?

<sup>37</sup> Ntšamo atšbe Taitá endamcá atše ndoñe sëntsamëse, tšëngaftanga átšbeñe ndoñe šmattsošbuáchiye.

<sup>38</sup> Pero, ntšamo atšbe Taitá endamcá atše aiñe stsamëse, masque ndoñe átšbeñe šmونتsošbuaché, nÿe chë Taitabe obenánaca soyënga tijamama šmochtsošbuáchiye. As, canÿe ora chašmotsetátšëmbo y chacmësertá, chë Taitá átšbeñe yomnama y atše chábeñe tsmënama ca —Jesús tojanëyana.

<sup>39</sup> Chora chënga cachiñe tmojánbošena Jesús jishachama, pero cha chëngbentsana tojanotsbocá.

<sup>40</sup> Chentšana, Jesús Jordán béjaye chenguana tojesaná y choca tojtsanoquedañe. Chentše Juan tempo entšanga yojanëbáyana.

<sup>41</sup> Ba entšanga tmojána Jesús jinÿama, y mëntšá imojtsichamo: “Ndegombre, masque Juan ni mo canÿe bëts soye Bëngbe Bëtsabe obenánaca tonjëftsema, lempe ntšamo quem boyabásabiamá tonjanoyebuambacá, ndegombre yojamna ca.”

<sup>42</sup> Y chentše, ba entšanga Jesúsbeñe imojtsanošbuaché.

## 11

### *Lázaro tojanóbana*

<sup>1</sup> Inamna canÿe boyabása šocá, Lázaro ca uabainá. Cha inoyena canÿe pueblo Betania ca uabáinentše, Marta y Maríaftaca, chabe uabénata.

<sup>2</sup> Quem María inamna nda Bëngbe Utabná Jesusbe shecuatšiče botamana uanguëtšiče tbojanáshecbuešcja, y chabe stjënashaca tbojtanshechojó cha.

<sup>3</sup> Chë uta uabénatna ínÿenga tmojanichamó Jesús jaunenayama: —Bëngbe Utabná, chë aca condbobonshaná šocá entsemna ca.

<sup>4</sup> Jesús chca tojanuena ora, tojánayana: —Quem šocana ndoñe quenátsmëna Lázaro chaóbanama. Pero aiñe entsemna Bëngbe Bëtsabe obenana entšanga jinÿanÿiyama, y Bëngbe Bëtsabe Uaquiñá chamuatschuama ca.

<sup>5</sup> Jesús corente yojánababuanÿeshana Marta, María y chatbe uaftše Lázaro.

<sup>6</sup> Masque chcasna, Lázaro šocá yojtsemna ca Jesús tmojanianayana ora, cabá uta te más cha yojétsemna luarentše tojtsanoquedañe.

<sup>7</sup> Chentsana, chabe uatsjédayënga tojanëyana: —Judeoye cachiñe cuajna ca.

<sup>8</sup> As chë uatsjédayënga tmojanianyana: —Buatëmbayá, baseftayté entsemna chë luaroca judiënga cmonjanbuachetá ndëtsbéngaca jtsóbama; y mora, ¿cabá choye jtésama cojtseboše ca?

<sup>9-10</sup> Chora Jesús tojanëyana: —Bnëtsana uta hora bnëtë endmëna. Nda bnëtë tojtsana, ndoñe ntjojéstjiana, binÿniñe bëtsemnayeca. Cachcá átseftaca endmëna, tondaye quenátopodena átseftaca jopásana, atše jóbanama cabá ndoñe tonjobuache ora. Pero ibeta tojtsanëse, cha jtsojéstjiana, ndoñe binÿniñe causa. Cachcá, bënga šontsamna yojtsësháchenëntscuana jatrabájana. Atšbe jóbanama tempo chaojóshjango ora, ya ndoñe queochátëshachena jatrabájama ca —tojánayana.

<sup>11</sup> Chentsana tojanëyana: —Bëngbe amigo Lázaro tojtso-maná, pero atše choye chanjá jetsefšenama ca.

<sup>12</sup> Chora chë uatsjédayënga tmojanjuá: —Bëngbe Utabná, tojtsomanase yojtsayana chana tšabá yochtsatsmëna ca.

<sup>13</sup> Pero Jesús yojtsanëtsëtsná ndayá Lázaro tojtsanóbana ca, y chabe uatsjédayëngna imojtsejuabnaye Lázaro ndegombre yojtsomáñama.

<sup>14</sup> As Jesús tšabá tojanëyana: —Lázaro tontsóbana.

<sup>15</sup> Atše sëntsoyejuá choca atše ndoñe tsmënama, tšëngaftangbe tšabiama chaotsemnama; chca, tšëngaftanga más átšbeñe chašmotsošbuáchema. Pero cuajna cha jinÿyama ca.

<sup>16</sup> Chora Tomás, chë Gemelo ca uabobainá, chë inÿe uatsjédayënga tojanëyana: “Bëngnaca cuajna, cháftaca mochjóbana ca.”

*Jesús iuama entsanga chámuatayenama y chë nÿetsca tescama yomna tšabe vida chamotsebomnama*

<sup>17</sup> Jesús chë béconana tojánashjango ora, tojántatsëmbona Lázaro ya canta te uatbontsána yojtsemnama.

<sup>18</sup> Betania pueblo yojamna Jerusalén béconana, mo unga kilómetroca.

<sup>19</sup> Ba judiënga tmojána Marta y María jautsëtsayama y jatjëmbabayama ndoñe tša ngménaca chabondëtsemnama, chatbe uaftše tojanóbana causa.

<sup>20</sup> Jesús yojtsashjajuanama Marta tojántatsëmbona ora, tojánbocna cha jajébenguama, pero María cach yebnentše tojanoquedá.

<sup>21</sup> Chora Marta Jesúsbioye tbojanianyana: —Bëngbe Utabná, aca muentše macmënëse, atšbe uaftše ndoñe matënjóbana.

22 Pero atše sěntsetatšēmo, masque ndayánaca mora Běngbe Bětsá chacojotjañe, y cha lempe chca cmochjátšetaye ca.

23 Y Jesús tbojanjuá: —Acbe uaftše echántayena ca.

24 Chora Marta tbojaniyana: —Aíñe, atše sěndětatsēmo cha yochtayenama, pero quem luare jopochócama te, nñetsca obanēnga mochtayena ora ca.

25 As Jesús tbojaniyana: —Atše sěndmēna chē entsānga chāmuatayenama y chē nñetsca tescama yomna tšabe vida chamotsebomnama endamá. Nda átšbeñe tojtsošbuaché, masque chaóbana, echántayena.

26 Y nda cabá ainá totsomñe y átšbeñe tojtsošbuaché, ndocna te queochatóbana. ¿Chē cbontsatsá soyiñe quecojtsošbuaché ca? —Jesús tbojantjá.

27 Chora Marta tbojaniyana: —Aíñe, Běngbe Utabná, atše áceñe sěntsošbuaché, aca chē Cristo, chē Běngbe Bětsabe Uaquiñá y chē quem luaroye jabamá comnama ca.

*Jesús, Lázaro yojtsátbontsana cuevēshentše yojenóbošachna*

28 Chca tojánayanentšana, Marta tojtaná chabe quenata María jachembuama, y iytēcana tbojaniyana: “Buatēmbayá tonjášhango y entseboše aca jinñama ca.”

29 María chca tojanuena y cachora tojěftsanbocna y tojána Jesús jinñama.

30 Jesús cabá ndoñe chē puebloye tonjánamashēngo; yojětsemna Marta tbojanjébengo luarentše.

31 Chē yebnentše imojtsemna judiēnga, María tša ngménaca ndoñe chaondětsemnama tjěmbambnayēnga, tmojánbocana María juastama; er chē tojěftsantsbaná y tojěftsanbocna ora, chē judiēnga imojtsejuabnaye, Lázaro yojtsátbontsana luaroye María yojtsaye, choca jošachnama ca.

32 Jesús yojtsemnentše María tojánashjango ora, chábentše tojanoshamentšé y tbojaniyana: —Běngbe Utabná, aca muentše macmēnēse, atšbe uaftše ndoñe matěnjóbana ca.

33 María y cháftaca tmojánashhajna judiēnga, nñetscanga imojtsemnóbošachiye; y Jesús chca tojáninñe ora, corente tbojancochtsetšena y puerte ngménaca yojtsemna.

34 Chora Jesús tojanatjá: —¿Ndayentše cha šmojuatbontsá ca? Y chēnga tmojanjuá: —Běngbe Utabná, mabo y cochjinñe ca.

35 Chora Jesús tojánenobošachna.

36 As chē judiēnga tmojánayana: —¡Minñēnga, tša ibnabobonshana ca!

37 Pero inñe judiēnga imojtsichamo: —Chē jtaná chabuabínñnama tojamá, ¿tondaye tonjobená jamama, Lázaro ndoñe chaondóbanama ca?

*Lázaro tojtanayena*

38 Jesús, cachiñe puerte cochtsetšenaná, chë uatbontsánoye tojanobeconá. Chë luarna cuevëshe inamna, y amashjuanentše canye bëts ndëtsbéca yojtsatámena.

39 Chora Jesús tojanëyana: —Chë ndëtsbé mojuánanga ca.

Chora Marta, chë obanabe uabena tbojanianyana: —Bëngbe Utabná, mora ya bacá yojtsonguëtsé, er ya canta te entsemna cha tontsóvana ca.

40 Y Jesús tbojanjuá: —Ndegombre, ya tcbonjauyana, aíñe átsbeñe tcojtsošbuáchese, cochjinye Bëngbe Bëtsá puerte obená y bëtsá bëtsemnama ca.

41 Chora chë ndëtsbé tmojanjuaná; Jesús celoye yojontješiyey Bëngbe Bëtsábioyey tbojanianyana: “Taita, cbatschuá atšbe opresido tcojouenama.

42 Atše sëndëtatšëmbo aca sempre šcondbëtseyeunanama; atše chca tcbonjauyana, muentše montsemna entšangbe tšabiamá, chca, aca atše šcojichmoma, chënga chamotsošbuáchema ca.”

43 Chca tojánayanentšana, jabuache tojánayana: “¡Lázaro, chentšana matsbocna ca!”

44 Y cachora chë obaná tojtanbocna, cucuatšënga y shecuatšënga entšëjuaca batsëcná, y chabe jubiá base entšëjuaca uamochëcjuaná. As Jesús tojanëyana: “Motsejafjoná y jama chaotsobena ca.”

*Chë judiëngbe amëndayënga tmojanenoyeuná Jesúsbioyey jóbama*

*(Mt 26.1-5; Mc 14.1-2; Lc 22.1-2)*

45 Chë soyëngama, banga chë judiënguentšana, María jatjëmbabayama tmojánanga, y ntšamo Jesús tojanmcá tmojáninjënga, Jesúsbeñe imojtsošbuaché.

46 Pero inye judiënga fariseúngbioyey tmojána, ntšamo Jesús tojanmama chënga jacúntama.

47 As, chë fariseunga y chë bachnangbe amëndayënga tmojánenefjna inye judiëngbe amëndayëngaftaca, y tmojánayana: —¿Ndayá mochjobenaye cháftaca jamama? Quem boyabása bëts soyënga entsama.

48 Nye cachcá chamojonýase, nyetsca entšanga chábeñe mochantsošbuáchiye; chë romanëngbe amëndayënga mochanjabo y lempe mochantsepochóca, Bëngbe Bëtsabe bëts yebna y bëngbe luare Israel ca —chënga imojtsichamo.

49 Pero canya chënguentšá, Caifás ca uabainá, chë uata chë bachnangbe más uámana amëndayá inamná, tojanëyana: —Tšëngaftanga tondaye quešmátstatšëmbo.

50 Y ndoñe quešmatsjuabná, tšëngaftangbiamá más tšabá yojtsemna nye canye boyabása Israeloca entšangbiamá



chaóbana, y ndoñe nyets bēngbe luare chamotsepochoá ca —cha tojanēyana.

<sup>51</sup> Pero Caifás chē soye n̄ye cachabe juábnaca ndoñe chca tonjánayana. Cha, chē uata chē bachnangbe más uámana amēndayá inámnayeca, Bēngbe Bētsabe Espíritbe obenánaca tojánayana Jesús ibojamna Israeloca entšangbiamá jóbana ca.

<sup>52</sup> Y ndoñe n̄ye Israeloca entšangbiamá, sinó chē in̄ye luarēnguiñe Bēngbe Bētsabe básenga tmojanáshanēnga chamu-atábama, as chca, nyetscanga n̄ye can̄ye luarentša entšanga chamotsemnama.

<sup>53</sup> Chcasna, cach tescana judiēngbe amēndayēnga tmojanenoyeuná Jesús jóbama.

<sup>54</sup> Chíyeca Jesús entšángbeñe, Judea luariñe ya ndoñe yontsana. Chē luarentšana tojéftsanbocna y can̄ye luaroje tojtsanoñe, entšanga ndoyeniñe béconana, can̄ye pueblo Efraín ca uabáinoje. Y chentše chabe uatsjéndayēngaftaca tojtsanoquedañe.

<sup>55</sup> Judiēngbe Bashco fiestama batšá yojtsájamna, y ba entšanga pueblēnguentšana Jerusalenoye imojtsajna, soyēnga choca jamama ntšamo tempo inamncá, chca, Bēngbe Bētsabe bominyama tšábenga jtsemnama, chē Bashco fiesta cabá ndobuache ora.

<sup>56</sup> Chocna, judiēnga Jesús imojtsenguaye, y Bēngbe Bētsabe bēts yebnentše imojtsentjanaye: “¿Ntšamo šmojtsejuabná, cha tayochjabo o ndoñe quem fiestama ca?”

<sup>57</sup> Chē fariseunga y chē bachnangbe amēndayēnga tmojanmandá, nderado nda Jesús ndayentše tojtsemnama tojtsetatšēmbēsna, chaobuambá ca, as Jesús jishachama.

## 12

*María, botamana uanguētsiye Jesúsbeñe tbojanáshecbuešcja (Mt 26.6-13; Mc 14.3-9)*

<sup>1</sup> Chnēnguana te chē Bashco fiestama yojtsájamna ora, Jesús Betania pueblōje tojtaná. Lázaro, chē Jesús tbojtanayená cha, choca inoyena.

<sup>2</sup> Chentšna bēts saná Jesusbiamá tmojanábua. Marta tojanējuatšé, y Lázaro yojtsemna chē Jesúsēftaca juasama mesēshañe imojtsetbiámanēnguentše.

<sup>3</sup> As María can̄ye jarrētema tojanaca; chiñe yojanaftsuamna can̄ye botamana uanguētsiye, bētscá uámaniye, ena nárdoca pormániye. Chē uanguētsiye, María, Jesúsbe shecuatšēnguiñe tbojanáshecbuešcja, y cachabe stjēnashaca tbojtanshecbójó. Chora, chē yebnentše ena nardiyana yojtsonguētsiye.

4 Chora, canya Jesusbe uatsjendayënguentšá, Judas Iscariote, chë Jesús uayayëngbe cucuatšinë yoch-janayentsbashejuaná, tojánayana:

5 —Quem botamana uanguëtsiye unga patse denario crocénana enduámana. ¿Ndáyeca ndoñe šmonjuiye y ndbomnjémënga chë crocénana mašmëntsatsatá ca?

6 Pero Judas chca tojánayana, chë ndbomnjémëngbeñe ntse-juabnaycá, sinó cha atbëbaná inamna causa. Judas chëngbe crocénana shecnëšiñe yojánatbëna, y ba soye, chë shecnëšoye imojanatsuáma crocénánentsana cha yojánatbëbana.

7 As Jesús tbojanjuá: —Cachcá monyá. María mëntscoñe chë botamana uanguëtsiye iuabofjájona, cha jobenayama átšbeñe jabuéscjama, er ndoñe bën y atše šmochanjaitëme.

8 Chë ndbomnjémëngna tšëngaftangbeñe sempre mochanjesomñe, pero atše ndoñe ca —tojánayana.

*Judiënga tmojanenoyeuná Lázaro jóbama*

9 Ba judiënga tmojántatsëmbona Jesús Betanioca yojtsem-nama, y choye tmojána, ndoñe nýe Jesús jinýama, sinó Lázarnaca, chë Jesús tbojtanayená cha.

10 As chë bachnangbe amëndayënga tmojanenoyeuná Lázarnaca jóbama.

11 Chabe causa, ba judiënga chëngbioye cachcá tmoje-sanënýa y Jesúsbeñe imojtsošbuaché.

*Jesús Jerusalenoye tojánashjango*

*(Mt 21.1-11; Mc 11.1-11; Lc 19.28-40)*

12 Chë yëfsana, mallajta entsanga, Jerusalenoca fiestama tmojánashjajnënga, tmojántatsëmbona Jesús choye yochjánashjanguama.

13 As chëngna palma betiye buacuafjënga tmojanatëtsetše, y Jesús jajëbenguama tmojánbocana, y mëntsá imojtsáyebuache: “¡Bëngbe Bëtsá matschuanga! ¡Corente bendición bomná chë Bëngbe Utabnabe obenánaca tojabá! ¡Corente bendición bomná chë Israeloquëngbe Rey ca!”

14 Jesús canye burrotema tbojáninýena y chábeñe tojanenoyayé. Ntšamo Bëngbe Bëtsabe uabemana palabrënguiñe iuayancá, cachcá tojanopasá. Chiñe mëntsá endayana Jerusalenoca entsangbiama:

15 Sión bëts puebloca oyenënga, ndoñe matauatjëngana. Minýënga, tšëngaftangbe Rey burrotëmiñe enjaquená entsabó ca.

16 Chca orna, Jesusbe uatsjëndayënga chë soyëngama ndoñe tonjanësertá; pero chentsana, Jesús corente bëtsá yomnama Bëngbe Bëtsá tojaninýanyé ora, chë uatsjëndayënga chama tmojanenojuabó, lempe ntšamo Bëngbe Bëtsabe uabemana palabrënguiñe iuayancá y cachcá Jesúseftaca tojanopasama.

17 Chë Jesúseftaca imojtsemna entšanga, Lázarbioye uat-bontsánoye tbojanchembo ora y chentšana tbojtanayená ora, ntšamo tmojáninýama chora imojtsecuéntaye.

18 Chíyeca, ba entšanga tmojánbocana Jesús jajébenguama, chë bëts soye Bëngbe Bëtsabe obenánaca cha tojanmama tmojanuénayeca.

19 Pero chë fariseunga imojtsenatsëtsnaye: “Tšëngaftanga šmontsonýa bënga tondaye jamama quemuátobenama y más, inýetscanga cha montsëstona ca!”

### *Básefta Grecia luaroca entšanga Jesús tmojánguango*

20 Bashco fiestama, chë Bëngbe Bëtsá jadórama Jerusalenoye tmojánangbeñe, básefta griego entšángnaca imojtsemna.

21 Chëngna, Felipe chë Galilea luarocá, chë Betsaida pueblócábioye, tmojanobeconá y tmojanimpadá: “Señor, bënga fsëntseboše Jesús jinýama ca.”

22 Chora Felipe tojána Andrés jauyanama, y chë útatna Jesúsbioye tojána, chë grieguëngbiamá jauenayama.

23 Jesús chata tojanëyana: “Chë Bëngbe Bëtsá Entšá tbojanbemá corente bëtsá yomnama jinýanýiyama te ya tojobuache.

24 Ndegombre šcuayana: Canýe trigo jénaye ndoñe fshantsiñe tmonjuatbontsá y ndoñe tonjóbanëse, nýe cach canýe trigo jénaye jesomñana. Pero tmojuatbontsá y tojóbanase, bëtsá jashájonana.

25 Cachcá, nda nýe cachá tojtsenóbobonshana, cha chabe vida echanjëftsobuetše. Pero nda nýe cachá ndoñe tontsenóbobonshana y ntšamo atše stsemandacá, quem luariñe vida tojtsebomnëntscuana cha tojtsamëse, chë nýetsca tescama yomna tšabe vida echántsebomna.

26 Nda ntšamo stsemandacá jamama tojtseboše, atše chašotsëstona. Chca, ndayentše atše chaitsemna, chánaca, chë atše oservená, chentše chaotsemna. Atše šojtseservénabiamá, atšbe Taitá Bëngbe Bëtsá echanjínýanýiye bëtsá yomnama ca” —Jesús tojánayana.

### *Jesús tojánayana cha yochjanóbanama*

27 Y más Jesús tojánayana: “¡Mora tša cochtsetšenaná sëntsemna! ¿Atše chjayana: ‘Taita, chë átšeftaca echanjopása soyënga šmotsebojuaná ca?’ Ndoñe; er más chama atše quem luaroye tijabo.

28 Taita, šminýanýe aca puerta bëtsá y obená comnama ca.”

Y cachora, celocana canýe oyebuambnayana tojanóbocna mëntšá: “Ya tcbonjinýanýe atše puerta bëtsá y obená tsmënama, y mora cachiñe cachcá chanjama ca.”

29 Entšanga chca tmojanuena ora, ínŷenga imojtsichamo nŷe tojanjuésase ca; pero ínŷengna imojtsichamo: —Canŷe ángel chábioye tbonjuatsésá ca.

30 Chora Jesús tojanéyana: —Ntšamo šmonjouencá, atšbiana ndoñe quenátsmēna, sinó tšēngaftangbiana.

31 Mora chē tempo entsemna, chē quem luare entšanga tmojëftsema bacna soyēnga jinŷanŷiyama y chēngbe castiguama jayanama. Y mora, chē nŷetsca bacna soyēnga mandayá, quem luarentšana mochantábocna.

32 Pero atše fshantsocana atsbananá chaitsemna ora, nŷetsca entšanga átsbioye chanjúbuaja ca —Jesús tojánayana.

33 Chca cha yojttsichamo, ana jinŷanŷiyama ntšamo jóbanama ibojamnama.

34 Chora chē entšanga tmojanjuá: —Bēngbe Bētsabe uabemana palabrenguñe endayana, y chíyeca bēnga fsēndētatsēmbo chē Cristo nŷetsca tescama vida yochtsebomna ca. As, ¿ndáyeca cojtsichamo, Bēngbe Bētsá Entšá tbojanbemá chamuatsbanama yojtsemna ca? ¿Nda yojtsemna Bēngbe Bētsá Entšá tbojanbemá ca? —chēnga imojtsichamo.

35 Y Jesús tojanéyana: —Nŷe baseftatescama chē entšangbe juabnēnga binŷnayá tšēngaftangbeñe entsemna. Chē binŷnayá cabá tšēngaftangbeñe yojtsemnēntscuana, cháftaca šmochtsajna. Chca, mo ibetiñcá ndoñe quešmochátajna. Nda ndoñe binŷniñe tojtsana, cha ndoñe ntsetatšēmbuana ndēmuajana yojtsana.

36 Chē binŷnayá cabá tšēngaftangftaca endētsemnēntscuana, chábeñe šmochtsošbuáchiye; as, tšēngaftangbe juabnēnga binŷniñe echántsemna ca —Jesús tojánayana.

Chē soyēnga tojánayanentšana, Jesús tojtsanoñe y entšangbiana yojetsóitana.

*Ndáyeca chē judiēnga Jesúsbeñe ndoñe montsanošbuaché*

37 Masque Jesús, judiēngbe delante ba bēts soyēnga Bēngbe Bētsabe obenánaca tojëftsema, chēnga ndoñe chábeñe ntsošbuáchiyana,

38 ntšamo Bēngbe Bētsabe juabna oyebuambnayá Isaías tojanabemcá, cachcá chaotsemnama. Isaías mēntšá tojánayana: Bēngbe Utabná, ¿nda bēngbe buayenana soyiñe yojtsošbuaché? Y ¿nda tbojosertá, acbe obenana tcojinŷinŷé ora ca?

39 Chíyeca chēnga ndoñe montsobena Jesúsbeñe jtsošbuáchiyama, er Isaías mēntšánaca tojëftsanabema:

40 Bēngbe Bētsá tojama chēnga chabe soyēngama ndoñe botamana chamondētsejuabnama y chabe soyēnga ainaniñe ndoñe chamondóyēngacñama, as ndoñe chaondētsēsertánama ca.

Y Bëngbe Bëtsá entsichamo: “Chca entsemna, chënga atšbe  
benache ndoñe chamondishachama,

y atše ndoñe ntjåtsebacama;

y chca, chënga mochántsemna mo ndëshnana entsangcá ca.”

<sup>41</sup> Isaías chca tojánayana, er tojáninÿe Jesús puerte bëtsá y obená yojamna, y chca chë uabemaniñe Jesusbiana yojanyebuambná.

<sup>42</sup> Pero masque chca iuábemanëse, ba judiënga imojtsanošbuaché, y banga judiëngbe amëndayëngnaca Jesúsbeñe imojtsanošbuaché. Pero chëngna, Jesúsbeñe imojtsošbuáchema entsángbeñe ndoñe montsichamo. Chca imojánama chë fariseungbiana auatja causa, chë judiëngbe enefjuana yebnënguentšana ndoñe chamondëtëbuacnama.

<sup>43</sup> Chëngbiana más yojanámana, entsanga chëngbiana chamotsichamo tša uámanënga imojamna ca, y ndoñe, Bëngbe Bëtsá chca chaotsamama.

*Jesusbe palabréngaca yochtsótatšëmbo entsanga tšabá o ndoñe tšabá tmonjamama*

<sup>44</sup> Chora Jesús mëntšá jabuache tojánayana: “Nda átšbeñe tojtsošbuaché, ndoñe nÿe átšbeñe ntsošbuáchiyana; chë nda šojichmó chábeñnaca cha jtsošbuáchiyana.

<sup>45</sup> Cachca, nda atše šojtsonÿá, chë šojichmó chábioynaca cha jtsonÿayana.

<sup>46</sup> Atše quem luaroye tijabo entsangbe juabnënga jabobínÿnama, chca, nda átšbeñe tojtsošbuaché, mo ibetiñcá ndoñe chaondëtsemnama.

<sup>47</sup> Pero nda atšbe soyëngama tojouena, pero ntšamo sentsichamcá ndoñe tontsama, atše chabiana ndocá quichátayana tšabá o ndoñe tšabá tonjama ca. Atše ndoñe chiyátabo, ntšamo quem luarentša entsanga tmojamama tšabá o ndoñe tšabá yontsemna ca jatichámuama; quem luaroye sënjabo ndayá chënga jabátsebacama.

<sup>48</sup> Nda atše šojtsaboté y atšbe palabréngama ndoñe šonjoyeuná, ya entsebmna nda chabiana yochjayana bëts castigo jtsebmnama ibojtsemna ca. Atše tijanoyebuambá palabréngaca, quem luare jopochócama te chabiana chca echántsayana.

<sup>49</sup> Er atše ndoñe nÿe atšbe juábnaca quetsatoyebuambná. Chë Taitá, chë šonjichmó cha, šonjamandá ntšamo jayanana y ndayá jabuátambana.

<sup>50</sup> Atše sëndëtatšëmbo, atšbe Taitá tojamandá orna, cha jamándana entsanga chë nÿetsca tescama yomna tšabe vida chamotsebmnama. Chíyeca, ndayá sentsichamcá, endmëna ntšamo atšbe Taitá Bëngbe Bëtsá šojamandacá ca” —Jesús tojánayana.

## 13

*Jesús chabe uatsjéndayënga tojanashecjabebé*

<sup>1</sup> Bashco fiesta cabá ndobuache ora, Jesús yojtsetátšëmbo chabe tempo tojanóshjanguama, quem luarentšana jëftsebocnama y chabe Taitábioye jtama. Ntsamo Jesús chábenga yojanababuanÿeshancá, chë quem luare imojamnënga, chórna yojtseboše chë bëts bonshánana puerte más jinÿanÿiyana.

<sup>2</sup> Pero Satanás, Júdasbe ainaniñe bacna juabnënga tojanjajó, uayayëngbe cucuatšíñe Jesús jayentšbáshejuanama. Judas Iscariote, Simonbe uaquiñá.

<sup>3</sup> Jesús yojtsetátšëmbo chabe Taitá Bëngbe Bëtsá nyets obenana tbojánatšetama. Cachcá, Jesús yojtsetátšëmbo, Bëngbe Bëtsábíocana cha tojánabama y cachábíoye jtama ibojtsemnama.

<sup>4</sup> Chcasna, chë ibeta jasama tmojanpochocá ora, mesëshentšana tojantsbaná, chabe juatsboye uichëtjoníya tojanenátsejca y canÿe tuallëjua tojanenasná.

<sup>5</sup> Chentsana, canÿe bachešíñe búyeshe tojanbuešcja y tojanontsé chabe uatsjéndayënga jushecjabebiyana y jtëshechojuana cha yojsasnana tuallëjuaca.

<sup>6</sup> Pero, Simón Pedro tbojanobuache ora, Jesúsboye tbojaniyana: —Atšbe Utabná, ¿aca šcochjuashecjabí ca?

<sup>7</sup> Chora Jesús tbojanjuá: —Atše séntsama soye mora ndoñe quecmátësertana; pero más chcoye aíñe cmochanjosérta ca.

<sup>8</sup> As Pedro tbojaniyana: —¡Ndocna te šcatjuashecjabí ca!

Pero Jesús tbojaniyana: —Ndoñe chacbonjuáshecjabese, atšbia ndoñe quecochátsmëna ca.

<sup>9</sup> Y Simón Pedro tbojaniyana: —¡Atšbe Utabná, as nÿe atšbe shecuatšënga ndoñe, ndayá atšbe cucuatšënga y bestšášnaca ca!

<sup>10</sup> Pero Jesús tbojanjuá: —Nda bebená tojtsemna, nÿe shecuatše jtsashecjabíama jtsajabótana, ndoñe nÿetšá cachiñe. Nda tojtsobebé, ndoñe tsengá ntsemnana. Cachcá, mo bebënënga cuenta tšëngaftanga šmontsemna; pero canÿa muentše entsemna, y cha mo bebenacá ndoñe quenátsmëna.

<sup>11</sup> Jesús yojtsetátšëmbo nda chë uayayëngbe cucuatšíñe boshjuaná yochtsanmënama, chíyeca tojánayana: “Tšëngaftanguentšá canÿa entsemna, cha mo bebenacá ndoñe quenátsmëna ca”.

<sup>12</sup> Jushecjabebiyama tojanpochocá ora, chabe juatsboye uichëtjoníya tojtánichëtjo, y mesëshentše tojtánótbema. Chora tojanëyana: —¿Chë tcbonjábíama soyama quecmojtsësertana ca?

13 Tšëngaftanga atše šmondbauyana Buatëmbayá y Bëngbe Utabná ca; tšabá chca šmontsichamo, er atše ndegombre chca sëndmëna.

14 Atše, tšëngaftangbe Buatëmbayá y Utabná, tcbon-jushecjabebé; chcasna, tšëngaftángnaca cmontsamna jenáshecjabebiyana.

15 Ntšamo quem sóyeca tcbonjanÿanÿecá, tšëngaftanga cachcá šmochtsama.

16 Ndegombre šcuayana, chë oservená chabe nduiñbiama ndoñe más uamaná ntsemnana. Cachcá, chë ichmoná chë tbojichmobiama ndoñe más uamaná quenátsmëna.

17 Quem soyënga chašmojuatsjinÿe y chca chašmojamëse, tšëngaftanga puerte oyejuayënga vida šmochanjëftsebmna.

18 “Atše sëndétatšëmbo chë tijábacacangiama, chíyeca atše nÿetscangiama ndoñe chca quetsatoyebuambná. Y ntšamo Bëngbe Bëtsabe uabemana palabrenguiñe endayancá cachcá chaotsemnana, chë ‘canÿa átseftaca tandëse tonjasá, atšbe contra echántsemna ca’, cachcá echanjopása.

19 Mora, cabá ndoñe chca tonjopasá ora, lempe chë soyënga sentsichamo. As, chca chaojopasá ora, átšbeñe šmochantsošbuáchiye, y as šmochántsetatšëmbo atše tsmëna chë nda sëndmëná.

20 Ndegombre šcuayana: Nda atše tijichmóbioye tbojofja, cha atše šochanjofja; y nda atše šojofja, cha chë nda šojichmóbioye bochanjofja ca” —Jesús tojánayana.

*Jesús tojánayana uayayëngbe cucuatšinë Judas bochjáboshjonama*

*(Mt 26.20-25; Mc 14.17-21; Lc 22.21-23)*

21 Chë soyënga tojánayanentšana, Jesús corente cochtsetšenaná yojtsemna, y tojánayana: —Ndegombre šcuayana, canÿa tšëngaftanguentšá uayayëngbe cucuatšinë šochanjáboshjona ca.

22 Chora, chabe uatsjëndayënga tmojanontšë enonÿinÿnayana, y ndoñe montsetátšëmbo ndabiama Jesús chca tojánayanama.

23 Canÿe uatsjëndayá, chë Jesús puerte ibnabobonshaná, Jesusbe juachaca inatbemana.

24 As, Simón Pedro chábioye tbojánefjatšëmbo, ndabiama Jesús chca tojánayanama Jesúsbioye chabotjama.

25 Chë puerte bonshana uatsjëndayá, Jesúsbioye batšatema más tojanosjoná y tbojantjá: —Bëngbe Utabná, ¿nda cha yojtsemna ca?

26 Chora Jesús tbojanjuá: —Atše canÿe base tandëtema chanjafchécuacuaye y ndábioye chajoyé, cha entsemna ca.

As Jesús canÿe base tandëtema tojanfchecuacuá, y Judas, Simón Iscariotbe uaqiñábioye, tbojanoyé.

27 Tandëse tojanóyëngacñe y cach ora, Satanás Júdasbe ainaniñe bacna juabñenga tbojáncochëngo. As Jesús tbojanianana: “Chë cochanjama soye, cam ora moma ca.”

28 Pero ni canya chë jasama imojtsetbiamanënguentsá tbojanësertá, ndayama Júdasbioye chca tbojanianama.

29 Judas inamna chëngbe crocénana shecnësiñe uambayá; chíyeca ínÿenga tmojanjuabó Jesús chca ibojtsatsaye, ana ndayá yojtseita soye chë fiestama chauabuámiyama, o nd-bomnjémënga ndayánaca chauatšatama ca.

30 Júdasna chë base tandëtëma tojanóyëngacñe, y cachora chentsana tojëftsanbocna. Chora ya ibeta yojtsemna.

### *Chë tsëm mando*

31 Judas tojëftsanbocnentsana, Jesús tojánayana: —Ora tocjebuache, Bëngbe Bëtsá Entšá tbojanbemá corente bëtsá y obená yomnama jinÿanÿiyama; y mua echanjínÿanÿiye Bëngbe Bëtsá corente bëtsá y obená yomnama.

32 Cha echanjínÿanÿiye Bëngbe Bëtsá chca yomnama, chíyeca Bëngbe Bëtsánaca echanjínÿanÿiye corente bëtsá y obená yomnama, y mora entsemna chë ndaye ora Bëngbe Bëtsá chca chabiamana yochjínÿanÿiye.

33 Atšbe básënga, baseftatescama tšëngaftangaftaca sëntsemna. Chora šmochántseguaye, pero ntšamo judiënga sënjauyancá, mora cachcá tšëngaftanga cbëyana: Chë chanjá luaroye, tšëngaftanga ndoñe quešmátobena jama ca.

34 Canÿe tsëm soye cbetsamëndá: Nÿetscanga šmochtsenbobonshana. Ntšamo atšë tšëngaftanga cbondábabuanÿeshana, cachcá tšëngaftanga šmochtsenbobonshana.

35 Tšëngaftanga šmojttsenbobonshánëse, nÿetsca entsanga mochántsetatšëmbo, tšëngaftanga atšbe uatsjëndayënga šmomnama ca —Jesús tojanéyana.

*Jesús tojánayana, chábioye ndoñe bonjanabuátma ca Pedro yochjánayanama*

*(Mt 26.31-35; Mc 14.27-31; Lc 22.31-34)*

36 Chora Simón Pedro tbonjantjá: —Bëngbe Utabná, ¿ndëmoye cochjá ca?

As Jesús tbojanjuá: —Atšë sëntsá luaroye, mora aca ndoñe quecátobena atšë juastana, pero más chcoye aiñe šcochanjuasto ca.

37 As Pedro tbojanianana: —Atšbe Utabná, ¿ndáyëca ndoñe sëntsobena mora aca juastama? ¡Atšë sëntseprontana acbiamana jóbanama ca!

38 Chora Jesús tbojanianana: —¿Ndegombre cojtseprontana atšbiamana jóbanama? Ndegombre cbëyana, cabá ngallo



ndēcánta ora, aca unga soye atšbiamá cochanjayana: “Chandoñe quetsatabuatma ca”.

## 14

*Jesús beyeca entsanga jobenayana Bëngbe Bëtsá bioye jama*

<sup>1</sup> Mëntśánaca Jesús tojánayana: —Ndoñe ainana tsetšanënga matsmënana. Tšëngaftanga Bëngbe Bëtsá beñe šmondošbuaché; átšbeñnaca šmochtsošbuáchiye.

<sup>2</sup> Atšbe Taitá Bëngbe Bëtsá endmënoca, ba luarënga joyé nanama endmëna. Ndoñe chca tontsemnëse, atše chca matchënjáuyana. Morna, cha endmënoye atše chanjá tšëngaftangbiamá canye luare joyé nanama jabuáprontama.

<sup>3</sup> Atše chajá y chë luare chacbojabuaprontá ora, cachiñe moye chanjésabo, tšëngaftanga átšeftaca junatsama. As, atše chaitsemnoye, tšëngaftangnaca chašmotsá joyé nanama.

<sup>4</sup> Atše chanjá choye ntšamo jama y jashjanguama ya šmontsetátšëmbo ca —Jesús tojánayana.

<sup>5</sup> Chora Tomás Jesús bioye tbojanियana: —Bëngbe Utabná, ndëmoye cochjama ndoñe queftsátstatšëmbo. As, ¿ntšamo bënga fchtsetátšëmbo ntšamo choye jama ca?

<sup>6</sup> Chca tbojanियana ora, Jesús tbojanjuá: —Atše sëndmëna benachcá; chëjana tcojtsase, pronto jashjanguana. Atše sëndmëna ntšamo ndegombre yomncá sempre oyebuamb-nayá, y entsanga chë nyetsca tescama yomna tšabe vida chamotsebomnana endamá. Nye átšbeyeca endopodena ndayëjana jama, y atšbe Taitá Bëngbe Bëtsá bioca jashjanguama.

<sup>7</sup> Tšëngaftanga atše šmojtsábuatmëse, atšbe Taitánaca šmattsábuatma. Morscana ya cha šmontsábuatma y cha šmontsonyá ca —tbojanियana.

<sup>8</sup> Pero Felipe tbojanियana: —Atšbe Utabná, nye chë Taitá šmanyanýe, ndayama más ca.

<sup>9</sup> Chora Jesús tbojanियana: —Chëfta te tšëngaftangaftaca sëntsemna, y ¿cabá ndoñe atše šcontsábuatma, Felipe? Nda atše šojinye, chë Taitá Bëngbe Bëtsá bioynaca jinýana. As, ¿ntšamo atše šcojtsatsá, chë Taitá šmanyanýe ca?

<sup>10</sup> ¿Ndoñe condošbuaché, atšbe Taitá átšbeñe y átšnaca chábeñe nye canýacá ftsmënama? Chë cbontsëtsëtná soyënga, ndoñe nye atšbe juábnaca chca quetsatoyebuambná. Atšbe Taitá, chë átšbeñe vida endbomná jtsamana lempe ntšamo stsamcá.

<sup>11</sup> Muiñe šmochtsošbuáchiye: Atšbe Taitá átšbeñe endmëna, y átšnaca chábeñe mo nye canýacá sëndmëna. Chama ndoñe šmontsošbuachese, as nye chë tijama soyëngámnaca átšbeñe šmochtsošbuáchiye.

12 Ndegombre šcuayana, nda átšbeñe tojtsošbuaché, ntšamo atše tijamcá y cachcá cha echántsama. Atšbe Taitá entsemnoye atše chanjá, chíyeca, chë átšbeñe ošbuachiyá, chama más bëts soyënga echanjama.

13 Tšëngaftanga ndaye sóynaca Bëngbe Bëtsábioye šmojtjañe, y chca šmojama atše jótšëmbonëse, átšbeñe šmošbuachéyeca, lempe šmochanjóyëngacñe; chca, chë Uaquiñá echanjínÿanÿiye chë Taitá corente bëtsá y obená yomnama.

14 Tšëngaftanga ndaye sóynaca atše šmojtjañe, y chca šmojama atše jótšëmbonëse, átšbeñe šmošbuachéyeca, atše chë soye chanjama ca —Jesús tojánayana.

*Jesús tojanašebuachená chë Uámana Espíritu jíchmuama*

15 Mëntšánaca Jesús tojánayana: “Tšëngaftanga atše šmojtsebobonshánëse, ntšamo cbontsamëndacá cachcá šmochanjama.

16 Chca chašmojamëse, atšbe Taitá Bëngbe Bëtsá tšëngaftangbiamá chanjaimpáda, tšëngaftanga jabújabuachama y jabáñemuayama inÿa cha chabuichmoma, chë Uajabuachaná nÿetsca tescama tšëngaftangaftaca chauétsemnama.

17 Cha, chë Uámana Espíritu endmëna chë nÿetsca soyënguiñe ntšamo ndegombre yomncá oyebuambnayá. Chë nÿe quem luarama enójuabnaye entšanga, chë átšbeñe ndošbuáchiyënga ndoñe quematonÿá, ni quematábuatma. Chíyeca chënga ndoñe quemátobena cha jóyëngacñana. Pero tšëngaftanga aiñe cha šmontsábuatma. Cha tšëngaftangaftaca entsemna, y tšëngaftangbe ainaniñe sempre echanjëftsiyena.

18 “Atše ndoñe quebocháisabashejuana, mo uajchonga cuenta chašmotsemnama. Tšëngaftangbíoie chanjésabo.

19 Muentšana baseftaytese, chë nÿe quem luarama enójuabnaye entšanga ndoñe más quešmochátonÿaye; pero tšëngaftangna aiñe, atše cachiñe šmochántinÿe. Atše ainá chántsemna, chíyeca tšëngaftanga átšeftaca tšabe vida šmochántsebmna.

20 Chë Uámana Espíritu tšëngaftangbe ainaniñe chašmojóyëngacñe ora, tšëngaftanga šmochántsetatšëmbo, atše atšbe Taitábeñe nÿe canÿacá tsmënama; cachcá, tšëngaftanga šmochántsetatšëmbo, tšëngaftanga átšeftaca cachcá nÿe canÿacá šmomnama y átšnaca tšëngaftangaftaca.

21 Nda totátšëmbo ntšamo atše tijamandacá y sempre chca tojtsama, cha ndegombre šojtsebobonshana. Nda átšbioye šojtsebobonshana, chábioye atšbe Taitánaca bochántsebobonshana. Atšnaca cha chántsebobonshana, y nda atše tsmënama cha chanjinÿinÿiye ca” —Jesús tojánayana.

22 Chora, inÿe Judas, ndoñe Judas chë Iscariote, Jesúsbioye tbojaniyana: —Bëngbe Utabná, çntšamo chca yojtsemna, nÿe bënga šcochjínÿanyïe ntšamo cach aca comnama, y nÿetsca quem luarentšëngbioye ndoñe ca?

23 Chora Jesús tbojanjá: —Nda atše šojtsebobonshana, ntšamo atše sëntsoyebuambnacá echanjama. Atšbe Taitánaca chábioye bochántsebobonshana, y bëndata chábioye fchanjabo y chábeñe vida fchantsebomna.

24 Nda ndoñe šontsebobonshana, ndoñe queochátama ntšamo sëntsoyebuambnacá. Ntšamo sëntsoyebuambnacá ndoñe nÿe atšbe juábnaca quenátsmëna, sinó chë Taitá, chë šonjichmó chabe juábnaca.

25 “Atše cabá tšëngaftangaftaca sëntsemnëntscuana, lempe quem soyëngama sëntsoyebuambná.

26 Chë Uajabuachaná, chë Uámana Espíritu, atšbe impadanánaca atšbe Taitá bochanjíchmuá. Cha lempe cmochántسابuatambaye, y echanjama nÿetsca chë tcbonjáuyana soyëngama chašmuatenójuaboma.

27 “Chë atšbe ainaniñe puerte tšabe ebionana tšëngaftangbiana šcuétešoshjona, cbetsatšatá. Chë nÿe quem luarama enójuabnaye entšanga cmondbétsatšatnaye soyëngcá ndoñe quenátsmëna, chë atše cbontsatšatná ainaniñe puerte tšabe ebionana. Ainana tsetšanënga ndoñe matsmënana, ni matauatjëngana.

28 Ya šmonjouena ntšamo tcbonjáuyancá: ‘chanjá y tšëngaftangbioye chanjésabo’. Tšëngaftanga atše šmojtsebobonshánëse, šmattsóyejuaye atše chë Taitábioye jama šojtsemnama, er chë Taitá atšbiana más bëtsá endmëna.

29 Quem soyënga tcbonjáuyana, cabá ndoñe chca tonjopasá ora; as, chca chaojopasá ora, chiñe jenójuaboyëse átšbeñe chašmotsošbuáchema.

30 “Chë quem luarentša bacna soyënga mandayá endabó; chíyeca atše ya ndoñe bëtscá tšëngaftangaftaca quichaisóyeuambaye. Pero cha tondaye quenátobena atše jabórlana.

31 Masque cha chca endmëna, chca entsemna, atše chë Taitábioye tsbobonshánama quem luarentša entšanga chamotsetatšëmbuama. Ntšamo atšbe Taitá šojamandacá, atše cachcá tsámama chamotsetatšëmbuama.

“Motsbananga. Muentšana cuajna ca” —Jesús tojanëyana.

## 15

*Jesús yomna mo chë tšabe uvas betiyá*

1 Mëntśánaca Jesús tojánayana: “Atše sëndmëna mo chë tšabe uvas betiycă, y atšbe Taitá Bëngbe Bëtsá chë tšabe uvas betiye inÿenacă.

2 Chë inÿená, chë uvas betiyentša buacuafjënga ndëshajuanëfjënga jtsebuácuetëtsetšana; pero chë uvas betiyentša buacuafjënga shajuanëfjënga jtsobolímpiana, bëtscă chaotseshájuanama. Nda ndoñe tontsama ntšamo Bëngbe Bëtsá tojtseboščă, jtsemnana mo chë ndëshajuana buacuafjëngcă; y chë causa, chë Taitá chábioye corente bochantsecastíga.

3 Tšëngaftanga šmonjouena ntšamo tijayancă; bëtscă chca šmontsama. Chíyeca mora tšëngaftanga šmontsemna mo chë limpiana y shajuana buacuafjëngcă.

4 Atšeftaca cányiñe mo canÿacă šmochtsemna y atše tšëngaftangaftácnaca. Chë buacuafja uvas betiyentšana juanánëfja ndoñe ntsoobenana nÿe cachabe ponto jashájonana. Cachcă, tšëngaftanga átšeftaca ndoñe cányiñe mo canÿacă šmontsemnëse, ndoñe šmattsobena Bëngbe Bëtsabiana bëtscă soyënga jamama.

5 “Atše chë tšabe uvas betiycă sëndmëna y tšëngaftanga chë buacuafjëngcă. Nda átšeftaca cányiñe mo canÿacă tojtsemna y atše cháftacnaca, cha Bëngbe Bëtsabiana bëtscă soyënga echanjama, mo canÿe buacuafja becă tojtseshajuancă. Er, tšëngaftanga atšbe uajabuáchenana ndoñe šmontsebomnëse, átšeftaca cányiñe mo canÿacă ndoñe šmontsemna causa, ton-daye šmattsobena jamama.

6 Canÿa átšeftaca cányiñe mo canÿacă ndoñe tontsemnëse, cha jtsemnana mo canÿe buacuetëtšena buacuafja, utšenëfja y buashánëfjă. Chca buacuafjënga, entšanga jtsatbanana, iñeshoye jtsëtšenana y chentše jtsejuinÿiyana. Cachcă, nda ndoñe átšeftaca cányiñe mo canÿacă tontsemna, ndoservenă jtsemnana y luaroca cha mochantsesegóra.

7 “Tšëngaftanga átšeftaca cányiñe mo canÿacă šmojtsemna y ntšamo atše tijayancă šmojtsamëse, lempe ntšamo šmojtseboščă šmochjotjañe, y lempe šmochanjóyëngacñe.

8 Chë shajuana buacuafjëngcă tšëngaftanga chašmojtsemna ora, šmochanjínÿanÿiye atšbe Taitá corente bëtsă y obenă yomnama. Y chca, tšëngaftanga atšbe ndegombre uatšjëndayënga šmochántsemna.

9 Ntšamo chë Taitá šondbobonshancă, átšnaca cachcă tšëngaftanga chondábabuanÿeshana. Chíyeca, šmochtsiyena atšbe bonshánama jtsejuabnaye.

10 Atše sëndama ntšamo atšbe Taitá šondëmandacă. Chíyeca atše sëndoyena chabe bonshánama jtsejuabnaye. Cachcă

tšëngaftágnaca, ntšamo atše cbontsamëndacá šmojtsamëse, atšbe bonshánama jtsejuabnayëse šmochantsiyena.

11 “Atše chca cbontsëtsëtsná, chë atše sëntsebomna oyejuayana tšëngaftágnaca chašmotsebonnama, y tšëngaftanga puerte chašmotsóyejuama.

12 Mëntšá cbetsamëndá: Ntšamo atše cbondababuanýeshancá, cachcá šmochtsenbobonshana.

13 Chë chabe amiguëngbiama tojóbanabiama, ndocna quenátobena chabiama más bonshánana jtsebonnana.

14 Ntšamo atše tijamandacá tšëngaftanga šmojtsamëse, atšbe amiguënga šmochántsemna.

15 Chë oserverná ndoñe ntsetatšëmbuana ndayá chabe nduiño tojtsamama. Chíyeca atše tšëngaftanga oservernénga ca ndoñe quechatëtsëtsná. Morscana mëntšá cbontsëtsëtsná: ‘Tšëngaftangna atšbe amiguënga šmontsemna ca’, er lempe ntšamo atšbe Taitábentsana tijuatsjinýcá, tšëngaftanga tcbonjinýané.

16 Tšëngaftanga ndoñe atše chešmatábuayana, pero atše aíñe tšëngaftanga tcbonjabacacá y tcbonjubuáyana, Bëngbe Bëtsabe trabajo jamama; y chca, mo canýe betiye sempre tojtseshajuana y chë shajuana ndocna te tontsopochocacá, tšëngaftanga chašmotsemnana. Chca, lempe ntšamo atšbe Taitá šmojtjañcá, y chca šmojama atše jótšëmbonëse, átšbeñe šmošbuachéyeca, cha lempe cmochanjátšataye.

17 Mëntšá atše cbetsamëndá: Smochtsenbobonshana ca” — Jesús tojanéyana.

*Jesús y chabe entsanga, chë nýe quem luarama enójuabnayëngbiama uaboyëñjanënga*

18 Mëntšánaca Jesús tojánayana: “Pero chë nýe quem luarama enójuabnaye entsanga tcmojtsëbuayëñjëse, šmochjenójuaboye, natsana chënga atše šmonjanáboyëñjama.

19 Tšëngaftanga, chë nýe quem luarama enójuabnaye entsanguentsana šmojtsemnëse, chënga cmattsababuánýeshana cachëngbengbioycá. Pero tšëngaftanga ndoñe chë nýe quem luarama enójuabnaye entsanguentsana quešmátsmëna, y atšna, chë quem luare oyenënguentsana tšëngaftanga tcbonjabacacá. Chíyeca chë nýe quem luarama enójuabnaye entsanga tšëngaftanga cmontsëbuayëñja.

20 Smochjenójuaboye ntšamo tcbonjáuyanama: ‘Chë oserverná chabe nduiñbiama ndoñe más uamaná quenátsmëna ca’. Chënga monjánama atše chaisufrima; tšëngaftágnaca chašmotsesufrínama mochántsama. Entšanga ntšamo atše tijayanentsana ntsachetšá tmojtsamcá, cachcá chënga mochántsama ntšamo tšëngaftanga chašmojtsëtsëtsná chentsana.

21 Chë chacmojtsëbuayënjënga, chë šojichmó cha ndoñe quematábuatma. Chíyeca chënga lempe chca cmochanjáborlaye, atšbe causa.

22 “Atše ndoñe matijabo y chënga ndoñe matijáuyanëse, ndegombre ndoñe bacna soye mattsebomna. Pero mora, chëngbe bacna soyëngama chënga ndoñe quemátobena jayanana, ‘¡Chca fsënjama ntsetatšëmbcá ca!’

23 Nda atše šojtsáboyënja, atšbe Taitábioynaca jtsáboyënjana.

24 Atše chë bëts soyënga Bëngbe Bëtsabe obenánaca chëngbeñe ndoñe matijamëse, ndegombre chënga ndoñe bacna soyënga mattsebomna. Pero mora, masque ntšamo sënjamcá tmonjinjëse, chënga atše šmontsáboyënja y atšbe Taitábioynaca.

25 Chca chënga montsama, ntšamo chëngbe leyënguiñe enduabemancá cachcá chaopasama. Chiñe mëntšá endayana: ‘Nye tondayama chënga šmonjanáboyënja ca.’

26 “Atše, atšbe Taitábentšana chë Uajabuachaná y añemuayá tšëngaftangbioye chanjíchmuá. Cha chë Uámana Espíritu endmëna, chë nyetsca soyënguiñe ntšamo ndegombre yomncá oyebuambnayá. Cha endmëna chë Taitábentšana ichmoná; y cha lempe atšbe tšabe soyënga cmochantsëtsëtsnaye.

27 Chorscana, tšëngaftángnaca atšbiama entšanga šmochantsëtsëtsnaye, er tšëngaftanga átšeftaca šmondétsemna, entšanga jábuayenama atše sënjanbojatsé orscana ca” —Jesús tojánayana.

## 16

1 Mëntšánaca Jesús tojánayana: “Atše quem soyënga cbontsëtsëtsná, tšëngaftanga átšbeñe ošbuáchiyana ndoñe chašmondájbanama, atšbe causa chašmojtsesufrina ora.

2 Chëngna, chë judiëngbe enefjuana yebnënguentsana cmochantëbuacana. Chca tempo chaojobuache ora, chë tšëngaftanga chacmojtsëbáyënga mëntšá mochántsejuabnaye: ‘Bënga tšabá tmonjama ca. Ntšamo Bëngbe Bëtsá yojtsebošcá, cachcá bënga tmonjama ca.’

3 Chënga, chë Taitá Bëngbe Bëtsá ndoñe quematábuatma, y átšbioye cach ndoñe. Chíyeca, chca cmochanjáborlaye.

4 Atše chca tšëngaftanga cbontsëtsëtsná, ntšamo tcbonjáuyanama chašmuenójuaboma, chca tempo chaojobuache ora ca” —Jesús tojánayana.

### *Ndayá chë Uámana Espíritu inétsama*

Mëntšánaca tojánayana: “Entšanga jábuayenama sënjanbojatsé orscana, chë echanjopása soyëngama ndoñe quecbënjatanëtsëtsná, er atše tšëngaftangaftaca sënjetsemna.

5 Pero morna, chë šojichmó cha yomnoye chantá; y tšëngaftanguentšá ndocná šochanjatjaye, ‘¿ndë moye cojtsá ca?’

6 Mora, tšëngaftangbe ainana ngmënaca entsemna, atše chca tčbonjáuyana causa.

7 Pero ndegombre šcuayana: Atše chanjá y chca tšëngaftangbe tšabiama echántsemna. Atše ndoñe quetsjase, chë Uajabuachaná y añemuayá ndoñe tšëngaftangbioye queochátabo. Pero aññe chanjá, y chora cha tšëngaftangbioye chanjíchmua.

8 Cha chaojáshjango ora, echanjama quem luarentša entšanga corente chamotsetátšëmbo ndayá ndegombre yomna bacna soyënga jtsamana, ndayá ndegombre yomna chë Bëngbe Bëtsabe bominyiñe tšabia jtsemnana, y ndayá yomna chë Bëngbe Bëtsá entšangbiamá jayanana tšabá o ndoñe tšabá tmonjamama.

9 Entšanga átšbeñe ndoñe quematošbuaché. Chíyeca chë Uajabuachaná echanjama chënga corente chamotsetátšëmbo ndayá ndegombre yomna chë bacna soyënga jtsamana.

10 Chë Taitábioye chanjá y atše ndoñe más quešmochátinye. Chíyeca chë Uajabuachaná echanjama chënga corente chamotsetátšëmbo ndayá ndegombre yomna Bëngbe Bëtsabe bominyiñe tšabia jtsemnana.

11 Quem luarentša bacna soyënga mándayabiamá Bëngbe Bëtsá ya tonjayana, ntšamo cha tojamama ndoñe tšabá yontsemna ca y nyetsca tescama castiganá chaotsemna ca. Chíyeca chë Uajabuachaná echanjama entšanga corente chamotsetátšëmbo, ndayá ndegombre yomna chë Bëngbe Bëtsá entšangbiamá jayanana tšabá o ndoñe tšabá tmonjamama.

12 “Atše cabá ba soyënga séntse bomna tšëngaftanga jáuyanama. Masque chcasna, mora tšëngaftanga ndoñe quešmátobena chë soyëngama josértana.

13 Pero chë Uámana Espíritu, chë nyetsca soyënguiñe ntšamo ndegombre yomncá oyebuambnayá, chaojáshjango ora, lempe ntšamo ndegombre yomncá cmochanjabuatambá. Cha ndoñe nye cachabe juábnaca queochátoyebuambnaye. Ntšamo chë Taitá chábioye tbojauyancá, tšëngaftanga cachcá cmochanjáuyana, y cha cmochanjábuayenaye ntšamo yochjopásama.

14 Atšbe soyënguentsána cha echanjójyëngacñe, y cach soyëngama cmochanjabuatambá. Chcase cha cmochanjínñanñiye atše bëtsá y obená bëtsemnana.

15 Lempe ntšamo chë Taitá endbomncá, atšbe soyëngnaca endmëna. Chíyeca atše tčbonjáuyana, chë Uámana Espíritu atšbe soyënguentsána yochjójyëngacñe y cach soyëngama

cmochjabuatambá ca.”

16 “Baseftayté y atše ndoñe más quešmochátinÿe. Inÿe baseftayté y cachiñe šmochantétinÿe ca” —Jesús tojanéyana.

*“Tšëngaftangbe ngménana, oyejuayana echanjóbema”*

17 Chora Jesusbe básefta uatsjéndayënga imojtsentjanaye: —¿Ntšamo yojtsentšáyana, chë “baseftayté y atše ndoñe más quešmochátinÿe, y inÿe baseftayté y cachiñe atše šmochantétinÿe, er atše chë Taitábioye chanjá ca”?

18 ¿Ntšamo yojtsentšáyana, chë “baseftayté ca”? Ndoñe quemuátstatsëmbo ntšamo yojtsentšáyanama ca —chënga imojtsichamo.

19 Jesús yojtsetátšëmbo chënga chca jatjayama imojtsebošama, y tojanéyana: —Atše tcbonjáuyana: “Baseftayté y atše ya ndoñe más quešmochátinÿe, y inÿe baseftayté y cachiñe atše šmochantétinÿe ca.” ¿Chë soyëngama šmojtsentjaná ntšamo stsentšáyanama?

20 Ndegombre šcuayana: Tšëngaftanga šmochanjenóbošachna y puerte ngménënga šmochántsemna, pero chë nÿe quem luarama enójuabnaye entsanga corente oyejuayënga mochántsemna. Masque tša ngménënga šmochántsemna, chentsana tšëngaftangbe ngménana, oyejuayana echanjóbema.

21 Canÿe shembása tbojontšabuache šešona jónÿnama ora, tša ngménaca cha jésemnana, puerte tbojtsetsetše causa. Chë šešona ya tojonÿná ora, cha ndoñe ntsenójuabnayana chë tša ibuántsetšama. Canÿe šešona quem luaroye cháúashjanguama chë shembása tojámayeca, chora cha tšabá y oyejuayá jtsemnana.

22 Ndegombre, tšëngaftángnaca cachcá, chora tša ngménaca šmochántsemna. Pero atše tšëngaftangbioye chajésabo ora, atše šmochantétinÿe y corente oyejuayënga šmochántsmëna. Y ndocná queochatobenaye chë oyejuayana jabuajuánana.

23 “Chë te chaojóshjango ora, tšëngaftanga ndocá atše quešmochatstjaye. Ndegombre šcuayana, lempe ntšamo atšbe Taitá šmojtjañcá, y chca šmojama atše jótšëmbonëse, átšbeñe šmošbuachéyeca, cha lempe cmochanjátšataye.

24 Mëntscoñama, atšbe Taitá tondaye chešmatotjañe atše jótšëmbonëse. Cha motjañënga y šmochanjóyëngacñe, y chca, bëtscá oyejuayana šmochántsebomna ca” —Jesús tojanéyana.

*Jesucristo, quem luarentše mandayábioye yëñjanayá*

25 Mëntsánaca Jesús tojánayana: “Chë soyëngama lempe cuentëngaca tšëngaftanga tcbonjáuyana; pero tempo echanjobuache, chora atše ya ndoñe más cuentëngaca quebochátëtsësnaye; chë cuentna, puerte botamana lempe atšbe Taitabiana cbochanjáuyana.



26 Chë tena, atše jótšëmbonëse, átšbeñe šmošbuachéyeca, atšbe Taitábioye šmochanjotjañe. Y atše cbëyana; chca, chë te ndoñe quešochatájaboto tšëngaftangbiana atšbe Taitá jatsimpadánana.

27 Atše ndoñe quichatsimpadana, er cach Taitá tšëngaftanga cmondábabuanýeshana. Tšëngaftanga atše šmondobonshánama, y Bëngbe Bëtsábiocana atše tijabama šmojtsošbuáchema, chë Taitá cmondábabuanýeshana.

28 Atše chë Taitábiocana sënjábozna y quem luaroye sënjabo. Pero mora quem luare chanjëftsebošhona atšbe Taitábioye jtama ca” —Jesús tojánayana.

29 Chora chabe uatsjëndayënga tmojaniana: —Mora ya ndoñe cuentëngaca quecatoyebuambná, chíyeca lempe paselo josértama bëngbiana entsemna.

30 Mora fsëntsetatšëmbo aca nýetsca soyëngama cotatšëmbuama, y ndoñe quenátsiyta ndocná aca chacmátstjanama, er aca chëngbe juabnënga jtsabuatmana, chënga cabá aca ndëtjaye ora. Chíyeca bënga fsëntsošbuaché aca Bëngbe Bëtsábiocana tcojabama ca —chënga tmojaniana.

31 As Jesús tojanëyana: —¿Mora chiñe šmojtsošbuaché ca?

32 Ya tempo tojjobuache y cam ora entsemna, tšëngaftanga nýetsquénache šmochanjuáshana y atše nýe canýa šmochanjésebošhona. Pero atše ndoñe nýe canýa quichátsmëna, chë Taitá átšeftaca entsëmnayeca.

33 Atše lempe quem soyënga cbontsëtsësná, tšëngaftangbe ainaniñe tšabe ebionana chašmotsebošhona, átšeftaca cánýiñe mo canýacá jtsemnëse. Quem luarentse šmochanjasufrina; pero añemo šmochtsebošhona, atše ya chë quem luarentša mandayá sënjayëñaná ca —Jesús tojánayana.

## 17

*Jesús chabe uatsjëndayëngbiana Bëngbe Bëtsábioye tbojanimpadá*

1 Jesús chë soyënga tojánayanentšana, celoye tojanontješé y Bëngbe Bëtsábioye tbojaniana: “Taita, atšbe te ya tojjobuache. Minýanýé, atše acbe Uaquiñá, corente bëtsá y obená bëtsemnama. As, atše acbe Uaquiñá, aca corente bëtsá y obená comnama chainýanýema.

2 Mora aca nýets obenana šconjatšetá nýetsca entsángbeñe, nýetscanga chë atšbiana tcojábacacanga chë nýetsca tescama yomna tšabe vida chamotsebošhona atše chaimama.

3 Chë nýetsca tescama yomna tšabe vida jtsebošhona endmëna aca, chë nýe canýe y ndegombre Bëngbe Bëtsá jtsabuatmana, y atše Jesucristo, acbe ichmoná.

4 “Lempe ntšamo šconjamandacá atše sënjapochocá, y chca quem luariñe sënjama aca corente bëtšá y obená comnama jïnÿanÿiyama.

5 Taita, quem luare cabá ndoñe quenjatsmëna ora, aca tconjaninÿanÿé atše corente bëtšá y obená ácaftaca bëtsemnama. Mora moma atše cachcá ácaftaca chaitsemnama.

6 “Aca quem luarentša entšanguentshana quem boyabásenga tconjabacacá y atšbiamá šconjinÿinÿé. Atše chënga sënjanÿanÿé ntšamo ndegombre aca comnama. Chënga acbe entšanga mondmëna; y acna, chë atšbiamá chënga šconjinÿinÿiyá. Chënga acbe palabra tmonjouena y tšabá tmonjoyeuná.

7 Chíyeca chënga mondëtatšëmbo, lempe ntšamo atše tsbomncá ácbentshana tijóyëngacñama.

8 Atše chënga sënjáuyana ntšamo aca šcojauyancá, y chënga montsošbuaché chë atše sënjauyaniñe. Chíyeca, chënga ndegombre mondëtatšëmbo atše acbiocana tijabama, y montsošbuaché aca chë atše šcojichmó cha comnama.

9 “Atše chëngbiamá cbontseimpadana. Chë nÿe quem luarama enójuabnaye entšangbiamá ndoñe quecbátsimpadana, pero aíñe chë atšbiamá šcojinÿinÿiyëngbiamá, er chënga acbe entšanga mondmëna.

10 Lempe ntšamo atše tsbomncá, acbiámnaca endmëna; y cachcá, lempe ntšamo cobomncá, atšbiámnaca endmëna. Acbengbe vidëngaca aca tcojinÿanÿé atše corente bëtšá y obená bëtsemnama.

11 “Atše ndoñe quem luarentše quešocháisetotona, pero chënga aíñe cabá camuentše mochanjëftsemna. Atše chantá ácaftaca jtsatsmënama. Uámana Taitá, chë atšbiamá šconjinÿinÿiyënga acbe obenánaca cochtsanÿena. Chca ntšamo bëndata mo canÿacá bondmëna, chëngnaca cachcá chamotsemnama.

12 Atše chëngaftaca sëntsemnëntscuana, chënga sëntsanÿena, aca šconjatšetá obenánaca. Atše chënga sëndánÿena, y ni canÿa queochátsmëna infernoca pochocaná, nÿe chë infernoca pochocaná jtsemnama ibomná chana aíñe, ntšamo acbe uabemana palabrënguiñe endayancá, cachcá chaotsemnama.

13 “Morna chë aca condmënoye chantá; pero atše cabá quem luariñe sëntsemnëntscuana chca chënga sëntsëtsëtsná, chca, chë atše sëntsebmoma puerte bëtscá oyejuayana chëngnaca chamotsebmomnama.

14 Atše chënga sënjáuyana ntšamo aca šcojauyancá. Ntšamo atše ndoñe quetsátsmëna chë nÿe quem luarama enójuabnaye entšanguentsá, cachcá, chënga cach ndoñe quemátsmëna. Chíyeca, chë nÿe quem luarama enójuabnaye entšanga chënga montsëbuayënja.

<sup>15</sup> Atše ndoñe quecbátsimpadana, chënga quem luarentšana chacúbuacanama; pero aíñe, nyetsca bacna soyënguentsana chacuatsebacama.

<sup>16</sup> Ntšamo atše ndoñe quetsátsmëna chë nye quem luarama enójuabnaye entšanguentsá, cachcá, chënga cach ndoñe quemátsmëna.

<sup>17</sup> Cochjama chënga acbe entšanga chamuétsemnama, y chca, nye acbiama vida chamotsebomna. Chca cochjama, ntšamo ndegombre yomncá chënga imoyenama. Ntšamo aca condbetsichamcá, ndegombre endmëna.

<sup>18</sup> Ntšamo aca quem luaroye šconjanichmocá, cachcá átšnaca chënga sentsachamná, quem luare entšanga jábuayenama.

<sup>19</sup> Chëngbiama atše cachiñe mëntsá cbëyana: Atše nye acbiama sëndmëna. Y chca, chëngnaca, ntšamo acbiama ndegombre yomncá jtsóyebuambnayëse acbe entšanga chamotsemna, y chca, nye acbiama vida chamuétsebomna, ntšamo ndegombre yomncá chënga imoyenama.

<sup>20</sup> “Pero nye chëngbiama ndoñe quecbátsimpadana, sinó chë átšbeñe mochtsošbuáchiyëngbiamnaca, chë atšbiama šconjínjinyënga, chëngbioye atšbiama ínÿenga chamojtsabuayiná ora;

<sup>21</sup> as chënga nyetscanga cánÿiñe mo canÿacá chamotsemnama. Ntšamo aca, Taita, átšeftaca cánÿiñe mo canÿacá bondmëna y átšnaca ácaftaca, cachcá chëngnaca cánÿiñe mo canÿacá bëndátaftaca chamotsemnama cbontseimpadana. Y chca, quem luarentša nyetsca entšanga, atše šcojichmoma chamotsošbuáchema.

<sup>22</sup> Ntšamo chë obenana y uámanana šconjatšetacá, cachcá átšnaca chënga sënjatšatá. As, ntšamo bëndata cánÿiñe mo canÿacá bondmëna, chëngnaca cachcá cánÿiñe mo canÿacá chamotsemnama.

<sup>23</sup> Atše chëngbe ainaniñe sëntsemna, y aca átšeftaca cánÿiñe mo canÿacá bondmëna; as, chëngnaca nyetsca soyënguiñe cánÿiñe mo canÿacá chamotsemnama. Y chca, quem luarentša entšanga chamotsetátšëmbo aca šcojichmoma, y chamotsetátšëmbo ntšamo atše šcondbobonshancá, chëngnaca cachcá condábabuanÿeshanama.

<sup>24</sup> “Taita, atšbiama chënga šconjínjinye. Atše mëntsá sëntseboše: chë atše chántsemnoca, chëngnaca chamotsemna, y chentše, chë šconjatšetá obenana y uámanana chënga chámuinye. Quem luare cabá ndoñe quenjatsmëna orscana, šconjánbobonshana; chíyeca, cachora tconjaninÿanÿé atše corente bëtsá y obená bétsemnama.

<sup>25</sup> Taita, nyetsca soyënguiñe tšabá amá, masque chë nye quem luarama enójuabnaye entšanga ndoñe

quecmatábuatma, atše aíñe cbonduábuatma, y quem boyabásenga montsetátšëmbo, aca comna chë šcojichmó cha.

<sup>26</sup> Atše chënga sënjinÿanÿé ntšamo ndegombre aca comnama, y más chanjínÿanÿiye; chca, ntšamo šcondbobonshancá, chëngnaca cachcá chamotsenbobonshánama y atše chëngbe ainaniñe chaitsemnama ca” —Jesús tojánayana.

## 18

*Uayayënga Jesús tmojánishache*

*(Mt 26.47-56; Mc 14.43-50; Lc 22.47-53)*

<sup>1</sup> Chë soyënga Jesús tojëftsanayanentsana, chabe uatsjëndayëngaftaca tojëftsanbocna, chë binche bėjaye Cedrón ca uabáiniye chenguana jama. Chentše inamna canÿe tjashetema; y Jesús chabe uatsjëndayëngaftaca choye tojánamengo.

<sup>2</sup> Y Judas, chë Jesús uayayëngbe cucuatšične boshjuaná, tšabá chë luare yojanábuatma, er Jesús y chabe uatsjëndayënga ba soye chentše imojánenefjuana.

<sup>3</sup> Chora Judas tojánashjango, y cháftaca ba soldadënga y básefta Bëngbe Bëtsabe bëts yebnoca josticiënga; chënga imojamna chë bachnangbe amëndayënga y fariseungbe ichmónënga; nÿetscanga uajuinÿanëšhangaca, lamparëšhangaca y espadëjangaca uajátënga.

<sup>4</sup> Jesusna yojtsetátšëmbo lempe ntšamo cha yochjanpásama; chíyeca, natsanoye tojánbocna y chë entšanga tojanëyana: —¿Nda šmojtsenguá ca?

<sup>5</sup> Y chënga tmojanjuá: —Jesús, chë Nazaretocá fsëntsenguá ca.

As Jesús tojanëjua: —Atše cha sëndmëna ca.

Y Judas, chë boshjuaná, chánaca chë entšángaftaca yojtsemna.

<sup>6</sup> Jesús tojanëyana: “Atše cha sëndmëna ca”, y cachora chë entšanga tmojtanostëtsánanga y fshantsoye tmojánshajaye.

<sup>7</sup> Chora Jesús cachiñe tojanatjá: —¿Nda šmojtsenguá ca?

Y chënga tmojanjuá: —Jesús, chë Nazaretocá ca.

<sup>8</sup> As Jesús tojanëyana: —Ya tcbonjáuyana: “Atše cha sëndmëna ca.” Atše šmojtsenguasna, mënga cachcá šmochjónÿaye chamotsóñengama ca.

<sup>9</sup> Chca tojanopasá, ana ntšamo Jesús tojanayancá cachcá chaotsemnama, chë “Atšbe Taitá Bëngbe Bëtsá, chë šconjínÿinÿiye entšanguentsana ni canÿa pochocaná queochátsmëna ca”.

<sup>10</sup> Simón Pedro canÿe espadëja inasëngbuájonÿana; asna, tojanenosëngbotëntšena y chë bachnangbe más uámana

amëndayabe canÿe oservenábioye catšbioica matscuaše tbojtsaněštjango. Chë oservená Malco ca inauabaina.

<sup>11</sup> As Jesús, Pédrëbioye tbojanijana: “Acbe espadëja matosëngbuajonÿá. Ntšamo atšbe Taitá Bëngbe Bëtsá tojanmandacá, chë atše puerte ngmënana jtsebomnama, ¿ndoñe chca chaondětsemna ca?”

*Jesús, Anasbe yebnoca*

*(Mt 26.57-58; Mc 14.53-54; Lc 22.54)*

<sup>12</sup> Chentsana chë soldadënga, chëngbe amëndayá y Bëngbe Bëtsabe bëts yebnoca josticiënga Jesús tmojánishache y tmojanëcuéatsëca.

<sup>13</sup> Natsanëna, Anás, Caifasbe uambén taitábioye Jesús tmojanánatse. Caifás chë uata inamna chë bachnangbe más uámana amëndayá.

<sup>14</sup> Caifás yojamna nda judiënga tojanëyana: “Tšëngaftangbiana más tšabá entsemna canÿe boyabása Israeloca entšangbiana chaóbana ca.”

*Pedro tojánayana Jesúsbioye ndoñe bonjanabuátma ca*

*(Mt 26.69-70; Mc 14.66-68; Lc 22.55-57)*

<sup>15</sup> Simón Pedro y inÿe uatsjendayá Anasbe yebnoye Jesús imojtsëstona. Chë inÿe uatsjendayábioyna, chë bachnangbe más uámana amëndayá ibnauábuatma; chíyeca, cha tojanobená Jesúseftaca chabe chashjóntscoñe jashjanguana.

<sup>16</sup> Pero Pédrëna nÿe shjoca, amashjuanentše tojanoquedá. Chcasna, chë inÿe uatsjendayá tojánbocna y chë bëššása ebtafjuana shembásaftaca tojanoyebuambá. Chora Pedro tbojanëmashëngo.

<sup>17</sup> As chë shembása Pédrëbioye tbojanijana: —¿Acnaca ndoñe chë boyabásabe uatsjendayá condmëna ca?

Y Pedro tbojanjuá: —Ndoñe; atše cha ndoñe quetsatabuatma ca.

<sup>18</sup> Tša yojtsesësna causna, chë oservénënga y chë josticiënga shjoca tmojanniñe y chentše imojtósboniye. Y Pédrënaca chëngaftaca yojtšëšbonena.

*Ntšamo chë bachnangbe más uámana pasado amëndayá, Jesúsbioye tbojantjá*

*(Mt 26.59-66; Mc 14.55-64; Lc 22.66-71)*

<sup>19</sup> Chora, chë bachnangbe más uámana pasado amëndayá tojanontšë Jesús jatjayama chabe uatsjëndayëngbiana y ndayá cha entšanga yojánabuatambamnaca.

<sup>20</sup> Y Jesús tbojanjuá: —Atše nÿetsca entšangbe delante sënjoyebuambá. Sempre chë entšangbe enefjuana yebnënguenache sëndabuatambá, y Bëngbe Bëtsabe bëts

yebnócnaca, n̄yetsca judiēnga mondbétsenefjuanentšē; y chca, iytēmencá tondaye chiyatoyebuambá.

<sup>21</sup> ¿Ndáyeca chca šcojstsetjaná? Atšbe palabra tmojouenēnga májtaye, as chēnga chacmēyana ntšamo atše tijáuyana. Chēnga mondētatsēmbo ntšamo atše tijayancá ca —Jesús tbojanjuá.

<sup>22</sup> Jesús chē soyēnga tojánayana ora, can̄ye josticio chentšē yojtsemná, Jesúsbiōye tbojanjuebjantšetá y tbojaniyana: —¿Chca chē bachnangbe más uámana amēndayá cuanjojuá ca?

<sup>23</sup> Y Jesús tbojanjuá: —Ndoñe tšabá tijayanēsna, šmēyana ndayentšē chē podesca palabra yojtsemna; y tšabá tijóyebuambasna, ¿ndáyeca šcojajuebjantšetá ca?

<sup>24</sup> Chentšana, Anás tojanmandá, chē bachnangbe más uámana amēndayá Caifasbe yebnoye, Jesús batsēcná chamuánatsama.

*Pedro cachiñe tojánayana Jesúsbiōye ndoñe bonjanabuátma ca (Mt 26.71-75; Mc 14.69-72; Lc 22.58-62)*

<sup>25</sup> Chēntscuana, Pedro yojtsešbonena, tsanana chē iñe juachaca. Chora chē entšanga tmojantjá: —¿Aca ndoñe chabe uatsjendayēnguentšá condmēna ca?

Y Pedro ndoñe ca tojánayana: —Atše ndoñe quetsátmēna ca —cha tojánayana.

<sup>26</sup> Chora, chē bachnangbe más uámana amēndayabe can̄ye oservená Pédrēbiōye tbojaniyana: —¿Atše ndoñe cháftaca chē tjashetémoca tcbonjin̄ye ca?

Chē oservená inamna chē Pedro tbojtsanmatstētšabe pamillo.

<sup>27</sup> Y Pédrēna cachiñe ndoñe ca tojánayana, y cachora can̄ye gallo yojacánta.

*Jesús Pilatbe delante*

*(Mt 27.1-2, 11-14; Mc 15.1-5; Lc 23.1-5)*

<sup>28</sup> Chentšana, Caifasbe yebnentšana Jesús tmojanánatse chē romano mandadbe yebnoye. Ya yojtsebín̄yana, y chē bēts yebnoye chē judiēnga ndoñe tmonjánamashjna, er chēnga imojtseboše chē Bashco saná jasama. Judiēnga ndoñe imonjobena Bashco saná jasana, chca tempo can̄ye ndoñe judiēbe yebnoye nda tojámashēnguse.

<sup>29</sup> Chíyeca Pilato tojánbocna y chēnga tojanēyana: —¿Ndayá quem boyabásabe contra šmochjayana ca?

<sup>30</sup> Chora chē entšanga tmojanjuá: —Bacá uamaná ndoñe tontsemnēse, ndoñe matifjuánatse ca.

<sup>31</sup> As Pilato tojanēyana: —Tšēngaftanga matánatse, y ntšamo cach tšēngaftangbe leyiñe iuayancá muabiana šmochjayana tšabá o ndoñe tšabá tonjamama ca.

Y chë judiënga tmojanjuá: —Bënga derecho queftsátsbomna ndocná jóbama ca.

<sup>32</sup> Chca tojanopasá, ana ntšamo Jesús cachá jóbanama tojanayancá cachá chaotsemnama.

<sup>33</sup> As Pilato cach yebnoye tojtanamáshëngo, Jesús tbojanchembo y tbojantjá: —¿Aca chë judiëngbe Rey cojtsemna ca?

<sup>34</sup> Y Jesús tbojanjuá: —¿Ntšamo šconjatjacá, cach aca chca cojtsejuabnáyeca chca yojtsemna o ínÿenga atšbiama tcmo-jacuentáyeca ca?

<sup>35</sup> Chora Pilato tbojaniana: —¿Mo atše judío quetsmëna? Cach ácbioca entšanga y chë bachnangbe amëndayënga muentše tcmonjúshjango. ¿Ndayá tcojama ca?

<sup>36</sup> Chora Jesús tbojanjuá: —Atšbe jamándama luare ndoñe quem luarentše quenátsmëna. Aíñe tojtsemnësna, atšbe ústonënga muantsatsejaye atše chë judiëngbe cucuatšinë ndoñe chašmondboshjonama. Pero atšbe jamándama luare ndoñe quem luarentše quenátsmëna ca —Jesús tbojanjuá.

<sup>37</sup> As Pilato tbojaniana: —¿As aca rey cojtsemna ca?

Y Jesús tbojanjuá: —Tšabá tcjayana; atše rey sëndmëna. Chama atše tijonÿná y quem luaroye tijabo; y atše sënjabo ndegombre soyëngama jabóyebuambayama. Y chca soyënga jtsamëse tmoyenënga, atše jtseyeunanana ca.

<sup>38</sup> Chora Pilato tbojaniana: —¿Y ndayase chë ndegombre soye yomna ca?

*Jesusbiana tmojánayana chaóbana ca*

*(Mt 27.15-31; Mc 15.6-20; Lc 23.13-25)*

Chca tbojantjá chentšana, Pilato cachiñe tojánbocna judiëngaftaca jóyebuambayama, y tojanëyana: —Atše ni mo canÿe soye chiyátinÿena, quem boyabása castigana chaotsemna ca jayanama.

<sup>39</sup> Pero tšëngaftanga šmondétatsëmbo, Bashco fiestama atše canÿe utamená cachcá jëtsboshjonama. ¿Šmojtseboše chë judiëngbe Rey chjëtsboshjona ca?

<sup>40</sup> Chorna nÿetsca entšanga cachiñe tmojanáyebuachena: —¡Ndoñe, cha ndoñe! ¡Barrabás matsboshjona ca!

Barrabasna canÿe bacá uamana entšá inamna.

## 19

<sup>1</sup> Chora Pilato, Jesús tbojanánatse y tojanmandá chamotsetjanjama.

<sup>2</sup> Y canÿe coronësha uchmašëfjangaca chë soldadënga tmojanapormá y Jesús tmojanabestšajó; y canÿe shbuenda uafjat-senga entšayá mo reycá tmojanichëtjo.

<sup>3</sup> Chorna chënga imojtsóbobecocnaye y jtsafchayama imojtsatsëtsnaye: “¡Bayté judiëngbe Rey cochtsemna ca!” Y imojtsejuebantsetaye.

<sup>4</sup> Pilato cachiñe tojánbocna y entsanga tojanëyana: —Smochjouena; cha chanjuábocna, chë boyabása castiganá chaotsemna ca jayanama atse ni mo canye soye ndoñe sënjinÿenama chašmotsetatšëmbuama ca.

<sup>5</sup> As Jesús tojánbocna chë uchmašëfjangaca coronësha uabestšajoná y chë shbuenda uafjatsenga entsáyá mo reycá uichëtjoná. Y Pilato tojanëyana: —¡Muentše chë boyabása entsemna ca!

<sup>6</sup> Chë bachnangbe amëndayënga y chëngbe josticiënga cha tmojáninÿe ora, tmojanontšë uayebuáchana: —¡Motsecrucificá! ¡Motsecrucificá ca!

Chora Pilato tojanëyana: —Cach tšëngaftanga mánatse y šmochjacrucifíca; atse ni mo canye soye chiyátinÿena quem boyabása castiganá chaotsemna ca jayanama ca.

<sup>7</sup> Chora chë judiënga tmojanjuá: —Bëngna canye ley fsëndbomna, ntšamo chiñe endayancana, quem boyabása jóbanama bontsemna, Bëngbe Bëtsabe Uaquiñá entsenobiamná causa ca.

<sup>8</sup> Pilato chca tojanuena ora, más yojtsauatja.

<sup>9</sup> Cachiñe chabe yebnoye tojtanamáshëngo y Jesús tbojantjá: —¿Ndëmocá aca cmëna ca?

Pero Jesús ndocá tbonjanjuá.

<sup>10</sup> Chora Pilato tbojaniana: —¿Ndoñe šcochanjojuá ca? ¿Ndoñe condëtatšëmbo, aca jacrucificama o jëtsboshjonama atse tsobenama ca?

<sup>11</sup> As Jesús tbojanjuá: —Acbe obenana Bëngbe Bëtsá ndoñe macmënjánatsetase, tondaye cattsobena átšeftaca jamama; chíyeca, acbe cucuatšíñe šonjaboshjoná, acbiama más bëts bacna soye tonjama ca.

<sup>12</sup> Cach orscana Pilato yojtsenguaye ntšamo jamana, jobenayama Jesús jëtsboshjonama; pero chë judiënga imotsáyebuache: —¡Chacojëtsboshjonešna, Césarbe amigo ndoñe condmëna! ¡Nda rey tojtsenobiamná chana, Césarbe uayayá jtsemnana ca!

<sup>13</sup> Pilato chë soyënga tojanuena ora, chashjoye Jesús tbojanábocna. Pilato tojanótbema chabe puententše tribunaloca. Chë tribunaloca chashjañna hebreo biyañe Gabata ca inauabaina, y endayana “ndëtsbéngaca pormániñe ca”.

<sup>14</sup> Bashco fiestama canye te yojtsájamna, y mo nÿetsto ora yojtsemna. Chora Pilato chë judiënga tojanëyana: —¡Muentše tšëngaftangbe rey entsemna ca!

<sup>15</sup> Pero chënga tmojanáyebuachena: —¡Chaóbanal! ¡Chaóbanal! ¡Motsecrucificá ca!



As Pilato tojanatjá: —¿Tšëngaftangbe rey atše chjacrucificá ca?

Y chë bachnangbe amëndayënga tmojanjuá: —Bëngbe rey nyë César endmëna, ndocná más ca.

<sup>16</sup>Chentšana Pilato, chëngbe cucuatsiñe Jesús tbojánboshjona chamocrucificama y chë judiënga cha tmojanánatse.

### *Jesús tmojancrucificá*

*(Mt 27.32-44; Mc 15.21-32; Lc 23.26-43)*

<sup>17</sup>Jesús tojánbocna chabe cruz tantšajónana y tmojanánatse canye luaroye, “Obanabe Bestšashe ca” uabáinoye (hebreo biyañe Gólgota ca inauabaina).

<sup>18</sup>Chentše cha tmojancrucificá y inye útatnaca cátaoica tmojanacrucificá; Jesusna tsëntsaca.

<sup>19</sup>Pilato tojanmandá canye uabemana soye chë cruciñe chamuanjuama. Chiñe yojetsábemana: JESÚS NAZARETOCÁ, JUDIËNGBE REY ca.

<sup>20</sup>Y ba judiënga chë uabemana soye tmojanalía, er chë Jesús tmojancrucificá luare Jerusalenó béconana inamna, hebreo, latín y griego biyañe yojetsábemana.

<sup>21</sup>Chca juabemana tojanmandáyeca, chë bachnangbe amëndayënga Pilato tmojanianya: —Ndoñe matabiamnana “Judiëngbe Rey” sinó ntšamo cachá tojayancá, “Judiëngbe Rey atše sëndmëna ca”.

<sup>22</sup>Pero Pilato tojanëjua: —Ntšamo tijuábema cachcá chaotsábemana ca.

<sup>23</sup>Chë soldadënga Jesús tmojancrucificá chentšana, chabe entšayangá tmojanájaca y cántañe tmojanajatá, nyetsca canta soldadëngbiama. Chabe cmešëjua tmojanaca; chëjuana yojanamna nduajonanëjua, nyetsëjua uabianánëjua.

<sup>24</sup>As chë soldadënga tmojáneniyana: “Ndoñe matjuátanëca; más tšabana tsbanánoye mochjútšena, ndabiama yochjuáquedama chaotsotatšëmbuama ca.”

Chca tojanopasá ana ntšamo Bëngbe Bëtsabe uabemana palabrenguiñe endayancá cachcá chaotsemnama, chë “Atšbe entšayangá tmojatenájataye; atšbe cmešëjuamna tsbanánoye tmonjanëtšena, ndabiama jauquédama jtsotatšëmbuama ca.” Y lempe chca chë soldadënga tmojanma.

<sup>25</sup>Jesusbe cruz juachaca imojtsemna chabe mamá; chë mamabe quenata María, Cleofasbe shema; y María Magdalena.

<sup>26</sup>Jesús chabe mamábioye tbojáninye, y chabe juachacna chë Jesusbe bonshana uatsjendayá yojtsemna. Chora chabe mamá tbojanianya: “Mama, chentše acbe uaqiñá entsemna ca.”

27 Y chë bonshana uatsjendayá tbojanianyana: “Chentše acbe mamá entsemna ca.”

Cach orscana, chë uatsjendayá chabe yebnentše Jesusbe mamábioye tbojanofja.

*Jesús tojanóbana*

(Mt 27.45-56; Mc 15.33-41; Lc 23.44-49)

28 Jesús yojtsetátšëmbo ya lempe tojanchnënguama, chíyeca chentšana y ntšamo Bëngbe Bëtsabe uabemana palabrenguifne endayancá cachcá chaotsemnana, tojánayana: “Sontsajuendá ca.”

29 Chentše inamna canye matbaja buajútjena untja vínoyeca. As, chë soldadënga canye esponjëshe chë vínoyeca tmojanfcheacuacú, canye hisopo niñëfjiñe tmojananguësëtjo y játsbanase, Jesusbe uayásoye tmojanbeconá.

30 Chë untja vínoye Jesús tojanofsé ora, tojánayana: “Ya lempe tocjochnëngo ca.”

Tojanotsejbé y tojanóbana.

*Canye soldado chabe lanzësaca costillaca Jesúsbioye tbojanashacuá*

31 Bashco fiestama canye te yojtsájamna, y chë judiënga ndoñe imontseboše chë crucificánënga cachentše chë ochnayté chamotsemnana, chë te puerte uámana te bétsemnayeca. As Pilato tmojanimpadá chë crucificánënga shecuatšënga jetsatcacayama y chë cuerpënga chentšana jtsejuánama chaomandama.

32 As chë soldadënga tmojána y shecuatšënga imojtsatcayey, natsana canya y chentšana chë inya, Jesúsëftaca yojtse-crucificaná.

33 Pero Jesúsbioye tmojanobeconá ora, ya obaná tmojáninye; chíyeca chabe shecuatšënga ndoñe tmonjanatcacá.

34 Masque chca, canye soldado Jesúsbioye costillaca canye lanzësaca tbojanashacuá. Y cachora buifne y búyeshë chentšana tonjanóbocna.

35 Chë mëntšá cuentayá chentše enjamna y tonjáninye, y ndegombre entsichamo; cha endëtatsëmbo ndegombre yojtsichámuama, chca, tšëngaftángnaca chiñe chašmotsošbuáchema.

36 Chë soyënga chca tojanopasá, ntšamo Bëngbe Bëtsabe uabemana palabrenguifne endayancá cachcá chaotsemnana. Chiñe endayana: “Ni mo canye betaše cha quemochatsëntšátca ca.”

37 Y ínÿoca, Bëngbe Bëtsabe uabemana palabrenguifne endayana: “Chë tmojenachentšá bominye mochanjabuájua ca.”

*Jesús tmojanatbontsá**(Mt 27.57-61; Mc 15.42-47; Lc 23.50-56)*

<sup>38</sup> Chë soyënga tojanopasá chentšana, José Arimateocá, Pilátbïoye tbojanimpadá Jesusbe cuerpo jesocñama chabolesenciama. José inamna Jesusbe canye ustoná, masque nÿe iytëcana, chë judiëngbiama auatja causa. Pilato aïñe tbojanlesenciá; as José tojána y Jesusbe cuerpo yojtsámbañe.

<sup>39</sup> Nicodemo, chë ibeta Jesúsbiyoye tbojanbuachá, chánaca tojánashjango y tojanëyamba unga bnëtsana kilo mirra y áloe enájuabnana.

<sup>40</sup> As José y Nicodemo Jesusbe cuerpo tbojanca y tmojanandmaná chë botamana uanguëtse soyëngaca unëtjona entsëjuangaca. Judiënga chca imnauamana, obaná juatbontsama ora.

<sup>41</sup> Jesús tmojan crucificá luarentse canye base jajañe inamna, y chiñe canye tsëm cuevëshe, entsangbe pormánëshe, obanëngbiama; chëshiñe cabá ndocna obaná mondëjajo.

<sup>42</sup> Asna, nÿe chentse Jesusbe cuerpo tmojansegorá, chë Bashco fiestama canye te yojtsájamma causa, y chë cuevëshe chë béconana inámnayeca.

**20***Jesús tojtanayena**(Mt 28.1-10; Mc 16.1-8; Lc 24.1-12)*

<sup>1</sup> Chë inÿe semana bojatsenté, cabá cachëse, cabá ndëbinÿna ora, María Magdalena chë cuevëshoye tojána y tojáninÿe inÿoca yojtsemna chë cuevëshoye amashjuanentsa ndëtsbé.

<sup>2</sup> Asna, tojëftsanótjajo y tojána chë Simón Pedro y chë inÿe uatsjendayá, ndábïoye Jesús tša ibnabobonshana ibojtsemnoye. Chora tojanëyana: “Bëngbe Utabnabe cuerpo chë cuevëshentsana tmojtsámbañe y ndayentse tmotsejájoma ndoñe queftsátstatšëmbo ca.”

<sup>3</sup> Chora Pedro y chë inÿe uatsjendayá chentšana tbojëftsanbocna y chë cuevëshoye tbojánata.

<sup>4</sup> Nÿets útata ibojtsëchamana, pero chë inÿe uatsjendayá Pédrëbiama más betscó tojanótjajo y natsana chë cuevëshoye tojánashjango.

<sup>5</sup> Tojanotsejbé y chë chentse tmojanacjá entsëjuangá tojáninÿe, pero choye ndoñe tonjánamashëngo.

<sup>6</sup> Chentšana, Simón Pedro chabe ústonoye tojánashjango y chë cuevëshoye tojánamashëngo, y tojáninÿe chë chentse tmojanacjá entsëjuangá.

<sup>7</sup> Y chë Jesús juabestšëntsacjuama tojanaservé entsëjuana ndoñe chë inÿájuangaca yontsamna, sinó inÿoca botamana uandmanánëjua.

<sup>8</sup> Chora chë inÿe uatsjendayá, chë cuevëshoye natsana tojanashjanguá, choye tojánamashëngo. Tojáninÿe y Jesús tojtanayenama yojtsanošbuaché.

<sup>9</sup> Chëntscoñe chë útata cabá ndoñe yontsósertana ntšamo Bëngbe Bëtsabe uabemana palabrenguiñe endayancá, chë Jesús obanënguentsana jtayenama ibojamnama.

<sup>10</sup> Chentsana chë uatsjéndayata chatbe oyenoye tbojtaná.

*Jesús, María Magdalénbioye tbojánebëbocna*

*(Mc 16.9-11)*

<sup>11</sup> Pero María chentše tojanoquedá, chë cuevëshe juachaca šachénaca; yojtsošachentscuana tojanotsejbé cuevëshoye jarrepárama.

<sup>12</sup> Y tojáninÿe uta angelotémata uafjantsëjua uichëtjonata, Jesusbe cuerpo yojëftsejajóntše ibojtsetbemana. Canÿa tsëntšénëshoica y chë ínÿana matsësoica.

<sup>13</sup> Chora chata tmojanियana: —Shembása, ¿ndayama cošaché ca?

As cha tojanjuá: —Atšbe Utabná tmojtsámabañe, y ndayentše tmojtsejájoma ndoñe quetsátstatšëmbo ca.

<sup>14</sup> Chca tojánayana ora, tojanostëtsantješé y tojáninÿe chentše Jesús yojtsemna, pero María ndoñe yontsetátšëmbo cha Jesús bëtsemnama.

<sup>15</sup> Chora Jesús tbojanियana: —Shembása ¿ndayama cošaché? ¿Nda congua ca?

María yojtsejuabnaye chë boyabásana yojtsemna chentša base jajañe uaishanÿa ca; chíyeca tbojantjá: —Bacó, aca tcojuambësna, šmëyana ndayentše cojtsejajó, as atše cha jesocñama ca.

<sup>16</sup> As Jesús tbojanियana: —¡María ca!

Chora María chábioye tojanontješé y tbojanियana: —¡Rabuni ca! (hebreo biyañe chca endayana “Buatëmbayá ca”).)

<sup>17</sup> Chora Jesús tbojanियana: —Ndoñe šcatábojajo, er atše cabá ndoñe atšbe Taitábioye quetstëtstsjua. Pero motsa atšbe catšátangbioye y cochjáuyana, atše stsetsjuá atše y tšëngaftangbe Bëtsábioye, atše y tšëngaftangbe Taitábioye ca.

<sup>18</sup> As María Magdalena tojána y Jesusbe uatsjéndayënga tojanëyana cha chë Utabnábioye tbojáninÿe ca y cha chë palabrenga tojánayana ca.

*Jesús chabe uatsjéndayënga tojánebëbuacna*

*(Mt 28.16-20; Mc 16.14-18; Lc 24.36-49)*

<sup>19</sup> Tojanibétata ora, cach semana bojatšenté, chë uatsjéndayënga tmojánenefna canÿe luarentše, pero lempe tmojtanatame, chë judiëngbiama auatja causa. Chora Jesús tojánamashëngo, chëngbe tsëntsaca tojantsá y

mëntšá tojanacheuá: “Chë atšbe ainaniñe tšabe ebionana tšëngaftangaftaca chaotsema ca.”

20 Y chca tojanëyana ora, chabe cucuatšënga y costillaca tojaninÿanyé. Chora chë uatsjëndayënga oyejuayënga imojtsemna, chëngbe Utabná tmojáninÿama.

21 As Jesús cachiñe tojanëyana: “Chë atšbe ainaniñe tšabe ebionana tšëngaftangaftaca chaotsemna. Ntšamo atšbe Taitá Bëngbe Bëtsá šojichmocá, átsnaca cachcá tšëngaftanga cbontšachamná ca.”

22 Chca tojánayana ora, chëngbioye tojangouo y tojanëyana: “Chë Uámana Espíritu šmochjójyëngacñe.

23 Ndëmuanÿënga chëngbe bacna soyëngama chašmojáperdonanga, perdonánënga mochántatsmëna; y ndoñe chašmonjáperdonasna, ndëperdonánënga mochántsemna ca.”

*Tomás, Bëngbe Utabnábioye ainá tbojáninÿe*

24 Pero Tomás, chë Gemelo ca uabobainá, canÿa chë bnëtsana uta uatsjëndayënguentsá, chë uatsjëndayëngaftaca ndoñe yontsemna, Jesús tojánashjango ora.

25 Chíyeca, “bënga chë Utabná fsënjinÿe ca”, chë inÿe uatsjëndayënga tmojanियana ora, Tomás tojanëjua: “Atše chabe cucuatšinë chë uajabonjana uinÿiniñe ndoñe sënjinÿe, y chiñe atšbe ntšabuafja ndoñe sënjajué y atšbe cucuatše chabe costillaca ndoñe, ndoñe quichátošbuachiye ca.”

26 Canÿe semana tojanochñëngo ora, chë uatsjëndayënga cachiñe canÿe luarentše tmojánenefjna. Y Tomásnaca chëngaftaca yojtsemna. Masque chentše atámeniñe yojtsemna, Jesús tojánamashëngo, chëngbe tsëntsaca tojantsá y tojanëyana: —Atšbe ainaniñe tšabe ebionana tšëngaftangaftaca chaotsemna ca.

27 Chora Tomásbioye tbojanियana: —Acbe ntšabuafja muentše mojué y atšbe cucuatše minÿe; acbe cucuatše miyëbo y atšbe costillaca mojué. Y ndošbuachiyá ndoñe matsmënana, sinó atše tijtayanama cochtsošbuáchiye ca.

28 As Tomás tbojanियana: —¡Atšbe Utabná y atšbe Bëtsá ca!

29 Chora Jesús tbojanियana: —Tomás, nÿe šconjínÿeyeca cojtsošbuaché. ¡Bëngbe Bëtsá chaoma puerte oyejuayënga chamotsemna chë nÿe ntjinÿcá tmojošbuachenga ca!

*Ndayama quem librëša tmojanábema*

30 Jesús, chabe uatsjëndayëngbe delante inÿe bëts soyënga Bëngbe Bëtsabe obenánaca tonjëftsema, pero quem librëšañe ndoñe quenatábemana.

31 Y quem librëšañe soyëngna, entsábemana tšëngaftanga chašmotsošbuáchema, Jesús, chë Cristo y Bëngbe Bëtsabe Uaquiñá bëtsemnama; y chcase, chábeñe

chašmojtsošbuachese, chábeyeca chë nyjetsca tescama yomna tšabe vida chašmotsebonnama.

## 21

*Jesús, canýsëfta chabe uatsjéndayënga tojánebëbuacna*

<sup>1</sup> Chca tojanopasá chentšana, Jesús inýe soye chabe uatsjéndayënga tojánebëbuacna, Tiberias mar béjaye tsachañe. Chora mëntšá tojanopasá:

<sup>2</sup> Cánýentše imojétsemna Simón Pedro; Tomás, chë Gemelo ca uabobainá; Natanael, chë Galilea luarocá, Caná pueblocá; Zebedeobe uaquiñata y Jesusbe inýe uta uatsjéndayata.

<sup>3</sup> Simón Pedro chënga tojanëyana: —Sëntsá beonga jashebuáyama ca.

As chënga tmojanjuá: —Bëngnaca ácaftaca fchanjá ca.

As tmojána y canýe barquëshoye tmojánamashjna; pero chë ibeta tondaye tmonjáninýena.

<sup>4</sup> Ya yojtsebínýana orna, Jesús chë tsachoca yojtsemna, pero chë uatsjéndayënga ndoñe imontsetátšëmbo cha Jesús yojamnama.

<sup>5</sup> Chora Jesús tojanatjá: —Básenga, ¿tondaye šmonjashbuá ca?

Y chënga tmojanjuá: —Tondaye ca.

<sup>6</sup> As Jesús tojanëyana: —Barquëshu catšbioica chë atarriëshu mëtsëna y beonga šmochanjáshebuaye ca.

As chënga chca tmojanma, y chora chëshu jtabocnama ndoñe imontsobena, nyetšá beonga tmojánishëche causa.

<sup>7</sup> As chë Jesusbe bonshana uatsjendayá, Pédrëbioye tbojaniana: “¡Bëngbe Utabná entsemna ca!”

Simón Pedro chca soye tojanuena y cachora entšayá tojtaníchëtjo, er nduichëtjoná yojtsemna, y chë béjayoye tojanoshbuetše.

<sup>8</sup> Chë inýe uatsjéndayëngna chë barquëshañe tmojána, y chë atarriëshu jútjena beóngaca imojtsásjaye, er chë tsachocama bécoñe imojtsemna, nýe canýe patse metroca.

<sup>9</sup> Fshantsoye tmojánastjajna ora, chënga tmojáninýena canýe chebániñe pormániñe, y chentšna canýe beona y tandëšnaca yojtsegorana.

<sup>10</sup> Chora Jesús tojanëyana: “Chë šmonjáshebuaye beonguentšana báseftanga miyëbo ca.”

<sup>11</sup> Simón Pedro chë barquëshoye tojánamashëngo, y chë atarriëshu jútjena bëts beóngaca, uasjojónana tsachóntscoñe tojanëyamba. Mo canýe patse y shachna bnëtsana y unga beóngaca; pero masque nyetšá beonga, chë atarriëshu ndoñe ntjuatanëcanana.

<sup>12</sup> Chora Jesús tojanëyana: “Mabënga, šmochjase ca.”

Chë uatsjéndayënguentshana ni canya yontsenñémua cha jat-jayama nda cha yojamnama, er nyetscanga imojtsetátšëmbo cha chë Utabná bétsemnama.

<sup>13</sup> Chora Jesús tojanobeconá, chë tandëse tojanca y chënga tojanatšatá, y chë beónacnaca cachcá tojanma.

<sup>14</sup> Chóracna, Jesús ya unga soyama chabe uatsjéndayënga yojsanebëbuacana, obanënguentshana tojtanayenentshana.

*Jesús, Simón Pédroftaca tojanoyebuambá*

<sup>15</sup> Jasama tmojanpochocá ora, Jesús, Simón Pédrëbioye tbojantjá: —Simón, Juanbe uaquiñá, ¿quemëngbiama más quešcbobonshana ca?

Y Pedro tbojanjuá: —Atšbe Utabná, aíñe. Aca condëtatšëmbo atše aíñe cbondbobonshánama ca.

As Jesús tbojaniana: —Atšbe entsanga, mo oveshatemëngcá imomnënga, cochtsanÿena ca.

<sup>16</sup> Chora cachiñe tbojantjá: —Simón, Juanbe uaquiñá, ¿quešcbobonshana ca?

Y Pedro tbojanjuá: —Atšbe Utabná, aíñe. Aca condëtatšëmbo atše aíñe cbondbobonshánama ca.

As Jesús tbojaniana: —Atšbe entsanga, mo oveshëngcá imomnënga, cochtsanÿena ca.

<sup>17</sup> Y unga soyama tbojtëtantjá: —Simón, Juanbe uaquiñá, ¿quešcbobonshana ca?

Pedro puerte tbojanongmé, ya unga soyama “quešcbobonshana ca” tbonjantjá causa; y tbojanjuá: —Atšbe Utabná, aca lempe condëtatšëmbo. Aca condëtatšëmbo atše aíñe cbondbobonshánama ca.

As Jesús tbojaniana: —Atšbe entsanga, mo oveshëngcá imomnënga, cochtsanÿena.

<sup>18</sup> Ndegombre cbëyana: Más bobontse conjamna ora, conjanamana cach aca jtichëtjuana y ndëmoye jama cojtseboše choye jtsoñana; pero tanguá chacojtsemna orna, buacu-atšënga cochanjatsbaná, y inya cmochantichëtjo y ndëmoye jama ndoñe chacontseboše choye cmochanjuánatse ca —Jesús tbojaniana.

<sup>19</sup> Chca tojánayana, ana jtsotatsëmbuama ntšamo Pedro jóbanama ibojamnama, y chë chca jóbanëse, Bëngbe Bëtsá corente bëtsá y obená bétsemnama Pedro yochjáninÿanÿiyama. Y chca tojánayanentshana, Pédrëbioye tbojaniana: —Smasto ca.

*Jesusbe bonshana uatsjendayá*

<sup>20</sup> Pedro tojesanenostëtsantješé y tojáninÿe, Jesusbe bonshana uatsjendayá ústonoye yojsaye. Cha enjamna chë monjansá ora, Jesús cabá ndóbana ora, chë Jesúsbioye más tonjanosjoná y tbonjantjá: “Bëngbe Utabná, ¿nda chë boshjuaná yochtsemna ca?”

21 Pedro chábioye tbojáninÿe ora, Jesúsbioye tbojantjá: — Atšbe Utabná, y cháftaca, ¿ntšamo yochjopása ca?

22 Chora Jesús tbojanjuá: —Atše quem luaroye jesabáměntscuana cha ainá chauesomñama atše stsebošěse, ¿aca ndayá chama cmatjátsěntšamna? Acna nÿe šmasto ca.

23 Chíyeca, chentšana, Jesucristbeñe ošbuáchiyěngbenache nÿetscanga imojánichamo, chě uatsjendayá ndoñe yochanjanóbana ca. Pero Jesusna ndoñe chca tonjánayana, sinó “atše quem luaroye jesabáměntscuana cha ainá chauesomñama atše stsebošěse, ¿aca ndayá chama cmatjátsěntšamna? ca”.

24 Mua endmēna chě uatsjendayá; cha entsichamo quem soyēnga ndegombre yojamnana, y camuá quem librěšañe lempe tonjuábema. Y bēnga mondětatsēmbo cha ndegombre soye endóyebuambnana.

25 Jesús inÿe ba soyēnga tonjëftsema; tša bětscá soyēnga endmēna, nderado lempe cada canÿe soye tcojuábema y librěsangá tcojuapormá, atše sěntsejuabná, nÿetsca chěsangá quem luarentše ndoñe nanjuába.



## Hechos

*Jesús tojanašebuachená chë Uámana Espíritu jíchmuama*

<sup>1</sup> Teófilo, atšbe natsana librěšaňe tčbonjuábobema lempe ntšamo Jesús tojanmama y tojánabuatambama, chca tojanbojatšé orscana,

<sup>2</sup> y Běngbe Bětsá celoye tbojtanatsbanantscuana. Cabá celoye nděta orna, chë chabe ichmoněngcá tojanabacacá boy-abásengna Jesús tojěftsanaměndá, chë Uámana Espíritbiajana, ndayá jamama yojánamnana.

<sup>3</sup> Jesús cruciňe tojanóbana y tojtanayenentsana, ba soye chë ichmóněnga yojáneběbuacana, chca, chěnga jinŷanŷiyama cha ndegombre tojtanayenama. Canta bnětsana tentscuana cha yojáneběbuacana y Běngbe Bětsabe aměndayama chěnga yojanabuatambá.

<sup>4</sup> Canŷe, Jesús chabe ichmóněngaftaca yojětsemna ora, měntšá tojanaměndá: —Jerusalenentsana ndoňe šmatjábocana. Camuentše šmochjobátma, ntšamo atšbe Taitá tčmonjanašebuachenacá chaóshjanguěntscuana, ndayama atše tčbonjáuyana.

<sup>5</sup> Ndegombre, Juan entsanga bėjayeca tonjaněbaye; pero ndoňe baytesna, Běngbe Bětsá chë Uámana Espíritu bochanjíchmu, tšěngaftangbe ainaniňe jtsemándayama cháumashěnguama ca.

*Jesús celoye tojtantsjuá*

<sup>6</sup> Canŷe, chë ichmóněnga Jesúseftaca cánŷiňe imojtsemna ora, chěnga tmojantjá: —¿César y chë Romoquěngbe aměndayentsana tašcochjatsebacá, y mora běnga, Israeloca entsanga, canŷe Rey quemochtsatsbomna ca?

<sup>7</sup> As Jesús tojaněyana: —Tšěngaftanga ndoňe quecmátamna chë soyěngama jtsetatšěmbuana. Nŷe atšbe Taitá aňe; y cha, chabe obenánaca echanjamánda mocna ora y ndayté chca chaopasama.

<sup>8</sup> Chë Uámana Espíritu tšěngaftangbe ainaniňe jtsemándayama chaojabo ora, tšěngaftanga obenana šmochanjóyěngacňe. Chentsana, ntšamo atšbiama šmotatšěmbcá, chë tčbonjabuatambá soyěnga, entsanga šmochjáuyana Jerusalenentshe, nŷets Judea luariňe, Samarioca y quem luarentša nŷets luarěnguenáchnaca ca.

<sup>9</sup> Chë soyěnga tojánayanentsana y chabe uatsjěndayěnga imojtsonŷaye ora, Běngbe Bětsá, Jesúsbioye tbojtanatsbaná y canŷe jantšetěshe chábioye ibojútsbotse y ndoňe más tčmonjanobená cha jinŷama.

10 Jesús celoye yojtsetsjuama chënga bën imojtser-reparánentscuana, nÿe ndeolpe, uta boyabásata uafjantse entšayaca bopormánata chëngbe juachaca tbojabántsaye,

11 y chëngbioye tmojanéyana: “Galileoca entšanga, ¿ndáyeca celoye šmojtsantješana? Jesús, chë tšëngaftangaftaca enjamná celoye tontá y ntšamo mora šmonjinÿcá cha celoye jtama, cachcá quem luaroye cha echanjésabo ca.”

### *Júdasbe cuenta Matías tmojanábuayana*

12 Jesusbe ichmónënga chë Olivos tjashocana Jerusalenoye tmojtaná. Chë tjocana Jerusalenóntscoñna bécoñe inamna, ndayéntscoca canÿe ochnayté jama yojanlesenciana nÿetšá.

13 Jerusalenoye tmojtanashjajna orna, chë yebnentša ts-banánoca tsoye tmojtanášëngo. Chentše yojánatana Pedro, Juan, Santiago, Andrés, Felipe, Tomás, Bartolomé, Mateo, Santiago chë Alfeobe uaquiñá, Simón chë Celote ca uabobainá, y Judas, chë Santiagbe uaquiñá.

14 Chënga sempre imojanamana jtenefjnana Bëngbe Bëtsáftaca jencuéntama básefta shembásengaftaca, María Jesusbe mamá y Jesusbe catšátangaftaca.

15 Chë tempo tmojánenefjna canÿe patse y uta bnëtsana Jesucristbeñe ošbuáchiyënga, y canÿe, Pedro tojantsá y tojanéyana:

16 “Jesucristbeyeca atšbe catšátanga, endánëyta ntšamo Bëngbe Bëtsabe uabemana palabrenguiñe iuabemancá chaochnënguama, y tempo, David chë Uámana Espíritbeyeca chiñe tojanábema ntšamo Júdaseftaca yochjanopásama; chcasna, Judas uayayënga tojanënatse Jesús chamuishachama.

17 Júdasnaca bëngbe enutá enjamna y Jesús chábioynaca tbonjanábuayana bëngcá chabe trabajuñe jtsoservénama.

18 Tšëngaftanga šmondëtatšëmbo, chë Judas bacna soye tojanmama tmojtanabuená crocenánacna fshantse tmojánbuamema. Chentšana cha tojtsanótsatše y chabe bestšaše tsëntsaca tbojtsanashtëtšena y chabe uafsbentšana nÿetsca chabe chunchullëjuangá tojtsanáshana.

19 Jerusalenentše oyenënga chë soyama tmojántatšëmbona ora, chë fshantse chëngbe biyañe Acéldama ca tmojanabaye. Acéldama endayana ‘Buiñe Luare ca’.

20 Salmos librëšañe, Jesucristo uayayëngbe cucuatšñe boshjuanabiamama mëntšá enduábemana:

Chabe yebna éañañe chaotsemna

y ndocná chentše chaondëtsiyena ca.

Y mëntšánaca endayana:

Chabe cuenta inÿa chabe trabajo chaoma ca.

21 “Chcasna, mora muentše montsemna taitanga bĕngaftaca mondenutĕnga, Bĕngbe Utabná Jesús bĕngaftaca enjamnĕntscuana,

22 Juan Jesúsbioye tbonjanabaye orscana y Bĕngbe Bĕtsá Jesúsbioye bĕngbentšana celoye tbontanatsbanantscuana. Y mora šontsamna canĕa mĕnguentšá juabuáyanama, Jesús tojtanyenama entšángbioye bĕngaftaca jábuayenama ca.”

23 As chora útata tmojanabocacá: José, nda Barsabás ca imojanábobuatma y ínĕngna Justo ca; y chentšana Matías.

24 Chora Bĕngbe Bĕtsáftaca mĕntšá tmojanencuentá: “Bĕngbe Utabná, aca nĕyetscangbe ainana icuabuatma; chcasna, šminĕyanĕ nda quem útatentšana cochjuábuayanana,

25 canĕe ichmonacá Júdasbe cuenta chaotrabajama. Judas ya ndoñe canĕe ichmoná quenátsmĕna, bacna soye tojama causa, y cha mora yojtsemna chĕ ndayentše jtsemnama ibomna luaroca ca” —chĕnga tmojánayana.

26 Y nda chĕ ichmoná yochtsemnama jtsotatšĕmbuamna tsbanánoye tmojanĕtšena y Matías tbojanobuache; as cach orscana, Jesucristbeñe ošbuáchiyĕnga chabiamama imojanjuabná mo canĕe Jesusbe ustonacá, cachcá ntšamo chĕ bnĕtsana canĕe uatsjĕndayĕngbiamama chĕnga imojanjuabnacá.

## 2

### *Chĕ Uámana Espíritu ošbuachiyĕngbeñe tojánamashĕngo*

1 Pentecostés ca uabaina fiesta tojanobuache ora, chĕ jaja sananga tmojanobuátbanama fiesta te, Jesucristbeñe ošbuáchiyĕnga nĕyetscanga cánĕiñe canĕe luarentše imojtsemna.

2 Ndeolpe, celocana mo canĕe jabuache binĕiĕcá yojtsaishauenana y chca, tša jabuache shauenanana tojanóshjango nĕyets yebnentše, chĕnga imojtsetbiámanentše.

3 Y chora bichtajĕnga mo iñeshcá yojónĕna y canĕánĕabeñe yojojátaye.

4 Chca chĕ Uámana Espíritu tojánamashĕngo chĕngbe ainaniñe jtsemándayama; chora nĕyetscanga tmojanontšé inĕyetsá biyan-gana, chĕnga tempo ndmabiyañe, ntšamo chĕ Uámana Espíritu yojtsamcá chĕnga inĕyetsá chamotsebiyama.

5 Chĕ tempo Jerusalenentše imojtsemna ba judiĕnga, Bĕngbe Bĕtsá puerte adórayĕnga, nĕyets luarĕngocana áshjajnĕnga; chĕnga tmojánabo Bĕngbe Bĕtsá jĕtschuayama.

<sup>6</sup> Entšanga chë shauenanana tmojanuena ora, tmojanójoto y ndoñe imontsetátšëmbo ntšamo jtsejuabnayana ndayá yojtsoapasánama, er chë inye luarocana áshjajnënga imojtsuenana chë Jesucristbeñe ošbuáchiyënga inyetšá biyangana jtsóyebuambnayana, ntšamo cada ona chënga imojanbiyacá.

<sup>7</sup> Chë soyëngama entšanga puerte imojenjaná y mëntšá imojtsenatsëtsnaye: “Chë chca montsóyebuambnanga Galileoquënga mondmëna.

<sup>8</sup> Chcase, ¿ntšámoyeca bënga imojtsobena chënga joyauayana cach bënga mondëbiyacá ca?

<sup>9</sup> Muentše montsemna Partioquënga, Medioquënga, Elam, Mesopotamia y Judeoquënga, Capadocia, Ponto y Asia luaroquëgnaca,

<sup>10</sup> Frigioquënga, Panfilia, Egiptó y Libia, chë Cirene béconana luaroquënga. Báseftangna Romoquënga montsemna;

<sup>11</sup> chëngbeñe nderado judiënga camuentše onýnánënga, pero inýengna ndoñe, y chënga Bëngbe Bëtsá mondbëtsatschuanaye cach ntšamo chë judiënga monduamancá. Inýengna Cretocana y Arabiocánënaca tmojabo. ¡Y bënga montsobena chë Galileoca judiënga joyaunayana Bëngbe Bëtsá bëts soyënga tojamama cach bënga mondëbiyacá ca!” —chë entšanga imojtsichamo.

<sup>12</sup> Chë causa nyëtscanga imojtsenjnanaye y ntšamo jtsejuabnayama ntsetatšëmbcá imojtsemna y imojtsentjanaye: “¿Ndayá chë soye yojtstayana ca?”

<sup>13</sup> Pero inýengna, chë soyëngama chëngbioye imojtsëbayajuana y imojtsichamo: “Chënga tëmiënga montsemna ca.”

### *Ntšamo Pedro chora tojanoyebuambá*

<sup>14</sup> Chentšana, Pedro tojantsá chë inye bnëtsana canye ichmónëngaftaca y jabuache tojanontsé chë entšanga jáuyanana, mëntšá: “Atšbe entšanga judiënga y nyëtscanga Jerusalenentše oyenënga, tšabá šmochjouena. Ntšamo tojopasama cbochanjábuayenaye, as chacmësertama.

<sup>15</sup> Tšëngaftanga šmontsejuabná atše y atšbe enutënga tëmiënga fstsemna ca, pero ndegombre, tëmiënga ndoñe queftsátsmëna; cabá cachëse, base mošenana ora ctsomñe.

<sup>16</sup> Pero ntšamo entsopasánamna, Bëngbe Bëtsabe juabna oye-  
buambnayá Joel mëntšá tojanábema:

<sup>17</sup> Bëngbe Bëtsá mëntšá tojánayana: ‘Quem luare jopochócama te chaojtsobeco ora, chë soyënga echanjochnëgo.

Atše chanjama, atšbe Espíritu nyëtscangbe ainaniñe cháumashënguama.

Chentšana, tšëngaftangbe uaquiñënga y bemianga atšbe soyëngama entšanga mochantsëtsëtsnaye;

tšëngaftangbe bobontsëngna, atše chanjama soyënga  
 mochantsonyaye mo otjenayoquëcá;  
 y tšëngaftangbe bëtsëjëmëngna atšbe soyënga  
 mochantstjénaye.

18 Chca ora, atše chanjama nÿetsca atšbe oservénëngbiama,  
 boyabásenga y shembásenga,  
 chëngbe ainaniñe atšbe Espíritu cháumashënguama,  
 as chënga atšbe soyëngama entšanga mochantšëtsëtsnaye.

19 Atše chanjama bëts soyënga celoca;  
 y quem luariñe echántsemna buiñe, iñeshe y ngona mo  
 jantšetëshcá, atšbe obenana jinÿanÿiyama.

20 Cabá chë puerte uámana te, chë Bëngbe Utabná bëts soyënga  
 jamama ndobuache ora,  
 shinÿe ndoñe queochátsbuashinÿinÿana  
 y juashcona buánganëtema mo buiñcá echántsemna.

21 Y as, ndánaca Bëngbe Utabná tbojtsotsëmbuaná, cha bochan-  
 jatsbocá.

Chca Joel tempo tojanábema ca” —Pedro tojánayana.

22 Chora Pedro tojatanëyana: “Israeloquënga, šmochjouena  
 ntšamo cbochanjauyancá: Bëngbe Bëtsá ndegombre  
 tcmonjaninÿanÿé, Jesúsbioye chabe trabajo biannayá cha  
 tbojánbemama. Chë soye Bëngbe Bëtsá tcmonjaninÿanÿé, Jesús  
 chë Nazaretocáftaca cha tojanma bëts soyëngaca y ójnanana  
 soyëngaca, Bëngbe Bëtsabe obenana jinÿanÿiyama. Cach  
 tšëngaftanga chë soyëngama šmondëtatšëmbo, Bëngbe Bëtsabe  
 obenánaca chë soyënga tšëngaftangbeñe Jesús tonjánmayeca.

23 Ndegombre tšëngaftangbe cucuatšinë Jesús  
 tmonjánboshjona, pero cabá ndëboshjona ora, Bëngbe  
 Bëtsá tojanjuabó ntšamo jopásana yojamnama; y ntšamo  
 tšëngaftanga cháftaca šmochjanmámna cha inatátšëmbo.  
 Tšëngaftangna Jesús šmonjanishache y šmonjanma cha  
 chamóbama y chamocrucificama, bacna entšangbe  
 cucuatšinë.

24 Pero Bëngbe Bëtsá tojama cha cháuatayenama; y chë  
 obanëngbe luarentšana tbojatsbocá, er ndoñe yonjopodena  
 cha obaná chaoquedama ca” —cha tojánayana.

25 Chora Pedro tojatanëyana: “Rey David tempo Jesus-  
 biamma mëntšá tojëftsanabema, ntšamo cha Bëngbe Bëtsábioye  
 tbojaniyanama:

Atšbe Utabná, aca sempre átšeftaca condbétsemna,  
 y sempre átšeftaca condboquedá atše juajabuáchama,  
 chíyeca ndocná queochatobenaye atše jauátjanama.

26 Chíyeca atše corente oyejuayá sëntsemna,  
 y atšbe uayásaca cbontsatschuaná.

Atše masque chanjóbana, tšabá sëndétatšëmbo aca atšbe Bëtsá, atše chaitayenama cochjamama.

27 Aca, Bëngbe Bëtsá, obanëngbe luarentše ndoñe quešcochátsboshjona,

y ndoñe quecochatsleséncia acbe uámana oservenabe cuerpo chaotsopochocama.

28 Aca chë tšabe benache šconjaninÿinÿé, ntšamo tšabe vida jtsebmnama.

Aca átšeftaca condbétsemnama, atše puerte oyejuayá séntsemna ca –David tojéftsanabema ca.”

29 Chentšana Pedro tojatanëyana: “Baconga y batanga, šontsemna ndegombre tšëngaftanga jábuayenana tšabá chacmésertama. Bëngbe tempsca bëts taitá David tojanóbana y tmojanatbontsá, y bënga montsemna cha tmojanatbontsá luare béconana.

30 Cach David canÿe Bëngbe Bëtsabe juabna oyebuamb-nayá inamna. Cha tšabá inatátšëmbo Bëngbe Bëtsá bëtscá tbojanšbuáchenama, Davidbe entšanguentšana canÿa, Cristo, cach Davidcá rey jabemama.

31 David inatátšëmbo chë Uámana Uabuayaná, chë Cristo, cháuatayenama Bëngbe Bëtsá yochjanmama. Chama cha tojánayana y tojéftsanabema, obanëngbe luarentše Cristo ndoñe ntjéftseboshjonana y Bëngbe Bëtsá ndoñe ntjalesénciana chabe cuerpo chaotsopochocama ca.

32 Bëngbe Bëtsá tojama Jesús cháuatayenama y bënga cha fsënjinÿe. Chíyeca bënga fsëntsetatšëmbo chca ndegombre bétsemnama.

33 Bëngbe Bëtsá, Jesús celoye tbontanatsbaná chabe catšbioica jtsatsmënama jtsemándayama, y Bëngbe Bëtsá chë Uámana Espíritu Jesúsbioye tbojanëntšabuaché ntšamo chë Taitá tbojanšbuachenacá. Ntšamo tšëngaftanga šmontsonÿá y šmontsuenancá entsemna, Jesucrísoftaca chë Uámana Espíritu bëngbe ainaniñe cháumashënguama Bëngbe Bëtsá tojámayeca.

34 David ndoñe Jesuscá celoye tonjána, pero mëntšá tojéftsanábema:

Bëngbe Bëtsá atšbe Utabná Crístbioye tbonjaniyana:

‘Atšbe catšbioica cochtsetbemana,

35 acbe uayayënga acbe cucuatšinë chamoquedama atšbe obenánaca chjamëntscuana ca.’ ”

36 Chora Pedro tojatanëyana: “Tšëngaftanga nÿets Israelo-quënga šmochtsetátšëmbo, atše ndegombre cach Jesusbiana séntsóyebuambnama. Cha tšëngaftanga šmonjancrucificá, pero Bëngbe Bëtsá chábioye tbonjábema Bëngbe Utabná y chabe Uámana Uabuayaná, chë Cristo ca.”

37 Chë soyënga tmojanuena ora, entšanga cocht-setšenánënga imojtsemna, y Pedro y chë inÿe ichmónëngbioye tmojanëyana: —Baconga, ¿ndayá mora jamama šojtsamna ca?

38 As Pedro tojanëjua: —Ngménaca šmochtenójuaboye bacna soyënga šmojtsamama, chca amana šmochtsajbaná y Bëngbe Bëtsabe benache šmochtishache. Chca chašmojama ora, cbochanjubaye mo chábeñe ošbuachiyëngcá, Jesucristo atše jótšëmbonëse. Chcase, Bëngbe Bëtsá tšëngaftangbe bacna soyëngama cmochanjáperdonaye y echanjama chë Uámana Espíritu tšëngaftangbe ainaniñe jtsemándayama cháuamashënguama.

39 Bëngbe Bëtsá chë soyënga tmonjanašebuachená tšëngaftangbiama, tšëngaftangbe básengbiama y nÿets chë bën luarënguenache imomna entšangbiama, nÿetscanga chë Bëngbe Utabná Bëngbe Bëtsá chábiyey jabama chaojubuáyanënga ca.

40 Inÿe palabréngnaca Pedro tojatanëyana y bëtscá tojanabuayená mëntšá: “¡Bëngbe Bëtsá chë Israeloca bacna entšanga echanjácastigaye. Chašmótsbocamna, chëngbentšana šmochtsojuánañe ca!”

41 Ba entšanga imojtsanošbuaché ntšamo Pedro tojanëyanama y tmojánenabayey. Cach te mo unga uaranga entšanga nÿetsá tmojanoboté, Jesucristbeñe ošbuáchiyënga jtsemnama.

42 Chënga corente imojtseboše jtsemama chë Jesusbe ichmónënga imojtsabuatambá soyënga. Tšabá yojtsacochebiona nÿetscanga cánÿiñe jtsemnama y imojanamana mo chë Jesucristbeñe ošbuachiyëngcá cánÿiñe jtseyayana y cánÿiñe Bëngbe Bëtsáftaca jtscuécúentayana.

*Ntšamo chë natsana Crístbeñe ošbuáchiyënga vida imnabomna*

43 Nÿetscanga imojtsenjnanaye, chë ichmónënga bëtš soyënga y inÿe soyënga chabe obenana jinÿanÿiyama chamomama Bëngbe Bëtsá tojánmayeca.

44 Nÿetsca chë Jesucristbeñe ošbuáchiyënga sempre cánÿiñe mo canÿacá imojtsemna y nÿetsca chëngbe bomna soyënga nÿetscangbiama yojtsemna.

45 Chënga imojanamana fshantsënga jtstobuíyana y chë imojánbomna soyëngnaca, y chë crocénana jujátayana ntšamo chë ínÿyenga tojtsëjabotcá.

46 Cada te imojanamana Bëngbe Bëtsabe bëtš yebnentšë jénefnana cha jëtšchuayama, y yebnënguenache cánÿiñe imojtseyey oyejuayënga y ndoñe ojëndayënga.

47 Chënga imojanamana Bëngbe Bëtsá jtšatschuanayana, y nÿetsca entšanga imojtsejuabnaye chë Jesucristbeñe

ošbuáchiyëngbiama tšabe entšanga imojamna ca. Y cada te Bëngbe Bëtsá yojtsama más ošbuáchiyënga chamóbotema, chë ndëmuanyënga cha yojtsatsebacyënga.

### 3

#### *Pedro canye coshétbioye tbojanshná*

<sup>1</sup> Canye te, Pedro y Juan Bëngbe Bëtsabe bëts yebnoye tbojánata bëts mošenana ora. Chca ora entšanga imojanamana Bëngbe Bëtsáftaca jtsencuëntayana.

<sup>2</sup> Bëngbe Bëtsabe bëts yebnentše canye cosheto yojtsemna; tojanonýná orscana chca šocá inamna. Entšanga imojanamana cada te cha juanatsana canye luaroye, Bëngbe Bëtsabe bëts yebnoca, Botamana Amashjuana ca uabáinoye, chë tmojtsachnějuanënga lemošna chaótejañama.

<sup>3</sup> Pedro y Juan Bëngbe Bëtsabe bëts yebnoye jamashënguama chë cosheto tojánanyë ora, canye lemošna chátbioye yojótejañe.

<sup>4</sup> Chatna chë šocá imojtsonýaye, y Pedro tbojaniyana: “Scochtsénýaye ca.”

<sup>5</sup> As cha yojtsénýaye y yojtsejuabnaye ndayá chjójyëngacñe ca.

<sup>6</sup> Chora Pedro tbojaniyana: “Quetsátsbomna ni crocénana, ni castellano aca jatšetayama, pero atše chanjama Jesucristbe obenánaca ndayá acbiama jamama atše stsobencá: Jesús chë Nazaretocá obenana endbomna; chíyeca atše cbëyana chabe mándoca, matëtsbaná y cochtsana ca.”

<sup>7</sup> Pedro chca tbojaniyana ora, tbojanábuacueshache catšbióicatše y tbojtanatsbaná, y cachora chë cosheto shecuatšiče y shëmiabeñe añemo yojtsatsbomna.

<sup>8</sup> As chë cosheto, canye jontsënjëse tšabá tojtantsá y tojanontšë tšabá jtsanana, y Bëngbe Bëtsabe bëts yebnoye Juan y Pédroftaca tojánamashëngo; yojtsayontsënjnaye y Bëngbe Bëtsá ibojtsatschuanaye, tbojanshnama.

<sup>9</sup> Chë Bëngbe Bëtsabe bëts yebnentše imojétsemnënga nýetscanga cha tmojáninýe tšabá jtsanana y Bëngbe Bëtsá jtsatschuanayana.

<sup>10</sup> Chënga imnatátšëmbo cha chë cosheto yojamnama, chë nda yojanamana Bëngbe Bëtsabe bëts yebnoca, chë Botamana Amashjuanentše jótbemana, entšanga lemošna jotejañama. Cha tšabá yojtsatsmënamna entšanga ojanánënga imojtsemna.

*Ntšamo Pedro tojanoyebuambá Salomonbe Amashjuana ca uabáinentše*

<sup>11</sup> Chë cosheto ya shnaná ora, ndoñe yontseboše Juan y Pédrëbentšana joluárana. As, nýetsca entšanga ojanánënga tmojanótjajo chë amashjuana otsbojebniñe, Salomonbe



Amashjuana ca uabáinoe, chë Juan, Pedro y chë cosheto shnaná imojétsemnoe.

12 Pedro chë entsanga tojánanýe ora, tojanéyana: “Taitanga y mamanga, Israeloquënga, ¿ndáyeca chë soyëngama ojanánënga šmojtsemna? ¿Ndáyeca nýe šcojtsëbuútja? ¿šmojtsejuabná nýe bëndatbe obenánaca quem boyabása tifjashná ca? ¿O šmojtsejuabná quem boyabása tifjashná bëndata Bëngbe Bëtsá puerte tšabá ftsadoránayeca?

13 Bëngbe Bëtsá, ndábeñe Abraham, Isaac y Jacob imojanošbuaché y ndábeñe bëngbe bëts taitanga imojanošbuaché, cha tonjinýanýé chabe oservená Jesús chë más uamaná yomnama. Cha tšëngaftanga chë mándayëngbe cucuatšinë šmonjáboshjona chamóbama. Pilato enjëtseboše Jesús jëtšboshjonama, pero tšëngaftanga Pilatbe delante šmonjánayana chca ndoñe šmontsanboše ca, y chíyeca Pilato ndoñe tbontanboshjona.

14 Jesús uamaná y nýetsca soyënguiñe tšabá amá enjamna, pero tšëngaftangna cha šmontsanaboté y Pilato šmonjanimpadá chabe cuenta canýe boyabása, entšá obanayá, chabuatsboshjonama.

15 Y chca, chë ndegombre tšabe vida chašmotsebonnama amábioye tšëngaftanga šmonjanóba. Pero Bëngbe Bëtsá tojanma cha cháuatayenama y bënga chë soye fsenjáninýe y chama fsëndétatšëmbo.

16 Jesús puerte obená endmënayeca, quem cosheto añémoca entsatsmëna. Ntšamo šmonjinýe y šmonjatatšëmboncá ndegombre tonjopasá Jesúsbeñe betsošbuáchema. Chë Jesúsbeñe jtsošbuáchiyana tonjama cha tšabá tšëngaftangbeñe chaotsatsmënama.

17 “Taitanga y mamanga, atše sëndétatšëmbo tšëngaftangbe causa y tšëngaftangbe amëndayëngbe causa Jesús tojanóbanama. Pero tšëngaftanga chca šmojanma, ndayá šmojétsamama ntsetatšëmbcá.

18 Tempo, Bëngbe Bëtsá chë chabe juabna oyebuamb-nayënga tojanamëndá entsanga jábuayenama, chë Bëngbe Bëtsabe Uámana Uabuayaná puerte ngmënana yochtsanbonnama. Morna, ntšamo Bëngbe Bëtsá tojanayancá ya tonjochnëngo.

19 Chcasna, ngmënaca menójuabonga bacna soyënga šmojtsamama, chca amana šmochtsajbaná y Bëngbe Bëtsabe benache šmochtishache, chca, tšëngaftangbe bacna soyënga cha chacmabuajuánama. Chca chašmojamëse, Bëngbe Bëtsá echanjama tšëngaftangbe ainaniñe oyejuayana chašmotsóbonñama,

20 y tšëngaftangbioye bochanjíchmuá Jesús, chë tempo chabe

Uámana Uabuayaná Bëngbe Bëtsá tbojanbemá.

<sup>21</sup> Canÿe te echanjóshjango, Bëngbe Bëtsá lempe tsmëmacá jëtsbemama. Chë tentscuana Jesús bontsemna celoca jo-quédana. Chca echanjochnëngo ntšamo Bëngbe Bëtsá chabe juabna oyebuambnayëngbiajana entšanga tojanabuayenacá.

<sup>22</sup> Moisés bëngbe bëts taitanga tojanabuayená: ‘Chë Utabná Bëngbe Bëtsá canÿe chabe juabna oyebuambnayá ntšamo atše sëndmëncá, cmochanjayentšíchmua. Cha tšëngaftangbentšana echanjábocna y tšëngaftanga cmontsamna ntšamo chacmojtsëtsëtsnacá cha jtseyeunanana.

<sup>23</sup> Ndánaca chábioye ndoñe chabonjoyeuná, cha bontsemna chë Bëngbe Bëtsabe entšángbentšana luaroca jtsemnama y chamotseepochocama ca’ —cha tojánayana.

<sup>24</sup> “Y nÿetsca chë Bëngbe Bëtsabe juabna oyebuambnayëngnaca Samuel orscana, entšanga tmojanabuayená ndayá quem tempo yochjanchnënguama, ntšamo mora montsonÿacá.

<sup>25</sup> Chabe juabna oyebuambnayëngaftaca Bëngbe Bëtsá tojanašebuachená bëts soyënga tšëngaftangbiamá, y tšëngaftangbe bëts taitángaftaca canÿe trato tojánbema; chë soyënga cabá tšëngaftangbiamá entsemna. Bëngbe Bëtsá Abrahámbioye mëntšá tbojanianá: ‘Chë ácbentšana entšángbeyeca tšabe bendicionënga chanjama nÿetsca quem luarentša entšangbiamá ca.’

<sup>26</sup> Bëngbe Bëtsá tojama chabe oservená cháuatayenama y natsana tšëngaftangbioye tbojanichmó, bacna soyënga amana chašmotsajbanama. Y chca, Bëngbe Bëtsá jamama tšëngaftangbeñe tšabe bendicionënga chaotsemnama ca” — Pedro tojánayana.

## 4

### *Pedro y Juan Jerusalenentša mandadëngbe delante*

<sup>1</sup> Pedro y Juan cabá entšanga imojtsëtsëtsnaye; chorna chë chata ibojtsemnoye tmojánashjajna judiëngbe bachnanga, Bëngbe Bëtsabe bëts yebnentša soldadëngbe amëndayá y saduceo ca uabaina judiëngbe amëndayënga.

<sup>2</sup> Chatna entšángbioye imojtsabuátambaye Jesús tojtanayenama y chë soye yojánayana obanënga ndegombre mochtayena ca. Chë causa, chë tmojánashjajna amëndayënga tojánëtëna.

<sup>3</sup> As, Pedro y Juan tmojánishëche y ya jetiñe yojtsemna causa, cárceloye tojanëtame yëfsanëntscuana.

4 Masque chca, banga entšanguentšana, ntšamo Pedro y Juan tbojanayancá tmojanuenënga, aïñe Jesucristbeñe imojtsošbuáchiye. Chë tentscuana shachna uaranga Jesucristbeñe ošbuáchiyënga imojtsemna, nÿe boyabásenga jacuéntase.

5 Yëfsana, chë judiëngbe amëndayënga, judiëngbeñe bëtsëjemëngcá amëndayënga y ley abuátambayënga Jerusalenentše tmojánenefjna.

6 Chéntšnaca imojtsemna, chë bachnangbe más uámana amëndayá Anás ca uabainá, Caifás, Juan, Alejandro y chë bachnangbe más uámana amëndayëngbe nÿetsca pamíllangnaca.

7 Chora chënga tmojanmandá Pedro y Juan junatsama, y chëngbe tsëntsaca tojanatsá y mëntšá tmojanatjá: —¿Ndabe obenánaca chë soyënga šojtsama, o, nda derecho tcmënjatšatá chë soyënga chašotsamama ca?

8 As Pedro, chë Uámana Espíritu chabe ainaniñe corente jtsemándayëse, mëntšá tojanëjua: —Israeloca mándayënga y bëtsëjemënga,

9 mënté šconjatjá chë jama ndobenáftaca tšabe soye tifjamama y ntšamo cha mora jama vojtsatobenama.

10 Chcasna, ntšamo tojopasama cbochanjabuayená, chca, tsëngaftanga y nÿetsca Israeloca entsanga chë soyënga chašmotsetatšëmbuama. Quem boyabása, chë tsëngaftangbe tsëntsaca entsemná, Jesucristo chë Nazaretocabe bëts obenánaca chca tšabá entsatsmëna. Y Jesús endmëna nda tsëngaftanga šmonjancrucificá y ndabiamama Bëngbe Bëtsá tojanma cháuatayenama.

11 Jesusbiamama Bëngbe Bëtsabe uabemana palabrenguiñe mëntšá endayana: “Chë yebna jebuanënga tmontsanaboté ndëtsbé, mora chë más bëts uashacuanësentše entsejájona ca”. Tsëngaftanga šmondmëna mo chë yebna jebuanëngcá, er Jesúsbioye šmontsanaboté y mora cha chë más uamaná entsemna.

12 Nÿe cha yobena tsëngaftanga játsebacama. Bëngbe Bëtsá ndocna inÿe entšábioye tbonjatšetá chabe obenana chca jamama; chíyeca quem luarentše ndocná más quenátobena bënga játsebacama. Nÿe Jesucristbe obenánaca aïñe ca —Pedro tojánayana.

13 Chënga imojenjnaná Pedro y Juan tša añémoca ibojtsóyebuambnana tmojáninÿe ora, y chata tempo nduatsjínÿenata y librëša nduabuatmata bëtsemnana tmojántatšëmbona ora. Chca chë mándayënga tmojántatšëmbona chata Jesúsëftaca bayté ibojamnana.

14 Y entsanga imojtsonÿaye chë tmojanshná cha chentše

chátaftaca yojtsemnama; chë causa, chënga ndocá más tmonjanobená chatbe contra jatichámuana.

15 As chora tmojanamëndá chentšana chábuaisebocnama y chentše tmojanoquedangna chë soyama imojtsenatsëtsnaye.

16 Chënga imojtsentjanaye: “¿Ndayá chátaftaca mochjama ca? Jerusalenentše oyenënga montsetátšëmbo chata chë bëts soye Bëngbe Bëtsabe obenánaca tbojamama; chë causa, bënga ndoñe quemuátobena jayanana chata chca ndoñe tbonjama ca.

17 Pero entsanga chama ndoñe más chamondëtsencuéntamna, chata mochjáuyana: ‘Ndoñe más entsángbeñe Jesús šmattsebáyana; y ndoñe chašmonjouenëse, jabuache castigo šochántsebomna ca.’ ”

18 As chë mándayënga cachiñe chata tmojánachembo y tmojanamëndá ndoñe más Jesús jtsebáyanana, ni chabiamana entsángbeñe jtsabuátambayana.

19 Pero Pedro y Juan tbojánayana: “¿Ntsamo tšëngaftanga šmatjayana ntšamo fchanjayanama ca? Ndegombre, Bëngbe Bëtsabe bominyiñe ndoñe tšabá quenátsmëna tšëngaftangbioye añe joyaunayana y chábioye ndoñe.

20 Er bënga queftsátobena jtsajbanana oyebuambnayana chë tifjinye y tifjouena soyëngama ca.”

21 Chë mandayëngna chátbioye tojtsanautatjá, pero chentšana tmojtanabáshejuana. Njetsca entsanga Bëngbe Bëtsá imojtsatschuanaye ntšamo tojanopasama; chíyeca, chë mándayënga ndoñe tmonjanobená tondaye ntjinyenana ntšamo chata jácastigama.

22 Chë boyabása, ndáftaca chata chë bëts soye Bëngbe Bëtsabe obenánaca tbojanma, inabomna canta bnëtsana uatama más.

*Jesucristbeñe ošbuáchiyënga Bëngbe Bëtsá tmojanimpadá más añemo chauatšatama*

23 Pedro y Juan ya tmojtanabáshejuana ora, tbojánata chë inye ošbuáchiyëngaftaca jateninyenama y lempe ntšamo chë bachnangbe amëndayënga y bëtsëjemëngcá mándayënga chátbioye tmojanëyancá, chëngbiyoe tmojanacuntá.

24 Chënga chca tmojanuenentsana, njetscanga cányiñe tmojanontsé Bëngbe Bëtsáftaca mëntšá jencuéntama: “Bëngbe Utabná, aca chë nda tojama celoca, fshantse, njetsca béjayënga y lempe ntšamo chenache yomncá,

25 chë Uámana Espíritbiajana tcojánayana y acbe oservená David, ntšamo tcojanayancá tojanábema, mëntšá:

¿Ndayeca entsanga yapa imojtsetšátjaye ca?

¿Ndayeca imojtsejuabná nye bonamentiamana soyënga jamana?

26 Quem luarentša reyënga y amëndayënga imoprontánënga,

nÿetscanga tmojenoyeuná Bëngbe Bëtsá y chabe Uámana Uabuayaná chë Cristbe contra jtsemnama ca —cha tojanábema.

27 “Ndegombre chca tonjopasá. Rey Herodes y Poncio Pilato, quem bëts pueblentse, ndoñe judiëngaftaca y israelitëngaftaca tmonjánenefjna, jenóyeunayama ntšamo jamana, Jesús chë acbe uámana oservená y chë Uámana Uabuayaná tcojabemábioye jóbama.

28 Tempo, Bëngbe Bëtsá, acbe obenánaca y ntšamo icnabošcá tcojanmandá ntšamo mora chaotsemnama, y chënga chca Jesúseftaca tmonjama.

29 Morna Bëngbe Bëtsá, mouena ntšamo chënga montsichamo, bënga jasúfriama cašojtsamna ca; chcasna, cochjama bënga fchayobená Jesusbe tšabe noticiënga bëts añémoca entšángbeñe jtsóyebuambnayama,

30 y cochjama acbe obenánaca šoquënga tšabá chamot-satsmënama y cochjama bënga fchayobená bëts soyënga jamama, Jesús chë uámana oservenabe obenánaca y cha jótšëmbonëse ca” —chënga tmojánayana.

31 Bëngbe Bëtsáftaca jencuéntama tmojanpochocá orna, chë tmojánenefjnentse tojanangmëmana; y nÿetscangbe ainaniñe chë Uámana Espíritu tojanontsé más jtsemándayana, y chënga tmojanontsé más añémoca Bëngbe Bëtsabe soyëngama entšanga jábuayenama.

### *Nÿetsca bomna soyënga nÿetscangbiama yojtsemna*

32 Jesucristbeñe ošbuáchiyënga, nÿetscanga canÿe juabna imojtsebomna y ainaniñe cach canÿe ebionana. Ndocná ntjatichamuana chabe soyënga nÿe chabiamana yojtsemna ca, pero añe imojtsichamo, “atše sëndbomna soyënga nÿetscangbiama entsemna ca”.

33 Chë Jesusbe ichmónëngna puerta obenánaca mëntšá imojtsichamo: “Fsënjinye y fsëntsetatšëmbo Bëngbe Utabná Jesús obanënguentsana tojtayenama ca.” Y Bëngbe Bëtsá yojtsama chë ichmónënga bëtscá tšabe bendicionënga chamotsebomnama.

34 Jesucristbeñe ošbuachiyëngbeñe ndocná yonjamna ndayánaca uajabotá, er nÿetscanga fshantse o yebna bomnënga imojanamana jtsatobuíyana, y chë crocénana

35 chë ichmónëngbioye jayentšbuáchiyana, ntšamo tojtsëjabotcá nÿetscanga jujátayama.

36 Chca tojanma canÿa Bëngbe Bëtsabe bëts yebnoca trabajayá, José ca uabainá; cha chë ichmónënga imojanábobuatma Bernabé ca (y chca iuayana “Añemuayá ca”). Bernabé yojamna Chipre luarocá.

<sup>37</sup> Chana, fshantse yojtsatobuiye, y chë crocénana Jesusbe ichmónëngbioye yojáyentsbuachiye, chë uajabótëngbiamana chaoservema.

## 5

### *Ntšamo Ananías y Safíraftaca tojanopasá*

<sup>1</sup> Inamna canýe bacó, Ananías ca uabainá, y chabe shemna, Safira ca. Chatna canýe fshantse tbojániye.

<sup>2</sup> Ananías y Safira tbojanenóyeunata; chcasna, batšá crocénana cachatbiamana tbojanobuajó y chë tojanójama crocénana ichmónëngbioye Ananías tojanamba, pero tojanéyana chana canjamna nýets crocénana ntsachetšá chë fshantsama tbojanosháchiñe ca.

<sup>3</sup> As Pedro tbojaniyana: “Ananías, ¿ndáyeca tcojalesenciá Satanás acbe ainaniñe bacna juabnënga chacmócochënguama, Uámana Espíritu chë crocenánama jabuambayama ca? Acna chë fshantsama tcmojtabuená crocenánentšana cach acbiamana batšá tcontábojama.

<sup>4</sup> Cabá ntsatobuiye ora, chë fshantse ácbeshe endánmëna y tcojtsatobuíyentšana chë crocénana acbiana y chánaca condánobena ntšamo tcojtsebošcá jamama. ¿Ndáyeca acbe ainaniñe tcojajuabó chë crocenánama chca jobostérama? Chca jamëse, ndoñe nýe entšángbioye quecatabuambná, sinó Bëngbe Bëtsánaca ca” —Pedro tbojaniyana.

<sup>5</sup> Ananías chë palabrenga tojanuena ora, obaná tojánshajaye. Y nýetscanga chama tmojántatsëmbonënga corente imojtsauatja.

<sup>6</sup> Chentšana, básefta bobontsënga tmojánashajjna y Ananíasbe cuerpo entšëjuaca tmojanandmaná y jauátbontsama tmojanamba.

<sup>7</sup> Mo unga horëntscose, Ananíasbe shema Safira tojánashjango, pero ndoñe yontsetátšëmbo ntšamo chabe boyáftaca tojanopasama.

<sup>8</sup> Chora Pedro tbojantjá: —Ndegombre šmëyana, ¿chë šmonjayana nýetšnama chë fshantse šmojiye ca?

As chë shema tbojanjuá: —Aíñe, nýetšnama fsënjiye ca.

<sup>9</sup> Pedro tbojaniyana: —¿Ndáyeca tsëndata šojenoyeuná Bëngbe Utabnabe Espíritu jabuambayama, y cabá castigo jtsebošcama ndoñe šontsobatmana ca? Acbe boyá jauátbontsama tmonjuambënga muentše bësoca montsemna y mora ácnaca cmochanjuamba ca.

<sup>10</sup> Cachora Safira Pédrëbe shecuatšentše obaná tojánshajaye. Chë bobontsënga tmojtanamáshjna ora, obaná Safira tmojáninýena; asna, chentšana tmojanamba y cachabe boyabe juachaca tmojanatbontsá.

11 Y nÿetsca Jesucristbeñe ošbuáchiyënga chentše imojtsemnënga y nÿetscanga chë soye tmojántatšëmbonënga, corente imojtsauatja.

*Ba bëts soyënga chë ichmónënga tmojanma, Bëngbe Bëtsabe obenana jinÿanÿiyama*

12 Chë Jesucristbe ichmónëngaftaca ba bëts soyënga entsángbeñe yojtsebinÿna Bëngbe Bëtsabe obenana jinÿanÿiyama; y nÿetsca Jesucristbeñe ošbuáchiyënga imojanamana Bëngbe Bëtsabe bëts yebnoca jénefnana, Salomonbe Amashjuana otsbojebnentše.

13 Chë ínÿenga, chë Jesucristbeñe ndošbuáchiyënga, imojtsauatja Jesucristbeñe ošbuáchiyëngaftaca jtsenutana; pero entsángna chë ošbuáchiyëngbiama tšabá imojtsencuëntaye.

14 Bëngbe Utabnábeñe ošbuáchiyënga más imojtsóbotena, bëtscá boyabásenga y shembásengnaca.

15 Tša bëts soyënga chë ichmónëngaftaca yojtsebinÿna; chíyeca entsánga imojanamana jutsnëshangañe y tjuashënguiñe tsáshenoye šoquënga jubuacnana, chca, Pedro chëjana tojtsachñëjuana ora, nÿe mo chabe sómbrënaca chëngbe cuerpëjana chaochnënguama, shnánënga jtsatsmënama.

16 Jerusalén chábuañe pueblënguentsána ba entsánga imojanamana jabana, y šoquënga y bacna bayëjbe juabna uambayënga imojtsëyabó; y nÿetscanga shnánënga imojtsatsmëna.

*Bëngbe Bëtsá tojanma Pedro y chë inÿe ichmónënga cárcelocana natjëmbana chámuaisebocnama*

17 Chë ichmónënga tša tšabá imojtsamama, chë judío bachnangbe más uámana amëndayá y chabe ústonënga, chë saduceunga, puerte envidia imojtsebomna.

18 As chë ichmónëngbioye tmojánishëche y chë bëts pueblentša cárceloye tojtsanëtame.

19 Pero ibetna, Bëngbe Utabná canÿe ángel tbojanichmó y chë utámenentša bëšašangá cha tojánatëfjo, chënga tojtanëbuacna y mëntšá tojanëyana:

20 “Motsajna, Bëngbe Bëtsabe bëts yebnentše šmochjámashjna, y entsánga šmochjabuayená ntšamo cuanjama chë nÿetsca tescama yomna tšabe vida jtsebomnama, Jesucristoftaca cánÿiñe mo canÿacá jtsemnëseca.”

21 Ntšamo tmojanuencá, yëfsana cabá cachëse Bëngbe Bëtsabe bëts yebnoye tmojána y tmojanontšé entsánga jabuátambana.

Chëntscuana, chë bachnangbe más uámana amëndayá y chabe ústonënga, chë Israeloca bëtsëjemëngcá mándayënga y inÿe chentša amëndayënga tmojánachembo jénefnama

y jenóyeunayama; as chora chënga tmojanmandá chë utámenocana chë ichmónënga jobiatšama.

22 Pero chë soldadënga chë utámenoye tmojánashjajna ora, chënga chentše ndoñe tmonjánanýena. Chcasna, chënga tmojtaná chë mándayënga chca jaúnayama.

23 Y tmojánayana: “Chë utámenoca fsënjínýena lempe tsabá endëtsëtámeñe y soldadëngna nýetsca bëšašangá monduabojanýanga; pero fsënjatëfjo y tsoye fsënjámashjna orna ndocná chibiátinýena ca.”

24 Chë bachnangbe amëndayënga y chë Bëngbe Bëtsabe bëts yebnentša soldadëngbe amëndayá chca tmojanuena ora, yojsëtëmnana y imojtsentjanaye ndayá chentšana yochjanopásama.

25 Chorna, chënga imojtsemnentše canýe boyabása tojánashjango y mëntšá tojanëyana: “Chë šmojutámiënga mora Bëngbe Bëtsabe bëts yebnocá montsemna, entšanga montsabuatambá ca.”

26 Chë soldadëngbe amëndayá tojána soldadëngaca, chë Jesusbe ichmónënga junatsama; pero nýe tsabá tmojanënatse, er chënga entšangbiamá imojtsauatja, nderado cachëngbioye ndëtsbéngaca muantsëbaye.

27 Chëngbioca tmojanëshejajna ora, mandayëngbioye tmojanënatse; chora chë bachnangbe más uámana amëndayá mëntšá tojanëyana:

28 –Bënga jabuachana tcbontsëuyaná y tcbonjúuyana ndoñe šmontselesenciana jtsóyebuambnayama chë boyabása Jesús tojánayana yojtsemna jabuátambama soyëngama ca. Masque chcasna, mora tsëngaftanga nýetsca chë Jerusalenentša oyenënga chabe soyëngama šmojtsabatambá y šmojtseboše, cha tojanóbanama castigo bëngbeñe chaotsemnama ca.

29 Chorna, Pedro y chë inýe ichmónënga tmojánayana: –Bënga šontsamna natsana Bëngbe Bëtsá joyeunayana y chentšana entšángbioye.

30 Chë Taitá, nda bëngbe bëts taitanga monjánadorana, cha tojama Jesús cháuatayenama, chë nda tsëngaftanga šmonjanóba canýe cruciñe juajabonjëse.

31 Bëngbe Bëtsá tbontatsbaná y chabe catšbioica tbojëtstbema, jtsamëndayama, y tbojábema entšangbe Unachayá y Atsebacayá, chca, Israeloca entšanga ngménaca chamuenójuaboma bacna soyënga imojtsamama y chca amana chamotsajbanama, y chëngbe bacna soyëngama perdonánënga chamotsemnama.

32 Bënga fsëntsichamo ndayá bënga ndegombre tifjinýe Bëngbe Bëtsá chca jtsamana ca; chë Uámana Espíritnaca chë soyëngama endbëtsoyebuambnaye. Bëngbe Bëtsá endbëtsama



chë Uámana Espíritu cháumashëngo chë tmojtseyeunanënge ainaniñe jtsemándayama ca —chënga tmojánayana.

33 Chë mándayënga chca tmojanuena ora, puerte tmojanot-jayaná y tmojánbošena chë ichmónënga jtsëbáyama.

34 Pero chë mándayënguentše yojtsemna canye fariseo, Gamaliel ca uabainá. Chana canye ley abuatambayá inamna y entšanga puerte imnarrespetana. As cha tojantsá y tojan-mandá chë ichmónënga ratotema chentšana jubuacnama.

35 Chentšana chë inye mándayënga tojanëyana: “Israeloca taitanga, puerte cuedado šmochtsebmna ntšamo quem boy-abásengaftaca šmochjamama.

36 Quem soyama šmochjenójuaboye: Ndoñe bayté quenátsmëna, Teudas tonjánbocna y cha enjánichamo canye uámama entšá canjamna ca, y mo canta patse entšanga cha tmojanasto. Pero chora ínÿenga cha tmontsanóba y chabe ústonënga tmontsanáshana, y chca lempe tontsanopochocá.

37 Chentšana, chë entšanga jenábemama enjamna ora, Judas chë Galileocá tonjánbocna y tonjanma báseftanga cha chamuastama; pero chánaca ínÿenga tmontsanóba y nyetsca chabe ústonënga tmontsanáshana.

38 Chíyeca atše cbëyana, quem boyabásenga matabáshejuana y ndocá mataborlánana. Ntšamo chënga montsamancá, nye entšangbe juabna y nye chëngbe trabajo tojtsemnëse, betscó echanjopochóca.

39 Pero chca Bëngbe Bëtsabe soye tomnëse, tšëngaftanga ndoñe quešmochatobenaye jáyëñjanama. Cuedado šmochtsebmna, nderado mo Bëngbe Bëtsabe uayayënga šmuatjanenobiama ca” —cha tojanëyana.

Y as chënga Gamaliel tmojanoyeuná.

40 Chcasna, chë ichmónëngbioye tmojánachembo, tmojtsanachebuánganja y tmojanëyana Jesusbe uabáinaca entšángbeñe ndoñe chamondëtsoyebuambná ca; y chentšana tmojtanabáshejuana.

41 Chora chë ichmónënga chë amëndayëngbentšana puerte oyejuayënga tmojésanbocna, er Bëngbe Bëtsá tojanalesenciá jasúfriama, chënga Jesusbiama oservënënga bétsemnayeca.

42 Chentšana, chënga cada te imojanabuatambá y Jesús, chë Uámama Uabuayaná, chë Cristo bétsemnama entšángbioye imojanabuayiyiná, Bëngbe Bëtsabe bëtš yebnentše y yebnënguenáchnaca.

## 6

*Chë ichmónëngbiama ujabuáchanënga tmojanëbuáyana*

1 Chë tempo, Jesucristbeñe ošbuáchiyënga betscó imojtsóbotena. Chora chë Jesucristbeñe ošbuachiyëngbentše,

chë judiënga griego biyanga batšá imojtsetšátjaye y chë judiënga hebreo biyangbiamá mëntšá tmojánayana: “Chë griego biyangbe viudángbioye ndoñe cachcá quemnatëjabuáchana ntšamo chë hebreo biyangbe viudángbioye cada te montsëjabuachancá ca.”

<sup>2</sup> Asna, chë bnëtsana uta ichmónënga nÿetsca chë Jesucristbeñe ošbuáchiyënga tmojanëbuaja y tmojanëyana: “Ndoñe tšabá quenátsmëna, bënga jtsajbanana Bëngbe Bëtsabe palabra oyebuambnayana nÿe chë viudanga jtsanÿenama chë tojtsëjaboto soyënguïñe.

<sup>3</sup> Chcasna, baconga y batanga, tšëngaftanguentsana canÿsëftanga mëbuáyana, tšabá mandbomnëngcá šmëbuátmënga, chamotsemna osertánënga y chë Uámana Espíritu chëngbe ainaniñe chaotsemánda, as chënga chë ujabótënga jtsëjabuáchanama trabajo fchanjábanÿiye.

<sup>4</sup> Y bëngna šontsamna nÿets tempo Bëngbe Bëtsáftaca jtsencuëntayana y Bëngbe Bëtsabe palabra entsanga jtsabuayiy-nayana ca” —chënga tmojánayana.

<sup>5</sup> Nÿetscanga tojanogusetá ntšamo chë ichmónënga tmojanayancá; as, Esteban tmojanábuayana; canÿe boyabása puerte ošbuachiyá cha inamna y chë Uámana Espíritu chabe ainaniñe yojanmánda. Chentšana tmojanëbuáyana Felipe, Prócoro, Nicanor, Timón, Parmenas y Nicolás (cha inamna ndoñe judío entšá, Antioquía bëts pueblócá, y cha yojanamana Bëngbe Bëtsá jtsadoránana mo cach judiëngcá).

<sup>6</sup> Chentšana chënga tmojanënatse Jesucristbe ichmónënga imojtsemnoye; chocna, chë Jesusbe ichmónënga Bëngbe Bëtsá tmojanimpadá chë ichmónëngbe trabajënguïñe chë ubuáyanënga chaújabuachama, chëngbe cucuatšënga chëngbe bestšašentše jajájuase.

<sup>7</sup> Más banga Bëngbe Bëtsabe palabra imojtsuenana, y chca, Jesucristbeñe ošbuáchiyënga más imojtsóbotena, y Jerusalenentše más ošbuáchiyënga betscó imojtsóbotena. Y ba judiëngbe bachnángnaca tmojanontšé Jesucristbeñe jtsošbuáchiyana, ntšamo chë ínÿenga imojtsanošbuachecá.

### *Esteban tmojánishache*

<sup>8</sup> Esteban, Bëngbe Bëtsabe obenana y chábentšana tšabe bendicionënga yojtsebomnëse, entšángbeñe bëts soyënga yojtsama.

<sup>9</sup> Báseftanga “Ya Cachcá Atabashejuana Oservénënga ca” uabainënga tmojanontšé Estébanoftaca enatsëtsnayana. Chënga imojamna judiënga Cirenoquënga, Alejandrioquënga, Cilicia y Asioquëgnaca, y chëngbe enefjuana luare yojanabaina “Ya Cachcá Atabashejuana Oservénëngbe Yebna ca”.

10 Pero chë Uámana Espíritu tojanma Esteban chaóyebuambama bëtscá osertanacá, y chíyeca chënga ndoñe imontsobena ntšamo cha jojuana.

11 As chënga báseftanga tmojanëbuénaye Estébanbe contra podesca soye chamuayanama, mëntsá: “Cha fsënjoyeuná Moisesbiana y Bëngbe Bëtsabiama ndoñe tšabá jtsóyebuambnayana, mo cuafjoyangucá ca.”

12 Chcase chënga tmojanma entsanga, bëtsëjemëngcá mándayënga y ley abuatambayënga Estébanbe contra chamóntša enbouenanana; y as, Esteban tmojanotbá y chë mándayënga imojtsemnoye imojuíchëmo.

13 Y tmojanënatse básefta entsanga, uayátsenaye soyënga y podesca soyënga Estébanbe contra chamuayanama; as chënga mëntsá tmojánayana: “Mua bacna soyënga entsichamo chë Bëngbe Bëtsá jtsadoránama bëts yebnama y Moisesbe leyëngama.

14 Y fsënjoyeuná cha jayanana, Jesús Nazaretocá Bëngbe Bëtsabe bëts yebna caochtseepochóca y caochjama bënga nÿe chabe mandëngaca mandánënga chamotsiyenama y ndoñe ntšamo Moisés bëngbe bëts taitanga tojëftsanabuatambacá ca.”

15 Chë mándayënga y nÿetscanga chentše imojëtsetbiamanënga Esteban tmojanonÿinÿé ora, tmojáninÿe chabe jubiá yojtsebuashinÿinÿana mo canÿe ángelbe jubiácá.

## 7

### *Ntšamo Esteban tojanenëuyaná*

1 Chora chë bachnangbe más uámana amëndayá, Estébanbioye tbojantjá: —¿Ntšamo acbiana montsichamcá ndegombre yojtsemna ca?

2 As Esteban tojanëjua: —Taitanga y baconga, mouenënga. Bëngbe Bëtsá, chë corente uamaná endmëná, Abrahámbioye tbojánëbëbocna, cha Mesopotamioca yojaniyena ora; tbojánëbëbocna, Harán bëts puebloca joyénanama cabá nda ora,

3 y Bëngbe Bëtsá tbojaniyana: “Metseboshjona acbe fshantse y acbe pamíllanga y cbochanjinÿinÿiye luaroye cochjá ca.”

4 As Abraham chabe luare Caldea tojëftsanboshjona y tojána Haránoca joyénanama. Chabe taitá tojanóbanentšana, Bëngbe Bëtsá Abrahámbioye chë luaroye tbojanánatse, chë mora tšëngaftanga šmontsiyenentše.

5 Pero quem luariñe ni mo base fshantse ndoñe tbonjëftsanatsetá, ni mo ndayentše jtsiyenama. Pero aíñe Abrahámbioye tbojanšbuachená chë fshantse jatsetayama, chabiana y chabe básengbiana, Abraham tojóbanentšana.

Chca tbojanšbuachená ora, Abraham ni canýe šešona bonjánbomna.

6 Y Běngbe Bětsá mēntsá tbojaniyana: “Chě ácbentšana entšanga, inýengbe luaroca áshjajnēnga mochántsemna, y choça oyenēnga chěngbe oservénēnga chěngbioye mochanjábiama y canta patse uatěntscuana jabuache mochanjasufrina ca.”

7 Y mēntsánaca tbojaniyana: “Pero atše chanjácastigaye chca oservénēnga chacmojábiama luarentša entšanga; y as, chentšana chě ácbentšana entšanga mochanjésebocana y mora bontsemna luaroye mochanjésabo y muentše atše šmochántadorana ca.”

8 Běngbe Bětsá Abrahámbioye tbojanšbuachená nýe cha y chabe básengbe Taitá cha jtsemnama y jamama tšabe bendicionēnga chěngbeñe chaotsemnama, y chama, chaotsinýnamna tbojanmandá chabe šešona, boyabásetema tojonýná ora, base bobachtema chě más delicadentše jatěšana. Chýeca, chabe uaquiñá Isaac tojanonýná ora, posufta tianoye Abraham base bobachtema chě más delicadentše tbojantětše. Isaac cachcá tojanma chabe uaquiñá Jacóboftaca y Jacob cachcá tojanma chě chabe bnětsana uta uaquiñēngaftaca. Chěnga monjamna chě Israeloca bnětsana uta běts pamíllangbe taitanga.

9 “Quem uaquiñēnga běngbe běts taitanga monjamna. Chěngna, chěngbe uabentsá Josébioye envidia innabomna y tmojtsatanobuiye, Egiptoye canýe oservenacá chamotsánatseñama. Pero Běngbe Bětsá Josébioye nýets tempo ibnauájabuachana,

10 chýeca nýetsca chabe ngmenēnguentšana tbojanatsbocá y Běngbe Bětsá tojanma cha chaotsetatšěmbuama tšabá jóyebuambayama chě Egiptoca réybentše, Faraón ca uabainá. Běngbe Bětsá tojanma chě Faraón chaoyejuá ntšamo José yojamnama; chýeca Faraón Josébioye tbojánbema Egiptoca mandado y chabe yebnēnguentše oyenēngbiámna.

11 “Chě tempo, Egiptó y Canaán luariñe běts shěntsana tojanóshjango y puerte ngménana yojtsemna y běngbe běts taitanga ndoñe imontsobena saná jónýenama.

12 Pero Jacob tojántatšěmbona Egiptoca saná yojtsemnama; asna, chabe uaquiñēnga, chě běngbe běts taitanga choye tojanichamó. Chora yojamna chě natsanama chěnga Egiptoye jama.

13 Uta soyama chěnga tmojtesaná ora, José chabe catsátanga tojanéyana: ‘Atše José sěndmēna, tšēngaftangbe uabentsá ca.’ Chca chě Faraón Josebe pamíllangbiama tojántatšěmbona.

14 Chentšana, José tojanmandá chabe taitá Jacob y nýetsca pamíllanga Egiptoye chamotsama. Canýsěfta bnětsana

shachnënga imojamna chë Egiptoeye tmojánanga.

15 Chcasna, Jacob Egiptoeye tojána choca joyénanama. Choca cha tojanóbana y chë ínÿe bëngbe bëts taitángnaca.

16 Jacob y chabe básenga, ntšamo imojtsobancá, chëngbe cuerpo Siquem bëts puebloye imojtsatambaye y tmojanëtebuantsá, Abraham tojëftsanbuamé cuevëshënguiñe. Abraham canÿe crocenánama Hamorbe uaquiñëngbioye, chëshënga yojtëyentsbuamiñe Siquem puebloca.

17 “Ntšamo Bëngbe Bëtsá Abrahámbioye tbojanšbuachenacá jamama yojtsobeco ora, Egiptoca corente tmojanoboté Israe- loca entsanga y banga chënga imojtsemna.

18 Cabana, Egiptoca ínÿe rey tojanoyayé y cha Josébioye ndoñe tbonjanabuátmana.

19 Chë reyna, bëngbe entsanga, chë bëngbe bëts taitángbioye tojanaingñé y tojanma chënga puerte chamosufrima; tojanamëndá, chë tmojtsónÿna šešonatémënga cachcá jtsënyayana chamotsóbanama.

20 Chë tempo canÿe básetema tojanonÿná y cha Moisés ca tmojanabaye. Bëngbe Bëtsá Moisesbiana oyejuayá yojtsemna y chabe bëtsëtsata cach yebnentše tmojanboché unga ishinÿentscuana.

21 Cachcá jonÿayama yojtsamna orna, Faraonbe bembe tbojanocñe y mo cachabe uaquiñá cuenta tbojanboché.

22 Chca, chë Egiptoquënga imnatátšëmbo soyënga Moisés tmojanbuatëmbá y canÿe uámana entsá tojánbozna jóyebuambayama y ndayánaca jamama.

23 “Canta bnëtsana uata tojánashjache ora, tojanenojuabó jama jtsetatsëmbuama ntšamo chë Israeloquënga, chabe entsanga imojtsemnama.

24 Canÿe, Moisés tojáninÿe canÿe Egiptocá canÿe Israe- locábioye ibojtsejantšetaye ora; as Moisés tbojanoboguiyaná y chë Egiptocábioye tbojtsanóba.

25 Moisés yojtsanjuabnaye chë Israeloquënga yojtsósertana, Bëngbe Bëtsá yochjanma cach Moisesbe obenánaca chë Egiptoca mandentsana chëngbioye játsebacama ca. Pero chë Israeloquënga ndoñe yontsësertana.

26 Yëfsana, Moisés tojánanÿena útata, cach Israelocata, ibojtsentsjanaye; chora cha betscó tojána jetsëuyanama y tojanéyana: ‘Tsëndata catšata šondmëna, ¿ndáyeca šojtsentsjanata ca?’

27 As, chë ínÿabioye ibojtsetsjanayá Moisésbioye tbojtsanaju- atsëntše y tbojanianana: ‘¿Nda bëngbeñe tcmënjajayé mandado y chë tšabá o ndoñe tšabá ftsamama chacuayanama ca?’

28 ¿Cojtseboše átšnaca jóbama, ntšamo tonjopasá yëfse chë Egiptocábioye tconjobacá ca?’

29 Moisés chca tojanuena ora, Madián luaroye tojtsanachá y choca yojoyena inye luarocana ashjanganacá. Chentše uta uaquĩnata yojěftsabamna.

30 “Chentšana canta bnětsana uatěse, entšanga ndoyena luariñe, Sinaí tjañe béconana, canye ángel tbojáneběbocna zarzěsha yojtsángbototjuanentše.

31 Moisés yojenjaná ndayá yojtsonyama y tšabá jinyama tojanobeconá ora, tojanuena Běngbe Bětsá měntšá ibojtsatsětsnaye:

32 ‘Atše acbe běts taitangbe Bětsá sěndměna, Abraham, Isaac y Jacoběbe Bětsá ca.’ Moisés chama tojaněuatjaná, ibojtsen-gměmnaye y añemo ndoñe yontsebomna choye jontjěsiyama.

33 As Běngbe Utabná tbojanियana: ‘Motsenóshecbotsca, er aca contsemnentše nye atšbiana luare endměna, er átšnaca chentše sěntsemna.

34 Ndegombre sěnjinye ntšamo atšbe entšanga Egiptoca montsesufrina y sěnjouena chěngbe oyabojuayana, y atše sěnjabo chěnga jabátsebacama. Chcasna, mabouena, Egiptoeye cbochanjíchmuca ca’ –Běngbe Bětsá tbojanियana.”

35 Chentšana Esteban tojaněyana: “Quem Moisés entšanga tmojtsanaboté y tmojanियana: ‘¿Nda běngbeñe tcměnjajayé mandado y chě tšabá o ndoñe tšabá ftsamama chacuayanama ca?’ Masque chca, Běngbe Bětsá mo mandayacá y atsebacayacá tbojesanichmó, chě zarzěshentše tojanobinyná ángeloftaca.

36 As Moisés, běngbe běts taitanga Egiptocana tojěsaněbuacna y běts soyěnga tojanma, y inye soyěnga Běngbe Bětsabe obenana jinyanjěyama Egiptentše, chě Buángana ca uabaina mar bėjayentše y entšanga ndoyena luarentše, canta bnětsana uatěntscuana.

37 Cach Moisés Israeloca entšanga měntšá tojaněyana: ‘Běngbe Bětsá tšěngaftanguentšana canya bochanjábema atšcá Běngbe Bětsabe juabna oyebuambnayá ca.’

38 Moisés Israeloca entšángaftaca yojěftsemna chě entšanga ndoyena luaroca. Choca chě entšanga tmojánenefjna Sinaí tjañe béconana. Chentšana canye ángel Moisésoftaca tojanoyebuambá, běngbe běts taitángbioye chě buayenana soye Moisés chaóyebuambama, chě entšanga tšabe vida jónyěnama palabrénga; y Moisés chca tojanma, běngnaca chě palabrénga jouenama jobenayama.

39 “Pero běngbe běts taitanga ndoñe tmonjánbošena joyeyunayama, masna nye tmojtsanaboté y Egiptoeye jesshěconama imojtsaiseboše.

40 Moisés cabá chě tja tsjuanoca chě ángeloftaca yojtsemna ora, chěngbe bachnangbe más uámana aměndayá Aarónbioye

mëntšá tmojanijana: ‘Běngbe Bětsabe cuenta šmayentšpormá canye buashinÿinÿana soye jadórama, bēnga chašúnatsama. Er bēnga quemátstatsēmbó ndayá yojtsopasana Moisés, chē Egip-tocana šonjěftsēbuacnáftaca ca.’

<sup>41</sup> As tmojanma canye buashinÿinÿana soye mo canye uac-nabecá y cha jadórama ba bayēnga tmojanēbaye, y tmo-janóboyejuanga cachēnga chē soye tmojanpormáyeca.

<sup>42</sup> Chē causa, Běngbe Bětsá chēngbentšana tojtsanojuánañe y cachcá tojesanēñyaye chēngbe bacna soyēnga causa, estrellatémēnga chamotsadoránama. Chca jochnēnguama, Běngbe Bětsabe juabna oyebuambayēngbe librěšañe mëntšá endayana, ntšamo Běngbe Bětsá tojanayancá:

Israeloca entšanga,

¿Atše jětschuayama bayēnga chešmēnjanēbaye y chē soyēnga chešmēnjanátšēmbona,

chē canta bnětsana uata entšanga ndoyena luarentše tšēngaftanga šmonjěftsemna ora?

<sup>43</sup> Atše jadóra cuentna, chē Molocbiana jebna soye šmonjanacutsá y cha šmonjánadorana,

y chē Refánbe estréllacnaca cachcá šmonjánama.

Chē soyēnga mo Běngbe Bětsá cuenta šmonjánbomna y cach tšēngaftanga šmonjanobopormá jadórama.

Mora chē causa atše chanjama, Babilonientšana más chcoye tšēngaftanga chacmotsénatsama ca” —chiñe endayana.

<sup>44</sup> “Běngbe tempsca běts taitanga entšanga ndoyena lu-arooca, chē jatsjacama opodena yebna innabomna; chē yeb-nentše Běngbe Bětsá chēngaftaca tojanoyebuambá. Inajebna ntšamo Běngbe Bětsá Moisésbioye tbojanmandacá, y cha to-janma ntšamo chaojebuama Běngbe Bětsá tbojaninÿinÿecá.

<sup>45</sup> Běngbe běts taitangna chēngbe taitāngbentšana chē jatsjacama opodena yebna chēngbiana tmojanóyēngacñe, y chēnga chē Canaán luaroye Josuéftaca, chē inÿe luaroquēngaftaca jéntsjava tmojána ora, chē jebna soye tmojanamba y chocna, Běngbe Bětsábeyeca chentša entšāngbioye Israeloquēngbentšana tmojtānēbuacna; y chē jebna soyna chē tmojanayēñjaná luarentše tojanoquedá, rey David yojěftsiyeněntscuana.

<sup>46</sup> David tšabá mandbomná inamna, chíyeca Běngbe Bětsá cháftaca puerta yotsóyejuaye. David chábioye lesencia tbojan-otjañe jajebuama, Běngbe Bětsá chē Jacob tbojanadorá cha, chentše chaotsiyenama.

<sup>47</sup> Pero Salomón inamna nda chē Běngbe Bětsabe běts yebna tojanjebuá.

48 Masque chë celoca Bëngbe Bëtsá, entsangbe jebna yebniñe ndoñe quenatiyena. Ntsamo Bëngbe Bëtsabe juabna oye-buambnayá tojanabemcá, ndayá Bëngbe Bëtsá tojanayancá:

49 ‘Celoca endmëna chë luare ndayentsana atše tsmánda, y quem luare endmëna nÿe mo canÿe tšenëtemcá ndayentše atšbe shecuatšënga chjacjaye.

As, ¿ntsamo atšbiana jebna yebna šmochjajebo ca?’ –chë Utabná jayanana—;

‘o ¿ndaye yebnentše atše jóchnama chjobenaye,

50 ndegombre cach atše nÿetsca chë soyënga tijamëse ca?’ ”

51 Esteban mëntsánaca tojanéyana: “Tšëngaftanga nÿets tempo josértama ndëbošënga šmondmëna; šmondmëna ainana mo chë Bëngbe Bëtsábeñe ndošbuáchiyëngbe ainancá, y Bëngbe Bëtsabe soyëngama nduauenanënga šmondmëna. Tšëngaftanga ndocna te quešmátsboše chë Uámana Espíritu joyeunayana. Ntsamo tšëngaftangbe bëts taitanga monjaniyencá, tšëngaftángnaca cachcá.

52 ¿Bëngbe Bëtsabe juabna oye-buambnayënguentsana, ndábioye tšëngaftangbe bëts taitanga ndoñe monjanacmena? Chë Bëngbe Bëtsá tojanichamó entsanga chënga tmojtsanëbaye, y mëngna entsángbioye imojanabuayiyná Cristo, chë ntsamo Bëngbe Bëtsá yobošcá amá yochjánabama. Pero morna, uayayëngbe cucuatšïñe cha šmojáboshjona y šmojóba.

53 Bëngbe Bëtsabe mandënga angelëngaftaca tšëngaftanga šmonjanóyëngacñe, pero chë soyënga ndoñe quešmátsyeunana ca” –cha tojanéyana.

### *Esteban ndëtsbéngaca tmojanóba*

54 Chentša mándayënga chca tmojanuena ora, Estébanoftaca tmojanotjayaná y tmojanenaftëšbonzentsé, rábiaca imojtsemnama.

55 Pero chë Uámana Espíritu Estébanbe ainaniñe corente yojtsemándaye. Celoye yojontješiye y Bëngbe Bëtsabe buash-inÿinÿanana yojinÿe, y Jesús, Bëngbe Bëtsabe catšbioica yojtsatšana.

56 As, Esteban tojánayana: “¡Mouenënga, sëntsonÿá celoca entsatëfjna y Bëngbe Bëtsá Entšá tbojanbemá Bëngbe Bëtsabe catšbioica entsemna jtsamëndayama ca!”

57 Chora chënga jabuache imojtseyoye, imojtsenamatsachto ndoñe más ntsuenanama y Estébanbioye tmojanontsënja.

58 Chentšana, chënga chë pueblentsana tmojtsanábozna y ndëtsbéngaca tmojtsanatëchënganja. Chë Estébanbioye mal tmojanquedangna entsayangá tmojtsanenátsejca y



canÿe bobontse, Saulo ca uabainá, tmojesanábonÿiñe chaotsinÿenama.

<sup>59</sup> Ndëtsbéngaca imojtsénanantscuana, Esteban Bëngbe Bëtsáftaca ibojtsencuéntaye y mëntsá tojánayana: “Bëngbe Utabná Jesús, atšbe espíritu šmóyëngaca ca.”

<sup>60</sup> Chentšana Esteban tojanoshamentšé y jabuache tojánayana: “¡Bëngbe Utabná, chëngbe bacna soye motsaperdoná ca!” Y chca tojánayana ora, tojanóbana.

## 8

<sup>1</sup> Saulo chentše yojtsemna y tšabá imojtsama ca yojtsejuabnaye, Esteban tmojanóbama.

*Saulo yojánama chë Crístbeñe ošbuáchiyënga chamot-sesufrínama*

Cach te, ínÿenga tmojanontšé Jesucristbeñe ošbuáchiyënga Jerusalenentše ucamenana y jtsamana puerte chamot-sesufrínama; chcasna, chënga tmojtsanacheta y Samarioye y Judeoye tmojanáshana. Nÿe chë Jesucristbe ichmónënga ndócnoye tmonjánacheta.

<sup>2</sup> Básefta boyabásenga, Bëngbe Bëtsá adórayëngna, Esteban tmojanamba jauátbontsama y chabiamana puerte tmojánenobošachna.

<sup>3</sup> Chëntscuana, Saulo yojtsentšena Jesucristbeñe ošbuáchiyënga jtsapochócama y yebnënguenache yojánamashjuana boyabásenga y shembásenga sjojónana ubuacana jutámiamana.

*Felipe Samaria luaroca tšabe noticiëngama yojanabuayiyá*

<sup>4</sup> Y Jesucristbeñe ošbuáchiyënga tmojanáshanëngna nÿetsquénache imojánabuayiyenaye Jesusbe tšabe noticiënga.

<sup>5</sup> Chca, Felipe Samarioye tojána y tojanontšé chë Bëngbe Bëtsabe Uámama Uabuayaná, Cristbiamana, chentša entsanga jábuayenama.

<sup>6</sup> Entšanga imojánenefjuana Felipe joyeunayama y tmojáninÿe bëts soyënga cha jtsamana, Bëngbe Bëtsabe obenana jinÿanÿiyama. Chënga nÿetscanga ntšamo Felipe yojtsichamcá tšabá imojtseyeunana.

<sup>7</sup> Banga bayëjbe juabna uambayënga tšabá imojtsatsmëna y chë bacna bayëjënga jabuache jtsaiyoyëse chëngbentšana imojtsaisebocana; y banga jama ndobenënga y coshetënga tšabá imojtsatsmëna.

<sup>8</sup> Chë soyama chë pueblentša oyenënga corente imojtsóyejuaye.

<sup>9</sup> Pero canÿe pueblentše Samarioca inamna canÿe boyabása, Simón ca uabainá; cha tempo inamna canÿe bocjuaná

y chë Samarioca entsanga chabe soyëngama imojánenjnanaye. Cha yojánichamo cha canye uámana entsá canjamna ca.

<sup>10</sup> Y chábioye corente inmayerunana nyetscanga, uámanënga y nduámanëngnaca. Entsanga imojánichamo: “Mua entsemna chë Bëngbe Bëtsabe bëts obenana inyanynayá ca.”

<sup>11</sup> Y ndegombre chënga corente inmayerunana, er cha chë bocjuanana soyëngaca bayté chë entsanga ingñënënga y ojnánanënga yojsabamna.

<sup>12</sup> Pero chë luarentša entsangna, Felipe tmojanoyeuná chë cha yojsëtsëtsná tšabe noticiënga Bëngbe Bëtsabe amëndayama y chë Jesucristbiana tšabe soyënga. Chorna chënga Jesucristbeñe imojtsošbuáchiye, y boyabásenga y shembásenga tmojánenabaye.

<sup>13</sup> Y cach Simónënga Jesucristbeñe yojtsošbuáchiye y tojanenábaye, y chentšana cada te Felípeftaca cha yojsanmëna. Cha tojáninye Felipe chë bëts soyënga Bëngbe Bëtsabe obenánaca jamana, y chama ojnananá yojtsemna.

<sup>14</sup> Chë Jerusalemoca imojtsemna ichmónënga tmojántatšëmbona Samarioca entsanga Bëngbe Bëtsabe palabra tmojanóyeunama; as, chora Pedro y Juan choye tmojanichamó.

<sup>15</sup> Pedro y Juan Samarioye tbojánashjango ora, chentše Jesucristbeñe ošbuáchiyëngbiana Bëngbe Bëtsá tmojanimpadá, as chë Uámana Espíritu chëngbeñe cháumashënguama jtsemándayama.

<sup>16</sup> Er cabá ni mo cányabeñe chë Uámana Espíritu tonjánamashëngo; chënga tmojánenabaye Bëngbe Utabná Jesús jótšëmbonëse, chábeñe ošbuáchiyënga jtsemnama imojtsebóšeyeca.

<sup>17</sup> As Pedro y Juan chëngbe bestšašiñe cucuatšënga tbojancjá, y chca, chë Uámana Espíritu tojánamashëngo chëngbe ainaniñe jtsemándayama.

<sup>18</sup> Simón tojáninye, chë ichmónënga entsángbeñe cucuatšënga tmojancjá ora, chë Uámana Espíritu chëngbeñe jamashënguana. As chora Simón chë ichmónënga tojanéyana: — Quem crocénana mosháchiñe,

<sup>19</sup> y átsnaca chë obenana šmatšetá, y ndábeñnaca cucuatšënga chaijajajó ora, chábeñnaca chë Uámana Espíritu cháumashëngo ca.

<sup>20</sup> As Pedro tbojaniana: —¡Acbe crocénana infiernoye chaotsá y ácnaca, chë Bëngbe Bëtsabe tšetana soye crocenánaca jobuámiñama yopodena ca tojajuabó causa!

<sup>21</sup> Ndegombre, aca bëngaftaca ndoñe quecátsmëna, ni bëngbe trabajo acbiana quenátsmëna, Bëngbe Bëtsabe delante acbe ainaniñe tšabe juabnënga ndoñe quecátbomna causa.

22 Ngménaca cochjenójuaboye quem bacna soye tcojamama y chca amana cochtsajbaná y Bëngbe Bëtsá cochjaimpáda, aca chca tcojájuaaboma nderádose cmatjaperdóna.

23 Atše sëntsetatsëmbo, acbe ainaniñe tša bacna juabnënga ínÿengbiana yojtsemnama; y bacna soyënga amana jtsajbanama ndoñe quecátobena causa, aca mo canÿe ntsacjuanacá contsemna ca —Pedro tbojaniana.

24 As chora Simón tojanëyana: —Bëngbe Utabná atšbiana šochjaimpáda, ntšamo šmonjauyancá ndoñe chandëpasama ca.

25 Pedro y Juan, ntšamo Bëngbe Utabná Jesucristbiana tbojaninÿcá y ibnatatšëmbcá entšanga imojtsëtsësnaye. Chentšana, Jerusalenoye tbojésanata y tbojánachnëngo ba Samarioca pueblënguëjana, tšabe noticiënga entšanga abuayinyaye.

### *Felipe y chë Etiopía luaroca reinabe uajabuachaná*

26 Chentšana, Bëngbe Utabnabe canÿe ángel Felípbioye tbojaniana: “Moprontá y tmana luarëngoye motsa, Jerusalenentšana Gaza ca uabaina bëts puebloye benachëjana ca.” Chë benachna entšanga ndoyena luarëjana yojanachnëngona.

27 As Felipe yojëftsëtsbaná y tojána. Benachiñe tbojáneninÿena canÿa Etiopía luarocáftaca. Etiopía luaroca canÿe reiná inamna y chë boyabásana chabe uajabuachaná y chabe crocénana bojanÿá inamna. Chana Jerusalenoye tojánabo Bëngbe Bëtsá jadórama.

28 Chora Etiopía luaroye yojtsataye, chabe cochëshañe inayésenotbemañe, y chë Bëngbe Bëtsabe juabna oyebuambnayá Isaíasbe uabemana librëša yojtsaiualíaye.

29 Chora chë Uámana Espíritu Felípbioye tbojaniana: “Mobeconá y chë cochësha juachaca cochtsaye ca.”

30 As Felipe betesco yojobeconá. Chora yojouena chë Etiopía luarocá, Isaíasbe uabemana librëša yojtsaiualíaye; as tbojanjá: —¿Chë contsalía soye quecmojtsosertana ca?

31 Y chë Etiopía luarocá tbojanjá: —¿Ntšamo šochjosërta, ndocná šonjabuayenase ca?

Y Felípbioye tbojaniana: —Diosmanda, atšbe cochëshoye mášëngo y atšbe juachaca mabótbema ca.

32 Isaíasbe uabemana librëshañe mëntšá yojtsalíaye: Cha tmojanánatse mo canÿe oveshá jóbama cuafjuanatscá; y chë mo canÿe oveshá tmojtsëtsbotjná ora, cha iyteca jtsemnana, chánaca cachcá, chacá tondaye chenátanayana.

33 Entšanga tmonjanma cha puerte chaosufrima,

mo cha canye nduamaná cuaftsemncá y ntšamo ndoñe bet-somerecencá cháftaca tmonjanma.

Ndocná nanjobenaye chabe básengbiama jacuéntana, quem luarentša chabe vida tmontsanbojuaná causa ca.

<sup>34</sup> Chora chë Etiopía luaroca uajabuachaná Felípbioye tbojaniyana: —Diosmanda, šmobuayená, ¿ndabiama Bëngbe Bëtsabe juabna oyebuambnayá chca yojtsichamo, cachabiama o inýabiama ca?

<sup>35</sup> As Felipe tojanontsé, chë Isaíasbe librëšañe yojtsayana sóyeca, Jesusbe tšabe noticiënga jábuayenama.

<sup>36</sup> Chentša bënëse, canye béjaye obëjniñe juachañe ibojtsachnëjuana. Chora chë uajabuachaná tojánayana: —Muentše béjaye entsemna. ¿Ndáyeca ndoñe nanjopódia atše muentše uabainá jtsemnama ca? Diosmanda, šmabaye ca.

<sup>37</sup> As Felipe tbojaniyana: —Jesucristbeñe nyets acbe ainánaca tcojtsošbuáchese, aíñe echanjopódia juabáyama ca.

Y chë boyabása tbojanjuá: —Aíñe, sëntsošbuaché Jesucristo Bëngbe Bëtsabe Uaquiñá yomnama ca.

<sup>38</sup> As chë Etiopiacá tojanmandá chë cochësha chauátotonama. Chentšana, nyets útata chë béjayoye tbojanashëbëbuástjango y Felipe, chë Etiopioca uajabuachanábioye tbojanabaye.

<sup>39</sup> Chë béjayentsana tbojtambocna ora, chë Uámana Espíritu Felipe ibojtsánatseñe y chë uajabuachaná ya ndoñe más Felípbioye ibontsonyaye, pero corente oyejuayá yojtsatoñe.

<sup>40</sup> Felipe tojántatšëmbona Azoto bëts puebloca yojtsemnama, y chentšana tojána nyetsca publënguenache chë tšabe noticiënga abuayiynaye, Cesarea puebloye jashjanguëntscuana.

## 9

*Ntšamo Saulo Crístbeñe ošbuachiyá tojanóbema  
(Hch 22.6-16; 26.12-18)*

<sup>1</sup> Saulo chëntscuana cabá Bëngbe Utabnábeñe ošbuachiyënga yojanautatjná jtsëbáyama. Chama cha tojána chë bachnangbe más uámana amëndayábioye,

<sup>2</sup> uabemana tsbuanachangá jauátjañama, as chëchangaca jobenayama chë Damascoca judiëngbe enefjuana yebnëngoye jama, y chocna, chë Jesucristo tojaninýanýé Benache ustoniñe, boyabásenga o shembásenga tojánýenëse, jótabayama y Jerusalenoye junatsama. Y chca jamama tojambocna.

<sup>3</sup> Pero ya Damasco béconana yojtsaye orna, nye ndeolpe chabe juachañe celocana canye bëts tcuinýe tojanbuash-inýinýena.

4 Chora Saulo fshantsoye tojánshajaye y canÿe oyebuamb-nayana tojanuena, mëntsá: —Saulo, Saulo, ¿ndáyeca chca šcojtsacmena ca?

5 As Saulo tbojantjá: —¿Nda comna, Bëngbe Utabná ca?

Y chë oyebuambnayana tbojanjuá: —Atše sëndmëna Jesús y aca condama atšbe entšanga chamotsesufrínama.

6 Pero matëtsbaná y Damascoye mamáshëngo; chentše canÿa cmochanjabuayená ndayá jamama cmojtsemnama ca.

7 Chë Sáuloftaca imojánajna boyabásenga tša auatjanánënga imojtsemna y chíyeca ndoñe imontsobena jóyebuambayana; er nÿe chë oyebuambnayana tmojanuena, pero ndocná tmonjáninÿe.

8 As Saulo fshantsentšana tojtantsbaná y tojt-anobuchatefjona ora, tondaye yontsobena jinÿana. Chcasna, chë ínÿenga tmojëftsanobuacuetëntsé y chca, Damascoye tmojanánatse.

9 Chentše yojëftsemna unga te, jinÿama ntobencá, ni nt-jascá y tondaye ntjofšiyá.

10 Damascoca Jesucrístbeñe canÿe ošbuachiyá inoyena, Ananías ca uabainá. Cha Bëngbe Utabnábioye mo otjenayoquécá tbojáninÿe y Bëngbe Bëtsá tbojanियana: —Ananías ca.

As cha tbojanjuá: —Bëngbe Utabná, ¿ndayá chjama ca?

11 Y Bëngbe Utabná tbojanियana: —Moprontá y motsa chë “Ndericho tsáshenañe ca” uabáinoye, y Júdasbe yebnentše coch-janotícia canÿe boyabásabíama, Saulo ca uabainábíama, Tarso pueblócá; cha mora Bëngbe Bëtsáftaca bentsencuénta.

12 Saulo ya tonjinÿe mo otjenayoquécá, canÿe entšá Ananías ca uabainá entsamashjuana y chabe cucuatšënga chabe bestšašínë entsejájua, chca, cha chabuatabínÿnama ca.

13 Ananías chca tojanuena ora, tojánayana: —Bëngbe Utabná, banga ba soyënga chabíama šmonjacuentá; Jerusalenoca tša bacá acbe entšanga imomnënga tojáborye.

14 Y mora entsebomna mando chë bachnangbe amëndayëngbentsana, muentše aca otšëmbuanënga jótabayama ca.

15 As Bëngbe Utabná tbojanियana: —Motsa, er atše cha sënjuábuayana atšbíama chaotrabajama; chaóyebuambama ndoñe judiëngbeñe, reyëngbeñe y Israeloca entšángbeñnaca, y chca, chënga atšbíama chamotatšëmbonama.

16 Atše cha chanjinÿinÿiye ntsachetšá ibojtsemna átšbeyeca jasúfriama ca.

17 As Ananías tojána Saulo yojtšanmëna yebnoye. Tojánamashëngo ora, Saulëbe bestšašínë chabe cucuatšënga tojanjajó y tbojanियana: “Jesucrístbeyeca atšbe catšata, Saulo, Bëngbe Utabná Jesús, chë benachëjana conjanabó

ora cmonjanebëbocná, šonjichmó aca chacmatabínÿnama y chë Uámana Espíritu acbe ainaniñe jtsemándayama cháumashënguama ca.”

18 Cachora, Sálëbe bominÿentsana mo beonbe bobachëshëngcá tojantquëcjana, y chca, ibojtsatabinÿna; chora tojantsbaná y tojanenábaye.

19 Chentsana, Saulo tojanse y añemo yojsatsbomna y basef-tayté chë Jesucristbeñe ošbuáchiyëngaftaca tbojántotona, Damascoca.

### *Damasco puebloca Saulo entsanga yojanabuayiná*

20 Saulo cachorscana tojanontsé jábuayenama judiëngbe enefjuana yebnënguenache, Jesús Bëngbe Bëtsabe Uaquiñá bëtsemnama.

21 Chë imojtsuenanënga nÿetscanga imojtsenjnanaye y mëntšá imojtsichamo: “Mua entsemna chë Jerusalenoca Jesúsbioye otšëmbuanënga endanëbanayá, y mora camuá Damascoye tojabo, Jesucristbeñe ošbuáchiyënga jabótabayama y chë bachnangbe amëndayëngbe cucuatšifne jabáshejuanama.”

22 Pero Saulo cada ora más añémoca yojsóyebuambnaye y puerte tšabá yojaninÿanÿná Jesús Bëngbe Bëtsabe Uámana Uabuayaná bëtsemnama. Chíyeca chë Damascoca judiënga ndoñe imontsobena ntšamo cha jojuana.

### *Ntšamo Saulo judiëngbentsana tojtsanachá*

23 Bayté tojanochnëngo ora, judiënga tmojanenoyeuná ntšamo jamëse Saulo jóbama,

24 pero Saulo chë soye tojántatšëmbona. Bnëté y ibeta, chë bëts pueblentsa bëšašanguenache chënga chabiamá imojanayá, jtsóbama;

25 pero chë Jesucristbeñe ošbuáchiyënga, ibeta, cha canÿe bëts sbarëcuiñe tmojtsanatsamá, y chë pueblentsa shëconana tapiëšëjana tmojtsanëštjango. Chca cha tojanotsbocá.

### *Saulo Jerusalenoca*

26 Saulo Jerusalenoye tojánashjango ora, yojtseboše chë Jesucristbe ichmónëngaftaca jenútanama, pero nÿetscanga imojt-sebiauatja y ndoñe imontsošbuaché Saulo Jesucristbe ustoná yojtsemnama.

27 Chcasna, Bernabé Sálëbioye tbojëftsanbetše y chë Jesucristbe ichmónëngbioye tbojanánatse, y tojanacuntá Saulo benachiñe Bëngbe Utabnábioye tbojáninÿama, ntšamo Bëngbe Utabná tbojaniyanama y ntšamo cha Damascoca tša añémoca Jesusbiamá entsanga tojánabuayenama.

28 As Saulo Jerusalenentše tojanototoná y chë Jesucristbe ichmónëngaftaca yojánana. Bëngbe Utabnabiamama bëts añémoca entšanga yojanabuayiyná y

29 yojanoyebuambná y imojanenatsëtsná chë griego biyá judiëngaftaca; pero chëngna imojtsenëyeunana Saulo jtsóbama.

30 Jesucristbeñe ošbuáchiyënga chca tmojántatsëmbona ora, Saulo Cesarea luaroye tmojanánatse, y chentšana Tarso puebloye tmojanichmó.

31 Y chca, Jesucristbeñe ošbuáchiyënga Judeoca, Galilea y Samaria luarentše chora ya ndoñe más montsansufrina y natjëmbana imojtsemna, y nyëtscanga más ošbuáchiyana imojtsebonna. Ntšamo Bëngbe Bëtsá yojanbošcá, imojtsaniyena cha jtsatschuanayëse; y chë Uámana Espíritbe uajabuáchenanaca, Jesucristbeñe ošbuáchiyënga más tmojanoboté.

### *Pedro Enéasbioye tbojanshná*

32 Pedro yojánabuache nyëtsca chë Jesucristbeñe ošbuáchiyëngbenache. Y chca, Lida puebloca Bëngbe Bëtsabe entšanga jabuachámnaca tojána.

33 Lida pueblentše canya tbojáninyena, Eneas ca uabainá. Cha jama ndobená inamna y posufta uata jutsnëshañe chca inajájona.

34 Pedro tbojaniyana: “Eneas, Jesucristo tcmojashná. Matëtsbaná y acbe tjuashe motsejacaná ca.” Y cachora chë jama ndobená tojtantsbaná.

35 Nyëtscanga chë Lida pueblentše y Saronoca oyenënga chë entšá shnaná tmojáninye. Y as, chënga bacna soyënga amana tmojtsanajbaná y cach orscana tmojanontsé Bëngbe Utabnábeñe ošbuáchiyana.

### *Pedro tojanma Dorcas cháuatayenama*

36 Chë tempo, Jope puebloca yojaniyena canye shembása Jesucristbeñe ošbuachiyá, Tabita ca uabainá, o griego biyañna Dorcas ca. Cha nyëts tempo tšabe soyënga yojánama y yojanama chë tojtsëjabetënga jujabuáchana.

37 Pero chora, šocana tbojanshache y tojtsanóbana. Tmojtsanbébé chentšana, canye tsoye tsbanana tsañoca chabe cuerpo tmojtanaajájó.

38 Jope inamna Lida béconana, y Lidentše Pedro yojtsemna; y chë Jope pueblentše Jesucristbeñe ošbuáchiyënga tmojántatsëmbona Pedro choca yojtsemnama. Asna, uta boyabásata tmojanichamó Pedro jauyanama: “Diosmanda, betscó Jope puebloye mabo ca.”

39 As Pedro tojëftsantsbaná y chë uta boyabásaftaca tojána. Choye tmojánashajna ora, tmojanánatse chë Dórcasbe cuerpo

yojtsemnoye, tsbanánoca; chorna, nÿetsca viudanga šachénaca Pédrëbioye tmojanóbobuashcona y imojtsinÿinÿnaye chë Dorcas yojuajonaná entsayangá y cmešëjuangá, cabá chëngaftaca yojëftsemna ora.

<sup>40</sup> Pedro tojanmandá nÿetscanga chentsana chamotse-bocanama; chora Pedro yojoshëntsamentšiyey y Bëngbe Bëtsáftaca ibojencuentá. Chentsana, Pedro chë obanábioye tbojanonÿinÿé y tbojaniyana: “Tabita, matëtsbaná ca.”

As Dorcas tojtanobuchatëfjona y Pédrëbioye tbojáninÿe ora, tojanótbema.

<sup>41</sup> Chora Pedro tbojanábuacueshache y tbojtanatsbaná. As Pedro tojánachembo nÿetsca chë Jesucristbeñe ošbuáchiyënga, chë viudanga y chë ínÿenga, y Dorcas ainá tojtaninÿanÿé.

<sup>42</sup> Chë soye nÿets Jope pueblentše tojanótatšëmbona y banga Bëngbe Utabnábeñe imojtsošbuáchiye.

<sup>43</sup> Y Pedro bayté Jope pueblentše tojanoquedá, Simón chë bobáchëshiñe trabajayabe yebnentše.

## 10

### *Pedro y Cornelio*

<sup>1</sup> Cesarea pueblentše inamna canÿe boyabása Cornelio ca uabainá; cha inamna chë Italiano ca uabaina soldadëngbe amëndayá.

<sup>2</sup> Cornelio Bëngbe Bëtsábioye ibnarrespetana y nÿetsca chabe yebnentša oyenëngaftaca Bëngbe Bëtsá puerte imojánadorana. Becá crocénana inaquëcjnaye chë judiënga ndbomnjémënga jujabuáchama y sempre Bëngbe Bëtsáftaca ibnëncuentaye.

<sup>3</sup> Canÿe te, mo bëts mošenana ora, cha botamana tojáninÿe mo otjenayoquëcá, mëntšá: Bëngbe Bëtsabe canÿe ángel Cornelio yojtsemnoye yojtsamashjuana y tbojaniyana: —¡Cornelio ca!

<sup>4</sup> Cornelio chë ángelbioye ibojtsonÿaye y auatjananá tbojaniyana: —Taita, ¿ndayá yojtsemna ca?

Y chë ángel tbojaniyana: —Bëngbe Bëtsá condbëtseimpadanama y chë ujabótënga condbëtsëjabuachanama, Bëngbe Bëtsá ácaftaca entsoyejúa y lempe cmochanjóyeunaye.

<sup>5</sup> Chcasna, mora básefta boyabásenga Jope bëts puebloye michamó y Simón, chë Pedro ca monduabobuatmá, moye chamuánatse.

<sup>6</sup> Cha posada entsebomna inÿe Simónbentše, chë bobáchëshiñe trabajayabe yebnentše. Chabe yebna mar bëjaye tsachañe endmëna. Cha cmochanjauyana ndayá jamama cmojtsemna ca.



<sup>7</sup> Chë Cornéliëbioye ibojuatsëtsaye ángel tojtsatanoñe ora, Cornelio chabe oservenënguentshana útata tojánachembo y canye soldádnaca, chabe uajabuachaná, Bëngbe Bëtsá adorayá;  
<sup>8</sup> lempe ntšamo yojopasacá chënga tojanacuntá y chentšana Jope puebloye tojanichamó.

<sup>9</sup> Yëfsana mo nyetsto ora, chënga benachiñe Jope béconana imojtsajnëntscuana, Pedro yebnentša tsbanánoye tojánašëngo, Bëngbe Bëtsáftaca jencuéntama.

<sup>10</sup> Becá tbojánishëntsena y jasama yojtseboše; pero imojtse-bopróntantscuana, Pedro mo otjenayoquëcá mëntsá tojáninye:

<sup>11</sup> Celoca yojtsatëfjna y mo canye bëts entšayëjuacá yojtsabá y nyets canta sibientsana yojtsëjonýana.

<sup>12</sup> Chë entšayëjuañe imojtsemna nyetscna bayënga, ósjojnaye bayënga y nyetscna shloftšëngnaca.

<sup>13</sup> Y tojanuena canye oyebuambnayana mëntsá: — Motsbaná, Pedro; mobaye y quem bayënga mose ca.

<sup>14</sup> Chora Pedro tojánayana: —Ndoñe, atšbe Utabná. Atše ndocna te chiyáisese Moisesbe leyíñe ndoñe yondëlesenciana jasama bayënga y chë jasama ndoñe tšabá imomna bayënga ca.

<sup>15</sup> Y cachiñe tojtétanuena chë oyebuambnayana mëntsá: — Bëngbe Bëtsá tojalesenciá y canye bayá tšabá jasama yomna ca tojayanëse, aca ndoñe matsjuabnana chë bayá jasama ndoñe tšabá yontsemna ca.

<sup>16</sup> Chë soye unga soyama chca tojanopasá chentšana, chë entšayëjua celoye tojtanátsjua.

<sup>17</sup> Pero Pedro ndoñe yontsetátšëmbo ntšamo tojaninycá ndayá chabiamama yojtsayanama. Chëntscuana, chë Cornéliëbe ichmónënga noticiánana Simónbe yebnocá tmojánashjajna y shjoca bëšoca imojtsobátmana.

<sup>18</sup> Tmojanchembo ora, tmojanënoticiá Simón, chë Pedro ca uabobainá, chentše taibojatanama.

<sup>19</sup> Pedro, ndayá tojáninyama chabosertama yojt-senójuabnantscuana, chë Uámana Espíritu tbojaniyana: “Mouena, muentše mora unga boyabásenga cmontsenguá.

<sup>20</sup> Motsbaná, mocana matastjango y yapa ntjatenojuab-naycá chëngaftaca cochjá, er atše chënga sënjichamó ca”.

<sup>21</sup> As Pedro tojtanastjango y chë tmojánashjajnënga to-janýana: —Atše sëndmëna chë šmontsenguá cha. ¿Ndáyeca moye šmojabo ca?

<sup>22</sup> Chora chënga tmojanjúá: —Cornelio šonjichamó. Cha endmëna chë soldadëngbe amëndayá, canye tšabá mándbomna entšá y Bëngbe Bëtsábioye adorayá, y nyetsca judiënga chabi-ama tšabá mondbëtsoyebuambnaye. Bëngbe Bëtsabe canye ángel

chábioye tbojabuayená ntšamo jamana aca chábioye chacot-sama, as chë ndayá cha jauyanama cojtsebomncá cha jouenama ca.

<sup>23</sup> As chënga tojanëmashengo y posada tojanëyentsame. Yëfsana Pedro chë unga boyabásengaftaca tojána. Básefta Jesucrístbeñe ošbuáchiyënga Jope pueblentsënga Pedro tmojan-tjëmbambá.

<sup>24</sup> Chë inye yëfsana Cesarea puebloye tmojánashjajna. Chentše Cornelio Pédrëbiana yojtsobatmana, y Cornelio tojanëbuaja pamíllanga y tšabe amiguëngnaca chentše imojtsemna.

<sup>25</sup> Pedro tojánashjango ora, Cornelio tojánbocna jajëbenguama y chabe shecuatšentše yojoshëntsamentšiyë cha jadórama.

<sup>26</sup> Pero Pédrëna tbojtanatsbaná y mëntšá tbojaniyana: — Matëtsbaná, atše cach aquëcá nje canye entšá sëndmëna ca.

<sup>27</sup> Pedro Cornélioftaca encuëntaye chë yebnentše tojánamashëngo y ba entšanga tojánanýena, chentše tmojanójetënga.

<sup>28</sup> Chora Pedro tojanëyana: —Cach tšëngaftanga šmondëtatšëmbo chë judiëngbe leyënguiñe endayana ndoñe yondopodena canye judío ndoñe judío entšángaftaca jenútanama y ni mo chëngbe yebnënguenache jábuachama ca. Pero Bëngbe Bëtsá šonjinýinýé atše ndocna te šondmëna inýabiana jatsjuabnayana cháftaca jenútanama ndoñe tšabá yondmëna ca.

<sup>29</sup> Chíyeca, šmonjobetše ora, ndocá ntjatichamcá nje sënjabo ca.

Chora tojanatjá: —¿Ndáyeca šmojobetše ca?

<sup>30</sup> As Cornelio tojánayana: —Canta te entsemna, camëntša ora, muentše sëndánmëna Bëngbe Bëtsáftaca encuëntaye y ndeolpe sënjinýe atšbe delante canye boyabása uabuashinýinýana entšayaca bopormaná.

<sup>31</sup> Cha šonjauyana: “Cornelio, Bëngbe Bëtsá condbëtseimpadanama y chë ujabótënga condbëtsëjabuachanama, Bëngbe Bëtsá ácaftaca entsoyejuá y lempe cmochanjóyeunaye ca.

<sup>32</sup> Básefta boyabásenga Jope bëts puebloye michamó y Simón chë Pedro ca monduabobuatmá moye chamuánatse ca. Cha posada entsebomna inye Simónbentše, chë bobáchëshiñe trabajayabe yebnentše, y chabe yebna mar bėjaye tsachañe endmëna. Cha cmochanjauyana ndayá jamama cmojtsemna ca.”

<sup>33</sup> Chcasna, cachora sënjichamó aca jobetšama, y aslëpaye jabama tcojóyaunama. Y as morna, nýetscanga Bëngbe Utabnabe delante fsëntseprontana jouenama lempe ntšamo Bëngbe Bëtsá tcmojamandacá ca —cha tojánayana.

*Ntšamo Pedro tojanoyebuambá Cornéliëbe yebnentše*

34 Pedro chora tojanontšé mēntšá jóyebuambayama: —Mora atše šontsosertana, ndegombre Bēngbe Bētsabiana n̄yetscanga cachá uámanēnga imomnama.

35 N̄yets luarēnguenache Bēngbe Bētsá júbuajana cha tmojt-satschuaná y tšabe soyēnga tmojtsamēnga.

36 Tšēngaftanga šmondētatsēmbo, Bēngbe Bētsá Israeloca entšanga tojánabuayenama, tšabe noticiēnga jtsóyebuambnayēse, chēnga n̄yetscanga ainaniñe tšabe ebionana chamotsebomnama, Jesucristbeyeca; y cha endmēna n̄yetsca entšangbe Utabná.

37 Tšēngaftanga šmondētatsēmbo ntšamo n̄yets Judeoca tonjanopasama. Chē soye Galilea luaroca tojanobojaťsé, Juan entšanga yojanabuayiyá orscana, chēnga bacna soyēnga amana chamotsajbanama y chamuenábayama.

38 Smondētatsēmbo ntšamo Bēngbe Bētsá, Jesús Nazareto-cábioye tbojanábuayanama y tojanma chē Uámana Espiritu chabe ainaniñe cháúamashēnguama, y tojanma Jesús corente obená chaotsemnama; y šmondētatsēmbo ntšamo Jesús enjánana entšangbiana tšabe soyēnga amiñe y n̄yetscanga chē Satanás yojánama chamosufrimēnga áshnaye, er Bēngbe Bētsá cháftaca yojtsemna.

39 “Bēnga fsēnjánin̄ye y fsēndētatsēmbo lempe ntšamo Jesús tojanmcá Jerusalenoca y n̄yets Judea luariñe; y cha tmonjanóba, can̄ye cruciñe jacrucificase.

40 Pero Bēngbe Bētsá tonjanma unga tianoye cha cháuatayenama y bēngbeñe chaon̄yama.

41 Cha n̄yetsca entšangbe delante ndoñe chenátanbocna, pero aĩñe bēngbeñe, chē tempo Bēngbe Bētsá šojanēbuáyanēnga, Jesús tojtanayenama chamuin̄yama. Y tojtanayenentšana bēnga cháftaca fsēnjanse y fsēnjanofsé.

42 Cha šonjichamó entšanga jábuayenama y jayanama ndegombre cha yomna chē Bēngbe Bētsabe uabuayaná, chē nda obanēngbiana y ainēngbiana yochjayana tšabá o ndoñe tšabá tmonjamama.

43 Bēngbe Bētsabe juabna oyebuambnayēnga n̄yetscanga cach Jesusbiana tmojánayana, nda Jesúsbeñe tojtsošbuaché, chábioye Bēngbe Bētsá chabe bacna soyēngama bochanjaperdóna, Jesusbe obenánaca ca.”

*Ndoñe judiēnga chē Uámana Espiritu tmojanóyēngacñe*

44 Pedro chē palabrenga cabá yojtsóyebuambnantscuana, chē Uámana Espiritu tojánamashēngo n̄yetsca chē imojtsuenanēngbe ainaniñe jtsemándayama.

45 Chë judiënga Jesucristbeñe ošbuáchiyënga Pédroftaca tmojánabënga imojenjaná, chë Uámana Espíritu ndoñe judiëngbeñnaca cháumashënguama Bëngbe Bëtsá tojanmama.

46 Chënga imojtsuenana chënga inyetsá jtsebiayangana, chënga tempo ndmabiyañe y jtsichámuana Bëngbe Bëtsá bëts soyënga tojanmama.

47 Chora Pedro tojánayana: “Pero mëngna chë Uámana Espíritu tmonjójyëngacñe ntšamo bënga tmonjoyëngacñëcá. Chcasna, ndocná queochatobenaye jamana chënga uabáinënga ndoñe chamondëtsemnana ca.”

48 As Pedro tojanamëndá chënga jubáyama, Jesucristo jótšëmbonëse. Chentšana chënga tmojanimpadá baseftaytë chëngaftaca chaoquedama.

## 11

*Ntšamo Pedro chë Jerusalenoca imojánenefjuana ošbuachiyëngbiyoye tojanëyana*

1 Jesucristbe ichmónënga y chë Judeoca Jesucristbeñe ošbuáchiyënga tmojántatšëmbona, chë ndoñe judiëngnaca Bëngbe Bëtsabe palabriñe imojtsošbuáchema.

2 Pero Pedro Jerusalenoye tojesaná ora, báseftanga chabiamana ndoñe tšabá tmonjánayana. Chënga imojamna chë juabnayënga, chë ndoñe judiënga ošbuáchiyënga boyabásenga canjánamna chë más delicadentše base bobachtema tëtšenënga jtsemnana ca, ntšamo chë judiënga imojanamancá, as chënga jobenayama chë judiënga ošbuáchiyëngaftaca jenútanama ca.

3 As Pedro tmojantjá: —¿Ndáyeca tcojá chë ndoñe judiënga jábuachama y chëngaftaca tcojase ca?

4 Chora Pedro lempe chënga tojanacuntá ntšamo chë ndoñe judiëngbiyoye cha tojána orscana tojanopasama. Cha tojanëyana:

5 —Atše Jope puebloca sënjamna y Bëngbe Bëtsáftaca sënjencuénta ora, mo otjenayoquëcá sënjáninye celocana mo canye bëts entšëjuacá átšbiyoye enjétsabeconaye y nyets canta sibiocana enjétsëjonýana.

6 Y botamana sënjanrrepará ndayá chë tsoye bëtsemnana y sënjáninye choye monjëtsemna uamna y tjoca bayënga, ósjojnaye bayënga y nyetscna shloftšëngnaca.

7 Y sënjanuena canye oyebuambnayana mëntsá: “Motsbaná, Pedro; mobaye y quem bayënga mose ca.”

8 Chora atše sënjánayana: “Bëngbe Utabná, ndoñe; atše ndocna te chiyáisese chë Moisesbe leyiñe ndoñe yondëlesenciana jasama bayënga y jasama ndoñe tšabá imomnënga ca.”

<sup>9</sup> Chentšana cachiñe sëntëtanuena chë celocana oyebuamb-nayana mëntšá: “Bëngbe Bëtsá tojalesenciá y canye bayá tšabá jasama yomna ca tojayanëse, ndoñe matsjuabnana chë bayá jasama ndoñe tšabá yontsemna ca.”

<sup>10</sup> Chë soye unga soyama chca tonjanopasá y chentšana chë entšëjua celoye tontanátsjua.

<sup>11</sup> Y cachora unga boyabásenga Cesarea pueblcana ichmónënga, chë posada sëndbomnentse tmonjánashjajna, atše janguanguama.

<sup>12</sup> Y chë Uámana Espíritu šonjanmandá atše yapa ntjatenu-juabnaycá chëngaftaca jama; y quem chñënguana Jesucristbeñe ošbuachiyëngnaca átšeftaca tmonjána. Njëtsanga canye entšá Cornelio ca uabainabe yebnoye fsënjánamashjna;

<sup>13</sup> y chana bënga šonjanacuntá ntšamo tojáninye, cachabe yebnentse canye ángel ibojtsebiatsana y mëntšá tbojaniyana: “Básefta boyabásenga Jope bëts pueblloye michamó y moye chamuánatse Simón, chë Pedro ca monduabobuatmá,

<sup>14</sup> y cha cmochanjabuayená ntšamo aca y acbe yebnentša oyenënga šmochjotsbocá ca.”

<sup>15</sup> As, atše jóyebuambayama sënjanbojatsé orna, chë Uámana Espíritu tonjánamashëngo chëngbe ainaniñe jtsemándayama, ntšamo bëngbeñe natsana tonjanamashëngcá.

<sup>16</sup> “Chora sënjanenujuabó ntšamo Bëngbe Utabná tonjánayanama: ‘Ndegombre, Juan entšanga bėjayeca tonjanëbaye; pero Bëngbe Bëtsá chë Uámana Espíritu bochanjíchmuá, tšëngaftangbe ainaniñe jtsemándayama cháuamashënguama ca.’

<sup>17</sup> Chcasna, chëngnaca Bëngbe Bëtsá chë Uámana Espíritu tonjatsatá, ntšamo bënga, chë Utabná Jesucristbeñe ošbuáchiyënga, šonjanatsatacá. Y chca, atše ndoñe quetsátsmëna canye tša uamaná, Bëngbe Bëtsá jauyanama ntšamo cha yobošcá ndoñe chaondëtsemna ca.”

<sup>18</sup> Jerusalenoca Jesucristbeñe ošbuáchiyënga chë soyënga tmojanuena ora, ndocá más tmonjantjá y Bëngbe Bëtsá tmojtanchuá, mëntšá: —¡Asna, Bëngbe Bëtsá chë ndoñe judiëngnaca tojalesenciá chëngbe bacna soyëngama ngmënaca chamuatenójuaboma y chca amana chamotsajbanama, chë njëtsca tescama yomna tšabe vida chamotsebomnama ca!

*Ntšamo Antioquía pueblca tojanobojatsé, entšanga Jesucristbeñe ošbuáchiyana*

<sup>19</sup> Esteban tmojanóba chentšana, tmojanontsé chë Jesucristbeñe inye ošbuachiyëngnaca jatëcamiyama. As chentšana báseftanga yojtsamna bën luarëngoye jtsachetëngana Fenicioye, Chipre y Antioquía luarëngoye, y

chenache chënga Jesucristbe soyëngama imojanoyebuambná, pero nÿe judiëngbiama.

<sup>20</sup> Pero báseftanga imojamna Chipre y Cirene luaroquënga, y chënga Antioquía bëts puebloye tmojánashjajna orna, chë ndoñe judiëngbeñnaca tmojanoyebuambá, Jesús, chë Utabnabe soyëngama jabuayenase.

<sup>21</sup> Bëngbe Utabnabe obenana chëngaftaca yojtsemna, y chca, ba entšanga tmojanajbaná bacna soyënga amana y tmojanontsé Bëngbe Utabnábeñe jtsošbuáchiyana.

<sup>22</sup> Jerusalenoca Jesucristbeñe ošbuáchiyënga chë soye tmojántatšëmbona ora, Antioquía luaroye Bernabé tmojanichmó.

<sup>23</sup> Bernabé choye tojánashjango orna, tojáninÿe ntšamo Bëngbe Bëtsá tšabe bendicionënga chëngbeñe tojanmama y chama corente tojanoyejuá. Nÿetscanga tojanabuayená chamotsiyena nÿets ainánaca Bëngbe Utabnábeñe jtsošbuáchiyëse.

<sup>24</sup> Bernabé inamna canÿe entšá tšabe soyënga amá, chë Uámana Espíritu chabe ainaniñe yojtsemádaye y bëtscá ošbuachiyá inamna. Y banga tmojanontsé Bëngbe Utabnábeñe jtsošbuáchiyana.

<sup>25</sup> Chentšana, Bernabé Tarso puebloye tojána Saulo janguanguama,

<sup>26</sup> y tbojáninÿena ora, Antioquía luaroye tbojëftsanbetše. Antioquía luarentšna canÿe uata nÿetsá Jesucristbeñe ošbuáchiyëngaftaca cánÿiñe ibojëftsemna y ba entšanga tmojanabuatambá. Antioquioca inamna chë ndayentše natsanama Jesucristbeñe ošbuáchiyënga Cristbe ústonënga ca imojtšëbuatma.

<sup>27</sup> Chë tempo, básefta Bëngbe Bëtsabe juabna oyebuambnayënga Jerusalenocana Antioquía luaroye tojána.

<sup>28</sup> Chënguentšana canÿa Agabo ca uabainá tojantsá y chë Uámana Espíritbeyeca tojánayana, mëntšá: “Nÿets luariñe entšanga oyeniñe bëts shëntsana echanjóshjango ca.” Y ndegombre chca tojanopasá, Claudio Romoca bëts mandado inamna ora.

<sup>29</sup> Chcasna, chë Antioquía bëts pueblentša Jesucristbeñe ošbuáchiyënga imojenóyeunaye ntsachetšá crocénanënaca juíchmuana, ntšamo cada ona tojobenacá, Judeoca Jesucristbeñe ošbuáchiyënga jujabuáchama.

<sup>30</sup> Chca tmojanma, y Bernabé y Sáuloftaca chë crocénana tmojanichmó chë Judeoca Jesucristbeñe ošbuáchiyënguentše bëtsëjemëngcá amëndayëngbioye.

## 12

*Santiago tmojanóba; Pedro tmojanětame*

<sup>1</sup> Chë tempo, rey Herodes básefta Jesucristbeñe ošbuáchiyënga tojánishëche jutámíama y játssetšenama.

<sup>2</sup> Tojanmandá espadějaca chamóbama Santiago, Juanbe catšata;

<sup>3</sup> y Herodes tojántatsëmbona judiënga chë soye tojanogúsetama; as, cha tojanmandá Pédrënaca chamutámíama. Chca tojanopasá chë levadúraca ndëpormana tandëse sayté, Bashco fiesta ora.

<sup>4</sup> Pedro tmojánishache orna, Herodes tojanmandá chamutámíama, y chë cárceloca soldadënga cantátanga tmojanenojátá cántentše cha chamotsebojanýama. Herodes yojtsejuabnaye, Bashco fiesta tojochnëngo ora Pedro juabocnama, entsangbe delante jayanama cha chaóbanama.

<sup>5</sup> Chcasna, Pedro yojtsětámëna y chë soldadëngna corente imojtsebojanýá. Pero Jesucristbeñe ošbuáchiyëngna bëtscá Bëngbe Bëtsá imojtseimpadana Pédrëbíama.

*Bëngbe Bëtsá tojanma Pedro natjëmbana cárcelocana cháuaisebocnama*

<sup>6</sup> Canýe te yojtsájamna Herodes entsangbe delante Pedro juabocnama. Chë te ibetna, Pedro yojtsomañe y cátaoica canýe soldado yojtsemna; uta cadenëjuaca yojtsabatsëcna y inýe soldadëngna bëšócana chë utámëniñe imojtsebojanýá.

<sup>7</sup> Ndeolpe, Bëngbe Utabnabe canýe ángel tojánbocna, y lempe chë utámëniñe yojtsebuashinýinýana. Chora chë ángel tëchañe Pédrëbioye tbojánbojajo, tbojanfšená y tbojaniyana: “Betsco motsbaná ca.” Y cachora chë cadenëjuangá Pédrëbe buacu-atsënguentshana tojanatquëcjana,

<sup>8</sup> y chë ángel tbojaniyana: “Matichëtjo y matóshecochëtjo ca.” Pedro tojanma ntšamo chë ángel tbojaniyancá, y chora chë ángel tbojátaniyana: “Mataquëfsayé y šmasto ca.”

<sup>9</sup> Pedro utámënocana chë ángel ibojtsëstona, pero ndoñe yontsetátšëmbo aíñe ndegombre o ndoñe bentsemna chë ángel yojtsama cha chocana cháuaisebocnama; masna, ibojtsinýana mo canýe otjénayoca cuaftsemncá ca.

<sup>10</sup> Y útentše chë soldadënga imojtsebojanýajana chata tbojánachnëngo y yerëša bëšásoye tbojánashjango, chë ndayëša yojanamna tsáshenoye jabocnama; y chë bëšásana nýe cachabe ponto yojotëfjo. Chentšana tbojëftsanbocna ora, canýe tsáshenëjana ibojtsaye, y nýe ndeolpe chë ángel Pédrëbentšana yojtsojuánañe.

<sup>11</sup> Nýa chora Pedro tbojanosertá y tojánayana: “Mora tšabá šjosertá, ndegombre Bëngbe Utabná chabe ángel tbojichmó

atše jatsbocama Heródesbe cucuatšentšana y lempe ntšamo judiënga átšeftaca jamama imojuabnámnaca ca.”

<sup>12</sup> Pedro chë soyama juicio tojanca ora, tojána María, Juanbe mamabe yebnoye; Juan, Marcos ca imojanábobaina. Y chë yebnentše banga cánýiñe imojtsemna, Bëngbe Bëtsáftaca encuéntaye.

<sup>13</sup> Pedro chë tsashenoica bëshásoca tojanchembo ora, canýe oservená, Rode ca uabainá, tojánbocna jarrepárama.

<sup>14</sup> Chë oservená Pédrëbioye tbojanoyatëmbá ora, corente oyejuayá yojtsemna y cha, jebiatëfjo cuentna, cach tsoye tojesaná chë tšabe noticia jaúnayama, Pedro bëshoca yojtsemna ca.

<sup>15</sup> Chë tsoca imojtsemnëngna chora tmojaniyana: “¿Opá chectsebocna ca?”

Pero chë oservená yojtsichamo ndegombre ca. Y chënga tmojaniyana: “¡Chabe ángel ctsemna ca!”

<sup>16</sup> Chëntscuana Pedro cabá yojtsechembuana; tmojánebiatëfjo y tmojáninýe ora, chënga puerta imojenjnaná.

<sup>17</sup> Pero Pedro tojánëfjatšëmbo iytëca chamobiamama y tojanacuntá ntšamo Bëngbe Utabná utámenocana tbojánatsbocama. Chentšana tojanëyana: “Ntšamo tonjopasama Santiago y chë Jesucristbeñe inýe ošbuáchiyënga šmochjaúnaye ca.”

Chora Pedro chë yebnentšana tojtáisebocna y inýoye yojáta.

<sup>18</sup> Tojanbinýna ora, chë soldadënga puerta imojóntša enbouenanana, ntšamo Pédroftaca tojanopasama ndoñe imontsetátšëmbo causa.

<sup>19</sup> As Herodes tojanmandá Pedro chamotsenguanguama; pero jtsinýenama ndoñe imonjobenaye orna, Herodes chë soldadënga tojanatjá ndayá Pédroftaca tojanopasana y chentšana tojanmandá chë cha imojanbojanýá soldadënga jtsëbáyama. Chë soyënga tojanochnëngo chentšana, Herodes Judea luar-entšana tojëftsanbocna y Cesarea luaroye tojtsanoñe, y choca tojtsanoquedañe.

### *Herodes tojanóbana*

<sup>20</sup> Herodes corente yojtsetšátjaye Tiro y Sidonoquëngaftaca; as chënga tmojanenoyeuná Heródesbioye jama. Canýe uámana uajabuachaná, Blasto ca uabainábioye tmojanayeuamaná, y chana tojanašebuachená Herodes jauyanama ndoñe más entjayánanënga chamondëtsemnama, er Tiro y Sidonoca entšanga vida inmabomna Heródesbe luaroca sanángaca.

<sup>21</sup> Chcasna, rey Herodes inýe tescama tojánachembo. Chë tena, jóyebuambayama Herodes uámana entšayaca yojtopórma y yojótbema chabe mándaye tbemanentše; chentšana tojanonguamé.



<sup>22</sup> Chora entšanga tmojanontsé mëntšá uayebuáchana: “¡Chë entsoyebuambná cha entšá ndoñe quenátsmëna! ¡Chana canye dios entsemna ca!”

<sup>23</sup> Cachora, Bëngbe Bëtsabe canye ángel tojanma Herodes šocana chaboshachama, chabe cuenta Bëngbe Bëtsá chamuatschuama entšanga ndoñe yonjáuyana causa. Herodes tojanóbana mamángaca sasná.

<sup>24</sup> Pero chë tempo más bëtsca entšanga Bëngbe Bëtsabe palabra imojtsuenana y Jesucristbeñe imojtsošbuáchiye.

<sup>25</sup> Bernabé y Saulo chatbe trabajo tbojëftsanma ora, Jerusalenocana Antioquía luaroye tbojésanata y Juan, chë Marcos ca uabobuatmá, chátaftaca tmojëftsanbetše.

## 13

*Bernabé y Saulo tbojanbojatsé Bëngbe Bëtsabe trabajo jamama*

<sup>1</sup> Antioquía luaroca Jesucristbeñe ošbuáchiyënguentše imojtsemna Bëngbe Bëtsabe juabna oyebuambnayënga y ošbuachiyëngbioye abuátambayënga. Chënga imojanabaina Bernabé, Simón (chë Sibetá ca uabobuatmá), Lucio Cirenocá, Manaén (nda tojanoboché cányiñe Herodes, chë Galileoca réyefata) y Saulo.

<sup>2</sup> Canye te, Bëngbe Utabná imojtsatschuanaye y chama tondaye ntjascá imojtsemna ora, chë Uámana Espiritu tojánayana: “Mora šmochjaleséncia Bernabé y Saulo tšëngaftangbentšana chabuétsebocnama; chatna canye trabajuama sënjabacá ca.”

<sup>3</sup> Bëngbe Bëtsá jëtschuayama tondaye ntjascá imojtsemnëntscuana y cháftaca imojtsencuéntantscuana, chëngbe cucuatšënga chatbe bestšaše juatsboica tmojancjá, chatbe trabajuiñe chaújabuachama Bëngbe Bëtsá jtseimpadánëse. Y chentšana chátbioye tmojtanadiošoftá.

*Bernabé y Saulo Chipre luaroca*

<sup>4</sup> As Bernabé y Saulo, chë Uámana Espiritbeyeca ichmónata, Seleucia ca uabáinoye tbojánata y chentšana bejaycá, Chipre luaroye.

<sup>5</sup> Salamina bëts puebloye tbojánashjango ora, tbojanontsé Bëngbe Bëtsabe palabrama entšanga jábuayenama, chentša judiëngbe enefjuana yebnënguenache. Juan Marcos mo chatbe uajabuachanacá ibojtsebomna.

<sup>6</sup> Njëts chë luarëjana tmojánachnëngo orna, Pafos puebloye tmojánashjajna; y chentše tmojáninýena canye judío tatsëmbuá, Barjesús ca uabainá. Cha yojánichamo cha canjamna canye Bëngbe Bëtsabe juabna oyebuambnayá ca, pero ndoñe chca yonjamna.

<sup>7</sup> Chë tatsëmbuá inatrabájaye chë Chipre luaroca mandad-biama, Sergio Paulo ca uabainá; y chë mandadna corente osertaná inamna. Cha yojtseboše Bëngbe Bëtsabe palabra jouenama; as tojanmandá Bernabé y Saulo jobiatšana.

<sup>8</sup> Pero chë tatsëmbuá, grieguiñe Elimas ca uabainá, Saulo y Bernabebe contra yojtsemna y yojtsama chë mandado ndoñe chaondëtsošbuáchema, ntšamo chë Jesucristbeñe ošbuáchiyënga imojanošbuachecá.

<sup>9</sup> Chora, Saulo chë Pablo ca imojanábobuatmabe ainaniñe chë Uámana Espiritu corente yojtsemándaye; as chë tatsëmbuábioye yejuana ibojonýinýiye,

<sup>10</sup> y tbojaniyana: “¡Abuambnayá, puerta bacna entšá, Satanásbe uaquiñá y tšabe soyënga ndoñe chaondëtsebínýnama trabajayá! Bëngbe Utabnabe nyetsca ndegombre soyëngama aca contsichamo uayátsenaye soyënga yojtsemna ca.

<sup>11</sup> Mora, Bëngbe Bëtsá cmochanjacastíga, jtaná cochanjoquéda y baseftayté jinýama quecochatobenaye ca.”

Cachora Elimas mo ibetiñcá yojoquéda y ibojtsonguaye canýa buacuetëntšnana chabuánatsama, jtaná yojtsemna causa.

<sup>12</sup> Chë mandado chca tojáninýe ora, Jesucristbeñe yojtsošbuaché y yojenjnaná Bëngbe Utabnabe soyënga tojanat-sjínýama.

### *Pablo y Bernabé Antioquía pueblentše, Pisidia luaroca*

<sup>13</sup> Pablo y chabe enutënga, Páfosocana, bejaycá Perge puebloye tmojátananga, Panfilia luaroca. Pero Juan tojésanabashejuana y Jerusalenoye tojésanshëcona.

<sup>14</sup> Pergentsana Antioquía puebloye tbojátanata; chë pueblo inamna Pisidia luare béconana. Chentšna, ochnayté, chë judiëngbe enefjuana yebnoye tbojánamashëngo y tbojanótbema.

<sup>15</sup> Moisesbe leyiñe y Bëngbe Bëtsabe juabna oyebuamb-nayëngbe uabemana librëšangañe tmojanalía orna, chë enefjuana yebnentša mándayënga canýa tmojanichmó chënga jáuyanama: —Israeloquënga, bënga fsëntseboše entšanga chašmabuayená, nderado ndayá jayanama šmojtsebomñese, muentša entšanga añemo chamotsebomnama ca.

<sup>16</sup> As Pablo tojantsá y entšángbioye cucuátšeca tojánefjatsëmbo iytëca chamobiamama, y tojánayana: —Smochjouena Israeloquënga y ndoñe judiënga Bëngbe Bëtsá adórayënga.

<sup>17</sup> Israeloca entšanga mondadorana Bëtsá, Bëngbe Bëtsá, bëngbe bëts taitanga tojanëbuáyana, y tojanma chënga corente bëtscanga chamotsemnama, chënga Egiptoca inýe luarocana

ashjajnëngcá imojoyena ora. Y chentšana, cachabe obenánaca chë luarocana chënga tojésanëbuacana.

18 Canta bnëtsana uata nÿetsá, Bëngbe Bëtsá entšanga ndoyena luaroca chënga yojanëuantana,

19 y cha tojanma chë Canaán luaroca canÿsëftentša entšanga chamopochocama y bëngbe bëts taitanga chëngbe fshantsënga nduiñënga tojánabiama.

20 Chë tempo, chë Bëngbe Bëtsá Abrahámbyoye quem fshantse jatsetayama tbojanšbuachená orscana, y chë tempo, chë bëngbe bëts taitanga chë fshantse tmojanóyëngacñëntscuana, canta patse y shachna bnëtsana uata tojanochnëngo.

“Chentšana, Bëngbe Bëtsá chëngbiama mandadënga tojánabiama, Bëngbe Bëtsabe juabna oyebuambnayá Samuel chëngbe mandayá yojëftsemna tempëntscuana.

21 Chentšana, Israeloquënga Samuel tmojanimpadá canÿe rey chabojayé chaotsamëndama; as Bëngbe Bëtsá Saúlbyoye chëngbe rey tbojánbema, canta bnëtsana uatëscama. Saúl inamna Cisbe uaquiñá y Benjaminbe bëts pamillanguentšá.

22 Más chcoyna, Bëngbe Bëtsá Saúlbyoye chë mándayentšana tbojtsanjuaná, y chentšana Davidbyoye mo chëngbe reycá tbojánbema. Chabiama Bëngbe Bëtsá tojánayana: ‘Atše sëndëtatšëmbo, David, Isaíbe uaquiñá, canÿe tšabe entšá yomnama y chama atše sëndoyejúa, y cha sempre endëprontana ntšamo atše stsebošcá jtsamama ca.’

23 Davidbentšana canÿe entšá Jesús enjamna, nda Bëngbe Bëtsá tbojanichmó Israeloca entšanga jabátsebacama, ntšamo cach Bëngbe Bëtsá chëngbe bëts taitanga tojanašebuachenacá.

24 Cabá Jesús ndëbocna ora, Juan nÿetsca Israeloquënga tojanabuayená bacna soyënga amana chamotsajbanama y chamuenábayama.

25 Juanbe trabajo jopochócama yojtsobeco ora, cha tojánayana: ‘¿Nda atše tsmënama tšëngaftanga šmojuabná ca? Chë tšëngaftanga šmontsejuabná atše tsmëna ca cha, atše ndoñe quetsátmëna. Pero átšbentšana echanjabo canÿa, y atše merecido taitsatobuajoñe ni mo jotsejbiyama chabe shecochëtjonëshentša corriëja jajafjonama ca.’

26 “Chcase morna, Abrahámbyoye entšanga y ndoñe judiënga Bëngbe Bëtsá adórayënga; bëngbiama entsemna quem buayenana soye, chë Bëngbe Bëtsá entšanga jätsebacana.

27 Masque cada ochnayté, Bëngbe Bëtsabe juabna oyebuambnayëngbe uabemana palabra monjanalía chëngbe enefjuana yebnentše, Jerusalenentša oyenënga y chentša mándayënga ndoñe quenjatanësertana nda Jesús bëtsemnama, y chë tmojtsalía soyëngama cach ndoñe. Y chca, chënga

Jesús chamóbama tmojánboshjona ora, chë chca amënga tmojanma ntšamo Bëngbe Bëtsabe juabna oyebuambnayëngbe librëšangañe iuabemancá.

28 Y masque ndocna bacna soye tmonjáninyëna Jesús jóbanama chabotsemnama, Pilato tmojanimpadá chaomandá chábioye jóbama.

29 Chentsana, lempe ntšamo Bëngbe Bëtsabe uabemana palabrénguiñe iuayancá Jesúseftaca tojanochñëngo ora, chabe ústonënga chë cruzocana tmojtanéštjango y tmojanatbontsá.

30 Pero Bëngbe Bëtsá tojanma Jesús cháuatayenama.

31 Chë Galileocana Jerusalenoye cháftaca tmojánanga, baytentscuana Jesús yojánebébuacana; y morna, lempe ntšamo Jesusbiana tmojaninyá, chënga entšángbeñe montsoyebuambná.

32 “Y chca, mora bënga chë tšabe noticiënga cbontsëtsësná. Ntšamo Bëngbe Bëtsá bëngbe bëts taitanga tojanašebuachenacá,

33 cha tonjama, bënga chë chëngbe entšanguentšëngbiana, chca chaotsemnama. Y Bëngbe Bëtsá chca tojama, Jesús cháuatayenama cha jamëse. Rey David, Bëngbe Bëtsabe uabemana palabrénguiñe, segundo salmentše mëntšá tojanábema, ntšamo Bëngbe Bëtsá Jesúsbioye tbojanianama:

Aca atšbe uaquiñá condmëna.

Mënté entšanga sënjinyanýé aca atšbe Uaquiñá comnama ca.

34 Y tempo Bëngbe Bëtsá chabe uabemana palabrénguiñe tojaninyanýé cachá jamama Jesús cháuatayenama y ndoñe cachiñe chaondóbanama, mëntšá tojánayana ora:

Chë ndegombre soyënga y chë tšabe bendicionënga ntšamo

David sënjanšbuachenacá,

tšëngaftanga cbochanjátšataye ca.

35 Inýoca Bëngbe Bëtsabe uabemana palabrénguiñe, Salmos librëša uabiamnayá, mëntšá tojanábema ntšamo Jesús Bëngbe Bëtsábioye tbojanianama:

Aca ndoñe quecochatslesëncia atšbe cuerpo,

chë acbe Uámana oservenabe cuerpo chaotsopochocama ca.

36 David, chabe tempo imojoyenëngbiana tojanma, ndayá cha chaomama Bëngbe Bëtsá tojanjuabocá. Cha tojanóbana y tmojanatbontsá chë chabe bëts taitángbioye tmojanëtabuantsá luarentše, y chabe cuerpo tojanopochocá.

37 Pero chë Bëngbe Bëtsá tojanma chauatayenamabe cuerpna, ndoñe tonjanopochocá.

38-39 “Asna, baconga y batanga, atše sëntseboše tšëngaftanga quem soye chašmotsetátšëmbo: Ndayá Jesús tojanmama, entšanga chëngbe bacna soyëngama perdonánënga montsemna. Jesúsbeyeca, nyetsca chábeñe tmojtsošbuáchenga,

bacna soyëngama perdonánënga mochántsemna. Ntšamo Moisesbe leyíñe iuayancá tmojanmama, chënga ndoñe tmonjanobená chca perdonánënga jtsemnama; nyë Jesúsbeñe jtsošbuáchiyëse chënga perdonánënga jtsemnana.

40 Cuedado šmochtsebomna, ntšamo Bëngbe Bëtsabe juabna oyebuambnayënga tmojanayancá, tšëngaftangaftaca ndoñe chaondochnënguama.

41 Bëngbe Bëtsá mëntšá tojánayana: Smochjouena. Tšëngaftanga chë ntšamo atše tijayancá šmojtsábotenga, ojnanánënga šmochántsemna y šmochanjóbana. Tšëngaftanga cabá vida šmobomnëntscuana, atše bëts soyënga chanjëftsema, y masque ndánaca chë soyëngama chacmojtsacúnta, tšëngaftanga chiñe ndoñe quešmochatošbuáchiye ca” –Pablo tojanoyebuambá.

42 Pablo y chabe enutënga chë judiëngbe enefjuana yebnentsana tmojëftsanbocna ora, chë ndoñe judiënga chëngbioye tmojanaimpadá, chë inye ochnaytescama chë soyëngama más jábuayenama.

43 Chentše chë te jénefnama tempo tojanopochocá ora, ba judiënga y ndoñe judiënga, chë Bëngbe Bëtsábioye imojánadorana mo chë judiëngcá, Pablo y Bernabé tmojanëseto. Y chatna chënga tmojanabuayená nyëts tempo chamotsejuabnama, Bëngbe Bëtsá chëngbiam tšabe soyënga yojtsamama.

44 Chë inye semana, chë ochnaytena, nya mo nyëtsca chë pueblentše oyenënga tmojanobeconá Bëngbe Bëtsabe palabra jouenama.

45 Pero ba entšanga choye jouenama tmojánama chë judiënga tmojáninye ora, tmojanotjayaná, ba entšanga Pablo imojtseyeunanama; as chënga tmojanontsé mocá ichámuana ndayá cha yojtsóyebuambnama, y chábioye oyenguayana.

46 As Pablo y Bernabé más añémoca mëntšá tbojánayana: “Endánëyta, natsana tšëngaftanga, chë judiënga šmomnënga, Bëngbe Bëtsabe palabra jshabuayenana. Pero tšëngaftangna chë palabra šmontsaboté, y šmontsejuabná tšëngaftangbiam ndoñe tšabá yontsemna chë nyëtsca tescama yomna tšabe vida jtsebomnana ca; chë causa, bënga fchantsoñe chë ndoñe judiëngbeñe Bëngbe Bëtsabe palabra jóyebuambayama.

47 Er Bëngbe Bëtsá chama šjanichamó, mëntšá jauyanëse: Aca tcbonjuábuayana chë ndoñe judiëngbioye tšabe noticiënga jábuayenama, chaósertama.

Y chca, aca chëngbiam cochántsemna mo canye binynayacá.

Chca, ácbeyeca nÿets luarënguenache entšanga atše chanjatse-bacá ca.”

48 Chë ndoñe judiënga chca tmojanuena ora, puerte imojtsóyejuaye y tmojanontsé mëntsá ichámuana: “Bëngbe Utabnabe palabra tšabá bëngbiama entsemna ca.” Y chora, chë nÿetsca tescama yomna tšabe vida jtsebomnama Bëngbe Bëtsá tempo tojánabacacanga, tmojanontsé Jesúsbeñe jtsošbuáchiyana.

49 Y chca, nÿets chë luariñe más entšanga Bëngbe Bëtsabe palabra imojtsuenana.

50 Pero chë judiënga tmojanoyebuambá, shembásengaftaca Bëngbe Bëtsá adórayënga y uámanënga, y chë pueblentša uámana taitángaftaca, jamama Pablo y Bernabé chabosufrima y chë luarentšana jtëbuacnama.

51 As, Pablo y Bernabé tbojésanshecstëtonata, judiënga jinÿanÿiyama chënga ndoñe tšabá tmojanmama; y chentšana, Iconio puebloye tbojtsanoñe.

52 Pero Jesucristbeñe ošbuáchiyënga corente oyejuayënga imojtsemna, y chë Uámana Espíritu chëngbe ainaniñe corente yojtsemádaye.

## 14

### *Pablo y Bernabé Iconio puebloca*

1 Iconioca, Pablo y Bernabé cánÿiñe tbojánamashëngo chë judiëngbe enefjuana yebnentše y corente obenánaca Bëngbe Bëtsabe palabra tbojanoyebuambá. Chíyeca, ba judiënga y ndoñe judiënga Jesucristbeñe imojtsošbuaché.

2 Pero chë judiënga Jesucristbeñe ndošbuáchiyënga, chë ndoñe judiëngbioye tmojanayëñaná, Pablo y Bernabebiama podesca chamotsejuabnama.

3 Chíyeca, Pablo y Bernabé bayté chentše tbojanototoná y ndauatjca Bëngbe Utabná Jesucristbiama tbojanoyebuambá. Bëngbe Utabná obenana chata tojanatšatá bëts soyënga jtsamama, y chë soyëngaca Bëngbe Utabná entšanga tojaninÿanÿé, ndayá chë ichmónata ibojtsoyebuambnacá ndegombre bëtsemnama, chë Bëngbe Bëtsá nÿetscanga iuababuánÿeshanana.

4 Pero nÿetsca chë pueblentša entšanga ndoñe cachcá imontsejuabnaye; ínÿenga chë judiëngaftaca imojtsemna, y ínÿengna chë Jesucristbe ichmonátaftaca.

5 As, chë judiënga y ndoñe judiënga chentša mandayëngaftaca tmojanenoyeuná chata jtsatsetšenama y ndëtšbéngaca jtsébáyama.

<sup>6</sup> Pero Pablo y Bernabé chama tbojántatsëmbona orna, tbojtsanëchañe Lистра y Derbe pueblöye, Licaonia luaroca, y chocha chábuañe luarëngöye;

<sup>7</sup> y chë luarënguenáchnaca, chata Jesucristbe tšabe noti-ciënga entšanga tmojanabuayená.

*Listra puebloca, ndëtšbéngaca Pablo tmojtsanatëchënganja jtsóbama*

<sup>8</sup> Lистра puebloca inamna canye boyabása jama ndobená. Ndocna te yondobena jana, chca cosheto inónyña causa. Chë boyabásana yojtsetbemana

<sup>9</sup> ouenana ntšamo Pablo yojtsichamcá. Y Pablo chábioye tbojanonjinyé ora, tojántatsëmbona chë šocá tša yojtsošbuáchema, shnaná jtsatsmënama;

<sup>10</sup> as Pablo, juayebuáchenëse tbojanianyana: “¡Motsbaná y acbe shecuatšëngaca tšabá motsa ca!”

Chora chë boyabása, canye jontsënjëse tojantsá y yojóntša anana.

<sup>11</sup> As chë entšanga, ndayá Pablo tojanmcá tmojáninye ora, tmojanontšë uayebuáchana chë Licaonia luarentša biyañe, mëntšá: “¡Bëngbe diosënga bëngbioye tbojátšma mo entšatcá ca!”

<sup>12</sup> Bernabé imojtsábobuatma Zeus ca, mo chë chëngbe diosënga amëndayacá; y Páblëna Hermes ca, mo chë inyë diosëngbiana oyebuambnayacá. Páblëbioye chca imojtsábobuatma, er cha más yotsoyebuambná.

<sup>13</sup> Zeusbiana chentša bachna inabomna canye yebna chë pueblo chaboca, chábioye jadórama. Chë bachna, uacnënga tojanënatse y uantšëfjushangá tojanëyamba chë Zeus jadórama yebnentša amashjuanoye; y cha y chë entšanga imojtseboše chë uacnënga jashebuáyana y jajuinjyiyana, chca, chë ichmonátbioye jadórama.

<sup>14</sup> Bernabé y Pablo chama tbojántatsëmbona ora, entšayá tbojtsanenántšajatanëca, entšanga jinjyanjyiyama, ntšamo chënga imojtsamcá chata tondaye yonjógusetama, y tbojëftsantojajo entšangbe tsëntsajana y mëntšá ibojtsaychembumbuana:

<sup>15</sup> “Baconga y batanga, ¿ndáyeca chca šmojtsama ca? Bëndata cach tšëngaftangcá entšata fsëndmëna. Muentšë bëndata fsëntsemna nje jábuayenama Bëngbe Utabná Jesucristbe tšabe noti-ciënga, tšëngaftanga chë quem ndoservena soyënga, vida ndbomna soyënga adórayana chašmotsajbanama, y Bëngbe Bëtsá Ainabe benache chašmatishachama. Ndegombre, cha tojanma celoca, fshantse, nyetsca béjayënga y lempe ntšamo chenache yobinjncá.

16 Masque tempo, Bëngbe Bëtsá entšanga tojanalesenciá cada ona chaoma ntšamo tojtsejuabnacá, tšabá cachëngbiana yojtsemnayeca,

17 Bëngbe Bëtsá ndocna te ntjájbanana tšëngaftanga jtsinÿanÿnayana, cachá tojama tšabe soyëngaca, mocna Bëtsá cha yomnana. Cha endama tšëngaftangbiana chauaftema y chë matënga botamana chaoshájonama, y becá saná cmondatsatná; y cha endama tšëngaftangbe ainaniñe corente oyejuayana chašmotsebomnama ca” —chata tbojánayana.

18 Masque chë soyënga tbojánayana, nÿe batšatema más bën y ya ndoñe matbëñjanobenata chë entšanga jtsëuyanana uacnënga jashebuáyama, chca, chátbioye jadórama.

19 Chca ora, básefta judiënga tmojánashjajna Pisidioca, Antioquíocana y Iconiocana, y chentša entšángbioye tmojanayëñaná, Jesucristbe ichmonatbe contra chamotsemnama. Chcasna, Pablo ndëtsbéngaca imojtsénanaye y chabe cuerpo chë pueblo chaboye tmojtsansjojó, er chënga imojtsejuabnaye Pablo ya obaná yojtsemna ca.

20 Pero Jesucristbeñe ošbuáchiyënga Pablo tmojanóbobuashcona orna, cha tojtantsbaná y cachiñe chë puebloye tojtesaná; y chë yëfsana, Bernabéftaca Derbe puebloye tojána.

21 Derbe puebloca Jesucristbe tšabe noticiënga entšanga tmojanabuayená, y chca, entšanga Jesucristbeñe imojtsošbuáchiye. Chentšana chata tbojésanshëcona Listra, Iconio y Pisidioca Antioquiye.

22 Chë luarënguenache chata ibojánana chë Jesucristbe ustonëngbioye atañëmuaye, cada te chábeñe más chamotsošbuáchema. Y entšángbioye tmojanëyana: “Bëngbe Bëtsabe amëndayoye jamashënguamna, bënga šontsamna quem luarëntše bëtscá jëftsepadecénana ca.”

23 Nÿetsca ošbuachiyëngcá enefjuanenache, bëtšëjemëngcá mándayënga tmojanabacacá, chentša Jesucristbeñe ošbuáchiyënguentsana, cachënga chentša ošbuachiyëngbioye jtsamëndayama. Bëngbe Bëtsá jëtschuayama tondaye ntjascá imojtsemna y cháftaca imojtsencuénta ora, cha tmojanimpadá, chë ošbuáchiyënga Bëngbe Utabnabe cucuatšinë chamotsemnama, ndábeñe chënga imojtsošbuaché.

*Pablo y Bernabé, Sirioca Antioquía puebloye tbojtanata*

24 Pisidia luarëjana tbojánachnëngo ora, Panfilia luaroye tbojánashjango.

25 Perge pueblentše Jesucristbe tšabe noticiënga entšángbioye tmojanabuayená, y chentšana Atalia puebloye tbojánata.



<sup>26</sup> Chentšana, Bernabé y Pablo, bejaycá tbojtanata Sirioca Antioquía pueblöye. Chentša entshanga Bëngbe Bëtsá tmojanimpadá chata chabe cucuatshiñe chabotsemnama, chë trabajuñe chaotsanñenama; y chorna, chë trabajo ya tbojanpochocá.

<sup>27</sup> Choye tbojtanashjango ora, nñetsca Jesucristbeñe ošbuachiyëngbioye tmojánachembo, y tmojanacuntá ntšamo Bëngbe Bëtsá tšabe soyënga chátaftaca tojanmama, y ntšamo Bëngbe Bëtsá tojaninñanyé, chë ndoñe judiëngnaca chamotsobenama Jesucristbeñe jtsošbuáchiyama.

<sup>28</sup> Y Pablo y Bernabé bayté chentše tbojanototoná Jesucristbeñe ošbuáchiyëngaftaca.

## 15

*Ichmónënga y bëtsëjemëngcá mándayënga Jerusalenoca tmojánenefna jencuëntama*

<sup>1</sup> Chë tempo, báseftanga Judeocana áshjajnënga tmojanontsé, Antioquía pueblentše, chentša Jesucristbeñe ošbuáchiyënga mëntšá jabuátambana: “Base bobachtema chë más delicadentše ndoñe šmonjenotëtšëse, ntšamo Moisesbe leyiñe endayancá, ndoñe quenátopodena tšëngaftanga atsebácanënga jtsemnama ca.”

<sup>2</sup> Chíyeca, Pablo y Bernabé jabuachana chca buatëmbayëngaftaca imojánenatsësnaye. Cabana, tmojanëbuáyana Pablo, Bernabé y ínñyënga Jerusalenoye chamotsama, choca chë Jesucristbe ichmónëngaftaca y chë chentše Jesucristbeñe ošbuachiyëngbeñe bëtsëjemëngcá mandayëngaftaca chama chamencuentama.

<sup>3</sup> Chcasna, chë Antioquioca imojánenefjuana Jesucristbeñe ošbuáchiyënga Jerusalenoye chënga tmojanichamó. Fenicia y Samaria luarëjana imojtsachñëjuana ora, chënga tmojanacuntá ntšamo chë ndoñe judiënga chëngbe tempsca soyënguiñe ošbuáchiyana tmojtsanajbanama y chora Bëngbe Bëtsábeñe imojtsošbuáchema. Jesucristbeñe chentša ošbuáchiyënga chca tmojanuena ora, puerte oyejuayënga imojtsemna.

<sup>4</sup> Pablo y chë ínñyënga Jerusalenoye tmojánashjajna ora, chentša Jesucristbeñe ošbuáchiyënga, Jesucristbe ichmónënga y bëtsëjemëngcá mándayënga chëngbioye tmojanëbuaja. Chentšana, Pablo y Bernabé tbojanacuntá lempe ntšamo Bëngbe Bëtsá chátaftaca yojamcá.

<sup>5</sup> Pero básefta fariseunga, chora ya Jesucristbeñe ošbuáchiyënga, tmojantsá y mëntšá tmojánayana: “Chë ndoñe judiënga entsamna chë más delicadentše base bobachtema tëtšenënga jtsemnana, bënga judiëngcá; y tšëngaftanga

cmontsamna chënga jáuyanana, ntšamo Moisesbe leyënguñe iuayancá chamotsamama ca.”

6 As, chë Jesucristbe ichmónënga y bëtsëjemëngcá mándayënga tmojánenefjna jencuéntama, chë ndoñe judiënga aíñe o ndoñe yonjánamnama chë más delicadentse base bobachtema tëtšenënga jtsemnama, ntšamo chë judiënga imojanamancá.

7 Bën y bëtscá chënga tmojanencuentá chentšana, Pedro tojantsbaná y mëntsá tojanëyana: “Jesucristbeyeca catšátanga, tšëngaftanga šmondëtatsëmbo, ya bayté entsemna Bëngbe Bëtsá tšëngaftangbentsana atše šonjanábuayana, Jesucristbe tšabe noticiënga chë ndoñe judiënga jábuayenama, chca, chënga Bëngbe Utabnábeñe chamotsošbuáchema.

8 Bëngbe Bëtsá jtsetatsëmbuana lempe ntšamo entšanga tmojtsejuabnacá. Y cha šonjaninÿanyé, chë ndoñe judiëngnaca imnobena chabe entšanga jtsemnama, chábeñe tmojtsošbuáchese, chë Uámana Espíritu chëngbe ainaniñe cháumashënguama cha tojanma ora, ntšamo cha bëngbe ainaniñe tojanmcá.

9 Y chca, Bëngbe Bëtsabiana nÿetscanga cachcá monduámana, judiënga y ndoñe judiëngnaca; y cha tojama chë ndoñe judiëngnaca chëngbe bacna soyëngama perdonánënga chamotsemnama y ainaniñe tšabe juabna chamotsebomnama, Bëngbe Bëtsabe palabriñe jtsošbuáchiyëse.

10 Y mora, ¿ndáyeca tšëngaftanga ndoñe šmontseboše ntšamo Bëngbe Bëtsá tojamcá? Pero tšëngaftanga šmontseboše, chë ndoñe judiënga Jesucristbeñe ošbuáchiyënga lempe chë leyentša mandënga chamotsocumplínama, mo nda ínÿabioye uauta uasmanësha cuaftsasmëmnacá; pero lempe chë mandënga, ni bëngbe bëts taitanga ni bënga ntsobenana jocúmpliana.

11 Y chca ndoñe chaondëtsemna. Bënga mondošbuaché bënga atsebácanënga imomnama Bëngbe Utabná Jesús chabe tšabe juabna šojaninÿanyéyeca, y Bëngbe Bëtsá cachcá chë ndoñe judiëngnaca tojatsebacá ca” —cha tojanëyana.

12 Chorna, chentše imojtsemna entšanga nÿetscanga iytëca tmojanobiana, y tmojanuena Bernabé y Pablo jtsóyebuambnayana, chë bëts soyëngama, Bëngbe Bëtsabe obenana entšanga jinÿanÿiyama, y inÿe soyëngama chabe obenánaca, ntšamo chë ndoñe judiëngbeñe Bëngbe Bëtsá chátaftaca tojanmcá.

13 Chë útata jóyebuambayama tbojanpochocá ora, Santiago mëntsá tojánayana: “Jesucristbeyeca catšátanga, šmochjouena:

<sup>14</sup> Simón šonjabuayená ntšamo Běngbe Bětsá natsana tojan-injanyé, chě ndoñe judiěngnaca cha iuanjēnana, y chíyeca cha chěnguentšana banga tojubuáyana chabe entšanga chamotsemnana.

<sup>15</sup> Ntšamo Simón šonjabuayenacá entsemna cachcá ntšamo chě Běngbe Bětsabe juabna oyebuambnayēnga tmojanayancá, ntšamo yochjanopásama y ntšamo Běngbe Bětsabe uabemana palabrēnguiñe endayancá, mēntšá:

<sup>16</sup> Chentšana atše chanjésabo

y chě Rey Davidbe pamíllanga cachiñe uámanēnga chantabiama;

mo nda canye uáshajayena yebna tojětsjebcá, atše, Davidbe pamíllanga cachiñe uámanēnga chantabiama;

<sup>17</sup> chca, chě inye entšanga chamonguango ndayá jamana atše, tšěngaftangbe Utabná, más chašmotsábuatmama,

njětsca ndoñe judiēnga, chě atšbe entšanga chamotsemnana atše tijábacacanga.

<sup>18</sup> Chca atše, tšěngaftangbe Utabná sěntsichamo,

nda ya bayté entsemna tonjanma entšanga chě soyēnga chamotsetatšěmbuama ca —chiñe endayana.”

<sup>19</sup> Chentšana Santiago mēntšá tojaněyana: “Chíyeca atše sěntsejuabná, bēnga ndoñe šontsamna chě ndoñe judiēngbiama jamana más totcá chaotsemnana Jesucristo jtsěstonama.

<sup>20</sup> Chamna, šontsamna chēnga juabuábiamana y jáuyanana ndoñe chamondětsesá, sananga chě ndaye soyēnga entšanga tmojuabná diosēnga yomna ca jadórana tmojuiyēbana; bacna soyēnga shembásēnga o boyabásēngaftaca ndoñe chamondětsama y ndoñe chamondětsesá tšěšana bayēngbe mēntšena, y buiñe cach ndoñe ca.

<sup>21</sup> Er chě natsana tempēnga orscana, njětsca pueblēnguenache mondmēna chě Moisés tojěftsanayana soyēnga entšāngbiōye abuyiynayēnga; y chabe leyēnga, njětsca ochnayté mondbetsalíaye chě bēnga judiēngbe enefjuana yebnēnguenache ca” —cha tojaněyana

*Chě Jerusalenoca ichmónēnga y bětsějēngcá mándayēnga canye tsbuanácha tmojanichmó chě ndoñe judiēngbiama*

<sup>22</sup> Chentšana, chě Jesucristbe ichmónēnga y bětsějēngcá mándayēnga, njětsca chě Jesucristbeñe ošbuáchiyēngaftaca tmojanenoyeuná chěnguentšana báseftanga jabacacayama, Pablo y Bernabéftaca Antioquía pueblōye jíchamuama. Chcasna, tmojanēbuáyana Judas, chě Barsabás ca uabobuatmá, y Silas; chata ibnamna uámanata chě Jesucristbeñe ošbuáchiyēnguentše.

<sup>23</sup> Y chěngaftaca canye tsbuanácha tmojanichmó, y chiñe mēntšá yojětsayana:

Bënga chë Jesucristbe ichmónënga y chë bëtsëjemëngcá mándayënga, cach tšëngaftangcá Jesucristbeñe ošbuáchiyënga, fsëntseboše Bëngbe Bëtsá salúdoca chacmotsábouamna, tšëngaftanga chë ndoñe judiënga, Jesucristbeñe ošbuáchiyënga, Antioquía puebloca y Siria y Cilicia luarëngoca oyenënga.

24 Bënga fsëntsetatšëmbo bëngbentsana báseftanga choye tmojángama, bënga ntjamëndacá, y fsëntsetatšëmbo mocna soyënga cmojtsabuátambama y chë causa, tšëngaftanga ndoñe šmontsetátšëmbo ntšamo jtsejuabnayana ndayá jamama yomnana, Jesucristbe canye ndegombre ustoná jtsemana.

25 Chcasna, bënga fsënjenoyeuná y šonjúnynana tšabá yojtsemna báseftanga bënguentšana jabacacayana tšëngaftangbioye jontješiyama chamotsama, y Pablo y Bernabé, chë Jesucristbeyeca bëngbe bonshana catšátataftaca, choye chamotsama.

26 Chë úatna ba soye tbojotsbocá vida jáshbiana, Bëngbe Utabná Jesucristbiama oservëniñe.

27 Chátaftaca Judas y Silas fsënjichamó; y chatna cach tšëngaftangaftaca bochanjóyebuambaye ntšamo quem tsbuanáchañe yojtsábemanama.

28 Chë Uámana Espiritu y bënga cachcá fsëntsejuabná, bënga ndoñe šontsamna tšëngaftanga jamëndana bëtscá jabuache mandënga Moisesbe leyënguiñe chašmotsocumplínama. Nye quem uámana soyënga chiñe añe cmontsamna jtsobedecénana:

29 Ndoñe šmattsesaye mëntsëna, chë ndaye soyënga entsanga tmojuabná diosënga yomna ca jadórana tmojóba bayëngbiana; ndoñe šmatjofšiye buiñe, ni šmatjase tsešana bayëngbe mëntsëna; y shembásënga y boyabásëngaftaca bacna soyënga ndoñe šmattsama. Chë soyënga ntšamcá, tšabá šmochanjama.

Bëngbe Bëtsá salúdoca chacmotsábouamna ca –chiñe yojétsayana.

30 Chcasna, chë quem Jerusalenocana ichmónënga tmojésanodiošoftanentsana, Antioquía puebloye tmojána; y chocna, nyetsca chë Jesucristbeñe ošbuachiyëngbioye tmojanëbuaja y chë tsbuanácha tmojanayentšbuaché

31 Chë Antioquía pueblentša Jesucristbeñe ošbuáchiyënga ntšamo chë tsbuanáchañe yojtsabemancá tmojanalía ora, bëts añemo tmojtanca y corente imojtsóyejuaye.

32 Judas y Silas Bëngbe Bëtsabe juabna oyebuambnayata ibnamna; as, chátnaca chë chentša Jesucristbeñe ošbuachiyëngbioye ba soyënga tmojanéyana, chënga

añemo chamotsatsbomnama y Jesucristbeñe corente chamotsošbuáchema.

<sup>33</sup> Chentšana baseftaytese, chentša Jesucristbeñe ošbuáchiyënga chëngbioye tmojtanadiošoftá, chë ndëmuanyënga tmojanichamóngbioye jtama.

<sup>34</sup> Pero Sílasna tšabá ibojtsinýana cachentše más jëftsajëtanama.

<sup>35</sup> Pablo y Bernabé baseftayshinýe Antioquía pueblentše tbojanototoná y ba ínýengaftaca Bëngbe Utabná Jesucristbe tšabe noticiënga entsanga tmojanabuatambá y tmojanabuayená.

*Pablo cachiñe inýe luarëngoye tojána, Bëngbe Bëtsabe trabajo jamama*

<sup>36</sup> Chentšana baseftaytese, Pablo Bernabébioye tbojaniyana: “Bëngbe Utabnabe palabra tbonjanabuayená luarëngoye bochjésa, choca Jesucristbeñe ošbuáchiyënga jábuachama y jányama ntšamo imojtsemnana ca.”

<sup>37</sup> Bernabé yojtseboše, Juan chë Marcos ca uabobu-atmábioye chátaftaca jëftsbetšama.

<sup>38</sup> Pero Páblëna ndoñe tšabá ibontsinýana cha jëftsbetšana, er Juan chátbentšana tojtsanojuánañe Panfilia luarocana, y ndoñe tonjanatjëmbambá, Bëngbe Bëtsabe trabajo japochócantscuana.

<sup>39</sup> Y chë palabrama tondaye tbonjanenóyeunata causna, Pablo y Bernabé cachcá tbojesanenonýaye. Y chca, Bernabé, Marcos tbojëftsanbetše, y bejaycá Chipre luaroye tbojánata;

<sup>40</sup> y Páblëna, Silas tbojanábuayana jëftsbetšama. Chë Antioquía pueblentša Jesucristbeñe ošbuáchiyënga Bëngbe Bëtsá tmojanimpadá Pablo y Silas Bëngbe Utabnabe cucuatšinë chabotsemnana, chatbe trabajuiñe chaotsanýenama. Chentšana, Pablo Sílasëftaca tbojánbocna y

<sup>41</sup> Siria, Cilicia luarënguëjana tojánachnëngo entsanga añemo atšatnaye, chë luarenache enefjuana ošbuáchiyënga Jesucristbeñe más chamotsošbuáchema.

## 16

*Pablo Timotéobioye tbojáninýena*

<sup>1</sup> Chentšana Pablo tojánashjango Derbe y Listra luaroye, y chentše tbojáninýena canýe Jesucristbeñe ošbuachiyá, Timoteo ca uabainá; cha inamna canýe judiá Jesucristbeñe ošbuachiyabe uaquiñá y chabe taitana griego entsá inamna.

<sup>2</sup> Chë Listra y Iconioca Jesucristbeñe ošbuáchiyënga Timoteobiana tšabá imojanoyebuambná.

<sup>3</sup> Pablo tojánbošena Timoteo jëftsbetšama; pero cabá ndetsbetše orna, Pablo base bobachtema chë más delicadentše

tbojantëtše, ntšamo judiënga imojanamancá. Cha chca tojanma, jobenayama chë judiënga imojoyena luarëngoye cháftaca jama, er nyetsca judiënga imnatátšëmbo Timoteobe taitá griego inamnama.

4 Chë ibojtsachnëjuana pueblënguenache chata ibojtsana Jesucristbeñe ošbuachiyëngbioye abuayiynaye, ntšamo Jerusalenoca Jesusbe ichmónënga y bëtsëjemëngcá mándayënga tmojanamëndacá, ndayá chë Jesucristbeñe ošbuáchiyënga ndoñe judiënga jamama vojtsamncá.

5 Nyets luarenache enefjuana ošbuáchiyënga, Jesucristbeñe más imojtsošbuáchiye, y cada te Jesucristbeñe ošbuáchiyënga más imojtsóbotena.

*Pablo mo otjenayoquécá canye Macedonioca entšábioye tbojáninÿe*

6 Chë Uámana Espiritu, Pablo y Silasbioye tojaninÿanÿé, chata ndoñe yontsanamna Asia luaroca Bëngbe Bëtsabe palabra entšanga jábuayenana; asna, tbojánachnëngo Frigia y Galacia luarëjana.

7 Y Misia luaroca enajébanoye tbojánashjango ora, tmojanjuabó tsjuana jana, Bitinia luaroye; pero chë Uámana Espiritu tojanabuayená choye ndoñe chabondëtsama.

8 Misia luarëjana tmojánachnëngo ora, Troas luaroye chënga tmojána.

9 Chë te ibeta, Pablo mo otjenayoquécá tojáninÿe canye Macedonioca boyabása ibojtsebiatsana y mëntšá ibojtseimpadana: “Diosmanda Macedonioye mabo y šmabëjabuache ca.”

10 Pablo chca tojáninÿe y cachora lempe tmonjanprontá Macedonioye jama. Atšnaca, chë quem soyënga uabiamnayá, chënga sënjëtsatjëmbambnaye. Bënga fsënjëtsëjuabnaye ndegombre Bëngbe Bëtsá šojtsanachembuana choye jama ca, Jesucristbe tšabe noticiënga choca entšanga jábuayenama.

*Pablo y Silas Filipos puebloca*

11 As, Troasentšana bejaycá fsënjána Samotracia luaroye, y yëfsana Neápolis pueblöye,

12 y chentšana Filíposoye. Filipos enjamna canye uámana bëts pueblo Macedonioca y bëtscá romanënga oyeniñe. Chë luarentše baseftayté fsënjanoquedanga.

13 Canye ochnaytena, chë pueblentšana fsënjëftsanbocna y chë fshájaye tsachoye fsënjána. Fsënjanuena chentše canjamna canye luare Bëngbe Bëtsáftaca jencuëntama ca, y fsënjána janguanguama. Fsënjáninÿena ora, chentše fsënjanotbiama y Bëngbe Bëtsabe palabra fsënjanoyebuambá chentše tmojanójoto shembásengbiama.

14 Enjamna canÿe shembása, Lidia ca uabainá, Tiatira pueblócá, y cha enjamna uámana uabuángana uafjatsenga entsáyá uená. Cha inamna Bëngbe Bëtsábioye adorayá y chentše Páblëbioye ibotseyeunana. Bëngbe Bëtsá tojanma cha chabosertá lempe ntšamo Pablo yojtsoyebuambnacá, Jesucristbeñe chaotsošbuáchema.

15 Cha y chabe yebnentše oyenënga tmonjánenabaye ora, Lidia mëntšá šonjanaimpadá: “Tšëngaftanga šmonjayana atše Jesucristbeñe ndegombre stosošbuaché ca; chcasna, mabënga yebnoye, átsbentše chašmoquedama ca.”

Y šonjanëtarié bënga chentše joquédama.

16 Canÿe te, chë Bëngbe Bëtsáftaca encuéntaye luaroye fsënjétsajna orna, šonjanëbiatše canÿe tobiaše, oservená, bacna bayëjbe juabna uambayá; chë causa cha malisiayá inamna. Chabe nduiñënga becá crocénana imojanójacañe, chë tobiaše yojanmalísiaye soyëngama.

17 Chë tobiaše tonjanontsé Pablo y bënga usetonana y mëntšá enjétsaychembumbuana: “¡Quem boyabásenga montsemna chë celoca Bëngbe Bëtsabe oservënënga y tšëngaftanga cmontsabuyayiná ntšamo Bëngbe Bëtsá yobena tšëngaftanga játsebacama ca!”

18 Y bayté chca enjanchembumbuana; chë causa, Pablo bonjétsetana y cabana, tonjanobuértana y chë bacna bayëjbioye mëntšá tbonjaniyana: “¡Jesucristbe obenánaca y cha jótšëmbonëse, cbontsemánda chë tobiásbentšana chacuaisebocnama ca!”

Y cachora chë bacna bayëja chë tobiásbentšana tojésanbocna.

19 Pero, chë bayëjbe juabna chábentšana tojésanbocnama y chëngbiama más crocénana jabemama chora chë tobiaše ndoñe yontsobenama, chë tobiaše nduiñënga tmojáninÿe ora, Pablo y Sílasbioye tmojánishëche y tmojtsanasjojoye plazoye, mandayëngbioye.

20 Chë mandayëngbioye tmojanënatse ora, chënga mëntšá imojtsichamo: “Quem boyabásata judío entsáta bondmëna, y muatbe causa bëngbe pueblentša entsanga montsenbouenana,

21 y bontsabuatambá soyënga jamama ntšamo chë judiënga imuamancá y bëngbe leyënguiñe chë soyënga jamama ndoñe quenátslesenciana. Bënga ndoñe quešnátamna ni jouenana, ni jamana chë soyënga, romanënga bétsemnayeca ca” —chënga imojtsichamo.

22 Chora chë entsanga tmojanontsé uayebuáchana; as, chë mándayënga tmojanamëndá chata entsáyá jtsëtsejquécana y niñëfjéngaca jtsachebuánganja.

23 Jabuache tmojanachebuánganjentšana, cárceloje tmojanautame y chë utámenënga shanyá tmojanmandá yejuana chaotsabuajënyama.

24 Chca tmojanmandá ora, chë utamianá chata tojanënatse chë más tsoje utámenoye y shecuatšentšana tsbuanëšifne tojanatsebuá.

25 Pero tsëntseto orna, Pablo y Silas ibnétsocantañe Bëngbe Bëtsá jëtschuayama, y cháftaca ibnéncuentaye; y chë inye utámenëngna chca imojtsuenana.

26 Ndeolpe, corente jabuache yojsëbánjua y chë utámena yebna fshantsocana yojsábonjnaye. Cachora, nyetsca chë utámenentša bëšašangá tojantëfjo y nyetsca utámenënga chë cadenëjuangá yojsayentšjafjona.

27 Pero chë utámenënga shanyá tojanofšená y chë utámenentša bëšašangá yojsatëfjnama tojáninye ora, cha tojanjuabó nyetsca utámenënga tmojtsanacheta ca; chë causa, chabe espadëja yojenosëngbotëntšena jtsenóitanama.

28 Pero Pablo tbojánbochembo: —¡Acbe cuerpo ndocá matenábomana; nyetscanga camuentše fsëndëtsomñe ca!

29 Asna, chë utámenentša shanyá canye uajuinyanësha tojanëyá y chë utámenoye ochamanana tojánamashëngo y auatja causa ngmëmnyá Pablo y Sílasbe shecuatšentše yojoshëntsamentšiyë.

30 Chentšana tojtanëbuacna y tojanëyana: —Señórata, ¿ndayá šojtsemna jamama atše atsbocaná jtsemnama ca?

31 Y chata tbojanjuá: —Bëngbe Utabná Jesúsbeñe cochtsošbuáchiye, y chca, Bëngbe Bëtsá aca cmochanjatsbocá y acbe yebnentše oyenëngnaca ca.

32 Y cha y nyetscanga chë yebnentše imojtsemnënga, Bëngbe Utabnabe palabra tmojanabuayená.

33 Cach ora chë ibeta, chë utamianá chata tojanënatse chë lisianënguiñe jetsajabiama. Chentšana, cha y chabe pamíllanga tmojánenabaye.

34 Chentšana, chë utamianá chata tojanënatse chabe yebnoye y saná tojanacaredadó. Cha y nyetscanga chë yebnentše oyenënga oyejuayënga imojtsemna, Bëngbe Bëtsábeñe imojtsošbuáchemá.

35 Yëfsana cachëse, chë mandayëngna soldadënga tmojanichamó, chë utamianá jamándama Pablo y Silas chauatabáshejuanama.

36 Chë utamianá Páblëbioye tbojanianyana: —Chë mándayënga šmonjamandá tsëndata jtabáshejuanama. Chcasna, šontsobena natjëmbana jtsatoñana ca.

37 Pero Pablo chë soldadënga tojanëyana: —Bëndátnaca fsëndmëna mo Romoca onñnanatcá derecho bomnata y



šonjáchebuanganja entšangbe delante, bacna soyënga aiñe o ndoñe tatifjamama cabá ndinÿanÿiye ora, y cárceloje šmonjautame. ¿Y mora imojtseboše iytëcana jtabáshejuanama? Chca ndocna te chaondëtsemna; cach mándayënga chamuabo jabátëbuacnama ca —cha tojánayana.

<sup>38</sup> Chentšana, chë soldadëngna chë mandayëngbeñe tmojanobuambá ntšamo Pablo y Silas tbojanayancá; chca chënga tmojántatšëmbona chatna mo Romoca onÿnanatcá derecho bomnata ibnamnama; chë causa, chë mándayënga puerte imojtsauatja.

<sup>39</sup> Chcasna, cach mándayënga tmojána chata perdón jatëtejañama; chentšana tmojtanëbuacna y tmojanëyana: “Diosmanda, muentšana inÿe luaroye motsoñata ca.”

<sup>40</sup> As chata chë utámenentšana tbojëftsanbocna y Lídiëbe yebnoye tbojëftsanata. Chentšna, Jesucristbeñe ošbuáchiyëngaftaca tmojánenefjna y chata tbojánayana soyëngaca chëngbiyoye tmojanañemó. Y chentšana, chata ínÿoye tbojtsanoñe.

## 17

*Tesalónica puebloca, Pablo y Sílasbiyoye ndoñe tšabá tmojanëbuaja*

<sup>1</sup> Pablo y Silas inÿe luaroye ibojtsaye ora, Anfípolis y Apolonia bëts pueblënguëjana tbojánachnëngo y canÿe bëts pueblo, Tesalónica ca uabáinoje tbojánashjango. Chentšë, chë judiënga canÿe yebna imnabomna chënga jénefnama.

<sup>2</sup> Páblëna, ntšamo enjanamancá, cada ochnayté chë jénefnama yebnoye yojánaye, unga semanëntscuana, y chentšë chë judiëngaftaca yojanoyebuambná y imojánëtsëtsnaye. Bëngbe Bëtsabe uabemana palabrenguiñe iuayana soyëngaca,

<sup>3</sup> chënga yojanabuayiyiná y ndegombre yojaninÿanÿná, Bëngbe Bëtsabe Uámana Uabuayaná jóbanama y chentšana jtayenama ibojamnama. Y mëntšá yojanëtsëtsná: “Chë Cristo, Jesús endmëna, ndabiamama atšë cbontsabuyiyiná ca.”

<sup>4</sup> Judiënguentsana báseftanga chiñe imojtsošbuáchiye y Pablo y Silas tmojanëseto más jouenama. Ba grieguënga, Bëngbe Bëtsá adórayënga, Jesucristbeñe imojtsošbuáchiye y ba uámana shembásengnaca.

<sup>5</sup> Pero chë judiënga ndošbuáchiyënga chca tmojáninÿe ora, puerte envidia imojtsebomna. Asna, chënga tmojánachembo banga, tondaye amënga y bacna entšanga, y chënga tmojanenutaná jamama nÿetsca chë pueblentša entšanga chamotsenbouéñanama; y canÿe entšá, Jasón ca uabainabe yebna chënga tmojtsanabuache, Pablo y Silas

jtsanguanguama, chentšana jesëbuacnama y entšangbe cucuatšinë jabáshejuanama.

<sup>6</sup> Pero chentše ndocná tmonjáninÿena; as chë entšanga Jasón imojtsesjoye y chentša mándayënga imojétsemnoye tmojanánatse y Jesucristbeñe inÿe ošbuachiyëgnaca choye tmojanënatse, y mëntšá imojtsáyebuache: “¡Chë boyabásata, chë ndëmuanÿata ibojtsama nÿetsca luarentša entšanga chamuenbouéanama, quem luaróynaca tbojabo,

<sup>7</sup> y Jasón chabe yebnentše chata tojúbuaja ca! ¡Chënga montsama ntšamo chë Romoca bëts mandadbe mandënguiñe ndoñe quenatslesenciancá, er chënga montsichamo inÿe rey canmëna, Jesús ca, y cha, César chë Romoca mandadbe cuenta nÿetscángbeñe yojtsemánda ca!” —chënga imojtsáyebuache.

<sup>8</sup> Chë entšanga y chë pueblentša mándayënga chca tmojanuena ora, corente imojenbouéanana.

<sup>9</sup> Pero Jasón y chë inÿenga, cháftaca imojtsemnënga, crocénana tmojtanjajó, y as tmojtanabáshejuana.

### *Pablo y Silas Berea Puebloa*

<sup>10</sup> Ya ibeta yojtsemna orna, chë Jesucristbeñe ošbuáchiyënga tmojanma cachora Pablo y Silas Berea bëts puebloye chabuétsebocnama. Y chata choye tbojánashjango ora, chë judiëngbe enefjuana luaroye tbojánata.

<sup>11</sup> Chentša judiënga imojamna más tšabe ainana bomnënga chë Tesalonicoca judiëngbiama; chcasna, oyejuayënga chë buayenana soye Jesucristbiama tmojanóyëngacñe, y cada te Bëngbe Bëtsabe uabemana palabra imojanalía, jtsetatšëmbuama, ntšamo Pablo y Silas ibojtsëtsëtnacá añe o ndoñe ndegombre yojtsemnama.

<sup>12</sup> Y chca, ba chentša judiënga chatbe palábraca Jesucristbeñe imojtsošbuáchiye, y Grecia luaroca ba uámana shembásenga y boyabásengnaca.

<sup>13</sup> Pero, Pablo Bereoca chë Bëngbe Bëtsabe buayenana soyama entšanga yojtsabuayiynama chë Tesalonicoca judiënga tmojántatšëmbona ora, chënga choye tmojána y tmojanma chentša entšanga chamuenbouéanama.

<sup>14</sup> Chcasna, banga Jesucristbeñe ošbuáchiyënga tmojanma cachora Pablo chentšana chauétsebocnama y bėjaye tsachoye chaotsoñama; chëntscuana, Silas y Timoteo Bereoca tbojanoquedá.

<sup>15</sup> Pablo tmojantjëmbambá entšangna, Atenas ca uabaina bëts pueblóntscoñe cháftaca tmojána. Chentšana, Pablo chënga tojanabuayená chamuauisshëconama Silas y Timoteo jaúnayama betSCO jtsayana, Pábloftaca jateninÿenama.

### *Pablo Atenas puebloa*

16 Pablo Atenas bĕts pueblocá Silas y Timoteo yoĵtsĕbatmanĕntscuana, puerte tbojanongmé, er cha toĵáninĵe chentŝa entŝanga imoĵtsadorana bĕtscá cachĕngbe pormana soyĕnga, ndayama chĕnga imoĵanĵuabná diosĕnga yoĵamna ca.

17 Chĭyeca, chĕ judiĕngbe enefjuana yebnentŝe, judiĕnga y ndoĕne judiĕnga Bĕngbe Bĕtsá adorayĕngaftaca imoĵánenatsĕtsnaye, y cada te chentŝa plazoca chĕ ndĕmuanĵyenga chentŝe imoĵanashĵajuanĕngaftácna.

18 Y báseftanga, ntŝamo jtseĵuabnayama entŝanga abuátambayĕnga, epicureunga y estoiquĕnga ca uabainĕngnaca Pábloftaca imoĵánenatsĕtsnaye. Inĵyenga imoĵtsichamo: “¿Ndayama quem bostero yoĵtsoyebuambná ca?” Y ínĵyengna: “Chana inĵe luarĕngoca entŝangbe diosĕngbiama muentŝe entsabóyebuambnaye ca.”

Chĕnga chca imoĵtsichamo, er Páblĕna Jesusbiama y chĕ obanĕnga jtayenama yoĵanoyebuambná.

19 Asna, chentŝa entŝanga cha tmoĵanánatŝe canĵe luaroye, entŝanga jĕnefnama y oyebuambnayĕnga joyaunayama luare, Areópago ca uabáinoye. Chentŝe imoĵanamana uámanĕnga jĕnefnana, nderado ndabiama jayanama tŝabá o ndoĕne tŝabá tonjamama. Chora Pablo tmoĵantĵá: —¿Chĕ aca contŝabu-atambá soyĕnga ndayá bĕtsayanana bĕnga quefstsobena jtŝe-tatŝĕmbuama ca?

20 Aca tŝĕm soyĕnga ŝcontŝĕtsĕtsná y bĕnga fsĕntseboŝe jtŝe-tatŝĕmbuana ndayá chĕ soyĕnga bĕtsayanana.

21 Er nĵetscanga Atenasentŝa oyenĕnga y inĵe luarĕngocana áshĵajnĕngna, corente yoĵanogúsetana chĕ toĵtsopasana tŝĕm soyĕngama jtsuenanana y jtsencuĕntayana.

22 As Pablo toĵantsá chĕngbe tŝĕntsaca chĕ Areópago ca uabáinentŝe y toĵánayana: —Atenasentŝa entŝanga: ntŝamo bominĵe sĕnjajajcá, atŝe sĕntsetatŝĕmbo tŝĕngaftanga ba diosĕnga puerte ŝmayaunana y ŝmadoránama.

23 Atŝe sĕndánrreparana tŝĕngaftangbe diosĕnga ŝmétsadorana luarĕnguenache y sĕnjínĵyena canĵe altar y chentŝe mĕntŝá iuábemana: “Chĕ Bĕtsá nduabuatmabiama ca”. Y morna, chĕ Bĕtsá chĕ nda ntsabuatomcá ŝmadoránabiama, atŝe cbontŝabuayiná.

24 “Chĕ Bĕtsá quem luare y lempe ntŝamo chentŝe yomncá toĵanma; cha endmĕna quem luarentŝe y celoca Utabná, y cha ndoĕne quenatiyena cha jadórama entŝangbe jebna yebnĕnguiĕne,

25 nĭ quebnatájaboto ndocná chabiama tondaye chaondĕtsama, er cha endmĕna nda inĕtsama bĕnga vida chamotŝebomnama y jtseshachnayama chamotsobenama, y cha nĵetsca soyĕnga ŝnetsatŝatnaye.

26 “Cha nÿe canÿe boyabásabentšana nÿets luarënguentsä entšanga tojánabiamana, nÿets quem luarentše chamotsiyenama; y cha quem soyënga cabá ndëma ora, tojanjuabó mocna ora y ndayentše entšanga chamuetsiyenama;

27 chca, Bëngbe Bëtsá chamonguanguama, masque chabiamana ndoñe corente tmontsetátšëmbo, y chamuinÿena y chábeñe chamotsošbuáchema; pero ndegombre, Bëngbe Bëtsá bëngbentše cada cánÿabentšana ndoñe bënoca quenátsmëna.

28 Ntšamo canÿa tojanayancá: ‘Bënga Bëngbe Bëtsáftaca cánÿiñe mo canÿacá mondmëna; chábeyeca bënga vida mondbomna, jobónjuama mondobena y ainënga mondmëna ca’. Ntšamo tšëngaftanguentsä báseftanga bëts soyëngama uabi-amnayëgnaca tmojanayancá: ‘Bënga nÿetscanga Bëngbe Bëtsabe básenga mondmëna ca’.

29 Y chcasna, Bëngbe Bëtsabe pamíllanga bënga tmomnëse, ndoñe quešnátamna jtsejuabnayana Bëngbe Bëtsá yomna mo cach entšangbe castellano, midio o chë ndëtšbeca pormana soyëngcá ca, er chë soyëngna nÿe ntšamo entšanga tmojanjuabocá y tmojtsobencá japórmana.

30 Pero Bëngbe Bëtsá tojanjuabó ndoñe ntjatonÿayana chë entšangbe tempsca ndosertánana, y morna, nÿetsca luarënguentsä entšanga entsamënda, ndaye bacna soyënga tmojtsamama ngmënaca chamuenojuabó, chca amama chamotsajbaná y Bëngbe Bëtsabe benache chamuatishache ca.

31 Bëngbe Bëtsá canÿe te tojuinÿnaná, y chë tena, ndocnábioye ínÿabiamana más tšabá ntjatonÿayacá, cha echanjayana entšanga tšabá o ndoñe tšabá tmonjamama; lempe chca cha echanjama canÿa cachá tbojabocacá entšáftaca, Jesús; y chca yochtsemnamna, Bëngbe Bëtsá entšanga tojinÿanÿé, chë bocacaná Jesús cháuatayenama cachá tojánmayeca ca” —Pablo tojánayana.

32 Chë obanënga mochtayenama ichámuana chë entšanga tmojanuena ora, báseftanga Pablo imojtsáboyejuana, y ínÿengna mëntšá imojtsichamo: —Bënga fsëntseboše chë contsichamo soyënga más chcoye cachiñe jatuenama ca.

33 As Pablo chëngbentšana tojésanbocna.

34 Pero báseftanga aíñe Jesucristbeñe imojtsošbuáchiye y Pablo tmojanasto más jatuenama; chënguentsë imojamna Dionisio, canÿa chë Areopagoca tbiamanënguentsá; canÿe shembásanaca, Dámaris ca uabaina, y ínÿenga.

1 Chë soyënga tojanochnëngüentsana, Pablo Aténasentšana Corinto bëts puebloye tojana.

2 Chocna, canye judío Ponto luaroca onÿnanáftaca tbojáneninÿena, Aquila ca uabainá. Cha y chabe shema Priscila, cabá chora cuenta Italia luarocana tbojánabo, nÿetsca judiënga Romocana chamuáisebocanama choca bëts mandado Claudio tojanmandá causa. Pablo tojana chata jautsëtsayama,

3 y ntšamo chata jamama Páblëncaca jamama inatátšëmboycna, cháaftaca yojtsoquedañe y cánÿiñe chënga imnatrabájaye; chënga imnatátšëmbo mo tambotemëngcá entšëjuaca japórmana.

4 Y nÿetsca ochnayté, Pablo yojanamana chentša judío entšangbe enefjuana yebnoye jana, Bëngbe Bëtsabe soyëngama jöyebuambayama, y puerte yojtsentšena judiënga y ndoñe judiënga chamotsošbuáchema, ntšamo cha yojtsanëtsëtsnacá ndegombre bëtsemnana.

5 Silas y Timoteo Macedoniocana choye tbojánashjango ora, Pablo nÿets tempo Bëngbe Bëtsabe soyëngama entšanga yojtsabuayiyayey y puerte tšabá chë judiënga yojaninÿanÿná, Jesús ndegombre Bëngbe Bëtsabe Uámana Uabuayaná bëtsemnana.

6 Pero chë judiënga Páblëbe contra imojtsemna y tmojanontšé podesca chabiama ichámuana. Asna, Pablo chabe uichëtjonyangá yojtsenántšasajaye, chënga jinÿanÿiyama chënga ndoñe tšabá tmonjánchjanguama, y tojanëyana: “Tšëngaftanga ndatsebácanënga chašmojóbanëse, cach tšëngaftanga šmochtsótatsëmbñe; atšna ndoñe. Mëntescana chë ndoñe judiënga jábuayenama chantsoñe ca.”

7 Chorna, chë judiëngbe enefjuana yebnentšana tojëftsanbocna y canye boyabása, Ticio Justo ca uabainábioye tojtsanoñe. Cha Bëngbe Bëtsábioye ibojánadorana y chë enefjuana yebnentša juachaca inoyena.

8 Y Crispo, canye chë enefjuana yebnentša mandayá, Bëngbe Utabná Jesucristbeñe yojtsošbuáchiye y nÿetsca chabe pamállangnaca; y banga chë Corintentšëngnaca Jesucristbeñe imojtsošbuáchiye, Pablo yojtsoyebuambná ora; y chënga tmojánenabaye.

9 Canye ibeta, Bëngbe Bëtsá Páblëbioye mo canye otjenay-  
oquécá tbojanianana: “Ndoñe matauatjana; nÿe cochtsana atšbe soyëngama oyebuambnaye y ndoñe iytëca cattsemana.

10 Er atše ácaftaca sëntsemna y ndocná quecmochátsbojajo ntšámnaca jáborlama; atše bëtscá entšanga quem pueblentše sëndábamna ca.”

11 Chcasna, Pablo Corintentše canye uata y chnënguana shinÿe tojanototoná, Bëngbe Bëtsabe palabra entšanga

abuátambaye.

12 Pero, Galión chë Acaya luarentša mandado inamna orna, chë judiënga imojenóyeunaye Páblëbe contra; cha tmojánishache y chë tribunaloye tmojanánatse.

13 Chocna, chë mandado tmojanianaya: —Mua entsanga entsëtsëtsná y entsama chënga Bëngbe Bëtsá chamotsadorana, pero ndoñe ntšamo bëngbe leyënguñe endayancá ca.

14 Pablo jóyebuambayama uatajanóntša orna, Galión chë judiënga tojanéyana: —Quem entsá nderado ínÿabioye matbënjóba o ndayánaca chca matënjobuachjanguá, as cocayé atše matijótbema tšëngaftanga judiënga yejuana joyaunayama;

15 pero ntšamo šmontsichamcá entsemna nÿe buatëmbana soyëngama, nÿe tšëngaftanga šmëbuatma entsangbiana y cach tšëngaftangbe leyëngama; chcasna, cach tšëngaftanga cmontsamna jenóyeunayana y jamana ntšamo chašmojenoyeunacá. Atše quem base soyëngama ndoñe quetsátsboše ngoberna jtsemnana ca.

16 As Galión tojanamëndá chë tribunal luarentšana chë judiënga jtëbuacnama.

17 Chorna, chë entsanga tmojánishache chë judiëngbe enefjuana yebnentša mandayá, Sóstenes ca uabainá, y Galionbe delante imojtsejantšetaye. Pero Galión chë soye tondayana ibontsentšamna.

*Pablo Antioquioye tojtaná y chentšana cachiñe inÿe luarëngoye tojána, Bëngbe Bëtsabe trabajo jamama*

18 Pablo cabá bayté Corintentše tbojántotona. Chentšana, Jesucristbeñe ošbuachiyëngbentshana tojesanodiošoftá y bejaycá Siria luaroye tojána, Priscila y Aquílaftaca. Cabá Sirioye nda ora, Cencrea puebloca nÿets stjënashë vojtsenátsbotje, Bëngbe Bëtsábioye jinÿinÿiyama canÿe soye tbojanšbuáchenama.

19 Efeso puebloye tmojánashjajna ora, Páblëna Priscila y Aquila tojésanabashejuana. Chentšana, cha tojána chë chentša judiëngbe enefjuana yebnoye y chentše chë judiëngaftaca yojanoyebuambná y imojánenatsëtsnaye.

20 Báseftanga Pablo tmojanimpadá inÿe baseftayté chentše chauesomñama, pero chana ndoñe tonjanoyauaná;

21 chentšana, chëngbentshana tojesanodiošoftá, mëntšá jëftsëyanëse: “Nderádose cachiñe chantésabo tšëngaftanga jabábuachama, Bëngbe Bëtsá šojalesenciase ca.”

Chora, Pablo bejaycá Efesocana tojëftsanbocna.

22 Cesarea puebloye tojánashjango ora, tojána jacheuayama Jesucristbeñe ošbuachiyënga Jerusalenoca; y chentšana Antioquioye tojána.

<sup>23</sup> Chentše baseftayté yojéftsemna; y chentšana, Pablo tojesaná Galacia y Frigia luarënguenache, Jesucristbeñe ošbuáchiyënga añemo atšatnaye.

*Apolos, Efeso puebloca Bëngbe Bëtsabe soyëngama yojanabuayiyná*

<sup>24</sup> Cach tempo, Efesoye tojánashjango canye judío, Apolos ca uabainá, Alejandría bëts puebloca; cha puerte obená inamna jonguamiyama y corente inatátšëmbo Bëngbe Bëtsabe uabemana palabréngama.

<sup>25</sup> Bëtsca tojánatsjinÿe chë Bëngbe Utabná tojaninÿanÿé benachama; añémoca yojanoyebuambná y Jesusbe soyëngama botamana yojanabuatambá, masque cha nÿe ntšamo Juan entšanga tojánabuatambama y tojanëbáyama inatátšëmbo.

<sup>26</sup> Ndauatjá Apolos tojanontsé jóyebuambayama chë judiëngbe enefjuana yebnentše. Pero Priscila y Aquila cha imojóyeunaye ora, barie tmojanchembo y más botamana tmojanbuayená, ntšamo Bëngbe Bëtsabe inÿinÿena benache bëtsemnama.

<sup>27</sup> Apolos Acaya luaroye jama yojtseboše orna, Jesucristbeñe ošbuáchiyënga bëtsca tmojanañemó y choca Jesucristbeñe ošbuáchiyëngbiama canye tsbuanácha tmojanichmó, chca, Apolos choca tšabá chamofjama. Acaya luaroye tojánashjango ora, Jesucristbeñe ošbuáchiyënga bëtsca tojanëjabuache. Bëngbe Bëtsá chëngbe tšabiama yojanjuabnáyeca, chënga Jesucristbeñe corente imojtsošbuáchiye.

<sup>28</sup> Entšangbe delante chë judiëngaftaca jabuachana imojánenatsëtsnaye y nÿetscanga tojaninÿanÿé, ntšamo ndoñe tšabá inamncá chë judiënga innatátšëmbuama; y Bëngbe Bëtsabe uabemana palabréngaca chënga tojaninÿanÿé, Jesús Bëngbe Bëtsabe Uámana Uabuayaná bëtsemnama.

## 19

### *Pablo Efeso puebloca*

<sup>1</sup> Apolos Corintoca yojtsemnëntscuana, Páblëna chë tjañe luarënguëjana tojánachnëngo y Efesoye tojánashjango; chentše básefta ošbuáchiyënga tojánanÿena, pero chëngna nÿe ntšamo Juan chë Ubayaná tojanabuatambacá innatátšëmbo.

<sup>2</sup> Pablo chënga tojanatjá: —¿Uámana Espiritu chenjánabo tšëngaftangbe ainaniñe jtsemándayama, Jesucristbeñe ošbuáchiyënga šmojanóbiamá ora ca?

Chora chënga tmojanjuá: —Ni mo queftsátstatsëmbo chë Uámana Espiritu yomnama ca.

<sup>3</sup> Y Pablo tojanéyana: —As, ¿ntšamo šmojánenabaye ca?

Y chënga tmojanjuá: —Fsënjánenabaye ntšamo Juan entšanga yojanëbayancá ca.

4 As Pablo tojaněyana: —Juan tojaněbaye chě bacna soyěnga amama ngménaca tmojanenojuabó, chca amana tmojanajbaná y chě Běngbe Bětsabe benache tmojánishachěnga, y entšanga yojanětsětsná chě chábentšana yochjanashjanguábeñe chamotsošbuaché ca; y cha Jesús endmēna ca —Pablo tojánayana.

5 Chca tmojanuena ora, chěnga tmojánenabaye Běngbe Utabná Jesús jótšěmboněse, chábeñe imojtsošbuáchema.

6 Pablo chěngbe bestšašiñe chabe cucuatšěnga tojanajó ora, Uámana Espíritu chěngbe ainaniñe tojánamashěngo jtsemándayama; tmojanontšé inyetsá biyangana, chěnga tempo ndmabiyañe, y Běngbe Bětsabe juabna imojtsoyebuambná.

7 Chentše imojtsemna bnětsana uta entšanga.

8 Unga shiněntscuana Pablo yojánaye chě judiěngbe enefjuana yebnoye y ndauatjca Jesucristbe soyěngama yojanoyebuambná; entšangaftaca imojánenatsětsnaye y entšanga yojanětsětsná Běngbe Bětsabe aměndayama, chěnga chábeñe chamotsošbuáchema.

9 Pero ba nduauenaněnga ndoñe imontsošbuaché y Běngbe Utabná tojaniněyaně Benachama entšangbeñe bacna soyěnga imojtsichamo. Chcasna, Pablo chěngbentšana tojtsanojuánañe y nře chě Jesucristbeñe ošbuáchiyěnga tojaněbuaja canře scueloye, canře entšá Tirano ca uabainabe yebnoye. Chentše cada te chě ouenaněngaftaca yojanoyebuambná,

10 y chca yojánama uta uatěntscuana; y chca, nřetscanga Asia luaroca oyeněnga Běngbe Utabnabe palabra tmojanuena, judiěnga y ndoñe judiěngnaca.

11 Y Běngbe Bětsá puerte běts soyěnga Pábloftaca yojtsama.

12 Tša běts soyěnga tojanma; chíyeca, nřetsca chě Pablo tojuabojajo entšayá y pañuelějuangá, entšanga imojanamana šoquěngbioye juyambana, y chca tmojama orna, chě šocaněnga juenatjěmbana y chě bacna bayějěnga entšangbentšana jésebocanana.

13 Pero básefta judiěnga tsáshenañe bacna bayějěnga entšangbentšana imojtaněbuacana. Chě judiěnga imojtseboše chě bayějěnga jtěbuacnana, Běngbe Utabná Jesús jótšěmboněse. As, chě bacna bayějěngbioye měntšá imojtsětsětsnaye: “Běngbe Utabná Jesús, Pablo bondbetsebayaná jótšěmboněse y chabe obenánaca cbontsaměnda muabentšana chašmuaisebocnama ca.”

14 Chca imojánama chě judío Esceva ca uabainabe canřsěfta uaquiñěnga. Esceva inamna bachnangbe aměndayá.

15 Pero canře, Escévěbe uaquiñěnga chca tmojánayana orna, chě bacna bayěja měntšá tojanějua: “Atše Jesús sěnduábuatma



y sëndétatsëmbo nda Pablo yomnana; pero tšëngaftanga, ¿ndëmuanyënga šmomna ca?”

16 As, cachora chë bacna bayëjbe juabna uambayá chëngbioye tojanontsënja y tša añemo bomná bétsemnayeca chënga tojtsanayëñaná, jabuache jtsajantšetayëse; chë causa, chënga chë yebnentšana tmojtsanacheta enašënga y lisiánënga.

17 Nyetscanga Efesoca oyenënga, judiënga y ndoñe judiënga, chca tmojántatsëmbona y corente imojtsanauatja. Y chca, Bëngbe Utabná Jesús entšanga más imojtsatschuanaye.

18 Jesucristbeñe imojtsošbuachiyënguentšana, banga imojánashjajuana y entšangbe delante imojtsecompšaye, tempo bacna soyënga tmojanmama;

19 banga, chë bocjuanana soyënga jamama imojanëntšënënga, chëngbe bocjuanana librëšangá tmojaniyëbo y entšanga imojtsantješna ora, chëšangá imojtsajuinýiye. Tmojanjuabó ntsachetšá chë librëšangá betsámanama y tojanóbocna shachna bnëtsana uaranga crocénana nyëtšá.

20 Y chca, Bëngbe Utabnabe palabra más ba entšanga imojtsuenana y chiñe imojtsošbuáchiye y Bëngbe Bëtsá chabe obenana entšángbeñe yojtsinýinýnaye.

21 Chca tojanochngüentšana, Pablo tojanjuabó Macedonia y Acaya luarënguëjana jachnënguse, Jerusalenoye jésama. Y yojtsejuabnaye cha ibojtsemna Jerusalenentšana Romoye jama ca.

22 Asna, chabe uajabuachanënguentšana útata, Timoteo y Erasto, Macedonioye cha tojanichamó. Chëntscuana Pablo baseftayté más Asia luarentše tbojanjëtana.

### *Efesoca entšanga tmojánenbouenana*

23 Chë tempo, Efesoca entšanga corente tmojánenbouenana, chë Bëngbe Utabná yojtsinýanýná Benache imojtsisháchichanëngbe causa.

24 Chë entšanga chca tmojanma, er canýe entšá mídioca soyënga pormayá, Demetrio ca uabainá, chënga tojanayëñaná chca jamama. Cha yojanamana binche soyetëmënga japórmana y chëtëmënga yojáninýna mo chë Efeso puebloquëngbe diosá Artemisa jadórama bëts yebncá. Demétrioftaca imojantrabájangna bëtscá crocénana imojanójacañe chë soyetëmënga eniñe.

25 Demetrio tojanëbuaja cháftaca imojantrabájanga y ínýënga cach mídioca soyënga pórmayënga, y mëntšá tojanéyana: “Baconga, tšëngaftanga šmondétatsëmbo, bënga bëtscá crocénana jtsebomnamna quem trabajuentšana chca jopódiana.

26 Pero tšëngaftanga šmontsonjã y šmontsuenana ntšamo chë Pablo ca uabainã yojsichamcã. Cha entsichamo, chë entsangbe pormana soyënga ndoñe yontsemna jtsadoránana ca; y chca ba entsanga tojabuayená y chënga aïñe montseye-unana. Chë soyna ndoñe nyë muentše Efesentše chca quenátapasana; nyëts Asia luaríñnaca chca entsopasana.

27 Resjo entsemna; chca causa, entsanga bëngbe trabajuama ndoñe tšabá quemochátichamo y chë uámana Artemisa jadórama bëts yebnama mochántsicamo uámana yebna ndoñe yondmëna ca. Y chca, Artemisbe obenana entsanga mochantsábotena y Artemisa ndoñe bañe quemochátabuatma, nda Asientše y nyëts luaríñnaca mondadorana ca.”

28 Chca tmojanuena ora, chca pórmayënga puerte tojánetëna y tmojanáyebuachena: “¡Efesoquëngbe Artemisa corente bëtsá endmëna ca!”

29 Y chca, nyëtsca chë pueblentša entsanga tmojánenbouenana. Tmojanotabá Gayo y Aristarquëbioye, Macedonioca boyabásata, Páblëbe tjëmbambnayata; y sjojónana tmojanënatse chëngbe enefjuana yebnóntscoñe.

30 Pablo tojánbošena choye jamashënguama chë entsángaftaca jóyebuambayama, pero Jesucristbeñe ošbuáchiyënga ndoñe tmonjanlesenciã.

31 Chë Asioca mándayëngbentše báseftanga imnamna Páblëbe amiguënga, y chënga Páblëbioye palabra tmojanafja chë jénefnama yebnoye ndoñe chaondámashënguama.

32 Chëntscuana, entsanga imojtsejotonocna, ínÿenga imojt-sechembumbuana canÿe soye y ínÿengna inÿe soye, chënga corente imojtsenbouenana causa, y banga chentše imojtsemnënga ndoñe imontsetátšëmbo ndayama choye tmojanobéconama.

33 Pero básefta judiënga, canÿe entsá, Alejandro ca uabainã, chë entsangbe natsanoye tmojanajuatsëntše, y báseftanga cha tmojanbuayená ntšamo yojsopasánama. Asna, Alejandro tojánëfjatsëmbo cucuátšeca iytëca chamobiamama, er cha yojtseboše entsangbe delante chë judiënga jobuauyanama.

34 Pero, Alejandro judío bemnama chë entsanga tmojánatšëmbona ora, nyëtsçanga tmojanáyebuachena uta horëntscuana, mëntsã: “¡Efesoquëngbe Artemisa corente bëtsá endmëna ca!”

35 Chë pueblentša mándayëngbe uajabuachaná, entsanga iytëca jábiamama tojanobenã ora, tojanëyana: “Efesoquënga, nyëts luaríñe endótatšëmbo, quem pueblentše oyenënga iuamna jtsinÿenana chë Artemisa jadórama bëts yebna y chë cha jadórama celocana otsatsëna ndëtšbé.

<sup>36</sup> Ndocná quenátobena chama jayanama ndoñe ndegombre yondmëna ca. Chcasna, natjëmbana motsomñënga y tondaye matamëngana corente tšabá ntjshajuaboycá.

<sup>37</sup> Tšëngaftanga quem boyabásenga moye šmojunatse, masque Artemisbe yebnentše tondaye tmonjatbëba y bëngbe Artemisbiana ndoñe podesca tmonjoyebuambá.

<sup>38</sup> Demetrio y cháftaca šmotrabájanga, nderado ndabiana ndaye demanda šmojtsebomnësna, cabildoca endatëfjna y chentše mándayënga montsemna chë demandënga jouenama, y chëngbentše cada ona šmochjëftsendemánda.

<sup>39</sup> Y tšëngaftanga inye soye šmojtsenguasna, cmontsamna ntšamo bëngbe leyënguiñe yomandancá, nyetsca quem pueblentše oyenëngaftaca jenóyeunayana.

<sup>40</sup> Ndayá mënté tojopasá causa, resjo entsemna bëngbiana chamuayana, ntšamo leyënguiñe yomncá bënga ndoñe montsama ca; y bënga ndoñe quemúatobena ndayá jojuana, ndáyeca quem enbouenanana tojopasá ca šojátjayëse ca” —cha tojanëyana.

<sup>41</sup> Y chca jayanëse, chë entšanga tojtanichamó.

## 20

### *Pablo, Macedonia y Grecia luaroye tojána*

<sup>1</sup> Chë enbouenanana tojanochnëngo ora, Pablo chë Jesucristbeñe ošbuachiyëngbioye tojanëbuaja jábuayenama, añemo chamotsatsbomnama; tojesanodiošoftá y Macedonioye tojëftsanbocna.

<sup>2</sup> Chë luarënguëjana cha tojánachnëngo Jesucristbeñe ošbuáchiyënga becá añemo atatšatnaye, ba chabe palabrëngaca; chentšana, Grecia luaroye tojánashjango,

<sup>3</sup> y chentše unga ishinye tojanoquedá. Barquëshañe Siroye játama Pablo yojtseprontana orna, tojántatšëmbona chë judiënga cha jtsóbama tmojanenóyeunama. Asna, tojanenujabó jesshëconama, cach Macedonia luarëjana jésachnënguse.

<sup>4</sup> Pablo quem boyabásenga tmojantjëmbambá: Sópater, chë Bereocá, Pirrbe uaquiñá; Aristarco y Segundo, Tesalónicocata; Gayo, Derbe pueblócá; Timoteo; y Tíquico y Trófinnaca, Asia luarocata.

<sup>5</sup> Chënga tmonjanonatsé y šonjanëbatma Troasoca.

<sup>6</sup> Chë levadúraca ndëpormana tandëse saye fiestentšana, Filíposentšana barquëshañe fsënjëftsanbocna y shachna tianoye, Troasoca chë tmonjanonatsenga fsëntanishëche, y chentše canye semana fsënjanouedanga.

### *Ntšamo tojanopasá Troas puebloca*

<sup>7</sup> Chë inye semana jobojátšama te, fsënjánenefjna Jesucristbeñe ošbuachiyëngcá tandëse jajátayama, cányiñe jasama;

y Pablo entsanga enjétsétsnaye. Cha bonjamna yéfsana chentsana jéftsebocnana; chë causa, más bën chëngaftaca tonjanoyebuambá, tséntseténtscuana.

<sup>8</sup> Fsënjamna canýe tsoye tsbanana tsañoca y chentše ba uajuinýanëshangá enjanamna;

<sup>9</sup> y canýe bobontse, Eutico ca uabainá, ventanentše enjántbemana. Pablo bën enjanoyebuambná causa, chë bobontse ocayana tbojanábuache. Cabana, corente tojtsanomaná ora, chë unga tsañocana tontsanótsatše y obaná chora tmontanatsbaná.

<sup>10</sup> As, Pablo tonjánastjango, chë bobóntsbioye tbonjanotsbuajó y tbonjanotsejcuá. Y chë entsanga tonjanéyana: “Ndoñe nyetšá matauatjëngana; ainá cha entsatsmëna ca.”

<sup>11</sup> Chentsana Pablo cach tsbanánoye tonjesaná y tandëse tonjanjatá, jtenójuaboyama ndayá Jesús jóbanëse tojanmama. Chora Pablo chë entsángaftaca tonjanse y tontétanontsé oye-buambnayana, jabinýnëntscuana. Chora Pablo chentsana tontsanoñe.

<sup>12</sup> Y chë otsatšena bobontsna ainá imojtsatánatseñe, y chama chë entsanga corente oyejuayënga imojtsemna.

### *Pablo Troasentsana Mileto puebloye tojána*

<sup>13</sup> Bëngna fsënjanonatsé y barquëshañe fsënjána Aso pueblóntsoñe, chentsana Pablo jtesbetšama, ntšamo fsënjanenoyeunacá, er Pablo tonjánbošena fshantscá choye jana.

<sup>14</sup> Asoca Pábloftaca fsëntaneninýena ora, bëngaftaca barquëshañe cha tonjána Mitilene puebloye.

<sup>15</sup> Chentsana fsënjéftsanbocna y yéfsana Quío luarëjana fsënjánachnëngo, y chë inýe yéfsana Samos luaroye fsënjánashjajna. Chentsana fsënjána y yéfsana Mileto puebloye fsënjánashjajna.

<sup>16</sup> Chca tonjanochnëngo er Pablo ndoñe chenátanbošena Efesoye jama, Asia luariñe ndoñe yapa ndétsemnama. Chca tojánbošena er cha enjétsese betscó Jerusalenoca jtsatsmënana, tojopodesna chë judiëngbe fiesta, Pentecostés ca uabaina fiestama.

### *Ntšamo Pablo chë Efesoca ošbuachiyëngbeñe bëtsëjemëngcá mándayënga tojanéyana*

<sup>17</sup> Miletocana Pablo tonjanmandá chë Efesoca ošbuachiyëngbeñe bëtsëjemëngcá mándayënga jobiatšana.

<sup>18</sup> Chënga tmonjánashjajna ora, Pablo tonjanéyana: “Tšëngaftanga šmondétatšëmbo ntšamo atše quem Asia luaroye sënjabánashjango orscana tšëngaftangbeñe snetsamana.

19 Njets tempo Bëngbe Utabná sëndëserveda y cach atše uamaná ndoñe quetsatenobiamná. Corente shëchbuiye tijëtsoperdé y ba soyënguifë tijasufri, chë judiënga atše jóbama mondboše causa.

20 Y lempe ntšamo tšëngaftangbe tšabiamá yomncá tcbonjabuayená; tondaye ntjatsbuetamencá. Njetscangbe delante sënjabuatambá y tšëngaftangbe yebnënguenáchnaca.

21 Judiënga y ndoñe judiënga Bëngbe Bëtsabe soyëngama sënjabuayená, bacna soyënga amama ngmënaca chamuenójuaboma y chca amana chamotsajbanama, Bëngbe Bëtsabe benache chamuishachama y Bëngbe Utabná Jesúsbeñe chamotsošbuáchema.

22 Y mora Jerusalenoye chanjá; Uámana Espiritu chca šontsemánda y ndayá choca chjapásamna ndoñe quetsátstatšëmbo.

23 Nje mëntšá aíñe sëndétatšëmbo: Njetsca bëts pueblënguenache ndayëjana atše chandbétsana, Uámana Espiritu šondbétsebuaiynaye entšanga cašmochjutame y puerte chaisufrima camochjama ca.

24 Atšbe vida cach atšbiamá ndoñe yapa quenatámana, chaitsaina o chayóbana. Pero atšbiamá iuámanana endmëna ndayá atše jobenayana atšbe trabajo jëftsepochoçana, ndayá Bëngbe Utabná Jesús šojanmandá jamama, chë tšabe noticiënga Bëngbe Bëtsá entšángaftaca tšabia yomnama jábuayenama.

25 “Y mora atše ndegombre sëntsetatšëmbo, tšëngaftangbentsana, chë ndëmuanyëngbentše Bëngbe Bëtsabe amëndayama sënjabuayená, ndocná atše más quešmochátinje.

26 Chíyeca, atše ndegombre mënté cbetsëyana: Atše tondaye quetsátstatšëmbo nderado nda ndatsbocaná chaojóbanabiamá,

27 er atše ntšamo Bëngbe Bëtsá jamama yojuabnacá lempe tcbonjabuayená, tondaye ntsebuetamencá.

28 Chcasna, cach tšëngaftangbiamá šmochtsantješna y njetscanga muentše Jesucristbeñe ošbuachiyëngbiámna. Chëngbeñe mo chëngbe abuajënyangcá Uámana Espiritu tcmónjayayé, Bëngbe Bëtsabe entšanga chašmotsanýenama, chënga Bëngbe Bëtsá chábenga tojábiamá, chabe Uaquiñabe buiñe juabuáshanëse y jóbánëse, mo bëtscá cuařjopagacá.

29 Atše sëntsetatšëmbo, atše chaitsoñe orna, banga mochanjabo y chënga mochántsemna mo corente tšátjaye tjañe quešëngcá, Jesucristbeñe ošbuáchiyënga chábeñe ošbuáchiyana chamotsajbanama chënga jamama.

30 Y tšëngaftangbentsánëna báseftanga mochanjábocana y entšángbioye uayátsenaye soyënga mochanjabuatambá, chca,

báseftanga Jesucristbeñe ošbuáchiyënga chë ínÿengbentšana chamotsoluarema y nÿe chë abuátambayëngbioye chamotsésetonama.

<sup>31</sup> Chcasna, sempre šmochtsantješna; ndoñe chacmondébnëtjomba, atše unga uatëntscuana, bnëté y ibeta, tšëngaftanga cada ona chondétsabuayiynama y chama atše puerte tijasufri.

<sup>32</sup> “Y morna, Jesucristbeyeca catsátanga, Bëngbe Bëtsabe cucuatšifne cbétsabashejuana y ntšamo tšëngaftangbiama chabe tšabe juabna yomnama palabréngaca, tšabá chašmuesomñe. Cha endobena jamama tšëngaftangbe ainaniñe más chašmotsošbuáchema, y endobena tšabe soyënga tšëngaftanga jatšatayama, ndayá jatšatayama tojanašebuachenacá mo tšëngaftangcá entšángbioye, ndëmuanÿënga cha tojáchembo chabe entšanga chamotsemnana.

<sup>33</sup> Atše ndocnabe crocénana, o castellano o entšayá atšbiama quetsatántšaboše;

<sup>34</sup> más inÿetšá, y tšëngaftanga lempe šmondétatšëmbo, atše cach atšbe cucuatšeca tijéftsetrabajama, atšbiama y átšeftaca imojamnëngbiama opresido enjamna soyënga janguanguama.

<sup>35</sup> Atše nÿets tempo sëndinÿanÿná entšá chca ibomnama, chë jabuache jatrabájana y chë ujabótënga jujabuáchana, quem Bëngbe Utabná Jesusbe palabréngama sempre jtsejuabnayëse: ‘Canÿe entšá más oyejuayá jtsemnana ndayánaca ínÿabioye tbojtsatšetná ora, y ínÿabioye tbojtseyëngacá ora ndoñe nÿa nÿetšá ca’ ” —Pablo tonjanoyebuambá.

<sup>36</sup> Pablo chë soyënga tonjánayanentšana, tonjanoshamentšë y nÿetscanga chentše monjëtsemnëngaftaca Bëngbe Bëtsá tmonjanótšëmbona.

<sup>37</sup> Nÿetscanga tmonjánenobošachna y Pablo tmontanotsejcuá y tmontanámocho.

<sup>38</sup> Y entšanga corente ngménaca monjëtsemna, chënga ndocna te más cha mochántinÿe ca Pablo tojanéyana causa. Chentšana, chënga chë barquësha enjetsamnëntscoñe cha tmonjantjëmbambá.

## 21

### *Pablo Jerusalenoye tojána*

<sup>1</sup> Chë Jesucristbeñe ošbuáchiyënga fsënjëftsanabashejuana ora, barquëshañe fsënjanenoyayé y ndericho Cos luaroye fsënjána; chë yëfsana Rodasoye y chentšana Pátara pueblöye.

<sup>2</sup> Pátara pueblentše canÿe barquësha fsënjáninÿëna, Fenicioye enjëtšaye; asna, chëshañe fsënjanenoyayé y chentšana fsënjëftsanböcna.

<sup>3</sup> Fsěntsachnėjuana ora, fsěnjáninŷe Chipre luare; Chipre bėngbe uañicuayoica tonjanoquedá y bėngna Sirioye fsěnjėtsaye. Tiro pueblentŷe chė barquėshentŷa uasmanėshangá jėftsáboshjonama yojámnyeca, chė puebloye bėnga fsěnjėftsanamashjna.

<sup>4</sup> Chentŷna, Jesucristbeñe oŷbuáchiyėnga fsěnjánanŷena y canŷsėfta te chėngaftaca fsěnjanoquedá. Chėnga Pablo tmonjaniyana cha ndoñe ibonjamna Jerusalenoye jtsayana ca, er chė Uámana Espíritu tojanabuayená ndayá choca cháftaca jopásama.

<sup>5</sup> Chė canŷsėfta te tonjanochnėngo ora, chentŷana fsěnjėftsanbocna y nŷetscanga parejo chėngbe shémangaftaca y básengaftaca ŷonjanatjėmbambá chė pueblo chabóntscoñe; y chentŷe, chė chėnŷañe fsěnjanoshamentŷé y Bėngbe Bėtsá fsěnjanimpadá.

<sup>6</sup> Chentŷana, fsěnjesanodioŷoftá y chė barquėshoye fsěntanáŷengo; chentŷana chė oŷbuáchiyėnga cachėngbe yebnėngoye tmontaná.

<sup>7</sup> Tirentŷana fsěnjėftsanbocna y Tolemaida puebloye fsěnjánashjajna; y chentŷe tonjanopochocá bėngbiana bejaycá chė te ayana. Tolemaidentŷe Jesucristbeñe oŷbuáchiyėnga fsěnjanacheuá y chėngaftaca canŷe te fsěnjanoquedanga.

<sup>8</sup> Yėfsana, bėnga chentŷana fsěnjėftsanbocna y Cesarea luaroye fsěnjánashjajna. Chocna, bėnga fsěnjána Felipe chė Jesucristbiana tŷabe noticiėnga abuyaynayabe yebnoye y cháftaca fsěnjanoquedanga. Felipe enjamna canŷa chė Jesucristbe ichmónėngbioye ujabuachanėnguentsá, Jerusalenoca ubuáyanėnga.

<sup>9</sup> Felipe enjánabamna canta ndėbouamna bembalianga y chėnga monjamna Bėngbe Bėtsabe juabna oyebuambnayėnga.

<sup>10</sup> Ya bayté chentŷe fsěnjėtsemna orna, Judeocana tonjánashjango canŷa Bėngbe Bėtsabe juabna oyebuambnayá, Agabo ca uabainá.

<sup>11</sup> Agabo bėngbioye tonjánashjango ora, Páblėbe uasnanėja tonjanca y cucuatŷėnga y shecuatŷėnga cachá tonjanenabatsėca y mėntŷá tonjánayana: “Uámana Espíritu entsichamo, Jerusalenoca quem uasnanėja nduĩñbioye chė judiėnga mėntŷá camochjama y ndoñe judiėngbe cucuatŷiñe camochjáboshjona ca.”

<sup>12</sup> Chca fsěnjanuena ora, bėnga y chentŷa entŷanga Pablo fsěnjanimpadá Jerusalenoye ndoñe chaondėtsama.

<sup>13</sup> Chora Pablo tonjánayana: —¿Ndáyeca ŷmojtsoŷaché y ŷmojtsama atŷbe ainaniñe puerte ngménana chaotsemnana ca? Atŷe sėntseprontana y ndoñe nŷe chaŷmobatsėcama;

Jerusalenoca jobanámnaca sěntseprontana, Běngbe Utabná Jesusbiana ca —cha tonjánayana.

<sup>14</sup> Jáyěňjanama ndoñe chibiatanobená ora, ndoñe más chibiatanimpadá; nýe měntšá fsěnjaniyana: —Ntšamo Běngbe Utabná yojtsebošcá chaotsemna ca.

<sup>15</sup> Chě soyěnga tonjanochněngüentšana, fsěňjanoprontá y Jerusalenoye fsěňjana.

<sup>16</sup> Cesareoca, básefta Jesucristbeñe ošbuáchiyěnga choye šonjanatjěmbambá y chocna, chěnga šonjaněnatse canýe Chipre luaroca entšabe yebnoye, Mnasón ca uabainá, ndábentše běnga joquédama. Mnasón tempšana inamna Jesucristbeñe ošbuachiyá.

*Pablo tojána Santiago jauatsětsayama*

<sup>17</sup> Jerusalenoye fsěňjánashajna orna, chentša Jesucristbeñe ošbuáchiyěnga oyejuayěnga šonjaněbuaja.

<sup>18</sup> Yěfsana, Pablo běngaftaca tonjána Santiago jábuachama, y chentše, nýetsca chě ošbuachiyěngbeñe bětsějeměngcá mandayěgnaca monjětsemna.

<sup>19</sup> Pablo tonjanacheuá y chentšana tonjanacuntá lempe ntšamo Běngbe Bětsá Páblěbe trabájoca chě ndoñe judiěngbeñe tojanmama.

<sup>20</sup> Chca tmonjanuena ora, Běngbe Bětsá tmontanchuá y Pablo měntšá tmonjaniyana: “Morna, Jesucristbeyeca běngbe catšata, contsonýá ntšamo ba uaranga judiěnga Jesucristbeñe imojtsošbuáchema, y chěnga nýetscanga montsantješna nýetsca Jesucristbeñe ošbuáchiyěnga chě Moisesbe leyentša nýetsca manděnga chamotsocumplínama.

<sup>21</sup> Y entšanga chěngbioye noticia tmojatsatá, aca chě inýe luarěnguenache imoyena judiěnga cojtsabuatabmá, Moisés tojanmandá soyěnga ndoñe ntseyeunanama y basetéměnga base bobachtema chě más delicadentše ndoñe ntjatětsama, ntšamo běnga judiěnga fsěnduamancá, y ntšamo běnga fsěndětatsěmbcá ndoñe chamondětsamana ca.

<sup>22</sup> Y morna, ¿ntšamo chě soyěngama cochtsemana? Ndegombre, chěnga mochanjátatsěmbona aca moye tcojabama.

<sup>23</sup> Chcasna, ntšamo cbochanjabuayenacá cochjama: Běngbentše canta boyabásenga montsemna y chěnga entsamna Běngbe Bětsabiana canýe šbuachenana soye jamama.

<sup>24</sup> Acaftaca cochjunatse, chěngaftaca cochtsemna y chěngcá cochtsama Běngbe Bětsabe delante tšábenga jtsatsměnama ntšamo chamojtsama ora, y ntsachetšá jětsjájua chaojtsamncá, aca cochjětsjájua, as chěnga chamobená nýets stjėnashe jtsenátsbotjiana, jinýanýiyama, ntšamo Běngbe Bětsábioye tmojašbuachenacá ya tmojamama.



Y chca, n̄yetsca judiēnga mochanjin̄ye ndoñe ndegombre yontsemna chē nt̄samo chēngbioye acbiamama tmojacuntacá; masna, chēnga mochanjátatsēmbona aca ndegombre nt̄samo Moisesbe leyīñe yomandancá icuamama.

25 Y chē ndoñe judiēnga Jesucristbeñe imojtsošbuachengbiamna, bēnga ya fsēnjubúabiama y fsēnjáuyana ndayá jtsocumplínama chēnga yojtsamnama, mēnt̄sá: ‘Ndoñe chamondētsesá mēnt̄sena, chē entsānga tmojtsejuabná diosēnga imomna soyēnga jadórama tmojiyēbana; ni buiñe, ni tsešana bayēngbe mēnt̄sena; y ndoñe chamondētsama bacna soyēnga shembásenga y boyabásengaftaca ca’ ” —chēnga tmojánayana.

*Bēngbe Bētsabe bēts yebnentse judiēnga Pablo tmojánishache*

26 As Pablo, yēfsana chē cántanga tonjanēnatse y chēngaftaca tonjanma soyēnga Bēngbe Bētsabe delante t̄sábenga jtsatsmēnama. Chent̄šana, Pablo Bēngbe Bētsabe bēts yebnoye tonjánamashēngo chē bachnanga júnayama, ndaytēnt̄scoñe yojamna chē cantangbiamama soyēnga jtsamama, Bēngbe Bētsabe delante t̄sábenga jtsatsmēnama, y jayanama ndayté chēngbiamama yojtsemna ndaye ora cada ona ibojtsemna ndayánaca Bēngbe Bētsabe bēts yebnoye juambana, Bēngbe Bētsabiamama juat̄sēmbonama.

27 Chēnga tmojanenoyeuná y tmojánayana can̄ȳsēfta tentscuana chca jamana ca. Chē can̄ȳsēfta te ya jochnēnguama yojtsemna orna, básefta judiēnga Asioquēnga Pablo tmojánin̄ye Bēngbe Bētsabe bēts yebnoca y tmojanma entsānga chamuenbouénanama. Y cha tmojánishache,

28 mēnt̄sá jtsayebuáchese: “¡Israeloca entsānga, šmabétsējabuache ca! Quem boyabása entsemna chē n̄yets luarēnguenache iuana abuat̄ambaye soyēnga bēngbe entsāngbe contra, y nt̄samo bēngbe leyēnguiñe endayanama contra, y quem Bēngbe Bētsabe bēts yebnama ndoñe t̄sabá yontsoyebuambná. Y cabana quem Bēngbe Bētsabe bēts yebnoye grieguēnga tojúmashēngo, y chca cha tonjama chē Bēngbe Bētsabe bēts yebna Bēngbe Bētsabe bomin̄yiñe ndoñe t̄sabá chaondētsemnama ca” —chēnga imojtsichamo.

29 Chca imojtsichamo, er entsānga Pablo tmojánin̄ye chē bēts pueblent̄se Trófimo Efesocáftaca; y imojtsejuabnaye chábioye Bēngbe Bētsabe bēts yebnoye Pablo tbojanánatse ca.

30 N̄yetsca chē pueblent̄sa entsānga tmojánenbouenana, y ochamanana chē Pablo yojtsemnoye tmojánashajana. Pablo tmojánishache y Bēngbe Bētsabe bēts yebnent̄šana shjoye tmojtsansjojó, y cachora chent̄sa bēšašangá tmojtanatame.

<sup>31</sup> Jtsóbama ya imojtsebuachéta ora, chë Romoca soldadëngbe mandayá tojántatsëmbona nÿetsca chë bëts pueblentša entsanga imojtsenbouenanama.

<sup>32</sup> Asna, chë mandayá chabe soldadënga y inÿe chentša amëndayënga tojánachembo y cánÿiñe chë entsanga imojtsemnoye tmojëftsanótjajo. Entšanga, chë mandayá y chë soldadëngbioye tmojánanÿe ora, tmojtsanajbaná Pablo jantšetayana.

<sup>33</sup> Chorna, chë soldadëngbe amëndayá tojanobeconá, Páblëbioye tbojánishache y tojanmandá uta cadenëjuaca cha chamotsebátsëcama y tojanatjá: “¿Nda mua yomna y ndayá tojama ca?”

<sup>34</sup> Pero chë entsángbeñe, ínÿenga canÿe soye imojtsáyebuache y ínÿengna inÿe soye; y chca, ntšamo ndegombre tojanopasama jtsetatsëmbuama chë mandayá ndoñe tonjanobená; chcasna, cha tojanmandá Pablo chë soldadëngbe oyenoye chamuánatsama.

<sup>35</sup> Chë soldadëngbe oyenoca grádasbengoye tmojánashjajna ora, chë soldadënga tojanotocá Pablo cutsnana juambama, chë entsanga tša rábiaca imojtsemna causa,

<sup>36</sup> er chënga ústonoye imojétsaye y “¡Chaóbana ca!” imojtsaiuáyebuache.

*Ntšamo Pablo entsangbe delante tojanenëuyaná*

<sup>37</sup> Chë soldadëngbe oyenoye ya jamashënguama imojtsemna orna, Pablo chë soldadëngbe amëndayábioye tbojantjá: — ¿Tašcatjaleséncia ratotema ácaftaca jóyebuambayama ca?

Y chë mandayá tbojanjuá: —¡Aca icobena griego biyañe jóyebuambayama!

<sup>38</sup> As, ¿aca ndoñe condmëna chë Egiptocá, chë ndoñe bayté quenátsmëna entsanga yojanëtsëtsná chë mándayëngbe contra chamotsemnama y chë canta uaranga podesca uamana entsanga puñálaca uajatëngaftaca, entsanga ndoyena luaroje tojanbocná ca?

<sup>39</sup> Chora Pablo tbojanjuá: —Atše judío sëndmëna, Tarso puebloca onÿnaná, canÿe uámana pueblentše Cilicia luaroca; Diosmanda šmoleseñciá entsanga jáuyanama ca.

<sup>40</sup> As, chë soldadëngbe amëndayá chca tbojanleseñciá. Páblëna chë gradasbenguiñe tojantsá y cucuatše tojanatsbaná entsanga iytëca chamobiamama. Nÿetscanga iytëca imojtsemna orna, Pablo hebreo biyañe mëntšá entsanga tojanëyana:

## 22

1 “Baconga y taitanga, mora šmochjouena atše jenëuyanama ntšamo chjayancá ca.”

<sup>2</sup> Pablo cachëngbe biyañe, hebreo biyañe yojtsóyebuambnama entšanga tmojanuena ora, más iyteca tmojanobiana. As Pablo tojanëyana:

<sup>3</sup> “Atše judío sëndmëna. Tarso pueblentše, Cilicia luaroca sënjanonÿná, pero muentše Jerusalenentše sënjanoboché y sëndëtatsëmbo soyëngna Gamaliélbeyeca chca botamana sënjanatsjinÿe. Cha corente tšabá šonjanbuatëmbá bëngbe bëts taitangbe leyënga; nÿets atšbe ainánaca Bëngbe Bëtsá sëndëservena, ntšamo nÿetsca tšëngaftanga mora šmontsamancá.

<sup>4</sup> Atše sënjánama chë Jesucristo tojaninÿanÿé Benache ústonënga chamosufrima y chamóbanama; boyabásenga y shembásenga sënjanëtabaye y cárceloye sënjanautame.

<sup>5</sup> Chë judío bachnangbe más uámana amëndayá, nÿetsca chë judiëngbeñe bëtsëjemëngcá mándayënga y inÿe muentša mándayënga mondobena jayanana ntšamo sentsichamcá ndegombre yomnama. Chënga uabemana tsbuanachangá šmonjaniyé, bëngbe catšátanga judiënga chamotsetatsëmbuama atše mando stsanbomnama, Jesucristbeñe ošbuáchiyënga jótabayama; y Damascoye sënjána choca Jesucristbeñe ošbuáchiyënga jótabayama, moye Jerusalenoye junatsama jacastígayama.”

*Pablo tojanacuntá ntšamo Jesucristbeñe ošbuachiyá tojanóbema*

*(Hch 9.1-19; 26.12-18)*

<sup>6</sup> “Pero canÿe te benachiñe Damasco béconana sënjëtsaye orna, mo nÿetsto ora, nÿe ndeolpe atšbe juachañe canÿe bëts tcuinÿe celocana tonjanbuashinÿinÿena.

<sup>7</sup> Y fshantsoye sënjëtseshajaye y canÿe oyebuambnayana sënjanuena mëntsá: ‘Saulo, Saulo, ¿ndáyeca šcojtsacmena ca?’

<sup>8</sup> Atše sënjantjá: ‘¿Nda comna, Bëngbe Utabná ca?’ Y chë oyebuambnayana šonjanjuá: ‘Atše sëndmëna Jesús Nazaretocá, y aca condama atšbe entšanga chamotsesufrínama ca.’

<sup>9</sup> Chë átšeftaca monjánajnënga chë bëts tcuinÿe tmojáninÿe y tmojanouatjananga, pero chë oyebuambnayana ndoñe tmonjanuena.

<sup>10</sup> Chora atše sënjantjá: ‘¿Bëngbe Utabná, ndayá jamama šojtsemna ca?’ Y cha šonjaniyana: ‘Matëtsbaná y mëtëtontsé Damascoye jama. Chentše canÿa cmochanjabuayená ndayá jamama cmojtsemnama ca.’

<sup>11</sup> Chë tcuinÿe yapa tonjanbuashinÿinÿena causa, atše jtaná sënjanoquedá. Chcasna, chë ínÿenga šmontanobuacuetëntsé y chca, Damascoye sënjánashjango.

<sup>12</sup> “Chentše enjamna canÿe bacó Ananías ca uabainá; cha inoyena ntšamo Bëngbe Bëtsá yobošcá y yojánama ntšamo

bëngbe leyënguiñe iuayancá, y nÿetsca chentša judiënga monjanamana chabiama tšabá jtsóyebuambnayana.

13 Cha tonjánabo atše jinÿama y tonjánashjango ora, šonjaniyana: ‘Jesucrístbeyeca atšbe catšata, Saulo, chacmotsatabinÿna ca.’ Cachora y cha sënjáninÿe.

14 “Chentšana cha tonjánayana: ‘Bëngbe bëts taitangbe Bëtsá aca tcmojuábuayana, ntšamo cha acbiama yobošcá chacotsetatšëmbuama, chë nÿetsca soyënguiñe Tšabá Amá chacuinÿama y cachabe uayášentsšana chacóyeunama.

15 Bëngbe Bëtsá chca tojama, aca chë chabe buayenana soyëngama entšángbeñe chacóyebuambama, y chamna nÿets luarentša entšángbeñe cochjacuénta, ntšamo tcojinÿe y tcojouencá.

16 Y mora, jndoñe más matobátmanana! Motsbaná y cochjenábaye Jesucristo jótšëmbonëse, chca, acbe bacna soyëngama perdonaná chacotsemnama ca’ ” —cha šonjaniyana.

*Pablo tojanacuntá ntšamo chë ndoñe judiëngbioye tmojánichmoma*

17 “Jerusalenoye sëntaná ora, Bëngbe Bëtsabe bëts yebnoye sënjána cháftaca jencuéntama, y ndeolpe atše mo otjenay-oquëcá sënjanouquedá.

18 Chca orna, Bëngbe Utabná sënjáninÿe y cha mëntšá šonjaniyana: ‘Betsco motsa y cam ora Jerusalenentšana métsebozna; quemuentša entšanga ndoñe quecmochatóyeunaye ntšamo atšbiamá condétatšëmbo y contsëtsësnacá ca.’

19 Atše sënjanjuá: ‘Bëngbe Utabná, chënga mondétatšëmbo atše sënjánana nÿetsca chëngbe enefjuana yebnënguenache y chë ácheñe ošbuáchiyënga sënjanëtámiana y sënjánatsetsenaye;

20 y acbiama ndegombre oyebuambnayá Esteban tmonjanóba ora, átsnaca chentše sënjamna y tšabá imojtsama ca chama sënjëtsejuabnaye, y cabá chë monjanóbanangbe entšayëjuangá atše chora sënjanabojanÿá ca’ —atše sënjanjuá.

21 Pero chca sënjánayana ora, Bëngbe Utabná šonjaniyana: ‘Motsa; atše bën luarëngoye, ndoñe judiëngbioye cbochanjíchmuca ca.’ ”

*Pablo y chë soldadëngbe amëndayá*

22 Chë entšanga chëntscoñe tmojanuena; pero chë ndoñe judiëngbiama tojanoyebuambá orna, chënga tmojanontšë uayebuáchana: “¡Ndoñe tšabá quenátsmëna cha vídaca chaotsemnama! ¡Motsóba ca!”

23 Y chënga más imojtsáyebuache; puerte rábiaca chëngbe uichëtjonëjuangá tsbanánoye imojtsëbéntaye y tsbanánoye polvëshe imojtsëtšana;

24 chë causa, chë mandayá tojánayana chë soldadëngbe oyenoye Pablo chamotsëmashëngo ca, y tojanmandá chamotsetjanja chaobuambama ndáyeca entšanga chca chabe contra imojtsáyebuache.

25 Pero jtsetjanjama ya tmojanbatsëca orna, chentše imojtsemna soldadëngbe amëndayábioye Pablo tbojantjá: —¿Tšëngaftanga šmobena canýe entšá derecho bomná mo canýa Romoca onýnanacá jatjanjana, ndegombre tšabá o ndoñe tšabá tonjamama cabá ndayana ora ca?

26 Chë básefta soldadëngbe mandayá chë soye tojanuena ora, tojána y nýetsca soldadëngbe amëndayábioye chama ibojue-naye, mëntšá: —¿Ndayá cochjama? Chë entšá derecho bomna mo canýa Romoca onýnanacá canmëna ca.

27 As chë amëndayá tojána Pablo yojtsemnoye y tbojaniyana: —Smëyana, ¿aca derecho bomná mo canýa Romoca onýnanacá comna ca?

Y cha tbojanjuá: —Arseñor ca.

28 Chora chë amëndayá tojánayana: —Atše becá crocénana sënjëtšajó mo canýa Romoca onýnanacá derecho jtsebom-nama ca.

As Pablo tbojanjuá: —Y atšna derecho bomná mo canýa Romoca onýnanacá sëndmëna atše tijanonýná orscana, er atšbe taitá chca derecho bomná inamna ca.

29 Chcasna, chë jatjanjama imojtseprontanënga, Páblëbentšana tmojanajuaná; y chë mandayánaca tojanajuaná y yojtsauatja, Pablo derecho bomná mo canýa Romoca onýnanacá yojamnama tojántatsëmbona ora, er cha tojanmandá Pablo chamotsebátsëcama.

### *Pablo, Jerusalenentša uámana mándayëngbe delante*

30 Chë soldadëngbe amëndayá yojtseboše ndegombre jtsetatšëmbuama ndaye soyama judiënga Páblëbe contra imojtsichámuama; asna, yëfsana tojanmandá cadenëjuangá jtsajafjonana y chë bachnangbe amëndayënga y nýetsca chë judiëngbe amëndayënga chamobéconama. Chentšana, Pablo tbojanábocna y chëngbe delante tbojanatsá.

## 23

1 Chora Pablo, nýetsca chë mandayëngbioye tojanënyänýe y tojanëyana: —Taitanga, atše mënténtscoñe tsiyena jtsamëse ntšamo Bëngbe Bëtsá yobošcá y chabe delante atšbe ainana natjëmbana endëtsomñe ca.

<sup>2</sup> As, Ananías, chë bachnangbe más uámana amëndayá, tojanmandá Páblëbe béconana imojtsemnënga cha chamotsáyejantšetama.

<sup>3</sup> Pero chora Pablo Ananíasbioye tbojanjuá: —¡Bëngbe Bëtsá ácnaca cmochanjëtsjantšetá, bacna entsá, ntšamo ndegombre tcojuabnacá ndinýinýayá! Aca chentše contsetbemana tšabá o ndoñe tšabá tijamama jayanama, ntšamo Moisesbe leyinë yomandancá; as, ¿ndáyeca cojtsemánda chašmojantšetama? Chca chë leyinë ndoñe quenátslesenciana ca.

<sup>4</sup> As, chabe béconana imojtsemna entsanga tmojánayana: —¿Chca chë Bëngbe Bëtsabe bachnangbe más uámana amëndayábioye cochjóyenguango ca?

<sup>5</sup> Chora Pablo tojánayana: —Taitanga, atše ndoñe quetsátstatšëmbo cha chë bachnangbe más uámana amëndayá yomnama. Er Bëngbe Bëtsabe uabemana palabrënguñe mëntšá endayana: “Entšangbe mandayabe contra ndoñe catjayana ca.”

<sup>6</sup> Pablo tojáninýe chë mándayënguëntše báseftanga saduceunga y ínýengna fariseunga imojtsemnama; as, mëntšá tojanáyebuachena: —Taitanga, atše fariseo sëndmëna; atšbe bëtšëtsanga fariseunga mondmëna. Atše, jtšošbuáchiyëse chë obanënga mochtayenama tsobátmana causa, atše ndoñe tšabá sëntsama ca tšëngaftanga šmochjayana ca.

<sup>7</sup> Pablo chca tojánayana ora, chë fariseunga y saduceunga tmojanontšé enatsëtsnayana, y chë causa nyetsca entsanga ndoñe cachcá imontsejuabnaye.

<sup>8</sup> Er chë saduceunga jtsichámuana chë obanënga ndoñe ntañenana ca, y ni angelënga, ni espíritënga ndoñe mondmëna ca; pero chë fariseunga aíñe chë soyënguñe jtšošbuáchiyana.

<sup>9</sup> Y nyetscanga tša imojtsáyebuache; asna, básefta fariseunga ley abuátambayënga tmojantsbaná y jabuachana mëntšá imojtsáyebuache: “Quem boyabása ndocna bacna soye tonjama. Nderado mo Bëngbe Bëtsabe canýe ángel o espíritu muábioye ndegombre tbojayana ca.”

<sup>10</sup> Entšanga más imojtsáyebuache y chë soldadëngbe amëndayá yojtsauatja nderado entsanga Pablo muantsatcacaye; as, cha tojanmandá soldadënga chamua Pablo chë entsángbentšana jaisábocnama y chë soldadëngbe oyenoye cachiñe jesánatsama.

<sup>11</sup> Yëfsana íbeta, Bëngbe Utabná Páblëbioye tbojánëbëbocna y tbojanayana: “Pablo, ainaniñe añemo cochtsebomna. Ntšamo aca atšbiamá condétatšëmbo y muentše Jerusalenentše condoyebuambnacá, cachcá cmontsemna Romoca jamama ca.”

*Judiënga tmojanenoyeuná Pablo jtsóbama*

12 Chë inye yëfsana, judiënguentsana báseftanga tmojanenoyeuná Pablo jtsóbama, y tmojanjurá tondaye ntjasana, ni ntjofsiyana, cha jóbantscuana.

13 Chca jamama tmojanjuabó entsanga imojamna canta bnëtsanëngama más.

14 Chënga tmojána chë bachnangbe amëndayënga y judiëngbeñe bëtsëjemëngcá mandayëngbioye y mëntsá tmojánayana: “Bënga Bëngbe Bëtsá mëntsá fsënjašbuachená y bacna soyënga bëngbeñe chaotsemna chca ndoñe fsënjocumplise: Tondaye ntjasana, ni ntjofsiyana, Pablo jóbantscuana.

15 Morna, tsëngaftanga y chë inye muentša mandayëngaftaca chë soldadëngbe amëndayá šmochjaimpáda Pablo moye chabuánatsama; y šmochjauyana chca yojtsemna ana chë ndayá yojtsopasánama más botamana cha jatjayama ca; y bëngna fchtseprontana cha jtsóbama, cabá moye ndáshjango ora ca.”

16 Pero, Páblëbe uabenbe uaquiñá chë soye tojántatšëmbona; asna, tojána chë soldadëngbe oyenoye, chama Pablo jauenayama.

17 Chorna, Pablo canye básefta soldadëngbe mandayábioye tbojanchembo y tbojaniyana: “Diosmanda quem basa mánatse chë nyetsca soldadëngbe amëndayábioye; canye soye entsebmna chábioye juenayama ca.”

18 As, cha chë bobontse tbojëftsanbetše, chë nyetsca soldadëngbe amëndayábioye tbojanánatse y tbojaniyana: “Chë utamená Pablo šonjachembo y šonjaimpadá quem bobontse ácbioye juanatsana; mua caojtsebmna canye soye aca jauyanama ca.”

19 Chë soldadëngbe amëndayá chë bobóntsbioye tbojëftsanobuácuëtëntsiye, luaroye tbojanánatse y tbojantjá: —¿Ndayá cojtsebmna atše jauyanama ca?

20 As chë bobontse tbojaniyana: —Judiënga tmojenoyeuná taitá jaimpádama, yëfse chëngbe amëndayëngbioye Pablo chacuánatsama, y chënga cmochanjauyana chca yojtsemna ana chë ndayá yojtsopasánama más botamana cha jatjayama ca.

21 Pero ndoñe catjóyaunaye; chënguentsana canta bnëtsanëngama más entsanga iytémenënga Pablëbiana montsanjä. Chënga tmojajurá, bacna soye chëngbeñe chaotsemna ndoñe tmonjocumplise, tondaye ntjasana, ni ntjofsiyana, Pablo jóbantscuana. Mora chënga montseprontana y montsobátmana ntšamo aca chë soyama cochjáuyanama ca —chë bobontse tbojaniyana.

22 Chentsana, chë soldadëngbe amëndayá chë bobóntsbioye tbojanmandá, ndayá ibojuenayama ndocnábeñe ntsecuéntayana, y chentsana tbojtanichmó.

*Pablo tmojanánatse Félix, chë Cesareoca mandádbioye*

23 Chentsana, chë soldadëngbe amëndayá tojánachembo útata chë inye soldadëngbioye mándayënguentsana, y tojanamëndá chamoprontama uta patse soldadënga, inye canyësëfta bnëtsanënga couayënguiñe y inye uta patse lanzëshangaca, Cesarea pueblöye íbeta, las nueve ora jabocanama;

24 y tojanamëndá couayënga chamoprontá Pablo chauenójayema. Y tojanmandá tšabá y ndocá ntjapasacá Pablo chamuánatsama, Félix chë Cesareoca mandádbioye.

25 Y canye tsbuanácha chëngaftaca tojanichmó y chëchañe mëntšá yojtsábemana:

26 Claudio Lisias, chë bëts uámana mandado Felixbiamá: Salud bomná chacotsomñe.

27 Judiënga quem boyabása tmojishache y montseboše jtsóbama; pero cha mo canya Romoca onyñanacá derecho bomná yomnama sënjátatšëmbona ora, atšbe soldadëngaftaca sënjá y chëngbe cucuatšentsana cha sënjatsbocá.

28 Atše sëntseboše jtsetatšëmbuana ndaye soyama chënga chabe contra imojtsichámuama; as, cha sënjuánatse nyetsca chë judiëngbe amëndayënga montsemnoye;

29 y chentsana, atše sënjátatšëmbona chënga chabe contra imojtsichamo ana cachëngbe leyentša soyëngama, pero cha tondaye tonjobuachjanguá, cha jóbama bënga chašotsamnama, ni mo cárcelöye jutámiamá.

30 Pero atše sënjátatšëmbona chë judiënga tmojenoyeuná cha jtsóbama; chíyeca, cam ora cha ácbiöye sëntsichamná, y chabe contra ichámëngna sënjáuyana, ndayá muabe contra jayanama imojtsebomncá acbe delante chamuayana ca.

31 Chentsana, chë soldadënga tmojanma ntšamo tmojanamëndacá, íbeta Pablo tmojëftsanbetše y Antípatris pueblöye tmojanánatse.

32 Yëfsana, chë shecuátšeca tmojána soldadëngna cach soldadëngbe oyenoye tmojésanshëcuana, y chë couayiñe enjaquenënga Pábloftaca tmojána.

33 Cesareöyö chënga tmojánashhajna ora, chë tsbuanácha chë mandádbiöyö tmojanantšabuaché, y Páblëncá chabe cucuatšinë tmojánhoshjona.

34 As chë mandado chë tsbuanácha tojanalía; chentsana, cha tojanënoticiá ndaye luarocá Pablo inamnama, y Cilicia luarocá cha inamnama cha tojántatšëmbona ora,



<sup>35</sup> tbojaniyana: “Acbe contra ichámënga chamobeconá ora, ácbioye oído cbochjabuájua ca.”

Chentšana, cha tojanmandá Rey Heródesbe bëts yebnoca Pablo chamotsebojanýama.

## 24

*Ntšamo Pablo chë mandado Félixbe delante tojanenëuyaná*

<sup>1</sup> Shachna tianoye, Ananías, chë bachnangbe más uámana amëndayá, Cesareoye tojána báseftangaftaca chë judiëngbeñe bëtsëjemëngcá mándayënguentsana y canýa entšanga obuauyayáftaca, Tértulo ca uabainá; y chë mandádbioye chënga tmojána Páblëbe contra jayanama.

<sup>2</sup> Pablo tmojanábocna ora, Tértulo tojanontsé chabe contra jayanama y Félixbioye tbojaniyana: “Aslëpaye, taita mandado, ácbeyeca bënga natjëmbana fsëndoyena y aca puerta obiashjachá cómnayeca ba tšabe soyënga quem luarentša entšangbiana yojtsebinýna.

<sup>3</sup> Nýets tempo y nýetsquénache chë soyënga fsëndóyëngacañe, bëts uámana mandado, y bënga chama corente cbondet-sechuaná.

<sup>4</sup> Pero ndoñe yapa bën jatenbiamnayamna, Diosmanda ratotema šmotsoyauná.

<sup>5</sup> Bënga fsëntsetatšëmbo quem boyabása entšanguentše entsemna mo bacna shacuancá, nýets luarënguenache yojtsana y yojtsama chë judiënga nýetscanga cachca soye ndoñe chamondëtsejuabnama, y cha yojtsemna chë Nazaretocabe ustonëngbe uanatsaná.

<sup>6</sup> Y tonjábošena jamama Bëngbe Bëtsabe bëts yebna, Bëngbe Bëtsabe bominyiñe ndoñe tšabá chaondëtsemnama; chíyeca bënga cha fsënjotbá. Bënga fsënjábošena chabiana jayanana tšabá o ndoñe tšabá tonjamama, ntšamo bëngbe leyënguñe endayancá;

<sup>7</sup> pero chë soldadëngbe amëndayá Lisias tonjontremeté y jabuachana bëngbe cucuatšentsana tbojtsánatseñe,

<sup>8</sup> y tonjayana chë chabe contra ichámëngna caojtsamna ácbioye chama jabana ca. Cach taitá chacojatjá ora, ndegombre soyënga cochántsetatšëmbo ndáyeca bënga muabe contra fstsichámuama ca” —cha tojánayana.

<sup>9</sup> Y chë judiënga chentše imojëtsemnëngna imojtsanichamo añe chca tojanopasá y lempe ndegombre yojtsemna ca.

<sup>10</sup> Chentšana, chë mandado Páblëbioye tbojánëfjatsëmbo chaóyebuambama; as Pablo tojánayana: “Atše sëndëtatšëmbo aca ba uatama comna muentša entšangbiana tšabá o ndoñe tšabá tmonjamama ichamuá; chcasna, tondayama ntsauatjca y puerta oyejuayá acbe delante šcuenëuyaná.

11 Ntšamo cach aca jtsetatšëmbuama contsobencá, cabá bnëtsana uta te entsemna atše Jerusalemoye sënjá, Bëngbe Bëtsá jadórama.

12 Y quemënga ndoñe chešmátinýena nderado ndáftaca jabuachana enatsëtsnayiñe, ni entšanga chamuenbouéanama amiñe, Bëngbe Bëtsabe bëts yebnoca, ni chëngbe enefjuana yebnënguenache, ni inýe luarënguenache chë bëts pueblentše.

13 Quem entšanga tondaye quemátsbomna ntšamo jayanama, atšbe contra montsichamo soyënga ndegombre yojtsemna ca.

14 Pero ndegombre endmëna y chanjayana, atše bëngbe taitangbe Bëtsá sëndëserveda, jtsiyenëse ntšamo Bëngbe Bëtsá šonjaninýanýe benache yomncá; y quem entšanga montsichamo, básefta soyënga ntšamo bënga quem Tsëm Benache ústonënga fstsošbuachecá, ndoñe ndegombre yondmëna ca. Pero atšna nýetsca chë Moisesbe leyiñe y Bëngbe Bëtsabe juabna oyebuambnayëngbe uabemana librëšanguentša soyënguiñe sëndošbuaché;

15 y atše cach chëngcá, puerte jtsošbuáchiyëse Bëngbe Bëtsábeñe sëndobátmana cha yochjama chë mochjóbanënga chámuatayenama, nýetsca entšanga, lempe tšabá amënga y chë ndoñe tšabá amëgnaca.

16 Chíyeca, atše nýets tempo puerte tšabá sëndama, tondayama ntjatenócochinýenama y atšbe ainana natjëmbana chaotsomñama, Bëngbe Bëtsabe delante y entšangbe delántnaca.

17 “Básefta uatama inýe luarënguenache atše sëndánana; ndoñe bayté quenátsmëna cach atšbe luaroye sëntashjango, chentša ndbomnjëmënga jujabuáchama ndayánaca jatšatayama y bayënga jobáyama, Bëngbe Bëtsá jëtschuayama.

18 Atše sënjama soyënga Bëngbe Bëtsabe delante tšabá jtsatsmënama; chentšana, básefta Asioca judiënga Bëngbe Bëtsabe bëts yebnentše šmonjínýena, pero ndoñe chešmátinýena ni ba entšángaftaca, ni enbouenaniñe.

19 Chë šmonjinýenënga entsamna ácbioye jabana y acbe delante atšbe contra chamuayana, nderado ndayá tmojtse-bomnëse.

20 O ndoñesna, cach quemënga, muentše montsemnënga chamuayana, chë judiëngbe amëndayëngbioye atše šmonjuánatse ora, atše ndayá tijobuáchjanguama chešmënjínýena, atše castiganá jtsemnama šojtsemna ca chënga chamuayanama;

21 o nderado nántsemna chë atše chëngbentše sëntsemna ora, mëntšá tijuáyebuachenama: ‘Atše chë obanënga mochtayenama puerte jtsošbuáchiyëse sëndobátmana causa,

tšëngaftanga atšbe contra šmochjayana ca.' ”

22 Félix bëtscá inatátšëmbo Bëngbe Utabná tojaninýinýé Benache ústonënga imojanošbuaché soyëngama; as, Pablo chca yojtsoyebuambná ora, cha tojanmandá ndoñe más chë soyama chë te jatóyebuambnayana, y chë entsanga tojanëyana: “Chë soldadëngbe amëndayá Lisias chaojášhjangora, chajayana ntšamo quem tšëngaftangbe sóyeca jamama ca.”

23 Y chentša soldadëngbe amëndayábioye tbojanmandá Pablo jtsebojanýama, pero nýe utamená ndoñe chaondëtsemna ca; y tojanmandá, Páblëbe amiguënga jalesénciyana ntšamo tmojtsebošcá cha chamuauájabuachama.

24 Chentšana baseftaytese, chë mandado Félix Cesareoye tojtashjangora, chabe shema Drusíaftaca, canýe judiá. Chorna, cha tojanmandá Pablo jachembuana y tojanuena ntšamo Pablo yojtsichamo, ntšamo canýa nanjobenaye Jesucristbeñe ošbuachiyá jtsemnama.

25 Pero, nýetsca soyënguiñe tšabá jtsamama, cachá jenomándama jtsobenama y ntšamo tmojamama nýetsca entsangbiana Bëngbe Bëtscá yochjayanama Pablo tojanoyebuambá ora, Félix tojanëuatjaná y Páblëbioye tbojaniyana: “Mora, mata; luare quétstsebozna ora, cbochjchembo ca.”

26 Jëtsboshjonama Pablo crocénana chabuatabuenámnaca Félix inobátmana; y chca, ba soye ibojanófjajana cháftaca jencuëntama.

27 Y chca uta uata tojanochñëngora; chentšana, Félix ya ndoñe más chë mandado yontsemna y chabe cuentna Porcio Festo mandadcá tmojántbema. Félix yojtseboše chë judiëngbe delante tšabá joquédama, chíyeca utamená Pablo tbojéftsanboshjona.

## 25

### *Pablo Festbe delante*

1 Festo chë luaroye tojánashjangora y unga tianoye, Cesarea pueblentšana Jerusalenoye cha tojána.

2 Chocna, chë bachnangbe amëndayënga y chë más uámana judiënga Fëstbioye tmojána Páblëbe contra jayanama.

3 Y tmojanimpadá, mo chëngbiana canýe bëtspavor cuenta, cha chaomandá Pablo Jerusalenoye chamuánatsama. Chëngna imojëtsejuabnaye Pablo benachiñe chamotsóbama.

4 Pero Festo tojanëyana, Páblëna Cesareoca utamená yojtsemna y baseftaytese cha choye jtama ca.

5 Y tojanéyana: “Chamna, tšëngaftangbe amëndayënga átšeftaca Cesareoye chamua y chë boyabása ndaye bëts soye tojobuáchjanguase, choca chabe contra šmochjayana ca.”

6 Festo Jerusalemntše posufta o bnëtsana te más chëngaftaca tbojëftsanjétana y chentšana Cesareoye tojtana. Yëfsana, cha tojanótbema chabe puestentše tribunaloca y tojanmandá Pablo choye chamuánatsama.

7 Pablo choye tojánashjango ora, Jerusalemocana tmojánashjajna judiënga tmojanobobeconá y ba uabouana soyënga chabe contra imojtsichamo, pero ni canye chë soyëngama tmonjanobená jinyanýiyana chca ndegombre bëtsemnama.

8 Y Pablo, cachá jenëuyanama mëntšá yojtsichamo: — Atše tondaye chiyatobuachjanguá, ni judiëngbe leyëngama, ni Bëngbe Bëtsabe bëts yebnama, ni Romoca bëts mandadbe contra ca.

9 Festo yojtseboše chë judiëngaftaca tšabá joquédama; as Páblëbioye tbojantjá: —¿Tacatjábošena Jerusalemoye jama, choca atše quem acbe soyama jayanama ca?

10 As Pablo tojánayana: —Atše sëntsemna chë Romoca bëts mandado tojichamó amëndayëngbe delante y chënga entsamna jayanama atše tšabá o ndoñe tšabá sënjamama. Ntšamo ndegombre contsetatsëmbcá, judiëngbe contra atše ndocna bacna soye chiyatsma.

11 Nderado atše ndaye bëts soye tjobuachjanguá y chama atše jóbanama šojtsemnëse, atše tondaye quichátayana atše ndoñe chayóbanama; pero atšbe contra montsichamo soyëngama tondaye ndegombre tontsemnëse, ndocná queochatobenaye chëngbe cucuatšinë atše jaboshjonana. Chíyeca, Diosmanda chë Romoca bëts mandado cháuyana tšabá o ndoñe tšabá sënjama ca —Pablo tojánayana.

12 As Festo, chë soyama chabe buayiynayënga tojanatjá y chentšana tojánayana: —Chë Romoca bëts mandado quem soyama cháuyanama tcojábošenësna, chábioye cochjá ca.

*Festo, Rey Agrípaftaca tbojanencuentá ntšamo Pábloftaca jamama*

13 Chentšana baseftayté tojanochnëngo ora, Rey Agripa y Berenice Cesareoye tbojána, Festo jauatsëtsayama.

14 Bayté chata chentše tojanajétana; y chca, Festo chë réybioye tbojancuentá Páblëbe soyama. Cha mëntšá tbojaníyana: —Muentše endmëna canye entšá, Pablo ca uabainá; Félix utamená tbonjëftseboshjona, atše mandadca sënjontšë ora.

15 Jerusalemoca sëndánmëna ora, chë bachnangbe amëndayënga y chë judiëngbeñe bëtsëjemëngcá mándayënga

Páblēbe contra demanda tmonjajajó y šmonjaimpadá cha jóbanama ibojtsemna ca atše jayanama.

<sup>16</sup> Y atše sēnjáuyana: “Chē romanēnga ndoñe quematamana ndocnabiama jayanana cha jóbanama ibojtsemna ca, chabe contra ichámēnga chabe delante ndoñe tmontsemnēse, chca, chama jenēuyanama cha chaobenama ca.”

<sup>17</sup> Chíyeca, chēnga moye tmonjabo ora, ndoñe yapa bēn ntatenobiamnycá cach yēfsana atšbe puestentše tribunaloca sēntótbema y sēnjamandá chē boyabása jobetšana.

<sup>18</sup> Pero chabe contra ichámēnga, ntšamo atše sēndanjuabnacá chēnga mochjayanamna ni mo canye bēts soye chabe contra chemátayana, chēnga jóyebuambayama tonjóyentšbuache ora.

<sup>19</sup> Chēnga chabe contra montsichamo, nye cachēngbe Dios ntšamo jadórama yomnana y canya Jesús ca uabainábiamna; cha tojanóbana, pero Pablo entsichamo cha ainá yotsomñe ca.

<sup>20</sup> “Chora atše ndoñe quetstétsetatšēmbo ntšamo chē soyiñe jamana; asna, Pablo sēnjantjá Jerusalenoye jama tayojétseboše ca, choca atše jayanama tšabá o ndoñe tšabá cha tonjanmama.

<sup>21</sup> Pero cha šonjaimpadá camuentše jaboshjonana, cach Romoca bēts uámana mandado chē soyama tojayanēntscuana ca. Chcasna, atše sēnjamandá cha chamotsebojanñama, chē mandádbioye jíchmuama atše jobenayēntscuana ca” —Festo tbojancuentá.

<sup>22</sup> Chca tbojanencuentá ora, Agripa Féstbioye tbojanianyana: —Atšnaca sēntseboše chē boyabása joyeunayama ca.

Y Festo tbojanjuá: —Cach yēfse oído chábioye cochanjabuájua ca.

<sup>23</sup> Chē yēfsana, Agripa y Berenice corente uachuanentše chē tribunaloye tbojánamashjna y chátaftaca tmojánamashjna chē soldadēngbe amēndayēnga y chē pueblentša uámana taitanga. Chentšana Festo tojanmandá Pablo jobetšana;

<sup>24</sup> y chora cha tojánayana: “Rey Agripa y nyetsca taitanga bēngaftaca šmojtsemnēnga: Chentše entsemna chē boyabása. Nyetsca judiēnga chabe contra átšbentše montsabíchamo, Jerusalenoca y quem Cesarea puebléntšnaca, y nya jtsayebuáchēse tša šmontseimpadana cha chaóbanama;

<sup>25</sup> pero atše sēntsejuabná quem boyabása tondaye tonjama, jóbanama chabotsemnana ca. Y más, cachá šonjaimpadá chē Romoca bēts uámana mandado César chabe soyama cháuayanama; chcasna, chca chanjama, chábioye cha chanjíchmu.

<sup>26</sup> Pero atše, atšbe bēts uámana mandádbioye quem boyabásabiamna juábobemama ndocna serto soye quetsátsbomna

causa, tšëngaftangbe delante cha tijatsá, y masna, acbe delante, bëts rey Agripa; chca, lempe chacojatjá chentšana, ndayá juabemama atše chaitsebomnama.

<sup>27</sup> Er atše sëntsejuabná ndoñe corente juabnayabe soye yomna, canye utamená jíchmuana y ndayama chabe contra tmojtsichámuama ndoñe lempe ntjuabemana ca” —cha tojánayana.

## 26

*Pablo tojanontsé rey Agripbe delante jóyebuambayama*

<sup>1</sup> Chentšana, Agripa Páblëbioye tbojanianana: —Jóyebuambayama contselesenciana, cach aca chacuenéuyanama ca.

As Pablo, chë réybioye jachuyama cucuatše tojanatsbaná y jenéuyanama tojanontsé mëntšá jayanama:

<sup>2</sup> —Atše ndegombre sëntsoyejuá mora chjobenaye acbe delante jóyebuambayama, uámana rey Agripa, chca, atše jenéuyanama nyetsca soyëngama ntšamo judiënga atšbe contra montsichámuama;

<sup>3</sup> y más sëntsoyejuá, taitá conduábuatmama lempe ntšamo judiënga monduamancá y condétatšëmbo chë judiënga ndayama imuenoboyebuambnama. Chcasna, Diosmanda uantádoca šmotsoyeuná.

*Pablo tojanacuntá ntšamo cha tempo inamnama*

<sup>4</sup> “Nyetsca judiënga mondétatšëmbo ntšamo atše temp-scana chëngbeñe tsiyenama, bobontse sënjamna orscana, atše sënjanonýná luarentše y Jerusalenentše.

<sup>5</sup> Chëngnaca mondétatšëmbo y montsobena jayanana, chënga tmojtsebošëse, chca ndegombre yomnama; atše nyets tempo fariseucá vida sëndbomna, y chë fariseunga mon-doyena más soyënga jtsamëse chë judiëngbe leyëngaca chë inye judiëngbiana.

<sup>6</sup> Y mora, ntšamo Bëngbe Bëtsá bëngbe bëts taitanga tojanašebuachenacá, chë obanënga jtayenama cha yochjamama puerte jtsošbuáchiyëse atše obatmana causa, šmojuánatse atšbe contra jayanama.

<sup>7</sup> Bëngbe bnëtsana uta Israeloca bëts pamíllanga mon-dobátmana chë šbuachenana soye chëngbiana chaóshjanguama y chíyeca, cada te bnëté y ibeta chënga Bëngbe Bëtsá mondado-rana y mondëserveda. Y atše cach soyama obatmana causa, bëts rey Agripa, judiënga mora atšbe contra montsabíchamo.

<sup>8</sup> ¿Ndáyeca tšëngaftanga judiënga šmojtsichamo, chë obanënga chámuatayenama Bëngbe Bëtsá yochjamama jtsošbuáchiyama ndoñe šmontsobena ca?

*Pablo tojanacuntá, ntšamo tempo cha Jesucristbeñe ošbuáchiyënga yojanaborlánama*

<sup>9</sup> “Y cach átšnaca sënjanjuabná atše šojamna lempe ntšamo stjobenacá jamana, Jesús chë Nazaretocábeñe ošbuáchiyënga corente chamosufrima,

<sup>10</sup> y chca Jerusalenentše atše sënjanma. Chë bachnangbe amëndayënga mando šmonjanatšetá, y chca, banga Jesucristbeñe ošbuáchiyënga cárceloye sënjanëtame; y jtsëbáyama ca chëngbiama montsanichamo ora, átšnaca aiñe chca chamoma ca sënjánichamo.

<sup>11</sup> Y ba soye, chë judiëngbe enefjuana yebnënguenache jabuache chënga sënjanatsetšená, chënga Jesucristo ústonana chamotsajbanama, y chëngaftaca tša etonaná sënjëtsemna causa, chë inye luarëngoca bëts pueblënguenáchnaca chënga sënjanëcamena.”

*Pablo tojanacuntá ntšamo cha Jesucristbeñe ošbuachiyá tojanóbema*

*(Hch 9.1-19; 22.6-16)*

<sup>12</sup> “Y cachcá jamama canye te Damascoye sënjétsaye; chë bachnangbe amëndayënga uabemanëchangá šmonjanëntšabuaché chca jamama y, cachënga choye šmonjanichmó.

<sup>13</sup> Pero, uámana rey, chë benachëjana mo nýetsto ora, sënjáninye canye bëts tcuinye celocana, shinýama corente más enjëtsebinýnaye, y atše y chë átšeftaca ajnëngbe shëconana corente enjëtsebuashinýinýana.

<sup>14</sup> Nýetscanga fsënjánshajaye y atše sënjanuena canye oye-buambnayana, hebreo biyañe, mëntsá šonjétsatsaye: ‘Saulo, Saulo, ¿ndáyeca chca šcojtsacmena ca? Cach aca bacá contsenabomá, atšbe entšanga chamosufrima tcojtsama ora, mo uacná ngmëche niñëfjiñe cha tojtsoscunjná orcá, cachá jenótsetšenana ca.’

<sup>15</sup> As atše sënjánayana: ‘¿Nda comna, Bëngbe Utabná ca?’ Y chë Utabná šonjanjuá: ‘Atše sëndmëna Jesús, y aca condama atšbe entšanga chamosufrima ca.

<sup>16</sup> Pero matëtsbaná y matëtsá. Atše cbonjébëbocna jinýinýiyama aca tchojuábuayanama atše šcochjaserviama, y chacotsetatšëmbuama y entšanga chacuacuntama, mora tconjinýe soyama y más chcoye atšbiama cbochanjinýinýiye soyëngámna.

<sup>17</sup> Atše chanjama judiënga y ndoñe judiënga tondaye chacmondëborlama; y morna, ndoñe judiëngbioye cbontsichamná,

<sup>18</sup> chënga atšbe soyëngama josértama aca chacomama. Chca, chënga bacna juabnënga ndoñe chamondëtsebmoma, mo ibetiñe cuaftsemnëngcá, sinó mo binýniñcá chamotsemna

átseftaca, atše chë entsangbe juabnënga binÿnayá. Satanabe cucuatšiñe ndoñe chamondëtsemnama, sinó Bëngbe Bëtsabe obenánaca chamotsiyenama; chënga átšbeñe chamotsošbuáchema, y chca, chëngbe bacna soyëngama perdonánënga chamotsemnama y chënga chamotsebomnama canÿe luare entsángaftaca, chë ndëmuanÿengbioye Bëngbe Bëtsá tšabe entsanga y chabe entsanga tojábiana, chënga átšbeñe betsošbuáchiyama ca' ” —cha šonjaniana.

*Pablo tojanma ntšamo chë mo otjenayoquécá tojaninÿcá*

<sup>19</sup> “Chcasna, bëts rey Agripa, atše sënjanma chë mo otjenayoquécá sënjáninÿe ora ntšamo Cristo šonjaniancá;

<sup>20</sup> y natsana, Damascoca entsanga chë tšabe noticiëngama sënjanabuayená; chentsana, Jerusaleñoquënga y nÿetsca chë Judea luaroquënga y ndoñe judiëngnaca; chënga sënjánaimpadana bacna soyënga amama ngmënaca chamuatenójuaboma, chca amana chamuajbaná y Bëngbe Bëtsabe benache chámuatishachama, y soyënga chamotsama jinÿinÿiyama chca ndegombre tmojanmama.

<sup>21</sup> Chca sënjánama causa, judiënga Bëngbe Bëtsabe bëts yebnoca šmonjanishache y tmonjánbošena atše jtsóbana.

<sup>22</sup> Pero Bëngbe Bëtsá sempre šonduájabuachana, y chca, cada te mëntscoñama, nÿetscanga Bëngbe Bëtsabiana sëndabuayiná, uámanëngbioye y nduámanëngbioynaca; nÿe ntšamo Moisés y Bëngbe Bëtsabe juabna oyebuambnayënga tmojanayancá, ntšamo yochjopásama atše sëndoyebuambná; inÿetšá ndoñe.

<sup>23</sup> Chënga tmonjánayana: ‘Bëngbe Bëtsabe Uámana Uabuayaná, Cristo jóbanama bontsemna; pero chaojóbanentsana, cha chë natsaná echántsemna obanënguentšana jtayenama, y cha judiëngbioye y ndoñe judiëngbioye echanjabuayená, y chca, chënga mochántsetatšëmbo nÿetscanga chábeñe tmojtsošbuáchenga atsebácanënga mochtsemnama ca.’ ”

*Pablo tojanma rey Agrípbioye jáyëñjanama, Jesucrístbeñe ošbuachiyá chaóbemama*

<sup>24</sup> Pablo, cachá jenëuyanama chë soyënga tojánayana ora, Festo mëntšá tojanáyebuachena: —¡Pablo, opá cojtsóbema! Yapa ualíaye causa, opá tcojtsóbema ca.

<sup>25</sup> Pero Pablo tbojanjuá: —Opá ndoñe quetsátmëna, bëts uámana Festo; inÿetšá entsemna; atše sëntsoyebuambná nÿets juábnaca, y ndegombre soyënga.

<sup>26</sup> Chentše rey Agripa entsuenana, y cha puerta tšabá chë soyëngama endétatšëmbo, chíyeca, tondayama ntjatauatjá, atše chabe delante sëntsoyebuambná; atše corente sëndétatšëmbo chánaca chë soyëngama yotatšëmbuama, er



ndayá Jesús tojanmcá, ndoñe tonjopasá ndaye iytēmena chaboye.

<sup>27</sup> Běts rey Agripa, ¿Běngbe Bětsabe juabna oyebuamb-nayēnga tmojánayana soyēnguiñe aca quecošbuaché? Atše sěntsetatsěmbo aĩne chiñe cošbuáchema ca —Pablo tbojaniyana.

<sup>28</sup> Chora Agripa tbojanjuá: —Batšatema más y mašcjayējaná Jesucristbe ustoná atše jóbemama ca.

<sup>29</sup> As Pablo tojánayana: —Nye batšatema más o bětscoma más, atše Běngbe Bětsá sěntseimpadana, ndoñe nye bēndatbe barie, sinó nyetscanga chē mora šmojtsuenanēnga, atšcá Cristbe ústonēnga chašmobiamama, pero utámenēnga ndoñe chamondětsemna, ntšamo mora atše sěntsemncá ca.

<sup>30</sup> Chorna, chē rey, chē mandado, Berenice y chē chěngaftaca imojantbiámanēnga tmojantsbaná,

<sup>31</sup> y luaroye tmojána chē soyama jencuéntama. Měntšá imojtsichamo: —Quem boyabása ndocna bacna soye tonjama jóbanama chabotsemnama, ni mo utamená jtsemnama ndoñe quebnátsmēna ca.

<sup>32</sup> Y Agripa Féstbioye tbojaniyana: —Chē Romoca běts mandado, quem chabe soyama cháuyanama cachá ndoñe matěnjábošeněse, bēnga matměnjobená quem boyabása jětsboshjonama ca.

## 27

### *Roma běts puebloye Pablo tmojanichmó*

<sup>1</sup> Italia ca uabaina luaroye Pablo jíchmuama tmojanenoye-uná ora, atše, quem librěša uabiamnayá, cháftaca sěnjána. Chora Pablo y chē inye utámenēnga Julio ca uabainabe cucu-atšĩne tmonjánabashejuana. Julio enjamna canya chē Romoca běts mandadbe soldadēnguentša mandayá.

<sup>2</sup> Asna, fsěnjánašēngo canye Adramitio puebloca barcuiñe; ya chē Asioca běts pueblēngoye juama enjětsamna. Cesarea pueblentšana fsěnjánbocna y Aristárcnaca bēngaftaca enjětsemna; cha enjamna Tesalónica běts pueblócá, Macedonia luaroca.

<sup>3</sup> Chē inye yěfsana, Sidón puebloye fsěnjánashjajna. Chentše Julio, tšabá mandbomná Pábloftaca enjětsemna; tbonjanles-enciá chabe amiguēngbioye chauabuáchama, chēnga chamof-jama y chamóbocuedama.

<sup>4</sup> Sidonocana fsěnjěftsambocnentšana, bēngbe contra corente enjětsebinyíaye. Chíyeca, Chipre fshantsēnga catšbioicajana, ndoñe yapa quentětsebinyíayějana bēnga fsěnjána.

<sup>5</sup> Cilicia y Panfilia luarënga béconana mar bejaycá fsënjánachnëngo, y Mira bëts puebloye fsënjánashjajna, Licia luaroca.

<sup>6</sup> Chë soldadëngbe amëndayá, canye Alejandría puebloca barco chentše tonjáninÿena, Italia luaroye yojétsaye; asna, šonjanamëndá chë barcuïñe jenójayiyana.

<sup>7</sup> Baseftaytentscuana uenana fsënjánana y pordonto fsënjanobená Gnido pueblentsa ndirichiñe jashjanguana. Cabá bëngbe contra enjëtsebinÿiaye causa, Salmón luarëjana fsënjánachnëjna, Creta fshantsënga béconana, ndoñe yapa quentëtsebinÿiayëjana.

<sup>8</sup> Y chca, pordonto bejaycá fsënjánana, fshantsënga béconana; chentsana, canye pueblo, Tšabe Puertënga ca uabáinentše fsënjánashjajna, Lasea ca uabaina pueblo béconana.

<sup>9</sup> Chca, bayté tonjanochnëngo y chora chë bejaycá jama puerta resjo enjëtsemna, er ya chë judiënga bayënga jobáyama te tonjanochnëngo, Bëngbe Bëtsá chëngbe bacna soyëngama cháuaperdonama, y chora chë uaftena tempo joshjanguama ya enjëtsobeco.

<sup>10</sup> Chíyeca Pablo chë entsanga mëntšá tonjanabuayená: “Baconga, atše šontsinÿana mora puerta resjo entsemna bejaycá játama, y ndoñe tšabá queochátsmëna, ni chë uasmanëshangama, ni chë barcuama y bëngbiama cach ndoñe, mo nderado muanjanóbana ca.”

<sup>11</sup> Pero chë soldadëngbe amëndayá Páblëbioye ndoñe ntjoyeunayana; más, chë barcuentsa mandayá y chë barco nduïñbioye aiñe.

<sup>12</sup> Ndoñe tšabá yonjamna, chë barco chora enjëtsemnentše chë uaftena tempëntscuana jëftsemnana; chë causa, nÿa mo nÿetscanga tmonjanenoyeuná cachiñe bejaycá chentsana játama, nderado cuanjobenaye Fenice puebloye jashjanguama y chentše jëftsemnama chë uaftena tempo tojopochocantscuana. Chë pueblo Creta luaroca enjamna; y choye jamashënguamna enjamna shinÿe endbetsenatjëmbambana juachoica tsjuanoicajana y tsmanoicajana.

*Mar béjayiñe puerta uaftena y binÿia tojanóshjango*

<sup>13</sup> Chentsana tonjanontšé tsmanoicana batšá binÿiayana, chíyeca chë entsanga tmonjanjuabó ya yojsanopodena jtëtóntšana jama ca. As, chentsana fsënjëftsanbocna y bejaycá fsënjána, Creta fshantsënga beconanëjana.

<sup>14</sup> Pero baseftayté chentsana, chë fshantsëngocana tonjanontšé corente jabuache binÿiayana y chë barquëshoye enjëtsoshjauana. Chë binÿia yojanabaina Nordeste binÿia ca.

15 Chë barcna nÿe chë bínÿiëbe ponto tonjanontsé uayana; chë binÿia enjétsobayëjana jama ndoñe quentétsopodena causa, šonjanotocá nÿe ntšamo tojtsebinÿiacá chašúyambama.

16 Chentsana fsënjánachnëjna Cauda ca uabaina stëtsoicajana, base fshantsënga mar béjayoca; chiñe ya ndoñe tša jabuache quentétsesebinÿiaye y pordonto fsënjánobená buyeshoicana jtabocnana chë barco enjanasjá canouše, ndoñe chaondëtsóndbemama.

17 Ya chë barquëshoye fsëntanëšëngo orna, chë entšanga lazëjangaca chë barquëshasha tmontsanabatsécaca, más uamorochëshasha chaotsamnana. Pero chënga monjétsauatja nderado chë barco chë Sirte ca uabaina cascajuentše nanjetsánjua; asna, chë barcuentsa ancla tmonjanashëbéútsena, chë barco ndoñe betscó chaondëtsábónjnana, y ntšamo enjetsanbinÿiaycá fsënjána.

18 Chë inÿe yëfsana y chë binÿiayana cabá jabuache enjétssemna causa, chënga tmonjanontsé chë barcuentsa uasmanëshangá jtsëshbuétsetsana;

19 y unga tianoye bëngnaca šonjanotocá, cach bëngbe cuuátšeca, chë barcuentsa soyënga buyeshoye jtsëtšanana.

20 Baytentscuana bënga ndoñe chibiatanobená jinÿana ni shinÿe, ni estrellatëmënga, tša tonjétsesebetata causa; y tša jabuache enjétsesebinÿiaye causa, bënga ya ndoñe quefštëtsanobatmana chentsana jótsbocana.

21 Ya bayté enjétssemna y chëntscuana tondaye saná ntjascá fsënjétssemna. Chentsana, Pablo bëngbe tsëntsaca tonjantsá y tonjánayana: “Baconga, tšabá manjamna atše mašmënjanoyeuná y Creta luarocana ndoñe matmënjëftsanbocna; chca mora ndoñe mal mamojtsepasá y ndoñe nÿa nÿetsá matmënjobuetše.

22 Pero mora ngmënaca ndoñe matsmëñëngana; masque chë barco echantsenatjëmba, tšëngaftanguentsá ndocná queochatóbana.

23 Ibeta canÿe ángel šonjébëbocna; Bëngbe Bëtsá, ndabia atše sëndmëna y nda sëndëserveda, cha tbojichmó;

24 y chë ángel mëntsá šonjauyana: ‘Pablo, ndoñe matauatjana; entseyta aca chë Romoca bëts mandádbioye chacotsama, y aca Bëngbe Bëtsábia cómnayeca, nÿetsca quem barcuñe ajnënga jobanámentsana cha echanjatsebacá ca.’

25 Chcasna, baconga, ndoñe matauatjëngana, er atše Bëngbe Bëtsábeñe corente sëntsošbuaché y lempe ntšamo chë ángel šonjauyancá echanjóbocna.

26 Pero mora entseyta canÿe fshantse mar béjayiñe chašúshejanguama ca” —cha tonjanëyana.

27 Canÿe ibeta, uta semana fsënjánana chentšana chë Adriático ca uabaina mar bėjayiñe fsënjëtsemna, y nÿe ínÿoye y ínÿoye chë binÿia šonjëtšëyambaye. Y mo tsëntseto yojëtsemna orna, chë barcuentsa trabájayënga tmojanjuabó ya fshantse béconana imojëtsemna ca.

28 As chënga tmonjanmedidá ntsachetšá chë búyeshe buatjoye inamnama y tonjanóbocna unga bnëtsana y chnënguana metro; más chcoye cachiñe tmonjanmedidá y uta bnëtsana canÿsëfta metro tonjanóbocna.

29 Chënga monjëtšauatja nderado bëts ndëtšbéngaca nanjëtšántšëtjama; asna, chë barco stëtšoiçajana canta ancla buyeshoye tmonjanashëbëútšena, chë barco ndoñe más chaondëtšábonjnama, y tša monjëtseboše betscó chaobínÿnama.

30 Chëntscuana, chë barcuentsa trabájayënga tmojánbošena chentšana jtsachetana; chamna, chënga tmojanontšé chë canouše buyeshoye justjanguana, pero chca imojëtšama, mo chë anclënga chë barco natsanoica cuaftšëstjajuancá.

31 Pero Pablo chë soye tojáninÿe, y chë soldadëngbe amëndayábioye y chë soldadëngbioye tonjanëná y mëntšá tonjanëyana: “Chë barcuentsa trabájayënga cach quem barcuentsë ndoñe chamonjoquedase, tšëngaftanga ndoñe quešmochatobenaye muentšana jótsbocama ca.”

32 As, chë soldadënga tmonjána y chë canoušentša lazëjënga tmontsantëtsetše y buyeshoye chëse tmontsantsatše.

33 Enjëtsebinÿana ora, Pablo nÿetscanga tonjanaimpadá ndayánaca chamosëngama, mëntšá jáuyanëse: “Ya uta semana entsemna y tšëngaftanga ni mo batšatema chešmatamaná, y tondaye chešmatsbmuananga.

34 Diosmanda, masque nÿe mo batšatémnaca šmochjase. Chca cmontsamna jamana ndoñe chašmondóbanama, er ndocná ndocá queochatšpása ca.”

35 Pablo, chca tonjánayanentšana, canÿe tandëse tonjanca y nÿetscangbe delante Bëngbe Bëtsábioye tbontanchuá. Chorna, tonjanjatá y tonjanontšé jasama.

36 Chentšana nÿetscanga tmonjanenñemó y chëngnaca tmonjanse.

37 (Chë barcuentsë nÿetscanga fsënjamna uta patse y canÿsëfta bnëtsana y chnënguanënga.)

38 Ntšamo inmabošcá tmonjansentšana, buyeshoye trigo tmontsanashaná, chca, chë barco ndoñe yapa chaondëtšautama.

### *Chë barco tojtsanenatjëmba*

39 Ya tonjanbinÿna ora, chë barcuentsa trabájayënga ndoñe quemëntëtsetatšëmbo ndaye fshantse chentše bëtsemnama, pero tmonjáninÿe chë fshantsentše canÿe luare jachañe, chë

béjaye chë luaroye omashjuanentše, y chiñe canye chënñañe enjamna; as chënga tmonjanjuabó jarrepáрана nderado cuanjobenaye chëjana chë barco chë fshantsoye juyambana.

<sup>40</sup> Asna, chë anclentša lazëjënga tmontsantëtsetše y chë anclënga buyeshoye tmontsanboshjuana, y chë timón, chë barco juyambama oservena soyentša uabatsëcnëjëngnaca tmontsanjafjoná. Chorna, chë barcuentsa natsanoica niñësiñe entsëjua tsbanánoye tmontanëšëngo, y chë binÿia tonjanma chë barco chaontšë chë chënÿoye juabëconama.

<sup>41</sup> Pero chë barco canye luaroye tonjánashjango, y chentše chë béjaye catatoicajana enjetsobuá y chë barco cánÿentše, bëtscá casco buyeshiñe binÿnentše tontsanajo. Chë barcuentsa natsanoica lado chë cascajuiñe entsanajuena, ndócnoye juabónjuama ntsopodencá, y chë stëtsoica lado puerte entsanashatiyina y lempe entsanandbiamná, yapa binÿia causa y búyeshe chentše enjëtsojantšetaye causa.

<sup>42</sup> Chora, chë soldadënga tmonjanjuabó chë utámenënga jtsëbáyana, jachbabëse chënga ndoñe chamondëtsachetama.

<sup>43</sup> Pero chë soldadëngbe amëndayá inaboše Pablo jatsbocama, y chiyecca chë soldadëngbiyoye ndoñe chenatanalesencia chca jamana; y tojanmandá nyetscanga chë jachbabama obenëngna natsana chë buyeshoye joshbuetšana tsachoye chamuashjanguama,

<sup>44</sup> y chë inÿengna tablëshënguiñe o chë barcuentsa pedazënguiñe chamoshbuetšama. Y chca, nyetscanga fsëñjanobená tsabá y ndocá ntjapasacá fshantsoye jashjanguama.

## 28

### *Pablo Malta luaroca*

<sup>1</sup> Ya nyetscanga fshantsoca tsabá fsëñjëtsemna ora; fsëñjántatšëmbona chë luare Malta ca yojanabaina.

<sup>2</sup> Chë luarentša entsanga bëngaftaca corente tsabá mándbomnënga monjëtsemna; canye inëshe tmonjanangbotjó y šonjanëbuaja choca bënga jatóšboniyama, er tša enjëtsoftena y yapa enjëtsetšëna.

<sup>3</sup> Pablo tojanatbaná básefta buashana chamesëfjënga y chë inëshoye enjëtsetšacjnaye ora, canye mëtscuaye tojánbocna y enjetsachaye, chentše yapa obonÿaye causa, y Páblëbe cucuatšë tontsanojonÿá.

<sup>4</sup> Chë luarentša entsanga, chë mëtscuaye Páblëbe cucuatšënoyotsajonÿanama tmonjáninÿe ora, monjëtsetšacjnaye: “Quem boyabása ndegombre inÿa obanayá cuanmëna; mar béjayoca jobanámentšana tojotsbocá, pero chca uamana

causa, diosá Justicia ndoñe quebnatsleséncia cha vida chaotsebomnama ca.”

<sup>5</sup> Pero Pablo tontsanenacuestëtoná y íñeshoye chë mëtšcuaye tbontsantsatše y Pablo ndocá chenatanpasá.

<sup>6</sup> Chë entsanga imojëtsejuabnaye chábioye bochtsacuefshachá y nÿe ndeolpe obaná yochjashajaye ca. Pero bën tonjanochnëngo y ndocá chenátanopasama chënga tmonjáninÿe ora, ya ndoñe cachcá quemëntétsanjuabnaye y tmonjanontsé ichámuana Pablo canÿe dios inamna ca.

<sup>7</sup> Chentša béconana inamna chë luarentša mandayabe fshantsënga. Cha šonjanëbuaja y corente tšabá šonjanacuedá, unga tentscuana. Chë taitana Publio ca inauabaina.

<sup>8</sup> Chë tempo, Públiëbe taitá šocá jutsnëshañe inajájona, calentóracá y buíñeca buamachnëjuanánaca. Pablo tonjána cha jinÿama y tonjánamashëngo; Bëngbe Bëtsábioye tbonjanimpadá y chë šocábeñe chabe cucuatšënga tonjanajó, y chca, cha shnaná enjétsatsmëna.

<sup>9</sup> Chca tonjanopasá chentšana, chë luarentša inÿe šoquënga Páblëbioye monjánajna y cha enjánashnaye.

<sup>10</sup> Bëtscá tšabe soyënga chentše bëngbiana tmonjanma, y cachiñe játama ya chë barcuiñe fsëntanenojayenga orna, lempe ntšamo bejaycá jama šonjanëjabotcá chënga šonjanatšatá.

### *Pablo Romoye tojánashjango*

<sup>11</sup> Chë fshantsentše mar béjayoca unga ishinÿe fsënjëftsemna, y chentšana canÿe Alejandriocana yojanabá barcuiñe fsënjanenojayé; chë barco nÿets uaftena tempo chë luarentše yojëftsamna y enjanabaina Cástor y Pólux ca, mo chë romanëngbe uta diosata catšatcá.

<sup>12</sup> Chentšana, Siracusa bëts puebloye fsënjánashjajna y chentše unga te fsënjëftsemna;

<sup>13</sup> y chentšana fshantse béconana bejaycá fsënjána, Regio puebloye jashjanguëntscuana. Yëfsana, tsmanoicana tsjuanoye enjëtsebinÿiaye, y chca, chë inÿe yëfsana Puteoli puebloye fsënjánashjajna.

<sup>14</sup> Chentše básefta Jesucristbeñe ošbuáchiyënga fsënjánanÿena, y šonjanëbuaja chëngaftaca canÿe semana chentše jëftsajëtanama; y chentšana Romoye fsënjëftsanbocna.

<sup>15</sup> Romoca Jesucristbeñe ošbuáchiyënga ya imojëtsetatšëmbo bënga choye fchjanashjajnama; chcasna, chënga tmonjánbocna bënga jajëbenguama canÿe luare Foro del Apio y Unga Tabernënga ca uabainóntscoñe. Pablo chënga tonjánanÿe ora, Bëngbe Bëtsá tbontanchuá y puerta añémoca enjëtsemna.

16 Romoye fsënjánashjajna ora, soldadëngbe amëndayá Páblëbioye tbonjalesenciá cánÿabe yebnentše chaotsiyenama, y tonjanmandá canÿe soldado chabotsebojanÿama.

*Ndayá Pablo Romoca tojanma*

17 Choye fsënjánashjajnentšana unga tianoye, Pablo tonjanmandá chentše imnoyena judiënga más uámanënga chamobéconama; y nÿetscanga ya tmojánenefjna ora, cha tojanëyana: —Catsátanga judiënga, masque atše tondaye chiyatsma bënga judiënga mondbétsama soyëngama contra, ni bëngbe bëts taitanga imojanamana soyëngama contra, judiënga Jerusalemoca šmonjanishache y romanëngbe cucuatšifne šmonjánboshjona.

18 Chë romanënga lempe šmonjantjá chentšana, monjéteboše atše jëtsboshjonana, er ndocna bacna soye chemátaninÿena atše jóbanama chašotsemnana.

19 Pero chë judiënga ndoñe quemtétseboše atše chašmuatsboshjonama; chíyeca, šonjanotocá jáimpadana cach Romoca bëts uámana mandado cháuyana atše tšabá o ndoñe tijanmama, masque atše tondaye quetsátsbomna, cach atšbe luarentša entšanga, judiëngbe contra jayanama.

20 Chíyeca, atše tcbonjúbuaja jáñÿama y jáuyanama, er ndayama chë Israeloca entšanga puerte jtsošbuáchiyëse mondobátmanama, chë obanënga mochtayenama, atše mora utamená sëntsemna ca —tojanëyana.

21 Chora chënga tmojanियana: —Bënga ni mo canÿe tsbuanácha Judeocana fchiyatáyëngaca acbiama noticiëngaca, y ni canÿe catšata judío, chocana moye ashjajnënguentšá, ndocna bacna soye acbiama chešnatacuntá.

22 Bënga fsëntseboše jouenana ntšamo aca cojuabnama, er ntšamo Jesucristbe ustonëngbiama fstšétatšëmbcá, entsemna ana nÿets luarenache chëngbe contra entšanga imojtsichamo ca.

23 Asna, canÿe tescama Pablo tmojanियana chca chaotsemnana; y chë tena, ba entšanga chë Pablo posada inabomnoye tmojanobeconá. Y cachëscana tojanjétanëntscuana, Pablo entšanga yojanëtsëtsná Bëngbe Bëtsabe amëndayama, ndayama cha ininÿe y inatátšëmbo; y yojtsentšena chënga jáyënjanama Jesúsbeñe chamotsošbuáchema, Moisesbe leyënguentša soyëngaca y Bëngbe Bëtsabe juabna oyebuambnayëngbe uabemana librëšangañe soyëngaca.

24 Báseftanga aíñe imojtsošbuáchiye ntšamo Pablo yojtsanëtsëtsnacá ndegombre bëtsemnana, pero ínÿengna ndoñe.

25 Nÿetscanga ndoñe cachcá montsanjuabnaye causa, tmojanontšé chentšana jësebocanana. As Pablo tojanëyana:

“Nÿets razónaca chë Uámána Espíritu tšëngaftangbe taitanga tojanëyana, Bëngbe Bëtsabe juabna oyebuambnayá Isaíasbiajana, mëntšá:

<sup>26</sup> Motsa chë entšanga jauyanama:

‘Bëtsá śmochantsuenana, pero tondaye quecmochátësertana; tša śmochantsafšna, pero tondaye quešmochátinÿe.

<sup>27</sup> Muentša entšanga ainánaca josértama ndoñe quemátsboše causa,

chënga nduauenanënga montsemna y nduabinÿnëngnaca;

chënga bomínÿeca ndoñe chamondobená jinÿama,

ni chëngbe matscuašeca jouenama,

ni chëngbe ainánaca josértama ndoñe chamondobená,

chca, atšbe benache ndoñe chamondishachama,

atše ndoñe ntjátsebacama ca.’ ”

<sup>28</sup> Pablo chora mëntšá tojanëyana: “Ndegombre śmochtsetátšëmbo, cach quem Bëngbe Bëtsabe buayenana soyënga entšanga bacna soyënguentsana játsebacama, chë ndoñe judiëngbioye mochanjábuayenaye, y ndegombre chënga cocayé aínne mochanjóyeunaye ca.”

<sup>29</sup> (Pablo chca tojánayana ora, chë judiënga chentšana imojésebocana y tša imojtsenatsëtsnaye.)

<sup>30</sup> Pablo uta uata chentše tonjanoquedá canÿe uántšamena yebnentše; y nÿetscanga cha jauatsëtsayama monjánajnënga cha enjanëbuájajana.

<sup>31</sup> Nÿetscangbe delante puerte añémoca entšanga enjanabuayiyná Bëngbe Bëtsabe amëndayama, y enjanabuatambá soyënga Bëngbe Utabná Jesucristbiamana, y ndocna Romoca mandayá quebënjatanauyá chca jtsamama.



## Romanos

### *Pablo Romoca ošbuáchiyënga jacheuayama*

<sup>1</sup> Atše Pablo, Jesucristbe oservená, quem tsbuanácha sentsabiamná. Bëngbe Bëtsá šonjanchembo Jesucristbe ichmoná jtsemnama, y šonjanbocacá chabe tšabe noticiëngama entšanga chayábuayenama.

<sup>2</sup> Ya bayté entsemna, Bëngbe Bëtsá chabe juabna oyebuambnayëngaftaca chë tšabe noticiënga entšanga tojanašebuachená, y chënga chca tmojëtsanábema Bëngbe Bëtsabe uabemana palabrënguiñe.

<sup>3-4</sup> Chë tšabe noticiëngna, chabe Uaquiñá Bëngbe Utabná Jesucristbiamna jtsóyebuambnayana. Entšá quetsomñecana, tojanonýná canýe rey Davídbentša entšábentšana; pero chabe espíritu sempre uamanáyecna, Bëngbe Bëtsá chabe obenánaca entšanga tojaninýanyé Jesucristo chabe Uaquiñá bétsemnama. Cha chca tojaninýanyé chë Uaquiñá cháuatayenama cha tojanma ora.

<sup>5</sup> Chábeyeca, Bëngbe Bëtsá atše canýe bëts soyama šojanábuayana, Jesucristbe ichmoná jtsemnama, chabe soyëngama entšanga jábuayenama, y nýets luarënguenache Jesucristbeñe ošbuáchiyënga chamotsemnama, y chca, ntšamo cha yomandacá chënga chamotseyeunanama.

<sup>6-7</sup> Tšëngaftángnaca chëngbeñe šmontsemna, tšëngaftanga chë Romoca šmoyenënga, ndëmuanyënga Bëngbe Bëtsá tcmojáchembo Jesucristbenga chašmotsemnama. Atše tšëngaftangbiamna sentsabiamná, tšëngaftanga Bëngbe Bëtsabe bonshánënga y chabe entšanga chašmotsemnama chëmbonënga. Atše sentsaimpadana Bëngbe Bëtsá Bëngbe Taitá y Bëngbe Utabná Jesucristo, chaboma tšëngaftangbeñe tšabe bendicionënga chaotsemnama, y chaboma tšëngaftanga ainaniñe tšabe ebionana chašmotsebomnama.

### *Pablo tša inaboše Roma bëts puebloye jama*

<sup>8</sup> Jabojátšamna, Bëngbe Bëtsá, Jesucristbiajana šcuatschuá, cada ona tšëngaftanguentsabiamna, er nýets quem luariñe entšanga tša monjesoyebuambná tšëngaftanga Jesucristbeñe bëtscá šmojtsošbuáchema.

<sup>9</sup> Bëngbe Bëtsá, nda nýets ainánaca sëndëservena, tšabe noticiënga chabe Uaquiñabiamna abuayiynayiñe, endétatšëmbo atše nýets tempo Bëngbe Bëtsáftaca stsencuénta ora, tšëngaftangbiamna sëndétseimpadanama;

<sup>10</sup> y mora Bëngbe Bëtsá sëntseimpadana, nýa mora y cha tojtsebošëse, chašolesenciá jama tšëngaftanga jautsëtsayama.

11 Er atše tša sējnéseboše tšēngaftanga jányama, chca, atše chayobená jamama chē Uámana Espíritbentsana yóbocana tšabe soyēnga tšēngaftanga chašmotsebomnama; y chca, tšēngaftanga ainaniñe bēts añemo chašmotsebomnama, y Jesucristbeñe corente chašmotsošbuáchema;

12 o más tšabá jayanamna, tšēngaftanga y átšeftaca mochjenájabuache ainaniñe bēts añemo jtsebomnama, tšēngaftanga y átšnaca Jesucristbeñe tša imošbuachéyeca.

13 Y morna, Jesucristbeyeca catšátanga, sēntseboše tšēngaftanga chašmotsetátšēmo atše ba soye jama tijájuaboma, tšēngaftanga jautsētsayama, pero mēntscoñama ndoñe tsjobenaye. Atše sēntseboše ndayá chayobená jamana ínŷenga tšēngaftangbioca Jesucristbeñe chamotsošbuáchema, ntšamo ínŷengbeñe ndoñe judiēngbeñe tonjopasacá.

14 Atše Jesucristbiana canŷe oservená sēndmēna, y chíyeca nŷetscángaftaca obligaciōnaca sēntsemna, chē pueblēnguiñe oyenēngaftaca y bēn tjoye oyenēngaftaca, chē uatsjinŷenēngaftaca y ndoñe chcangaftácnaca.

15 Chíyeca atše tša sēntseboše tšēngaftanga chē Romoca šmoyenēngnaca chē tšabe noticiēnga jábuayenama.

*Chē tšabe noticiēnga Bēngbe Bētsabe obenana jtsinŷanŷayana*

16 Atše ndoñe quetsátēuatja chē tšabe noticiēnga jtsabuayiyayama, er chē noticiēnga jtsinŷanŷayana Bēngbe Bētsabe obenana; y chē obenánaca, nŷetscanga Jesucristbeñe ošbuáchiyēnga jtsobenana atsebácanēnga jtsemnama, natsana chē judiēnga chca ošbuáchiyēnga, pero chē ndoñe judiēngnaca.

17 Er chē tšabe noticiēnga jtsinŷanŷayana ntšamo Bēngbe Bētsá inétsama entšanga chabe bominiñe tšábenga chamotsemnama. Y entšanga chabe bominiñe tšábenga jábiamana, chēnga Jesucristbeñe tmojtsošbuáchema. Ntšamo Bēngbe Bētsabe uabemana palabrēnguiñe endayancá: “Nŷe ndabiama Bēngbe Bētsá tojama chabe bominiñe tšabia chaotsemnama, cha Bēngbe Bētsábeñe betsošbuáchema, cha ndegombre chē nŷetsca tescama yomna tšabe vida echántsebmna ca.”

*Bēngbe Bētsabe delante nŷetscanga culpa bomnēnga mondmēna*

18 Bēngbe Bētsá celocana tojinŷanŷé, chē uabouana castigo, tša tbojetnama entšangbiana chaotsemnama, ainaniñe bacna juabnēnga bomnēngbiana y chē bacna soyēnga amēngbiana y ndēmuanŷengbiana, masque Bēngbe Bētsabe ndegombre soyēnga jtsotatšēmbñana, tša bacna soyēnga tmojtsama causa, ndoñe ntjaleséciana cachēnga jtsiyenama ntšamo ndegombre yomncá.

19 Bēngbe Bētsá echanjácastigaye, er ntšamo entšanga imobencá Bēngbe Bētsabiama jtsetatšēmbuama soye,

chëngaftaca sempre endétsemna. Y chca endmëna, Bëngbe Bëtsá chë soye tojinÿanyëyeca.

<sup>20</sup> Bëngbe Bëtsá quem luare tojanma orscana, entsanga mondetsobena botamana josértana, Bëngbe Bëtsabe obenana ndocna te yochjëftsopochócama y cha ndegombre Bëngbe Bëtsá yomnama. Chë soyënga Bëngbe Bëtsabiama entsanga quemátobena jinÿana; nÿe jtsetatšëmbuamna aíñe. Entsanga mondobena chë soyënga Bëngbe Bëtsabiama jtsetatšëmbuana, cachá tojanma soyëngaca. Chcasna, chënga ndoñe quemátobena jayanana bacna soye tmojama, cha nduabuatma causa ca.

<sup>21</sup> Chënga Bëngbe Bëtsabiama mondétatšëmbo, pero ndoñe ntsebošana chábioye jadórana, “aca ndegombre Bëngbe Bëtsá condmëna ca” jtsichámëse, ni cha ntsatschuanayana. Pero, ntšamo chënga tmojtsejuabnacá tondaye ntsámanana; ndoservenena juabnéngaca y bacna juabnéngaca montsiyena, y chca, chënga montsiyena, jtsamëse ntšamo cachëngbe juabnénga yomncá, mo ibetiñe cuaftsajncá.

<sup>22</sup> Chënga jtsichámuana corente osertánënga imomna ca, pero ndegombrna juabna ndbomnénga mondmëna.

<sup>23</sup> Chënga ndoñe ntsadoránana Bëngbe Bëtsá, chë ndocna te yochjëftsobaná; chë cuenta, soyënga tmojobopormá mo entsangcá, y chëngna aíñe jóbanana; o soyënga shloftšëngcá o bayëngcá, o osjojnayëngcá, y chënga diosënga imomna ca jtsejuabnayëse jtsadoránana.

<sup>24</sup> Chíyeca, Bëngbe Bëtsá cachcá tojónÿa, cachëngbe ainaniñe puerte bacna juabnéngaca mandánënga chamotsiyenama, y chca, bacna soyëngnaca ínÿengaftaca imojtsama; chë soyëngamna jtsëuatjana chënga entsamna.

<sup>25</sup> Chënga chca jtsemnana, er ndoñe tmonjábošena Bëngbe Bëtsabe ndegombre soyënguiñe jtsošbuáchiyana, pero chë ndoñe ndegombre soyënguiñe cocayé jtsošbuáchiyana; chënga jtsadoránana y jtseeservénana, Bëngbe Bëtsá quem luarentše tojama soyënga; pero ndoñe ntsadoránana, ni ntseservénana cach Bëngbe Bëtsá, chë nÿetsca chë soyënga tojanmá. Entsanga nÿets tempo cha chamotsatschuaná. Chca chaotsemna.

<sup>26</sup> Entsanga chca ndoñe tšabá tmonjámayeca, Bëngbe Bëtsá cachcá tojónÿa, chënga ínÿengaftaca bacna soyënga jtsamama chamotsebošama; chë soyëngamna jtsëuatjana chënga entsamna. Y chca, chë shembásengnaca tmojtsajbaná boyabásengaftaca jtsamana ntšamo tšabá yomncá, inÿe shembásengaftaca bacna soyënga jtsamama.

<sup>27</sup> Cachcá, boyabásenga tmojtsajbaná shembásengaftaca jtsamana ntšamo tšabá yomncá; y tša imojtseboše inÿe boyabásengaftaca bacna soyënga jtsamama. Chënga chë inÿe boyabásengaftaca bacna soyënga imojtsama causa, entsamna

jtsëuatjana, y chë soyëngama castigánënga mochántsemna, cachëngbe cuerpënguiñe jasúfriase, ntšamo chëngbe bacna soyëngama yojtsëmerecencá.

<sup>28</sup> Chënga ndoñe tmonjábošena jtsiyenana jtsejuabnayëse, ntšamo entšanga Bëngbe Bëtsabiana imotatsëmbcá ndegombre bétsemnama. Chíyeca Bëngbe Bëtsá cachcá tojónya, cachëngbe ndbémana juábnaca chamotsiyenama; y chca, chënga ba soyënga jtsamana, jamama ndoñe yontsamncá.

<sup>29</sup> Chënga nyetscna bacna soye jtsamana: ainaniñe nyetscna bacna juabna jtsebmomna, nye cachëngbiana bëtscá soyënga jtsebmomna tša jésebošana, y ínÿengbioye ntšámnaca jáborlama jtsebošana; chënga nye játsbošana ínÿa tojtsebmomna soyënga jtsebmomna, ínÿenga jtsébánayana. Mondmëna penzentserënga, ínÿenga áingñayënga, puerte bacna soyënga ínÿengbiana bošënga, y uayátsenayënga.

<sup>30</sup> Chënga ínÿengbiana podescna jtsóyebuambnayana, Bëngbe Bëtsá jtsáyayana, ínÿenga jtsóyanguayana, nye cachëngbe soyënga más iuámana ca jésejuabnayana, tša jtsenábotamnayana, jésejuabnayana ntšamo muanjobenaye más bacna soyënga jamana; chëngbe bëtsetsangbioye ndoñe ntsayaunanana.

<sup>31</sup> Chënga ndoñe ntsebošana chë tšabe soyëngama chaósertama, tondayama palabra ndbomnënga, ndocnábioye ntsebomshánana y ndocnabiana ntjóngmiana.

<sup>32</sup> Y chënga corente mondëtatšëmbo chca soyënga amëngbiana, Bëngbe Bëtsá chabe leyiñe tojayana jóbanama yojtsëmerecena ca; pero masque chca, chënga nyets tempo chca jtsamana, y oyejuayënga jtsénÿayana ínÿenga cachcá tmojtsama ora.

## 2

*Bëngbe Bëtsá echanjama chë ndoñe tšabe soye amënga bëtscá castigo chamotsebmomna*

<sup>1</sup> Chcasna tsëngaftanga, chë ínÿenga ndoñe tšabá montsama ca šmojtsichámënga, ndoñe quešmatobena jayanana ndáyeca chca cach tsëngaftanga šmojama soyëngama. Tsëngaftanga chca ínÿengbiana šmojtsichamo ora, jtsinÿanÿnayana cach tsëngaftángnaca ndoñe tšabá šmonjamama, y castigánënga jtsemnama cmontsamna, er tsëngaftanga cachëngcá šmojtsiyena.

<sup>2</sup> Bënga mondëtatšëmbo, Bëngbe Bëtsá ntšamo ndegombre yomncá inétsamama, chë chca amëngbiana ndoñe tšabá tmonjama ca y castigánënga jtsemnama yojtsamna ca cha tojayana ora.

<sup>3</sup> Y tsëngaftanga, chë ínÿenga ndoñe tšabá montsama ca šmojtsichámënga, y cachca soyënga šmojtsama,

¿šmojatsjuabná Bëngbe Bëtsabe castigüentšana šmochjotsbocá ca?

<sup>4</sup> Bëngbe Bëtsá tšëngaftangbiamá corente tšabe juabna end-bomna; mora ndoñe quecmátacastigaye, y tšëngaftangaftacna puerte uantado nÿe chca endétsemna. ¿Chama tšëngaftanga cha šmojtsábotena? ¿Ndoñe šmondétatšëmbo Bëngbe Bëtsá chca corente jtsababuánÿeshanëse cmojtsënÿa, tšëngaftanga juabna chašmotrocama y chabe benache chašmuishachama cha yobóšeyeca?

<sup>5</sup> Er tšëngaftanga ndoñe quešmátsboše chacmotsësertánama, y bacna soyënga amama jtsajbanama ndoñe quešmátsboše causa, šmontsama más bëts castigo chašmotsebomnama, chë ndayté Bëngbe Bëtsá ntšamo entšanga tmojamcá tšabá o ndoñe tšabá bétsemnama yochjayana ora; chë te, Bëngbe Bëtsá echanjamánda chë ndoñe tšabe soye amënga bëts castigo chamotsebomnama, y chë tšabe soye amëngna, uacanana soye; y chca echanjama ntšamo ndegombre yomncá, y echanjínÿanÿiye cha tša tbojetna, entšanga ndoñe tšabá tmonjamama.

<sup>6</sup> Chca, chë te, ntšamo cada ona tojëftsemama, Bëngbe Bëtsábentšana echanjóyëngacñe.

<sup>7</sup> Ndëmuanyënga nÿets tempo tšabá jtsamëse imoyena, y chca imonguá Bëngbe Bëtsá más uámanënga chauabiamá, cha chëngbiamá tšabá chaotsoyebuambná y tšabe vida jtsebomnama chaoma; chë te chëngbiamá Bëngbe Bëtsá echanjama, chë nÿetsca tescama yomna tšabe vida chamotsebomnama.

<sup>8</sup> Inÿënga imoyena, nÿe cachëngbe juabnëngaca cachënga tšabá jtsomñama; y ntšamo ndegombre tšabá yomncá tmojtsaboté, ntšamo ndoñe tšabá yomncá jtsamama. Y Bëngbe Bëtsá chë te, ndoñe tšabá tmonjëftsobuachjanguamna puerte etonaná echanjayana nÿetsca tescama castigánënga jtsemnana chënga yojtsamna ca.

<sup>9</sup> Bëngbe Bëtsá echanjama, chca amëngna puerte chamosufrima y lastemcá chëngbiamá chaotsemnana, er yapa tsetšënana chëngbiamá echanjëftsemna; chca echántsemna chë chcángbeñe judiënga imomnëngbiamá natsana, y ndoñe judiëngbiámnaca.

<sup>10</sup> Pero chë te, Bëngbe Bëtsá echanjama, ntšamo tšabá yomncá amëngna puerte uámanënga chamotsemnana, chëngbiamá corente tšabá echanjóyëbubayé, y echanjama chënga cháftaca tšabá tempcá chamotsatsmënana; y chca echántsemna chë chcángbeñe judiënga imomnëngbiamá natsana, pero ndoñe judiëngbiámnaca.

<sup>11</sup> Er Bëngbe Bëtsabiamá nÿetscanga cachcá monduámána.

<sup>12</sup> Chë Moisesbe ley ndoñe monduábomnënga, bacna

soye tmojamamna castigo mochántsebmna, masque leyënga ndoñe tmonduábomñese, ndayá yojsamna jamama chaúyanama; y chë Moisesbe leyënga imuabomñengbiamna, bacna soye tmojamama, Bëngbe Bëtsá echanjayana chënga ndoñe tšabá tmonjama ca y castigo chamotsebmna ca, chë leyënguiñe iuayana soyëngaca.

13 Chca endmëna, er Bëngbe Bëtsá ndoñe queonÿbatsma entšanga chabe bominÿiñe tšábenga chamotsemnana, nÿe ntšamo chë leyiñe iuayancá tmojsuenanama, sinó ntšamo leyënguiñe iuayancá, ndayá jamama yojsamncá tmojsamëse.

14 Chë ndoñe judiënga chca leyënga ndoñe quematábomna, pero chëngbe ainanentša juabnënga tojtsëtsësná ndayánaca jamana, y ndayá chamotsamama ntšamo chë leyënguiñe tomandancá chënga tmojamëse, chënga jtsinÿanÿnayana tšabá imotátšëmbo ndayá aiñe o ndoñe inétsamna jamama, masque leyënga ndoñe tmonduábomñese, ndayá yojsamna jamama chaúyanama.

15 Ntšamo tmojsiyencá chënga jtsinÿanÿnayana, ndayá leyiñe yomandánama chënga ainaniñe cachcá imojuabnama. Ntšamo chënga ainaniñe imotátšëmbo y imojuabnacá ndayá cachënga tmojamama, jtsinÿanÿnayana chënga ntšamo chë leyiñe yomandánama cachcá imojuabnama. Inÿe ora, chëngbe juabnënga echantsëtsësnaye aiñe o ndoñe tšabá tmonjama ca; y ndayté, Bëngbe Bëtsá nÿetscangbiama ntšamo tmojamama yochjayana ora, cachëngbe ainaniñe tmojajuabó soyëngaca, cha echanjínÿanÿiye ndayá tšabá o ndoñe tšabá tmonjamama.

16 Chë te, Bëngbe Bëtsá nÿetscangbiama echanjayana chëngbe juabnëngama y ntšamo tmojamama, ndayá entšanga tempo ndoñe tmonjáninÿama; cha chca echanjama Jesucrísoftaca; y chë atše sëndabuayiyiná tšabe noticiënga entsichamo ndegombre chca yochtsemnana.

### *Judiënga y Moisesbe ley*

17 Y mora tšëngaftangbiama, chë judiënga šmomna ca ichámënga, y tša šmojtsejuabná Moisesbe léyeca tšëngaftanga tšabe vida jtsebmnama, y jtsenábotamnayana Bëngbe Bëtsabe ubuáyana entšanga šmomna ca;

18 tšëngaftanga chë ntšamo Bëngbe Bëtsá yobošcá tšëngaftanga chašmotsamama tatšëmbënga, y chë leyentšana šmojuatsjinÿe jobocacayana ndayá más tšabá jamama tojtsemncá.

19 Tšëngaftanga tša jësejuabnayana, šmobena ínÿenga chë ntšamo tšëngaftanga cmësertancá ndosertánënga jujabuáchama ca, mo jtanënga unachayënga cuaftsemnëngcá, o mo chë ndoñe binÿniñcá oyenëngbe juabnënga binÿnayëngcá;

20 tšëngaftanga jtsejuabnayana chë ntšamo tšabá yomncá ndosertánëngbiana abuayiynayënga šmomna ca, y mo chë basengcá tondaye nduatsjínÿenëngbiana abuátambayënga ca. Tšëngaftanga tša jésejuabnayana chë ley šmobomnama, lempe šmotátšëmbo ca y ntšamo šmojtsichamcá ndegombre yojtsemna ca.

21 Y chcasna, tšëngaftanga chë ínÿenga abuátambayënga, ¿ndáyeca ndoñe cach tšëngaftanga šmondëtsánatsana? Tšëngaftanga ínÿengbioye jtsabuayiynayana ndoñe chamondëtsatbëbanama; as, ¿ndáyeca cach tšëngaftanga šmnëtsatbëbana?

22 Tšëngaftanga jtsichámuana, acbe shema o boyábioye ndoñe ínÿaftaca cattseíngñaye ca; as, ¿ndáyeca tšëngaftanga cachcá šmnëtsama? Tšëngaftanga jtsáboyënjana soyënga chë ndayama ínÿenga tmojtsichamo diosënga yomna ca y jtsadórayana; as, ¿ndáyeca chë soyënga chënga jadórama yebnënguentsana uámana soyënga šmnëtsatbëbana?

23 Tšëngaftanga tša jtsenábotamnayana chë ley šmobomnama; as, ¿ndáyeca šmonÿbétsama ínÿenga Bëngbe Bëtsabiana podesca chamotsóyebuambnama, tšëngaftanga chë leyentša mandënga jobedésama ndocna te ntsebošana causa?

24 Chama, Bëngbe Bëtsabe uabemana palabrënguiñe mëntšá endayana: “Tšëngaftanga judiëngbe causa, ndoñe judiëngbeñe Bëngbe Bëtsabiana ndoñe tšabá quematoyebuambná ca.”

25 Tšëngaftanga ntšamo leyíñe yomandancá šmojtsamëse, Bëngbe Bëtsábenga šmomnama jinÿanÿiyama, chë más delicadentse base bobachtema tëtšenënga jtsemnana tšabá nántsemna; pero ntšamo chiñe tomandancá ndoñe šmontsamëse, chca tëtšenënga jtsemnana, tondayama ntsošervénana, y chca, tšëngaftanga jtsemnana mo chë más delicadentse base bobachtema ndëtëtšenëngcá.

26 Y chë ndoñe judiënga chë más delicadentse base bobachtema tëtšenënga, judiëngcá ndoñe quemátsmëna; pero chënga ntšamo leyíñe yomandancá tmojtsamëse, ndegombre Bëngbe Bëtsá chënga echanjúbuaja mo cachabe entšangcá.

27 Y chca, tšëngaftanga judiëngbiana Bëngbe Bëtsá echanjayana ndoñe tšabá šmonjama ca, ntšamo leyíñe yomandancá ndoñe šmontsama causa. Cha chca echanjama, er bëtscá ndoñe judiënga mondmëna y chënga ntšamo leyíñe yomandancá mondocumplina, pero chënga ndoñe quemátsmëna tšëngaftangcá tëtšenënga, jtsinÿnama Bëngbe Bëtsábenga šmomnama. Tšëngaftanga, masque Bëngbe Bëtsabe uabemana ley šmonduábomna y chë más delicadentse base bobachtema tëtšenënga šmondmëna, cabá ndoñe šmontsama ntšamo leyíñe iuayancá, ndayá jamama cmojtsamnana.

28 Chcasna, nda chë más delicadentše base bobachtema tmojatëtše ora, chábioye chë soye ndoñe ntjábemana canye ndegombre judío. Y canye entsá ndoñe Bëngbe Bëtsábia ntsemnana nýe ínýenga chë más delicadentše base bobachtema tmojatëtšama.

29 Y canye entsá ndegombre judío jtsemnana, ntšamo chabe ainaniñe tomncá, cha Bëngbe Bëtsabe entsá yomnama tojtsinýanýnase. Y chca, canye ndegombre judío, Bëngbe Bëtsabe entsá yomnama chaotsinýnamna ndoñe quenátsmëna chë más delicadentše base bobachtema jtsetëtšenana, sinó ntšamo Bëngbe Bëtsá tojamcá chabe ainaniñe chaotsebínýnama. Bëngbe Bëtsabe Espíritu jamana entsá chca ainana chaotsebomnama, ndayá inétsinýanýnaye cha canye ndegombre judío yomnama; y chë uabemana ley ndoñe quenátobena chca jamana. Bëngbe Bëtsá endmëna chë tšabe soye entsábiamama ichamuá; entsanga ndoñe.

### 3

1 Chcase, ndánaca šuatjatjaye, as ¿Bëngbe Bëtsabe entsá jtsemnana jëftsashjáchama, más tšabá yojtsemna canye judío jtsemnana ca? ¿Base bobachtema chë más delicadentše tëtšená jtsemnana becá yojtsámama ca?

2 Aíñe, chca jtsemnana corente enduámama y nýetsca soyënguiñe; natsana chjayana, Bëngbe Bëtsá, judiënga chabe palabra tojanabanýé, nýetscangbiamama chamotsinýenama.

3 Y morna, ¿ndayá yochjopása nderado judiënguentše báseftanga ya ndoñe chca tmontsentšénëse? Y chë causa, ¿Bëngbe Bëtsánaca yochtsajbaná ntšamo tojašebuachenacá amana?

4 ¡Ndoñe, ndegombre ndoñe! Chca ndoñe cha queochatsma; tšëngaftanga šmondëtatšëmbo Bëngbe Bëtsá sempre endbëtsama ndayá jamama tojašebuachenacá, masque nýetsca entsanga bosterënga chamotsomñe. Er Bëngbe Bëtsabe uabemana palabrenguiñe Bëngbe Bëtsábiamama mëntšá endayana:

Aca ntšamo chacojayana ora, nýetscanga mochanjinýe aca ntšamo ndegombre yomncá cnétsamama;

y chacojtsenëuyaná ora, sempre cochanjínýanýiye acbe contra tmojtsoyebuambnángbioye, chënga ndoñe tšabá montsamama ca.

5 Pero bënga ndoñe tšabe soye montsama ca báseftanga tmojayana ora, Bëngbe Bëtsá sempre tšabá inétsamama entsanga más tšabá jinýama tmojtsobenëse, ¿ntšamo bënga mochjayana? ¿Bënga imojtsobena jayanana Bëngbe Bëtsá ndoñe



tšabá tonjama ca, Běngbiama castigo chaotsemna ca cha tojayana ora? (Morna atše sěntsoyebuambná ntšamo entšanga jóyebuambayama monduamancá.)

<sup>6</sup> ¡Ndoñe, ndegombre ndoñe! Ndoñe quemuátobena chca jayanama. Běngbe Bětsá nŷets tempo ntšamo ndegombre yomncá ndoñe tontsaměse, ndegombre cha ndoñe nanjobenaye jayanama nŷetsca quem luarentša entšangbiama, ntšamo tmojamcá tšabá o ndoñe tšabá bětsemnama.

<sup>7</sup> Nderado nda tojayana: “Atše ndaye bacna soye stjama y ndoñe ntšamo ndegombre yomncá tojtsemna, y chě soye tojoservé Běngbe Bětsá puerte uamaná y bětsá yomnama jinŷanŷiyama, y Běngbe Bětsá sempre ntšamo ndegombre yomncá tojtsamama jinŷama entšanga tmojtsobeněse, ¿ndáyeca Běngbe Bětsá cabá iuichamo ntšamo atše tijamcá ndoñe tšabá yontsemna ca y atše canŷe bacna soye amá stsemna ca?”

<sup>8</sup> Y chcase, ndánaca měntsá nanjátayana: “Ntšamo ndoñe tšabá yondměncá mochjama, chca, entšanga chámuinŷe Běngbe Bětsá puerte tšabia yomnama ca.” Ndegombre, atše mal jaquédama báseftanga tmojayana atše chca stsabuatambá ca; Běngbe Bětsá chca abuatambayěnga echanjácastigaye, ntšamo castigáněnga jtsemnama imomerecencá.

*Ntšamo entšá tojtsamama, Běngbe Bětsabe bominiŷiñe ndocná tšabia ntsemnana*

<sup>9</sup> Y asna, ¿Běngbe Bětsá běnga judiěnga ínŷengbiama más tšabá šonŷa? ¡Ndoñe, ndegombre ndoñe! Atše ya sěnjiniŷinŷé judiěnga y ndoñe judiěgnaca, chě bacna soyěnga jamama juabněngaca mandáněnga imomnama.

<sup>10</sup> Er Běngbe Bětsabe uabemana palabrenguiñe měntsá endayana:

Ntšamo entšá tojtsamama, ndocná Běngbe Bětsabe bominiŷiñe tšabia quenátsměna.

¡Ndoñe, ndegombre ndoñe, ni mo canŷa chca quenátsměna!

<sup>11</sup> Ndocná quenátsměna ntšamo ndegombre yomncá chabotsosertánama;

¡Ndocná quenátsměna nda chaotseboše Běngbe Bětsáftaca jtsemnama!

<sup>12</sup> Nŷetscanga ndoñe tšabe benache tmojishache y chiñe montsajna.

Chěnga nŷetscanga Běngbe Bětsabe bominiŷiñe tondayama quemátoservena.

Ndocná quenátsměna ntšamo tšabá yomncá chaotsamama, ¡ni canŷa ndoñe!

13 Ntšamo tmojtsichamcá puerte bēts bacna soye jtsemnana, mo canye obanabe cuevēshe atēfjnēshe puerte bacá tojtsonguētšecá.

Chēnga tmojtsoyebuambná soyēngaca ínŷengbioye jtsaíngñayana.

Chē tmojtsichamo soyēngaca puerte bacna soye ínŷengbiama jtsamana, mo canye mētšcuaye tbojtseftētše orcá, chē veneno canye entšábioye jóbana.

14 Chēnga, nŷets tempo ínŷengbiama podesca jtsichámuana, y sempre jtsóyebuambnayana chē ínŷenga ntšámncá jáborlama.

15 Sempre jtseprontánana ínŷengbioye ntšámncá jáborlama y jobáyama.

16 Chēnga siempre jtsiyenana ínŷenga chamotsesufrínama jtsamēse, y nŷe ntšámncá jtsaborlánana.

17 Chēnga ndocna te tondaye ntjamana nŷetscanga natjēmbana chamotsiyenama;

18 Chēnga ndoñe ntsiyenana Bēngbe Bētsabiama jtsejuabnayēse, cha chē más bētsá nŷetscangbiama yomnama ca –chiñe endayana.

19 Er bēnga mondētatsēmo, lempe ntšamo leyiñe iuabemancá, chē leyēngaca mandánēnga imoyenēngbiama yomnama. Chcasna, chē ley endmēna, Bēngbe Bētsabe delante ndocná chaondobená jayanama, cha ndoñe tšabá tonjama, chama ndoñe yonjátatsēmo causa ca; y endmēna jinŷanŷiyama, ntšamo tmojamcá tšabá o ndoñe tšabá bētsemnana Bēngbe Bētsá nŷetscangbiama yochjayana ora, nŷetscanga yojtsamna chabe delante jayanama, ndáyeca ntšamo tšabá yomncá ndoñe tmonjama ca.

20 Er, Bēngbe Bētsá ndoñe queochatsma ndocná chabe bominyiñe tšabia chaotsemna, ntšamo leyiñe yomandancá cha tojamama; chē ley bēngbiama jamana, nŷe bēnga bacna soye tmojamama chamotsetatšēmbuama.

*Ntšamo Bēngbe Bētsá inama entsanga chabe bominyiñe tšábenga chamotsemnana*

21 Pero mora, Bēngbe Bētsá tonjinŷanŷé ntšamo cha inama entsanga tšábenga chabe bominyiñe chamotsemnana; y Bēngbe Bētsá ndoñe ntjamana canya chabe bominyiñe tšabia chaotsemnana, ntšamo ibomncá cha tojtsamama, ntšamo chē leyēnguiñe y mandēnguiñe yomncá. Pero masque mora chca, Bēngbe Bētsá tonjinŷanŷé, Moisesbe leyiñe y Bēngbe Bētsabe juabna oyebuambnayēngbe librēšangañe yopodena jinŷenana chca yochtsemnana.

22 Bēngbe Bētsá jamana entsanga chabe bominyiñe tšábenga chamotsemnana, chēnga Jesucristbeñe tmojtsošbuáchema.

Bëngbe Bëtsá nyetscanga Crístbeñe ošbuáchiyëngbiamá chca jamana, y chabiamá nyetscanga cachcá monduámána;

<sup>23</sup> er nyetscanga bacna soye tmojama, y chë causa, ndocna entśá tonjobená jashjáchana ndocna bacna soye ndbomná jtsemnama y puerte bëtsá jtsemnama, ntśamo Bëngbe Bëtsá tojanjuabocá entśanga chamotsemnama.

<sup>24</sup> Pero Bëngbe Bëtsá chëngbiamá corente tśabe juabna bómnyeca, mo ndayá cuafjatsatacá, cha jamana chënga chabe bominyiñe tśábenga chamotsemnama. Bëngbe Bëtsá chca tojanma, Cristo Jesúsbeyeca, entśanga atsebácanënga chamotsemnama y ya ndoñe más bacna soyënga jamama juabnëngaca mandánënga chamondëtsemnama cha tojanma ora.

<sup>25</sup> Bëngbe Bëtsá cha tbojanábuayana, chabe buiñe juabuáshanëse y jóbanëse, cha chaotsemna ndábeyeca Bëngbe Bëtsá entśanga bacna soyëngama jáperdonama; Jesucrístbeñe jtsošbuáchiyëse entśanga jobenayana perdonánënga jtsemnama. Bëngbe Bëtsá chca tojanma, jinÿanÿiyama cha inétsama entśanga tśábenga chabe bominyiñe chamotsemnama, chë entśanga bacna soyënga tmojanmama chë tempo ntjatonyáycá, er cha chë tempo corente uantado chëngaftaca yojtsemna y chëngbe bacna soyëngama ndoñe yonjánacastigaye.

<sup>26</sup> Cha lempe chca tojanma, jinÿanÿiyama cha sempre ntśamo ndegombre yomncá inétsamama, y nyetscanga Jesucrístbeñe ošbuáchiyënga chabe bominyiñe tśábenga chamotsemnama inétsamama.

<sup>27</sup> Chcáyeca, entśá ndoñe ntsobenana tondayama ntsenábotamnayana. Chca endmëna, er Bëngbe Bëtsá tśabia chabe bominyiñe jabemana, ndoñe ntśamo leyiñe tomandancá cha tojtsamama, sinó nÿe Jesucrístbeñe tojtsošbuáchema.

<sup>28</sup> Y chca jayanëse, mora bënga tśabá montsetátšëmbo, Bëngbe Bëtsá inétsama canÿe entśá tśabia chabe bominyiñe chaotsemnama, nÿe Jesucrístbeñe tojtsošbuáchema, y ndoñe ntśamo leyiñe yomandancá cha tojtsamama.

<sup>29</sup> ¿O Bëngbe Bëtsá nÿe judiëngbe Bëtsá yomna? ¿Ndoñe judiëngbe Bëtsánaca cha ndoñe yondmëna? Aíñe, chëngbe Bëtsánaca cha endmëna;

<sup>30</sup> er nÿe canÿe Bëtsá nyetscangbiamá endmëna, y cha echanjama chë más delicadentše base bobachtema tëtšenënga imomnëngbiamá y ndoñe chchangbiámna, chabe bominyiñe tśábenga chamotsemnama, Jesucrístbeñe tmojtsošbuáchema.

<sup>31</sup> Chcasna, Bëngbe Bëtsá jamana entśanga chabe bominyiñe tśábenga chamotsemnama, Jesucrístbeñe tmojtsošbuáchema; ¿chca yojtsayana chë ley nÿe tondayama

yondoservena ca? ¡Ndoñe, ndegombre ndoñe! Injětšá, chca jamana chë ley más chaotsámanama.

## 4

### *Ntšamo Abrahánoftaca tojanopasá*

<sup>1</sup> Morna Abrahambiana mochjóyebuambaye, bëngbe tempsca bëts taitá, y mochjinjye ndayá tojánatsjinjye Bëngbe Bëtsábeñe ošbuáchiyana bomnentšana.

<sup>2</sup> Abraham chabe bominjyiñe tšabia chaotsemnana, ndayá cha tojanmama Bëngbe Bëtsá matënjanmëse, cha matënjanobená entšángbeñe ndayama jtsenábotamnayana, pero Bëngbe Bëtsabe delante ndoñe;

<sup>3</sup> er Bëngbe Bëtsabe uabemana palabrënguiñe mëntšá endayana: “Abraham, Bëngbe Bëtsábeñe yojtsošbuáchiye, y chíyeca Bëngbe Bëtsá tonjánayana cha chabe bominjyiñe tšabia yojamna ca.”

<sup>4</sup> Canjye entšá trabajayá, crocénana josháchiñana ndayá tojamama, pero chë crocénana ndoñe nje tšetánana ntsemnana, sinó chana jtsemnana ntšamo cha tojtsomerecencá.

<sup>5</sup> Er menójuabonga, nda tondaye tontsama Bëngbe Bëtsá cháuyanama cha chabe bominjyiñe tšabia yomna ca, pero aiñe tojtsošbuaché Bëngbe Bëtsábeñe, nda endbáyana chë bacna soye tmojamënga mora mo ndoñe chca cuafjamcá chamotsemna ca, chabiana Bëngbe Bëtsá echanjama chabe bominjyiñe tšabia chaotsemnana, chabe ošbuáchiyama.

<sup>6</sup> Rey David cachcá chabe librëšañe tojánayana, chë ndabiana Bëngbe Bëtsá jayanana chabe bominjyiñe tšabia chaotsemna ca, masque chabiana chca cháuyanama tondaye tonjamëse. David chca entšabiana tojánayana, cha puerte echantsoyejuaye ca.

<sup>7</sup> Chabe librëšañe mëntšá tojanábema:

¡Tša oyejuayënga jtsemnana chë Bëngbe Bëtsá chëngbe bacna soyënga tojápardonanga,

chë Bëngbe Bëtsá chëngbe bacna soyënga tojabuajuánanga!

<sup>8</sup> ¡Puerte oyejuayá jtsemnana chë Bëngbe Bëtsá mo ndoñe bacna soye cuafjama cuenta tbojtsonyá cha ca!

<sup>9</sup> ¿David tojánayana nje chë más delicadentše base bobachtema tëtšenënga imomnëngbiama oyejuayana yomna ca? Ndoñe; ndoñe chca mondmënëngbiámnaca. Y muentše tmonjayana, Abraham Bëngbe Bëtsábeñe yojtsošbuachéyeca, Bëngbe Bëtsá tojánayana cha chabe bominjyiñe tšabia yojamna ca.

<sup>10</sup> Y ¿ntseco chca tojanopasá? ¿Abraham ya chë más delicadentše base bobachtema tëtšená yojtsemna ora, o cabá ndoñe

chca yontsemna ora? Ndegombre, Abraham cabá ndoñe chca tětšená yontsemna ora.

<sup>11</sup> Y cabá chentsana, Abraham base bobachtema chë más delicadentše tětšená yojtsemna; y chca yojamna jinýanýiyama, Bëngbe Bëtsá tempo ya chabiamna tojánayana cha chabe bominyiñe tšabia yojamna ca, cha Bëngbe Bëtsábeñe yojtsošbuáchema. Lempe chca tojanopasá, jinýanýiyama Abraham mo taitacá yomnama Bëngbe Bëtsábeñe imošbuachéngbiama, masque ndoñe base bobachtema chë más delicadentše tětšenënga mondmëna. Y cachcá Bëngbe Bëtsá chë ošbuáchiyëngbiama tojánayana, chënga chabe bominyiñe tšábënga imomna ca.

<sup>12</sup> Y Abrahámnaca endmëna mo chë taitacá, chë más delicadentše base bobachtema tětšenënga imomnëngbiama, pero aïñe Bëngbe Bëtsábeñe corente jtsošbuáchiyëse imoyenëngbiama, cachcá ntšamo bëngbe bëts taitá Abraham Bëngbe Bëtsábeñe yojtsošbuachecá. Y cha cabá chë más delicadentše base bobachtema ntsetëtšena ora, ya chca yojtsošbuáchiye.

*Jtsošbuáchiyëse, ntšamo Bëngbe Bëtsá tojašebuachenacá jóshjanguana*

<sup>13</sup> Bëngbe Bëtsá tojanašebuachená Abrahambiamna y chábentsana entšangbiama, quem luare chëngbiama yochjëftsemna ca. Y chca tojanašebuachená, ndoñe Abraham ntšamo leyiñe yomandancá betsobedecénama, sinó cha Bëngbe Bëtsábeñe yojtsanošbuáchema, y chíyeca Bëngbe Bëtsá tojánayana cha chabe bominyiñe tšabia yojamna ca.

<sup>14</sup> Pero, ntšamo Bëngbe Bëtsá tojanašebuachenacá, bënga ntšamo chë leyiñe yomandancá tmojtsamëngbiama yojtsemna ca tmojayanëse, Bëngbe Bëtsábeñe jtsošbuáchiyana tondayama nantsoserverna, y ntšamo Bëngbe Bëtsá tojanašebuachenacá tondaye ntsámanana.

<sup>15</sup> Chë ley juabocnana, Bëngbe Bëtsá puerte etonaná entšanga cháucastigama, chënga ntšamo chiñe iuayancá ndoñe tmontsamama; pero ndocna mandënga tontsemnëse, ndocná ntsoobenana chë ndoñe tontsayancá ndoñe ntjamana.

<sup>16</sup> Y chca, Bëngbe Bëtsá Abrahámbioye tbojansbuachená, cha yojtsanošbuachéyeca, ntšamo Bëngbe Bëtsá tojanašebuachenacá, ndegombre chaotsemnama chë Bëngbe Bëtsábeñe imošbuáchema mo Abrahámbentsana entšangcá imomnëngbiama; y Bëngbe Bëtsá chca tojanašebuachená, cha chëngbe tšabiamna iuantjéšnayeca. Chë mo Abrahámbentsana entšangcá imomnëngbeñe, ndoñe quemnatmëna nýe chë ntšamo ley yomandacá imnétsamënga, sinó nýetscanga chë ntšamo Abraham tojanošbuachecá Bëngbe Bëtsábeñe

imošbuachéngnaca. Y Abraham nÿetscanga bēngbiamā, Bēngbe Bētsábeñe ošbuáchiyēnga, mo taitacá endmēna.

17 Ntšamo Bēngbe Bētsabe uabemana palabrēnguiñe endayancá, Bēngbe Bētsá Abrahám bioye ibojtsatsētnaye ora: “Atše sēnjama aca ba luariñe entšangbiamā atšbe bominiñe taitá chacotsemnā ca.” Chē ntšamo tojanašebuachenacá ndegombre tšabe soye endmēna, er Bēngbe Bētsá chca Abrahambiamā yojanjuabná; y Bēngbe Bētsá endmēna ndábeñe Abraham yojtsanošbuaché, y nda inétsama entšanga chámuatayenama, y nda inamánda y entšanga jobenayana jinÿama ndayá ndocna te tmonjaninÿcá.

18 Abraham Bēngbe Bētsábeñe yojtsošbuáchiye y yojtsobatmana ntšamo tbojanšbuachenacá chaotsemnā, masque entšabe juabniñe ndoñe chca ntjátsjuabnayana; y chca, cabana cha tojánashjache jtsemnāna “ba luariñe entšangbe taitá”, ntšamo Bēngbe Bētsá tbojaniancá: “Acbentšana entšanga tša mallajta mochántsemna, ndocná queochatobenaye jacúntana ca”.

19 Abraham yojanobatmanēntscuana, cha puerte chábeñe yojtsanošbuaché, ntšamo tbojanšbuachenacá jóyēngacñama, masque Abraham yojtsonÿaye ya bētsanánējema yojtsemnā, er ya mo patse uata yojtsebomna, y chabe shema, Sara, ndoñe yonjobena šešonga jtsabamnā.

20 Abraham ndocna te tonjanajbaná Bēngbe Bētsábeñe ošbuáchiyana, y ni mo canÿe ndoñe yonjanjuabo ye chē ntšamo Bēngbe Bētsá tbojanšbuachenacá ndoñe joparējana ca; sinó más corente chábeñe yojtsanošbuaché, y chca Bēngbe Bētsá bioye ibojtsatschuanaye,

21 er cha tšabá inatátšēmo, ntšamo tbojanšbuachenacá jamama, ndegombre Bēngbe Bētsá obená inamnā.

22 Chíyeca, Bēngbe Bētsá tojánayana cha chabe bominiñe tšabia yojamna ca.

23 Pero, chabe bominiñe tšabia yojamna ca Bēngbe Bētsá tojánayana ora, ndoñe nÿe Abrahambiamā chca ntsóyebuambnayana;

24 ndayá bēngbiámna, ndēmuanÿēngbiamā Bēngbe Bētsá yochjayana chabe bominiñe tšábēnga imomna ca, bēnga Bēngbe Bētsábeñe imošbuachéyeca; Bēngbe Bētsá, nda tojanma Bēngbe Utabná Jesús cháuatayenama.

25 Bēngbe Bētsá tojanalesenciá entšanga Jesús chamóbama, bēnga bacna soyēnga tmojanma causa, y Bēngbe Bētsá tojanma cha cháuatayenama. Bēngbe Bētsá chca tojanma jobenayana, bēnga chabe bominiñe tšábēnga jábiamama.

*Mora bēnga Bēngbe Bētsabe bominyiñe tšábenga montsemna*

<sup>1</sup> Er Bēngbe Bētsá tojama bēnga chabe bominyiñe tšábenga chamotsemnama, bēnga chábeñe imošbuachéyeca; mora tempá tšabá Bēngbe Bētsáftaca bēnga montsatsmēna, Bēngbe Utabná Jesucristbeyeca.

<sup>2</sup> Bēnga Crístbeñe mondošbuáchema, cha tojama bēnga chamotsetatšēmbuama Bēngbe Bētsá tša tšabia yomnama, y Bēngbe Bētsábiocana tšabe soyēnga jtsebomñese mora chamotsiyenama. Bēnga tša oyejuayēnga jésemnana, er Bēngbe Bētsábeñe jtsošbuáchiyēse mondobátmana cha puerte uámanēnga y bētsétsanga šochjábiamama, batšá ntšamo cachá yomncá.

<sup>3</sup> Y ndoñe n̄ye chama bēnga oyejuayēnga jésemnana, ndayá bēnga tmojtseufrina y padecena soyēnguiñe tmojtsajna órnaca. Chca mondbama, er bēnga mondétatšēmo bēnga tmojtseufrina orna, bēnga juatsjín̄yana ntšamo uantadēnga jtsemnama padecena soyēnguiñe tmojtsemna ora, Bēngbe Bētsábeñe jtsošbuáchiyēse.

<sup>4</sup> Bēnga padecena soyēnguiñe tmojtsemna ora, más tšabá uantadēnga jtsemnama mondobénayeca, Bēngbe Bētsá oyejuayá bēngaftaca jtsemnana, padecena soyēnguentšana ndegombre tšabá tmojachnēngo ora. Bēngbe Bētsá oyejuayá bēngaftaca chaotsemnama bēnga tmojama ora, bēnga jtsobenana más jtsobátmanana, ntšamo šojašebuachenacá cha yochjamama.

<sup>5</sup> Bēnga chca tmojtsobátmanēse, ndocna te n̄ye bonamente quemochatobátmana, er Bēngbe Bētsá šojin̄yan̄yé tša bētsacá cha šuababuán̄yeshanama. Bēngbe Bētsá chca tojama chē Uámana Espíritbeyeca, y cha endmēna nda Bēngbe Bētsá tbojanichmó bēngbe ainaniñe chaotsemnama jtsemándayama.

<sup>6</sup> Tempo bēnga tondaye chemuatanobená jamana Bēngbe Bētsabe bominyiñe tšábenga jtsemnama, y chora Cristo tojanóbana bēnga chē bacna soyēnga tmojamēngbe tšabiamama, n̄ya chama tempo yojamna ora.

<sup>7</sup> Ndoñe paselo quenátsmēna jajuaboyana, ndáyeca can̄ya nantseprontana jóbanama can̄ya ntšamo chē leyiñe yomandancá jamama tojtsamanabiamama; pero, can̄ya bētsacá jtsababuán̄yeshanēse tšabe soyēnga ín̄yengbiamama tojtsamabiamama, nderádose chabiamama jóbanama cuantseprontana.

<sup>8</sup> Pero Bēngbe Bētsá bēnga šojan̄yan̄yé tša šuababuán̄yeshanama, er bēnga cabá bacna soyēnga ntsamcá imojoyena ora, Cristo bēngbiamama tojanóbana.

<sup>9</sup> Cristo, chabe buiñe juabuáshanēse bēngbiamama tojanóbana yeca, Bēngbe Bētsá tojanma bēnga chabe bominyiñe

tšábenga jtsemnama. Y chca endménayeca, ndegombre Cristo šochanjátsebacaye, entšanga ndoñe tšabá tmonjama ca y castigo chëngbiana chaotsemna ca Bëngbe Bëtsá chaojayana ora.

<sup>10</sup> Bënga tempo Bëngbe Bëtsá imojanáya; pero cha tojanma bënga cháftaca tempcá tšabá chamotsatsmënama, chabe Uaquiñá tojanóbanayeca. Y mora, bënga natjëmbana cháftaca chamotsemnama ya tojama ora, ndegombre atsebácanënga mochántsemna, chabe Uaquiñá ainá yómnayeca.

<sup>11</sup> Y ndoñe nÿe chca, ndayá bënga cháftaca puerta oyejuayënga chamotsemnámnaca Bëngbe Bëtsá jamana, ndayá Bëngbe Utabná Jesucristo bëngbiana tojánmayeca. Y mora, chábeyeca Bëngbe Bëtsá tojama bënga cháftaca tempcá tšabá chamotsatsmënama.

### *Adán y Cristo*

<sup>12</sup> Canÿe entšá bacna soye tojanma causa, nÿetsca entšanga bacna soyënga amënga tmojábocana; y cha tojanóbana, bacna soyënga tojanma causa. Y chca, nÿetsca entšanga entsamna jóbanama, er nÿetscanga bacna soyënga tmojama.

<sup>13</sup> Bëngbe Bëtsá Moisésbioye chë leyënga cabá nduántšaboshjona ora, entšanga quem luarentše bacna soyënga tmojanma. Pero ndocna ley tontsemna ora, Bëngbe Bëtsá ndoñe ntjatonÿayana entšanga bacna soyënga tmojamama.

<sup>14</sup> Nÿetsca entšanga, Adánbentsana Moisésbentscoñe, nÿetscanga yojánamna jóbanama, ntšamo cach Adán tojanmcá ndoñe tmonjanmëngnaca, ntšamo cha ndoñe chaondëmama Bëngbe Bëtsá tbojanmandacá cha tojanma ora. Y Adánbeñe entšanga mondobena jinÿama, ntšamo chë jabama ibojamná canÿe soyënguiñe yochtsanmëna.

<sup>15</sup> Pero ntšamo chë útata tbojanmcá ndoñe cachca soye quenátsmëna; er Bëngbe Bëtsá entšangbe tšabiana jtsejuabnayeše tšabe soyënga chëngbiana tojanma ora, ndoñe yonjamna mo ntšamo Bëngbe Bëtsá tbojanmandacá ndoñe chaondëmama Adán tojanma orcá. Tšëngaftanga šmondëtatšëmbo, nÿe canÿe entšá canÿe bacna soye tojanma causa, cha tojanma nÿetsca entšanga jóbanama chaotsamnama, pero Bëngbe Bëtsá entšangbe tšabiana yajuabnáyeca, más bëts soyënga jamana, chë Adanbe bacna soye entšangbiana bacna soyënga tojanmama. Chca, Bëngbe Bëtsá tojanma ba entšanga bëtská tšabe soyënga chamotsebonnama; y chca tojama, nÿe canÿe entšá, Jesucristo, tšabe soyënga tojánmayeca.

<sup>16</sup> Chë ba entšanga bëtská tšabe soyënga chamotsebonnama Bëngbe Bëtsá tojamentšana endóbocana soye,



puerte inÿetsá comna, chë entsá Adán, canÿe bacna soye tojanmentšana tojanóbocna soyama. Adán bacna soye tojanmentšana, Bëngbe Bëtsá tojánayana chana bacna soye tojanma y castigo jtsebomnama ibojtsemna ca, y nÿetsca entságnaca chë causa; pero masque nÿetscanga bacna soyënga tmojama, Bëngbe Bëtsá entsangbe tšabiama ndoñe bëndëtsebnatjëmbayeyeca, tojanma entsanga chabe bominiñe tšábenga chamotsemnama y chë bacna soyëngama castigánënga ndoñe chamondëtsemnama.

17 Ndegombre endmëna, canÿe entsá bacna soye tojanma causa, nÿetsca entsanga jóbanama yojtsamna. Pero puerte más, canÿe entsá Jesucristo tojanma. Ndëmuanÿengbiama Bëngbe Bëtsá tojama bëtscá tšabe soyënga chamotsebonnama, ndëmuanÿengbiama Bëngbe Bëtsá tojama chabe bominiñe tšábenga chamotsemnama, y Bëngbe Bëtsábiocana chca tmojóyëngacñënga, chënga nÿetscanga mochantsiyena bacna soyënga jtseyëñjanayëse y nÿetsca tescama mo bëtsetsangcá; y chca echántsemna ndayá Cristo tojánmayeca.

18 Y chca, ntšamo canÿe entsá, Adán, canÿe bacna soye tojanmama, Bëngbe Bëtsá tojánayana nÿetscanga bacna soye tmojanma y castigánënga chamotsemna ca; cachcá ntšamo canÿe entsá, Cristo, puerte tšabe soye tojánmayeca, Bëngbe Bëtsá jayanana nÿetscanga imojtsobena chabe bominiñe tšábenga jtsemnama y chë nÿetsca tescama yomna tšabe vida jtsebonnama ca.

19 Y ntšamo Bëngbe Bëtsá tbojanmandacá ndoñe chaondëmama canÿe entsá tojanma causa, nÿetsca entsanga bacna soye amënga tmojanobiama; cachcá, ntšamo Bëngbe Bëtsá tbojanmandacá canÿe entsá, Jesucristo, tojánmayeca, Bëngbe Bëtsá tojanma bëtscá entsanga chabe bominiñe tšábenga chamotsemnama.

20 Chë ley entsangbe cucuatšiñe tmojanáboshjona, jinÿanÿiyama ntšamo ndegombre yomna bacna soyënga jtsamana; pero entsanga más bacna soyënga imojtsama ora, Bëngbe Bëtsá cabá más chëngbe tšabiama yojtsanjuabnaye y más tšabe soyënga chëngbiama yojtsama.

21 Chcasna, mora mochjayana, entsanga bacna soyëngaca puerte mandánënga imojamna, y chca, nÿetscanga jóbanama yojamna ca. Pero mora, ya ndoñe chca quenátsmëna, er Bëngbe Bëtsá tojama entsanga chabe bominiñe tšábenga chamotsemnama, Bëngbe Utabná Jesucristbeyeca chë nÿetsca tescama yomna tšabe vida chamotsebonnama; chíyeca mora bënga montsobena jtsiyenama, Bëngbe Bëtsá šojatsatá tšabe soyënga lempe bëngaftaca jtsemnëse.

## 6

*Crístbeyeca bēnga tšabe vida jtsebomnana*

<sup>1</sup> Y asna, ¿ntšamo mochjayana? ¿Šojtsamna jtsiyenana sempre bacna soyēnga jtsamēse, chca, Bēngbe Bētsá šuababuánjeshanama más chašotsinjanynama, cha más bacna soyēnga bēnga jtsaperdónayēse?

<sup>2</sup> ¡Ndoñe, ndegombre ndoñe! Tempo bēnga monjanियena bacna soyēnga jamama juabnēngaca mandánēnga, pero mora bēnga montsobena jtsiyenana chē juabnēnga tondaye bēngbioye ntsamcá, y chca, bēnga montsobena mo obanēngcá chē soyēngama jtsemnana; y as, ¿ndáyeca bēnga muatjátsjuabnaye ntšamo ndoñe tšabá tontsemncá jatiyenana?

<sup>3</sup> Er ndegombre tšēngaftanga šmondētatsēmbo, bēnga uabáinēnga tmojanoquedá ora, tmonjaninjanýe bēnga Cristo Jesúseftaca cánýiñe mo canýacá bétsemnana; y bēnga uabáinēnga tmonjanoquedá ora, enjamna mo bēnga cuafjobancá, ntšamo Cristo tojanobancá.

<sup>4</sup> Bēnga uabáinēnga tmonjanoquedá ora, enjamna mo bēngnaca cháftaca cuafjobancá, y cháftaca uatabuantsanēngcá. Chca yojamna, bēnga chamotsobenama mo tsēm entšangcá jtsiyenama, ntšamo Crístoftaca tojanopasacá, cha cháuatayenama Bēngbe Bētsá tojanma ora, chabe puerte bēts obenánaca.

<sup>5</sup> Bēnga Crístoftaca cánýiñe mo canýacá jtsemnēse, cha tojanóbana ora mo bēngnaca cháftaca cuafjobancá enjámnayeca, ndegombre bēnga cánýiñe mo canýacá cháftaca mochántsemna, bēnga cachiñe vida nýetsca tescama chamotsatsbomnana Bēngbe Bētsá jtsamēse, ntšamo Cristo cháuatayenama cha tojanmcá.

<sup>6</sup> Y bēnga mondētatsēmbo, chē ntšamo bēngbe vida enjamncá, bacna juabnēngaca mandánēnga, Jesucrístbeñe cabá ntsošbuáchiye ora, mora ya ndoñe chca yontsemnana; y chca entsemna mo chē tempsca vida chaóbanama cuafjamcá, Cristo tmojancrucificá ora. Chca yojamna, Bēngbe Bētsá jobenayama chē bacna soyēnga jamama bēngbe juabnēnga jtsepochoćama; y chca, ya ndoñe más chē bacna soyēngaca mandánēnga chamondētsemnana, mo nýets tempo nýe ínýabiama oservenēngcá.

<sup>7</sup> Er canýe entšá tojóbana ora, chē bacna soyēnga chábioye ya ndoñe más ntsemándayana.

<sup>8</sup> Er Cristo tojanóbana ora, mo bēngnaca cháftaca cuafjobancá endménayeca, cháftaca jtsiyenámna bēnga montsošbuaché.

<sup>9</sup> Bënga mondétatšëmbo Cristo cháuatayenama y ndocna te cha cachiñe jatóbanama Bëngbe Bëtsá tojanmama; y ndocna obenana queochatsma cha cachiñe chauatóbanama.

<sup>10</sup> Cha tojanóbana, y chë bacna soye jamama juabnënga ndocna te ntjobenayana chábioye jamándana, y ínÿenga ndoñe imontsobena ntšamo cha jabórlana; y ntšamo mora cha yoyencá, Bëngbe Bëtsá jtseservénama yomna.

<sup>11</sup> Cachcá, tšëngaftanga cmontsamna jtsejuabnayana, chë ya ndoñe más bacna soyëngaca mandánënga šmojtsemnana, pero vida šmobomna lempe jtsamëse Bëngbe Bëtsá tšëngaftangaftaca oyejuayá chaotsemnana, Cristo Jesúseftaca cánÿiñe mo canÿacá jtsemnëse.

<sup>12</sup> Tšëngaftanga cmontsamna, chë bacna soyënga jamama ainanentše šmobomna juabnëngaca ndoñe más mandánënga ntsemnana, chca, tšëngaftanga ndoñe chašmondétsamama juabnëngaca nÿe cach tšëngaftanga, tšëngaftangbe cuerpiñe tšabá jtsomñama.

<sup>13</sup> Tšëngaftanga ndoñe quecmátamna jalesénciana ndaye tšëngaftangbe cuerpentša soye, bacna soyënga jamama chaoservema. Chamna, tšëngaftanga cmontsamna Bëngbe Bëtsá jauyanana, lempe ntšamo tšëngaftanga šmomncá, cha jaserviama chaotsemna ca, tšëngaftanga chë šmomna mo ya ndoñe más obanëngcá Bëngbe Bëtsabiama, y tojanma tšabe vida chašmotsebomnana; y jauyanana nÿetsca tšëngaftangbe cuerpentša soyëngna Bëngbe Bëtsá jaserviama yojtsemna ca.

<sup>14</sup> Ndoñe quecmátamna bacna soyëngaca mandánënga jtsemnana, er tšëngaftanga ndoñe quešmátiyena leyiñe iuayana soyëngaca mandánënga, y šmondoyena Bëngbe Bëtsá tšëngaftangbiama tšabá jtsejuabnayëse.

*Ošbuachiyá obligaciónaca jtsemnana ntšamo tšabá yomncá jamama*

<sup>15</sup> Y asna, ĺbënga imojtsobena bacna soyënga jamana, chë leyiñe iuayana soyëngaca ndëmandánënga imomnana, y Bëngbe Bëtsá bëngbiama tšabá jtsejuabnayëse bënga imoyenama? ¡Ndoñe, ndegombre ndoñe!

<sup>16</sup> Tšëngaftanga tšabá šmondétatšëmbo, ínÿabe cucuatšišiñe mo nÿets tempo nÿe ínÿabiama oservenëngcá šmojoquedá ora, cha jtsobedecénama, ndegombre tšëngaftanga chë nduiñbiama nÿets tempo oservénënga jtsemnana. Chcasna, cachcá jtsemnana, chë tšëngaftanga šmojabocacá bacna soyëngaca mandánënga jtsemnana, y chca jtsemnana mo Bëngbe Bëtsabe bominyiñe tšëngaftanga nÿetsca tescama obanënga cuaftsemncá, o Bëngbe Bëtsá jtsobedecénama, y chca, chabe bominyiñe tšábenga jabocanana.

17 Pero šontsamna Běngbe Bětsá jtsatschuanayana, er tempo tšěngaftanga mo nje ínjabiana oserveněngcá šmojamna, bacna soyěnga jamama juabněngaca mandáněnga; pero mora njetš ainánaca šmojoyeuná, ntšamo chě tcmojanabuatambá soyěnguiñe šmojoyěngacñěcá.

18 Běngbe Bětsá tšěngaftanga cmojatsebacá, bacna soyěngaca nděmandáněnga chašmotsemnana, y morna mo Běngbe Bětsabiana oserveněngcá šmojábcna, ntšamo tšabá yomncá jtsamama.

19 Muentše sěnjoyebuambá ntšamo entšanga mond-betsichamcá, er tšěngaftanga ndoñe corente juabna quešmátsbomna toto palabrenga chacmósertama. Tempo, tšěngaftanga šmonjanamana jaleséciana, lempe ntšamo šmojamncá mandáněnga jtsemnana, bacna soyěnga shembásaftaca o boyabásaftaca jamama juabněngaca, y nje ndaye bacna soyěnga jamama juabněngaca. Cachcá, mora tšěngaftanga cmontsamna jaleséciana tšěngaftanga chašmotsemnana juabněngaca mandáněnga tšabe soyěnga jtsamama, chca, ndegombre Běngbe Bětsabe entšanga chašmotsemnana.

20 Tšěngaftanga, cabá bacna soyěnga jamama juabněngaca mandáněnga šmonjamna ora, tšěngaftanga ndoñe obligacónaca quešměnjatsměna ntšamo Běngbe Bětsabiana tšabá yomncá játamama.

21 ¿Ndaye tšabe soye tšěngaftanga šmojosháchiñe chě tempo šmojánama soyěnga amiñe? Tondaye; y mora chě soyěngama šmojtsěuatja. Chca soyěnga tcojamentšana jóbcnana, entšá njetšca tescama castiganá chaotsemnana, mo Běngbe Bětsabe bominyiñe njetšca tescama obaná cuaftsemncá.

22 Pero mora, ndoñe quešmátsměna bacna soyěnga jamama juabněngaca mandáněnga, y mora bětscá šmojtsentšena Běngbe Bětsá jtseyeunanana y jtseservénana. Chca jtsamana, tšěngaftangbiana puerte tšabá entsemna, er chca, Běngbe Bětsabe entšanga šmochántsemna, y cabana, chě njetšca tescama yomna tšabe vida šmochántsebomna.

23 Bacna soyěnga tcojtsamentšana jóbcnana entšá njetšca tescama castiganá chaotsemnana, mo Běngbe Bětsabe bominyiñe njetšca tescama obaněnga cuaftsemncá; pero, Běngbe Bětsá šojtsatšatná soyěnguentšana, jóbcnana chě njetšca tescama yomna tšabe vida jtsebomnana, Cristo Jesús Běngbe Utabnáftaca cányiñe mo canyáca jtsemněse.

## 7

*Chě bouamnátbentšana ndayá běngbiana mochjuatsjinjě*

1 Jesucristbeyeca catšátanga, tšëngaftanga šmotátšëmbo ntšamo chë leyënga entsangbiana inétsemnama; tšëngaftanga šmotátšëmbo, ntšamo chë leyinë tojtsayancá canyë entsá chaotsamamna, nýe chë entsá tojtsainëntscuana chábioye jtsemándayana.

2 Chcasna, canyë bouamna shembása, ntšamo chë leyinë endayancá bontsemna chabe boyáftaca jëftsemnana, chë boyá tuainëntscuana; pero chë boyá tojtsóbanësna, chë leyinë endayana, chë shemna canya jtoquédana, chë boyabiana ndëmandaná ca.

3 Y chca, chë shema inyë boyabásaftaca chabe boyábioye tbojaingñé, chë boyá cabá vida totsóbomñe ora, chë shemna jtsabáinana chabe boyábioye ínÿaftaca ingñayá ca. Pero chabe boyá tojtsóbanëse, chë leyinë endayana chë shemna canya jtoquédana, chë boyabiana ndëmandaná ca, y cha jtsobernana ínÿaftaca jtobouamayana; y chca tojama ora, boyábioye ínÿaftaca ingñayana ndoñe ntsemnana.

4 Tšëngaftanga chë ošbuachiyëngaftácnaca cachcá endmëna; ya ndoñe más chë léyeca mandánënga quešmátsmëna, er Cristo tojanóbana ora šmojánbocna, mo chë soyëngama obanënga cuaftjoquedangcá, ínÿabe entsanga jtsemnama, Crístbenga, ndabiana Bëngbe Bëtsá tojanma cháuatayenama; y chca jtsemnëse, bënga bëtscá soyënga ntšamo tšabá yomncá chamotsamama, Bëngbe Bëtsá jasérviana.

5 Bënga chë nýe ntšamo cabënga innabošcá monjanियena ora, chë ley enjanoservena bëngbe ainaniñe chamotsebomnama bacna soyënga jamama puerte bëtš juabnënga, nýe bënga tšabá jtsomñama. Ba bacna soyënga tmonjanma, y chë causa bënga šonjánamna nýetsca tescama castigánënga jtsemnama, mo Bëngbe Bëtsabe bominÿiñe nýetsca tescama obanënga cuaftsemncá.

6 Pero mora Bëngbe Bëtsá šojatsebacá chë léyeca ndëmandánënga chamotsemnama; chë ley tempo enjamna bëngbiana mo canyë amëndayacá. Pero mora bënga chë leyama mo obanëngcá montsemna; chca, bënga ndoñe chamondëtsiyenama ntšamo tempo enjamncá, chë uabemana leyëngaca mandánënga, y añe tsmëcá chamotsiyenama, ntšamo chë Uámana Espíritu iuamcá bënga vida chamotsebomnama.

*Bacna soye jamama juabna tcojtsebomnëse, chë ley jamana entsá bacna soye chaomama*

7 Báseftanga muanjayana cach ley bacna soye yomna ca; ndegombre, chë ley ndoñe chca quenátsmëna. Chë léyeca atše tšabá sëndétatsëmbo ndayá yomna bacna soye jamana. Atše ndocna te matijántatsëmbona ndayá yomna chë “ínÿabioye

jtsántšabošana”, “ínjábioye ndoñe cattsantšaboše ca” chë leyiñe ndoñe matmënjanábemëse.

<sup>8</sup> Pero bacna soyënga jamama juabnënga atše bomna causa tonjanma, atše puerte chaitsebošama chë ndoñe šonjamna jtsebošana soyënga; y chca chë juabnëngaca tonjanopasá, atše chë leyënguiñe ndayá iuayanama jtsejuabnayëse. Er ndocna ley tondmëna ora, entšá ndoñe ntsetatšëmbuana ndayá yomna bacna soye jtsamana.

<sup>9</sup> Canje tempo enjamna, chora atše sënjaniyena leyëngama ntsetatšëmbcá, pero ntšamo leyiñe iuayancá sënjanabuátmana ora, ndayá jamama ndoñe yonjamnama, atše sënjanontsé chë bacna soyënga jamama juabnëngaca mandaná jtsemnama;

<sup>10</sup> y chora atše sënjántatšëmbona, chë causa šojtsanmëna nÿetsca tescama castiganá jtsemnama, mo Bëngbe Bëtsabe bominjñiñe nÿetsca tescama obaná cuaftsemncá. Bëngbe Bëtsá chë mando tojanma, atše chë nÿetsca tescama yomna tšabe vida jtsebomnama chayobenama, chë ley jtseyeunanëse; pero ndoñe chiyatanobedecé causa, chë mando tonjanma atše chašotsemna nÿetsca tescama castiganá jtsemnama.

<sup>11</sup> Chë leyentša mandñe inje soyënga ndoñe šonjëtsemna jamama ca yojtsayánayeca, chë bacna soyënga jamama juabnënga átšbeñe, šmonjaningñe bacna soyënga jamama; y chë mando bëtsemnama, chë bacna soyënga jamama juabnënga tmonjanma atše chašotsemna nÿetsca tescama castiganá jtsemnama, mo Bëngbe Bëtsabe bominjñiñe nÿetsca tescama obaná cuaftsemncá.

<sup>12</sup> Pero bënga mëntšá mochjayana: chë leyna tšabe soye endmëna, er Bëngbe Bëtsábiocana tojanóbocna, y chë mandëngnaca Bëngbe Bëtsábiocana tojanóbocna ca; chiñe endayana ndayá tšabá yomna jamana y chca tšabá jtsemnana.

<sup>13</sup> Y asna, ¿quem tšabe soye tojanma atše chašotsemna nÿetsca tescama castiganá jtsemnama, mo Bëngbe Bëtsabe bominjñiñe nÿetsca tescama obaná cuaftsemncá? ¡Ndoñe, ndegombre ndoñe! Chë bacna soyënga jamama juabnënga atše bomna causa, chca átšeftaca tonjanopasá. Chë tšabá yomna sóyeca, chë bacna soyënga jamama juabnënga tmonjanma atše chašotsemna nÿetsca tescama castiganá jtsemnama. Chca chë juabnëngaca tonjanopasá, entšanga jobenayama jtsetatšëmbuama ndayá yomna bacna soye jamana; y chë mando, bacna soye jamama ndoñe yondmëna ca jtsichámuana causa, nÿetsca entšanga mondobena jinjána canje bacna soye, mo canje puerte bëts bacna soyca.

<sup>14</sup> Bënga mondétatšëmbo chë ley Bëngbe Bëtsabe ley yomnama, pero atšna nje canje entšá sëndmëna, canja nÿets

tempo n̄ye bacna soyēnga jamama juabnēngaca mandaná.

15 Ndegombre ndoñe quešnátēsertana ntšamo sēntsamcá, er ndoñe ntsamana ndayá jamama stsebošcá, pero aíñe jt-samana ndayá jamama ndoñe šontsogustancá.

16 Pero chē atšbe ainaniñe stsejuabná ndoñe tšabá tontsemna soye stsamēse, ndayama leyíñe iuayana ndoñe candmēna ntsamana ca, chca atše jtsin̄yan̄nayana chē ley ndegombre tšabe soye yomnama.

17 Chcasna, atše ya ndoñe ntsemnana chē chca tojt-samá, ndayá chē bacna soye jamama atšbe ainaniñe yomna juabnēnga jtsamana atše chca jamama.

18 Atše sēndētatsēmbo, atšbe ainaniñe tondaye yontsemna ntšamo tšabá yomncá atše jamama. Masque sēntseboše ntšamo tšabá yomncá jamama, ndoñe quetsátobena chca jamama.

19 Atše ndoñe quetsátama chē tšabe soye ndayá jamama sēndbošcá, pero aíñe sēntsama chē bacna soye ndayá jamama ndoñe sēndbošcá.

20 Chē ndayá ndoñe jamama sēntsebošcá stsamēse, chca jtsayanana, atše ya ndoñe stsemna chē chca yojtsamá, sinó chē bacna soye jamama atšbe ainaniñe yomna juabnēnga chca yojtsama.

21 Chca, atše tijátatsēmbona ndayá átšeftaca yojtsopasánana; masque, ntšamo tšabá yomncá jamama stseboše, bacna juabnēnga sempre jtsemándayana atše bacna soye chaimama.

22 Atšbe ainanoca puerte sēntsoyejuá, Bēngbe Bētsábiocana yóbocana mandēngama.

23 Pero atše sēnjín̄yena in̄ye soye átšeftaca yojtsopasánama; chē bacna soye jamama atšbe ainaniñe yomna juabnēnga yojtsama atše ndoñe ntjamama ntšamo atšbe juabnoca yomna mo ndegombre soycá, mo chē bacna soyēngaca mandaná cuaftsemncá.

24 ¡Tša lastema atšbiama! Chē bacna soye jamama juabnēnga átšbeñe entsemánda, y entsama atše chašotsemna n̄yetsca tescama castiganá jtsemnama, mo Bēngbe Bētsabe bomín̄yiñe n̄yetsca tescama obaná cuaftsemncá. ¿Nda nanjobenaye chentšana atše jatsbocama?

25 N̄ye Bēngbe Bētsá endmēna nda yobena atše jatsbocama, Bēngbe Utabná Jesucrístbeyeca. Chábioye chama mochtsatschuanaye. Atšbe ainanoca atše aíñe sēntsejuabná chē ley puerte tšabe soye yomna ca, y jobedésama sēntseboše; pero chē bacna soye jamama átšbeñe yomna juabnēngaca, atše bacna soyēnga sēntsama, ntšamo chē juabnēnga sontsemandacá.

## 8

*Ntšamo Běngbe Bětsabe Espíritu yomandacá jtsiyenana*

<sup>1</sup> Y chca, Běngbe Bětsá ndoñe ntjayanana, Cristo Jesúseftaca cányiñe mo canyáca imomnēnga, chěngbe bacna soyēngama n̄yetsca tescama castigánēnga jtsemnama vojtsamna ca.

<sup>2</sup> Er, chē Uámána Espíritoftaca mandánēnga mondmēnayeca, Běngbe Bětsá šojatsebacá, bēnga chē bacna soye jamama juabnēngaca mandánēnga ndětsemnama, y n̄yetsca tescama castigánēnga ndětsemnama, mo Běngbe Bětsabe bominiñe n̄yetsca tescama obanēnga cuaftsemncá. Chē Uámána Espíritu jamana bēnga ndegombre tšabe vida chamotsebonnama, cányiñe mo canyáca Cristo Jesúseftaca jtsemnēse.

<sup>3</sup> Běngbe Bětsá tojanma ndayá Moisesbe ley ndoñe tonjanobenacá, er entšanga mondoyena n̄ye ntšamo cachēnga imobošcá, y n̄ye cányēnga ndoñe ntsobenana jamana ntšamo tojtsamncá. Běngbe Bětsá tojánayana entšangbeñe bacna juabnēngbe mando jtsepochoćama ca, y chama chabe Uaquiñá tbojanichmó. Cha quem luaroye mo canyē entšacá tojánabo, canyē ainánaca, mo chē entšanga bacna soye amēngbe ainancá, pero ndocna te ni mo canyē bacna soye ndoñe tonjéftsema; y tojánabo, chábeyeca entšanga bacna soyēngama perdonánēnga chamotsemnama.

<sup>4</sup> Běngbe Bětsá chca tojanma, bēnga chē mora oyenēnga jtsamēse ntšamo chē Uámána Espíritu ainaniñe yomandacá y ndoñe n̄ye ntšamo bēnga entšanga tmojtsebošcá, chamobinama tšabá jamana ntšamo chē leyiñe yomandancá, ntšamo šojtsamncá.

<sup>5</sup> Chē n̄ye cachēnga tšabá jtsomñama cachēngbe juabnēngaca imoyenēnga, n̄ye sempre jésejuabnayana bacna soyēnga jtsamama, chca bacna juabnēngaca mandánēnga; pero ntšamo chē Uámána Espíritu ainaniñe iuamēndacá oyenēngna, sempre jésejuabnayana tšabe soyēnga jamama, ntšamo chē Uámána Espíritu yobošcá.

<sup>6</sup> Ntšamo chē n̄ye cachá tšabá jtsomñama juabnēngaca mandaná oyenentšana jóboconana entšá n̄yetsca tescama castiganá chaotsemnama, mo Běngbe Bětsabe bominiñe n̄yetsca tescama obaná cuaftsemncá; y ntšamo chē Uámána Espíritu tojtsemandacá oyenentšana jóboconana chē n̄yetsca tescama yomna tšabe vida jtsebonnama y ainaniñe tšabe ebionana.

<sup>7</sup> Chē n̄yets tempo oyenēnga n̄ye ntšamo tmojtsebošcá n̄ye cachēnga tšabá jtsomñama jtsejuabnayēse, Běngbe Bětsabe uayayēnga jtsemnana, er chēnga ndoñe ntsamana ntšamo cha tojtsamēndacá, y chca jamama ndoñe ntsobenana;

<sup>8</sup> y chca, chē n̄ye chca bacna juabnēngaca oyenēnga, ndoñe ntsobenana jamana ntšamo Běngbe Bětsá tšabá tbojtsinycá.



9 Pero tšëngaftanga ndoñe quešmátiyena nýe cach tšëngaftanga tšabá jtsomñama cach tšëngaftangbe juabnëngaca, sinó šmojtsiyena ntšamo chë Uámana Espíritu tšëngaftangbe ainaniñe cmamëndacá, er chë Uámana Espíritu sempre tšëngaftangbe ainaniñe iuétsemna. Nda ndoñe quem Cristbe Espíritu tondbomná, ndoñe Cristbia ntsemnana.

10 Pero Cristo sempre tšëngaftangbe ainanentše vida totsóbomñëse, masque tšëngaftangbe cuerpënga yochjopochóca, quem luarentše entšanga bacna soyënga jtsamana causa, tšëngaftangbe espíritu nýets tempo vida echanjesóbomñe, er Bëngbe Bëtsá tojama tšëngaftanga chabe bominýiñe tšábënga chašmotsemnana.

11 Y Bëngbe Bëtsabe Espíritu, Jesús cháuatayenama tojamabe Espíritu, sempre tšëngaftangbe ainaniñe tojtsemnëse, Bëngbe Bëtsá, chë Cristo cháuatayenama tojamá, echanjama chë tšëngaftangbe yochjóbana cuerpo, cachiñe vida chaotsatsbomnana. Cha chca echanjama chabe Espíritoftaca, y mua sempre tšëngaftangbe ainaniñe iuétsemna.

12 Chcasna, Jesucristbeyeca catšátanga, šontsamna jtsiyenana ntšamo chë Uámana Espíritu ainaniñe šuamëndacá; ndoñe quešnátamna jtsiyenana nýe bënga tšabá jtsomñama cabëngbe bacna juabnëngaca;

13 er nýe bënga tšabá jtsomñama cabëngbe bacna juabnëngaca šmojtsiyenëse, castigánënga šmochántsemna, mo Bëngbe Bëtsabe bominýiñe obanënga cuaftsemncá; pero Uámana Espíritbeyeca, chca juabnëngaca nýetsca bacna soyënga jtsamana jtsajbanama šmojobenase, chë nýetsca tescama yomna tšabe vida šmochántsebmna.

14 Ntšamo chë Uámana Espíritu yomandacá tmojtsamëngna, Bëngbe Bëtsabe básënga jtsemnana.

15 Er Bëngbe Bëtsá ndoñe tonjama bënga ainaniñe canýe espíritu chamotsebomnana, mo nýe ínýabiana nýets tempo oservenëngcá chašotsamëndama, y chca cha chaoma bënga cachiñe chamotsëuatjama; sinó chë Bëngbe Bëtsá tojama bënga chamotsebomnana Espíritu jamana bënga Bëngbe Bëtsabe básënga chamotsemnana, y chë Espíritu endama “Atšbe Taitá ca” bënga Bëngbe Bëtsá chamotsechëmbuanama.

16 Y chë Uámana Espíritu y bëngbe espíritu canýe ora jayanana bënga Bëngbe Bëtsabe básënga imomna ca.

17 Y Bëngbe Bëtsabe básënga mondmënayeca, bëngnaca mochanjójyëngacñe ndayá cha chabe básënga jatšatayama tojašebuachenacá; bënga y Cristo cánýiñe chë soyënga mochanjójyëngacñe, er bënga inýe soyënguiñe tmojasufrí cachcá ntšamo Cristo tojansufricá, Bëngbe Bëtsá uámanënga y bëtsëtsanga chášuabiamama, ntšamo cach Cristo yomncá.

*Běngbe Bětsá bětšětsanga y uámaněnga šochjábiama*

18 Atše ndegombre sěndětatsěmbo, ntšamo quem tempo běnga imosufrincá, puerte batšatema yomna chě běngbe tšabiama uámanana y buashinjinyanana Běngbe Bětsá sochjinyanyiyama.

19 Lempe ntšamo Běngbe Bětsá tojamcá endmēna mo tša cuaftsobatmancá, chaobuache chě Běngbe Bětsá ntšamo chabe básenga imomnama jinyanjyiyama ora.

20 Er lempe ntšamo Běngbe Bětsá tojamcá, mora ndoñe yontsoservena ntšamo chaotsemnama cha tojanjuabocá. Chca tojanopasá, ndoñe chě lempe ntšamo cha tojanmcá chca chaotsemnama tojánbošenayeca, ndayá cabá chě soyěnga tojanmentšana, Adán bacna soye tojanmentšana, Běngbe Bětsá tojanjuabó ntšamo cha tojanmcá joserviama ndoñe ndayama ntšamo cha tempo tojanjuabocá. Pero lempe ntšamo Běngbe Bětsá tojanmcá entsemna mo cuaftsobatmancá canye te, ndēmua ora chě soyěnga chaoservema cha yochjamama jtsetatsěmběse, ntšamo quem luare jobojátšama ora chama cha tojanjuabnacá;

21 Běngbe Bětsá canye te yochjama lempe ya ndoñe más chaondetsopochocama. Y chora, ntšamo Běngbe Bětsá yochjamcá chabe básenga chamotsemnama, lempe ntšamo cha tojanjuabnacá, chabe uámanana y buashinjinyanana jtsebomnama, cachcá yochjama lempe chě cha tojanma soyěngaca.

22 Er běnga mondětatsěmbo lempe ntšamo Běngbe Bětsá tojanmcá mēntscoñama yomna mo canye shembása šešona jtsebomnama ora tbojtsetsetšama tojtsoběsnacá; er lempe ntšamo cha tojanmcá entsemna mo tša cuaftsebošcá Běngbe Bětsá chaomama, chě soyěnga chaoservema ndayama cha tempo tojanjuabocá.

23 Pero ndoñe nye chě lempe ntšamo Běngbe Bětsá tojanmcá yojtsemna mo chě shembasacá, sinó běngnaca; y běnga ainaniñe mondbomna chě Uámana Espíritu, y chě soye endmēna ndayá natsana běnga tmojanóyěngacñe, chě Běngbe Bětsá bětscá soyěnga šochjátšatayentšana; běnga běngbe ainanoca tša jesoběsnayana, běnga chabe básenga chamotsemnama Běngbe Bětsá chaomama mondobátmaněntscuana, y chca, Běngbe Bětsá chaoma běnga ndocna te ndopochócama cuerpěnga chamotsebomnama.

24 Běnga, Běngbe Bětsábeñe jtsošbuáchiyěse monjobátmana ntšamo cha tojanayancá chaomama, y chíyeca cha běnga šojatsebacá; pero ndayama tmobatmancá, ya tojtsěchnějuanama běnga tmojtsonyase, chora chama ya ndoñe ntjátobatmaněngana. Er ndocná jatobátmanana chě ndayá jinjyama ya tojobenacá.

25 Pero ndayama bënga tmobatmancá, cabá ndoñe jinÿama tmontsobena soye tojtsemnëse, bënga jtsamnana Bëngbe Bëtsábeñe jtsobátmanana, uantadënga jtsemnëse, ntšamo tojayancá Bëngbe Bëtsá chaomëntscuana.

26 Uámana Espíritnaca bënga šochandbëtsëjabuachana, er bënga ainaniñe ndoñe corente ntsošbuáchiyana. Bënga ndoñe quemuátstatsëmbo Bëngbe Bëtsáftaca jencuéntana ntšamo ndegombre tšabá yomncá; pero cach Espíritu Bëngbe Bëtsábioye bëngbiama jtsotjanañana, mo chca ora chabe ainanoca tša cuaftsobësnacá; y ndayá chca ora tbojtsotjanañamna, bënga ndoñe ntjobenayana bëngbe palábraca chama jóyebuambayama.

27 Y Bëngbe Bëtsana, ntšamo entšanga ainanoca tmojtsebošcá yonÿá, y ntšamo chë Espíritu jayanama tojtsebošcá yotátšëmbo, er chë Espíritu chabe entšangbiama ibotjanañe, ntšamo Bëngbe Bëtsá yobošcá.

*Bënga ayëñjanayëngama más tmojábocana*

28 Y bënga mondëtatšëmbo, Bëngbe Bëtsá nÿetsca soyënguiñe inétsama cha imobobonshánëngbe tšabiama, ndëmuanyënga cha tojáchembo chabe entšanga chamotsemnana, ntšamo cha jamama yojanjuabnacá.

29 Jesucrístbeñe imošbuachéngbiamna, Bëngbe Bëtsá quem luare tojanma orscana yojanjuabná y chënga tojanabacacá chca chamotsemnana, y chë tempscana tojaninÿaná chënga chabe Uaquiñacá chamotsemnana; chca, chabe Uaquiñá chë bëtscá catšátangbeñe chë natsaná chaotsemnana.

30 Y chë Bëngbe Bëtsá chca tojánabacacangnaca, tojánachembo chabe entšanga chamotsemnana; chëngbiama tojanma chabe bominiñe tšábenga chamotsemnana, y chëngbiámna yochjama chabe uámanana y obenanentšana chamotsebomnana.

31 Y asna, ¿chë soyëngama ntšamo mochjayana? Co Bëngbe Bëtsá bëngaftaca tojtsemnëse, bënga jáyëñjanama ndocná queochatobenaye ca.

32 Cha tondaye tonjanma chabe Uaquiñá jasúfriama ndoñe chabondëtsemnana, sinó tojanalesenciá entšanga chamóba, nÿetsca bëngbe tšabiama. Bëngbe Bëtsá chabe Uaquiñáftaca chca tojanmëse, ndegombre Bëngbe Bëtsá lempe šochanjátšataye.

33 ¿Nda nanjobenaye jayanama chë Bëngbe Bëtsá tojábacacanga bacna soyënga tmojama y castigánënga chamotsemna ca? Ndocná; er cach Bëngbe Bëtsá endmëna nda tojayana bënga chabe bominiñe tšábenga imomna ca.

34 Y asna, ¿nda nanjobenaye jayanama bënga castigánënga jtsemnana šojtsamna ca? ¿Cristo Jesús cha yojtsemna? Ndoñe. Cristo, nda bëngbiama tojanóbana, pero cabá más, ndabiama Bëngbe Bëtsá tojanma cháuatayenama, y mora Bëngbe Bëtsabe

catšbioica yojtsetbemana, jamándama y puerte bëtsá chentše jtsemnana; y choça, chánaca bëngbiana Bëngbe Bëtsábioye ibotjanañe.

<sup>35</sup> ¿Ndayá nanjobenaye Crístbentsana, chë tša šondababuanÿeshanábentsana bënga jtsajuánayana? ¿Padecena soyënguiñe jtsemnana, tša jtsetsetšana, bënga chamosufrima ínÿenga tmojt sama ora, tondaye saná shëntsana ora, tondaye entšayá tmontsábomna ora, o resjo bëngbiana tojtsemna ora, o bënga jtsëbáyama ínÿenga tmojtseboše ora?

<sup>36</sup> Ntšamo Bëngbe Bëtsabe uabemana palabrenguiñe endayancá, canÿe entšá Bëngbe Bëtsábioye ibojauyana ora: Ache causa entšanga cada te šontsëtsëtsná bënga jtsëbáyama ca; entšanga bëngbioye nÿe ntšámnaca jtsaborlánana; bëngaftaca jamana mo chë jobáyama oveshëngaftaca mond-betsamcá ca.

<sup>37</sup> Pero ndoñe; nÿetsca chë soyënguentsana bëngna ayëñjanayëngama más tmonjábocana, cha bënga šuababuánÿeshanayeca.

<sup>38</sup> Er atše tšabá sëndëtatšëmbo tondaye yondobena, bënga Bëngbe Bëtsábentsana, chë tša šondababuanÿeshanábentsana jtsajuánayana: masque ainënga o obanënga tmojtsemna; ni angelënga, ni amëndayënga chca jamama quemátobena; ni chë mora yojtsëchnëjuana soyënga, ni chë más chcoye yochjopása soyënga; ni ndocna obenana cach ndoñe;

<sup>39</sup> ndocna quem luarentša tsbanánoca soye, ni quem luarentša tajsoica soye; ni ndocna inÿe soye ntšamo Bëngbe Bëtsá tojamcá, quenátobena chca bënga jtsajuánayama. ¡Ndocna soye quenátobena bënga Bëngbe Bëtsábentsana, chë bënga šondababuanÿeshanábentsana jtsajuánayana, chë Cristo Jesús Bëngbe Utabnáftaca Bëngbe Bëtsá šojanÿanÿé bonshánentsana!

## 9

*Bëngbe Bëtsá Israeloca entšanga tojabacacá, uámanënga chamotsemnana*

<sup>1</sup> Atše, Crístoftaca cánÿiñe mo canÿacá quetsomñecana, ntšamo sentsichamcá ndegombre endmëna; atše ndoñe quetsátsbostero. Atšbe ainanoca juabnënga, Uámana Espíritbeyeca jtsemandánëse, chë šmonybëuyana tšabá o ndoñe tšabá tijamama, šmontsatsëtsná atše ndoñe stsebosterama.

<sup>2</sup> Ndegombre, atše puerte ngmënaca atšbe entšangbiana, chë Israeloquëngbiana sëntsemna y atšbe ainana tša šontsetsetše, chënga Jesucristbeñe jtošbuáchiyama ndoñe quemátsboše causa.

<sup>3</sup> Tšabá tojtsemnëse, atše stjobenaye jtsebošana cach atše Bëngbe Bëtsábeyeca nÿetsca tescama castigáná y Crístbentsana

luaroca jtsemnama, atšbe entšanga, chë cach atšcá buiñe bomna entšanga jujabuáchama.

<sup>4</sup> Chënga mondmëna chë Israeloca entšanga, chë Bëngbe Bëtsabe bocacana entšanga. Bëngbe Bëtsá chënga chabe basengcá tojánabiama y chë tša bëtsá y uamaná cha yomnama chënga tojaninÿanÿé. Bëngbe Bëtsá ba soye chënga tojanabuayená ndayá cha chëngbiama yojánboše y ndayá chëngbiama jamama, y chë ley chëngbe cucuatšišne tojanáboshjona. Chënga monjántatšëmbo ntšamo Bëngbe Bëtsábioye ndegombre jadórana, y chënga mondbomna chë Bëngbe Bëtsabe šbuachenánana: chënga cha játsebacana.

<sup>5</sup> Chënga mondmëna chë bëngbe tempsca uámana bëts tai-tangbentšánënga, y Crístnaca mo canÿe entšacá, mo canÿe Israeloca entšangbentšacá tojánabo; y cha endmëna Bëngbe Bëtsá, nÿetsca soyënguñe mandayá. Nÿetsca entšanga nÿets tempo cha chamotsatschuaná. Chca chaotsemna.

<sup>6</sup> Atše ndoñe quetsátichamo, ndayá jamama to-janašebuachenacá ndoñe Bëngbe Bëtsá tonjama ca; er, nÿetsca Israeloca entšangbentšënga ndoñe Bëngbe Bëtsabe ndegombre entšanga quemátsmëna.

<sup>7</sup> Ni nÿetsca Abrahámbentšana entšanga, ndoñe chabe ndegombre básenga quemátsmëna; er Bëngbe Bëtsá Abrahámbioye tbojaniyana: “Chë ácbentšana entšanga nÿe Isaácbentšana mochanjabo ca.”

<sup>8</sup> Chca entsayana, bëngna ndoñe šontsamna jtsejuabnayana Abrahámbentšana nÿetsca entšangbiama mo Bëngbe Bëtsabe basengcá; inÿetšá, nÿe chë Bëngbe Bëtsá tbojanšbuachenáyeca Abraham yojánabamna básengbiama cocayé entsemna jtsejuabnayana, Abrahámbentšana ndegombre entšanga bétsemnama.

<sup>9</sup> Er mëntšá endmëna ntšamo Bëngbe Bëtsá tojánayana, Abrahámbioye tbojanšbuachená ora: “Camëntša tempo entsba uata chanjésabo, y Sara canÿe šešona bochantsebomna ca.”

<sup>10</sup> Pero nÿe nÿetšá ndoñe quenátsmëna. Chë Rebecbe uta básatna canÿe taitá ibnabomna, bëngbe tempsca bëts taitá Isaac.

<sup>11-12</sup> Bëngbe Bëtsá, Rebécbioye tbojaniyana: “Acbe mayor uaquiñá, acbe ngomënche uaquiñábioye bochanjasérvia ca.” Cha chca tojánayana jinÿinÿiyama chë básatbentšana canÿa cha tbojánbocacama, Jacob, y ndoñe chë inÿe basa, Esaú, chca jamama tempo cha tojanjuabóyeca. Rebécbioye chca tbojaniyana chë básata cabá ndonÿna ora, y ni canÿe basa cabá ndocna soye ndama ora. Y chca, ntšamo tojanopasacana, tojanopasá chë básatbentšana canÿa y ndoñe chë inÿa chca

chaotsemnama Bëngbe Bëtsá tbojanábuayanayeca, y ndoñe ndayá chata tbojanmama.

<sup>13</sup> Ntšamo Bëngbe Bëtsá chabe uabemana palabrënguiñe tojanayancá: “Jacob sënjánbobonshana, y Esaú sënjanáboyënja ca.”

<sup>14</sup> Y asna, ¿ntšamo mochjayana? ¿Bëngbe Bëtsá ndoñe cachcá nyetscángaftaca endëtsemna ca? ¡Ndoñe, ndegombre ndoñe!

<sup>15</sup> Er Bëngbe Bëtsá Moisésbioye tbojaniyana:

Atše šochanjóngmia nda chaitsebošabiamá,  
y nda chaitsebošá chanjalastéma ca.

<sup>16</sup> Y chca, Bëngbe Bëtsá canye entšá jabocacayana, ndoñe ndayá chë entšá tojtsebošama o tojamama, ndayá Bëngbe Bëtsá tbojalastemama.

<sup>17</sup> Er Bëngbe Bëtsabe uabemana palabrënguiñe, Faraón chë Egiptoca réybioye cha tbojaniyana: “Atše rey tchbonjábema, tša bëtscá atšbe obenana yomnama nyetscanga ábeñe chayinñanyema, y nyets luarentša entšanga atšbiamá chamotatšëmbonama ca.”

<sup>18</sup> Y chca, Bëngbe Bëtsá jalastémama nda tojtsebošábioye, y nda tojtsebošábioye jalesénciana chabiamá nduauenaná chaot-somñama.

<sup>19</sup> Pero ndánaca tšëngaftanguentšá šuatjatjaye: “Bëngbe Bëtsá chca tojtsamëse, ¿ntšamo cha nantsobena jayanana canye entšá bacna soye tojama ca? ¿Nda nanjobenaye chë ndayá Bëngbe Bëtsá tojtsebošama corente contra jtsemnana?”

<sup>20</sup> Pero, nye entšá quecotsemñecá, ¿ntšamo catjobenaye tša uamaná comna ca jtsejuabnayaná, Bëngbe Bëtsá jatstjanayama ndáyeca canye soye chca yojtsama ca? ¿Chë pormaná soye chë chca tojamábioye buanjauyana: “¿ndáyeca chca šcojama ca?”?

<sup>21</sup> Chë fshantse soyënga pormayá jtsoobenana canye fshantsentšana jamana, canye matbaja uámana tescama, y inñajna cada te chaotsoservénama. Cachcá, Bëngbe Bëtsá jtsoobenana jamana ntšamo cha tojtsebošcá, ndayá cha tojama sóyeca.

<sup>22</sup> Bëngbe Bëtsá yojáboše jinñanyiyama entšángaftaca tbojánatnama, chëngbe bacna soyëngama; y yojáboše cha puerte obená yomnama jinñanyiyama. Chiyeca, chënga tša yojanëuantana, chënga chë ndëmuanñengbiamá Bëngbe Bëtsá yochjánayana chëngbe bacna soyëngama castigánënga jtsemnana yojánamna ca, chë ndëmuanñënga jtsapochócama Bëngbe Bëtsá yojtsanprontana.

<sup>23</sup> Y chánaca yojáboše jinñanyiyama cha puerte uamaná y bëtscá yomnama. Cha tojama, bënga chë ndëmuanñënga cha šojanalastemá, chabe obenanentšana y uámananentšana

chamotsebomnama; y cha tempo chca tojanjuabó bēnga uámanēnga y bētsētsanga jábiamama.

24 Bēnga mondmēna chē ndēmuanŷenga Bēngbe Bētsá chama šojánachembo, ínŷengna judío entsanguentšana, y ínŷengna ndoñe judiēngbentšana.

25 Ntšamo chabe uabemana palabrenguiñe, Oséasbe libréšañe Bēngbe Bētsá tojanayancá:

Entsanga ndoñe átsbenga mondmēnēnga, chēnga “atsbe entsanga ca” chantsēbobuatma;

y canŷe luarentša entsanga ndoñe sēnjánababuanŷeshanēnga, chēngna “atsbe bonshánēnga ca” chantsēbobuatma.

26 Y cach luare ndayentše Bēngbe Bētsá tojánayana: “Tšēngaftanga atsbe entsanga ndoñe quešmátsmēna ca”,

cachentše Bēngbe Bētsá ainá chēnga echanjáuyana “atsbe básenga ca”.

27 Israeloca entsangbiana, Isaías jabuachana tojánayana:

Masque Israeloca entsanga puerta banga chamotsemna, nŷa mo chē mar béjayoca chēñyañe cascajca,

Bēngbe Bētsá nŷe báseftanga chentšana echanjátsebacaye;

28 er, ndoñe bēn y Bēngbe Utabná canŷe y nŷetsca tescama echanjayana,

nŷets quem luarentša entsangbiana ndayá chēnga tmojamama tšabá o ndoñe tšabá bétsemnama,

y chēngaftaca echanjama ntšamo chaojayancá ca —cha tojánayana.

29 Ntšamo Isaías tojanayancá, Bēngbe Bētsá Israeloca entsángaftaca ntšamo jamama tojanoyebuambá ora:

Bēngbe Utabná, nŷets obenana bomná,

ínŷenga bēnga jtsapochócama cha tojanalesenciá ora,

báseftanga bēngbe entsanguentšēnga ainēnga chamotsomñama ndoñe matēnjanmēse,

bēnga mora pochocánēnga mamojtsemna, mo chē Sodoma y Gomorra pueblēngoca entsangcá ca,

cha nŷetscanga y nŷetsca tescama tojtsanapochócaye ca.

*Israeloca entsanga y chē tšabe noticiēnga*

30 Chcasna, mora mēntšá mochjayana: ndoñe judiēnga tondaye monjánama Bēngbe Bētsabe bominiñe tšábenga jtsemnama, pero cha tojanma chēnga chabe bominiñe tšábenga chamotsemnama, chēnga chábeñe imojtsošbuáchiyama.

31 Pero, Israeloca entsanga imojánboše Bēngbe Bētsabe bominiñe tšábenga jtsemnama, ntšamo chē leyiñe iuayancá jtsemēse; pero ndoñe chca tmonjanobená.

32 ¿Y ndáyeca chca? Co chē Bēngbe Bētsabe bominiñe tšábenga jtsemnama, chábeñe jtsošbuáchiyēse, chēnga tondaye

monjánama causa chca, sinó chca jtsemnama imojánboše nýe ntšamo leyiñe iuayancá jtsamëse. Y chca, chëngna Jesús tmojtsanaboté, ntšamo chë Bëngbe Bëtsabe uabemana palabrénguiñe chë tmojtsanábotengbiama endayancá, chëngbiama cha yomna mo chë ndëtsbé ndayiñe chënga jtsojestjiamcá ca.

<sup>33</sup> Bëngbe Bëtsabe uabemana palabrénguiñe cha chca tojánayana:

Smochjinýe, atše sënjama Jerusalenentše canýa chaotsemna, y cha endmëna mo ndëtsbecá ndayentše chënga mochjostje,

y canýe peñëscá ndayëse yochjama chënga chamotsótsatšama; pero nda chábeñe tojtsošbuaché, ndocna te nýe bonamente queochátobatmana ca.

## 10

<sup>1</sup> Jesucristbeyeca catsátanga, atše nýets ainánaca sëntseboše y Bëngbe Bëtsá sëntseimpadana, cha Israeloca entšanga cháuatsebacama.

<sup>2</sup> Atše sëndëtatšëmbo y sëntsobena chëngbiama jayanama, chënga puerte mondboše Bëngbe Bëtsá jaserviama, pero ntšamo chënga yojtsësertancá, ntšamo Bëngbe Bëtsá jaserviama yojtsamnamna, ndoñe quenátsmëna ntšamo ndegombre yomncá.

<sup>3</sup> Chënga ndoñe tonjanësertá ntšamo Bëngbe Bëtsá inétsama entšanga chabe bominyiñe tsábenga chamotsemnama, y cachënga tmojúanguango ntšamo jamëse jobenayama Bëngbe Bëtsabe bominyiñe tsábenga jtsemnama; pero ndoñe chca tmonjanobená, chë entšanga chabe bominyiñe tsábenga chamotsemnama ntšamo Bëngbe Bëtsá inetsamcá ainánaca ntjoyëngacñëcá.

<sup>4</sup> Er Cristo tojama entšanga ndoñe chamondétsama ntšamo leyiñe iuayancá, Bëngbe Bëtsabe bominyiñe tsábenga jtsemnama, chca, chënga chamobenama chabe bominyiñe tsábenga jtsemnama, Crístbeñe jtsošbuáchiyëse.

<sup>5</sup> Chë Bëngbe Bëtsabe bominyiñe tsábenga jtsemnama bošëngbiama, ntšamo leyiñe iuayancá jtsamëse, Moisés mëntšá tojánayana, chëngbiama tojanábema ora: “Nda tojtsama nýetsca mandënga ntšamo leyënguiñe endayancá, tsabe vida echántsebomna, nýets tempo chë leyëngaca mandaná ca.”

<sup>6</sup> Mëntšá endmëna ntšamo Bëngbe Bëtsabe uabemana palabrénguiñe iuayana, entšanga chabe bominyiñe tsábenga chamotsemnama ntšamo cha inétsamama, Jesucristbeñe jtsošbuáchiyëse: “Ndoñe cattsetjanaye: ‘¿Nda celoye yochjátsjua ca?’ (chca endmëna ndayá Cristo quem luaroye chaotsmama);



<sup>7</sup> o, ‘¿Chë obanënga imomna luaroye yochjátśma ca?’ (chca endmëna ndayá Cristo chë obanënga imomna luarentšana chaotsjuama).”

<sup>8</sup> Ntšamo Bëngbe Bëtsabe uabemana palabrénguiñe iuayancá mëntśá endmëna: “Tšëngaftanga paselo šmontsobena ntšamo Bëngbe Bëtsá tojabuayenacá jouenama, tšëngaftanga ya chama palabréngaca šmojoyebuambá y tšëngaftangbe ainaniñe chama šmojtsejuabná.” Chë buayenánana endmëna ndayá bënga ftsabuayiynacá, y chiñe endayana Jesucristbeñe jtsošbuáchiyama šojtsamna ca.

<sup>9</sup> Chë buayenana soyënguiñe endayana, Jesús ndegombre Bëngbe Utabná yomna ca aca tcojayanëse, y Jesucristo cháuatayenama Bëngbe Bëtsá tojanmama, nyets ainánaca tcojtsošbuáchese, Bëngbe Bëtsá cmochjatsbocá ca.

<sup>10</sup> Er ainanoca bënga Jesucristbeñe jtsošbuáchiyana y Bëngbe Bëtsá jamana cachabe bominiñe tšábenga chamotsemnana; palabréngaca bënga jinyanñiyana ndegombre Jesucristbeñe imojtsošbuáchema, y Bëngbe Bëtsá bënga játsebacana.

<sup>11</sup> Er Bëngbe Bëtsabe uabemana palabrénguiñe mëntśá endayana: “Nda Bëngbe Bëtsábeñe tojtsošbuaché, ndocna te nye bonamente queochátobatmana ca.”

<sup>12</sup> Judiënga y ndoñe judiënga atsebácanënga mondmëna cach sóyeca, er canñe Utabná nyetscangbe Utabná endmëna, y cha tmojtsoštšëmbuanëngbiama, cha bëtscá jtsamana.

<sup>13</sup> Er Bëngbe Bëtsabe uabemana palabrénguiñe mëntśá endayana: “Ndánaca Bëngbe Utabná tbojtsoštšëmbuanábioye, cha bochanjatsbocá ca.”

<sup>14</sup> Pero, ¿ntšamo cha mochjótšëmbona, chábeñe ndoñe tmontsošbuáchese? ¿Y ntšamo chábeñe mochtsošbuáchiye, chabiama jóyebuambayama ndoñe tmonjouenëse? ¿Y ntšamo chabiama mochjouena, chabe buayenana soyënga chënga jáuyanama ndocná tontsemnëse?

<sup>15</sup> ¿Y ntšamo chabe buayenánana mochtsabuátambaye, chëngbioye jíchamuama ndocná tontsemnëse? Ntšamo Bëngbe Bëtsabe uabemana palabrénguiñe endayancá: “¡Tša tšabá chë buayenánana abuátambayënga tmojášhajna ora ca!”

<sup>16</sup> Pero nyetscanga chë tšabe noticiënga ndoñe ntjoyeyunayana. Cach Isaiás mëntśá tojánayana: “Utabná, ¿nda chë mondabuayiyná soyënguiñe yojtsošbuaché ca?”

<sup>17</sup> Chcasna, chë tšabe noticiënga jouenëse, entšanga jobenayana Jesucristbeñe jtsošbuáchiyana; y nda Cristbiamama tojtسابuayiynase, entšanga chabe buayenánana jouenana.

<sup>18</sup> Pero atše šcotjá: ¿ndegombre nandmëna judiënga chë buayenánana ndoñe tmonjanuena ca? ¡Aíñe, chënga aíñe tmonjanuena! Ntšamo Bëngbe Bëtsabe uabemana

palabrënguiñe endayancá, chë Bëngbe Bëtsabe buayenana soyëngama oyebuambnayëngbiama:

Chëngbe oyebuambnayana nyets quem luariñe tojóshjango, y chëngbe palabrënga nyets luarënguentša entsangbenache tojuáshana ca.

19 Pero cachiñe šcotjá: ¿Israeloca entsanga chë buayenánana ndoñe tonjanësertá ca? Natsana, Moisés mëntšá tojánayana, chë ndoñe judiënga Jesucristbeñe tmojtsošbuaché ora, ntšamo chë judiënga mochtsanjuabnayama tojanoyebuambá ora:

Atše, Bëngbe Bëtsá, chanjama, ndayá chë ndoñe judiënga chamojashjache soyëngama tšëngaftanga chašmotsíyentsbuašama, chënga chë ndoñe monjamna mo tšëngaftangcá atšbe entsanga.

Atše chca chanjama chëngaftaca, chënga chë tempo Bëngbe Bëtsabe soyëngama ndoñe tonjanësertá ca.

20 Isaíasnaca, Bëngbe Bëtsabiama tojanoyebuambá ora, puerte añémoca tojánayana:

Chë atše ndoñe šmondënguanga, šmonjínÿena; y chë atšbiama ndoñe mondënoticiangbioye sënjenonÿinÿé ca.

21 Pero Israeloca entsangbiama mëntšá tojánayana:

Nyets tempo atše tša sënjánama, chënga átšeftaca tšabá tempcá chamotsatsmënama,

pero chënga ndoñe chemátanbošena jouenama, y atšbe contra monjëtsemna ca.

## 11

*Bëngbe Bëtsá, Israeloca entsangbiama tsabe juabna yobomana tojinÿanÿé*

1 Y as mora šcotjá: ¿Bëngbe Bëtsá chabe entsanga tojt-sanëbaté? ¡Ndoñe, ndegombre ndoñe! Cach atše canÿe Israelocá sëndmëna, Abrahábentšana entsá y Benjaminbe bëts pamillentsana entsá.

2 Bëngbe Bëtsá chabe entsanga ndoñe tonjubaté, chë temp-scana tojánabacacanga. Tšëngaftanga šmondëtatšëmbo ntšamo Bëngbe Bëtsabe uabemana palabrënguiñe endayancá, Bëngbe Bëtsabe juabna oyebuambnayá Elías, Israeloca entsangbe contra Bëngbe Bëtsábioye cha ibojanatsëtsná ora:

3 “Bëngbe Utabná, acbe juabna oyebuambnayënga tmojt-sëbaye y acbiama pormana altarënga tmojtsepochochá; nyë atše vídaca tijoquedá, y chënga montseboše átšnaca jóbama ca.”

4 Y mëntšá Bëngbe Bëtsá tbojanjuá: “Atše canÿsëfta uaranga boyabásenga atšbiama sënjacuedá, Baal ndoñe tmonjado-ranga, ndayá entsanga tmojobopormá y imojtsejuabná canÿe dios yomna ca.”

<sup>5</sup> Mórna ca cachcá entsemna, judiënguentše báseftanga monduájamna Jesucristbeñe ošbuáchiyënga, ndëmuanyënga Bëngbe Bëtsá tojabacacá, cha chëngbiana tšabe juabna bómnyeca.

<sup>6</sup> Bëngbe Bëtsá entsanga jabacacayana chëngbiana tšabe juabna bómnyeca; y ndoñe chca ntjamana ndayá entsanga tmojamama. Er ndayá tmojamama Bëngbe Bëtsá entsanga tojabacacase, cha nanjínyanñiye cha chca inétsama, ndoñe nñe chëngbiana tšabe juabna bómnyeca.

<sup>7</sup> ¿Y asna? Israeloca entsanga ndoñe chemátaninñena ntšamo Bëngbe Bëtsabe bominiñe tšabenga jtsemnana, pero chënguentšënga básefta bocacánëngna aññe tmojanobená. Bëngbe Bëtsá tojanalesenciá chë inñyënga Israeloquënguentšana chabe buayenana soyënga ainaniñe ndoñe chamondóyëngacñama;

<sup>8</sup> ntšamo Bëngbe Bëtsabe uabemana palabrenguiñe endayancá: “Bëngbe Bëtsá tojama chënga chabe soyëngama jósertama ndoñe chamondëtsobenama, y mëntscoñama chënga ndoñe quemátobena chabe soyëngama ni jinñyana ni jósertana, mo nduabínñënga o nduauenanënga cuaftsemnëngca ca.”

<sup>9</sup> Davidnaca chëngbiana mëntsá tojánayana: Mo chë entsanga canñe fiestentse oboyejuayënga, chëngbe uayayëngbeyeca nñe ndeolpe ishëchenëngcá, y mo chë bayëngbiana uachmaniñe ishëchenëngcá, chënga mal chamopasama chaomama Bëngbe Bëtsá sëntseimpadana, mo nda ndëtsbeñe cuaftsojestjca.

Chca Bëngbe Bëtsá chaoma, chëngbe bacna soyëngama; y cha cháuyana chënga puerte castigánënga jtsemnana yojtsamna ca, bacna soyënga tmojama causa;

<sup>10</sup> Bëngbe Bëtsá chaoma ntšamo mochjapásama chënga ndoñe chamondobená jtsetatšëmbuana, y chaoma puerte chamosufrima, nñets tempo padecena soyënguiñe jtsiyenëse ca —cha tojánayana.

### *Bëngbe Bëtsá ndoñe judiënga tojatsebacá*

<sup>11</sup> As mora šcotjá: ¿Israeloca entsanga Bëngbe Bëtsá ndoñe tmonjanoyeuná ora, cha tojánayana chënga nñetsca tescama castigánënga jtsemnana yojtsamna ca, ndocna inñe soye chëngbiana ntsemncá? ¿Chëngbiana yojamna mo chë ndëtsbeñe jojestjiana y jtëtsbanama ndoñe más ntjobenayancá? ¡Ndoñe, ndegombre ndoñe! Chca ndoñe quenátsmëna. Chënga Bëngbe Bëtsá ndoñe chematanoyeuná causa, ndoñe judiënga tmonjántatšëmbona ndayá bëtsemnana Bëngbe Bëtsábeyeca atsbocaná jtsemnana; y chë causa, mora, judiënga, ndayá chë ndoñe judiënga Bëngbe Bëtsábentšana tmojoshachiñcá montsiyentšbuaše.

12 Judiënga bacna soyënga tmojanma causa, inÿe entšanga quem luarentše tmojobená ba tšabe soyënga jtsebomnama. Chë judiënga tmonjanorrebajá causa, chë ndoñe judiënga ba tšabe bendicionënga Bëngbe Bëtsábentšana tmojosháchiñe. Y chca, chë bëtscá judiënga Bëngbe Bëtsá játsebacama, chënga atsebácanënga chamojtsemna ora, más bëtscá tšabe bendicionënga Bëngbe Bëtsábentšana nÿetsca entšangbiana echántsemna.

13 Ntšamo mora chanjayancá, tšëngaftanga ndoñe judiëngbiana entsemna. Bëngbe Bëtsá šojichmó chabe soyëngama chë ndoñe judiënga jábuayenama; atše sëntsejuabná puerte uámana trabajo stsebomna ca.

14 Atše sëntsobátmana, quem trabájoca atše jobenayana jamama chë cach atšcá buiñe bomna entšanguentšënga, ndayá chë ndoñe judiënga Bëngbe Bëtsábentšana tmojoshachiñcá chamotsiyentšbuaše, y chca, ndayá tijamama, Bëngbe Bëtsá chënguentshana báseftanga cháuatsebacama.

15 Er chë judiënga Bëngbe Bëtsá tojtsanëbaté ora, cha tojanma inÿe entšanga quem luarentše cháftaca tempcá tšabá chamotsatsmënama; y chënga cha chamojoyeuná ora, corente tšabá echántsemna, nÿa chënga mo obanënga cuabmëncá y cuaftsatayanëngcá.

16 Nda canÿe arninÿentshana chë natsana tandëse Bëngbe Bëtsabiama joserviama yojtsemna ca tojayanëse, jtsemnana mo nÿetsana chabiama cuaftsemncá. Canÿe betiyentša tbëtëjënga Bëngbe Bëtsabiama yojtsemna ca canÿa tojayanëse, nÿetsca chë betiyentša buacuafjëgnaca Bëngbe Bëtsabiama jtsemnana.

17 Chë judiënguentshe báseftanga Jesucristbeñe ndoñe montsanošbuaché ora, tšëngaftanga chë ndoñe judiënga šmonjanobená chábeñe jtsošbuáchiyana. Y chca, judiënga monjamna mo canÿe jena olivo betiyentshana entšanga tmojatëtše buacuafjëngcá, y tšëngaftangna mo tjoca olivo betiyentša buacuafjënga, chë jena olivo betiyeshiñe jenëfjëngcá. Mora tšëngaftanga Bëngbe Bëtsábentšana cachca tšabe soyënga chë judiëngaftaca šmontsebomna, mo chë jena buacuafjënga y cachentša buacuafjënga cach tbëtëjentšana lempe cuaftsoyëngacañcá.

18 Ndoñe šmattsenábotamnaye, tšëngaftanga Bëngbe Bëtsabe tšabe soyënga šmojtsebomnama, chë Jesucristbeñe ndoñe montsanošbuaché judiëngbiana yojamna soyënga. Smochtsejuabnaye, buacuafjëngna chë tbëtëjëngayeca vida jtsebomnana, y ndoñe tbëtëjënga chë buacuafjëngayeca; cachcá, tšëngaftanga nÿe Bëngbe Bëtsábeyeca chë tšabe soyënga šmojtsebomna.

19 Pero tšëngaftanga šmuatjayana: “Aíñe, pero Bëngbe

Bëtsá básefta judiënga tojanëbaté, Jesucristbeñe ndoñe montsanošbuaché causa; chíyeca bënga fsënjanobená mo buacuafjënga betiyiñe jenëfjëngcá chca tšabe bendicionënga Bëngbe Bëtsábentšana jóyëngacñana ca.”

<sup>20</sup> Ndegombre, chënga Jesucristbeñe ndoñe montsanošbuaché causa, mo buacuetëtsenëfjëngcá tmonjanoquedá, pero Jesucristbeñe šmojtsošbuáchema, tšëngaftanga šmojoquedá Bëngbe Bëtsábentšana tšabe bendicionënga jtsoyëngacacñá. Chcasna, chama ndoñe šmattsenábotamnaye; más tšabana cuedado jtsebomnana.

<sup>21</sup> Er Bëngbe Bëtsá, chë Jesucristbeñe ndoñe montsanošbuaché judiënga, ndoñe tonjanaperdoná, y chënga chabe entšanga bëtsemnamna, monjamna mo cach betiyentša buacuafjëngcá; tšëngaftanga, chë mo betiyiñe jena buacuafjëngcá šmomnënga, cha cach ndoñe quecmochátaperdonaye, chábeñe ošbuáchiyana šmojtšajbanase.

<sup>22</sup> Bëtscá šmochtsejuabnaye Bëngbe Bëtsá puerte tšabia yomnama, pero cha tšatjayá yomnámnaca šmochtsejuabnaye; tšatjayá endmëna chë bacna soyënga tmojtšamëngaftaca, pero tšëngaftangaftacna puerte tšabia. Cha tšëngaftangaftaca chca echántsemna, tšëngaftanga chca chašmojtšomerecëñentscuana; pero ndóñesna, Bëngbe Bëtsá echanjama tšëngaftangnaca mo buacuetëtsenëfjëngcá chašmoquedama, chë tšabe bendicionënga Bëngbe Bëtsábentšana ntsoyëngacacñá.

<sup>23</sup> Y ntšamo mora imojtsejuabnacá chë judiënga tmojatrocá y tmojontšé Jesucristbeñe jtsošbuáchiyana, chëngnaca cachiñe chë tšabe bendicionënga Bëngbe Bëtsábentšana mochanjóyëngacñe, y mochántsemna mo betiyiñe jena buacuafjëngcá, er Bëngbe Bëtsá becá obenana endbomna jamama ntšamo chë judiënga tempo imojanbomncá cachiñe chamotsatsbomnama.

<sup>24</sup> Chcasna, más paselo jtsemnana canye jena olivo betiyentša buacuatëtsenëfja cach betiyiñe jëtsjena, y ndoñe, chë tjoca olivos betiyentša buacuafja canye jena olivos betiyiñe chaójuama jájena. Cachcá, más paselo jtsemnana chë Jesucristbeñe ndoñe montsošbuaché judiëngbiamna, jontšana jtošbuáchiyana y tšabe bendicionënga Bëngbe Bëtsábentšana jóyëngacñana, tšëngaftanga ndoñe judiënga chë tempo Bëngbe Bëtsá ndoñe šmonjanábuatmëngbiamna.

*Bëngbe Bëtsá nyetscángaftaca puerte tšabia endmëna*

<sup>25</sup> Jesucristbeyeca catšátanga, atše sëntseboše tšëngaftanga chašmotsetátšëmbo chë tempo Bëngbe Bëtsá entšanga ndoñe tonjaninýanýé soyëngama. Atše sëntseboše tšëngaftanga

quem soyëngama chašmotsetátšëmbo, chca, tšëngaftanga ndoñe judiënga chë judiëngbiana más uámanënga šmomna ca ndoñe chašmondëtsejuabnama. Ndayá Bëngbe Bëtsá tempo entšanga ndoñe tonjaninÿanÿecá, quem soye endmëna: Bëngbe Bëtsá tojalesenciá, nÿe baseftatescama banga Israeloquënga Bëngbe Bëtsabe soyënga ainaniñe ndoñe chamondóyëngacñama; pero chca echántsemna, chë ndoñe judiënguentše atsebácanënga jtsamnama imomnënga, atsebácanënga chamojtsemnëntscuana.

<sup>26</sup> Chca chaojopasá ora, nÿetsca Israelentša entšanga atsebácanënga mochántsemna; ntšamo Bëngbe Bëtsabe uabemana palabrënguiñe endayancá:

Entšangbe atsebacayá Israelocana echanjabo,

y echanjama nÿetsca Jacóbëbentšana entšanga ndoñe más vida chamondëtsebmna, bacna soyënga jtsamëse ca.

<sup>27</sup> Y mëntšá endmëna ntšamo chëngbiana chjašebuachená:

chënga játsebacana, chëngbe bacna soyëngama chajaperdónaye ora ca —chiñe endayana.

<sup>28</sup> Chë tšabe noticiënga tmojtšanaboté causa, judiënga Bëngbe Bëtsabe uayayënga mondmëna, chca, tšëngaftangbe tšabiana chaotsemnama. Pero Bëngbe Bëtsá tojánabacacayeca, chëngnaca Bëngbe Bëtsabe bonshánënga mondmëna, er Bëngbe Bëtsá chëngbe tempsca uámana bëts taitanga chca tojanašebuachená.

<sup>29</sup> Chca endmëna, er Bëngbe Bëtsá ndocna te juabna ntjatrócana; nÿetscanga chabe entšanga chamotsemnama tojáchembënga, nÿets tempo cha echántsabuanÿeshana, y echanjama chëngbeñe tšabe bendicionënga chaotsemnama.

<sup>30</sup> Tšëngaftanga ndoñe judiënga tempo ndoñe šmonjánama ntšamo Bëngbe Bëtsá inabošcá; y mora, Bëngbe Bëtsá tcmojalastemá, judiënga Bëngbe Bëtsá ndoñe tmonjoyeuná causa.

<sup>31</sup> Cachcá, Bëngbe Bëtsá tšëngaftanga tcmojalastemama, judiënga montsemna chë Bëngbe Bëtsá ndoñe montsobedecënënga, chca, Bëngbe Bëtsá chëngnaca cháualastemama.

<sup>32</sup> Er Bëngbe Bëtsá tojinÿanÿé, cha ndoñe ntjoyeunayama juabnëngaca nÿetscanga mandánënga imomnama, chca, nÿetscanga jálastemama cha jobenayama.

<sup>33</sup> ¡Ndegombre, Bëngbe Bëtsá nÿetscangbiana puerta tšabia endmëna, puerta osertaná y puerta obiashjachá! Ndocná quenátobena ínÿenga jábuayenama ndayá Bëngbe Bëtsá jamama inetsejuabnacyá, y ndocná quenátobena corente josértana ntšamo cha inetsamcá.

<sup>34</sup> Ntšamo Bëngbe Bëtsabe uabemana palabrënguiñe endayancá:

Ndocná quenátstatsëmbo ntšamo Bëngbe Bëtsá inetsejuabnaya;

ndocná quenátobena cha jábuayenama ndayá jamana ibomnama.

<sup>35</sup> Ndocná quenátobena ndayánaca cha natsana jshatsetayana, chë tbojatsetabiama ndebená cha jatsmënema, y chë ndebënema ndayánaca jtoyiyama chabotsemnema ca.

<sup>36</sup> Er lempe cha tojama, lempe cha iútabna, y lempe chabiama yomna. ¡Nÿetscanga nÿetsca tescama cha chamotsatschuaná! Chca chaotsemna.

## 12

### *Ntšamo jtsiyenëse Bëngbe Bëtsá jtseservénama*

<sup>1</sup> Chcasna, Jesucristbeyeca catšátanga, Bëngbe Bëtsá bënga ba soye šojalastemáyeca, puerte cbontsaïmpadana, tšëngaftanga Bëngbe Bëtsá chašmëyana tša šmojtseboše lempe jamana chábioye jadórama ca, Bëngbe Bëtsá jadórama mo ndayá cuafjobacá y cuafjuatšëmboncá, mo cabá ainá cuaftsomñcá. Smochjauyana tšëngaftanga sempre smochtsentsëna cha servénana y jtsamëse cha tšabá bëngaftaca chaotsemnema. As, chca chašmojtsama ora, ndegombre oyejuayá Bëngbe Bëtsá šmochántsebiamnaye.

<sup>2</sup> Ndoñe šmattsiyena jtsamëse ntšamo chë nÿe quem luarama enójuabnaye entšanga monduamancá, y smochjaleséncia Bëngbe Bëtsá mo tsëm entšangcá chácmbiamama, tšëngaftangbe ainana y juabna mo tsëmcá chaomëse. Chca, tšëngaftanga smochanjobenaye jtsejuabnayana y smochántsetatsëmbo ntšamo Bëngbe Bëtsá yobošcá: ndayá tšabá yomna, chë ndayá cha oyejuayá ibnabema, y ndayá ya ndoñe yondopodena más tšabá jtsemnema.

<sup>3</sup> Ndayá Bëngbe Bëtsá atšbiana tšabá jtsejuabnayëse šojatsetama, nÿetsca tšëngaftanga cbochjáuyana, ndocná cachabiama chaondëtsejuabná más uamaná yomna ca, nÿe ntsachetšá jtsenójuabnayana ibomna nÿetšá. Más tšabá, cada ona cachabiama tšabá chaotsenojuabná, y chca chaotsenojuabná ntšamo chabe ošbuáchiyana yomncá, chca, chë Bëngbe Bëtsá tbojatsetá ošbuáchiyana chabiama chaotsetrabájama.

<sup>4</sup> Er, ntšamo bënga cada ona mondbomna canÿe cuerpo y chë cuerpiñe ba soyënga jtsebmomna, y nÿetsca soyënga ndoñe cach soyama cuerpiñe ntsoservénana,

<sup>5</sup> cachcá bënga ošbuáchiyënga, masque bëtscanga imomna, Crísoftaca cánÿiñe mo canÿacá mondmënayeca, bënga mondmëna mo chabe cuerpo cuaftsemncá, y cada ona cánÿiñe mo canÿacá nÿetscángaftaca.

6 Běngbe Bětsá tojama běnga cada ona chamotsebomnama ndoñe cachca chabe tšetana obenana, ntšamo Běngbe Bětsá cada ona běngbe tšabiana inajuabnaycá. Y chabe juábnaca běnga jtsóyebuambnayama jtsobenama Běngbe Bětsá tojaměse, chca mochtsama ntsachetšá chábeñe běngbe ošbuáchiyana yomncá.

7 Ošbuáchiyěnga bětscá jasérviana běnga chamotsobenama Běngbe Bětsá tojaměse, chca mochtsama. Tšabá jtsabuátambayama běnga chamotsobenama Běngbe Bětsá tojaměse, chca mochtsama.

8 Inyěnga jañémuama běnga chamotsobenama Běngbe Bětsá tojaměse, chca šontsamna. Lempe ntšamo běnga tmobomncá inyěngbiámnaca chaotsemnama běnga jamama chamotsobenama Běngbe Bětsá tojaměse, nyets ainánaca chca šontsamna. Aměndayěnga jtsemnama běnga chamotsobenama Běngbe Bětsá tojaměse, šontsamna bětscá jamana tšabá jtsaměndayama. Inyěnga jálastemama běnga chamotsobenama Běngbe Bětsá tojaměse, šontsamna oyejuayěnga chca jamana.

*Ntšamo běnga Jesucristbeñe ošbuáchiyěnga jtsamana šojtsamna*

9 Inya chašmojtsebobonshana ora, nyets ainánaca chca šmochtsama. Ndayá yomna ndoñe tšabe soye šmochtsaboté y chentšana šmochtsojuánañe; šmochtsentšena ntšamo tšabá yomncá jtsamama.

10 Cmontsamna nyetscanga puerte jtsenbobonshánana, Jesucristbeyeca catšátanga quetsomñecá, chě ín्यěnga běngbiana más uámaněnga imomna ca jtsejuabnayěse.

11 Ndoñe oyěnjayěnga šmattsemna, ndayá bětscá Běngbe Utabnabiama šmochtsetrabájaye; ainaniñe corente añemo jtsebomněse, Běngbe Utabná sempre šmochtseserverna.

12 Tšěngaftanga Běngbe Bětsábeñe jtsošbuáchiyěse, chábeñe šmobatmánayeca, puerte oyejuayěnga šmochtsemna; padecena soyěnguiñe chašmojtsachnějuana ora, puerte uantaděnga šmochtsemna, y sempre Běngbe Bětsáftaca šmochtsencuéntaye.

13 Běngbe Bětsabe entšanga opresido bomněnga šmochjújabuache, y šmochtseprontana tšěngaftangbe yebnentše posada ín्यěnga júyentšamiama.

14 Běngbe Bětsá šmochtseimpadana, chě tšěngaftanga chašmosufrima aměngbiana tšabe bendicioněnga cha chaotsamama; añe, cha šmochjaimpáda tšabe bendicioněnga chěngbiana chaotsamama, bacna soyěnga ndoñe.



15 Oyejuayënga ínÿengaftaca šmochtsemna, chënga oyejuayënga chamojtsemna ora; ngménaca šmochtsemna, ínÿenga ngméniñe chamojtsemna ora.

16 Šmochtsiyena nÿetscanga jtsenÿeunanëse. Nÿe cach tšëngaftanga uámanënga ndoñe šmattsenobiamnaye, sinó chë nduámanënga imomnëngaftaca tšabá mándbomnënga šmochtsemna. Ndoñe šmattsejuabnaye yapa osertánënga šmomna ca.

17 Inÿenga bacá chacmojtsaborlana ora, ndoñe šmattsatëchënanaguaye; corente šmochtsentsëna ntšamo nÿetsca entšangbiama tšabá yomncá jtsamama.

18 Ntsachetšá šmojobenacá, lempe šmochtsama natjëmbana nÿetsca entšángaftaca jtsiyenama.

19 Atšbe bonshánënga, ínÿenga bacá chacmojtsaborlana ora, ndoñe šmatjama chënga chë causa chamotsesufrínama, ndayá Bëngbe Bëtsá šmochjaleséncia chënga cháúacastigama; er Bëngbe Bëtsabe uabemana palabrénguiñe cha tojánayana: “Atšbe chanjama chënga chamosufrima, ínÿenga chamosufrima tmojama causa; y chënga chanjácastigaye, ínÿengbioye bacá tmojaborlá causa ca.”

20 Chca játamamna, mëntšá šmochjama, ntšamo cachánaca tojanayancá:

Acbe uayayá tbojtseshëntsane, saná cochjacaredáda, y tbojtsajuendase, cochjuáfsiye.

Chca chacojamëse, cochanjama cha puerte chaotsëuatja ntšamo tcmojaborlama, y ainana corente chabotsetšëna, mo chebana iñbenga chabe bestšašiñe cuafjacacá ca.

21 Ndoñe šmatjaleséncia, ntšamo ndoñe tšabá tontsemncá tšëngaftanga chacmayëñjanama. Chamna, ntšamo tšabá yomncá jtsamëse, chë ndoñe tšabe soye šmochjayëñjaná.

## 13

1 Nÿetsca entšanga entsamna jtsamana ntšamo chë amëndayënga tmojtsamëndacá, er ndocná obenana ntsebomnana, Bëngbe Bëtsá ndoñe chca tbonjalesenciase, y nÿe Bëngbe Bëtsá tojama amëndayënga obenana chamotsebomnama.

2 Chca, chë amëndayëngbe contra tmojtsemnëngna, ntšamo chaotsemnama Bëngbe Bëtsá tojayancá contra chënga jtsemnana; y chca contra tmojtsemnëngna, castigánënga mochántsemna;

3 er ntšamo tšabá yomncá amënga, ndoñe quenátamna ndayama chë amëndayënga jatebëuatjana, nÿe chë bacna soye amëngna aiñe. Tšëngaftanga šmojtseboše jtsiyenama chë amëndayëngbioye ntjatebëuatjácá; chcasna, ntšamo tšabá

yomncá šmochtsama, y chë amëndayëngna tšabe bomínjeca mochantsonyaye ntšamo chašmojtsamcá;

4 er chë amëndayëngna Bëngbe Bëtsabe trabajo amënga mondmëna, tšëngaftangbe tšabiama. Pero bacna soyënga šmojtsamësna, cmontsamna jtsiyenana chë amëndayënga jtsebëuatjëse, er chënga jacastígama obenana mondbomna, y chca mondbëtsama. Chënga, Bëngbe Bëtsabe mándoca jayanana chë bacna soye amënga ndoñe tšabá tmonjama ca, y jamana chënga chamosufrima.

5 Chiyeca, jtseytana ntšamo chë amëndayënga tmojtsichamcá jtsamana, pero ndoñe nýe chë castigo ndoñe chašmondëtsebonnama, ndoñe chca šmontsama causa, sinó chë ainanentša tšabe juabnënga ntšamo tbojtsëtsëtnacá joyeunayama yómnyayeca.

6 Cachca soyëngama, amëndayëngbiama impuesto tšëngaftanga jtsatsquécjnayana; er chë amëndayënga Bëngbe Bëtsabe oservénënga mondmëna, ntšamo chiñe jtsamama tojtsamncá corente tmojtsentšena ora.

7 Chcasna, tšëngaftanga šmochjáyentšbuachiye ntšamo chënga jtsebomnama tojtsamncá. Chë crocénana entšanga ayëngacayëngbioye, ndaye impuéstnaca šmochtëbuénaye; chëngna šmochtsarrespetana ntšamo yomncá, y chënga uámanënga chamotsemnana šmochtsejuabnaye.

8 Crocénana inýa jëtsëntšabuáchiyama chacmojtsamnëse, nýe ntoyiycá ndoñe šmatjoquéda, nýets tempo ndebénënga; nýe quem soye sempre šmochtsama: nýetscanga šmochtsenbobonshana; er nda ndëmua entšábioye tbojtsebobonshana, ya tojama ntšamo leyiñe yomandancá.

9 Quem mandënga, “acbe shema ínýaftaca ndoñe cattseíngñaye, inýa ndoñe catjóba, ndoñe catjatbëba, inýa tojtsebomna soye ndoñe nýe acbiama cattseboše”, y chë inýe mandënga leyiñe lempe quem mandíñe entsemna: “Ndëmua entšánaca cochtsebobonshana ntšamo cach aca cuenobobonshancá”.

10 Nda ndëmua entšábioye tbojtsebobonshana, chábioye ndoñe bacá ntjabórlana; chca, ndánaca jtsebobonshánëse, entšá jamana lempe ntšamo leyiñe yomandancá.

11 Chë soyënga cmontsamna jtsamana, er bënga mondëtatšëmbo ya chë uámana tempiñe imojtsiyenama, chë mocna ora šojtsamna prontánënga jtsemnana, mo ocnayentšana cuafjofšenangcá, Jesucristo jasérviam a jtsentšënëse. Chca cmontsamna jamana, er chë Bëngbe Bëtsá bënga játsebacama te, mora ya más bécoñe entsemna, ntšamo chë Jesucristbeñe jtsošbuáchiyama tmonjanontsé ora enjamnama.

<sup>12</sup> Mora bēnga mondoyena canye luarentše bētská bacna soyēngaca y ngmenánaca, y chca jtsemnana mo bēnga nyets tempo ibetiñe cuaftsajncá. Pero ya entsobeco chē Bēngbe Bētsá bēnga játsebacama te, mo chē ibetiñe ya jtsopochócama y binýniñe ya jontšamcá. Chíyeca mochtsajbaná bacna soyēnga amana, y mochtsiyena tšabe soyēnga jtsamēse, Satanás játsjama y jáyēnjanama bēnga jtseprontánēse, mo canye soldado jenēuyanama y inya jayēnjanama ba soyēnga tojenocjacá.

<sup>13</sup> Ntšamo šojtsamncá mochtsiyena, ntšamo entšanga ndaye tšabe sóynaca jamama monduamancá, ínýengbiama lempe chaotsinýnēse. Chcasna, ndoñe quešnátamna yapa tmoyēnga ntsemnana, ndoñe fiestēnguenache ndoñe tšabe soyēnga ntsamana, ndoñe bacna soye boyabása o shembásaftaca ntsamana y jenomándama ntobencá chca soyēnga ndoñe ntsamana, nyetscanga ndoñe cachcá ntsejuabnayama ndoñe ntsamana y ndoñe ínýenga yapa ntšiyentšbuašana.

<sup>14</sup> Chca játamamna, šmochtsiyena jtsamēse ntšamo Bēngbe Utabná Jesucristo endbetsamcá, y ndoñe nye šmatjésejuabnaye jtsamana nye cach tšēngaftanga tšabá jtsomñama juabnēngaca, ndayá tšēngaftanga chašmotsamama chē juabnēnguiñe tojtsemncá.

## 14

*Ndoñe šmattsóyebuambnaye inye ošbuáchiyēngbe contra*

<sup>1</sup> Chē Jesucristbeñe nye batsatema ošbuáchiyēnga tšabá šmochjúbuaja, y chēngaftaca ndoñe šmattsenatsētnaye ndayá aíñe o ndoñe jamana yontsamnama.

<sup>2</sup> Er básefta ošbuáchiyēnga corente imotátšēmo chēnga nye ndayánaca jasama imobenama, pero chē Jesucristbeñe nye batsatema ošbuáchiyēngna, ndocna mēntšena ntseyayana, er chēnga jtsejuabnayana aíñe jasana canye bacna soye nántsemna ca.

<sup>3</sup> Chē nyetsca saná sayēnga ndoñe chamondētsejuabná chē inye soyēnga ndoñe mondētseyēngbiama, chē causa chēnga más batšá uámanēnga imomna ca; y chē ndaye soyēnga ndoñe mondētseyēngna, chē nyetsca saná sayēngbe contra ndoñe chamondētsoyebuambná, er Bēngbe Bētsá chēnga tojúbuaja mo chabe entšangcá.

<sup>4</sup> Tšēngaftanga ndoñe quecmátamna chē ínýabe oservená ndoñe tšabá tonjama ca jatichámuana. Cachabe nduiño jtsemnana nda yochjayana cha tšabá o ndoñe tšabá tonjamama. Y chē oservená jamana ntšamo tbojtsemncá, er Bēngbe Utabná obenana endbomna cha chca chaotsamama.

<sup>5</sup> Báseftanga mondmëna, chënga jtsejuabnayana canÿe te inÿe tescama más uámana te yomna ca; pero ínÿengna jtsejuabnayana cada te cachcá iuámana ca. Y entsemna ndayá cada ona corente tšabá chaotsetátšëmbo, ntšamo yojuabnacá ndáyeca chca ca.

<sup>6</sup> Nda tojtsejuabná canÿe te inÿe tescama más uámana te yomna ca, chca jamana Bëngbe Utabnábiama jtenójuaboyama. Y nda nÿetsca saná tojtsesá, chca jamana Bëngbe Utabnábiama jtenójuaboyama, er cha Bëngbe Bëtsábioye chë sanama jëtschuayana; y nda tojtsejuabná sananga yomna y ošbuáchiyënga chcana chamotsesama Bëngbe Bëtsá ndoñe yondboše ca, cha chë soyënga ndoñe ntjasana, Bëngbe Utabnabiama jtenójuaboyama, y chánaca Bëngbe Bëtsábioye chë sanama jëtschuayana.

<sup>7</sup> Bënga ošbuáchiyënguentsana ndocná ainá ntsemnana nÿe cachabiama, ni jóbanana nÿe cachabiama.

<sup>8</sup> Bënga tmojtsiyenëse, Bëngbe Utabnabiama jtsiyenana; y tmojóbanëсна, Bëngbe Utabnabiama jóbanana. Chca, masque ainënga o obanënga, bënga Bëngbe Utabná benga jtsemnana.

<sup>9</sup> Chama Cristo tojanóbana y Bëngbe Bëtsá tojanma cha cháuatayenama, cha Bëngbe Utabná chaotsemnana, ainëngbeñe y chë ya tmojóbanëngbeñe chaotsemándama.

<sup>10</sup> As, ¿ndáyeca tšëngaftanguentšë báseftanga, catšátangbe contra jtsóyebuambnayana, ndayá chënga tmojtsamama? ¿Y ndáyeca ínÿenga tšëngaftanguentšë jtsichámuana, catšátanga ndoñe uámanënga montsemna ca, ndayá chënga tmojtsamama? Er nÿetscanga šontsamna Bëngbe Bëtsabe delante jashjanguana, ntšamo cada ona tojëftsemcá tšabá o ndoñe tšabá bëtsemnana cha cháuyanama.

<sup>11</sup> Er Bëngbe Bëtsabe uabemana palabrënguiñe Bëngbe Utabná mëntšá tojánayana:

Ndegombre atše ainá sëndëtsomñe, y chíyeca atše šcojurá, nÿetscanga atšbe delante mochanjoshëntsaméntša atšbe jadórama,

y nÿetscanga šmochanjauyana, “ndegombre aca Bëngbe Bëtsá condmëna ca”.

<sup>12</sup> Chcasna, cada ona bënga šontsamna Bëngbe Bëtsá jauyanana ntšamo tmojamama ndáyeca chca ca.

*Ndoñe šmatjama inÿe ošbuáchiyënga bacna benachiñe chamótsatšama*

<sup>13</sup> Chíyeca, ya ndoñe quešnátamna ínÿengbe contra jtsóyebuambnayana. Chca játamamna, šmochtsejuabnaye y yejuana šmochtsantješna ndocna te tondaye ntjamana, ndayá chaoma Jesucristbeyeca acbe catšata, chaojuabó y bacna soyënga chaoma.

14 Atše sëndétatšëmbo, mo canÿa Bëngbe Utabnáftaca cánÿiñe mo canÿacá quetsomñecá, ndocna soye yondmëna, nÿe cachabe ponto chaotsemna ndoñe tšabe soye. Pero canÿe entsá tojtsejuabná ndayánaca ndoñe tšabe soye yondmëna ca, ni jasama, ni jabojuama, chabiama cocayé chë soye nÿets tempo jëftsemnana ndoñe tšabe soye.

15 Tšëngaftanga inÿa becá šmojtsatsëtná, inÿe soyënga tšabá endmëna jasama ca, y cha tojtsejuabná, chca soyënga jasama ndoñe tšabá yondmëna ca, pero tšëngaftanga tša šmojtsatsá causa, cha chca soyënga tojase, y chentšana tbojtsebiona puerte bacna soye tojamama, chca, tšëngaftanga jtsinÿanÿayana ndoñe šmondoyena jtsamëse chë ínÿenga jtsababuánÿeshanëse. Nÿe tšëngaftanga inÿe soyënga šmétsesayama ndoñe šmatjaleséncia chë soye chaoma inÿa, ndabiama Cristo tojanóbana, chë ndoñe ndegombre benachiñe chaoquedama.

16 Ndoñe šmatjaleséncia ndayá tšëngaftanga tšabá šmétsamama, ínÿenga ndoñe tšabá tšëngaftangbiama chamotsóyebuambnama. Chca šmochanjobenaye, ntšamo šmojtsamcá jtsajbanase, ínÿenga ndoñe tšabá tmontsoyebuambná ora.

17 Bëngbe Bëtsabe amëndayana bëngbeñe ndoñe quenátsmëna inÿe soyënga aíñe jasana o inÿe soyënga ndoñe, canÿe soye aíñe jofšiyana o inÿe soye ndoñe. Pero chabe amëndayana bëngbeñe aíñe endmëna jtsamana soyënga ndayama Bëngbe Bëtsá tojayana aíñe tšabá jamama yomna ca, cháftaca tempcá tšabá jtsatsmënana y ainaniñe oyejuayana jtsebomnana; y Uámana Espíritbeyeca bënga jobenayana chca jamana.

18 Y nda Crístbioye chca tbojtserverna, jamana Bëngbe Bëtsá cháftaca oyejuayá chaotsemnama, y entsangbe bominÿiñe tšabia jtsemnama.

19 Sempre šontsamna tšabe soyënga jtsamana y chë soyëngaca chaopodé jamana nÿetscanga natjëmbana chamotsiyenama, y ndaye sóynaca šmochtsama, ndayá ínÿenga chaújabuache Jesucrístbeñe corente jtsošbuáchiyama y ainaniñe bëtscá añemo jtsebomnama.

20 Tšëngaftanga ndaye sanánaca jasama šmobénayeca, ndoñe šmatjama chaotsopochocama ndayá Bëngbe Bëtsá ainaniñe tojamcá. Ndegombre, nÿetsca sananga tšabá jasama endmëna; pero ndayá tšëngaftanga šmojasama, inÿa bacna benachiñe chaótsatsáma šmojamëse, chë soye cocayé ndoñe tšabá ntsemnana.

21 Tšabá endmëna mëntšena ndoñe ntjasana, vínoye ndoñe ntjofšiyana o ndayánaca ndoñe ntjamana, pero chë soye aíñe

tcojama ora, Jesucristbeyeca canye catšata chaojuaboma y bacna soye chaomama tojoservese.

<sup>22</sup> Asna, ntšamo tšëngaftanga chë soyëngama ndegombre šmošbuachecá, nye Bëngbe Bëtsá y tšëngaftangaftaca chaotsemna. Canye entšá ndegombre oyejuayá jtsemnana, canye soye jamama tšabá yomna ca tojtsejuabnase, y chë soye tojamentšana, ndoñe tšabá chca yonjamna ca juabnënga ainaniñe ndoñe tontsebomñese.

<sup>23</sup> Pero canye entšá ndayá tojamentšana tojayana, bacna soye tojama ca chë ndayá tojasama o tojamama, as Bëngbe Bëtsánaca echanjayana cha ndoñe tšabá tonjama ca, er ntšamo tojamcá ndoñe tonjama chë soye aiñe tšabá yomnama jtsošbuáchiyëse; y ndayánaca chca ora tojtsamëse, chca jamana bacna soye jtsemnana.

## 15

*Ntšamo inyëngbiana tšabá tojtsemncá mochtsama, ndoñe nye bëngbiana*

<sup>1</sup> Bënga, chë Jesucristbeñe corente ošbuáchiyënga, šontsamna chë nye batšatema ošbuáchiyënga jujabuáchana, chënga bacna soyënga tmojtsama ora, nye batšá ošbuáchiyana bomna causa; y ndoñe nye jatsënguayana nye ndaye soyëngaca yopodena bënga tšabá jtsemnana.

<sup>2</sup> Cada ona bënga šontsamna jamana ntšamo cach bëngcá Jesucristbeñe ošbuachiyabiama tšabá tojtsemncá, y ndayá cha oyejuayá chaotsemnana tojama soye. Chca šontsamna, cha más bëtscá Jesucristbeñe chaotsošbuáchema, y ainaniñe más añemo chaotsebomnana.

<sup>3</sup> Er Cristo, ntšamo tojanmcá cach ndoñe tonjanma nye cha oyejuayá jtsemnana. Inyëtsá, cháftaca tojanopasá ntšamo Bëngbe Bëtsabe uabemana palabrénguiñe endayancá, mo Cristo Bëngbe Bëtsáftaca cuaftsoyebuambnacá: “Ntšamo entšanga montsichamcá aca joyenguanguama, atše šmontsatsëtsná ca.”

<sup>4</sup> Er lempe ntšamo tempo Bëngbe Bëtsabe uabemana palabrénguiñe tmojanabemcá, bënga jabuátambama endmëna. Ndayá bënga chiñe tmojuatsjínýama, bënga jtsoobenana padecena soyënguiñe tmojtsachnëjuana ora uantadënga jtsemnana, y ainaniñe más añemo jtsebomnana; y chíyeca bënga montsobena, chábeñe jtsošbuáchiyëse, chábeñe jobátmana, ntšamo tojanayancá chaomama.

<sup>5</sup> Atše, Bëngbe Bëtsá sëntseimpadana, nda inétsama bënga padecena soyënguiñe uantadënga chamotsemnana, y nda inétsama bënga ainaniñe más añemo chamotsebomnana, cha chaoma nyëtscanga canye juabna chašmotsebomnana,

ntšamo Cristo Jesús yojanjuabnacá tšëngaftanga jtsejuab-nayëse;

<sup>6</sup> cha chca chaoma, nyetsca tšëngaftanga mo cánÿiñe cuaft-semncá, y mo nyetscanga canÿe ora cuafjayancá, Bëngbe Bëtsá, Bëngbe Utabná Jesucristbe Taitá, puerte bëtsá y uamaná yomnama chašmuinÿanÿema.

*Chë ndoñe judiëngbiámnaca chë tšabe noticiënga jtsemnana*

<sup>7</sup> Nyetscanga oyejuayënga šmochjenofja, ntšamo Crístnaca tšëngaftanga tcmojanëbuajcá, chca, entšanga chamuinÿanÿé Bëngbe Bëtsá puerte bëtsá y obená yomnama.

<sup>8</sup> Atše sëntseboše ndayá jayanana, Cristo tojánabo judiënga jabáserviama ca, chca, jinÿanÿiyama Bëngbe Bëtsá sempre inétsamama ntšamo tojašebuachenacá; tojánabo ntšamo Bëngbe Bëtsá bëngbe tempsca uámana bëts taitanga tojanašebuachenacá chaocumplima;

<sup>9</sup> y Bëngbe Bëtsá puerte bëtsá yomna ca chë ndoñe judiëngnaca chamuayanámnaca, cha chënga inétsalastemanama, ntšamo Bëngbe Bëtsabe uabemana palabrenguiñe endayancá, y chca tojanocumplí:

Chíyeca, atše chë ndoñe judiëngbeñe chaitsemna ora, aca cbochantsatschuanaye, Bëngbe Bëtsá; y jacántase chanjayana aca puerte bëtsá y uamaná comna ca.

<sup>10</sup> Inÿoca mëntsá endayana:

Puerte oyejuayënga chë ndoñe judiënga šmochtsemna, Bëngbe Bëtsabe bocacana entšàngaftaca cánÿiñe ca.

<sup>11</sup> Y inÿoca mëntsá endayana:

Bëngbe Utabná šmochtsatschuanaye tšëngaftanga ndoñe judiënga,

y cha šmochtsatschuanaye nyetsca tšëngaftanga nyets lu-arënguenache entšanga ca.

<sup>12</sup> Y Isaíasnaca Bëngbe Bëtsabe uabemana palabrenguiñe mëntsá tojanábema:

Canÿa Isaíbe entšanguentšana echanjabo,

y Bëngbe Bëtsá chábioye uamaná bochanjábema, nyets lu-arënguenache entšanga chaotsamëndama,

y chënga chábeñe jtsošbuáchiyëse, chábeñe mochantsobátmana tšabe soyënga chëngbiana chaotsamama ca.

<sup>13</sup> Atše, Bëngbe Bëtsá sëntseimpadana, nda inétsama bënga chábeñe chamotsobátmanama tšabe soyënga bëngbiana chaomama, cha chaoma tšëngaftanga ainaniñe puerte oyejuayënga chašmotsemnana y ainaniñe tšabe ebionana chašmotsebomnana, chábeñe jtsošbuáchiyëse; y Bëngbe Bëtsá chca tšëngaftangbiana chaoma, tšëngaftanga cada te más chábeñe chašmotsobátmanama, chë Uámana Espíritbe obenánaca.

14 Jesucristbeyeca atšbe catšátanga, atše corente sëndétatsëmbo tšëngaftanga puerte tšábenga šmomnama, ndayá cmamnana corente šmotatsšëmbuama, y jtsenbuayiynayama šmobenámnaca.

15-16 Quem tsbuanáchañe básefta soyëngama sënjuábema, ntšamo šmatjátsjuabnayama atše ntjatauatjca; chca sënjama, básefta soyëngama chašmuatenójuaboma; y chca sentsobena juabemana, er Bëngbe Bëtsá tojama atše chaitsebomna chë uámana trabajo, Cristo jtseservénana, chë ndoñe judiënga jtsëjabuáchanëse. Atše bachnëcá sentsoserverna, Cristo stseserverna ora, entšanga tšabe noticiëngama jtsabuayiynayëse; atše chca sëndama chë ndoñe judiënga Jesucristbeñe chamotsošbuáchema, y ndayánaca chamotsamama Bëngbe Bëtsá oyejuayá chëngaftaca chaotsemnana, mo chabiamana canyë uatšëmbonancá. Chcánaca atše sëndama, ndoñe judiënga ndegombre Bëngbe Bëtsábenga chamotsemnana, chë Uámana Espíritbeyeca.

17 Chca, atše Cristo Jesúsëftaca cányiñe mo canyáca quetsomñecá, ndegombre sentsobena jtsejuabnayana ntšamo Cristo jaserviama atše sëndamcá, puerte uámana soye yomnana.

18 Atše añemo sëntsebomna nye chë ndayá Cristo átšëftaca tojamama jóyebuambayama, ndoñe judiënga Bëngbe Bëtsá chamóyeunama. Chca tonjopasá, ndayá tijayanama y tijamama,

19 chë Bëngbe Bëtsabe obenana jinyanñiyama bëts soyëngama, chë chabe obenánaca tojopasá tšabe soyëngama, y chë Uámana Espíritu bëts obenánaca tojama soyëngama. Y chca, Jerusalenocana jabojátšase, nyetsca luarënguëjana Iliria luaróntscoñe, Cristbe tšabe noticiëngama nyets luarënguenache entšanga tijabuayená.

20 Atše sempre canyë soye inye soyëngama más sënjánboše, y enjamna chë tšabe noticiëngama jábuayenana, entšanga ndocna te Cristbiamana oyebuambnayana tmonjanuena luarënguenache; y chca sënjanma, atše ndoñe játamama inya tojanbojátšé trabajo, mo ínñabe bojátšena yebnentše jajebuama cuafjatontšecá.

21 Ntšamo Bëngbe Bëtsabe uabemana palabrënguñe endayancá, chë tempo Cristbiamana ndoñe tmonjanuenëngbiamana: Chë ndëmuanñyënga tempo ndocná chabiamana tonjanabuayená, chënga tšabá mochanjinñe ntšamo cha yomnana; y chë ndocna te chabiamana tmonjouenënga, chabe soyëngama echanjósertaye ca.



22 Y n̄ya ch̄e causa, at̄se ndoñe chiyjobená t̄s̄ngaftangbioye jana t̄s̄ngaftanga j̄ányama, masque ba soye tsjenojuabná choye jama.

23 Pero mora at̄sbe trabajo quem luar̄nguiñe s̄enjapochocá y tempscana t̄s̄ngaftanga j̄ányama t̄sa s̄endánboseyeca,

24 s̄entsejuabná mora āiñe chjobenaye choye jama, t̄s̄ngaftanga jauts̄sayama, ch̄ejana chajachn̄ngo ora, España luaroye chaitsá ora. Y baseftayt̄é t̄s̄ngaftangaftaca chj̄eftsemna, cbochj̄ányama t̄s̄ngaftangaftaca oyejuayá; chentsana Diosmanda šmochjuájabuache, y lempe nt̄šamo chašojtsajabotcá šmochj̄át̄setaye jobenayama Españaoye ayana jt̄étónt̄sama.

25 Morna Jerusalenoye chanjá, choca ents̄anga B̄ngbe B̄tsábenga imomn̄nga jaujabuáchama;

26 er Jesucrist̄beñe ōsbuáchiȳnga Macedonia y Acaya luar-ents̄nga, tmonjajuabó t̄sabá yojtsemna crocénana jájuabana ch̄e Jerusalenoca ents̄anga, B̄ngbe B̄tsábenga imomn̄nga y ndbomn̄jém̄nga imomn̄nga jujabuáchama; y oyejuaȳnga chca tmonjama.

27 Cach̄nga chca tmonjajuabó, y chca jamana t̄sabá endm̄ena, er judīnga tmonjanma, ch̄e B̄ngbe B̄tsábicocana tmojanóȳngac̄ne soȳnga ndoñe judīngnaca chamotsebomnama; chíyeca ndoñe judīnga ents̄amna ch̄e Jerusalenoca judīnga ōsbuáchiȳnga jujabuáchana, ndaye soȳnga jat̄sataȳese, ch̄nga vida jt̄sebomnama chamotsobenama.

28 Y chca, quem trabajo chajapochocá ora, y ch̄e ndoñe judīnga ōsbuáchiȳnga lempe tmoj̄átbanana chaj̄áftsayents̄buachiye ora, chanjont̄sé Españaoye jama, y t̄s̄ngaftangbiajana chanjachn̄ngo t̄s̄ngaftanga j̄áftsan̄yama, t̄s̄ngaftangaftaca baseftayt̄é j̄eftsemnama.

29 At̄se corente s̄entsetat̄š̄embo t̄s̄ngaftangbioye chaj̄á ora, chj̄áshjango y chjama t̄s̄ngaftanga b̄etscá t̄sabe bendicion̄nga Cr̄ist̄bents̄ana chašmotsebomnama, tondaye chacmond̄etsabuásheben̄entscuana.

30 Jesucrist̄beyeca cat̄šátanga, B̄ngbe Utabná Jesucrist̄beñe ōsbuáchiȳnga quetsomñecá, y b̄nga bonshánana chamotsebomnama ch̄e Uámana Esp̄iritu in̄étsamayeca, t̄s̄ngaftanga cbontsaimpadana, b̄etscá chašmotsent̄šena B̄ngbe B̄tsá nyets ainánaca jt̄seimpadánama, nt̄šamo at̄se s̄endbetseimpadancá, cha at̄se chašotsin̄yena.

31 Cha šmochtseimpadana ch̄e Judea luaroca ndōsbuáchiȳnga ndocá chašmond̄eborlama, y ch̄e Jerusaleñoqūnga B̄ngbe B̄tsábenga, t̄sabá chamóȳngac̄ñama ndayá ch̄nga jujabuáchama chaj̄áftsayents̄buachiye ora.

32 Y chentshana, y Bëngbe Bëtsá chca chaojábošenëse, atše chayobená bëtscá oyejuayá tšëngaftangbioca jashjanguana tšëngaftanga jányama, y tšëngaftangaftaca chaitsemna ora, batšá jóchnama chayobená.

33 Atše, Bëngbe Bëtsá sëntseimpadana, nda inétsama bënga ainaniñe tšabe ebionana chamotsebomnama, nýetsca tšëngaftangaftaca chaotsemnama. Chca chaotsemna.

## 16

### *Ubuátmënga jacheuayama*

1 Atše sëntseboše tšëngaftanga jáuyanana Febe, Jesucristbeyeca bëngbe uabena, canye tšabe entšá endmënama; cha chë Cencrea puebloca enefjuana ošbuáchiyënga endújabuachana.

2 Tšabá cha šmochjofja, mo canya Bëngbe Utabnábia quetsomñecá, ntšamo Bëngbe Bëtsabe entšanga entsamncá inyëngaftaca jenofjana. Šmochjuájabuache ntšamo tbojtsajabotcá, er cha banga tonjúabuache; átšbioynaca.

3 Atšbe cuenta Prisca y Aquila šmochjácheuaye, chë átšeftaca tbonjatrabajata, Cristo Jesusbiana oservëniñe.

4 Jobanámnaca bonjanprontana, atše jatsbocama, ndoñe chašmondóbama. Atše chama chata sëntsatacheuaná; y ndoñe nýe atše, sinó nýets luarenache enefjuana ndoñe judiënga ošbuachiyëgnaca chca.

5 Chë ošbuáchiyënga, chë Bëngbe Bëtsá jëtschuayama chatbe yebnentše jénefnama imuamanëgnaca, šmochjácheuaye. Atšbe bonshana Epeneto šmochjachuaye; cha endmëna chë natsaná Asia luaroca Jesucristbeñe jtsošbuáchiyama.

6 María šmochjachuaye; cha tšëngaftangbeñe bëtscá tojatrabajá.

7 Chë cach atšcá judeocata Andrónico y Junias šmochjácheuaye. Chata canye ora átšeftaca cárceloye bonjanëtámëna, y Jesucristbe ichmónëngbiama chata puerte uámanata bonjamna, y atšbiana más natsana tbojanontšë Jesucristbeñe jtsošbuáchiyama.

8 Ampliato šmochjachuaye, atšbe bonshaná, er atšcá cha Bëngbe Utabnáftaca cányiñe mo canyáca bondmëna.

9 Urbano šmochjachuaye, chë bëngaftaca Cristbiana oservëniñe trabajayá; y atšbe bonshana Estáquisnaca šmochjachuaye.

10 Apeles šmochjachuaye; cha ba soye tonjinyanýe Jesucristbeñe puerte yošbuáchema; y Aristóbulbe yebnentšëngnaca šmochjácheuaye.

11 Chë cach atšcá judeocá Herodión šmochjachuaye, y chë Narcisbe pamillentšana Bëngbe Utabnábeñe ošbuachiyëngnaca.

12 Trifena y Trifosa šmochjácheuaye; chata Bëngbe Utabnabiama puerta bondëtrabája; y bëngbe bonshaná Pérsidnaca šmochjachuaye; cha bëtscá endëtrabája, Bëngbe Utabnabiama oservëniñe.

13 Rufo, chë Bëngbe Utabnabiama uámana trabajáyá, šmochjachuaye, y chabe mamánaca; cha mo atšbe mamacá endmëna.

14 Asíncrito, Flegonte, Hermes, Patrobas y Hermas šmochjácheuaye, y chë ínÿenga Jesucristbeñe ošbuáchiyënga chëngaftaca inmënutanangnaca.

15 Filólogo y Julia, Nereo y chabe uabena, Olimpás y nyetsca Bëngbe Bëtsabe entšanga chëngaftaca inmënutanangnaca šmochjácheuaye.

16 Nyetscanga mo Jesucristbeyeca catšatangcá šmochjenchuaye, jtenámochëse, ntšamo cach tšëngaftangbe pamíllanga puerta bonshanánaca šmondetsacheuanaycá. Nyets luarenache enefjuana Crístbeñe ošbuáchiyënga cmontsacheuaná.

17 Jesucristbeyeca catšátanga, atše cbontsaimpadana tšabá šmochjuáfsna y cuedado šmochtsebmna chë cánÿenga ínÿengaftaca contra chamotsemnama y ínÿenga Jesucristbeñe ošbuáchiyana chamotsajbanama inmëtsamëngbiama; chëngna, chë tšëngaftanga ndaye šmojóyëngacñe buatëmbana soyëngama contra jtsóyebuambnayana.

18 Er chca amënga, ndoñe ntsentšénana Cristo Bëngbe Utabná jtseservénana, sinó jtsamana ndayá cachënga tmojtsebošcá, nye cachëngbe cuerpama tšabá tojtsemncá; y tšabe y botamana palabrëngaca chë paselo jáingñama yomna entšanga jáingñana, chëngbe ainaniñe chëngcá chamotsejuabnama.

19 Nyetsca entšanga tmojouena, chë Bëngbe Bëtsabe soyëngama ntšamo ínÿenga tmojabuatambacá, tšëngaftanga corente šmnëtsayaunanama, y chíyeca atše puerta oyejuayá tšëngaftangaftaca sëntsemna. Atše sëntseboše, tšëngaftanga tšabá chašmotsetátšëmbo jtsamana ntšamo tšabá yomncá, y ntšamo bacna soyënga jamanna chašmotsemna mo ndoñe cuaftsetatšëmbcá.

20 Y Bëngbe Bëtsá, nda inëtsama bënga ainaniñe tšabe ebionana chamotsebmnama, ndoñe bën y echanjama tšëngaftanga Satanás chašmoyëñjanama, mo cha tšëngaftangbe cucuatšifne cuafjaboshjoncá. Atše sëntseimpadana Bëngbe Utabná Jesús, chaoma tšabe bendicionënga tšëngaftangbeñe chaotsemnama.

21 Timoteo, chë átseftaca trabajayá, tšëngaftanga cmontsacheuaná; y Lucio, Jasón y Sosípater, cach atšcá Judeoquënga, chëngnaca tšëngaftanga cmontsacheuaná.

22 Atšnaca Tercio, chë Páblëbe cuenta quem tsbuanácha uabiamnayá, tšëngaftanga cbontsacheuaná, tšëngaftanga y átšnaca Bëngbe Utabnáftaca cánÿiñe mo canÿacá quetsomñecá.

23 Gayo cmontsacheuaná; atše Pablo chabe yebnentše posada séntsebomna, y cha enduamana nÿetsca chë muentša ošbuáchiyënga tšabá júbuajana. Erasto, chë quem pueblentša crocénana bojanÿá, tšëngaftanga cmontsacheuaná, y Jesucristbeyeca bëngbe catšata Cuártënaca.

24 Atše, Bëngbe Utabná Jesucristo séntseimpadana, cha chaoma tšëngaftangbeñe tšabe bendicionënga chaotsemnama. Chca chaotsemna.

*Quem tsbuanácha juapochócama, Pablo Bëngbe Bëtsábioye tbojtanchuá*

25 Bënga sempre mochtsinÿanÿnaye Bëngbe Bëtsá puerte uamaná yomnama. Cha endobena jamama tšëngaftanga puerte chašmotošbuáchema; y chca, cha echanjama ntšamo chë bënga fsëndabuayiyiná tšabe noticiënguiñe yomncá, ntšamo chë Jesucristbe buayenana soyënga yomncá, y ntšamo chë Bëngbe Bëtsá šojinÿanÿé ndegombre soyënga yomncá. Nÿets tempo mëntscoñama, Bëngbe Bëtsá chë soyënga entšanga ndoñe tonjinÿanÿé, y chë causa chënga chë soye ndoñe ntsetatšëmbuana.

26 Pero morna, ntšamo Bëngbe Bëtsabe juabna oyebuambnayënga tmojanabemcá, tojama bëtscá entšanga chë ndegombre soyëngama chamotsetatšëmbuama; Bëngbe Bëtsá, chë nÿets tempo vida bomná, tojanmandá entšanga nÿets luarënguenache chë ndegombre soyëngama chamotsetatšëmbuama, chënga chábeñe chamotsošbuáchema y ntšamo cha yobošcá chamotsamama.

27 Nÿe canÿe Bëngbe Bëtsá endmëna, y cha nÿets osertánana endbomna. ¡Nÿetscanga chamotsinÿanÿná cha puerte bëtscá y uamaná yomnama, ndayá Jesucristo tojanmama! Chca chaotsemna.

# 1 Corintios

*Pablo chënga jacheuayama*

<sup>1</sup> Atše Pablo, ndábioye Bëngbe Bëtsá tbojanchembo Jesucristbe ichmoná jtsemnama, Bëngbe Bëtsá chca yojánbošeyeca, cánýiñe chë Jesucristbeyeca catšata Sósteneseftaca,

<sup>2</sup> quem tsbuanácha sentsabianná tsëngaftanga chë Corinto bëts puebloca Jesucristbeñe ošbuáchiyëngbiana; ndëmuanýenga Cristo Jesúseftaca Bëngbe Bëtsá tojábiama chabe entšanga nýe chábioye oservénënga, ndëmuanýenga Bëngbe Bëtsá tojáchembo chabe entšanga chašmotsemnama, chë nýe quem luarama enójuabnaye entšanguentšana luarénënga, Bëngbe Utabná Jesucristbioye tmojotšëmbonëngaftaca, Jesucristo nda yomna Bëngbe Utabná y chëngbe Utabná.

<sup>3</sup> Atše sentsaimpadana Bëngbe Bëtsá Bëngbe Taitá y Bëngbe Utabná Jesucristo, chaboma tsëngaftangbeñe tšabe bendicionënga chaotsemnama, y tsëngaftangbe ainaniñe tšabe ebionana chašmotsebomnama.

*Bëngbe Bëtsá Jesucristbeyeca tojama tsëngaftanga ba tšabe bendicionënga chašmotsebomnama*

<sup>4</sup> Bëngbe Bëtsá tsëngaftangbiana sempre sëndbétsatschuanaye, er tsëngaftanga cánýiñe mo canýacá Cristo Jesúseftaca šmómnayeca, Bëngbe Bëtsá tsëngaftangbeñe tojajuabó, tsëngaftangbe tšabiama.

<sup>5</sup> Chca Crístoftaca šmómnayeca, Bëngbe Bëtsá tojama tsëngaftanga chašmotsebomnama chábentšana nýetsca tšabe soyënga, tsëngaftanga obenana chašmotsebomnama cha jamëse, Bëngbe Bëtsabe soyëngama jóyebuambayama y chë soyëngama chacmësertama.

<sup>6</sup> Chca, ntšamo cbonjanabuayiynacá mo Jesucristbe ndegombre soyëngcá, tsëngaftangnaca ínýëngbioye tšabá šmojinýanýé ndegombre soyënga bëtsemnama, chë ntšamo jtšiyenama.

<sup>7</sup> Y chca, Bëngbe Bëtsá chabe entšanga inétsatsatnaye tšabe soyënguentsana tondaye quecmochatabuáshebena, Bëngbe Utabná Jesucristo quem luarentše yochtónýna tescama Bëngbe Bëtsábeñe jtšošbuáchiyëse chašmojtsobátmanëntscuana.

<sup>8</sup> Cha echanjama tsëngaftanga chábeñe corente chašmotsošbuáchema y ainaniñe bëts añemo chašmotsebomnama, ndayá tsëngaftangaftaca jamama cha yujuabnacá chaojapochocantscuana; chca, chë Bëngbe Utabná Jesucristo nýetsca entšangbiana tšabá o ndoñe tšabá

tmonjamama yochjayana te, ndocná chaondobená jayanana tšëngaftanga ndoñe tšabá šmonjama ca.

<sup>9</sup> Bëngbe Bëtsá nyets tempo jtsamana ntšamo tojašebuachenacá, y cha endmëna nda tcmojánachembo canyiñe mo canyáca chašmotsemnama chabe Uaquiñá Jesucristoftaca, Bëngbe Utabná.

*Choca ošbuachiyëngbeñe nyetscanga ndoñe cachcá montsanjuabná*

<sup>10</sup> Jesucristbeyeca atšbe catšátanga, tša cbontsaimpadana, chë ndayá Bëngbe Utabná Jesucristo nyetsca bëngbiana yomnama, tšëngaftanga nyetscanga cachcá chašmotsejuabnama, y tšëngaftangbeñe ndoñe más báseftanga canye soye y ínÿenga ínÿe soye chamuatsjuabná. Y aïñe šmochtsiyena mo canyáca, nyetscanga cachcá jtsejuabnayëse y cachcá jamama jtsebošëse.

<sup>11</sup> Jesucristbeyeca atšbe catšátanga, atše chca sënjayana, er Cloebe yebnentsënga šmonjabëuenaye, tšëngaftangbeñe šmojtsepenzentserama.

<sup>12</sup> Ntšamo sëntsichamcá entsemna ndayá tšëngaftangbentšë báseftanga šmojttsichamo: “Atšë Páblëbe ustoná sëndmëna ca”; ínÿengna imojtsichamo: “Atšna Apólosbe ustoná sëndmëna ca”; ínÿenga: “Atšna Pédrëbe ustoná sëndmëna ca”, y ínÿengna: “Atšna Cristbe ustoná sëndmëna ca” imojtsichamo.

<sup>13</sup> Chca šmojttsamama, jtsóbocanana mo cada básefta ošbuáchiyënga canye Cristo tmojtsebo mncá. ¿Pablo yojamna nda tmojan crucificá tšëngaftangbe tšabiama? ¿O tšëngaftanga uabáinënga šmomna, atšë jótšëmbonëse, tšëngaftanga atšbe ústonënga bëtsemnama?

<sup>14</sup> ¡Bëngbe Bëtsá sëndbëtsatschuanaye atšë ndocná tšëngaftanguentšá tijanábayama; nÿe Crispo y Gáybiöye aïñe!

<sup>15</sup> Chca, ndocná quenátobena jayanana, atšë jótšëmbonëse uabainá cha tojanoquedá ca, mo átšbeñe ošbuáchiyënga cuaftsemncá.

<sup>16</sup> Estéfanasbe pamillentsëgnaca sënjanëbaye, pero ndoñe quetsatabouíñna inÿa tijanábayama.

<sup>17</sup> Er Cristo ndoñe chešnatanichmó ínÿenga jubáyama, ndayá chë chabe tšabe noticiëngama entšanga jábuayenama. Ndoñe chešnatanichmó chë soyënga jayanama, corente osertana entšangbe soyënga jtsichámëse; chca, entšanga Crístbeñe chamotsošbuáchema, ndoñe chë atšbe osertánanentšana palabrengama, sinó nÿe chë buayenánama, Cristo cruzoca bëngbiana tojanóbanama.

*Crístbeñe yomna Bëngbe Bëtsabe obenana y osertánana*

18 Quem buayenánana, Cristo entsangbiamna cruzoca tojanóbanama, chë pochocánënga jtsemnana tmojtsajnëngbioye jtsinýanana mo ndoñe corente juabna bomnëngbe soycá; pero bëngbiamna, chë Bëngbe Bëtsá nyetsca tescama šochjátsebacangbiamna, quem buayenánana jtsinýanýnayanana Bëngbe Bëtsabe obenana.

19 Ntsamo Bëngbe Bëtsá chabe uabemana palabrenguiñe tojanayancá:

Atše chanjama chë tša osertánëngbe osertánana tondayama chaondëtsoservénama;

y chanjama chë ba soyëngama osertánëngbe osertánana tondayama chaondëtsámanama.

20 ¿Ntsachetśá yojtsámama chë tša osertaná y chë puerte uatsjinýená tbojayana soyënga? ¿Ntsachetśá yojtsámama chë tša tšabá chë soyëngama juabnayá, morscá, y ínýengaftaca enatsëtsnaye ora chëngbe ayëñjanayá tojayana soyënga? Ndegombre Bëngbe Bëtsá tojinýanýé, chë quem luarentša bëts osertánánaca tmojayana soyënga tondaye yonduámanama.

21 Bëngbe Bëtsá, nyets osertánana bomná quetsomñecá y puerte tšabá jtsejuabnayëse, ndoñe tonjanalesenciá quem luarentša entsanga cha chamotsábuatmama, chë quem luar-entsënga tša osertánënga tmojánayanana soyëngama. Chamna, cha tšabá tbojanínýnana chábeñe ošbuáchiyënga játsebacana chë bënga fsëndabuayiyná soyëngama, masque ínýengbioyna mo ndoñe corente juabna bomnabe soycá jtsinýanana.

22 Judiënga tša jtsebošana y Bëngbe Bëtsábioye jtsotjanañana bëts soyënga chaomama, chabe obenana jinýanýiyama; y ndoñe judiëngna tša jtsenguayana chë puerte osertánëngbe soyënga jtsetatšëmbuama.

23 Pero bëngna Cristbiamna entsanga fsëndabuayiyná, chë ínýënga tmojancrucificabiamna. Quem buayenánana chë judiënga ndoñe tšabá ntjëuénanana. Y ndoñe judiënga mondbëtsejuabnaye chca yomna mo canýe ndoñe corente juabna bomnabe soycá ca;

24 pero bëngbiamna, nyetscanga Bëngbe Bëtsá chabe entsanga chamotsemnana šojáchembëngbiamna, masque judiënga o ndoñe judiënga, Cristbeñe endmëna nyets Bëngbe Bëtsabe obenana y osertánana;

25 er ndayá Bëngbe Bëtsá tojanmcá, Cristo cruzoca chaóbanama jalesénciase, banga jtsinýanana mo canýe ndoñe corente juabna bomnabe soycá, pero ndegombre endmëna canýe puerte más osertaná tojama soye, lempe ntsamo entsanga imotatsëmbuama. Y ndayá cha tojamcá masque bángbioye jtsinýanana mo canýe tondaye obenabe soycá, ndegombre chë soye jtsinýanýnayanana Bëngbe Bëtsá puerte

más obenana yobomnama, nyets obenana ntšamo entšanga imobomnama.

<sup>26</sup> Jesucristbeyeca atšbe catšátanga, šmochtsejuabnaye ntšamo yojamnama, Bëngbe Bëtsá chabe entšanga chašmotsemnama tcmojánachembo ora. Tšëngaftangbentše nye báseftanga tša osertánënga šmojamna, ntšamo chë osertánana bomnënga imomnama entšanga mondbetsejuabnaycá; y báseftanga šmojamna becá mando atšetanënga o uámana pamillentšënga.

<sup>27</sup> Pero Bëngbe Bëtsá, quem luarentše ndoñe tša osertánënga tojanabacacá, chca, cha jamama chë quem luarentša soyëngama tša osertánënga chamotsëuatjama; y cha, quem luarentše ndobenënga tojanabacacá, chca, chë obenana bomnënga chamotsëuatjama.

<sup>28</sup> Bëngbe Bëtsá quem luarentšana tojanbocacá ndayá tondaye yonduamancá y ndayá ínÿënga imuabotencá; tojanbocacá ndayá tondaye yonduamancá, chca, ndayá quem luarentše tša iuamancá tondaye chaondëtsámanama.

<sup>29</sup> Y chca, Bëngbe Bëtsabe delante ndocná quenátobena jayanana tša bëtsá cha yomna ca.

<sup>30</sup> Bëngbe Bëtsá tojama bënga Crísoftaca cánÿiñe mo canÿacá jtsemnëse chamotsiyenama, y chábeyeca tojama bënga chamóyëngacñama chabe osertánana bomna soyënga; chábeyeca tojama bënga tšábënga chabe bominiñe chamotsemnama, chabe entšanga jtsemnama chamobenama, puerte tšábënga cach Bëngbe Bëtsacá, y atsebácanënga chamotsemnama.

<sup>31</sup> Y chca, ntšamo Bëngbe Bëtsabe uabemana palabrenguiñe endayancá: “Nda tojtseboše jayanama cha canÿe uamaná yomna ca, chamna más tšabá cha bontsemna jayanama Bëngbe Utabná puerte uamaná yomna ca.”

## 2

*Ntšamo Pablo Cristo crucificanábiana chënga tojanabuayená*

<sup>1</sup> Pero, Jesucristbeyeca atšbe catšátanga, Bëngbe Bëtsabe ndegombre soyëngama tšëngaftanga jábuayenama sënjána ora, chca sënjanma ndoñe chë uámanëngbe palabrengaca, ni chë tša osertánëngbe palabrengaca.

<sup>2</sup> Y tšëngaftangataca sënjamna ora, ndoñe quetstétseboše nye ndayíñnaca jatsjuabnayana, ndayá nye Jesucristbeñe, nda bëngbe tšabiama tmojanrucificá.



<sup>3</sup> Atše tšëngaftangbeñe sënjamna, mo canya ba soyënga jamama ndobenacá, y mo canya puerte auatjacá y tbojtsen-gmëmnacá, chabe trabajo jamama ndoñe jobenayama juab-naye causa.

<sup>4</sup> Ntšamo cbonjanëtsëtsná y cbonjanabuayiynacá atše sënjanoyebuambá ndoñe chë tša osertánëngbe palabréngaca, tšëngaftanga jáyënjanama chiñe chašmotsošbuáchema; pero aíñe tcbonjanayënjaná, Bëngbe Bëtsabe Espíritu y chabe obenana tšëngaftanga jinyanjyëse,

<sup>5</sup> chca, tšëngaftanga Bëngbe Bëtsábeñe chašmotsošbuáchema, ndoñe nje entšangbe osertánanaca, sinó Bëngbe Bëtsabe obenanama.

*Uámana Espíritbeyeca, Bëngbe Bëtsá jamana entšanga cha chamotsábuatmama*

<sup>6</sup> Pero, chë ya tmojashjáchénga Bëngbe Bëtsábeñe puerte jtsošbuáchiyama y chabe soyëngama corente jtsosertánama, chëngbeñe bënga fchandóyebuambaye becá osertánana bomna soyënga. Pero ndoñe quenátsmëna quem luarentša entšanga quem tempo mondbëtsichamo soyënga, ni mora quem luarentše amëndayëngbe soyënga, ndëmuanjyënga ndoñe bën y ndocna obenana bomnënga mochanjëftsoquéda.

<sup>7</sup> Y aíñe, chë bënga fsëndoyebuambná osertánana bomna soyënga endmëna chë Bëngbe Bëtsá quem luarentša entšángbioye baytentscuana ndoñe tonjaninjanjyé soyënga, y chca, entšanga baytentscuana chë soyënga ndoñe tmonjanábuatmana. Cha yojanjuabná chë soyënga chca yochtsanmënama, quem luare cabá cha ndëma ora, y yojanjuabná, chë soyëngaca bënga mochtsanobena puerte bëtsëtsanga y uámanënga jtsemnana, cháftaca chë njetsca tescama yomna tšabe vida jtsebomnama.

<sup>8</sup> Quem Bëngbe Bëtsabe puerte osertánana bomna soyënga endmëna canye soye ndayá quem luarentša amëndayënga ndoñe ntsësertánana, er chënga aíñe matënjanësértase, Bëngbe Utabnábioye chënga ndoñe matmënjancrucificá, Bëngbe Utabná nda puerte bëtsá y uamaná yomna.

<sup>9</sup> Bëngbe Bëtsabe uabemana palabrénguiñe quem Bëngbe Bëtsabe puerte osertánana bomna soyëngama mëntsá endayana:

Cha imobobonshánëngbiama Bëngbe Bëtsá tojaprontá soyënga, ndocná tonjinjye, ni tonjouena y ni mo tonjajuabó ca.

<sup>10</sup> Pero Bëngbe Bëtsá quem soyënga chabe Espíritoftaca bënga šojanjanjyé, er chë Espíritu lempe jtsetatsëmbuana, chë Bëngbe Bëtsabe soyëngama puerte totcá josértama yomna soyëngámna.

<sup>11</sup> Entšángbeñe ndocná quenátobena jtsetatšëmbuana ndayá entšabe ainaniñe tomnama, sinó nýe chë entšabe espíritu, chë chábeñe yomná. Cachcá, nýe Bëngbe Bëtsabe Espíritu jtsetatšëmbuana ndayá Bëngbe Bëtsá tojuabnacá.

<sup>12</sup> Y bëngna, Bëngbe Bëtsábíocana Espíritu tmojóyëngacñe, ndoñe canýe quem luarentša espíritu, chca, bënga chašósertama chë Bëngbe Bëtsá tojama bënga chamotsebomna soyëngama, bëngbe tšabíama cha jtsejuabnayëse.

<sup>13</sup> Bënga chë soyëngama fsëndoyebuambná, ndoñe chë quem luarentša entšángbentsána tifjuatsjinýe osertánana bomna palabréngaca, sinó chë Bëngbe Bëtsabe Espíritu šojabuatambá palabréngaca. Chca, Bëngbe Bëtsábíocana soyëngama bënga fsëndabuayiná, Bëngbe Bëtsabe Espíritubentsána yóbocana palabréngaca, chë Uámana Espíritu ainaniñe imobomnéngbioye.

<sup>14</sup> Bëngbe Bëtsabe Espíritu ndoñe tondbomná, chabe ainaniñe ndoñe ntjóyëngacñana chë Bëngbe Bëtsabe Espíritbíocana yóbocana soyënga, er chë entšabíama chë soyënga jtsemnana mo canýe ndoñe corente juabna bomnabe soyëngcá, y chabosertama cach ndoñe ntsobenana. Chca endmëna, er entšá jobenayana quem soyëngama jtsetatšëmbuama y josértama, nýe chabe ainaniñe chë Uámana Espíritu tbojtsájabuachañëse.

<sup>15</sup> Pero nda aíñe chë Espíritu tbojtsebomna jtsobenana nýetsca soyënga tšabá jinýama chabosertama, y ndocná chë Espíritu ndoñe tbondbomná ntsobenana josértana ntšamo chë Espíritu bomná yomnama.

<sup>16</sup> Er Bëngbe Bëtsabe uabemana palabrénguiñe mëntšá en-dayana: “Ndocná quenátabatma Bëngbe Utabnabe juabna, chábioye jabuátëmbama chaotsobenama ca.” Pero bënga, chë ošbuáchiyënga, mondobena jajuaboyana ntšamo Cristo yojuabnacá.

### 3

#### *Jatrabájama enutanánënga Bëngbe Bëtsá jasérvíama*

<sup>1</sup> Pero, Jesucrístbeyeca atšbe catšátanga, atše ndoñe chiyatanobená jóyebuambayama, mo tšëngaftanga chë Uámana Espíritoftaca mandánënga šmojatsmëncá, sinó nýe cachënga tšabá jtsomñama juabnénga bomna entšángbioycá, mo basetemëngbioycá, Cristbe soyëngama josértama ndobenënga.

<sup>2</sup> Mo canýe bebmacá, chabe basetémbioye nýe létsiye jafsiyana y paselo jabmuánama sananga, chë básetema chcana jasama cabá ndoñe ntsobenana causa, cachcá, atše cbonjanabuatambá Bëngbe Bëtsabíama nýe chë más paselo josértama soyëngama, y ndoñe inýe soyënga más totcá josértama soyënga, er tšëngaftanga ndoñe quešmënjatobena chca

soyëngama josértana. Y ni mora, tšëngaftanga quešmátobena Bëngbe Bëtsabe soyëngama josértana, chë josértama más totcá yomna soyëngama;

<sup>3</sup> er tšëngaftanga cabá šmojtsama, nÿe ntšamo cach tšëngaftanga tšabá jtsomñama tšëngaftangbe juabnënga yomncá. Y tšëngaftanga ínÿengaftaca cabá yapa šmojtsenántšaboše y nÿe ínÿengbioye jayënjanama soyënga šmojtsamëntscuana, tšëngaftanga šmojtsama nÿe ntšamo cach tšëngaftanga tšabá jtsomñama tšëngaftangbe juabnënga yomncá, y chca, tšëngaftanga šmojtsiyena mo chë nÿe quem luarama enójuabnaye entšangcá.

<sup>4</sup> Er canÿa: “Atše Páblëbe ustoná sëndmëna ca”, y ínÿana: “Atše Apólosbe ustoná sëndmëna ca” tojayana ora, chca jt-samana mo chë nÿe quem luarama enójuabnaye entšangcá.

<sup>5</sup> Tšëngaftanga chca šmojamama, atše šontsemna tšëngaftanga játajana: ¿Ndayá Apolos yomna? ¿Ndayá Pablo? Chatna co nÿe Bëngbe Bëtsábioye oservénata bondmëna, ndátbeyeca tšëngaftanga Jesucristbeñe šmojtsošbuaché, y bëndata cada ona fsënjama chë Bëngbe Bëtsá šojanÿanyé trabajo.

<sup>6</sup> Atšna, mo nda jajañe jénaye cuafjuatbontsacá, tšëngaftangbeñe sënjanbojatsé chë trabajo, Bëngbe Bëtsabe soyëngama jábuayenama; y Apolos, mo nda chë jajañe matënguiñe bėjaye cuaftsebuešcñacá, enjantrabája cach atše sënjanbojatsé chiñe; pero Bëngbe Bëtsá, ntšamo matatémënga chauájuama endbetsamcá, tojama banga tšëngaftanguentše Jesucristbeñe chamotsošbuáchema.

<sup>7</sup> Ntšamo, chë jená y chë matënguiñe bėjaye buešcñayá ndoñe yapa ntsámanana chiñe shajuanënga chaóboचना, nÿe Bëngbe Bëtsá aiñe, cachcá, nda Bëngbe Bëtsabiama entšanga jábuayenama trabajo tojabojatsé y nda chentšana tojášhango cach trabajuiñe jóntšama, ndoñe ntjamana entšanga Jesucristbeñe chamotsošbuáchema; nÿe Bëngbe Bëtsá chca jamana.

<sup>8</sup> Chë jená y chë matiñe bėjaye buešcñayá cach trabajuiñe jtsentšénana, y chatna mo trabajayatcá jtsámanana; y cada ona juacánana ntšamo chabe trabajo tomncá.

<sup>9</sup> Bëndata fsëndmëna trabájayata Bëngbe Bëtsabiama oservëniñe, y tšëngaftanga šmondmëna mo Bëngbe Bëtsabe jajañcá, ndayentše cha yojtseboše tšabe jaja saná chaóboचना, y šmondmëna mo chë cha yojtsejebuana bëtš yebncá.

<sup>10</sup> Er Bëngbe Bëtsá atšbe tšabiama jtsejuabnayëse, chë trabajo šojabonyé, y atše mo canÿe puerte tšabe jebuanacá, canÿe yebna ndayiñe chaotsécuatjonama tojapormacá, sënjanbojatsé chë trabajo, Bëngbe Bëtsabe soyëngama

tšëngaftangbeñe jábuayenama. Chentšana inya, mo chë inye yebna jebuaná tojabojatšë jajebuama chiñe más jatsjebuama nda tojatontšecá, cach atše sënjanbojatšë trabajuiñe tojanontšë. Pero cada ona botamana chaotsantješna ntšamo chë trabajo yojsamama.

11 Mo chë cánÿabentšana inye trabajayacá, ndoñe ntsoybenana chë yebna jajebuama tojanbojatšë cha chë yebna chaotsécuatjonama tojanpormañe inye soye cachcá chaoservema jatspórmana, cachcá, ndocná chaondëtsabuatambá inye soyënga, nye ntšamo Jesucristbe soyënga yomncá aiñe, chë ntšamo atše natsana sënjanabuatambacá.

12 Chë Jesucristbiamá más uámana soyënga buatëmbayá jtsemnana mo chë castellano, midio y inye uámana soyëngaca yebna jebuanacá; y chë Jesucristbiamá nye nduámana soyënga buatëmbayana mo chë niñëbenga, butsjajésha y tëshenjñësheca yebna jebuanacá.

13 Y Cristo chaojésabo te, Bëngbe Bëtsá echanjínÿanÿiye ntšamo cada cánÿabe trabajo yomnana. Cha chë te ñësheca chca echanjínÿanÿiye, y chë ñësheca, Bëngbe Bëtsá echanjinÿe y echanjínÿanÿiye ndaye trabajo cada ona tojamama.

14 Ntšamo cada cánÿabe trabajo yojsámanama jtsetatšëmbuama Bëngbe Bëtsá chaojinÿe ora, cha chabe trabajo aiñe yojsámana ca queojayanëse, chë tšabe trabajayá Bëngbe Bëtsábiocana canÿe uacanana soye echanjóyëngacñe, er cha jtsemnana mo canÿe entšacá, nda canÿe yebna tojtsejebuana jtsejuinÿama ndoñe paselo tondmëna soyëngaca.

15 Pero chë te cánÿabe trabajo nye batšá yojsámanama Bëngbe Bëtsá ñësheca chaojinÿanÿese, chora chabe trabajo echántsemna mo chë jtsejuinÿama paselo tomna soyëngaca jebuanabe soyëngcá, chentšana nyets yebna jtsejuinÿana. Chë jebuaná jtsachana, pero chabe trabajo lempe jobuétšana. Cachcá, chë Bëngbe Bëtsabiamá trabajo tojtsamá, nye batšá oservena trabajo, cha echanjobenaye atsbocaná jtsemnana, masque lempe ntšamo tojamcá tondaye queochaisoquéda.

16 ¿O tšëngaftanga ndoñe šmondëtatšëmbo nyetscanga cánÿiñe Jesucristbeñe ošbuachiyëngcá, mo chë Bëngbe Bëtsabe bëts yebncá šmomnana, y tšëngaftanguentše Bëngbe Bëtsabe Espiritu yomnana?

17 Nderado nda tojama, tšëngaftanga nyetscanga cánÿiñe Jesucristbeñe ošbuachiyëngcá jtsemnana chaotsopochocama, Bëngbe Bëtsá chábioye bochantsepochóca, er chë Jesucristbeñe ošbuachiyëngcá cánÿiñe imomnënga, jtsemnana mo chë Bëngbe Bëtsabe bëts yebncá, chabe entšanga nye chábioye

jaserviama; y tšëngaftanga chca šmondmëna.

<sup>18</sup> Ndocná cachá chaondëtsenoíngña. Nderado nda tšëngaftanguentšá tojtsejuabná cha tša osertaná yomna ca, ntšamo quem luarentša entšanga mondbëtsejuabnaye ntšamo canye puerte osertaná inëtsemnana, cha bontsemna jóbemama mo canya ndabiama quem luarentša entšanga chamuayana cha corente juabna ndbomná yomna ca, chca, ndegombre corente osertaná jtsemnana chaobenama.

<sup>19</sup> Er chë quem luarentša entšanga tša osertánënga imotátšëmbo soyënga, Bëngbe Bëtsabe bominiñe yomna mo chë corente juabna ndbomnabe soycá. Bëngbe Bëtsabe uabemana palabrënguine mëntšá endayana: “Bëngbe Bëtsá chë tša osertánënga jáyëñjanana, ndayá cachënga ínÿenga jáingñama tša osertánánaca tmojtsama soyëngaca ca.”

<sup>20</sup> Y mëntšánaca endayana: “Bëngbe Utabná endëtatšëmbo chë tša osertánëngbe juabnënga tondayama yondoservénama ca.”

<sup>21</sup> Chíyeca, ndocná chaondëtsichamo corente uamaná yomna ca, ndaye entšabe ustoná tomnana, er lempe ntšamo šmobomncá, Cristbeñe ošbuáchiyënga bëtsemnana, tšëngaftangbe tšabiama endmëna, y nÿetscanga chë tcmojujabuachëngnaca cachcá.

<sup>22</sup> Lempe tšëngaftangbe soye endëtsomñe: ndayá Páblëbeyeca yomncá, Apólosbeyeca, Pédrëbeyeca, ndayá quem luarentše yomncá, ndayá yomncá ainá tcojtsemna ora, tcojóbana ora, ndayá mora yomncá y chë más chcoye yochtsemncánaca.

<sup>23</sup> Y tšëngaftanga Crístbenga šmondmëna, y Cristna Bëngbe Bëtsábia.

## 4

### *Jesucristbe ichmónëngbe trabajo*

<sup>1</sup> Entšanga entsamna bëngbiana jtsejuabnayana bënga fstsemna Cristbe uajabuáchanënga y Bëngbe Bëtsabe soyëngama jtsabuátambayama trabajo bomnënga, chë Bëngbe Bëtsá baytentscuana entšángbioye ndoñe tonjaninÿanyé, pero mora aiñe tojinÿanyé soyënga jtsabuátambayama trabajo bomnënga.

<sup>2</sup> Chca, nda canye trabajo tojtsebojanÿabiamna, chabe mandayá jtsobátmanana cha aiñe tšabe palabra bomná chaotsemnana.

<sup>3</sup> Atšbe bariëna, tondaye quenatámana, ntšamo tijamcá šmojinÿe y ndoñe tšabá tijama ca šmojayanëse, o inÿe entšanga cachcá tmojayanëse mo canye tribunaliñcá. Ni cach atše ndoñe chca quetsátama, jtsetatšëmbuana ntšamo atšbe trabajuama tijayancá ndegombre tayojtsemnana.

<sup>4</sup> Atšbe ainaniñe ndocna juabna quetsátsbomna atše chašuyanama bacna soye tijama ca, pero chca ndoñe

quenátayana, ndegombre Bëngbe Bëtsabe delante ndocna bacna soye ndbomná atše stsemna ca. Er Bëngbe Utabná endmëna nda atšbe trabajo yonýá y nda ndegombre yobena jayanama atše tšabá o ndoñe tšabá tijamama.

<sup>5</sup> Chíyeca, tšëngaftanga ndoñe quecmátamna jinýana y jayanana ínýenga ndoñe tšabá tmonjama ca, chë nýa chama tempo cabá ndóshjanguëntscuana, Bëngbe Utabná chama chaojésabo ora. Cha chaojésabo ora, puerte tšabá echanjínýanýiye chë iytemencá yomna soyëngama, mo ibetiñe cuaftsemncá, y botamana echanjínýanýiye, mo binýniñcá, ndayá jamama nýe chëngbe ainanoca entšanga tmojajuabocá. Y chora Bëngbe Bëtsá cada entšabiama echanjayana tšabe soyënga, ntšamo tbojtsomerecencá.

<sup>6</sup> Jesucristbeyeca atšbe catsátanga, chë soyëngama tšabá jábuayenamna, atše sënjama ntšamo Apolos y atše tifjatrabájama botamana chašminýama, y chca sënjama tšëngaftangbe tšabiama, ntšamo bëndata tifjamentšana chašmuatsjínýama jtsiyenana nýe ntšamo Bëngbe Bëtsabe uabemana palabrenguiñe iuayancá, y ndocná tšëngaftanguentsá canýe entšabiama chaotsenábotamnaye, y ínýabiama ndoñe tšabá chauátoyebuambnama.

<sup>7</sup> Er, ¿nda chë ínýengbiama más uámanënga tšëngaftanga cmojtsabiamná? ¿Y ndayá smobomna, Bëngbe Bëtsá ndoñe tcmojtsatá soye? Y tšëngaftanga chca chašmotsebotnamna cha tojanmëse, ¿ndáyeca šmojtsebotamná mo Bëngbe Bëtsabe tšetana soyënga ndoñe tontsemncá, y nýe cach tšëngaftangbeyeca šmojonýencá?

<sup>8</sup> Tšëngaftanga šmojtsejuabná ya lempe ntšamo cmëjabotcá Bëngbe Bëtsábiocana šmojtsebotna ca, y lempe ntšamo jtsebošama šmojtsobencánaca ca. Mo reyënga cuaftsemnëngcá cmojtsabiona, bëngbentsana tondaye ntsëjabotcá. Malaye tšëngaftanga mo reyëngcá šmojtsemna, Crísoftaca cánýiñe jtsemándayëse; chca, bëngnaca tšëngaftangaftaca jtsemnama, cánýiñe jtsemándayëse.

<sup>9</sup> Atše šontsinýana, bënga chë Cristbe ichmónënga Bëngbe Bëtsá šojábiamna mo chë nýetscangbiama más nduamanëngcá, mo chë jóbanama yojtsamna entšangcá. Nýetscanga chë Bëngbe Bëtsá tojábiamënga bëngbioye jtsënýayana mo ndoñe cachca entšanga fstsemncá; angelënga y entšángnaca cachcá bëngaftaca montsama.

<sup>10</sup> Bënga, Cristbiama oservena causa, quem luarentša entšangbiama fsëntsinýna mo corente juabna ndbomnëngcá; chë cuenta, tšëngaftanga šmojtsejuabná Cristbe soyëngama corente osertánënga šmomna ca. Bënga fsëndmëna chë entšangbe bominiñe ndocna obenana ndbomnënga; y

tšëngaftangna šmojtsejuabná puerte obenana bomnënga šmomna ca. Tšëngaftangbioye ínÿenga puerte uámanënga y bëtsëtsanga jtsabiamnayana, pero chënga bëngbioye jtsëbuayënjana.

11 Y mëntscoñama, bënga šontsabuashebebianana saná, ndayá jofšiyama y entšayá. Entšanga bëngbioye bacá jtsaborlánana, y tondaye yebna queftsátsbomna.

12 Y bënga puerte jabuache fsëndëtrabája cach bëngbe cuuatšëngaca. Entšanga šojóyanguango ora, Bëngbe Bëtsá fchandbëtseimpadana cha chaoma chënga tšabe bendicionënga chamotsebomnama. Bënga chamosufrima ínÿenga tmojt-sama ora, bënga chë soye fchandbétsoboyaye.

13 Inÿenga bëngbiana bacá tmojtsoyebuambná ora, jtsababuánÿeshanëse fsënduamana jtëjuana. Quem luarentša entšangbe bominÿiñe bënga jtsemnana chë puerte nduámanënga, mo chë quem luarentša basurëshëngcá, chë quem luarentša entšanga tondayama ndoservénënga, mo chë quem luarentša tsengacá; y chca endmëna mëntscoñama.

14 Quem soyënga ndoñe quecbatëbuabiamná tšëngaftanga chašmotsëuatjama, sinó ndayá jábuayenama mo cach atšbe basëngbioycá, atšbe bonshánënga.

15 Er masque tšëngaftanga mallajta abuátambayënga chašmotsóbomñe, jacúntama ntjobenaycá, Cristbiana chacmotsabuátambama, ndoñe banga quešmátabamna tšëngaftangbiana mo taitangcá, Cristo Jesúsbeñe jtsošbuáchiyama tcmojanëjabuachama. Nÿe atše sëndmëna mo taitacá tšëngaftangbiana, mo ošbuachiyëngcá, er atše natsana tcbonjanabuayená chë tšabe noticiënga Jesucristbiana, y tšëngaftanga chiñe šmontsanošbuaché.

16 Chíyecna, cbontsaimpadana ntšamo atše tijamcá chašmotsamama.

17 Chama Timoteo tšëngaftangbioye sentsichamná, atšbe bonshaná, canÿe aíñe tšabe palabra bomná; Bëngbe Utabnábeñe tojanošbuachéyeca, atše Cristbiana sënjanbuayiyná ora, mo atšbe uaquiñacánaca cha endmëna, ntšamo chabe ošbuáchiyana yomnama. Cha echanjama tšëngaftanga chašmuatenójuaboma ntšamo atše tšëngaftangbeñe tsjoyenama, Crístbeñe ošbuachiyacá, ndayama atše nÿets tempo ošbuáchiyënga sëndbetsabuatambaycá nÿets luare ošbuáchiyënga enefjuanenache.

18 Tšëngaftanguentšë báseftanga ya šmojatsjuabná puerte uámanënga šmojtsemna ca, er šmojtsejuabná atše stsauatja tšëngaftangbioye jama jányama ca.

19 Pero Bëngbe Bëtsá chašojalesenciase, sentsobátmana betscó tšëngaftangbioye jama jányama. As chjinÿe ntsache

obenana imobomna chë Bëngbe Bëtsabe entšangcá jtsiyenama tša uámanënga imomna ca juabnayënga, y ndoñe nÿe ntšamo jayanama imobencá.

<sup>20</sup> Er Bëngbe Bëtsá canÿe ošbuachiyabe ainaniñe tojtsemánda ora, chca jtsinÿnana ndoñe nÿe ntšamo tojtsichámuama, ndayá Bëngbe Bëtsabe obenana chábeñe tojtsemnama.

<sup>21</sup> ¿Tšëngaftanga ndayá más šmattseboše: atše chayá tšëngaftangbioye jaucácanama, o chayá tšëngaftangbioye jányama puerte bonshanánaca y ntsetšatjaycá tšëngaftanga jauyanama?

## 5

*Ndayá cuanjama canÿe boyabása shembásaftaca bacna soye amáftaca*

<sup>1</sup> Ndegombre nÿets luariñe entsótatšëmbo tšëngaftanguentše yojtsemna canÿa, shembásaftaca bacna soye amá, y ntšamo cha yojtsamcá puerte bacna soye yojtsemna; ni chë Bëngbe Bëtsábioye nduabuátmënga chca ntsamana: canÿe entšá cachabe mamamnáftaca bacna soye yojtsama.

<sup>2</sup> Y tšëngaftanga cabá šmojtsjuabná corente tšábenga šmomna ca, masque chca tšëngaftangbeñe yojtsopasánëse. Tšëngaftanga cmontsamna puerte ngménaca jtsemnana, tša uabouana soye cha yojtsama causa. Canÿe entšá chca tojamáftacna, tšëngaftanga cmontsamna jamana cha ndoñe más tšëngaftangaftaca chaondenútanama mo ošbuachiyacá.

<sup>3</sup> Y atšna, masque tšëngaftangaftaca choca ndoñe quetsásmëna, atšbe juabna choca tšëngaftangaftaca entsemna; y chca atšbe espíritoca sëntsemnayeca, Bëngbe Utabná šojéftsanatšetá mándoca, sënjajuabó y sëntsetatšëmbo ntšamo tšëngaftanga cmojtsamnama, chë entšá chca tojamáftaca.

<sup>4</sup> Tšëngaftanga chašmojénefjna ora, chentše atšbe espíritoca tšëngaftangaftaca atše chántsemna, y atšbe espíritu chentše echántsemna Bëngbe Utabná Jesusbe obenánaca.

<sup>5</sup> Y chora tšëngaftanga cmontsamna jamándana chë entšá ya ndoñe más tšëngaftangaftaca mo ošbuachiyacá chaondenútanama, mo Satanasbe cucuatšiñe cha cuafjaboshjoncá, chca, chë quem entšá nÿe cachá tšabá jtsomñama juabnënga chaotsopochocama, y chca, Bëngbe Utabná cachiñe chaojésabo ora, chabe espíritu atsbočaná chaotsemnama.

<sup>6</sup> Tšëngaftanga šmojtsejuabná puerte tšábenga y uámanënga šmomna ca, pero šmojtseleséncia canÿa tšëngaftanguentše chca chaotsamama. Chca ndoñe tšabá quenátsmëna. Tšëngaftanga



ya šmondětatsěmbo, ntšamo chě nje batšá levadura endbama, njetš arninjá chauábochema; cachcá, tšengaftanguentšě canya tša bacna soye chca tojama ora, njetšcangbiama ndoñe tšabe soyěnga jóbocnana.

<sup>7</sup> Chíyeca, tšengaftanga cmontsamna, chca uabouana bacna soye tojamá jtabocnana, cha ya ndoñe más tšengaftanguaftaca mo ošbuachiyacá chaondenútanama; y chora tšengaftanga šmochántsemna mo tsěm arninjacá, ndocna levaduraca, chě bacna juabnėngaca ya nděmandánėnga šmojtsěmnyayeca. Ndegombre tšengaftanga chca šmondmėna, er Bėngbe Bėtsá tojama tšengaftanga tsěm vida chašmotsebonnama. Bashco fiesta ora, oveshá tmojanóba, Israeloca entšanga perdonánėnga chamotsebnama. Cachcá Cristo, mo chě oveshacá, tojanóbana bacna soyėnguentsana bėnga játsebacama.

<sup>8</sup> Ntšamo chě judiėnga chě fiesta ora mondbamcá, njetš levadura ojamnana cachcá jonjyayana, cachcá, bėnga šontsamna jtsajbanana oyenana bacna soyėnga ínjėngbiama jamama jtsebošėse, y ndaye bacna soye jtsamėse, ntšamo tempo imojanamcá. Ntšamo chě judiėnga chě fiestiñe nje levaduraca ndėpormana tandėse mondbetsesaycá, cachcá, bėnga šontsamna jtsiyenana njetšca soyėnga ainaniñe ndocna bacna juábna jtsamėse, y ndegombre yomncá jtšoyebuambnayėse y jtsamėse.

<sup>9</sup> Chě inje atšbe tsbuanáchañe tcbonjáuyana, chě boyabása o shembásaftaca bacna soye amėngaftaca tondayama chašmondětsencuėnta ca.

<sup>10</sup> Y chca ndoñe quetstėtseboše jáuyanana nja tondayama chašmondětsoyebuambná njetšca chě quem luarentšėnga boyabása o shembásaftaca bacna soye amėngaftaca, chě nje cachėngbiama bėtscá soyėnga jtsebonnama tša bošėngaftaca y atbėbanėngaftaca, y chě cachėngbe pormana soyėnga diosėnga yomnama jtsejuabnayėse adorayėngaftaca ca; er nja chca jamamna, tšengaftanga cmattsamna quem luarentšana jėftsebocanana.

<sup>11</sup> Ntšamo chora sėnjanayancá endmėna ndayá tondayama ntsencuėntayana, chě Cristbeñe ošbuachiyá yomna ca tojayanáftaca, y boyabása o shembásaftaca bacna soye tojt-sama, o nda nje cachabiama bėtscá soyėnga jtsebonnama tša tojtseboše, o chě cachabe pormana soyėnga diosėnga yomnama jtsejuabnayėse tojtsadorana, o yapa tojtsayatsená, o yapa tojtsetmó, o tojtsatbėbana. Chca entšángaftacna, ni mo šmuatjót bema chėngaftaca cányiñe jasama.

<sup>12-13</sup> Atše ndoñe quešnátsmėna jayanana chě ndošbuáchiyėnga, chě bėngaftaca ndoñe mondbėnutananga, aiñe o ndoñe tšabá tmonjamama. Bėngbe Bėtsá echántsemna

nda chëngbiana yochjayana ntšamo tmojamcá tšabá o ndoñe tšabá bétsemnama, tšëngaftanga ndoñe. Ndegombre nye chë ošbuáchiyënga tšëngaftangaftaca inménutanangbiana cmontsamna chca jayanana. Chcasna, šmochjama ntšamo Bëngbe Bëtsabe uabemana palabrenguiñe endayancá: “Tšëngaftanga cmontsamna, chca bacna soye amá tšëngaftangbentsana jtabocnana ca.”

## 6

### *Ošbuáchiyënga jendemándama tojtsemna ora*

1 Canye tšëngaftanguentša ošbuachiyá inye ošbuachiyabiana canye demanda tojtsebomna ora, ¿cha nanjá chë ndošbuáchiyënga mandadëngbioye chë soye chamojandmanama? ¿Ndáyeca chca nanjama, y ndoñe chë Bëngbe Bëtsabe entšangbioye nanjá chabe demanda chamouenama?

2 Tšëngaftanga ndegombre šmondétatšëmbo, Bëngbe Bëtsabe entšanga mochjayanama quem luarentša entšangbiana tšabá o ndoñe tšabá tmonjamama. Y chënga quem luarentša entšangbiana chca jayanama tmojtsobenëse, ¿ndoñe montsobena más base soyëngama chca jayanama?

3 Tšëngaftanga ndegombre šmondétatšëmbo chë angelëngbiámnaca tšabá o ndoñe tšabá tmonjamama bënga mochjayanama. Chcasna, bënga más jtsobenana chë quem luarentše jëftsiyenama soyëngama chca játayanana.

4 Y chcase, tšëngaftangbeñe chca demandënga chë quem luarentše jëftsiyenama soyëngama tojtsemna ora, ¿ndáyeca šmatjátëbuayana chë ošbuáchiyëngbiana tondaye tmontsámama entšanga, chë soyënga chamojandmanama?

5 Chca sënjayana tšëngaftanga chašmotsëuatjama: ¿O tšëngaftanguentše ni mo canya yondmëna corente osertaná, ošbuachiyëngbeñe demandënga chaojandmanama?

6 Pero ndoñe chca: ošbuachiyëngbeñe demandënga tojtsemna ora, mandadëngbioye jana chë soyënga chamojandmanama. Y chca jamana ndošbuáchiyënga mandadëngaftaca.

7 Y tšëngaftangbeñe nye demandënga jájandmanama tojtsemna ora, tšëngaftangbiana ya canye puerte bacna soye jtsemnana. ¿Ndáyeca ndoñe šmattsóboyaye ínÿenga bacá cmojtsaborlana ora? ¿Ndáyeca ndoñe cachcá šmatjonÿaye ínÿenga cmojtsabiabëbana ora?

8 Pero cach tšëngaftangaftacna inÿetšá copasana, ínÿengbioye bacá jtsaborlánana y jtsabiabëbanana, y tšëngaftangcá Crístbeñe ošbuachiyëngbioynaca.

9 ¿Tšëngaftanga ndoñe šmondétatšëmbo, chë bacna soye amënga Bëngbe Bëtsabe amëndayoye ndoñe

mochanjámashënguama? Ndoñe matenoíngñana. Ni chë boyabása o shembásaftaca bacna soye amënga, ni chë cachëngbe pormana soyënga diosënga yomna ca jtsejuabnayëse adórayënga, ni cachëngbe boyá o shema ínÿaftaca íngñayënga, ni chë boyabásenga mo shembasengcá jtsinÿnama bošënga, ni chë boyabásenga ínÿe boyabásengaftaca bacna soye amënga,

<sup>10</sup> ni chë atbëbanënga, ni chë nÿe cachëngbiama bëtscá soyënga jtsebomnama tša bošënga, ni chë tša tmoyënga, ni chë uayátsenayënga, ni chë ínÿengbiama bacna soye jtsamëse immétsatbëbanënga, chënga nÿetscanga ndoñe quemochatobeyaye Bëngbe Bëtsabe amëndayoye jamashjnama.

<sup>11</sup> Y tempo báseftanga tšëngaftangtšënga chca šmojamna, pero Bëngbe Bëtsá tšëngaftangbe bacna soyëngama tcmojaperdoná, y chca entsemna mo bebënënga cuaftsemncá; cha tojama tšëngaftanga chabe entšanga chašmotsemnama, nÿe cha chašmotseservénama, y tojama tšëngaftanga mo tšabengcá chabe bominÿiñe chašmotsemnama. Lempe chca Bëngbe Bëtsá, tojama ndayá Bëngbe Utabná Jesucristo tojanmama y ndayá Bëngbe Bëtsabe Espiritu tojamama.

*Bëngbe cuerpo chaotsemna Bëngbe Utabná jtseeservénama*

<sup>12</sup> Mondbétsichamo: “Atšbiama entselesenciana ndayánaca jamama, ndayama Bëngbe Bëtsá ndocá tonjayana ca.” Pero básefta soyënga jtsamana ndoñe atšbe tšabiama ntsemnana. “Atšbiama entselesenciana ndayánaca jamama ca”, pero ndoñe quichatsleséncia ndaye sóyecnaca nÿets tempo mandaná jatsmënana.

<sup>13</sup> Mëntsánaca mondbétsichamo: “Saná uafsbicama y uafsbíá saná chaóyëngacñama ca.” Pero Bëngbe Bëtsá canÿe te echanjama chë uta soye chaotsopochocama. Bëngbe Bëtsá entšabiama cuerpo ndoñe tonjanma, boyabása o shembásaftaca bacna soye cha chaotsamama, sinó chë cuérpoca Bëngbe Utabná bënga chamoservema, y Bëngbe Utabná bëngbiama tšabe bendicionënga chaotsamama.

<sup>14</sup> Y Bëngbe Bëtsá, nda tojama Bëngbe Utabná cháuatayenama, bëngbiámncaca chabe obenánaca echanjama chámuatayenama.

<sup>15</sup> ¿Tšëngaftanga ndoñe šmondëtatšëmbo, Crísoftaca cánÿiñe mo canÿacá šmomnama yomna mo tšëngaftangbe cuerpo chabe cuerpentša soye cuaftsemncá? Tšëngaftangbe cuerpo Crístbioye jasérvicama endmënayeca, tšëngaftangbe cuerpo jtsemnana mo Cristbe cuerpentša soycá. ¿Ntšamo atše chjátobena atšbe cuérpoca, chë ndayá yomna mo Cristbe cuerpentša soycá, canÿe bacna vida bomna shembásaftaca bacna soye jamana, y chca atšbe cuerpo jabemana mo

chë shembásabe cuerpentša soye cuaftsemncá? ¡Ndoñe, ndegombre ndoñe!

<sup>16</sup> ¿O tšëngaftanga ndoñe šmondétatšëmbo, canýe entšá canýe bacna vida bomna shembásaftaca tbojéninýena ora, chë útata jóbemana mo canýacá? Er Bëngbe Bëtsabe uabemana palabrénguiñe boyabása y shembása tbojéninýenama mëntšá endayana: “Chë útata mo canýacá bochantsema ca.”

<sup>17</sup> Pero canýe entšá Bëngbe Utabnáftaca cánýiñe mo canýacá tojtsemna ora, jtsemnana mo chë útata cach canýe espíritu tbojtsebomncá.

<sup>18</sup> Nýa ndocna te canýe boyabása o shembásaftaca bacna soyënga šmattsama. Nderado ndaye inýe bacna sóynaca nda tojama ora, sempre jamana ndayánaca chabe cuerpentšana shjoye; pero boyabása o shembásaftaca bacna soye jamamna, lempe jamana nýe cachabe cuérpoca, y chë causa, chca jamëse, cachabe cuerpama más bacna soyënga jtsamana.

<sup>19</sup> ¿Tšëngaftanga ndoñe šmondétatšëmbo tšëngaftangbe cuerpo yomna mo canýe yebncá Uámana Espiritbiama, cha tšëngaftangbe ainaniñe chaotsiyenama Bëngbe Bëtsá tojánmayeca? Ndegombre tšëngaftangbe cuerpo ndoñe tšëngaftangbe soye quenátsmëna, sinó Bëngbe Bëtsabe soye.

<sup>20</sup> Chca endmëna, er Cristo bënga játsebacama tojanóbana ora, yojamna mo cha bëtská cuafjopagacá tšëngaftanga Bëngbe Bëtsábenga chašmotsemnama. Chiyeca, chë tšëngaftangbe cuerpëngaca chašmojtsama soyëngaca šmochtsinýanýnaye Bëngbe Bëtsá puerte uamaná y bëtsá bëtsemnama.

## 7

### *Jobouamayama jábuayenama*

<sup>1</sup> Mora chanjóyebuambaye ndayá tšëngaftanga átšbioye šmojuábobemama. Ndegombre, canýe boyabásabiama más tšabá endmëna ndoñe chaondobouamá.

<sup>2</sup> Pero choca banga boyabása o shembásaftaca bacna soye amënga imojtsemna causa, tšabá entsemna cada boyabása chabe shema chabotsóbomñe, y cada shembása chabe boyá.

<sup>3</sup> Boyábioye bontsemna jamana chabe shembiamama lempe ntšamo jamama ibomncá, boyá bëtsemnama; y chabe shémnaca cachcá chabe boyabiamama chaoma.

<sup>4</sup> Chë shembe cuerpo ndoñe nýe cha cánýabiama ntsemnana, sinó chabe boyabiámnaca. Cachcá, chë boyabe cuerpo ndoñe nýe cha cánýabiama ntsemnana, sinó chabe shembiámnaca.

<sup>5</sup> Ni boyá, ni shema ndoñe chabondëtsejuabná jtsenbiátšbuana. Añe chca copodena, pero nýe chë útata chca básefta tescama tbojenóyeunase, Bëngbe Bëtsáftaca jencuéntama jtsentsénama. Pero chentšana chë útata entsamna cachiñe

cányiñe jtëtsmënana, chca, Satanás ndoñe chaondobená jamama bacna soye chaócochënguama, cachënga jenomándama ndoñe tmontsobena causa.

<sup>6</sup> Atše chca sëntsicamo, tšëngaftanga jábuayenama, ndayá jamama šmojtselesenciana, y chca ndoñe chašmondëtsamama jamëndama.

<sup>7</sup> Y atšbe bariëna, atšbe juabna entsemna malaye nyëtscanga chë soyënguñe mo atšcá šmattsemna. Pero Bëngbe Bëtsá cada ona obenana tbojatšetá tšabe soyënga jamama, Crístbeñe ošbuáchiyënga jujabuáchama, ínÿenga canÿe soyama, ínÿengna ínÿe soyama.

<sup>8</sup> Chë cabá ndbouamnënga y viudanga sëntsëtsëtsná, chëngbiana tšabá yojtsemna ntjobouamaycá joquédana, atšcá.

<sup>9</sup> Pero chca jtsemnama cachënga jenomándama ndoñe tmontsobenëse, chënga entsamna jtsóbouamayana, er más tšabá endmëna jtsóbouamayana, y ndoñe nÿe boyabásabiana o shembásabiana tša nyëts tempo jésejuabnayana.

<sup>10</sup> Pero chë bouamnënga sëntsamënda shema chabe boyábioye ndoñe cachcá chabondetsonÿá. Chca ndoñe nÿe atše quetsatamënda, ndayá cach Bëngbe Utabná.

<sup>11</sup> Pero, shema cachcá chabe boyábioye tbojesonÿase, cha bontsemna ntjobouamaycá jtsomñana o chabe boyáftaca cachiñe jtenútanana. Y cachcá, chë boyá ndoñe quebnátsmëna chabe shema cachcá jesonÿayana.

<sup>12</sup> Chë ínÿenga chjáuyana, atšbe juabncá y ndoñe Bëngbe Utabnabe soycá, nderado canÿe ošbuachiyá tbojtsebomna canÿe shema Crístbeñe ndošbuachiyá, pero chë shema tojtseboše cháftaca joquédana jtsiyenama, cha chë shémbioye ndoñe cachcá chabondetsonÿá.

<sup>13</sup> Nderado canÿe ošbuachiyá tbojtsebomna canÿe boyá Crístbeñe ndošbuachiyá, pero chë boyá tojtseboše cháftaca joquédana jtsiyenama, chë shema ndoñe chaondëtsejuabná cha cachcá jesonÿayana.

<sup>14</sup> Er Bëngbe Bëtsá tojama, canÿe shembása ošbuachiyá chabe entšá chaotsemnama, nÿe chábioye chabot-seservénama, y chca, chánaca jtsejuabnayana chë shembásabe boyá Crístbeñe ndošbuáchiyabiana mo chabiana oservena entšacá, cha chëngbeñe mo canÿe pamillëcá jatrabájama tojtseboše ora; y cachcá, chë boyá ošbuachiyábeyeca Bëngbe Bëtsá jtsejuabnayana chabe shema Crístbeñe ndošbuáchiyabiana mo chabiana oservena entšacá, cha chëngbeñe mo canÿe pamillëcá jatrabájama tojtseboše ora. Er chca ndoñe tontsemnëse, chë básenga muántsemna ndošbuachiyatbe básenga, Bëngbe Bëtsáftaca tondaye ndbomnënga. Ndoñe chca yondmënayeca, canÿa o nyëts

uta bĕtsĕtsatbe ošbuáchiyama, Bĕngbe Bĕtsá jtsejuabnayana chĕ básengbiama mo chabe entšangcá.

<sup>15</sup> Pero chĕ boyá o shema Crístbeñe ndošbuachiyá cachcá jtšenónyayama tša tojtsebošĕse, chca chaboma. Chora, chĕ ošbuachiyá ndoñe ntsotocánana chĕ ínŷaftaca cachiñe jtĕtenútanama, er Bĕngbe Bĕtsá tcmojáchembo natjĕmbana chašmotsiyenama.

<sup>16</sup> Chca šmochjama, er aca shema ħntšamo cattsetátšĕmbo, tacuatjobenaye acbe boyá jayĕnjanana Crístbeñe chaotsošbuáchema, y chca, atsbocaná chaotsemnana? o aca boyá ħntšamo cattsetátšĕmbo, tacuatjobenaye acbe shema jayĕnjanana Crístbeñe chaotsošbuáchema, y chca, atsbocaná chaotsemnana?

<sup>17</sup> Masque ntšámna, cada ona chaotsiyena jtsamĕse ntšamo chĕ Bĕngbe Utabná tbojatšetá obenana yomncá, cada ona ndayá jamama Bĕngbe Bĕtsá tbojachembcá. Chca atšĕ nŷets luare ošbuáchiyĕnga enefjuanenache sĕndbĕtsamĕndaye.

<sup>18</sup> Nderado Bĕngbe Bĕtsá cánŷabioye tbojachembo, y cha ínŷengbeyeca chĕ más delicadentšĕ base bobachtema tĕtšená tojtsemna, ntšamo chĕ judiĕnga monduamancá, cha ndoñe chaondĕtsenobiamná mo ndoñe judío cuafjatsmĕncá; y nderado Bĕngbe Bĕtsá cánŷabioye tbojachembo, y cha ndoñe chca tĕtšená tontsemnĕse, cha ndoñe chaondĕtsejuabná tĕtšená jatsmĕnana, ntšamo chĕ judiĕnga monduamancá.

<sup>19</sup> Er ndayá iuámna, ndoñe quenátsmĕna chca tĕtšená jtsemnana o ndoñe, ndayá ntšamo Bĕngbe Bĕtsá yomandacá jtsamana.

<sup>20</sup> Cada ona bontsemna jtsiyĕñana, ntšamo vojjoyencá, chabe entšá chaotsemnana Bĕngbe Bĕtsá tbojanchembo ora.

<sup>21</sup> Bĕngbe Bĕtsá tcmojanchembo ora, nŷets tempo ínŷabiama oservená cojamnĕse, chama ndoñe cattsenócochinŷena. Pero nderado tojtsemna ntšámose jashjáchama ndoñe más chca ntsemnana, cach acbiama jatrabájama, as chca cochjama.

<sup>22</sup> Er chĕ nŷĕ ínŷabiama nŷets tempo oservená yojamná, Bĕngbe Bĕtsá chabe entšá chaotsemnana tbojanchembo ora, cha mora ošbuachiyacá, jtsemnana canŷa ya ndoñe más bacna soyĕnga jamama juabnĕngaca mandaná, sinó Bĕngbe Utabnabiama oservená. Cachcá, chĕ nŷĕ cachabiama trabajayá yojamná, Bĕngbe Bĕtsá tbojanchembo ora, mora cha nŷets tempo Crístbe oservená jtsemnana.

<sup>23</sup> Cristo bĕngbiama tojanóbana ora, yojamna mo cha bĕtscá cuafjopagacá, bĕnga Bĕngbe Bĕtsabe entšanga chamotsemnana. Ndoñe šmatjalesĕncia nŷĕ entšangbe juabnĕngaca nŷets tempo mandánĕnga chašmotsemnana, y Bĕngbe Bĕtsabiama chacmotsebnĕtjomba.

24 Chcasna, Jesucristbeyeca atšbe catšátanga, cada ona bontsemna Bëngbe Bëtsáftaca jtsiyenana, ntšamo yojoyencá Bëngbe Bëtsá tbojanchembo ora.

25 Y chë ndëbouamna shembásengbiama, chënga aíñe o ndoñe yontsamna jobouamayamna, atše chama ndoñe Bëngbe Utabnabe canye mando quetsátsbomna, pero chanjayana ntšamo atše tsjuabnacá. Bëngbe Bëtsá atšbe tšabiama tojanjuabóyeca, entšanga montsobena jtsejuabnayana aíñe tšabe palabra bomná chiñe atše tsmënama.

26 Atše šontsinýana, entšá ibojtsemna jtsomñana nýe ntšamo mora yotsomñcá, er bënga mora montsiyena puerte padecena soyënguiñe.

27 Shema tcbomnëse, ndoñe cachcá catjëftsonýaye; y ndoñe tcondbomnësna, ndoñe catjátsënguaye.

28 Tcojobouamase, bacna soye ndoñe quecátama; y nderado canye tobiaše tojobouamase, cach bacna soye ndoñe quenátama. Pero chë tmojtsobouamangna padecena soyënguiñe mochanjoyena quem luarentše chamojëftsemnëntscuana, y atše sëntseboše chënga jujabuáchama chca jatiyenama ndoñe chaondëtsamnama.

29 Jesucristbeyeca atšbe catšátanga, ntšamo sëntseboše jayanamna mëntšá entsemna: Cristo quem luaroye yochjésabo orscama ya nýe batšá entsájamna. Chíyeca, morscana y nýets tempo más chcoye, chë bouamnënga entsamna jtsiyenana mo ndoñe bouamnënga tmontsemncá, o mëntšá, entsamna jtsentsénana Bëngbe Bëtsabe soyënguiñe, y ndoñe nýe chë bouamná bëtsemnama tbojtsemna soyënguiñe.

30 Cachcá, chë puerte ngménaca tša ošachiyiñe imomnënga, entsamna jtsiyenana mo ndoñe chca tmontsemncá; y chë puerte oyejuayënga, chamotsiyena mo ndoñe chca tmontsemncá; chë soyënga buamnayënga chamotsiyena mo tondaye chëngbe soye tontsemncá.

31 Chë quem luarentša soyëngaca jtsiyenama imojtsentsénënga entsamna jtsiyenana mo ndoñe chca tmontsamcá, er quem luare ntšamo bënga mora monduabuatmcá, pronto echanjochnëngo.

32 Atše sëntseboše tšëngaftanga ndoñe chašmondëtsenocochinýenama. Canye entšá ndoñe bouamná tontsemna ora, jtsobenana jtsentsénana Bëngbe Utabnabe soyëngama jtsejuabnayama, y ntšamo oyejuayá cha jabemama;

33 pero chë bouamná nýets tempo jtsenócochinýenana quem luarentša soyëngama, jtsiyenama, y ntšamo chabe shema oyejuayá jtsebomnama;

<sup>34</sup> y chca, cha uta soyiñe canye ora jtsentšénana. Chë ndëbouamna shembása y chë tobiáše bontsobena jtsentšénana Bëngbe Utabnabe soyënguñe sempre jtsejuabnayama. Chënga mondobena jtsentšénana Bëngbe Bëtsá jaserviama, ndayá chëngbe cuérpoca y chëngbe espíritoca tmojamama. Pero inyetsá, chë bouamna shembásana, nyets tempo jesenócochinñenana quem luarentše vida jtsebomnama soyëngama, y ntšamo chabe boyá oyejuayá jtsebomnama.

<sup>35</sup> Atše chca cbontsëtsësná tšëngaftangbe tšabiama, y ndoñe jamëndama ba soyënga jamama ndoñe chašmondëtsobenama, ndayá ntšamo tšabá yomncá chašmotsiyenama, y nye Bëngbe Utabná jtseservénama chašmotsentšénama.

<sup>36</sup> Nderado nda tojtsejuabná chabe uatsëtsnaye tobiášeftaca jt sobouamayama ibojtsemna ca, chca jamama chë tobiáše ya bëtsá tojtsemnayeca, y chca jamama tša tšabá yojtsemna ca tojtsejuabnase, cha bontsemna jamana ntšamo tojtsebošcá. Chaotsobouamá. Chca tojama ora bacna soye ndoñe ntšamana.

<sup>37</sup> Pero nderado inya, tondaye obligaciónaca tontsemna y lempe ntšamo tojtsebošcá cha tojtsobena jamama, cha tšabá tojajuabó y chabe ainaniñe corente tojtsetátšëmbo, ndoñe nt sobouamayana tšabá yomna ca, cha tšabá chca jtsamana.

<sup>38</sup> Chcasna, chë tobiášeftaca tojtsobouamá chana, canye tšabe soye jamana; pero chë ndoñe cháftaca tonjobouamá chana, canye más tšabe soye jamana.

<sup>39</sup> Chë shembása bouamná jtsotocánana chabe boyáftaca sempre jëtsiyenana, chë boyá vida tojtsebomnëntscuana; pero chë boyá tojóbanëse, cha jtsobenana cachiñe jtobouamayana, nda cha tojtsebošáftaca, pero chca chaoma mo canya Bëngbe Utabnáftaca cányiñe mo canyacá quetsomñecá.

<sup>40</sup> Pero atše jayanamna, cha más oyejuayá nántsemna ndoñe tontóbouamase; y sëntsejuabná, átšnacá tsbomna chë Bëngbe Bëtsabe Espíritu chašotsebuayiynama.

## 8

### *Uátšëmbona saná entsangbe pormana soyëngama*

<sup>1</sup> Mora chanjóyebuambaye ndayá tšëngaftanga atše šmojatjama, ndayá jtsesayama, chë tempo ínÿenga cachëngbe pormana soyënga, diosënga yomna ca jtsejuabnayëse jadórana tmojanátšëmbona soyëngama. Bënga mondëtatšëmbo bënga nyetscanga osertánënga imomnama. Canya tbojtsosertana ora, cha nderado nanjájuaboye, chca bëtsemnama puerta uamaná cha yojtsemna ca, pero canya, ínÿenga tojtsababuánÿeshana ora, cha jtsobenana chënga becá jujabuáchana.



2 Nderado nda tojtsejuabná ndegombre canye soye yotátšëmbo ca, cabá ndoñe yontsetátšëmbo ndayá jtsetatšëmbuama ibojtsemncá.

3 Pero nderado nda Bëngbe Bëtsábioye tbojtsebobonshana, Bëngbe Bëtsá chábioye jtsabuatmana mo chabe entšacá.

4 Y chë tempo ínÿenga cachëngbe pormana soyënga, diosënga yomna ca jtsejuabnayëse jadórama uátšëmbona soyëngamna, atše šcuayana: bënga corente mondétatšëmbo chë chënga imnétsadorana soyënga, diosënga yomna ca jtsejuabnayëse, ndegombre ndoñe dios quemátsmëna y ñye canya Bëngbe Bëtsá endmëna.

5 Pero masque celoca y quem luarentše chamomna entšangbiana “diosënga ca” uabáinënga (ntšamo ndegombre endmëncá, banga quem luarentša tsbanánoca obenánaca mondmëna, entšangbiana diosënga ca ubuátmënga, y banga bëts mándoca entšangbiana “utabnënga ca” uabáinënga),

6 bënga chë ošbuáchiyëngbiamna ñye canya Bëngbe Bëtsá endmëna, Bëngbe Taitá, ndábentsana ñyetsca soyënga yóbocana, y ñye nda jtseservénama bënga imoyena. Y ñye canye Utabnánaca endmëna, Jesucristo, ndábeyeca ñyetsca soyënga yomna, y cach bëngnaca imomna.

7 Pero ñyetsca ošbuáchiyënga ndoñe chca quemátstatšëmbo. Básefta entšanga, Crístbeñe cabá ntsošbuáchiye ora, imojanamana ndaye sanánaca juatšëmbonana, chë chënga imojanjuabná diosënga yojamna ca soyënga jadórama; chënga, chca uatšëmbonana tmojtšesá ora, jtsejuabnayana chca uatšëmbonana bétsemnama, y ainaniñe juabnënga jtsebomnana ndoñe tšabá tmonjamama, chana tmojase causa. Chënga, ndayá tempo imojánamama, ndoñe quemátobena tšëngaftangcá jtsejuabnayana, chcana jasana bacna soye ndoñe yondmëna ca.

8 Ndegombre, ndayá bënga tmojtšesacá ndoñe ntjamana bënga Bëngbe Bëtsábioye más chamuatobéconama. Bënga Bëngbe Bëtsabe bominiñe ndoñe quemochátsmëna más tšábenga aíñe tmojtšesama; ni ndoñe chcanga, ndoñe tmontšesá causa.

9 Pero cuedado šmochtsebomna, ndayá jamana yolesenciánama tšëngaftanga corente tšabá šmotatšëmbuama, ndayánaca jatsmana, y chca causa ínÿenga, chë soyënguiñe más batšá ošbuáchiyënga y osertánënga, ntšamo tšëngaftanga šmojtšamcá chamuatšmama, y chentšana, chëngbe ainaniñe juabnënga chamotsebomna y chëngbioye chaotsëtsësná ndoñe tšabá tmonjama ca.

10 Er, aca chë soyëngama tatšëmbuá, nderado tcojót'bema jasama canye luarentše, canye soye ndayama entšanga

dios yomna ca jtsejuabnayëse adórayentše, y canýe Crístbeñe ošbuachiyá tojtsebomna ainaniñe juabnënga ndoñe tšabá tonjamama, chca tojáseyeca, aquécá chë soyëngama ndoñe yondëtatsëmbo causa, y cha nderado chentše cojttesama tcmojinýëse, chë soye nanjobenaye chábioynaca jañémuana chë saná jasana, chë tempo chë soyëngama tmojanátšëmbona saná.

11 Y chca aca, chë soyëngama ntšamo betatsëmbuama tcojamama, catjama chë Jesucristbeyeca acbe catšata, chë ndoñe corente ošbuachiyá, y ndoñe aquécá chë soyëngama corente tatsëmbuá, cha pochocaná chaotsemnama, er chabe ainantše echántsemna juabnënga canýe bacna soye tojamama, chë saná tojasama. Chca nderado cánýabioye catjama, ndabiama Cristo tojanóbana, cha jatsbocama.

12 Jesucristbeyeca acbe catšatbiama chca bacna soye tcojama ora, chca causa cha canýe soye tojama, ndayama chabe juabnënga ainaniñe chabotsatsëtsná ndoñe chca chaondëtsama ca; y chca, chentšana tša tojesejuabná cha canýe bacna soye tojamama, acna canýe bacna soye jamana, ndoñe nýe chë catšatbiama, ndayá cach Cristbiámna.

13 Chíyeca, nderado ndayá atše stsesama, atše tsjama Jesucristbeyeca atšbe catšata chaoma canýe soye y chca jamama chabiama canýe bacna soye tojtsemnëse, más tšabá nántsemna ndocna te chë soye atše ntjasana, chca, atše ndoñe jatsmama cha canýe bacna soyiñe chaótsatsama.

## 9

### *Jesucristbe ichmónëngbe derecho*

1 Ndegombre endmëna, atše ndayánaca jamana stselesenciánama y Moisesbe leyëngaca ndoñe más mandaná sëntsemnama. Cach ndegombre endmëna, atše canýe Jesucristbe ichmoná tsmënama y Jesús Bëngbe Utabná tijinýama; y cach tšëngaftanga mora ošbuáchiyënga jtsemnëse, šmondmëna ndayá tojóbocna Bëngbe Utabnabiama atšbe trabajuentšana.

2 Masque ínýenga atšbiama ndoñe quematsjuabná atše canýe Jesucristbe ichmoná tsmëna ca, tšëngaftangbiamna aíñe chca endmëna; er tšëngaftanga Crístbeñe ošbuáchiyënga šmondmënama y Bëngbe Utabnáftaca cánýiñe mo canýacá šmondmënama, puerte tšabá šmontsinýanýná atše Jesucristbe canýe ichmoná tsmënama.

3 Mëntšá chanjayana chë atše ndoñe tšabá tijama ca imojtsichámëngbiama:

4 Ndegombre bēnga n̄yets derecho fsēndētsóbm̄ñe jtsobátmanama tsēngaftangbentšana, chē tbojujabuáchēngbentšana, bēngbe trabajuama saná o ndayá jofšiyama chašcuacaredadama.

5 Y bēngnaca derecho fsēndētsóbm̄ñe can̄ye shema ošbuachiyá jtsebomnama y bēngaftaca cha jēftsβetšama in̄ye luaroye fstsajna ora, ntšamo chē Jesucristbe in̄ye ichmónēnga, Bēngbe Utabnabe catsátanga y Pédrēnaca mondbetsamcá.

6 ¿O n̄ye Bernabé y atše šojtsētocana cabēndatbe cucuátšeca jatrabájana vida jtsebomnama, y ndoñe derecho fsēntsebomna ošbuáchiyēnga chašotsacuédanama, Bēngbe Bētsabiamana trabájayama?

7 ¿Ndēmua mo can̄ye soldadcá tojtsoservená, ndayá tbojtsájabotama cachá nantsatopagana, vida jtsebomnama? Ndocná can̄ye jajañe uvas betiyēnga ntjájana, chentša uvasēsangá ndoñe ntjuasama. Ndocná oveshēnga ntsan̄yēnana, chē tojabuatēba létšiyentšana ndoñe ntjofšiyama.

8 Ntšamo atše muentše sēntsichamcá ndoñe n̄ye entsangbe juabna quenátsmēna; y Moisesbe leyíñnaca cachcá endayana,

9 er chabe leyíñe mēntšá endayana: “Aca can̄ye toróftaca shajuana tmojtsatbaná luariñe chacojtsetrabája ora, ndoñe catjuanguētsenaye ca.” Y chca ndoñe quenátayana Bēngbe Bētsá n̄ye toronga inétsan̄yēna ca,

10 sinó in̄ye más bēts soye; chca endayana ndayá ndegombre bēnga, chē Bēngbe Bētsabiamana soyēngama abuayiy-nayíñe trabájayēnga cha šnetsan̄yēna ca. Chca tmojanábema bēngbiamana, er chē fshantse arayá y chē meshēnga atbanayá, entsamna chca jamana jtsobátmanēse, chē tmojátabe shajuantšana batšá jójyēngacñama.

11 Y chca, bēnga chē tšabe noticiēngama tbojábuaenase, y chca, Bēngbe Bētsábiocana tšabe bendicionēnga chašmotsebomnama bēnga tifjama, ndoñe yapa tanandátsmēna tsēngaftanga jótjañana, chē šmobomna soyēnguentšana bēnga jēftsiyenama chašcuatšatama.

12 In̄yēnga derecho tmojtsebomna tsēngaftanga jótjañana chē šmobomnentšana chašmuacaredadama, tsēngaftangbeñe chēngbe trabajuama, as bēnga más derecho fstsebomna chca jamama.

Pero bēnga tondaye checbatamēndá, bēnga chē derecho bétsebomnayeca. Chca játamamna, bēnga lempe fsēntsoboyá, chca, bēnga tondaye ntjátamama, y chē causa entsanga ndoñe chašondētsayaunana, bēnga chē tšabe noticiēnga fstsabuayiyná ora.

13 Tšēngaftanga šmondētatsēmo, Bēngbe Bētsabe bēts

yebnoca trabájayënga Bëngbe Bëtsabiana oservéniñe, mondbóyëngacñe chënga jasama, ndayá entšanga Bëngbe Bëtsá jadórama chabe bëts yebnoye tmojiyëbo sananguentšana. Y chë Bëngbe Bëtsá jadórama soyënga amënga, altaroca, chë juatšëmbonama luarentše, chënga jasana ndayá chentše tmojuátšëmbona soyënguentshana.

14 Cachcá, Bëngbe Bëtsá tojamandá, chë tšabe noticiënga abuayiynayëngna, vida jtsebomnamna lempe ntšamo tojtsëjabotcá chamóyëngacñe ca, chë tšabe noticiënga abuayiynayama.

15 Pero atše ndocna te chiyaisemandá ínÿenga chca chašmotsecuedánama, atše chë tšabe noticiënga abuayiynayá bëtsemnama chca derecho tsbómnyeyca, y cach ndoñe mora quem soye quecbatëbuabiamná, tšëngaftanga ndayánaca atše chašmuatšetama. Atšbiana más tšabá nántsemna jóbanana, y ndoñe ntjalesénciana inÿa chaoma atše cach atšbiana oyejuayá ndoñe ntjátsmënama, ínÿengbentšana soyënga stjójyëngacñe causa.

16 Atše ndoñe quetsatsjuabná atše canÿe bëts soye tsama ca, chë tšabe noticiënga stsabuayiynama, er atše obligaciönaca sëntsemna chca jtsamama, Bëngbe Bëtsá chama šojanchémboyeca. ¡Tša lastemcá atšbiana nántsemna, chë tšabe noticiënga ndoñe sëntsabuyiynase!

17 Chíyeca, atše chë tšabe noticiënga stsabuayiyná nÿe atše chca jamama stsebóseyeca, atšbe uacanana soye ya stsebomna; pero atše chca stjama, y ndoñe tontsemna nÿe atše chca jamama stsebóseyeca, masque chca, atše tsama, ndayá jtsamama Bëngbe Bëtsá šojanbonÿecá.

18 Y chca, atšbe uacanana soye endmëna atše oyejuayá jtsemnana chë tšabe noticiënga abuayiynayama, ošbuachiyëngbentšana atše vida jtsebomnama tondaye ntjatoyëngacñecá; chca, atše tondaye quetsátama chë tšabe noticiënga abuayiynayama tsbomna deréchoca, chë atšbe trabajuentshana vida jtsebomnama.

19 Atše, masque ndocna entšábeyeca nÿets tempo mandaná quetsátsmëna, puerta nduamaná sënjóbema, mo canÿa nÿets tempo ínÿabeyeca mandanacá, nÿetscanga jaserviama, chca, atše chca jtsamëse, jobenayama becá entšanga, ntšamo tojopodecá, jayënjanama Crístbeñe chamotsošbuáchema.

20 Chë judiëngbiamna atše sënjama chaitsiyena mo chëngcá jtsamëse y jtsejuabnayëse, chca, atše jobenayama chënga jáyënjanama Crístbeñe chamotsošbuáchema. Y chë Moisesbe léyeca mandánënga imoyenëngbiamna, atše chëngcá sënjóbema, masque ndegombre chë Moisesbe léyeca mandaná ndoñe quetsátiyena; chca sëndbama chënga jáyënjanama Crístbeñe

chamotsošbuáchema.

<sup>21</sup> Pero chë Moisesbe léyeca ndëmandánënga oyenëngbiamna, atše chëngcá sënjobema, chënga jáyëñjanama Crístbeñe chamotsošbuáchema, masque ndegombre endmëna, atše šontsemna jamana ntšamo Bëngbe Bëtsá šomandacá y ntšamo Cristo šomandacá.

<sup>22</sup> Chë nÿe batšatema ošbuáchiyëngbiamna y Bëngbe Bëtsabe soyëngama nÿe batšatema osertánëngbiamna, atše sënjama chaitsiyena mo chëngcá jtsamëse y jtsejuabnayëse, chca, atše jobenayama jamama chënga sempre Crístbeñe chamotsošbuáchema. Y lempe chca, chë atše jamana ntšamo nÿetscanga imomncá atše chaitsemnana, endmëna atše jobenayama báseftanga jáyëñjanama Crístbeñe chamotsošbuáchema.

<sup>23</sup> Atše lempe chca sëndama, bëtscá entsanga chë tšabe noti-ciënguiñe chamotsošbuáchema, y chca, atše atsboaná chaitsemnana y chëngcá atše chayóyëngacñana, chë atsebácanënga Bëngbe Bëtsá yochjatsataye tšabe soyënga.

<sup>24</sup> Tšëngaftanga šmondëtatšëmbo, canÿe luaroye jashjanguama entsanga tmojótjajo orna, banga jotjajuana, pero nÿe canÿa chë uacanana soye jóyëngacñana. Chcasna, mo chë uacanana soye jóyëngacñana tmojótjajëngcá, tšëngaftanga cmontsamna jtsiyenana, chë Bëngbe Bëtsábicana uacanana soye josháchiñana.

<sup>25</sup> Nÿetscanga chë tmojótjajënga ínÿenga jáyëñjanama, chënga jopróntana nÿetsca soyënguiñe jtsenomándayëse, chca, canÿe uacanana soye, tsbuanachëngaca uapormana coronësha juayëngacñana; y chësha betesco jtsanctana. Pero bënga ndoñe; bënga mondoyena Cristbiamna soyënga jtsamëse, Bëngbe Bëtsábicana ba tšabe soyënga mo uacanancá jóyëngacñana, y chë soyënga nÿetsca tescama bënga mochanjëftsebmna.

<sup>26</sup> Y atšna, atšbe bariëna sëndëntšena Bëngbe Bëtsá jt-seservénama, ndoñe mo canÿa ínÿëngbioye jáyëñjanama tojotjajuacá, chë ndëmoye jashjanguama yomnama ntsetatšëmbcá; y cach ndoñe mo nda tojtsepeliá orcá, chora, cha nÿe ínÿoye chabe buacuatsënga tojtsëtšana y chë ínÿabe cuerpoye ndoñe.

<sup>27</sup> Mo canÿe tšabe peliayacá, chabe cuerpo játsëtšenana y chca chë cuerpo corente jtsemándayana, atše ndoñe quetsatsleséncia chë atše tšabá jtsomñana atšbe ainanentša juabnënga chašotsemándama; y chca, Crístbioye jt-seservënëse chamotsiyenama ínÿëngbioye stjabuayená chentšana, Bëngbe Bëtsá chašotsaboté chabe uacanana soye josháchiñana, cha ndoñe tšabá tijaservé causa.

*Cach entsangbe pormana soyënga ndoñe chamondëtsadoránama jábuayenama*

1 Jesucristbeyeca atšbe catšátanga, atše sëntseboše tšëngaftanga chašmotsetátšëmbó bëngbe tempsca bëts taitanga judiënga, chënga nyëtscanga Bëngbe Bëtsá canye jantšetësheca benache yojaninÿanÿná, y chënga nyëtscanga, chë Buángana ca uabaina mar bejayëjana tmojánachnëjna, chiñe mo bojojuinë cuaftsomñcá.

2 Chë jantšetësheca Moisés imojanëstonama, y chë mar bejayëjana tmojánama, chënga tmojanóbema Moisesbe ústonënga.

3 Chënga nyëtscanga tmojanse cachca saná, chë Bëngbe Bëtsá celocana tojanichmó saná;

4 y nyëtscanga tmojanofšé chë Bëngbe Bëtsá tojanma chë peñësentšana chaóbozna béjaye. Cristo chëngaftaca yojtsemna jtsanÿenama chënga imojtsajnéntscuana, y ntšamo chë peñësentše chëngaftaca tojanopasacá, yojaninÿanÿná Cristo chënga yojtsanÿenama.

5 Masque chca, banga chënguentsënga ntšamo tmojanmama Bëngbe Bëtsá ndoñe yontsóyejuaye; y chë causa, Bëngbe Bëtsá tojanma chënga chamóbanama chë entsanga ndoyenentše.

6 Lempe chca tojanopasá bënga jinÿanÿiyama y jábuayenama ntšamo inopása entsanga bacna soyënga jamama tmojtseboše ora, bënga chca jamama ndoñe chamondëtsebošama.

7 Chíyeca, tšëngaftanga ndoñe šmattsadorana entsangbe pormana soyënga, ndayama ínÿenga jtsejuabnayana diosënga yomna ca, ntšamo báseftanga israeloquënga tmojanmcá. Ntšamo Bëngbe Bëtsabe uabemana palabrënguiñe chëngbiana endayancá, chënga canye ternerá castellánoca tmojanpormá ora, mo dios cuaftsemncá jadórama: “Entšanga tmojanotbiana jasama y jatmuama, y chentšana tmojantsbaná joboyeuama ca”.

8 Boyabása o shembásaftaca bacna soyënga ndoñe šmattsama, ntšamo báseftanga chënguentsënga tmojanmcá, y chë causa, nye canye te, uta bnëtsana y unga uaranga entsanga tmojanóbana

9 Bacna soyënga ndoñe šmattsama, jinÿama buetatescama Bëngbe Utabná uantado yochjëftsemnama y ndoñe šochanjacastígayama. Báseftanga chënguentsënga chca tmojanma, y chë causa tmojanóbana mëtšcuayëngaca ftëtšenënga.

10 Bëngbe Bëtsabe contra ndoñe šmattsóyebuambnaye, ntšamo báseftanga chënguentsënga tmojanmcá, y chë causa, chë ángel obanayá tojanma chënga chamóbanama.

11 Lempe chca bëngbe tempsca bëts taitángaftaca tojanopasá, bënga jinÿanÿiyama ntšamo jtsiyenana šojtsamnama,

y Moisés, Bëngbe Bëtsabe uabemana palabrenguiñe chca tojéftsanboshjona bënga jabuátambama, bënga, chë Jesucristo yochjésabo orscama ya batšatema yojtsájamna ora oyenëngbiamana.

12 Chcasna, nda tojtsejuabná Bëngbe Utabnabiamana tšabá yojtsama ca y bacna soyënga ndocna te yochanjama ca, cuedado chaotsebomna, bacna soyënga amiñe ndoñe chaondótsatšama.

13 Ndocna entšá jatócochënguana bacna soyënga jamama, ntšamo tempo ínÿenga ndoñe tonjanocochëngcá cachca bacna soyëngama, pero tšëngaftanga corente šmondëtatsëmbo Bëngbe Bëtsá sempre cmochtsëjabuachanama chë padecena soyënguiñe, y cha ndoñe yochanjalesénciamana bacna soyënga jamama chacmócochënguama, tšëngaftanga chca soyënga jamama jtsóboyayama obenana ntsebomncá; pero chë padecena soyënguiñe chašmojtsemna ora, cha cmochanjínÿanÿiye ntšamo chë bacna soyënga ora tšabá jabocanama, y chca, jtsóboyayama chašmotsobenama.

14 Chíyeca, atšbe bonshánënga, ndocna te šmattsadorana cach entšangbe pormana soyënga, ndayama ínÿenga jtsejuabnayana diosënga yomna ca.

15 Atše sëntsoyebuambná mo tšëngaftanga corente osertánënga cuaftsemncá. Cach tšëngaftanga šmochjenójuaboye y šmochjayana, ntšamo cbojtsëtsësnacá aiñe o ndoñe tšabá bëtsemnana.

16 Ntšamo Jesús chë coptema vinoyama Bëngbe Bëtsábioye tbojtanchuacá, bëngnaca cachcá Bëngbe Bëtsá chama fsëndbëtsatschuanaye. Bënga chca tmojama ora, ndegombre, jtsinÿanÿnayana bënga Crístoftaca cánÿiñe mo canÿacá imomnama, chabe buiñe juabuáshanëse bëngbiamana tojanóbanayeca. Y chë mondbajataye tandëse tmojase ora, jtsinÿanÿnayana bënga Crístoftaca cánÿiñe mo canÿacá imomnama, cha bëngbiamana tojanóbanayeca.

17 Bënga ošbuáchiyënga masque banga mondmëna, chca orna nÿetscanga cach tandësentšana bënga jasana, y chíyeca bënga jtsemnana mo canÿacá, mo Cristbe cuerpcá.

18 Tšëngaftanga šmochtsejuabnaye ndayá chë Israeloca bachnanga monduamanama: chënga chë altaroca tmojóba y tmojuátšëmbona bayënguentshana jasana, y chca chënga chora jtsinÿanÿnayana chënga cánÿiñe mo canÿacá imojtsemnana Bëngbe Bëtsáftaca, chë chca tmojtsadoranáftaca.

19 Y chca, atše ndoñe quetsátsboše jayanama chë entšangbe pormana soyënga mo diosënga cuaftsemncá, uámana soyënga yomna ca. Ni chë cach entšangbe pormana soyënga diosënga yomna ca jtsejuabnayëse jadórama uátšëmbona saná inÿe

sanama más iuámana ca.

<sup>20</sup> Pero aíñe, entsanga cach entsangbe pormana soyëngama mo diosënga cuaftsemncá, chca tmojuátšëmbona ora, ndegombre chënga Satanás y chabe uajabuachanëngbioye jtsadoránana, y ndoñe Bëngbe Bëtsábioye. Y atše ndoñe quetsátsboše, tšëngaftanga chca uatšëmbonana šmojasama, cányiñe mo canyáca chë bayëjëngaftaca chašmotsemnana.

<sup>21</sup> Tšëngaftanga ndoñe quešmátobena chë vínoye coptémentšana jofšiyana, ntšamo chë ošbuáchiyënga bétsemnana mondbetsamcá, y chentšana chë cach entsangbe pormana soyënga, mo diosënga cuaftsemncá jadórama vínoye coptementšanënaca. Chca šmojama ora jtsemnana mo chë diablëngaftaca cuaftsesangcá. Y cach ndoñe quešmátobena vínoye jofšiyana y tandëše jasana, ntšamo ošbuáchiyënga bétsemnana mondbetsamcá, y chentšana cach entsangbe pormana soyënga mo diosënga cuaftsemncá jadórama fiestentša sanánaca jasana, y chca chë bayëjëngbioye jtsadoránana.

<sup>22</sup> Bënga chca tmojtsamama, bënga mochanjama Bëngbe Utabná puerte etonaná bëngaftaca chaotsemnana, er chë bayëjëngaftaca bënga chca jtsamana. ¿O imojtsejuabná bënga chabiamá más obenana bomnënga imomna ca?

*Lempe šmochjama Bëngbe Bëtsá puerte bëtsá y uamaná yomnana jinyanñiyama*

<sup>23</sup> Mondbétsichamo: “Entselesenciana ndayánaca jamana, ndayama Bëngbe Bëtsá ndocá tonjayana ca”, pero básefta soyënga atše stjama ora ndoñe nñyetscangbe tšabiamá ntsemnana. “Entselesenciana ndayánaca jamama ca”, pero nñyetzca soyënga ntšamo bënga tmojamcá, ošbuachiyëngbioye ndoñe ntjujabuáchana Jesucrístbeñe más chamotsošbuáchema, y ainaniñe más añemo chamotsebomnana.

<sup>24</sup> Ndocná chaondétsama lempe ntšamo tojobenacá nñe cachabe tšabiamá, ndayá más chaotsama chë inñyengbe tšabiamá.

<sup>25</sup> Lempe mercadoca tmojtsena soyënguentsana šmochjase, ntjatstjanaycá chë mëntšena aíñe o ndoñe tmonjuátšëmbona chë cach entsangbe pormana soyënga, mo diosënga cuaftsemncá jadórama ca. Ndoñe chca šmattsetjanaye, ntšamo tšëngaftangbe ainaniñe juabnënga šmojtsebomnana;

<sup>26</sup> er ntšamo Bëngbe Bëtsabe uabemana palabrenguiñe endayancá: “Quem luare Bëngbe Utabnabe soye endmëna, y lempe ntšamo chiñe yomncánaca ca.”

<sup>27</sup> Nderado canñe ndošbuachiyá tmojúbuaja chábioca jasama, y tšëngaftanga choye jama tša šmojtsebošëse, lempe ntšamo cha chacmojonanjacá šmochjase, ndayentšana chë



saná tojóbcnana ndocá ntjatstjanaycá, ntšamo tšëngaftangbe ainaniñe juabnënga šmojtsebmnama.

<sup>28</sup> Pero nderado nda tcmojáuyana: “Quem mëntšena cach entšangbe pormana soyënga mo diosëngcá jadórama tmonjanátšëmbona ca”, as ndoñe chana šmatjase, er canya chca tcmojáuyana, y ainanentše šmojtsebmna juabnënga, chë chca jamama ndoñe tšabá bëtsemnana.

<sup>29</sup> Atše sëntsoyebuambná ndayá chë chca tcmojauyanabe ainaniñe juabnëngama, chë soye jasana ndoñe tšabá yondmënana, ndoñe chë tšëngaftangbe ainanentša juabnëngama.

Pero tšëngaftanga šmatjatjaye: “¿Ndáyeca atše šojtsemna jayanana ndayá atše stsobena jamama, ošbuachiyá bëtsemnana, ntšamo chë ínÿabe ainaniñe juabna yobomnana ca?”

<sup>30</sup> Y atše chë ndayá stesama Bëngbe Bëtsá tijëtschuase, ¿ndáyeca inÿa šochjauyana atše ndoñe tšabá tijama ca, chë soye tijasama, chë ndayama Bëngbe Bëtsá tijëtschuá ca?”

<sup>31</sup> Masque ntšámnaca, cachcá, chašmojtšesá, o chašmojtsofšëšná, o ndaye inÿe soye chašmojtsama, ndayama Bëngbe Bëtsá ndocá tonjayana, lempe šmochtsama Bëngbe Bëtsá puerte bëtsá y uamaná yomnana jtsinÿanÿnayama.

<sup>32</sup> Tondaye šmatjama ndayá chaobená jamana, ínÿenga Cristo chamotsábotema. Ndoñe chca šmatjama, ni judiëngbiama, ni ndoñe judiëngbiama, ni chë Bëngbe Bëtsábeñe ošbuachiyëngcá enefjuanëngbiama.

<sup>33</sup> Smochtsama ntšamo atše sëndëntšencá, nÿetscanga nÿetsca soyënguiñe oyejuayënga jtsabamnana, lempe ntšamo stjobenacá jtsamëse, ndoñe nÿe atšbe tšabiama, ndayá masna chë ínÿengbe tšabiama, chënga chamotsobenama chëngbe bacna soyënguentšana atsebácanënga jtsemnana.

## 11

1 Tšëngaftanga šmochtsiyena ntšamo atše sëndamcá jtsamëse, cach ntšamo atše sëndoyencá, ntšamo Cristo inetsamcá jtsamëse.

*Ntšamo yomna shembásenga tšabá jtsemnana, ošbuachiyëngcá tmojénefna ora*

<sup>2</sup> Atše sëntseboše tšëngaftanga jáuyanana tšabá šmojama ca, tšëngaftanga nÿetsca soyënguiñe atšbiama šmnëtsenojuabnana, y tšëngaftanga šmojtsabuátambama y šmojtsamama ntšamo tcbonjanabuatambacá, cachcá ntšamo atše sënjëtsanboshjoncá.

<sup>3</sup> Pero atše sěntseboše tšěngaftanga chacmēsertá: nda n̄jetsca entšanga iuaměnda cha, Cristo endmēna; y nda shėmbioye ibománda cha, boyá endmēna; y nda Crístbioye ibománda chana, Běngbe Bětsá endmēna.

<sup>4</sup> Nderado can̄ye boyabása chabe bestšaše tojtsenátsbotse, in̄ye ošbuáchiyěngaftaca cán̄yiñe Běngbe Bětsáftaca tbojtsencuénta ora o Běngbe Bětsabe juabna tojtsoyebuambná ora, cha jamana cachá chaotsėuatjama, chabe bestšásēca chca tojama causa.

<sup>5</sup> Pero nderado can̄ye shembása chabe bestšaše ndoñe tontsenátsbotse, in̄ye ošbuáchiyěngaftaca cán̄yiñe Běngbe Bětsáftaca tbojtsencuénta ora o Běngbe Bětsabe juabna tojtsoyebuambná ora, cha jamana chama cachá chaotsėuatjama; jtsėuatjana mo cha lempe jshetětšená cuaftsemncá.

<sup>6</sup> Er, nderado can̄ye shembása ndocna te tontseboše chabe bestšaše jtsenátsbotsana, chabiama más tšabá nántsemna lempe chaotsenójshetětše. Pero tojtsejuabná utsbotjená o chca lempe jshetětšená jtsemnama cha yochtsėuatja ca, as chabe bestšaše chaotsenátsbotse.

<sup>7</sup> Boyabása ndoñe quebnátsmēna chabe bestšaše jtsenátsbotsana, er Běngbe Bětsá tojanma ntšamo cachá yomncá cha chaotsemnama, y chě boyabása chca jtsemnēse, jtsin̄yan̄yayana Běngbe Bětsá chabe mandayá yomnama. Pero ntšamo chě shembása yomncá, jtsin̄yan̄yayana chě boyabása chabe mandayá yomnama;

<sup>8</sup> er Běngbe Bětsá, boyabása ndoñe tbonjanma shembásabentšana, ndayá shembása boyabásabentšana.

<sup>9</sup> Y Běngbe Bětsá, boyabása ndoñe tbonjanma shembásabeyeca, ndayá shembása boyabásabeyeca.

<sup>10</sup> Chíyeca, y chca jamama angelēnga tšabá jtsin̄yan̄anayeca, shembása jtsemnana chabe bestšaše chaotsenátsbotsama, chca, chaotsin̄yana in̄ya chábeñe yomándama.

<sup>11</sup> Pero, Běngbe Utabnábeñe ošbuachiyěngcá jtsiyenamna, boyabásenga y shembásenga cachcá jtseytētanana.

<sup>12</sup> Er masque Běngbe Bětsá, shembása boyabásabentšana tbonjanma, mora, shembásabentšana boyabása jóbocnana; y lempe Běngbe Bětsábiocana endóbocana.

<sup>13</sup> Cach tšěngaftanga, yejuana chama šmochtsejuabnaye y šmochjayana tšabá o ndoñe tšabá yontsemna, can̄ye shembásabiama Běngbe Bětsáftaca jencuéntana, bestšaše ntsenatsbotscá.

<sup>14</sup> Ntšamo entšanga sempre mondbetsejuabnaycá, ndayá tšabá bětsemnama, bėngbioye jtsabuátambayana, boyabása bēn stjēñēsha chabuájuaa tojalesenciase, cha jamana cachá chama chaotsėuatjama.

15 Pero shembásabiamna, chë bën stjënëssha jtsinÿanÿnayana chabe botamanana y uámanana, er Bëngbe Bëtsá tojanma shembása bën stjënëssha chaotsábomnama, chca, cha chaotsebomna ndáyeca chabe bestšaše jtsenátsbotsama.

16 Masque ntšámnaca, ndánaca tojtseboše quem soyama más jatóyebuambayama, cha bontsemna jtsetatšëmbuana, ni bënga, ni Bëngbe Bëtsábeñe ošbuachiyëngcá enefjuanënga queftsatsleséncia chca ndoñe chaondétsemnama.

*Bëngbe Utabnabiamna jtenójuaboyama jasama ora, chënga ndoñe tšabá imonjánama*

17 Mora cbochanjaménda soyënguiñe atše ndoñe quetsátobena tšëngaftanga jáuyanana tšabá šmojama ca, er tšëngaftanga Crístbeñe ošbuachiyëngcá šmojénefjna ora, Bëngbe Bëtsá jadórama, atše šontsinÿana chë soye yojtsoservena tšëngaftanga más bacá chašmotsemnama, y ndoñe tšëngaftangbe tšabiamna.

18 Natsana cbochjáuyana, atše sënjouena tšëngaftanga ošbuachiyëngcá šmojénefjna ora, báseftanga canÿe soye innétsejuabnaye y ínÿengna inÿetšá ca, y atše sëntsejuabná batšana ndegombre chca yojtsemna ca.

19 Ndegombre jtseytana tšëngaftangbeñe chamotsemna báseftanga canÿe soye juabnayënga y ínÿengna inÿetšá, chca, nÿetscanga chamotsetatšëmbuama ndëmuanyënga imojtsemna chë Bëngbe Bëtsá tojayana chënga tšabá tmojama ca.

20 Tšëngaftanga tandëse jasama y vínoye jofšiyama šmojénefjna ora, ntšamo bënga fsënduamancá, Bëngbe Utabná bëngbiamna tojanóbanama jtenójuaboyama, ndayá chora tšëngaftanga šmnetsamcá, ndoñe quenátsmëna ntšamo ndegombre cmojtsamncá, chë Bëngbe Utabnabiamna jtenójuaboyama jasama ora;

21 er chë jasama tojobuache ora, cada ona inóntša jasama ndayá tojiyëbcá, y ndoñe ntjatobátmanana nÿetscanga ndayánaca jasama chamotsebomnëntscuana; báseftanga shëntseca joquédana, y ínÿengna tša jëftsesana y jofšiyana jëftsótmenantscuana.

22 ¿Tšëngaftanga ndoñe yebna šmondbomna ndayentše jasama y jofšiyama? ¿Ndáyeca tšëngaftanga šmojtsejuabná chë innénefjna ošbuáchiyënga nduámanënga imomna ca, y šmojama chë chentše tmojtsemnënga, tondaye ndbomnënga, chamotsëuatjama? ¿Tšëngaftanga šmojtsejuabná atše cbochjáuyana tšabá šmojama ca, chë Bëngbe Utabnabiamna jasama ora chca šmojamama? ¡Ndegombre ndoñe!

*Bëngbe Utabnabiamna jtenójuaboyama saná  
(Mt 26.26-29; Mc 14.22-25; Lc 22.14-20)*

23 Er atše cach Bëngbe Utabná bentšana ntšamo cbontsabuatëmbacá sënjanóyëngacñe: Bëngbe Utabná cach uayayëngbe cucuatšiñe tmojánboshjona íbeta, tandëse tojanca,

24 Bëngbe Bëtsábioye tbojtanchuá chentšana, tojanjatá y tojánayana: “Quem tandëse atšbe cuerpo entsemna; tšëngaftangbe tšabiama chanjóbana. Ntšamo mora montsamcá šmochtsama, atšbiama jtenójuaboyama ca.”

25 Cachcá, chë saná tmojansentšana, coptema tojanaca y tojánayana: “Quem coptema vínoye atšbe buiñe entsemna. Atšbe buiñe echanjuábuashana tšëngaftanga chašmotsetatšëmbuama, ntšamo Bëngbe Bëtsá entsanga tojanašebuachenacá pronto yochtsemnama. Cada vínoye chašmojtsofšëšná ora, chca šmochjama atšbiama jtenójuaboyama ca.”

26 Er tšëngaftanga cada quemëntša tandëse chašmojtšesá ora y quem coptementšaycá chašmojtsofšëšná ora, Bëngbe Utabná chaojésabëntscuana tšëngaftanga šmochántsinjñanýnaye cha entšangbiama tojanóbanama.

*Ntšamo yomna jamana, Bëngbe Utabnabiama jtenójuaboyama jasama ora*

27 Chcasna, Bëngbe Utabnabiama jtenójuaboyama jasama ora, ndánaca tandësentšana tojase y coptémentšana tojofšë, ndoñe chë ntšamo chaotsemnama Bëngbe Utabná yojanjuabnacá, chabiama Bëngbe Bëtsá jayanana cha puerte bacna soye tojama ca. Chë entsá chca tojama ora, cha jtsinjñanýnayana, Bëngbe Utabnabe cuerpo y buiñe chabiama tondaye yonduámanama.

28 Chíyeca, entsemna cada ona corente chauenojuabó jtsetatšëmbuama aíñe o ndoñe yontseprontana chca jasama y jofšiyama, cabá ndëse y ndofšë ora.

29 Er nderado nda tojase y tojofšë, chë Bëngbe Utabnabiama jtenójuaboyama jasama ora, cach Bëngbe Utabnabe cuerpo yomnama ntjajuaboycá, cha chë sóyeca jamana Bëngbe Bëtsá chabotsecastigama.

30 Chíyeca, banga tšëngaftanguentšënga šoquënga šmojtsemna, ínýenga añemo ndbomñënga, y ínýengna ndoñe nýe báseftanga tmojóbana.

31 Pero bënga corente tmojajuabó jtsetatšëmbuama aíñe o ndoñe montseprontana ntšamo šuamncá jasama y jofšiyama, cabá ndëse y ndofšë ora; chca, Bëngbe Bëtsá ndoñe buántsemna bënga játa castigana, ntšamo tšabá yomncá ndoñe tmonjase causa.

32 Pero, Bëngbe Utabná castígoca chca šojabuayená ora, jtsemnana bënga más tšabá jtsamama chamuatsjinýama, y chca, bayté chentšana, Bëngbe Bëtsá ndoñe chabondëtsemna

játayanana bënga šojtsamna nÿetsca tescama castigánënga jtsemnana ca, cánÿiñe chë nÿe quem luarama enójuabnaye entšángaftaca.

<sup>33</sup> Chca, Jesucrístbeyeca atšbe catsátanga, tšëngaftanga chë Bëngbe Utabnabiana saná jasama chašmojënefjna ora, cánÿiñe nÿetscanga šmochjabojátša.

<sup>34</sup> Y nderado nda tbojtseshëntsana, cachabe yebnoca chauétsese, chca, Bëngbe Bëtsá ndoñe chabondëtsemna tšëngaftanga jácastigana chora ndoñe tšabá šmonjama causa. Chë inÿe soyëngama ndayama tšëngaftanga šmonjatjá, chamna chanjamánda tšëngaftanga jányama chajjá ora.

## 12

### *Bëngbe Bëtsabe tšetana obenana, tšabe soyënga jamama*

<sup>1</sup> Jesucrístbeyeca atšbe catsátanga, atše sëntseboše tšëngaftanga chašmotsetátšëmbo Bëngbe Bëtsabe tšetana obenanama tšabe soyënga jamama, Crístbeñe ošbuáchiyënga jujabuáchama.

<sup>2</sup> Tšëngaftanga šmondëtatšëmbo, tšëngaftanga Crístbeñe ndošbuáchiyënga šmonjamna ora, ínÿenga cmonjanabu-atambá soyënga, y chora tšëngaftanga šmonjamna ínÿabeyeca uasjanëngcá, cach entšangbe pormana soyënga mo diosënga cuaftsemncá jadórama; y chë soyëngna ni mo jóyebuambayama ntšobenana.

<sup>3</sup> Chíyeca, atše mora sëntseboše tšëngaftanga chašmotsetátšëmbo, ndocná ntšobenana jayanana: “Jesús ndoñe chë Cristo quenátsmëna, ni Bëngbe Utabná ca”, chë Bëngbe Bëtsabe Espíritbe obenánaca cha tojtsóyebuambnase. Y cach ndocná ntšobenana jayanana: “Jesús Bëngbe Utabná endmëna ca”, chë Bëngbe Bëtsabe Espíritbe obenánaca cha ndoñe tontsóyebuambnase.

<sup>4</sup> Espíritu jamana bënga ndoñe chamondëtsebomnama cachca tšetana obenana tšabe soyënga jamama, pero lempe jobayana cach canÿe Espíritbeyeca.

<sup>5</sup> Bënga, Bëngbe Bëtsá mondëserveda, nÿetsca soyënguiñe jtse-trabájayëse, pero cach Utabná nÿets chë trabajënga šojabanÿé.

<sup>6</sup> Nÿetsca soyënga Bëngbe Bëtsabe obenánaca fsëndbétsama, pero cach Bëngbe Bëtsá endmëna nda inétsama bënga chë soyënga jamama obenana chamotsebomnama.

<sup>7</sup> Bëngbe Bëtsá inétsama cada ošbuachiyá chaotsebomnama canÿe tšetana obenana tšabe soyënga jamama, y chë soye jtsinÿanÿnayana Bëngbe Bëtsabe Espíritu chabe ainaniñe yomnama; y chë tšetana obenana jtsemnana nÿetscangbe tšabiana.

<sup>8</sup> Bëngbe Bëtsá, Espíritbeyeca, canya obenana jatštayana puerte osertanánaca chaóyebuambama, y inyana obenana cach Espíritbeyeca ndayámnaca corente jtsetatšëmbëse chaóyebuambama;

<sup>9</sup> Inyana cach Espíritbeyeca, obenana Crístbeñe puerte chaotsošbuáchema, y inyabiamna, cach nye canye Espíritbeyeca, obenana jatštayana šoquënga jáshnama;

<sup>10</sup> Inyana, obenana tšabe soyënga Bëngbe Bëtsabe obenánaca jamama, y inyana, obenana Bëngbe Bëtsabe juabna jóyebuambayama. Inyana, obenana corente jajuaboyama y jtsetatšëmbuama ntšamo tmojayancá Bëngbe Bëtsabe Espíritbeyeca o bacna espiritëngbeyeca tojtsemnama, y inyana, obenana chë tempo ndmabiyáñnaca chaóyebuambama, y inyana, obenana josértama ntšamo chë ndaye biyáñnaca jóyebuambayama obenana bomná tojtsichamcá, y inyëngna chama jábuayenama.

<sup>11</sup> Pero cach Espíritu, chë nye canye Espíritu lempe chca jamana, ntšamo tšabá bëtsemnama cha tojtsejuabnacá cada entšábioye jatštayëse.

*Nyetsca ošbuáchiyënga cányiñe, mo Crístbe cuerpcá jtsemnana*

<sup>12</sup> Cuerpo nye canye soye endmëna y chë cuerpna ba soyënga jtsebomnana; masque chë cuerpo ba soyënga jtsebomnana, nye canye cuerpo jtsemnana. Bëngaftácnaca cachcá. Bënga banga mondmëna nyetscanga Crístbeñe ošbuáchiyënga, pero Crístbeyeca, bënga cányiñe mo canyácá jtsemnana.

<sup>13</sup> Er bënga nyetscanga, judiënga o ndoñe judiënga, nye inyabiamna nyets tempo oservënënga o cachëngbiama trabájayënga šojanëbaye, Crístoftaca cányiñe mo canyácá, jtsemnama mo chabe cuerpcá, y chca yomna cach Espíritbeyeca; y Bëngbe Bëtsá tojama cach Espíritu nyetscangbe ainanoye cháuamashënguama, bënga jtsamëndayama.

<sup>14</sup> Cachcá, canye cuerpo ndoñe nye canye soye ntsebomnana, ndayá ba soyënga.

<sup>15</sup> Nderado shecuatše tojayana: “Cucuatše ndoñe quetsásmëna causa, atše cuerpentša soye ndoñe quetsásmëna ca”. Chca tojayanamna, shecuatše mo chë cuerpentša soye ndoñe cuaftsemncá ndoñe ntjátsmënana.

<sup>16</sup> Nderado matscuaše tojayana: “Bominye ndoñe quetsásmëna causa, atše cuerpentša soye ndoñe quetsásmëna ca”. Chca tojayanamna, matscuaše chë cuerpentša soye ndoñe cuaftsemncá ndoñe ntjátsmënana.

<sup>17</sup> Nyets cuerpo bominye tojtsemnëse, bënga ndoñe muantsobena jouenama. Y nyets cuerpo matscuaše tojtsemnëse, bënga ndoñe muanjobenaye jonguëtsetšiyana.

18 Pero ndegombre endmëna, Bëngbe Bëtsá nÿetsca soye cuerpentše tojancjá ndayentše cha tojánbošenentše.

19 Nÿetsca cuerpentša soyënga nÿe canÿe soye tojtsemnëse, ndoñe canÿe cuerpo nántsemna.

20 Pero ndegombre endmëna, masque ba soyënga cuerpentše yomna, nÿe canÿe cuerpo jtsemnana.

21 Bominÿe quenátobena cucuatše jauyanana: “Ndoñe quecátsiyta ca”; y cachcá, bestšaše quenátobena shecuatše jáuyanana: “Ndoñe quecátsiyta ca”.

22 Inÿetsá, chë cuerpentša soyënga, chë tojtsinÿana mo obenana ndbomna y nduámana soyëngcá, jtsemnana chë cuerpama más iyta soyënga.

23 Chë cuerpentša soyëngama, ndayama bënga tmojtsejuabná más nduámana soyënga yomna ca, bënga jamana más chaotsámanama, chiñe entšayaca jtichëtjëse. Y chë cuerpentša soyënga, ndayama bënga jtsëuatjana ínÿenga chamotsonÿama, bënga jamana ínÿenga ndoñe chamondëtsonÿama, chiñe entšayaca jtichëtjëse.

24 Pero chë cuerpentša soyëngaca, chë nÿetscanga jtsonÿayana y botamana jinÿama jtsemnana soyëngacna, ndoñe ntseytana chca játamana. Bëngbe Bëtsá cuerpo tojama, ntšamo bënga chamotsamama chentša más nduámana soyënga, más chaotsámanama, ntšamo chë soyënga bënga tmojtsinÿenama.

25 Cha chca tojanma, cuerpentša nÿetsca soyënga chë cuerpama trabajo cánÿiñe chamotsamama, y chca, cada soye chaotsama trabajo chë cuerpentša nÿetsca soyëngbe tšabiamama.

26 Nderado canÿe cuerpentša soyama bacna soye tojopasá, chora nÿetsca chë cuerpentša soyëngámnaca chca ndoñe tšabe soye jtsebínÿnana; pero canÿe cuerpentša soyama tcojama más uámana soye chaotsemnana o ndaye tšabe soye tojopasase, chora nÿetsca chë cuerpentša soyëngámnaca chca tšabe soye jtsebínÿnana.

27 Cachcá, tšëngaftanga Crístbeñe ošbuáchiyënga, cháftaca cánÿiñe mo canÿacá jtsemnëse, mo chabe cuerpcá jtsemnana, y cada ona tšëngaftanguentšá mo chë cuerpentša soyëngcá, jtsemnana mo chabe cuerpentša soyëngcá.

28 Ntšamo Bëngbe Bëtsá cuerpentše soyënga tojancjá ndayentše inabošcá, cachcá, ošbuachiyëngcá enefjuanëngbeñe Bëngbe Bëtsá tojubuáyana, natsana báseftanga mo Jesucristbe ichmonëngcá, chorna Bëngbe Bëtsabe juabna oyebuambnayënga, chorna Bëngbe Bëtsabiamama abuátambayënga, chorna chë bëts soyënga Bëngbe Bëtsabe obenánaca jamama obenana bomnënga, chë šoquënga jáshnama obenana bomnënga, chë ínÿengbioye puerte

ujabuáchanënga, chë inÿe ošbuachiyëngbioye amëndayënga, y chë nÿetsca biyañe jtsóyebuambnayama obenana bomnënga, tempo ndmabiyañe.

<sup>29</sup> Ndegombre, ošbuachiyëngcá enefjuanëngbeñe nÿetscanga ndoñe Jesucristbe ichmónënga ntsemnana, nÿetscanga ndoñe Bëngbe Bëtsabe juabna oyebuambnayënga, nÿetscanga ndoñe abuátambayënga, nÿetscanga ndoñe Bëngbe Bëtsabe obenana bomnënga, bëts soyënga jamama.

<sup>30</sup> Nÿetscanga ndoñe šoquënga jáshnama obenana bomnënga; nÿetscanga ndoñe nÿetsca biyañe jtsóyebuambnayama obenana bomnënga, tempo ndmabiyañe; ni nÿetscanga ndoñe obenana bomnënga quemátsmëna, chë tempo ndmabiyañe nÿetsca biyañe jtsóyebuambnayama obenana bomnënga ntšamo tmojt-sichamcá jósértama y ínÿengbioye chama jtsabuayinyayama.

<sup>31</sup> Pero tšëngaftangna puerta šmochtseboše, lempe ntšamo chašmojobenacá šmochjama, chë Bëngbe Bëtsabe más uámana tšetana obenana jëftsashjáchama.

### *Bonshánana jtsebomnana*

Y inÿe soye más, atše cbochanjínÿanÿiye ntšamo šmojtsobena cabá más tšabá jtsiyenana, Bëngbe Bëtsá jtseservënëse.

## 13

<sup>1</sup> Nderado atše stjóyebuambaye entšangbe biyañe y angelëngbe biyañe, pero ínÿengbioye ndoñe sëntsababuánÿeshanëse, atše stsemna canÿa tondayama uamaná, mo nÿe canÿe metalëshe tojtsenancá, o mo nÿe canÿe platillëshcá ndoñe tšabá tontsenanëshe.

<sup>2</sup> Y atše obenana stsebomna Bëngbe Bëtsabe juabna jóyebuambayama y nÿetsca soyëngama, y chë Bëngbe Bëtsá tempo entšanga ndoñe tonjaninÿanÿé soyënga šojtsësertana, y Bëngbe Bëtsabe nÿetsca soyëngama stsetátšëmbo, y Crístbeñe puerta stjesošbuáchiye, chca betsošbuáchema nÿa mo chë tjashënga chamobonjoma jamama, pero ínÿenga ndoñe sëntsababuánÿeshanëсна, atše tondaye sëntsemna.

<sup>3</sup> Y atše lempe ntšamo stsebomncá ndbomnjémënga stsëjátaye, y ínÿengbioye stjenontréga atšbe cuerpo chamojuinÿema, pero ínÿengbioye ndoñe sëntsababuánÿeshanëse, atše ndocna uámana soye ntjashjáchana.

<sup>4</sup> Canÿe entšá ínÿenga ababuanÿeshaná, uantado jtsemnana masque padecena soyënguiñe tmojtsemna órnaca, y ínÿengaftaca tšabe ainánaca mando jtsebomnana. Inÿenga ababuanÿeshaná ndoñe ntsántšabošana ntšamo inÿa tojatsbomncá, ni ntsenábotamnayana, ni cachá chë ínÿengbiana más uamaná ntjätenobiamnayana;



<sup>5</sup> ndoñe bacá mandbomná ínÿengaftaca ntsemnana, ni nyets tempo ntsebošana y lempe jtsamana nye chabiamá tšabe soye jónyena; cha nye ndayámnaca ndoñe ntjetnana, ntšamo ínÿenga tmojaborlá ora jtsaperdónayana.

<sup>6</sup> Inÿenga ababuanÿeshaná ndoñe ntjóyejuayana chë ndoñe tšabá yondmëna soyëngama; chë ndegombre yomna soyëngamna aíñe.

<sup>7</sup> Inÿenga ababuanÿeshaná, ainaniñe añemo jtsebomnana nyetsca padecena soyënguiñe, lempe ntšamo más tšabá yomna soyënguiñe jtsošbuáchiyana, nyetsca más tšabá yomna soyëngama jtsobátmanana, y jtsóboyayana nyetsca toto soyënga.

<sup>8</sup> Bonshánana nyetsca tescama jëftsemnana. Canÿe te echántsemna, chora chë Uámana Espíritu ndoñe más queochátama entšanga Bëngbe Bëtsabe juabna chamotsóyeuambnama, ni chë ndocna te ndmabiyañe chamotsóyeuambnama, ni chë puerte jtsetatšëmbëse jóyeuambayama obenama chamotsebomnama;

<sup>9</sup> er ntšamo mora bënga imotatšëmbcá y Bëngbe Bëtsabe juábnaca jóyeuambayëse tmojayana soyënga, nye batšatema bëngbioye jtsinÿanÿnayana Bëngbe Bëtsabe soyëngama, ndoñe lempe;

<sup>10</sup> pero Jesucristo chaojésabo ora, y chaojama bënga chamotsemna lempe ntšamo Bëngbe Bëtsá bëngbiama yojanjuabnacá, quem soyënga, chë nye batšatema bëngbioye jtsinÿanÿnayana Bëngbe Bëtsabe soyëngama, ya ndoñe más queochátšbinÿna.

<sup>11</sup> Atše básatema ora, sënjanoyebuambná, sënjanjuabná, y soyëngama tšabá jtsetatšëmbuamna sënjanjuabná mo canÿe basetemcá; pero bëtsá sënjanóbema orna, sëntsanajbaná lempe amana mo canÿe basetemcá.

<sup>12</sup> Cachcá, mora bënga quem luarentše nye batšatema Bëngbe Bëtsabe soyëngama jtsetatšëmbuana, mo canÿe espejuiñe tmojtsonÿacá, pero ndoñe nÿa corente tšabá. Pero canÿe te bënga mochántsetatšëmbo lempe nyetsca soyëngama, bënga Bëngbe Bëtsabe delante chamojtsemna ora. Mora atše sëntsetatšëmbo nye batšatema Bëngbe Bëtsabe soyëngama, pero chora lempe chanjuábuatmana, ntšamo Bëngbe Bëtsá corente suabuatmcá.

<sup>13</sup> Pero morna, Bëngbe Bëtsábeñe jtsošbuáchiyana, chábeñe jtsobátmanana, y chábioye y ínÿengbioye jtsababuánÿeshanana, chë soyëngna nyetsca tescama jëftsemnana; pero chentšana chë más uámana soye endmëna ínÿenga jtsababuánÿeshanana.

## 14

*Ndmabiyañe obenana Bëngbe Bëtsabe tšetánana*

1 Bětscá šmochtsama nŷetscanga jtsababuánŷeshaněse chašmotsiyenama, y puerte šmochtseboše jtsebomnama chě Běngbe Bětsabe tšetana obenana tšabe soyěnga jamama; pero chentšana masna, chě Běngbe Bětsabe juabna jóyebuambayama obenana.

2 Er chě tempo ndmabiyañe mora jóyebuambayama obenana bomná, Běngbe Bětsábioye jtsatsětsnayana y ndoñe entšángbioye, er ndegombre entšanguentše ntšamo cha tojtsoyebuambnacá ndocná ntjosértana; chana chabe espíritoftaca jtsóyebuambnayana y ndoñe nŷe chabe juábnaca, chě tempo Běngbe Bětsá ndocna entšábioye tbonjaninŷinŷe soyěngama.

3 Pero chě Běngbe Bětsabe juabna oyeambuambnayana entšanga jtsětsětsnayana, chěnga más chamotsošbuáchema y ainaniñe añemo chamotsebomnama, Běngbe Bětsabe soyěngama jábuayenama, y jamama padecena soyěnguiñe tmojtsemna órnaca añemo chamotsebomnama.

4 Chě tempo ndmabiyañe mora jóyebuambayama obenana bomná, jtsamana nŷe cha más jtsošbuáchiyama y ainaniñe añemo jtsebomnama; pero chě Běngbe Bětsabe juabna oyeambuambnayana jtsamana chě ošbuachiyěngcá enefjuaněnga chca soyěnga chamotsebomnama.

5 Atše sěntseboše nŷetsca tšěngaftanga chě tempo ndoñe šmonjanbiyañe mora jóyebuambayama obenana chašmotsebomnama, pero chama atše más sěntseboše tšěngaftanga chě Běngbe Bětsabe juábnaca soyěnga chašmotsóyebuambnama. Chě Běngbe Bětsabe juábnaca soyěnga oyeambuambnayá más uamaná jtsemnana chě inŷe biyañe oyeambuambnayabiama; chca ndoñe nántsemna, ntšamo canŷe biyañe tojayancá chě biyañe oyeambuambnayá tbojtsěsertáněse y chě ošbuachiyěngcá enefjuaněnga tojábuaenase, y chca, chě soyěnga tmojouenama, chěnga chamotsobena más jtsošbuáchiyama y añemo jtsebomnama.

6 Y mora, Jesucrístbeyeca atšbe catšátanga, atše nderado tbojábuahe y nŷe inŷe biyañe tbojábuaeněse, ¿chca ntšamo cbatjújuahe? Atše jtsoobenana jujabuáchana, nŷe ntšamo chě biyañe tijayancá átšnaca šojtsěsertáněse, y ndayá Běngbe Bětsá šojinŷinŷecá entšanga jábuayenama stjobenase, chě Běngbe Bětsá tojama atše jtsetatšěmbuama soye, chě Běngbe Bětsabe juábnaca stsoyebuambná soye o chě tšěngaftanga jabuátambama cha yoboše soye.

7 Entšanga monduamana ndayánaca juénanana, mo flautěfja o arpa, vida ndbomna soyěnga; cada sóyeca inŷetšá juénanama ndoñe tontsopodéněse, ndocná nantsobena jtsetatšěmbuama ndayá canŷa chě soyěngaca yojtsénanama.

<sup>8</sup> Y nderado nda trompetéjua tojuájetä ora, soldadenga japéliama chamoprontama, chë uajatëtaná inyetsá, nya chama ndoñe tonjuájetëtëse, ndocná buanjosérta y jenpéliama ndoñe nanjopróna.

<sup>9</sup> Tšëngaftangafácna cachcá jtsopasánana. Inyenga paselo josértama jobenaycnana tšëngaftanga ndoñe šmonjóyebuambase, ndocná queochátstatšëmbo ntšamo šmojtsichamcá. Nántsemna mo nýe cányenga cuaftsoyebuambnacá.

<sup>10</sup> Atše sëntsejuabná, ndegombre quem luarentse ba inýe biyañe entšanga imnétsoyebuambnayana, y ndaye biyáñnaca tmojoyebuambá ora, sempre jtsemnana inýenga ntšamo chënga tmojtsichamcá osertánenga.

<sup>11</sup> Pero ntšamo inya chabe biyañe šojauyancá atše ndoñe šontsësertánëse, atše stsemna canýe chabíama ndosertana biyañe oyeambuambayá, y chánaca cachcá atšbíama.

<sup>12</sup> Chcasna, chë Uámana Espíritu šondinýanýná obenana jtsebomnama tšëngaftanga puerte šmobóseyeca, lempe ntšamo šmojobenacá šmochtsama chca tšetana obenana jóyëngacñama, chë ošbuáchiyënga más jtsošbuáchiyama y añemo jtsebomnama inétsama obenana.

<sup>13</sup> Chíyeca, chë tempo ndmabiyañe mora jóyebuambayama obenana tojtsebomná, Bëngbe Bëtsá chabotseimpadana, cha chaoma ntšamo chë inýe biyañe tojayancá chabosertama y ošbuáchiyënga jábuayenama obenana chaotsebomnama.

<sup>14</sup> Pero atše Bëngbe Bëtsáftaca stjencuénta, chë ndmabiyañe jóyebuambayama cha obenana šojanatšetacá jtsóyebuambnayëse, atšbe espíritu cháftaca nantsóyebuambnaye, pero atšbe juabna ndoñe ntsetatšëmbuana ntšamo chë espíritu tojtsoyebuambnacá.

<sup>15</sup> Y asna, ¿ntšamo atše chtsemana? Bëngbe Bëtsáftaca chanjencuénta atšbe espíritoca, pero ntšamo stsichámuama jtsejuabnayësnaca. Bëngbe Bëtsá jëtschuayama chanjavérsia atšbe espíritoca, pero chca chanjama chíñnaca jtsejuabnayëse.

<sup>16</sup> Nderado aca Bëngbe Bëtsá cojtsatschuaná nýe espíritoca, y canya quem Bëngbe Bëtsabe tšetana obenanama ndosertaná tmojóyeunase, cha ndoñe ntsoobenana jayanana “chca chaotsemna ca”, cach aquécá cha yojtsejuabnama jinýinýiyama, er ntšamo cojtsichamcá cha ndoñe ntsësertánana.

<sup>17</sup> Aca jtsoobenana chca puerte tšabá Bëngbe Bëtsá jëtschuayana, pero ntšamo tcojtsamcá ndoñe ntjamana inya ndaye tšabe soye chaotsebomnama.

<sup>18</sup> Atše, Bëngbe Bëtsá sëntsatschuaná inýe biyañe jóyebuambayama tšëngaftangbíama más tsobenama;

<sup>19</sup> pero Cristbeñe ošbuachiyëngcá tmojénefjna ora,

atše más sëndbétseboše nÿe mo shachna palabratémnaca jóyebuambayana, chënga aïñe catafjosertacá, chca, ínÿenga jabuátambama, y ndoñe bnëtsana uaranga palabrënga jatóyebuambnayana inÿe biyañe, chënga chaósertama ndoñe tontsopodénese.

<sup>20</sup> Jesucristbeyeca atšbe catsátanga, šmochtsajbaná basetemëngcá juabnayana. Mo šešonatemëngcá šmochtsemna, bacna soyënga jamama ntsetatšëmbcá; pero mo bëtsëtsangcá tšabá šmochtsejuabnaye.

<sup>21</sup> Bëngbe Bëtsabe uabemana palabrënguiñe, Bëngbe Utabná mëntšá tojánayana:

Atše quem entsángbioye chanjáuyana,  
 ínÿenga inÿe luarëngocana ashjajnëngaftaca, chëngbiana canÿe  
 ndosertana biyañe oyebuambnayënga;  
 y chanjáuyana ndayá chëngbe biyañe chamojtsichamo  
 soyëngaca;

pero ni chca, chënga ndoñe quešmochatóyeunaye ca.

<sup>22</sup> Chcasna, inÿe biyañe jóyebuambayama obenana jtsebomnana endmëna, Bëngbe Bëtsá ndayánaca chë chábeñe ndošbuachiyëngbioye jinÿanÿiyama, y chábeñe ošbuachiyëngbioyna ndoñe. Pero, Bëngbe Bëtsabe juabna jóyebuambayama obenana jtsebomnana endmëna, Bëngbe Bëtsá ndayánaca chábeñe ošbuachiyëngbioye jinÿanÿiyama, y chábeñe ndošbuachiyëngbioyna ndoñe.

<sup>23</sup> Er tšëngaftanga nÿetscanga ošbuachiyëngcá šmojënefjna ora, nÿetscanga ba biyañe šmojtsoyebuambná, y choye tojámashëngo canÿa chca Bëngbe Bëtsabe tšetana obenanama ndosertaná o chábeñe ndošbuachiyá, cha nanjájuaboje tšëngaftanga opënga šmojtsóbema ca.

<sup>24</sup> Pero nÿetscanga tmojtsichamo, Bëngbe Bëtsabe juábna jtsóyebuambnayëse, y choye tojámashëngo canÿa Bëngbe Bëtsábeñe ndošbuachiyá o canÿa chca Bëngbe Bëtsabe tšetana obenanama ndosertaná, ntšamo chašmojtsichamcá cha bochanjosérta; y chë soye cha bochanjayëñaná cha bacna soyënga tojamama, y ndayá cha tojamiñe corente echántsejuabnaye, ntšamo nÿetscanga tmojtsichámuama.

<sup>25</sup> Y Bëngbe Bëtsá chábioye bochanjinÿinÿiye ntšamo cha ainaniñe tojajuabó y tojabošencá, ndayá ndocnábioye tbonjinÿinÿecá, y cha echanjoshëntsamentšiyë Bëngbe Bëtsá jadórana, y tšëngaftangbe delante echanjayana Bëngbe Bëtsá ndegombre tšëngaftangbeñe yojtsemna ca.

*Ošbuachiyëngcá šmojënefjna ora, ntšamo tšabá yomncá lempe šmochtsama*

<sup>26</sup> Chcasna, Jesucristbeyeca atšbe catsátanga, šmojënefjna ora, cada ona ndayánaca jtsebomnana nÿetscangbiana: ínÿengna

jtsobenana javérsiama, Bëngbe Bëtsá jëtschuayama, ínÿengna jtsobenana jabuátambana o jábuayenama ndayá Bëngbe Bëtsá tojinÿanÿecá, o tempo ndmabiyañe chora jtsóyebuambnayana, o entsanga jábuayenana ntšamo inÿa inÿe biyañe tojayancá. Pero lempe šmochjama, ošbuáchiyënga más chamotsošbuáchema y más añemo chamotsebomnama Cristo jasérviamo.

<sup>27</sup> Nderado inÿe biyañe jóyebuambayama tojtsemnëse, útata o nÿa másese únganga chca chamoyebuambá, y canÿánÿa; y jtseytana ndánaca ntšamo tmojtsichamcá chabosertá y nÿetscanga chama chauabuayená.

<sup>28</sup> Y chca chabosertama y nÿetscanga jábuayenama ošbuachiyëngbeñe ndocná tontsemnëse, as ošbuachiyëngcá chamojénefná ora chë chca oyebuambnayá bontsemna ndoñe chca biyañe ntsóyebuambnayana, sinó nÿe canÿa tojtsemna ora cha jtsobenana chca Bëngbe Bëtsáftaca jencuéntana.

<sup>29</sup> Utata o únganga entsamna jayanana soyënga, Bëngbe Bëtsabe juábnaca jtsóyebuambnayëse; y chë ínÿenga jtsamnana botamana jajuaboyana y jayanana ntšamo chënga tmojayancá aíñe o ndoñe Bëngbe Bëtsábiocana tayojsóbocanama.

<sup>30</sup> Pero canÿa Bëngbe Bëtsabe juabna tojtsóyebuambnantscuana, inÿa chentše ouenana tbemanábioye Bëngbe Bëtsá tbojinÿinÿé ndayánaca yojtsebomna jayanama, as chë natsana oyebuambnayá iytëca chaóbema, y chabolesenciá chë inÿa chaóyebuambama.

<sup>31</sup> Chca, nÿetscanga, canÿánÿa jtsobenana jayanana soyënga, Bëngbe Bëtsabe juábnaca jtsóyebuambnayëse, nÿetscanga chamuatsjínÿama y nÿetscanga añemo jatšatayama.

<sup>32</sup> Chë Bëngbe Bëtsabe juabna oyebuambnayá endobena jtsemándayana ntšamo tojtsichamcá, cha cachabe espíritoca tojtsoyebuambná ora;

<sup>33</sup> er Bëngbe Bëtsá endmëna nda inétsama bënga natjëmbana chamotsiyenama, y ndoñe chë bënga nÿetscanga cachcá ndoñe chamondëtsejuabnama, y nÿe ntšamo cada ona tojtsebošcá chaotsamama.

Ntšamo nÿets luarënguenache, chë ošbuáchiyënga, chë Bëngbe Bëtsabe entsanga mondbénefná luarënguenache endbetsemncá,

<sup>34</sup> tšëngaftangbéntšnaca, shembásenga entsamna iytëca jobiamëngana, ošbuachiyëngcá šmojënefná ora, er ndoñe quenátslesenciana chënga chora chamuátoyebuambnama, y aíñe chënga entsamna chëngbe boyanga jtsayaunanana, ntšamo Moisesbe leyiñe endayancá.

<sup>35</sup> Chënga ndayánaca jtsetatšëmbuama tmojtsebošëse, cachëngbe boyángbioye yebnoca chamotjanga; er ndoñe

corente tšabá ntsemnana canye shembása jtsóyebuambnayana tšëngaftanga ošbuachiyëngcá šmojënefjna ora.

<sup>36</sup> ¿Tšëngaftanga šmojatsjuabná, Bëngbe Bëtsabe tšabe noticiënga tšëngaftangbeñe tojanobojaťsé ca, o nye tšëngaftanga chë soyënga šmojanóyëngacñe ca? Ndegombre ndoñe chca; chíyeca tšëngaftanga nye cányënga ndoñe ntsobenana jayanama ndayá jamama cmojtsamnama.

<sup>37</sup> Nda tojtsejuabná cha Bëngbe Bëtsabe juabna oyebuambnayá yomna ca, o chabe ainaniñe chë Espíritu jtsemándayama yojtsebomna ca, cha bontsemna tšabá jtsetatšëmbuana, ntšamo Bëngbe Utabná šojamandacá atše stsabiamnama.

<sup>38</sup> Pero cha ndoñe chca tontsetátšëmbo y chca ndoñe yondmëna ca tojayanëse, ndayá cha tojayanacá ndoñe šmatjóyëngacñe.

<sup>39</sup> Chcasna, Jesucristbeyeca atšbe catšátanga, puerta šmochtseboše Bëngbe Bëtsabe juábnaca soyënga jtsóyebuambnayama obenana jtsebomnama, y ndoñe šmattsama chë tempo ndmabiyañe ínënga ndoñe chamondëtsóyebuambnama;

<sup>40</sup> pero lempe šmochjama ntšamo jamama yomncá, y ndoñe nye ntšamo cada ona tojatsjuabnacá.

## 15

### *Cristo tojtanayenama*

<sup>1</sup> Morna, Jesucristbeyeca atšbe catšátanga, atše sëntseboše tšëngaftanga chašmuatenójuaboma atše tčbonjanabuayená tšabe noticiënguiñe, ndayá tšëngaftanga šmonjanóyëngacñe, chë ndáyeca tšëngaftanga Jesucristbeñe šmojtsošbuaché y cha jtšeservënëse šmojtsiyena.

<sup>2</sup> Chca šmobómnayeca, tšëngaftanga atsebácanënga šmojtsemna, pero tšëngaftanga sempre chiñe šmojtsošbuachese, ntšamo cbonjanabuayiynacá; chca ndóñesna, nye ndoñe corente tšabá ntjajuaboycá chë buayenana soyënguiñe šmojtsanošbuaché.

<sup>3</sup> Er atše tšëngaftangbeñe sënjëťtsanboshjona, Bëngbe Bëtsábíocana atše tijanóyëngacñe más uámana buatëmbana soyënga. Atše tčbonjabuatambá: Cristo tojanóbana bënga bacna soyënga tmojamama, ntšamo Bëngbe Bëtsabe uabemana palabrënguiñe chabe juabna oyebuambnayënga chama tmojanayancá;

<sup>4</sup> chë Cristo tmojanatbontsá y unga tianoye cha cháuatayenama Bëngbe Bëtsá tojanmama, ntšamo Bëngbe Bëtsabe uabemana palabrënguiñe chabe juabna oyebuambnayënga chama tmojanayancá;

5 chë Pédrëbioye tbojánebëbocnama, y chentsana chë bnëtsana útata ca uabobáinëngbioynaca.

6 Chentsana mo shachna patsama más chábeñe ošbuáchiyënga tojánebëbuacna, chënga cánÿentše imojtsemna ora; chënguentšanga banga cabá vida imotsóbomñe, masque báseftanga ya tmojóbana.

7 Chentsana Santiágbioye tbojánebëbocna, y chentsana nÿetsca chabe ichmónëngbioye.

8 Y chentsana átsnaca šonjánebëbocna. Mo canÿe šešona cabá shbená tojonÿnacá, Cristo chabe ichmoná šonjánbema, chë tempo chama jopróntama ntsebomncá, ndayëntscuana ínÿenga cha tojanabuatambá.

9 Er atše sëndmëna chë más batsá uamaná Jesucristbe ichmónëngbeñe; y ni merecido taitatobuajoñe “chabe ichmoná ca” chašmotsábobuatmama, er atše tša sënjánama Jesucristbeñe ošbuáchiyënga chamotsesufrínama.

10 Pero Bëngbe Bëtsá atšbe tšabiamama yojanjuabná, y chíyeca atše mora tsmëna ntšamo sëndmëncá, y chabe tšabe juábna atšbiamama jtsamama, ndoñe nÿe bonamente quenátsmëna. Er atše más sënjatrabajá, chë inÿe Jesucristbe ichmónëngbiamama; pero ndegombre atše ndoñe nÿe canÿa chca chiyatsma, sinó masna Bëngbe Bëtsá chë trabajo tojama, tšabe juabna atšbiamama jtsebomñese.

11 Ndayá más yojtsámama ndoñe quenátsmëna, atše o chënga, Jesucristbe soyëngama abuayiynayiñe más tojatrabajá, sinó ndayá chë soyënga bëngbe buayenana soye yojtsemna, y tšëngaftanga chiñe šmojtsošbuaché.

### *Chë obanënga cachiñe vida mochtsatsbomnama*

12 Pero bëngbe buayenana soye endmëna, Bëngbe Bëtsá tojanma Cristo cháuatayenama; as çndáyeca básefta tšëngaftanga šmnëtsichamo Bëngbe Bëtsá ndoñe yochanjama chë mora obanënga chámuatayenama ca?

13 Pero chca tojtsemna, chë obanënga ndoñe mochántayenasna, Cristo cach ndoñe tontanayena;

14 y Cristo ndoñe matenjésayenëse, bënga nÿe bonamente chabiamama fstsabuayiyná, y tšëngaftanga nÿe bonamente chábeñe šmojtsošbuaché.

15 Y canÿe más bëts soye: chca tojtsemnësna, bënga muanjábocna mo chë Bëngbe Bëtsabiamama soyënga tmojinÿe ca ichamëngcá, pero ndoñe ndegombre chca tontsemna; er bënga fsëndbétsichamo, Cristo cháuatayenama Bëngbe Bëtsá tojanma ca. Pero chë obanënga ndoñe mochántayenasna, Bëngbe Bëtsá ndoñe tonjanma Cristo cháuatayenama.

16 Pero chë obanënga ndoñe mochántayenasna, Cristo cach ndoñe tontanayena.

17 Y Cristo cháuatayenama Bëngbe Bëtsá ndoñe matënjanmëse, tšëngaftanga nÿe tondayama chábeñe šmojtsošbuaché; tšëngaftanga chë bacna soyëngama cabá ndoñe perdonánënga šmontsemna.

18 Y chca, chë tmojanóbanënga, Crístbeñe ošbuáchiyënga, chënga cach ndoñe chëngbe bacna soyënguentšana atsebácanënga quemochátsmëna, sinó nÿetsca tescama castigánënga.

19 Bënga tmojtsobátmana Cristo bëngbiana tšabe soyënga chaotsamama, pero chca nÿe quem luarentše bënga vida tmojtsebomnëntscuana, as bënga nÿetscangbiana más muantsomerecena, nÿetscanga bëngbiana chaotsangménama.

20 Pero chca ndoñe ndegombre quenátsmëna, er ndegombre Bëngbe Bëtsá tojanma Cristo cháuatayenama. Mo chë uanatsena shajuancá, jtsinÿanÿnayana más shajuanënga chentšana yochjóbcnana, cachcá, Cristo tojtanayena ora, cha tojaninÿanÿé Bëngbe Bëtsá yochjanma ínÿenga chábeñe ošbuáchiyënga chámuatayenama vida chamotsatsbomnana.

21 Chca, ndayá canÿe entšá, Adán, tojanmama, nÿetscanga jóbanama yojtsamna, cachcá, ntšamo inÿe entšá, Cristo, tojanmama, Bëngbe Bëtsá yochjama entšanga chámuatayenama.

22 Er ntšamo, Adánbentšana entšanga bétsemnayeca jóbanama jtsamnana, cachcá, Crístbeñe ošbuáchiyënga bétsemnayeca, Bëngbe Bëtsá jamana chë nÿetsca tescama yomna tšabe vida chënga chamotsebomnana.

23 Pero Bëngbe Bëtsá jamana cada ona cháuatayenama nÿa chama tempo tojtsemna ora. Natsana Cristo, y chentšana, Cristo cachiñe quem luaroye chaojésabo ora, nÿetscanga chë Crístbe entšanga imomnënga.

24 Y chentšana, Bëngbe Bëtsá chë Taitábioye, Cristo chabe amëndayana chabojantšabuaché ora, nÿetsca mandadënga, mando y obenana bomnënga corente jtsayënjanayëse.

25 Er Cristo bontsemna ínÿenga mo reycá jtsamëndayana, chabe uayayënga chabe cucuatšiñe chamoquedama Bëngbe Bëtsá tojamëntscuana.

26 Canÿe uayayá inétsama entšanga jóbanama; pero Cristo último echanjama chabe obenana pronto chaotsopochocama.

27 Er ntšamo Bëngbe Bëtsabe uabemana palabrënguiñe en-dayancá: “Bëngbe Bëtsá tojama Cristo nÿetsca soyënguiñe chaotsemándama ca.” Pero “tojama Cristo nÿetsca soyënguiñe chaotsemándama ca” tojayana ora, jtsopodénana puerte tšabá jinÿama, chca ndoñe yontsayana, Bëngbe Bëtsá Crístbeyeca mandaná yojtsemna ca; Bëngbe Bëtsá nda tojanma Cristo nÿetsca soyënguiñe chaotsemándama.

28 Y Cristo nÿetsca soyënguiñe chaojtsemánda ora, cach



Cristo, chë Uaquiñá, echántsemna Bëngbe Bëtsábeyeca mandaná, Bëngbe Bëtsá chë Cristo nÿetsca soyënguifne chaotsemándama tojanmá. Y chca, Bëngbe Bëtsá lempe echántsemna, lempe ntšamo quem luarentše yobínÿniñe.

<sup>29</sup> Inÿetšánaca, báseftanga cachiñe uabáinënga imojtsemna, chë ošbuáchiyënga nduabáinënga obanëngbe cuenta. Chca chënga jamana mo chë obanënga uabáinënga chamotsemnana cuafjamcá. Chë obanënga chámuatayenama ndoñe tontsemnëse, ¿ndáyeca entšanga chëngbe cuenta muantenábaye?

<sup>30</sup> Obanënga chámuatayenama Bëngbe Bëtsá ndoñe tonjamëse, ¿ndáyeca bënga muántseprontana nÿets tempo resjuifne jtsajnama, Cristbiana oservena causa?

<sup>31</sup> Atšbiana cada te resjo endmëna jóbanama. Jesucristbeyeca atšbe catšátanga, atše sentsichamo, chca ndegombre yómnyeca, atše oyejuayá stsemna ca, mo Cristo Jesús Bëngbe Utabnabe canÿe oservenacá, tšëngaftanga chábeñe šmojtsošbuáchema.

<sup>32</sup> Mo canÿa tšátjaye bayëngaca tojtsentsjaná orcá, atšbiana puerte resjo enjamna jóbanama, Efeso pueblaca; pero nÿe chë entšanga mondbétsëjuabnaye jëftsashjáchama soyënga jtsebošëse chca matsjamnëse, ¿ndaye tšabe soye matënjanóbozna, chca atšbiana resjo jóbanama enjamna ora? Obanënga ndoñe mochántayenësna, mochtsama ntšamo entšanga jayanana monduamancá: “¡Mochjase y mochjofšiye, nderado yëfse mutjóbana ca!”

<sup>33</sup> Ndoñe matenoíngñana. Ntšamo canÿa tojanayancá: “Nderado nda bacna amiguëngaftaca tojtsenutaná, cha jtsajbanana chë tšabe soyënga, ntšamo jtsamëse yojoyena.”

<sup>34</sup> Tšabá šmochtenójuaboye, y juabna ndbomnacá ndoñe; y šmochtsajbaná bacna soyënga amana, chë obanënga ndoñe mochántayena ca juabnaye causa, er báseftanga tšëngaftanguentše Bëngbe Bëtsabe soyënga ndoñe quešmatábuatma. Atše chca sentsichamo tšëngaftanga chašmotsëuatjama.

### *Ntšamo chë obanënga mochtayena*

<sup>35</sup> Pero nderado nda nanjatjaye: “¿Ntšamo chë obanënga mochtayena ca? ¿Mocna cuerpo mochtsebomna ca?”

<sup>36</sup> ¡Juabna ndbomna entšá! Ndayá tcojajé orna, jtseytana chë jénaye chaóbanama, chë matatema vida chaotsebomnana.

<sup>37</sup> Ndayá tcojajecá ndoñe ntsemnana chë juábocnana matatema, ndayá nÿe chë meshe, trigo meshe o ndaye mata méshnaca jtsemnana.

<sup>38</sup> Pero Bëngbe Bëtsá jamana chë jénayentšana mata chauábocnana, ntšamo jamama cha tojajuabocá; y cha

jamana cada jénayentšana canýe mata chauábocnama, ntšamo chë jénayentšana chauábocnama tojtsemncá.

<sup>39</sup> Nýetsca cuerpënga ndoñe cachcá ntsemnana. Entšanga canýe cuerpo mondbomna, bayënga inýe cuerpo, shloftšënga inýe cuerpo, y beongna inýe cuerpo.

<sup>40</sup> Chë celoca vida bomnënga inýetsá jtsinýnana, y chë quem luarentše vida bomnëngna inýetsá. Pero chë buash-inýinýanana y botamanana ntšamo celoca vida bomnënga jtsinýnancá, ndoñe cachcá ntsemnana chë quem luarentše vida bomnëngbe botamanancá.

<sup>41</sup> Cachcá, shinýe ndoñe quenátsbomna cachca buash-inýinýana juashconcí, ni estrellëngcá; y estrellënguëntše cach ndoñe cachcá ntsebuashinýinýanana.

<sup>42</sup> Cachcá, chë obanënga chámuatayenama Bëngbe Bëtsá chaojama ora chamojtsebomna cuerpo, ndoñe queochátsmëna cachcá ntšamo quem luarentše imojaniyena ora imojéftsebomna cuerpcá. Ntšamo chë jénaye tcojuatbontsá ora chiye jóbanana, cachcá, quem luarentše bënga mondbomna cuerpo jóbanana, inýënga juatbontsana y jtsopochócana; pero bënga chámuatayenama Bëngbe Bëtsá chaojama ora, bënga tsëm cuerpo mochántatsbomna y ndocna te queochatopochóca.

<sup>43</sup> Chë óbana cuerpo tmojuatbontsá ora, chë cuerpo tondaye ntsámanana; pero chë obanënga chámuatayenama Bëngbe Bëtsá chaojama ora, chë tsëm cuerpo puerte echántsebuashinýinýana y echantsámana. Bënga quem luarentše imoyenëntscuana imobomna cuerpo, nýe batšá obenana jtsebomnana; pero chë Bëngbe Bëtsá šochjatšataye tsëm cuerpo, puerte obenana bomna cuerpo echántsemna.

<sup>44</sup> Quem luarentše imobomna cuerpo endmëna cam luarentše vida chaotsebomnama; pero bënga chámuatayenama chaojama ora, chë bënga mochtsebomna tsëm cuerpo, puerte chë Espíritbeyeca echántsemandana. Canýe cuerpo quem luarentše vida chaotsebomnama yómnyeyeca, canýe cuerpënaca, jtsemnana celoca vida chaotsebomnama.

<sup>45</sup> Chca Bëngbe Bëtsabe uabemana palabrenguifë endayana: “Bëngbe Bëtsá, chë natsana entšá tbojanma chaotsainama ca.” Adánbentšana nýetsca entšanga jabocanana, pero Crísbeyeca, Bëngbe Bëtsá tojama banga mo tsmëma entšangcá chamotsemnama; chca, Cristo jtsemnana mo chë ústonoye Adancá; pero Crístna canýe espíritu endmëna, y chë espíritu jamana entšanga chë nýetsca tescama yomna tšabe vida chamotsebomnama.

<sup>46</sup> Pero chë celoca nýetsca tescama vida jtsebomnama cuerpna ndoñe natsana ntjóbcnana, ndayá chë quem luar-

entše vida jtsebomnama cuerpo; chentšana chë celoca vida jtsebomnama cuerpo.

<sup>47</sup> Bëngbe Bëtsá, chë natsana entsá tbojanma fshántseca, y chca, cha fshantsentšana tojánbocna; Cristna, mo entsángbentšana chë natsaná tsmacá bemanacá, celocana tojánbocna.

<sup>48</sup> Adánbentšana, chë natsana entsá, chë fshántseca tmojanmábentšana tmojábocanënga, ntšamo cha yojamncá jtsemnana. Cachcá, chë mo tsmëmangcá tojábiamënga, Cristcá jtsemnana; Cristo nda celocana tojánabo.

<sup>49</sup> Ntšamo bënga jtsinynana chë Bëngbe Bëtsá fshántseca tbojánbema entsacá, cachcá bëngnaca mochtsinyna ntšamo chë celocá yomnacá.

<sup>50</sup> Jesucristbeyeca atšbe catšátanga, atše cbochjáuyana, nýe quem luarentše vida jtsebomnama cuerpëngaca, bënga ndoñe ntsoybenana Bëngbe Bëtsabe amëndayoye jamashënguana; ni ndayá yochjopochóca soye, ntsoybenana ndayá ndoñe yochanjopochóca soye jtsebomnana.

<sup>51</sup> Smochjouena, atše canye soye chochanjáuyana, y chë soye Bëngbe Bëtsá entsanga tempo ndoñe tonjaninýanýe: Bënga ošbuáchiyënga nýetscanga ndoñe quemochatóbana, pero Bëngbe Bëtsá šochanjátrocaye mo tsmëmangcá.

<sup>52</sup> Nýe betesco, mo tcojofshetá y cachora tcojtafšnacá, quem luare ya jopochócama ora, canye ángel trompetéřjua chaojuájetëta ora, er chora trompetéřjua echanjuénana, Bëngbe Bëtsá echanjama obanënga chámuatayenama, nýetsca tescama vida jtsebomnama; y bënga, chë ainënga mochtsemnënga, cha šochanjátrocaye mo tsmëmangcá jtsemnana;

<sup>53</sup> er jtseytana Bëngbe Bëtsá chaotrocá chë bëngbeñe jopochócama yomna soye, ndocna te yochanjopochóca soyiñe; y ndayá bëngbeñe yochjóbana soye, ndocna te yochanjóbana soyiñe.

<sup>54</sup> Bëngbe Bëtsá chca bëngaftaca chaojama ora, chë cha jatrocana ndayá bëngbeñe yochjopochocacá, ndocna te yochanjopochóca soyiñe, y ndayá bëngbeñe yochjobancá, ndocna te yochanjóbana soyiñe, chora echanjochnëngo ntšamo Bëngbe Bëtsabe uabemana palabrenguiñe chama endayancá:

Bëngbe Bëtsá tojayënjaná chë entsanga chamóbanama endbétsama obenana;

entsanga ndoñe más quemochatóbana ca.

<sup>55</sup> ¡Mora entsanga chamuatóbanama chaotsama obenana ya ndoñe quenátsmëna;

Bëngbe Bëtsá chë obenana nýetsca tescama tojayënjaná ca!

<sup>56</sup> Entšanga bacna soyënga tmojama causa, obenana endmëna entsanga jóbanama chaotsamnana. Ndayá leyiñe iuayanama,

entsá jtsetatšëmbuana ndayá yomna bacna soyënga jamana, y chca tátšëmbo causa, chca bacna soyënga jamama juabnëngaca mandaná jtsemnana, y cabana, jóbanama jtsemnana.

<sup>57</sup> ¡Pero Bëngbe Bëtsá mochtsatschuanaye, bënga mo ayënjanyëngcá cha šojábiamama, er ya ndoñe šontsamna chca jtsemnama, chë Bëngbe Utabná Jesucristo bëngbiana tojanma sóyeca!

<sup>58</sup> Chíyeca, Jesucristbeyeca atšbe catšátanga, atšbe bonshánënga, Jesucristbeñe sempre puerte šmochtsošbuáchiye y ndocna te šmatjaleséncia ndocná ni tondaye chaotsama chábeñe ošbuáchiyana chašmotsajbanama. Sempre šmochtsentsëna bëtscá jtsamana Bëngbe Utabnabiana trabájayiñe, er tšëngaftanga šmondëtatsëmbo, Bëngbe Utabnabiana trabájayiñe ndayá šmojamcá, ndocna te nÿe bonamente ntsemnana.

## 16

### *Jerusalenoca ošbuáchiyëngbiana crocénánama*

<sup>1</sup> Mora chanjóyebuambaye chë Jerusalenoca Bëngbe Bëtsabe entsanga ndbomnëjëmëngbiana tšëngaftanga šmochjuíchmua crocénánama. Atše sëntseboše tšëngaftanga chca chašmoma ntšamo chë Galacia luaroca ošbuachiyëngcá enefjuanenache chama atše sënjanabuayenacá.

<sup>2</sup> Cada tmengo, cmontsamna batšá crocénana jaluárana ntšamo chë semaniñe šmojonÿencá, y šmochtsejuabaye; chca atše choye chaijá ora, ndoñe chacmondëtsamna quem uajabótama chora crocénana játatbanayana.

<sup>3</sup> Y atše choye chaijáshjango ora, Jerusalenoye chjichamuá chë tšëngaftanga mo tšabengcá šmojubuáyana entsanga, chë Jerusalenoca ošbuachiyëngbioye tšëngaftangbe crocénana chámuayentšbuachema, y tsbuanachangá chanjúyentšbuachiye ndayá imojtsamama chënga jábuayenama.

<sup>4</sup> Y nderado, átšnaca chëngaftaca jama tšabá tojtsemnëse, chënga átšeftaca chamua.

### *Ntsamo Pablo yojanjuabná chë luarëngoye jama*

<sup>5</sup> Atše sëntsejuabná tšëngaftangbioye jama jautsëtsayama, Macedonia luarëjana chaijachnëngüentsana, chentša ošbuáchiyënga jaftsanyëse, er atše sëntsejuabná natsana Macedonia luaroye jéftsana.

<sup>6</sup> Nderado baseftayté tšëngaftangbeñe chašuétsejetana, o nderádose nÿets uaftena tempo; as tšëngaftanga inÿe luaroye játama chašmuájabuachama, ndëmoye jama chašojtsemnoye.

7 Atše ndoñe quetsátsboše nje betesco tšëngaftanga jáftsanjána, er atše sentsobátmana más bayté tšëngaftangbeñe jaftsemnana, Bëngbe Utabná chca šojalesenciase.

8 Pero Efesoca šochanjajétana Pentecostés fiesta chaojobuáchëntscuana.

9 Er Bëngbe Bëtsá tojama atše jobenayama muentše chë tšabe noticiëngama banga jábuayenama, y chíyeca banga Crístbeñe montsošbuaché; pero bángnaca atšbe contra montsemna.

10 Timoteo tšëngaftangbioye chaojase, yejuana šmochtsantješna cha tondayama chaondëtsauatjama, tšëngaftangbeñe tojtsemnëntscuana, er cha Bëngbe Utabnabiamá endëtrabája, ntšamo atše sëndamcá.

11 Chcasna, ndocná chábioye chabondëtsáboyënja. Bëtscá šmochjama cha natjëmbana átšbioye chauatábama, er atše cha sentsobátmana, chë ínÿenga muentše Crístbeñe ošbuáchiyëngaftaca.

12 Y Jesucrístbeyeca bëngbe catšata Apólosna, atše bëtscá cha sënjaimpadá, chë Jesucrístbeyeca catšátanga tšëngaftanga jáñyama mochjángaftaca chaotsama, pero cha ndoñe chenátsbošena choye mora jama. Cha choye caochjá, chaojobená ora ca.

### *Pablo chënga jtadióšoftanama*

13 Sempre šmochtsenocuedana chë Bëngbe Utabná ndoñe chašmondëtseservenama tojtsama soyëngama. Nÿets tempo, Crístbeñe y chabe soyënguñnaca šmochtsošbuáchiye. Ainaniñe puerte añemo šmochtsebomna, y bëtscá šmochtsama Bëngbe Bëtsabe obenánaca.

14 Y nÿetsca soyënga ntšamo chašmojtsamcá, bonshanánaca šmochtsama.

15 Jesucrístbeyeca atšbe catšátanga, tšëngaftanga šmondëtatšëmbo, Estéfnas y chabe pamíllanga chë natsanënga monjamnama Jesucrístbeñe jtsošbuáchiyama, Acaya luaroca, y bëtscá imojtsentšena Bëngbe Utabnabiamá jtsetrabájayana, chabe entšanga jtsëjabuáchanëse.

16 Atše cbaimpadá, tšëngaftanga lempe šmochtsama ntšamo cmojtsamëndacá, chca entšanga mo tšëngaftangbe uanat-sanëngcá, y ntšamo nÿetsca chë ínÿenga mo bëngcá quemuiñe uajabuáchanëse trabájayënga cmojtsamëndacá.

17 Atše tša oyejuayá sëntsemna tšëngaftangbe pueblentšana Estéfnas, Fortunato y Acaico moye tmojáshjajnana, er atše sentsobena oyejuayá chëngaftaca jtsemnana, tšëngaftangaftaca choca jtsemnana cabá ndoñe sentsobenëntscuana.

18 Er chënga átšbioye tmonjabo y tšëngaftangbiamá šmonjauyana, y chca chënga tmonjama, atše y

tšëngaftanga natjëmbana ainánaca chamotsomñama. Chënga šmochtsëtabna mo puerte uámána entšangcá.

<sup>19</sup> Asia luaroca ošbuachiyëngcá enefjuanënga cmontsacheuaná. Aquila y Prisca y chatbe yebnentše mondbétsenefjuana ošbuáchiyënga cmontsacheuaná, Bëngbe Utabnábeñe ošbuachiyëngcá, tšëngaftangcá bétsemnayeca.

<sup>20</sup> Muentša ošbuáchiyënga nýetscanga cmontsacheuaná. Nýetscanga šmochjenchuaye mo Jesucristbeyeca catšatangcá, jtenámochëse, ntšamo cach tšëngaftangbe pamíllanga puerte bonshanánaca šmondbetsacheuanaycá.

<sup>21</sup> Quem palabrënga tšëngaftanga jacheuayama cach atšbe cucuátšeca sëntsabiamná.

<sup>22</sup> Nderado nda Bëngbe Utabnábioye ndoñe tbontsebobonshana, Bëngbe Bëtsá nýetsca tescama chabocastigá. ¡Bëngbe Utabná cachiñe cochjésabo!

<sup>23</sup> Atše, Bëngbe Bëtsá sëntseimpadana, Bëngbe Utabná Jesús chaoma tšëngaftangbeñe tšabe bendicionënga chaotsemnama.

<sup>24</sup> Atše, nýetsca tšëngaftanga cbondábabuanýeshana, canya mo tšëngaftangcá, Cristo Jesúseftaca cányiñe mo canyácá jtsemnëse.

## 2 Corintios

### *Jacheuayama*

<sup>1</sup> Atše Pablo, Jesucristbe canye ichmoná, Běngbe Bětsá atše chca jtsemnama yojánbošeyeca, Jesucristbeyeca běngbe catšata Timotéoftaca quem tsbuanácha sěntsabiamná, Corinto pueblaca Běngbe Bětsábeñe ošbuachiyěngcá enefjuaněngbiama, y nyets Acaya luarentše Běngbe Bětsabe nyetsca entšangbiámnaca.

<sup>2</sup> Atše sěntseimpadana Běngbe Bětsá Běngbe Taitá y Běngbe Utabná Jesucristo, chaboma tšěngaftangbeñe tšabe bendicioněnga chaotsemnama y ainaniñe tšabe ebionana chašmotsebonnama.

### *Ntšamo Pablo tojansufri*

<sup>3</sup> Běnga mochtsatschuanaye Běngbe Bětsá, chě Běngbe Utabná Jesucristbe Taitá, běngbe Taitá, chě běngbiama lastemado yomná, y ndaye padecena soyěnguiñe tmojtsemna ora, běnga šondbetsañemuayá.

<sup>4</sup> Cha běnga jtsañémuayana padecena soyěnguiñe tmojtsemna ora, chca, běnga chamotsobenama chě tmojtseufriněnga jañémuayama, ntšamo Běngbe Bětsá šojujabuachcá chěnga jujabuáchěse.

<sup>5</sup> Er ntšamo Cristo tojansufricá, běnga tša fsěnděsufrina chabiana oservěniñe; cachcá, Cristbeyěcnaca Běngbe Bětsá jamana běnga puerte añemo ainaniñe fchaitsebonnama.

<sup>6</sup> Er běnga tmojtseufriněse, jtsemnana běnga jobenayama tšěngaftanga jañémuayama chě šmojtseufrina ora, y atsebácaněnga chašmotsebonnama, Běngbe Bětsabe soyěngama joueněse. Chě padecena soyěnguiñe tmojtsemna ora Běngbe Bětsá šojáñemose, jtsemnana běnga fchayobenama tšěngaftanga jañémuayama, padecena soyěnguiñe šmojtsemna ora. Chca, běnga jobenayana tšěngaftanga jujabuáchana, Běngbe Bětsábeñe chašmotsobátmanama, chábeñe jtsošbuáchiyěse, y lempe jtsóboyayama, ntšamo běnga fsěnjասufricá šmojtseufrina ora.

<sup>7</sup> Běnga sempre fsěndobátmana y tšabá fsěndětatsěmbo chě padecena soyěnguentšana tšabá šmochjábocanama, er běnga fsěndětatsěmbo, chě ntšamo běnga fsěnjասufricá tšěngaftanga šmojasufrima; y cachcá, Běngbe Bětsá yochjama tšěngaftanga ainaniñe puerte añemo chašmotsebonnama, ntšamo běnga fchaitsebonnama cha tojamcá.

<sup>8</sup> Jesucristbeyeca atšbe catšátanga, běnga fsěntseboše tšěngaftanga chašmotsetátšěmbo ntšamo běnga Asia luaroca

tša fsënjansufrínama. Bënga puerte padecena soyënguiñe fsënjanियेना, n्या ndoñe más jauantacá, chentšana vídaca jabocanama ntjatobatmancá.

<sup>9</sup> Bënga šontsanënana mo jóbanama cuafsamncá. Pero chë soye tonjanoservé, bënga jtsošbuáchiyama Bëngbe Bëtsábeñe, nda inétsama obanënga chámuatayenama, y ndoñe cabëngbeñe ntsošbuáchiyana.

<sup>10</sup> Cha šojatsebacá bënga jóbanama puerte resjo enjamentšana, y cachcá šochjátsebacaye bëngbiana cachiñe cachcá tša resjuíñe chamojtsemna ora. Bënga puerte chábeñe fsëndobátmana, puerte padecena soyënguiñe bënga chamojtsemna ora, cha cachiñe šochjátsebacama.

<sup>11</sup> Tšëngaftángnaca cmontsamna bënga jujabuáchana, bëngbiana Bëngbe Bëtsá jaimpádase; chca, ba entsanga Bëngbe Bëtsá mochanjëtschuaye, er cha tojama bënga chábensana tšabe bendicionënga fchayóyëngacñama, cha jamëse ntšamo chënga bëngbiana tmojanimpadacá.

### *Ndayeca Pablo Corinto puebluye ndoñe tonjána*

<sup>12</sup> Canye soye endmëna ndayá oyejuayënga šojtsabiamná: bënga bëngbe ainantša juabnëngaca jtsetatšëmbuana puerte tšabá jtsamëse ftsiyena ca, ntšamo chë Bëngbe Bëtsabe entsanga endbetsamncá, nyetsca quem luarentša entsángbeñe, y más tšëngaftangbeñe, y bënga jtsetatšëmbuana ntšamo tšabá tifjamcá nyets ainánaca tifjamama. Bënga tondaye chibiatsma quem luarentša entsangbe osertanánaca, ndayá Bëngbe Bëtsá tša tšabia bëngaftaca bëtsemnayeca, šojújabuache chca chamotsiyenama.

<sup>13</sup> Er ntšamo fsëntsabiamnamna ndoñe queftsátsboše, ntšamo tšëngaftanga šmojtsalía y cmojtsësertánentsana inyetsá játayanana, y sëntsobátmana puerte tšabá lempe chacmósertama.

<sup>14</sup> Mora ndayá atše stsamama ndoñe lempe quecmátësertana. Pero atše sëntseboše tšëngaftanga chama corente chacmósertama; chca, Bëngbe Utabná quem luaroye chaojésabo ora, tšëngaftanga bëngbiana oyejuayënga chašmotsemnama, ntšamo bëngnaca tšëngaftangbiana oyejuayënga fchantsemncá.

<sup>15</sup> Chca ndegombre yomnama atše sëndëtatšëmboyeca, atše sënjanjuabná tšëngaftangbioye jshétsana jányama, y chca, chë tšabe soye tšëngaftangbiana uta soye jamana, tšëngaftangbioye uta soye jányëse.

<sup>16</sup> Atše sënjanjuabná tšëngaftanga jshaftsanyana, Macedonioye ayiñe chëjana matijánachnëngo ora; y chentšana, ya camoye ataboye ora, tšëngaftanga cachiñe jáftsanyana. Chca,



tšëngaftanga mašmënjanošená atše juajabuáchana Judea luaroje játama.

17 Atše chca jamama tsjanjuabná ora, ¿chca tijanma ndoñe corente tšabá ntjenjuaboycá? ¿Tšëngaftanga šmatjájuaboje, ntšamo nýe quem luarama enójuabnaye entšanga monduamancá, cachora canýe soyama “aíñe” y “ndoñe ca” jayanëse, atše ndayánaca jamama snétsejuabnaye ca?

18 Canýe soye ndegombre endmëna: Bëngbe Bëtsá sempre endbama ntšamo tojayancá, y chca puerte ndegombre endmënayeca, atše ndayánaca chjama ca stjayana ora, chca ndoñe questsbatayana chentšana atšbe juabna jatstrócama, mo canýa cachora canýe soyama “aíñe” y “ndoñe ca” cuafjatichamcá.

19 Er Cristo Jesús, Bëngbe Bëtsabe Uaquiñá, ndabiama Silvano, Timoteo y atše tšëngaftangbeñe fsënjanabuayiyiná, ndoñe ntsejuabnayana canýe soye jamama y chentšana jatsjuabnayana inýetsá jatsmama, mo canýe entšá cachora canýe soyama “aíñe” y “ndoñe ca” cuafjatichamcá, ndayá chana nýets tempo ntšamo tojtsejuabnacá jayanana y jamana ntšamo ndegombre yomncá, chentšana ntjatstrocaycá.

20 Er ndayá cha tojamiñe, lempe ntšamo Bëngbe Bëtsá tojašebuachenacá jocúmpliana, mo chë lempe ntšamo Bëngbe Bëtsá tojašebuachenama cha “aíñe ca” cuaftsichamcá. Chýyeca, Bëngbe Bëtsá bënga tmojtsatschuaná ora, Cristo Jesúsbeyeca bënga jayanana “chca chaotsemna ca”.

21 Pero Bëngbe Bëtsá endmëna nda inétsama bënga y tšëngaftanga puerte Crístbeñe chamotsošbuáchema, cháftaca cánýiñe mo canýacá jtsemnëse; y Bëngbe Bëtsánaca endmëna nda bënga šojabacacá chabe entšanga chamotsemnama.

22 Cha tojama chë Uámana Espiritu bëngbe ainaniñe cháumashënguama jtsemándayama, y chë soye jtsinýanýnayana bënga Bëngbe Bëtsabe entšanga imomnama. Y bëngbe ainaniñe chë Espiritu imobómnyayeca, bënga corente jtsetatšëmbuana bënga mochjóyëngacñama lempe ntšamo Bëngbe Bëtsá bënga jatšatayama šojašebuachenacá.

23 Bëngbe Bëtsá entsonýá atše ndegombre stsichámuama. Atše Corinto puebloye cabá ndoñe chiyjá, er atše ndoñe quetsátsboše tšëngaftanga jašëchnana, chë bacna soyënga šmojamama, tchojaucacánëse.

24 Bënga ndoñe queftsátsboše tšëngaftanga jamëndana ndayiñe cmojtsamna jtsošbuáchiyana; er tša šmojtsošbuachéyeca, ndoñe quešmochatajbaná Crístbeñe jtsošbuáchiyana. Bëngbe fséntseboše ndayá tšëngaftanga juajabuáchana, corente oyejuayënga chašmotsemnama.

## 2

<sup>1</sup> Chíyeca atše ndoñe chiyjá jautsëtsayama, er atše sënjanjuabó y sënjanéniyana choye ndoñe jama ca, bacna soyënga šmojtsanmama jábuayenama, y chca, ngménënga játabiamana, ntšamo chanýe sënjamcá.

<sup>2</sup> Tšëngaftanga ngménaca chašmotsemnana atše stjamëse, ħnda yochjama atše oyejuayá chaitsemnana, sinó nýe tšëngaftanga, chë atše ngménënga tijábiamënga?

<sup>3</sup> Chíyeca tcbonjanëbuábiana chë ntšamo šmojualiaca, chca, atše choye stjášhango ora, tšëngaftanga átsbioye ndoñe ngmená chašmondëbemama. Chca játamamna, tšëngaftangbiana más tšabá endmëna oyejuayá atše chašmobema. Atše tšabá sënjántatšëmbo ndayá átsbioye oyejuayá šojabemcá, tšëngaftangnaca chca mašmënjánbošena y oyejuayënga chë soye matcmënjánabiama. Chíyeca atše ndoñe chiyataná, nýetscanga oyejuayënga jtsemnana ndoñe quenjatopodena ora.

<sup>4</sup> Pero chë tsbuanácha tcbonjanëbuábiana ora, atše corente šonjanongmé y ainana šonjántsetšena chca jabuache soyënga tšëngaftanga jubuábiamama, y chca jamama šëchbuíynaca sënjanoperdé. Pero atše ndoñe checbátanëbuabiana atše jatmama tšëngaftanga puerte ngménaca chašmotsemnana, ndayá chašmotsetatšëmbuama atše tša cbababuánýeshanama.

*Perdón chë bacna soye amabiana*

<sup>5</sup> Y mora, chë tšëngaftangbeñe puerte ngménana chaotsemnana tojama boyabásabiamna, cha átsbioye ndoñe ngmená chešnátšbema, ntsachetšá tšëngaftanga tcmojabiamcá, ínýengbioye ínýengbiana más. Chca sëntsichamo, er atše ndoñe quetsátšboše jayanama ntsachetšá tojamama cha más bacna soye tojama ca.

<sup>6</sup> Banga tšëngaftanguentšënga ntšamo šmojamcá, chë entšabiama ya bëts castigo entsemna. Nýe nýetšá ponto.

<sup>7</sup> Chamna, ndayá mora cmojtsamna jamamna entsemna, cha jtseperdónana y jañémuana, chca, ndocna tšabe soye jamama ndobená ndoñe chaondëtsemnana, chë castiguama puerte ngménaca bëtsemna causa.

<sup>8</sup> Chíyeca, tšëngaftanga cbaimpadá cachiñe tšabá chašminýinýe chábioye corente šmobobonshánama.

<sup>9</sup> Tempo ya chama tcbonjanëbuábiana, atše jinýama tšëngaftanga aíñe o ndoñe šmontsanprontánama, lempe ntšamo tcbonjanamëndacá jamama.

<sup>10</sup> Chcasna, ndánaca ndayánaca tšëngaftanga chašmojaperdoná ora, átsnaca cha chantseperdóna. Y atše cha chantseperdóna, ndayá japerdónama ndegombre

tojtsemnëse. Y chca chanjama tšëngaftangbe tšabiamama y Cristbe delante.

<sup>11</sup> Atše tšëngaftangcá, quem entsábioye šcoperdoná chë bëngbiamama tojama bacna soye; chca, Satanás ndoñe chaondobenama bënga jáingñama, er bënga mondëtatšëmbo cha inëtseboše ndaye bacna soye entsá chaotsamama.

*Ndáyeca Pablo ndoñe natjëmbana Troas pueblaca tontsanoquedañe*

<sup>12</sup> Atše Troas pueblaca sënjánashjango ora, Cristbe tšabe noticiënga jábuayenama, atše sënjáninÿe Bëngbe Utabná tojanma chentše banga chë buayenana soye chamouenama y chëngbe ainaniñe chana chamóyëngacñama.

<sup>13</sup> Masque chca enjamna, atše ndoñe quetstétsobena natjëmbana ainana jtsebomnana, er atše sënjanjuabná Jesucristbeyeca bëngbe catšata Tito chentše jinÿenana, pero ndoñe chca. Chíyeca, Troas pueblentša entsanga sëntanadiošoftaná, y Macedonia luaroye sënjána.

*Crísoftaca cánÿiñe mo canÿacá jtsemnëse, bënga mo ayëñjanayëngcá jtsemnana*

<sup>14</sup> Atše Bëngbe Bëtsábioye sëndbëtsatschuanaye, bënga bacna soyënga jamama juabnënga cha tojanëyëñjanama, tempo šojanaménda juabnënga; y chë mora bënga Crísoftaca cánÿiñe mo canÿacá jtsemnëse, nÿets tempo cha šnetsënachayama, mo canÿe ayëñjanayacá, y chë nÿets luarenache entsanga Cristbiamama soyënga chamotsábuatmama bëngaftaca cha yojtsamama, mo nda canÿe botamana uanguëtse soye nÿets luarënguenache chauáshanama cuaftsamcá.

<sup>15</sup> Er chë incienso tojtsejuinÿinÿana ora, entsábioye tšabá juanguëtšenana; cachcá Cristbe tšabe noticiënga fstsabuayiyná ora, Bëngbe Bëtsabiamama bënga jtsemnana chë ndëmuanyënga tmojtsama cha oyejuayá chaotsemnana. Incienso tcojtsejuinÿiná ora, nÿetscángbioye juanguëtšenana. Cachcá, Bëngbe Bëtsabe palabra fstsoyebuambná ora nÿetscanga jouenana, Cristo yojtsatsebacanga y chë pochocánënga jtsemnana imojtsajnëngnaca.

<sup>16</sup> Chë pochocánënga jtsemnana imojtsajnëngna, pochocánënga mochanjábocana, er ntšamo bënga fsëndabuayiynacá y tmojouencá chënga tmojtsaboté; y chca, chëngbiamama chë tšabe noticiënga jtsemnana mo canÿe obanabe uanguëtšancá. Pero chë Cristo yochjátsebacangna, tšabe noticiënga tmojóyëngacñeyeca, mochanjobenaye tšabe vida nÿets tempo jtsebomnana; y chca, chëngbiamama chë tšabe noticiënga jtsemnana mo canÿe puerte botamana

uanguëtsancá. Y asna, ¿nda obenana yojtsebomna chë tšabe noticiënga jábuayenama trabajo jtsamama?

17 Bënga chë tšabe noticiënga ndoñe queftsatabuayiyná, ntšamo ba entsanga imojtsamcá, mo nÿe batšá uámana soyënga cuaftsemncá, y ndayánaca juácanama, mo nda ndaye nduámana soyënga cuaftsencá. Banga chca mondama; bënga ndoñe. Bënga, Crístoftaca cánÿiñe mo canÿacá jtsemnëse, fsëndabuayiyná mo Bëngbe Bëtsabe delante cuaftsemnëngcá, ndegombre nÿe ntšamo tšabá yomncá nÿets ainánaca jtsebošëse, y mo Bëngbe Bëtsabe ichmonëngcá.

### 3

#### *Chë Bëngbe Bëtsabe tsëm tratama buayenana soye*

1 Chca bëngbiana fstsjayana ora, tšëngaftanga cmojtsinÿana ¿bënga cachiñe tiftëtontsé cabënga bëtsétsanga enobiamnayana? ¿O bënga šojtsamna, mo inÿengcá, tšëngaftanga juyentšbuáchiyana o juátjañana tsbuanachangá, bënga tšabá fstsamama chëchangaca jinÿanÿiyama?

2 Bënga bëngbe ainaniñe puerte tšabá fsëndëtatšëmbo, nÿetsca entsanga, ntšamo tšëngaftanga jtsamëse šmoyencá tmojinÿe ora, tšëngaftanga jtsinÿanÿayana bënga ndegombre ntšamo tšabá yomncá fstsamama. Chca, tšëngaftanga jtsemnana mo canÿe tsbuanachacá, nÿetscanga jtsabuatmana y jtsobenana jualána, bënga tšabá fstsamama.

3 Nÿetscanga tšabá mondëtatšëmbo Cristo tojanma tšëngaftanga chábeñe chašmotsošbuáchema, y bëngaftaca cha chca tojanmámncá. Chca, tšëngaftanga šmondmëna mo Cristbe canÿe tsbuanachacá, ndayécha quem luarentša entšángbioye tojuyentšbuaché bëngaftaca. Tšëngaftanga ndoñe chešmatanobená Crístbeñe ošbuáchiyënga jtsemnana entšangbe trabájoca, er Crístbeñe šmonjanošbuaché chë Bëngbe Bëtsá Ainabe Espíritbeyeca; y chca, tšëngaftanga šmondmëna mo canÿe tsbuanácha cháftaca uabemanëchacá, y ndoñe mo entšángbeyeca uabemana tsbuanachacá. Bëngbe Bëtsá chë mandënga ndëtšbé tablëbenguiñe tojanábema, entšanga chamotsobedecénama, pero tšëngaftangna Cristbe buayenana soye tšëngaftangbe ainaniñe šmojóyëngacñe.

4 Crístbeyeca Bëngbe Bëtsábeñe jtsošbuáchiyëse, bënga corente fsëndëtatšëmbo chca ndegombre bëtsemnana.

5 Ndoñe quenátsmëna, nÿe bënga cánÿenga quem trabajo jamama ftsobena y játayanana bëngbe soye chë trabajo yojtsemna ca, er bënga jtsobenana chca jamama, nÿe Bëngbe Bëtsabe ujabuáchenanaca;

6 er cha tojama bënga fchayobenama quem trabajo jamama, chë entsanga jábuayenana Bëngbe Bëtsá chabe

entsángbioye tojanašebuachená soyëngama, ndayá Cristo tojanma sóyeca, mo canye tsëm tratcá, Bëngbe Bëtsá y chabe entsángaftaca. Quem soye ndoñe quenátsmëna mo chë Bëngbe Bëtsá tempo Israeloca entsángbioye léyeca tojanašebuachená soyëngcá. Inyëtšá; entsanga mondama Bëngbe Bëtsabe tsëm trato, Uámana Espíritbeyeca. Chë natsana trato, chë uabemana ley, ntšamo chiñe iuabemancá ndoñe tconjama causa, entsá jóbanama jtsemnana; pero Cristbe tsabe noticiënga, chë tsëm trato, entsanga ainaniñe tmojóyëngacñe ora, chë Uámana Espiritu jamana, chë nyëtsca tescama yomna tsabe vida chënga chamotsebomnama.

7 Quem Moisesbe ley, chë ndoñe tmonjobedecema entsanga jóbanama jtsemnana, ndëtsbé tablëbenguiñe letrëngaca tmojanábema, y Bëngbe Bëtsá Moisésbioye tbojanantšabuaché ora, cha tša buashinÿinÿaniñe tojánabo. Chë causa entsanga ndoñe imontsobena ni mo jinÿana Moisesbe jubiá, er tša ibojtsanjuebëbuashinÿinÿana, Bëngbe Bëtsáftaca tbojánencuententšana tojtana ora. Pero betscó tojanéjbana chë jubiá chca buashinÿinÿanana. Chë ley, chë natsana trato, Bëngbe Bëtsá tojanayentšbuaché ora, tša buashinÿinÿanánaca cha tojanmëse;

8 ndegombre, más bën y uámana tempo entsemna chë Bëngbe Bëtsá bënga šojanašebuachená tsëm soyënga yojtsama ora, chë Uámana Espiritu bëngbe ainaniñe cháumashënguama Bëngbe Bëtsá tojama ora.

9 Bëngbe Bëtsá chë ley tojanayentšbuaché ora, chë ndáyeca entsanga jóbanama yojánamna, ntšamo chiñe betsayancá ndoñe tmonjama causa, chora cha chca tojanma puerte chabe buashinÿinÿanana jinÿanÿiyëse; ndegombre más bën y uámana tempo entsemna chë mocna ora Bëngbe Bëtsá yojtsama entsanga chabe bominÿiñe tsábenga chamotsemnana.

10 Er chë Bëngbe Bëtsá ley tojanayentšbuaché ora tojaninÿanÿé buashinÿinÿanana, mora jtsinÿnana mo ya ton-daye cuabndëtsemncá, chë Bëngbe Bëtsá entsangbiamama tsëm soyënga tojtsamama tcojtsonÿá ora, chë tša buashinÿinÿanana yojtsemna ora.

11 Er chë leyama tempo, chë ya jochnënguama tempo entsemna ora, Bëngbe Bëtsá chabe buashinÿinÿanana y uámanana tojinÿanÿese; ndegombre chë Bëngbe Bëtsá tsëm soyënga entsangbiamama jamama ora, chë ndocna te yochanjochnëngo tempo ora, Bëngbe Bëtsá más chabe buashinÿinÿanana y uámanana echántsinÿanÿnaye.

12 Y chca, Bëngbe Bëtsá chca bëts soyënga yochjamama fsëndobatmánayeca, bënga fsëntsobena jóyebuambayama, nyëtsca soyëngama jayanëse, tondayama ntjatauatjca.

13 Y chca, bēnga ndoñe Moisescá queftsátama, chē chabe jubiá chaobuashinÿinÿenama Bēngbe Bētsá tojanma ora, canÿe entšējuaca yojtsenamochécjua; cha chca tojanma, chē Israeloca entšanga ndoñe chamondobená jinÿama chē jubiá buashinÿinÿanana ya yojtsēchnējuana ora.

14 Pero Bēngbe Bētsá tojanma chēnga ndoñe chaondósertama ntšamo Moisesbiajana cha tojanayancá. Y cabá quem tempo, ntšamo Bēngbe Bētsá Moisésbioye tbojanšbuachenacá chēngbiama jamama, Israeloca entšanga tmojtsalía ora, ndoñe ntsēsertánana Bēngbe Bētsabe ndegombre soyēnga, mo chēngbiama iytēmena soyēnga cuaftsemncá, mo chē Moisés yojtsenamochécjua entšējuacá. Y chca endmēna, er nÿe Crísoftaca cánÿiñe mo canÿacá jtsemnēse, chēnga jtsobenana chē soyēngama jósertana, y iytēmencá ya ndoñe ntsemnana.

15 Y méntscoñama, Moisesbe librēšangá chēnga tmojtsalía ora, ndoñe ntsēsertánana Bēngbe Bētsabe ndegombre soyēngama, ntšamo chiñe tojtsayancá jamama ndoñe montseboše causa.

16 Pero canÿe entšá chē Bēngbe Utabnabe benache tojishache ora, cha jtsobenana chē soyēngama josértana.

17 Y Bēngbe Utabná y Espíritu canÿa bondmēna, y Bēngbe Bētsabe Espíritu tojtsemnentše, chē bacna soyēnga jamama juabnēnga, ni chē ley ndoñe ntsemándayana.

18 Moisés chabe jubiañe Bēngbe Bētsabe buashinÿinÿanana y uámanana tojaninÿanÿé, y chíyeca, canÿe entšējuaca yojtsenamochécjua, chca, chēnga ndoñe chamondinÿama. Pero bēnga ošbuáchiyēnga nÿetscanga jtsinÿanÿnayana Bēngbe Utabnabe buashinÿinÿanana y uámanana, mo canÿe espejo canÿe soye tojtsinÿanÿnacá, y ndoñe queftsátsoše ntšámnaca jamēse chē soye jatsēytamianana. Cha bēngaftaca yojtsama cada te más chē ntšamo cha yomncá bēnga chamotsemnana, cada te más bētsēsanga chē ntšamo cha yomncá jtsemnēse. Chca endmēna ntšamo Bēngbe Utabná yojtsama; y Bēngbe Utabná y Espíritu canÿa bondmēna.

## 4

1 Y chca, Bēngbe Bētsá bēngbiama lastemado yómnyeca, quem trabajo šojabanÿé, jtsabuayiynayama chē Crísoftaca tojašebuachená soyēnga; y chíyeca bēnga ndocna te ntjájbanana ainaniñe añemo bomnana.

2 Bēnga fsēntsaboté chē ínÿenga iytēmencá imnétsama soyēnga, chē ínÿenga tmojinÿe ora chama jtsēuatjana, y chē ínÿenga entšanga jáingñama imnétsama soyēngnaca, y Bēngbe Bētsabe buayenana soye ndoñe queftsatstróca ndoñe ndegombre soyēngaca. Chamna, bēnga sempre nÿe chē ntšamo ndegombre yomncá fsēndbétsoyebuambnaye, mo

Bëngbe Bëtsabe delante cuaftsemnëngcá jtsamëse; y chca, bënga fsëndbëtsama cada entšabe ainanentša juabnënga chamuayanama, bënga ndegombre soyënga fstsoyebuambná ca.

<sup>3</sup> Y nderado bënga chë tšabe noticiënga fstsabuayiyná ora, báseftanga chë soyënga chaósertama ndoñe tontsopodëne, nÿe chë pochocánënga jtsemnana tmojtsajnëngbiama chca jtsemnana.

<sup>4</sup> Chëngbiama, chë Crístbeñe ndošbuáchiyëngbiama, chë quem luarentše mora mandayá, Satanás, tojama chë buayenana soye ndoñe chaondëtsësertánama; chca, chënga ndoñe chamondinÿama chë tšabe noticiënguentšana puerta bëts y tšabe soyënga, chë Cristo puerta bëtsá y obená yomnana ínÿanÿnaye soyënga, nda nÿetsca soyënguiñe Bëngbe Bëtsacá yomna.

<sup>5</sup> Bënga ndoñe nÿe cabëngbe soyama queftsatabuayiyná, ndayá Jesucristbiama mo Bëngbe Utabnacá. Bënga bëngbiama fsëndbáyana mo oservenëngcá fstmëna ca, tšëngaftanga jujabuáchama; y chca fsëndbëtsama Jesús jaserviama.

<sup>6</sup> Er Bëngbe Bëtsá, nda quem luare jobojátšama ora tojanmandá binÿniñe ibetentšana chaóbocnana, chánaca tojama bënga ainaniñe tšabá chabe soyëngama chašotsësertánama, chca bënga fchayobená juabuátmanana chë Bëngbe Bëtsabe uámanana y obenanentšana inétsobocana osertánana, ndayá Crístbeñe bënga mondonÿá.

*Bënga fsëndoyena Crístbeñe jtsošbuáchiyëse*

<sup>7</sup> Pero chë puerta tšabe y bëts soye, chë Cristbe buayenana soye, bënga mondbomna cuerpiñe, bëngbe ainaniñe; y chë cuerpënga jtsemnana nÿe mo matbajëngcá, ndoñe yapa obenana ntsebmomnana, chca, jinÿanÿiyama tša bëts obenana Bëngbe Bëtsábiocana yóbocnana, y ndoñe bëngbentšana.

<sup>8</sup> Y chca, bënga nÿetsca padecena soyënguiñe vida fsëndbomna, pero ndoñe queftsátsmëna ndobenënga chë padecena soyënguentšana tšabá jabocnana; ndoñe queftsátstatšëmbo ndayá jamama šojtsamna, pero ndoñe queftsátsmëna ntobencá jtsobátmanama quem padecena soyënguentšana tšabá jabocnana.

<sup>9</sup> Inÿënga montsama bënga puerta fchaisufrima, pero Bëngbe Bëtsá ndoñe nÿe cachcá šontsabashejuana; mo nda ínÿabioye cuafjutsencá tmojtsentsjaná ora, ya jóbama jtseprontánana, uayayënga bënga jtsëbáyama imojtsejuabnangbe cucuatšiniñe fsëntsemna, pero cabá ndoñe ntjobáyana.

<sup>10</sup> Inÿënga sempre jtsamana bënga bëngbe cuerpiñe puerta fchaisufrima, y jobanámna resjo jtsemnana, ntšamo Jesúseftaca tmojanmcá, cha chaosufrima y chaóbanama. Chca

bëngaftaca endopasana, chca, ínÿenga chamobená jinÿama Jesús bëngbeñe vida yobomnama.

11 Er bënga vida fchabomnëntscuana, sempre puerte resjo bëngbiana jëftsemnana jóbanama, Jesúsbioye servena causa; y chca endmëna, ínÿenga chamobená jinÿama Jesús vida yobomnama bëngbe cuerpiñe, chë canÿe te yochjopochóca cuerpo.

12 Y chca, bënga tša fsëndësufrina y jobanámnaca resjo endmëna; y tšëngaftanga tšabe noticiënga šmojóyëngacñayeca, Bëngbe Bëtsá tojama chë nÿetsca tescama yomna tšabe vida chašmotsebomnama.

13 Bëngbe Bëtsabe uabemana palabrenguiñe endayana: “Atše sëntsanošbuaché y chíyeca sënjanoyebuambá ca.” Bënga cachca ošbuáchiyana fsëndbomna chë chca tojanayanacá, y chíyeca bëngnaca Bëngbe Bëtsábeñe fsëntsošbuaché y chabiana fsëntsoyebuambná.

14 Er bënga fsëndétatšëmo, Bëngbe Bëtsá, nda tojanma Bëngbe Utabná Jesús cháuatayenama, chánaca yochjama bënga Crístoftaca cánÿiñe mo canÿacá jtsemnëse, bënga chámuatayenama, y tšëngaftangaftaca cánÿiñe cha yochtsemnoye šochjúshejango.

15 Lempe ntšamo bënga fstsama y fstsésufrincá tšëngaftangbe tšabiana endmëna; chca, más becá entšanga chábeñe chamojtsošbuaché ora, ba tšabe bendicionënga Bëngbe Bëtsá entšangbiana jtsamëse, más becá entšángnaca chábioye chamotsatschuaná, ndayá chëngbiana cha yochjamama; y lempe chca, Bëngbe Bëtsá puerte uamaná y obená yomnama nÿetsca entšanga chamotsichámuama.

16 Chíyeca bënga ndoñe ntjájbanana ainaniñe añemo bomnana. Masque quem luarentša bëngbe cuerpo cada te jt-sopochócyana, Bëngbe Bëtsá jamana chë bëngbentšana nÿets tempo vida yochtsebomna soye, cada te más obenana chaotsebomnama; y chca, bënga jtsemnana mo tsmëma entšangcá.

17 Ntšamo bënga mora fsëndësufrincá endmëna nÿe quem luarentše vida tmojtsebomnëntscuana, y chca, chë soye jtsemnana mo canÿe nduámana soycá; pero ntšamo bënga fsëndësufrincá josérviana bënga jtsebomnama chë Bëngbe Bëtsá šochjatšataye puerte bëts uámanana y obenana, cháftaca nÿets tempo vida jtsebomnama, chë ndayá yomna nÿetsca soyëngama más bëts y uámana soye.

18 Er bënga nÿe chë tojtstopodena jinÿama soyënguiñe ndoñe nÿets tempo queftsatsjuabná, ndayá chë ndoñe yondopodena jinÿama soyënguiñe; er chë bënga imobena jinÿama soyënga ndoñe nÿetsca tescama ntsemnana; pero chë bënga ndoñe mondobena jinÿama soyënga cocayé nÿetsca tescama jtsemnana.



## 5

<sup>1</sup> Bënga mora mondbomna canÿe cuerpo quem luarentşe vida jtsebomnama. Quem cuerpo yomna mo chë jtsat-sjacama yopodena yebncá, cánÿentşe ndoñe nÿets tempo ntjëftsemnana. Bënga mondëtatşëmbo, quem cuerpo canÿe te tojtsopochocase, Bëngbe Bëtsá yochjama bënga tsmëma cuerpënga chamotsatsbomnama, celoca nÿetsca tescama vida jtsebomnama, Bëngbe Bëtsabe pormana cuerpënga y ndoñe entşangbe pormana cuerpënga.

<sup>2</sup> Chíyeca, bënga quem luarentşe chca vida tmojtse-bomnëntscuana, yapa tmojtseufrina causa, bënga tşa jtseboşana betscó Bëngbe Bëtsá celoye chaşúyambama, y bënga nÿets tempo celoca jtsiyenama tsëm cuerpo jtsebomnama cha chaomama;

<sup>3</sup> chca, Cristo yochjésabo ora, bënga chë tsëm cuérpoca chamotsemnana, y ndoñe nÿe espíritu ndocna cuérpoca.

<sup>4</sup> Bënga quem cuerpiñe, chë quem luarentşe vida jtsebomnama cuerpiñe chamojtsiyenëntscuana, yapa padecena soyënguiñe sufrina causa, bënga jabuache mochanjášachna; chca echántsemna ndoñe nÿe chë espíritu ndocna cuérpoca jtsemnana bënga imojtsebóseyeca, ndayá masna, bënga chë tsëm cuerpo chamotsebomnama Bëngbe Bëtsá chaomama imojtsebóseyeca. Bënga fsëntseboşe chë bëngbeñe jopochócama yomna soye Bëngbe Bëtsá lempe chaotrocama, chca, bënga chamotsobenama celoca nÿetsca tescama vida jtsebomnama.

<sup>5</sup> Y Bëngbe Bëtsá endmëna nda tojama bënga chamotseprontánama chë tsëm cuerpo jtsebomnama, y nda tojama Espíritu bëngbe ainaniñe cháumashënguama, chca bëngbioye jinÿanÿiyama, bënga ndegombre mochjójyëngacñe ndayá Bëngbe Bëtsá tojaşebuachenacá.

<sup>6</sup> Y chca, bënga sempre ainaniñe bëts añemo fchandbétsebomna. Bënga fsëndëtatşëmbo, quem cuerpiñe cabá vida bënga mochjëftsebomnëntscuana, bënga ndoñe mochántsemna Bëngbe Utabná yojtsemnentşe.

<sup>7</sup> Er mora bënga fsëndoyena jtsamëse, ntşamo Crístbeñe bënga imoşbuachecá, y ndoñe nÿe ndayá jinÿama tmojtsobenama.

<sup>8</sup> Bëngbe fsëntsemna ainaniñe bëts añémoca, y más fsëntseboşe jájbanana quem cuerpiñe vida jtsebomnana, jama Bëngbe Utabnáftaca nÿetsca tescama vida jtsebomnama.

<sup>9</sup> Chíyeca bënga bëtscá fsëndëntşena Bëngbe Utabná sempre oyejuayá jabemama, masque bënga quem luarentşe quem cuérpoca tmojtsiyena, o ya ndoñe.

<sup>10</sup> Er nÿetscanga şontsamna jashjanguana Cristbe puestoca tribunalentşe, cada ona ntşamo yomerecencá

chaóyëngacñama, ntšamo tšabá o ndoñe tšabá quem luarentše chabe cuerpiñe vida yojëftsebomnëntscuana tojëftsemcá.

*Jábuayenama ntšamo Bëngbe Bëtsá inama entšanga tempcá tšabá cháftaca chamotsatsmënama*

<sup>11</sup> Chcasna, Bëngbe Utabná nyëtscangbiana chë más bëtsá yomnama jtsejuabnayëse, bënga bëtscá fsëndama entšanga jáyëñjanama, bënga tšabá fstsamama chamotsejuabnama. Pero Bëngbe Bëtsá ya endëtatšëmbo ntšamo bënga fstmënama, y atše sëntsobátmana tšëngaftángnaca chca tšabá chašmotsetátšëmbo, tšëngaftangbe ainanentša juabnëngaca, chë bëngbiana aíñe ca cmojtšëtsëtsná juabnënga.

<sup>12</sup> Bënga ndoñe cachiñe cabëngbiana queftsatoyebuambná; chca fsëntsichamo ndayá tšëngaftanga oyejuayënga bëngbiana chašmotsemnama, chca, tšëngaftanga jojuama chašmobenama, chë uámana soyënga tmojtsebiamnángbioye ndayá entšanga canye entšábeñe tmojtsonyáca y ndoñe chca chë entšabe ainaniñe tomna soyëngaca.

<sup>13</sup> Er bënga mo chë ndoñe corente juabna ndbomnëngcá fstsamëse, ntšamo báseftanga mondbetsichamcá, jtsemnana Bëngbe Bëtsá jaserviama; y bënga corente juabna bomnëngcá fstsamëse, jtsemnana tšëngaftangbe tšabiana.

<sup>14</sup> Bënga chca fsëndmëna, Cristo šondábabuanyëshanayeca, y chë soye endama bënga nye cha fchaitseservënama, er bënga fsëndenojuabná y puerte tšabá fsëndëtatšëmbo, canya, Cristo, nyëtscangbiana tojanóbanama; y cha nyëtscangbiana tojanóbanayeca, endmëna mo cha tojanóbana ora, nyëtscanga cháftaca cuañobancá.

<sup>15</sup> Y Cristo nyëtscangbiana tojanóbana, chë quem luar-entše vida bomnënga ndoñe más nye cachëngbiana chamondëtsiyenama, sinó chabiana, nda chëngbiana tojanóbana y tojtanayena.

<sup>16</sup> Chíyeca, bënga ya ndoñe ndocnabiana queftsatsjuabná ntšamo entšanga quem luarentše jtsejuabnayama monduamancá; masque ndegombre bënga chca Cristbiana fsënjanjuabná, mora ya ndoñe chca chabiana queftsatsjuabná.

<sup>17</sup> Chcasna, nderado nda Crísoftaca cányiñe mo canyáca tojtsemna, Bëngbe Bëtsá tojama cha mo canye tsëm entšacá chaotsemnama. Ntšamo chë Crístbioye cabá nduabuátmana ora cha yojamncá, mora ya ndoñe quenátsmëna. Morna cha jtsejuabnayana y jtsamana inye soyënga y tsëm soyënga.

<sup>18</sup> Bëngbe Bëtsá endmëna nda chca inétsama, entšanga mo tsëm entšangcá jábiamama; y cha Crísoftaca tojama bënga tempcá tšabá cháftaca chamotsatsmënama. Y cha bënga canye trabajo sonjanabanýe, bënga entšanga jábuayenama, Bëngbe Bëtsá

inétsama entšanga tempcá tšabá cháftaca chamotsatsmënema, y entšanga jujabuáchama chca chamotsemnema.

<sup>19</sup> O mëntšá, Cristo tojanma sóyeca Bëngbe Bëtsá yojtsama entšanga chamotsobenama tempcá tšabá cháftaca jtsatsmënema, y chca, chënga chamotsobena chëngbe bacna soyëngama perdonánënga jtsemnema, y chë soyëngama nÿetsca tescama castigánënga jtsemnema ndoñe chaondëtsamnema. Y bënga šonjanabanÿé chë trabajo, entšanga jtsabuayiy-nayama ntšamo Bëngbe Bëtsá inama entšanga tempcá tšabá cháftaca chamotsatsmënema.

<sup>20</sup> Y chca, bënga jtsemnana Cristbe cuenta oye-buambnayënga y amënga, mo cach Bëngbe Bëtsá bëngaftaca cmojtsaimpadancá. Cristbe cuenta chaimpadá, bëtscá šmochtsentšena Bëngbe Bëtsáftaca tempcá tšabá jtsatsmënema.

<sup>21</sup> Cristo ndocna bacna soye tonjanma, pero bëngbe bacna soyënga jabuajuánamna, Bëngbe Bëtsá cháftaca tojanma mo cha canÿe bacna soyënga amá cuaftsemncá, chca, bënga Crístoftaca cánÿiñe mo canÿacá jtsemnëse, Bëngbe Bëtsabe bominiñe tšábenga jtsemnema chamotsobenama.

## 6

<sup>1</sup> Chcáyeca, bënga Bëngbe Bëtsáftaca cánÿiñe trabájayënga quetsomñecana, cbontsaimpadana ndoñe nÿe bonamente chašmondóyëngacñe chë Bëngbe Bëtsá yojtsama soyënga, tšëngaftangbiana tšabe juabna jtsebomnëse.

<sup>2</sup> Er Bëngbe Bëtsá chabe uabemana palabrenguiñe mëntšá tojánayana:

Chë tšabe soye jamama tšabá šonjaninÿana ora, atše tcbon-janoyeuná;

chë ácbioye jatsbocama te, tcbonjanájabuache ca.

Smochjinÿe. Mora entsemna chë mocna ora Bëngbe Bëtsá tšabá ibojtsinÿana tšabe soye jamama; mora entsemna chë mocna ora Bëngbe Bëtsá yojtseboše aca jatsbocama.

<sup>3</sup> Bënga ndocna bacna soye queftsátama, ndayá chaoma entšanga chë tšabe noticiënga chamotsábotema, chca, ndocná podesca chaondëtsóyebuambnama bëngbe trabajuama, Cristbiana.

<sup>4</sup> Inÿetšá, bëngna nÿetsca soyënguiñe fsënjanियena mo Bëngbe Bëtsabe oservenëngcá; Bëngbe Bëtsábeñe obatmancá puerta uantadënga jtsemnëse, fstsesufrina ora; puerta padecena soyënguiñe bëtsemna causa, ndayá jamama ndoñe fsëntsetatšëmbo ora; y ainaniñe puerta ngménaca fstsemna ora;

<sup>5</sup> Inÿënga šojtsatsetšená ora; cárceloye šojautame ora; entšanga bëngbe contra tmojtsenbouénana ora; jabuache

trabájayíñe puerte uamëntšnayënga fstsemna ora; bayté ntsamanacá fstsemna ora; y jasama tondaye fsëntsebmna ora.

<sup>6</sup> Bëngnaca fsëntsinÿanÿná Bëngbe Bëtsabe oservénënga fstsmënama, puerte tšabe vídaca, ndocna bacna soye ntjamcá jtsiyenëse; Bëngbe Bëtsabe soyëngama corente jtsetatšëmbëse; ínÿenga ntšamo šojáborlaye ora puerte uantadënga jtsemnëse; ínÿengbiuye puerte bonshanánaca jtsënÿayëse; Uámana Espíritu bëngbe ainaniñe jtsebmñëse; y ndegombre nyets ainánaca nyetscanga jtsababuánÿeshanëse;

<sup>7</sup> ntšamo Bëngbe Bëtsabiamá ndegombre yomncá jtsabuayinyayëse; Bëngbe Bëtsabe obenánaca ba soyënga jtsamëse; y mo chë soldadëngcá, uayayënga jáyënjanama y chëngbiamá jenëuyanama soyënga jtsebmñana, chë Satanásbioye jayënjanama y chabiamá jenëuyanama ndayá Bëngbe Bëtsá šojatšatacá jtsebmñëse; y Bëngbe Bëtsá chca tojama, er cha tojama bënga chabe bominyíñe tšábenga chamotsemnana.

<sup>8</sup> Bënga fsëntsinÿanÿná Bëngbe Bëtsabe oservénënga fstsmënama, ínÿenga bëngbiamá tšabe soyënga tmojtsejuabná ora y bënga nduámanënga jtsemnana chënga tmojtsama ora; ínÿenga tšabe soyënga bëngbiamá tmojtsoyebuambná ora y chënga bëngbiamá podesca tmojtsichamo ora; bënga áingñayënga fstsmëna ca báseftanga tmojtsejuabná ora, pero bënga ntšamo ndegombre yomncá jtsóyebuambnayëse.

<sup>9</sup> Mo nduamanëngcá bënga entšángbeñe jtsënÿayana, pero banga corente tšabá bënga šondëubuatma; bëngbiamá sempre resjo endmëna jóbanama, pero šmochjinÿe, bënga sempre vídaca chentšana jatóbocañana; bënga juatsjínÿama jobenayama, Bëngbe Bëtsábeyeca castigánënga fchandbétsemna, pero nÿa jóbanana ndoñe.

<sup>10</sup> Masque ngménënga fstsemna, ainaniñe sempre oyejuayënga fchandbétsomñe; masque ndbomñëjemëngcá, pero fchandbétsama banga Bëngbe Bëtsábíocana bëtscá chamotsebmñana; quem luarentša soyënga tondaye queftsátsbmna, pero Bëngbe Bëtsabe entšanga quetsomñecana, ndegombre lempe fsëndëtsóbomñe.

<sup>11</sup> Tšëngaftangbiamá, Corintoca entšanga, lempe fsënjayana, tondaye ntjaitëmcá; nyets ainánaca, corente cbondábabuanÿeshana.

<sup>12</sup> Bënga puerte cbondábabuanÿeshana, pero tšëngaftangna ndoñe yapa queščátbabuanÿeshana.

<sup>13</sup> Atše cbontsaimpadana, mo canÿe taitá chabe básenga cuaftsaimpadancá, atše puerte chašmotsebobonshánama, er atše corente cbondábabuanÿeshana.

*Bënga mondmëna mo Bëngbe Bëtsabe bëts yebncá*

<sup>14</sup> Crístbeñe ndošbuáchiyëngaftaca ndoñe šmatjenutaná ndayánaca jamama, er chca, chëngaftaca šmatjábocana mo chë jaárama uacnata ndoñe cachënchechata tbontsemncá. Ndegombre, chë tšabe soyënga amá y Bëngbe Bëtsabe bominyiñe tšabia mëná, nÿa tondayama cachcá ntsejuabnayana, chë Bëngbe Bëtsá tojamandacá ndoñe tontsamacá y bacna soyënga amacá. Ndegombre, chë entšangbe juabna binÿnayáftaca vida bomná, nÿa tondaye ntsebomnana chë nÿe mo ibetiñcá juabnayáftaca.

<sup>15</sup> Cristo y Satanás, Belial cánaca uabainá, ndocna te tondayama cachcá ntsejuabnayana; y cachcá copasana, Crístbeñe ošbuachiyá y chábeñe ndošbuachiyáftaca.

<sup>16</sup> Ndocna soyiñe cachcá ntsemnana, Bëngbe Bëtsabe bëts yebna, chë nÿe canÿe Bëngbe Bëtsábioye jadórama yebna, y chë entšangbe pormana soyënga, mo diosënga cuaftsemncá jtsadoránana soyënga; chca endmëna, er bënga, nÿetscanga cánÿiñe Jesucrístbeñe ošbuachiyëncá, mondmëna mo Bëngbe Bëtsá Ainabe bëts yebncá, ntšamo Bëngbe Bëtsá chabe uabemana palabreñguiñe chabe entšangbiana tojanayancá:

Chëngbeñe vida chántsebomna y chëngbenache chántšana; atše chëngbe Bëtsá chántsemna y chëngna atšbe entšanga ca.

<sup>17</sup> Chíyeca mëntšánaca Bëngbe Utabná chabe entšanga tojanéyana:

“Chë bacna soye amëngbentšana šmochjésebocana, y chëngbentšana šmochtsojuánañe; tondaye šmattsebana, ni šmattsama ndayá Bëngbe Bëtsabe entšangbiana ndoñe tšabá tontsemncá.

As cbochanjúbuaja,

<sup>18</sup> y chántsemna mo canÿe taitacá tšëngaftangbiana, y tšëngaftangna mo atšbe uaquiñënga y bemiángcá.

Chca séntsicamo atše, tšëngaftangbe Utabná, nÿets obenana bomná ca” —chiñe enduábemana.

**7**

<sup>1</sup> Chcasna, atšbe bonshánënga, chca endmëna ntšamo Bëngbe Bëtsá šojašebuachenacá. Chíyeca šontsamna, Bëngbe Bëtsabe delante nÿetsca soyënguiñe tšábënga jtsemnana, bëngbe cuerpama o espíritbiana bacna soye ndoñe más ntsamcá; y Bëngbe Bëtsá nÿetscangbiana más uamaná yomna ca mondëjuabnáyeca, lempe ntšamo tmojobenacá mochtsiyena mo chabe entšangcá, nÿetsca soyënguiñe puerte tšábënga jtsemnëse.

*Ntsamo chë Corintoca entšanga juabna tmojantrocá*

<sup>2</sup> Bëngbiamá šmochtsenójuabnaye tšëngaftangbe ainaniñe puerte bonshanánaca. Bënga ndocnabiamá bacna soye chibiatsma, ndocnabiamá chibiatsma más bacna entšá chaotsemnama, y ndocnábioye chibiatsingñé.

<sup>3</sup> Atše chca ndoñe quetsátichamo, ndoñe tšabá šmonjama ca tšëngaftangbiamá jayanama, er ntšamo ya tcbonjauyancá, atše tšëngaftangbiamá sempre ainaniñe puerte bonshanánaca sëndbétsenojuabnaye; y chca, mo átšeftaca canyiñcá šmochántsemna, masque chayóbana o cabá vida chaitsóbonñése.

<sup>4</sup> Atše puerte tšabá sëndétatsëmbo, ntšamo tšabá yomncá šmochtsamama; y tšëngaftangbiamá puerte oyejuayá sëntsemna. Lempe ntšamo tsësufriñcá tsiyenama, atšbe ainaniñe bëts añemo sëndétsóbonñe y corente sëntsoyejuá.

<sup>5</sup> Macedonia luaroye fsenjánashjajna orscana, ndoñe luare queftsátsbomna jóchnama, sinó nyetsca soyënguiñe fsëndëpadecena: chë bëngbe buayenana soyama contra tmojtsemnëngaftaca jabuachana enatsëtsnayëse, y bëngbe ainaniñe jtsauatjëse.

<sup>6</sup> Pero Bëngbe Bëtsá, chë yapa añemo ndbomnëngbioye endbetsañemuayá, tojanma bënga ainaniñe más añemo fchaitse-bomnama, Tito moye tonjánashjango ora.

<sup>7</sup> Y cha tonjánabo ora, bënga ndoñe más añemo quefstétsebomna nýe cha tojánashjanguama, sinó tšëngaftanga šmojanájabuachama y ainaniñe añemo chaotsebomnama šmojanmama. Cha šonjanëyana tšëngaftanga tša šmojánboše bënga jányama ca, y šonjanacuntá ntšamo tšëngaftanga ngmënaca šmojamna, atšbiamá ndoñe tšabá šmonjanma causa, y ntšamo tšëngaftangbiamá atšbe tšabiana puerte iuámanana; y quem chabe noticiëngaca, cabá más sëntsoyejuá.

<sup>8</sup> Er masque tšëngaftanga tša ngmënaca šmojamna chë tcbonjanëbuábiamá tsbuanáchama, mora ndoñe quetsatsjuabná más tšabá yojamna chca ndoñe jatëbuabiamana ca; masque tempo atše chca sënjanjuabná, er atše sëntsetatsëmbo chë tsbuanácha básefta tescama ngmënënga tcmojánabiamá,

<sup>9</sup> mora atše puerte oyejuayá sëntsemna, ndoñe tšëngaftanga ngmënënga šmojamnama, ndayá chë šmojánbomna ngmënana tojanmama tšëngaftanga chašmuenójuaboma ndoñe tšabá šmontsamama, y chca amana chašmotsajbanama, tšëngaftangbe juabñënga jatrócase. Chca enjamna, er tšëngaftanga ngmënana šmojánbomna ntšamo Bëngbe Bëtsá inabošcá; chíyeca, bënga ndocna bacna soye tšëngaftangbiamá chibiatsma.

<sup>10</sup> Ntšamo Bëngbe Bëtsá tojtsebošcá ngmënana bomnentsana, jóbocnana chë bacna soyënga tcojamama

jenójuaboyana y juabnënga jatrócana; y juabna jatrócana entšábioye juanatsana atsbocaná chaotsemnama, y chandocna te ntjátsjuabnayana más tšabá yojamna ndoñe chca ntjatstrócana ca. Pero ntšamo chë nye quem luarama enójuabnaye entšanga mondbetsebomncá ngménana bomnentsana, ndoñe ntjóbochnana juabna jatrócana; chentsana jóbochnana nye nyetsca tescama castigana jtsemnana, mo nyetsca tescama cuafjobancá.

11 Smochjinÿe ndayá tojóbochna, ntšamo Bëngbe Bëtsá inabošcá ngménana bomnentsana: tojanma chë šmojanma soyiñe puerte chašmuenójuaboma; y ntšamo jájandmanana bëtscá chašmonguanguama; tojanma tšëngaftanga chacmetonama chë bacna soye tojanmáftaca; y castigánënga jtsemnama jtsauatjámna. Chentsana, tšëngaftanga tša šmojtsanboše atše jinÿama; y šmojtsanprontana lempe jamama chca bacna soye ndoñe más chaondëtsemnama y chca tojanmábioye jacastígama. Nyetsca chë soyënguiñe tšëngaftanga šmonjinÿanÿé chca bacna soye ndoñe šmonjanmama; y chca, mora tondaye quenátsmëna tšëngaftanga castigo jtsebomnana chacmotsamnana.

12 Y chca, atše chë tsbuanácha tcbonjanëbuábiamana ora, ndoñe checbátanëbuabiamana chë puerte bacna soye tojanmábeyeca, ni chë bacna soye tojanoyëngacñábeyeca; ndayá tšëngaftanga, mo Bëngbe Bëtsabe delante cuaftsemnëngcá, chë šmojanma soyiñe bëtscá chašmuenójuaboma, y chca, cha chašminÿanÿé tšëngaftanga bëngbe tšabiamana puerte šmenójuabnana.

13 Chíyeca bënga más añemo ainaniñe fsëntsebomna.

Pero ntsachetšá añemo fstsboamnana, masna puerte oyejuayënga fsëntsemna, er bënga fsënjinÿe Tito tša oyejuayá, er chabe ainaniñe lempe natjëmbana yojtsemna nyetsca tšëngaftangbiama.

14 Tito tšëngaftanga jányama cabá nda ora, atše cha sënjanianana tšëngaftanga smochjanóyeunaye chë atše tcbonjanëbuajana palabra ca; y tšëngaftanga ndoñe chešmatsma atše chaitsëuatjama chca tijánayanama. Inÿetšá, lempe ntšamo tchojauyancá ndegombre endmëna; cachcá, ntšamo bënga Títbioye fsënjanianancá ndegombre entsemna, chë tšëngaftangbiama fstsóyejuama.

15 Y mora Tito más cmontsababuánÿeshana, ntšamo cha tcmojanamëndacá ndayá tšëngaftanga šmojanmama, y ntšamo puerte respétoca y mo uamaná cuaftsemncá chabiamana jtsejuabnayëse šmojanofjama tojtenojuabó ora.

16 Atše puerte oyejuayá sëntsemna, er atše sëndëtatšëmbo tšëngaftanga ntšamo tšabá yomncá nyetsca soyënguiñe

šmochtsamama.

## 8

*Chënga jañémuayama, inÿe ošbuachiyëngbioye nÿets ainánaca jujabuáchama*

<sup>1</sup> Y mora, Jesucristbeyeca catsátanga, bënga fsëntseboše tšëngaftanga chašmotsetátšëmo ntšamo Bëngbe Bëtsá bëtscă tšabe bendicionënga tojama Macedonia luarentše ošbuachiyëngcă enefjuanëngbiamama.

<sup>2</sup> Chënga puerte tmojasufri, y chora chca, chënga tmojinÿanÿé becá imošbuáchema y tša imoyejuama; y masque puerte ndbomnjémënga, chënga nÿets ainánaca bëtscă tmojanacaredadó Jerusalemntša ošbuáchiyënga ndbomnjémëngbiamama.

<sup>3</sup> Atše sëndétatšëmo y sëntsobena jayanama chënga ndegombre tmojatšatá ntšamo tmojobenacá, y ntsachetšá imobentšana cabá más, chënga chca imobóseyeca.

<sup>4</sup> Tša šonjánaimpadana chëngbioye jálesenciamama ndayánaca jamama, Jerusalemoca ošbuachiyëngbioye jujabuáchama.

<sup>5</sup> Bënga ftsjanobatmanama cabá más chënga tmonjanma; natsana, chënga Bëngbe Utabná tmojanianama lempe ntšamo cha tojtsebošcă chënga jamama imojtseboše ca, y chentšana bëngaftácñaca cachcă tmonjanma; y lempe enjamna ntšamo Bëngbe Bëtsá inabošcă.

<sup>6</sup> Ndayá Macedonioca ošbuáchiyënga tmojanmama bënga añemo fsënjanóyëngacñeyeca, bënga Tito fsënjaimpadá chë tšabe trabajo chaopochocama, chë tšëngaftangbeñe crocénana játbanana, Jerusalemoca ošbuáchiyënga jujabuáchama, ndayá cha jamama tojanbojatšecá.

<sup>7</sup> Y morna, ntšamo tšëngaftanga nÿetsca soyënguiñe tša šmomncá —puerte ošbuáchiyënga, becá obenënga Bëngbe Bëtsabe soyëngama jóyebuambayama, puerte osertánënga Bëngbe Bëtsabe soyëngama, corente juabnayënga bëtscă jamama Cristo jaserviama y bëngbioye corente ababuánÿeshanënga —cachcă, mórñaca bëtscă šmochjama quem trabajuiñe chë ošbuáchiyënga ndbomnjémëngbiamama, tšëngaftangbe bonshánana jtsinÿanÿayëse.

<sup>8</sup> Chca ndoñe quebatëtsëtsná mo canÿe mandcă; atše sëntseboše ndayá nÿe tšëngaftanga jáuyanana ntšamo inÿënga bëtscă tmojatrabajá chë ndbomnjémëngbiamama, tšëngaftángñaca cachcă chašmotsamama; y chca, chašminÿanÿëma chë tšëngaftanga šmobomna bonshánana ndegombre bëtsemnama.

<sup>9</sup> Er tšëngaftanga šmondétatšëmo ntšamo Bëngbe Utabná Jesucristo puerte tšabe soyënga bëngbiamama tojamama,



bëngbioye puerte jtsababuányeshanëse. Celoca, cha cabá quem luaroye ndabo ora, cha bëtscá inabomna; pero tšëngaftanga ababuányeshanayeca, mo canye puerte nduamanacá tojanóbema. Y mora, Cristo mo canye nduamanacá tojóbmayeca, Bëngbe Bëtsá puerte tšabe soyënga šojatšatá.

10 Tšëngaftangbe tšabiamá mëntšá cbaruayená, ntšamo quem soyiñe šmochjamama. Chë inye uata tšëngaftanga šmonjanbojatsé, ndoñe nye chë ndbomnjémëngbiama jacjayama, ndayá chca jamama jtsebošámnaca.

11 Morna, chë ndbomnjémëngbiama trabajo šmochjapochóca; chca, ntšamo tšëngaftanga becá šmonjanprontana y jujabuáchama tša šmonjanbošcá, mórncaca cachcá chašmomama chë trabajo japochócama, ntšamo šmojobenacá jacjayëse.

12 Er canye entšá, jatštayama ndegombre tojtsebošëse, ndayá cha tojatštacá Bëngbe Bëtsábioye oyejuayá jabemana, ntšamo cha tojtsobencá, y ndoñe ntšamo cha ndoñe tontsobencá.

13 Ndoñe quenátsmëna, tšëngaftanga puerte ujabótënga chašmoquedá, ínÿengbioye atšatnaye causa, chënga ndoñe yapa ujabótënga chamondëtsemnana.

14 Atše sentsichamo ndayá nyetscanga chamotsenajabuachana, chca tojtsëjaboto ora ca. Mora, chë bëtscá šmobomnentšana šmontsobena chënga jujabuáchana, ndayá tojtsabuáshebecá jatšatayëse; y inye orna, chënga entsamna tšëngaftanga jujabuáchana chë cmojtsabuáshebena soyëngaca. Chca, nyetscanga jóyëngacñana ndayá tojtsëjaboto ora.

15 Ntšamo Bëngbe Bëtsabe uabemana palabrenguiñe endayancá:

Chë tša bomnábioye ndoñe chebatanójama;

y chë nye batšá bomnábioye, ndoñe quebënjatanbuáshbena ca.

### *Tito y chabe enutënga*

16 Bëngbe Bëtsá šcuatschuá, tšëngaftanga jtsanÿenama Tito ainaniñe juabnënga chaotsebomnana cha tojanmama, cachcá ntšamo bënga fsëndbomncá.

17 Er tšëngaftangbioye chaotsama bënga fsënjanimpadá ora, cha oyejuayá aiñe ca tonjánayana choye jama; y chabiamá puerte enduámana tšëngaftangbe tšabiana; chíyeca mora echanjá tšëngaftanga jányama, chca jamama cachá yobóseyeca.

18 Títoftaca, canya Jesucristbeyeca bëngbe catšata fsëntsichamná; chabiamá puerte tšabá ošbuachiyëngcá enefjuanëngbenache mondoyebuambná, chabe trabajuama chë tšabe noticiënga abuayinyayama.

19 Y ndoñe nýe chë soye, sinó quem luarentşe oşbuachiyëngcá enefjuanënga cha tmonjuábuayana bëngaftaca Jerusalenoye jama, y jujabuáchama chë ndbomñëjémëngbiama trabajuiñe; chë trabajo endmëna bonshánana jinýanýiyama; chca fsëntsama, Bëngbe Utabná jtsatschuanayama y jinýanýiyama bënga chca jujabuáchama tşa fstsboşama.

20 Títoftaca cha fsëntsichamná, chca, ndocná chaondëtsichamo bënga ndoñe tşabá tifjama ca, ntşamo játbanama cmojtsamniñe, chë becá juabónana játbanama, ndbomñëjémënga jujabuáchama;

21 er bënga fsëndama lempe ntşamo fstsobencá, ndoñe nýe ntşamo Bëngbe Bëtsabe bominyiñe tşabá yomncá jamama, ndayá ntşamo entsangbe bominyiñe tşabá yomncánaca.

22 Chátaftaca inya Jesucristbeyeca bëngbe catsátnaca fsëntsichamná; cha bënga ba soyiñe şonjinýanýe cha yojtseboşe bëtscá jamama, Cristo jaserviama, y mora más, er cha puerte bëtscá entsejuabná tşëngaftanga puerte tşabá şmochjamama.

23 Y Titbiamna, cha quem trabajuiñe atşbe enutá endmëna, y atşcá tşëngaftangbiama endëtrabája; y chë inýata Jesucristbeyeca bëngbe catsatbiamna, chata bontsemna quemuentşa oşbuachiyëngcá enefjuanëngbe ichmónata, chëngbiama chabóyebuambama; y chë bontsama sóyecna, chata Crístbioye corente jtsatschuanayana.

24 Chíyeca, chëngbioca oşbuachiyëngcá enefjuanënga chca chamotsetatşëmbuama, chë ichmona boyabásengbiocyte şmochjinyanýiye tşëngaftanga ndegombre chënga şmojtsababuánýeshanama, y bënga razón fstsebonnama tşëngaftangbiama oyejuayënga jtsemnama.

## 9

### *Chë inye oşbuáchiyëngbiama crocénana játbanama*

1 Chë Jerusalenoca Bëngbe Bëtsabe entsangbiama crocénana játbanamna ndoñe quenátsiyta tşëngaftangbiocyte jatëbuabiamnayama,

2 er atşe ndegombre sëntsetatşëmbo tşëngaftanga tşa şmojtseboşe chca jujabuáchama. Macedonioca entsanga puerte oyejuayá sempre sëndbëtsëtsësnaye, Acaya luaroquënga chë inye uatscana quem trabajuiñe jujabuáchama şmoprontánama; y chë jujabuáchama tşëngaftangbe bëtscá juabnënga tmojama banga quem luarentşënga bëtscá añemo chamotsebonnama, chëngnaca chë trabajo jamama.

3 Pero Jesucristbeyeca quem catsátanga sëntsichamná, ntşamo bënga oyejuayënga tifjayancá tşëngaftanga chaşmotsamama,

chë tšëngaftanga quem trabajuiñe bëtscá šmochjama ca; chca, ntšamo tijanayancá ndoñe nýe bonamente chaondëtsemnama, y ntšamo sënjanayancá tšëngaftanga chašmotseprontánama;

<sup>4</sup> er nderado báseftanga Macedonioquënga átšeftaca tmojá y choca ndëprontánënga tcmojánýena chë ndbomnějémëngbiama ujabuáchenanaca, chë soye nanjama bënga fchaitšëuatjama, er ba soye fsënjayana bënga ndegombre fstsëtátšëmbo tšëngaftanga prontánënga šmochtsemna ca; y ndegombre, tšëngaftangbiama cabá más ouatjca nántsemna.

<sup>5</sup> Chíyeca, tšabá šonjuínýnana Jesucristbeyeca quem catsátanga jáimpadana chënga atšbe natsana chamotsama tšëngaftanga jányama, y chacmëjabuachama chë juabónana játbanama, ndayá tšëngaftanga tempo šmonjanašebuachenacá. Chca, atše choca chaijáshjango ora, tšëngaftangbe juabónana chaotseprontana. Chca, tšëngaftanga šmochanjínýanyiye ndbomnějémëngbiama šmojacjá, chca jamama tša šmobóšeyeca, y ndoñe nýe batšatema jatšatayama y tšëngaftangbiama bëtscá jobuájuama šmojtseboše.

<sup>6</sup> Quemuiñe šmochtsenójuabnaye: Nda nýe batšá tojajé, cach batšá chentšana josháchiñana; y nda bëtscá tojajé, cach bëtscá chentšana josháchiñana.

<sup>7</sup> Cada ona bontsemna jajájuana ntšamo chabe ainaniñe tojajuabocá; ndoñe ngménaca o nýe ínýenga chca jamama tmojtsemándayeca. Chca chaotsemna, er nda oyejuayá toja-jajóbioye, Bëngbe Bëtšá jtsebobonshánana.

<sup>8</sup> Bëngbe Bëtšá endobena jamana chábentšana nýetsca tšabe bendicionënga y bëtscá soyënga tšëngaftanga chašmotsebomnama; chca, ntšamo nýetsca soyënguiñe cmojtsëjabotcá sempre chašmotsóbomñama, y cabá más bëtscá chašmotsebomnama, nýetsca tšabe obrënguiñe ínýenga chašmëjabuachama.

<sup>9</sup> Bëngbe Bëtšabe uabemana palabrenguiñe, mëntšá endayana chë bëtscá tojacjabiamana:

Cha nýets ainánaca ndbomnějémënga bëtscá jatšatayana; y chë tšabe soyënga ntšamo cha tojtsamcá nýets tempo jëftsemnana.

<sup>10</sup> Bëngbe Bëtšá, nda endbama chaotsemna jénaye jájema y sananga jasama, cmochanjátšataye lempe ntšamo cmojtsëjabotcá, y echanjama, tšëngaftanga cabá más tšabe soyënga chašmotsamama.

<sup>11</sup> Bëngbe Bëtšá echanjama tšëngaftanga nýetsca tšabe soyënga chašmotsebomnama, chca, tšëngaftanga nýets ainánaca puerte ínýengbioye chašmatšatama, y bëngbeyeca, chë mochjóyëngacñënga Bëngbe Bëtšá chamotsatschuanama;

12 er chë ujabuáchenana Bëngbe Bëtsabe entšanga tcojatšatá ora, ndoñe nye ndayá tojtsëjabotcá jatšatayana, ndayá chënga Bëngbe Bëtsá chamotsatschuanámnaca jamana.

13 Chënga Bëngbe Bëtsá mochántatschuanaye, er chë ujabuáchenanaca chëngbioye jinÿanÿiyana, ntšamo Cristbe tšabe noticiënguifne iuayancá tšëngaftanga šmoberdecénama, y ntšamo tšëngaftanga tšabá jamëse, nyets ainánaca bëtscá soyënga chënga y nyetscanga šmojátšatama.

14 Y chënga tša mochántseboše tšëngaftanga jánÿama y tšëngaftangbiana Bëngbe Bëtsá mochántseimpadana, er cha bëtscá tšabe soyënga tšëngaftangbiana tojama.

15 ¡Bëngbe Bëtsá šcuatschuá ndayá cha šojátšatama, canÿe puerte uámana soye, ndocná jobenayana tšabá jayanama ntšamo chë soye bëtsemnana!

## 10

*Ntšamo Pablo tojánayana ínÿenga chabe contra imojtsichamo ora*

1 Y mora, atše Pablo, cbochanjáimpada, tšëngaftangbioye puerte bonshanánaca jtsënÿayëse, y tšëngaftangbiana tšabá jamama jtseprontánëse, ntšamo cach Cristo endbetsamcá. Báseftanga tšëngaftangbioquënga imojtsichamo atše puerte nduamaná tsenóbema atše tšëngaftangaftaca stsemna ora, pero corente añemo bomná tsenóbema jabuache soyënga jayanama tšëngaftangbentšana bënoca stsemna ora ca.

2 Tšëngaftanga cbontsaimpadana, tšëngaftanga jánÿama chaijá ora, atše ndoñe chašondëtsemna puerte añemo bomná jtsemnana, jabuache soyënga tšëngaftanga jáuyanama, ndoñe ntšamo atše puerte tšabá sëntsetatsëmbcá ndayá báseftangaftaca jamama šojtsotocana, chë ndëmuanÿenga imojtsejuabná, nye bënga tšabá jtsomñama juabnëngaca bënga fstsiyena ca.

3 Ndegombre bënga quem luarentše fsëndoyena, pero ndoñe queftsátspelia Cristbiana, ntšamo quem luarentša entšanga monduamancá;

4 er chë ndaye sóyeca bënga Cristbe soyëngama fsëndépelia, ndoñe quenátsmëna mo chë ndaye sóyeca chë nye quem luarama enójuabnaye entšanga japéliama monduamancá, ntšamo nye chënga tšabá jtsomñama juabnënga yomncá. Inÿetšá, chë ndaye soyëngaca bënga fsëndépelia, Bëngbe Bëtsá jtsinÿanana puerte obenana bomna soyënga yomna ca; y endmëna chë Satanás tojtsemánda soyënga jayënjanama, puerte jabuache soyënga jayënjanama. Mo nda canÿe uayayábioye jtsepochoancá, chë Bëngbe Bëtsabe osertánana ndoñe yonduámana ca jinÿanÿiyama soyënga ichámëngbiana,

5 y Bëngbe Bëtsabe osertánana jtsabotema juabnënga bomnëngbiamá, bënga fsëndama ntšamo chënga tmojtsichamcá tondaye chaondëtsámanama. Y chë japéliama fsëndbomna soyëngaca, bënga fsëndbëtsama chca juabnayana chamotsajbanama, y chamotsobena ntšamo Cristo yomandacá jtsamana.

6 Bënga fsëntseprontana chë Cristbiamá nduauenanënga jácastigama, lempe ntšamo Cristo cmojtsamëndacá tšëngaftanga chašmojtsama ora.

7 Tšëngaftanga ndayánaca jtsonyayana nýe ntšamo tbojtsabinýnecá. Nderado nda becá tojtsejuabná Cristbia yomna ca, cha bontsemna jtsejuabnayana bëngnaca Crístbenga fstmënama, ntšamo cha yomncá.

8 Er atše masque tša sëndbëtsoyebuambnaye chë Bëngbe Utabná šojatsatá mandama, chë ndáyeca bënga jamama tšëngaftanga puerte chašmotsošbuáchema y ainaniñe bëts añemo chašmotsebomnama, y ndoñe tšëngaftanga ntjapochócama, chama atše ndoñe quetsátëuatja.

9 Atše ndoñe quetsátsboše tšëngaftanga chacmotsinýana, tšëngaftanga jaútatjayama atše stseboše ca, ndayá atšbe tsbuanáchangañe tijuábemama.

10 Er báseftanga mëntsá atšbiamá imojtsichamo: “Chabe tsbuanáchangañe cha šontsamënda bëtscá soyënga jamama, y tša obenacá cha jtsóyebuambnayana; pero cha bëngaftaca tojtsemna ora, cha jtsóyebuambnayana mo canýe ndocna obenana ndbomnacá, y ntšamo tojtsichamcá tondaye ntsámanana ca.”

11 Chca entsanga entsamna jtsetatšëmbuana, ntšamo bënga fstsichamcá, tsbuanachangá juíchmuase, tšëngaftangaftaca cabá ndoñe fsëntsemna ora, tšëngaftangaftaca fchaitsemna órnaca, bënga chca fchjamama.

12 Ndegombre bënga ndoñe tša añemo queftsátsbomna jayanama nýetšá uámanënga fstmëna ca, mo chë cachënga jtsenábotamnayana uamanëngcá. Chënga jtsejuabnayana y jtsichámuana tšábenga imomna ca, nýe ntšamo cachëngbeñe ínýenga imomnama jtsonyayëse; y chca tmojtsama ora, chënga juabna ndbomnënga jtsemnana.

13 Bënga ndoñe yapa quifchatóyebuambaye cabëngbiamá, chca, tša tšábenga bënga imomna ca jtsenábotamnayama; fchanjóyebuambaye ndayá chë bënga tifjama tšabe traba-juama, ndayá Bëngbe Bëtsá šojabanýecá, y chíñnaca entsemna ntšamo tšëngaftangbeñe Corintoca tifjamcá.

14 Chíyeca, bënga ndoñe queftsatoyebuambná chë bënga ndoñe derecho fsëntsebomnama, ntšamo ndegombre nántsemna bënga tempo tšëngaftangaftaca ndoñe mafsënjamnëse; er bënga chë natsanënga fsënjamna

tšëngaftangbioye jama, Cristbiana tšabe noticiënga jábuayenama.

<sup>15</sup> Y ndoñe quifchatóyebuambaye tša tšabá bëngbe trabajo yomna ca, chë ndayama ndoñe šontsamna chca jatichámuana, chë trabajo ndoñe bëngbe soye, sinó ínÿengbe soye yómnayeca. Chamna, bënga fsëntsobátmana tšëngaftanga Crístbeñe más chašmotsošbuáchema, y chca chaojtsemna ora, bënga fchayobená ba luariñe entšanga jábuayenana, ntšamo tšëngaftangbeñe fsëntsamcá.

<sup>16</sup> Chca, fsëntsobátmana bënga jobenayama tšabe noticiëngama jábuayenama, chë tšëngaftangbentšana más chcoye imoyena entšángbioye; chca, bënga ndoñe yapa quifchatóyebuambaye ínÿengbe trabajuama, Cristbe soyënga jábuayenama, mo chë soye bëngbe trabajo cuafjatsmëncá.

<sup>17</sup> Ntšamo Bëngbe Bëtsabe uabemana palabrenguiñe endayancá: “Nda tojtseboše jayanama cha canÿe uámana entšá yomna ca, más tšabá cha cháuyana Bëngbe Utabná puerte uamaná endmëna ca.”

<sup>18</sup> Er Bëngbe Bëtsá jayanana canÿe entšá ndegombre tšabá tojama ca, ndoñe nÿe cachá tojtšenábotamnabiana, ndayá Bëngbe Bëtsá chca ndegombre tojama ca Bëngbe Bëtsá tojtsejuabnabiana.

## 11

### *Pablo y chë ndoñe ndegombre ichmónënga*

<sup>1</sup> Malaye atše šmëntjëuánta, atše básefta soyënga mo canÿe opá tojtsoyebuambnacá stsihámëntscuana, cach atše stsenabotamná ora. Masque ntšámncá šmochtsëuánta.

<sup>2</sup> Bëngbe Bëtsábeyeca atše tša cbondábabuanÿeshana y cbondánÿena, tšëngaftanga nÿe cha chašmotsëstonama y ndoñe ínÿengbioye. Er atše Cristo sënjašbuachená tšëngaftanga sempre cha šmochtsëstonama, y sëntseboše, cha quem luaroye yochjésabo ora, chábioye tšëngaftanga júshejanguana, mo nÿe chábioye sempre ustonëngcá, ntšamo canÿe taitá chabe bembe ndocna boyabása nduabuatmá nÿe canÿe boyabásaftaca chaóbuamama jushjanguancá.

<sup>3</sup> Mëtscuaye Evábioye tbojaningñé, y cha tbojanínÿnana puerte osertanabe soyënga cuaftsatsëtsnacá, pero ndegombre ndoñe chca yonjamna. Atše sentsauatja nderado cachcá ínÿenga tšëngaftangaftaca muanjama y tšëngaftangbe juabna chašmotrocá, y chca, tšëngaftanga chašmotsajbaná sempre jtsejuabnayana nÿe Cristo nÿetsca soyënguiñe jtseeservënana.

<sup>4</sup> Atše chama sentsauatja, er ndánaca jashjanguana y Jesusbiana tojtسابuayiyná, mo cha inÿe entšá cuaftsemncá, ndoñe ntšamo bënga Jesusbiana fsëndabuayiynacá, y tojtsama

tšëngaftanga chašmobená canýe espíritu jtsebomnana, pero ndoñe ntšamo chë Bëngbe Bëtsá tojama tšëngaftangbe ainaniñe cháumashënguama espiritcá, chë Uámana Espíritu, tšëngaftanga tšabá cha jtsëuántana. Y atše sentsauatja, tšëngaftangbe ainaniñe inýe buayenana chašmóyëngacñama ndánaca tojtsamama, ndoñe cachcá chë tšabe noticiënga ntšamo ya bëngbentsana šmonjouencá, y chora tšëngaftanga chábioye becá tšabá jtsëuántana.

<sup>5</sup> Pero atše sëntsejuabná tondayiñe más batšá uamaná tsmëna ca, chë Jesucristbe puerte uámana ichmónënga imomna ca juabnayëngbiama.

<sup>6</sup> Atše ndoñe sënjuatsjinýe ntšamo corente tšabá entšàngaftaca jóyebuambayama; pero atše puerte tšabá sëndétatsëmbo ntšamo stschámuama. Bënga puerte tšabá nýetsca soyënguiñe tšëngaftanga tcbonjanýanýé, ndegombre chca osertánana ftsbomnana.

<sup>7</sup> ¿O atše ndoñe tšabá sënjama, tšabe noticiënga cbonjanabuayiyná ora, tšëngaftangbentsana atšbiamana tondaye ntjotjañcá, nduamanacá jenóbemëse; chca, tšëngaftanga puerte uámanënga chašmotsemnana Bëngbe Bëtsá chaomama?

<sup>8</sup> Mo ínýenache ošbuachiyëngcá enefjuanënga crocénana cuafjabaquécá, crocénana sënjanóyëngacñe chë ošbuachiyëngbentsana, tšëngaftanga jujabuáchama jobenayama.

<sup>9</sup> Y tšëngaftangaftaca sënjamna ora y ndayánaca šojanájoboto ora, atše ndoñe checbátantjañe atšbe opresidama, chca, tšëngaftangbiama totcá ndoñe chaondëtsemnana; er chë Jesucristbeyeca catšátanga Macedoniocana tmonjánashjajnënga, šmonjanatšetá ntšamo šojanbuashbencá. Chca, atše sënjanma, atšbe causa tšëngaftangbiama totcá ndoñe chaondëtsemnana; y sempre chca chántsama.

<sup>10</sup> Serto, Cristbe ndegombre soyënga atšbe ainaniñe sëntsebomna; chíyeca, atše corente sëntsetatsëmbo ndocná Acaya luarentše yochjama atše chayajbaná puerte oyejuayá jtsóyebuambnayama, chë tšabe noticiënga stsabuayiyná ora; y chca chanjama atšbe opresidama chašmoyema ínýenga ntšamncá.

<sup>11</sup> ¿Y ndáyeca chca stsama? ¿Yojtsemna ndoñe cbondábabuanýeshana causa? Ndoñe. Bëngbe Bëtsá endétatsëmbo tša cbondábabuanýeshanama.

<sup>12</sup> Pero atše sempre chántsama ntšamo sëndamcá, chca, chë ínýenga, chë Jesucristbe puerte uámana ichmónënga imomna ca juabnayënga ndoñe chamondëtsebomna ndáyeca jatenábotamnyama, ntšamo bënga ftsamcá chënga imojtse-trabája ca.

13 Er chënga ndoñe quemátsmëna Jesucristbe ndegombre ichmónënga, mondmëna chë ínÿenga jáingñama imotrabájanga, y mondama entšanga chaotsinÿanama chënga mo Jesucristbe ndegombre ichmónënga cuaftsemncá.

14 Y chama ndoñe šmatjenjnaná, er cach Satanásnaca endbëtsama mo canÿe buashinÿinÿana angelcá jtsinÿnama;

15 chíyeca, ndoñe muatjenjnaná, chabe oservenëngnaca tmojtsamama mo tšabe entšangcá jtsinÿnama. Pero chënga mochanjopochóca, ntšamo tmojtsomerecencá, ndayá tmojamama.

*Ntšamo Pablo tojansufri, Cristbe ichmoná bëtsemna causa*

16 Cachiñe cbochtëtéyana: ndocná chaondëtsejuabná atše opá stsemna ca, cach atše stsenabotamná ora; pero chca šmojtsejuabnase, mo canÿe opabioycá šmochtsëuánta, chca, átšnaca jtsenábotamnayama jobenayama.

17 Chca jayanëse, ndoñe quenátsmëna ntšamo Bëngbe Utabná endbetsamcá, ndayá canÿe opá inetsamcá; atše tšabá jtsetatšëmbëse ndegombre stsebomna ndáyeca jobenayama jtsenábotamnayana.

18 Banga mondmëna, cachënga jtsenábotamnayana ndayá quem luarentše chënga tmojamama, as átšnaca chantsenábotamnaye.

19 Tšëngaftanga chë tša osertánënga, oyejuayënga opëngbioye jtsëuantánana.

20 Atše sëndëtatšëmbo tšëngaftanga chë opëngbioye šmnetšëuantánama, er tšëngaftanga šmondbëtšëuantana chë nÿets tempo tšëngaftanga mo chëngbe oservenëngcá tcmojtsamëndayënga, o chë tšëngaftanga bëtscá tcmojtsabacanga, o tcmojtsaíngñanga, o chë uámanënga tmojtsenobiamnanga tšëngaftanga mo nduamanëngcá jtsamëndayama, o chë tcmojtsajuebiantšëtayënga.

21 Atše chca sëntsichamo masque sëntšëuatja chca jayanama. Bënga fsënjamna corente obenana ndbomnënga, ntšamo tšëngaftanga bëngbiana šmojayancá, tšëngaftangaftaca chca jamama.

Inÿenga, chë tšëngaftangbeñe imotrabájanga, ndayama jtsenábotamnayama tmojtsebomnëse, puerte uámana ichmónënga imomna ca jtsichámëse, átšnaca añemo sëntsebomna chama jtsenábotamnayama; chca stjayana ora, mo canÿe opá tojtsoyebuambnacá sëntsoyebuambná.

22 Chënga jtsenábotamnayana hebreunga imomnama. Atšnaca hebreo sëndmëna. Chënga jtsenábotamnayana Israeloquënga imomnama. Atšnaca Israelocá sëndmëna. Chënga jtsenábotamnayana Abrahábentšana entšanga imomnama. Atšnaca Abrahábentšana entšá sëndmëna.



23 Chënga jtsichámuana Cristo imoservena ca. Atše chëngbiamá cabá más tšabe oservená sëndmëna. Chca stjayana ora, mo canye opá tojtsoyebuambnacá sëntsoyebuambná. Atše chëngbiamá más tijatrabajá, más šmojutame, más šmojatsetšená y ba soye atšbiamá resjo endmëna jóbanama.

24 Shachna soye judiënga šmonjantsetšená chë unga bnëtsana y esconëfta soye jasachënjëse, ntšamo chënga jacastígana monduamancá.

25 Unga soye niñëbéngaca šmonjanëtsjanganja, y ndëtsbéngaca canye šmonjanatëchënganja. Unga soye chë atše sënjänenjaquena barco tontsanenatjëmbe, y chca ora, canye šonjanotocá, chë mar béjayoca tsachocana bënoca canye ibeta jëftsebobínynana y canye te jëftsejétanana.

26 Atše becá sënjánana, y chca atšbiamá resjo enjamna bëts fshajayënguiñe y uacucuatsënga chašmuebiatbëbama; resjo cach atšbe entšángbentše, judiënga y ndoñe judiëngbentše; resjo bëts pueblënguentše, entšanga ndoyenentše y mar béjayoca. Atšbiámnaca resjo enjamna chë Jesucristbeyeca atšbiamá catšátanga imomna ca jtsichámuana, pero ndegombre chca ndoñe mondmënéngbeñe.

27 Atše bëts cá tijatrabajá empás uamëntšnáyá joquédantscuana; ba soye tijachnëngo ibeta ntsamanacá y ba soye tijachnëngo shëntseca y uajuendayá; ba soye ndayá jasama ntsebmncá; tijasufrí sësnama y tondaye entšayama.

28 Quem soyëngama y inye ndoñe chiyátayana soyëngama más, atše cada te natjëmbana ainánaca ndoñe queschatmëna, er ndoñe quetsátstatšëmbo ntšamo nÿetsca ošbuachiyëngcá enefjuanënga imojtsiyenana.

29 Ndánaca tšabe soye jamama tondaye añemo tontsebmna ora, atše chabiamá šochandbóngmia, mo átšnaca cach tondaye añémoca cuabndëtsemncá. Nderado ínÿenga tmojama ndánaca bacna soyiñe chaótsatsáma, atše ndegombre puerte ngmënaca chandbëtsesufrina.

30 Nderado nÿa tojátsiyta atše ndayama jatenábotamnayama, as chë atše tondaye obenana ndbomná tsmënana ínÿanÿnaye soyëngama chtsenábotamnaye.

31 Bëngbe Bëtsá y Bëngbe Utabná Jesucristbe Taitá, ndábioye nÿetscanga nÿetsca tescama jtsatschuanayama entsamna, cha endëtatšëmbo atše ndegombre stsichámuama chë sëntsoyebuambná soyënguiñe.

32 Atše Damasco bëts puebloca sënjamna ora, chë rey Aretasbe uabuáyana mandado tojanmandá chë puebloye amashjuaniñe soldadënga chamotsebojanÿama, atše chašmishachama chëjana stsebocana ora;

33 pero básefta enutënga, canye sbarëcuiñe

šmontsaněštjango chë pueblentša shëconana tapiěšiñe canýe atěfnějana, y chca atše sënjanobená chëngbe cucuatšentšana jótsbocana.

## 12

*Ndayá Pablo mo otjenayoquécá tojáninýe y ndayá Satanás tojanma, Pablo chaosufrima*

<sup>1</sup> Atše šontsemna más jtsenábotamnayana, masque chca tcojamentšana ndocna tšabe soye ntjóbcnana. Mora chanjóyebuambaye, chë mo otjenayoquécá sënjinýe Bëngbe Bëtsabe soyëngama y Bëngbe Utabná šojinýinýé soyëngama.

<sup>2</sup> Atše canýe entšá sënduábuatma, cha Cristoftaca cánýiñe mo canýacá endmëna y nda bnětsana canta uata entsemna, Bëngbe Bëtsá tbojanánatse, chë celoca más tsbanánoye, Bëngbe Bëtsá yomnoye. Atše ndoñe quetsátstatšëmbo Bëngbe Bëtsá cha tbojanánatse chabe cuérpoca o nýe chabe espiritiñe. ¡Nýe Bëngbe Bëtsá chama yotátšëmbo!

<sup>3-4</sup> Atše sëndětatsëmbo Bëngbe Bëtsá chë entšábioye celoye tbojanánatsama, nýetscanga oyejuayënga imomnoye (atše ndoñe quetsátstatšëmbo Bëngbe Bëtsá tbojanánatse chabe cuérpoca o nýe chabe espiritiñe; nýe Bëngbe Bëtsá chama yotátšëmbo), y chentše cha tojanuena palabrënga, ndocná bontsemna jayanama palabrënga, chë ndayama entšangbiana ndoñe yontselesenciana jatichámuana.

<sup>5</sup> Atše chë entšá sëndmëna. Canýe entšá ndáftaca chca tojopasabiana, tšabá nántsemna chama jtsenábotamnayana; pero cach atšbiana jtsenábotamnayana ndoñe tšabá ntsemnana, ndayá nýe chë atše mo obenana ndbomnacá tsmënama inýinýnaye soyëngama chantsenábotamnaye.

<sup>6</sup> Y nderado jtsenábotamnayama atše stseboše, chca ora atše ndoñe stsama mo canýe opá tojtsoyebuambnacá, er ntšamo ndegombre yomncá atše stschamo. Pero chca ndoñe quetsátama, chca, ndocná chaondětsejuabná ntšamo atšbiana tbojtsinýanama o ntšamo atšbiana cha tojouenama atše más tsmëna ca.

<sup>7</sup> Chýyeca, tša uamaná tsjamna ca atše ntjátsjuabnayama, atše chë Bëngbe Bëtsá tša bëts soyënga tbojaninýinýé entšá bétsemnayeca, Bëngbe Bëtsá tojanma atše chaitsebomna ndáyeca puerte chaisufrima, mo canýe bëts uchmašëfja atšbe cuerpiñe tojtsashacuancá, mo Satanasbe ichmona soycá, atše chaisufrima chaomama.

<sup>8</sup> Unga soye Bëngbe Utabná sënjaimpadá chca sufrínana chašotsebojuánama;

<sup>9</sup> pero Bëngbe Utabná šonjauyana: “Nýe atšbe bonshánana endmëna lempe ntšamo cmojtšajabotcá; nýetscanga atšbe obenana más tšabá jinýana, chë obenana ndbomna entšángbeñe atšbe obenana stjínýanýiye ora ca.” Chcasna, atše puerte oyejuayá chanjóyebuambaye chë atše mo obenana ndbomnacá tsmënama inýinýnaye soyëngama, Cristbe obenana átšbeñe sempre chaotsomñama.

<sup>10</sup> Chíyeca, Cristo jaserviama, oyejuayá chandbétsemna atše mo obenana ndbomnacá stsemna ora, inýenga šmojtsoyenguá ora, puerte padecena soyënga causa ndayá jamama ndoñe sëntsetatšëmbo ora, atše puerte chaisufrima inýenga tmojtšama ora y puerte tšetšena ainánaca stsemna ora; er chca soyënguiñe stsemna ora, mo canýa obenana ndbomnacá, chora Bëngbe Bëtsá jamana atše ainaniñe bëts añemo chaitsebomnama.

*Nderado ndayá Corintoca ošbuáchiyënga muanjamama Pablo yojánauatja*

<sup>11</sup> Atše chca chë soyëngama sëntsenabotamná ora sënjoyebuambá mo canýe opá tojtsoyebuambnacá, pero ndegombre tšëngaftanga šmonjama atše chca chaimama. Er tšëngaftanga šmondmëna ndëmuanýenga yojtšamna atšbiamma puerte tšabá jtsichámuana, atše chca jtsenábotamnayama ndoñe chašondëtsemnama. Ndegombre, atše tondayiñe más batšá uamaná quetsátsmëna, chë Jesucristbe puerte uámana ichmónënga imomna ca juabnayeñgbiamma, masque atše šontsebiona mo atše tondaye cuaftsamancá.

<sup>12</sup> Canýa Jesucristbe ndegombre ichmoná bétsemnama inýinýnaye soyënga, tšëngaftangbeñe tonjanopasá atše choca sënjamna ora. Chca, chë Bëngbe Bëtsabe obenana inýinýnaye soyënga y chë tšabe soyënga ntšamo chora tonjanopasacá, puerte tšabá jtsinýanýnayana atše canýe ndegombre ichmoná tsmënama; y atše chca sënjanma, padecena soyënguiñe puerte uantado jtsemnëse.

<sup>13</sup> ¿Ndayá tšëngaftanga ndoñe cachcá šmonjanóyëngacñe chë inýe luarenache ošbuachiyëngcá enefjuanëñgbiamma? Canýe soye aínë, er tšëngaftangbioye tondaye ntjotjañcá, atše ndoñe chiyatslesenciá tšëngaftanga atšbe opresidama chašmuájabuachama, ntšamo inýe ošbuáchiyënga aínë sënjalesenciácá. Smochtseperdóna chca bacna soye tšëngaftangbiamma tijamama.

<sup>14</sup> Atše ya sëntseprontana, móracna unga soyama jama tšëngaftanga jánýama, y mora atše cach ndoñe quebochataimpáda atšbe opresidama chašmuatájabuachama. Atše ndoñe quetsátšboše chë tšëngaftanga šmobomna soye jatsbomnana, ndayá puerte sëntseboše tšëngaftanga Cristo

sempre chašmotseservénama. Atše chca jamama sěntseboše, er atše tšěngaftangbiamama mo canye taitacá, Crístbeñe šmotsanošbuachéyeca, atše chabiamama tcbonjanabuayená ora; sěntsejuabná chě taitanga ínėtsamna crocénana jájuabana básenga jtsanýenama, y ndoñe básenga chě taitangbiamama.

15 Y atše corente oyejuayá lempe ntšamo tsbomncá chanjátšataye, y atše jopochócantscuanėnaca, tšěngaftangbe tšabiamama. Atše cada te más cbojtsababuánýeshanėse, ¿tšěngaftangama más batšá atše šmochtsebobonshana?

16 Ndoñe; tšěngaftangama tšabá šmondětatsěmbo, atše uajabotá sěnjamna ora, atše tondaye tcbonjanótjañama. Masque chca, básęftangama imojtsichamo ntšamo ínýenga ndayíñnaca jáingñama atše tstátšěmbo ca, chěngbentšana crocénana josháchiñama; y atše catijama, ínýenga jáingñase, nýe ntšamo atše tsbošcá chamotsamama ca.

17 ¿O nderado atše tchojaingñé, canya chě tšěngaftangbioye sěnjichamó chentšáftaca?

18 Tito sěnjanimpadá tšěngaftangama jányama chaotsama, y cháftaca sěnjnichmó chě ínýa bėngcá Crístbeyeca bėngbe catšata. ¿Nderado Tito tcmojaingñé? ¿Ndoñe ndegombre yondmėna, Tito y atše cachcá fstsjuabná y fstsboše y cachca soyęnga jtsamėse ftsiyena? Ndegombre chca endmėna.

19 Nderado tšěngaftangama šmojatsjuabná bėnga jenėuyanama chca cbojtsėtsėtsná ca; pero ndoñe chca quenátsmėna. Inýetšá, bėnga Crísoftaca cánýiñe mo canýacá entšangcá, Bėngbe Bėtsabe delante fsěntsoyebuambná, y lempe ntšamo tijayancá, Jesucrístbeyeca atšbe bonshana catšátanga, tšěngaftangbe tšabiamama tijayana, Crístbeñe corente chašmotsošbuáchema y ainaniñe bėts añemo chašmotsebomnama.

20 Er atše sěntsauatja, atše jányama chaijá ora, ndoñe chacbondánýena ntšamo tsbošcá, y tšěngaftangama atše ndoñe chašmondínýena ntšamo šmojtsebošcá. Sěntsauatja nderado bacna soyęnga šmattsama: jtsenpenzentserana, ínýengaftaca yapa jtsenántšabošana, ndayánaca rábiaca jtsamana, nýe tšěngaftangbiamama tšabe soyęnga jtsebomnama jtsebošana, ínýengbiamama podesca ichámuana, uayátšenayęnga jtsemnana, ínýengbiamama cachęnga más uámanęnga jtsenobiamnayana, y nýetscanga ndoñe cachcá ntsejuabnayana. Chca chacbojánýenėse, tšěngaftangama ndoñe quešmochátšbošena jóyęngacñana ntšamo tšěngaftangama jucácanama atše sochtsemncá.

21 Atše sěntsauatja, cachiñe jányama chaijá ora, atšbe Bėtsá chaoma atše chaitsėuatja chca šmojtsamama, y chašotsemna puerta ngmėnaca jošachnama ba tšěngaftangbiamama, ndėmuanýenga ya bayté bacna soyęnga imojtsama y chca

juabnayana ndoñe tmonjatrocá, y ndoñe tmonjajbaná chë bacna soyënga boyabása o shembásaftaca jtsamama juabnayana, y chca soyënga jtsamana y nyetsca bacna soyënga jtsamana, jenomándama ntsobencá.

## 13

### *Inye soyëngama jábuayenama y jádiošoftama*

<sup>1</sup> Móraca ya unga soyama tsëngaftanga jányama chanjá. Atše chajáshjango ora, tojtseytëse chanjayana ntšamo báseftanga tmojamcá tšabá o ndoñe tšabá bëtsemnana. Nda bacna soye ntšamo Moisesbe leyíñe endëmandancá tojama ora, atše chanjayana cha ndoñe tšabá tonjama ca; pero útata o únganga tmojtsemnëse, chënga chamuayanama cha ndegombre chca tojamama.

<sup>2</sup> Atše tempo sënjanabuayená, chë tsëngaftanguentsënga bacna soye tmojánamënga y chë ínÿenga, atše šojtsanmëna jácastigana, chca soyënga amana ndoñe tmonjájbananga. Mora, tsëngaftangbentsana bënoca sëntsemna ora, cachiñe cachcá cbëtëtabuayená, ntšamo sënjanamcá chë tsëngaftangaftaca uta soyama sënjamna ora: atše cachiñe jányama chajase, ndoñe quichatsleséncia bacna soyënga chašmotsamama y chama ntjacastigacá jatabáshejuanana.

<sup>3</sup> Atše chca chanjama, er tsëngaftanga šmontsenguá ndayánaca tšabá chacminÿanÿema Cristo atšbiajana yoyebuambnama. Cristo ndoñe quenátsmëna mo canÿa obenana ndbomnacá, ntšamo tsëngaftangaftaca cha tojamama; ndayá chabe bëts obenana tsëngaftangbeñe bëtscá jtsinÿanÿayana.

<sup>4</sup> Er cha tmojancrucificá mo canÿa obenana ndbomnacá; pero mora, Bëngbe Bëtsá puerte obená betsómñeyeca, cha tojtayena. Cachcá bëngnaca, cháftaca cánÿiñe mo canÿacá jtsemnëse, mo obenana ndbomnëngcá jtsemnana; pero cháftaca mochantsiyena, Bëngbe Bëtsá puerte obená betsómñeyeca, tsëngaftanga jtsaservénama.

<sup>5</sup> Tsëngaftanga cada ona šmochjshénojuaboye, tšabá jtsetatšëmbuama mocna entsanga bëtsemnana, jtsetatšëmbuama aíñe o ndoñe sempre Crístbeñe puerte tašmuetsošbuáchema. Šmochjshénojuaboye chca šmošbuáchema ntšamo šmojtsemnana y tšabá ínÿenga šmochjínÿanÿiye. ¿Ndoñe šmondëtatšëmbo Jesucristo tsëngaftangbe ainaniñe yoyenama? Ndóñesna, tsëngaftanga ndegombre ndoñe Crístbeñe ošbuáchiyënga šmontsemna.

<sup>6</sup> Pero atše sëntsobátmana tsëngaftanga ndegombre chašmotsejuabnama bënga Jesucristbe ndegombre ichmónënga ftsmënama.

7 Y Bëngbe Bëtsá fsëntseimpadana bacna soye ndoñe chašmondëtsamama, ndoñe chë Jesucristbe ndegombre ichmónënga ftsmënama tšëngaftanga jinÿanÿiyama, ndayá ntšamo tšabá yomncá chašmotsamama. Nÿetscanga chca tmojtsamëse, nántsinyäna mo Cristbe ndegombre ichmónënga bënga ndoñe cuabndmëncá, er chca ndoñe tašuatátëjaboto jinÿanÿiyana ntšamo bënga bëngbe mándoca ftsmënama mo ichmonëngcá, tšëngaftanga jábuayenama. Pero chë soye tondayana šattsentsamna,

8 er bënga queftsátobena tondaye jamana Bëngbe Bëtsabe ndegombre soyëngama contra; nÿe ntšamo chabe ndegombre soyënga yomncá aiñe.

9 Bënga fsëntseboše ntšamo tšabá yomncá tšëngaftanga chašmotsamama, er bënga oyejuayënga fchandbëtsemna, bënga mo chë obenana ndbomnëngcá fstsemna ora, bëngbe mando jácastigama ntjatinÿanÿaycá, y tšëngaftanga ainaniñe bëts añémoca šmojtsemna ora y puerte tšabá šmojtsemnómánda ora. Bënga Bëngbe Bëtsá fchandbëtseimpadana, chca bacna soyënga amana jtsajbanase, chašmobená jtsemnana nÿetsca soyënguiñe tšábënga, y lempe ntšamo tšëngaftanga chašmotsemnana Bëngbe Bëtsá yobošcá.

10 Quem tsbuanácha cbontsëbuabiamná tšëngaftangaftaca cabá ndoñe sëntsemna ora; chca, atše choye chajá ora ndoñe chašondëtsemna jabuache jucácanana, mo canÿa puerte mandayacá, ntšamo Bëngbe Utabná šojanbemcá, tšëngaftanga jujabuáchama chábeñe corente chašmotsošbuáchema y ainaniñe bëts añemo chašmotsebomnana, y ndoñe tšëngaftanga jatapochócama.

11 Morna, Jesucristbeyeca atšbe catsátanga, tšabá chašmotsomñe, šmochtsajbaná chca bacna soyënga amana y šmochtsemna lempe ntšamo Bëngbe Bëtsá yobošcá. Šmochjouena ntšamo tcbonjabuayenacá, nÿetscanga cachcá šmochtsejuabnaye, nÿetscángaftaca natjëmbana šmochtsiyena, y Bëngbe Bëtsá, chë cmondababuanÿeshaná y tšëngaftangbe ainaniñe tšabe ebionana chašmotsebomnana endamá, tšëngaftangaftaca echántsemna.

12 Nÿetscanga šmochjenchuaye mo Jesucristbeyeca catšatangcá, jtenámochëse, ntšamo cach tšëngaftangbe pamállanga puerte bonshanánaca šmondbetsacheuanaycá.

13 Nÿetsca quem luaroca ošbuáchiyënga cmontsacheuaná.

14 Atše, Bëngbe Bëtsá sëntseimpadana, Bëngbe Utabná Jesucristo chaoma, nÿetsca tšëngaftangbeñe tšabe bendicionënga chaotsemnana. Bëngbe Bëtsabe bonshánana sempre chašmotsóbomñe, y Uámama Espiritu sempre

chašmotsóboŋňe, y chě Uámana Espíritoftaca cánŷiňe mo  
canŷacá chašmotsomňe.

## Gálatas

*Pablo Galacia luaroca ošbuáchiyënga jacheuayama*

<sup>1-2</sup> Atše Pablo, quem tsbuanácha sentsabiamná Jesucristbeñe ošbuáchiyëngbiana, chë Galacia luaroca ošbuachiyëngcá enefjuanëngbiana. Jesucristo y Bëngbe Bëtsá, chë Taitá, nda tojanma Jesucristo cháuatayenama, chata šmonjanchembo chatbe ichmoná jtsemnama. Ndocna entšá chešnátanabuayana atše Cristbe ichmoná jtsemnama; ni Jesucristo, ni Bëngbe Bëtsá ndocna entšá tbonjanichmó atše chatbe ichmonacá jabuábuayanama. Atše y chë ínÿenga Jesucristbeñe ošbuáchiyënga átšeftaca montsemnënga, tšëngaftanga cbontsacheuaná.

<sup>3</sup> Atše sëntseimpadana Bëngbe Bëtsá Bëngbe Taitá y Bëngbe Utabná Jesucristo, chaboma tšabe bendicionënga tšëngaftangbeñe chaotsemnama, y chaboma tšëngaftangbe ainaniñe tšabe ebionana chašmotsebonnama.

<sup>4</sup> Cristo chabe derecho vida jtsobomñama cachcá tojanonÿá y tojanóbana, bëngbe bacna soyënguentshana játsebacama, y bënga chamotsobena jtsiyenama ndoñe ntšamo quem tempo entšanga imoyencá, puerta bacna soyënga imojtsama ora. Cristo tojanóbana ora, tojanma ntšamo Bëngbe Bëtsá, Bëngbe Taitá endmëná yojanbošcá.

<sup>5</sup> Nÿetscanga nÿetsca tescama Bëngbe Bëtsá chamotsatschuaná. Chca chaotsemna.

*Nÿe canÿe ndegombre buayenana soyënga Cristbiana endmëna*

<sup>6</sup> Atšbe ainanoca inÿetšá šontsebiona, er nda nanjouena, tšëngaftanga nÿe baseftayshinÿe y ya juabna šmojatstrocá y Bëngbe Bëtsá stëtsoye šmojtsequedá, nda tšëngaftanga tcmojáchembo chabe entšanga chašmotsemnama. Cha chca tojanma Crísbeyeca, er mua puerta tšabia tšëngaftangaftaca enjamna. Tšëngaftanga Bëngbe Bëtsá stëtsoye šmojtsequedá, ínÿengbe buayenana soye jouenama, y chë ínÿenga jtsichámuana chë buayenana soyënga chë tšabe noticiënga canmëna ca.

<sup>7</sup> Ndegombre, ndoñe quenátsmëna inÿe ndegombre buayenánana. Ntšamo entsopasancá mëntšá entsemna: báseftanga montsama tšëngaftanga ndoñe natjëmbana ainánaca chašmotsiyenama, y becá montsama chë Cristbiana tšabe noticiënguentshe, ba ndegombre soyënga jtsejuánama, inÿe soyënga jacjayama.

<sup>8</sup> Nderado bënga o canÿe celoca ángel soyënga cmojtsabuayiná, y ndoñe tontsemna mo chë tšabe



noticiënga bënga tempo tcbonjanabuayenacá, as chë chca tojtsamabiama ¡Bëngbe Bëtsá chaoma infiernoca becá chaosufrima!

<sup>9</sup> Tempo ya chca sënjanayana; mora cachiñe šcutëtayana: Nderado nda soyënga cmojtsabuayiyná, y ndoñe tontsemna mo chë tšabe noticiënga, ntšamo tempo šmonjanoyëngacñëcá, ¡Bëngbe Bëtsá chabiama chaoma infiernoca puerte chaosufrima!

<sup>10</sup> Atše chca stjayana ora, ¿tšëngaftanga cmojtsinÿana atše soyënga stsama entšanga oyejuayënga átšeftaca chamotsemnama? Ndoñe chca quenátsmëna. Atše sëndboše ndayá Bëngbe Bëtsá átšeftaca oyejuayá chaotsemnama. Entšanga oyejuayënga chamotsemnama, atše cabá soyënga stsamëse, atše ya ndoñe Cristbe canÿe oservená stsemna.

*Ntšamo Bëngbe Bëtsá Páblëbioye tbojanchembo, Jesucristbe ichmonájtsemnama*

<sup>11</sup> Atše sëntseboše tšëngaftanga, Jesucristbeyeca atšbe catšátanga, chašmotsetátšëmbo chë tšabe noticiënga ntšamo sëndabuayiynacá quem luarentša entšangbe juabnentšana ndoñe yondóbocanama.

<sup>12</sup> Ndocna entšá chë tšabe noticiënga chešnatanbuayená, ni chešnatanbuatëmbá, ndayá cach Jesucristo šonjaninÿinÿé.

<sup>13</sup> Tšëngaftanga šmojátatšëmbona ntšamo atše tempo tsjanamana jtsiyenana, ntšamo judiënga Bëngbe Bëtsá mondadorancá atše cha sënjanadorana ora, ntšamo atše becá tsjánamama chë ošbuachiyëngcá enefjuanënga puerte chamosufrima, y ntšamo atše becá tsjánamama ndocná Jesucristbeñe chaondëtsošbuáchema.

<sup>14</sup> Atše inÿe judiënga cach atšcá uata bomnëngbiama más sënjanama Bëngbe Bëtsá adórayiñe, ntšamo judiënga cha jadórama monduamancá, y atše nÿets añémoca tša sënjantšena jtsamama ntšamo bëngbe bëts taitanga básenga jabuátambama monjanamancá.

<sup>15</sup> Pero Bëngbe Bëtsá atšbe tšabiama yojanjuabná, y chíyeca, atše cabá ndonÿna ora, canÿe bëts soyama cha šojanbocacá.

<sup>16</sup> Y cha tojánbošena ora, šonjaninÿinÿé ntšamo ndegombre chabe Uaquiñá yomnana, y šonjanchembo. Cha chca tojanma, atše chë tšabe noticiënga ndoñe judiëngbeñe chayábuayenama. Y atše ndocnábioye chiyataná ndayá jamama šojtsanmënama chašobuayenama;

<sup>17</sup> y Jerusalenoye cach ndoñe chiyataná chë atšbiama más natsana Jesucristbe ichmónënga imojamnëngaftaca jencuéntama. Chamna, cachora Arabia uabaina luaroye sentsanoñe, y chentšana Damasco bëts puebloye sëntaná.

18 Jesucristbeñe jtsošbuáchiyama sënjanóntša orscana, unga uatëse Jerusalenoye sënjána Pédroftaca jencuéntama, y cháftaca nÿe uta semana sënjëftsemna.

19 Y ndocna chë Jesucristbe inÿe ichmónënga chiyáisananÿe; nÿe Santiago aíñe, Bëngbe Utabnabe catšata.

20 Bëngbe Bëtsá šontsonÿá, ntšamo tšëngaftanga cbontsëtsëtsnacá ndegombre bétsemnama.

21 Jerusalenocana sënjëftsanbocnentšana, Siria y Cilicia luarëngoye sënjána.

22 Pero chë tempo, chë Jesucristbeñe ošbuáchiyënga Judea luariñe bomínÿeca ndoñe quešmënjatanábuatma.

23 Nÿe inÿengbïoye imojtsayaunana: “Nda tempo bënga puerte chamotsesufrínama enjanamá, mora entšanga entsabuayiyná, Jesucristbeñe jtsošbuáchiyama caojtsamna ca. Y tempo cha tša enjánboše jamama entšanga Jesucristbeñe ndoñe chamondëtsošbuáchema ca” —chënga imojtsichamo.

24 Y entšanga Bëngbe Bëtsá imojtsatschuanaye, ndayá cha atšbiajana tojanmama.

## 2

*Chë inÿe ichmónënga tmojánayana Pablo aíñe tšabá yojtsama ca*

1 Jerusalenoye sënjána orscana bnëtsana canta uatëse, cachiñe choye sënjesaná. Bernabé šonjantjëmbambá, y Tito bëndátaftaca fsënjëftsanbetše.

2 Choye sënjána, choye jama šojamnama Bëngbe Bëtsá šonjaninÿanyéyeca. Atše nÿe chë Jesucristbeñe ošbuáchiyëngbïama uámanënga imojamnëngaftaca sënjanencuentá, inÿengaftaca ndoñe; y chë tšabe noticiëngama chë ndoñe judiëngbeñe sëndabuayiynama chënga sënjanacuntá. Chca sënjanma atše jtsetatšëmbuama, ntšamo tijanma y sënjëftsamcá ndoñe nÿe bonamente yonjamnama.

3 Pero chënga tmonjánayana atše aíñe tšabá tijanma ca, y Tito, chë átšeftaca enjamná, masque Grecia luarocá enjamna, chënga ndoñe chematanmandá base bobachtema chë más delicadentše tëtšená chaotsemnama, ntšamo judiënga mond-uamancá, Bëngbe Bëtsábenga imomnama chaotsinÿnama.

4 Chca tonjanopasá, masque inÿenga monjánboše Tito base bobachtema chë más delicadentše tëtšená chaotsemnama. Chënga tmonjánayana bëngcá Jesucristbeñe ošbuáchiyënga imojamna ca, pero ndoñe chca quemënjatsmëna. Chënga chë Jesucristbeñe ošbuáchiyëngaftaca tmojanenutaná, ndayá yojtsanopasánama chë ošbuáchiyënga ntsetatšëmbcá, mo chë ošbuáchiyëngbïama bacna soyënga jamama cuafseitëmena cuenta. Chënga tmojánabo jtsetatšëmbuama ntšamo Jesucristo

bënga atsebácanënga šojánabiamama, chë judiëngbe leyëngaca ndëmandánënga, cháftaca cánÿiñe mo canÿacá jtsemnëse. Chënga chca tmojanma, er chënga imojtsanboše jamana, bënga chë judiëngbe leyëngaca nÿets tempo mandánënga chamotsiyenama.

<sup>5</sup> Pero bënga ndocna ora fchiyátanayana aíñe ca chë ntšamo chënga monjánichamo bënga šojánamna jamama soyëngama, er bënga becá fsënjánboše tšëngaftanga nÿets tempo Jesucristbe ndegombre tšabe noticiënga chašmotsóbomñama.

<sup>6</sup> Pero chë ndëmuanÿengbiamama entšanga monjánichamo chë uánatsanënga imojamna ca (ndayá chënga tempo imojamna atšbiamama ndoñe quenatámana; Bëngbe Bëtsabiamama nÿetscanga cachcá monduámana), chëngna tondaye chešmatanbuayená, ntšamo tempo tijanmama inÿetsá chaimama.

<sup>7</sup> Masna, chënga tmonjántatšëmbona, Bëngbe Bëtsá chë tšabe noticiënga ndoñe judiënga jábuayenama trabajo atše jamama šojanëntšabuáchema, ntšamo judiënga jábuayenama cachcá Pédrëbioye tbojanëntšabuachecá.

<sup>8</sup> Er Bëngbe Bëtsá atše chabe ichmoná šonjánbema, ndoñe judiënga chabiamama jábuayenama, ntšamo cachá Pédrëbioye chabe ichmoná tbojanbemcá, judiënga chabiamama jábuayenama.

<sup>9</sup> Santiago, Pedro y Juan, chë ošbuachiyënguentša uánatsanënga, atše canÿe bëts trabajo chaitsebomnana Bëngbe Bëtsá tojanmama tmonjántatšëmbona ora, cucuatše šontanatšataye atše y Bernabébioye, jinÿinÿiyama chënga šojanëbuajama mo cachëngbe trabajo amatcá. Y fsënjanenoyeuná bëndata jama, masna ndoñe judiënga jtsabuayiynayama trabajo jamama, y chëngna judiëngbeñe.

<sup>10</sup> Chënga nÿe šonjanaimpádaye chë ošbuáchiyënga ndbomñëjëmënga Jerusaleñoquëngbiamama jtsenójuabnayama; y atše bëtscá sentsama chënga jujabuáchama.

*Pablo Antioquioca Pédrëbiamama tojánayana cha ndoñe tšabá tojanma ca*

<sup>11</sup> Pero Pedro Antioquía bëts puebløye tonjánabo ora, chabe delante sënjánayana cha ndoñe tšabá tonjanma ca, er ntšamo enjanamcá ndoñe tšabá quenjatsmëna.

<sup>12</sup> Mëntšá tonjanopasá: Santiago básefta entšanga Antioquiøye tojanichmó, pero chënga cabá choca ndáshjajna ora, Pedro yojanamana chë ndoñe judiënga ošbuáchiyëngaftaca jtsesayana. Pero chë entšanga tmojánashjajnentšana, Pedro tojtsanajbaná chëngaftaca sayana y encuéntayana. Cha chca tojanma, ntšamo chë ndoñe judiënga ošbuáchiyënga, chë base bobachtema chë más delicadentše tëtšëngna jtsemnana

yojánamna ca tmojánayanënga, chabiamama muanjájuaboyama yo-jtsauatja causa.

<sup>13</sup> Chë inye judiënga ošbuachiyëgnaca tmojanontšë amana cachcá ntšamo Pedro yojtšamcá, jtsamëse ntšamo chënga imojántatšëmbo chca jamama ndoñe yonjanamncá. Y Bernabénaca, ntšamo chënga imojtsamcá jtonyayëse, chëngcá yo-jtsama, jtsamëse ntšamo cha yojántatšëmbo chca jamama ndoñe ibonjamncá.

<sup>14</sup> Chënga ndoñe quemënjátaniyena jtsamëse ntšamo yojanamncá, ntšamo chë Jesucristbe tšabe noticiënguentsa ndegombre soyënga endmëncá. Chca sënjáninye ora, Pédrëbioye nyetsca ošbuáchiyëngbe delante sënjanianana: “Aca canye judío, mo ndoñe judío bendmëncá cojtsiyena, y ndoñe ntšamo chë judiënga jamama monduamancá; chcasna, ¿ntšamo catjobenaye jamana chë ndoñe judiënga ošbuáchiyënga mo chë judiëngcá chamotsiyenama ca?”

*Bëngbe Bëtsá judiënga y ndoñe judiënga játsebacana, Jesucristbeñe tmojtsošbuáchema*

<sup>15</sup> Bënga judiënga fsëndmëna, bëngbe bëtsëtsanga judiënga monjámnayeca, y ntšamo judiënga chë ndoñe judiëngbioye mondubobuatmcá, chë “bacna soye amënga ca”, ndoñe queftsátsmëna.

<sup>16</sup> Y bënga mondëtatšëmbo, canye entšá Jesucristbeñe tojtsošbuáchema, Bëngbe Bëtsá jamana cha chabe bominyiñe tšabia chaotsemnama, y Bëngbe Bëtsá ndoñe chca ntjamana, ntšamo chë judiëngbe leyënguñe jamama yomna ca iuayancá chë entšá tojamama. Y bëngnaca Jesucristbeñe imojtsošbuaché, Bëngbe Bëtsá chaomama bënga chabe bominyiñe tšábenga chamotsemnama, pero ndoñe ntšamo chë judiëngbe leyënguñe jamama yomna ca iuayancá bënga tmojamama. Er Bëngbe Bëtsá ndocna ora ntjamana canye entšá chabe bominyiñe tšabia chaotsemnama, ntšamo chë judiëngbe leyënguñe iuayancá jamama ibomna ca cha tojamama.

<sup>17</sup> Pero, bënga bëtscá mondënguá, Bëngbe Bëtsá chaomama bënga chabe bominyiñe tšábenga chamotsemnama, bënga Crísoftaca cányiñe mo canyácá jtsemnëse, chábeñe imošbuáchema. Chca mondošbuaché, bënga chë bacna soyëngama perdonánënga chamotsemnama. Pero inye entšanga jtsichámuana bënga bacna soyënga amënga imomna ca, ntšamo chë Moisesbe leyiñe iuayancá ndoñe montsama causa. ¿Y chca, Cristo bacna soye amënga šuabiamná ca nántsayana? ¡Ndoñe, ndegombre ndoñe!

<sup>18</sup> Atše, ntšamo Bëngbe Bëtsá šojaninyiñecá, chë šojtsemna jájbanama soyënga, cachiñe jajuaboyama y

jamama stëtontšese, mo chë Moisesbe ley jtsocumplínana perdonánënga jtsemnama, atše stsemna mo nda ndayá cachá tojtsendbema y cachiñe tojtëtsjebuanacá; y ndegombre, atše stsemna canya ntšamo ndoñe tšabá yondmëncá amá.

<sup>19</sup> Chë judiëngbe leyëngaca atše sëndëtatšëmbo, ntšamo chë leyënguiñe iuayancá stsamëse, Bëngbe Bëtsá ndoñe yochanjama atše chabe bominiñe tšabia chaitsemnama; y chca, atše jtsemnana mo obanacá chë castígoca, er chë leyentša mandënga stsamëse, ndoñe quetsátobena atsbocaná jtsemnama. Chë léyeca ndoñe más mandaná ntsemnama jtsebošëse, atše cachcá chë ley sënjanonýá, Jesucristbeñe jtsošbuáchiyama; y chca, atše chaitsobena jtsiyenana Bëngbe Bëtsá jtseservënëse. Atše Crístoftaca cányiñe mo canyáca sëndmënayeca, Cristo cruciñe tojanóbana ora enjamna mo átšnaca cuafjobancá;

<sup>20</sup> y mora entsemna mo nýe atše ya ndoñe cuaftsiyencá, Cristo becá vida atšbe ainaniñe entsebómnyeca. Y ntšamo mora atše vida sëntsebomncá, entsemna atše chë Bëngbe Bëtsabe Uaquiñábeñe betsošbuáchiyama, nda šojánbobonshana, y chabe derecho vida jtsobomñama cachcá tojanonýá y atšbe tšabiama tojanóbana.

<sup>21</sup> Atše ndoñe quetsatábotena ntšamo Bëngbe Bëtsá entsangbe tšabiama juabna yobomncá. Nderado Bëngbe Bëtsá tojama canye entsá chabe bominiñe tšabia chaotsemnama, ntšamo chë leyiñe jamama yomna ca iuayancá cha tojtsamama, as Cristo nýe tondayama matënjanóbana.

### 3

#### *Ley jtsobedecënëse o Jesucristbeñe jtsošbuáchiyëse*

<sup>1</sup> ¡Tšëngaftanga Galacientša entsanga, yapa ndenójuabnayënga! Entsemna mo nda tcmojtsabocjuanacá, tšëngaftangbe juabna tojtsetrocá. Ndoñe quešnátësertana ntšamo chca nanjopása, er cach atše botamana cbonjanabuayiyná, Jesucristo cruciñe tojanóbana.

<sup>2</sup> Atše sëntseboše nýe canye soye atše chašmëyana: ¿Uámana Espíritu tšëngaftangbe ainaniñe tojánamashëngo jtsemándayama, tšëngaftanga ntšamo chë leyiñe jamama yomna ca iuayancá šmojamama, o tšëngaftanga chë tšabe noticiënga šmojanuena y chiñe šmojtsošbuáchemá?

<sup>3</sup> ¿Ndáyeca tša ndenójuabnayënga šmomna? Bëngbe Bëtsabe Espíritbeyeca tšëngaftanga šmonjanontsé mo tsmëma entsangcá jtsemnana. ¿Y mora šmojtseboše tšëngaftangbe vidënga jachnënguama nýe entsangbe juabnëngaca jtsiyenëse?

<sup>4</sup> ¿Njetsca soyënga ndayëjana tšëngaftanga šmojachnëjna, ton-dayama tonjoservé? Ndegombre chca ndoñe taiuatsmëna.

<sup>5</sup> Bëngbe Bëtsá, chë Uámána Espíritu tšëngaftangbe ainaniñe cháumashënguama tojanma ora, y tšëngaftangbeñe bëts soyënga chaopasama tojama ora, ¿ndáyeca chca nanjama? ¿Tšëngaftanga ntšamo chë leyiñe jamama yomna ca iuayancá šmojtsamama, o tšëngaftanga Jesucristbe tšabe noticiënga šmojanuena y chiñe šmojtsošbuáchema?

<sup>6</sup> Menójuabonga ntšamo Abraham tojanpasama. Bëngbe Bëtsabe uabemana palabrënguiñe mëntšá endayana: “Cha Bëngbe Bëtsábeñe yojtsošbuáchiye, y chíyeca Bëngbe Bëtsá tonjánayana cha chabe bominiñe tšabia yojamna ca.”

<sup>7</sup> Chíyeca tšëngaftanga cmontsamna jtsetatšëmbuana, Bëngbe Bëtsábeñe ošbuáchiyënga mondmëna mo Abrahábentšana entšangcá, cachcá ošbuáchiyana bëtsebomnama, chë chábertšana ndegombre entšangbiana más.

<sup>8</sup> Bëngbe Bëtsabe uabemana palabrënguiñe endopodena jualíama, Bëngbe Bëtsá yochjanma chë ndoñe judiënga chabe bominiñe tšábenga chamotsemnama, chábeñe tmojtsošbuáchema ca. Y Bëngbe Bëtsabe uabemana palabrënguiñe, cabá chca ndëma ora, Bëngbe Bëtsá Abrahámbioye quem tšabe noticiënga tbojanbuayená: “Acbeyeca, atše chanjama njetsca quem luarentša entšanga tšabe bendicionënga chamotsebomnama ca.”

<sup>9</sup> Bëngbe Bëtsá tojanma Abraham ba tšabe bendicionënga chaotsebomnama, cha chábeñe yojtsošbuáchema. Chca, Bëngbe Bëtsá, chábeñe ošbuachiyëngbiámnaca ba tšabe soyënga jamana, cachcá ntšamo Abrahambiana tšabe soyënga tojanmcá.

<sup>10</sup> Chë Bëngbe Bëtsá chabe bominiñe tšábenga yochjábiana ca juabnayënga, ntšamo leyiñe jamama yomna ca iuayancá lempe tmojtsobedecénama, chënga njets tempo jtsiyenana jtsetatšëmbëse Bëngbe Bëtsá njetsca tescama chënga yochjácastigayama. Er Bëngbe Bëtsabe uabemana palabrënguiñe mëntšá endayana: “Bëngbe Bëtsá jayanana njetsca tescama castigo chaotsebomna ca, nda njets tempo ndoñe tontsama njetsca mandënga ntšamo chë leyënguiñe iuabemancá ca.”

<sup>11</sup> Ndegombre, puerte tšabá entsinjinëna, Bëngbe Bëtsá ndoñe yochanjama ndocná chabe bominiñe tšabia chaotsemnama, ntšamo chë leyiñe jamama ibomna ca iuayancá tojtsobedecënëse. Chca ndegombre endmëna, er Bëngbe Bëtsabe uabemana palabrënguiñe mëntšá endayana: “Nye ndabiana Bëngbe Bëtsá tojama chabe bominiñe tšabia chaotsemnama, cha Bëngbe Bëtsábeñe betsošbuáchema, cha ndegombre chë

nÿetsca tescama yomna tšabe vida echántsebmna ca.”

<sup>12</sup> Jtsamana ntšamo chë leyënguifne jamama yomna ca iuayancá, ndoñe quenátsmëna mo Bëngbe Bëtsabeñe cuaftsošbuachecá. Ntšamo Bëngbe Bëtsabe uabemana palabrenguifne endayancá: “Nda tojtsama nÿetsca mandënga ntšamo chë leyënguifne endayancá, tšabe vida echántsebmna, nÿets tempo chë leyëngaca mandaná ca.”

<sup>13</sup> Pero, Cristo jóbanama ibojamna ca tmojánayanama, y cha bëngbe causa chca chamomama chënga tojanalesénciayeyeca, Cristo tojama bënga nÿetsca tescama castigánënga ndoñe chamondëtsemnama, ntšamo chë leyifne iuayancá ndoñe tmontsama causa. Ntšamo Bëngbe Bëtsabe uabemana palabrenguifne endayancá: “Nÿetsca tescama castigo chaotsebmna, nda canÿe niñëšifne tmojajonÿá chaóbanama cha ca.”

<sup>14</sup> Chca tojopasá, Bëngbe Bëtsá chaomama, chë tšabe bendicionënga ntšamo cha Abrahámioye tbojanšbuachenacá, ndoñe judiëngnaca chamotsebmnama, Cristo Jesúsbeyeca; y Jesucristbeñe ošbuachiyánaca, Bëngbe Bëtsá chaomama chë Uámana Espíritu bëngbe ainaniñe cháúamashëngo jtsemándayama, ntšamo Bëngbe Bëtsá tojanašebuachenacá.

*Ndocna ley quenátobena Bëngbe Bëtsabe šbuachenana soye jatrócama*

<sup>15</sup> Jesucristbeyeca catšátanga, chë ndayá sëntsichamcá endmëna ntšamo nÿets tempo entšángbeñe endbetsopasancá. Uta entšata tbojenoyeuná canÿe trato jënbemama, y ntšamo tbojenšbuachenacá chaotsinÿnama chatbe uabaina tsbuanáchañe tbojuábemëse, ndocná inÿa más ntsoobenana jayanana ntšamo tbojentratacá ndoñe yontsoservenana ca; y inÿe soyënga chiñe jacjayama cach ndoñe.

<sup>16</sup> Chcasna, Bëngbe Bëtsá ba soye Abrahámioye tbojanšbuachená puerte tšabe bendicionënga chabiamama, y chabe entšanguentšana canÿabiámnaca. Y Bëngbe Bëtsabe uabemana palabrenguifne ndoñe quenátayana: “chabe entšanguentšëngbiámnaca ca”, mo Bëngbe Bëtsá ba entšangbiamama cuaftsichamcá; sinó mëntšá endayana: “acbe entšanguentšana cánÿabiamama ca”. Y chca entsayana, nÿe canÿe entšá ca; y cha endmëna Cristo.

<sup>17</sup> Atše ndayá mëntšá cbontsëtsëtsná: Natsana, Bëngbe Bëtsá Abrahánoftaca canÿe trato tojánbema, y tbojanianama “aifne ca”, ntšamo tbojanšbuachenacá jamama. Chentšana canta patse y unga bnëtsana uatëse, Bëngbe Bëtsá Moisesbe cucuatsifne chë leyënga tbojanántšaboshjona; chíyeca, chë leyënga ndoñe ntsoobenana jamana chë Bëngbe Bëtsá Abrahánoftaca tojánbema trato ndoñe chaondëtsošservënama, ni jamana ndayá Bëngbe Bëtsá tojanšbuachenacá ndoñe chaondëtsošservënama.

18 Er ndayá Bëngbe Bëtsá chabe entšanga tojatsatacá, tojtsemna chënga ntšamo chë leyiñe jamama yomna ca iuayancá tmojtsamama, chca, chë tšetana soyënga ya ndoñe nantsóbocana ndayá Bëngbe Bëtsá jamama tojanašebuáchenantšana. Pero ba tšabe bendicionënga Abrahambiana jamama, Bëngbe Bëtsá tbojanšbuachenáyeca, Bëngbe Bëtsá chë soyënga Abrahambiana tojanma.

19 Asna, ¿ndayama chë Moisesbe ley nantsoservena? Bëngbe Bëtsá chë leyënga tojanáboshjona, ba tšabe soyënga jamama Abrahambioye tbojanšbuáchenantšana baytese. Bëngbe Bëtsá yojanjuabná chë ley chaoservé entšanga jinñanñiyama ndayá tšabá o ndoñe tšabá jamama bétsemnama, chë Abrahambentšana Uámana Entšá jashjanguëntscuana, ndabiana Bëngbe Bëtsá Abrahambioye tbojanšbuachená ba tšabe bendicionënga jamama. Bëngbe Bëtsá angelëngaftaca chë ley Moisesbe cucuatšine tbojanántšaboshjona, y chë entšá Moisés enjamna chë oyebuambnayá Bëngbe Bëtsáftaca y entšángaftaca.

20 Uta entšata canye trato jénbemamna, jtseytana inye entšá chë uta entšátaftaca chaóyeuambama; pero Bëngbe Bëtsá Abrahambioye ba tšabe soyënga jamama tbojanšbuachená ora, nye canya chca tojanma, y ndoñe bonjanájaboto inya chabiana Abrahánoftaca chaóyeuambama.

### *Ndayama chë ley yomna*

21 ¿Chca nántsayana, ntšamo Moisesbe leyiñe iuayancá, chë Bëngbe Bëtsá tojanšbuachená soyëngama contra yomna ca? ¡Ndoñe, ndegombre ndoñe! Bëngbe Bëtsá entšangbe cucuatšine canye ley tojanáboshjona, y chë ley tojtsobena jamana entšanga ndegombre tšabe vida chamotsebomnama, as Bëngbe Bëtsá nanjama entšanga chabe bominñiñe tšábenga chamotsemnama, ntšamo chë leyiñe jamama yomna ca iuayancá tmojtsamama.

22 Pero Bëngbe Bëtsabe uabemana palabrenguiñe endayana, nyetsca quem luarentša entšanga cachëngbe bacna soyënga jamama juabnëngaca mandánënga imomna ca, chca, Jesucristbeñe ošbuáchiyënga chamobenama ndayá Bëngbe Bëtsá tojašbuachenacá jóyëngacñama. Y chënga, Jesucristbeñe imojtsošbuáchema imojtsebomna ndayá Bëngbe Bëtsá tojanašebuachenacá.

23 Jesucristbeñe jtsošbuáchiyama entšanga chamobenama tempo joshjanguëntscuana, bënga monjamna corente mandánënga chë léyeca, y chca enjamna mo presënga cuaftsemncá, cárceloca utámenënga. Chë ley chca enjamna, ntšamo entšanga Jesucristbeñe muanjobenaye



jtsošbuáchiyama Běngbe Bětsá jinjanjyama tempo joshjanguěntscuana.

<sup>24</sup> Cristo jabama tempo tonjanoshjanguěntscuana, chě ley bėngbiama enjamna mo canye pamillentša oservenacá, cha jtamana chentša básenga chamotsamama ntšamo tšabá tojtsemncá. Chě ley chca yojamna, bėnga Crístbeñe jtsošbuáchiyama chamobenama, y chca, Běngbe Bětsá chaoma bėnga chabe bominyiñe tšábenga chamotsemnana.

<sup>25</sup> Pero Jesucristbeñe jtsošbuáchiyama bėnga chamotsobena mora ya tonjóshjangoyeca, chě ley ya ndoñe más quenátsmėna mo canye entšacá, ndayá tšabá yomncá bėnga chamotsamama cuaftsamcá.

<sup>26</sup> Cristo Jesúsbeñe šmojtsošbuáchema, nyetsca tšėngaftanga šmojobená Běngbe Bětsabe básenga jtsemnana, Cristo Jesúseftaca cányiñe mo canyáca jtsemněse.

<sup>27</sup> Tšėngaftanga tcmónjanėbaye, y chca, Crístoftaca cányiñe mo canyáca šmontsemna. Y mora šmojobená mo cach Crístcá jtsemnana.

<sup>28</sup> Chíyeca, ndayá Běngbe Bětsá tojamama, judiėnga y ndoñe judiėnga cachcanga mondmėna; nyets tempo nye inyabiama oservėngə y chě nye cachėngbiama trabájayėnga cachcanga, y boyabásenga y shembásengnaca. Nyetsca tšėngaftanga mo canyáca šmondmėna, Cristo Jesúseftaca cányiñe mo canyáca jtsemněse.

<sup>29</sup> Tšėngaftanga Crístbe entšanga šmondmėnayeca, šmontsemna mo Abraháměntšana entšanga cuaftsemncá; y chca, ntšamo Běngbe Bětsá Abraháměbioye tbojašbuachenacá, tšėngaftanga šmochanjóyėngacñe.

## 4

<sup>1</sup> Atšnaca sěntseboše jayanama, chě uaquiñá nda yochjóyėngacñe ntšamo tbojtsotocancá, ntšamo chabe taitá jatšetayama tbojašbuachenacá, cha cabá mo canye basacá tojtsemněntscuana, ndocna derecho chě soyėnguiñe ntsebomnana; y chca, cha jtsemnana mo canya nyets tempo nye inyabiama oservėnacá, masque lempe ntšamo chabe taitá tbojašbuachenacá chě uaquiñabiama tojtsemna.

<sup>2</sup> Chě uaquiñá tojtsobóchantscuana, entšanga jtsemnana ndėmuanyėnga ntšamo cha tbojtsajabotcá jtsoinayana, y inyėnga jtsejuabnayana ndayá chě taitabe soyėngaca jamama, chě uaquiñá otocana soyėngaca. Y chca jtsemnana, chě taitá tojayana tempěntscuana.

<sup>3</sup> Mo cachcá cuaftsemncá, bėnga chě ndegombre soyėngama cabá ndosértaye ora, bėngnaca mandánėnga monjamna mo nyets tempo nye inyabiama oservėngcá, quem luarentše imománda espiritėngaca.

4 Pero Bëngbe Bëtsá chabe Uaquiñá quem luaroye tbojanichmó, nÿa chama tempo tojanóshjango ora; cha mo nÿetsca entsangcá, canÿe shembásabentšana tojanonÿná, y yojoyena jtsamëse ntšamo judiëngbe leyiñe jamama ibojamna ca yojanayancá jtsamëse.

5 Quem luaroye chca tojánabo bënga jabátsebacama, y chamotsobenama Bëngbe Bëtsabe basengcá jtsemnana, bënga chë tempo šonjánamna chë ley jtsobedecénana.

6 Y chca, tšëngaftanga ya chabe básenga šmojtsemnana jinÿanÿiyama, Bëngbe Bëtsá chabe Uaquiñabe Espíritu tbojanichmó, nÿetscangbe ainaniñe cháumashënguama, y chë Espíritu endama bënga Bëngbe Bëtsá chamochembo, “Atšbe Taita ca”.

7 Mëntšá, cada ona tšëngaftanguentsá ya ndoñe quenátsmëna mo chë nÿets tempo nÿe ínÿabiama oservenëngcá, quem luarentše imománda espiritëngaca mandánënga, y aiñe Bëngbe Bëtsabe basa tojoquedá. Y chabe basa tojoquedáyeca, lempe ntšamo Bëngbe Bëtsá chabe básenga jatšatayama tojašebuachenacá cha echanjójyëngacñe.

*Pablo, Galacia luaroquëngbiama ngménaca yojtsanjuabnaye*

8 Tempo, Bëngbe Bëtsá ndoñe šmonjanábuatma ora, tšëngaftanga šmojamna mo nÿets tempo nÿe ínÿabiama oservenëngcá, ndoñe ndegombre diosënga mondmëna espiritëngaca mandánënga.

9 Pero mora, Bëngbe Bëtsábioye šmontsábuatma ora, o tšabá jayanama, Bëngbe Bëtsá cmojtsëbuatma ora, ¿ntšámoyeca tšëngaftanga cachiñe chë quem luarentše imománda espiritënga šmojtsayaunana? Chënga ndocna obenana quemátsbomna, y nduámanënga mondmëna. ¿Ndáyeca tšëngaftanga šmojtseboše cachiñe jtsemnana mo chë nÿets tempo nÿe ínÿabiama oservenëngcá, chë espiritëngaca mandánënga?

10 Tšëngaftanga tša jtsejuabnayana diënguiñe, shinÿënguiñe, canÿe uatentša tempënguiñe y uatënguiñe, mo uámana tempëngcá Bëngbe Bëtsá tšabá jadórama, y chama bëts fiestënga jtsebomnana.

11 Atše corente šontsengmena, nderado atšbe trabajo tšëngaftangbeñe tondayama tonjoservé.

12 Jesucrístbeyeca atšbe catšátanga, bëtscá cbontsaimpadana, šmochtsiyena jtsamëse ntšamo atše sëndamcá, er átšnaca sënjóbema ntšamo tšëngaftanga ndoñe judiënga šmondmëncá. Tšëngaftanga ndocna bacna soye atše chešatsborlá.

13 Tšëngaftanga šmondétatšëmbo, atše sënjanobená chë nat-sana soyama tšëngaftanga chë tšabe noticiënga jábuayenama, canye šocana šonjanontšáshjango causa.

14 Atše canye šocana sënjánbomna causa, tšëngaftangbiana ndoñe paselo quenjatsmëna tšëngaftangbeñe atše jofjana; pero masque chca, tšëngaftanga ndoñe chešmatanaboté, ni quešmatanáboyënja; masna, tšëngaftangbeñe tšabá šmonjanofja; šmonjanofja mo canye ángel Bëngbe Bëtsabe ichmoná šmojofjá, o cach Jesucristbioycá.

15 Ndayá chora tšëngaftangaftaca enjanopasancá, puerte oye-juayënga tcmónjánabiana. ¿Y mora ndayá tojopasá? Ndegombre, atše sëndétatšëmbo y sentsobena jayanama, tšëngaftanga ndaye sóynaca atšbiana mašmënjanmama. Chë más uámana šmojánbomna soyënga atšbe cucuatšinë mašmënjánboshjona, y nya mo chë bominyëngnaca masmënjánenobuchjatsëca atše jatšetayama.

16 Y morna, ¿ntšamo ndegombre yomncá cbojtsëtsësnama, atšbiana šmojtsejuabná mo tšëngaftangbe uayayá cuaftsemncá ca?

17 Chë ndoñe ndegombre soyënga buátëmbayënga montsinýinýná mo tšëngaftangbiana ndegombre tšabá chašmotsiyenama cuaftsebošcá, pero chca ndoñe quenátsmëna; ndayá jamama imojtsebošcá, tšëngaftangbiana ndoñe tšabá quenátsmëna. Chënga montseboše atšbe contra y atšbe buátëmbana soyëngama contra chašmotsemnana, chentšana tšëngaftanga chëngaftaca jtsemnana chašmotsebošama y chënga chašmotsababuánýeshanama.

18 Puerte tšabá endmëna atše y ínýenga chafstseboše tšëngaftangaftaca amiguënga jtsemnana, canye tšabe soye jamama tojtsemnëse; y sempre chca chauétsemna, tšabiana tojtsemnëse, y ndoñe nýe atše chentše tšëngaftangaftaca stsemna ora.

19 Tšëngaftanga, chë atšbiana mo atšbe basengcá šmondmënënga, Jesucristbeñe chašmošbuáchema tcbon-janëjabuáheyeca; atše cachiñe sentsesufrina tšëngaftangbe causa, ntšamo canye šešona jtsebomnana ora canye shembása jtseusufrinancá; y atše chca chanjëftsesentina, ntšamo Cristo endmëncá tšëngaftangbe vidiñe ndegombre chaojtsebínýnëntscuana.

20 Malaye atše, mora tšëngaftangaftaca stsemna, atše jobenayama jinýanýiyama, cach tšëngaftanga jáuyanëse, ntšamo ndegombre atše tšëngaftangbiana tsësentínana. Atše tša šontsecochëngmena tšëngaftangbiana.

21 Canýe soye šmochjauyana, tšëngaftanga chë Moisesbe léyeca mandánënga jtsemnana šmojtsebošënga. ¿Ntšamo chë leyinë endayancá tacmojtsësertana?

22 Chiñe endayana, Abraham uta uaquiñata yojánabamna ca; cánýana Agárbeñe, canýa chabe shembiana nýets tempo oservená; y chë ínýana, cachabe shémbeñe, Sara, y mua ndocnabiana nýets tempo oservená yonjamna.

23 Chë chabe shembiana nýets tempo oservenabe šešona, tojanonýná nýe Abraham y Agar chca chaotsemnana tbojánbošenayeca; y cachabe shembe šešona tojanonýná, Bëngbe Bëtsá chë soye jamama Abrahámbioye tbojanšbuachenáyeca.

24 Ntšamo Agar y Sara, y chatbe šešónataftaca tojanopasacá, bënga canýe uámana soye šontsabuatambá. Ndayá chë uta shembásataftaca tojanopasacá, uta trato entsinýinýná: chë shembása Agar, chë nýets tempo nýe ínýabiana oservená yojamná, entsinýinýná chë trato Bëngbe Bëtsá y Israeloca entšángaftaca, chë Moisésoftaca Bëngbe Bëtsá leyënga entšangbe cucuatšinë tojanáboshjona ora. Agar básenga yojtsabamna ora, chëngnaca tmojanonýná nýe ínýabiana nýets tempo oservénënga jtsemnana, y chë tratentša leyinë soyëngaca mandánënga jtsemnana tmojtsebošëngnaca jtsemnana mo nýe ínýabiana nýets tempo oservénëngcá.

25 Ndayá Agáraftaca tojanopasacá entsinýinýná chë Sinaí batsjoca tmojánbema trato, Arabia luaroca; y chë morsca bëts pueblo Jerusalénënaca entsinýinýná, er chentša entšanga montsemna chë leyëngaca mandánënga. Ntšamo Agar y chabe básenga nýe ínýabiana nýets tempo oservénënga monjamncá, Jerusalenentša entšángnaca cachcá chëngcá mondmëna, chë leyëngaca nýets tempo mandánënga bëtsemnayeca.

26 Ndayá Sáraftaca tojanopasacá, chë nýe cachabiana trabájaye shembása, entsinýinýná chë trato, chë tšabe bendicionënga Abrahambiana jamama chábioye tbojanšbuachená ora. Chánaca entsinýinýná chë Bëngbe Bëtsabe bëts pueblo celoca, Jerusalén ca uabaina pueblo, er chë chentše mochjoyénananga, mora ndoñe quemuátiyena chë leyëngaca mandánënga. Chë Crístbeñe ošbuáchiyënga mondmëna chë celoca bëts pueblo Jerusalenentše joyénanama, y chca, ndegombre chënga mondmëna celocama entšanga.

27 Chë celoca Jerusalén endmëna chë ndegombre bëts pueblo chë Jesucrístbeñe ošbuáchiyëngbiana, y chca endmëna mo canýe shembása šešonga ndabamná y aífne chaotsabamnana Bëngbe Bëtsá cuafjamcá. Quem luarentša Jerusalén endmëna chë uámana luare chë léyeca mandánënga

imomnëngbiama, y chca endmëna mo canÿe shembása aiñe boyaftaquëcá, er Bëngbe Bëtsabe uabemana palabrerënguiñe chë shembásatbiama mëntsá endayana:

Shembása šešonga ndabamná, y ndocna te tsetšanënga ndobomná šešona jtsebonnama, moyejuá y moyó oyejuayá cojtsemnama.

Chca moma, er aca, chë shembása chabe boyabiama utšená, chë shembása boyá bomnabiama más básenga cochántsabamna ca.

<sup>28</sup> Chcasna, Jesucristbeyeca atšbe catšátanga, ntšamo Isaac Abrahambe uaquiñá tojanobemcá, Bëngbe Bëtsá chca Abrahámioye tbojanšbuachenáyeca; cachcá, tšëngaftángraca šmojobená Bëngbe Bëtsabe básenga jtsemnama, Bëngbe Bëtsá chca tojanšbuachenáyeca.

<sup>29</sup> Ntšamo chë tempo tojanopasacá, chë Isaac chaosufrima Ismael tojanmcá (Ismael, Abrahambe uaquiñá Agárbeñe, chë nÿe chata chca tbojánbošenayeca onÿnaná; Isaac, chë Bëngbe Bëtsabe Espíritbeyeca onÿnaná), mórncaca cachcá entsopasana: chë ndoñe ndegombre soyënga buátëmbayënga judiënga montsama bënga chamosufrima, ntšamo Isaac chaosufrima Ismael yojanamcá.

<sup>30</sup> Pero, ¿ndayá Bëngbe Bëtsabe uabemana palabrerënguiñe Abrahambe básatbiama iuayana? Mëntsá endayana: “Moma, chë nÿets tempo nÿe ínÿabiama oservená y chabe basa acbe yebnentšana chábuaisebocnama, er chë nÿets tempo nÿe ínÿabiama oservenabe šešona ndoñe quenátobena chabe taitabe soyënga jtsebonnama. Nÿe chë propio shembe šešona aiñe, er chë shemna ndoñe nÿe ínÿabiama nÿets tempo oservená quenátsmëna.”

<sup>31</sup> Chcasna, Jesucristbeyeca atšbe catšátanga, bënga ndoñe quemuátsmëna mo canÿa nÿe ínÿabiama nÿets tempo oservenabe básenga cuaftsemncá, er mora ya ndoñe más quemuátsmëna chë léyeca nÿets tempo mandánënga. Y aiñe montsemna mo canÿe shema ndoñe nÿe ínÿabiama nÿets tempo oservenabe básenga cuaftsemncá, er Bëngbe Bëtsabe básenga bënga mondmëna.

## 5

### *Cristo bënga šojatsebacá*

<sup>1</sup> Cristo bënga šojatsebacá, ndoñe más mo chë nÿets tempo nÿe ínÿabiama oservenëngcá chamondëtsiyenama, chë léyeca mandánënga. Nÿa šmochtsentsena nÿets tempo chca atsebácanënga chašmoquedama, y ndoñe šmatjalesencia tšëngaftanga cachiñe chë léyeca mandánënga ínÿenga chácmbiamama.

<sup>2</sup> Tšabá šmochjouena. Atše Pablo cběyana: Nderado tšëngaftanga ndoñe judiënga, šmojalesenciá ínÿenga chë tšëngaftangbe más delicadentše base bobachtema chamotëtšama, ntšamo judiënga monduamancá, asna, ndayá Cristo tšëngaftangbiama tojanmcá tondayama nantsoservenana.

<sup>3</sup> Ndëmuanÿe entšánaca, nda tojalesenciá ínÿenga chabe más delicadentše base bobachtema chamotëtšama, cachiñe cha šcobuayená: Mora aca cmontsemna nÿetsca chë judiëngbe leyentša mandënga jtsobedecénana.

<sup>4</sup> Ndëmuanÿenga tšëngaftangbentšana šmojtsenguá, Bëngbe Bëtsabe bominiÿiñe tšábenga jtsemnama, ntšamo leyiñe jamama yomna ca iuayancá jtsamëse, tšëngaftanga chca šmojtsamama, šmojama Crístoftaca cánÿiñe mo canÿacá ndoñe chašmondëtsemnama; Bëngbe Bëtsábentšanënaca šmojtsoluaré, y chca, šmontsinÿanÿná tšëngaftanga ndoñe šmontseboše, Bëngbe Bëtsá tšëngaftangbe tšabiama jtsejuabnayeše, chácmatsebacana.

<sup>5</sup> Pero bënga, Bëngbe Bëtsábeñe jtsošbuáchiyëse, mondobátmana cha yochjama bënga chabe bominiÿiñe tšábenga nÿets tempo chamotsemnama. Y bënga chca mondobátmana, Jesucristbeñe ošbuáchiyana bómnayeca, y chë ošbuáchiyana chë Uámana Espíritbiajana bëngbioye endobá.

<sup>6</sup> Er Crístoftaca cánÿiñe mo canÿacá tmojtsemna ora, aiñe base bobachtema tëtšenënga tmojtsemna o ndoñe, tondaye ntsámanana; ndayá puerta enduámana endmëna chë Jesucristbeñe bënga mondbomna ošbuáchiyana, y chca bëtsebomnamna bënga montsinÿanÿná ínÿenga jtsababuánÿeshanëse.

<sup>7</sup> Tšëngaftanga tšabá šmonjánama, chë jtsiyenana ntšamo Bëngbe Bëtsabe ndegombre soyënga yomncá jtsamëse. Y mora, ¿nda tojama tšëngaftanga chašmotsajbanama chë Bëngbe Bëtsabe ndegombre soyënga jtsuenanama?

<sup>8</sup> Ndegombre, Bëngbe Bëtsá ndoñe quenátsmëna, er cha tšëngaftanga tcmojáchembo chabe entšanga chašmotsemnama.

<sup>9</sup> Ntšamo entšanga mondëntšayancá: “Nÿe base levadura jamana nÿetsana chauabochama ca”; cachcá, tšëngaftanga chë judiëngbe básefta leyëngaca mandánënga jtsemnama šmojabojátšese, šmuatjábocna nÿetsca leyëngaca mandánënga.

<sup>10</sup> Bënga Bëngbe Utabnáftaca cánÿiñe mo canÿacá bëtsemnayeca, atše corente sëntsetatšëmbo, ntšamo atšbe juabna yomncá tšëngaftangnaca cachcá šmochtsejuabnayama; y átsnaca corente sëntsetatšëmbo Bëngbe Bëtsá puerta bochjacastíga, nda tšëngaftanga natjëmbana ainánaca ndoñe chašmondëtsiyenama

tojtsamábioye, masque ndánaca cha chaotsomñe.

11 Y atšbiana chanjayana, Jesucristbeyeca atšbe catsátanga, Jesucristbeñe ošbuáchiyënga base bobachtema chëngbe más delicadentše tëtšenënga chamotsemnama entšanga cabá stsabuayiynase, entšanga ya ndoñe muantsama atše chaitsesufrinama. Atše chca stsamëse, Cristo cruciñe tojanóbanama ntšamo iuayancá entšanga stsabuayiyná ora, chënga ya ndoñe átšeftaca nanjósentiaye.

12 Pero chë natjëmbana ainánaca ndoñe chašmondëtsiyenama imojtsamëngna, jmalaye cachënga muanjenocbóna!

13 Pero tšëngaftanga, Jesucristbeyeca atšbe catsátanga, Bëngbe Bëtsá tcmojáchembo chë judiëngbe léyeca ndëmandánënga chašmotsemnama. Pero chca bëtsemnama, mora ndoñe šmatjátsjuabnaye šmojtsoyena jalesénciana, nÿe tšëngaftangbe cuerpënga tšabá chamotsemnama juabnëngaca mandánënga jatiyenama. Chamna, tšëngaftanga šmuenbobonshánayeca, nÿetscanga šmochtsenájabuachana.

14 Er ntšamo Moisesbe leyentša nÿetsca mandënguiñe endayancá, nÿe canÿe mandiñe lempe chca entsayana. Y chë mando endmëna: “Ndëmua entšánaca cochtsebobonshana ntšamo cach aca cuenobobonshancá.”

15 Pero ínÿenga chamotsesufrinama jtsamëse tšëngaftanga šmojtsiyenëse, mo tšátjaye bayënga tmojtsenashantsná y tmojtsenobanacá, cuedado šmochtsëbomna. Ndóñese, nÿetscanga šmatjánenpochocaye.

*Ntšamo chë Bëngbe Bëtsabe Espiritbeyeca vida jtsebomnama*

16 Chiyeca cbochjáuyana: Nÿets tempo šmochtsiyena ntšamo chë Uámana Espiritu cmojtsamëndacá, y chca, tšëngaftanga ndoñe quešmochátama soyënga, nÿe cach tšëngaftanga tšabá jtsonñama juabnëngaca.

17 Er ndayá bënga, nÿe entsangbe juábnaca jamama mondbošcá, jtsemnana ndayá chë Uámana Espiritu bënga chamomama yobošcá contra; y ndayá chë Uámana Espiritu bënga chamomama yobošcá, jtsemnana ndayá bënga, nÿe entsangbe juábnaca jamama imobošcá contra. Chca endmënayeca, ntšamo chë Uámana Espiritu chašmomama yobošcá šmojtsamëse, ndoñe quešmátobena jamana, ndayá cach tšëngaftanga, nÿe entsangbe juábnaca jamama šmojtsbošcá.

18 Tšëngaftanga, ntšamo chë Uámana Espiritu cmojtsamëndacá šmojtsamëse, ndoñe quecmátamna ntšamo chë leyíñe iuayancá játamama.

19 Ntšamo entšanga, nÿe entsangbe juábnaca tmojtsamcá, nÿetscanga paselo jtsonÿayana: chënga bacna soye boyabása o

shembásaftaca jtsamana, nÿe chca soyëngama jésejuabnayana, y ndoñe ntsobenana cachënga jenomándama, chca soyënga jtsamëse.

<sup>20</sup> Ba uabouana soyënga jtsamana, diosënga yomna ca tmojtsejuabná soyënga jadórama, jtsencjuanayana, ínÿengaftaca jtsenáyayana, nÿetscanga ndoñe cachá chamondëtsejuabnama jtsamana, ínÿengaftaca yapa jtsenántšabošana, soyënga nÿe rábiaca jtsamana, ínÿengaftaca tša jesenaleganana, y cánÿenga ínÿengaftaca contra chamotsemnana jtsamana.

<sup>21</sup> Nÿe jtsebošana ntšamo inÿa tojatashjachá jtsebomnana, yapa tmoyënga jtsemnana, fiestënguiñe ndoñe tšabe soyënga jtsamana, y inÿe soyëngnaca mo chë soyëngcá jtsamana. Y mora atše cbabuayená, cach ntšamo tempo sënjanmcá: chca soyënga jtsamëse oyenënga, Bëngbe Bëtsabe amëndayoca ndoñe luare quemochátsbomna.

<sup>22</sup> Pero, Uámana Espíritu ainaniñe tojtsemánda ora, quem soyënga chentšana jóbocnana: nÿetscanga jtsababuánÿeshanana, jtsóyejuayana, natjëmbana ínÿengaftaca jtsiyenana, puerte uantado nÿetsca padecéniñe jtsemnana, nÿetscanga corente bonshanánaca jtsëñÿayana, tšabe ainana jtsebomnana, y nÿétscañe tšabe palabra bomnënga jtsemnana,

<sup>23</sup> jtsejuabnayana chë ínÿenga mo chabiamá más uámanënga cuaftsemncá, y cachá nÿetsca soyënguiñe jenomándama jtsobenana. Y ndocna ley quenátsmëna, chca soyënga tmojtsama entšangbiamá contra cháuyanama.

<sup>24</sup> Jesucristbenga imomnënga tmojama, chënga chë nÿe entšangbe juabnëngaca mandánënga ndoñe ntsemnana; ya ndoñe más, chë nÿe cachënga tšabá jtsomñama bacna juabnëngaca mandánënga quemátsmëna, y chë nÿe cachëngbiamá soyënga jamama bëtscá juabnëngaca cach ndoñe.

<sup>25</sup> Bënga ndegombre tšabe vida chamotsebomnana Uámana Espíritu yojtsamayeca, bënga mochtsiyena jtsamëse lempe ntšamo Uámana Espíritu šojtsamëndacá.

<sup>26</sup> Ndoñe šmattsenábotamnaye, uámanënga jatenobi-amnayëse, ndoñe soyënga mattsama ínÿenga bëngaftaca chaoséntiayama, y ndoñe nÿe mochjátsboše ntšamo inÿa tojatashjachá jatsbomnana.

## 6

### *Nÿetscanga šmochtsenájabuachana*

<sup>1</sup> Jesucristbeyeca atšbe catšátanga, nderado ndánaca bacna soye tojamama šmojinÿe, tšëngaftangbentše ntšamo chë Bëngbe Bëtsabe Espíritu tojtsemmandacá tmojtsamënga cmontsamna cha juajabuáchana, chë ndoñe tšabe soye



amana chaotsajbanama; pero chca šmochjama becá bonshanánaca jtsonyáyese. Cuedado šmochtsebomna, er ndóñese, tšëngaftángnaca cmatjócochëngo cachcá soye jamama.

<sup>2</sup> Chë soyënguiñe chašmojtsepadecena ora, šmochtsenájabuachana, mo chë uauta uasmanëshangá šmojtsëyambá ora, juyambama šmojtsenajabuachancá. Y chca chašmojtsama ora, ntšamo Cristo tojanmandacá šmochantsocumplina.

<sup>3</sup> Nderado nda tojtsejuabná, cha canye uámana entšá yomna ca, pero ndoñe chca cha tondmënese, cachá jtsenoíngñayana.

<sup>4</sup> Cada ona chauenojuabó, ntšamo tojamcá tšabá o ndoñe tšabá bétsemnama. Ntšamo tojamcá tšabá tojtsemnëse, chca tojamama oyejuayá chaotsemna; pero cha ndoñe quebnátsmëna jayanana ntšamo tojamcá tšabá yojtsemna ca, chë ndayá ínÿenga tmojamama más tšabá yojtsemna ca jatichámëse.

<sup>5</sup> Er cada ona bontsemna jtsenójuabnayana, jtsetatšëmbuama ntšamo tojamcá tšabá o ndoñe tšabá bétsemnama.

<sup>6</sup> Nda Bëngbe Bëtsabe soyëngama tojtsatsjendá, cha bontsemna chabe buatëmbayáftaca nyetsca tšabe soyënga jenájatayana.

<sup>7</sup> Ndoñe matenoíngñana; ndoñe šmattsejuabnaye tšëngaftanga šmojtsobena ntšamo Bëngbe Bëtsá tojamandacá ndoñe ntjamana, castigo ntjoyëngacñëcá, er ndocná quenátobena Bëngbe Bëtsá jaíngñana. Ntšamo entšanga mondëntsayancá: “Ndayá tcojajé y cachcá josháchiñana ca.”

<sup>8</sup> Mo nda ndoñe tšabe fshantsiñe tojajecá, tšabe shajuana ndoñe ntjoshachiñana, cachcá, nda tojtsiyena nÿe cachá tšabá jtsomñama bacna juabnëngaca, cha echanjábocna jabuache castiganá nyetsca tescama. Pero mo nda uaba fshantsiñe tojajecá, tšabe shajuana josháchiñana, cachcá nda tojtsiyena ntšamo chë Uámana Espíritu tojtsemandacá jtsamëse, chë nyetsca tescama yomna tšabe vida echántsebomna.

<sup>9</sup> Chcasna, ndoñe chašondëmantšé tšabe soye jtsamama; er masque šojtsëmantšnasna, pero chë tšabe soyënga jtsamama ndoñe tmonjajbanase, canye bëts te echanjóshjango, bënga bëtscá tšabe soyënga josháchiñama, mo tša tšabe shajuanënga tmojashaquëcá.

<sup>10</sup> Chíyeca, tmojtsobena ora, nyetscangbiana tšabe soyënga mochjama, pero masna chë Jesucristbeñe ošbuáchiyana bómnayeca, bëngcá Bëngbe Bëtsabe básenga imomnëngbiana.

*Quem tsbuanácha juapochócama cach Pablo tojanábema*

<sup>11</sup> ¡šmochjinÿe, tša bëts letrëngaca cach atšbe cucuátšeca mora cbontsëbuabiamná!

12 Ndēmuanjēnga imojtseboše, tšēngaftanga chē ndoñe judiēnga jamēndama tšēngaftangbe más delicadentše base bobachtema tētšenēnga chašmotsemnama, ntšamo judiēnga monduamancá, chēnga chca jtsamana nje chē judiēngaftaca tšabá joquédama. Y chca jtsamēndayana, chēnga chamosufrima ínēnga chamotsamama ndoñe mondbóšeyeca; er judiēnga muanjama chēnga chamosufrima, Cristo cruzoca jóbanana entšangbiana puerte iuámana ca chēnga tmojtsabuayiynase.

13 Pero ni mo chē más delicadentše base bobachtema tētšenēnga imomnēnga, ndoñe quemátama lempe ntšamo chē leyíne iuayancá. Pero chēnga jtsebošana tšēngaftanga chca tētšenēnga chašmotsemna, chēnga jtsenábotamnayama jobenayama, ínēnga base bobachtema chacmatētšama tšēngaftanga šmojalesenciama.

14 Atšeftacna ndocna te chca chaondopasá. Atše nyets tempo y becá chanjēftsóyebuambnaye ndayá atšbiana Bēngbe Utabná Jesucristo tojanmama, cha cruzoca tojanóbana ora; er ndayá choca tojanma sóyeca, atšbiana tondaye quenatámana ntšamo entšanga quem luarentše imojuabnacá y chēngbiana puerte iuámana; y ndayá atšbiana puerte iuámana, entšangbiana tondaye quenatámana; y chē causa, atše chēngbiana mo obanacá sēndmēna.

15 Chē más delicadentše base bobachtema aiñe tētšená o ndoñe, tondaye quenatámana. Ndayá puerte iuámana endmēna, Bēngbe Bētsá mo tsmēma entšangcá bēnga šojábiana, Uámana Espíritu bēngbe ainaniñe jtsemándayēse.

16 Chē quem buatēmbana sóyeca jtsamēse šmoyenēngbiana, atše, Bēngbe Bētsá sēntseimpadana, cha chaoma tšēngaftangbe ainana natjēmbana chašmotsebomnama y becá chacmotsalastemánama; y ndoñe nje chēngbiana chca quetsatsimpadana, ndayá nyetscanga Bēngbe Bētsabe entšanga imomnēngbiámnaca.

17 Y mora, nje canje soye cbochjáuyana: morscana ndocná chaondétsama atše jasúfriama chašotsemnama; er atšbe cuerpiñe endētinyna ntšamo atše tijasufrí, Jesusbe oservená bētsemnama.

18 Jesucristbeyeca atšbe catsátanga, atše sēntseimpadana Bēngbe Utabná Jesucristo chaoma tšabe bendicionēnga tšēngaftangbeñe chaotsemnama. Chca chaotsemna.

## Efesios

### *Jacheuayama*

<sup>1</sup> Atše Pablo, Jesucristbe ichmoná Běngbe Bětsá chca yobóseyeca, quem tsbuanácha sěntsabiamná Efeso puebloca Běngbe Bětsabe entšanga y Cristo Jesúsbeñe ošbuáchiyěnga imomněngbiamna.

<sup>2</sup> Atše sěntseimpadana Běngbe Bětsá Běngbe Taitá y Běngbe Utabná Jesucristo, chaboma tšěngaftangbeñe tšabe bendicioněnga chaotsemnana, y chata chaboma tšěngaftangbe ainaniñe tšabe ebionana chašmotsebonnana.

*Crítoftaca cányiñe mo canyáca jtsemněse, běnga mochántsebonna nýetsca tšabe soyěnga, ntšamo celoca yobinýncá*

<sup>3</sup> Běngbe Bětsá y Běngbe Utabná Jesucristbe Taitábioye mochjětschuaye, er běnga Crítoftaca cányiñe mo canyáca mondměnayeca, Běngbe Bětsá tojama běnga nýetsca tšabe soyěnga chamotsebonnana, ntšamo celoca yobinýncá.

<sup>4</sup> Běngbe Bětsá běnga šojanabacacá Crítoftaca cányiñe mo canyáca chamotsemnana, cabá quem luare cha ndama orscana, běnga chabe delante chamotsemnana chabe entšanga, bacna soyěngama perdonáněnga y chabe oservéněnga, y běnga ainaniñe bacna soye ndbomněnga imomna ca cha cháuyanama.

<sup>5</sup> Běngbe Bětsá šuababuánýeshanayeca, tempo cha tojanjuabó y tojánbošena běnga mo cachabe basengcá jábiamama, chě Jesucristo yochjanma sóyeca.

<sup>6</sup> Chíyeca běnga Běngbe Bětsábioye sempre jtsatschuanayana, cha běngbe tšabiamna juabna yobómnyayeca, ndayá chabe Bonshana Uaquiñáftaca běngbe tšabiamna cha tojamama.

<sup>7</sup> Běngbe Bětsá puerte bonshanánaca běngbe tšabiamna bětscá yujuabnáyeca, cha běngbe bacna soyěngama šojtsaperdoná y šojatsebacá, er Jesús běngbiamna tojanóbana, chabe buiñe juabuáshaněse.

<sup>8</sup> Běngbe Bětsá tojama běnga nýets osertánana y becá juabna chamotsebonnana, cha becá bonshanánaca běngbe tšabiamna juabna yobómnyayeca,

<sup>9</sup> y tojama běnga chamotsetatšěmbuama ndayá jamama cha yobošcá, ndayá cachá tempscana yojanjuabná jamama, pero entšanga chca ndoñe tonjaninýanyé. Ndayá jamama Běngbe Bětsá tempo yojanjuabnacá, ndayá cha tojama běnga chamotsetatšěmbuama, cachá yojanjuabná chca jamama.

<sup>10</sup> Ndayá jamama Běngbe Bětsá yujuabnacá, lempe echanjochněngo nýa chama tempo chaojóshjango ora, y quem

Bëngbe Bëtsabe juabna endmëna jamana, lempe ntšamo cha tojamcá celoca y quem luarentše, Cristo chamotsebomna nyetsca chë soyënguiñe mo chë mandayacá.

11 Bëngbe Bëtsá sempre jamana nyetsca soyënga ntšamo tojtsejuabnacá y tojtsebošcá. Y Bëngbe Bëtsá bënga sojabacacá, ntšamo cabá chca ndama ora yojanjuabnacá; chca, bënga Crísoftaca cánjiñe mo canyácá jtsemnëse, bënga chamóyëngacñama ndayá Bëngbe Bëtsá chabe entšanga jatšatayama tojašebuachená, mo chëngbe otocana soycá.

12 Y Bëngbe Bëtsá chca tojama, bënga chë Crístbeñe natsana imojtsanošbuachenga, cha bënga sochjánatsebacama, tšabe soyënga jtsamëse chamotsiyenama, chca, chë inye entšanga Bëngbe Bëtsabe obenanama cha chamotsatschuanama.

13 Y tšëngaftángnaca, chë ndegombre buayenánana šmojanuena ora, chë Bëngbe Bëtsá bënga játsebacama buayenánana, y Crístbeñe šmojtsanošbuaché ora, Bëngbe Bëtsá tojanma tšëngaftanga Crísoftaca cánjiñe mo canyácá chašmotsemnana y tcmojanainyñaná tšëngaftanga chabe entšanga bétsemnana. Bëngbe Bëtsá chca tojanma, Uámana Espíritu tšëngaftangbe ainaniñe cháumashënguama tojanma ora, ntšamo tempo cha tojanašebuachenacá.

14 Bënga chë Uámana Espíritu bëngbe ainaniñe mondbómnyayeca, corente mondetatsëmbo ndayá Bëngbe Bëtsá chabe entšanga tojašebuachenacá bënga mochjójyëngacñama. Uámana Espíritbeyeca bënga montsobena chca puerte tšabá jtsetatsëmbuama, chë Bëngbe Bëtsá chabe entšanga nyetsca tescama játsebacama y ntšamo tojašebuachenacá jatšatayama tempo chaóshjanguëntscuana; y lempe ntšamo cha bëngbiana inétsamama, nyetscanga cha mochántatschuanaye, cha bëtsá y obená bétsemnana.

*Pablo Bëngbe Bëtsábioye tbojanimpadá, ošbuáchiyënga osertánana chamotsebomnana.*

15-16 Chcáyeca, atšna, Bëngbe Bëtsá tšëngaftangbiana st-seimpadana ora, sempre cha sëndbëtsatschuanaye, er atše sënjátatsëmbona ntšamo tšëngaftanga Bëngbe Utabná Jesúsbeñe tša šmojtsošbuáchema, y ntšamo tšëngaftanga nyetsca chë Bëngbe Bëtsábënga imomnënga šmababuánjeshanama.

17 Bëngbe Bëtsá, Bëngbe Utabná Jesucristbe Taitá, nda corente iuámana, sëntseimpadana cha chaoma Uámana Espíritu chacmëjabuachama, corente osertánënga chašmotsemnana, y chacminyanjé nda Bëngbe Bëtsá yomnana, chca, más tšabá cha chašmotsábuatmama.

18 Atše, Bëngbe Bëtsá sëntseimpadana, cha chaoma tšëngaftanga Bëngbe Bëtsabe soyënguiñe corente osertánana chašmotsebomnana, tšëngaftanga chašmotsetatsëmbuama,

ndayá Bëngbe Bëtsábeñe jtsošbuáchiyëse tšëngaftanga šmojtsobatmancá cha cmochjátšatayama. Bëngbe Bëtsá tcmojáchembo chábeñe chca chašmotsobátmanama. Atše cha sëntseimpadana, chaoma tšëngaftángnaca chašmotsetátšëmbo tša bëtscá y bëts soyënga yomna ndayá chabe entšanga cha tojašebuachenacá;

<sup>19</sup> y chašmotsetátšëmbo tša bëts soye y ndocna te ntjëftso pochócama chabe obenana yomnama, chë ndayá bëngbe ainaniñe tšabe soyënga yojtsama, bënga chë Crístbeñe ošbuachiyëngbeñe. Cach quem puerte bëts obenana endmëna,

<sup>20</sup> ndáyeca Bëngbe Bëtsá tojanma Cristo cháuatayenama, y chabe catšbioica celoca tbojtantbema chaotsemándama.

<sup>21</sup> Choca Cristo nyetsca soyënguiñe yojtsemánda, y más bëtscá obenana y mando yojtsebomna nyetsca mándayëngbiama, chë mando y obenana bomnëngbiama, y cha yomna más uamaná y bëtsá nyetsca chë entšangbiama mo bëtsetsangcá utabnëngbiama, chëngbe uabaina respétoca jtsichámëse. Cristo puerte bëtsá endmëna lempe ntšamo quem luarentše yobínýnama y Cristo yochjésabentsana yochtsebinýnámna.

<sup>22</sup> Bëngbe Bëtsá tojama Cristo nyetsca soyënguiñe chaotsemándama, y tbojanábuayana nyetsca soyënguiñe chaotsemándama, chábeñe ošbuáchiyëngbe tšabiama.

<sup>23</sup> Cha endmëna nyetsca chábeñe ošbuáchiyëngbe mandayá, y chënga mondmëna mo cachabe cuerpo cuaftsemncá. Chëngbe ainaniñe cha endoyena y nyetsca luarënguiñnaca, y lempe cha endëmánda.

## 2

*Atsebácanënga mondmëna, Bëngbe Bëtsá  
šwababuánýeshanayeca*

<sup>1</sup> Tempo tšëngaftanga Bëngbe Bëtsabiama mo obanëngcá šmonjamna, er tšëngaftanga šmonjaniyena, ntšamo Bëngbe Bëtsá yomandacá ntsamcá, y bëtscá bacna soyënga šmojánama.

<sup>2</sup> Chca, tšëngaftanga šmonjánama mo chë nýe quem luarama enójuabnayënga monduamancá, y šmonjanëyeunana Satanás, chë bacna espíritënga obenana bomnënga y quem luarentša tsbanánoca imomnëngbe amëndayá, chë Bëngbe Bëtsábioye ndëyeunanëngbe ainaniñe yománda espíritu.

<sup>3</sup> Tempo bënga nyetscanga fsënjaniiyena ntšamo tšëngaftanga šmonjaniyencá. Bënga soyënga fsënjánama, nýe ntšamo ftsjanbošcá nýe bëngbe cuerpëngbe tšabiama, y nýe ntšamo bëngbe juabna enjamncá bacna soyënga jamama. Bënga fsënjaniiyena soyënga jtsamëse mo chë Bëngbe Bëtsábioye nduabuatma

entšanga mondbetsamcá; chë causa bënga fsënjanomerecena jtsebomnana chë Bëngbe Bëtsabe uabouana castigo, cachcá chë Bëngbe Bëtsábioye nduabuatmëngcá.

<sup>4</sup> Pero Bëngbe Bëtsá sempre tša lastemado entšangbiana endmëna y sempre corente bënga šondábuanyëshana;

<sup>5</sup> y chíyeca, bënga cabá mo obanëngcá chabiana fsënjamna ora, bacna soyënga fsënjánama causa, chora cha tojanma bënga tšabe vida chamotsebomnama y Cristoftaca cánýiñe mo canýacá chamotsemnama. Bëngbe Bëtsá tšëngaftangbe tšabiana juabna bómnyeca, bacna soyënguentšana tcmojatsebacá.

<sup>6</sup> Bënga Jesucristoftaca cánýiñe mo canýacá bëtsemnayeca, Cristo Jesús cháuatayenama Bëngbe Bëtsá tojanma ora y celoca tbojtantbema ora, enjamna mo bëngnaca chámuatayenama Bëngbe Bëtsá cuafjamcá y Cristo Jesúseftaca celoca cuaftatbi-amcá.

<sup>7</sup> Chca enjamna, Bëngbe Bëtsá entšanga cháuinýanýema nyetsca joshjanguama tempënguiñe, ntšamo cha bëngbe tšabiana bëtscá juabna bëtsebomnama, cha Cristo Jesúseftaca bëngbioye tšabe juábnaca šojánanye ora.

<sup>8</sup> Er Bëngbe Bëtsá tšëngaftangbiana tšabe juabna yojánbomnayeca, tcmojatsebacá, Jesucristbeñe šmojtsanošbuáchema; pero atsebácanënga šmondmëna, ndoñe cach tšëngaftanga ndayá šmojánmayeca, ndayá atsbocaná jtsemnana endmëna Bëngbe Bëtsabe canýe tšetana soye.

<sup>9</sup> Atsebácanënga šmondmëna, ndoñe cach tšëngaftanga ndayá šmojánmayeca; chíyeca ndocná quenátobena jtšenábotamnayana atsbocaná yojtsemnama.

<sup>10</sup> Bëngbe Bëtsá šojtabiana ntšamo bënga mondmëncá, y Cristo Jesúseftaca cánýiñe mo canýacá bëtsemnayeca, Bëngbe Bëtsá mo tsmëma entšangcá cuafstsatsmëncá šojtabiana, tšabe soyënga jtsamëse jtsiyenama. Y ndayá bënga tšabá mondamcá, Bëngbe Bëtsá tempo tojanprontá bënga chamot-samama.

*Crístbeyeca tempcá tšabá Bëngbe Bëtsáftaca jtsatsmënana*

<sup>11</sup> Tšëngaftanga ndoñe judiënga, ndëmuanýenga judiënga cmondubuatma “chë más delicadentše base bobachtema ndëtëtšenënga ca”, chëngcá uinýnanánënga ndoñe šmondmënama; chënga cachënga jtšenábobuatmana “chë más delicadentše base bobachtema tëtšenënga ca”, y cachëngbe cuerpënguiñe chca jtsamana. Mëntsá, tšëngaftanga chë ndoñe judiënga,

<sup>12</sup> šmochjenójuaboye ntšamo tempo šmojamnama, Crístbeñe cabá ndošbuáchiye ora. Chora, tšëngaftanga Cristo ndoñe šmonjábomna, Israeloca entšangbiana stëtšoye šmonjanquedana, y ndoñe šmonjantátšëmbo lempe

ntšamo Bëngbe Bëtsá chabe entšanga tojanašebuachenacá. Tšëngaftanga quem luarentše šmonjaniyena ndocnábeñe ntsobatmancá y Bëngbe Bëtsá ntsabuatmncá.

13 Pero mora tšëngaftanga Cristo Jesúseftaca cányiñe mo canyácá šmontsemna, chë tempo Bëngbe Bëtsá ndoñe šmonjanábuatmënga, y cha tojama chábioye chašmotsábuatmama; y chca yomna, er Jesús, chabe buiñe juabuáshanëse, tšëngaftangbiama tojanóbana.

14 Cach Cristo yojtsama bënga tempcá tšabá Bëngbe Bëtsáftaca chamotsemnana. Cha tojama judiënga y ndoñe judiënga nyetscanga mo cachca entšangcá chamotsemnana, mo nda canye tapiëse tojtsendbemcá, chë ndayëseca canye luarentša entšanga tmojtsenjáta, chënga enáyaye causa.

15 Cristo chënga mo cachca entšangcá tojábiana, judiëngbe leyënga y mandënga ndocna obenana chamondëtsebomnana jamëse. Chca tojama, cha jóbanëse, chë útoica entšanga mo nye canye tsmëma entšangcá jábiamama, cháftaca cányiñe mo canyácá jtsemnëse. Cha chca tojanma chënga nyetscanga tšabá chamotsiyenama;

16 y Cristo cruciñe tojanóbanayeca, cha tojanma chë útoica entšanga enáyayana chamotsajbanama, y tojanma chë útoica entšanga mo canye entšangcá chamotsemnana, chënga tempcá tšabá Bëngbe Bëtsáftaca chamotsatsmënama.

17 Cristo quem luaroye tojánabo tšabe noticiënga jabábuayenama, tempcá tšabá Bëngbe Bëtsáftaca jtsatsmënama. Cha quem tšabe noticiënga tojanabuayená tšëngaftanga chë ndoñe judiëngbioye, chë Bëngbe Bëtsá ndoñe šmonjanábuatmënga, y chë judiëngbioynaca, chë Bëngbe Bëtsá imojanábuatmënga.

18 Er chábeyeca, canyányënga y ínënga montsobena chë Taitábioye jobéconana, er bënga nyetscanga cachca espíritu bëngbe ainaniñe mondbomna, chë Uámana Espíritu.

19 Chíyeca tšëngaftanga, Bëngbe Bëtsabe entšanguentše ndoñe quešmátsmëna mo inye luarocana ashjajnëngcá, y ni mo cachëngbe yebnentše ndoyenëngcá, tondayama derecho ndbomnënga. Inyetsá endmëna; tšëngaftanga derecho šmondbomna cachcá ntšamo Bëngbe Bëtsabe entšanga mondbomncá, y Bëngbe Bëtsabe básenga šmondmëna.

20 Jesucristo y chabe entšanga mondmëna mo canye jebna yebncá. Jesucristbe ichmónënga y chë Bëngbe Bëtsabe juabna oyebuambnayënga mondmëna mo chë ndëtšbënga ndayiñe chë yebna tojtsëcuatjoncá; tšëngaftanga ošbuáchiyënga šmondmëna chë jebna yebnentša soyëngcá, y cach Jesucristo mo chë más uámana luarentše uashacuana ndëtšbecá.

21 Quem más uámana luarentše uashacuana ndëtšbeñe,

nÿetsca chë bëts yebnentša soyënga jtsëcuatjonana, y tsbanánoye más tmojatsjebëse, chë bëts yebnentše tsëm jebna sóynaca chiñe jtsëcuatjonana. Cachcá Cristo, mo chë más uámana luarentše uashacuana ndëtsbecá, jtsamana nÿetsca chábeñe ošbuáchiyënga cháftaca cánÿiñe mo canÿacá chamotsemnana, y ínÿengnaca cachcá chamotsemnana. Y nÿetsca ošbuáchiyënga Crísoftaca cánÿiñe mo canÿacá tmojtsemna ora, chënga jtsemnana mo Bëngbe Utabnabiana canÿe bëts yebna jebncá, chábioye jtsatschuanayama.

<sup>22</sup> Y tsëngaftanga Efesoca ošbuachiyëngbiámna Cristo entsama, chë inÿe chábeñe ošbuáchiyëngaftaca mo canÿe entsangcá chašmotsemnana. Y chë Uámana Espíritu bëngbe ainaniñe vojtsiyénayeca, bënga nÿetscanga cánÿiñe mondmëna, mo canÿe bëts yebncá ndayentše Bëngbe Bëtsá yoyena.

### 3

*Pablo Jesucristbe trabajo yojanbonÿena, chë ndoñe judiëngbeñe jamama*

<sup>1</sup> Chca, atše Pablo utamená sëntsemna, Cristo Jesusbiana soyënga entsanga abuayiyayeca causa, tsëngaftanga chë ndoñe judiëngbe tsabiama.

<sup>2</sup> Er tsëngaftanga ya cmontsamna jtsetatšëmbuama, Bëngbe Bëtsá tsëngaftangbe tsabiama juabna yobomnana; y chca, chë trabajo atše šojabonÿé, tsëngaftangbe tsabiama jamama.

<sup>3</sup> Tsëngaftángnaca cmontsamna jtsetatšëmbuama ndayá Bëngbe Bëtsá šojinÿinÿé, ntšamo cha jamama tempo tojanjuabocá, pero entsanga chca ndoñe tonjaninÿanÿé, y chë soyama ya batsatema tcbonjubuábiana.

<sup>4</sup> Chašmojualiá ora, šmochanjátatšëmbona Cristbe soyënga šosertánama, chë tempo ndocná yonjanábuatma soyënga,

<sup>5</sup> chë tempo Bëngbe Bëtsá ndocnábioye tbonjaninÿinÿé soyënga; pero mora cha tojinÿanÿé, Jesucristbe ichmónënga nÿe Bëngbe Bëtsabiama oservénëngbioye y Bëngbe Bëtsabe juabna oyebuambnayëngbioye; y cha chca tojama chabe Uámana Espíritoftaca.

<sup>6</sup> Ndayá tempo Bëngbe Bëtsá ndoñe tonjaninÿanÿecá mëntšá endmëna: chë ndoñe judiënga Jesucristbe tsabe noticiënguiñe chamojtsošbuaché ora, cachcá ntšamo chë judiënga ošbuáchiyënga Bëngbe Bëtsábiocana mochjoshachiñcá, chëngnaca chábiocana mo otocancá chë soye mochanjóyëngacñe. Chënga mo cach judiënga ošbuachiyëngcá, Cristo mondbomna mo chëngbe mandayacá. Y chca Cristo endmëna mo bestšašcá y chënga nÿetscanga mondmëna mo cachabe cuerpentša soyëngcá. Chë ndoñe judiënga ošbuáchiyënga mochanjóyëngacñe lempe ntšamo



Bëngbe Bëtsá chë judiënga ošbuáchiyënga tojašebuachenacá. Chca echántsemna chë ndoñe judiëngaftaca, chënga Cristo Jesúseftaca cánÿiñe mo canÿacá bëtsemnayeca.

<sup>7</sup> Masque ndoñe šonjanomerecena, mo ndayá cuaf-jatsetacá, Bëngbe Bëtsá šonjanábuayana cha jtseservénama, tšabe noticiënga entšanga jtsabuayinyayëse; y cha átšeftaca chca tojanma chabe obenánaca.

<sup>8</sup> Atše nÿetsca chë Bëngbe Bëtsabe entšanguentše sëndmëna chë más nduamaná; pero Bëngbe Bëtsá bëtš pavor šontsebema, šonjalesenciá chë Cristbe bëtšcá tšabe soyënga chë ndoñe judiënga jábuayenama. Chë Cristbe soyënga tša bëtšcá endmëna, y chca, quenátopodena chë soyënguentsana lempe jtsabuatmana.

<sup>9</sup> Y chë trabajo šonjabonÿé jamama, nÿetscanga botamana jinÿama chamotsobenama ndayá Bëngbe Bëtsá yochjama, ndayá cachá, chë nÿetsca soyënga tojamá, tempšana yojanjuabnacá. Mëntscoñama Bëngbe Bëtsá chë soye ndocnábioye tbonjinÿinÿé, pero mora aiñe.

<sup>10</sup> Chca, Crístbeñe ošbuachiyëngbeyeca, mora chë celoca mándayënga y obenana bomnënga, chamobená juabuátmanana nÿets osertánana ntšamo Bëngbe Bëtsá yobomncá.

<sup>11</sup> Bëngbe Bëtsá chca tojama, ntšamo cachá yojanjuabnacá nÿetsca tescama jamama, y chca cha tojama Jesucrísoftaca, Bëngbe Utabná.

<sup>12</sup> Bënga Crístoftaca cánÿiñe mo canÿacá mondmëna, y chábeñe mondošbuachéyeca, bënga montsobena Bëngbe Bëtsábioye jobéconama todayama ntjatauatjácá, y corente jtsetatšëmbëse cha ndoñe chašondubatema.

<sup>13</sup> Chíyeca atše cbontsaimpadana ndoñe chašmondëtsajbaná ainaniñe añemo bomnana, atše sëntsesufrina causa, er chë tšëngaftangbe tšabiamana tsësufrintšana, tšëngaftangbiama tšabe soyënga endóbocana.

### *Cristbe bonshánana*

<sup>14-15</sup> Y chca, Bëngbe Bëtsá, chë Taitá, ndábentsana nÿetsca pamíllanga celoca y quem luarentše uabaina imóyëngacañe, chabe delante joshamëntšase,

<sup>16</sup> sëntseimpadana, chabe bëtšcá uámana bomnánaca chaoma, tšëngaftanga ainaniñe obenana y bëtš añemo chašmotsebonnama, chabe Espíritbeyeca,

<sup>17</sup> y tšëngaftanga Crístbeñe jtsošbuáchiyëse, mua tšëngaftangbe ainaniñe chaotsiyenama. Bëngbe Bëtsánaca sëntseimpadana, cha y ínÿenga nÿets ainánaca jtsababuánÿeshanëse,

<sup>18</sup> tšëngaftanga y nÿetsca Bëngbe Bëtsabe entšágnaca tšëngaftangaftaca, chašmotsobena josértama Crístbe

bonsánana bēngbiama tša bētská yomnama. Nderado nda tojontsé chabe bonsánana jatšēmbonana mo canye soye cuaftsemncá, cha ndocna te nanjobenaye jtsetatšēmbuana tēntsoye ndayēntscoca yomna y nyanējoye ndayēntscoca, jashenoye ndayēntscōñe y tsbanánoye ndayēntscōñe yomna.

<sup>19</sup> Atše sēntseimpadana tšēngaftanga chašmobená chē bonsánana juabuátmanana (chē bonsánana puerte bētská endmēna causa, bēnga ndocna te quemochatobenaye josértama ntšamo chē soye lempe yomnana). Pero sēntseboše, tšēngaftangbe ainaniñe nye Bēngbe Bētsabe soyēnga chaotsemna y tšēngaftanga chašmotsiyena jtsamēse, ntšamo tšēngaftanga chašmotsamama Bēngbe Bētsá yujuabnacá.

<sup>20</sup> Y mora, n̄yetscanga Bēngbe Bētsá chamotsatschuaná. Cha obenana yobomna ntšamo bēnga tmojtsojtjanañe o tmojtsejuabnama más soyēnga jamama, chabe puerte bēts obenánaca; y chē obenana bēngbe ainaniñe yojtsemánda y yojtsama bēnga ainaniñe sempre ošbuáchiyana chamotsebomnama.

<sup>21</sup> ¡Entšanga Bēngbe Bētsá chamotsatschuaná n̄yets tempo y n̄yetsca tescama, ndayá Crístbeñe ošbuáchiyēnga tmojtsamama y cach Cristo tojamámna! Chca chaotsemna.

## 4

### *Uámana Espíritbeyeca bēnga cányiñe mo canyáca jtsemnana*

<sup>1</sup> As, atše chē cárceloye utamená, Bēngbe Utabnabiamama trabájaye causa, tšēngaftanga cbontsaimpadana, ndēmuanyēnga Bēngbe Bētsá tcmojáchembo chabe entšanga chašmotsemnana, siempre chašmotsiyena mo chē entšangcá ndēmuanyēnga Bēngbe Bētsá cach soyama tojánachembo y chca imomerecena.

<sup>2</sup> Cada ona chamotsenojuabná mo chē ín̄yēnga chabiama más uámanēnga tmojtsemncá, y n̄yetscángbioye puerte bonshanánaca šmochtsobátmana, y bētská bonsánana jtsebonnēse šmochtsenēuantana;

<sup>3</sup> siempre šmochtsejuabnaye y šmochtsentšena tšēngaftanga n̄yets tempo cányiñe mo canyáca chašmotsemnana, n̄yetsca tšēngaftanga natjēmbana jtsemnēse. Y tšēngaftanga šmotsobena cányiñe mo canyáca jtsemnana chē Uámana Espíritbeyeca.

<sup>4</sup> Bēnga Jesucrístbeñe ošbuáchiyēnga bétsemnayeca mondmēna mo cach cuerpentšēngcá, chē Crístbe cuerpo, y cachca Espíritu bēnga n̄yetscanga ainaniñe mondbomma. Bēngbe Bētsá šojáchembo, bēnga chábeñe jtsošbuáchiyēse, n̄yetscanga cachcá šochjátšatayama chamotsobátmanama.

<sup>5</sup> Bënga nÿetscanga cach Utabná mondbomna, cachca ošbuáchiyana Jesucristbeñe mondbomna, y bënga nÿetscanga uabáinënga mondmëna chca betsošbuáchiyama.

<sup>6</sup> Bënga ošbuáchiyënga nÿetscangbiama cach Bëngbe Bëtsá y Taitá endmëna. Cha bëngbe amëndayá endmëna, chabe obenana nÿetscángbeñe jtsinÿnana, y nÿetsca bëngbe ainaniñe chabe Espiritu endmëna.

<sup>7</sup> Pero bënga, cada ona tšetana obenana tojóyëngacñe, tšabe soyënga jamama, ntšamo Cristo jatsatayama tojanbošencá, chábeñe ošbuáchiyënga jujabuáchama.

<sup>8</sup> Chíyeca, Bëngbe Bëtsabe uabemana palabrënguiñe Jesucristbiama mëntšá endayana:

Cha celoye tontantsjuá, y cháftaca tonjanëyamba nÿetsca chabe uayayënga, chë tojánayënjananga, y chabe entšángbioye obenana tonjanatšatá, tšabe soyënga jamama ca.

<sup>9</sup> ¿Y ndayá yojtsayana chë “cha tontantsjuá ca”? Chca entsayana co Cristo natsana, quem luaroye tojánastjango ca.

<sup>10</sup> Y Cristo, chë tojanastjanguá, cachá endmëna nda celoca chë más tsbanánoye tojtantsjuá; chca, canÿe ora nÿetscañe cha chaotsemnama.

<sup>11</sup> Y cachá, chë tšabe soyënga jamama obenana tojanatšatá ora, tojanma chábeñe ošbuáchiyënguentšë chamotsemna ínÿengna chabe ichmónënga, ínÿengna Bëngbe Bëtsabe juabna oyebuambnayënga, ínÿengna tšabe noticiënga Cristbiama abuayiynayënga, y ínÿengna ošbuáchiyënga anÿenënga y Bëngbe Bëtsabe soyëngama abuátambayënga.

<sup>12</sup> Cristo tojanabacacangna chabe entšángbioye mochjanëjabuache, cha tojanabanÿé trabajo chënga chamotsamama, y nÿetsca ošbuáchiyënga, chë nÿetscanga cánÿiñe mondmëna mo Cristbe cuerpcá, cada te más ošbuáchiyana y bonshánana chamotsebomnama,

<sup>13</sup> bënga nÿetscanga chamobenantscuana cachca ošbuáchiyana Jesucristbeñe jtsebomnama, y Bëngbe Bëtsabe Uaquiñabiama nÿetscanga lempe cachcá jtsetatšëmbuama. Chca, bënga mochanjashjache jtsemnama lempe ntšamo Cristo yomncá, mo bëtsëtsanga bëtscá juabna bomnëngcá,

<sup>14</sup> y ndoñe nÿe mo basengcá, Bëngbe Bëtsabe soyëngama jtsetatšëmbuama. Chë soyënguiñe ya ndoñe más nÿe mo basengcá quemochátsmëna, ndëmuanÿënga paselo jáingñama yomna. Mo canÿe barquësha nÿe ndaye bínÿiacnaca tojtsëyambancá, básefta entšanga nÿe ndaye buatëmbana soye tmojatüencá jatsyeunanana; bënga ndoñe chca quemochátsmëna, ya ndoñe más bëngbe juabna quemochatstróca, nÿe ndaye tmojatüena tsëm sóyeca, ínÿengbioye áingñayënga. Chënga becá

montsetátšëmbo ntšamo entšanga jáingñana, y montseboše chë montsabuatambá bostero soyënga bënga jtseyeunanama.

<sup>15</sup> Chamna, chë Bëngbe Bëtsabe ndegombre soyëngama bonshanánaca jtsóyebuambnayëse, šontsamna jashjáchana jtsemnama lempe ntšamo Cristo yomncá. Cha bëngbe amëndayá endmëna, cachcá ntšamo bestšaše chë cuerpentša soyënga jtsemandayaná.

<sup>16</sup> Mo canÿe bestšašcá, chëse jamana nÿetsca chë cuerpentša soyënga ndayentše chamuenefjnama y chiñe jobónjuama chamotsobenama, chë cuerpo saná chaotsebomnama jtsemëse, chca, nÿets cuerpo tšabá chaóbochema, cachcá Cristo, chë nÿetsca ošbuáchiyëngbe amëndayá, chabe obenánaca jamana chënga cada te más ošbuáchiyana y bonshánana chamotsebomnama. Cada cuerpentša soye tojtsama ntšamo chë soye chaotsamama tomncá, as nÿets cuerpo tšabá jobóchana; cachcá, ošbuáchiyënguentše cada ona tojtsama ntšamo jamama tbojtsemncá, as nÿetsca ošbuáchiyënga cada te más ošbuáchiyana mochántsebomna, puerte jtsebobonshánëse.

*Cristoftaca cányiñe mo canÿacá jtsemnëse tsëm vida šmochtsebomna*

<sup>17</sup> Mëntšá entsemna ntšamo cbontsëtsëtsnacá, y Bëngbe Utabná endmëna nda tojama atše mando chaitsebomnama tšëngaftanga chca jáuyanama: Ndoñe más šmattsiyena bacna soyënga jtsamëse, mo chë Bëngbe Bëtsábioye nduabuátmënga mondbetsamcá; chënga jtsiyenana jtsamëse ntšamo cachëngbe ndoservena juabnënga tojtsamëndacá.

<sup>18</sup> Chëngbe juabnoca obenana mondbomna nÿe ndoñe ndegombre soyëngama josértama. Chënga ndoñe quemátsbomna chë Bëngbe Bëtsábocana yóbocana tšabe vida, er chënga ndoñe quematsleséncia chë Bëngbe Bëtsabe soyënga chëngbe ainaniñe chaómashënguama; y chca endmëna, er chënga tmojajuabó y tmojama chë Bëngbe Bëtsabe buayenana soye chëngbe ainaniñe tondaye chaondómashënguama.

<sup>19</sup> Chënga bacna soyënga tmojtsama ora, tondayama ntsenócochinÿenana; chënga nÿets tempo jesentšénana nÿetsca bacna soyënga amana, y chca jtsamana tondayama ntjatenajuabnycá.

<sup>20</sup> Pero chca ndoñe quenjatsmëna ntšamo tšëngaftanga Cristbe soyëngama šmojanatsjinÿe y ntšamo chábioye šmojanabuatmancá.

<sup>21</sup> Ndegombre tšëngaftanga chabiamana šmojanuena y ínÿenga tmojanabuatambá mo chábeñe ošbuachiyëngcá y ntšamo chë ndegombre soyënga Jesucristbeñe endbinÿncá.

<sup>22</sup> Chcasna, ntšamo tšëngaftanga šmojanjuabná, šmojanentina y šmojanamcá Jesucristbeñe cabá

ndošbuachená ora, mora lempe stëtsoye šmochjaquéda; ntšamo tempo tšëngaftanga šmojanjuabná, šmojansentina y šmojanamcá, canýe ondbiamnaye juabnentšana yojóbocana, tšëngaftanga bacna soyëngama juabnëngaca mandánënga jtsemnëse, y chë juabnënga tšëngaftangbioye cmojánaingñaye.

23 Tšëngaftanga cmontsamna tšëngaftangbe juabniñe tsëm y tšabe juabnënga jtsebomnana.

24 Tšëngaftanga cmontsamna jashjáchana mo tsmëma entšangcá jtsemnama, y chë ntšamo tempo šmojanamcá mora ndoñe cachcá chašmondëtsamama. Chca, tšëngaftanga šmochanjashjache jtsemnama ntšamo Bëngbe Bëtsá yomncá. Bëngbe Bëtsá chca tsmëma entšangcá tcmojábiana, tšëngaftanga chašmotsiyenama jtsemnëse Bëngbe Bëtsabe bominiñe tšabá yomna soyënga y chábioye jadórama soyënga, chë ndegombre soyënguentšana óbocana soyënga.

25 Chcasna, ya ndoñe más šmattsebohero, ndayá cada ona cháuyana ndegombre soyënga cachacá Jesucristbeñe ošbuachiyáftaca, er nyetscanga cánýiñe mondmëna mo nyë canýe entšangcá.

26 Nderado chacmojetëna, tcmojetëna causa ndaye bacna soye ndoñe šmatjama. Pero ndoñe šmatjaleséncia bënama chacmetëna y ndoñe nyets te chacmondetëna.

27 Ndoñe šmatjaleséncia Satanás ndayánaca tšëngaftangtaftaca chaomama.

28 Chë yojanatbëbaná chauajbaná atbëbanama y jatrabájama chaontšë; cachabe cucuátšeca tšabe trabajo chaotsóboma, chca, ndayánaca cha chaotsebomnama chë ujabótënga jatšatayama.

29 Bacna palabrënga ndoñe šmattsichamo, pero aíñe tšabe palabrënga y nýa chorsca ujabótama palabrënga, chë inýe entšangbioye jujabuáchama más Cristcá chamotsemnana, chënga Bëngbe Bëtsábiocana tšabe bendicionënga chamóyëngacñama, chë ndayá chašmojtšëtsësná sóyeca.

30 Ndoñe šmattsama soyënga, Bëngbe Bëtsabe Uámana Espíritu chabongmema. Bëngbe Bëtsá tojama Uámana Espíritu tšëngaftangbe ainaniñe cháuumashënguama, y chca, tcmojanainýnaná chabe entšanga bëtsemnayeca, chë yochjóshjango tescama, Bëngbe Bëtsá chabe entšanga nyetsca tescama yochjatsebacaye orscama.

31 Inýengbiana bacna juabnënga ainaniñe ndoñe chašmondëtsebomna, etonánënga ndoñe chašmondëtsemna, ni inýengtaftaca ndoñe chacmondetëna. Inýengbioye ndoñe chašmondëtsabuachembuana, inýengbioye ndoñe šmatjoyánguango y ndaye bacna sóynaca ndoñe šmattsama.

32 Njetscángaftaca tšábenga šmochtsemna, njetscanga šmochtsenlastemana y šmochjenperdóna, ntšamo Běngbe Bětsá, Crístbeyeca tcmojaperdonacá.

## 5

*Ntšamo yomna Běngbe Bětsabe básenga chamotsiyenama*

<sup>1</sup> Tšěngaftanga, Běngbe Bětsabe bonshana básenga quet-somñecá, nŷa šmochtsentšena cachacá jtsemnama.

<sup>2</sup> Smochtsiyena njetsca soyěnga bonshanánaca jtsaměse, ntšamo Cristo šojanababuanŷeshancá; chca, cha chabe derecho vida jtsobomñama cachcá tojanonŷá y běngbiana tojanóbana. Y ntšamo Cristo tojanmcá, yojamna Běngbe Bětsábioye jětschuayama, y chabe bominiŷe tša tšabá yojtsemna, mo ndaye ora Běngbe Bětsá oyejuayá jóyěngacñana ndayá tcojóna y altaro ca tcojajuinŷese, y chě soye botamana jtsonguětsiyana.

<sup>3</sup> Tšěngaftanga, Běngbe Bětsábenga šmogněnga, ndoñe quecmátamna shembása o boyabásaftaca bacna soyěnga jtsamana, ni chca játamama jtsejuabnayana y jtsebošana, y chě nŷe yapa jěsebošana más soyěnga inŷengbiana jtsebomnama cach ndoñe. Ni chě soyěngama ndoñe šmattsóyebuambnaye.

<sup>4</sup> Bacna soye ndoñe šmattsóyebuambnaye, ni corente ntjenjuaboycá, ni nŷe ntšámnaca bacna soye jenbotatšěmbonana cach ndoñe, er chě soyěnga tšěngaftangbiana ndoñe tšabá ntsemnana. Chca játamamna, más tšabá, Běngbe Bětsá šmochtsatschuanaye.

<sup>5</sup> Er tšěngaftanga ya šmondětatsěmbo, ndocna chě shembása o boyabásaftaca bacna soye amá, ndocna chě nŷe chabe bacna juabněngaca soyěnga jtsamama oyená, o chě nŷe más soyěnga inŷengbiana jtsebomnama bošá y amá (chca jtsayanana chabiama más iuámama soyěnga jtsebomnana, Běngbe Bětsábioye jatsbobonshánama), chca aměnguentšana ndocná tondaye queochatóyěngacñe ndayá Běngbe Bětsá chabe entšángbioye jatšatayama tojašebuachenantšana, Cristo y Běngbe Bětsabe aměndayoca.

<sup>6</sup> Ndocná chacmondaingñe ndoñe ndegombre tondmėna palabrěngaca, bacna soyěnga chašmotsamama, er chě causa chě uabouana castigo echanjobaye, ndáyeca Běngbe Bětsá chábioye nděyeunaněnga yochjácastigaye.

<sup>7</sup> Chíyeca, chca aměngbe soyěnga tondaye šmattsama.

<sup>8</sup> Tempo tšěngaftanga šmojanियena bacna juabněnga jtsebomněse y bacna soyěnga jtsaměse, mo ibetiñe cuaftsiyencá, pero mora Běngbe Utabnáftaca cánŷiñe mo canŷacá bětsemnayeca, chabe soyěnga šmontsetátšěmbo y

sempre šmondétsemna cháftaca, chë entšangbe juabnënga binÿnayáftaca. Smochtsiyena jtsamëse mo chë binÿnayabe entšangcá.

<sup>9</sup> Chë binÿnayábeyeca entšanga tšabe soyënga jtsamana, chë Bëngbe Bëtsabe bominiñe tšabá yomna soyënga, y ndegombre soyëgnaca.

<sup>10</sup> Nÿa šmochtsentšena soyënga jamama, Bëngbe Bëtsá oyejuayá chaotsemnama.

<sup>11</sup> Chë mo ibetiñe cuaftsiyencá oyenëngbe bacna soyënga tondayama ntoservénana, y tšëngaftanga chca ndoñe šmattsama. Chamna, chëngbioye šmochjínÿanÿiye chënga ndoñe tšabá tmonjamama.

<sup>12</sup> Ndegombre, nÿe chë ndayá chënga mo iytëmencá tmojamama jóyebuambayama ya cuantsëuatja;

<sup>13</sup> pero nÿetsca soyënga binÿniñe tmojacjá ora jtsopodénana tšabá jinÿama ntšamo ndegombre tomncá. Cachcá, ntšamo entšanga tmojamcá chë binÿnayá chaojinÿanÿé ora, echantsopodena jtsotatsëmbuama ntšamo chë soyënga yomnana;

<sup>14</sup> er ndayánaca binÿniñe tojtsinÿinÿena, jtsopodénana jinÿama ntšamo ndegombre chë soye tomncá. Cachcá, ntšamo entšanga iytëmencá tmojtsamcá chë binÿnayá chaojinÿanÿé ora, chënga mochántsetatsëmbo bacna soyënga imojtsamama. Chíyeca mëntšá jtsichámuana:

Botamana cochjájuaboje, aca ndoñe quecátobena jenomándana, mo canÿa cuaftsomañcá;

chë bacna soyënga ama causa, Bëngbe Bëtsabe bominiñe mo obanëngcá imomnënguentsana šmochtsojuánañe,

y Cristo acbe juabnënga echantsebínÿnaye ca.

<sup>15</sup> Chcasna, šmochtsantješna ntšamo tšabá yomncá jtsamëse chašmotsiyenama. Ndoñe šmattsiyena jtsamëse, mo chë Bëngbe Bëtsabe soyëngama ndosertanëngcá, pero aíñe chë chca soyëngama osertanëngcá.

<sup>16</sup> Lempe ntšamo chašmojobenacá nÿets tempo tšabe soyënga šmochtsama, er quem tempo entšanga yapa bacna soyënga montsama.

<sup>17</sup> Ntjenojuaboycá ndoñe šmattsama, mo chë ndosertanëngcá. Pero aíñe bëtscá šmochtsentšena ndayá Bëngbe Utabná jamama yobošcá chacmósertama.

<sup>18</sup> Ndoñe šmattsótmenaye, er chë soye entšábioye juanatsana jenomándama ndoñe chaondëtsobenama; chamna, šmochjama Uámana Espíritu sempre y bëtscá tšëngaftangbe ainaniñe chaotsemándama.

<sup>19</sup> Šmochjenatsëtsaye Salmos librëšañe enduábemana cantënga jacántase, Jesucristbe soyëngama cantëngaca y chë

Bëngbe Bëtsabe Espíritu inétsama tšëngaftanga chašmotsobena jacántama soyëngaca; chca, nyëts ainánaca Bëngbe Utabnabiamana šmochjacántaye y cha šmochtsatschuanaye.

<sup>20</sup> Nyëts tempo y lempe ntšamo cha tojamama Bëngbe Bëtsá chë Taitá šmochtsatschuanaye, Bëngbe Utabná Jesucristbiajana.

*Ntšamo yomna canye yebnentšënga chamotsemnana*

<sup>21</sup> Nyëtscanga šmochtsenëyeunana, tšëngaftanga Crístbioye puerte šmorrespetánayeca.

<sup>22</sup> Shémanga, šmochtsetátšëmbo tšëngaftangbe boyanga chë yebnentša mándayënga imomnana; y nyëts tempo chca šmochtsama, Bëngbe Utabná chašmotsobedecénama.

<sup>23</sup> Er boyá endmëna shembe mandayá y inyëná, ntšamo Cristo chë ošbuáchiyëngbe mandayá y inyëná endmëncá. Cha chënga tojatsebacá y mora cha chënga entsamënda, mo chë bestšaše nyëts cuerpo jtsemmandayancá;

<sup>24</sup> y chca, ntšamo chë ošbuáchiyënga, Cristo chëngbe amëndayá yomnana imotatsëmhcá y chca jtsamana, cachcá, chë shemángnaca entsamna jtsemnana nyëtsca soyënguiñe chëngbe boyángaftaca.

<sup>25</sup> Boyanga, tšëngaftangbe shémanga šmochtsababuányëshana, ntšamo Cristo chábeñe ošbuáchiyënga yojanababuanyëshancá, y chca, chabe derecho vida jtsobomñama cachcá tojanonýá y chëngbiana tojanóbana.

<sup>26</sup> Chca tojanma, chënga chabe entšanga y puerte tšábenga jábiamama; y chënga tmojánenabaye ora, tmojaninýanýe Bëngbe Bëtsá chëngbe bacna soyënga tojánabuajuanama, y chabe delante tšábenga chamotsemnana cha tojanmama. Cha chca tojanma, er chënga chábeñe imojtsanošbuaché, chabiamana buayenana soyënga tmojanuena ora.

<sup>27</sup> Cha chca lempe tojanma, chë ošbuáchiyënga japróntayama corente tšábenga y uámanënga cachabiamana chamotsemnana, ndocna bacna soye ndbomnënga, ni ndocna entšá chaondobená jayanama chënga imomna chë ndoñe tšabá tmonjamënga ca, ni ndocna inye cachca sóyeca.

<sup>28</sup> Ntšamo canye boyá cachabe cuerpo endbetsebobonshancá, cachcá cha bontsemna chabe shémbioye jtsebobonshánana. Nda chabe shémbioye tbojtsebobonshana, cachábioye jtsebobonshánana, er chata cánýiñe jtsemnana mo nye canye entšá cuenta.

<sup>29</sup> Er ndocná cachabe cuerpo jtsáboyënjana, ndayá saná janguangoñana y jtsinýenana, ntšamo Cristo bënga chë ošbuáchiyëngaftaca endbetsamcá;



<sup>30</sup> er bēnga n̄yetscanga cānyīñe mondmēna mo chabe cuerpo cuaftsemncá, y bēnga mo chabe cuerpentša soyēnga cuaftsemncá.

<sup>31</sup> Ntšamo Bēngbe Bētsabe uabemana palabrenguiñe endayancá: “Chíyeca, boyabása chabe taitá y chabe mamá echanjésabashejuana chabe shémaftaca jenútanama, y chē útata mo canyáca bochántsemna ca.”

<sup>32</sup> Chē soyēnga josértama puerta totcá comna, pero atše šcuayana, chē soye entsoyebuambná ntšamo Cristo chábeñe ošbuáchiyēngaftaca yomnama.

<sup>33</sup> Pero morna, tšēngaftanga cada ona cachabe shémbioye chabotsebobonshana, ntšamo cachá iuenobobonshancá, y shema boyábioye ndoñe stētšoye chabondēquedá.

## 6

<sup>1</sup> Básenga, Bēngbe Utabnáftaca cānyīñe mo canyáca bétsemnayeca, tšēngaftangbe bētsétsangbioye šmochtsayaunana, er chca jamana tšabá endmēna.

<sup>2</sup> Moisesbe leyiñe canye mando endmēna, y chentše endmēna chē Bēngbe Bētsabe natsana mando, ndayentše cha tojašbuachená tšabe bendicionēnga jamama: “Acbe taitá y acbe mamá ndoñe stētšoye catjēftsaquédaye,

<sup>3</sup> tšabe vida chacuetsobomñama y quem luarentše baytē chacuetsiyenama.”

<sup>4</sup> Taitanga, ndoñe šmattsama tšēngaftangbe básenga chauetēnama; más tšabana, chēnga šmochtsabéchaye jtsabuátambayēse y jucácanēse, ntšamo Bēngbe Utabná endbetsabuatambaycá.

<sup>5</sup> Tšēngaftanga, chē n̄yets tempo n̄ye ín̄yabiana oservénēnga, tšēngaftangbe nduiñēnga šmochtsayaunana; chca šmochtsama puerta respétoca, bētscá cuedádoca y n̄yets ainaniñe tšabe juabnēngaca, mo cach Crístbioye cuaftseservencá.

<sup>6</sup> Y chca chē nduiñēngbioye šmochtsaservena, ndoñe n̄ye chēnga chacmojtsēnyā ora, mo nda n̄ye entšangbe delante tšabá joquédama cuaftsebošcá, ndayá Cristbe oservenēngcá, chēnga n̄yets ainánaca jtsamana ntšamo Bēngbe Bētsá tojtsebošcá.

<sup>7</sup> N̄yetsca trabajotémēnga šmochtsama n̄yets tšēngaftangbe añémoca, mo Bēngbe Utabnabiana cuaftsetrabajacá, y ndoñe n̄ye entšangbiana.

<sup>8</sup> Er tšēngaftanga ya šmondētatsēmbo, cada ona, n̄yets tempo n̄ye ín̄yabiana trabajayá o n̄ye cachabiana trabajayá tomna, ntšamo tšabe soyēnga tojamcá Bēngbe Utabnábiocana yochjójyēngacñe.

<sup>9</sup> Y tšëngaftanga, ndëmuanyëngbiama ínÿenga nyets tempo imoservena, cachcá tšabá chëngaftaca šmochjamna, tondayama ntsaútatjnayëse. Smochtsenójuabnaye, Bëngbe Utabná chë celoca endmëná, tšëngaftanga y chëngbe mandayá yomnama, y chabiama nyetscanga cachcá monduámana.

*Ndayá Bëngbe Bëtsá entsanga tojatsatá Satanasbiama jenëuyanama*

<sup>10</sup> Y morna, Bëngbe Utabnáftaca cánÿiñe mo canÿacá jtsemnëse, ainaniñe bëts añemo šmochtsebomna, chë Bëngbe Utabnabe bëts obenanentsana óbocana añemo.

<sup>11</sup> Mo canÿe soldadcá, ba soyënga jtchëtjuana chë tmojtsentsjananga ora uayayëngbiama jenëuyanama, tšëngaftángnaca cachcá, nyetsca chë Bëngbe Bëtsá cmojatsatá soyëngaca šmochtseprontana jenëuyanama, tšëngaftanga jáingñama Satanás ntšámnaca tojtsama ora, ndoñe chacmondáyënjanama.

<sup>12</sup> Er bënga ndoñe quemuatenojuerzana cach quem luarentša entsángaftaca jenëyënjanama, ndayá bacna espíritënga mando bomnëngaftaca; bacna espíritënga obenana bomnëngaftaca; y quem luarentša entsanga, chë bacna juabna bomna causa y Bëngbe Bëtsabe soyënga nduabuatma causa, mo ibetiñe cuaftsoyencá oyena entsángbioye amëndaye espíritëngaftaca; y chë tsbanánoca luarënguñe imomna y bacna soyënga chaotsebínÿnama ama espíritëngaftácnaca.

<sup>13</sup> Chíyeca, lempe ntšamo Bëngbe Bëtsá cmojatsatacá šmochjójyëngacñe y chë soyënga jtsamëse šmochtsiyena jtseprontánama, mo canÿe soldado jenëuyanama y jáyënjanama bëtská soyënga tojtchëtjácá. Chca šmochjama, chë uayayá Satanás tšëngaftangbioye jáingñama chaojtsama ora ndoñe chacmondáyënjanama, y jenëuyanama lempe jtsamëse, chašmobená cha jayënjanama.

<sup>14</sup> Mo canÿe soldadcá, jabuache jtsanayana y cochaca canÿe morocho soye jenácochjatsana jtsevalentiamna y ndoñe chamondëyënjanama, tšëngaftángnaca cachcá, ntšamo ndegombre yomncá jtsamëse šmochtsiyena, mo chë jabuache cuaftasnacá, y chë Bëngbe Bëtsabe bominÿiñe tšabá yomna soyënga jtsamëse, mo chë morocho soye cochaca cuaftjencochjatscá, chca, Satanás tšëngaftangftaca tondaye chaondobená jamama.

<sup>15</sup> Mo canÿe soldadcá jtshëcochëtjuana betscó jobónjuama jtseprontánama, tšëngaftángnaca cachcá, Bëngbe Bëtsabe obenánaca sempre šmochtseprontana jtsabuayiyayama ntšamo Bëngbe Bëtsá inétsama entsanga tempcá tšabá cháftaca chamotsatsmënama.

16 Canÿe soldado escudo jtsebmomnana chë uayayabe uajuinÿinÿana flechëjuangá chabe cuerpiñe ndoñe chaonduámashënguama. Cachcá, tšëngaftanga cmontsamna Jesucristbeñe puerte jtsošbuáchiyana, mo escudo cuaftsebmncá, chca, chë bacna soyënga mandayá Satanás tšëngaftangaftaca tondaye chaondobená jamama, tšëngaftangbe ošbuáchiyana jabuajuánama cha tojtsama ora.

17 Mo chë soldadká, canÿe morocho buchtsanëse tojtabuchëtsëse chabe bestšaše jenëuyanama, tšëngaftángnaca cachcá, sempre šmochjésejuabnaye Bëngbe Bëtsá cmojátsebacama, y chë juabna cmochanjújabuache, mo canÿe morocho buchtsanëse cuaftsabuchëtsancá. Mo canÿe soldadká, chë uayayábioye jayënjanana, chabe espadëjaca japéliase, cachcá tšëngaftanga, Bëngbe Bëtsabe palabra šmochtsóyebuambnaye Satanás jayënjanama. Uámana Espíritu jtsamana, tšëngaftanga Bëngbe Bëtsabe palabra chašmotsebmomnana.

18 Nÿets tempo chë Uámana Espíritbe uajabuáchenanaca Bëngbe Bëtsáftaca šmochtsencuëntaye, lempe ntšamo Bëngbe Bëtsáftaca jencuëntama yomncá y chábioye jtseimpadánëse. Yeuana šmochtsenójuabnaye ntšamo šmojtsichámuama, Bëngbe Bëtsáftaca chašmojtsencuënta ora, y chca šmochjama Bëngbe Bëtsábeñe sempre jtsobátmanëse, y Jesucristbeñe ošbuáchiyëngbiamana nÿetscangbiamana cha šmochtseimpadana.

19 Atšbiámnaca Bëngbe Bëtsá šmochtseimpadana, atše jóyebuambayama chajjontsé ora, cha chë buayenana soye chašúyanama; y atše chayobená tondayama ntjatauatjácá jóyebuambayana, y chca, entšanga chayinÿanÿé Jesucristbiamana tšabe noticiënga, ndayá chënga tempo ndoñe monjántatšëmbo.

20 Bëngbe Bëtsá šojichmó mo canÿa chabe cuenta oyebuambayacá, chë buayenánama entšángbeñe jóyebuambayama, y chca bétsamama, mora atše utamená séntsemna. Atšbiamana Bëngbe Bëtsá šmochtseimpadana, atše chayobenama Cristbe buayenánama tondayama ntjatauatjácá jóyebuambayana, ntšamo atše jamama šojtsemncá.

### *Pablo chënga jtadióšoftanama*

21 Tíquico, Jesucristbeyeca bëngbe bonshana catšata y canÿe entšá tšabe palabra bomná, Bëngbe Utabnabe trabajo jamama oservëniñe, ntšamo atše stsemnana y ndayá stsamama tšëngaftanga chašmotsetatšëmbuama, lempe cmochanjácuntaye.

22 Chama cha tšëngaftangbioye sënjichmó, ntšamo muentše fstsemnana chacméyanama, y tšëngaftanga ainaniñe añemo chašmotsebmomnana chaomama.

<sup>23</sup> Atše sěntseimpadana Běngbe Bětsá chě Taitá y Běngbe Utabná Jesucristo, chaboma chě Jesucristbeyeca catšátangbe ainaniñe tšabe ebionana chašmotsebomnama, y Běngbe Bětsábioye y ínĵengbioye puerte chašmotsababuányeshanama, Jesucristbeñe tšěngaftangbe ošbuachiyánaca;

<sup>24</sup> y chaboma, chě Běngbe Utabná Jesucristbioye běts bonshanánaca imobobonshaněngbeñe tšabe bendicioněnga chaotsemnama, canĵe ndocná yondobena jatrócama bonshanánaca.

## Filipenses

### *Jacheuayama*

<sup>1</sup> Pablo y Timoteo, Jesucristbiana oservénata, quem tsuanácha fsëntsabiamná Filipos bëts puebloca Bëngbe Bëtsabe entsanga imomnënga, y Jesucrísoftaca cánÿiñe mo canÿacá imomnëngbiana. Fsëntsabiamná nÿetsca chë Jesucrístbeñe ošbuáchiyëngbiana, nÿetsca chentša uanatsanëngaftaca y chë inÿe ošbuáchiyënga ujabuáchaniñe trabajayëngaftaca.

<sup>2</sup> Atše sëntseimpadana Bëngbe Bëtsá Bëngbe Taitá y Bëngbe Utabná Jesucristo, chaboma tsëngaftangbeñe tsabe bendicionënga chaotsemnama, y chaboma tsëngaftanga ainaniñe tsabe ebionana chašmotsebonnama.

### *Pablo Bëngbe Bëtsábioye tbojtanchuá ošbuáchiyëngbiana*

<sup>3</sup> Cada tsëngaftangbiana stenojuabó ora, Bëngbe Bëtsá tsëngaftangbiana sëndbëtsatschuanaye;

<sup>4</sup> y Bëngbe Bëtsá tsëngaftangbe tsabiana stseimpadana ora, atše corente oyejuayá chca sëndbëtsama,

<sup>5</sup> ntšamo tsëngaftanga atše šmojuájabuachama, tsabe noticiënga Jesucristbiana entsanga abuayiyñayiñe, tsëngaftanga Jesucrístbeñe jtsošbuáchiyama šmonjanbojatsé orscana y méntscñoñama.

<sup>6</sup> Atše corente sëntsetatšëmbo, Bëngbe Bëtsá tojanbojatsé tsëngaftangbe ainaniñe tsabe soyënga jtsamama, y más tsabe soyënga yochtsamama. Y chca yochtsama, lempe ntšamo tsëngaftangbiana cha yojtsejuabnacá chaohnënguëntscuana, y chca, Cristo Jesús yochjésabëntscuana.

<sup>7</sup> Atše tsëngaftangbiana sempre ainaniñe sëndbëtsenojuabnaye, chíyeca atšbiana puerte tsabá entsemna chca tsëngaftangbiana jtsejuabnayana. Tsëngaftanga nÿetscanga atše šmonjuájabuache jamama chë Bëngbe Bëtsá tša tsabia bëtsemnayeca šonjanëntsabuaché trabajo. Atše chë Bëngbe Bëtsabe trabajo sëndbomna jamama, mora sëntsetámëna ora o natjëmbana shjoca stsana ora, nÿetscángbioye tsabá inÿinÿñayiñe chë tsabe noticiënga ndegombre soyënga bëtsemnama, y bëtscá amiñe entsanga chë soyënguiñe corente chamotsošbuáchema.

<sup>8</sup> Bëngbe Bëtsá yotátšëmbo ntšamo sëntsichamcá ndegombre bëtsemnama. Atše tša sëntseboše tsëngaftanga jányama y cbontsababuanÿeshana cachcá ntšamo Cristo Jesús atše šondbobonshancá.

<sup>9</sup> Atše, Bëngbe Bëtsá sëntseimpadana tsëngaftanga cada te más cha chašmotsebobonshánama y chë inÿyëngbioynaca,

chca, osertánana chašmotsebomnama ndayá chë ndegombre soye bétsemnama jtsetátšëmbuama, y chašmotsetátšëmbo ndayá tšabá o ndayá ndoñe tšabá tondmënama;

<sup>10</sup> y chca, chašmotsobena sempre jabocacayama chë puerte tšabá yojtsemna jamama soye. Chca, Cristo yochjésabo ora, tšëngaftanga puerte tšabe vida šmochántsebomna, bacna soyéngaca ndëmandánënga; y tondaye quešmochátama, chora chë entšanga chca ndoñe tšabá quenátsmëna ca chamuátichamuama.

<sup>11</sup> Y lempe ntšamo chašmojtsamcá ndegombre tšabá echántsemna, y nÿe Jesucristo endobena jamama entšanga chca chamotsamama. Nÿetsca chë tšabe soyënga echántsemna, Bëngbe Bëtsá puerte bëtsá y uamaná bétsemnama jinÿanÿiyama.

*Atšbe vida endmëna Cristo jtseservënama*

<sup>12</sup> Jesucristbeyeca atšbe catšátanga, atše sëntseboše tšëngaftanga chašmotsetátšëmbo, ntšamo atše tijapasama, más bëtscá entšanga Jesucristbiamá tšabe noticiënguiñe chamotsošbuáchema tojoservema.

<sup>13</sup> Chca, nÿetsca chë romanëngbe mandadbe bëts yebna bojanÿá soldadënga y chë inÿe entšanga quem luarentše montsetátšëmbo atše utamená stsemna, atše Cristbiamá tstrabája causa.

<sup>14</sup> Atše utamená sëntsemnayeca, ošbuáchiyënguentshana banga ainaniñe más añemo montsebomna, y chíyeca chënga Bëngbe Bëtsabe palabra más y más añémoca y tondayama ntjatauatjcá entšángbioye montsabuayiyná.

<sup>15</sup> Ndegombre entsemna, báseftanga Cristbiamá entšángbioye imojtsabuayiyná, pero chëngna nÿe ntšamo tijashjachcá šmojtsántšabošama chca, y chënga imojtseboše, bëtscá jtsamëse, atše chayotjáyana; chíyeca chca imojtsama. Pero ínÿengna, entšángbioye montsabuayiyná tšabe soyënga ínÿengbiamá jamama ndegombre imojtsebóseyeca.

<sup>16</sup> Mënga chca montsama, atše šmondobonshánayeca y Bëngbe Bëtsá chë trabajo šojanëntšabuáchema mondëtatšëmboyeca, Jesucristbiamá tšabe noticiënga ndegombre bétsemnama entšanga jtsinÿanÿnayana;

<sup>17</sup> pero chë ínÿengna chca imojtsama, ndoñe tšabe soyënga ínÿengbiamá imojtsebóseyeca, ndoñe chënga chë ínÿengbiamá tšabe soyënga imojtsebóseyeca. Chënga Jesucristbiamá imojtsoyebuambná nÿe entšanga chënga chamotsarrespetánama, y nÿe cachëngbiamá tšabe soyënga jtsebomnama imojtsebóseyeca. Chënga jtsejuabnayana mochjobenaye jamama atše más chašotsengmënama ca, muentše utamená chjëftsemnëntscuana, chënga entšángbioye chca tmojtsabatambá ora.

18 Pero ¿ndayase chë soye atšbiamá? Masque ntšámnaca, tšabe soyënga ínÿengbiamá tmojtseboše o ndoñe, Cristbiamá montsoyebuambná, y Cristbiamá chënga montsoyebuambnama atše oyejuayá sëntsemna.

Y cabá más chanjóyejuaye,

19 er atše sëntsetatšëmbo quem utámenentšana atše chjësebocnama. Atše sëntsetatšëmbo muentšana chjësebocnama, tšëngaftanga Bëngbe Bëtsá šmoimpadánayeca y Jesucristbe Uámana Espiritu šuajabuachánayeca.

20 Atše corente jtsošbuáchiyëse Bëngbe Bëtsábeñe sëndobátmana, atše ndocna te tondaye chanjëftsema y chama chjaisëuatjama, pero aíñe nÿetscangbe delante beca añémoca chayoyebuambá, y nÿets tempo pero más mora, lempe ntšamo stsamama y stsihámuama, atše chaima entšanga chaminÿanjëma Cristo puerte bëtsá y uamaná bëtsemnama, y chca chántsama masque ainá o obaná chaitsemnëse.

21 Chca entsemna, er atšbe vida Cristo jtseservénama endmëna, y nderado atše chajjóbanëse, nÿetscanga puerte bëts soye mochanjëftsashjache.

22 Pero atše ainá stsemnëse, chanjobenaye más uámana trabajo Cristbiamá jëftsemama. Chíyeca, atše ndoñe corente quetsátstatšëmbo ntšamo mora jobuáyanana, ainá jtsemnama o ndoñe.

23 Ndegombre mora puerte šontsëtëmnana ntšamo jobuáyanana: atše tša sëndboše ndoñe más quem luarentše ntjëftsemnana, Crísoftaca jtsatsmënama, y ndegombre chca atšbiamá puerte tšabá nántsemna;

24 pero, ínÿoicana tšëngaftangbiamá šontsemna ainá jëftsemnana.

25 Atše corente sëntsetatšëmbo chca ndegombre yochtsemnama, y chíyeca sëntsetatšëmbo atše cabá ainá chjëftsemnama, tšëngaftanga jujabuáchama más Jesucristbeñe chašmotsošbuáchema, y chiñe bëtscá oyejuayana chašmotsebonnama.

26 Chca, atše tšëngaftanga jutsëtsayama choye chajjá ora, chašmobená inÿe soyama más Cristo Jesús jëtschuayama.

27 Morna, chë más uámana soye entsemna, tšëngaftanga chašmotsama ntšamo jtsiyenama ntšamo chë Cristbiamá tšabe noticiënguiñe endayancá. Y mëntšá, cachcá, jutsëtsayama chajjá o ndoñe, atše chántsetatšëmbo tšëngaftanga Jesucristbeñe ošbuáchiyama ndoñe šmontsajbanama, y aíñe beca ošbuáchiyana chábeñe šmotsobomñama; nÿetscanga cachcá šmojtsejuabnáyeca y nÿetscanga cach soye šmojtsebóšeyeca, cánÿiñe nÿetscanga enutanánënga jtsenojuerzánëse, ndocná

chë tšabe noticiënguifne tšëngaftanga šmobomna ošbuáchiyana chacmondábuajuanama.

<sup>28</sup> Tšëngaftangbe uayayëngbiana tondayama šmattsauatja, sempre bëtscá añemo šmochtsebmna. Chca tšëngaftanga šmochanjínÿanÿiye chënga pochocánënga mochtsemnama, y tšëngaftangna atsebácanënga šmochtsemnama. Y chë soye Bëngbe Bëtsá tšëngaftangbiana echántsama, Crístbeñe šmošbuachéyeca.

<sup>29</sup> Chca echanjopása, er Bëngbe Bëtsá tšëngaftangaftaca puerte tšabia endmëna, Crístbiana oservénënga Bëngbe Bëtsá tcmojábiana, pero ndoñe nÿe chábeñe chašmotsošbuáchema, ndayá chabiana chašmosufrímnaca.

<sup>30</sup> Tšëngaftanga y atše cachca soyama montsenojuerzana. Tšëngaftanga ya šmonjinÿe ntšamo atše sënjánenojuerzana, entšanga jinÿanÿiyama chë tšabe noticiënga ndegombre soyënga bëtsemnama. Y mora, tšëngaftanga noticiënga šmochanjóyëngacñe ntšamo atše cach soyama cachcá tsamama.

## 2

*Ndoñe uámanënga šmattsenobiamnaye, ntšamo Cristo ndoñe tonjanmcá*

<sup>1</sup> Tšëngaftanga, Crístoftaca cánÿiñe mo canÿacá jtsemnëse, ainaniñe bëtscá añemo šmontsebmna. Cristo cmondábabuanÿeshana, y chë soye tšëngaftanga cmontsëjabuachana nÿetsca trabajënguentsana tšabá jabocanama. Y tšëngaftanga Crístbe Espíroftaca cánÿiñe mo canÿacá šmontsemna; tšëngaftanga nÿetscanga šmondénbobonshana y nÿetscangbiana jóngmiana šmonduamana.

<sup>2</sup> Tšëngaftanga lempe chca šmobómnayeca, atše corente oyejuayá šmochjábema, er tšëngaftanga nÿetscanga cachcá cánÿiñe šmondëjuabná, cachcá nÿetscanga šmondénbobonshana, nÿetscanga mo canÿe ainancá šmondobomna, y nÿetscanga cachca soye šmondboše.

<sup>3</sup> Tondaye šmattsama nÿe ínÿenga chë sóyeca chamotjáyanama, o nÿe tšëngaftanga tša bëtš soyënga amënga šmomna ca entšanga chamotsejuabnama; pero ndoñe yapa uámanënga šmojtsemna ca šmochtsejuabnaye, y cada ona chaotsejuabná chë ínÿenga bëngbiana más uámanënga imomnama.

<sup>4</sup> Y ndocná tondaye chaondëtsama, nÿe chabiana tšabe soyënga jónÿenama, sinó ndayánaca chaotsama nÿetscangbiámnaca tšabe soyënga jónÿenama.

<sup>5</sup> Tšëngaftanga cmontsamna jtsemnana ntšamo cach Cristo Jesús yojanjuabná y yojanamcá:



6 Cha nÿets tempo yomna cach Bëngbe Bëtsacá y uamaná cach  
Bëngbe Bëtsacá,

pero masque chca, ndocna te yonjanjuabná:

“Atše sëntseboše nÿetsca entšanga nÿets tempo atše  
chašmotserrespetana, ntšamo atšbe Taitá Bëngbe Bëtsá  
mondërrespetancá ca.”

7 Pero cha mo nduamanacá tonjanóbema, nÿetsca chabe  
bomna soyënga jëftseboshjonëse,

y ndegombre, mo canÿe oservernacá tojanóbema.

Cha canÿe entšacá tojanonÿná,

y entšanga canÿe ndegombre entšacá tmojáninÿe.

8 Cachá tojanlesenciá nduamaná jtsemnama,

y sempre Bëngbe Bëtsábioye ibnayeunana, y jobanámnaca,  
cruciñe jóbanëse.

9 Ndayá cha tonjanmama, Bëngbe Bëtsá, chë celoca más  
uámana luare tbojaninÿinÿe

y chë más uámana uabaina, chë más bëtsëtsangbe  
uabainënguentša uabaina tbojabuajo;

10 y chca, celoca imomnënga, y quem luarentše y  
fshantse jashenoye imomnëngnaca nÿetscanga  
chamóshamentšema,

Jesúsbioye jëtschuayama, chabe uámana uabaina jayanëse;

11 y chca, nÿetscanga chamuayana Jesucristo chëngbe Utabná  
yomna ca,

chca, Bëngbe Bëtsá chë Taitá nÿetscanga chamotsatschua-  
nama.

*Crístbeñe ošbuáchiyënga entsamna mo buashinÿinÿana es-  
trelëngcá jtsemnana*

12 Chcasna, atšbe bonshana catšátanga, ntšamo  
atše tšëngaftangftaca sënjamna ora, atše sempre  
šmonjanëyeunancá, mora más šmochtsatënëyeunana, mora  
atše tšëngaftangbiama bënoca stsemna ora. Bëtsëtsanga  
ntjatenobiamnycá y Bëngbe Bëtsá jtserrespetánëse  
šmochtsama soyënga, chca, tšëngaftangbe tšabe videntše,  
Jesucristbeñe ošbuáchiyënga quetsomñecá, tondaye  
chacmondëtsabuáshebenama;

13 er Bëngbe Bëtsá nÿets tempo tšëngaftangbe ainaniñe  
inétsama tšëngaftanga ndayánaca chašmotsebošama y  
chašmotsamama, ntšamo cha yojuabná y yobošcá  
chaotsemnana.

14 Ndayánaca jamama chacmojtšëjaboto ora, chë soye  
šmochjama, chca jamama yapa totcá comna ca ntjatichamcá  
y ínÿengaftaca jabuachana ntjatenatsëtsnycá.

15 Chca cmontsamna, chca, tšëngaftanga šmojtšama  
soyënguiñe ndocná ndocna bacna soye chaondinÿenama,  
y puerte tšabe vida chašmotsebonnama. Bëngbe Bëtsabe

puerte tšabe basengcá šmochtsiyena, tšëngaftanga chë šmojtsemnënga canye luarentše puerte bacna entšángbeñe y sempre bëtscá bacna soyënga jtsamana uamanëngbeñe. Chíyecna, tšëngaftanga šmochtsiyena puerte tšabe soyënga jtsamëse, y chca tšëngaftanga šmochántsemna mo canye ibetiñe luarentše buashinÿinÿana estrellëngcá.

16 Chë tšabe soyëngaca entšángbioye chauinÿanÿë ntšamo muanjobenaye tšabe vida jtsebmnama. Chca chašmojamëse, Cristo cachiñe yochjésabo ora, atše chantsobena tšëngaftangbeyeca puerte oyejuayá jtsemnana, er ntšamo chašmojamcá echanjínÿanÿiye atše ndoñe nÿe bonamente jabuache tijatrabajá. Chca atše chántsemna mo nda bëtscá tojoprontá, y chentsana ínÿengaftaca tojótjajo ora, chëngbioye tojtsayëñjanacá.

17 Mo chë altaroca canye bachna buiñe tojuabuashanacá, Bëngbe Bëtsá jëtschuayama tmojóba ovesháftaca, cachcá nderado echántsemna atšbe buiñe, atše šmojóbase, chca, Bëngbe Bëtsábioye oyejuayá jabemama. Tšëngaftanga bëtscá šmojalemošná, Crístbeñe tša šmošbuachéyeca, y tšëngaftangbe ošbuachiyánënaca endmëna Bëngbe Bëtsábioye oyejuayá jabemama. Chë uta soye echántsemna mo chë buiñe y chë oveshacá, Bëngbe Bëtsábioye oyejuayá jabemama. Atše chca stjabanëse, puerte oyejuayá stsemna, y stjama tšëngaftángnaca cachcá chašmotsóyejuama.

18 Chca, tšëngaftanga cmontsamna oyejuayënga jtsemnana, y šmochjama átšnaca oyejuayá tšëngaftangaftaca chaitsemnama.

### *Timoteo y Epafrodito*

19 Atše becá ošbuachiyánaca Bëngbe Utabná Jesúsbeñe jtsobátmanëse, sëntsejuabná pronto chjobenaye Timoteo tšëngaftangbioye jíchmuama, tšëngaftangbiama chašuabocuéntama, y chca, atše más añemo chaitsatsbomnama.

20 Er nÿe cha endmëna canya cach atscá ainaniñe juabnáyá, y cha ndegombre puerte entseboše tšëngaftanga tšabá chašmuetsiyenama;

21 chë ínÿengna nÿetscanga nÿe cachëngbe tšabiama ndayánaca jamama jtsejuabnayana, y tondaye ntsebošana Jesucristbiama jamama.

22 Pero cach tšëngaftanga ya šmondëtatšëmbo, ntšamo Timoteo chë padecena soyënguentshana tšabá tonjétsobocñama, y ntšamo Timoteo y atše, mo canye uaquiñá chabe taitábioye cuaftsajabuachancá, cánÿiñe fsënjantrabája, más bëtscá entšanga chë tšabe noticiënga chamóyëngacñama.

23 Chcasna, atše sentsobátmana cha jíchmuana, ntšamo átšeftaca jopásama chaitsetátšẽmbo y cachora;

24 pero bẽtscá ošbuachiyánaca sentsobatmánayeca, sentsējuabná, Bẽngbe Utabná chašojtábocnẽse, pronto átšnaca chjobenaye choye jama.

25 Atše sentsējuabná yojtsemna, Jesucristbeyeca bẽngbe catšata Epafrodítanaca choye jíchmuana, nda átšeftaca cánỹiñe endẽtrabája y chẽ tšabe noticiẽnga ndegombre soyẽnga bẽtsemnama jinỹanỹiyama endenojuerzana, nda tšẽngaftanga šmojanichmó atše chašuabẽuájabuachama.

26 Cha chanjíchmu; cha puerta entseboše tšẽngaftanga jánỹama, y yapa ngmẽnaca entsemna, cha šocá enjamnama šmojátatšẽbonama.

27 Y ndegombre cha šocá enjamna, y enjẽtsinỹna mo jt-sobanamcá; pero Bẽngbe Bẽtsá tbonjalastemá, y ndoñe nỹe chábioye sinó átšbioynaca, atše ndoñe más ngmenanẽnga chayátšbomnama, ntšamo mora sentsẽbomnama.

28 Chíyeca atše más sentsẽboše cha pronto jíchmuana, as tšẽngaftanga cha chašmojtinỹe ora, puerta oyejuayẽnga chašmotsemnama, y atše ndoñe yapa chašondẽtsengmenama.

29 Smochjofja nỹets oyejuayánaca, Bẽngbe Utabnábeyeca catšátanga quetsomñecá; y nỹets tempo chacá amẽngbioye mo bẽtsẽsangcá šmochtsétabna,

30 er batšatema más y matẽnjẽtsobana, Cristbiana trabajaiñe uajabuachaniñe. Cha chẽ trabajo tonjanma atše juajabuáchama, ntšamo cach tšẽngaftanga ndoñe chešmatanobenacá, atše juajabuáchama.

### 3

#### *Ndayá Pablẽbiana ndegombre corente yojanámana*

1 Y morna, atšbe catšátanga, ndayá Bẽngbe Utabná to-jamama móyejuanga. Ndoñe bacá quešnatámana, ntšamo chẽ inỹe tsbuanáchañe tbonjanẽbuabiamcá cachcá cachiñe jtẽtẽyanama; y chẽ soye bẽtscá cmochanjújabuache ndoñe resjuiñe chašmondẽtsemnama.

2 Cuedado šmochtsebomna chẽ ndoñe tšabe entšangbiana, mo quešẽngcá imomnẽnga, chẽ puerta bacna soyẽnga mondbẽtsamẽnga, y entšangbe más delicadentše base bobachtema jatẽtšana uamanẽnga;

3 er bẽnga mondmẽna y ndoñe ínỹenga, chẽ ndegombre uinỹnanánana bomnẽnga, bẽnga Bẽngbe Bẽtsabe entšanguentsẽnga bẽtsemnama, bẽnga chẽ Uámana Espíritbe uajabuáchenanaca Bẽngbe Bẽtsá mondadoránama, bẽnga chẽ Cristo Jesúseftaca cánỹiñe mo canỹacá bẽtsemnama mondbẽtsoyejuama, y bẽnga chẽ ntšamo ínỹenga

monduamancá bēngbe cuerpiñe jamama tondayama yondoservénama mondbétsejuabnayama.

4 Masque atše razón sēndětsóbmñe, ndayá atšbe cuerpiñe tmojamcá ndegombre iuámanama jtsejuabnayama; nderado nda tojtsejuabná razón yojtsebomna chē soyēnga yoservena ca jtsejuabnayama, ndegombre atše chabiamama más razón chama stsóbmñe.

5 Sēnjanonýná y posufta tianoye base bobachtema chē más delicadentše šmojantětše; atšbe nýets uta bētsětsata Israe-locama entsanguentšata bonjamna, y atšna Benjaminbe bēts pamillentšá sēndmēna; atšbe tempsca bēts taitanga nýetscanga hebreunga immamna. Atšna fariseo sēnjamna. Atše sēnjánama, lempe ntšamo judiēngbe leyēnguiñe endayancá, ndayá jamama šojanmēncá.

6 Atše tša sēnjánboše Bēngbe Bětsá jtseeservénama, chíyeca Jesúsbeñe ošbuáchiyēnga bētsca sēnjanēcama; y ndayá canýe entšá ibnětsemna jtsamama, Bēngbe Bětsabe bominiñe tšabia jtsemnama, judiēngbe ley jtsocumplínese, chama ndocná tondaye quenjátšbomna jayanama, atše ndoñe tšabá sēntsanama ca.

7 Pero lempe chca ntšamo atše sēnjamnama y ndayá sēnjánamama, puerte sēnjanjuabná atšbiamama puerte yojanámana ca; pero mora, Cristo atšbe ainaniñe tonjámashēngoyeca, chē soyēnga atšbiamama ya ndoñe quenatámana.

8 Y cabá más, tondaye atšbiamama quenatámana, chē bēts soye jtsonýayese, Cristo Jesús, Bēngbe Utabná jtsabuatomana. Chábeyeca, lempe chē nýe quem luarentša soyēnga sēnjéseboshjona, y lempe chē soyēnga atšbiamama tondayama quenátoservena; y chca entsemna, chē bēts soye jěftsashjáchama, Cristo jtsabuatomama,

9 y cháftaca cánýiñe mo canýacá jtsemnama. Atše ya ndoñe quetsatsnguá Bēngbe Bětsabe bominiñe tšabia jtsemnama, nýe ntšamo atše tijamama chē judiēngbe ley jtsocumplínese, pero Crístbeñe jtsošbuáchiyēse aiñe; Bēngbe Bětsá entsama atše chabe bominiñe tšabia chaitsemnama, atšbe bacna soyēngama jtseperdónase, y lempe chca entsemna atše Crístbeñe sēndošbuachéyeca.

10 Atše sēntseboše ndayá cha jtsabuatomana, chē obanēnguentšana tojtanayenama cha tojaninýanjé obenana atše chaitsebomnama, atše cháftaca cánýiñe mo canýacá chaitsemna ora; y ntšamo bēnga játsebacama ora cach Cristo tojansufricá, átšnaca cachcá chaisufrima. Y cha tojanóbana orcá atše chaitsemnama;

11 y ntšámna, atše jěftsashjáchama Bēngbe Bětsá chaomama atše chaitayenama.

*Yejuana jtsentsénese, Bëngbe Bëtsábiocana uacanánana josháchiñama*

12 Pero atše ndoñe quetsátichamo lempe chca ya tijashjache ca, o atše ndocna bacna soye ndamá y puerte tšabia Bëngbe Bëtsabe bominyiñe stsemna ca, pero sempre natsanoye sentsá, mo nda canye luaroye jashjanguama cuaftséchamancá; y puerte jtsošbuáchiyese sentsobátmana atše chjobenaye jtsemnama, chë ndayama Cristo šojanchembo, er Cristo Jesús ya tonjama atše chabiamana chaitsemnama.

13 Atšbe catšátanga, atše ndoñe quetsátichamo chca ya tijashjache ca. Pero chama canye soye sentsama: chë tempo atše sënjánbomna y sënjánama soyënga, mora lempe stëtsoye sënjaquedá, y bëtscá sentsama jobenayama chë jashjanguama yojtsemnoye jashjanguama,

14 chë ndëmoca yojtsemna jashjanguama luaroye jobenayama jashjanguama, mo nda canye luaroye jashjanguama ndayánaca juácánama bëtscá jenojuérase cuaftséchamancá. Cachcá, átsnaca sentsá chë Bëngbe Bëtsá šojtsachembuana uacanánana josháchiñama, Cristo Jesúsbeyeca; y chë uacanánana entsemna chë nyetsca tescama yomna tšabe vida jtsebomnana.

15 Chca bënga šontsamna jtsejuabnayana, chë Jesucristbeñe puerte ošbuáchiyana y nyets tempo cha ústonënga; y nderado tšëngaftanga ndayíñnaca inyetšá šmojatsjuabná ora, Bëngbe Bëtsá chë sóynaca tšabá cmochanjínñanyíye.

16 Pero morna šontsamna jtseyenana ntšamo mëntscoñama Bëngbe Bëtsabe soyëngama šojosertacá.

17 Jesucristbeyeca catšátanga, ntšamo atše sëndmëncá tšëngaftanga šmochtsemna, y chë ntšamo jtseyenama tcbonjaninñanyécá imojtseyenëngbiyoye šmochtsënñaye.

18 Ntšamo cbochanjauyancá, ya ba soye tcbonjáuyana y mora cachiñe chca chanjayana, pero chca jayanamna atše puerte ngménaca sëndbétsemna. Banga mondmëna, y chënga ntšamo vida imojtsebomnana montsinñinñná, lempe ntšamo Cristo chë cruciñe jóbanëse bëngbiama iuayancá contra chënga imojtsemnama,

19 y chëngbiyoye nyetsca tescama infiernoca mochántsapochocaye. Chëngbiama chë más uámana soye yojtsemna jtsamana ntšamo cachënga tmojtsebošcá, nye cachëngbe cuerpiñe tšabá jtsonñama. Chënga nña mo bëts soye cuafjamcá jtsemnana chë soyënga tmojtsama ora, pero ndegombre chënga entsamna cach soyëngama jtsëuatjama; y chënga sempre jésejuabnayana chë nye quem luarama enójuabnayëngbe soyëngama.

20 Chë cuenta bëngna, ndegombre celocama entšanga mondmëna, y mora montsobátmana, chë luarocana chauabo bëngbe atsebacayá, Bëngbe Utabná Jesucristo.

21 Cha bëngbe cuerpënga, chë pronto jopochócama cuerpënga echanjátrocaye, jtsemnama mo chabe cuerp cá; chë obanënguentsana tojtayenabe cuerp cá; y cha chca echanjama, cha puerte obenana lempe jtsemándayama bómnyeca.

## 4

*Bëngbe Utabnáftaca cányiñe mo canyáca jtsemnëse oyejuayana jtsebomnana*

1 Chcasna, Jesucristbeyeca atšbe catšátanga, Bëngbe Utabnábeñe ošbuáchiyana ntjajbanacá, y puerte chábeñe jtsošbuáchiyëse, cháftaca cányiñe mo canyáca šmochtsemna. Corente cbondábabuanyëshana y tša sëntseboše tšëngaftanga jányama. Tšëngaftangbeyeca atše puerte oyejuayá sëntsemna, y atše corente sëndbétsoyejuaye tšëngaftangbiamana ínÿengbioye jáuyanama.

2 Evodia sëntseimpadana y Síntiquenaca, chata chabuatenóyeunama, mo Bëngbe Utabnábeñe ošbuachiyata quetsomñecá.

3 Y ácnaca, nda puerte tšabá átšeftaca tconjatrabajá, cbontseimpadana chama chë shembásata chacújabuachama, er chata bëtscá átšeftaca tbonjatrabajá tšabe noticiënga entšanga abuayiynayiñe. Clemente y inÿe entšanga átšeftaca tmonjatrabajá cach soye amiñe. Nÿetsca chëngbe uabaina entsábemana chë librëšañe, ndayentše yojtsábemana chë tšabe vida mochjónÿenëngbe entšangbe uabaina.

4 Sempre oyejuayënga šmochtsemna, Bëngbe Utabnáftaca cányiñe mo canyáca jtsemnëse, y cachiñe šcutëtayana: ¡Móyejuanga!

5 Nÿetscanga chamotsetátšëmbo, tšëngaftanga tšabe juabna bomnënga šmomnana. Bëngbe Utabná jésabama tempo ya entsobeco.

6 Todayama šmattsenócochinÿena, pero cada Bëngbe Bëtsáftaca chašmojtsencuénta ora, ndayá cmojtsëjbotama cha šmochjaimpáda. Y chca chašmojtsama ora, chánaca šochtsatschuanaye.

7 Chca, Bëngbe Bëtsá echanjama chë chabe ainaniñe tšabe ebionana tšëngaftanga chašmotsebomnana; chë tšabe ebionana puerte bëtscá endmëna, y bënga entšanga quetsomñecá ndoñe ntsobenana chama jósertana; y chca tšabe ebionánaca, tšëngaftangbe juabnënguñe y ainaniñe

tondayama quešmochátenocochinÿena, er tšëngaftanga cánÿiñe mo canÿacá Cristo Jesúseftaca šmondmëna.

*Lempe ntšamo tšabá yomncá soyëngama jtsejuabnayana*

<sup>8</sup> Cabana, atšbe catšátanga, lempe ntšamo ndegombre yomncá soyënguiñe šmochtsejuabnaye, lempe chë respeto yomerecëniñe, nÿetsca soyënguiñe entšangbe bominiñe tšabá yomniñe, nÿets tempo corente tšabá yomniñe, nÿetsca soyënga entšanga yogusetániñe, y lempe chë ndayama entšanga tmojtsejuabná tša iuámana ca soyënguiñe. Lempe chë tšabá yomna soyënguiñe y jtsatschuanayama yomna soyënguiñe šmochtsejuabnaye.

<sup>9</sup> Sempre šmochtsama chë átšbentšana šmojuábouinÿe soyënga, chë atšbiajana šmojóyëngacñe soyënga, chë atše šmojoyeuná soyënga y ntšamo šmojinÿcá atše jtsamana. Chca šmochtsama y Bëngbe Bëtsá, chë bënga ainaniñe tšabe ebionana chamotsebomnama amá, tšëngaftangaftaca echántsemna.

*Pablo tojtanacheuá tmojanájabuachama*

<sup>10</sup> Atše corente sëndoyeuá Bëngbe Utabnáftaca cánÿiñe mo canÿacá tsmënama, er tšëngaftanga ba ishinÿe chentšana, cachiñe šmojatobená atše jatinÿinÿiyana ntsachetšá atšbe tšabiana tšëngaftangbiana iuámanana. Chca, atše ndoñe quetsátichamo tšëngaftanga atšbiana cmojtsanebnëtjomba ca, ndayá ntšamo tšëngaftanga tšabá šmojuabnacá atše jinÿinÿiyama ndoñe yonjanopodena ca.

<sup>11</sup> Atše chca, ndoñe quetsátichamo uajabotá stsemna ca, er atše sënjuatsjinÿe sempre oyejuayá jëftsemnana, nÿe ndaye soyiñe masque batšatémnaca stsebomnëse.

<sup>12</sup> Atše sëndëtatšëmbo ntšamo yomna jtsiyenana chë vida jtsebomnama ujaboto soyënga tojtsashbenëse, y ntšamo yomna jtsiyenana chë tcuajabótama más bëtscá jtsebomnëse. Atše tijuatsjinÿe oyejuayá jtsemnana masque nÿe ndaye soyënguiñnaca stsemna ora, jasama bëtscá stsebomna ora o masque nÿe shëntseca jtsemnana šojtsemna ora, atše jtsiyenama bëtscá soyënga stsebomnëse o masque ndóñnaca.

<sup>13</sup> Atše lempe chca sëndobena, atše obenana jtsebomnama Cristo endbétsamayeca.

<sup>14</sup> Masque chcasna, tšëngaftanga tšabá šmonjama, atše padecena soyënguiñe sënjamna ora atše juajabuáchana.

<sup>15</sup> Tšëngaftanga, chë Filipos puebloca Jesucristbeñe ošbuáchiyënga, corente šmondëtatšëmbo, Macedonia luarentšana sënjëftsanbocna ora, nÿe tšëngaftanga atše šmonjanájabuachama; inÿe ošbuáchiyënga ndoñe. Chora enjamna atšbe bojatšena tempo tšëngaftangbe luarentše chë

tšabe noticiënga entsanga abuyiynayiñe; y nye tšëngaftanga atše šmonjanájabuache.

<sup>16</sup> Ba soye atše Tesalónica puebloca sënjamna ora, y chašmuájabuachama šonjanájaboto ora, tšëngaftanga atšbe opresidëngama crocénana šmonjanafja.

<sup>17</sup> Chca ndoñe quenátayana atše tsjuabná nye tšëngaftangbentsana ndayánaca jójëngacñama ca; chë sóyeca atše sëntseboše ndayá tšëngaftanga más tšabe soyënga chašmotsamama, Bëngbe Bëtsá tšëngaftangbiana más chaotsóyejuama.

<sup>18</sup> Er atše ya lempe sënjojëngacñe, y chë šuajabótama cabá más sëntsebomna. Atše chë ntšamo šjuajabotcá lempe sëntsebomna, chë tšëngaftanga Epafrodítóftaca šmonjanichmó soyëngaca. Ndayá atše šmojanichmocá, Bëngbe Bëtsabe bominyiñe puerte tšabá entsemna, mo juatšëmbonama ndayá tcojóba y altaroca tcojajuinýe y botamana tojtsonguëtšecá, chora cha oyejuayá chca jójëngacñana.

<sup>19</sup> Atšbe Bëtsá, chabe bëtscá uámana y bëts bomnánaca, echanjama tšëngaftanga lempe ntšamo cmëjabotcá Cristo Jesusbiajana chašmójëngacñama.

<sup>20</sup> Entšanga nyets tempo chamotsinýanýná Bëngbe Bëtsá y Bëngbe Taitá puerte uamaná bétsemnama. Chca chaotsemna.

### *Chënga jtadiósoftanama*

<sup>21</sup> Atšbe cuenta, nyetscanga chë Jesucristbeyeca Bëngbe Bëtsábenga imomnënga šmochjácheuaye. Atšeftaca montsemna Jesucristbeyeca catšátangnaca cmontsacheuaná.

<sup>22</sup> Nyetscanga chë muentše Bëngbe Bëtsábenga imomnënga, y más chë romanëngbe mandadbe bëts yebnoca oyenënga, cmontsacheuaná.

<sup>23</sup> Atše sëntseimpadana Bëngbe Utabná Jesucristo, chaoma tšëngaftangbeñe tšabe bendicionënga chaotsemnama.



## Colosenses

### *Jacheuayama*

1 Atše Pablo, Jesucristbe ichmoná Bëngbe Bëtsá chca yobóseyeca, y Jesucristbeyeca bëngbe catšata Timotéoftaca,

2 quem tsbuanácha sentsabiamná chë Colosas puebloca Bëngbe Bëtsábenga imomnëngbiana. Tšëngaftanga bëngcá Jesucristbeñe ošbuáchiyënga šmondmëna, y chca, Jesucristbeyeca bëngbe catšátanga. Atše sëntseimpadana Bëngbe Bëtsá Bëngbe Taitá, chaoma tšabe bendicionënga tšëngaftangbeñe chaotsemnama, y chaoma tšëngaftangbe ainaniñe tšabe ebionana chašmotsebonnama.

*Pablo, Bëngbe Bëtsábioye tbojanimpadá Colosas puebloca ošbuáchiyëngbiana*

3 Bëngbe Bëtsá, Bëngbe Utabná Jesucristbe Taitá tšëngaftangbiana fstseimpadana ora, cha sempre fchandbëtsatschuanaye,

4 er bënga fsënjátatsëmbona ntšamo tšëngaftanga Cristo Jesúsbeñe tša šmojtsošbuáchema, y ntšamo tšëngaftanga nyetscanga chë Bëngbe Bëtsábenga imomnënga šmababuánjeshanama.

5 Natsanama, chë ndegombre buayenánama, chë tšabe noticiënga, tšëngaftanga tcmojanabuatambá ora, tšëngaftanga botamana šmojanuena ntšamo chë buayenániñe bejtsayancá, chë tšëngaftanga šmojtsobena tšabe soyama jobátmana, Bëngbe Bëtsábeñe jtsošbuáchiyëse. Chë šmotsobatmana soye entsama tšëngaftanga Jesucristbeñe puerte chašmotsošbuáchema y nyetscanga chašmotsababuánjeshanama. Bëngbe Bëtsá celoca enduaquëcñá chë tšëngaftanga šmojtsobatmana tšabe soye.

6 Chë tšëngaftanga tcmojanabuayená tšabe noticiënga más bëtscá entšanga montsuenana; y chca, nyets quem luarentše entšanga montsiyena más tšabe soyënga jtsamëse. Chca entsemna ntšamo tšëngaftangbentše tojopasacá, chë natsana te chë tšëngaftanga Bëngbe Bëtsabe tšabiánama šmojanuena orscana, y ntšamo Bëngbe Bëtsá puerte bonshanánaca y tšabiánaca bëngbioye šuanjënema ndegombre cmojanosërta orscana.

7 Y chca Epafra tšëngaftanga tcmojanabuatambá, Bëngbe Bëtsabe bonshánama y tšabiánama. Epafra endmëna canya bëngaftaca Cristbiana oservená, y cha bënga fsëndbobonshana; cha Cristbiana endëtrabája bëngbe cuenta tšëngaftangbentše.

8 Cha šonjáuyana ntšamo chë Uámana Espíritu yojtsama, nyetscanga Jesucristbeñe ošbuachiyëngbioye chašmotsababuányeshanama.

9 Lempe ntšamo tšëngaftangaftaca tojopasama, chë natsana te tšëngaftangbiana fsënjanuena orscana y mëntscoñama, Bëngbe Bëtsá sempre tšëngaftangbiana fchandbétseimpadana, cháftaca fstsencuénta ora. Bëngbe Bëtsá fsëndëimpadana, chabe Espíritu chaoma tšëngaftanga chašmotsobena jtsetatšëmbuana y jtsoertánana, chca, ntšamo Bëngbe Bëtsá yobošcá chašmotsamama, tšëngaftanga tšabá chašmotsetatšëmbuama.

10 Y chca, tšëngaftanga šmochantsobena jtšiyenana jtšamëse ntšamo Bëngbe Utabná yobošcá, y sempre šmochántsama ntšamo chabiana tšabá yomncá. Ntšamo tšëngaftanga chašmojtšiyencá tšabe soyënga jtšamëse, chentšana nyetsca tšabe soyënga echanjóbcna, y tšëngaftanga más tšabá Bëngbe Bëtsá šmochantsábuatma.

11 Atše, Bëngbe Bëtsá sëntseimpadana, chabe puerte bëtscá obenánaca cha chaoma tšëngaftangbe ainaniñe bëtš añemo chašmotsebonnama; y chca, tšëngaftanga chë padecena soyënguñe chašmojtsemna ora, puerte uantadënga chašmotsebonnama, y ainaniñe añémoca Bëngbe Bëtsábeñe beca chašmotsobátmanama.

12 Y puerte oyejuayënga Bëngbe Taitá šmochántsatschuanaye, nda iuama bënga chamotsobena ntšamo cha chabe entšanga jatšatayama tojašebuachenacá jtsebonnama. Tšëngaftanga šmochanjóyëngacñe ntšamo cmojtšëtocancá celoca, chë corente buashinñinñana luarentše.

13 Bëngbe Bëtsá bënga šojatsebacá, Satanás, chë ibetiñe luarentša mandayabe cucuatšentšana, y tojama chë chabe bonshana Uaquiñabe amëndayana bëngbe ainaniñe chamotsebonnama;

14 chábeyeca Bëngbe Bëtsá Satanasbe cucuatšentšana šojatsebacá; o mëntšá, chábeyeca Bëngbe Bëtsá bëngbe bacna soyënga šojtsaperdoná.

*Cristo tojanóbanayeca, entšanga Bëngbe Bëtsáftaca tšabá jt-satsmëñana*

15 Cristo tmonjáninñe ora, bënga tmojántatšëmbona ntšamo Bëngbe Bëtsá yomnana; entšanga imojobena cha jinñama, pero Bëngbe Bëtsábioye ndoñe. Cha, chë Bëngbe Bëtsabe Uaquiñá, ya natsana yojtsemna lempe chë Bëngbe Bëtsá tojanma soyëngama; y cha lempe chë soyëngama más uamaná endmëna.

16 Chábeyeca Bëngbe Bëtsá tojama lempe ntšamo celoca y quem luarentše yobinñncá, lempe ntšamo chë entšanga imobena o ndoñe mondobena jinñama soyënga, y chë espíritëngnaca chë imobena ínñengbioye jtšamëndayana y

obenana imobomna. Bëngbe Bëtsá, chábeyeca y chabiamna tojama, lempe ntšamo quem luarentše yobinýncá.

17 Bëngbe Bëtsá cabá nyetsca soyënga ndama ora, Cristo ya yojsemna; y chábeyeca mora yomna, lempe ntšamo quem luarentše chaotsemnana yojamncá.

18 Cha endmëna nda nyetscanga Bëngbe Utabnábeñe ošbuáchiyënga iuamënda, ntšamo chë bestšaše nyetsca chë cuerpentša soyënga jtsemandayancá. Cha endmëna nda iuama ošbuáchiyënga tsëm tšabe vida chamotsebomnana, y cha endmëna chë Bëngbe Bëtsabe más bëts Uaquiñá. Bëngbe Bëtsá tojanma, chë cachiñe ainënga mochtsatsmënguentsana, cha chë natsaná chaotsemnana; nýe cha canya chë más uámana luare chaotsebomnana, nyëtscañe chaotsemándayama.

19 Er Bëngbe Bëtsá yojanjuabná cachabiamna tšabá yojamna, lempe ntšamo cha yomncá, chabe Uaquiñábeñnaca chaotsemnana,

20 y Bëngbe Bëtsá tojánbošena, Crístbeyeca nyetsca soyënga quem luarentše y celoca, cháftaca tempcá tšabá chaotsatsmënama. Bëngbe Bëtsá chë soye tojanma, chabe Uaquiñá cruciñe tojanóbana ora y chabe buiñe tojanábuashana ora; y chca, Bëngbe Bëtsá tojanma nyetsca soyënga quem luarentše y celoca, cháftaca tempcá tšabá chaotsatsmënama.

21 Tempo, tsëngaftanga Bëngbe Bëtsá stëtšoye šmojanquedá y chábioye uayayënga šmojamna, bacna soyënga šmojanjuabná y šmojánama causa;

22 pero mora chabe Uaquiñáftaca, cha mo canye entšacá jóbane, Bëngbe Bëtsá tojama tsëngaftanga tempcá tšabá cháftaca chašmotsatsmënama; y chca tojama, tsëngaftanga chabe delante nyets tempo chašmotsemnana; chora tsëngaftanga, chabe entšanga, ainaniñe ndocna bacna soye ndbomnënga chašmotsemnana, y ndocná chaodayana ntšamo šmojamncá ndoñe tšabá yontsemna ca.

23 Pero tsëngaftanga cmontsamna chë bëtscá ošbuáchiyana šmondobomnana nyets tempo jtsebomnana, Bëngbe Utabnábeñe jtšošbuáchiyama ndocna te ntjajbanacá. Nyets tempo chë tšabe noticiënguñe šmochtsosbuáchiye, y ndoñe šmatjaleséncia ndocná tsëngaftangbe ošbuáchiyana chaotrocama; y nýe chca puerte jtšošbuáchiyëse Bëngbe Bëtsábeñe šmochtsobátmana, ntšamo tsëngaftanga šmojanmncá, Jesucristbiamna buayenánama šmojanuena ora. Chë buayenánana endmëna ntšamo ba entšanga nyetsca quem luarentša entšángbioye tmojabuayenacá, y atšbe trabajo endmëna cach tšabe noticiëngama entšanga jtsabuayiyayana.

*Pablo, ošbuáchiyënga jasérviana trabajo tmojanbonjë*

<sup>24</sup> Atše corente sënjesoyeuá mora tšëngaftangbiana jasúfriama stsobenama. Ba entšanga entsamna jasúfriana Cristo jasérviana, y atše sëntsesufrina ntšamo Cristo tojansufricá, mora atše jtseufrinëse chabe cuenta, ntšamo jasúfriama yomncá. Y ntšamo sëntsesufrincá entsemna Crístbeñe ošbuáchiyëngbe tšabiana, chë chabe cuerpcá imomnënga, chënga Crístbenga bëtsemnama.

<sup>25</sup> Bëngbe Bëtsá atše šojábema chë Jesucristbeñe ošbuáchiyëngbe canye ujabuachaná. Cachá chë trabajuama šojanábuayana, chca jamëse, tšëngaftangbe tšabiana chaotsemnama. Chë trabajo endmëna, lempe ntšamo cha tojayancá entšanga jábuayenana.

<sup>26</sup> Bëngbe Bëtsá nÿetsca entšanga ndoñe tonjanalesenciá, quem luare jobojátšama orscana y nÿets tempo chë buayenánama chamotsetatšëmbuama; pero mora, chábenga imomnënga chë soye cha tojinÿanyë.

<sup>27</sup> Bëngbe Bëtsá yoboše, chabe entšanga imomnënga chamotsábuatmama ndayá tempo chënga ndoñe tonjaninÿanyëcá; y yoboše chë ndoñe judiënga jinÿanyiyama tša bëts y tšabe soye yomna chë ndegombre buayenánana, ndayá tempo ínÿenga ndoñe tonjaninÿanyëcá. Chë tempo ndoñe yonjanótatšëmbo buayenánana entsemna, Cristo tšëngaftangbe ainaniñe yojtsiyena, y chábeñe puerte jtsošbuáchiyëse šmojt sobena jt sobátmanana, Bëngbe Bëtsá puerte bëtšëtsanga y uámanënga chácmbiamama, batšá ntšamo cachá yomncá.

<sup>28</sup> Bënga nÿetscángbioye Jesucristbiana fchandbëtsabuayiynaye; fchandbëtšëtsësnaye ndayá chënga ndoñe yontsamna jtsamana, y fsëndbëtsabuatambaye nÿets osertánánaca ndayá chënga aiñe yojtsamna jtsamana, y chca, nÿetscángbioye Bëngbe Bëtsabe delante junatsama, puerte ošbuáchiyënga y osertánënga Bëngbe Bëtsabe soyënguiñe, chënga Crísoftaca cánÿiñe mo canÿacá jtsemnëse.

<sup>29</sup> Chca chaotsemnama, atše bëtscá sëndëtrabája; y chca sëntsama, chë Cristo yojtsama atše chaitsebomnama bët sobenánaca.

## 2

<sup>1</sup> Atše sëntseboše tšëngaftanga chašmotsetátšëmbo, Bëngbe Bëtsá becá tsimpadánama, tšëngaftangbioye jujabuáchama, chë Laodicea puebloquënga Jesucristbeñe ošbuáchiyënga y nÿetscanga chë ndocna te atše šmonjinÿe ošbuachiyëngnaca.

<sup>2</sup> Atše chca sëndama, tšëngaftanga y chënga ainaniñe bëtš añemo chašmotsebomnama, y cánÿiñe mo canÿacá

chašmotsemanama, nÿetscanga jtsenbobonshánëse. Chca, nÿets osertánana tšëngaftanga chašmotsebomnana, y chë tempo Bëngbe Bëtsá entsanga ndoñe tonjaninÿanyé buayenánama chašmotsetatšëmbuama, y chë buayenánana Cristbe soye entsemna.

<sup>3</sup> Mo canÿe bëtscá bomnana iytémena soycá pero mora ya uinÿenana, cachcá Cristbeñe entsemna nÿets osertánana y obenana Bëngbe Bëtsá jtsabuutmama. Chë soye tempo Bëngbe Bëtsá entsanga ndoñe tonjaninÿanyé, pero mora Cristo yojtsama bënga chë uámana soyënga chamotsebomnana.

<sup>4</sup> Atše chca sentsichamo, botamana palabrëngaca ndocná chacmondáingñema.

<sup>5</sup> Er masque choca tšëngaftangaftaca atše ndoñe quetsásmëna, atšbe ainana aiñe choca tšëngaftangaftaca entsemna; y atše puerte sëntsoyejuá tšëngaftanga šmatenÿeyenanama y nÿets tempo Bëngbe Bëtsábeñe šmojtsošbuáchema.

*Cristoftaca cánÿiñe mo canÿacá jtsemnëse, entsanga ndegombre tšabe vida jtsebomnana*

<sup>6</sup> Tšëngaftanga Jesucristbeñe ošbuáchiyënga šmojanóbiana ora, šmojanayana: “Cristo Jesús, Bëngbe Útabná entsemna ca”. Chcasna, tšëngaftanga cmontsamna jtsiyenana soyënga jtsamëse mo chë cháftaca cánÿiñe mo canÿacá tojtsemnacá.

<sup>7</sup> Chca šmontsobena jamana, cháftaca cánÿiñe mo canÿacá nÿets tempo jtsemnëse. Smochtsiyena jtsamëse ntšamo cha tojabuatëmbacá y cada te más chca. Cabá más šmochtsošbuáchiye chë Cristbiana buayenana soyëngama, ntšamo tcmojabuatambacá; y Bëngbe Bëtsá sempre šmochtsatschuanaye.

<sup>8</sup> Cuedado šmochtsebomna, ndoñe šmatjaleséncia ndocná chaondétsamama tšëngaftanga jtsajbanama Cristbeñe ošbuáchiyana jtsebomnana. Chca entsanga montseboše juabnëngaca tšëngaftanga jáingñama, nÿe básefta entsangbe juabnënga y tondayama ndoservena juabnënga. Chë juabnënga jtsóbocanana ntšamo bëtš taitanga básengbioye mondbetsabuátambayentsana y chë espíritëngbentsana, ndëmuanÿengbiana entsanga jtsejuabnayana chënga nÿetsca soyënguiñe imománda ca; pero Cristbentsana chë juabnënga ndoñe ntsóbocanana.

<sup>9</sup> Cristo endmëna cachcá ntšamo Bëngbe Bëtsá yomncá, masque mo canÿe entsacá quem luarentše yojëftsiyena;

<sup>10</sup> y Bëngbe Bëtsá tojama tšëngaftanga ndegombre tšabe vida chašmotsebomnana, Cristoftaca cánÿiñe mo canÿacá bëtsemnayeca; y Cristo, nÿetsca chë mándayënga y obenana bomnëngbiana más uamaná endmëna.

11 Tšëngaftanga Crísoftaca cánÿiñe mo canÿacá bétsemnayeca, mo uinÿnananëngcá šmontsemna, tšëngaftanga Bëngbe Bëtsabe entšanga šmomnama. Quem uinÿnánana ndoñe quenátsmëna mo chë más delicadentše base bobachtema tmojatëtšcá, cach entšángbeyeca ntšamo judiënga monduamancá, pero aiñe entsemna cach Cristo nda tmojauinÿnaná; y chë uinÿnánana entsemna, tšëngaftangbe ainanentšana Cristo bacna juabnënga jabuajuánayana.

12 Tšëngaftanga šmojánenabaye ora, enjamna mo ntšamo cach Cristo tmojanatbontsacá tšëngaftanga utebuantsánënga cuaftsemncá, er tšëngaftanga šmojanajbaná jtsamana chë tempo šmojánama bacna soyënga; y ntšamo Cristo cháuatayenama Bëngbe Bëtsá tojamcá, cachcá, tšëngaftanga šmojánenabaye ora, enjamna mo tšëngaftanga chašmatayenama Bëngbe Bëtsá cuafjamcá, er mora tšëngaftanga mo tsmëma entšangcá šmondoyena. Chca tojanopasá, Bëngbe Bëtsá obená bétsemnama tšëngaftanga šmojtsošbuáchema, y chë obenana tojama Cristo cháuatayenama.

13 Inÿe tempo tšëngaftanga Bëngbe Bëtsabiamna mo obanëngcá šmojamna, yapa bacna soyënga jtsamama šmojanamana causa y uinÿnanánënga mo Bëngbe Bëtsabe entšangcá ndoñe šmonjámnyayeca, pero aiñe šmojanamana bacna soyënga jtsamana nÿe ntšamo šmojanbošcá. Morna Bëngbe Bëtsá tojama tšëngaftanga tšabe vida chašmotsebomnama, Crísoftaca cánÿiñe mo canÿacá jtsemnëse, y Bëngbe Bëtsá bëngbe nÿetsca bacna soyënga šojtsaperdoná.

14 Mo nda ba ndebénënga tojtsabamna y chama tsbuanachangá tojtsamna y chiñe tojtsayana chënga obligaciönaca imojtsemna chë ndebénana pronto jtobocana ca, pero chë entšá chëchangá tojtsandbiama chë entšanga cha ndoñe más chamondëtsendebénama, Bëngbe Bëtsá cachcá tojama, bacna soyëngama bënga šojtsaperdoná ora. Jesús bëngbe bacna soyëngama cruciñe tojanóbana ora, enjamna mo Bëngbe Bëtsá bëngbe ndebénana tojtsanpochocá cuenta.

15 Jesucristo cruciñe tojanóbanayeca, Bëngbe Bëtsá tojanayëñaná Satanás y chabe bacna espíritënga obenana bomnënga y ínÿengbioye amëndayënga; y nÿetsca entšangbe delante tojaninÿanÿé cha chënga jtsamëndayama yobenama, mo canÿe reycá chë ínÿënga tojayëñaná ora, chabe entšángaftaca natsana jtsayana y chë ayëñanánëngna ústonoye.

*Ainaniñe beca jtsebošana chë ošbuáchiyëngbiama celoca yomna soyënga*

16 Ndoñe caso šmattsabiamnaye, ndoñe tšabá šmontsama ca ínÿënga tšëngaftangbiama tmojtsichamo ora, ndayá

tšëngaftanga šmétsesaye o šmétsofsšësnayama, o ndayá aiñe o ndoñe šmondbëtsamama Bëngbe Bëtsá jadórama fiestënga ora o shbojueta fiesta ora, o jóchnama tese.

17 Bayté entsemna, Bëngbe Bëtsá entsangbe cucuatšinë chë mandënga tojánboshjona, chë soyëngama bënga jabuátambama. Chë mandëngaca Bëngbe Bëtsá yojaninÿanÿnaye ndayá más chcoye jopásama; entsángbioye yojaninÿanÿnaye ndayá Cristo yochjanmama.

18 Báseftanga mondmëna y chënga mo nduamanëngcá entsángbeñe jtsebínÿnana, pero tsoye cachënga corente uámanënga jtse nobiamnayana y angelënga jtsadórayana, mo Bëngbe Bëtsá cuaftsemncá. Ndoñe caso šmattsabiamnaye, tšëngaftanga ndoñe tšabá šmotsama ca chënga tmojtsichamo ora, ntšamo chënga tmojtsichamcá tšëngaftanga ndoñe šmotsámayeca. Chënga jtsichámuana bëts soyënga mo otjenayoquécá tmojinÿe ca, y nÿe cachënga puerte jtse nábotamnayana, pero chca chamotsamama razón ndoñe quemátsbomna, er nÿe ntšamo inÿe entsanga imnetsejuabnaycá chëngnaca cachcá jtsejuabnayana.

19 Chënga Jesucrísoftaca cánÿiñe ndoñe tmonjoquedanga, y Cristo endmëna chë nÿetsca ošbuáchiyëngbe amëndayá, mo chë bestšaše nÿets cuerpo jtse mandayancá. Canÿe cuerpiñe chë bestšaše jtsamana nÿets cuerpo chaóbochema, ntšamo Bëngbe Bëtsá tojtsebošcá, chë cuerpo ndayá jasama chaotse bomnama jtsamëse, y nÿetsca chë cuerpentša soyënga chamenefjanama jtsamëse. Cachcá, Cristo jtsamana nÿetsca ošbuáchiyënga cánÿiñe mo canÿacá cháftaca chamotsemnana, y cada te más tšabá cha chašmotsábuatmama.

20 Cristo tojanóbana ora enjamna mo tšëngaftángnaca cuafjobancá, y Bëngbe Bëtsá tšëngaftanga cmojatsebacá chë quem luarentše imománda espíritëngbe cucuatšentšana. As, ¿tšëngaftanga ndáyeca šmojtsiyena jtsamëse mo chë nÿe quem luarama enojuabnayëngcá? ¿Ndáyeca tšëngaftanga cabá šmobedecena chca mandënga, mo:

21 “Chë soye ndoñe matsbanana, chca soye ndoñe catjase, o chë soye acbe cucuatšëca ndoñe catjaca ca”?

22 Lempe chë mandënga, chë ndayá canÿa ndoñe bontsemna jamana, nÿe soyëngama jtsayanana, y tempo tojochnëngo ora, chë soyënga jtsopochócana y chora tondaye ntsámanana. Chë mandënga jtse mnana nÿe ntšamo entsanga mondbetsamcá y ínÿengbioye mondbetsabuatambaycá.

23 Ndegombre, ba entsanga jtsejuabnayana chë mandënga tmojamëngbiana, puerte osertánanaca chca tmojama ca, pero ndegombre chca ndoñe quenátsmëna; er chënga jtsichámuana, ntšamo Bëngbe Bëtsá jadórama yomncá imo-

jtsabuátambá ca, jtsabuátambayana entšá cabnmëna uamaná ndoñe ntsenobiamnayana ca, y jabuache cachabe cuérpoca jtsamana ca. Pero chë mandënga tondaye ntsámanana, er chë mandënga entšangbe ainanentšana ndoñe ntjajuánana chë bacna soyënga jtsamama juabnënga.

### 3

<sup>1</sup> Cristo cháuatayenama Bëngbe Bëtsá tojanma ora, enjanma mo tšëngaftángnaca Crístbeñe ošbuáchiyënga, chašmatayenama cha cuafjamcá. Chiyeca, tšëngaftangbe ainaniñe puerte šmochtseboše ndayá Bëngbe Bëtsá celoca tšëngaftangbiama yobomncá; y choca, Cristo uámana puestentše endëtbemana, Bëngbe Bëtsabe catšbioica. Y šmochtsinÿinÿnaye chca šmojtsebošama, ntšamo jtsamëse mora šmojtсийenama.

<sup>2</sup> Tšëngaftanga nÿets tempo chë celoca soyëngama šmochtsejuabnaye, ndoñe chë nÿe quem luarentše yomna soyëngama.

<sup>3</sup> Tšëngaftanga Crísoftaca cánÿiñe mo canÿacá jtsemnëse, jtsemnana mo tšëngaftanga ya cuafjobancá, er mora ya ndoñe quešmátiyena tempcá jtsamëse. Cristo, Bëngbe Bëtsáftaca cánÿiñe mo canÿacá endmëna, y Cristo endmëna nda mora tšëngaftangbe vida yojtšinÿena.

<sup>4</sup> Ndegombre, Cristo endmëna nda endama tšëngaftanga tšabe vida chašmotsebonnama; y quem luarentše cha cachiñe chaojtonÿná ora, tšëngaftángnaca chentše cháftaca šmochántsemna, y chora ntšamo Cristo corente uamaná y bëtsá yomnama Bëngbe Bëtsá yochjinÿanÿiyacá, tšëngaftangbiámnaca echanjínÿanÿiye más bëtsëtsanga y uámanënga šmojtsemnana.

#### *Tempsca vida y morsca vida*

<sup>5</sup> Tšëngaftanga, ntšamo chë nÿe quem luarama enójuabnayënga mondbetsebošcá bošana lempe šmochtsajbaná. Ndocná chaondëtseboše ndaye bacna soye boyabása o shembásaftaca jtsamana, ni chca soyënguiñe ndoñe chaondëtsejuabná; ndoñe chaondëtsiyena nÿe ínÿengbiama bacna juabnënga jtsebonnëse, y ndoñe chaondëtseboše nÿe bëtscá soyënga ínÿengbiama más jtsebonnama, er chca jtsamana jtsayanana, chabiama más yojtšámana soyënga jtsebonnana, Bëngbe Bëtsá jatsbobonshánama.

<sup>6</sup> Er entšanga mondmëna y chënga chca soyënga jtsamama jtsebošana, y Bëngbe Bëtsá ndoñe ntseyeunanana. Chca entšangaftaca Bëngbe Bëtsá puerte bochanjetna, y echanjamánda chë uabouana castigo chëngbeñe chaotsemnana.



<sup>7</sup> Y tempo, tšëngaftanga šmojaniyena jtsamëse, sempre nÿe chca bacna juabnëngaca,

<sup>8</sup> pero mora tšëngaftanga cmontsamna lempe quem soyënga stëtšoye jaquédana: ínÿengaftaca jetnana, ínÿengaftaca rábiaca jtsemnana, ínÿabioye ntšamo jáborlama jtsebošana, ínÿengbioye joyánguanguana, y ndoñe tšabe palabrénga jtsóyebuambnayana.

<sup>9</sup> Ndoñe šmattsenbuambnaye, er ntšamo tempo šmojamncá mora tšëngaftanga ya ndoñe cachcá quešmátsmëna, y mora ndoñe quešmátiyena jtsamëse ntšamo tempo šmojanamcá.

<sup>10</sup> Y mora tšëngaftanga šmojashjache jtsemnana mo tsmëma entšangcá, y ntšamo tempo šmojanamcá ndoñe cachcá quešmátama. Bëngbe Bëtsá chca tsmëma entšangcá tcmojábiana; y cha nÿets tempo yojtsama, tšëngaftanga cada te más ntšamo cha yomncá chašmotsemnana, chca, corente tšabá cha chašmuábuatmanana.

<sup>11</sup> Chíyeca, ndayá Bëngbe Bëtsá tojamama, ndoñe judiënga y judiënga cachcanga mondmëna; chë más delicadentše base bobachtema tëtšenënga ndoñe más uámanënga quemátsmëna chë ndoñe chca mondmënëngbiana; chë inÿe luarëngocana áshjajnënga, bën tjoye oyenënga, chë nÿe ínÿabiana nÿets tempo oservénënga y chë cachëngbiana trabájayënga, nÿetscanga cachcanga mondmëna. Chë nÿe ndayá iuámana endmëna Crístbeñe jtsošbuáchiyana y nÿetsca ošbuáchiyëngbe ainaniñe cha yojtsemna jtsemándayama.

<sup>12</sup> Tšëngaftanga Bëngbe Bëtsábenga šmondmëna. Cha cmondábabuanÿeshana y tcmojabacacá chabe entšanga chašmotsemnana; chíyeca, tšëngaftanga cmontsamna ínÿenga jtsinÿanÿayana nÿetscangbiana jóngmiana šmuamanama, tšabe juabna ínÿengbiana sempre šmnétsebomnana, cada ona chë ínÿenga chabiana más uámanënga cuaftsemncá imnétsejuabnayama, nÿetscanga puerte bonshanánaca šmnétsënÿayama, y nÿetsca padecena soyënguiñe corente uantadënga šmomnana.

<sup>13</sup> Nÿetscanga šmochtsenëuantana y šmochjenperdóna, nderado ntšamo nda ínÿabioye tbojaborlá y chama cha tbojtsatsëtsná ora. Ntšamo Bëngbe Bëtsá tšëngaftanga tcmojaperdonacá, tšëngaftángnaca cachcá ínÿenga šmochjáperdonaye.

<sup>14</sup> Lempe chë soyëngama más enduámana nÿetscanga jtsenbobonshánana. Nÿetscanga šmojtsenbobonshánëse, tšëngaftanga šmochantsobena sempre lempe chë inÿe soyënga corente tšabá jtsamana, ntšamo ndegombre chë soyënga jamama yomncá.

<sup>15</sup> Cristo endama tšëngaftangbe ainaniñe tšabe ebionana chašmotsebomnana. Chë tšëngaftangbe

ainaniñe tšabe ebionánaca šmochtsiyena nyetscanga natjěmbana, Jesucristbeñe ošbuáchiyěnga quetsomñecá. Běngbe Bětsá tcmojáchembo tšěngaftanga nyetscanga cányiñe mo canye cuerpcá chašmotsemnama, y chca, natjěmbana chašmotsiyenama. Běngbe Bětsá sempre šmochtsatschuanaye.

16 Chě Cristbe puerte tšabe buayenana soyěnga tšěngaftangbe ainaniñe nyets tempo šmochtsambaye. Nyets osertanánaca šmochtsenbuátěmbaye y šmochtsenbuayiynaye. Nyets ainánaca šmochjacánta chě Salmos librěšañe uabemana cantěnga, chě Jesucristbe soyěngama cantěnga, y chě Běngbe Bětsabe Espíritu iuama tšěngaftanga chašmotsobena jacántama soyěnga; chca šmochjama Běngbe Bětsá jětschuayama.

17 Y lempe ntšamo chašmojtsama o chašmotsichamcá, Běngbe Utabná Jesúsbeñe ošbuáchiyěnga quetsomñecá chca šmochjama, sempre Běngbe Bětsá Běngbe Taitábioye, chábeyeca jtsatschuanayěse.

### *Ntšamo ín्यengaftaca jtsiyenama*

18 Shémanga, šmochtsatšěmbo tšěngaftangbe boyanga chě yebnentša mándayěnga imomnama, y nyets tempo chca jtsejuabnayěse šmochtsiyena, er tšěngaftanga Běngbe Utabnábeñe ošbuáchiyěnga quetsomñecá, chca cmontsamna.

19 Boyanga, tšěngaftangbe shémanga sempre šmochtsababuányěshana, y podesca palabréngaca ndoñe šmattsětsěsnaye.

20 Básenga, tšěngaftangbe bětsětsanga nyětscañe šmochtsayaunana; chca šmojtsaměse, Běngbe Bětsá oyejuayá echántsemna.

21 Taitanga, ndoñe šmattsama tšěngaftangbe básenga chauetěnama, ainaniñe tondaye añémoca chěnga ndoñe chamondětsatsměnama.

22 Tšěngaftanga chě nyets tempo nye ín्यabiana oservéněnga, tšěngaftangbe nduiñěnga nyětscañe šmochtsayaunana, y ndoñe nye chěnga tcmojtsěnyá ora, mo nda nye entšangbe delante tšabá joquédama tojtsebošacá, ndayá chěnga šmochtsayaunana nyets ainaniñe ndegombre tšabe juabněngaca, er tšěngaftanga Běngbe Utabnabiama corente respeto šmondobomna.

23 Lempe ntšamo chašmojtsamcá, nyets tšěngaftangbe añémoca šmochtsama, mo Běngbe Utabná ndegombre cuaftseservencá, y ndoñe nye entšangbioycá.

24 Tšěngaftanga ya šmondětatsěmbo, ntšamo cha chabe entšanga tojašebuachenacá mo uacanancá, Běngbe Utabná tšěngaftanga cmochjátšatayama. Er Cristo, chě

Utabná, endmëna ndábenga tšëngaftanga šmomnana, y cha šmondëservena.

<sup>25</sup> Pero chë ndoñe tšabe soyënga tontsamábioye, Bëngbe Bëtsá bochanjacastíga, ntšamo chë entšá bacna soyënga tojamcá, er Bëngbe Bëtsabiana nyetscanga cachcá monduámána.

## 4

<sup>1</sup> Y tšëngaftanga, ndëmuanyëngbiama ínÿenga nyets tempo imoservena, nyetsca soyënguñe tšabá šmochtsama, y nyetscangbiama cachcá šmochtsemna, chë nyets tempo nÿe tšëngaftangbiama oservenëngaftaca, er tšëngaftanga šmondëtatšëmbo celoca canÿa endmëna, ndabiama tšëngaftángnaca oservénënga šmondmëna.

### *Ošbuáchiyënga jábuayenama*

<sup>2</sup> Nyets tempo Bëngbe Bëtsáftaca šmochtsencuéntaye, ntšamo šmojtsichámuama botamana jtsejuabnayëse y Bëngbe Bëtsá jtsatschuanayëse.

<sup>3</sup> Bëngbe Bëtsáftaca cha šmojtsencuénta ora, bëngbiámna chašmochtseimpadana, cha chaoma bënga fchayobenama Bëngbe Bëtsabe palabra Cristbiana entšanga jábuayenama, chë buayenana soye ndayama tempo entšanga ndoñe monjántatšëmbo. Atše chë buayenana soye entšanga abuátambaye causa, mora cárceloye sentsétámena.

<sup>4</sup> Chcasna, Bëngbe Bëtsá atšbiama šmochtseimpadana, atše chayobenama chë buayenana soyënga entšanga jabuátambama, y chë soye atše chaima chënga corente tšabá catafjosertaycá, er atše šontsemna chca jamana.

<sup>5</sup> Šmochtsiyena nyetsca soyënga osertanánaca jtsamëse chë Jesucristbeñe ndošbuáchiyëngaftaca, y chca, nyets tempo ínÿenga šmochtsinÿanÿnaye tšëngaftanga Jesucristbeñe ošbuáchiyënga bëtsemnama.

<sup>6</sup> Inÿengaftaca chašmojtsencuénta ora, šmochtsama ntšamo šmojtsoyebuambnacá chëngbiama tšabá chaotsemnama, y soyënga šmochtsichamo nyetscanga oyejuayana chamotse-bomnama; y šmochtsetátšëmbo ntšamo cmojtsamna cada cánÿabioye jojuana.

### *Jtadiósoftanama*

<sup>7</sup> Jesucristbeyeca bëngbe bonshana catšata Tíquico, canÿe trabajayá tšabe palabra bomná y Bëngbe Utabnabiama bëngaftaca oservená, tšëngaftangbioye noticiënga echanjuamba ndayá átšeftaca tojopasama.

<sup>8</sup> Chíyeca cha tšëngaftangbioye sentsichamná, chca, tšëngaftanga chašmotsetatšëmbuama ndayá bëngaftaca jojtsopasana, y cha chacmañémuayama.

9 Cháftaca Onésimo echanjá, Jesucristbeyeca bēngbe bonshana catšata; cha canýe tšabe palabra bomná endmēna, nda tšēngaftangbiocana tonjánabo. Chata tšēngaftanga cmochanjácuntaye lempe ntšamo muiñe yojtsopasancá.

10 Aristarco, muentše átšeftaca cárceloye utamená, cmontsacheuaná. Y Marcos, Bernabebe primo, chánaca cmontsacheuaná. Tšēngaftanga ya buayenánēnga šmontsemna ndayá jamama cmojtsamnana, Marcos tšabá jofjama, cha tšēngaftanga jautsētsayama tojase.

11 Jesús, chē Justo cánaca uabainá, chánaca cmontsacheuaná. Quem pueblentša nyetsca judiēnga ošbuáchiyēnguentšana, nýe chē unga átšeftaca mondētrabája, Bēngbe Bētsabe amēndayana entšāngbioye chaóshjanguama, y chēnga mondama atše ainaniñe bēts añemo chaitsebomnama.

12 Epáfrasnaca cmontsacheuaná, inýe tšēngaftangbiocá y cha Cristo Jesusbiamá jatrabájama endoservena. Cha nyets tempo tšēngaftangbiama Bēngbe Bētsábioye tša bochandbētseimpadana, tšēngaftanga Bēngbe Utabnábeñe ošbuáchiyana ndocna te chašmondájbanama, y nyets tempo chašmotsiyena lempe jtsamēse, ntšamo chē Jesucristbeñe corente ošbuáchiyēnga jtsiyenana yojtsamncá; y chca, tšēngaftanga corente šmochántsetatšēmbo ntšamo šmojtsamcá ndegombre yomna ntšamo Bēngbe Bētsá yobošcá.

13 Cach atše sēnjinye y sēntsobena jayanama ntšamo cha jabuache yotrabájama, tšēngaftanga jujabuáchama, chē Laodicea puebloquēnga y Hierápolis puebloca oyenēngnaca.

14 Lucas, bēngbe bonshana ashnayá, cmontsacheuaná; y Démasnaca.

15 Chē Laodiceoca Jesucristbeyeca catšátanga bēngbe cuenta šmochjácheuaye. Ninfábioynaca šmochjachuaye, y nyetsca ošbuáchiyēnga chē Bēngbe Bētsá jētschuayama chabe yebnentše jénefnama imuamanēngnaca.

16 Quem tsbuanácha chašmojualiá chentšana, Laodiceoca ošbuachiyēngbioye šmochjuíchmua, chócnaca mēcha chamualiamá; y tšēngaftāngnaca šmochjualiá chē Laodiceoca ošbuachiyēngbioye tmonjanichmó tsbuanácha, chēcha tšēngaftangbioye chaojuáshjango ora.

17 Arquipo šmochjauyana yejuana chaotsantješna chē Bēngbe Bētsá tbojabonyé trabajo sempre tšabá chaotsocumplínama.

18 Atše Pablo, nýe quem palabrenga tšēngaftanga jacheuayama cach atšbe cucuátšeca sēntsabiamná. Smochtsenójuabnaye atše utamená stsemnama. Atše, Bēngbe Bētsá sēntseimpadana, cha chaoma tšabe bendicionēnga tšēngaftangbeñe chaotsemnama.

# 1 Tesalonicenses

## *Jacheuayama*

<sup>1</sup> Atše Pablo, Silvano y Timotéoftaca, quem tsbuanácha sentsabiamná tšëngaftangbiana, chë Tesalónica bèts puebloca Jesucristbeñe ošbuáchiyëngbiana, tšëngaftanga chë Bëngbe Bëtsá chë Taitá y Bëngbe Utabná Jesucristoftaca cányiñe mo canyáca šmommënga. Atše sëntseimpadana Bëngbe Bëtsá, chaoma tšabe bendicionënga tšëngaftangbeñe chaotsemnama, y tšëngaftanga ainaniñe tšabe ebionana chašmotsebomnama.

*Pablo Bëngbe Bëtsábioye tbojtanchuá chë Tesalónica pueblentša entšangbe ošbuáchiyama*

<sup>2</sup> Bënga sempre Bëngbe Bëtsá fsëndëtschuaná tšëngaftangbiana, y bënga cháftaca ftsencuénta ora, tšëngaftangbiana fchandbétseimpadana.

<sup>3</sup> Bënga, Bëngbe Bëtsá chë Taitáftaca ftsencuénta ora, fsëndbëtsenojuabnaye ntšamo tšëngaftanga šmotrabájama, Jesucristbeñe ošbuáchiyana šmobómnyeyeca; ntšamo tšëngaftanga tša ínÿenga šmëjabuáchana, Jesucristo šmobobonshánayeca; y ntšamo tšëngaftanga, ndocna te ntjajbanacá, jtsošbuáchiyëse Bëngbe Utabná Jesucristbeñe šmobátmanama.

<sup>4</sup> Jesucristbeyeca catšátanga, bënga fsëndëtatšëmbo Bëngbe Bëtsá cmababuánÿeshanama, y cha tcmojábacacama chábënga chašmotsemnama.

<sup>5</sup> Bënga chë tšabe noticiënga Jesucristbiana tcbonjanabuayená ora, ndoñe nÿe bënga jóyebuambayëse chca quenjatsmëna, ndayá chë Uámana Espíritbe obenanácnaca, y bënga corente jtsejuabnayëse chë buayenánana ndegombre soye bëtsemnama. Tšëngaftanga corente šmondëtatšëmbo ntšamo bënga ftsjamna tšëngaftangaftaca fsënjamna ora, tšabe soyënga tšëngaftangbiana nguayíñe.

<sup>6</sup> Chora, ntšamo bënga fsënjanamcá y ntšamo Bëngbe Utabná enjaniyencá, tšëngaftanga šmonjanontšé amana; y chë buayenánana šmonjanóyëngacñe chë Uámana Espiritu tcmojanatšatá oyejuayánaca, masque ínÿenga tmojamna tšëngaftanga puerte chašmosufrima.

<sup>7</sup> Mëntšá, tšëngaftanga uánatsanënga šmonjanobiama ntšamo ndegombre jtšiyenama, nÿetsca Macedonia y Acaya luarentša Jesucristbeñe ošbuáchiyëngbiana.

<sup>8</sup> Tšëngaftanga šmojoyebuambá Bëngbe Utabná Jesucristbe palabrama. Mora, ndoñe nÿe Macedonia y Acaya luarentše entšanga chama quemátstatšëmbo —nÿets luarenache

entságnaca montsetátšëmbo ntšamo tšëngaftanga Bëngbe Bëtsábeñe šmojtsošbuáchema —y chca, bënga tondaye más quešnátëjaboto tšëngaftangbiana jatichámuama.

<sup>9</sup> Cach entsanga montsoyebuambná chë bënga tcbonjánabuache ora tša tšabá tšëngaftanga šcojanëbuajama. Chëngnaca montsichamo ntšamo tšëngaftanga šmojtsajbaná chë šmojanjuabná diosënga yojamna soyënga adórayana y šmojanontsé chë tšabe benache jtishachama, y chë Bëngbe Bëtsá ndegombrá y ainá jaserviama,

<sup>10</sup> y chca, chabe Uaquiñá Jesús jobátmama; mua celocana echanjésabo; chabiana Bëngbe Bëtsá tojanma obanënguentšana cháuatayenama, y cha šochanjátsebacaye chë uabouana castigüentšana, Bëngbe Bëtsá entsangbe bacna soyëngama chëngbiana yobomnentšana.

## 2

### *Ntšamo Pablo yojantrabája Tesalónica puebloca*

<sup>1</sup> Cach tšëngaftanga, Jesucristbeyeca catšátanga, šmondëtatšëmbo bënga tcbonjánabuache ora ndoñe nÿe bonamente quenjatsmënama.

<sup>2</sup> Tšëngaftanga šmondëtatšëmbo, bënga cabá tšëngaftangbioye nda ora, Filiposoca šonjanëyánguango y bacá šonjánaborlama; y masque tšëngaftangbioca bëngbe contra entsanga monjamna, Bëngbe Bëtsá tonjanma bënga fchayobená chë tšabe noticiënga bëtsá ańémoca jabuátambama.

<sup>3</sup> Er bënga entsángbioye bostero soyënga ndoñe queftsjatanabuayiyná, tšëngaftangbiana bacna soyënga ndoñe queftsjatanboše, y entsanga jáingñama ndoñe queftsjatanoyebuambná.

<sup>4</sup> Bëngna inÿetšá; Bëngbe Bëtsá yojanjuabná bënga chabe trabajo jamama obenënga ftsjamna ca, y chca, šonjanëbuáyana chabe tšabe noticiënga entsanga jabuátambama, y chca bënga fsëndoyebuambná; chíyeca bënga ndoñe nÿe entsangbe bominyiñe tšabá chaotsinÿnama queftsátama, ndayá nÿe Bëngbe Bëtsabiana, nda chë ndayá bëngbe ainaniñe yomnama yotátšëmbo.

<sup>5</sup> Ntšamo tšëngaftanga corente šmondëtatšëmbcá, bënga ndocna te tšëngaftangbiana tšabe soyënga tifjánayana, tšëngaftanga bëngaftaca oyejuayënga chašmotsemnana; y ntšamo tšëngaftanga cbonjanëtsëtsnacá ndoñe quenjatsmëna nÿe tšëngaftangbentšana ba soyënga bëngbiana josháchiñama. Bëngbe Bëtsá chama yotátšëmbo.

<sup>6</sup> Ndocna te bënga queftsatsnguá entsanga más uamanëngcá bënga chašotsabiamnana, ni tšëngaftangbentšana, ni inÿengbentšana.

7 Masque bēnga, Cristbe ichmónēnga bétsemnama, matifjanobená tšēngaftanga n̄ye sempre jtsamēndayana, bēnga ndoñe chca chibiátanma; bēnga corente jtsababuán̄yeshanēse cbonján̄an̄yena, ntšamo can̄ye mamá chabe básēnga jtsabéchayana y corente bonshanánaca jtsan̄yēnana.

8 Tša cbonján̄abuan̄yeshanayeca, bēnga ndoñe n̄ye chē Bēngbe Bētsabe tšabe noticiēnga checbēnjatanabuayená, tšēngaftanga chiñe chašmotsošbuáchema ntšamo bēnga fsēndošbuachecá, ndayá bēngbe vidēnga jáshbiamnaca fsēnjanprontana tšēngaftangbe tšabiama. ¡Tša cbondábabuan̄yeshana!

9 Jesucristbeyeca bēngbe catšátanga, tšēngaftanga šmenabouín̄yena ntšamo bēnga bētscá y jabuache fsēnjantrabajama, Bēngbe Bētsabe tšabe noticiēnga abuyaiynayiñe y bēngbe vida onguayiñe, chca, tšēngaftanga ndoñe chacmondétsamnama bēngbe uajabótama bēnga jatatsatnayama.

10 Cach tšēngaftanga šmondétatsēmo y Bēngbe Bētsánaca, ntšamo bēnga ftsjamna tšēngaftanga chē ošbuáchiyēngaftaca fsēnjamna ora; fsēnjan̄iyena ntšamo Bēngbe Bētsá tšabá tbojtsin̄yancá, n̄yetscángaftaca fsēnjan̄ama ntšamo jamama šojanamncá, y ndocná quenátobena jatichámuana ntšamo fsēnjanamcá ndoñe tšabá yonjamna ca.

11-12 Tšēngaftanga šmondétatsēmo, bēnga bētscá jóyebuambayēse cada ona tšēngaftanguentsá cbonjan̄ejabuachanama y cbonján̄añemuama, ntšamo can̄ye taitá chabe básēngaftaca endbetsamcá. Bēnga bētscá cbonjan̄etsētsná ntšamo Bēngbe Bētsá tšabá tbojtsin̄yancá chašmotsiyenama; y Bēngbe Bētsá cmontsēbuájajana chabe amēndayoye jamashēnguama y chabe obenana y buashin̄yinanana jin̄yama.

13 Bēnga, Bēngbe Bētsabe tšabe soyēnga cbonjanabuayiyná ora, ntšamo tcbonjan̄eyancá tšēngaftanga šmonjanuena y šmontsanošbuaché mo Bēngbe Bētsábiocana buayenanancá, y ndoñe n̄ye entsangbe oyebuambnayanancá. Y ndegombre Bēngbe Bētsabe buayenánana endmēna, y chē palábraca, tšēngaftanga chē chábeñe ošbuachiyēngbeñe Bēngbe Bētsá bētscá soyēnga yojtsama. Chama sempre Bēngbe Bētsá fsēndétschuaná.

14 Jesucristbeyeca catšátanga, cach tšēngaftangbe luarentša entsanga cmonjan̄ecamena ora y šmonjansufrina, šmonjanpasá ntšamo chē Judeoca Bēngbe Bētsábeñe ošbuachiyēngcá enefjuanēnga tmonjanpasacá, y chēngna Cristo Jesusbe entsanga mondmēna. Chēnga tmonjansufrí cach luarentša entsanga, chē judiēnga, chēngbioye

monjanëcamena ora.

<sup>15</sup> Chë judiëngbe bëts taitanga, Bëngbe Bëtsabe juabna oye-buambnayëngbioye tmojtsanëbaye, y ntšamo chëngbe bëts taitanga tmojanmcá, chëngnaca Bëngbe Utabná Jesúsbioye tmojanóba, y chënga mondama bënga chaftsesufrínama. Chënga ndoñe tsábenga Bëngbe Bëtsabe bominyiñe quemátsmëna, y nyetsca entšangbe contra montsemna.

<sup>16</sup> Chë ndoñe judiëngbioye, Bëngbe Bëtsá cháuatsebacama jábuayenama fstseboše ora, chë judiënga bëts cá jtsamana bënga ndoñe fchandobenama chca jamama. Judiënga nyets tempo bacna soyënga monjánama; pero chë entšanga jábuayenama bënga ndoñe fchandobenama jtsamana, entsemna chë último bacna soye ntšamo chë judiënga jamama imojtsobencá, más ya ndoñe; y mora, cabana, Bëngbe Bëtsá ya puerte chëngaftaca tbojetna y echanjácastigaye.

*Pablo tša yojánboše, Tesalónica pueblota entšanga jányama*

<sup>17</sup> Jesucristbeyeca catšátanga, bënga tsëngaftangbentsana baseftayté jëftseboचना šonjanotocá ora, masque ndoñe choca tsëngaftangftaca queftsátanmëna, sempre tsëngaftangbiana fsënjanojuabná, y tša fsënjánboše tsëngaftangbioye jtésana jautsëtsayama.

<sup>18</sup> Bënga fsënjánboše tsëngaftangbioye jésana; chíyeca cach atše Pablo, ba soye sënjanóshenguënja jobenayama choye jésama, pero Satanás yojantrabája bënga ndoñe fchandobenama chca jamama.

<sup>19</sup> Atše sëntsanošoše tsëngaftanga jautsëtsayama, er tsëngaftangbeyeca Bëngbe Utabná Jesusbe delante, cha yochjésabo ora, ntšamo tsëngaftanga šmoyenama, bënga puerte jtsošbuáchiyëse fchantsoátmana, corente oyejuayënga fchtsemnana y más bëtsëtsanga fchtsemnana.

<sup>20</sup> Añe, ndegombre, ntšamo tsëngaftanga šmoyenama, bënga bëts cá añémoca ntšamo tsëngaftangbeñe tifjamama fsëndbëtsoyebuambnaye, y tša oyejuayënga fsëntsemna.

### 3

<sup>1</sup> Chíyeca ya ndoñe chibiatanobená más jatobátmanana tsëngaftanga jautsëtsayama; as fsënjanojuabó nye bëndata Atenas bëts pueblentše joquédana,

<sup>2</sup> y jíchmuana Jesucristbeyeca bëngbe catšata Timoteo, chë bëngaftaca trabajayá, Bëngbe Bëtsábioye oservéniñe, tsabe notiçiënga Cristbiana entšanga abuayiynayiñe. Fsënjanihmó chacmañémuayama y chaotsamama tsëngaftanga Jesucristbeñe más chašmotsošbuáchema;

<sup>3</sup> y chca, ndocná Jesucristbeñe ošbuáchiyana chaondájbana, masque tsëngaftanga Jesúsbeñe



ošbuáchiyënga bétsemnama, ínÿyënga imojtsama chašmotsesufrínama. Er cach tšëngaftanga šmondëtatšëmbo bënga šojtsamna chca quem luarentše jëttsepadecénana.

<sup>4</sup> Y cabá tšëngaftangaftaca fsënjëftsemna ora, tcbonjanëyana bënga šojánamna jasúfriana; y ndegombre chca tonjopasá, ntšamo tšëngaftanga ya šmondëtatšëmbcá.

<sup>5</sup> As y chë tšëngaftangbiana jtsetatšëmbuama más jatabátmanana ndoñe quetstétsobenayeca, sënjanjuabó šojëtsemna Timoteo jíchmuana. Sënjanichmó atše jtsetatšëmbuama aínhe bëtscá o ndoñe tšëngaftangbe ošbuáchiyana Jesucristbeñe tayojamnama, er atše yapa sënjanjuabná nderado Satanás tojanma tšëngaftanga bacna soyënga chašmotsamama, y chca, bëngbe trabajo tondayama chaondëtsooservénama.

<sup>6</sup> Pero mora, Timoteo tšëngaftangbiocana tontashjango y tonjúshjango noticiënga, y bënga chama oyejuayënga fsëntsemna, ntšamo tšëngaftanga bëtscá Jesucristbeñe šmojtsošbuáchema y nyetscanga šmenbobonshánama. Cha šonjacuntá ntšamo tšëngaftanga corente oyejuayënga bëngbiana šmuatenojubnama, y ntšamo tšëngaftanga tša šmojtseboše bënga jányama, cachcá ntšamo bënga tšëngaftanga jányama tša fsëntsebošcá.

<sup>7</sup> Quem sóyeca, Jesucristbeyeca catšátanga, y mora chë bënga nyetsca chë padecena soyënga fstsebomna ora y ínÿyënga bënga jasúfriama imojtsama ora, bëtš añemo fsëntsebomna, ntšamo tšëngaftanga tša Jesucristbeñe šmojtsošbuáchema jtsetatšëmbëse.

<sup>8</sup> Jtsetatšëmbuana tšëngaftanga sempre puerte tšabá Bëngbe Utabnáftaca šmoyenama, entsama bënga más añémoca chaftsiyenama.

<sup>9</sup> Mora fchantsobena Bëngbe Bëtšá jtsatschuanayana tšëngaftangbiana, y chë tšëngaftangbeyeca chabe delante bënga oyejuayana ftsbomnámnaca.

<sup>10</sup> Cada te, bnëté y ibeta, tša Bëngbe Bëtšá fsëndëtseimpadana jobenayama tšëngaftanga jautsëtsayama chašualesenciama, Bëngbe Bëtšabe palabra tšabá chašmobedecema, chë buayénana ntšamo yojtsashbencá jabuátambama.

<sup>11</sup> Bënga, Bëngbe Bëtšá fsëntseimpadana, cachá y Bëngbe Utabná Jesús, chašújabuache bënga fchayobenama tšëngaftangbioye jama jautsëtsayama.

<sup>12</sup> Y Bëngbe Utabná chaoma más bëtscá chašmotsenbobonshánama, y cachcá corente nyetscángaftaca, ntšamo bënga cbondababuanÿeshancá.

<sup>13</sup> Chca, tšëngaftangbe ainaniñe bëtscá añemo šmochántsebomna; y Bëngbe Utabná Jesús cachábengaftaca chaojésabo ora, Bëngbe Bëtšá Bëngbe Taitabe delante ndocná

chaondayana, ntšamo tšëngaftanga šmojamcá ndoñe tšabá yontsemna ca, er tšëngaftanga šmondmëna Bëngbe Bëtsábenga, nÿe cha jtseservénama.

## 4

*Ntšamo jtsiyenama, Bëngbe Bëtsá oyejuayá chaotsemnama*

<sup>1</sup> Y mora inÿe palabra šmochjatspaséncia. Jesucristbeyeca bëngbe catšátanga, tšëngaftanga bëngbentsana šmonjanatsjinÿe ntšamo jtsiyenana cmojánamna, ntšamo Bëngbe Bëtsábioye oyejuayá jabemama yomncá, y ndegombre chca tšëngaftanga šmondoyena. Y mora Bëngbe Utabná Jesusbe cuenta, cbontsaïmpadana y becá cbontsëtsëtsná más chca chašmotsamama.

<sup>2</sup> Tšëngaftanga šmondëtatšëmbo ndayá tifjánayana ntšamo tšëngaftanga chašmotsiyenama, y chca fsënjanma Bëngbe Utabná Jesús chca jamama šonjanamëndáyeca.

<sup>3</sup> Bëngbe Bëtsá endboše tšëngaftanga chašmotsiyenama mo Bëngbe Bëtsabengcá, ndocná bacna soyënga boyabása o shembásaftaca chaondëtsamama,

<sup>4</sup> y nÿetscanga chamotsobena ntšamo canÿe shema jonguan-guana, chë ntšamo canÿa Bëngbe Bëtsábia yomná jamama ibomncá, y ntšamo entsangbe bominiñe tšabá yomncá,

<sup>5</sup> y ndoñe chabondónguango nÿe cháftaca bacna soyënga chëngbe cuérpoca jamama, ntšamo chë Bëngbe Bëtsábioye ndu-abuátmënga mondbetsamcá.

<sup>6</sup> Chë palabriñe ndocná chabe catšátbioye chabondëingñe, chë catšatbe shémaftaca bacna soye jamëse, er chca amëngbioye Bëngbe Utabná corente echanjácastigaye. Chíyeca bënga ya bëtscá chama tcbonjabuayená.

<sup>7</sup> Er Bëngbe Bëtsá ndoñe šonjánachembo bacna soyënga boyabása o shembásaftaca jtsamama, ndayá ntšamo tšabá yomncá jtsamama, ntšamo chabe entsanga mondbetsamcá.

<sup>8</sup> Mëntšá, nda quem buatëmbana soyënga tojtsábotena, cha ndoñe nÿe entsanga jtsëbáténana, ndayá Bëngbe Bëtsábioye, nda tšëngaftangbe ainaniñe Uámana Espíritu cháumashënguama tojama.

<sup>9</sup> Atše ndoñe quešnátsmëna juabuábiamana ntšamo cmojtsamna ínÿenga Jesucristbeñe ošbuáchiyënga jtsababuánÿeshanama, er cach Bëngbe Bëtsá tcbonjabu-atambá nÿetscanga chašmotsenbobonshánama.

<sup>10</sup> Y ndegombre, tšëngaftanga chca šmondama nÿetsca Macedonia luarentše Jesucristbeñe ošbuáchiyëngaftaca. Pero cbontsaïmpadana, Jesucristbeñe catšátanga, más chca chašmotsamama.

11 Nýa sempre quem soyënguiñe šmochtsentšena: natjëmbana jtsiyenana, ínÿengbe soyënguiñe ndoñe ntsontremeténana, y ndoñe ntjatobátmanana nýe ínÿenga tšëngaftangbiana chamotsetrabájama, ntšamo tcbonjanëyancá tšëngaftangaftaca fsënjamna ora;

12 chca šmochtsama, chë ínÿenga Jesucrístbeñe ndošbuáchiyënga chacmotsarrespetánama, y ndocnábeñe ntjatobatmancá šmochantsobena jtsiyenana.

*Bëngbe Utabná quem luaroye yochjésabo ora*

13 Bëngbe catšátanga, bënga fsëntseboše tšëngaftanga ndegombre chašmotsetátšëmbo ntšamo chë obanëngaftaca yochjopásama, y chca, tšëngaftanga ndoñe ngmenánaca chašmondëtsemnana, mo chë ínÿengcá, chë tcojóbanentšana ndoñe yontsemna jtayenama ca juabnayëngcá.

14 Bënga fsëndošbuaché Jesús tojanóbana y tojtanayenama, y cachcá bënga fsëndošbuaché chë tmojóbanënga y Jesúsbeñe tmojtsošbuáchese, Bëngbe Bëtsá chëngbiana yochjama chë nýetsca tescama yomna tšabe vida Jesucrístoftaca chamotsebomnana, y quem luaroye cháftaca chamuatábama.

15 Chë soyama bënga cbontsëtsëtsná ntšamo cach Bëngbe Utabná tojëftsananabatambacá: Bëngbe Utabná chaojésabo ora, chë ošbuáchiyënga chë te cabá ainënga chamojtsemnënga, chábioye ndoñe quemochátinÿena tsbanánoca, más natsana chë ya obanënga chë te mochtayenëngbiana.

16 Er entšanga mochanjouena canÿe mando juayebuáchenana, chë angelëngbe amëndayabe oyebuambnayana y chë Bëngbe Bëtsabe trompetëfjua juajatëtámna, y chora cach Bëngbe Utabná celocana echanjástjango. Y chë tmojóbanënga, Crístbeñe imojanošbuachenga, natsana mochántayena;

17 chentšana, chë ainënga chamojtsemnënga chëngaftaca cánÿiñe Bëngbe Bëtsá šochanjúyamba, Bëngbe Utabná yochtsemnoca jashjanguama, chë celoca jantšetëshënga endmënoca; as chentšana nýetsca tescama cháftaca bënga mochántsemna.

18 Quem palabrëngaca nýetscanga ndoñe más ngménana ainaniñe chašmondëtsebonna.

## 5

1 Jesucrístbeyeca catšátanga, ndoñe quenátsiyta atše jubuábiamana mocna ora chë soyënga yochjopásama.

2 Cach tšëngaftanga corente šmondëtatsëmbo, Bëngbe Utabná yochjésabo chama ndocná chaondëtsejuabná ora, mo canÿe atbëbanacá jashjanguana ibeta ndocná chama tonjatsjuabná ora.

<sup>3</sup> Entšanga chamojáyana: “Lempe tšabá endětsomñe y tondayama quešnátamna játauatjana ca”, chora nýe ndeolpe chě entsangbiana tša jasúfriama echanjóshjango, mo canýe shembása šešona jtsebomnama ora nýe ndeolpe jasúfriama jóntšancá; y ndegombre, entsanga chca jasúfriama quemocha-totsbocá.

<sup>4</sup> Pero tšěngaftanga catšátanga, ndoñe quešmátiyena mo ibetiñcá, bacna soyěnga jtsejuabnayěse y jtsaměse; y chca, Běngbe Utabná chaojésabo ora, tšěngaftanga ndoñe auatjanáněnga quešmochátsměna, mo ndábioye canýe atbėbaná tbojotbá ora, chábioye cuaftsauatjanacá.

<sup>5</sup> Nýetsca tšěngaftanga šmondměna entsangbe juabna binýnayabe básenga, y mo binýniñcá šmondoyena. Běnga ndoñe chě ibetiñe mandayabe básenga quemuátsměna, y mo ibetiñcá ndoñe quemuátiyena;

<sup>6</sup> chíyeca běnga ndoñe quešnátamna jtsemnana mo chě cachěngbe cuerpo jenomándama ndobeněngcá, chě mo cuaftsemangcá oyeněnga. Pero aíně šontsamna mo chě fšněngcá jtseyenana, běngbe cuerpo jtsemándayěse y nýets tempo jtseprontáněse.

<sup>7</sup> Ibeta ora entsanga jtsemangana, y cach ibeta tojtsemna ora entsanga jotmenangana;

<sup>8</sup> pero běnga, chě binýnentšěngna, šontsamna sempre běngbe cuerpo jtsemándayana. Šontsamna Běngbe Bětsábeñe jtsošbuáchiyana y cha jtsebobonshánana, chě uyaná Satanasbiana jeněuyanama y cha jayějanama, mo canýe soldadcá, canýe morochó soye cochaca jenáčochjatsana jtsevalentiana y ndoñe chamonděyějanama. Y chě castigüentšana Běngbe Bětsá šochjátsebacamnaca puerte jtsošbuáchiyěse jtsobátmanana; y chca, běnga mochántsemna mo canýe soldadcá, cha canýe casquěse juabuchětsana jeněuyanama.

<sup>9</sup> Er Běngbe Bětsá ndoñe šonjáchembo běnga chašotsamnama chě nýetsca tescama castigo jtsebomnama. Ndayá Běngbe Bětsá šojabacacá, Běngbe Utabná Jesucristbeyeca běnga chamótsbocama.

<sup>10</sup> Cha běngbiana tojanóbana, běnga cháftaca cánýiñe jtseyenama chamotsobenama, masque ainěnga o obaněnga chamojtsemněse, cha chaojésabo ora.

<sup>11</sup> Chíyeca, nýetscanga šmochtsenañémuaye y šmochtsenájabuachana más jtsošbuáchiyama, ntšamo tšěngaftanga mora ya šmontsamcá.

*Pablo choca ošbuáchiyěnga jábuayenama*

<sup>12</sup> Jesucristbeyeca catšátanga, cbontsaimpadana chašmotsarrespetana chě Běngbe Bětsabiana tšěngaftangbeñe trabajayěngbioye, y chě Běngbe Utabná tšěngaftanguentše

tojábacacanga uánatsanënga chamotsemnana y ntšamo jtsiyenama cmojtsamnana chácmabuayenama.

13 Cmontsamna chënga jtsarrespetánana y jtsababuánÿeshanana, ndaye trabajo chënga imojtsamama. Natjëmbana nÿetscángaftaca šmochtsiyena.

14 Quem soyënga chašmotsamámna cbonstaimpadana: jatrabájama ndoñe tmontsebošëngbioye šmochjucácana, añemo ndbomnëngbioye šmochjáñëmuaye, bëtscá ošbuáchiyana ndbomnëngbioye šmochjújabuache, y uantadënga nÿetscángaftaca šmochtsemna.

15 Cuedado šmochtsebmna, nderado nda bacna soye tbojaborlase, ndocná ndoñe cachcá chabondëtachnënguama. Masha, nÿe šmochtsentšena nÿets tempo tšabe soyënga jtsamama cach tšëngaftanguentšëngaftaca y nÿetsca entšangaftácnaca.

16 Nÿets tempo oyejuayënga chašmotsemna.

17 Sempre Bëngbe Bëtsáftaca šmochtsencuéntaye.

18 Nÿetsca soyënguñe Bëngbe Bëtsá šmochtsatschuanaye; er chca entsemna ndayá cha yojtseboše, bënga Cristo Jesúsbeñe ošbuachiyëngcá chamotsamama.

19 Ndoñe šmattsama ntšamo chë Uámana Espiritu tšëngaftangbeñe yojtsamcá chaotsopochocama.

20 Ndoñe šmattsábotena chë Bëngbe Bëtsabe juabna oye-buambnayëngbe buayenana soye.

21 Yejuana šmochjúbuaboje y šmochjayana, chë Bëngbe Bëtsabe juabna oyebuambnayá yomna ca tojtsichamuabe buayenánama ndegombre Bëngbe Bëtsábicocana tayóbocanama, y chentša tšabe soyënga šmochjobuajo y sempre chca šmochtsama.

22 Nÿetsca bacna soyënguentsana šmochtsojuánañe.

23 Cach Bëngbe Bëtsá, chë bëngbe ainaniñe tšabe ebionana chamotsebmna endamá, nÿetsca soyiñe tšábënga chacá chacmabiana, y nÿets tšëngaftangbe espíritu, ainana y cuerpo chaotsinÿena, Bëngbe Utabná Jesucristo chaojésabo orscama; y chora, ntšamo tšëngaftanga šmojamama bacna soyënga yojtsemna ca ndocná chaondayanama.

24 Nda tcmojúbuaja chábinga chašmotsemnana, cha sempre jtsamana ntšamo tojayancá, y lempe cha echanjama.

*Inÿe rueguënga chëngbiama y jtadiósoftanama*

25 Jesucristbeyeca catšátanga, Diosmanda, bëngbiámna Bëngbe Bëtsá šmochtseimpadana.

26 Nÿetscángbioje mo Jesucristbeyeca catšatangcá šmochjácheuaye, jtenámochëse, ntšamo cach tšëngaftangbe pamállanga puerta bonshanánaca šmondsetsacheuanaycá.

<sup>27</sup> Cbontsaměnda quem tsbuanácha n̄yetsca Jesucristbeñe ošbuáchiyěnga chašměbuáliama, y chca sěntsama, Běngbe Utabná chca jamama šojanmandáyeca.

<sup>28</sup> Atše sěntseimpadana Běngbe Utabná Jesucristo, chaoma tšabe bendicioněnga tšěngaftangbeñe chaotsemnama.

## 2 Tesalonicenses

### *Jacheuayama*

<sup>1</sup> Atše Pablo, Silvano y Timotéoftaca, quem tsbuanácha sentsabiamná tšëngaftangbiama, chë Tesalónica bëts puebloca Jesucristbeñe ošbuáchiyëngbiama, tšëngaftanga Bëngbe Bëtsá chë Taitá y Bëngbe Utabná Jesucristoftaca cânÿiñe mo canÿacá šmommënga.

<sup>2</sup> Atše sëntseimpadana Bëngbe Bëtsá, chaoma tšabe ben-dicionënga tšëngaftangbeñe chaotsemnama, y tšëngaftangbe ainaniñe tšabe ebionana chašmotsebomnama.

*Cristo chaojésabo ora, ntšamo entšanga tmojamama Bëngbe Bëtsá echanjayana*

<sup>3</sup> Jesucristbeyeca bëngbe catsátanga, šontsamna nyets tempo Bëngbe Bëtsá tšëngaftangbiama jtsatschuanayana, ntšamo tšëngaftangbiama jamama šojtsëtocancá, er tšëngaftanga cada te más ošbuáchiyana šmontsebomna, y ntšamo tšëngaftanga nyetscanga šmojtsenbobonshana, tempscama más yojtsemna.

<sup>4</sup> Tšëngaftangbe ošbuáchiyama y bonshánama, bënga nyets tempo oyejuayënga fchandbétsemna, chë ínÿenache Bëngbe Bëtsábeñe ošbuachiyëngcá enefjuanëngbeñe tšëngaftangbiama jóyebuambayama. Bënga fchandbétsoyebuambnaye ntšamo tšëngaftanga ínÿetsá ntjatsjuabnaycá Jesucristo šmëstonama, y ntšamo tšëngaftanga chábeñe tša šmošbuachémnaca, masque ínÿenga tša cmécamena y chašmosufrima bëtscá imojtsama, tšëngaftanga Jesucristbeñe ošbuáchiyënga bétsemnama.

<sup>5</sup> Tšëngaftanga chca Cristo šmëstonayeca, corente entsinÿinyëna Bëngbe Bëtsá nyetsca soyënguiñe tšabá amá yomnama, y entšanga ntšamo tmojamama tšabá o ndoñe tšabá bétsemnama jayanama ora, cha chca echanjayana ntšamo entšanga tmojtsomerecencá. Y chca entsayana tšëngaftanga aíñe merecido šmotsobuájoñe chabe amëndayoye jamashënguama ca; y mora, tšëngaftanga choye jobenayama jashjanguama šmojtsamama, ínÿenga imojtsama chašmotsesufrínama.

<sup>6</sup> Bëngbe Bëtsá echanjama ntšamo jamama ibomncá; echanjama chë tšëngaftanga chašmosufrima imojtsamënga bëtscá chamosufrima;

<sup>7</sup> y echanjama tšëngaftanga y bënga chë mondësufrinëngbiama, ndoñe más chamondëtsesufrinama. Cha quem soyënga echanjama, Bëngbe Utabná celoca chaojábobocna ora. Cha chabe puerta obenana bomna

angelëngaftaca echanjabo, y chora bëtscá iñetšënga echántsemna.

<sup>8</sup> Cha echanjabo chë Bëngbe Bëtsábioye jtsabuatmama ndoñe montsebošënga jabácastigayama, y chë tšabe noticiënga Bëngbe Utabná Jesusbiamama ndoñe montsuenanëngbioynaca.

<sup>9</sup> Chënga Bëngbe Bëtsá echanjácastigaye, nyetsca tescama jtsapochócase; y Bëngbe Utabná bentšana bënoca mochántsemnënga, y ndocna te quemochatobenaye jinýama Bëngbe Utabná tša bëtscá y obená bétsemnama.

<sup>10</sup> Quem puerta uámana te, Bëngbe Utabná chaojésabo ora, nyetsca chabe entšanga, nyetsca chábeñe ošbuáchiyënga cha mochántatschuanaye y mochántichamo: “¡Tša obená cha yomna ca!” Y tšëngaftanga chëngaftaca šmochántsemna, er tšëngaftanga šmontsanošbuaché bënga ndegombre fsënjántatšëmbo soyënguiñe, chë bënga tcbonjanabuayená soyënguiñe.

<sup>11</sup> Chíyeca, chca chaotsemnama, nyets tempo Bëngbe Bëtsábioye tšëngaftangbiamama fsëndëimpadana mercedo bomnënga chácmbiamamama, chë vida chašmotsebomnama, ndayama cha tcmojúbuaja, y chabe obenánaca bëtscá chaoma tšëngaftanga chašmobená nyetsca tšabe soyënga ntšamo šmojtsejuabnacá jamama, y chašmobená jamama ndaye soyënga ntšamo šmojtsamcá, Jesucristbeñe šmojtsošbuáchema.

<sup>12</sup> Chca jtsamëse, tšëngaftanga šmochanjínýanýiye Bëngbe Utabná puerta bëtscá y uamaná bétsemnama, y cha echanjama tšëngaftanga más uámanënga chašmotsemnama. Chca echanjopása, er Bëngbe Bëtsá y Bëngbe Utabná Jesucristo tšëngaftangbiamama tšabe juabna ibobomna.

## 2

### *Chë Bëngbe Bëtsabe contra yomná*

<sup>1-2</sup> Mora atše sëntseboše Bëngbe Utabná Jesucristo jésabama orscama jáuyanama, chë bënga cháftaca tsbanánoca jteninýenama ora. Básefta entšanga imojtsichamo chë bëtscá uámana te, chë Bëngbe Utabná jésabama te, ya tojóshjango ca; pero cbontsaimpadana, Jesucristbeyeca catšátanga, bëtscá šmochtsentšena chënga ndoñe chamondobená jamana tšëngaftanga inýetšá juabna tšëngaftangbe ainaniñe chašmátsbomnama. Ndoñe šmatjóyeunaye nderado nda mëntšá chacmojtsëtsësná ora: “Canýe Bëngbe Bëtsabe juabna oyebuambnayá šonjáuyana chë Bëngbe Bëtsabe uámana te ya tojóshjango ca” o “canýa chca šonjabuayená ca” o “Páblëbiocana tsbuanácha fsënjushache y chiñe entsayana chë te ya tojóshjango ca”.



3 Bětscá šmochtšentšena ndocná tondáyeca chacmondáingñema. Er chě Běngbe Utabnabe uámana te cabá ndóshjango ora, mallajta entšanga Běngbe Bětsabe aměndayama contra mochántsemna, y chě Běngbe Bětsabe contra yomná echanjábocna. Y cha entsemna nda ibojtsemna infiernoca pochocaná jtsemnama.

4 Cha Běngbe Bětsabe contra echanjóyebuambaye, chě ndēmuanjēngbiamā y ndaye soyēngama entšanga imojuabná diosēnga imomnama contra echanjóyebuambaye. Chentšana cha echanjayana chēngbiamā más obenā yomna ca. Y Běngbe Bětsabe bēts yebnóynaca cha echanjámashēngo, choca echanjót bema y entšanga echantsětsětsnaye ndegombre cha Běngbe Bětsá yojtsemna ca.

5 ¿Chě soyama tšēngaftanga ndoñe šmondenabouínjyna? Atše cabá tšēngaftangaftaca sēnjamna ora, chama sēnjanoyebuambná.

6 Y tšēngaftanga šmondětatsēmbo, nda mora yojtsama chě Běngbe Bětsabe contra yomná ndoñe chaondonynama, cabá chě tempo chca jopásama ndóshjango ora.

7 Mora ya mallajta entšanga puerte bacna soyēnga tmojontsé amana, ndoñe ntšamo Běngbe Bětsá tojayancá chēnga jamama yojtsamna ca, y bēnga chě soyēnga josértama ndoñe quemuátobena, ndayá nje Běngbe Bětsá chca šojinjanjese; pero ntšamo tchbonjauyancá chě Běngbe Bětsabe contra yomnabiamā ndoñe queochatēchnēngo, nja nda chě soyēnga ndoñe chaondětsemnama yojtsamábioye Běngbe Bětsá chabojtsejuanā ora aífne.

8 Chora chě Běngbe Bětsabe contra yomná echanjábocna; pero Běngbe Utabná yochjésabo ora, echanjángouo y echanjama cha chaóbanama; y tša buashinjinjanánaca y obenánaca echanjábocnama, chábioye bochantsepochoáca.

9 Chě Běngbe Bětsabe contra yomná, Satanasbe obenánaca echanjabo, y entšanga bēts obenana echanjínjanjīye, y chě bēts soyēngaca entšanga ingñēnēnga mochántsemna.

10 Cha ba bacna soyēnga echanjama ntšamo Běngbe Bětsá ndoñe yondbošcá, chca, ba entšāngbioye njētsca soyēnguiñe jáingñama. Y chēnga ndegombre pochocānēnga mochántsemna; Běngbe Bětsá chca echanjama, chēnga chě ndegombre soyēnga Jesucristbiamā chēngbe ainaniñe ndoñe tmonjanóyēngacñe causa, y chě soyēngama mo uámana soyēngcá ndoñe tmonjanjuabó causa, chca, atsebācanēnga jtsemnama.

11 Chca causa, Běngbe Bětsá entseleséncia entšanga ingñēnēnga chamotsemnama, y chě ndoñe ndegombre soyēnguiñe chamotsošbuáchema.

12 Běngbe Bětsá chca echanjama, njētscanga chě ndegombre soyēnguiñe Jesucristbiamā ndoñe tmontsošbuáchenga,

chë bacna soyënga amama oyejuayënga tmojtsemnënga, chë nyetsca tescama castigo chamotsebomnama jayanama.

*Bëngbe Bëtsá šojabacacá atsebácanënga jtsemnama*

13 Pero bënga šontsamna nyets tempo Bëngbe Bëtsá jtsatschuanayana tšëngaftangbiama, Jesucristbeyeca catšátanga, Bëngbe Utabnabe bonshánënga. Bënga, Bëngbe Bëtsá fsëndëtschuaná cha quem luare cabá ndobojátša ora, atsebácanënga chašmotsemnama tcmojánabacacama. Bëngbe Bëtsá tcmojatsebacá er chë Uámana Espíritu Bëngbe Bëtsabe entšanga tcmojábiana, y tšëngaftanga chë ndegombre soyënguiñe šmojtsošbuaché.

14 Chë tsabe noticiënga bënga cbondábuayiynayeca, Bëngbe Bëtsá tcmojúbuaja chábënga chašmotsemnama. Cha tcmojúbuaja Bëngbe Utabná Jesucristbe obenana y buash-injinyánánënaca chašmotsebomnama.

15 Chcasna, ndocna te šmattsajbaná ošbuáchiyana chë ndegombre soyënguiñe ntšamo tcbonjabuatambacá, cach tšëngaftangbeñe jóyebuambayëse y tsbuanácha jubuábiamëse, y ndocna te inyetsá šmatjatsjuabnaye.

16 Bëngbe Bëtsá puerte tsabia endmënayeca, cha šuababuányëshana y tojama bënga sempre añemo ainaniñe chamotsebomnama y chë mochjóyëngacñe tsabe soyëngama corente jtsošbuáchiyëse chamotsobátmanama. Chábioye y Bëngbe Utabná Jesucristbioye fsëntseimpadana,

17 chata chaboma tšëngaftanga bëtsacá añemo ainaniñe chašmotsebomnama, y tšëngaftanga nyets tempo chašmotsobena ntšamo tsabá yomncá jtsichámuama y jtsamama.

### 3

*Bëngbiama Bëngbe Bëtsá šmochtseimpadana*

1 Y morna, Jesucristbeyeca bëngbe catšátanga, Diosmanda bëngbiama Bëngbe Bëtsá šmochtseimpadana, nyetsca luarenache más ba entšanga chamotsobenama Bëngbe Bëtsabe buayenánana jouenama, y chënga chë soye chamóyëngacñama, y puerte chamotserrespetánama, ntšamo tšëngaftanga šmonjanmca.

2 Bëngbe Bëtsánaca šmochtseimpadana cha chašotsëbuáuyayama, y chë puerte bacna entšanga ndoñe chamondobenama jamama bënga fchaisufrima, er nyetscanga ndoñe quemochatošbuáchiye chë fsëndbuayiyná palabriñe.

3 Pero Bëngbe Utabná sempre jtsamana ntšamo tojayancá, y cha echanjama tšëngaftanga más chábeñe chašmotsošbuáchema, y ndoñe nye cachcá quecmatënja

chë bacna soyënga mandayá nÿe ntšámnaca ndoñe chacmondáborlama.

<sup>4</sup> Y Bëngbe Utabná entsama bënga ndegombre ainaniñe fchaitsejuabnama, ntšamo bënga tcboganamëndacá mora šmojtsamama y cachcá sempre šmochtsamámna.

<sup>5</sup> Bënga, Bëngbe Bëtsá fsëntseimpadana, Bëngbe Utabná benache chacmanÿanÿé bonshánana jtsebomnama ntšamo Bëngbe Bëtsá endbomncá, y chašmojtsesufrina ora, corente añemo chašmotsebomnama, ntšamo Cristo tojansufrí ora yojanbomncá.

*Nÿetscanga entsamna jtsetrabájayama*

<sup>6</sup> Jesucristbeyeca catšátanga, Bëngbe Utabná Jesucristbe mándoca cbontsamënda, ndëmua Jesucristbeñe ošbuachiyá jatrabájama ndoñe tontseboše y ndoñe tontsiyena ntšamo bënga tcbonjabuatambacá, cháftaca ndoñe šmattsóyebuambnaye.

<sup>7</sup> Cach tšëngaftanga tšabá šmondëtatšëmbo ntšamo cmojtsamna jtsiyenana, ntšamo bënga fsënjoyencá: bënga tšëngaftangbeñe fsënjaninyena ora, nÿe ntjatrabajacá oyënjayënga ndoñe queftsjatsmëna,

<sup>8</sup> ni ndocnabe saná chibiáisese, tondaye ntabuenaycá. Inÿetšá enjamna; cada te bnëté y ibeta jabuache fsënjantrabája, chca, tšëngaftanga ndoñe chacmondëtsamnama bëngbe uajabótama bënga jatatšatnayama.

<sup>9</sup> Y ndegombre, bënga derecho fsënjánbomna tšëngaftanga jamëndama chaščújabuachama; pero masque chca, bënga jabuache fsënjantrabája tšëngaftanga chašmotsetatšëmbuama ntšamo yomna jtsiyenama, y chca chašmotsamama.

<sup>10</sup> Bënga tšëngaftangaftaca fsënjamna ora, mëntšá tcbonjanamëndá: Nda ndoñe tontseboše jatrabájama, cha cach ndoñe chaondëtsesá.

<sup>11</sup> Chca fsëntsichamo, er bënga fsënjátatšëmbona, báseftanga tšëngaftanguentsënga imojtsiyena tondaye ntsamcá, pero tša chë ínÿengbe soyënguiñe jtsontremetënese.

<sup>12</sup> Chca oyena entsángbioye fsëntsabuayiyná y fsëntsamënda Bëngbe Utabná Jesucristbe mándoca, natjëmbana cachëngbe vida onguayiñe chamotsotrabájañama.

<sup>13</sup> Jesucristbeyeca catšátanga, ndoñe chacmondëumantšé tšabe soyënga amana.

<sup>14</sup> Nderado nda ntšamo quem tsbuanáchañe fsënjayancá ndoñe tontsuenana, šmochjarrepára nda cha yojtsemna y cháftaca ndoñe šmattsencuëntaye, chca, cha chaotsëuatjama.

<sup>15</sup> Mo canÿe uayayacá ndoñe šmattsonÿaye; šmochjabuayená mo canÿe catšatcá, chca ndoñe chaondëtsamama.

*Jtadiósoftanama*

<sup>16</sup> Běngbe Utabná fsěntseimpadana, cha, chě entšanga tšabe ebionana ainaniñe chamotsebomna iuamá, chaoma tšěngaftanga nýets tempo y nýetsca tescama chca chašmotsebomnama. Běngbe Utabná tšěngaftangaftaca chaotsemna.

<sup>17</sup> Nýe quem palabrěnga tšěngaftanga jacheuayama cach atšbe cucuátšeca sěntsabiamná. Atše chca sěndbauapochóca atšbe tsbuanachangá juabemama; ntšamo muentše entsabemancá entsinýinýná quem tsbuanácha atšbiácha iuamnama.

<sup>18</sup> Atše, Běngbe Bětsá sěntseimpadana, Běngbe Utabná Jesucristo chaoma tšabe bendicioněnga tšěngaftangbeñe chaotsemnama.

# 1 Timoteo

## *Jachuayama*

<sup>1</sup> Atše Pablo, Jesucristbe ichmoná sëndmëna. Bëngbe Bëtsá bëngbe atsebacayá endmëna y Bëngbe Utabná Jesucristo endmëna ndábeñe bënga, puerte jtsošbuáchiyëse mondobátmana ba soyënga bëngbiamana cha yochjamama. Atše Jesucristbe ichmoná sëndmëna, er chata tbojanmandá atše chca jtsemnana.

<sup>2</sup> Timoteo, atše quem tsbuanácha chontsabobiamná. Atše Bëngbe Bëtsabe soyëngama entšanga sënjanabuayiyiná ora, aca Jesucristbeñe tconjanošbuaché, y chca, aca mo atšbe ndegombre uaqiñacá tconjanóbema. Atše sëntseimpadana, Bëngbe Bëtsá Bëngbe Taitá, y Cristo Jesús Bëngbe Utabná, chaboma aca tšabe bendicionënga chacotsebomnana, chata chacmo-lastemama y ainaniñe tšabiana ebionana chacotsebomnana.

*Pablo chë ndoñe ndegombre soyënga abuatambayëngbiamana chënga tojanabuayená*

<sup>3</sup> Ntšamo chë Macedonia luaroye chocana sënjëftsanbocna ora tconjanimpadacá, mora cachiñe cbochtësimpáda. Efeso pueblaca cochjoquéda, básefta entšanga chácuamëndama chë ndoñe ndegombre soyënga ndoñe chamondëtsabuatambama,

<sup>4</sup> ni nÿets tempo ndoñe nÿe chamondetsejuabná anteungbe cuentëngama, ni chë ba uabemana uabáinënga chë tempsca bëts taitangbiamana. Er nÿe chca yapa jesejuabnayanentšana, jóbocnana nÿe ínÿengaftaca jabuachana enatsëtsnayañe, y chca chëngbioye tondayama ntjujabuáchana ntšamo Bëngbe Bëtsá jamama yojuabnacá chaósertama. Chë soyna nÿe chábeñe jtsošbuáchiyëse jobenayana josértana.

<sup>5</sup> Chca mando entsemna nÿetscanga chamotsenbobonshánana, y chë bonshánana endóbocana nda chabe ainanentše ndocna bacna soyënga tondbomnábentšana, ntšamo tojtsamcá tšabá yojtsemna ca ainaniñe tojtsejuabná y tojtsetatšëmbuábentšana, y Jesucristbeñe ndegombre ošbuachiyábentšana.

<sup>6</sup> Báseftanga tmojtsajbaná chca jtsemnana y inÿe soyëngama tmojontsé juabnayana; chíyeca chënga mora imojtsentšena nÿe ndayámna ndoservena soyëngama enatsëtsnayana.

<sup>7</sup> Chënga jtsebošana Bëngbe Bëtsabe ley abuatambayënga jtsemnana, pero chënga ndoñe yontsósertana ni ntšamo imojtsabuatambacá, ni mo ndayánaca ntšamo chënga tmojtsichamcá, mo chë soyënga ndegombre cuaftsemncá.

<sup>8</sup> Pero bēnga mondētatsēmbō chē leyēnga tšabá yomnama; tšabá endmēna, chē ndayama chē leyēnga tmojuamcá entšá chē leyēngaca tojtsamēse.

<sup>9</sup> Bēngnaca mondētatsēmbō, chē leyēnga ndoñe tmonjuama chē nyetsca soyēnguiñe tšabá amēngbiana. Chē leyēnga tmonjuama quemētšá entšanga jácastigama: ntšamo leyēnguiñe ndoñe tontselesenciancá amēnga y ntšamo Bēngbe Bētsá yobošcá ndámēnga, chē Bēngbe Bētsá ndoñe imondadoránēnga y bacna soye amēnga, Bēngbe Bētsá ndoñe mondērrespetánēnga y Jesucristbeñe jtsošbuáchiyana y Bēngbe Bētsá jtsadoránana tondaye yondoservena ca juabnayēnga, cachabe taitá o mamá obánayēnga y ndēmuanyēnga imomna entšanga obánayēnga,

<sup>10</sup> boyabásaftaca o shembásaftaca bacna soye amēnga y boyabásenga cach boyabásengaftaca bacna soye amēnga, entšanga enēnga nye ínñabiana nyets tempo chamotseservénama, bosterēnga y chē nye bonamente Bēngbe Bētsabiana júrayēnga; chca entsayana, chē leyēnga yomna jácastigama nyetscanga ndēmuanyēnga ndoñe tmontsama ntšamo chē ndegombre buatēmbana soyēnguiñe iuayancá.

<sup>11</sup> Ntšamo muentše chē leyēngama tijayancá, entsebuátēmbana chē Bēngbe Bētsábíocana puerte tšabe noticiēnguiñe, chē ndegombre buatēmbana soye; Bēngbe Bētsá, chē corente bendición bomná, šonjichmó chē buayenánana entšanga jabuátambama.

*Pablo Bēngbe Bētsábíoye tbojtanchuá, tbojanlastemama*

<sup>12</sup> Atše, Bēngbe Utabná Jesucristo sēndētschuaná, er cha tojanjuabó, ntšamo cha šojanmandacá jobedésama atše tsjētseprontanama, y chíyeca šojanábuayana atše chabiana chaitrabajama; y cha endmēna nda inétsama atše obenana chaitsebomnama chē trabajo jamama.

<sup>13</sup> Cha chca átšeftaca tonjanma, masque tempo atše chabe contra ba soyēnga sēnjánichamo, chabe ústonēnga sēnjanēcama, y chabiana tondaye respeto ntsebomncá sēnjánenobuena. Pero Bēngbe Bētsá šonjanlastemá, er atše, Jesucristbeñe ošbuachiyá cabá ndoñe quetsjátanmēna, y chca, atše ndoñe quetsjátantatsēmbō ndayá tsjánamama.

<sup>14</sup> Y chca, Bēngbe Utabná ba tšabe bendicionēnga atšbiana tonjanma, y chábeñe ošbuachiyá šonjánbema, y tonjanma atše cha chaitsebobonshánama y ínñengbioynaca. Cha chca bēngbiana tojama, bēnga cánñiñe mo canñacá Cristo Jesúseftaca bétsemnayeca.

<sup>15</sup> Ntšamo chanjayancá ndoñe nye bostero soye quenátsmēna, y nyetscanga entsamna chca ndegombre bétsemnama jtsejuabnayama: Cristo Jesús quem luaroye

tonjánabo, bacna soye amënga jabátsebacama, y chë bacna soye amënguentse atse chë más bëts bacna soye amá sëndmëna.

<sup>16</sup> Chíyeca, Bëngbe Bëtsá šonjanlastemá, jinÿanÿiyama cha puerte uantado entšángaftaca yomnama. Y chë soye ínÿengbioye tojaninÿanÿé, chë nÿetsca tescama yomna tšabe vida jtsebomnama, chë chábeñe mochtsanošbuachëngbioye; chca tonjaninÿinÿé cachá átšeftaca uantado jtsemnëse, atse nÿetscangbiama chë más bëts bacna soye amá jtsemnëse.

<sup>17</sup> ¡Entšanga nÿets tempo chamotsinÿanÿná, chë Utabná nÿets tempo mandayá y puerte bëtsá y obená yomnama! Cha endmëna chë ndocna te echanjëtsobaná, chë entšanga ndoñe ntobenana jinÿamá y chë nÿe canÿe Bëngbe Bëtsá yomná. Chca chaotsemna.

<sup>18-19</sup> Timoteo, aca mo atšbe uaquiñacá condmëna. Atse tcbonjaimpadá, ntšamo tcbonjauyancá entšanga chacúyanama, ntšamo báseftanga Bëngbe Bëtsabe juabna oyebuambnayënga acbiama tmojanayancá, y chiñe jtsejuabnayëse chë Jesucristbe soyëngama chacopeliá y nÿets tempo chca chacotsama, Jesucristbeñe puerte jtsošbuáchiyëse, y lempe ntšamo tcojtsamama tšabá yojtsemnama ainaniñe jtsetatšëmbëse. Báseftanga, chënga ndoñe tšabá imonjëtsama ca chë ainanoca juabnënga tmojánayana ora, chë soye ndoñe tmonjanuena y chë causa, Jesucristbe soyënguiñe ošbuáchiyana tmojtsanajbananga y tmojanontsé inÿe buatëmbana soyënguiñe jtsošbuáchiyana.

<sup>20</sup> Chca tonjopasá Himeneo y Alejáandroftaca, y atse sënjalesenciá Satanás chaoma chata chabosufrima; y chca, chata chabuatsjinÿe Bëngbe Bëtsabiama ndoñe bacá ntsóyebuambnayana.

## 2

### *Pablo tojanabuayená ntšamo Bëngbe Bëtsá jtsadoránama*

<sup>1</sup> Nÿetsca soyama más cbontsaimpadana ndayá chë Jesucristbeñe ošbuáchiyënga Bëngbe Bëtsáftaca chamojtsencuénta ora, nÿetsca soyëngama ntšamo tojtsëjbotcá cha chamotseimpadana, nÿetsca entšangbiama, y cha sempre chamotsatschuaná.

<sup>2</sup> Entsemna, nÿetscangbe tšabiama Bëngbe Bëtsá jtseimpadánama, pero masna quem luarentša reyëngbiama y inÿe mándayëngbiama, chca, nÿetscanga puerte natjëmbana jtsiyename chamuetsobenama, y nÿetsca soyënguiñe tšabá jtsemëse, Bëngbe Bëtsá jtsatschuanayama, y entšangbe juabniñe tšabá chamotsemnama.

<sup>3</sup> Chca jtsamana tšabá endmëna, y Bëngbe Bëtsá, bëngbe Atsebacayá, chama jtsóyejuayana;

<sup>4</sup> y chca jtsóyejuayana, er cha endboše nýetsca entšanga atsebácanënga chamotsemnama y chë ndegombre buayenánana chamotsábuatmama.

<sup>5</sup> Chca nýetsca entšangbiamama endmëna, er nýe canýe Bëngbe Bëtsá nýetscangbiamama endmëna, y nýe canýa endmëna nda yobena jamama entšanga tempcá tšabá Bëngbe Bëtsáftaca chamotsemnama; cha endmëna Jesucristo, cach entšá.

<sup>6</sup> Er Jesucristo, mo canýa ínýenga játsebacama cuaftopagacá, chabe derecho vida jtsobomñamama cachcá tojanonýá y tojanóbana, chca, nýetsca entšanga chamotsobenama atsebácanënga jtsemnama. Chë soye cha tonjaninýanjé, nýa chama tempo yojtsemna ora, chë Bëngbe Bëtsá nýetsca entšanga atsebácanënga chamotsemnama yobošama.

<sup>7</sup> Bëngbe Bëtsá chca nýetsca entšangbiamama yobóšeyeca, Jesucristo šojanábuayana chabe ichmoná jtsemnama, chabe soyënga entšanga jtsabuayiynayama; ndegombre soye sëntsoyebuambná, ndoñe quetsátsbostero. Sonjanmandá chë ndegombre buayenánana chë ndoñe judiëngbioye jabuátambama, y chënga entsamna chiñe jtsošbuáchiyana.

<sup>8</sup> Ntšamo sënjayancá, atše sëntseboše nýetsca chë Jesucristbeñe ošbuachiyëngcá enefjuana luarënguenache, boyabásenga Bëngbe Bëtsáftaca chamotsencuënta, y chora celoye, Bëngbe Bëtsábioye cucuatše chamatsbaná; pero chamna, ainaniñe bacna soyënga ntsebomncá, ínýengaftaca ntjatentjayanaycá, y ínýengaftaca jabuachana ntjatenatsëtsnaycá chënga chamotsemna.

<sup>9</sup> Y atše sëntseboše shembásenga entšayangá chamu-atíchëtjo, mo chë tšabe shembásenga mondbetsichëtjoncá, ndoñe nýe entšanga chamotsëbuáuatjama y ntšamo tmojtsichëtjonama chëngna uámanënga imomna ca entšanga chamotsejuabnama. Ndoñe quenátamna jtsenóbotamnayana, nýa mo chca chquëcnënga jtsemnëse, ni castellano soyëngaca o uámana fjantse ndëtsbéngaca, o yapa uámana entšayangaca, chca, nýe entšanga jinýama tšabá jtsemnama.

<sup>10</sup> Pero aíñe mo chë Bëngbe Bëtsá adóraye shembásenga mondbetsamcá jtsamëse, chë tšabe soyënga jtsamana.

<sup>11</sup> Nderado nda tojtsabuatambá ora, shembása bontsemna jtsatsjédayana, chca ora tondaye ntjatichamcá, y chentša mándayënga chaotsayaunana.

<sup>12</sup> Atše ndoñe quichatsleséncia, canýe shembása boyabásenga chaotsabuatambá, ni chaotsamënda. Canýe boyabása tojtsabuatambá o tojtsamënda ora, shembása ndocá chaondëtsichamo.

<sup>13</sup> Chca chaotsemna, er Bëngbe Bëtsá natsana Adán tbojanpormá, y chentšana Eva;



14 y er Satanás Adánbioye ndoñe tbonjaningñé, ndayá chë shémbioye; y chca tbojaningñé ora, chë shema tojanma ntšamo Bëngbe Bëtsá ndoñe tbonjanlesenciaca.

15 Pero shembása atsbocaná echántsemna, básenga quem luaroye endbaúshejangoyeca, pero chamna, aíñe nÿets tempo Bëngbe Bëtsábeñe tojtsošbuáchese, nÿetscanga tojtsababuánÿeshanëse, cachá nÿetsca soyënguiñe jenomándama tojtsobenëse, y nÿets tempo tšabe soyënga tojtsamëse, ntšamo Bëngbe Bëtsabe entšanga mondbetsamcá.

### 3

*Ntsamo ibojtsemna chë ošbuachiyëngcá enefjuanëngbeñe mandayá*

1 Mëntsá ndegombre endmëna: nderado nda tojtseboše canÿe trabajo jtsebomnama, cánÿentše ošbuachiyëngcá enefjuanentše chë inÿe ošbuáchiyënga jtsamëndayama, cha ndegombre yojtseboše canÿe puerte tšabe trabajo.

2 Chíyeca, chë ošbuachiyëngcá enefjuanëngbe mandayá bontsemna jtsiyenana ba tšabe soyënga jtsamëse, chca, cha ndoñe tšabá yontsama ca ndocná chaondëtsichamuama. Y mëntsánaca cha bontsemna jtsemnama: nÿe canÿe shembásabe boyá; ntšamo jtsiyenama tšabá juabnayá chaotsemna, cachá nÿetsca soyënguiñe jenomándama chaotsobena, y chaotsetátšëmbo ndayá ibomna tšabá jtsamana; chaotseprontana chabe yebnentše posada entšanga júyentšamiama, y chaotsobena botamana abuatambayá jtsemnama.

3 Ndoñe yapa tmoyá o penzentsero chaondëtsemna; pero chaotsemna tšabá mandbomná, entšanga natjëmbana chamotsiyenama bošá, y ndoñe chaondëtsejuabná nÿe crocénana jésebomnama.

4 Chaotsetátšëmbo ntšamo nÿetsca chabe yebnentša entšanga botamana jtsamëndayama, y chaoma chabe básenga chë ntšamo cha tojayancá chamotsamama, ndocna te stëtšoye chamondëquedama;

5 er, nda cachabe yebnentša entšanga ndoñe tontsobena jtsamëndayama, chca, ¿ntšamo nantsobena chë ošbuachiyëngcá enefjuanënga jtsanÿenama?

6 Cha ndoñe chaondëtsemna cabá mora cuenta Jesucristbeñe ošbuachiyá; aíñe chca chë ošbuachiyëngcá enefjuanëngbe mandayá tojtsemnëse, nderado nÿe cachá uámana entšá nantsenobiamnaye, y ntšamo Bëngbe Bëtsá Satanásbioye tbonjancastigacá, chca bëtsemnama, cach soyama Bëngbe Bëtsá chë entšábioye buanjacastíga.

7 Chánaca bontsemna jtsiyenana jtsamëse, y chca chaojt-sama ora, chë Jesucristbeñe ndošbuáchiyënga tšabá chabiamama chamotsichamo. Chë entsá ndoñe chca tontsamëse, chënga chabiamama mochanjayana ndoñe tšabá yontsama ca, y Satanás echanjama cha chabócochëngo bacna soyënga jamama.

*Ntsamo ibojtsemna chë ošbuachiyëngcá eneffjuanënga ujabuachaná*

8 Cachcá, chë mándayëngbe ujabuáchanënga mëntšá entsamna: uámana entsangcá nyetscanga chamotsétabna, uta palabra ndbomnënga; ndoñe yapa vínoye chamondëtsetmó, y ndoñe chamondëtseboše nye paselo becá crocénana jtsebomnana.

9 Chënga entsamna ndegombre jtsošbuáchiyana chë Bëngbe Bëtsá tojinñanyé soyënguiñe, chë ndayiñe bënga mondošbuaché, chëngbe ainaniñe inyetsá juabnënga ntjatsbomncá.

10 Natsana, chëngbiamama botamana šmochjshauarrepára jtsetatšëmbuama chënga aíñe o ndoñe montsobena mo chë ošbuachiyëngbeñe mándayëngbe ujabuachanëngcá joserviama. Chënga nyetsca soyënguiñe tšabá tmojtsemnëse, šmochjálesenciaye chiñe chamoserrema.

11 Cachcá, chë shémanga mëntšá entsamna: nyetscangbiamama mo uámana entsangcá utabnënga, ndoñe uayátsenayënga, cachënga nyetsca soyënguiñe jenomándama obenënga, y nyétscañe tšabe palabra bomnënga.

12 Canye ujabuachaná chaotsemna nye canye shembásabe boyá, y chaotsetátšëmbo ntsamo chabe básenga y nyetsca chabe yebnentša oyenënga jtsamëndayana.

13 Chë ujabuáchanënga tšabá chiñe tmoservénëse, canye uámana puesto mochanjashjache, y chënga mochantsobena bëts añémoca jtsóyebuambnayama ntsamo Cristo Jesúsbeñe tmošbuáchema.

*Ndayá Bëngbe Bëtsá bënga šojinñanyecá, canye bëts buatëmbana soye endmëna*

14 Atše sentsobátmana pronto chjobenaye jama aca jauatsësayama; pero chca cbontsabobiamná,

15 nderado atše betesco jama ndoñe sënjobenase, chacotsetatšëmbuama ntsamo canya ibojtsemna nyetsca chë Bëngbe Bëtsábënga imomnëngaftaca. Chënga mondmëna chë Jesucristbeñe ošbuáchiyënga, chë Bëngbe Bëtsá Ainabe básenga. Chënga chë Bëngbe Bëtsabe ndegombre soyënga mondbomna chë más uámana puestoca quem luarentše, y tša mondëntšena chama inyëngbiöye jáyënjanama.

16 Nya ndegombre endmëna, Bëngbe Bëtsá soyënga šojinÿanyé, y chë soyëngaca bënga montsobena jtsiyenana, chë Bëngbe Bëtsabe entšanga imomnëngcá; chë soyënga bëngbiana ndegombre bëts buatëmbana soye endmëna, y chë buatëmbana soye mëntsá endmëna:

Cristo quem luarentše cach entšacá entšángbioye tojánebëbuacna.

Chë Uámana Espíritu tonjinÿanyé cha nyetsca soyënguiñe tšabá amá yomnama.

Angelënga cha tmojáninÿe, y chabiana ba luarënguentša entšángbioye tmojanabuayená.

Ba entšanga quem luarentše chábeñe montsanošbuaché, y Bëngbe Bëtsá celoye tbontanatsbaná, cha puerta bëtsá y obená yomnama jinÿanÿiyëse.

## 4

### *Báseftanga chë tšabe benachentsana mochtsojuánañe*

1 Uámana Espíritu, nyetscanga catafjosertaycá tojayana, quem luare jopochócama tempo chaojtsobeco ora, básefta entšanga camochtsajbaná ošbuáchiyana chë ndayiñe bënga Jesucristbiana mondošbuaché soyënguiñe ca. Chëngna, espíritënga entšanga áingñayënga mochántsayauana, y chë ndoñe ndegombre soyënga chë bacna bayëjënga entšángbioye mochtسابuátambaye soyënguíñnaca.

2 Chca buatëmbana soye jtsóbocanana chë bacna entšanga ntšamo ndegombre tmojuabnacá ndinÿinÿnayëngbentsana y chë bosterëngbentsana. Chënga chca bacna soye tmojtsama ora, ainanoca ndoñe ntsejuabnayana, ntšamo tmojamcá ndoñe tšabá yontsemna ca, er yapa bacna soyënga tmojama causa, chënga nÿe chca chëngbe ainaniñe jésejuabnayana.

3 Quem entšanga ndoñe ntjaleséciana ínÿenga chamot-sobouamama, y jtsemándayana básefta sananga entšanga ndoñe chamondëtsesama. Ntšamo chënga chiñe tmojtse-buatëmbacá ndoñe ndegombre soye ntsemnana, er Bëngbe Bëtsá chë sananga tojanma, Jesucristbeñe ošbuáchiyënga y chë ndegombre soyënga uabuátmënga chamóyëngacñama, Bëngbe Bëtsábioye chama jtsatschuanayëse.

4 Er lempe ntšamo Bëngbe Bëtsá entšanga chamosama tojamcá tšabá entsemna. Ndoñe quešnátamna ndaye saná jtsaboténana, bënga chë saná tmojuáyëngacñe ora, Bëngbe Bëtsá chama tmojëtschuase;

5 er chca saná Bëngbe Bëtsábioye tšabá jtsinÿnana, cachá chca tojayánayeca, y bënga chë sanama cha mondbatschuayama.

*Jesucristbiana trabájayiñe canÿe tšabe oservená*

<sup>6</sup> Aca, chë soyënga ošbuachiyëngbioye chacojtsabuátambase, aca Jesucristbiana trabájayiñe canye tšabe oservená cochántsemna. Y mo nda bëtscá añemo jtsebmomna botamana tojtsesacá, cachcá, ácnaca puerte ošbuáchiyana y ainaniñe bëtš añemo cochántsebmomna; chca echántsemna, chë bënga mondošbuaché buayenana soye aca icuatsjendá y icoyeunánayeca, y ntšamo chë tšabe buatëmbana soyënguñe endayancá sempre icuámayeca.

<sup>7</sup> Pero ndoñe nye quem luarentša entsangbe cuentënga y ndoservena cuentënga cattsuenana. Ba soyënga cochjama aca bëtš añemo ainaniñe chacotsebmomna, mo nda bëtš añemo jtsebmomna cachabe cuérpoca ba soyënga cuaftsamcá, ntšamo Bëngbe Bëtšá jadórama yomncá jtsiyenama jtsamëse;

<sup>8</sup> cachabe cuérpoca ba soyënga jamana más añemo jtsebmomna, añe batšatema endoservena; pero jtsiyenana Bëngbe Bëtšábioye jadórama yomncá jtsamëse, puerte enduámama y juajabuáchana nyetsca soyënga tšabá chaotsemnana; chca jtsamama puerte tšabá endmëna cachabe vidama quem luarentše, y chë inye vidócnaca.

<sup>9</sup> Ntšamo tijayancá ndegombre entsemna, y nyetscanga entsamna jtsejuabnayana chca ndegombre bëtsemnana.

<sup>10</sup> Y chë soyama bënga puerte mondëtrabája y mondësufrina, er chë Bëngbe Bëtšá Ainábeñe puerte mondošbuachéyeca, bënga mondobátmana cha yochjama soyënga bëngbe tšabiana. Cha endmëna chë nyetsca entsangbe atsebacayá, pero ndegombre masna, chábeñe ošbuáchiyëngbe atsebacayá cha endmëna.

<sup>11</sup> Ntšamo quem soyëngama tcbonjauyancá entsanga cocht-samëndaye y cochtsabuátambaye.

<sup>12</sup> Ndoñe catjaleséncia, aca bobontse comnana, ndánaca chacmotsáboyënjama. Pero añe bëtscá cochtsama, chënga puerte chacmotserrespetánama, chca jtsamëse icoyenama jtsonyayëse, cachcá chamotsamama: botamana jtsóyebuambnayëse, nyets tempo tšabe soyënga jtsamëse, nyetscanga jtsababuányëshanëse, Bëngbe Bëtšábeñe corente jtsošbuáchiyëse, y puerte tšabia jtsemnëse, ainaniñe ndocna bacna soye ndbomná.

<sup>13</sup> Atše choca chaijashjanguëntscuana, cochtsentšena chë Bëngbe Bëtšabe uabemana palabrenga entsángbeñe jtsalíayama, y chënga jtsabuátambayama y jtsabuayiyayama.

<sup>14</sup> Acbioye Bëngbe Bëtšá obenana tcmojanatšetá tšabe soyënga jamama chacotsobenama, ošbuáchiyënga jujabuáchama. Bëngbe Bëtšabe juabna oyebuambnayënga acbiana tmojanoyebuambá ora, y chë ošbuachiyënguentša

bëtsëjémënga chëngbe cucuatšënga ácebeñe tmonjancjá y Bëngbe Bëtsá acbiama tmonjanimpadá ora, chca tšetana obenana tcojanóyëngacñe. Chë soye sempre cochtsinýena.

<sup>15</sup> As, aca cmontsemna sempre jtsamana chë soyënga ntšamo tbonjauyancá. Cochtsentsëna chë soyënga tšabá jtsamama, chca, entšanga chamobená jinýama, aca cada te más tšabá lempe cojtsamama.

<sup>16</sup> Botamana cochtsantješna, aca chë tšabe soyënga jtsamëse cojtsiyenama, y chë tšabe buatëmbana soye ínýenga cojtsabuátambama. Cada te chca cochtsama, y chca, cach aca cochanjenájabuache atsbocaná jtsemnana y chë ácbioye ouenanëngnaca játsebacama.

## 5

*Ntšamo Timoteo ibojtsemna chë inýe ošbuáchiyëngaftaca jtsemnana*

<sup>1</sup> Bëtsëjémënga ndoñe catjucácana; chca játamamna, cochjúbuayenaye, chënga mo cach acbe taitá cuaftsemncá; y chë bobontšëngaftaca cochjama, mo chënga acbe catšátanga cuaftsemncá.

<sup>2</sup> Chë bëtsanana shembásëngaftaca tšabá cochtsemna, chënga mo cach acbe mamá cuaftsemncá; y chë tobiasšëngaftaca cochjama, chënga mo acbe uabëంగా cuaftsemncá; chëngaftaca cmontsemna puerte tšabia jtsemnana, chëngbiama ndocna bacna juabnënga ainaniñe ntsebmncá.

*Ošbuáchiyëngbenache viudanga tmojtsemna ora*

<sup>3</sup> Chë ndegombre viudanga, chë ndocná mondbomna chaújabuachama, chënga cochtsarrespetana y cochtsëjabuachana.

<sup>4</sup> Pero canýe viudá nderado básënga o nietënga tuabamna, chënga entsamna natsana jshauatsjínýana ndayá chënga chamotsamama Bëngbe Bëtsá yobošcá, cachëngbe pamíllanga chamotsarrespetánama, chëngbioye jtsanýenëse, y chëngbe bëtsëtsangaftaca tšabá chamotsama, ntšamo chënga chëngaftaca tmojanmncá, er chca jtsamama, Bëngbe Bëtsá jtsóyejuayana.

<sup>5</sup> Chë ndegombre viudá, chë juajabuáchama ndocná tbondbomná, Bëngbe Bëtsábeñe jtsošbuáchiyëse, cha bochjuájabuachama jtsobátmanana, y nýets tempo jtseimpadánana, bnëté y ibeta, cha chabuájabuachama.

<sup>6</sup> Pero canýe viudá, nýe quem luarentša entšàngaftaca oyejuayá jtsemnana soyënga tojtsamëse, cha masque ainá tojtsemna, Bëngbe Bëtsabe bominiñe mo canýe obanacá jtsemnana, er chábioye ndoñe ntseeservénana.

<sup>7</sup> Lempe chë soyënga chamotsamama ošbuáchiyënga cocht-samëndaye, chca, ndocná ndocna bacna soye chëngbiana jatichámuama chaondëtsebomnama.

<sup>8</sup> Er, nda cachabe entsanga y más, cachabe pamíllanga ndoñe tontsacuedana, cha chca jtsinÿinÿnayana chë bu-atëmbana soyënga, ndayiñe bënga mondošbuaché, ndegombre soyënga ndoñe yondmëna ca yojtsejuabnama, y cha chë ndoñe ošbuáchiyëngbiana más bacna entsá jtsemnana.

<sup>9</sup> Chë jujabuáchama viudanga imuábemana lístañe, chaotsábemana chë viudá chnënguana bnëtsana uatama más yobomná, y nÿe canÿe boyá ibnabomná.

<sup>10</sup> Entšanga cha chamotsábuatma mo canÿe tšabe soyënga amacá: chabe básenga botamana tojabëché, áshjajnënga chabe yebnentše posada júyentsamiama prontaná, Bëngbe Bëtsabe entsanga imomnënga tojushecjabebé, chë imosufrínënga tojújabuache; jayanana, nda sempre nÿetsca tšabe soyënga jamama yontšená.

<sup>11</sup> Pero chë lístañe, chë viudanga chnënguana bnëtsana uata cabá ndbomnënga ndoñe catjúbiana; er chë chëfta uata ndbomnënga, yapa nÿe cachënga tšabá jtsemnana juabnënga jtsebomnana y soyënga jtsamana. Chcase, chënga Jesucristbioye ya ndoñe ntseservénana, y chora jtsebošana cachiñe jtëtóbouamayama;

<sup>12</sup> y chca, ínÿenga chëngbiana mochanjayana ndoñe tšabá montsama ca, chënga chë ntšamo tempo Bëngbe Bëtsá tmojanšbuachenacá chënga ndoñe tmonjamama.

<sup>13</sup> Y cabá más, tondaye ntsamcá tmojtsemna ora, chënga juabouinÿana oyënjayënga jtsemnana, y yebnënguenache jtsanama; y ndoñe nÿe oyënjayënga, sinó oinÿañëgnaca, ínÿengbe soyënguiñe jtseyentsbëtsjuanëse, y ndoñe yontsemna jayanama soyënga jtsichámëse.

<sup>14</sup> Chíyeca, atše sëntseboše, chë viudanga cabá tobiašëngna chamuatobouamá, básenga chamotsabamna, y chamotsobena cachëngbe yebnënguenache jtsemándayana; y tondaye chamondëtsama, chca, bëngbioye uayayënga chamuayana, chënga chca ndoñe tšabá montsama ca.

<sup>15</sup> Atše chca sëntsichamo, er básefta viudanga cabá tobiašënga tmojtsajbaná Jesucristo obedecénana, y tmojontsé Satanás joyeunayana.

<sup>16</sup> Canÿe shembása, Jesucristbeñe ošbuachiyá, nderado chabe pamíllangbeñe viudanga tojtsabamna, cha bontsemna chënga jujabuáchana, chca, chë ošbuachiyëngcá enefjuanënga ndoñe chaondëtsamna chëngbiana játantješnana; chca, chë ošbuáchiyënga mochanjobenaye chë ndegombre

viudanga, chë chaujúabuachama ndocná mondbomnëngbioye jujabuáchama.

*Ntšamo cuantsemna chë ošbuachiyëngbeñe amëndayëngaftaca*

17 Chë bëtsëjemënga, tšabá chë ošbuachiyëngcá enefjuanënga tmamëndangna, jtsomerecénana entšanga más chamotsarrespetánama, chca trabajo bëtsamama, y más, chë sempre entšanga jtsabuayiynayama y jtsabuátambayama imontšëngbioye.

18 Er Bëngbe Bëtsabe uabemana palabrenguiñe endayana, mëntšá: “Aca canye toróftaca shajuana tmojtsatbaná lulariñe chacojtsetrabája ora, ndoñe catjuanguëtsenaye ca”; ínÿoca: “Chë trabajayá merecido jtsebuájonana juácánama ca”. Chíyeca, chë bëtsëjemëngcá amëndayënga jtsomerecénana entšanga chamotsarrespetánama.

19 Nderado nda tcmojáuyana canye bëtsëjema bacna soye tojama ca; pero útata o unga entšanga más ndoñe tmontsemna, chca tojamama tmojinÿe, y chë bëtsëjema mal quedayá ndegombre soye yojtsichamo ca ndoñe tmonjayana, ndoñe catjóyeunaye.

*Inÿe soyëngama jábuayenama*

20 Chë bëtsëjemënga nÿe bacna soyënga tmojtsamënga, nÿetsca entšangbe delante cochjucácana, chca nÿetscanga uatjana chamuishache, bacna soye amama castigo mochtsebomnama.

21 Atše cbontsemánda, Bëngbe Bëtsabe delante, Jesucristo y Bëngbe Bëtsabe bocacana angelëngbe delante, chë mandënga chacotsamama; pero ndoñe catjayana canye bëtsëjema tšabá o ndoñe tšabá tonjama ca, cabá ndoñe lempe botamana ndabonÿe ora, ni canye entšá ínÿengbiana más tšabá ntjatacaycá.

22 Ndocnabe bestšašíñe cucuatšënga catjajájua, Bëngbe Bëtsábioye chabiana jaimpádama, jinÿinÿiyama cha mo canye bëtsëjema amëndayacá joserviama yojtsobenama, nÿe betscó, juabuáyanama botamana ntjenajuaboycá. Pero nÿe ntjenajuaboycá chca tcojamëse, y cha canye bacna soye amá tomñësna, ácnaca cochántsemna mo chabe bacna soyënga cuafjamcá. Cochtsantješna ndocna bacna soyënga ainaniñe chacondëtsebomnama.

23 Aca ba soye uafsbiaca condbëtsešoca causa, ndoñe más nÿe ena búyeshe cattseftmana, sinó base vínoynaca.

24 Entšanga mondobena tšabá jinÿana, básefta entšangbe bacna soyënga, cabá chë soyëngama chëngbioye botamana ntjátjaye ora; pero ínÿengbe bacna soyëngama, nÿe tcojátjajentšana entšanga chama jtsetatšëmbuana.

<sup>25</sup> Cachcá, báseftanga entšangbe delante tšabe soyënga jtsamana, y cachora chë soyëngama jtsotatsëmbuana; y ínÿengna iytemncá tšabe soyënga jamana, pero masque chca, ndayténaca chë tmojanma tšabe soyëngama ínÿenga mochanjátatsëmbona.

## 6

<sup>1</sup> Chë nyets tempo nÿe ínÿabiamana oservénënga entsamna, chëngbe nduiñëngbiama jtsejuabnayana, chënga uámana entšanga imomnama y nÿets respeto jtsebomnama imomerecénama. Chca entsamna, Bëngbe Bëtsabe Uabainama y chabe soyëngama, ndayiñe bënga mondošbuaché y entšanga mondbétsabuatambaye, ínÿenga podesca ndoñe chamondëtsóyebuambnana.

<sup>2</sup> Y chë imobomna Jesucristbeñe ošbuáchiyënga nduiñënga, chëngbioye nÿe batsá ndoñe chamondëtsarrespetana, er chënga Jesucristbeyeca chëngbe catsátanga mondmëna, y entsamna más tšabá jtsaservénana, er chëngbe trabajuentša tšabe soyënga imóyëngacañe, Jesucristbeñe ošbuáchiyënga mondmëna, y Bëngbe Bëtsabe bonshánënga.

*Jtsiyenana Bëngbe Bëtsá jadórama soyënga jtsamëse, endmëna chë ndegombre bomnana*

Quem soyënga cmontsamna entšanga jtsabuátambayana, y becá jtsëtsëtsnayana chca chacmóyaunama:

<sup>3</sup> Nderado nda inÿe soyënga tojtsabuatambá, y ntšamo bënga mondëjuabnacá, chë Bëngbe Utabná Jesucristbiamana ndegombre buatëmbana soyama, ni chë buatëmbánana ntšamo jtsiyenama Bëngbe Bëtsábioye jadórama yomna soyënga jtsamëse, ndoñe cachcá bëngcá tontsejuabnase,

<sup>4</sup> cha nÿe cachá puerte uámana entšá yojtsenobianná, y tondaye ndosertaná yojtsemna. Cha tša jtsogustánana ba soyëngama y palabrëngama jabuachana jtsenatsëtsnayana, y cha nÿe chama vida jésebomnana. Cha chca yomna causa, nÿe jtsebošana chë inÿa tojashjache soyënga jtsebomnama, nÿetscanga ndoñe cachcá chamondëtsejuabnana jtsamana, ínÿengbioye joyáanguanguama jtsebošana, bacna soyënga ndoñe ndegombre soyënga ínÿengbiama jtsejuabnayana,

<sup>5</sup> y ínÿengaftaca nÿe sempre jtsenpenzétsiayana, er chëngbe juabniñe nÿe bacna soyënga jtsebomnana, chë ndegombre soyënga quematábuatma, y jtsejuabnayana chë soyënga Bëngbe Bëtsá jadórama jtsamana, nÿe más soyënga jóyëngacñama yoservena ca.

<sup>6</sup> Ndegombre canÿe entšá bëtscá tšabiana jëftsashjáchana, cha tojtsiyena Bëngbe Bëtsábioye jadórama soyënga jtsamëse,



y sempre oyejuayá n̄je ch̄e tojtsebomna soyēngaca tojtsemn̄ese.

<sup>7</sup> Er bēnga tmojanon̄yná ora, quem luaroye bēngaftaca tondaye tmonjaniyēbo, y quem luarentšana cach tondaye quemochatobenaye jēftsocñama.

<sup>8</sup> As, bēnga ndayá jasama y ndayá jtichētjuama tmojtsebomn̄ese, ch̄e soyēngaca oyejuayēnga mochtsemna.

<sup>9</sup> Pero ch̄e bomnēnga jtsemnama tmojtsebošēnga, bacna soyēnga jamama tojócochēngo ora, ndoñe ntsemorochana y pronto chiñe jotsatšana, mo bayá uachmaniñe cuafjotsatšcá, ch̄e entšanga Satanasbe cucuatšiñe ndeolpe jotsatšana; chora chēnga jtsamana soyēnga mo ch̄e juabna ndbomnēngcá, y ch̄e cachēngbiamā ndoñe tšabe soyēnga tmojtsamēngbe juabnēngaca. Y mo ch̄e uándbemana barco, bēts búyeshe asentoye tojtsenatjēmbcá, cachcá, ch̄e bacna juabnēnga bomnama, chēngbioye mochántsapochocaye y n̄yetsca tescama mochántscastigaye.

<sup>10</sup> Crocénana jtsebomnama yapa jtsebošana, jamana entšabe ainanentšana n̄yetsca bacna juabnēnga y soyēnga chaóboconama; y básefta entšanga, crocénana jtsebomnama yapa jtsebošana causa, tmojtsajbaná ošbuáchiyana ch̄e Bēngbe Bētsabe soyēnguiñe, ch̄e bēnga mondošbuaché soyēnguiñe, y chca cachēngbiamā tmojama puerte chamosufrima y bēts ngmēnana jtsebomnama.

*Ch̄e tšabe soyama jtsenojuerzánama, ošbuáchiyana sempre chaotsemnama*

<sup>11</sup> Pero aca, Bēngbe Bētsabiamā oservená, chca benachentšana cochtsojuánañe. N̄ya cochtsentsēna, ch̄e Bēngbe Bētsabe bominjñiñe tšabá yomncá jtsamama, ch̄e ndayá Bēngbe Bētsá jadórama yomncá jtsamama, Jesucristbeñe puerte jtsošbuáchiyama, n̄yetscanga jtsababuán̄yeshanama, Bēngbe Bētsábeñe jtsoátmanēse puerte uantado padecena soyēnguiñe jtsemnama, y corente jtsababuán̄yeshanēse n̄yetscanga chacotsēñ̄yayama.

<sup>12</sup> Ch̄e tšabe soyama, ošbuáchiyana joboguiyanama cochtsennojuerzana. Ch̄e n̄yetsca tescama yomna tšabe vida cochjashjache; chama Bēngbe Bētsá tmojanchembo y bētscá entšangbe delante tconjánayana tšabe soyēnga Jesucristbiamā, ndayñe aca icošbuaché.

<sup>13</sup> Y mora, Bēngbe Bētsabe delante, nda endbama lempe ntšamo quem luarentše yobinjñcá vida chaotsebomnama, y Jesucristbe delante, ntšamo cachabiamā ndegombre bemncá Poncio Pilatbe delante lempe tojanayaná, chatbe delante cbontsemánda,

14 lempe cochjama ntšamo tcbonjauyancá, ndocna soye chacmondëntšashbe jamama, y cochtsiyena, ntšamo ndocná tondaye chaondětsebmoma jayanama aca bacna soye tcojama ca. Y chca cochtsama Bëngbe Utabná Jesucristo quem luaroye yochjésabëntscuana.

15 Y nÿa chë soyama chë tempo chaojóshjango ora, Bëngbe Bëtsá chca echanjínÿanÿiye, er cha endmëna chë corente bendición bomná y chë nÿe canÿe Mandado. Cha nÿetsca reyëngbiama, chë más uámana Rey, y nÿetsca amëndayëngbiama, chë más uámana Utabná.

16 Nÿe cha ndoñe bondmëna ndocna te ntjóbanana, y cha canÿe bëts buashinÿinÿana luarentše endoyena y choye ndocná yondobena jobéconana. Cha ndocná tbonjinÿe y ndocná yondobena jinÿana. ¡Entšanga nÿets tempo chamotsinÿanÿná cha puerta bëtsá y obená bëtsemnama! Chca chaotsemna.

17 Chë quem luarentša soyëngaca bomnënga imomnënga, cochjámëndaye enábotamnyënga ndoñe chamondětsemnama, ni lempe tšabá yochjóbcnama, bëtsá soyënga bëtsebmoma ndoñe chamondëtsobátmana, er chë tcbomna soyëngama ndoñe ntsótatšëmbuana ndayëntscóñama chca mochtsebmoma; pero aiñe, Bëngbe Bëtsábeñe jtsošbuáchiyëse, chënga chábeñe chamotsobátmana. Cha endmëna chë sempre bëtsá soyënga šnetsatšatnayá; y chca, cha jamana bënga chamotsobena nÿetsca chë soyëngaca oyejuayënga jtsemnama.

18 Ntšamo tšabá yomncá chënga chamotsama, ba tšabe soyënga chamotsama, y siempre tšabe ainánaca chamotseprontana entšanga ba soyënga jatšatayama, y ndaye tmobomna soye entšangaftaca jenájatayama.

19 Mo nda bëtsá shajuana tojtsábuajo y jtsetatšëmbuana yochtsebmoma más chcoye jasama, cachcá, quem bomnënga ba tšabe soyënga tmojtsamëse, mochántsetatšëmbo chënga bëtsá tšabe bendicionënga más chcoye mochtsebmoma. Y chënga chë soyënga tmojtsamëse, chënga chë ndegombre vida, chë nÿetsca tescama yomna tšabe vida mochanjéftsashjache.

### *Inÿe soye Timotéobioye tbojanbonÿé*

20 Timoteo, ndayá Bëngbe Bëtsá tcmojabonÿecá, botamana cochtsinÿena. Entšanga nÿe quem luarentša soyëngama encuëntayana, ndoñe cattsuena, ni chë ndoservena soyëngama jabuachana enatsëtsnayana, chë ndayama entšanga jtsichámuana becá osertánanentšana chca yóbocana ca, pero ndegombre chca ndoñe ntsemnana.

21 Atše chca sentsichamo, er báseftanga chca osertánana imobomna ca ichámënga, Jesucristbeñe ošbuáchiyana y chë bënga mondošbuaché soyënguiñe ošbuáchiyana tmojtsajbaná.

Atše, Běngbe Bětsá sěntseimpadana, ácbeñe tšabe bendi-  
cioněnga chaotsemnama.

## 2 Timoteo

### *Jachuayama*

<sup>1</sup> Atše Pablo, Jesucristbe ichmoná sēndmēna, Bēngbe Bētsá chca yobóseyeca. Jesucristo šonjichmó entšanga jábuayenama Bēngbe Bētsabe šbuachenánama, ntšamo cha inétsamama entšanga chē nýetsca tescama yomna tšabe vida chamotsebmoma; y chca vida montsebmoma Cristo Jesúseftaca cánýiñe mo canýacá bētsemnayeca.

<sup>2</sup> Atše quem tsbuanácha cbontsabobiamná, acbiama Timoteo, aca mo atšbe bonshana uaquiñacá, Crístbeñe condošbuachema. Atše sēntseimpadana, Bēngbe Bētsá, Bēngbe Taitá, y Jesucristo, Bēngbe Utabná, chaboma ácbeñe tšabe bendicionēnga chaotsemnana, chata ácbioye chacmolastemama, y acbe ainaniñe tšabe ebionana chacotsebmoma.

*Ndoñe ntsēuatjana entšángbeñe Jesucristbiana jóyebuambayama*

<sup>3</sup> Sempre Bēngbe Bētsáftaca stsencuénta ora, acbiama sēndbētsenojuabnaye, y acbiama sēndbētsatschuanaye bnēté y ibeta; y Bēngbe Bētsá endmēna nda atše sēndēservena, ainánaca jtsejuabnayēse y jtsetatšēmbēse, ntšamo atše stsamcá tšabá bētsemnana, cachcá ntšamo atšbe bēts taitanga tmojanmcá.

<sup>4</sup> Atše sēndbētētenojuaboye ntšamo aca, chocana atše sēntanabo ora shēchbuiye tconjanoperdema, y chíyeca atše tša sēntseboše aca jtétinýama, atše puerte oyejuayá chaitsemnana.

<sup>5</sup> Bēngbe Bētsá acbiama sēndbatschuaye, er atše sēndbátenojuaboye aca Jesucristbeñe ndegombre ošbuáchiyana condbomnana. Natsana, acbe bēts mamá Loida, y chentšana acbe mamá Eunice chábeñe bontsanošbuáchiye, y ácnaca cachcá tcojamama atše puerte sēndétatšēmo.

<sup>6</sup> Chíyeca sempre cochtsantješna quem uámana soyama: Mo nda canýe shinýañe tojtsajuinýinýnacá, chentše sempre chaotsoiñama, cachcá aca, chē Bēngbe Bētsá tcmojatšetá obenana tšabe soyēnga jamama, sempre cochtsinýena. Chē obenana aca conjanóyēngacñe, atšbe cucuatšēnga acbe bestšašañe sēnjanjajó y Bēngbe Bētsá acbiama sēnjanimpadá ora.

<sup>7</sup> Er Bēngbe Bētsá tonjama bēngbe ainaniñe Uámana Espiritu chaotsemándama, uatjana ndoñe ntsebmoma, ndayá obenana bēnga chamotsebmoma, bonshánana Bēngbe Bētsabiana y nýetscangbiana chamotsebmoma, y cabēnga jenomándama chamotsobenama.

<sup>8</sup> Chíyeca, ndoñe cattsëuatja entšanga jáuyanama, ntšamo tcojinýe y cojtsetatsëmbcá Bëngbe Utabnabiamama ndegombre bétsemnama; ni atšbiamama ndoñe cattsëuatja, atše cárceloye sëndutámenama, chabiamama oserverna causa. Chamna, chë Bëngbe Bëtsá cmochanjátsetaye obenánaca, sempre cochtseprontana jasúfriama, átšeftaca y ínýengaftaca, entšanga tšabe noticiënga abuyiynaye causa.

<sup>9</sup> Bëngbe Bëtsá endmëna nda bënga šojatsebacá, y šojáchembo jtsiyenama mo chábënga imomnëngcá jtsamëse. Y cha chca tojama, ndoñe nderado bënga ndaye tšabe soye tmojamama, ndayá cachá chca chaotsemnama inabóšeyeca y bëngbe tšabiamama juabna bómnyayeca. Cha chca inajuabnaye, cabá quem luare ndmëna orscana; y chca jamama Bëngbe Bëtsá inajuabnaye, chë ndayá Cristo Jesús bëngbiamama jamama sóyeca.

<sup>10</sup> Y mora, Bëngbe Atsebacayá Jesucristo tojáboyecama, Bëngbe Bëtsá šojinýanýe cha bëngbe tšabiamama juabna yobomnama. Jesucristo tonjama, entšanga nýetsca tescama obanënga ndoñe chamondëtsemnama, y tonjama bënga chamotsetatsëmbuama, chë tšabe noticiënga chabiamama joudenëse y joyeunayëse, bënga chë nýetsca tescama yomna tšabe vida mochjábomnama, ndoñe nýe jopochócama cuerpëngüñe.

<sup>11</sup> Bëngbe Bëtsá šojanábuayana tšabe noticiënga entšanga jábuayenama, Jesucristbe ichmoná jtsemnama y entšanga jabuátambama.

<sup>12</sup> Chë causa, atše mora cárceloca quem soyënga sëntsesufrina; pero chama atše ndoñe quetsátëuatja, er atše sëndëtatšëmbo ndábeñe atše stošbuáchema, y corente sëndëtatšëmbo cha yobena jtsinýenana ndayá šojabonyecá, chë ndayté cha yochjésabëntscuana.

<sup>13</sup> Nýets tempo, chë ndegombre buayenánana, ndayá átšbentšana tconjanuencá, entšanga cochtsabuayiyenaye, entšanga jtsinýanýenayëse aca Jesucristbeñe icošbuáchema, y Bëngbe Bëtsá y nýetscanga icuababuánýeshanama, y chca yomna aca Cristo Jesúsëftaca cánýiñe mo canýacá bétsemnayeca.

<sup>14</sup> Chë Uámama Espíritu, chë bëngbe ainaniñe endoyenabe uajabuáchenanaca, ntšamo Bëngbe Bëtsá tcmojabonyecá sempre cochtsinýena.

<sup>15</sup> Ntšamo ya condëtatšëmbo, nýetsca ošbuáchiyënga Asia luroquënga cachcá šmonjesonyá, y chentše bontsemna Figelo y Hermógenes.

<sup>16</sup> Pero Bëngbe Utabná Onesíforbe pamíllanga chaotsalastemana, er cha ba soye šonjanañemó, y atše cárceloye utámenama cha ndoñe quenjatëuatja.

17 Masna, Romoye tojabánashjango ora, cha botamana šojánguango y šonjáninyena.

18 Bëngbe Utabná lastemado cháftaca chaotsemna, ntšamo nyetscanga tmojamcá tšabá o ndoñe tšabá yontsemnama cha yochjayana ora. Aca corente condětatsëmbo ntsachetšá Onesíforo Efeso puebloca šonjanéjabuachama.

## 2

### *Jesucristbiana canye tšabe soldado*

1 Y aca, atšbe uaquiñá, chë Cristo Jesús acbiana tšabe juabna yobomntšana, bëtscá añemo ainaniñe cochtse-bomna.

2 Ntšamo ba entšangbe delante šconjoyeunacá, cach buayenánana, boyabásenga nyétscañe tšabe palabra bomnënga cochjábanyïye, y chamotsobena ínÿenga cachcá jabuátambama.

3 Aca, chë bënga fsëndbomna padecena soyëngama jasúfriama chacmojtsemna ora, Jesucristbe soyëngama entšanga abuayiynaye causa, ainaniñe bëts añemo cochtsebomna, mo canye tšabe soldadcá, cha chabe mándayabiana jasúfriana.

4 Ndocna soldado ntjátanana shjoca soyënguiñe vida jtse-bomnama o crocénana juácanama. Soldado chca jtsamana, chabe mandayá, chca chaotsemnama tbojabocacá cha, oye-juayá chaotsemnama.

5 Y canye travisiayá, ínÿenga jáyëñjanama, canye soye juácanama; pero ntšamo chë uacanánana jocñama tomncá ndoñe tonjatravisiase, cha chë soye ndoñe ntjosháchiñama. Cachcá, acbe trabajo cochjama ntšamo cmojtsemncá.

6 Chë jajañe trabajayá derecho jtsebomnana chë natsaná jtsemnama, chë tmojatbaná sananguentšana ndayánaca jtse-bomnama. Acaftaca cachcá echanjopása, chë trabajo tšabá chacojamëse.

7 Chë cbontsatsëtsnañe cochtsenójuabnaye, y Bëngbe Utabná echanjama lempe chacmósertama.

8 Sempre cochtsenójuabnaye Jesucristbiana, ndabiana Bëngbe Bëtsá tojanma cháuatayenama y enjamna canya rey Davidbentšana entšá, ntšamo atše chabiana sëndabuayiyná tšabe noticiënguiñe endmëncá.

9 Chca abuayiynaye causa, atše sëntsesufrina, nya cadenëjuangácnaca utsbuaná, mo canye bëts bacna soye ochjajnayacá. Pero masque atše chca sëntsemna, chë Bëngbe Bëtsabe soyëngama buayenánana ínÿenga entšangbioye montsabuatambá.

10 Chíyeca atše nyetsca padecena soyëngaca sëndëtsóboyana, Bëngbe Bëtsabe bocacánëngbe tšabiana, chëngnaca

atsebácanënga chamotsemnama, Crístbeñe jtsošbuáchiyëse; y Cristo Jesús bëtsëtsanga cháuabiamama, y cháftaca nyëtsca tescama chamotsiyenama.

<sup>11</sup> Mëntsá ndegombre endmëna:

Cristo Jesús tojanóbana ora, enjamna mo bëgnaca cuafjobancá, er bënga tmonsajbaná oyenana ntšamo tempo monjanियencá y Jesucrístbeñe montsošbuaché; y chca, bëgnaca cháftaca mochantsiyena;

<sup>12</sup> bënga chë padecena soyëngaca tmojtseufrina ora, tmojtsemorochëse, bëgnaca Jesucrístoftaca mochántsemandaye.

Bënga tmojayana, cha ndoñe monduabuatma ca, as cha bëngbiámnaca cachcá echanjayana;

<sup>13</sup> bënga chábeñe ndoñe tmontsošbuáchese, masque chca, cha cabá echanjama ntšamo tbojašebuachenacá, er cha lempe jamana, ntšamo sempre iuetsemncá jtsinÿanÿnayëse.

*Canÿe trabajayá, ndáftaca Bëngbe Bëtsá jtsóyejuayana*

<sup>14</sup> Chë tbonjauyana soyëngama, cochjama chë entšanga chamotsenójuabnama, y Bëngbe Bëtsabe delante cochjábuayenaye chënga ndoñe yontsamna nÿe palabrëngama jabuachana enatsëtsnayana; er chca, ndocna tšabe soye ntjamana, y chca tmojtseatsëtsná ora, jamana chë soye ouenanënga más batšá chamotsošbuáchema, y jujabuáchana chëngbe tšabe juabnënga jtsondbiamama.

<sup>15</sup> Lempe ntšamo icobencá cochtsama, aca chacotsemnama mo canÿe entšá ndabiamama Bëngbe Bëtsá cháuyana nyëtsca soyënguiñe tšabá amá yomna ca; aca chacotsemnama mo canÿe trabajayacá, nda tondaye tontsebmoma ndayama jatëuatjama; y chacotsemnama chë ndegombre buayenánana corente tšabá buatëmbayá.

<sup>16</sup> Entšanga nÿe quem luarentša soyëngama, ndoservena palabrënga tmojtseencuénta ora, chë soye ndoñe cattsuenana; er chë soye jamana entšanga puerta inÿetsá chamobocanama, ntšamo Bëngbe Bëtsá ndoñe yondmëncá, inÿetsá jtsejuabnayëse y jtsamëse.

<sup>17</sup> Chëngbe buatëmbana soyëngaca puerta bacá ínÿengbioye jáborlana, nÿa mo canÿe uabouana šocana chamotsebmomana cuafjamcá. Chca buatëmbayënguentše Himeneo y Fileto bontsemna.

<sup>18</sup> Chata chë ndegombre benachentšana tbojtsojuánañe, y ibojtsichamo chë obanënga chámuatayenama Bëngbe Bëtsá ya catënjama ca, y Jesús chaojésabo ora, nyëtscanga chámuatayenama Bëngbe Bëtsá ndoñe yochanjama ca.

Chë causa, chata bontsama básefta entsanga chë ntšamo Jesucristbeñe imojanošbuachecá, mora ya ndoñe chamondëtsošbuáchemá.

<sup>19</sup> Pero Bëngbe Bëtsabe ndegombre buayenánana nyets tempo cachcá endesomñe, y ndocná quenátobena chë soye jatrócama. Chca endmëna mo chë ndëtsbenga ndayíñe canye bëts yebna tojebncá, ndayíñe mëntsá yojtsábemana: “Bëngbe Utabná endëubuatma chë chábenga imomnënga”, y “Nyetscanga chë Bëngbe Utabná benga imomnënga ca tmojtsichámënga, chamuajbaná nyetsca bacna soyënga amana ca”.

<sup>20</sup> Canye uámana entsabe yebnentse, tsafjoca soyënga ndoñe nye castellano o midio soyënga ntsemnana, ndayá niñëse y fshantse soyëgnaca; chë natsana soyënga uámana tescama jtsebuájonana, pero chë inye soyëngna, nye nyets tempo chauet-soservénama.

<sup>21</sup> Chca endmëna chë Jesucristbeñe imojtsošbuachéngbeñe, ndoñe nyetscanga tmontsajbaná bacna soyënga juabnayana y amana, ni chë chca tmojtsama entsángbentsana ndoñe tmontsojuaná. Pero, chca jtsojuánañama tojtsebošá, echántsemna canya Bëngbe Utabnabiama tšabe trabajayá; y chca, mo chë tsafjoca castellano y midio soyëngcá, canye uámana trabajuiñe echanjosérvia, y cha sempre echántseprontana ndaye tšabe soye jamama.

<sup>22</sup> Chíyeca, ntšamo básefta bobontsënga bacna soyënga jamama mondbošcá, ndoñe cattsama; pero aíñe cochtsiyena ntšamo Bëngbe Bëtsabe bominyíñe tšabá yomncá jtsemëse, Jesucristbeñe puerte cochtsošbuáchiye, Bëngbe Bëtsá y inyënga cochtsababuánýeshana y nyetscángaftaca natjëmbana cochtsomñe, chë chaujabuachama Bëngbe Utabná mondbet-sotšëmbuanëngaftaca cánýiñe, ndocna bacna soye ainaniñe ntsebmncá.

<sup>23</sup> Ndoservena soyëngama palabrenga y ndosertánentsana óbocana soyëngama ndoñe cattsuenana; aca corente condëtatsëmbo chë soyënguentsana entsanga nye jabuachana enatsëtsnanyiñe jabocanana.

<sup>24</sup> Pero chë Bëngbe Utabnabiama oservená ndoñe quebnátsmëna inyëngaftaca jabuachana ntsenatsëtsnayana; chamna, cha bontsemna jtsababuánýeshanëse nyetscanga jtsënyayana, jtsemnana tšabe buatëmbayá y inyëngaftaca uantadá.

<sup>25</sup> Cha bontsemna, chë chabe contra y chabe buayenánama contra imomnënga, chë ndegombre soyënga jabuátambama, pero ndoñe ntjatenabotamnaycá. Chca bontsemna, nderado Bëngbe Bëtsá nanjama chca juabnayana chamotrocama, y chca, chënga chë ndegombre soyëngama chamotsetatsëmbuama;



<sup>26</sup> chënga botamana chamuatsjuaboma, y Bëngbe Bëtsá, Satanás cucuatšënguentsana cháuatsebacama. Satanás chënga tojanëtabá ntšamo cha tojtsebošcá jamama, mo bayënga canÿe uachmaniñcá.

### 3

*Ntšamo entsanga mochtsemna, Cristo jésabama chaojt-sobeco ora*

<sup>1</sup> Pero aca cmontsemna jtsetatsëmbuana, Cristo jésabama tempo chaojt-sobeco ora, entsanga echántsamna puerte padecena soyënguiñe jtsiyenana.

<sup>2</sup> Chca echántsemna, er entsanga, cada ona nÿe cachabe tšabiama echanjésenojuabnaye, crocénana jtsebonnama tša mochántseboše, mochántsemna enábotamnayënga y ínÿengbioye mo nduamanëngcá mochantsënÿaye. Bëngbe Bëtsabiama y ínÿengbiama bacá mochantsóyebuambnaye, chëngbe bëtsëtsangbioye ndoñe quemochátayaunana, ni chëngbiama tšabe soyënga tmojtsamëngbioye quemochtëtacheuanaye, y Bëngbe Bëtsabiama y chabe soyëngama ndoñe respeto quemochátsbomna,

<sup>3</sup> ni cachëngbe pamíllangbioye quemochátatabuanÿeshana, mochántseboše ndoñe natjëmbana jtsiyenama, uayátsenayënga mochántsemna, cachënga jenomándama ndoñe quemochátobena, mo ainana ndbomnëngcá mochántsemna, y nÿetsca tšabe soyënga uaboténënga.

<sup>4</sup> Chënga, uayayëngbe cucuatšíñe entsanga ayentšbáshejuanënga mochántsemna, mochántsama soyënga tondayama ntjatsrreparánëse, y cachënga uámana entsangcá mochántsenobiamnaye; chënga Bëngbe Bëtsá jatsbobonshana cuenta, cachëngbe cuerpiñe tšabá jtsomñama soyënga mochántseboše.

<sup>5</sup> Inÿenga echantsinÿana mo ndegombre Bëngbe Bëtsá adórayënga chënga cuaftsemncá, pero chë mochántsama soyëngaca mochanjínÿanÿiye, Bëngbe Bëtsá obená bëtsemnama chënga ndoñe mondošbuáchema.

Nÿa tondayama chëngaftaca cattscuéntaye.

<sup>6</sup> Chënguentsë báseftanga mondmëna, y chëngna botamana palabrëngaca yebnënguenache jamashjnana, y chenache, chë paselo yomna jáingñama shembásenga jtsaíngñayana, chëngbe buatëmbana soyënguiñe chamotsošbuáchema. Chë shembásenga bëtscá bacna soyënga tmojama, y chë causa ndoñe corente natjëmbana montsiyena, y ba ndoñe tšabe soyënga imojtsama nÿe cachënga tšabá jtsemnama, ntšamo tmojtsebošcá.

<sup>7</sup> Chënga nÿets tempo nÿe ndaye tsëm soye jatóntšana jatat-sjínÿana, pero ndocna te ntjobenayana Bëngbe Bëtsabe ndegombre soyënga josértama.

<sup>8</sup> Ntšamo Janes y Jambres Moisesbe contra ibojamncá, cachcá, chë ínÿenga jáingñama abuátambayënga nÿetsca ndegombre soyëngama contra jtsemnana. Chë entsanga chëngbe juabniñe nÿe bacna soyënga jtsebomnana, y Bëngbe Bëtsá chënga tojtsébaté, chënga chë ndegombre soyënguiñe ndoñe ntsošbuáchiyana causa.

<sup>9</sup> Pero chënga ndoñe quemochatobenaye bëtscá entsanga jáÿenjanama, er nÿetsca entsanga mochanjátatsëmbona chënga nÿe bacna soyënga juabnayënga imomnana, mo chë Israeloca entsanga tmojantatsëmboncá Janes y Jambres nÿe chca juabnayata bétsemnana.

*Inÿe soye Timotébioye tbojanbonÿé*

<sup>10</sup> Pero acna, puerte tšabá condétatsëmbo ntšamo atše tijabuatambacá, ntšamo jtsamëse atše tsiyena, ndayá jamama tsjuabná, ntšamo atše Jesucristbeñe puerte tsošbuaché, ntšamo ínÿengaftaca uantado tsmëna; ntšamo atše, Bëngbe Bëtsá y ínÿengbioye tsababuánÿeshana; ntšamo atše, Bëngbe Bëtsábeñe jtsobátmanëse,

<sup>11</sup> ínÿenga šmonjanacmena ora; y sënjansufrina ora, padecena soyënguiñe bëts añemo tsjánbomna. Acnaca condétatsëmbo ntšamo atše chama Antioquía, Iconio y Listra bëts pueblëngoca tsjansufrínama. Pero masque entsanga tša šmonjanacmena, atše lempe sënjánauantana, Bëngbe Bëtsábeñe jtsobátmanëse, y cada ora, Bëngbe Utabná chëngbentsana sonjanatsbocá.

<sup>12</sup> Ndegombre endmëna, nÿetscanga chë Bëngbe Bëtsá jadórama soyënga jtsamëse jtseyenama bošënga, y Cristo Jesúseftaca cánÿiñe mo canÿacá imomnënga, puerte mochanjasúfria, chca bétsemnana, chënga chamosufrima ínÿenga chamojtsama ora;

<sup>13</sup> pero chë bacna entsanga y chë ínÿenga áingñayënga, cada te más bacna entsanga mochántsemna, más bacna soyënga jtsamëse; chënga ínÿengbioye mochántsaingñaye, pero cachëngnaca ingñënënga mochántsemna.

<sup>14</sup> Pero aca, nÿets tempo cochtsejuabnaye y cochtsama lempe ntšamo tcojuatsjinÿcá, chë ndegombre soyëngcá cojtsošbuácheñe, er aca tšabá condëubuatma chë tmojanbuátëmbanga;

<sup>15</sup> y aca, cabá básetema conjamna orscana, chë Bëngbe Bëtsabe uabemana palabrengama condétatsëmbo, chë ndaye sóyeca aca contsobena juatsjinÿana, Bëngbe Bëtsá chacmatsbocama, Cristo Jesúsbeñe jtsošbuáchiyëse.

16 Bëngbe Bëtsá, Uámana Espíritbeyeca tonjama, lempe ntšamo Bëngbe Bëtsabe uabemana palabrenguiñe yobinýncá entšanga chamuábemama. Chë uabemana palabra endoservena, bëngbioye chë ndegombre soyënga jabuátambama; nderado ndaye soye ndoñe tšabá tmonjamama bënga chamotsetatšëmbuama, jinýanýiyama ntšamo más tšabá chë soyënga muanjobenaye jamama; y bëngbioye jabuátambama ntšamo jtsiyenama chë Bëngbe Bëtsabe bominýiñe tšabá yomna soyënga jtsamëse;

17 chca, canýe entšá Bëngbe Bëtsabiamana oservená y obená chaotsemnana, tšabá chaotsetátšëmbo y sempre chaotseprontana nyetsca tšabe soyënga jtsamama.

#### 4

1 Bëngbe Bëtsabe delante y Cristo Jesús, nda echanjabo mo reycá jabomándama y jabáyanama chë ainëngbiamana y chë ya mochjóbanëngbiamana, ntšamo chëngbe vidënguiñe tmojëftsemcá tšabá o ndoñe tšabá bétsemnana, chatbe delante cbomandá,

2 Bëngbe Bëtsabe palabra entšanga chacotsabuayiyayama; sempre chca jamama cochtseprontana, masque entšanga aíñe o ndoñe jouenama tmojtsebošëse. Cochjama, ínýenga bacna soyënga tmojtsamama chamotsetátšëmbo, chca tmojtsamama cochjúácana y cochjúabuayenaye ndayá jamama yojtsamnana. Sempre chca cochtsabuátambaye, chca ora puerte uantado jtsemnëse.

3 Chca cochtsama, er canýe tempo echanjóshjango y chora entšanga chë ndegombre buatëmbana soye ndoñe quemochátuenana; chamna, nýe chë último tsëm soyënga jtsetatšëmbuama boše causa, ba abuátambayënga mochanjuánguango, y chënga mochántsihamo soyënga nýe ntšamo cach entšanga jouenama tmojtsebošcá.

4 Chënga chë ndegombre soyënga ndoñe quemochátuenana, y nýe ndaye cuentënga mochántseyeunana.

5 Pero aca, sempre botamana cochtsejuabnaye; chë padecena soyëngama chacojtsesufrina ora, añemo cochtsebomna; chë Jesucristbiamana tšabe noticiënga entšanga abuayiyayabe trabajo cochtsama; y nýa cochtsentšena ndayá Bëngbe Bëtsá tcmojabonýecá tšabá jtsamama.

6 Er mo Bëngbe Bëtsábioye jëtschuayama, canýe bayá obanáftaca tcojabuešcja vínoye jtsopochocancá, cachcá atšbe vídnaca ya jopochócama entsemna. Atše jóbanama bécoñe entsemna; chanjóbana ora echántsemna Bëngbe Bëtsá oyejuayá chaotsemnana.

7 Cristo Jesusbe soyëngama corente sënjenojuerzá. Mo canýe travisiayacá, chë jashjanguama yomna luaroye ya tojashjangcá, átšnaca ya, ntšamo Bëngbe Bëtsá yobošcá atše jt-

samëse, atšbe trabajo ya tijapochocá. Atše nÿets tempo Jesucristbeñe sëndošbuaché.

<sup>8</sup> Chcasna, atšbiamá canÿe uacanana soye echántsemna, er Bëngbe Bëtsá tojama atše chabe bominiñe tšabia chaitsemnama. Bëngbe Utabná endmëna chë ndegombre tšabá ichamuá entšanga aíñe o ndoñe tšabá tmonjamama, y cha chë uacanana soye šochántatšetaye, entšanga ntšamo tmojamama cha chaojabáyana ora. Pero cha nÿe atše ndoñe chë uacanana soye quešochtétatšetaye, ndayá nÿetscángbioye chca, ndëmuanÿenga puerte imoboše cha cachíñe cháuesabama, cha imobobonshánayeca.

### *Inÿe soyënga Timoteobiamá*

<sup>9</sup> Lempe ntšamo tcojobenacá cochjama betscó jabama atše jabínÿama;

<sup>10</sup> er Demas, cha yapa nÿe quem luarentša entšangbe soyënga bošá enjamna, cha cachcá šonjessonÿá y Tesalónica pueblóye tojtsoñe. Crescente Galacia luaroye tonjá y Tito Dalmacia luaroye.

<sup>11</sup> Nÿe Lucas, chë šmonjanájabuachanënguentsana, mora átšeftaca entsemna. Marcos cochjaftsenguango y ácaftaca cochjëtsbetše, er cha atšbe trabajuama puerte oservená endmëna.

<sup>12</sup> Tíquico, Efesoye sënjichmó.

<sup>13</sup> Chacójabo ora, uabonjanía šcochjesacñe, atše Troas bëts puebloca, Carpbe yebnoca tijésaboshjona; chë librëšangánaca, pero chë uámana uabemana tsbuanachangá ndoñe chacmondétsebnatjëmbe.

<sup>14</sup> Alejandro, chë cobre soyënga pormayá, puerte bacá šonjaborlá. Bëngbe Utabná bochanjacastiga, ntšamo atše šojaborlama.

<sup>15</sup> Chabiamá cuedado cochtsebomna; cha tojobenase ntšámnaca cmatjabórla, er cha chë bënga mondabuayiyná soyëngama contra entsemna.

<sup>16</sup> Chë natsana soyamá, mándayëngbe delante šonjanotocá jenëuyanama ora, atše ndocná chešnátanajabuache; nÿetscanga cachcá šmonjessonÿaye. Pero atše sentsobátmana, Bëngbe Bëtsá chama chënga chaotsaperdoná.

<sup>17</sup> Pero Bëngbe Utabná aíñe šonjanájabuache y tonjanma atše bëts añemo jtsebomnama, y chcase, atše sënjanobená Jesucristbiamá nÿetsca chabe tšabe noticiënga entšanga jábuayenama, y chë luarentša ndoñe judiënga tmonjanobená chë soye jouenama. Mëntšá, Bëngbe Utabná canÿe uabouana resjuentsana šonjanatsbocá, mo canÿe león jtsosañámentšana ndábioye cuafjatsbocacá,

<sup>18</sup> y Bëngbe Utabná šochanjatsbocá, bacna soye ndocná chašondëborlama; y sempre jtsinÿenëse, celoye, chë ndayentše cha yománda luaroye šochanjesbetše. ¡Nÿetscanga nÿetsca tescama cha chamotsatschuaná! Chca chaotsemna.

*Pablo Timotéobiöye jadióšoftanama*

<sup>19</sup> Atšbe cuenta cochjácheuaye Prisca y Aquila, y Onesíforbe pamílnaca.

<sup>20</sup> Erasto, Corinto puebloca tontsoquedañe, y Trófimo Mileto puebloca šocá sënĵëftseboshjona.

<sup>21</sup> Lempe cochjama, uaftena tempo chaondóshjango ora moye jabama. Acnaca cmontsechuaná Eubulo, Pudente, Lino, Claudia y nÿetscanga muentše Jesucristbeñe ošbuáchiyënga.

<sup>22</sup> Atše sëntseimpadana, Bëngbe Utabná Jesucristo ácaftaca chaotsemna, y Bëngbe Bëtsá tšëngaftangbeñe tšabe bendicionënga chaotsemnama chaoma.

## Tito

### *Jachuayama*

<sup>1</sup> Atše Pablo, Bëngbe Bëtsabe oservená sëndmëna y Jesucristbe ichmoná entšanga jábuayenama, chë Bëngbe Bëtsá chabe entšanga chamotsemnama tojábacacanga, Jesucristbeñe chamotsošbuáchema y chë ndegombre soyëngama chamotsetatšëmbuama; chë soyënga endmëna ntšamo bënga, Bëngbe Bëtsabe básenga bëtsemnama, mondoyena jtsamëse.

<sup>2</sup> Lempe chca sëndama, er Bëngbe Bëtsabeñe jtsošbuáchiyëse, atše sentsobátmana chë nyetsca tescama yomna tšabe vida jtsebomnama. Bëngbe Bëtsá, chë ndocna te obosterayá, quem luare cabá ndmëna orscana tojanašebuachená entšanga chca vida jtsebomnama;

<sup>3</sup> y nÿa chama tempo tojóshjango ora, chë entšanga jábuayenama, soyëngaca Bëngbe Bëtsá chabe palabra šojinÿanyé, ndayá Jesucristo entšangbiana yochjanmama; y chca jábuayenama atše palabra šmonjabonyé, Bëngbe Bëtsá, bëngbe Atsebacayabe mándoca.

<sup>4</sup> Tito, quem tsbuanácha cbontsabobiamná. Atše Jesucristbe soyëngama entšanga sënjanabuayiyiná ora, aca chábeñe contsanošbuaché y nyets útata cachca ošbuáchiyana Jesucristbeñe bondbomna, y chca, aca mo atšbe ndegombre uaquiñacá condmëna. Atše sëntseimpadana, Bëngbe Bëtsá Bëngbe Taitá y Jesucristo Bëngbe Atsebacayá, ábeñe tšabe bendicionënga chaotsemnama chata chaboma, y chaboma aca ainaniñe tšabe ebionana chacotsebomnama.

### *Titbe trabajo Creta luaroca*

<sup>5</sup> Atše Creta luaroca tcbonjëftsanboshjona, ntšamo chentše jamama enjetsashbencá chacomama, y nyetsca pueblënguenache chë ošbuachiyëngcá enefjuanëngbeñe bëtšëjemëngcá amëndayënga jtsemnama chacubuáyanama, ntšamo tcbonjëftsemandacá.

<sup>6</sup> Canÿa bëtšëjemama uabuayaná mëntšá bontsemna: chaotsiyena ntšamo chabiana ndocná chaondëtsichamo ndoñe tšabá yontsama ca; nÿe canÿe shembásabe boyá; chabe básengna, Jesucristbeñe ošbuachiyënga chamotsemna, y chamotsiyena, ntšamo ndocná chaodayana chënga nÿe jenomándama ntšobencá y nÿe ntšamo tmojtsebošcá imojtsiyena ca, o chënga chëngbe bëtšëtsanga o mándayënga ndoñe montsayaanana ca.

<sup>7</sup> Er cánÿentše ošbuachiyëngcá enefjuanëngbe mandayá, Bëngbe Bëtsabe trabajo jamama tmojabonyëyeca, cha

bontsemna jtsiyenana, ntšamo ndocná chaundayana cha ndoñe tšabá yontsama ca; ntjajuaboycá, nýe ntšamo cha tojtsebošcá ndoñe chaondětsama; ndoñe chaondětsiyena nýe rábiaca jtsemnama; ndoñe chaondětsetmó; penzentsero ndoñe chaondětsemna; y ndoñe chaondětseboše nýe paselo becá crocénana jtsebomnama.

8 Pero chabe yebnentše posada entšanga júyentsamiamana sempre chaotseprontana, tšabe soyenga chaotsebínýnama sempre chaotsentšena, botamana juabnayá chaotsemna, ntšamo Běngbe Bětsabe bominiñe tšabá yomncá chaotsiyena, nýets tempo Běngbe Bětsábioye chabotsadorana, y cachá nýetsca soyenguiñe jenomándama chaotsobena.

9 Cha bontsemna nýets tempo jtsošbuáchiyana y jtsobedecénana chě ndegombre buayenana soye, ntšamo tmojabuatěmbacá, chca, chě ndegombre buatěmbana soyengaca ínýenga añemo chaotsatšatnama, y chě soyama contra tmojtsemměnga jáyěñjanama, ndoñe tšabá montsamama.

10 Cha chca bontsemna, banga nýe nděmandáněnga jtsiyenama bošěnga mondměna causa, y chěnga mondměna, nýe ndaye ndoservena soyengama yapa oyebuambnayěnga y ínýenga áingñayěnga, y chcanga más mondměna chě nýetsca ošbuáchiyěnga base bobachtema chě más delicadentše tětšeněnga jtsemnama yojtšamna ca mondbětsichaměnguentše.

11 Y entseyta chěngbioye jtayáchetana, er chěnga jamana ba pamíllanguentše nýetscanga Jesucristbeñe ošbuáchiyana chamotsajbanama. Chěnga chca mondbětsama, chě ndoñe yontsamna jtsabuátambayama soyenga jtsabuátambayěse, nýe paselo crocénana jongánama.

12 Enjamna canýa, ndabiamana entšanga jtsichámuana cach Creta luarentša diosěngbiamana oyebuambnayá canjamna ca, y cha cachabe luarentša oyeněngbiamana měntšá tonjánayana: “Creta luarentše oyeněnga, nýets tempo bosterěnga mondměna, ainana ndbomměnga y oyěñjayěnga nýe becá jasama bošěnga ca.”

13 Y chca ndegombre cha tonjánayana; chíyeca chěnga jabuache cochjucácana, chca, chěnga Jesucristbeñe chamotsošbuáchema y chamotsobedecena chě buatěmbana soyenga, chě ndayiñe běnga mondošbuaché;

14 y cach judiěngbe cuentěnga ndoñe chamondětsuenana, ni chě ndegombre soyenga uaboteněngbe manděnga.

15 Chě ainaniñe bacna juabněnga ndbomměnga y chca juabněngaca nděmandáněnga, nýetsca soyengama jtsejuabnayana mo ndegombre tšabe soyenga cuaftsemncá; pero chě bacna soyengaca mandáněnga y Jesucristbeñe

ndošbuáchiyënga, nÿe ndayámncá jtsejuabnayana mo bacna soye cuaftsemncá. Chca entsemna, er chëngbe juabnoca nÿe ena bacna soyënga jésebomnana, y ndaye bacna soye tmojama ora, chëngbe ainaniñe juabnënga ndoñe ntsebomnana, bacna soye tmojamama chaúyanama.

<sup>16</sup> Chënga jtsichámuana Bëngbe Bëtsá imuábuatma ca, pero ntšamo tmojtsama soyëngaca jtsinÿinÿayana chca ndoñe ndegombre yondmënama. Chënga Bëngbe Bëtsabe bominiñe puerte bacna entsanga mondmëna, y ntšamo cha tomandacá ndoñe ntsamana; chë causa chënga ndoñe ntsobenana ndaye tšabe soye jamama.

## 2

### *Soyënga ntšamo chë ndegombre buatëmbánana endmëncá*

<sup>1</sup> Ntšamo chacojtsoyebuambnacá sempre chaotsemna ntšamo chë ndegombre buatëmbánana endmëncá.

<sup>2</sup> Cochjayana chë bëtsëjëmëngna chamotsemna cachënga nÿetsca soyënguiñe jenomándama obenënga, nÿetscangbiana mo uámana entsangcá utabnënga, ntšamo jtsiyenama tšabá juabnayënga, nÿets tempo chë ndegombre soyënguiñe chamotsošbuaché, Bëngbe Bëtsá y nÿetscanga chamotsababuánÿeshana, y padecena soyënguiñe puerte uantadënga chamotsemna.

<sup>3</sup> Cachcá, chë bëtsanana shembásenga chamotsiyena mo Bëngbe Bëtsábioye adorayëngcá, uayátsenayënga ndoñe chamondëtsemna, ni tmoyënga. Entsamna chamotsiyena tšabe soyënga jtsamëse;

<sup>4</sup> chë tobiasënga chamotsinÿanÿná y chamotsabuatambá ntšamo chëngbe boyanga y básenga jtsababuánÿeshanana,

<sup>5</sup> ntšamo cachënga jenomándama jtsobenana, ainaniñe ndocna bacna soye ntsebomnana, yebnentša soyënga jtsamama jtsentsénana, nÿetscángaftaca tšábenga jtsemnana, cachëngbe boyángbioye jtsayaunanana, chca, ndocná chaondëtsobena Bëngbe Bëtsabe palabrama bacá jatóyebuambnayana, ntšamo chë tobiasënga tmojamama.

<sup>6</sup> Cachcá, chë bobontsënga añemo cochtsatšatnaye cachënga jenomándama chamotsobenama,

<sup>7</sup> y chënga cochjínÿanÿiye ntšamo yomna jtsiyenana, cach aca nÿetsca soyënguiñe tšabá jtsamëse. Chca chacojtsabuatambá ora, nÿe chë ndegombre buayenánana cochtsabuátambaye y corente respétoca chca cochtsama,

<sup>8</sup> chë ndegombre soyënga jtsóyebuambnayëse; chca, ndocná chaondobená jayanana aca ndoñe tšabá tconjayana ca, y chca, chë acbe contra ichámënga chamotséuatja, er ndocna bacna soye quemochatobenaye bëngbiana jayanama.



9 Chë nÿets tempo nÿe ínÿabíama oservénënga cochjúbuayenaye, chëngbe nduiñëngbioye chamotsobedecénama, soyënga chamotsama chënga chamotsóyejuama, y yajuatsanënga ndoñe chamondëtsemnama.

10 Ndoñe chamondëtsatbëbana, pero aíñe nÿétscañe tšabe palabra bomnënga chamotsemna. Chënga chca entsamna, chca, ínÿenga chámuinÿe y chamojuabó tša botamana chë buatëmbana soyënga, Bëngbe Bëtsá bëngbe Atsebacayabíama yomna ca.

11 Er Bëngbe Bëtsá bënga šonjinÿanÿé cha bëngbe tšabíama juabnënga yobomnama, y chca, cha tojama nÿetsca entsanga chamotsobena atsebácanënga jtsemnama.

12 Chë Bëngbe Bëtsabe juabna bëngbe tšabíama, šontsabuatambá jtsajbanama oyenana soyënga jtsamëse mo chë Bëngbe Bëtsá ndoñe mondadoranëngcá, quem luarentša bacna soyënga bošana jtsajbanama; y ntšamo mora quem luarentše jtsiyenámnaca šontsabuatambá, cabënga jenomándama jtsobenëse, ntšamo Bëngbe Bëtsabe bominjÿiñe tšabá yomncá y cha jadórama soyënga jtsamëse.

13 Y chca jtsamëse, y Bëngbe Bëtsábeñe ošbuachiyánaca jtsiyenëse, jtsobátmanana chë puerte oyejuayana jtsebomnama te, Bëngbe Bëtsá obená y Atsebacayá Jesucristo, buashinÿinÿaniñe y canÿe corente uamanacá yochjésabo ora.

14 Cha chabe derecho vida jtsobomñama cachcá tojanonÿá y bëngbíama tojanóbana, chë ntšamo Bëngbe Bëtsá bemandacá ndoñe yondmëncá jtsamëse oyenentsana bënga játsebacama, ainaniñe ndocna bacna soye ndbomnënga jábíamama, bënga chábenga chamotsemnama, sempre prontánënga ntšamo tšabá yomncá jtsamama.

15 Chca cmontsemna jtsabuátambayana, chënga becá añemo jtsatšatnayëse, y jtsinÿanÿnayëse chënga bacna soye tmojamama, chë nÿets condbomna mándoca jucácanëse. Ndoñe catjaleséncia ndocná chaondayana aca mando ndoñe condbomna ca.

### 3

#### *Ndayá Jesucristbeñe ošbuáchiyënga yojtsamna jamana*

1 Cochtsama chënga chamuatenójuaboma chë mandadënga y inÿe mándayënga chamotsayaunanama, chamotsobedecénama, y tšabá yomncá jamama sempre chamotseprontánama.

2 Ndocnabíama ndocna bacna soye chamondëtsoyebuambná, penzentserënga ndoñe chamondëtsemna, ndayá nÿetscángaftaca natjëmbana jtsiyenama

bošënga, tšabá mándbomnënga, nyetscanga tšabe ainánaca imojtsënyama entšanga jtsinÿanÿnayëse.

<sup>3</sup> Er bëngnaca tempo monjamna Bëngbe Bëtsabe soyëngama ndosertánënga, ntšamo Bëngbe Bëtsá endëmandacá ndoñe quemjátanama, ingñénënga y mandánënga monjamna nyetsca bacna soyënga jamama juabnëngaca y nye quem luarentše tšabá jtsemnama juabnëngaca. Bënga monjaniyena nye bacna soyënguiñe juabnaye, ínÿenga uantšaboše. Inÿenga bënga šonjanëbuayënja y bënga nyetscanga monjanenáboyënja.

<sup>4</sup> Pero Bëngbe Bëtsá, bëngbe Atsebacayá, bëngbe tšabiamama juabna yobómnyeyeca y tša šuababuánÿeshanama šonjaninÿanÿé ora,

<sup>5</sup> cha šonjanatsebacá, pero ndoñe nderado bënga ndaye tšabe soye tmojanmama, ndayá cha bëngbiama tbojanongméyeca. Cha šonjanatsebacá, bëngbe bacna soyënga jabuajuánase, y chë Uámana Espíritu jujabuáchëse, bënga mo tsmëma entšangcá chamotsemnama, ntšamo tempo vojammcá ntjatsjuabnaycá y ntjatamcá.

<sup>6</sup> Bëngbe Atsebacayá Jesucrístbeyeca, Bëngbe Bëtsá tojanma Uámana Espíritu bëngbe ainaniñe nyets tempo chaotsemándama y bënga chašotsëjabuachanama,

<sup>7</sup> chca bënga, Bëngbe Bëtsá bacna soyëngama šojaperdónanga y bëngbe tšabiamama juabna bómnyeyeca tojayana chabe bom-inÿiñe tšábënga imomnënga, chamotsobena cha yobomna soyënguentsana bënga mo ndayá cuaftsëtocancá jóyëngacñama, y chca, chábeñe jtsošbuáchiyëse, chë nyetsca tescama yomna tšabe vida chamotsobátmanama.

<sup>8</sup> Chca, lempe ntšamo tijayancá nÿa ndegombre endmëna, y atše sëntseboše chë soyëngama bëtscá chacotsabuatambá, chca, chë Bëngbe Bëtsábeñe tmošbuachenga chamotsentsena chë tšabe soyënga jtsamama. Chë buatëmbánana puerte tšabá endmëna y nyetscangbiama bëtscá endoservena.

<sup>9</sup> Inÿenga nye ndoservena soyëngama jabuachana tmojtsenatsëtsná ora, y anteungbe cuentëngama chamojtsoyebuambná ora, ndoñe cattsontremetena; ndoñe cattsama cach tšëngaftanga ndoñe tšabá jtsenëyeunanamcá, y judiëngbe leyëngama ndoñe ínÿengaftaca cattsenpéliaye. Chca jtsamana tondayama ntososervénana, y nye bonamente chca jtsamana.

<sup>10</sup> Nderado nda tojtsama entšanga ndoñe cachcá nyetscanga chamondëtsejuabnama y chamotsenpéliama, canÿe o uta soye cochjabuayená ndoñe tšabá tonjamama; pero cha ndoñe tcmonjóyeunase, chentšana cháftaca ndoñe más cattsóyebuambnaye.

<sup>11</sup> Chca cochjama, er aca cochanjátatsëmbona canÿa chca tojtsemná, chabe juabna tojatrocá bacna soyënga jtsejuab-

nayama. Chë soye y chë inÿe bacna soyënga ntšamo cha tojtsamcá, jtsinÿanÿnayana cha ibojtsemna castiganá chama jtsemnama.

*Inÿe soyënga Titbiamá*

<sup>12</sup> Atše, Artemas o Tíquico ácbioye chajichmó y choca chaojáshjango ora, ndayánaca cochjama Nicópolis puebloye aca jama atše jinÿama, er atše sënjajuabó chentše chë uaftenëntscuana jëftsemnana.

<sup>13</sup> Lempe ntšamo chacojobenacá, cochjuájabuache chë ínÿenga obuauyayá Zenas, y Apólosnaca; lempe ntšamo chata ibojtsëjabotcá cochjátšataye, ínÿoye jama jatóntšama chamobenama y benachëjana tondaye chaondëtsabuáshebenama.

<sup>14</sup> Atše sëntseboše, bëngbe entsanga, chë bëngcá Jesucristbeñe ošbuáchiyënga, chamotsentšena chë tšabe soyënga jtsamama y chë puerte ujabótënga jtsëjabuáchanama, chca, chënga tondayama ndoservená vidënga ndoñe chamondëtsebonnama.

*Pablo Títbioye jadiósoftanama*

<sup>15</sup> Nÿetscanga chë átšeftaca montsemnëngnaca cmontsechuaná. Atšbe cuenta cochjácheuaye nÿetscanga chë bënga imuababuanÿeshanëngbioye, cach bëngcá Jesucristbeñe ošbuáchiyana bómnyeca. Atše, Bëngbe Bëtsá sëntseimpadana, cha chaoma ábbeñe tšabe bendicionënga chaotsemnama.

## Filemón

### *Jachuayama*

<sup>1</sup> Atše Pablo, mora utamená Cristo Jesusbiamma oservena causa, quem tsbuanácha sentsabiamná, Jesucristbeyeca bēngbe catšata Timotéoftaca, acbiamma Filemón, bēngbe bonshaná y nda bēngaftaca condētrabája Jesucristo jasérviamma.

<sup>2</sup> Atše sēntsacheuaná, Jesucristbeyeca bēngbe uabena Apia y Arquínaca, nda bēngaftaca cánŷiñe Jesucristbe soyēngama endenojuerzana; y nŷetsca ošbuachiyēngnaca, ndēmuanŷenga imuamana acbe yebnentše jénefnama Bēngbe Bētsá jētschuayama.

<sup>3</sup> Atše sēntseimpadana Bēngbe Bētsá Bēngbe Taitá y Bēngbe Utabná Jesucristo, chata chaboma tšabe bendicionēnga tšēngaftangbeñe chaotsemnana, y chaboma tšēngaftangbe ainaniñe tšabe ebionana chašmotsebmnama.

### *Filemonbe bonshánana y ošbuáchiyana*

<sup>4</sup> Bēngbe Bētsáftaca stsencuēnta ora, acbiamma sēndbētsenojuabnaye, y sempre acbiamma Bēngbe Bētsá sēndbētsatschuanaye,

<sup>5</sup> er atše sēnjátatsēmbona ntšamo aca nŷetsca chē Bēngbe Bētsábenga imomnēnga icuababuánŷeshanama, y ntšamo aca Bēngbe Utabná Jesúsbeñe tša icošbuáchemma.

<sup>6</sup> Bēnga, Jesucristbeñe ošbuáchiyēnga quetsomñecá, ácaftaca mo canŷacá fsēndmēna. Chca endmēnayeca atše Bēngbe Bētsá sēntseimpadana, tšēngaftanga chašmobená más botamana josértana nŷetsca chē Bēngbe Bētsábiocana tmojójōyēngacñe tšabe bendicionēnga, bēnga Cristo Jesúsēftaca cánŷiñe mo canŷacá bētsemnayeca.

<sup>7</sup> Jesucristbeyeca atšbe bonshana catšata, aca chē Jesucristbeñe ošbuáchiyēnga tša condábabuanŷeshanama, atše corente oyejuayá sēntsemna y bēts añemo sēntsebmna. Y aca tcojama, nŷetscanga chē Bēngbe Bētsábenga imomnēnga chēngbe ainaniñe ngmēnaca ndoñe chamondētsemnana, chēnga jujabuáchēse.

### *Pablo, Filemónbioye Onésimbiamma tbojanimpadá*

<sup>8</sup> Y chca, atše Cristbe ichmoná quetsomñecá sēntsobena, aca nŷe jamándana ntšamo yomncá chacotsamama, pero atše chca ndoñe quichatsma.

<sup>9</sup> Y cbondbobonshánayeca, chca játamamna, aca cbochanjaimpáda. Atše Pablo, Jesucristbe cuenta ichmoná jōyebuambayama y mora utamená, chabiamma oservena causa,

<sup>10</sup> canÿe ruego cbochanjábema, Onésimo chacuájabuachama. Atše utamená tsmënëntscuana, Jesucristbe soyëngama cha sënjanbuayiyiná. Cha Crístbeñe tonjanošbuachéyeca, cha mo atšbe uaqüñacá tonjanóbema.

<sup>11</sup> Tempo, cha ácbioye tondayama quecmënjåtanservena, pero mora cha becá entsámama, acbiama y atšbiama.

<sup>12</sup> Mora ácbioye sentsatichamná, y atše sempre chabiamasëndbétsenujabnaye y sëndbobonshana.

<sup>13</sup> Atšbiama puerte tšabá manmëna cha átšeftaca matënjoquedase, acbe cuenta atše chašoservema, cárceloye utamená sëntsemnëntscuana, chë tšabe noticiënga entsanga abuyayynaye causa.

<sup>14</sup> Pero atše ndoñe chiyatsma cha chaoquedama atše chašúájabuachama, er atše ndoñe quetsátsboše aca obligaciónaca chacotsemnama, atše juajabuáchama ndayánaca chacomama; y sëntseboše aca ndayánaca chacoma, cach aca chca jamama puerte tcojtsebošëse. Chcasna, tondaye quichatsma, chë soye chca chaotsemnama aca cabá ndocá ntjayancá.

<sup>15</sup> Atše sëntsejuabná nderado Onésimo ácbentšana básefta tescama tojanoluaré, mora ácaftaca nyëts tempo jtsatsmënama ca,

<sup>16</sup> y ndoñe nyë acbiama mo nyëts tempo canÿe oservenacá, ndayá chama más uamanacá, mo Jesucristbeyeca canÿe bonshana catsatcá. Atše puerte Onésimo sëndbobonshana, y acna cmontsemna más cha jtsebobonshánana, er cha mora ndoñe quenátsmëna canÿa nyë acbiama nyëts tempo oservená, ndayá Bëngbe Utabnábeyeca canÿe catsata, ntšamo cach aca condmëncá.

<sup>17</sup> Chca, aca atšbiama condëjuabná mo ácaftaca cánÿiñe Bëngbe Utabnabiama trabajayacá; chíyecna cmontsemna cha jtöfjana, mo atše šcojofjá.

<sup>18</sup> Nderado ntšamo cha tcmojanborlá o ndayánaca tcmonebena, atše chama cbochjëtsëntšabuachiye.

<sup>19</sup> Atše Pablo, cach atšbe cucuátšeca quem soye sentsabiamná. Atše chama cbochanjëtsëntšabuachiye. Ndegombre, ndoñe quenátsiyta atše chacbëyana becá šcondebena ca, ntšamo atsbocaná jtsemnama atše tcojójánbuayenama.

<sup>20</sup> Chcasna, Jesucristbeyeca atšbe catsata, Bëngbe Utabnáftaca cánÿiñe mo canÿacá quetsomñecá, Diosmanda chë pavor šcochtsebema. Diosmanda cochjama atšbe ainana ngmënaca ndoñe chaondëtsemnama.

<sup>21</sup> Atše chca cbontsabobiamná, er atše tšabá sëndëtatšëmbo, ntšamo cbontseimpadancá cochjamama, y cabá más chama cochjatsmama.

<sup>22</sup> Y mora inÿe soye, Diosmanda posada šochjabopróna, atše jányama chaijábocna orscama, er atše puerte jtsošbuáchiyëse Bëngbe Bëtsábeñe sëndobátmana, cha tšëngaftangbiana yochjama lempe ntšamo atšbiana chašmojotjañcá, y chca, cha šochjaleséncia atše tšëngaftangbioye jésama.

*Pablo Filemónbioye jadióšoftanama*

<sup>23</sup> Epafras, muentše átšeftaca cárceloye utamená, Cristo Jesusbiana entšanga abuayiynaye causa, chánaca cmontsechuaná.

<sup>24</sup> Y Marcos, Aristarco, Demas y Lucas, chë bëngaftaca mondëtrabájanga Cristo jaserviama, chëngnaca cmontsechuaná.

<sup>25</sup> Atše sëntseimpadana Bëngbe Utabná Jesucristo, chaoma tšabe bendicionënga tšëngaftangbeñe chaotsemnama.

## Hebreos

*Bëngbe Bëtsá bëngaftaca tojoyebuambá, chabe Uaquiñáftaca*

<sup>1</sup> Tempo, Bëngbe Bëtsá ba soye y ba soyëngaca bëngbe bëts taitángbioye tojanëyana, chë chabe juabna oyebuamb-nayëngaftaca.

<sup>2</sup> Pero quem tempo bëngaftaca tojoyebuambá, chabe Uaquiñá jíchmuase, bëngbioye cha chašúyanama. Bëngbe Bëtsá tojama, lempe ntšamo chabe soye yomncá, chabe Uaquiñabiama chaotsemnana, y chábeyeca Bëngbe Bëtsá quem luare y nyetsca inye luarënga tojama.

<sup>3</sup> Cha endinÿanÿná Bëngbe Bëtsabe corente buash-inÿinÿanana y uámanana, y cha endmëna cach Bëngbe Bëtsacá, y chábeñe bënga mondobena jinÿama ntšamo Bëngbe Bëtsá yomncá. Chabe bëts obenánaca endútabna lempe ntšamo quem luarentše yobinÿncá; cha tojayana y chca jtsemnana. Cha tojanóbana bëngbe bacna soyënga jabuajuánama, y chentsana Bëngbe Bëtsá tojaninÿanÿé cha puerte bëtsá y uamaná bëtsemnana, celoca játbemëse, Bëngbe Bëtsabe catšbioica, nyetscanga jtsamëndayama.

*Bëngbe Bëtsabe Uaquiñá chë angelëngbiama más bëtsá yomna*

<sup>4</sup> Y chca, Bëngbe Bëtsá tbojánbema chë angelëngbiama más uamaná y obená, er Bëngbe Bëtsá tbojanbuajó canÿe más uámana uabaina y chë angelëngbiama canÿe más uámana trabajo tbojanbonÿé.

<sup>5</sup> Ndegombre chca endmëna, er Bëngbe Bëtsá ndocna te ndocna ángelbioye mëntšá tbonjaniyana, ntšamo chabe Uaquiñábioye tbojaniyancá:

Aca atšbe Uaquiñá condmëna.

Mënté entsanga sënjinÿanÿé aca atšbe Uaquiñá comnana ca. Ni ndocna angelbiama mëntšá tojánayana, ntšamo chabe Uaquiñabiama tojanayancá:

Atše canÿe taitá chabiama chántsemna,

y cha canÿe Uaquiñá atšbiama ca.

<sup>6</sup> Quem Bëngbe Bëtsabe Uaquiñá endmëna nyetscangbiama más uamaná. Chca Bëngbe Bëtsá tojánayana, chabe natsana Uaquiñá quem luaroye cháuashjanguama cha tojanma ora: Bëngbe Bëtsabe nyetsca angelënga cha chamotsatschuaná ca.

<sup>7</sup> Y chabe angelëngbiama, mëntšá tojánayana:

Atše sëndama atšbe angelënga, chë atšbe buayiynayënga, mo binÿiëngcá chamotsemnana,

y chënga, atšbe oservënënga, mo iñëjëngcá ca.

<sup>8</sup> Pero chabe Uaquiñabiama Bëngbe Bëtsá tojánayana:

Utabná, acbe amëndayana nÿetsca tescama echántsemna,  
y aca nÿetsca soyënguïñe condbétsemandaye, ntšamo tšabá  
yomncá jtsamëse.

<sup>9</sup> Aca icontšena ntšamo tšabá yomncá nÿetsca soyënguïñe jt-  
samama, y sempre chca jtsamama tša icoboše,  
pero nÿa todayama cmondogustana bacna soyënga  
jtsamana, chë ndayá Bëngbe Bëtsá ndoñe yondboše  
soye;

chíyeca Bëngbe Bëtsá tcmojabocacá,  
y tojama aca puerte oyejuayá chacotsemnama,  
chë ínÿengbiamá más oyejuayá ca –Bëngbe Bëtsá tojánayana.

<sup>10</sup> Bëngbe Bëtsá mëntšánaca chabiamá tojánayana:

Utabná, quem luare jobojátšama ora, aca quem luare tcon-  
janma,

y lempe chë celoca yomna soyëngnaca.

<sup>11</sup> Lempe chë soyënga nÿets tempo ndoñe queochátsmëna;  
aca nÿetsca tescama cochántsemna.

Lempe chë soyënga echanjopochóca, mo tojuatanguaná  
entšayacá.

<sup>12</sup> Aca chë luarënga cochanjátrocaye, mo tsmëcá cuafjabiamcá.  
Chca, chë luarëngaca cochanjama, mo entšayá  
tcojtenëjonëtse y tcojenotrocacá.

Pero aca nÿets tempo cach aca cochandesomñe,  
y nÿets tempo vida cochandesóbomñe ca –cha tojánayana.

<sup>13</sup> Bëngbe Bëtsá ndocna te ndocna ángelbioye mëntšá tbon-  
janiyana, ntšamo chabe Uaquiñábioye tbojaniyancá:

Atšbe catšbioica cochtsetbemana,  
acbe uayayënga acbe cucuatšïñe chamoquedama atšbe  
obenánaca chjamëntscuana ca.

<sup>14</sup> Ndegombre, nÿetsca angelënga espíritënga mondmëna  
Bëngbe Bëtsá jaserviama, ndëmuanÿënga cha tojanichamá  
bënga jabújabuachama, chë atsebácanënga mochtsemnëngbe  
tšabiamá.

## 2

### *Canÿe bëts soye endmëna atsebácanënga jtsemnana*

<sup>1</sup> Chíyeca, bënga šontsamna sempre Bëngbe Bëtsabe soyënga  
jtsuenanana, chë bënga tmonjouena soyënga, chë tšabe be-  
nachentšana ndoñe chamondojuánama.

<sup>2</sup> Ndayá Bëngbe Bëtsá tempo angelëngaca entšanga to-  
janamëndacá, canÿe ndegombre soye endmëna, y entšanga  
entsamna chca jtsobedecénana; y chë bacna soye tmo-  
janmënga y ntšamo Bëngbe Bëtsá tojanmandacá ndoñe tmon-  
janmënga castigo tojanatšatá, chca tmojanma causa; y chca,



3 bēnga chca bacna soyēnga tmojtsamēse, ¿ntšamo mochjobenaye jtsejuabnayana Bēngbe Bētsá chama ndoñe šochanjacastígaye ca? Ndegombre cha chca echanjama, bēnga chábeñe ndoñe tmontsošbuáchese, chē bēts soye jēftsashjáchama, atsebácanēnga jtsemnama. Bēngbe Utabná chē natsaná yojtsemna nda entšanga tojanabuayená Bēngbe Bētsá entšanga yochjánatsebacama; y ínŷenga bēnga sonjanabuayená cachcá ntšamo chábioye tmojanoyeunacá.

4 Y Bēngbe Bētsánaca tonjaninŷanŷé, ndayá chēnga tmojanabuayenacá ndegombre bétsemnama, chabe obenana jinŷanŷiyama soyēngaca, entšanga chamenjnaná soyēngaca, bēts soyēngaca, y entšanga chē Uámana Espiritu ainaniñe chamotsebomnama cha jtsamēse. Chca jamēse, cada ona chaotsobena jamama ntšamo Bēngbe Bētsá yobošcá.

*Bēngbe Bētsá tojanma Jesucristo entšangcá chaotsemnama*

5 Bēngbe Bētsá angelēnga ndoñe tonjubuáyana chamotsemándama ndayá quem luarentše yochtsemniñe, lempe mo tsmécá chaotsemnama Bēngbe Bētsá chaojama ora, chē ndayama mora bēnga montsoyebuambná.

6 Chamna, ínŷoca Bēngbe Bētsabe uabemana palabrēnguiñe mēntšá endayana, ntšamo chábioye canŷa tbojaniancá tojánayana:

Entšanga ndoñe yapa uámanēnga quemátsmēna, as ¿ndáyeca tša chēngbeñe cuanjésejuabnaye?

Chēnga entšanga mondmēna. ¿Ndáyeca tša chēnga cuanjésanŷena?

7 Aca tcojama entšá puerte uamaná chaotsemnama, y chē angelēngna nŷe batšatema chabiamá más uámanēnga mondmēna.

Aca tcojama cha puerte uamaná y respeto merecido bomná chaotsemnama,

8 y cha chaotsemándama nŷetsca chē inŷe soyēnguiñe, chē quem luarentše aca tcojamiñe —chiñe canŷa tojánayana.

Entšá lempe chaotsemándama Bēngbe Bētsá tojanma ora, ton-daye tonjánboshjona entšáftaca ndēmandana soye ca. Pero mēntscoñama ndoñe nŷa chca quemēntinŷe, chē entšá lempe ntšamo quem luarentše yomncá jtsemándayana.

9 Pero bēnga mondētatsēmbo y corente mondonŷá Jesús aíñe chca tojanmama. Bēngbe Bētsá tojanma cha nduamaná chaotsemnama, mo canŷe entšacá, baseftayté chē angelēngbiamá más batšá uamaná. Bēngbe Bētsá, entšangbe tšabiamá jtsejuabnayēse, yojánboše Jesús chaóbanama, corente jasúfriase; Bēngbe Bētsá yojánboše cha chca chaomama, nŷets luarentša entšangbe tšabiamá. Y Jesús ya chca tojánmayeca,

Bëngbe Bëtsá ya tojinÿanjé cha puerte bëtsá y uamaná bëtsemnama.

<sup>10</sup> Nÿetsca soyënga yobinÿna Bëngbe Bëtsabiana y chábeyeca. Tšabá enjamna, Bëngbe Bëtsá jamana Jesucristo chaotsemnama lempe ntšamo entšanga tmojtsajabotcá, nda chëngbe bacna soyënguentšana cháuatsebacama. Bëngbe Bëtsá chca tojanma, Jesús, chë entšanga atsebácanënga jtsemnama unachayá, chaosufrima jamëse, chca, ba entšanga celoca, mo chabe basengcá, cháftaca bëtsëtsanga chamotsemnama.

<sup>11</sup> Er Bëngbe Bëtsá cach Taitá nÿetscangbiana endmëna: Jesús, chë entšanga Bëngbe Bëtsábenga chamotsemnama iuamabiana, y chë entšanga chca chamojtsemnëngbiámna. Chíyeca Jesús, Bëngbe Bëtsabe Uaquiñá, ndoñe ntsëuatjana chëngbioye catšátanga ca jtsachembuanama.

<sup>12</sup> Bëngbe Bëtsabe uabemana palabrenguiñe Bëngbe Bëtsábioye cha mëntšá tbojaniana:

Atšbe uabentsëngbeñe acbiana chanjóyebuambaye, y jacántase cbochanjëtschuaye, ácbioye adórayënguentše ca.

<sup>13</sup> Y mëntšánaca cha Bëngbe Bëtsabiana tojánayana:

Atše atšbe Bëtsábeñe chantsošbuáchiye ca.

Y más chcoye mëntšá tojánayana:

Muentše Bëngbe Bëtsabe básengaftaca sëntsemna, chë atšbe cucuatšíñe tojábashesjuanënga, atše jtsanÿenama ca.

<sup>14</sup> Quem Bëngbe Bëtsabe básenga nÿetsca entšangcá mondmënayeca, Jesúsna canÿe entšá chëngcá tojanóbema. Cha chca tojanma, jóbanëse, chë entšanga jóbanama chaotsamnama obenana bomná Satanás, jayëñjanama.

<sup>15</sup> Y chca, cha tojama chë jóbanama y ndayá chentšana yochjopásama auatjënga ndoñe chamondëtsauatjama; chënga nÿets tempo corente ngménaca imnoyena, jóbanama auatja causa.

<sup>16</sup> Er ndegombre, cha ndoñe tonjánabo chë angelënga jabújabuachama, ndayá chë Abrahábentšana entšangbioye.

<sup>17</sup> Y chama cha ibojamna jtsemnana nÿetsca soyënguiñe cachcá mo chabe uabentsëngcá, chë entšanga, chca, jobenayama jtsemnama chëngbiana mo bachnangbe canÿe más uámana amëndayacá, Bëngbe Bëtsá jtseimpadánama chëngbioye chëngbe bacna soyëngama cháuperdonama, puerte lastemado mëná y sempre ntšamo Bëngbe Bëtsá tbojauyancá amá. Chca, cha jóbanëse jamama entšanga chamobenama perdonánënga jtsemnama, y chca, jobenayama Bëngbe Bëtsáftaca tšabá tempcá jtsemnëngama.

<sup>18</sup> Y mora cha entsobena, ndëmuanÿenga bacna soye jamama tojócochenguënga jujabuáchana; cha chca entsobena, er cachánaca tojansufrí, cha bacna soye chaomama Satanás tša yojtsentšena ora.

## 3

*Cristo Moisesbiana más uamaná endmëna*

<sup>1</sup> Chíyeca, Jesucristbeyeca catšátanga, Bëngbe Bëtsábenga, ndëmuanÿenga Bëngbe Bëtsá tojáchembo chabe entsanga chamotsemnana, corente Jesucristbeñe šmochjésejuabnaye. Cha endmëna nda Bëngbe Bëtsá bëngbioye tbojanichmó, y nda bëngbiana yomna mo chë más uámána bachnangbe amëndayacá, Bëngbe Bëtsábioye jtseimpadánama bacna soyëngama chašotsaperdonama. Cha chca endmëna chë bënga mondošbuaché soyënguiñe y chë mondbáyana ndegombre yomna ca soyënguiñe.

<sup>2</sup> Er Jesús nÿets tempo tojanma ndayá chaotsamama Bëngbe Bëtsá tbojaniancá, Bëngbe Bëtsá, nda tbojanábuayana chca chaoservema, cachcá ntšamo Moisés tojanma ntšamo Bëngbe Bëtsá tbojanmandacá, chabe entsángbioye cháuaservema.

<sup>3</sup> Canÿe yebna jebuaná chë yebnama más uamaná jtsemnana; cachcá Jesús, nda inétsama entsanga Bëngbe Bëtsábenga chamotsemnana, más jtsemerecénana Bëngbe Bëtsá cha puerte bëtsá y uamaná bëtsemnana cháuinÿanÿema, nÿe ntšamo Moisés, canÿa Bëngbe Bëtsabe entsanguentšá yojanomerecénama.

<sup>4</sup> Ndëmuanÿe yébnënaca canÿe jebuaná jtsebomnana, pero Bëngbe Bëtsá endmëna nda tojanma lempe ntšamo yobinÿncá.

<sup>5</sup> Moisés yojtsama ndayá chaotsamama Bëngbe Bëtsá tbojanmandacá, tšabe oservenacá nÿetsca Bëngbe Bëtsabe entsángbeñe, y yojamna canÿa corente tatsëmbuá ndayá más chcoye yochjanopásama, ndayá Bëngbe Bëtsá yochjánayanama.

<sup>6</sup> Pero Cristo, ndayá Bëngbe Bëtsá tobošcá jamana, chë Bëngbe Bëtsabe entsángbeñe Uaquiñacá jtsemándayëse, ntšamo canÿe uaquiñá jtsemándayana ndayá nÿetsca chabe pamíllanga tmojtsamiñe; cha, chë Uaquiñacá y chënga chë Bëngbe Bëtsabe pamillentsëngcá. Bënga chë pamillentša entsanga jtsemnana, bënga chë ndayá tmošbuáchema bëts añémoca sempre tmojtsóyebuambnase, y sempre Bëngbe Bëtsá tšabe soyënga bëngbiana yochjamama tmojtsobátmanëse, y bënga chca jtsebomnana puerte oyejuayënga tmojtsemnëse.

*Chë jóchnama uámána luare Bëngbe Bëtsabe entsangbiana*

<sup>7</sup> Chcasna, ntšamo chë Uámána Espíritu Bëngbe Bëtsabe uabemana palabrenguiñe tojanayancá:

Mënté tšëngaftanga ndayá Bëngbe Bëtsá tojtsichamcá šmojouenëse,

<sup>8</sup> ndoñe šmattsama, Bëngbe Bëtsabe buayenana soyënga tšëngaftangbe ainaniñe ndoñe chaondómashënguama,

mo chë entšanga ndoyena luaroca Moisésoftaca imojëftsemnëngcá, Bëngbe Bëtsabe contra nyetsca soyënguiñe imojtsemna.

Chënga bëtscá bacna soyënga tmojanma, mo ndayá cuaftsamcá jinÿama ntsachetšá más muanjobenaye jamana y Bëngbe Bëtsá cabá uantado chëngaftaca tayojtsemnama.

<sup>9</sup> Bëngbe Bëtsá tojánayana: “Chentše, tšëngaftangbe bëts taitanga bëtscá monjánama jinÿama ndayëntscoñe atše uantado chëngaftaca tsjamnama;

chca chënga tmonjanma, masque canta bnëtsana uatëntscuana chënga chentše tmonjáninÿe chë atše sënjánama bëts soyënga.

<sup>10</sup> Chiyeca, atše chorsca entšàngaftaca šonjánetna y sënjánayana: ‘Tšëngaftanga mora átšeftaca ndoñe quešmátajna, mo chë otšenënga tmojtsemnëngcá,

y ndoñe šmonjábošena jtsiyenana ntšamo atše tsbošcá jtšamëse.’

<sup>11</sup> Chiyeca, atše chëngaftaca etonaná sënjánayana, mo nda cuafjajuracá,

chënga ndocna te mochjëftsashjache chë átšeftaca jóchnama uámana luaroye jashjanguama ca” —cha tojánayana.

<sup>12</sup> Jesucrístbeyeca catšátanga, yejuana šmochtsantješna ndocná tšëngaftanguentšá chaondëtsebmoma canÿe ainana bëtscá bacna juabnëngaca, y chë causa chaotsemna Bëngbe Bëtsábeñe ndošbuachiyá, y Bëngbe Bëtsábentšana, chë sempre iuetsemnábentšana chaotsojuánañe.

<sup>13</sup> Chamna, nyetscanga añemo šmochtsatenatšetnaye cada te, chë bënga imobena Bëngbe Bëtsá joyeunayama tempo imoyenëntscuana, chë Bëngbe Bëtsabe uabemana palabrënguiñe “mënté ca” uabaina tempo. Chca cmontsamna, ndocná tšëngaftanguentšá chaondëtsamama, Bëngbe Bëtsabe buayenana soyënga ainaniñe ndoñe más chaondómashënguama, bacna soyënga jamama juabnëngaca ingñená.

<sup>14</sup> Er, ndayá Jesús chabe amëndayoca yobomnentšana bënga chamóyëngacñamna, bënga šontsamna sempre ainaniñe corente jtsetatšëmbuana Jesusbe soyënga ndegombre soyënga bëtsemnama, ntšamo bënga chábeñe jtsošbuáchiyama tmonjanontšé ora monjanamcá.

<sup>15</sup> Ntšamo Bëngbe Bëtsabe uabemana palabrënguiñe endayancá:

Mënté tšëngaftanga ntšamo Bëngbe Bëtsá tojtsichamcá šmojouenëse,

ndoñe šmattsama, Bëngbe Bëtsabe buayenana soyënga ainaniñe ndoñe chaondómashënguama,

mo chë entšanga ndoyena luaroca Moisésoftaca imojëftsemnëngcá, Bëngbe Bëtsabe contra nyetsca soyënguiñe imojtsemna ca.

<sup>16</sup> ¿Y ndëmuanyënga imojamna, chë Bëngbe Bëtsá tojanëyancá tmojanuenentšana, nyetsca soyënguiñe chabe contra imojt-sanmëna? Co chë Moisésbeyeca Egiptocana tmojánbocanënga.

<sup>17</sup> ¿Y ndëmuanyëngaftaca Bëngbe Bëtsá etonaná canta bnëtsana uatëntscuana yojtsemna? Co chë bacna soyënga tmojanmëngaftaca, ndëmuanyënga entšanga ndoyena luaroca tmojanóbana y chëngbe cuerpo chentše tojanoquedá.

<sup>18</sup> ¿Y ndëmuanyënga tojanëyana, mo nda cuafjajuracá, chënga ndocna te mochjëftsanashjache chë cháftaca jóchnama uámana luaroye jashjanguama ca? Co chë ndëmuanyënga ntšamo cha tojanmandacá ndoñe tmonjanmënga.

<sup>19</sup> Y ndegombre, bënga montsobena jinýama chënga ndoñe tmonjëftsanashjache chë cháftaca jóchnama uámana luaroye jashjanguama, Bëngbe Bëtsábeñe ndoñe imontsošbuaché causa.

## 4

<sup>1</sup> Chýyeca, bënga chë Bëngbe Bëtsáftaca jóchnama uámana luare jashjáchama cabá imobenëntscuana, ntšamo cha šojanašebuachenacá cachcá mëntscoñama iuëtsemna, puerte cuedado mochtsebomna, nderado ndánaca tšëngaftanguentšá ndoñe nanjobenaye chca jashjáchama.

<sup>2</sup> Er bëngnaca chë tšabe noticiënga tmonjouena, cachcá chë Bëngbe Bëtsabe buayenana soyënga chëngbe ainaniñe ndoñe chaondómashënguama tmojanmëngcá; pero chënga chë buayenana soyënga tmojanuena ora, ndocna tšabe soye chëngbeñe tonjanopasá, er chca tmojanuena ora, chë palabrënguiñe ndoñe montsanošbuaché.

<sup>3</sup> Pero bënga, chë Jesucristbeñe tmojošbuachengna, mochanjobenaye chë jóchnama uámana luaroye jashjanguama, chë ndayama Bëngbe Bëtsá tojánayana, chë tempo chábioye chca tmojtsanábotengbiamana cha mëntšá tojánayana ora:

Chýyeca, atše chëngaftaca etonaná, sënjánayana mo nda cuafjajuracá,

ndegombre chënga ndoñe mochjëftsashjache chë jóchnama uámana luaroye jashjanguama ca.

Pero cha chabe trabajo tojanpochocá, quem luare tojanma ora;

<sup>4</sup>er Bëngbe Bëtsabe uabemana palabrënguiñe cánýentše mëntšá endayana, chë canýsëfta tianoye ndayá cha tojanmama:

Bëngbe Bëtsá nyetsca trabajëngama tonjanochná chë canýsëfta tianoye ca.

<sup>5</sup> Y cachentše Bëngbe Bëtsabe uabemana palabrënguïñe endayana, chë tempo chábioye chca tmojtsanábotengbiamá:

Chënga ndocna te quemocháisashjache chë átšeftaca jóchnama uámana luaroye jashjanguama ca.

<sup>6</sup> Chë entsanga monjamna chë natsanënga chë tšabe noticiënga jouenama, pero chë Bëngbe Bëtsáftaca jóchnama uámana luare ndoñe tmonjëftsashjache, ntšamo cha inabošcá chënga ndoñe tmonjanma causa. Chcasna, cabá ndegombre endëtsomñe báseftanga, chë Bëngbe Bëtsá tojánayana soyënguïñe tmojtsošbuáchenga, mochjëftsashjache chë Bëngbe Bëtsáftaca jóchnama uámana luaroye jashjanguama.

<sup>7</sup> Chë entsanga ndoyena luaroca, Bëngbe Bëtsá entsanga tojánachembo chë cháftaca jóchnama uámana luaroye chámuamashjnama, y chentšana ba uatëse cha cachiñe canye tempo tojuinñaná, chora entsanga chamobenama chë cháftaca jóchnama uámana luaroye jashjajnama, chë cha “mënté ca” tojanabaye tempo. Cha chca tojanma Davidbiajana jóyebuambayëse, David Bëngbe Bëtsabe uabemana palabrënguïñe mëntšá tojánayana ora:

Mënté tšëngaftanga, ndayá Bëngbe Bëtsá tojtsichamcá šmojouenëse,

ndoñe šmattsama, Bëngbe Bëtsabe buayenana soyënga ainaniñe ndoñe chaondómashënguama ca.

<sup>8</sup> Josué, Israeloca entsanga Canaán fshantsëngoye yojtšënachaye ora, chë Bëngbe Bëtsáftaca jóchnama uámana luare jtsebomnama cha choca matëñjanmëse, Bëngbe Bëtsá bayté chentšana, David yojëftsiyena ora, inye tempuama ndoñe matëñjanoyebuambá, chë ndaye ora entsanga muanjobenaye chë cháftaca jóchnama uámana luare jashjáchama.

<sup>9</sup> Y chca, cabá endmëna canye uámana luare ndayentše Bëngbe Bëtsabe entsanga mochjobenaye cháftaca jóchnama, ntšamo Bëngbe Bëtsá tojanochnacá, chë quem luare jamama nyetsca trabajënga tojanpochocá ora;

<sup>10</sup> er nda tojashjache chë Bëngbe Bëtsáftaca jóchnama uámana luaroye jashjanguama, cha jóchnana chë Bëngbe Bëtsá tbojanmandá jamama trabajëngama, ntšamo Bëngbe Bëtsá tojanochnacá, chë quem luare jamama nyetsca trabajënga tojanpochocá ora.

<sup>11</sup> Chíyeca, šontsamna lempe ntšamo tmojobenacá jamana chë jóchnama uámana luare jëftsashjáchama, ntšamo chë Bëngbe Bëtsábioye ndoñe tmonjanoyeunangcá ndocná chaondëtsamama, y chë causa chënga chë soye ndoñe tmonjëftsashjache.

<sup>12</sup> Er Bëngbe Bëtsabe palabra endmëna mo canÿe aina soycá, nÿets tempo entsángbiøye ndayánaca jtsabuátambayana, y bëtsá jamana corente obenánaca, y ndocna te nÿe bonamente chë palabra jóyebuambayana. Mo chë nÿets utoicajana más efšana espadëjaquécá, jobenayana puerte jashenoye jatëtšana canÿe cuerpo tcojatëtše ora, cachcá y cabá puerte más Bëngbe Bëtsabe palábraca, cha bënga jinÿanÿiyana ntšamo bënga nÿe bëngbe ainaniñe tmojtsejuabná y tmojtsebošcá, y chë ndocnábioye tmonjinÿinÿé sóynaca; y chë palábraca cha endobena jáuyanana ntšamo bënga tmojajuabó y tmojabošencá aiñe o ndoñe tšabá bëtsemnana.

<sup>13</sup> Ntšamo Bëngbe Bëtsá tojamentsana tondaye quenátopodena chabiamama iytëmenana jtsemnana. Bëngbe Bëtsá lempe bominÿe iuetsequëcñá, y nÿetsca soyëngama y nÿetscangbiamama lempe yotátšëmbo; Bëngbe Bëtsá, ndábioye šojtsamna sempre jojuana ndáyeca canÿe soye chca tmojamama.

*Jesús endmëna chë más uámana bachnangbe bëts amëndayá*

<sup>14</sup> Jesús, Bëngbe Bëtsabe Uaquiñá celoye tojámashëngo, y mora cha endmëna nda chabe delante sempre bëngbiamama ibuëtseimpadana, mo chë bachnangbe canÿe más uámana amëndayacá. Chíyeca, bënga šontsamna sempre chábeñe jtsošbuáchiyana, ntšamo bëngbe ndegombre ošbuáchiyana yomncá, chë ndayama bënga nÿetsca entsángbeñe tmojayana.

<sup>15</sup> Er chë bëngbiamama impadaná, mo bachnangbe canÿe más uámana bëngbe amëndayacá, Jesús, yobena bëngbiamama jóngmiana, bënga inÿe ora ndoñe yapa obenana tmontsebmoma ora, tšabe soye o ndaye sóynaca jamama. Chca endmëna, er Satanás tša yojtsentsena Jesúsbioye ba juabnënga chabotsontšáshjajuanama, jayënjanama bacna soye chaomama, nÿetsca juabnënga ntšamo bëngnaca mondbetsebmomncá, pero Jesús ndocna te ndocna bacna soye tonjëftsema.

<sup>16</sup> As, ndauatjca Bëngbe Bëtsá mochjótšëmbona, mo chábioye cuaftsobecocnangcá; cha canÿe uámana tbemaniñe yojtsetbemana canÿe bëts reycá; chca mochjama, bënga chášualastemama, y bëngbiamama tšabe juabna jtsebmomnëse, chašujabuachama bënga chca chašojtsëjaboto ora.

## 5

<sup>1</sup> Ndëmuanÿe bachnangbe más uámana amëndayánaca jtsemnana entsanguentsana bocacaná, y uabuayaná chëngbe cuenta Bëngbe Bëtsá jaserviama, chábioye juatšëmbonama y bayënga jobáyama Bëngbe Bëtsá jëtschuayama, chca,

Bëngbe Bëtsá chë bacna soyënga entšanga tmojamama cháuaperdonama.

<sup>2</sup> Chë bachna jtsobenana jóngmiana, chë bacna soyënga amëngbiana chama ntsetatšëmbcá, y chë bacna soyënga jamama ingñénënga imomnënga, mo otšenëngcá imomnëngbiana, er cachánaca inye ora ndoñe yapa obenana ntsebomnana, chë bacna soyënga jamama juabnëngama jtocochbuáchama.

<sup>3</sup> Y chíyeca cha jtsemnana bayënga jobáyama Bëngbe Bëtsá juatšëmbonama, ndoñe nye entšángbioye bacna soyëngama cháuaperdonama, ndayá chábioye chaboperdonámnaca.

<sup>4</sup> Ndocná quenátobena cachá quem uámana trabajo jentšetayana, bachnangbe más uámana amëndayá jtsemnana; cha jtsemnana, Bëngbe Bëtsábeyeca uabuayaná chca uámana trabajo jamama, ntšamo ndegombre Aarónoftaca tempo cha tojanmcá.

<sup>5</sup> Cachcá, Cristo ndoñe cachá tonjanenábuayana jtsemnana chë Bëngbe Bëtsabe delante sempre bëngbiana impadaná, mo bachnangbe canye más uámana amëndayacá, ndayá Bëngbe Bëtsá tbojanábuayana chë uámana trabajo jtsebomnana. Cha endmëna nda Jesúsbioye mëntšá tbojaniana:

Aca atšbe Uaquiñá condmëna.

Mënté entšanga sënjinñanyé aca atšbe Uaquiñá comnana ca.

<sup>6</sup> Y inyocnaca, Bëngbe Bëtsabe uabemana palabrenguiñe mëntšá tbojaniana:

Aca nyetsca tescama canye bachna condmëna,

canye bëts bachna ntšamo Melquisedec yojamncá ca.

<sup>7</sup> Jesús quem luarentše yojëftsiyenëntscuana, cha juayebuáchëse y shëchbuíyeca Bëngbe Bëtsáftaca ibnécuentaye y ibnaimpadana, cha chë jobanámentšana jatsbocama yojanobená; y Jesús ntšamo Bëngbe Bëtsá yojanbošcá tojánmayeca y tša respeto chabiana bómnayeca, chábioye tbojanoyeuná.

<sup>8</sup> Chca, Cristo masque Bëngbe Bëtsabe Uaquiñá inamna, jasúfriase tojanábouinye ntšamo jamana ndayá Bëngbe Bëtsá tojtsebošcá.

<sup>9</sup> Chca, Bëngbe Bëtsá chábioye tbojánbema lempe ntšamo entšanga tmojtsajabotcá, nda chëngbe bacna soyëngama cháuatsebacama; chentšana cha, Cristo, tojanma lempe ntšamo yojaniytcá, nyetscanga chë entšanga chábioye imojánëyeunanënga chamotsobenama nyetsca tescama atsebácanënga jtsemnana;

<sup>10</sup> y Bëngbe Bëtsá tbojanábuayana, chë chabe delante sempre bëngbiana impadaná, mo bachnangbe canye más uámana



amëndayacá chaotsemnana, canye bêts bachna ntšamo Melquisedec yojamncá.

*Resjo endmëna, ošbuáchiyana jtsajbanana*

<sup>11</sup> Bëtscá entsemna quem palabrama jóyebuambayama, pero chë soyënga jayanama ntšamo tšëngaftanga catafjosertaycá, ndoñe paselo quenátsmëna, er tšëngaftangna nya uenana Bëngbe Bëtsabe soyëngama jósertana.

<sup>12</sup> Tšëngaftanga ya bayté Jesucristbe soyëngama šmotátšëmboyecá, tšëngaftanga cmontsamna ya jtsobenana ínÿengbioye chë soyënga jtsabuátambayana; pero tšëngaftanga cmontséjaboto ndánaca Bëngbe Bëtsabe soyëngama cachiñe chacmëtëtabuayená, chë jtsošbuáchiyama šmojontsé ora natsana jshauatsjínÿana soyëngama. Y chca, tšëngaftanga šmojobiama mo šešonatemëngcá, jtsëjabótana létšiyé jofšiyana y ndoñe jobenayana jasana chë jabmuánama ndoñe paselo tontsemna soyënga.

<sup>13</sup> Chë nyetsca soyënguiñe ntšamo tšabá yomncá jtsamama buatëmbana soyënga ndoñe tontsabuatmá cha, jtsemnana mo canye šešonatemcá, nda vida jtsebomnana nÿe létšiyé jtseftmanëse.

<sup>14</sup> Pero chë tmojtsobena jajuaboyana y jtsetatšëmbuana ndayá tšabá yomna o ndayá ndoñe tšabá jamama, chca jtsamëse tmoyenamna, chënga jtsemnana mo bëtsëtsangcá, ndëmuanÿenga ndayánaca jasana, chë ndoñe paselo jabmuánama soyëngnaca.

## 6

<sup>1</sup> Chcasna, bënga šontsamna jtsajbanana nÿe jésebošana jtsatsjëndayana Cristbe buatëmbana soyënga, chë bënga chábeñe jtsošbuáchiyama tmojanontsé ora tmojanatsjinÿe soyënga, y šontsamna jtsatsjëndayana chabiama nyetsca soyënga, más totcá josértama yomna soyënga. Chca, bënga mochántsemna mo chë bëtsëtsangcá, ndayánaca jtsesayana. Ndoñe más nÿe chë natsana buatëmbana soyëngama mattsatsjëndaye, mo chë ndayá yomna bacna soyënga jtsamana y chë bënga ndoñe vida ntsebomnana junatsana soyënga amana jtsajbanana, y chë tšabe benache jtishachana; o ntšamo Bëngbe Bëtsábeñe jtsošbuáchiyana;

<sup>2</sup> chë juabáyana ndayá yomna; chë ínÿabe bestšašiñe cucuatšënga jacjayana Bëngbe Bëtsábioye chabiama jaimpádama; chë obanënga jtayenama Bëngbe Bëtsá yochjamama; y mocna ora ntšamo entšanga tmojamama Bëngbe Bëtsá yochjayanama, chënga chë nyetsca tescama yomna tšabe vida chamotsebomnana o nyetsca tescama castigánënga chamotsemnana.

<sup>3</sup> Y bēnga chca fchanjama, chē más totcá yomna josértama soyēnga jtsabuátambayana, Bēngbe Bētsá chca chašojálesenciase.

<sup>4</sup> Ndēmuanŷenga, canŷe ya chē Bēngbe Bētsabe ndegombre soyēnga tmojanóŷengacñe, y chē Bēngbe Bētsabe ba tšabe soyēngnaca, chábenga bétsemnama, y chē Uámana Espíritu chēngbe ainaniñe chaotsemándama imobomna,

<sup>5</sup> y chē Bēngbe Bētsá ntšamo tojašebuachenacá sempre inétsamama tmojinŷe, y ndēmuanŷenga tmojáninŷe Cristo jt-samana bēts soyēnga chabe bēts obenánaca, chē ndaye obenánaca cha puerte bēts soyēnga yochjama cha quem lu-aroŷe yochjésabo ora,

<sup>6</sup> chēnga Jesucrístbeñe ošbuáchiyana lempe tmojtsajbanase, tondaye quenátsmēna ndayá jamama cachiñe Bēngbe Bētsábioŷe jtobéconama; er Bēngbe Bētsabe Uaquiñá chca stētsoŷe jaquédana, y jtsemnana mo Bēngbe Bētsabe Uaquiñábioŷe cachiñe chēnga tmojtsecrucificacá, y entšanga cachiñe cha chamotsáboŷejuanama chēnga cuafjamcá.

<sup>7</sup> Smochjinŷe: fshantse jamana chē ba uafténēnga chiñe chaómashēnguama, y chē chiñe trabájayēngbiama bētscá jaja sananga tojóboŷnēse, Bēngbe Bētsá jamana, chē fshantsentšana bētscá tšabe soyēnga entšangbiama chaotsebínŷnama.

<sup>8</sup> Pero nŷe uchmašēshangá y matēnga uchmēfjangaca chiñe tojuábocnēse, chē fshantse tondaye ntsámanana; y nderado Bēngbe Bētsá nanjama chiñe ndocna tšabe mata chaonduábocnama, y cabana, entšanga chiñe mochantsashaniñá. Cachcá, chē ošbuáchiyana tmojtsajbananga castigánēnga mochántsemna.

*Bēngbe Bētsábeñe sempre chamotsobátmanama y ainaniñe bētscá añemo chamotsebomnama*

<sup>9</sup> Pero masque chca montsoyebuambná, atšbe bonshánēnga, bēnga tšabá fséndétatšēmo tšēngaftangebeñe chē más tšabe soyēnga echántsemna, chē atsbocaná jtsemnana tojtsá cha yobomna soyēnga.

<sup>10</sup> Er Bēngbe Bētsá sempre ntšamo tšabá yomncá nŷetsca soyēnguiñe jtsamana, cha ndegombre echántsejuabnaye ndayá tšēngaftanga šmojamama, y chē chabiama šmojinŷinŷe bonshánama, chabe entšangbioŷe jtsējabuáchanēse, ntšamo mórnaca šmojtsama.

<sup>11</sup> Pero bēnga fséntseboše, cada ona tšēngaftanguentšá, nŷets tempo y Jesús chaojésabēntscuana chaotsinŷanŷná corente yoboše chca jtsamana, Bēngbe Bētsábeñe chca jtsošbuáchiŷe, chábeñe sempre chašmotsobátmanama, tšēngaftange tšabiama cha chaomama.

12 Ndoñe queftsátsboše tšëngaftanga oyënjayënga chašmotsobiamama chë Bëngbe Bëtsá tcmojabanyé trabajo jtsamama, ndayá Jesucristbeñe ošbuáchiyana bomnëngcá y padecena soyënguñe uantado mënëngcá šmochtsama. Chca, chënga mochanjóyëngacñe ndayá Bëngbe Bëtsá jatšatayama tojašebuachenacá, chabe entšanga bëtsemnana.

13 Bëngbe Bëtsá Abrahámbyoye tbojanšbuachená ora, chca tbojanियana cachabe uabaina jayanëse, er inya chabiamama más uamaná ndoñe yontsemna ndabiamama jajúrama, ntšamo tbojanšbuachenacá ndegombre chaotsemnana;

14 cha mëntsá tbojanšbuachená: “Añe, atše chanjama aca bëtscá tšabe bendicionënga chacotsebomnana, y chanjama acbentša pamillentsana mallajta entšanga chamotsemnana ca.”

15 Y chca, Abraham Bëngbe Bëtsábeñe jtsošbuáchiyëse, puerte uantadiñe yojanobátmana ntšamo tbojanšbuachenacá Bëngbe Bëtsá yochjanmama, y pronto chca tojanóyëngacñe.

16 Entšanga tmojajurá ora, chca jamana chëngbiamama canye puerte más uámanabe uabaina jayanëse, y chca chëngbiamama más uamanabiamama tmojajurá ora, jtsayanana ntšamo tmojašbuachenacá pronto mochjamama, y chcasna, chama ya ndoñe más ntjatenátsëtsnayana.

17 Y chca, Bëngbe Bëtsá tojánbošena botamana jinyanjyiyana, ntšamo cha tojanašebuachenacá mochjanoyëngacñëngbyoye, ntšamo tojanašebuachenacá cha ndegombre yochjanmama, y ndocna te chë ntšamo jamama yojanjuabnacá yochjantrócama. Chíyeca, botamana tojaninjanjyë cha chca yochjanmana, cachabiamama jajúrase, chë ntšamo tojanašebuachenacá yochjanmama ndegombre bëtsemnana.

18 Bëngbe Bëtsabe šbuachenana soye y chama jinyanjyiyama ntšamo tojanayancá, ntšamo tojanašebuachenacá ndegombre yochjanmama, chë uta soye ndocná ntsoobenana jatrócama; y chca tojayana ora, ndoñe ntsopodénana Bëngbe Bëtsá chaobená jobostérama. Y chca, chë uta soyama, bënga bëtscá añemo ainaniñe jóyëngacñana, bënga chë Bëngbe Bëtsábyoye tmojobéconanga, cha chásuatsebacama y chašotsanjenama, mo canye bëtš resjuentsana tmojtsachetëngcá, ntšamo chentšana atsebácanënga jtsemnana cuaftsenguacá. Bëngbe Bëtsá šojáuyana bënga imojtsobena chábeñe jtsobátmanama ca, y bëtš añémoca chábeñe jtsošbuáchiyëse, cha yejuana šochtsanjenama mondobátmana.

19 Mo ntšamo chë bėjaye asentoca cuedádoca tcojajajo anclama, chë barcuñe enjaquenënga tšabá jtsetatšëmbuana chë barco ndoñe yochántsashatijynama, cachcá bëngnaca,

Bëngbe Bëtsábeñe imobátmanama, montsobena ainanoca jtsetatšëmbuana lempe tšabá yotsomñama. Bënga Jesucrístbeñe mondobátmana, y Bëngbe Bëtsá yojtsemnoye celoca cha tojámashëngo y chabe delante entsemna mo chë bachnangbe más uámana amëndayacá. Chana jamashënguana chë Bëngbe Bëtsabe bëts yebnoca, “chë más uámana ca” uabaina luaroye, entšëjua ujonýana stëtsoica, Bëngbe Bëtsabe delante jtsemnana,

<sup>20</sup> ndayentše Jesús celoca, Bëngbe Bëtsabe delante tojámashëngo bëngbe tšabiamama soyënga jamama, bëngnaca chamobenama chabe delante jamashënguama; chca, Jesús tojanóbema chë bachnangbe más uámana amëndayá nýetsca tescama, canýe bëts bachna ntšamo Melquisedec yojamncá.

## 7

*Jesús, canýe bëts bachna ntšamo Melquisedec yojamncá*

<sup>1</sup> Quem Melquisedec yojamna Salem puebloca rey y bachna chë celoca Bëngbe Bëtsabiamama; Bëngbe Bëtsá, chë nýetscangbiamama más uamaná. Abraham chë reyënga y chëngbe soldadëngaftaca imojentsjaná y tojanayënjaná chentšana yojtsatabó ora, Melquisedec tojánbocna cha jajëbenguama, y chora Bëngbe Bëtsábioye tbojanimpadá, Abraham bëtscá tšabe bendicionënga chaotsebomnana chaomama.

<sup>2</sup> Chora Abraham chábioye tbojanatšetá, chë reyëngaftaca imojentsjaná ora, lempe tojanosháchiñentšana, bnëtsanentšana canýe soye. Chë palabra Melquisedec endayana “nýetsca soyënguiñe tšabá ama rey ca”; y chánaca yojamna Salem puebloca rey, y chca endayana “nýetscanga natjëmbana chamotsiyenama ama rey ca”.

<sup>3</sup> Chabe pamíllangbiamama tondaye quenatótatšëmbo; chca cha endmëna mo ni taitá ni mamá ndoñe endbomnacá, ni bëts taitanga. Tondaye quenatótatšëmbo ntseco tojanonýnama, ni ntseco tojanóbanama; chca, inýe soyënguiñe cha yojamna mo Bëngbe Bëtsabe Uaquiñacá, y endmëna mo nýetsca tescama bachna cuaftsemncá.

<sup>4</sup> Y mora, šmochjájuaboye tša uamaná Melquisedec inamnama, er bëngbe tempsca uámana bëts taitá Abraham chábioye tbojanatšetá, chë reyëngaftaca imojentsjaná ora lempe tojanosháchiñentšana bnëtsanentšana canýe soye.

<sup>5</sup> Ntšamo Moisesbe leyíñe endëmandacá, chë bachnangbe más uámana amëndayá Leví, Aarónënaca ca uabainabe pamillentsana tmomna bachnanga, jtsamnana chë Israeloca entšangbioye nýetsca chë tmobomna soyënguentsana bnëtsanentšana canýe soye jtsayëngacayana; y chca jtsamnana masque chë entšanga cachëngbe pamillentsënga tmomna y Abrahábentšana pamillentsëngnaca.

6 Pero Melquisedec, masque Aaronbe pamillentšá ndoñe yonjamna, Abraham, chë ntšamo Bëngbe Bëtsá tbojanšbuachenacá tojanóyëngacñabentšana, cha tojanóyëngacñe nyetsca soyënguentsana bnëtsanentsana canye soye, y Bëngbe Bëtsábioye tbojanimpadá, Abraham bëtsá tšabe bendicionënga chaotsebomnama chaomama.

7 Y ndocná quenátobena jayanama ndoñe ndegombre yondmëna ca, chë Bëngbe Bëtsábioye impadaná inyabiama tšabe soyënga chaomama, más uamaná inëtsemna chë chca tojóyëngacñabiama, inya chabiama Bëngbe Bëtsábioye tbojaim-padá ora.

8 Quem tempo, bachnanga mochjóbanënga, entšángbioye jtsayëngacayana nyetsca chë tmobomna soyënguentsana bnëtsanentsana canye soye, pero chë Bëngbe Bëtsabe uabemana palabra, Melquisedecbiana endoyebuambná cha mo canya cabá ainá totsomñá.

9 Y bënga montsobena jayanama, Abraham Melquisedécbioye chë nyetsca soyënguentsana bnëtsanentsana canye soye tbojanoyé ora, yojamna mo Leví, chë nyetscángbioye nyetsca soyënguentsana bnëtsanentsana canye soye ayëngacayá, Melquisedécbioye chca cuaftopagacá;

10 er cha Abrahambe pamillentšá inamna. Melquisedec yojtsabó ora y chábioye chë lempe tojanosháchiñentsana bnëtsanentsana canye soye Abraham tbojanatšetá ora, yojamna mo nyetscanga, chë Abrahábentšana entšanga más chcoye mochtsaniyenënga, chëngnaca chë bnëtsanentsana canye soye cuafjajajocá, masque Abraham chca tojanma ora, Leví y chë Abrahábentšana inye entšanga cabá ndoñe tmonjanonyná.

11 Israeloca entšanga Moisesbe ley tmojanáyëngaca, chë bëts taitá Levibe pamillentšënga bachnanga imojamnënga Bëngbe Bëtsá imojtseservena ora, y chënga monjamna Aarónbentšana entšanga. Ntšamo chë leyiñe yomandancá imojánamënga perdonánënga jtsemnama y Bëngbe Bëtsabe bominyiñe tšábënga jtsemnama quem bachnanga jamama matmënjanobenase, ndoñe manjanëyta Bëngbe Bëtsá inye bachna chabuatschembuama, nda ndoñe yonjamna mo chë bëts bachna Aaroncá, ndayá ntšamo chë bëts bachna Melquisedec yojamncá.

12 Er, canye bachnanga Bëngbe Bëtsábioye jtseservënama tmojajbaná y inye bachnanga chábioye jaserviama tmojatontšé ora, jtseytana chë natsana bachnanga imojanoservena ora mándaye leyëngnaca jtsetrócama.

13 Bëngbe Utabná, ndabiama quem soyënga jtsóyebuambnayana, ndoñe Aaronbe pamillentšá quenjatsmëna, ndayá inye pamillentšá, y quem pamillentša

entšanga ndocna te bachnangcá Bëngbe Bëtsá tmonjanservé, chë altar ndirichiñe Bëngbe Bëtsabe bëts yebnocá.

14 Er nÿetscanga mondëtatšëmbo Bëngbe Utabná Judabe pamillentsana bëtsemnama, y chë pamíllama Moisés ndocá tonjánayana, Bëngbe Bëtsá mo bachnangcá chënga jtseeservénama.

15 Y ntšamo tmojayancá montsobena más tšabá josértana, er chë tsëm bachna Cristo yojamna canÿa mo Melquisedec yojamncá.

16 Cha bachna yojamna, ndoñe chë bachnanga chabe pamillentsana jabocanama yojánamnama canÿe ley tojánayanayeca, ndayá nÿetsca tescama jëftsiyenama cha inobénayeca.

17 Er mëntšá endmëna, ndayá Bëngbe Bëtsá chabiamá tojánayana:

Aca bachna nÿetsca tescama condmëna, canÿe bëts bachna ntšamo Melquisedec yojamncá ca.

18 Cha tojánabo ora, Bëngbe Bëtsá tojanma chë nda bachna jtsemnama y ntšamo joserviama mandënga chaotsopochocama, er chë mandënga ndoñe ntjobenayana entšanga jujabuáchama atsebácanënga jtsemnama, y chca, chëngbiamá ndoñe bëtscá yonjanoserverna.

19 Er Moisesbe léyeca, entšanga ndoñe tmonjanobená Bëngbe Bëtsabe bominiñe tšábenga jtsemnama, pero mora chama canÿe corente más uámana soye montsebomna: Jesucristbeñe jtsošbuáchiyëse, chábeñe montsobátmana Bëngbe Bëtsáftaca tšábenga chášubiamama, y chca, Bëngbe Bëtsábioye bënga jtobéconama.

20 Y Bëngbe Bëtsá lempe chca tojanma, cachabiamá jajúrase, lempe ntšamo cha tojanayancá ndegombre chaotsemnama. Chë inÿe bachnanga, chë Aaronbe pamillentsëngbioye tmojanëbuáyana ora, Bëngbe Bëtsá ndoñe chca tonjánayana,

21 pero mo bachncá chaoservema Bëngbe Utabnábioye tbojanábuayana ora aíñe; cach Bëngbe Bëtsabiamá jajúrase, Bëngbe Utabná canÿe bachna yochtsemna ca tojánayana. Ntšamo Bëngbe Bëtsabe uabemana palabrénguiñe endayancá:

Bëngbe Utabná Bëngbe Bëtsá, Jesucristbioye tbojaniyana, cachabiamá jajúrase, ntšamo tojanayancá ndegombre chaotsemnama,

y juabna ndoñe ntjatrócama:

“Aca bachna nÿetsca tescama condmëna ca.”

22 Bëngbe Bëtsá chca tojánayanama, Jesúsbeñe bënga corente mondëtatšëmbo, ndayá Bëngbe Bëtsá bëngbiamá jamama tojanašebuachenacá, chë Jesúsbioye bëngbe bachna chaotsem-

nama juabuáyanana, más tšabá yojtsemna chë ndayá tempo cha chabe entšangbiana tojanašebuachená soyama.

<sup>23</sup> Chë inye bachnanga banga imojamna, er ndocná yonjanobena Bëngbe Bëtsábioye nyetsca tescama chca jtseservénana; cada ona básefta uatëngama tojëftsanoservé, tojanóbana y ínÿabioye chë trabajo jatontšabuáchana.

<sup>24</sup> Pero Jesús ndocna te ntjobanámayecna, cha mo bachnëcá Bëngbe Bëtsábioye nyetsca tescama bochjëftseservena, y ndocna te chabe trabajo ínÿabioye bochanjëftsinyinÿiye, chë inÿa cachcá jtsamama chauatontšema.

<sup>25</sup> Chíyeca, cha yobena nyetsca tescama játsebacana ndëmuanÿenga chábeyeca Bëngbe Bëtsábioye tmojobeconá, er nyetsca tescama cha echanjëftsiyena Bëngbe Bëtsábioye chëngbiana jtseimpadánama.

<sup>26</sup> Chcasna, Jesús ndegombre endmëna lempe ntšamo bënga imuajabotcá nda Bëngbe Bëtsábioye bëngbiana chabotseimpadánama, mo chë bëngbe bachnangbe más uámana amëndayacá. Cha sempre uamaná endmëna, ndocna te ni mo canÿe juabna ínÿabe contra yonjábomna, ainaniñe ndocna bacna juabna yonjábomna, chë bacna soyënga amënguentsana luaroca mëná, y Bëngbe Bëtsá tojanma celoca más bëtsá y obená nyetscangbiana cha chaotsemnama.

<sup>27</sup> Cha ndoñe bonjanájaboto canÿe te y inÿe te bayënga jtsebánayana, Bëngbe Bëtsá chabe bacna soyëngama chaboperdonama y chë bacna soyënga entšanga tmojanmámna, mo chë inÿe bachnangbe más uámana amëndayënga mondbetsamcá, cachëngbiana y chë judiëngbiámna. Cha tojanma lempe ntšamo yojaniytcá canÿe soye y nyetsca tescama, entšanga bacna soyënga tmojanmama perdonánënga chamotsemnama. Cha chca tojanma, chabe derecho vida jt-sobomñama cachcá tojanonÿná ora; y tojanóbana entšanga chamotsobenama perdonánënga jtsemnama.

<sup>28</sup> Ntšamo Moisesbe leyinÿe yojanmandacá, chëngbiana mo chë bachnangbe más uámana amëndayëngcá tmojanëbuáyana entšanga inÿe ora bacna soye amënga; pero Bëngbe Bëtsá cabá chë ley entšangbe cucuatšinÿe tojanáboshjonentsana baytese, cha chabe Uaquiñábioye chë bachnangbe más uámana amëndayacá tbojanábuayana, cachabiana jajúrase, ntšamo tojanayancá ndegombre chaotsemnama. Bëngbe Bëtsá tojanma chë Uaquiñá chaotsemnama lempe ntšamo entšanga tmojtsajabotcá, nda cháuatsebacama, ndocna te bacna soye ndamá, ni ainaniñe bacna juabnënga ndbomná.

## 8

*Cristo, nda jóbanëse tojanma entšanga Bëngbe Bëtsáftaca mo*

*canÿacá chamotsemnana*

<sup>1</sup> Chë más uámana soye ndayama bēnga montsichamo, chë Cristo mo bachnēcá yomnana montsoyebuambná ora, entsemna: Bēnga chábeñe imojtsebomna canÿa nÿetsca tescama Bēngbe Bētsabe delante bēngbiana impadaná, mo chë bēngbe bachnangbe más uámana amēndayacá, Bēngbe Bētsabe catšbioica yojtsetbemana jtsemándayama, y Bēngbe Bētsá chë más uámana tbemanentše.

<sup>2</sup> Chë inÿe bachnanga Bēngbe Bētsabe bēts yebnentše tmojánamashjna chë “más uámana ca” uabaina luaroye, Bēngbe Bētsabe delante jtsemnana; pero chë luare celoca ndayentše nÿets tempo Cristo mo chë bachnangbe más uámana amēndayacá yoserverna, entšanga ndoñe chca tmonjanpormá, ndayá Bēngbe Bētsá.

<sup>3</sup> Nÿetscanga chë bachnangbe más uámana amēndayēnga tmojanēbuáyana, entšangbiana soyēnga y tmojóba bayēnga Bēngbe Bētsábioye juatšēmbonama, chēngbe bacna soyēngama perdonánēnga chamotsemnana; chíyeca, jtseytana Jesucristo ndayánaca chaotsebomnana, Bēngbe Bētsábioye juatšēmbonama.

<sup>4</sup> Cha quem luarentše tojtsetrabájase, cha ni mo bachna ndoñe nántsemna, er muentše ba bachnanga mondmēna, y chēnga ba soyēnga jamana Bēngbe Bētsábioye jētschuayama, ntšamo jamama Moisesbe leyíñe yomandancá. Y chca, ndoñe nantseyta cha chca chauatoservénama.

<sup>5</sup> Chë inÿe bachnanga imobomna luarēnga Bēngbe Bētsá jadórama, y ndaye soyēngaca chēnga Bēngbe Bētsá imoserverna, ndoñe cachcá yontsemna chë ndayentše Jesucristo celoca yoserverna luarcá, ni ntšamo cha yoservencá; nÿe batšatema bēngbioye šuinÿanÿná ntšamo chë celoca luare yomnana, ndayentše Cristo mo bachnēcá yoserverna. Y bēnga mondētatsēmbo quem luarentše chë soyēnga chca yomnana, er chë Bēngbe Bētsábioye jadórama yebna, chë jatsjacama opodena yebna Moisés japórmama ora, Bēngbe Bētsá mēntšá tbojaniana: “Cuedado cochtsebomna chë atšbiana yebniñe nÿetsca soyēnga jamama, ntšamo tcbonjaninÿinÿecá chaco-mama, chë tjoca bonjamna ora ca.”

<sup>6</sup> Pero bēngbe bachnangbe más uámana amēndayá Cristo, tojashjache canÿe más bēts trabajo jtsebomnana, ntšamo chë inÿe bachnanga imobomna trabajuama; cachcá, ndayá Bēngbe Bētsá tojayancá Crísoftaca bēngbiana jamama, bēnga tempcá tšabá Bēngbe Bētsáftaca jtsemnana jtsamēse, puerte más tšabá endmēna, chë ndayá tempo chabe entšangbiana jamama tojanašebuachená soyama. Ntšamo mora cha tojayancá puerte más tšabá entsemna, er tojašebuachená más



tšabe soyënga bëngbiana jamama.

<sup>7</sup> Chë Bëngbe Bëtsá natsana tojanašebuachená soyëngaca matëñjanopodé entšanga chamotsamama ntšamo yojanamncá, ntšamo tojanašebuachenacá jóyëngacñama, as ndoñe manjanëyta Bëngbe Bëtsá cachiñe canye trato chauátsbemama entšangbiana.

<sup>8</sup> Pero Bëngbe Bëtsá tojáninye ntšamo yojanamncá entšanga ndoñe tmonjanmama, ntšamo cha tojanašebuachenacá jóyëngacñama, y Bëngbe Utabná Bëngbe Bëtsá chëngbiana mëntšá tojánayana:

Canye tempo echanjóshjango, y chora Israel y Judabe pamillentsa entšangbiana básefta soyënga jamama chanjašebuachená,

chënga átseftaca tempcá tšabá jtsemnama chamotsobenama.

<sup>9</sup> Chë chanjašebuachená soye ndoñe queochátsmëna cachcá ntšamo chë chëngbe bëts taitanga sënjanašebuachená soye enjamncá,

atše chënga sënjanënatse ora, Egiptó luarocana sënjesanëbuacna ora;

pero chëngna, ntšamo jamama enjanamncá, chë sënjanašebuachená soye jóyëngacñama ndoñe chemátanma causa,

atše cachcá chënga sënjesanënyaye ca, Bëngbe Utabná tojánayana.

<sup>10</sup> Chë Israeloca entšangbiana ndayá jamama canye tempo chentšana chanjašebuachená soye,

mëntšá entsemna ca, Bëngbe Utabná tojánayana:

Atše chanjama chë chëngbe juabniñe chaitsemánda soyama chënga chamotsejuabnama,

y chamotseboše jtsamana ndayá chëngbe ainaniñe chaitsemánda soye.

Atše chëngbe Bëtsá chántsemna, y chënga atšbe entšanga.

<sup>11</sup> Chë tempo ndoñe queochátsiyta cányenga ínÿenga chamotsabuátambama,

cachabe luariñe oyenábioye o cachabe pamillentsa entšábioye, atše chë chëngbe Utabná chašmotsábuatmama.

Ndoñe queochátsëyta, er nyetscanga uámanënga y nduámanënga,

corente tšabá atšbe šmochantsábuatma.

<sup>12</sup> Chënga chanjalastemaye y chëngbe bacna soyëngama chanjáperdonaye,

y ndocna te más chë bacna soyënga chënga tmojamama quichátsjuabnaye ca —cha tojánayana.

<sup>13</sup> Bëngbe Bëtsá, chë entšangbiana mora jamama tojášebuachenama tojtsichamo ora, chca jtsemnana, er cha tojama chë tempo entšangbiana jamama tojanašebuachená

soye, mora ya ndoñe chaondëtsoservénama; ndayá mo tanguá soyca tojtsemna y ya ndoñe tontsoserverna, chë soyna nÿe batšatema más y ya jtsopochócana.

## 9

### *Bëngbe Bëtsá jadórama muentša luare y chë celoca luare*

<sup>1</sup> Y morna, ndayá Bëngbe Bëtsá tojanašebuachenama y tojanmandá soyama, mandënga yojamna ntšamo cha jt-sadoránama, y nÿa chabiama pormana yebnentše quem luar-entše.

<sup>2</sup> Chíyeca, Bëngbe Bëtsá tojanmandá chaotsemna canÿe jatsjacama opodena yebna chábioye jadórama, mëntsá: Chë natsana tsañe quem Bëngbe Bëtsabiama yebnentše inauabaina “chë uámana luare ca”; chentše inamna chë canÿsëfta quinÿenëfjuangá castellano candelersëñe, y canÿe mesësha ndayiñe yojacjana chë luarentše Bëngbe Bëtsá bëtsemnama inÿinÿnaye tandëšënga.

<sup>3</sup> Inÿe ujonÿana entšëjua chentšana, inÿe luare inamna; inauabaina “chë más uámana luare ca”.

<sup>4</sup> Chentše inamna chë castellano altar, incienso jajuinÿiyama, y chë cajontema nÿetsiñe castellanoca pormánëtema. Quem cajontema yojaninÿanÿná ntšamo Bëngbe Bëtsá tojanašebuachenacá, chë Israeloca entšanga chabe uámana entšanga yochjánabiamama, y inauabaina “Bëngbe Bëtsabe šbuachenana soye inÿinÿnaye cajontema ca”; y chë tsoye quem soyënga inabomna: canÿe castellano jarrëtema, maná ca uabaina tandëšeca, chë Bëngbe Bëtsá tojanma celocana chabe entšangbiama chaótsatsáma saná; Aaronbe varëfja, chë tojanantšëfjonëfja; y chë ndëtšbé tablëbenga ndayiñe Bëngbe Bëtsá tojanábema chë bnëtsana uámana mandënga.

<sup>5</sup> Chë cajontema juatsboca imnamna chë juatëngmiáša uabomnënga, mo angelëngcá, “querubinënga ca” uabáinënga, y chënga imojaninÿanÿná chë Bëngbe Bëtsabe buashinÿinÿanana chéntšnaca bëtsemnama. Chënga, chë juatëngmiášangaca chë cajontémentša nÿets ústonëtema imojanëtsbotsana; chë ústonëtema inauabaina “entšanga bacna soyënga tmojamama Bëngbe Bëtsá perdonaye luare ca”, er chentše, chë cajontema juatsboca chë bachnangbe más uámana amëndayá jtsamanana buiñe jabuëscjana, chë Bëngbe Bëtsábioye cha ibnaimpadana te, entšanga cháuaperdonama. Pero mora ndoñe quenátšiyta chë soyëngama lempe jatóyebuambnayama.

<sup>6</sup> Lempe chca tmojanprontantšana, chë bachnanga sempre chë natsana luaroye imojánamashjuana, jamama ntšamo Bëngbe Bëtsá tojanamëndacá, chábioye jadórama.

<sup>7</sup> Pero nÿe chë bachnangbe más uámana amëndayá yojobena chë inÿe luaroye jamashënguana, y nÿe canÿe cada uata. Choye jamashënguama orna, cha ibojamna bayëngbe buiñe juabuyambana, Bëngbe Bëtsábioye juatšëmbonama, chca, chë bachnangbe más uámana amëndayá tojanma bacna soyënga Bëngbe Bëtsá chaboperdonama, y chë ntsetatšëmbcá entšanga tmojanma bacna soyëngnaca.

<sup>8</sup> Chca, chë Uámana Espíritu jamana bënga chašósertama, chë natsana luare cabá tojtsemnëntscuana y chë bachnanga cabá chë soyënga chentšë tmojtsamëntscuana, nÿetscanga cabá ndoñe tmonjanobená chë inÿe luaroye jamashjnama, chë “más uámana luaroye”.

<sup>9</sup> Chë soyëngaca jtsopodénana bëngbioye jinÿanÿiyana, chë tempo, chë Bëngbe Bëtsábioye jadórama yebnentšë entšanga uta luare imojábomna ora, ndoñe yonjopodena Bëngbe Bëtsabe delante nÿetscanga jatsmënana, mo chë bachnangbe más uámana amëndayacá. Y chë soyëngnaca jtsayanana, chë Bëngbe Bëtsabiama uátšëmbona soyëngaca y bachnanga tmojanóba bayëngaca, ndoñe tonjanopodé jamana canÿa Bëngbe Bëtsábioye adorayá, Bëngbe Bëtsáftaca tempcá tšabá chaot-satsmënana y Bëngbe Bëtsá chabe bacna soyëngama tbojaperdonama ainaniñe corente chaotsetatšëmbuama.

<sup>10</sup> Chënga, chë uátšëmbona soyëngaca y tmojanóba bayëngaca tmojanma nÿe ntšamo Moisesbe leyiñe yojanayancá, ndayá chiñe yojanlesenciancá, ndayá jasama o jofšiyama, y chë cuerpo jabebiana mo tšabe entšangcá Bëngbe Bëtsabe delante jtsatsmënana; nÿetsca mandënga nÿe cuerpama, pero ainanama tondaye ntjamana. Pero chë entšanga chca yojánamna jtsamana, nÿe Bëngbe Bëtsá inÿe soyënga, más tšabe soyënga jamama tojamandantscuana, chë tsëm trato tojábema ora.

<sup>11</sup> Pero Cristo ya tojánabo, y cha yomna chë Bëngbe Bëtsabe delante bëngbiana impadaná mo chë bëngbe bachnangbe más uámana amëndayacá, chca, bëngbiana chaotsemnana chë tšabe soyënga ntšamo mochjoyëngacñëcá. Chë luare celoca ndayentšë cha Bëngbe Bëtsabe delante mo bachnëcá yotrabája, puerta tšabe luare yomna, y chentšë cha, ndoñe chë quem luarentšë bachnanga imomnëngcá, cha yobena jamana lempe ntšamo Bëngbe Bëtsá entšangbiana jamama inajuabnaycá. Chë luare ndoñe entšangbe cucuátšëca yondëpormana, y chca jtsayanana, quem luarentša soye ndoñe yondmëna ca.

<sup>12</sup> Cha, canÿe y nÿetsca tescama chë luaroye Bëngbe Bëtsabe delante tojánamashëngo ora, cha ndoñe chivo o ternerbe buiñe tonjanabuyamba, ntšamo chë inÿe bachnanga imojuamancá; ndayá jóbanëse, chabe buiñe juabuáshanëse, cha

tojanma entšanga atsebácanënga jtsemnama chamotsobena; y chca tojanmëse, cha tojanobená chë luaroye Bëngbe Bëtsabe delante jamashënguama. Y Cristo chca choye tojanamashënguëse, tojanma bënga chë nyetsca tescama yomna tšabe vida jtsebomnama chamotsobenama.

13 Ndëmuanÿenga ndayámnaca chë leyama tmojanoquedá mo chë Bëngbe Bëtsabe delante ndoñe tšabengcá, chë bachnanga imojuamana chëngbioye toronga y chivëngbe buiñe jabuéscacjana, y chë altaroca tcojajuinÿé ternerabe jatinÿá chëngbioye jatbótotana, chca, chënga jábiamama Bëngbe Bëtsabe delante mo tšabengcá. Chca tmojamentšana, chë bachnanga tmojánayana chënga imojtsobena chë ínÿengaftaca jabama, Bëngbe Bëtsá jadórama, y cachiñe mo tšabengcá Bëngbe Bëtsabe delante imojtsatsmëna ca.

14 Ndayá bachnanga tmojanmcá yojanámana entšanga cachiñe mo tšabengcá Bëngbe Bëtsabe delante imojtsatsmëna ca jayanama; y chca, chë ínÿengaftaca Bëngbe Bëtsábioye jadórama tmojanobenase, jntsetšá más yojtsámana Cristbe buiñe, ndëmuanÿeye tojanábuashana bëngbiamama cha tojanóbana ora! Chë nyets tempo vida bomná Espíritbe obenánaca, Cristo, chabe derecho vida jtsebomñama cachcá tojanonÿá y bëngbiamama tojanóbana. Cha, chë ndocna bacna soye ndbomná, tojanóbana ora yojamna mo canÿe bayá tondaye ndbemaná chë bachnanga cuafjobacá juatšëmbonama, entšangbe bacna soyëngama; cachcá Cristo, chë ndocna bacna soye ndbomná, bëngbe bacna soyëngama jáperdonama tojanóbana. Bëngbiamama tojanóbanayeca, Cristo yobena jamama bënga ainaniñe corente tšabá chamotsetátšëmbo, bacna soyënga bënga tmojamama, chë ndoñe vida jtsebomnama bënga junatsana soyënga, chama bënga perdonánënga imojtsemnama, y chca, bënga montsobena jtsiyenana, Bëngbe Bëtsá, chë ndegombre ainá yomná, jtsetservénëse.

15 Chíyeca, Cristo jóbanëse tojama entšanga Bëngbe Bëtsáftaca cánÿiñe mo canÿacá chamotsemnama, ntšamo Bëngbe Bëtsabe tsëm trato yomncá; y chca cha tojama, Bëngbe Bëtsá chabe entšanga chamotsemnama tojáchembënga perdonánënga chamotsemnama, chë Bëngbe Bëtsabe tempsca tratentša ley jtsocumplínama inamna ora imojoyenëntscuana bacna soyënga tmojanmama; y chëngnaca chamotsobenama chë nyetsca tescama mochtsebomna soyënga jóyëngacñama, ntšamo Bëngbe Bëtsá chabe entšanga tojanašebuachenacá.

16 Ntšamo canÿe testamentiñe tojtsayancá chaopasamna, jtseytana chaotsótatšëmbo chë chca jamama tojašbuachená cha tojóbanama.

17 Canÿe testamento tondaye ntsámanana, chë chca jamama tojašbuachená cha cabá ainá totsomñëntscuana; nÿa cha tojóbana orna aíñe.

18 Chíyeca chë Bëngbe Bëtsabe natsana trato, entsángbeñe tojanoboatsé, chora tmojanóba bayëngbe buiñe jabuéscjëse.

19 Moisés chë leyentša nÿetsca mandënga nÿetsca entsánga tojánabuayenantšana, tojanca buángana boboshëshe y hisopo betiyentša buacuafja, chë ternerënga y chivëngbe buiñe búyesheca enajuabnëyiñe tojanfchequacuá, y chora chë leyënga librëshañe tojanbuéscacja, y nÿetsca entsángbeñnaca.

20 Y mëntšá tojánayana: “Quem buiñe entsinÿinÿná, ntšamo Bëngbe Bëtsá tojamandacá ndegombre yochtsemnana, y tšëngaftangbiana puerte yochtsámanama ca.”

21 Moisésnaca buiñe tojanbuéscacja chë jatsjacama opodena yebniñe, y lempe chentša soyënguiñe, chë ndaye soyënga Bëngbe Bëtsábioye jadórama yojanoservena.

22 Er ntšamo leyiñe iuayancá, yojtsemna nÿa mo nÿetsca soyënguiñe buiñe jabuéscacjana, Bëngbe Bëtsábioye jadórama tšabá chaoservema; y buiñe ndoñe tonjuábuashanësna, ndoñe ntsopodénana entsánga bacna soyëngama perdonánënga chamotsemnana.

*Cristo jasúfriase y jóbanëse, tojanma entsánga bacna soyëngama perdonánënga chamotsemnana*

23 Chíyeca jtseytana chë Bëngbe Bëtsábioye quem luarentše jadórama soyënga, chë bachnanga chamoma, Bëngbe Bëtsábioye jadórama tšabá chaoservema, chë Bëngbe Bëtsábioye jëtschuayama tmojóba bayëngbe buiñeca. Chë soyënga batšatema jtsinÿanÿnayana ntšamo chë celoca luare yomnana Bëngbe Bëtsabe delante, ndayentše Jesús yoservena. Lempe ntšamo chë Bëngbe Bëtsábioye jadórama luarentše yomncá, chabe delante celoca, Jesucristo tojanma, chábioye jadórama tšabá chaoservema; pero chca tojanma más uámana soyënga jamëse, chë tmojóba bayëngaca bachnanga quem luarentše inmëtsama soyëngama.

24 Er Cristo ndoñe tonjánamashëngo canÿe luarentše Bëngbe Bëtsá jadórama nÿe entsángbe pormánentše, ndaye luare nÿe batšatema jtsinÿanÿnayana ntšamo chë celoca luare Bëngbe Bëtsabe delante chábioye jadórama yomnana; ndayá cach celoye tojánamashëngo, Bëngbe Bëtsabe delante luaroye, bëngbiana jtseimpadánama.

25 Chë bachnangbe más uámana amëndayana chë “más uámana luaroye” jamashënguana canÿe cada uata, bayëngbe buiñeca, ndoñe cachabe buiñeca, chca, ndayánaca jamama entsánga bacna soyënga tmojamama perdonánënga chamotsemnana. Pero Cristo chë luaroye celoca ndoñe

tonjánamashëngo, chentšana jtésebcnana, y chabe buiñe juabuáshanëse cachiñe jatóbanama, y ba soye cachcá chauétsemnana.

<sup>26</sup> Chca tojtsemnëse, Cristbiana manjanmëna jasúfriana y jóbanana ba soye, chë Bëngbe Bëtsá quem luare tojanma orscana. Pero ntšamo tojopasacá entsemna, mora chë quem luare jopochócama tempo yojtsobeco ora, Cristo canye y nyetsca tescama tojenonýinýé quem luarentša entsanga bacna soyënga jabuajuánama, chëngbiana jóbanëse, mo entsangbe bacna soyëngama canye tmojóba bayá, Bëngbe Bëtsábioye uatšëmbonacá.

<sup>27</sup> Cachcá, ntšamo nyetsca entsanga jtsamnana nye canye jóbanama, y chentšana Bëngbe Bëtsá chëngbiana jayanana chë imojëftsiyenëntscuana ntšamo tmojanmcá tšabá o ndoñe tšabá bëtsemnana, y chëngaftaca jamana ntšamo chora tojajuabocá,

<sup>28</sup> cachcá, Crístnaca, nye canye chabe derecho vida jtsobomñama cachcá tojanonýá, chabe buiñe juabuáshanëse jóbanama, ba entsanga bacna soyëngama jáperdonama; y chentšana cachiñe yochjésabo, ndoñe bacna soyëngama entsanga jabáperdonama, ndayá chë cha cháuesabama tša tmobátmanëga jabátsebacama.

## 10

<sup>1</sup> Chë Moisesbe leyentša mandënga, ntšamo chë bachnanga yojánamnana Bëngbe Bëtsá jadórama tmojóba bayëngaca y inye soyëngaca, ndoñe ntsinýanýnayana lempe chë Bëngbe Bëtsá chabe entsanga jatsatayana puerta tšabe soyënga, pero aíñe batsatema jtsinýanýnayana ntšamo chë soyënga yochtsemnana. Chýyeca chë mandënga, chë uatšëmbona soyëngaca y Bëngbe Bëtsábioye jadórama tmojóba bayëngaca, ndocna te ntjopódiana jamana chë Bëngbe Bëtsábioye jobéconama tmojtsebošënga, chca soyënga tmojtsamama cada uata nyets tempo, chënga ainaniñe corente chamotsetatšëmbuama chëngbe bacna soyëngama nyetsca tescama perdonánënga imojtsemnana.

<sup>2</sup> Er ndayá tcojtsamama Bëngbe Bëtsabiana uatšëmbona soyëngaca y chábioye jëtschuayama tmojóba bayëngaca, entsanga Bëngbe Bëtsábioye adórayënga, chabe delante tšábënga jtsemnana matmëñjanobenase, chënga chë bacna soyënga tmojanmama ainaniñe ngmënaca ya ndoñe mamëñjëtsemna, y matmëñsanajbaná soyënga amana chë tmojóba bayëngaca.

<sup>3</sup> Pero juatšëmbonama entsanga bayënga tmojóba ora, josérviana entsanga bacna soyënga tmojamama cada uata chamuatenójuaboma;

<sup>4</sup> er chë toronga y chivënga tmojóbanëngbe buíñeca ndoñe ntsopodénana entšángbioye bacna soyënga jabuajuánama.

<sup>5</sup> Chíyeca, Cristo quem luaroye tojánabo ora, Bëngbe Bëtsábioye mëntsá tbojaniana:

Ndoñe tconjábošena entšanga chacmátšëmbona soyënga, ni tmojobaye bayënga,

pero aíñe tcojama atše canye entšacá chaitsemnana.

<sup>6</sup> Ndoñe tšabá quecmátinÿana chë tmojóba y tmojajuinÿé bayënga,

entšanga bacna soyëngama chacotsaperdonama.

<sup>7</sup> As atše Bëngbe Bëtsá sënjaniana: “Bëngbe Bëtsá, muentše sëntsemna,

ntšamo aca icobošcá atše chaimama,

ntšamo acbe uabemana palabrenguiñe atšbiana endayancá, chë ndayá atše chjanmama ca.”

<sup>8</sup> Natsana, Cristo tojánayana, Bëngbe Bëtsá ndoñe tonjánbošena, ni tšabá tbonjaninÿnana entšanga chamuátšëmbona soyënga, ni Bëngbe Bëtsábioye jëtschuayama tmojóba bayënga, ni tmojóba ni tmojajuinÿé bayënga, entšanga bacna soyëngama cha chaotsaperdonama ca, masque chënga chë Bëngbe Bëtsábioye jadórama soyëngaca jamana, ntšamo leyiñe iuayancá ndayá chënga jamama yojtsamna.

<sup>9</sup> Y chentšana, Cristo Bëngbe Bëtsábioye tbojátaniyana: “Muentše sënjabo, chë ntšamo aca icobošcá atše chaimama ca.” Chca, Cristo tojinÿanÿé chë jtsamana soyënga tmojóba bayëngaca, tondaye yonduámana entšanga bacna soyënga jabuajuánama, y entšangbe bacna soyëngama jóbanëse tojaninÿanÿé chë ntšamo Bëngbe Bëtsá yobošcá jtsamana, más iuámana chë inÿe soyënga játamama.

<sup>10</sup> Bëngbe Bëtsá tojama, bënga chabe entšanga y chabe delante tšábenga chamotsemnana, ntšamo Bëngbe Bëtsá yobošcá Jesucristo tojánmayeca, chabe derecho vida jtsobomñama cachcá jonÿayëse y entšangbe bacna soyëngama jóbanëse, canye y nÿetsca tescama.

<sup>11</sup> Judiëngbe nÿetsca bachnanga nÿets tempo ba soye altar-entša natsanoica Bëngbe Bëtsá jtseservénana, y ba soye cachcá jtsamana tmojóba bayëngaca, pero chë soyëngaca ndocna te ntjopódiana entšanga bacna soyënga jabuajuánama.

<sup>12</sup> Pero Jesucristo entšangbe bacna soyëngama tojanóbana ora, yojamna mo canye tmojóba bayacá, Bëngbe Bëtsá entšanga bacna soyëngama cháuaperdonama; nÿe canye y nÿetsca tescama chca tojanma, y chentšana Bëngbe Bëtsabe catšbioica tojtanoítbema, canye uámana puestentše, jtsemándayama.

13 Chentše cha yobátmana, Bëngbe Bëtsá chabe obenánaca Cristbe uayayënga chabe cucuatšíne chamoquedama yoch-jamëntscuana.

14 Er nýe canýe, entšangbe bacna soyëngama cruzoca jóbanëse, Jesucristo lempe tojama, entšanga chë Bëngbe Bëtsábenga jtsemnama chëmbonënga, chabe delante nýetsca tescama tšabengcá chamotsemnama.

15 Y Uámana Espíritnaca, Bëngbe Bëtsabe uabenana palabrenguíne šontsinýanýná chca ndegombre bëtsemnama, mëntšá tojánayana ora:

16 Ndayá entšangbiama chjama, canýe tempo chentšana chanjašebuachená soye mëntšá entsemna ca, Bëngbe Utabná tojánayana:

Atše chanjama chënga chamotseboše jtsamana ndayá chëngbe ainaniñe chaitsemánda soye, y chamotsejuabnama chë chëngbe juabniñe chaitsemánda soyama ca.

17 Y chentšana mëntšá tojánayana:

Ndocna te más quichátsjuabnaye chënga bacna soyënga tmojamama, y ntšamo atše stsebošcá contra soyënga chënga tmojamama ca.

18 Chcasna, Bëngbe Bëtsá nýetsca tescama entšanga bacna soyëngama tojaperdoná ora, ya ndoñe ntjásiytana inýe soyënga más játamama, mo bayënga cuafjobaycá, entšanga bacna soyëngama perdonánënga chamotsemnama.

### *Sontsamna Bëngbe Bëtsábioye jtobéconana*

19 Y chca, Jesucristbeyeca catšátanga, Jesusbe buiñe tojanábuashanama y bëngbiama tojanóbanama, chábeñe jtsošbuáchiyëse, bënga montsobena, tondayama ntjatauatjca Bëngbe Bëtsabe delante jamashënguama.

20 Bënga montsobena jamashënguama chë tsëm benachëjana, Cristo bëngbiama tojamëjana; cha nda inétsama chë nýetsca tescama yomna tšabe vida chamotsebonnama. Mo chë quem luarentse chë bachnangbe más uámana amëndayacá, chë ujonýana entšëjuajana jamashënguana chë “más uámana ca” uabaina luaroye, Bëngbe Bëtsabe delante jtsemnama, cachcá, Cristo bëngbe bacna soyëngama mo entšacá tojanóbanayeca, bëngnaca montsobena Bëngbe Bëtsabe delante luaroye jamashënguama.

21 Bënga mondbomna canýe bëtš bachnangbe más uámana amëndayá, Bëngbe Bëtsabe entšángbeñe jtsemándayama, y cha endmëna Jesús.

22 Chíyeca, Bëngbe Bëtsá jasérvíama ndegombre ainaniñe corente jtsebošëse, y chábeñe puerte jtsošbuáchiyëse,



šontsamna Běngbe Bětsábioye jobéconana. Ntšamo chě bachnángbioye buiñeca tmojanabuešcacjá, Běngbe Bětsabe delante tšabengcá chamotsemnama cha jaserviama, cachcá, Cristbe buiñe juabuáshanese y bėngbiamama jóbánese, bėnga ainaniñe corente montsetátšēmo Běngbe Bětsá nyetsca tescama bėngbe bacna soyėngama šojtsaperdonama. Y bėnga bėjayeca uabainėngnaca mondmėna; chíyeca bėnga jtsobenana Běngbe Bětsábioye chca jobéconana.

<sup>23</sup> Bėnga šontsamna nyets tempo Běngbe Bětsábeñe puerte jtsošbuáchiyana, y ndocna te nye ndayámncaca játajbanana entšángbeñe ichámuana, chě Běngbe Bětsábeñe jtsošbuáchiyese bėnga imobatmana soyėnga cha yochjamama, er chě soyėnga šojašebuachená cha, sempre jamana ntšamo tojayancá.

<sup>24</sup> Bėnga šontsamna janguanguana ntšamo muatjobenaye añemo jenatšetayana, nyetscanga jtsenbobonshánana, y ntšamo tšabá yomncá jtsamana;

<sup>25</sup> pero ndoñe quešnátamna játajbanana, Běngbe Bětsábioye jadórana enefjuanana mo Crístbeñe ošbuáchiyėnga quetsomñecá, ntšamo báseftanga imojtsamcá. Chamna, nyetscanga añemo mochtsenatšetnaye Cristo nyets tempo jtseeservénama, y más mora, chě ndayá imojtsonyama, Běngbe Utabná yochjésabama ya yojtsobecuama montsetátšēmo ora.

<sup>26</sup> Er chě ndegombre soyėngama tšabá tmojátatšēmonentšana y chě soyėnga tmojoyeuná chentšana, bacna soyėnga jtsamėse tmojtsiyena, nye chca jamama tmojtseboše causa, muattsaboté ndayá Cristo bėngbiamama tojanmccá, bėngbe bacna soyėngama cha tojanóbana ora, y ya tondaye nántsemna ntšamo Běngbe Bětsá bėnga jtsaperdónama.

<sup>27</sup> Y chca, ndayá bėnga muattsobena jobátmana soye nántsemna nye chě Běngbe Bětsábioyena castigo, chě ndayama šojtsamna uatjana jtsebomnana; y nye jobátmana chě tempo, ndaye ora Běngbe Bětsá puerte etonaná chabe uayayėnga bėtscá íñesheca yochtsapochóca.

<sup>28</sup> Ndánaca chě Moisesbe leyama tojayana tondaye yon-  
dovalena ca, y útata o únganga chca tmojouena y aífie cha chca tojayana ca chėnga tmojayanese, jtsemnana chě entšábioye jtsóbana, tondaye ntjalastemacá.

<sup>29</sup> Canya, nyets ainánaca Běngbe Bětsabe Uaquiñábioye tbojtsaboté; y tojayana Cristbe buiñe, chě ndėmuanyeye tojanábuashana bėngbiamama tojanóbana ora, tondaye yonduámama ca, ndayá nye ndaye entšabe buiñcá ca, chě buiñe chě ndėmuanyeye šojtsinyanyná ndayá Běngbe Bětsá tbojašebuachenacá bėngbiamama jamama, y ndáyeca Běngbe Bětsá chabe entšanga šojábiamama, cha jaserviama; chě entšá Uámama Espíritbioye tbojójenguango, nda inėtsama bėnga

tšabe soyënga chamotsebomnama; y canya chca amá, çtšëngaftanga ndoñe šmontsejuabná cha ibojtsomerecena Bëngbe Bëtsábiocana canye puerte más uabouana castigo, chë Moisesbe leyama tondaye yondovalena ca tojayanabiamá?

<sup>30</sup> Bënga nyëtscanga mondëtatšëmbo Bëngbe Bëtsá mëntšá tojánayanama: “Atše chanjama chënga chamosufrima, ínÿenga chamosufrima tmojama causa; y chënga chanjácastigaye, ínÿengbioye bacá tmojaborlá causa ca.” Y mëntšánaca tojánayana: “Bëngbe Utabná chabe entsangbiamá echanjayana ntšamo tmojëftsemcá tšabá o ndoñe tšabá bëtsemnama, y chëngaftaca echanjama ntšamo chora chaojajuabocá ca.”

<sup>31</sup> ¡Tša uabouana, Bëngbe Bëtsá chë nyëts tempo ainabe cucuatšíñe joquédana, castiganá jtsemnama!

<sup>32</sup> Pero ntšamo tempo yojamnama šmochtsenójuabnaye, chë ndegombre soyënga Jesucristbiamá cabá chora šmonjanábuatmana ora, y chora tša jenujuérsana cmonjanotocá padecena soyënguñe, y chë causa tša šmojansufri.

<sup>33</sup> Báseftanga tšëngaftanguentsëngbioye entsangbe delante tmojanoyánguango, y ínÿenga tmojanma puerte chašmotsesufrínama; y ínÿenga tšëngaftanguentsënga chca imojansufrinëngaftaca šmojanama, chënga jujabuáchama.

<sup>34</sup> Tšëngaftanga šmojánalastemana chë chënguentsënga cárceloye imojanëtámenënga; y oyejuayënga šmojanlesenciá ntšamo šmojanbomncá ínÿenga chacmotsabacama, er tšëngaftanga šmojátatšëmbona Bëngbe Bëtsábiocana más tšabe soyënga šmojtsebomnama, chë nyëtsca tescama šmochtsebomna soyënga.

<sup>35</sup> Chcasna, ndoñe šmatjajbaná ainaniñe bëtscá añemo jtsebomnana, ni Bëngbe Bëtsábeñe sempre jtsobatmanana; er chca šmobatmánayeca, Bëngbe Bëtsá echanjama tšëngaftanga bëtscá uacanana soyënga chábiocana chašmotsebomnama.

<sup>36</sup> Tšëngaftanga cmontsamna corente uantadënga jtsemnana, padecéniñe chašmojtsachnějuana ora, chca, ntšamo Bëngbe Bëtsá yobošcá tšëngaftanga chašmotsamama, y ndayá Bëngbe Bëtsá tojanašebuachenacá chašmóyëngacñama.

<sup>37</sup> Er Bëngbe Bëtsabe uabemana palabrenguñe cha mëntšá tojánayana:

Betsco, ndoñe bën, y chë jabama ibomná echanjabo.

Ndoñe bën quebochatóbema.

<sup>38</sup> Nÿe chë ndabiamá atše chaijama atšbe bominÿiñe tšabia chaotsemnama, átsbeñe cha betsošbuáchema, cha ndegombre chë nyëtsca tescama yomna tšabe vida echántsebomna;

pero uatjana causa, átsbeñe ošbuáchiyana tojtsajbanase, atše cháftaca ndoñe quichátoyejuaye ca —cha tojánayana.

<sup>39</sup> Pero bēnga ndoñe quemásmēna chē uatjana causa Bēngbe Bētsábeñe ošbuáchiyana tmojtsajbananga, y chca, n̄yetsca tescama pochocánēnga jtsemnama imojtsajnēnga; pero aíñe mondmēna chē Bēngbe Bētsábeñe ndegombre ošbuáchiyēnga, y chca, chē atsebácanēnga jtsemnama mochjashjáchēnga.

## 11

### *Bēngbe Bētsábeñe ošbuáchiyana jtsebomnana*

<sup>1</sup> Ošbuáchiyana jtsebomnana endmēna corente jtsetatšēmbuana, ndayá tmojtsobatmancá ndegombre chca yochjopásama; endmēna ainaniñe corente jtsetatšēmbuana, ndayá bēnga mora ndoñe tmontsonyáca ndegombre chca yomnama.

<sup>2</sup> Bēngbe Bētsá tojánayana bēngbe bēts taitanga tšabá imojánama ca, chēnga chábeñe imojtsošbuachéyeca.

<sup>3</sup> Bēnga, Bēngbe Bētsábeñe mondošbuachéyeca, mondētatšēmbo cha quem luare y n̄yetsca luarēnga tojanmama, chca chaotsemnama cha tojanmandá ora; chcasna, chē ndayá mora bēnga jin̄yama imobencá, cha tojanma bēnga ndoñe mondobena jin̄yama soyēnguentšana.

<sup>4</sup> Abel Bēngbe Bētsábeñe yojanošbuachéyeca, oveshatémēnga chábioye tbojanátšēmbona, y chē soye Bēngbe Bētsabiamá más tšabá yojtsemna, chē ndayá Caín, chabe catšata, Bēngbe Bētsá jētschuayama tbojanátšēmbonama. Chíyeca, Bēngbe Bētsá tojánayana Abel chabe bomin̄yiñe tšabia yojtsemna ca, ndayá Abel chábioye jētschuayama tojanmcá oyejuayá tojanóyēngacñeyeca. Ntšamo Abel Bēngbe Bētsábeñe yojanošbuachecá, masque cha ya obaná yojtsemna, chē soye cabá bēnga šontsabuatambá.

<sup>5</sup> Enoc Bēngbe Bētsábeñe puerte yojanošbuachéyeca, Bēngbe Bētsá celoye tbojesanbétseñe, ntjobancá. Chentšana ndocná tonjanobená cha jtsin̄yenana, Bēngbe Bētsá tbojesanbétseñe causa. Y Bēngbe Bētsabe uabemana palabrenguiñe endayana, Bēngbe Bētsá Enócaftaca oyejuayá canjamna ca, ntšamo jtsemēse yojoyenama, y chentšana celoye tbojtsanámbañe.

<sup>6</sup> Pero Bēngbe Bētsábeñe ntsošbuachiyá, ndoñe quenátopodena cha oyejuayá bēngaftaca jabemama, er chábioye jobéconamna, entšá jtsemnana jtsošbuáchiyana cha ndegombre bétsemnama, y cha inétsamama chē cha jtsabuatamba tša tmobošēngbiamá bētsá tšabe soyēnga chamotsebomnana, mo chábiocana uacanana soyēngcá.

<sup>7</sup> Bēngbe Bētsá Noébioye tbojanbuayená uabouana soyēnga yochjanopásama, cachora ndopodena jin̄yama soyēnga, y

cha Bëngbe Bëtsábeñe yojanošbuachéyeca, tojanma ntšamo Bëngbe Bëtsá tbojanmandacá y barquësha tojanapormá chabe pamíllanga játsebacama. Cha chca tojanma ora, ošbuáchiyana bómnayeca, cha tojaninÿanyé entšanga tša bacna soyënga tmojanmama y chë causa castigánënga jtsemnama yojtsamnama. Chabe ošbuachiyánamna Noé tojánashjache Bëngbe Bëtsabe bominÿiñe tšabia jtsemnama, y chca entšá jashjáchana, nÿe Bëngbe Bëtsábeñe jtsošbuáchiyëse.

<sup>8</sup> Bëngbe Bëtsá Abrahámioye tbojanchembo, inÿe luaroye cháuama; Abraham Bëngbe Bëtsábeñe yojanošbuachéyeca, tojanma ntšamo Bëngbe Bëtsá tbojanmandacá, y tojánbocna chë luaroye jama, chë Bëngbe Bëtsá tbojanšbuachená jatšetayama luaroye, masque Abraham ndoñe yontsetátšëmbo ndëmoye yochjánama.

<sup>9</sup> Bëngbe Bëtsábeñe yojanošbuachéyeca, yojobena mo inÿe luarocana ashjanganocá jtsiyenana, cachabe luarentše ndoyená, chë Bëngbe Bëtsá tbojanšbuachená luarentše. Entšëjuaca pormana tambënguiñe yojoyena, cachcá ntšamo chë chábentšana básenga Isaac y Jacob ibojëftsiyencá; y chátnaca Abrahamcá ibojanobátmana jóyëngacñama ntšamo Bëngbe Bëtsá Abrahámioye tbojanšbuachenacá.

<sup>10</sup> Er Abraham corente uantadá yojanobátmana chë canÿe luaroye celoca jamashënguama tempo; chë luare inamna canÿe bëts pueblo, puerte tšabe ucuatjoniñe pormana pueblo, canÿe luare chë ndayentšama Bëngbe Bëtsá tojanjuabó ntšamo chaotsemnama, y cachabe pormana luare inamna.

<sup>11</sup> Sara, Bëngbe Bëtsábeñe yojanošbuachéyeca, Bëngbe Bëtsá tojanma cha canÿe šešona chabotsebomnama, masque chora ya bëtsanáñjema yojtsemna, šešona jtsebomnama. Bëngbe Bëtsá chca tojanma, er Sara corente yojanjuabná, cha chë canÿe šešona yochtsanbomnama tbojanšbuachená cha, nÿets tempo ntšamo tojayancá amá yojamna ca.

<sup>12</sup> Y chca, quem entšá Abraham, chë šešonga jtsabamnama ya ndobenábentšana, ba básenga tmojanonÿná, tša mallajta mo chë celoca estrellëngcá, y tša chëftanga mo chë mar béjayoca chënÿañentša cascajca, ndocná jacúntama ntjobenayana.

<sup>13</sup> Nÿetsca quem entšanga imojëftsiyena jtsamëse ntšamo chëngbe ošbuáchiyana yojamncá, y chca tmojanóbana, masque cabá ndoñe tmonjanóyëngacñe chë Bëngbe Bëtsá tojanašebuachená soyënga. Pero chëngbe ošbuachiyánama corente imojtsetátšëmbo, Bëngbe Bëtsá chentšana baytese ntšamo tojanašebuachenacá yochjánatšatayama y chë soyënga ndegombre yochtsemnama, y chama oyejuayënga chënga imojtsemna. Chënga tmojánayana quem luarentše

chënga imojoyena mo cachëngbe luarentše ndoyenëngcá, y quem luarëjana mo nÿe achnejuanëngcá ca.

14 Y chca tmojtsichámëngna, puerte jtsinÿanÿnayana chënga tša imojtseboše inÿe luaroca joyéanama, canÿe luare cachëngbiama.

15 Chënga nÿe chë ndayentsana tmojëftsanbocna luarama manjánjuabnase, matmënjanošená tšabá cachoye jeshëconama.

16 Pero chëngna canÿe más tšabe luare inmaboše, canÿe luare celoca. Chíyeca Bëngbe Bëtsá ndoñe yonjanëuatja, chëngbe Bëtsá ca chënga chamotsechembuanama, er celoca canÿe bëts luare, mo canÿe bëts pueblëcá chëngbiama tojanprontá.

17 Bëngbe Bëtsá Abrahámbioye jinÿyama, ndegombre aïñe o ndoñe Bëngbe Bëtsábeñe tayojtsanošbuachema, tbojanmandá chabe uaquiñá Isaac chabuánatse jóbama, chábioye jëtschuayama, ntšamo Abraham chë tojóba bayëngaftaca jamama yojanamancá. Cha Bëngbe Bëtsábeñe yojanošbuachéyeca, yojtseprontana chë nÿe canÿe uaquiñá ibnabomná jóbama, Bëngbe Bëtsábioye jëtschuayama, masque Bëngbe Bëtsá mëntšá tbojanšbuachená:

18 “Chë ácbentsana entsanga nÿe Isaacbiajana mochanjabo ca.”

19 Abraham corente yojanjuabná y yojátatsëmbo, Bëngbe Bëtsá ndegombre obenana bomná bëtsemnama, chë obanënga chámuatayenama jamama. Chíyeca, Bëngbe Bëtsá Abrahámbioye tbojtsanauyaná Isaac jóbama ora, yojamna mo Abraham obanënguentšana chábioye cuaftoyëngacñëcá. Y chca, ntšamo Isaácaftaca tojanopasacá, batšá yojtsinÿanÿnaye ntšamo Jesucrísoftaca yochjanopasacá.

20 Isaac Bëngbe Bëtsábeñe yojanošbuachéyeca, Bëngbe Bëtsábioye tbojanimpadá chabe uaquiñátbiama, Jacob y Esaú, bëtscá tšabe bendicionënga chabotsebomnama, chë joshjanguama tempënga ora.

21 Jacob Bëngbe Bëtsábeñe yojanošbuachéyeca, ya jóbanama ora, tbojanimpadá cada ona chë Josebe básengbiama, Bëngbe Bëtsá chaoma bëtscá tšabe bendicionënga chamotsebomnama. Cha chca tojanma, jotsejbénase Bëngbe Bëtsábioye jadórama, y chabe jatjonëfjiñe tsbanánoca jojuáchase.

22 José Bëngbe Bëtsábeñe yojanošbuachéyeca, ya jóbanama ora, tojánayana más chcoye chë Israeloca entsanga Egiptó luarentšana mochjëftsanbocna ca, y tojëftsanmandá ndayá jamana chabe óbana cuérpoca.

23 Moisesbe bëtšëtsata Bëngbe Bëtsábeñe ibojanošbuachéyeca, cha tojanonÿná ora, unga shinÿëntscuana cha tmojtsaniytëme, er chata tbojáninÿe cha canÿe

botamana b́asetema b́etsemnama, y ndoñe tbonjanéuatjaná chē reybe mandama, chē nyetsca judiēngbe basetémēnga boyab́asetemēnga jtsēbáyana.

24 Moisés Bēngbe Bētsábeñe yojanošbuachéyeca, ya bētsá yojsemna ora, ndoñe tonjánbošena chē Egiptoca reybe bembēbe uaquiñacá chamotsábuatmama.

25 Chamna, tojánbošena cha jasúfriama ín̄yenga chamot-samama, cán̄yiñe chē Bēngbe Bētsabe entšángaftaca, y ndoñe n̄ye baseftayté tšabá jatsmēnana, bacna soyēnga jtsamēse, ntšamo cachá tojtsejuabnacá, n̄ye cachá tšabá jtsomñama.

26 Chamna, cha yojanjuabná, chē padecena soyēnguiñe jasúfriana ntšamo Cristo tojansufricá, más tšabá yojamna chē Egiptoca uámana soyēngama, er cha Bēngbe Bētsábeñe jtsošbuáchiyēse chábeñe yojanobátmana, ba tšabe soyēnga mo can̄ye uacanana soyca cha ibochjanatšetayama.

27 Bēngbe Bētsábeñe yojanošbuachéyeca, Moisés Egiptocana tojēftsanbocna, chē luarentša rey cháftaca chábuetnama nt-jatauatjca. Cha ainaniñe nyets tempo añemo yojtsebomna, y chca yojánin̄na mo chē ndocná jin̄yama tondobenacá, Bēngbe Bētsábioye cuaftson̄yaca.

28 Bēngbe Bētsábeñe yojanošbuachéyeca, ntšamo Bēngbe Bētsá tbojanmandacá, Moisés chē judiēnga tojanabuayená Bashco fiesta jamama, y chē Israeloca entšángaftaca yebnēngoye amashjuaniñe buiñeca tojanbuéscacja, chca, chē ángel obanayá, chē Israeloca pamíllangbeñe Egiptoca chē mayor uaquiñēnga ndocá chaondámama.

29 Moisés y Israeloca entšanga Bēngbe Bētsábeñe imojanošbuachéyeca, chē “Buángana ca” uabaina mar bejayējana tmojánenachnēngo, mo chiñe bojojo fshantse cuaftsomñcá; chentšana, chē Egiptoca entšanga cachcá jamama tmojánbošena ora, nyetscanga chiyiñe tojtsanatajo.

30 Israeloca entšanga Bēngbe Bētsábeñe imojanošbuachéyeca, chē Jericó bēts pueblentša tapiēsēnga shéconana can̄ysēfta tentscuama chēnga imojánajnentšana, chēsēnga yojtsáshajaye.

31 Rahab, chē pueblentša bacna vida bomna shembása, Bēngbe Bētsábeñe yojanošbuachéyeca, ndoñe tonjanóbana chē ín̄yengaftaca, chē bēts pueblentse oyenēnga, chē ntšamo Bēngbe Bētsá tojanmandacá ndoñe tmonjanmēnga; y ndoñe tonjanóbana, er chē Israeloca entšanguentšana ichmónēnga tšabá tojanēbuaja, chē jarrepárama tmojánanga ntšámose chē luar-entse oyenēnga jáyēnjanama jobenayama.

32 Atše sēntsobena bangbiana más jóyebuambayama, Bēngbe Bētsábeñe ošbuáchiyēngbiana, pero luare šattsēshbe chcang-

biana jóyebuambayama, mo Gedeonca, Barac, Sansón, Jefté, David, Samuel y Bëngbe Bëtsabe juabna oyebuambnayëngcá.

<sup>33</sup> Chënga Bëngbe Bëtsábeñe imojanošbuachéyeca ínÿengbe mandadëngbe entšángbioye tmojanayënjaná, bëtscá imojánama nÿetsca entšángaftaca ntšamo tšabá yomncá jtsamama y nÿetscanga cachcá chamotsámanama, ndayá Bëngbe Bëtsá chënga tojanašebuachenacá tmojanóyëngacñe; y Bëngbe Bëtsá tojanma chënga leóngaca imojtsemna ora, chënga chamuatenáyebengoma, chentšana báseftangbioye ndocá chamondámama.

<sup>34</sup> Ošbuáchiyana bómnyeca, Bëngbe Bëtsá tojanma lempe chaotsefsanama, chëngbioye iñeshiñe tmojanacjá ora, chënga ndocá chamondëpasama; tmojanotsbocá espadējaca jobanámentšana; ya tondaye añemo béntsebmna ora, Bëngbe Bëtsá tojanma bëtš obenana y puerte añemo chamotsebmnama; tmojánashjache bëtš obenana jtsebmnama ínÿenga jáyënjanama, chëngaftaca imojtsentsjaná ora; y tmojanobená inÿe mandadënga y chëngbe soldadënga jáyënjanama, chamotsachetama jamëse.

<sup>35</sup> Ošbuáchiyana bómnyeca, básefta shembásenga chëngbe óbana pamíllangbioye cachiñe ainënga tmojtananÿe, chënga ainënga chamotsatsmënama Bëngbe Bëtsá tojanma ora.

Ošbuáchiyana bómnyeca, ínÿenga tmojanma básefta ošbuáchiyënga, puerte chamosufrima, y jobanámnaca; er chënga más tmojánbošena jashjáchana chë nÿetsca tescama yomna tšabe vida jtsebmnama, y ndoñe nÿe chë jótsbocana batšatema más vida jtsebmnama.

<sup>36</sup> Ošbuáchiyana bómnyeca, ínÿenga corente tmojansufrí, ínÿenga chëngbioye tmojanoyánguango ora y tmojanatsetšená ora; y ínÿenga tmojansufrí y cárceloye cadenëjuangaca utámenënga joquédamnaca.

<sup>37</sup> Inÿengbioye ndëtšbéngaca tmojtsanatëchënganja, serruchëshaca tmojtsanëjácacaye, espadējaca tmojtsanëbaye. Inÿenga imojánajna cánÿentšana ínÿecnoye nÿe oveshá y chivëbe bobáchecha uichëtjonënga, ujabótënga, ainana tsetšanënga, y ínÿengbeyeca mocá borlánënga.

<sup>38</sup> Chë nÿe quem luarama enójuabnayënga ndoñe monjanomerecena chënga mëngaftaca jtsiyenama, chënga chë vida imojábomna cánÿentšana ínÿecnoye aniñe, entšanga ndoyena luarënguenache, tjañenache, fshantsiñe atëbëfñiñe y cuevëshënguiñe.

<sup>39</sup> Nÿetsca quem entšanga, ndëmuanÿëngbiana muentše tmonjoyebuambá, Bëngbe Bëtsá tšabá chëngbiana tojánayana, ošbuáchiyana imojánbmna ca; pero ni canÿa chënguentsá tonjanóyëngacñe, ndayá Bëngbe Bëtsá chëngbe entšanga

jatšatayama tojanašebuachenacá, nyjetsca tescama jtsebomnama.

<sup>40</sup> Bëngbe Bëtsá, bëngbeñe jtsejuabnayëse, tojanjuabó canye más tšabe soye bëngbiama jamama, chca, Bëngbe Bëtsá canye ora jamama, bënga nyjetscanga, chënga y bënga chamotsemnama lempe ntšamo Bëngbe Bëtsá yobošcá, ntšamo Bëngbe Bëtsá tojanašebuachenacá jýëngacñëse.

## 12

### *Bënga mochtsejuabnaye ndayá Jesús tojanmama*

<sup>1</sup> Chiyeca, bënga mochtsejuabnaye ba entšangbiama, chë bëngbiama más natsana imojaniyenënga, ndëmuanyënga puerte tšabá bënga jtsinyanynayana ntšamo ndegombre yomnana Bëngbe Bëtsábeñe ošbuáchiyana jtsebomnana, mo chënga ndayá bënga tmojtsamama cuaftsonyangcá. Chcasna, mo chë tmochamanëngcá, ínÿengaftaca jenëyëñjanama, chë jashjanguama tojtsemna luaroye natsana jashjanguama, chënga jotjajuamna, chë chorscama nduaservena entšayá jtsenátsejcana, y lempe ndayá tojtsama más uenana chamotjajuama soyëgnaca jtsenójacana; bëngnaca cachcá, ndoñe matjaleséncia bënga Crístbioye ndoñe tšabá ndëtsošservénama, ni chë bacna soyënga jamama juabnënga, chë bëngbioye paselo jáyëñjanama juabnënga cachcá chamotsamama. Chamna, šontsamna sempre Bëngbe Bëtsá jtseservénana, puerte uantadënga jtsemnëse masque padecena soyënguiñe tmoyena, bënga chamobená chë trabajo jamama, chë ndayama Bëngbe Bëtsá šojáchembo.

<sup>2</sup> Jesusbiamama mochtsejuabnaye, nda šuebënatsana bënga ošbuáchiyana chamotsebomnama, y šuinyanyná ntšamo nyjets tempo nyjetsca soyënguiñe Bëngbe Bëtsábeñe jtsošbuáchiyama. Cha chë cruzoca jóbanama sufrínana lempe tojanoboyá, er cha yojanobátmana chë chentšana yochtsanbomna bëts oyejuayánama; y yojanjuabná, chë más bacá uamana entšangcá jóbanana, chabiamama ndoñe canye uámana soye yonjamna ca; y chentšana chë uámana puestentše tojtanótbema, Bëngbe Bëtsabe catšbioica, jtsemándayama.

<sup>3</sup> Chiyeca, šmochtsejuabnaye ntšamo Jesús Bëngbe Bëtsábeñe jtsobátmanëse, puerte uantado yojamnama, chë bacna soye amënga corente chabe contra imojtsemna ora. Chca chábeñe šmochtsejuabnaye, tšëngaftanga Crístbiamama oservéniñe ndoñe chacmondëumantšema, ni ainaniñe añemo jtsebomnana ndoñe chašmondájbanama.

<sup>4</sup> Tšëngaftanga padecena soyënguiñe šmojachnëngo, entšanga bacna soyënga imojtsama causa, pero méntscoñama



ndoñe cmontsamna jóbanama, Cristbe soyëngama enojuerzániñe;

<sup>5</sup> y tcmojtsébnëtjomba ndayá Bëngbe Bëtsá tšëngaftangbioye, chabe básenga quetsomñecá tcmojábuayenama. Chë Bëngbe Bëtsabe uabemana palabrenguiñe mëntsá endayana:

Atsbe uaquiñá, Bëngbe Utabná aca jábuayenama tojtseboše ora, aca jasúfriase y padecena soyënga jauántase,

chora ndoñe catjátsjuabnaye chiñe mo canye nduámana soye cuaftsemncá;

y cha chacmojuácacana ora, ndoñe cattsajbaná ainaniñe añemo jtsebmna.

<sup>6</sup> Er Bëngbe Utabná jábuayenana nda cha tbobobonshanábioye, y jacastígana chë mo chabe uaquiñacá tbojofábioye ca —chiñe endayana.

<sup>7</sup> Padecena soyënguiñe chašmojtseufrina ora, šmochtsejuabnaye chë soye yojtsemna tšëngaftangbioye jábuayenama, y chca, Bëngbe Bëtsá tšëngaftangaftaca jtsamana mo chabe básenga quetsomñecá. ¿Nderado nántsemna canye uaquiñá, y chábioye chabe taitá ndocna te buanjuácacana, más tšabá chaotsamama?

<sup>8</sup> Nderado Bëngbe Bëtsá tšëngaftanga ndoñe tcmonjabuayená, ntšamo nyetsca chabe básengaftaca cha endbetsamcá, as tšëngaftanga ndoñe ntsemnana ndegombre chabe básenga.

<sup>9</sup> Y bënga básenga monjamna ora, bëngbe bëtsétsanga quem luarentše monjanamana bënga jácastigana, y bënga chëngbioye ndoñe stëtsoye ntjaquédana. Y mora, bënga más šontsamna, jtsobedecénana y más bëts respeto jtsebmna celoca Bëngbe Taitabiana, nda tojama entšanga espíritu chamotsebmna, y chca, bënga tšabe vida chamotsebmna.

<sup>10</sup> Bëngbe bëtsétsanga quem luarentše, nye básefta tescama, bënga jëftsabuayiynayana, y chca jamana chënga tšabá tojtsinýana ora; pero Bëngbe Bëtsá bënga šojtsabuayiyná ora, sempre chca jtsamana bëngbe tšabiana, bënga chabe entšanga jábiamama, cachacá puerta tšábenga, ntšamo cha nyets tempo yomncá.

<sup>11</sup> Sempre bënga ndaye castigo tmojtsebmna ora, chora bënga chama ndoñe oyejuayënga ntsemnana, pero aïñe cochtsetšenánënga. Pero bënga chë castigüentšana tmojuat-sjinýe ndayá Bëngbe Bëtsá chë sóyeca tbojtsabuayiynacá, as chentšana jóbochnana natjëmbana oyenana, nyetsca soyënguiñe ntšamo tšabá yomncá jtsamëse.

*Bëngbe Bëtsábioye jtsabotena, entšangbiana ndoñe tšabá ntsemnana.*

<sup>12</sup> Mo nda puerta uamëntšnayacá, jatrabájama tondaye añemo ntjtsebmncá, tsátšena buacuatsëngaca y puerta

uaměntšena ntsamiasšengaca, tšëngaftangbentšë báseftanga ya uaměntšayënga šmojtsemna Bëngbe Utabnabiamana trabájayiñe, y ainaniñe ndoñe añemo šmontsebomna. Cachiñe bëts añemo šmochtishache, y Bëngbe Bëtsabe obenana cachiñe šmochtsatsbomna.

<sup>13</sup> Mo chë canye benache tšabá y ndericho chaotsemnana tmojtsamëngcá, chca, chë coshetënga chiñe jama chamot-sobenama y más tšabá jtsatanama chamuatatsjínjama, y chë benachentšana ndoñe chamondětsebocanama; cachcá tšëngaftanga, chë bëtscá ošbuáchiyana y Cristo jaserviama corente añemo šmobomnënga, chë nye batšatema ošbuáchiyana y chca jatrabájama nye tondaye añemo ndbomnënga šmochjújabuache; chë soye šmochjama, ntšamo Cristo tšabá jaserviama yomncá jinjanyiyëse, y ntjalesenciácá ndocna soye chaotsama chë tšabe benachentšana tšëngaftanga chašmotsojuánañama.

<sup>14</sup> Lempe ntšamo chašmojobenacá šmochjama nyetścángaftaca natjëmbana jtsiyenama, y ntšamo Bëngbe Bëtsabe entšanga mondbetsamcá jtsamëse chašmotsiyenama, cha jtseservënëse; er chca ntjamcá, canya ndoñe ntsoobenana Bëngbe Utabnábioye jinjama.

<sup>15</sup> Yejuana šmochtsantješna, ndocná Crístbeñe ošbuáchiyana chaondëtsajbanama, y chca, chë Bëngbe Bëtsá chabe entšángbioye yochjatsataye tšabe soyënga chënga ndoñe chamondashjache. Smochtsantješna, tšëngaftanguentšë ndocná chaondětsemna, mo canye untja tbëtëjčá, chë chcaja sayëngbioye jásocayana, nda chaotsama, ínjenca natjëmbana ainana ndoñe chamondětsebomnana y bacna soyënga jtsamëse chamotsiyenama.

<sup>16</sup> Yejuana šmochtsantješna ndocná tšëngaftanguentšë shembása o boyabásaftaca bacna soye amá chaondětsemnana, ni canya ndabiamana Bëngbe Bëtsabe soyënga tondaye chaondëtsámana. Esaú chca tojanma, chë lempe yochjanashjachcá, mayor uaquiñá bétsemnana, chabe uabentsábioye canye šcnena sanama tbojtaname ora.

<sup>17</sup> Y tšëngaftanga šmondëtatšëmbo, chca tojanopasá chentšana, Esaú tojánbošena chabe taitá Bëngbe Bëtsábioye chaboimpadama, chabiamana tšabe bendicionënga chaomama, chë mayor uaquiñá bétsemnana yojanobena jtsebomnana soyënga; pero chora chabe taitá ndoñe tbonjanoyeuná, er masque Esaú chora juabna tojantrocá, cha ndoñe tonjanobená ntšamo yojtsopasancá jëtsjandmanana. Masque cha tša tojánbošena, shëchbuíyeca chabe taitábioye jaimpádase, ya ndoñe yontsopodena ntšamo tojanopasacá jëtsjandmanana.

<sup>18</sup> Tšëngaftanga ndoñe chešmatobeconá, mo chë entšanga

Israeloca Sinaí ca uabaina tjoye tmojanobeconacá, ndayá chënga imojobena jabojuama, y ññesheca yojtsángbototjuana, tondaye binñiñe luare, tša íbetiñe y puerte jabuache binñiëngaca;

19 ni chešmatuena chëngcá, canye trompetéjua uajatëtanana, ni Bëngbe Bëtsabe oyebuambnayana. Chë oyebuambnayana tmojanuenënga, imojtseimpadana ndoñe más chëngbioye chaondëtsóyebuambnama.

20 Chca tmojanma, jauántama ndoñe tmonjanobená causa, ntšamo Bëngbe Bëtsá tojanamëndacá: “Nda quem tjoca chaojoyená, masque canye bayá chaotsomñe, entsemna chana ndëtsbéngaca chamotsatëchënjanga jtsóbama ca.”

21 Ndegombre, ntšamo tmojaninýcá tša uabouana yojtsemna, cach Moisésnaca mëntšá tojánayana: “Tša sontsengmëmná auatjananá sëntsemna causa ca.”

22 Pero tsëngaftanga Bëngbe Bëtsábioye šmojobeconá, y chca endmëna mo tsëngaftanga canye Sión ca uabaina tjoye celoca cuafjobeconacá, chë Bëngbe Bëtsá nýets tempo vida bomnabe bëts puebioye, mo celoca Jerusalén cuenta; y ba uaranga angelëngbioye šmojobeconá, cánñiñe oyejuayënga enefjuanënga imojtsemnëngbioye, Bëngbe Bëtsá jtsatschuanayama.

23 Endmëna mo tsëngaftanga chë Bëngbe Bëtsabe entšángbioye cuafjobeconangcá, chentše enefjuanënga mo Bëngbe Bëtsabe basengcá, chënga ndayá chë Taitá tojašebuachenacá jóyëngacñama, ndëmuanýënga Bëngbe Bëtsá chabe librëšañe tojúbiana. Tsëngaftanga šmojobeconá Bëngbe Bëtsábioye, ntšamo nýetsca entšanga tmojamcá tšabá o ndoñe tšabá bëtsemnama yochjayanábioye. Endmëna mo tsëngaftanga cuafjobeconacá, chë entšanga mora ya obanënga y ntšamo tšabá yomncá jtsamëse imojëftsiyenëngbe espiritëngbioye, chë entšanga ndëmuanýëngbiana Bëngbe Bëtsá tojanma chamotsemnama lempe ntšamo chabe entšangbiana yojanjuabnacá, chca, cháftaca sempre vida jëftsebomnama.

24 Tsëngaftanga Jesúsbioye šmojobeconá, chë jóbanëse, entšanga Bëngbe Bëtsáftaca mo canýacá chamotsemnama tojanmá, ntšamo Bëngbe Bëtsabe tsëm trato yojamncá; y endmëna mo chë bëngbiana cha tojanóbana ora tojanábuashana buiñoje tsëngaftanga cuafjobeconacá; chca tojanábuashana, bëngbioye Bëngbe Bëtsabe delante mo tšabengcá jábiamama, mo ntšamo entšángbeñe buiñe jabuëscacjama chë bachnanga imojuamancá. Caín chabe catšata Abélbioye tbojanóba ora, yojamna mo chë Abelbe uabuáshanana buiñe Bëngbe Bëtsábioye cuaftseimpadancá, chë bacna soyama castigo chaotsemnama; pero Jesucristbe buiñe ndoñe chca ntsamana, ndayá chíyeca bënga más tšabe

soyënga jashjáchana; Jesusbe buíñeca, bënga montsobena atsebácanënga jtsemnama.

<sup>25</sup> Cuedado šmochtsebmna, bëngbioye tojtsoyebuambná ora cha joyeunayama. Chë Israeloca entsanga ndoñe tmonjánbošena Bëngbe Bëtsá joyeunayama, chë Sinái tjoca quem luarentše tojanabuayená ora; chëngbioye cha tojanacastigá. Y mora más, Bëngbe Bëtsá, chë celocana bënga abuayiynayá, ndoñe cachcá ndëcastigánënga quešochátabashejuana, ntšamo cha šojtsëtsëtnacá ndoñe tmontseyeunanëse.

<sup>26</sup> Bëngbe Bëtsá Sinái tjoca chë entsángbioye tojanoyebuambá ora, chabe oyeubambnayanaca tojanma quem luare chauangmëmanama, pero mora cha chabe uabemana palabrënguiñe tojašebuachená: “Atše cachiñe chanjatsma chauangmëmanama, ndoñe nÿe quem luare, sinó celócnaca ca.”

<sup>27</sup> Bëngbe Bëtsá “cachiñe ca” tojánayana ora, chë sóyeca yojtsichamo, chë ndayté lempe chaongmëmanama cha cachiñe yochjama ora, chë quem luarentše tmojama soyënga y chë jatrócama yopodena soyënga yochtsejuána ca, chca, nÿe chë nÿetsca tescama yomna soyënga y ndoñe jatrócama soyënga chaoquedama.

<sup>28</sup> Chcasna, Bëngbe Bëtsabe amëndayoca, chë cha yochjama bënga chamuamashënguama luare, yomna cachcá nÿetsca tescama y ndocna te ntjotrócana. Bëngbe Bëtsá chama mochjëtschuaye, y ntšamo cha tšabá tbojtsinÿancá mochtsadorana, chabiamá bëtsa respeto jtsebomnëse, y nÿetscangbiamá más bëtsá cha yomnama jtsejuabnaye.

<sup>29</sup> Er Bëngbe Bëtsá puerte etonaná chë chabiamá nduaueanënga jabuache echanjácastigaye, y chca, cha jtsemnana mo canÿe íñeshe lempe jtseepochocamcá.

## 13

*Ntšamo jtsiyenama, Bëngbe Bëtsá oyejuayá bëngaftaca chaotsemnama*

<sup>1</sup> Sempre nÿetscanga šmochtsenbobonshana, Jesucrístbeyeca catšátanga quetsomñecá.

<sup>2</sup> Sempre tšabá chë tšëngaftangbe yebnoye inÿe luarëngocana tmojášhjajnënga šmochjúbuaja, er chca jamëse, ntsetatšëmbcá báseftangna angelënga chëngbe yebnentše tmojanëbuaja.

<sup>3</sup> Chë utámenëngbiamá sempre šmochtsenójuabnaye, mo tšëngaftángnaca chëngaftaca utámenënga cuaftsemncá. Chë ínÿenga tmojtsama chamotsesufrinëngbiamá šmochtsenójuabnaye, er tšëngaftángnaca nderado cachcá smatjatspása.

4 Boyabása y shembása tbojanoubouamá ora, ntšamo tbojanensbuachenacá n̄yetscanga chamotserrespetana; y chē útata chabotsama n̄ye ndayá y n̄ye ntšamo Bēngbe Bētsá bouamnátbioye tojanamēndacá, er Bēngbe Bētsá echanjácastigaye chē shembása o boyabásaftaca bacna soye amēnga, y chē shema o boyábioye ín̄yáftaca ingñayēngnaca.

5 Ndoñe šmattsiyena jtsejuabnayēse n̄ye mallajta crocénana jēftsebmoma. N̄ye chē šmobomna soyēngaca oyejuayēnga šmochtsomñe, er Bēngbe Bētsá tojánayana: “Ndocna te cachcá quebochaton̄yaye, ni can̄ya quebocháiseboshjona ca.”

6 Y chca, bēnga montsobena corente añēmoca jayanama: Bēngbe Utabná endmēna nda atše šonduájabuachana; ton-dayama quichátauatja.

¿Ndayá can̄ye entšá nanjobenaye átšeftaca jamama ca?

7 Tšēngaftangbe amēndayēngbiana, chē Bēngbe Bētsabe buayenana soyēnga tcmojábuatambangiama, sempre šmochtsenójuabnaye. Sempre šmochtsenójuabnaye chē ntšamo chēnga imojaniyenentšana tojanóbocna tšabe soyēngama, y šmochtsiyena jtsamēse ntšamo chēnga imojanamcá, Jesucristbeñe ošbuáchiyēnga bétsemnana.

8 Jesucristo cachá n̄yets tempo iuétsemna, tempo, mora y n̄yetsca tescama.

9 Ndoñe šmatjaleséncia ín̄yēnga chamotsamama tšēngaftanga chē benachentšana chašmotsojuánañama, ndayá chēnga tmojtsabuátambama, y chē Cristo tojánabuatambama contra soyēngaca. Más tšabá endmēna bēnga ainaniñe añemo jtsebmomana, Bēngbe Bētsá tšabe juabna bēngbiana yobómnyeca, y ndoñe chē sanama, chē ndayá aīñe o ndoñe šontsamna jtsesayana soyēngama mandēnga tcojtsamēse. Chca mandēnga ndocna te chē Israeloca entšangbiana tempo tonjanoservé.

10 Bēnga chē Jesucristbeñe mondošbuáchenga, can̄ye soye mondbomna mo chē Bēngbe Bētsábioye jētschuayama altaroca juin̄yena soycá, bacna soyēngama perdonánēnga jtsemnana. Bēnga mondbomna chē Jesucristo bēngbiana tojanma soye, cruzoca tojanóbana ora, bēngbe bacna soyēngama; y chē n̄ye tmojóba bayēngaca soyēnga tmojtsama bachnanga ndoñe ntsebmomana, chē Cristo tojanóbana ora, ndayá tojanmentšana tojanóbocna tšabe soyēnga.

11 Er chē judiēngbe más uámana bachnangbe amēndayá, chē tmojóba bayēngbe buiñe chē “más uámana ca” uabaina luaroye juabuyambana, Bēngbe Bētsá entšangbe bacna soyēngama cháuperdonama, y chē bayēngbe cuerpēnga jtsejuin̄yiana entšanga tmojena luarentšana chaboca.

12 Cachcá, Jesúsna tojansufrí y tojanóbana bēts pueblentsana chaboca, chabe buiñe tojanábuashana ora jóbanēse, entsanga Bēngbe Bētsábenga chamotsemnana, y chabe delante mo tšabengcá chamotsemnana.

13 Chíyeca bēnga šontsamna Jesúsbioye jobéconana, nda entsanga tmojtsanaboté y bēts pueblentsana chaboca tojanóbana. Cha mochjuasto, y ntšamo cha tojansufricá bēngnaca mochjasúfria.

14 Er quem luarentše bēnga ndoñe quemátsbomna canye bēts pueblo bēngbiama, nýets tempo chauesomñe bēts pueblo, ndayá bēngna tša mondboše y puerte mondobátmana bēnga joyéanama chē celoca yochtsemna Bēngbe Bētsabe bēts pueblentše.

15 Chíyeca, šontsamna sempre Bēngbe Bētsábioye jtsatschuanayana, Jesucristbiajana. Bēngbe Bētsá chca tmojtsadorana ora, jtsemnana mo chábioye jētschuayama canye soye cuafjutšēmboncá. Chcasna, jtsóyebuambnayēse cha mochtsadorana.

16 Sempre ntšamo tšabá yomncá šmochtsama, y chē šmobomncá inýengbiámnaca chaotsemna. Chca šmochtsama, er chca tcojama ora, Bēngbe Bētsá oyejuayá jtsejuabnayana chca chabiama tcojama ca, y jtsinýnana bēnga Bēngbe Bētsá imojtsatschuanama, ndayá cha tojamama.

17 Sempre šmochtsama ntšamo chē tšēngaftanga ošbuachiyēngcá enefjuanēngbeñe amēndayēnga tmojayancá, y siempre šmochtsiyena jtsamēse nýe ntšamo chēnga tmojtsebošcá. Chēnga siempre tšēngaftangbioye jtsanýenana, tšēngaftangbe tšabiama, ntšamo cmojánanýenama Bēngbe Bētsábioye jojuama yojtsamnama chēnga jtsetatšēmbēse. Jtsayaunanēse, šmochjama chēnga chēngbe trabajo oyejuayánaca y ndoñe ngménaca chamotsamama, er ndoñe chca šmonjamēse, chē trabajo tšēngaftangbe tšabiama ndoñe nántsemna.

18 Bēngbe Bētsá bēngbiama šmochtseimpadana, er bēnga ainaniñe corente fsēndētatsēmbo tšabá tifjamama, y tša fsēntseboše jtsiyenana ntšamo tšabá yomncá lempe jtsamēse.

19 Tšēngaftanga bētscá cbontsaimpadana, Bēngbe Bētsá chašmoimpadama, atše chasolesenciama tšēngaftangaftaca cachiñe jtsatsmēnana.

*Bēngbe Bētsábioye chēngbiama jaimpádama y chēnga jacheuayama*

20 Atše, Bēngbe Bētsá sēntseimpadana, cha chē nda endbētsama bēnga natjēmbana chamotsiyenama, y nda tojanma Bēngbe Utabná Jesús cháuatayenama, nda bēnga šondánýena mo oveshēngbe tšabe abuajēñyacá; y Bēngbe Bētsá chca tojanma, Jesús, chabe buiñe juabuáshanēse

tojanóbanayeca, chca, entšanga jinŷanŷiyama ndegombre bétsemnama ntšamo Běngbe Bětsá chabe entšangbiamama tojanašebuachenacá nŷetsca tescama jamama.

<sup>21</sup> Cha sěntseimpadana chaoma tšěngaftanga chašmotsebomnama nŷetsca tšabe soyěnga ntšamo cmojtsějabotcá, chca, lempe ntšamo cha yobošcá tšěngaftanga chašmotsamama; y cha Jesucrístoftaca chaboma běngaftaca ntšamo cha tšabá tbojtsinŷancá. ¡Nŷetscanga nŷetsca tescama Cristo chamotsatschuaná! Chca chaotsemna.

<sup>22</sup> Jesucrístbeyeca catšátanga, tšěngaftanga cbontsaimpadana, jábuayenama ntšamo tcbonjauyancá, puerte uantádoca tšabá chašmóyěngacñama, er nŷe básefta palabrěngaca chama tcbonjubuábiamama.

<sup>23</sup> Atše sěntseboše tšěngaftanga chašmotsetátšěmbo, Timoteo Jesucrístbeyeca běngbe catšata, ya ndoñe utamená yontsemnama, y cha betSCO átšbioye chaojtaběse, átšeftaca chanjěftsbetše tšěngaftanga jánŷama chaijá ora.

<sup>24</sup> Tšěngaftanga ošbuachiyěngbeñe nŷetsca aměndayěnga šmochjácheuaye, y nŷetsca Běngbe Bětsabe entšágnaca choca. Chě Italia luaroquěnga ošbuáchiyěnga tšěngaftanga cmontsacheuaná.

<sup>25</sup> Atše, Běngbe Bětsá sěntseimpadana, cha chaoma tšabe bendicioněnga tšěngaftangbeñe chaotsemnama.

# Santiago

## *Jacheuayama*

<sup>1</sup> Atše Santiago, Bëngbe Bëtsá y Bëngbe Utabná Jesucristbe canye oservená, tšëngaftanga cbontsëbuabiamná, tšëngaftanga chë bnëtsana uta Israeloca bëts pamíllangbioye nýets luarëjana ujquëshenënga. Atše cbontsacheuaná.

## *Chë Bëngbe Bëtsábiocana osertánana*

<sup>2</sup> Jesucristbeyeca atšbe catsátanga, tšëngaftanga ndaye padecena soyënguiñe chašmojtsiyena ora, chiñe šmochjájua boye mo chca tšëngaftangbe tšabiamna cuaftsemncá y šmochjójeyuaye;

<sup>3</sup> er tšëngaftanga šmondétatsëmbo, chcañe chašmojtsajna ora, šmochtsetátšëmbo cach tšëngaftanga Jesucristbeñe puerte šmošbuaché o ndoñe. Chca ora bëts ošbuáchiyana chašmojtsebomnëse, šmochanjobenaye, Bëngbe Bëtsábeñe jtsobátmanëse añémoca jtsemnana, masque padecena soyënguiñe chašmotsomñëse.

<sup>4</sup> Pero chca chašmojtsemnëse, šmochtsentsëna jashjáchama ntšamo canye entšá Bëngbe Bëtsabe soyëngama corente osertaná yomncá chašmotsemnana, ntšamo Bëngbe Bëtsá yobošcá chašmotsiyenama, chiñe ni mo canye soye jamama chacmondëtsabuashebenëse.

<sup>5</sup> Nderado nda tšëngaftanguentsana ndoñe tontsobena corente osertánana jtsebomnana, cha bontsemna Bëngbe Bëtsá jaimpádana cha chaoma aiñe chana jtsebomnana, y Bëngbe Bëtsá chana bochanjátšetaye; er Bëngbe Bëtsá nýetscanga bëtscá endbétsatsatnaye y ndocnábioye jatáboyënjana.

<sup>6</sup> Pero cha bontsemna, Bëngbe Bëtsábeñe puerte jtsošbuáchiyëse chama cha jaimpádana, y cha nderado ndoñe bochanjójeyunayama ntjatatëmnancá. Nda mëntšá tojtsamëse, inye ora aiñe Bëngbe Bëtsábeñe cuaftsošbuachecá y inye ora ndoñe, cha entsemna mo canye olëshcá, mar béjayoca binjia nýe cátatoye jtsambayana.

<sup>7</sup> Chca ama entšá ndoñe chaondëtsejuabná, Bëngbe Utabnábensana ndayánaca jatóyëngacñama.

<sup>8</sup> Cha jtsemnana canye entšá, mora canye soye juabnayá, pero chentšana inýetšá jatójuabnañana. Chca, cha jtsiyenana nýetsca soyëngama uta soye jtsejuabnayëse, y chca cha ndoñe ntsoobenana tondaye puerte tšabá jamama.



9 Chë Jesucristbeñe ošbuachiyá, ndbomnjëjema y ndoñe yapa uámana entsá tomná, corente oyejuayá chaotsemna, er Bëngbe Bëtsabe bominiñe cha canye uámana entsá jtsemnana;

10 y chë bomnánaca puerte oyejuayá chaotsemna, Bëngbe Bëtsá chábioye nduámana entsá chabojábema ora, er mo chë shacuaníñe uantsefjushacá, cha ndoñe nyets tempo quem luarentse ntjëftsiyana.

11 Shinye tojábocna y becá tojojënñana ora, chë shácuana jtsebuashana, chë uantsefjúsha jtsátsatšana y chabe uabótamanana ya ndoñe más ntsebínñana. Cachá chë bomná, echanjóbana nye cachabiana más becá crocénana onguayíñe chaojtsemna ora.

*Bacna soye ocochënguentsana tšabá jabocnana*

12 Oyejuayá chaotsemna chë entsá chë padecena soyënguentsana tšabá tojëtsbocná, cabá Jesucristbeñe ošbuachiyá; chama Bëngbe Bëtsá chabiana oyejuayá echántsemna y echanjama chë nyetsca tescama yomna tšabe vida cha chaotsebomnama, mo uacananancá chabe ošbuáchiyama. Chë soye Bëngbe Bëtsá tojašebuachená nyetscanga cha imobobonshánëngbioye.

13 Nderado nda bacna soye jamama tbojócochëngo, ndoñe chaondëtsejuabná Bëngbe Bëtsá chca cháftaca yojtsama ca; er Bëngbe Bëtsá ndocna te bacna soye jamama jócochënguana, y cha ndoñe ntsamana ínýenga bacna soye jamama chaócochënguana.

14 Inyetsá endmëna, canya bacna soye jamama jócochënguana, bacna juabnënga tojtsebomna ora; cha chiñe nye jésejuabnayana y chë soye jtsasjayana cha chca jamama.

15 Nda yapa bacna soyënga tojtseboše, cabana cha pronto chë bacna soye jamana; y nda sempre bacna soyënga tojt-sama, chama Bëngbe Bëtsá nyetsca tescama bochanjacastíga.

16 Atšbe bonshana catsátanga, ndoñe matenoíngñana, jtse-juabnayëse Bëngbe Bëtsá yojtsama tšëngaftanga bacna soyënga chašmotsamama ca.

17 Nyetsca tšabe soyënga y chë puerte tšabe soyënga ts-banánocana endobá, Bëngbe Bëtsá chë Taitábiocana. Y cha chë shinye, juashcona, y nyetsca chë celoca yobuashinýinñana soyënga tojamá, nyets tempo nye cachá iuesomñe y ndoñe inya ntjátsmënana.

18 Cachá jamama tojánbošenayeca, bënga chábenga šojánabiana, bënga chabe ndegombre palabrenga jouenëse. Cha chca tojama, lempe ntšamo Bëngbe Bëtsá quem luarentse tojamentsana, bënga chë natsanënga chábenga chamotsemnana.

*Ntsamo ndegombre yomna Bëngbe Bëtsábioye tšabá jadórama*

19 Atšbe bonshana catšátanga, quem soyama šmochtsenójuabnaye: nÿetsca tšëngaftanga cmontsamna sempre jtseprontánana jouenama; pero jóyebuambayamna jobátmana y inÿengaftaca jetnámna.

20 Inÿaftaca tbojetna ora, canÿe entšá ndoñe ntsamana ntšamo Bëngbe Bëtsá yobošcá, chë nÿetsca soyënguifne tšabá jtsamana.

21 Chcasna, smochtsajbaná bacna soyënga jtsamëse oyenana, y amana nÿetsca soyënga ndoñe ntšamo Bëngbe Bëtsá yomandacá; y chë Bëngbe Bëtsá tojama tšëngaftangbe ainaniñe chaómashënguama buayenánana, ntjatosoberbnaycá smochjóyëngacñe. Chë buayenánana chašmojóyeunase, echanjopódia tšëngaftanga atsebácanënga jtsemnana.

22 Ndoñe quecmátamna nÿe chë Bëngbe Bëtsabe buayenánana jouenana, ndayá ntšamo cha tojayancá aifne jtsamana; ndoñe chca šmontsamëse, cach tšëngaftanga šmontsenoíngña.

23 Nda nÿe chë buayenánana tojouena, pero betesco tbojtsebnatjëmbe y ndoñe tontsama ntšamo chiñe tojtsayancá, cha jtsemnana mo canÿe entšá chabe jubíá espejuiñe tojtse nonÿacá:

24 chana cachá jtsenónÿayana, pero chë espejo tojabuertaná ora, jtsebnatjëmbana ntšamo cha bëtsemnana.

25 Pero nda ntšamo tojouencá ndoñe tbonjebnatjëmbe, y sempre tojtsejuabná chë entšanga játsebacama Bëngbe Bëtsabe puerte tšabe mando chabosertama, y tojtsiyena ntšamo chë mandënguëntse endayancá, lempe ntšamo chë entšá chaojt-samiñe oyejuayá Bëngbe Bëtsá bochanjábema.

26 Nderado nda tojtsejuabná Bëngbe Bëtsábioye ibojtsadorana ca y chë Bëngbe Bëtsábioye adoryá ntšamo ibomncá cha yojtsama ca, pero ndoñe tontsobena bacna soye oyebuambayana jtsajbanana, cachá yojtsenoíngña, y nÿetsca soyënga ntšamo tojtsamcá Bëngbe Bëtsá jadórana, chabiamana tondaye ntšamanana.

27 Bëngbe Bëtsá chë Taitabe bominÿiñe, chë puerte tšabe y ndegombre soyënga, ndayá entšá ibojtsemna jamana endmëna: chë uajchonga y viudanga corente ngmënënga tmojtsemna ora jujabuáchana, y ndoñe bacna soyënga játamana, mo chë nÿe quem luarama enójuabnayënga mondbetsamcá.

## 2

### *Nÿetscanga tšabá jtsatenonÿayëngana*

1 Tšëngaftanga, Jesucristbeyeca atšbe catšátanga, šmondošbuaché Bëngbe Utabná Jesucristo, chë puerte bëtsá y uamanábeñe; chíyeca tšëngaftanga cmontsamna nÿetsca entšanga cachcá jtsatenonÿayëngana.

2-3 Nderado tšëngaftanga cánÿentše šmojénefjna, y chora canÿe bomna entšá tojáshjango castellano ntšabuchëtjonëfjangaca y uámana entšayëjuangaca bopormaná, cha botamana šmojúmashëngo y mëntšá šmojauyana: “Moca quëfseroca mabesótbema ca”. Pero cachca ora, canÿe ndbomnëjema tojáshjango uandocuenta entšayá uichëtjoná, y cha šmojauyana: “Acna choca tsanana cochtsemna o chafjoca mótbema ca”.

4 Chca tšëngaftanga ya šmotsama cach tšëngaftanguentše báseftanga más uámanënga ínÿengbiana chamotsemnana, y chca šmojtsama, ana bacna juabnënga šmojtsebmna causa.

5 Atšbe bonshana catšátanga, quem soye šmochjouena: Bëngbe Bëtsá quem luarentše ndbomnënga imomnënga tojabacacá, chënga canÿe puerte uámana soye chamotsebmna, Jesucristbeñe puerte chamotsošbuáchema; y mo otocana soyca Bëngbe Bëtsabe amëndayama chamosháchiñama. Cha imobobonshánëngbioye chë soye jatšatayama tojašebuachená;

6 pero tšëngaftanga chë cuenta, mo ndoñe cach tšëngaftangcá entšanga bendmëncá chëngbioye jtsënyayana. Ndegombre, chë bomnënga mondmëna chë nÿe sempre cmondbétsamëndayënga y chë sjojonana chë pueblentša mandadëngbioye cmondbáunatsënga.

7 Y cach bomnëngnaca mondmëna chë Cristbiana podescayaebuambnayënga, ndábenga tšëngaftanga šmondmëna, y chabe uabaina tšëngaftangbiana puerte enduámana.

8 Bëngbe Bëtsabe uabemana palabrenguiñe mëntšá endayana: “Ndëmua entšánaca cochtsebobonshana ntšamo cach aca cuenobobonshancá ca.” Tšëngaftanga ntšamo chë Bëngbe Utabnabe mandiñe endayancá ndegombre šmojtsamëse, tšabá šmochántsama.

9 Pero tšëngaftanga ndoñe cachcá šmotsenonÿase, chcana bacna soye jtsamana y šmojama ntšamo Bëngbe Bëtsabe leyënguiñe ndoñe yondëlesenciancá.

10 Y mora, canÿe entšá nÿetsca chë leyentša mandënga tojtsobedecena, pero ndoñe tontsama ntšamo nÿe mo canÿe mando ntšamo iuayancá, cha Bëngbe Bëtsabiama jtsemnana canÿa ntšamo nÿetsca chë leyentša mandënguiñe ndoñe yondëlesenciancá amá.

11 Cach Bëngbe Bëtsá, chë “acbe shema o boyábioye ínÿaftaca ndoñe cattseíngñaye ca” tojanayaná, cachá mëntšánaca tojánayana, “ínÿabioye ndoñe catjóba ca”. Chca, nda cachabe shémbioye ínÿaftaca ndoñe tbonjaingñé, pero aíñe ínÿabioye tbojóba, chca, Bëngbe Bëtsabiama cha jtsemnana canÿa nÿetsca chë leyentša mandënga ndocumpliná.

12 Tšëngaftanga cmontsamna jtsóyebuambnayana y jtsamana ndayá Cristo šojanamëndacá, atsebacana entšangcá, er Bëngbe Bëtsá echanjayana ntšamo tmojamcá aíñe o ndoñe tšabá bétsemnama.

13 Er chë ínÿengbiama ndoñe ngménana bomnëngbiama, Bëngbe Bëtsá ntjongmiacá echanjayana ntšamo tmojamcá aíñe o ndoñe tšabá bétsemnama; pero chë ínÿengbiama aíñe ngménana bomnëngbiama, ntšamo tmojamcá aíñe o ndoñe tšabá bétsemnama Bëngbe Bëtsá chaojayana ora, chënga tšabá chentsana mochanjábocana.

*Chë ndegombre ošbuáchiyana, soyëngaca jinÿanÿiyana*

14 Atšbe catšátanga, ¿ndayama cánÿabioye buanjoservia jayanana aíñe Jesucristbeñe sëntsošbuaché ca, pero cha ínÿengbiama tšabe soyënga ndoñe tontsama, y chca, ntšamo cha tojtsamcá ndoñe tontsinÿanÿná cha Jesucristbeñe yošbuáchema? Ndegombre, cha ñe chca tojtsichámëse, ndoñe ntsopodénana cha atsbocaná chaotsemnama.

15 Nderado canÿe boyabása o shembása ošbuachiyá entšayá tbojtsabuáshbena y saná chë te jasámnaca tbojtsebuáshbena,

16 y canÿa tšëngaftanguentsá tbojauyana: “Diošoftá, sësnama ndoñe chacondëtsepadecena y becá chacuatoshachá ca”, pero chca chaotsemnama chábioye tondaye tbonjatšetase, ¿ndayama nantsoservenana chca jayanana?

17 Cachcá, nda tojayana Jesucristbeñe yošbuaché ca, pero ndocna tšabe soyënga tontsama, chë ošbuáchiyana bomnama jinÿanÿiyama, ñe chca ošbuáchiyana jtsebomnana tondayama ntsoservénana.

18 Pero nderado ndánaca mëntsá echanjayana: “Aca Jesucristbeñe icošbuaché, pero atšna ínÿengbiama tšabe soyënga sëntsama ca.” Chora atše stjojuá: “Sminÿinÿe ntšamo canÿa nantsobena Jesucristbeñe jtsošbuáchiyana, chca chaotsinÿnama tondaye ntsamcá, y chora, ndayá tijamama atšbe ošbuáchiyana cbochjinÿinÿiye ca.”

19 Aca condošbuaché ñe canÿe Bëngbe Bëtsá yomnama y chca tšabá contsama; pero chë bacna bayëjëngnaca chiñe jtsošbuáchiyana, y chë causa chënga uatjana jtsebomnama y jtsangmëmnayana.

20 Ndoñe obëjema cattsemna; ndegombre cbochanjinÿinÿiye nderado nda Jesucristbeñe tojtsošbuaché, pero tondaye tontsama chca chaotsinÿnama, chabe ošbuáchiyana tondayama ntsoservénana.

21 Bëngbe Bëtsá tojánayana chabe bominÿiñe Abraham, bëngbe tempsca bëts taitá, tšabia yojamna ca; chca tojánayana, er Bëngbe Bëtsá tbojanmandá ora, yojtseprontana chabe uaquiñá altariñe jóbama, cach Bëngbe Bëtsábioye jëtschuayama.

22 Aca contsobena Abrahámbeñe jinÿama, cha Bëngbe Bëtsábeñe yojanošbuáchema, y soyënga yojánama chca chaotsinÿnama; y ndayá cha tojanmama entsinÿinÿena, cha ndegombre puerte bëtscá yojanošbuáchema.

23 Chca tojanopasá ntšamo Bëngbe Bëtsabe uabemana palabrénguiñe endayancá, mëntšá: “Abraham Bëngbe Bëtsábeñe yojtsošbuáchiye, y chama Bëngbe Bëtsá tojánayana chabe bominiÿiñe cha tšabia yojamna ca.” Y Abraham entsanabaina Bëngbe Bëtsabe amigo ca.

24 Y tšëngaftanga šmontsetátšëmbo, Bëngbe Bëtsá ináyana canÿe entšá chabe bominiÿiñe tšabia yomna ca, chë entšá ndayá tojtsamama, chabe ošbuáchiyana chaotsinÿnama, y ndoñe nÿe ošbuáchiyana tojtsebonnama.

25 Cachcá tojanopasá Rahab, chë bacna vida bomna shembásaftaca; Bëngbe Bëtsá tojánayana chabe bominiÿiñe cha tšabia yojamna ca, er cha canÿe tšabe soye tojanma. Cha chë noticia uambaye judiënga posada tojanëyentšame, y chentšana tojanéjabuache inÿe benachëjana chamuáisebocanama, chë pueblentša soldadëngbiana chamotsachetama.

26 Lempe básefta palabrénguiñe jayanamna mëntšá entsemna: ntšamo canÿe cuerpo, espíritu ndbomna cuerpo, pronto jóbanana, cachcá chë ošbuáchiyana, ndocna soyëngaca tontsemna, chca chaotsinÿnama, tondayama ntsoservénana.

### 3

#### *Bichtájaca tšabá jóyebuambayama endmëna*

1 Jesucristbeyeca atšbe catšátanga, ndoñe yapa buátëmbayënga tšëngaftangbeñe chamondëtsemna; er tšëngaftanga ya šmondëtatšëmbo, bënga, chë entsanga abuátambayëngbiana, chë castigo más bëtscá yochtsemnana, Bëngbe Bëtsá ndoñe tmonjóyeunase, ntšamo entsanga tmojamama aíñe o ndoñe tšabá bëtsemnana cha chaojayana ora.

2 Bënga nÿetscanga nÿetsca bacna soyënga mondbétsama. Nderado nda oyebuambnayıñe ni mo canÿe bacna soye tonjama, chë entšá puerte tšabia jtsemnana, ntšamo Bëngbe Bëtsá yobošcá jtsiyenëse, y cha yojtsobena cachá sempre jtse nomándayama.

3 Chë couayëngbioye freno tmojuayashbé ora, ntšamo bënga tmojtsebošcá chënga mochántsama, y bënga cachora jtso benana ntšamo nÿets chëngbe cuérpoca tmojtsamcá jtsemándayana, y ndoñe nÿe chëngbe bestšaše.

4 Barquëshamnaca šmochjenójuaboye. Masque tša bëtsëtsacuemëngá y tša jabuache binÿiënga chë barco

jtsëjuatsëntšayana, chë uamanéjayënga chë barco juyambana ndayëjana tmojtsebošcá, y chca, nÿe canÿe base soyetémaca, timón ca uabainetémaca.

<sup>5</sup> Cachcá, chë bichtaja cuerpiñe canÿe base soyetema endmëna, pero chë bichtájaca entšanga jtsenábotamnayana bëts soyënga tmojamama. Smochjouena, canÿe base íñeshe jtsobenana canÿe bëts tjañe juangbotjuama.

<sup>6</sup> Y chë bichtaja endmëna mo canÿe íñeshcá, mo canÿe luare ndayentše puerte bacna soyënga tobinÿncá. Chë bichtaja jtsobenana bëngbe cuerpentše puerte bacna soyënga bëngbiamama. Mo canÿe íñeshe becá tojtsendbiamnacá, chë bichtájaca tcojtsichamo ndoñe tšabe soye, jtsobenana bacna soyënga bëngbiamama nÿets tempo quem luarentše tmuetšiyenëntscuana; y mo nda ndayá tojtsangbotjuacá, Satanás jtsobenana chë bichtaja jtsemándayana, bacna soyënga chaotsamama.

<sup>7</sup> Entšá endobena jtsamëndayana nÿetsca tjoica bayënga, shloftšënga, osjojnayënga y buyeshiñe oyena bayënga; y ndegombre mora entsamënda;

<sup>8</sup> pero ndocná tonjobená chë bichtaja jtsemándayana, chca, bacna soyënga amana chaotsajbanama. Chë bichtaja jtsamana bëtscá bacna soyënga cada te chauétsebinÿnama, y mo canÿe mëtšcuaycá veneno jtsebomnana jóbama, chë bichtájaca cachcá endmëna.

<sup>9</sup> Bichtájaca bënga puerte tšabá Bëngbe Bëtsá y Taitabiamama jtsichámuana, y cach bichtájaca bënga puerte bacá entšangbiamama mondbëtsichamo, masque Bëngbe Bëtsá cachacá enoparecënënga chënga tojábiamama.

<sup>10</sup> Cach uayášentšana jtsóbocanana Bëngbe Bëtsabiamama tšabe palabrënga y entšangbiamama bacna palabrënga. Jesucrístbeyeca atšbe catšátanga, chca ndoñe chaondëtsemna.

<sup>11</sup> Canÿe béjaye obocanentšana ndoñe ntsopodénana tšabe búyeshe chaóboconama y cachentšana untja búyeshnaca.

<sup>12</sup> Ntšamo canÿe higo betiyentšana ndoñe ntsopodénana olivosëšënga jashacama, y canÿe uvas betiyentšana ndoñe ntsopodénana higuëbënga jashacama, cachcá, atšbe catšátanga, tamona búyeshentšana ndoñe ntsopodénana tšabe búyeshe chaóboconama.

### *Bëngbe Bëtsábiocana óbocana osertánana*

<sup>13</sup> Nderado tšëngaftanguentše tojtsemna canÿe puerte tatšëmbuá y osertaná, cha bontsemna, chca yomnama entšanga jinÿanÿiyana, tšabe soyënga amana jtsiyenëse y chë ntjatosoberbnaycá tojama soyëngaca; y cha chca jamana, puerte osertaná bëtsemnama.

14 Pero tšëngaftangbe ainaniñe yapa ínÿabioye šmojtsántšaboše y nÿe ínÿenga chamotjáyanama soyënga šmojtsama, as ndoñe šmattsenábotamnaye osertánënga y tšábënga šmomnana, er ndegombre Bëngbe Bëtsabe osertánana tšëngaftanga ndoñe šmontsebmna.

15 Er chca osertánana, Bëngbe Bëtsábiocana ndoñe ntsóbocanana, ndayá nÿe quem luarama enójuabnayëngbentsana, nÿe entšangbe juabnentsana, y canÿe bacna bayëjbentsana.

16 Ndayentše entsanga yapa tmojtsenántšaboše, y nÿe ínÿenga chamotjáyanama soyënga tmojtsama, chentše todayama quemochátenëyeunana y nÿetsca bacna soyënga mochántsama.

17 Pero chë Bëngbe Bëtsábiocana óbocana osertánana bomnënga, nÿetsca soyamna, natsana puerte tšabe vídaca jtsiyenana, bacna soyëngaca ndëmandánënga; y chënga jtsemnana chë ínÿenga ndoñe chamondëtsentsjanama amënga, tšábënga y sempre jtseprontánana ínÿenga joyaunayama. Y cach quemënga jtsemnana ínÿengbiama ngménana bomnënga, sempre tšabe soyënga jtsamana, cachcá nÿetsca entsángbioye jtšëñyayana, y ntšamo ndegombre tojtsemncá jtsichámuana y jtsamana.

18 Ntšamo canÿe jená, botamana shajuana jtsebmnama tšabe jénaye jájena, cachcá, sempre natjëmbana jtsiyenama bošëngna, natjëmbana ínÿengaftaca jtsiyenana, chca, nÿetsca entsanga chamotsamama ntšamo Bëngbe Bëtsabe bominjñe tšabá yomncá.

## 4

### *Smochtsiyena Bëngbe Bëtsá tšëngaftangbeñe jtsemándayëse*

1 ¿Ndayentsana chë tšëngaftanga jtsentsjanayama y jtsenpenzëntsiayama yóbocana? Endóbocana chë tšëngaftangbe bacna juabnënguentsana, nÿe cach tšëngaftanga tšabá jtsomñama; y chë soyënga tšëngaftangbe ainaniñe sempre chë tšabe juabnëngama contra jësemnana.

2 Tšëngaftanga ndayánaca jtsebmnama šmojtseboše, pero chca jtsebmnama ndoñe šmontsobena, as jtseprontánana ínÿengbioye jtsëbáyama. Inÿa ntšamo tobomncá tšëngaftanga tša jtsántšabošana, y chë soye jashjáchama ndoñe šmontsobena ora, ínÿengaftaca jentjáyanangana y jtsenpenzëntsiayana. Ntšamo šmojtsebošcá ndoñe ntjobenayana jtsebmnama, Bëngbe Bëtsá chama ndoñe šmondbotjañe causa;

3 y chë soye šmojtjañe ora, tšëngaftanga ndoñe ntjójyëngacñana, ndoñe botamana chë soye šmondbotjañe

causa, er tšëngaftanga chë soye jtsebošana nje chaoservema oyejuayënga bacna soyënguine jtsomñama.

<sup>4</sup> ¡Tšëngaftanga, Bëngbe Bëtsá bobonshánana šmojtsajbananga! ¿Ndoñe šmondëtatšëmbo, chë jtsebošana nje quem luarama enójuabnayëngbe amigo jtsemnana y nje quem luarentša soyënga jtsebmnama, chca, canye entšá Bëngbe Bëtsabe uayayá jtsemnana? Ndánaca tojajuabó nje quem luarama enójuabnayëngbe amigo jtsemnana, chca, canye Bëngbe Bëtsábioye uayayá jóbemana.

<sup>5</sup> Ndoñe nje bonamente Bëngbe Bëtsabe uabemana palabrenguine mëntšá endayana: “Chë Bëngbe Bëtsá tbojanichmó bëngbe ainaniñe chaotsiyenama Uámana Espiritu, puerte entseboše nje Bëngbe Bëtsá canya bëngbe amëndayá chaotsemnana ca.”

<sup>6</sup> Pero Bëngbe Bëtsá, bëngbe tšabiama jtsejuabnayëse bënga jtsëjabuáchanana, chíyeca Bëngbe Bëtsabe uabemana palabrenguine mëntšá endayana: Bëngbe Bëtsá chë nje cachënga uámanënga tmojtsenobi-annangbe contra entsemna, y chë ndoñe uámanënga montsenobiamnangbiamna, Bëngbe Bëtsá más tšabe juabna entsebmna ca.

<sup>7</sup> Asna, tšëngaftanga šmochtseprontana nje Bëngbe Bëtsá chacmotsamëndama; ntšamo Satanás tcmojtsamëndacá ndoñe šmattsama, y cha cachora tšëngaftangbentšana echantsachá.

<sup>8</sup> Bëngbe Bëtsábioye šmochtobeconá, y cha echanjama tšëngaftanga ntšamo cha yomnana chacmotsësertánama. Tšëngaftanga bacna soye amënga, cach tšëngaftangbe cucuatšëngaca tšabe soyënga šmochtsama, bacna soyënga ndoñe. Tšëngaftanga chë inye ora jtsejuabnayana Bëngbe Bëtsá jtsebobonshánama, y inye orna, nje quem luarentša soyënga jtsebmnama, šmochtsajbaná bacna soyënga jamama bošana, chca, nje tšabe juabnënga tšëngaftangbe ainaniñe chašmotsebmnama.

<sup>9</sup> Tšëngaftangbe bacna soyëngama ngménaca šmochtsemna, šmochjenóbošachna y cochtsetšenánënga šmochjóyebuambaye. Jatenbiajuayamna, šmochjenóbošachna; y joyejuayëngamna, ngménaca šmochtsemna.

<sup>10</sup> Bëngbe Bëtsabe delante bëtšëtsanga ndoñe šmattsenobiamnaye, y cha más uámanënga cmochanjábiamna.

*Inyëngbiamna ndoñe ntsichámuana ndoñe tšabá tmonjama ca*

<sup>11</sup> Jesucristbeyeca catšátanga, inyëngbiamna bacna soyënga ndoñe šmattsóyebuambnaye. Nda cachabe catšatbiamna bacna soye tojtsichamo o tojayana ntšamo cha tojamcá ndoñe tšabá yontsemna ca, cha chora chë leyentša mandënga



ndoñe ntsocumplínana y jtsichámuana chë leyentša mandënga tondayama yontsoservena ca. Y chë leyama chca tcojt-sichámëse, cach ley jocúmplia cuenta, contsobiamná canÿe ichamuá chë ley aíñe o ndoñe yondoservénama, y chca ndoñe quecmátsmëna jtsamana.

<sup>12</sup> Chë ley tojuapormá cha nÿe canÿa endmëna, Bëngbe Bëtsá, y cachá endmëna ntšamo entšanga tmojamcá aíñe o ndoñe tšabá bëtsemnama ichamuá, y cachánaca entsobena entšanga játsebacama o nÿetsca tescama jácastigama. Y acna, ¿ndase cmëna ndëmua entšabiámnaca jobenayama jatichámuama ntšamo tojamcá aíñe o ndoñe tšabá bëtsemnama?

*Ndayá yëfse yochjatëchnënguama ndoñe ntsótatsëmbuana*

<sup>13</sup> Y mora quem soye šmochjouena, tšëngaftanga chë šmondbétsichamo: “Mënté o yëfse quemoye o chë inÿe bëtš puebløye fchanjanga, y chentše canÿe uata fchanjëftsemna ba soyënguiñe trabájayiñe, y ndegombre becá fchanjónÿena ca.”

<sup>14</sup> ¡Pero ni mo ndayá yëfse tšëngaftangaftaca yochjochnënguama ndoñe quešmátstatšëmbo! Tšëngaftanga ndoñe quešmátstatšëmbo ndayëntscuana vida šmochjëftsebomna, y chca, tšëngaftanga šmondmëna mo canÿe jantšetëshcá, chëshe mora jónÿnana y nÿe ndeolpe jatenatjëmbana. Tšëngaftangaftaca cachcá echanjopása.

<sup>15</sup> Tšëngaftanga mëntšá cmontsamna jayanama: “Bëngbe Bëtsá quešojalesenciase, ainënga fchántsemna y quem soye o chë soye fchanjama ca.”

<sup>16</sup> Pero chë cuenta, tšëngaftanga bëtš soyënga šmochjamama sempre jtsenábotamnyana, ndayá tšëngaftanga chašmomama Bëngbe Bëtsá yochjalesenciácá ntsetatšëmbcá; y chca jtsamana ndoñe tšabá quenátsmëna.

<sup>17</sup> Nda tojtsobena ntšamo tšabá yomncá jamama, pero ndoñe chca tonjama, cha canÿe bacna soye jtsamana.

## 5

*Chë bomnënga jábuayenama*

<sup>1</sup> ¡Quem soye šmochjouena, tšëngaftanga chë bomnënga! ¡Chë tšëngaftanga šmochtsesufrínama šmochjenóbošachna y uat-jananënga šmochtseyoye!

<sup>2</sup> Tšëngaftangbe bomnana buajónana janguánana entsemna, tondayama quenátoservena, y chë entšayëjuangá mejëjonga montsásá.

<sup>3</sup> Tšëngaftangbe castellano y midio tojtsengúsheshe; y chë ngúshesha echántsinÿinÿnaye tšëngaftanga chë crocenánaca ndoñe šmonjanmama ntšamo ínÿenga jujabuáchama yojamncá; chë causa, nÿetsca tescama cmochántsapochocaye, ntšamo

chë íñeshe canye soye endbetseepochocacá. Tšëngaftanga quem tempo bomnana šmojtsejuabá, y mora quem luare jopochócama ya entsobeco.

<sup>4</sup> Tšëngaftanga chë tšëngaftangbe fshantsënguñe tmojtsetrabajanga ndoñe šmontanëbuénaye, y mora šmochjouena, chënga chama cmontsachembuanama. Bëngbe Utabná nyets obenana bomná, chë trabajayëngbe chembuanana ya tojouena.

<sup>5</sup> Quem luarentse tšëngaftanga šmondoyena ba botamana soyëngaca y nye ntšamo cach tšëngaftanga šmobošcá jt-samëse. Ntšamo canye uacná jóbana, minyicá tojtsemna ora, cachcá tšëngaftangbiana entsobeco chë te, ndaye ora Bëngbe Bëtsá echanjama castigánënga chašmotsemnama, er puerte bacna soyënga šmojama. ¡Chë castigo jtsebínynama tempo ya entsobeco!

<sup>6</sup> Tšëngaftanga, chë puerte tšabá amëngbiana šmojayana jóbanama yojt samna ca y šmojtsëbaye, chca ndoñe chaondëtsemnama chënga ndocá jamama ntsobercá.

*Chë uantado jtsemnana y chë Bëngbe Bëtsáftaca jencuéntama ora*

<sup>7</sup> Pero tšëngaftanga, catsátanga, uantádoca šmochjobátma Bëngbe Utabná yochjésabo orscama. Chë jajañe trabajayá tojtsobátmana bëtscá tšabe shajuanënga jobuátbanama, jtso-tocánana natsana uantádoca jobátmana chë jajañama uaftena tempo chaóshjanguama.

<sup>8</sup> Tšëngaftánaca uantadënga šmochtsemna, y tšëngaftangbe ainaniñe añemo chaotsemna, er Bëngbe Utabná mëntescana ndoñe bën y moye echanjésabo.

<sup>9</sup> Jesucristbeyeca catsátanga, ntšamo ínÿenga tmojtsamama ndoñe nye šmattsoquejana, Bëngbe Bëtsá tšëngaftangbiana ndoñe chaodayanama, ntšamo šmojóyebuambama ndoñe tšabá šmonjama ca. Y nda yochjayana ntšamo entsanga tmojamcá aiñe o ndoñe tšabá bëtsemnama, ya entsebeconá.

<sup>10</sup> Atšbe catsátanga, chë tempsquënga Bëngbe Bëtsabe juabna oyeuambnayënga, ndëmuanÿenga entsanga tmonjanabuayená Bëngbe Utabná jótsëmbonëse, chënga bëngbioye šonjëftsaniñyanÿiye ntšamo tmojansufrima, ntšamo šojtsamna uantadënga jtsemnana tmojtsesufrina ora; y chca tšëngaftanga cmontsamna jtsamana.

<sup>11</sup> Bënga chëngbiana fsëndbëtsejuabnaye oyejuayënga imojamna ca, chë tmojansufrí ora Bëngbe Bëtsábeñe imojanobátmana ainaniñe añemo jtsebomñese. Tšëngaftanga šmojouena ntšamo Job ainaniñe añémoca Bëngbe Bëtsábeñe yojanobátmana, puerte padecena soyënguñe yojasufrina ora; y šmondétatšëmbo ntšamo Bëngbe Bëtsá cabana

chábioye tbojancuedama, y chca yojamna Bëngbe Utabná entsangbiana puerte ngmená yómnayeca.

12 Pero masna, atšbe catšátanga, ndayá jamama chašmojašbuachená ora, chca ndoñe šmatjama jajúrase ni celocama, ni quem luarama, ni ndocna inye soyama. Tšëngaftanga aíñe ca jayanama šmojtsebošëse, nye aíñe ca šmochjayana, y ndoñe casna nye ndoñe; chca, Bëngbe Bëtsá ndoñe chaundayana ndoñe tšabá šmonjama ca júraye causa.

13 Nderado nda tšëngaftanguentšá puerte ngménaca tojtsemna, cha bontsemna Bëngbe Bëtsá chama jaimpádama. Y nderado nda oyejuayá tojtsemna, cha bontsemna jacántana Bëngbe Bëtsá jëtschuayama.

14 Nderado nda šocá tojtsemna, cha bontsemna chentša ošbuachiyëngcá enefjuanëngbeñe bëtšëjemëngcá amëndayënga jáchembuana, chënga Bëngbe Bëtsá chabiana chamoimpadama, y Bëngbe Utabná jótšëmbonëse aceitiye chamuanëtjuama.

15 Y tšëngaftanga, puerte jtsošbuáchiyëse Bëngbe Bëtsá chašmojaimpadá ora, chë šocá salud echántinýena, y Bëngbe Utabná echanjama cha tšabá cachiñe chaotsatsmënama; y nderado cha bacna soyënga tojamëse, Bëngbe Bëtsá bochantseperdóna.

16 Chíyecna, chë bacna soyënga šmojtsamama šmochjobuambaye, y Bëngbe Bëtsá nyëtscangbiana šmochtseimpadana, chca, tšabá mo shnanëngcá chašmotsemnama. Canya ndabiana Bëngbe Bëtsá tojayana chabe bominýiñe tšabia yomna ca, cháftaca tbojencuentá ora, chánaca ba tšabe soyënga jóyëngacñana, y jobenayana bëtš soyënga jamama.

17 Bëngbe Bëtsabe juabna oyebuambnayá Elías, mo cach bëngcá canye entšá inamna, y puerte jtsošbuáchiyëse ndoñe chaonduaftema Bëngbe Bëtsábioye tbojanimpadá ora, quem luariñe mo unga uata y tsëntsañe ndoñe tonjanafté.

18 Chentšana, Bëngbe Bëtsábioye cachiñe tbojtanimpadá ora, quem luariñe tojanafté y cachiñe chë jajañenache bëtscá saná yojsatsbinýna.

19 Atšbe catšátanga, nderado nda tšëngaftanguentšá tojt-sajbaná chë ndegombre soyënga jtsamana, pero inýa chábioye tbojuájabuache cachiñe chë tšabe benache cháuatishachama,

20 tšëngaftanga šmochtsetátšëmbo, ndánaca chë bacna soye amábioye tbojuájabuache chabe ndoñe tšabe videntšana cháuaisebocnama, cha chë nyëtsca tescama castigüentšana chábioye jatsbocana, y jamana ba bacna soyëngama cha perdonaná chaotsemnama.

# 1 San Pedro

## *Jacheuayama*

<sup>1</sup> Atše Pedro, Jesucristbe ichmoná, quem tsbuanácha sentsabiamná chë cachëngbe luarentše ndoñe mon-doyenëngbiama, chë Ponto, Galacia, Capadocia, Asia y Bitinia luarënguenache ujquëshenënga imoyenëngbiama.

<sup>2</sup> Sëntsabiamná chë Bëngbe Bëtsá Bëngbe Taitá tojánabacangbiama, ntšamo cachá jamama yojanjuabnacá y ntšamo jopásama yojantatšëmbcá, cabá chca ndochnëngo ora; Uámana Espíritbeyeca, Bëngbe Bëtsá tojama tšëngaftanga chabe entšanga chašmotsemnama, Jesucristo chašmotseyeunanama y Bëngbe Bëtsabe delante tšabá chašmotsatsmënama, bacna soyënga abuajuánënga. Y Bëngbe Bëtsá chca tojanma, Jesucristbe buiñe juabuáshanëse, cha tojanóbanayeca. Atše bëtscá sëntseimpadana Bëngbe Bëtsá, chaoma tšabe bendicionënga tšëngaftangbeñe chaotsemnama, y chaoma tšëngaftangbe ainaniñe tšabe ebionana chašmotsebomnama.

*Bëngbe Bëtsábeñe jtsošbuáchiyëse vida jtsebomnana, atsebácanëngajtsemnama*

<sup>3</sup> Bëngbe Bëtsá y Bëngbe Utabná Jesucristbe Taitábioye matschuanga; cha puerta lastemado ínÿengaftaca yómnayeca, tojanma bënga tsëm juábnaca vida chamotsebomnama, bëngbioye bacna soyënga jabuajuánase, Jesucristo cháuatayenama tonjánmayeca. Chíyeca bënga montsobena chábeñe jtsobátmanana sempre y nyetsca tescama, ndayá cha šochjátšatayama.

<sup>4</sup> Ndayá bënga šochjátšataycá ndoñe quenátsmëna jëftsopochócama opodena soyënga, ndayá nyets tempo tšabe soyënga. Y bënga mondobátmana jóyëngacñama ndayá Bëngbe Bëtsá chabe entšanga jatšatayama tojašebuachenacá, ndayá celoca bëngbiama cha yojtsinÿena.

<sup>5</sup> Chë soyënga tšëngaftangbiama entsemna, Bëngbe Bëtsábeñe šmošbuáchema; cha chabe obenánaca cmondánÿena, tšëngaftanga jätsebacama. Cha chca jamama ya tojaprontá y echanjínÿanÿiye, Cristo jésabama tempo chaojóshjango ora.

<sup>6</sup> Chíyeca tšëngaftanga tša oyejuayënga šmojtsemna, masque nderado jtseytana inÿe ora, nyetsca padecena soyënguiñe jasúfriase chašmuachnënguama.

<sup>7</sup> Mo chë castellanama jtsetatšëmbuama aíñe o ndoñe tšabe castellano tomnama iñiñe fjuchnëngcá, padecena soyënguiñe tšabá chašmojachnënguse, Bëngbe Bëtsá

echanjínjānyīye tšēngaftanga ndegombre taišmošbuáchema. Chē castellano pronto endbetsopochóca, masque chca, chana puerte endbetsámāna. Y tšēngaftangbe ošbuáchiyana chē castellanama puerte más enduámāna. Tšēngaftanga padecena soyēnguentšana bēts ošbuachiyánaca chašmojábočnēse, Jesucristo chaojésabo ora, entšanga mochanjinjē tšēngaftanga šmojtsomerecena chacmotsatacheuanama, más bētsētsanga y obenēnga chácmbiamama y uámanēngnaca.

<sup>8</sup> Tšēngaftanga Jesucristo šmondbobonshana, y chábioye ndoñe chešmátaninjē; masque mora cha ndoñe quešmatonjā, tšēngaftanga chábeñe šmontsošbuaché, y šmontsebmna canjē puerte tšabe oyejuayana, y ntsachetšá chana yomnana ndoñe quešmátobena jayanama, tša bētsá causa.

<sup>9</sup> Chca oyejuayana tšēngaftanga šmontsebmna, er ndayá tšēngaftanga jtsošbuáchiyēse šmobatmancá, ya šmojtsosháchichana, chē Bēngbe Bētsá tšēngaftanga jtsatsebacayana.

<sup>10</sup> Bēngbe Bētsabe juabna oyebuambnayēnga ya imojanatsjendá y imojanguá jtsetatšēmbuama, ntšamo Bēngbe Bētsá entšanga játsebacama, y tmojanoyebuambá ndayá Bēngbe Bētsá tšēngaftanga jatšatayama, tšēngaftangbiama tšabe juabna cha yobómnayeca.

<sup>11</sup> Chēngbe ainaniñe yojtsemna Cristbe espíritu, y ntšamo tojanēyancá, cabá chca ndochnēngo ora, yojamna Cristo jasúfriama y ntšamo chentšana Bēngbe Bētsá chábioye puerte bētsá bochjānbemama, Bēngbe Bētsabe juabna oyebuambnayēnga imojanjuabná y imojanatsjendá jtsetatšēmbuama chē soyēnga yochjanopása ora, ndaye tempo y ntšamo chē tempo yochtsemnama.

<sup>12</sup> Pero tempo Bēngbe Bētsá chēngbioye tojaninjānyé, chca jtsamana ndoñe cachēngbe tšabiama yonjamnama, ndayá chca jtsamana yojamna tšēngaftangbe tšabiama. Chēnga tmojanoyebuambá, ntšamo chē tšabe noticiēnga oyebuambnayēnga tšēngaftanga tcmojauyancá. Y chca tcmojáuyana chē Uámāna Espíritbe obenánaca, nda Bēngbe Bētsá celocana thojichmó. Chē soyēnga endmēna ndayá chē angelēnga muantseboše tšabá jinjāma, chēnga chaósertama.

*Bēngbe Bētsá entšanga jtsachembuanana chabe entšangcá chamotsiyenama*

<sup>13</sup> Chíyeca, botamana jtsejuabnayēse tšabá jatrabájama, y cach tšēngaftanga jenomándama jtsoobenēse, yejuana šmochtsobátmana, Bēngbe Bētsá soyēnga cmochjátšatayama tšēngaftangbe tšabiama jtsejuabnayēse, Jesucristo quem luaroye yochjésabo ora.

14 Tšëngaftanga Bëngbe Bëtsabe básenga uauenanënga quet-somñecá, ndoñe šmattsiyena ntšamo cach tšëngaftangbe bacna juabnënga yomncá nÿe tšabá jtsomñama, ntšamo Bëngbe Bëtsábioye cabá nduabuatma ora šmonjanbomncá.

15 Chamna, šmochtsiyena mo chë Bëngbe Bëtsabe entšangcá, puerte tšabe entšangcá jtsamëse, er Bëngbe Bëtsá, nda tcmojáchembo chca chašmotsemnama, sempre uamaná endmëna.

16 Er Bëngbe Bëtsabe uabemana palabrënguiñe mëntšá endayana: “Tšëngaftanga Bëngbe Bëtsábeñe uámanënga šmochtsemna, er atše uamaná sëndmëna ca.”

17 Tšëngaftanga Bëngbe Bëtsábioye šmondbuyana “Taita ca”, šmondbótšëmbona ora. Bëngbe Bëtsabiama nÿetscanga cachcá mondmëna. Chíyeca, ntšamo nÿetscanga tmojamama tšabá o ndoñe tšabá yontsemna ca cha yochjayana ora, cha chca echanjama nÿe ntšamo chënga tmojamcá jtsonÿayëse. “Taita ca” chábioye šmondbuyánayeca, quem luarentše šmochtsiyenëntscuana sempre šmochtsejuabnaye cha nÿetscangbiama más bëtsá yomnama, chë šmojtsama sóyeca chca jtsinÿanÿayëse.

18 Tšëngaftanga šmondëtatšëmbo, Jesucristo, mo nda ínÿengbioye játsebacama crocénana cuafjëtsajocá, tonjanóbana tšëngaftanga játsebacama, chë nÿetsca soyënga nÿe bonamente jtsamëse oyenentšana, ntšamo jtsiyenama tšëngaftangbe bëts taitángbentsana šmojanatsjinÿcá. Cristo ndoñe checmatanatsebacá, yopodena jtsopochócama soyënga jëtsjájuase, mo crocénana o castellancá,

19 ndayá cachá jóbane, chabe uamana buiñe juabuáshanëse. Cristo chë ndocna bacna soye ndbomná, tonjanóbana ora enjamna mo canÿe oveshatemcá, tondaye ndbemaná, ni tsengana ndbomná, Bëngbe Bëtsábioye jëtschuayama altaroca obaná.

20 Chama Bëngbe Bëtsá Crístbeñe tojanjuabó y tbojanábuayana, cabá quem luare ndëtsemna ora; pero quem tempo, Cristo entšangbeñe tonjábocna tšëngaftangbe tšabiama.

21 Crístbeyeca, tšëngaftanga šmondošbuaché Bëngbe Bëtsábeñe, nda tonjanma Cristo cháuatayenama y puerte uamaná tbonjánbema. Mëntšá, ndábeñe tšëngaftanga šmošbuaché y šmobátmana, Bëngbe Bëtsábeñe endmëna.

22 Tšëngaftanga šmojama ndocna bacna soyënga ainaniñe ntsebomnama, Jesucrístbeyeca catšátangbioye ndegombre jtsababuánÿeshanama, er tšëngaftanga ntšamo ndegombre yomncá jtsamëse, Bëngbe Bëtsá šmoyeunana. Chcasna, sempre nÿets ainánaca nÿetscanga šmochtsenbobonshana.

23 Bëngbe Bëtsá tojama tšëngaftanga tsëm vida

chašmotsebmoma; pero tšëngaftanga tsëm vida šmontsebmoma, ndoñe nÿe quem luarentša entsanga ndayá tmojamama, sinó ndayá Bëngbe Bëtsá chë ndocna te jobanamá tojamama. Cha chca tojama cachabe palábraca, ndayá endoyebuambná ntšamo entsanga muantsobena tšabe vida jtsebmoma y chë palabra ndocna te queochaisopochóca.

<sup>24</sup> Ntšamo Bëngbe Bëtsabe uabemana palabrenguñe endayancá:

Nÿetsca entsanga mondmëna mo shacuanca,  
y chënga imobomna tšabe soyënga, endmëna mo chë shacua-  
nentša uantšefjushangacá.

Chë shácuana jtsanctana y chë uantšefjushangá  
jtsatquécjanana;

entsanga cachcá, nÿets tempo quem luarentše ndoñe que-  
mochátiyena;

<sup>25</sup> pero Bëngbe Bëtsabe palabra nÿets tempo echanjesomñe ca  
—chiñe endayana.

Y chë palabra endmëna chë Jesucristbe tšabe noticiënga, chë  
buayénana ntšamo ínÿenga tcmojabuayenacá.

## 2

<sup>1</sup> Chcáyecna, nÿetsca tescama šmochtsajbaná nÿetsca bacna  
soyënga amana, ínÿengbioye áingñayana, bacna entsanga chë  
ntšamo ndegombre šmojuabnacá ndinÿinÿnayënga ntsem-  
nana, ínÿengbioye untšabošana, y ínÿengbiama uayátsenayana.

<sup>2</sup> Mo cabá mora onÿnana šešoncá, tša jtsebošana chabe  
mamabe létsiye, cachcá tšëngaftanga cmontsamna puerta jt-  
sebošana nÿets tempo Bëngbe Bëtsabe soyënga jtsebmoma,  
chë soyëngaca Jesucristbeñe corente chašmotsošbuáchema, y  
chca, atsebácanënga chašmotsemnoma;

<sup>3</sup> ntšamo Bëngbe Bëtsabe uabemana palabrenguñe  
endayancá: “Tšëngaftanga šmojátatšëmbona Bëngbe Utabná  
puerte tšabia nÿetscángaftaca yomnoma ca.”

*Cristo, chë mo aina ndëtšbecá endmëná*

<sup>4</sup> Bëngbe Utabnábioye šmochtobeconá, nda endmëna mo  
canÿe aina ndëtšbecá, ndëmuanÿëse tojtsama entsanga tšabe  
vida chamotsebmoma. Báseftanga cha tmojtsaboté, mo  
ntšamo chë ndëtšbéngaca canÿe yebna tmojtsejebuana ora, lu-  
aroca tmojtsejajó ndëtšbecá; pero Bëngbe Bëtsá chábioye tbo-  
juábuayana, y chabe bominÿiñe cha puerta uamaná endmëna.

<sup>5</sup> Chábioye šmochtobeconá, tšëngaftanga chë tšabe  
vida šmojóyëngacñënga, cánÿiñe mo aina ndëtšbéngcá,  
Bëngbe Bëtsabiama jajebuama canÿe yebnentsama  
chašmotsemnoma; mo Bëngbe Bëtsabiama bachnangcá

chašmotsemnama, nÿe Bëngbe Bëtsábioye jtseservénama jtsentsénese, chábioye jtsatschuanayama. Ntsamo Bëngbe Bëtsábioye jtseservénama šmojtsamcá, chábioye tšabá jtsinÿanana, ndayá Jesucristo tojanmama.

<sup>6</sup> Chca ndegombre endmëna, er Bëngbe Bëtsabe uabemana palabrënguiñe, Bëngbe Bëtsá Jesucristbiana mëntšá tojánayana:

Smochjinÿe, atše sënjama Jerusalenentše canÿa chaotsemna, y cha endmëna mo chë canÿe yebna jajebuámentše chë más bëts uashacuanësentše jajona ndëtšbecá.

Cha atšbe Uabuayaná endmëna, y atšbiana puerte enduámana.

Nda chábeñe tojtšošbuaché, ndocna te nÿe bonamente chábeñe queochátobatmana ca.

<sup>7</sup> Tšëngaftanga, chábeñe ošbuáchiyëngbiana, nda endmëna mo chë yebna jajebuámentše más bëts uashacuanësentše jajona ndëtšbecá, cha puerte enduámana; pero chábeñe ndošbuáchiyëngbiamna, entsopasana ntsamo Bëngbe Bëtsabe uabemana palabrënguiñe Cristbiana endayancá:

Chë yebna jebuanënga tmontsanaboté ndëtšbé,

mora chë más bëts uashacuanësentše entsejájona ca.

<sup>8</sup> Inÿoca, Bëngbe Bëtsabe uabemana palabrënguiñe mëntšánaca chabiana endayana:

Cha endmëna mo ndëtšbé ndayentše jtsojestjiamcá;

y mo peñescá yomna chënga chamotsótsatsama ca.

Chënga Jesucristo jtsabotena, chabe buayenánana ndoñe ntjoyeunaycá; Bëngbe Bëtsá cabá chca ndopása ora tojanjuabó chca chaotsemnama.

<sup>9</sup> Pero tšëngaftanga šmondmëna Bëngbe Bëtsábeyeca bocacánënga, y mo canÿe rey tmojtseservena bachnangcá, y šmondmëna Bëngbe Bëtsabe entšanga nÿe chabiana jtsetrabájayama, y chë nÿe Bëngbe Bëtsábënga šmomnënga. Y chca endmëna, tšëngaftanga chë bëts soyënga ntsamo Bëngbe Bëtsá tojamcá chašmotsabuayiynama. Cha endmëna nda tcmojáchembo chašmotsajbanama oyenana mo ndoñe binÿniñcá jtsejuabnaye y jtsamëse, cháftaca jtsemnama chašmotsobenama, chë tšëngaftangbe juabnënga puerte binÿnayáftaca.

<sup>10</sup> Tempo tšëngaftanga ni mo cánÿentša entšangcá ndoñe quešmënjatsmëna, nÿe ujquëshenënga; pero mora, Bëngbe Bëtsabe entšanga šmontsemna; tempo šmonjamna entšanga ndocná tonjánalastemanga, pero mora, Bëngbe Bëtsá aiñe lastemado tšëngaftangftaca entsemna.

*Bëngbe Bëtsá jtseservénama jtsiyenana*



11 Atšbe bonshánënga, ndayentše tšëngaftangbe ndegombre luare yomna, celoca endmëna, y muentše quem luarentše, tšëngaftanga šmondmëna mo ínÿoicana ashjajnëngcá, y mo canÿe luarëjana nÿe achnëjuanëngcá, cach tšëngaftangbe luaroye átaiñe. Chíyeca cbontsaimpadana, ndoñe chašmondëtsama soyënga ntšamo chë šmobomna bacna juabnënga tomncá, ainaniñe bacna soyënga bomna causa; chca juabnënga ainaniñe jtsenpenzétsiyana, chentše jtsemándayama y Uámana Espíritu ndoñe chaondëtsemándama.

12 Chë Bëngbe Bëtsábioye nduabuatmëngbeñe sempre šmochtsiyena tšabá jtsamëse; chca chënga, masque mora tšëngaftangbe contra imojtsoyebuambná, tšëngaftanga mo bacá uamana entšanga cuaftsemnëngcá, chë tšabe soyënga ntšamo tšëngaftanga šmojtsamcá chamuinÿama, y chca, Bëngbe Bëtsá chëngbioye chaojenonÿinÿé te, chábioye chënga chamotsatschuanama.

13 Bëngbe Bëtsá šmoyeunanama, nÿetsca entšanga mando bomnëngbioye šmochtsobedecena; chë Romoca bëts mandádbioye, cha chë quem luarentša más uámana puesto jtsemándayama endbómnyeca;

14 y chë tšëngaftangbeñe mandadëngbióynaca, ndëmuanÿenga cha jíchamuana chë bacna soyënga amënga jácastigama, y chë tšabe soyënga amëngbiamá tšabá imojtsama ca chamuayanama.

15 Chë mando bomnëngbioye šmochtsobedecena, er Bëngbe Bëtsá endboše tšëngaftanga tšabe soyënga chašmotsamama, chca, chë ndosertánënga chë tšëngaftangbiamá podescá ichámënga, ntšamo ndegombre yomncá ntsetatšëmbcá, tondaye chamondëtsebomna tšëngaftangbe contra jayanama.

16 Smochtsiyena tšabá jtsamëse, mo chë ya ndoñe más bacna soyëngaca y bacna juabnëngaca ndëmandanëngcá; pero chca šmojtsemnama ndoñe šmattsejuabnaye nÿe ndaye bacna soye jamama šmojtsobena ca, y nÿe chca šmochjátama. Más tšabá endmëna jtсийenana, mo chë Bëngbe Bëtsá imoser-venëngcá.

17 Nÿetscangbiamá respeto šmochtsebomna, chë Jesucristbeyeca catšátangbioye šmochtsababuánÿeshana, siempre šmochtsiyena Bëngbe Bëtsabiamá jtsejuabnayëse cha chë más bëtsá yomnama, y chë Romoca bëts mandado šmochterrespetana.

*Cristo chabe entšanga tojinÿanÿé ntšamo yomna jasúfriana*

18 Tšëngaftanga, chë nÿets tempo ínÿabiamá canÿe yebnentše oservënënga, tšëngaftangbe nduiñëngbioye šmochtsayaunana, puerte respeto chëngbiamá jtsebomnëse; y ndoñe nÿe chë

tšábengbioye y n̄ye tšabá mandbomn̄ngbioye, ndayá ch̄e bacá mandbomn̄ngbioynaca.

<sup>19</sup> Nderado nda, ntšamo B̄ngbe B̄tsá yobošcá jamama bošama, tojoboyá chabe nduiño cha chaosufrima tojtsama ora, masque chama jasúfriama ndoñe t̄bondm̄ena, chca jam̄ese, B̄ngbe B̄tsá corente tšabá jtsin̄yanana.

<sup>20</sup> Er nderado tcmojtsacastigá ndaye bacna soye šmojama causa, y chora tša uantad̄enga chiñe šmojachn̄engo, ch̄e soye ndoñe yapa ntsámanana. Pero tšabe soȳenga šmojtsama y ch̄e causa šmojtsesufrina, y tša uantad̄enga chiñe šmojachn̄engo, ch̄e soye cocayé B̄ngbe B̄tsá corente tšabá jtsin̄yanana.

<sup>21</sup> Chca cmontsamna, er B̄ngbe B̄tsá tcmojánachembo tšabe soȳenga jamama y chca jasúfriama; chca ndegombre endm̄ena, er Cristo tš̄engaftangbiamna tonjansufrí, y chca cha tcmontanin̄yan̄yé, ntšamo jamama cmojtsamna, tš̄engaftanga chca chašmotsamama.

<sup>22</sup> Cristo ndocna te ndocna bacna soye chen̄áisema, ni ndocn̄abioye chebn̄aiseingñe.

<sup>23</sup> Chábioye tmojtsoyenguá ora, ch̄ngbioye ndoñe nt̄eyánguanguana. Cha chaosufrima tmonjanma ora, cha ndocá nt̄jat̄s̄ets̄snayana jaút̄at̄jayama, ndayá B̄ngbe B̄tsábeñe jtošbuáchiȳese, ch̄abeñe yojanobátmana. B̄ngbe B̄tsá ntšamo n̄yetscanga tmojamama tšabá o ndoñe tšabá yonjamna ca yochjayana ora, chca echanjama n̄ye ntšamo ch̄nga tmojamcá jtson̄yaȳese.

<sup>24</sup> Cristo cruciñe tonjanóbana ora, cha tonjansufrí ch̄e castigo, ch̄e b̄ngbe bacna soȳengama cach b̄nga šojánamna jasúfriama castigo, b̄nga ch̄e bacna soȳenga jamama juabn̄engaca ndoñe más mandán̄enga chamond̄etsemnama, y b̄nga ntšamo B̄ngbe B̄tsabe bomin̄yiñe tšabá yomncá jtsam̄ese chamotsiyenama. Er Crístbioye ch̄nga tmonjanlisiá chaóbanama y tonjansufrí joban̄entscuana, y chca, b̄nga šonjanatsebacá.

<sup>25</sup> Er tš̄engaftanga, tempo B̄ngbe B̄tsábentsana b̄noca šmonjamna, mo ótsena ovesh̄ngcá; pero mora Cristbe benache šmojtishache, y cha cmontsan̄yena, mo ovesh̄ngbe can̄ye abuañ̄yácá, y cha entsant̄ješna tš̄engaftanga tšabá chašmotsemnama.

### 3

#### *Ntšamo iuamna ch̄e bouamn̄ngbioye jtsiyenana*

<sup>1</sup> Cachcá mo ch̄e oserven̄ngcá, tš̄engaftángnaca sh̄émanga, tš̄engaftangbe boyángbioye šmochtsayaunana, chca, ch̄e B̄ngbe B̄tsabe buayenana soȳenguiñe ndošbuáchiye boyángbioye chašmobená jáȳenjanama, Jesucrist̄beñe chamotsošbuáchema,

ntšamo tšëngaftanga šmojtsiyenama. Ndoñe queochátsiyta chë buayenánama chënga jatëtsëtsnayana,

<sup>2</sup> er chënga mochanjinÿe tšëngaftanga šmojtsiyena, Bëngbe Bëtsá nÿetscangbiana más bëtsá yomnama sempre jtsejuabnayëse, y ntšamo šmojtsamcá chca yojtsinÿinÿnáyeca.

<sup>3</sup> Cach tšëngaftangbiana ndoñe mëntsá šmattsejuabnaye: “Entšanga atše botamaná tsmëna ca chamotsejuabnama atše nÿa mo chca chantenochquëca, chantenóbotamaye ba castelano soyëngaca o ba uámana entšayangá chantichëtjo ca”;

<sup>4</sup> ndayá chca chaotsemna, ntšamo tšëngaftanga chë Uámana Espíritbeyeca mandánënga jtsemnëse ainaniñe šmojuabnama, cmëbionama y šmobošama; ndocna te ndopochócaye botamanana jtsebonnama, ainaniñe nÿe cach tšëngaftanga uámanënga jenobiamama juabnënga ntsebonncá, pero aiñe ainaniñe tšabe ebionana jtsebonnëse. Chë soyënga Bëngbe Bëtsabe bominÿiñe puerte enduámama.

<sup>5</sup> Tempo chca, chë puerte tšabe shembásenga, chë Bëngbe Bëtsabe bocacanënguentsënga, imojanamana jtenóbotamayana; chënga Bëngbe Bëtsabeñe imojtsanošbuaché y chábeñe imojanobátmana, y nÿetscanga chëngbe boyángbioye imojánayaunana.

<sup>6</sup> Chca yojamna Sara, Abrahámbioye ibnayeunana y chábioye “Taita ca” ibojanábobuatma. Tšëngaftanga Sarabe bembangcá jtsemnana, tšabe soyënga šmojtsamëse, y tondayama uatjana šmontsebonnëse.

<sup>7</sup> Cachcá, tšëngaftanga boyanga, cada ona cachabe shémaftaca chaotsiyena, tšabá jtseñeÿeunanëse, y cha respeto buajoná chaotsemnana jtsamëse; pero chca, ndoñe nÿe cha acbiana más batšá obenana bonná bëtsemnama, ndayá Bëngbe Bëtsá chabiana tšabe juabna yobómnayeca, ntšamo cach aca tšabe vida tcmojašbuachenacá chábioynaca tbojašbuáchenama. Chca šmochtsama, Bëngbe Bëtsáftaca jencuëntama totcá chaondëtsemnana.

### *Chë tšabe soyënga amama jasúfriama yojtsamnënga*

<sup>8</sup> Y morna, nÿetsca tšëngaftanga cachcá šmochtsejuabnaye, inÿenga šmochtsalastemana, chë Jesucristbeyeca catšátangbioye šmochtsababuánÿeshana, inÿengbiana chacmóngmiaye, y cada ona chaotsejuabná chë inÿenga chabiana más uámanënga imomna ca.

<sup>9</sup> Inÿenga tšëngaftangbiana ntšamo tcmojaborlá ora, ndoñe šmattëchenanguaye; ni chacmojtsëyanguá ora, chëngbioye ndoñe šmattoyánguango. Chca játamama cuentna, Bëngbe Bëtsá šmochjaimpáda, chëngbeñe tšabe bendicionënga chaotsemnama cha chaomama, er Bëngbe Bëtsá tcmojáchembo chca

chašmotsamama, y Bëngbe Bëtsábiocana tšabe bendicionënga chašmosháchiñama.

<sup>10</sup> Ntšamo Bëngbe Bëtsabe uabemana palabrenguine endayancá:

Nda toboše tšabe vida jëftsebomnama y puerta oyejuayá tempënga jtsebomnama, yejuana chaochsenojuabná bacna soyëngama ndoñe chaondëtsóyebuambnama, y ndoñe chaondëtsebosterama.

<sup>11</sup> Bacna soyënguentsana chaotsojuánañe y tšabe soyënga chaotsama, natjëmbana nyetscángaftaca jtsiyenama chaotseboše, y chca chaotsemnama sempre chaotsentšena.

<sup>12</sup> Chca bontsemna jamana, er Bëngbe Utabná, chabe bominyiñe tšabe soyënga amëngbioye jtsanyenana, chëngbiama sempre jtsantješnëse; y sempre chëngbioye jtsayaunanana, chábioye ndayámncata tmojtsotjanañe ora; pero chë bacna soyënga jamana uamanëngbe contra cha jtsemnana ca —chiñe endayana.

<sup>13</sup> ¿Nda nanjobenaye tšëngaftangbiama bacna soyënga jamama, tšëngaftanga chë tšabe soyënga jamama sempre šmojtsentšënëse?

<sup>14</sup> Pero masque tšëngaftanga cmojtsamna jasúfriama tšabe soyënga šmojtsamama, Bëngbe Bëtsá chama tšabe soyënga cmochántatšataye. Chë tšëngaftanga chašmosufrima amëngbiama ndoñe matauatjëngana, ni ainana tsetšenánënga ndoñe matsmënëngana,

<sup>15</sup> ndayá ainaniñe sempre šmochtsejuabnaye Cristbiama mo Bëngbe Utabnacá y chabiama respeto šmochtsebomna; y sempre šmochtseprontana jojuama ndëmuanyënga tcmojtsatjaná ndáyeca tšëngaftanga Bëngbe Bëtsábeñe jtsošbuáchiyëse, chabiama ainaniñe šmobátmanama.

<sup>16</sup> Pero chca šmochjama tšabe ainánaca jtsënyayëse y Bëngbe Bëtsabiama respeto jtsebomnëse. Smochtsiyena tšabá jtsamëse, y chama ainaniñe ndoñe chašmondëtsebomna juabnënga y chamuayana chca ndegombre ndoñe tšabá šmontsama ca, chca, ingyënga tšëngaftangbiama podessa chamojtsoyebuambná ora, tšëngaftanga Crístbeñe ošbuáchiyënga quetsomñecá tšabe soyënga šmojtsamama, chënga chamotsëuatja chca tmojtsóyebuambnama.

<sup>17</sup> Más tšabá endmëna jasúfriana tšabe soyënga tcojamama, nderado Bëngbe Bëtsá chca chaotsemnama tojtsebošëse, y ndoñe chë jasúfriana ndaye bacna soye tcojamama.

<sup>18</sup> Er Cristo nyë canyë tonjanóbana bënga bacna soyëngama jáperdonama; chë nyetsca soyënguine tšabá amá,

chë Bëngbe Bëtsabe bominiñe ndoñe tšabá yondmëna soyënga amëngbiama, tšëngaftanga Bëngbe Bëtsáftaca chašmotsatsmënama. Entšacá, Cristo tonjanóbana, pero Bëngbe Bëtsá tonjanma, cha cachiñe vida chabe espiritiñe chaotsatsbomnana.

<sup>19</sup> Pero Cristo cháuatayenama Bëngbe Bëtsá cabá ndëma ora, chabe espiritiñe cha tojána chë ndoñe tšabe entsanga imonjamnëngbe espíritënga utámenënga imojamnoye, chëngbiama castigo tojtsemnëntscuana; y cha tojanayënjanama chënga tojanabuayená.

<sup>20</sup> Quem espíritënga bayté entsemna, Bëngbe Bëtsábioye ndoñe monjánëyeunana, Noebe yojëtsiyena ora, chë bacna soyënga amënga chca amama chamotsajbanama y tšabe benache chámuatishachama Bëngbe Bëtsá bën yojanobátmana ora, barquësha canduapormantscuana. Chentšana chë barquëshañe báseftanga tmojanotsbocá, posufta entsanga, búyeshe juatsbuacá chë barquësha yojtsámnayeca.

<sup>21</sup> Chë chënga chamótsbocama tojanëjabuache béjaye, enjamna mo chë mora jenábayama buyeshcá, chca, atsebácanënga bënga chamotsemnana. Pero tmojenábaye ora, bënga atsebácanënga jtsemnana, ndoñe chë cuerpentša tsengá tmojtšenóbolimpiana, ndayá bëngbe ainaniñe ndocna bacna juabnënga ntsebomnana Bëngbe Bëtsá tmojtseimpadánama; y bënga atsebácanënga mondmëna, Jesucristo cháuatayenama Bëngbe Bëtsá tojánmayeca.

<sup>22</sup> Cristo celoye tojtantsjuá y Bëngbe Bëtsabe catsbioica yomna jamándama. Cha endmëna chë amëndayá angelëngbiama y espíritënga mando y obenana bomnëngbiama.

## 4

*Entšanga entsamna jtsiyenana ntšamo Bëngbe Bëtsá yobošcá*

<sup>1</sup> Chcasna, ntšamo Cristo tojansufricá, chabe cuerpiñe mo entšacá játssetšenëse, tšëngaftángnaca cmontsamna jtseprontánana chca jasúfriama. Er chë Crístbeñe ošbuachiyá nda chabe cuerpiñe tojasufrí, chë bacna soyënga amentšana tojtsojuánañe,

<sup>2</sup> chca, chabe vidiñe, morscana y jobanëntscuana, jëtsiyenama ntšamo Bëngbe Bëtsá yobošcá, y ndoñe nÿe entsangbe bacna juabnëngaca, nÿe quem luarentše tšabá jëftsemnana.

<sup>3</sup> Tempo, bayté enjamna, ndayëntscuana tšëngaftanga šmonjánama soyënga, mo chë Bëngbe Bëtsábioye nduabuátmënga mondbetsamcá; nÿa ndoñe más. Chë tempo, tšëngaftanga šmonjaniyena nÿetsca bacna soyënga jtsamëse,

jenomándama ntsobencá; tšëngaftanga šmonjánama soyënga nÿe ntšamo šmojanbošcá, nÿe tšëngaftanga tšabá jtsomñama; šmonjanamana jotmenangana y ba fiestënga jtsebo mnana, y chora chë ófjanënga tša jtsetmoyana y tša jtseyoyana, y ba uabouana soyënga šmonjanamana jtsamana chë diosënga yojamna ca šmojanjuabná soyënga jadórama.

4 Morna, chë Bëngbe Bëtsábioye nduabuátmënga montsenjnaná, tšëngaftanga ya ndoñe más bacna soyënga jtsamëse šmojtsiyenama, ntšamo tempo šmonjaniiyena, ntšamo chënga jtsamëse mondoyena, jenomándama ntsobencá; y chë causa, chënga bacna soyënga tšëngaftangbiana jtsóyebuambnayana.

5 Pero chënga echanjótocaye jayanama ndáyeca chca tmojamama, chë entšangbiana, chë ainënga y chë ya mochjóbanëngbiana, ntšamo tmojamama, aíñe o ndoñe tšabá bëtsemnana jayanama entseprontanabe delante.

6 Chíyeca, Crístbeñe ošbuáchiyënga, chë mora obanënga imojtsemnënga, ainënga monjamna ora, ínÿenga chë tšabe noticiëngama chëngbioye monjanabuayiyná, chënga chamobenama chë nÿetsca tescama yomna tšabe vida chëngbe espíritoftaca jtsebo mnana, ntšamo Bëngbe Bëtsá yobomncá; masque mora quem luarentše, chëngbe cuerpo tojóbana, er Bëngbe Bëtsá tojayana nÿetsca entšanga yojtsamna jóbanama ca.

7 Ndoñe bayté y nÿetsca soyënga echanjopochóca. Chíyeca, tšëngaftanga cmontsamna botamana jtsejuabnayana y jenomándama jtsobenana, Bëngbe Bëtsáftaca jencuéntama chašmotsobenama.

8 Nÿetsca soyëngama, masna, sempre nÿetscanga puerta šmochtsenbobonshana, er nda ínÿenga puerta tojtsababuanÿeshaná, sempre jtseprontánana ínÿenga jáperdonama, chëngbiana bacna soyënga tmojamama.

9 Nÿetscanga šmochtsamana tšëngaftangbe yebniñe jenofjana, chca jamama totcá yojtsemna ntjatichamcá.

10 Nÿetsca tšëngaftanga Bëngbe Bëtsá tmojatsatá obenana tšabe soyënga jamama; chca, chë obenánaca cmontsamna jtsamana soyënga chë ínÿengbe tšabiana, chë Bëngbe Bëtsá cmojatsatá nÿets obenánaca ínÿengbioye jujabuáchama, nÿets tempo tšabe soyënga jtsamëse.

11 Nda tojtsabuayiyná, Bëngbe Bëtsabe palabra chaotsabuayiyná mo Bëngbe Bëtsá chabijana cuaftsoyebuambnacá; nda ínÿenga tojtsaserverna, chca chaotsama chë Bëngbe Bëtsá yojtsama cha chaotsebo mnana obenánaca. Nÿetsca soyënga ntšamo šmojtsamcá chaotsinÿanÿná Bëngbe Bëtsá puerta uamaná y obená bëtsemnana, Jesucrístbeyeca.

Chca šmochtsama, er Bëngbe Bëtsá puerte uamaná endmëna y obenana endbomna nyets tempo y nyetsca tescama. Chca chaotsemna.

*Puerte tšabá endmëna, Crístbeñe tcošbuáchema, jasúfriama tbojtsemnëse*

<sup>12</sup> Atšbe bonshana entšanga, ndoñe šmattsenjanaye padecena soyënguiñe šmojtseufrínama; chiñe jtsinynana ntsachetšá ošbuáchiyana šmobomnama. Chca ora ndoñe šmattsejuabnaye, tšëngaftanga ndoñe cmondamna chca soyiñe jtsachnějuanana ca;

<sup>13</sup> chamna, šmochjóyejuaye chë ntšamo Cristo tojansufricá šmojtseufrina ora, chca, Cristo corente obenánaca y uamanacá entšangbeñe chaojtonyná te, tšëngaftanga puerte chašmotsóyejuama.

<sup>14</sup> Puerte šmochtsóyejuaye, nderado nda tcmojoyánguango Cristbiana bétoservenayeca, er Bëngbe Bëtsabe Espíritu, chë corente bëtsá endmëná, sempre tšëngaftangbe ainaniñe iuétsemna.

<sup>15</sup> Tšëngaftanguentše ndocná chabondétsemna jasúfriama inya óbanaye causa, atbëbanama, bacna soyënga ínÿengbiana amama, o ínÿengbe soyënguiñe ontremeténama.

<sup>16</sup> Pero Cristbe ustoná tomnama tojasufri, chama ndoñe chaondëtsëuatja; chamna, Bëngbe Bëtsábioye chabotsatschuaná, cha Cristbe ustoná bétsemnama.

<sup>17</sup> Er chë tempo ya tojobuache, Bëngbe Bëtsá jayanama, cach Crístbeñe ošbuáchiyëngbiana, chabe entšangbiana, tšabá o ndoñe tšabá tmonjamama. Cha chca bëngbiana jayanama tojontšese, chë chabe palabra ndobedecenëngaftaca yochjanopasacá puerte uabouana echántsemna, cha chëngbiana chca chaojayana ora.

<sup>18</sup> Y chca, chë Bëngbe Bëtsabe bominyiñe tšabá amabiana ndoñe paselo atsbocaná jtsemnama tontsemnëse, ¿ntšamo yochjopása chë Bëngbe Bëtsábioye ndoñe adórayënga y chë bacna soye amëngaftaca?

<sup>19</sup> Chcasna, chë imosufrinëngaftaca Bëngbe Bëtsá chca yobóseyeca, entsamna chë tšabe soyënga jtsamana y Bëngbe Bëtsabe cucuatšiñe chëngbe espíritu chamoboshjona cha chaotsinÿenama, er cha chënga tojánabiana, y nyetsca soyënguiñe tšabe palabra bomná cha endmëna.

## 5

*Crístbeñe ošbuáchiyënga jábuayenama*

<sup>1</sup> Y mora, chë tšëngaftangbentše ošbuachiyëngcá ene-  
fjuanëngbeñe bëtšëjemëngcá amëndayënga chanjabuayená, atše cach tšëngaftangcá bëtšëjema, canÿa ntšamo Cristo

tonjansufricá tonjaninýa y chama ínýenga tonjanéyana, y canya ndábioye cach tséngaftangcá Bèngbe Bètsá bochjábema más uámana y bètsá, Cristo entsángbeñe chaojtonýná ora; tséngaftanga cbabuayená.

<sup>2</sup> Ošbuáchiyènga šmochtsanýena; chénga chašotsanýenama Bèngbe Bètsá chca tcmojábíama. Chca, chentša ošbuachiyèngbeñe šmochtsama ntšamo canye tsabe abujénýa chabe oveshéngaftaca endbetsamcá. Bèngbe Bètsabe trabajo ndoñe šmattsama, nýe cmojtsétocanama, ndayá chca jamama šmojtsebóšeyeca. Chca ndoñe šmatjama nýe paselo crocénana juácánama, ndayá ínýengbioye jujabuáchama tša šmobóšeyeca.

<sup>3</sup> Chè cmojtsamna jtsanýenama ošbuáchiyènga ndoñe nýe bètscá šmattsaméndaye, mo chéngbe nduiñènga cuafjatsmèngcá, ndayá ntšamo tséngaftanga šmojtšiyenama, chénga šmochjínýanýiye ntšamo yojtsamna jtsiyenana.

<sup>4</sup> Chca, chë bènga nýetscanga, mo chë tsabe abujénýacá šuanýená, quem luaroye yochjésabo ora, mo canye uabuashinýinýana coronèsha ndocna te tontsandbemèshacá, tséngaftanga canye bèts uacanana soye šmochanjóyèngacñe, y chë soye endmèna nýetsca tescama; Bèngbe Bètsá uámanènga y bètsétsanga cmochanjábíama, cháftaca nýets tempo oyejuayènga jtsemnèse.

<sup>5</sup> Cachcá, tséngaftanga chë bobontséngnaca cbabuayená, sempre šmochtsejuabnaye chë bètsèjémènga tséngaftangbe améndayènga imomnama, y chca šmochtsama. Cada ona tséngaftanguentsá bontsemna jtsejuabnayana chë ínýenga tséngaftangbíama más uámanènga cuaftsemncá, ínýengbioye šmojtšaserverna ora; er ntšamo Bèngbe Bètsabe uabemana palabrènguiñe endayanacá:

Bèngbe Bètsá chë nýe cachènga uámanènga tmojtšenobi-  
amngangbe contra entsemna,

y chë ndoñe uámanènga montsenobiamngambiamna, Bèngbe  
Bètsá más tsabe juabna entsebmna ca.

<sup>6</sup> Sempre šmochtsejuabnaye Bèngbe Bètsá chë más bètsá nýetscangbíama yomnama, y nýets mando y obenana bomná yomnama, y chabe delante ndoñe uámanènga šmattsenobiamnaye, cha más uámanènga chácmbíamama, chama chë tempo chaojobuache ora.

<sup>7</sup> Nýetsca soyènga ndayama šmuenócochinýenama Bèngbe Bètsabe cucuatšíñe šmochjáboshjona, er cha tséngaftanga yejuana cmondánýena.

<sup>8</sup> Cach tséngaftanga jenomándama chašmotsobena y sempre šmochtseprontana, er tséngaftangbe uayayá Satanás, mo



canÿe león tojtsejató, nda jtsósañama tojtsana orcá, chë diablo, sempre jtsebošana jamama, tšëngaftanga Jesucristbeñe ošbuáchiyana chašmotsajbanama.

<sup>9</sup> Puerte šmochtomorócha, Jesucristbeñe bëtscá jtsošbuáchiyëse, chë uayayá tondaye chaondobená tšëngaftangaftaca jamama, cach tšëngaftangcá Jesucristbeñe ošbuáchiyënga nÿets luarënguenache cachcá jasúfriama vojtsamnama jtsetatšëmbëse.

<sup>10</sup> Pero tšëngaftanga baseftayté chašmojasufrí chentšana, Bëngbe Bëtscá cmochanjábiana nÿetsca soyënguiñe puerte tšábënga, puerte chašmotsemorochama, bëtscá ošbuáchiyana y bonshánana bomnënga jtsemnëse, y ainaniñe corente añemo bomnënga chašmotsemnama; Bëngbe Bëtscá, chë bëngbiana tšabe juabna bomná, bënga nÿetsca tšabe soyënga šonjatšatá, y nda bënga šojáchembo nÿetsca tescama bëtšëtšanga jtsemnama, chca echanjama.

<sup>11</sup> Cha nÿets obenana nÿets tempo y nÿetsca tescama chaotsemorna. Chca chaotsemna.

### *Jtadiósoftanama*

<sup>12</sup> Silvano, ndabiana sëndëjuabná atšbiana canÿe tšabe palabra bomná Jesucristbeyeca catšata yomnama, cháftaca quem base tsbuanácha tcbonjubuábiana. Atše sëntseboše tšëngaftanga añemo jatšatayana y jáuyanana, ndegombre ntšamo tcbonjubuabiamcá vojtsoyebuambná ntšamo Bëngbe Bëtscá tšabe bendicionënga cmatšatnama. Chíyeca, sempre šmochjëftsiyena jtsamëse ntšamo chabe tšabe juabna tšëngaftangbiana yomncá.

<sup>13</sup> Ošbuáchiyënga muentše átšeftaca montsemnënga cmontsacheuaná. Chënga quem bëtš pueblentše mondoyena bacá uamana entšángaftaca, mo chë tempo, Babilonia bëtš puebloca imojoyena entšangcá, pero Bëngbe Bëtscá muentša ošbuáchiyënga tojabacacá cach tšëngaftangbioycá. Marcos, chë atšbiana mo uaquiñacá endmëná, chánaca cmontsacheuaná.

<sup>14</sup> Nÿetscanga Jesucristbeyeca catšatangcá šmochjenchuaye, jtenámochëse tša šmojtšenbobonshánama.

Atše, Bëngbe Bëtscá sëntseimpadana cha chaoma tšëngaftanga chë Jesucristoftaca cánÿiñe mo canÿacá šmomnënga, nÿetscanga ainaniñe tšabe ebionana chašmotsebonnama.

## 2 San Pedro

### *Jacheuayama*

<sup>1</sup> Atše Simón Pedro, Jesucristbe oservená y chabe ichmoná, quem tsbuanácha sentsabiamná tsëngaftangbiamá, ndëmuanÿenga šmojashjache jtsebmnama canÿe ošbuáchiyana Jesucristbeñe, cach bëngbe ošbuachiyancá uámanana, er Bëngbe Bëtsá y Atsebacayá Jesucristo, jtsebošana ndánaca y nÿetscanga chábeñe chamotsošbuáchema.

<sup>2</sup> Atše sëntseimpadana, tsëngaftanga Bëngbe Bëtsabiamá y Bëngbe Utabná Jesusbiamá cada te más jtsetatšëmbëse, Bëngbe Bëtsá chaoma tsabe bendicionënga tsëngaftangbeñe chaotsemnana y chaoma tsëngaftanga ainaniñe tsabe ebionana chašmotsebmnama.

### *Chë Jesucristbeñe ošbuáchiyëngbe tsabe soyënga*

<sup>3</sup> Bëngbe Bëtsá chabe obenánaca tojama bënga chamobená jtsebmnama, lempe ntšamo tmojtsëjabortcá tsabe vida jtsebmnama y jtšiyenama, Bëngbe Bëtsá jadórama soyënga jtšamëse. Cha chca tojama bënga chábioye chamotsábuatmama tojanma ora. Cha bënga šojáchembo, cachá obená y uamaná bëtsemnana y bëtš soyënga jamëse, chabe entšanga chamotsemnana.

<sup>4</sup> Chca, Bëngbe Bëtsá šojatšatá ntšamo bënga jatšatayama tojanašebuachenacá, bëtš y uámana soyënga, chca, quem luar-entša bacna soyënguentsana chašmotsojuánañama. Chë bacna soyënga quem luarentše jtsebínÿnana, entšanga nÿe cachëngbe bacna juabnëngaca jtšiyenama yapa boše causa. Chánaca chë tsabe soyënga šojatšatá, tsëngaftanga cháftaca cánÿiñe mo canÿacá chašmotsemnana, cachacá jtsemnana jashjáchëse.

<sup>5</sup> Chca, ndoñe quenátsmëna nÿe Jesucristbeñe ošbuáchiyana jtsebmnanana; chiñe šmochjenobuáshjache, bëtscá tsabe soyënga jtšamëse; chora bëtscá šmochtsama Bëngbe Bëtsabe soyëngama chacmotsësertánama;

<sup>6</sup> chora bëtscá šmochtsama cach tsëngaftanga jenomándama chašmotsobenama; y chca, tsëngaftanga masque padecena soyënguiñe chašmojtsachnëjuana, ainaniñe puerte añemo jtsebmnnëse, puerte uantadënga chašmotsemnana; y chentšana bëtscá šmochtsama, tsëngaftanga Bëngbe Bëtsá šmojtsadoránama jinÿanÿiyama; y

<sup>7</sup> chca, nÿetsca tsëngaftanga ošbuáchiyënga chašmotsenbobonshana; y chca, nÿetsca entšanga chašmotsababuánÿeshana.

<sup>8</sup> Tšëngaftanga lempe chë soyënga šmojtsebmoma, y bëtscá chca šmojtsamëse, šmochantsiyena becá oservena soyënga jtsamëse, y chentšana puerte tšabe soyënga echantsóvocana, corente tšabá Bëngbe Utabná Jesucristo chašmotsábuatmama.

<sup>9</sup> Pero nda quem soyënga ndoñe tontsama, Bëngbe Bëtsabe soyëngama ndoñe ntosertánana; y chca, cha mo canye jtaná o nduabinýnacá jsemnana; cha tbojtsebnatjëmbe Bëngbe Bëtsá chabe tempsca bacna soyënga tbojtsebojuánama, y Bëngbe Bëtsabe delante cachiñe tšabá chaotsatsmënama tojamama.

<sup>10</sup> Chýeca, Jesucristbeyeca atšbe catšátanga, nýa šmochtsentsena chca tšabe soyënga jtsamama, y chca, corente tšabá šmochanjátatšëmbona, Bëngbe Bëtsá chabe entšanga chašmotsemnana tcmojáchembuama y tcmojábacacama; y chca jtsamëse, Jesucristbeñe ošbuáchiyana ndocna te quešmochatajbaná.

<sup>11</sup> Chca, Bëngbe Bëtsá oyejuayá tšëngaftangbiamama echanjama, Bëngbe Utabná y Atsebacayá Jesucristbe amëndayoye jamashënguama ndegombre chašmobenama.

<sup>12</sup> Chcáyecna, atšbe sëntsejuabná tšëngaftangbioyema sempre chë soyëngama jtsabuayiynayana, masque chë soyëngama ya šmotátšëmbo, y tša šmojtsošbuaché Bëngbe Bëtsabe ndegombre soyënguiñe y chca šmojtsiyena, chë mora šmojtsetátšëmbo soyënguiñe.

<sup>13</sup> Sëntsejuabná, chajjéftsainëntscuana tšabá yojtsemna jamana, ainaniñe bëtscá añemo chašmotsebmomama chë soyënga jtsamama, ntšamo tijayancá jtsabuayiynayëse.

<sup>14</sup> Atšbe sëntsetatšëmbo, ndoñe baytese y atšbe ainana Bëngbe Bëtsábioyema yochtá, ntšamo Bëngbe Utabná Jesucristo šonjéftsanbuayenacá;

<sup>15</sup> pero bëtscá chanjéftsema, atšbe chajjóbana chentšánënacama tšëngaftanga nýets tempo chë soyëngama chašmotsenójuabnama.

*Cristo corente uamaná y obená yojamnama tmojáninýe ora*

<sup>16</sup> Bëngbe Utabnabe obenanama y cha yochjésabama ntšamo tchbonjanabuatambacá, ndoñe quenjatsmëna entšangbe osertanánaca pormana cuentëngaca, er cach bënga botamana fsënjáninýe chabe uámanana y obenana.

<sup>17</sup> Bëngbe Bëtsá chë Taitá, Jesucristo puerte obenana bomná bëtsemnana y cha corente bëtscá y uamaná bëtsemnana tonjaninýinýe ora, bënga fsënjáninýe. Chca fsënjáninýe Bëngbe Bëtsá, chë puerte uámana y bëtscábocana oyebuambnayana Jesúsbioyema mëntšá tbonjanianyana ora: “Mua atšbe bonshana Uaquiñá endmëna, atšbe chabiamama sëntsoyejuá ca.”

18 Cach bënga chë oyebuambnayana fsënjanuena, chë celocana tonjanóbocnana, er bënga Bëngbe Utabnáftaca fsënjanmëna, chë uámana tjoca.

19 Chë sóyeca bënga fsëntsobena corente jtsetatsëmbuana, ntšamo chë Bëngbe Bëtsabe juabna oyebuambnayënga tmojanayancá ndegombre bëtsemnama, y tšëngaftanga tšabá šmochántsama, ntšamo chënga tmojanayancá šmojtseyeunanëse. Chca, chëngbe palabrëngaca entsopodena Bëngbe Bëtsabe soyëngama tšëngaftanga jinÿanÿiyana, y echántsemna mo canÿe uajuinÿanësha canÿe ibetiñe luarentše tojtsebinÿnacá. Chë soyënga šmochtsuenana Jesucristo yochjésabëntscuana; chora, cha nÿetsca soyënga cmochanjinÿanÿiye, mo tšëngaftangbiana canÿe tsëm te cuafjabinÿncá, y chë jabinÿnama ora bínÿnaye estrella tojábocna tšëngaftanga jabuabinÿnamcá.

20 Pero natsana chacmësertá, ndocna palabra Bëngbe Bëtsabe uabemana palabrënguiñe tojayana canÿe soye yochjopása ca, cabá chca ndopása ora, nÿe cach Bëngbe Bëtsabe juabna oyebuambnayëngbe juabnentšana tojanóbocnama;

21 er Bëngbe Bëtsabe juabna oyebuambnayënga ndoñe monjanoyebuambná nÿe chënga chca jamama imnabóšeyeca, ndayá Bëngbe Bëtsabe cuenta tmojanoyebuambá, chë Uámana Espíritu chënga chca chamóyebuambama tojánmayeca.

## 2

### *Chë ndoñe ndegombre soyënga buátëmbayënga (Jud 4-13)*

1 Chë Bëngbe Bëtsabe juabna oyebuambnayëngbe tempo, Israeloca entšángbeñe baseftángnaca imojamna, ndëmuanÿenga imojichamo chënga ndegombre chca juabna oyebuambnayënga imojamna ca, pero ndegombre ndoñe chcanga imonjamna; cachcá, tšëngaftangbeñe abuátambayënga mochántsemna, y chënga ndoñe ndegombre soyënga mochántsabuatambaye, pero ndegombre soyëngaca cánÿiñe, chca, chënga chca imojtsabuátambama entšanga ndoñe chamondëtatšëmbonama. Chë buátëmbana soyënga echanjama, entšanga ndoñe ndegombre soyënga y bacna soyënga chamotsamama. Ntšamo chënga mochántsama y mochántsabuatambaye soyëngaca, mochántsama Jesucristo ndoñe chëngbe Utabná chaondëtsemnama, cha nda chënga tojatsebacá, mo nda ínÿenga játsebacama crocénana cuafjëtsajocá. Y chca, nÿe ndeolpe, chë Bëngbe Bëtsábiocana uabouana castigo nÿetsca tescama mochántsebmoma.

2 Banga chëngbioye mochantsësetona, nÿetscna bacna soye, jenomándama ntobencá jtsamëse; y chëngbe causa, ínÿenga

ndoñe tšabá quemochátoyebuambnaye chë tšabe benachama, chë ndegombre soyëngaca benache jtishachama.

<sup>3</sup> Chënga bëtská crocénana jtsebomnama yapa mochántseboše causa, ba bostero soyëngaca cmochántsaingñaye; pero Bëngbe Bëtsá tempo chëngbiana tojánayana, ndoñe tšabá imojtsamama y chëngbiana castigo nyëtsca tescama chaotsemnánaca.

<sup>4</sup> Bëngbe Bëtsá chë bacna soyënga tmojanma angelëngbioye ndoñe tonjanaperdoná, ndayá infiernoye tojtsanatsatse y puerta ibetiñe tojtsanabáshejuana, chë uabouana tboca chamoquedama, Bëngbe Bëtsá chëngbiana nyëtsca tescama castigo chamotsebomnama yochjayana orscama.

<sup>5</sup> Y cach ndoñe quem luarentša entšángbioye tonjanaperdoná Noé yojëftsiyena ora, y chënga jácastigama aiñe tojanma chë uabouana uaftena chëngbeñe chaotsemnama, chë nduauenana y bacna entšanga jtsapochócama. Chentšana, nye Noébioye, tbojanatsbocá, nda entšanga yojanabuayiyná ntšamo jtsiyenana, Bëngbe Bëtsabe bominyiñe tšabá yomncá jtsamëse; cha y inye canýsëftangnaca tojanatsebacá.

<sup>6</sup> Bayté entsemna, Bëngbe Bëtsánaca tojánayana chë Sodoma y Gomorra bëts pueblentša entšanga, yapa bacna entšanga imojamnama, bëts castigo jtsebomnama yojánamnama; y ñesheca tojtsanapochocá, chë pueblënga y chentša entšanga jatinýá jtsabiamëntscuana. Y chë sóyeca Bëngbe Bëtsá tojaninyanyé ntšamo bacna entšángaftaca yochjama, chë chentšana mochtsiyena bacna entšangbiana.

<sup>7</sup> Pero Bëngbe Bëtsá Lótbioye tbojanatsbocá, chë bëts pueblënga pochócaýentšana. Cha yojamna Bëngbe Bëtsabe bominyiñe tšabá amá, y ntšamo chë luarentša entšanga imojaniyenama, nyëtsca bacna soye jtsamëse, jenomándama ntšobencá, cha puerta ngménana inabomna.

<sup>8</sup> Er quem tšabe entšá, chëngbeñe oyená, chë entšanga imojtsama bacna soyënga cada te yojanonýaye y yojanuenana ora, puerta chabe tšabe ainaniñe inasufrina.

<sup>9</sup> Chca, Bëngbe Utabná endobena chë Bëngbe Bëtsábioye adórayënga játsebacana padecena soyënguentšana y bacna soyënga jamama juabnënguentšana, y chë bacna soyënga jamama uamanëngna castigánënga jtsabamnama, chë ntšamo chënga imojaniyenëntscuana imojanamcá ndoñe tšabá yonjamna ca Bëngbe Bëtsá yochjayana tescama, y chënga nyëtsca tescama chë bëts castigo chamotsebomnama jamándama.

<sup>10</sup> Chca ndegombre endmëna, y más chë ndëmuanýenga nye cachëngbe cuerpëngama bacna juabnëngaca jtsamëse imoyenëngbiana, chënga chë Bëngbe Utabnabe mando jtsaboténana. Chënga bacá buátsenanënga mondmëna

y jtsebošana nýe ntšamo cachënga tmojtsejuabnacá chaotsemnana, y ndoñe ntsauatjana chë espíritënga obenana bomnëngbiama puerte bacna soyënga jtsóyebuambnayama.

11 Chamna chë angelënga, masque más añemo y obenana bomnënga mondmëna, ndoñe jenñëmuana chë espíritënga obenana bomnëngbiama chca jayanama, chëngbiama ndoñe tšabe soyënga jtsóyebuambnayëse, Bëngbe Utabnabe delante.

12 Pero chë buátëmbayënga, chë cachënga ndoñe tontsësertana soyëngama puerte bacá jtsóyebuambnayana, y chca, chënga mondmëna mo tja bayëngcá, soyënga tšabá josértama juabna ndbomnënga; chënga jtsiyenana nýe ntšamo tojtsebiona y tmojtsebošcá, y chënga jónýnana, chámuashebuayama y chamëbáyama. Chë buátëmbayënga mo chë bayëngcá mochántsapochocaye.

13 Chënga mochanjasúfria, ínýenga chamosufrima tmojama causa. Chëngbe oyejuayana endmëna nýe chora chënga tšabá jtsemnana soyënga. Tšëngaftangftaca cánýiñe mo ošbuachiyëngcá tmojttesá ora, tšëngaftangbiama ouatjca jtsemnana y chëngbe causa, ínýenga tšëngaftangbiama podesca mochántsuchamo, er chënga chentše oyejuayënga jtsemnana, nýe chënga tšabá jtsemnana jtsamëse; y chënga tšëngaftangbeñe jtsemnana, tšëngaftangbioye jtsaíngñase.

14 Chënga ndoñe ntsoobenana canýe shembása jinýana, cháftaca bacna soye jamama ntsebošcá, y sempre jtsenguayana ntšamo bacna soye jamama. Chënga chë Jesucristbeñe nýe batšá ošbuáchiyana bomnënga jtsaíngñayana, y siempre jtsentšénana nýe más soyënga jésebošama y jésebomnana, ínýenga tmobomnana más soyënga jashjáchama; chënga montsemna pochocánënga jtsemnana.

15 Chënga chë tšabe benachentšana tmojtsojuánañe, y mora mo otšenëngcá montsemna. Chca chënga imojtsiyena jtsamëse, mo chë Bëngbe Bëtsabe juabna oyebuambnayá Balaamcá, cha ndoñe tšabá tonjanma orcá; Balaam Beorbe uaquiñá. Cha yapa inaboše bëtscá crocénana juácánama ínýengbiama bacna soyënga jtsamëse;

16 y Bëngbe Bëtsá, chábioye chabe bacna soyëngama tbojanácacana, cachabe asno chábioye chabuatsétsama jamëse; y chca, ndoñe tbonjanlesenciá jama chë ndocna juábnaca soye jamama.

17 Entšanga jtsobátmanana chënga bëtscá tšabe soyënga chamotsamama, pero chë tmojtsama soyënga tondayama ntoservénana, y chca, chënga jtsemnana mo búyeshe obo-canentše tojtsebuashjca; y chënga mora canýe soye jtsejuabnayana y chentšana inýetšá; chca chënga jtsemnana mo jantšetëshënga bëtš bínýiaca bonjnëshëngcá. Chëngbiama

Bëngbe Bëtsá tojayana castigo chamotsebomnama, chë más ibetoca, tondaye binÿniñe luarentše.

<sup>18</sup> Chënga ba botamana palabrëngaca jtsenábotamnayana, pero tondayama ntoservénana; y chë cabá mora Jesucristbeñe tmojtsošbuachëngbioye jtsaíngñayama, chënga ntšamo chëngbe enutënga Bëngbe Bëtsábioye nduabuátmënga imoyencá jtsiyenama imojtsajbananga. Chë buátëmbayënga chë soye jtsamana, chëngbioye jáyënjanase, nÿe cachënga tšabá jtsomñama bacna juabnëngaca soyënga chamotsamama, cachënga jenomándama ntosobencá.

<sup>19</sup> Chë abuátambayënga jašebuachenana tšabe vida jónÿenama, nÿe ntšamo chënga tmojtsebošcá jtsejuabnayëse y jtsamëse; pero cachënga mondoyena cachëngbe bacna juabnëngaca mandánënga, y chca, chënga montsajna pochocánënga jtsemnama, er ndaye entšánaca mandaná jtsemnana, chë nÿets tempo tobedecena sóyeca.

<sup>20</sup> Er ndëmuanÿënga, Bëngbe Utabná y Atsebacayá Jesucristo tmojtsábuatmama, tmojtsajbaná oyenana mo chë nÿe quem luarama enójuabnaye entšangcá, nÿetsca bacna soye amana y tša bacna juabnënga ainaniñe bomnana, pero mora cachiñe chë soyënguiñe tmojtésajna, y cachiñe mandánënga tmojtsemna chë bacna juabnëngaca, chënga mora más bacá tempscama jabocanana.

<sup>21</sup> Chëngbiamá más tšabá manjamna ndoñe ntjobenayana jtsetatšëmbuana ntšamo Bëngbe Bëtsabe bominiñe tšabá yomncá inétsamama, chë soye jatabuátmanana y chentsana játajbanana chë buátëmbana soyënga y chë abuayiyayëngaftaca chëngbioye Bëngbe Bëtsá tojanoyé mandënga jtsobedecénana.

<sup>22</sup> Pero chëngaftaca tojopasá ntšamo entšanga mondëntšayancá chca ndegombre bétsemnama: “Chë queše chabe ashconánana tojtsemnoye jesshëconana ca” y “chë cotše cabá chora bebená, ngüichetšoye jana jetsójanduouoyama ca”.

### 3

#### *Jesucristo quem luaroye jésabama ora*

<sup>1</sup> Jesucristbeyeca atšbe bonshana catšátanga, móraca ya uta soyama cbontsëbuabiamná. Quem uta tsbuanáchaca atše sënjábošena jamama tšëngaftangbe juabna nÿe ena tšabe soyëngaca chaotsemnama, y chca chaotsemnamna atše jtsabuayiyayëse chë tcmojanabuatambá soyëngama.

<sup>2</sup> Atše séntseboše tšëngaftanga chašmotsenojuabná, ntšamo chë inÿe tempënga ora, chë nÿe Bëngbe Bëtsábioye jtsoservënëse, chabe juabna oyebuambnayënga

tmojánayanama, y chë Bëngbe Utabná y Atsebacayabe  
 buatëmbana soyëngama y mandëngama, ndayá chabe  
 ichmónëngaftaca tšëngaftanga šmojanóyëngacñe.

<sup>3</sup> Pero masna quem soye chacmotsësertana: Jesucristo  
 quem luaroye jésabama tempo chaojtsobeco ora,  
 mochántsemna entšanga y chënga mochantsiyena  
 nyë cachënga tšabá jtsomñama bacna juabnëngaca,  
 y cmochantsëbuayajuana, chë Cristo yochjésabama  
 šmošbuáchema.

<sup>4</sup> Chënga mëntšá mochántsicamo: “Cristo tcmo-  
 janašebuachená quem luaroye jésabama. ¿Ndegombre chca?  
 Chcase, ¿ndayentše cha yojtsemna? Bëngbe bëtsësanga,  
 ndëmuanÿëngbioye cha tojanašebuachená quem luaroye  
 jésabama, ya tmonjóbana, y quem luarentše lempe cachcá  
 endesomñe, ntšamo quem luare tojanobojatšë orscana  
 enjamncá ca.”

<sup>5</sup> Chë entšanga ndoñe ntsebošana jtsejuabnayana ya bayté  
 yojtsemna, Bëngbe Bëtsá tojanmandá y chca tojanma celoca  
 y quem luare chaotsemnana. Cha quem luare tojanma  
 búyeshentšana y búyesheca;

<sup>6</sup> y cach búyeshecnaca, chë uabouana uaftenentša béjayeca,  
 ya bayté yojtsemna, cha lempe quem luarentše yojanbinÿncá  
 tojtsanpochocá.

<sup>7</sup> Pero chë mora entsemna celoca y quem luare, cach Bëngbe  
 Bëtsabe mándoca, ndoñe quenátopodena chamotsepochochama,  
 chë Bëngbe Bëtsá jayanama chábioye ndoñe mondadoránënga  
 ntšamo tmojamcá ndoñe tšabá yonjamnana, y chë bacna  
 soyënga tmojamama nyetsca tescama castigo chamotsebom-  
 nama jamándama tempo candóshjanguëntscuana. Chora Bëngbe  
 Bëtsá, celoca y quem luare íñesheca echantsepochóca.

<sup>8</sup> Pero, atšbe bonshánënga, canÿe soye endmëna y chë soye  
 ndoñe chacmondébnëtjomba: Bëngbe Utabnabe juabnama,  
 canÿe te endmëna mo canÿe uaranga uatcá, y canÿe uaranga  
 uata mo canÿe tecá.

<sup>9</sup> Ndoñe quenátsmëna, ntšamo báseftanga jtsejuabnayana,  
 ntšamo tojašebuachenacá cha ndoñe betesco yochanjama ca,  
 chë cha quem luaroye jésabama, ndayá chana puerta uantado  
 tšëngaftangaftaca comna; er cha jtsebošana ndocná nyetsca  
 tescama castigo chaondëtsebomnana, ndayá nyetscanga  
 bacna soyënga amana jtsajbanase, Bëngbe Bëtsabe tšabe  
 benache chamuashjáchama.

<sup>10</sup> Pero Bëngbe Utabná echanjésabo ndocná chama  
 chaondëtsejuabná ora, mo canÿe atbëbanacá jashjanguana,  
 ndocná chama tontsejuabná ora. Chora celoca  
 echanjopochóca, canÿe jabuache shauenanáncaca, y quem



luare ndaye soyënguentshana yomnana ññesheca echántsefjatëjo, y ndayá Bëngbe Bëtsá y entsanga quem luarentse tmojamcá, lempe echántsejuinÿe.

11 Lempe chca japochócama entsémnayeca, ndegombre tšëngaftanga cmontsamna jtsiyenana ntšamo chë Bëngbe Bëtsabe entsanga jtsiyenana entsamncá, y nÿets tempo jtsamëse chë Bëngbe Bëtsábioye jtsatschuanayama yomna soyënga,

12 tšëngaftanga chë Jesucristo quem luaroye jésabama chaóshjanguama šmojtsobátmanëntscuana; y nÿa šmochtsentšena cha más betso cháuesabama. Chë te ññesheca celoca echántsejuinÿe, y ndaye soyënguentshana quem luare yomnana cach ññesheca echántsefjatëjo.

13 Pero bënga mondobátmana ntšamo cha šojašebuachenacá: canÿe tsëm luare, mo canÿe tsëm celoca y tsëm fshantscá, y chentše nÿetscanga mochantsiyena ntšamo Bëngbe Bëtsabe bominÿiñe tšabá yomncá jtsamëse.

14 Chíyeca, atšbe bonshánënga, chë soyënga chaotsemnama šmojtsobátmanëntscuana, nÿa chiñe šmochtsentšena, chca, cha yochjésabo ora, chacmanÿena oyeniñe tšabá Bëngbe Bëtsáftaca jtsatsmënëse, ínÿengaftaca natjëmbana jtsiyenëse; chacmanÿena ainaniñe ndocna bacna soye ndbomnënga, y puerte tšabá jtsamëse oyeniñe; chca, ndocná chaondobená jayanama tšëngaftanga ndaye bacna soye šmojama ca.

15 Quem soye šmochtsejuabnaye: Bëngbe Atsebacayá ndoñe yapa betso tonjésabësna, chca jtsemnana cha puerte uantado nÿetscángaftaca yómnayeca; chca cha yomna, ba entsanga chë bacna soyënga amana chámajbanama y chabe benache chámuatishachama y chca, atsebácanënga chamotsemnana. Cach quem soyëngámncá, Jesucristbeyeca bëngbe bonshana catšata Pablo tcmonjanëbuábiamá, chë Bëngbe Bëtsá tojanma cha chaotsebomnana osertanáncá.

16 Chë soyëngama, Pablo nÿetsca chabe tsbuanáchangañe tonjanoyebuambá. Chëchangañe endmëna soyënga totcá josértama; y chë soyëngama, chë Bëngbe Bëtsabe soyëngama ndoñe tmonjuatsjínÿënga, y chë mora canÿe soye jtsejuabnayana y chentšana inÿetšá juabnayënga, jtsejuabnayana y ínÿengbioye jtsabuayiynayana ndoñe ndegombre yondmëna ca. Y cachcá jtsamana inÿe soyëngaca, Bëngbe Bëtsabe uabemana palabrënguñe. Chca chënga montsajna pochocánënga jtsemnana.

17 Chíyeca, atšbe bonshánënga, tšëngaftanga chë ya šmojtsetátšëmbo chë ndoñe ndegombre soyënga abuátambayënga mochtsemnana, yejuana šmochtsantješna; chca, chë Bëngbe Bëtsá ntšamo yomandacá ndobe-

decenëngbe soyëngaca ínÿenga jáingñama, tšëngaftanga ndoñe chašmondětsemna mo uambanëngcá, ndoñe chašmondětsajbanama jtsebomnana chë Bëngbe Bětsabe soyënga ntšamo šmojashjachcá.

<sup>18</sup> Pero atšna, Bëngbe Utabná y Atsebacayá Jesucristo sěntseimpadana, tšëngaftanga chašmotsiyena jtsaměse, chë chábentšana šmojóyëngacñe ba soyënga ntšamo tomnama jtsejuabnayěse, y chaoma tšëngaftanga cada te más tšabá cha chašmotsábuatmama. ¡Nÿetscanga cha chamotsatschuaná, mora y nÿetsca tescama! Chca chaotsemna.

# 1 San Juan

*Cristo, chë nyetsca tescama yomna tšabe vida entsanga chamotsebomnama amá*

<sup>1</sup> Bënga cbontsëbuabiamná chë Bëngbe Bëtsá ndabiajana inétsoyebuambnabiama, chë nyetsca tescama yomna tšabe vida entsanga chamotsebomnama iuamabiama, chë Bëngbe Bëtsá cabá quem luare ndëma orscana ya yojamnabiama. Bëngbe matscuašëngaca chabe oyebuambnayana fsënjouena y bëngbe bomínýeca cha tonjama soyënga fsënjinyë. Aíñe bënga cha fsënjinyë y bëngbe cucuatšeca fsënjábojajo.

<sup>2</sup> Cha bëngbentše tonjanonýná y fsënjáninyë; chíyeca bënga chabiama cbontsëtsësná y cbontsabuayiyná, nda sempre vida yobomna y nda chë nyetsca tescama yomna tšabe vida entsanga chamotsebomnama iuama. Chana, chë Taitá Bëngbe Bëtsáftaca inamna, pero mora bëngbioye šojinýanjé.

<sup>3</sup> Bënga tšëngaftanga cbontsabuayiyná ntšamo tifjinyë y tifjouencá, tšëngaftanga cánýiñe mo canýacá bëngaftaca chašmotsemnama. Bënga cánýiñe mo canýacá fsëndmëna chë Taitá Bëngbe Bëtsáftaca y chabe uaquiñá Jesucristoftaca.

<sup>4</sup> Bënga quem soyënga tšëngaftanga cbontsëbuabiamná, bëngbe oyejuayana corente bëtscá chaotsemnama.

*Bëngbe Bëtsá endmëna chë entsangbiama binýnayá*

<sup>5</sup> Mëntšá entsemna ntšamo Jesucristbentšana tifjouencá y chca tšëngaftanga cbontsabuayiyná: Bëngbe Bëtsábeñe lempe binýniñe, lempe tšabá endmëna, y chábeñe tondaye ndoñe chca quenátsmëna.

<sup>6</sup> Bënga tmojtsichamo cháftaca cánýiñe mo canýacá fsëntsemna ca, pero cabá ndoñe Bëngbe Bëtsábe cucuatšinyë, chë binýniñe tmontsemna, y chca, bacna soye juabnayënga y amënga tmojtsiyena, asna, bënga mojtsebostero y ndoñe montsama ntšamo ndegombre yomncá.

<sup>7</sup> Pero bënga chë binýniñe tmojtsiyena, tšabe soye juabnayënga y amënga ntšamo Bëngbe Bëtsá iuamcá, as nyetscanga cánýiñe mo canýacá mochántsemna, y chabe uaquiñá Jesucristbe uabuáshanana buíñeca, Bëngbe Bëtsá bëngbe bacna soyënga sempre šochántsabuanayey, y echanjama bënga chabe delante tšabá chamotsatsmënama.

<sup>8</sup> Bënga bacna soyënga ndoñe queftsátsbomna ca tmojtsichámëse, chca cabënga jtsenoíngñayana y ainaniñe chë ndegombre soyënga ndoñe tmonjójyëngacñe;

<sup>9</sup> pero bënga ndegombre bacna soye amënga fsëndmëna ca, Bëngbe Bëtsá tmojauyanëse, cha bënga šochanjínýanyie

cachá chë ntšamo šojiytsašebuachecá amá y nÿetsca soyënguiñe tšabá amá yomnama; y chca, nÿetsca bëngbe bacna soyënga šochanjáperdonaye y nÿetsca bacna soyënga šochanjábuajuanaye.

<sup>10</sup> Bënga tmojtsichamo, bacna soyënga ndoñe chibiatsma ca, chca bënga muattsichamo mo Bëngbe Bëtsá canÿe bostero cuaftsemncá, y ntšamo Bëngbe Bëtsá bënga šojauyancá ainaniñe ndoñe tmonjójyëngacñe.

## 2

### *Cristo, bëngbe obuauyayá*

<sup>1</sup> Tšëngaftanga mo atšbe basengcá, er atšbe tcbonjanéjabuache Jesucristbe tšabe noticiënguiñe chašmotsošbuáchema, quem soyënga cbontsëbuabiamná bacna soyënga ndoñe chašmondëtsamama. Pero ndánaca Crístbeñe ošbuachiyënguentšá bacna soye tojamëse, bënga canÿe obuauyayá Bëngbe Bëtsabe delante montsebmna, y cha endmëna Jesucristo, chë nÿetsca soyënguiñe tšabá amá.

<sup>2</sup> Jesucristo tonjanóbana ndoñe nÿe Bëngbe Bëtsá bënga chášuaperdonama bëngbe bacna soyëngama, ndayá quem luarentša nÿetsca entšágnaca chëngbe bacna soyëngama cháuaperdonama.

<sup>3</sup> Bënga ntšamo Bëngbe Bëtsá šojtsamëndacá tmojtsamëse, ndegombre mochántsetatšëmbo bënga cha imuábuatmama.

<sup>4</sup> Pero nda tojayana: “Atše Bëngbe Bëtsá sënduábuatma ca”, pero ndoñe tontsama ntšamo Bëngbe Bëtsá ibuamëndacá, cha canÿe bostero jtsemnana y ainaniñe chë Bëngbe Bëtsabe ndegombre soyënga ndoñe tonjójyëngacñe.

<sup>5</sup> Pero nda ntšamo Bëngbe Bëtsá ibuamëndacá tojtsama, jtsinÿanÿnayana chabe ainaniñe Bëngbe Bëtsabiana corente bonshánana yomnama, y chca, mochántsetatšëmbo bënga sempre cánÿiñe mo canÿacá cháftaca imomnama.

<sup>6</sup> Nda tojtsichamo Bëngbe Bëtsáftaca cánÿiñe mo canÿacá yojtsemna ca, bontsemna jtsiyenana soyënga jtsamëse ntšamo Jesucristo yojëftsiyencá.

### *Canÿe tsëm mando*

<sup>7</sup> Atšbe bonshana entšanga, ntšamo mora cbontsëbuabiamnacá, ndoñe canÿe tsëm mando quenátsmëna, pero aíñe canÿe tempsca mando; entsemna cach tšëngaftanga Crístbe ústonënga šmonjanobiana ora šmonjanójyëngacñe mando. Quem tempsca mando entsemna ntšamo tšëngaftanga bëngbentsana šmonjouencá.

<sup>8</sup> Pero masque chca endmënëse, quem cbontsëbuabiamná soye tšëngaftangbiana echántsemna mo canÿe tsëm mandcá.

Cristo enjëftsiyena ntšamo quem Bëngbe Bëtsabe mando ndegombre yomncá y tšëngaftágnaca cachcá šmondoyena, er chë bacna juabnënga jtsebomnëse mo ibetiñcá jtsiyenana tempo ya echanjochnëngo, y chë entšangbe juabna ndegombre binÿnayá ya entsebuashinÿinÿana.

<sup>9</sup> Nda tojayana chë binÿnayáftaca yojtsemna ca, pero cha chabe catsátbioye tbojtsáboyënja, cha cabá tempcá, bacna juabnënga jtsebomnëse yojtsiyena, mo ibetiñcá.

<sup>10</sup> Nda chabe catsátbioye tbojtsebobonshana, cha chë binÿnayáftaca jtsiyenana, y tondaye queochátsmëna cha bacna soye chaotsamama.

<sup>11</sup> Pero nda chabe catsátbioye tbojtsáboyënja, cha bacna juabnënga jtsebomnëse jtsiyenana, mo canÿa ibetiñe oyenacá. Cha ndoñe ntsetatšëmbuana chë ndayá tojamama ntšamo chentšana yochjopása, er chë bacna juabnënga jtsebomnëse jtsiyenana chábioye ndoñe ntjalesénciana ntšamo tšabá yomncá chaotsamama.

<sup>12</sup> Básenga, atše cbontsëbuabiamná Bëngbe Bëtsá tšëngaftangbe bacna soyënga tcmojáperdonama, ndayá Jesús tojanma sóyeca.

<sup>13</sup> Taitanga, tšëngaftanga cbontsëbuabiamná, er tšëngaftanga ya šmonjuábuatmana chë quem luare jobojátšama orscana ya inamná. Tšëngaftanga bobontsëngnaca cbontsëbuabiamná, er tšëngaftanga ya chë nÿetsca bacna soyënga mandayá Satanás šmonjayënjaná.

<sup>14</sup> Básenga, tšëngaftanga tcbonjubuábiamna, er tšëngaftanga chë Taitá ya šmonjuábuatmana. Taitanga, tšëngaftanga tcbonjubuábiamna, er tšëngaftanga ya šmonjuábuatmana chë quem luare jobojátšama orscana ya inamná. Bobontsënga, tšëngaftágnaca tcbonjubuábiamna, er tšëngaftanga bëtscá añemo ainaniñe šmambá, y Bëngbe Bëtsabe palabrama sempre tšëngaftangbe ainaniñe šmondëjuabná, y chë nÿetsca bacna soyënga mandayá šmonjayënjaná.

<sup>15</sup> Ndoñe matsbošana oyejuayënga jtsemnana nÿe quem luarentša soyëngaca, ni nÿe chë soyënga jtsebomnama. Nda yapa tojtseboše quem luarentša bacna soyënga jtsebomnama, cha ndoñe chë Taitábioye bondbobonshana.

<sup>16</sup> Er chë nÿe quem luarama enójuabnayënga mëntšá juabnënga mondbomna: yapa jtsebošana jtsebomnama ntšamo chë ainaniñe bacna juabnënga bomnënga mondbetsebošcá; yapa jtsebošana nÿe ndayá tmojátinÿe soye; y yapa jtsenábotamnayana chë tmobomna soyëngama. Chë juabnënga Bëngbe Bëtsábiocana ndoñe ntsóbocanana, ndayá nÿe chë quem luarama enójuabnayëngbentšana.

<sup>17</sup> Pero quem luare echanjopochóca y nÿetsca chentša soyënga, chë entšanga bacna juabnëngaca yapa imoboše jt-

sebomnama soyëngnaca. Pero nda ntšamo Bëngbe Bëtsá yobošcá tojtsama, cha chë nyetsca tescama yomna tšabe vida echántsebomna.

*Chë Cristbe contra yomná*

<sup>18</sup> Básenga, quem luare jopochócama tempo ya entsobeco. Ntšamo tšëngaftanga šmonjouencá, quem tempo echanjabo chë Cristbe contra yomná. Pero morna banga Cristbe contra imomnënga tmonjábocana. Chca bënga montsetátšëmbo chë quem luare jopochócama tempo ya yojtsobecuama.

<sup>19</sup> Chënga cach bëngbentsana tmonjábocana. Pero chënga Jesucristbeñe ndoñe tmonjanošbuachená ntšamo bënga mondošbuachecá, er chënga ntšamo bënga montsošbuachecá mamojtsošbuachese, cach bëngaftaca matmënjoquedanga. Pero chca tonjopasá, ndegombre jtsotatsëmbuama ntšamo bënga Jesucristbeñe mondošbuachecá, chënga nyetscanga ndoñe mondošbuáchema.

<sup>20</sup> Pero Cristo, chë Uamaná, tšëngaftanga tmonjabacacá, y cha tonjama chë Uámana Espíritu tšëngaftangbe ainaniñe cháumashënguama; y nyetsca tšëngaftanga chë ndegombre soyënga šmondëtatšëmbo.

<sup>21</sup> Atše cbontsëbuabiamná, ndoñe chë ndegombre soyëngama ndoñe šmondëtatšëmbuama, ndayá aíñe šmotatsëmbuama; er tšëngaftanga šmondëtatšëmbo chë ndegombre soyënga y ndoñe ndegombre soyënga cányiñe jtsemnana ndoñe yondopodénama.

<sup>22</sup> Nda tojayana Jesús chë Bëngbe Bëtsabe Uámana Uabuayaná, chë Cristo ndoñe yondmëna ca, chana jtseboosterana. Cha jtsemnana chë Cristbe contra yomná, nda iuichamo Cristo Bëngbe Bëtsabe Uaquiñá ndoñe yondmëna ca, y chca, cha Bëngbe Bëtsabiana ndoñe ntsejuabnayana cha chë Taitá bëtsemnana.

<sup>23</sup> Nda tojtsichamo Cristo Bëngbe Bëtsabe Uaquiñá ndoñe yondmëna ca, cha chë Taitáftaca cányiñe mo canyácá ndoñe ntsemnana. Pero nda entšángbeñe tojayana, Cristo aíñe Bëngbe Bëtsabe Uaquiñá endmëna ca, chana aíñe chë Taitáftaca cányiñe mo canyácá jtsemnana.

<sup>24</sup> Tšëngaftanga, chë Cristbe ústonënga šmojanóbiana orscana šmojanuena soye, tšëngaftangbe ainaniñe šmochtsambaye. Chca chašmojtsamëse, tšëngaftanga chë Uaquiñá y chë Taitáftaca cányiñe mo canyácá šmochántsemna.

<sup>25</sup> Y quem soye entsemna ntšamo Cristo šojëftsäebuachená: chë nyetsca tescama yomna tšabe vida jtsebomnana.

<sup>26</sup> Atše chca cbontsëbuabiamná, chë tšëngaftanga jáingñayama imojtsebošëngbiana chašmotsetatšëmbuama.

27 Pero Cristo tcmojanabacacá ora, Uámana Espíritu šmojanóyëngacñe, y mora tšëngaftangbe ainaniñe Uámana Espíritu šmontsebmna, y ndoñe quenátsiyta ndocná más chacmotsabuátambama, er chë Uámana Espíritu lempe cmontsabuatambá; y cha endabuatambá ndegombre soyënga, y bostero soyënga ndoñe. Mëntsá, ntšamo chë Uámana Espíritu tcmojabuatambacá jtsiyenëse, Cristoftaca cányiñe mo canyáca šmochtsemna.

28 Y mora básenga, Cristoftaca cányiñe mo canyáca šmochtsemna, chca, cha chaojabáisebocna ora, chábeñe jtsošbuáchiyëse, bënga añémoca chamotsemnana y ndoñe chamondëtsëuatjama, bënga chabe delante chamojtsemna ora.

29 Tšëngaftanga šmontsetátšëmbo Jesucristo nyetsca soyënguiñe tšabá amá yomnana. Chcasna, cmontsamna jtsetatšëmbuana, nyetscanga ntšamo Bëngbe Bëtsá yobošcá tmojtsamëngna, Bëngbe Bëtsabe básenga imomnana.

### 3

*Cristbeñe ošbuáchiyënga, Bëngbe Bëtsabe básenga*

1 Menójuabonga, ntsachetšá Bëngbe Bëtsá chë Taitá šondábabuanyëshanama. Chabe bonshánana tša bëtsca endmënayeca, bënga šondëubuabuatma chabe básenga ca, y ndegombre bënga chca mondmëna. Chë causa chë nyë quem luarama enójuabnayënga ndoñe quenátësertana ntšamo bënga imomnana, er chënga cha ndoñe tmonjanábuatmana.

2 Atšbe bonshana entšanga, mora bënga ya Bëngbe Bëtsabe básenga montsemna. Y masque cabá ndoñe quemuátstatšëmbo ntšamo más chcoye bënga mochjamnana, aiñe mondëtatšëmbo, Jesucristo chaojabáisebocna ora bënga cachacá mochtsemnana, er bënga mochanjobenaye jinýama ntšamo cha ndegombre yomncá.

3 Y nda chca chábeñe puerta jtsošbuáchiyëse tojtsobátmana, bacna soyënga amana jtsajbanana, más tšabia jtsemnana, ntšamo cach Cristo yomncá, lempe tšabia y bacna soye ndbomná.

4 Pero nda bacna soye tojama, chana ntšamo Bëngbe Bëtsá tojëftsemandacá jtsaboténana; er bacna soye jamana endmëna, jtsabotena ntšamo Bëngbe Bëtsá tojëftsemandacá.

5 Tšëngaftanga ya šmondëtatšëmbo Jesucristo quem luaroye tojánabo bëngbe bacna soyënga jabétsabuajuanama, y cha ni mo canye bacna soye ndoñe yondbomnana.

6 Chcasna, nda cányiñe mo canyáca cháftaca nyets tempo tojtsemna, ndoñe ntsiyenana bacna soyënga jtsamëse. Pero nda tojtsiyena bacna soyënga jtsamëse, Jesucristbiana ndoñe tbonjosertá y ndoñe yondëtatšëmbo ntšamo cha bëtsemnana.

<sup>7</sup> Atšbe básenga, ndocná chacmondaingñé: nda nyetsca soyënguñe tšabá tojtsama, cha canye tšabá mándbomna entšá jtsemnana, ntšamo Jesucristo yomncá;

<sup>8</sup> pero nda tojtsiyena bacna soyënga jtsamëse, chabe ainaniñe Satanás jtsemándayana, er Satanás quem luare jobojátšama orscana bacna soyënga iuétsama. Bëngbe Bëtsabe Uaquiñá nya quem soyama tojabo: chë Satanabe soyënga jabëtsepochochama.

<sup>9</sup> Ndocná Bëngbe Bëtsabe uaquiñá tojtsemná jtsiyenana bacna soyënga jtsamëse, er cha jtsebomnana chë Bëngbe Bëtsá tbojuántšame tšabe vida, y Bëngbe Bëtsá chabe Taitá endmëna. Chíyeca cha ndoñe ntsiyenana bacna soyënga jtsamëse.

<sup>10</sup> Corente jtsotatšëmbuana ndëmuanyënga Bëngbe Bëtsabe básenga imomnana y ndëmuanyënga Satanabe básenga; ndëmuanyëgnaca ntšamo tšabá yomncá ndoñe tmontsama o chabe catšata ndoñe tmontsebobonshana, ndoñe ntsemnana Bëngbe Bëtsabe básenga.

#### *Nyetscanga jtsenbobonshánana*

<sup>11</sup> Quem buayenana entsemna ntšamo tšëngaftanga šmojanuena, tšëngaftanga Cristbe ústonënga šmonjanobiamana orscana: nyetscanga šontsamna jtsenbobonshánama.

<sup>12</sup> Ndoñe Caincá muatjama. Chabe ainaniñe Satanás yojamánda, y chíyeca, chabe uabentsábioye tbojtsanóba. ¿Y ndáyeca tbojtsanóba? Cha ndoñe tšabá yonjánama; chabe uabentsana aíñe; chíyeca tbojtsanóba.

<sup>13</sup> Jesucristbeyeca atšbe catšátanga, ndoñe smattsenjnanaye chë nye quem luarama enójuabnayënga cmojtsëbuayënjama.

<sup>14</sup> Bënga mondëtatšëmbo, bënga tempo monjaniyena chë nye quem luarama enójuabnayënga mondoyencá, y chca, Bëngbe Bëtsabiamana mo obanëngcá monjamna, er bënga monjaniyena ntšamo Bëngbe Bëtsá ndoñe yondëmandacá. Pero Bëngbe Bëtsá tonjama mora bënga tsëm vida chamotsebomnana, y chca, mo ndegombre ainëngcá montsemna. Chca mondëtatšëmbo, er bënga bëngbe catšátangbioye mondábabuanyëshana. Nda chabe catšátbioye ndoñe tbontsebobonshana, cha cabá mo obanacá jtsiyenana.

<sup>15</sup> Nda cachabe catšátbioye tbojtsáboyënja, cha jtsemnana mo entšanga obanayacá. Y tšëngaftanga šmondëtatšëmbo entšanga obanayá ndoñe ntsoyobanana jtsiyenana, chë nyetsca tescama yomna tšabe vida chabe ainaniñe jtsebomnëse.

<sup>16</sup> Ndayá chë jtsenbobonshánana bëtsemnana mëntšá montsetátšëmbo: Jesucristo chabe derecho vida jtsobomñama cachcá tojanonýá y bëngbiamana tojanóbana; cachcá bënga šontsamna jtsemnana, sempre jtseprontánana chë Jesucristbeyeca bëngbe catšátangbiamana jóbana.



17 Canĵa bomnana tojtsebomna y catšátbioye uajabotá tbojtsonĵá, pero chabiama ndoñe tbonjongmé y ndoñe tbonjuájabuache, cha ndoñe ntobenana Běngbe Bětsabiama ainaniñe bonshánana jtsebomnana.

18 Atšbe básenga, ndoñe quešnátamna nĵe běngbe catšátanga imuababuánĵeshana ca jatichámuana, y nĵe chě bonshánama jatóyebuambnayana; pero ndegombre šontsamna ndayánaca jamana, chca, jinĵanĵiyama, běnga ndegombre ínĵengbiama imuababuánĵeshanama.

*Běngbe Bětsabe delante natĵěmbana ainánaca entšanga*

19 Chcase běnga mochántsetatsěmbo, ntšamo chě Běngbe Bětsabe ndegombre soyenga yomncá běnga imojtsamama. Y běnga ndoñe quemochátenocochinĵena, Běngbe Bětsábioca jtsemnana merecido ndoñe mondbuájona ca tmojtsejuabná ora; y běngbe ainana natĵěmbana Běngbe Bětsabe delante echántsemna.

20 Běnga chca běngbe ainaniñe tmojtsejuabná ora, běnga montsobena natĵěmbana ainana jtsebomnana, er Běngbe Bětsá corente jtsotatsěmbñana ntšamo běngbe ainana yomnana, y cha lempe yotátšěmbo.

21 Atšbe bonshana entšanga, běnga ndoñe bacna soye tmonjama ca běngbe ainaniñe tmojtsejuabnase, jtsobenana añémoca jtsemnana y tondayama ntsauatĵcá Běngbe Bětsabe delante jtsemnana.

22 Y cha lempe ntšamo chamojotĵañcá šochanjátšataye, er běnga montsama ntšamo Běngbe Bětsá ibuamandacá y ndayá chabe bominiñe tšabá yomncá.

23 Y chabe mando endmėna: běnga chabe Uaquiñá Jesucristbeñe jtsošbuáchiyana, y běnga nĵetscanga jtsenbobonshánana ntšamo Jesús šojěftsamėndacá.

24 Ntšamo Běngbe Bětsá tojěftsemandacá amėnga, Běngbe Bětsáftaca cánĵiñe mo canĵacá jtsemnana, y cha sempre chěngaftaca cánĵiñe mo canĵacá echanĵěftsemna. Y quem sóyeca běnga montsobena jtsetatsěmbuana cha běngaftaca iuėtsemnana: Uámana Espíritu běngbe ainaniñe cháumashėnguama cha tojama.

## 4

*Chě Běngbe Bětsabe Espíritu y chě Cristbe uayayabe espíritu*

1 Atšbe bonshana entšanga, nĵetscanga chě Běngbe Bětsabe juábnaca imoyebuambná ca ichámėngbioye ndoñe šmattsayaunana; botamana šmochjuarrepára corente jtsetatsěmbuama chěnga aiñe o ndoñe chě Běngbe Bětsabe juábnaca imóyebuambnama. Quem tempo banga Běngbe Bětsabe ndoñe ndegombre juabna oyebuambnayėnga quem luarėjana

mondajna. Chë causa tšëngaftanga cmontsamna botamana chëngbiama juarrepárana.

<sup>2</sup> Chë Bëngbe Bëtsabe Espíritu ndegombre imobomnëngbiama tšëngaftanga mëntsá šmontsobena jtsetatšëmbuana: nda tojayana Jesucristo quem luaroye aíñe entšacá tojánabo ca, cha ndegombre chë Bëngbe Bëtsabe Espíritu yojtsebomna.

<sup>3</sup> Pero nda ndoñe chca Jesucristbiama tonjayana, cha Bëngbe Bëtsabe Espíritu ndoñe yontsebomna; inyetsá, chana chë Cristbe contra yomnabe espíritu yojtsebomna. Tšëngaftanga šmojouena chë espíritu yochjabama; pero ndegombre cha ya quem luarentše entsemna.

<sup>4</sup> Atšbe básenga, tšëngaftanga Bëngbe Bëtsábenga šmondmëna y ndoñe šmonjalesenciá chë Bëngbe Bëtsabe ndoñe ndegombre juabna oyebuambnayënga tšëngaftangbioye chacmaingñema, er chë nyets tempo tšëngaftangbe ainaniñe vida endbomná, chë nye quem luarama enójuabnayëngbe ainaniñe mándayabiama más obená endmëna.

<sup>5</sup> Chë Bëngbe Bëtsabe ndoñe ndegombre juabna oyebuambnayëngna chë nye quem luarama enójuabnayënguentsana mondmëna, chíyeca chënga nye quem luarentša soyëngama jtsóyebuambnayana, y chë nye quem luarama enójuabnayënga chënga jtsayaunanana.

<sup>6</sup> Pero bënga Bëngbe Bëtsábenga mondmëna. Nda Bëngbe Bëtsábioye tbojtsabatma, bëngbioye jtsayaunanana; pero nda Bëngbe Bëtsábioye ndoñe tbontsabatma, cha bënga ndoñe ntsayaunanana. Chiñe bënga montsobena jtsetatšëmbuana nda chë ndegombre soyënga jóyebuambayama ama espíritu yobomnabiama, y nda chë ínÿëngbioye jáingñama ama espíritu yobomnabiámna.

### *Chë bonshánana Bëngbe Bëtsábiocana yóbocana*

<sup>7</sup> Atšbe bonshana entšanga, chë bonshánana Bëngbe Bëtsábiocana endóbocana; chcase, bënga šontsamna nyetscanga jtsenbobonshánana. Nda Bëngbe Bëtsábioye y chë inÿe entšángbioye tojtsababuánÿeshana, cha Bëngbe Bëtsabe uaquiñá jtsemnana y Bëngbe Bëtsábioye jtsabatmana.

<sup>8</sup> Nda ndoñe chca tontsebobonshana, cha Bëngbe Bëtsábioye ndoñe ntsábuatmana, er Bëngbe Bëtsá bonshanánaca nyetsca soyënga jamana.

<sup>9</sup> Bëngbe Bëtsá šonjinÿanÿé bënga šuababuánÿeshanana, cha chë nye canÿe Uaquiñá ibobomná quem luaroye jíchmuase; cha tbojanichmó, bënga chábeyeca chë nyetsca tescama yomna tšabe vida chamotsebomnama.

<sup>10</sup> Bëngbe Bëtsabe bonshánana mëntsá endmëna: ndoñe quenátsmëna bënga Bëngbe Bëtsá imobobonshánayeca, ndayá

cha bēnga šojánababuanýeshanayeca, y chabe Uaquiñá tbojanichmó, cha jóbanēse, bēnga bēngbe bacna soyēngama perdonánēnga chamotsemnama.

11 Atšbe bonshana entšanga, Bēngbe Bētsá chca šuababuánýeshana; chcasna, bēngnaca šontsamna nýetscanga jtsebobonshánana.

12 Ndocná ndocna te Bēngbe Bētsábioye tbonjinýe. Bēnga nýetscanga tmojtsebobonshánēse, Bēngbe Bētsá nýets tempo bēngaftaca echántsemna, y chabe bonshánana puerta bētsá bēngbeñe echántsemna.

13 Bēnga mēntšá montsobena ndegombre jtsetatšēmbuana bēnga Bēngbe Bētsáftaca imomnama y cha bēngaftaca: cha tonjanma chabe Espíritu bēngbe ainaniñe cháúamashēnguama.

14 Y cach bēnga fsēnjinye y entšanga fsēntsētsētná, chē Taitá chabe Uaquiñá tbojichmoma, quem luarentša entšanga jabátsebacama.

15 Ndánaca tojayana Jesús Bēngbe Bētsabe Uaquiñá yomna ca, cha Bēngbe Bētsáftaca cánýiñe echántsemna y Bēngbe Bētsánaca sempre cháftaca cánýiñe mo canýacá.

16 Chcase bēnga montsetátšēmbo y montsošbuaché ndegombre Bēngbe Bētsá bēnga šuababuánýeshanama. Bēngbe Bētsá nýetsca soyēnga bonshanánaca jamana y nda Bēngbe Bētsá y chē inýe entšanga sempre tojtsababuánýeshana, cha Bēngbe Bētsáftaca cánýiñe mo canýacá jtsemnana y Bēngbe Bētsánaca siempre cháftaca cánýiñe mo canýacá.

17 Chca, Bēngbe Bētsabe bonshánana puerta bētsá bēngbeñe echántsemna, bēnga bēts añémoca y tondayama ntsauatjá chamotsemnama, chē tšabá o ndoñe tšabá tmonjamama entšangbiana jayanama Cristo yochjésabo orscama; er bēnga Jesucrístoftaca cánýiñe mo canýacá jtsemnēse, quem luarentše mondmēna ntšamo Jesucristo endmēncá.

18 Nda Bēngbe Bētsá y chē inýe entšanga tojtsababuánýeshana, tondayama ntsauatjana; bēnga corente tmojtsebobonshana ora, ndoñe ntsopodénana uatjana jtsebomnana. Canýe entšá tojtsauatja ora, jtsemnana mo chabe castigo ya cuafjoboatšecá. Chca, nda uatjana tojtsebomna, Bēngbe Bētsábioye y chē inýe entšanga cha ndoñe corente yondábabuanýeshana, ntšamo Bēngbe Bētsá bēnga šuababuanýeshancá.

19 Natsana Bēngbe Bētsá šojánababuanýeshana, y chíyeca bēnga, cha y chē inýe entšanga imuababuánýeshana.

20 Nda tojayana: “Atše Bēngbe Bētsábioye sēndbobonshana ca”, pero cachca ora cachabe catšátbioye tbojtsáboyēnja, cha canýe bostero jtsemnana. Canýa aiñe jtsoobenana chabe

catšata jinŷama; y cha chë catšátbioye ndoñe tbontsebobonshana, ndegombre cha Bëngbe Bëtsábioye ndoñe bondbobonshana, ndábioye jinŷama ndoñe ntsobenana.

<sup>2</sup> Y bënga quem mando chábensana tmonjanóyëngacñe: nda Bëngbe Bëtsábioye tbojtsebobonshana, cachabe catšátbioynaca chabotsebobonshana ca.

## 5

*Chë Jesucristbeñe ošbuachiyá endobena Satanasbe soyënga jayëñjanana*

<sup>1</sup> Nda tojtsošbuaché Jesús chë Uámana Uabuayaná, chë Cristo yomnama, cha Bëngbe Bëtsabe uaquiñá jtsemnana; y nda canŷe taitábioye tbojtsebobonshana, chë taitabe uaquiñábioynaca cha jtsebobonshánana.

<sup>2</sup> Bënga Bëngbe Bëtsá tmojtsebobonshana y ntšamo cha tojtsemandacá tmojtsamëse, bënga ndegombre mochántsetatšëmbo, chë Bëngbe Bëtsabe basengbioynaca bënga imuababuánŷeshanama.

<sup>3</sup> Bënga Bëngbe Bëtsábioye imobobonshánama quem soyiñe jtsinŷnana: bënga ntšamo Bëngbe Bëtsá tomandacá tmojtsamëse. Y ndayá Bëngbe Bëtsá yomandacá ndoñe yapa totcá quenátsmëna bënga chamotsamama.

<sup>4</sup> Nda Bëngbe Bëtsabe uaquiñá tomna, chana jáyëñjanana quem luarentša entsanga y soyënga ntšamo Satanás yomandacá. Quem luarentša entsanga y soyënga ntšamo Satanás yomandacá, Crístbeñe bënga imošbuachéyeca montsobena bënga jayëñjanana.

<sup>5</sup> Nŷe nda, Jesús Bëngbe Bëtsabe Uaquiñá yomnama tojtsošbuaché, cha jtsobenana chë entsanga y soyënga ntšamo Satanás yomandacá jayëñjanana; ndocná más.

*Bëngbe Bëtsá tojinŷanŷé ntšamo chabe Uaquiñabiama ndegombre yomncá*

<sup>6</sup> Cach Jesucristo endmëna nda quem luaroye tojánabo y mëntšá tojanenonŷinŷé: búyeshca cha tmojanabaye ora, y buiñe juabuáshanëse cha tonjanóbana ora. Cha ndoñe tonjanenonŷinŷé nŷe búyeshca, ndayá búyeshca y buiñeca. Cach Uámana Espíritu entsobena jayanana chca ndegombre bëtsemnama Jesusbiamama, er chë Espíritu endmëna chë sempre ndegombre oyebuambnaya.

<sup>7</sup> Endmëna unga soyënga, ndayá iuinŷanŷná ntšamo ndegombre yomncá Jesusbiamama:

<sup>8</sup> Espíritu, búyeshca y buiñe; y chë unga soyënga lempe cachcá Jesusbiamama jtsinŷanŷnayanana.

<sup>9</sup> Bënga mondbétsejuabnaye, ndayá entšanga tmojinÿe ca tmojtsichámuama mo ndegombre cuaftsemncá, pero ndayá Bëngbe Bëtsá tojtsichamcá chë ndegombre soye jtsemnana y puerte jtsámanana, er chë ndegombre soye ntšamo cha tojtsichamcá, endmëna ndayá chabe Uaquiñabiama iuichamcá.

<sup>10</sup> Nda Bëngbe Bëtsabe Uaquiñábeñe tojtsošbuaché, cha chca nÿets tempo chabe ainaniñe jtsejuabnayana; nda Bëngbe Bëtsábeñe ndoñe tontsošbuaché, cha chca jtsamana mo Bëngbe Bëtsá canÿe bostero cuaftsemncá, er chë Bëngbe Bëtsá chabe Uaquiñabiama tojayana soyama cha jtsejuabnayana ndoñe ndegombre yontsemna ca.

<sup>11</sup> Ntšamo Bëngbe Bëtsá chabe Uaquiñabiama tojayancá mëntsá entsemna: Bëngbe Bëtsá bëngbiana tojama chë nÿetsca tescama yomna tšabe vida chamotsebomnama; y quem vida chabe Uaquiñábeñe entsemna.

<sup>12</sup> Nda Bëngbe Bëtsabe Uaquiñáftaca cánÿiñe mo canÿacá tojtsemna, cha chë tšabe vídnaca jtsebomnana; pero nda chë Bëngbe Bëtsabe Uaquiñáftaca cánÿiñe mo canÿacá ndoñe tontsemna, cha chë nÿetsca tescama yomna tšabe vida ndoñe ntsebomnana ca.

*Inÿe soyëngama jábuayenama y jtadióšoftanama*

<sup>13</sup> Tsëngaftanga, chë Bëngbe Bëtsabe Uaquiñábeñe šmošbuachéngbioye quem soyënga cbontsëbuabiamná, ndegombre chašmotsetatšëmbuama chë nÿetsca tescama yomna tšabe vida šmojtsebomnama.

<sup>14</sup> Bënga bëts añémoca y ndauatjcá Bëngbe Bëtsabe delante mondmëna, er bënga mondétatšëmbo, nderado ntšamo chaotsemnana cha tojtsebošcá bënga tmojotjañe ora, cha bënga šnétsayaunanama.

<sup>15</sup> Nderado ndayá chca Bëngbe Bëtsábioye tmojtsotjanañe ora, cha bënga joyaunayana; bënga mondétatšëmbo chca ndegombre yomnama, y chca, bëngnaca montsetatšëmbo, ndayánaca chábioye bënga chamojotjañcá cha šochjátšatayama.

<sup>16</sup> Nda cachabe catšátbioye tbojinÿe canÿe bacna soye tojtsamama, pero chë bacna soye tojamentšana cha perdonaná jtsemnana cabá tojtsopodénëse, chábioye bontsemna Bëngbe Bëtsá jaimpádana, y chca, Bëngbe Bëtsá echanjama chë catšata chë nÿetsca tescama yomna tšabe vida chaotsebomnama, cha chca tojamentšana perdonaná jtsemnana cabá tojtsopodénëse. Pero canÿe bacna soye endmëna, y chca tojamama canÿa ndoñe ntsoebenana perdonaná jtsemnana, y chca, cha jabocnana canÿa nÿetsca tescama castiganá chaotsemnana, y atše ndoñe quetsátichamo chë bacna soyama yojtsemna Bëngbe Bëtsá jtseimpadánana chaboperdonama ca.

<sup>17</sup> Nda tojtsama ntšamo Bëngbe Bëtsá ndoñe yondëmandacá, cha bacna soye jtsamana; pero nyetsca bacna soyënga ntšamo canya tojtsamcá, ndoñe ntjamana cha ndëperdonaná chaotsemnana.

<sup>18</sup> Bënga mondëtatšëmbo, nda Bëngbe Bëtsábioye mo taitacá tbojtsebomna, cha ndoñe ntsiyenana bacna soyënga jtsamëse, er chë Bëngbe Bëtsábentsana Onyñaná chábioye jtsinyenana, y Satanás, chë nyetsca bacna soyënga amëndayá, tondaye ntsobenana chábioye jabórlana.

<sup>19</sup> Bënga mondëtatšëmbo, bënga chë Crístbeñe ošbuáchiyënga Bëngbe Bëtsábenga imomnana, y chë quem luarentša inye entšanga Satanasbe cucuatšiñe imomnana.

<sup>20</sup> Bëngnaca mondëtatšëmbo Bëngbe Bëtsabe Uaquiñá tojabama, y cha iuama bënga osertánana chamotsebomnana, chë ndegombre Bëngbe Bëtsá yomná jtsabuatmama. Bënga chë ndegombráftaca cányiñe mo canyáca mondmëna, bënga chabe Uaquiñáftaca cányiñe bëtsemnayeca. Cha chë ndegombre Bëngbe Bëtsá endmëna, y nda chë nyetsca tescama yomna tšabe vida entšanga chamotsebomnana iuamá.

<sup>21</sup> Atšbe básenga, ndoñe šmattsadorana cach entšangbe pormana soyënga, chë ndayama ínÿenga mondbëtsejuabnaye diosënga yomna ca.

## 2 San Juan

*Jtsiyenana ndegombre soyëngaca y nyëtscanga jtsenbobonshánëse*

<sup>1</sup> Atše chë bëtsëjema, quem tsbuanácha sëntsabiamná, chë uámana mamá, chë Bëngbe Bëtsabe bocacaná y chabe basengbiámna, ndëmuanyënga atše ndegombre sëndábabuanyëshana. Y ndoñe nyë atše chënga quetsátababuanyëshana, ndayá nyëtscanga chë Bëngbe Bëtsabe ndegombre soyënga uabuátmëngnaca.

<sup>2</sup> Atše cbontsababuanyëshana, chë ndegombre soyënga bëngbe ainaniñe mondbómna y chë soyënga bëngbe ainaniñe sempre echántsemna.

<sup>3</sup> Atše sëntseimpadana Bëngbe Bëtsá chë Taitá, y Jesucristo chë Taitabe Uaquiñá, chaboma tsëngaftangbeñe tsabe bendicionënga chaotsemnama, chata tsëngaftangbioye chácmalastemama, y chaboma tsëngaftangbe ainaniñe tsabe ebionana chašmotsebonnama. Quem soyënga, bënga chë ndegombre soyënga uabuátmënga y nyëtscanga mondenbobonshánëngaftaca echántsemna.

<sup>4</sup> Puerte sënjoyejuá, er atše acbe básenguentše báseftanga sënjányena chë ndegombre soyënga ntšamo Bëngbe Bëtsá chë Taitá sojamëndacá jtsamëse.

<sup>5</sup> Y mora, uámana mamá, cbontseimpadana Diosmanda nyëtscanga chamotsenbobonshana. Chë cbontsëbuabiamná soye ndoñe canye tsëm mando quenátsmëna, ndayá cach Cristbe ústonënga tmonjanobiama ora tmonjanóyëngacñe mando.

<sup>6</sup> Bënga, Bëngbe Bëtsá y chë inye entsanga imababuanyëshanama jtsinynana, bënga ntšamo Bëngbe Bëtsá tojamandacá jtsamëse tmojtsiyenama. Y chabe mando, ntšamo Cristbe ústonënga šmonjanobiama ora šmojanuencá, mëntsá endmëna: jtsiyenana Bëngbe Bëtsá y chë inye entsanga jtsababuányëshanëse.

*Chë entsángbioye áingñayënga*

<sup>7</sup> Quem luarëjana banga entsángbioye áingñayënga mondana, y chënga jtsejuabnayana Jesucristo quem luaroye ndoñe mo canye ndegombre entsacá tonjánabo ca. Nda chca tojtsejuabná, cha jtsemnana chë aingñayá y Cristbe contra yomná.

<sup>8</sup> Chëngbiamna cuedado šmochtsëbonna. Ndoñe chcase, tsëngaftanga ndoñe quešmochátsbomna chë Cristbiamna cach tsëngaftangbe trabajuentsana tojóbozna soyënga, y

ndoñe quešmochatosháchiñe lempe ntšamo Běngbe Bětsá tšěngaftangbioye jatšatayama yojtsebošcá.

<sup>9</sup> Ndánaca chě Cristo tojanabuatambá soyəngama inye soyənga tojatabuatambá, cha ndoñe Běngbe Bětsáftaca cányiñe mo canyáca ntsemnana; pero nda sempre ntšamo Cristo tojanbuatěmbacá tojtsabuatambá, cha aíñe chě Taitáftaca y chabe Uaquiñáftaca cányiñe mo canyáca jtsemnana.

<sup>10</sup> Ndánaca tšěngaftangbioye tojá jabuátambama, pero ndoñe ndayá Cristo tojanabuatambacá tojtsebuátěmbase, cha ndoñe šmatjofja, ni mo šmatjachuaye.

<sup>11</sup> Er nda chábioye tbojachuase, chábioye jtsajabuáchanana chě bacna soye chaomama.

### *Jtadiósoftanama*

<sup>12</sup> Atše ba soyənga sěntsebmoma tšěngaftanga jáuyanama, pero ndoñe quetsátsboše tsbuanáchañe jubuábiamama. Atše sěntsejuabná aíñe chjobenaye tšěngaftangbioye jama, jobenayama nyětscángaftaca jencuéntama, chca, běngbe oyejuayana puerte bětscá chaotsemnana.

<sup>13</sup> Crístbeyeca acbe quenata, chě Běngbe Bětsabe bocacaná, chabe básenga cmontsacheuaná.



## 3 San Juan

### *Juan Gaybiam a puerte tšabá tojanoyebuambá*

<sup>1</sup> Atše chë bëtšējema, quem tsbuanácha atšbe bonshana amigo Gaybiam a sěntsabiamná. Chábioye atše ndegombre sěndbobonshana.

<sup>2</sup> Atšbe bonshaná y Crístbeyeca atšbe catšata, Běngbe Bětsá sěntseimpadana aca tšabia nŷetsca soyěnguiñe chacotsemnama y salud bomnánaca. Atše sěntsetatšěmbo aca ainaniñe tšabá cotsomñama, Běngbe Bětsabiam a bětscá tšabe juabněnga chentše jtsebomněse.

<sup>3</sup> Er báseftanga Jesucristbeñe ošbuáchiyěnga átšbioye tmonjabo y šmonjacuentá ntšamo aca chë ndegombre soyěnga yomncá icuamama, aca chë ndegombre soyěnga jtsaměse icoyenama. Chíyeca atše bětscá sěntsoyejuá.

<sup>4</sup> Tondaye jamana atše nŷetšá oyejuayá chaitsemnama, ndayá nŷe jouenana chë atšbe basengcá imoquedáněnga ntšamo chë ndegombre soyěnga yomncá jtsaměse imoyenama.

<sup>5</sup> Atšbe bonshaná, aca contsama ntšamo Jesucristo tonjanbuatěmbacá, aca chë ínŷyenga Jesucristbeñe ošbuáchiyěnga jujabuáchama ndayánaca tcojama ora, y masna, chë inŷe luaroquěngocana ashjajněngbiam a ndayánaca tcojtsama ora.

<sup>6</sup> Chë átšbioye tmonjaběnga tmonjoyebuambá, chë Jesucristbeñe ošbuáchiyěnga quem luarentše mondbenenefjněngbe delante, aca tša chěnga icuababuánŷeshanama. Diosmanda, ntšamo tojtsějabotcá chěnga cochjújabuache, chca, chěnga chamobená tšabá inŷe luarěngoye játama. Chěnga mondměna Běngbe Bětsabiam a trabájayěnga; chcasna, chěngaftaca cochjama ntšamo chěnga chama merecido imobuajoncá.

<sup>7</sup> Chca cochjama, er chěnga chěngbe pueblěnguentšana tmojěftsebocana Jesucristbe soyěngama entšángbioye jábuayenama, y chěnga chama tondaye crocénana quematóyěngacañe chë Jesucristbeñe ndošbuáchiyěngbe cucuatšentšana.

<sup>8</sup> Chíyeca běnga šontsamna chěngbiam a jtsantješnana y jtsějabuáchanana, chca, běnga chamobená cánŷiñe chěngaftaca jatrabájana, entšángbioye chë ndegombre soyěngama jábuayenama, ndayá chěnga mondama.

### *Diótrefes ndoñe tšabá tonjanma; Demetrio aíñe*

<sup>9</sup> Atše canŷe tsbuanácha chë Jesucristbeñe ošbuáchiyěnga chentše mondbenenefjněngbioye sěnjubuábiam a, pero Diótrefes

ndoñe yontsuenana ntšamo atše sěntsichamcá, er cha yojtseboše chě ín̄yengbioye n̄ye jtsaměndayana.

<sup>10</sup> Chíyeca atše choye chajjá ora, ndayá cha yojtsamama chanjauácacana. Cha sempre bacá yojtsoín̄yana y uayátsenaye soyēnga bēngbe contra yojtsichamo. Y chě soye chábioye ndoñe bontsobastana; chana chě Jesucristbeñe ošbuáchiyēnga chabe puebioye tmojáshjajnēnga ndoñe ntjúbuajana, y chēnga júbuajama tmojtsebošēngbioye ndoñe yontsalesenciana chca chamomama, y chě Jesucristbeñe ošbuáchiyēnga bétsemnama inm̄étsenefjuana luarentšana yojtsatēbuacana.

<sup>11</sup> Atšbe bonshaná, ndoñe cattsama chě ndoñe tšabá yontsamacá, ndayá chě tšabe soyēnga tmojtsamēngcá cocht-sama. Nda ntšamo tšabá yomncá tojtsama, cha Bēngbe Bětsábia jtsemnana; pero nda ndoñe chca tontsama, cha cabá ndoñe yondětatsēmbo ntšamo Bēngbe Bětsá yomnama.

<sup>12</sup> Jesucristbeñe ošbuáchiyēnga n̄yetscanga tšabe soyēnga Demetriēbiana montsichamo, y Jesucristbe ndegombre soyēnga entsin̄yana ntšamo cha soyēnga yojtsiyenama. Bēngnaca chabiana tšabá fsěntsichamo, y aca condětatsēmbo ntšamo bēnga fsěntsichamcá, ndegombre yomnama.

### *Jadiósoftanama*

<sup>13</sup> Atše ba soyēnga sěntsebomna aca jauyanama, pero ndoñe quetsátsboše tsbuanáchañe juábobemana.

<sup>14</sup> Atše sěntsejuabná betscó chjobenaye ácbioye jama jau-atsětsayama y jobenayana ácaftaca jencuéntama.

<sup>15</sup> Puerte tšabe ebionana ainaniñe chacotsebomna. Quem luarentša amiguēnga cmontsechuaná. Diosmanda, bēngbe amiguēngbioye choca cada ona cochjácheuaye.

## San Judas

### *Jacheuayama*

<sup>1</sup> Atše Judas, Jesucristbe oserverná y Santiagbe catšata, quem tsbuanácha sěntsabiamná, nděmuanÿengbioye Běngbe Bětsá, chě Taitá chabe entšanga chamotsemnana tojáchembo, chabe bonsháněnga, y nděmuanÿenga Jesucristo endánÿena.

<sup>2</sup> Atše, Běngbe Bětsá sěntseimpadana, cha puerte lastemado tšěngaftangaftaca chaotsemnana, cha chaoma tšěngaftanga ainaniñe tšabe ebionana chašmotsebomnana, y chaoma tšěngaftanga cada te más Běngbe Bětsábioye y ínÿengbioye chašmotsababuánÿeshanama.

### *Chě ndoñe ndegombre soyěnga buátěmbayěnga*

<sup>3</sup> Atšbe bonsháněnga, atše tša sěndboše tšěngaftanga jubuábiamama, ntšamo Jesucristo běngbe bacna soyěnguentšana šojátsebacama, tšěngaftangbioye y běngbioynaca; pero atše sěntsejuabná atše šojtsemna tšěngaftanga jubuábiamana, jáimpadama bětsá chašmotsama Jesucristbe soyěngama, chě mondošbuaché soyěngama jenujuéřzama, ndoñe chaondopochocama. Chě soyěnga Běngbe Bětsá chabe entšanga canÿe tojatsatá, y nÿetsca tescama.

<sup>4</sup> Er tšěngaftanga ntšamo ínÿenga imomnana ntjatatšěmboncá, básefta entšanga tšěngaftangaftaca tmojenutaná. Chěnga mondměna Běngbe Bětsá ndoñe adórayěnga, y chě buátěmbana soyěnga tmojtsetrocá. Běngbe Bětsá běngbe tšabiamana juabna yobómnayeca, chěnga jtsichámuana tšěngaftanga šmojtšobena nÿetsca bacna soyěnga jtsaměse jtsiyenana, jenomándama ntšobencá ca; y chca, chěnga montseboše jinÿanÿiyama, Jesucristo ndoñe běngbe canÿe Nduiño y Běngbe Utabná chěngbiamana yondměna ca. Y bayté, Běngbe Bětsabe uabemana palabřenguiñe tmojanábema, chě chca aměngna jtsamnana nÿetsca tescama castigáněnga jtsemnana ca.

<sup>5</sup> Masque tšěngaftanga lempe quem soyama ya šmondětatsěmbo, atše sěntseboše jamama tšěngaftanga chašmotsenujubná, Běngbe Utabná, Israeloca entšanga Egiptoquěngbe cucuatšentšana tojanatsebacá chentšana, cachá chě Israeloquěnguentše chábeñe ndošbuáchiyěnga tojánapochocama;

<sup>6</sup> y cachcá chě angelěngbiámna, nděmuanÿenga ndoñe tmonjanoquedá chě tmojanóyěngacñe mándoca, pero aíñe chěngbe luarěnga cachcá imojěftsonÿaye. Chě causa, Běngbe

Bëtsá tojanmandá cadenějuangaca nÿetsca tescama chamoquedama, chë más ibetiñe, tondaye binÿiñe luarentše, chënga bacna soyënga tmojanmama nÿetsca tescama castigánënga jtsemnana yojtsamna ca, cha jayanama tescama.

<sup>7</sup> Y chë Sodoma y Gomorra, y chë béconana pueblënguëntše entsangbiámnaca; chëngnaca cach angelëngcá ndoñe tšabá monjánama, y nÿetsca bacna soyënga imojánama boyabása o shembásaftaca, y ínÿengaftaca y bayëngaftácnaca. Chíyeca chënga tmonjansufrí chë ñëshECA castigo nÿetsca tescama, y chca, nÿetsca entsángbioye tmojaninÿanÿé, ndayá yochjopása chë chca Bëngbe Bëtsábioye ndoñe tbontsobedecenáftaca.

<sup>8</sup> Cachcá, chë ndoñe ndegombre soyënga buátëmbayëgnaca chë mo otjenayoquécá tmojáninÿe soyëngama jtsichámuana, y chë causa cachëngbe cuerpëngama bacna soyënga jtsamana, chë mando bomnëngbioye jtsëbáténana, y chë espíritënga obenana bomnëngbiana ndoñe tšabá ntsichámuana, mo chëngbioye cuafjoyanguangcá.

<sup>9</sup> Pero ni mo chë angelëngbe mandayá Miguel quem buátëmbayëngcá tojanma. Cha chë diábloftaca ibojentsjaná ora, Moisesbe cuerpama cháftaca jabuachana ibojanenatsësnaye ora, ndoñe tonjanenñemó jayanama chë diablëbiana podesca soyënga, jýenguanguse, ndayá nÿe mëntšá ibojauyana: “Bëngbe Utabná chacmácacana ca.”

<sup>10</sup> Pero quem buátëmbayëngna, chë ndoñe tontsësertana soyëngama podesca jtsichámuana, y ntšamo tojtsebionama y tmojtsebošama, nÿe mo bayëngcá, chë soyëngama tšabá josértama juabna ndbomnënga, ndayá chentšana tmojtsësertancá jtsamëse, jamana chënga nÿetsca tescama castigánënga jtsemnana chamotsajnama.

<sup>11</sup> ¡Tša lastema quem buátëmbayëngbiana! Er chënga ndoñe tšabá tmojanma, mo Caincá; cha tojanaboté ntšamo Bëngbe Bëtsá inétsama bacna soyënga japerdónama, y cabana chabe catšátbioye tbojanóba. Chënga crocénana juácanama, mo Balaam yojanamcá, Bëngbe Bëtsabe tšabe benachentšana tmojtsojuánañe, bacna soyënga jamama. Chënga chë amëndayëngcá Bëngbe Bëtsá tojanabacacángbioye ndoñe ntsayaunanana, ntšamo Coré, Moisés y Aarónbioye joyaunayama ndoñe tonjanbošencá; y chë causa chënga pochocánënga mochántsemna, ntšamo Coré pochocaná chaotsemnana Bëngbe Bëtsá tojanmcá.

<sup>12</sup> Chëngna tšëngaftangbiana jtsemnana mo canÿe ndëtsenga luarentše canÿe bëts tsengacá, tšëngaftangaftaca tmojenutaná ora, cánÿiñe jasama mo Jesucristbeñe ošbuachiyëngcá. Chënga chca jtsemnana, er chca fiestënguñe chënga oyejuayënga jtsemnana, nÿe chënga tšabá jtsomñama soyënga

jtsamëse, y chënga chama ndoñe ntsëuatjana. Chënga nÿe cachëngbiama jtsantjeshnana, ínÿengbiama ndoñe. Chënga tša jtsašebuachiyana, pero chëngbe buatëmbana soyënga ínÿengbiama tondayama ntsoservënana; y chca, chënga jtsemnana mo chë tša jënÿá ora jantšetëshëngcá, tondaye ntjuaftena, bínÿiaca ochñëjuanëshënga; y mo betiyeshënga jashtsnëshenga y buashanëshëngcá, chë jashacama tojtsemna ora tondaye shajuana causa.

<sup>13</sup> Chënga nÿets tempo bacna soyënga jtsamana cachëngbe bacna juabnëngaca, y chë bacna soyënga ntšamo tmojt-samcá jtsinÿanÿnayana chënga chë bacna juabnënga imobom-nama. Chca, chënga jtsemnana mo mar béjayoca oleshëngcá, chentsana espumushënga bëtscá tsenguësheca jtsóbocanana. Y cabana, chënga jtsemnana mo estrellëngcá chëtemëngbe benachentsana tmojtsebocna, y chentsana jtsefsanana. Bëngbe Bëtsá tojamandá, chë buátëmbayënga ntšamo tmojamamna, chë más ibetoca, tondaye binÿiniñe luarentše nÿetsca tescama chënga chamoquedama.

<sup>14</sup> Adánbentšana chñënguana pamillo entsanga tmojánachñëjna chentsana Enoc tojánashjango. Chánaca Bëngbe Bëtsabe juabna tojanoyebuambá chë bacna buátëmbayëngbiama, mëntšá tojánayana ora: “Smochjinÿe, Bëngbe Utabná echanjabo bëtscá uaranga angelëngaftaca,

<sup>15</sup> nÿetsca entsangbiama jabáyanama ntšamo tmojamcá tšabá o ndoñe tšabá bëtsemnana; y cha echanjamánda chë Bëngbe Bëtsábioye ndoñe adórayënga nÿetsca tescama castigánënga chamotsemnana, tša bacna soyënga chabe contra tmojamama, y bacna soyënga chabe contra tmojayanama, chënga, chë puerte bacna soyënga amënga ca” —tojánayana.

<sup>16</sup> Chënga mondmëna chë tšabe soyëngama nÿets tempo podesca ichámënga, y ndocna te tondáyeca oyejuayënga ntsemnana. Chënga jtsiyenana bacna soyënga jtsamëse nÿe cachënga tšabá jtsomñama, y puerte botamana pal-abrënga jtsichámuana uámanënga jtsenobiamnayëse, y tšabe soyënga ínÿengbioye jtsëtsënayana, chënga tšabá joquédama y chëngbentšana ndayánaca josháchiñama.

### *Ošbuáchiyënga jábuayenama*

<sup>17</sup> Pero tšëngaftanga, atšbe bonshánëngna, šmochtsenójuabnaye ndayá chë Bëngbe Utabná Jesucristbe ichmónënga tmojanëyanama, mëntšá:

<sup>18</sup> “Jesucristo quem luare jésabama tempo chaojtsobeco ora, mochántsemna entsanga, y chënga mochantsiyena jtsamëse nÿe cachënga tšabá jtsomñama bacna juabnëngaca, y tšëngaftanga cmochantsëbuayajuana ca.”

19 Chënga mondmëna chë ošbuáchiyënguëntšë nÿetscanga ndoñe cachcá chamondëtsejuabnama amënga; chënga mon-doyena jtsamëse cachëngbe bacna juabnëngaca y ndoñe quemátsbomna Uámana Espíritu, chëngbe ainaniñe chaotsemándama.

20 Pero tšëngaftanga, atšbe bonshánënga, nÿets tempo, cada te más Jesucristbeñe ošbuáchiyana šmochtsebomna, chë Bëngbe Bëtsábiocana endóbocana ošbuáchiyana, y Bëngbe Bëtsáftaca šmochjencuénta, ntšamo Uámana Espíritu tcmojtsamëndacá.

21 Yejuana šmochtsantješna tšëngaftanga nÿets tempo chašmotsiyenama, Bëngbe Bëtsá cmababuánÿeshanama jtsejuabnayëse, y šmochtsobátmana chë tempo ndaye ora Bëngbe Utabná Jesucristo, tšëngaftanga jtsalastemánëse, yochjama tšëngaftanga chë nÿetsca tescama yomna tšabe vida chašmotsebomnama.

22 Chë inÿe ora aiñe y inÿe ora ndoñe Jesucristbeñe ošbuáchiyana bomnënga šmochtsalastemana.

23 Bëtscá šmochtsama, báseftanga chë uabouana castigüentshana atsebácanënga chamotsemnana, mo chënga íñeshentshana cuaftëbuacancá. Inÿengbiana chacmotsangmena, pero cuedado šmochtsebomna, chënga chašmojtsëjabuachana ora, ntšamo chënga bacna soyënga tmojtsamcá ndoñe chašmondëtsamama; y chë bacna soyënga ntšamo chënga tmojtsiyena jtsamëse, chëngbe bacna juabnëngaca, nÿa tondaye chacmondëtsogetana.

### *Judas, Bëngbe Bëtsá jëtschuayama*

24-25 Chë nÿe canÿe Bëngbe Bëtsá, bëngbe Atsebacayá obenana endbomna tšëngaftanga jtsanÿenama, chca, tondaye chaondëma tšëngaftanga Jesucristbeñe ošbuáchiyana chašmotsajbanama; y obenana endbomna tšëngaftanga ainaniñe ndocna bacna soye ndbomnënga chašmotsemnana y puerte oyejuayënga cachabe delante chašmotsemnana, cha canÿe puerte uamaná y obená bëtsemnana chaojinÿanÿé ora. Bëngbe Utabná Jesucristbeyeca, nÿetscanga Bëngbe Bëtsá chamotsatschuaná; y cha puerte bëtsá chauesomñe, nÿets obenana bomná y nÿets mando bomná, nÿets tempscana, tempo, mora y nÿetsca tescama. Chca chaotsemna.

# Apocalipsis

## *Ndayá quem librësãñe yomna*

1 Quemuentse entsábemana ndayá Bëngbe Bëtsá Jesucristbioye tbojaninÿinÿé, chë Bëngbe Bëtsabe oservénënga cha cháuinÿanÿema, ndayá jopásama yojsobecuama chënga chamotsetatšëmbuama. Jesucristo chama chabe ángel tbojichmó, chë soyëngama atše, Juan, chë Jesucristbe oservenábioye chašuinÿinÿema.

2 Y atše sënjayana lempe ntšamo ndegombre yomncá lempe chë tijinÿe soyëngama, chë Bëngbe Bëtsabe buayenana soyëngama y chë Jesucristo šonjaniana ndegombre bëtsemna soyëngama.

3 Oyejuayá nda tojtsalía, y oyejuayënga ndëmuanÿënga botamana tmojtsuenana quem yochjopása soyëngama, chë muentse entsabemancá ndegombre tmojóyeunanga, er chca jopasa tempo entsobeco.

## *Asia luaroca ošbuachiyëngcá enefjuanënga jacheuayama*

4 Atše Juan, sëntsabiamná chë Asia luaroca canÿsëftañe ošbuachiyëngcá enefjuanëngbiama. Atše, Bëngbe Bëtsá sëntseimpadana, tšabe bendicionënga chábiocana chašmosháchiñe y ainaniñe puerte tšabe ebionana chašmotsebmna, Bëngbe Bëtsábentšana, chë canÿsëfta espíritëngbentšana y Jesucristbentšana. Bëngbe Bëtsá, chë mora endmëná, enjamná y sempre echantsemná; chë canÿsëfta espíritënga, chabe uámana puesto natsanoica mondmënénga;

5-6 y Jesucristo, chë ntšamo Bëngbe Bëtsabiamna yotatšëmbcá ndegombre oyebuambnayá, chë natsaná ndabiamna Bëngbe Bëtsá tojama obanënguentšana cháuatayenama, y nÿetsca quem luarentša mandadëngbe amëndayá. Cristo šondábabuanÿeshana y bëngbe bacna soyënguentšana šojatsebacá, cha tonjanóbanayeca, chabe buiñe juabuáshanëse. Cha tojama bënga chamotsobena cháftaca jtsemándayana y uámanënga chamotsemnana, y Bëngbe Bëtsá chabe Taitá mo bachnangcá chamotseservénama. ¡Nÿetscanga nÿets tempo chamotsinÿanÿná Cristo puerte bëtsá y uamaná bëtsemnana y obenana nÿetsca tescama yobomnana! Chca chaotsemna.

7 Mouenënga. Cristo jantšetëshënguiñe echanjésabo.

Chábioye nÿetscanga mochanjinÿe, chë tmonjancrucificágnaca;

y quem luarentša nyetsca entšanga puerte ngménaca  
 mochántsemna  
 y mochantsošachna chábeyeca.  
 Ndegombre, chca chaotsemna.

<sup>8</sup>“Atše sēndmēna chē nyetsca soyēnga bojatsayá y pochocayá ca,” Bēngbe Utabná Bēngbe Bētsá tojayana. Cha chē sempre endmēná, enjamná, nyets tempo echantsemná, chē nyets obenana bomná.

*Juan mo otjenayoquécá Cristbiamá tojáninýe*

<sup>9</sup> Atše Juan, Jesucristbeyeca tšēngaftangbe catsata, cháftaca cánýiñe mo canýacá bétsemnama, cach tšēngaftangcá sēndēpadecena, tšēngaftangcá chanjēftsashjache Bēngbe Bētsabe amēndayoye jamashēnguama, y tšēngaftangcá Bēngbe Bētsabeñe jtsobátmanēse, uantado sēndmēna chē padecena soyēnguiñe. Bēngbe Bētsabe palabra sēnjánabuayiynama y Jesusbiamá ntšamo ndegombre endmēncá sēnjánóyebuambnama, atše šmonjetsanētšena mar bėjayoca canýe fshantsentše, Patmos ca uabáinoca.

<sup>10</sup> Y tonjanopasá, canýe tmengo, chē ošbuáchiyēnga Bēngbe Utabnábioye cánýiñe jētschuayama te, atše sēnjanoquedá chē Uámana Espíritbeyeca corente mandaná, mo otjenayoquécá soyēnga sēnjétsonýaye, y atšbe stētšoica canýe jabuache oye-buambnayana sēnjanuena, mo canýe trompetéfjua cuafjuajātētcá;

<sup>11</sup> mēntšá šontsanatsētsná: “Canýe librēšañe mábema lempe ntšamo contsonýacá y cochjuíchmua chē Asia luaroca canýsēftañe ošbuachiyēngcá enefjuanēngbioye: Efeso, Esmirna, Pérgamo, Tiatira, Sardis, Filadelfia y Laodiceoquēngbioye ca.”

<sup>12</sup> Sēnjanobuértana jinýama nda chca šojtsanatsētsná, y chca sēnjanma ora, sēnjáninýe canýsēfta castellano candelerēšēnga;

<sup>13</sup> y chē canýsēfta castellano candelerēšēnguiñe tsēntsaca canýa sēnjáninýe, mo entšacá inýná, canýe bēn entšayá uichētjoná, y cochóntscoca canýe tēntša castellano uasnanéjaca.

<sup>14</sup> Chabe stjēnashana uafjantsēsha, puerte uafjantsēsha mo canýe oveshabe boboshēshacá, y chabe fšnēbēnga mo iñeshcá enjētsinýna.

<sup>15</sup> Chabe shecuatšēnga enjētsebuashinýinýana mo bronscá, ndaybé natsana iñējana tcojuchnēngo enabé chaotsemnama y chentšana entšējuaca becá tcojajojó corente chaotsebuashinýinýanama; y chabe oye-buambnayana jabuache enjētsenana mo bētscá bėjaye cuaftsebuachquēcjaná.

<sup>16</sup> Chabe catsbioica cucuatšiñe enjētsatbēna canýsēfta estrellēnga, y chabe uayoicana enjētsobocana canýe espadēja,



nÿets utoicajana puerte efsánëja, y chabe jubiá tša enjëtsebuashinÿinÿana, mo chë shinÿe corente, lempe ntšamo tojobenacá tojtsebuashinÿinÿana orcá.

<sup>17</sup> Cha sënjaninÿe ora, chabe shecuatšentše mo obanacá sënjánshajaye. Pero cha, chabe catšbioica cucuatše átšbeñe jajájuase, šonjaniyana: “Ndoñe matauatjana; atše sëndmëna chë nÿetsca soyënga bojatšayá y pochocayá,

<sup>18</sup> chë sempre vida bomná. Atše obaná sënjamna, pero mora nÿetsca tescama vida sëntsebomna. Atše obenana sëndbomna, y chë obenánaca entšángbioye ndoñe quenátamna infernoca nÿetsca tescama castigánënga jtsemnana, mo nÿets tempo cuaftsobancá.

<sup>19</sup> Ntšamo tconjinÿcá mábema, chë quem tempo endmëna soyëngama y chë más chcoye echántsemna soyëngama.

<sup>20</sup> Mëntšá endmëna chë atšbe catšbioica cucuatšinë tconjinÿe canÿsëfta estrellëngaca y chë canÿsëfta castellano candelersëngaca: chë canÿsëfta estrellënga montsinÿinÿná chë canÿsëftañe ošbuachiyëngcá enefjuanëngbeñe chamotsemándama uámana ichmónënga, y chë canÿsëfta candelersëngna chë canÿsëftañe ošbuachiyëngcá enefjuanënga.”

## 2

### *Efesoca ošbuachiyëngcá enefjuanënga jábuayenama*

<sup>1</sup> Mëntšánaca cha šonjaniyana:

“Mëntšá mabobema chë Efesoca ošbuachiyëngcá enefjuanëngbeñe chaotsemándama uámana ichmonábioye:

Mëntšá entsichamo chë chabe catšbioica cucuatšinë canÿsëfta estrellënga entsatbëná y chë canÿsëfta castellano candelersëngaca luarëjana entsaná:

<sup>2</sup> Atše lempe sëndëtatšëmbo ntšamo tšëngaftanga šmoyenana; atše corente sëndëtatšëmbo tšëngaftanga jabuache šmotrabájama, y ntšamo tšëngaftanga Bëngbe Bëtsábeñe jtsobátmanëse šmnëtsauantana padecena soyënguiñe šmojtsemna ora. Y átšnaca sëndëtatšëmbo tšëngaftanga ndoñe šmontsobena jtsëuantánana ntšamo bacna entsanga tmojtsamcá. Atšnaca sëndëtatšëmbo tšëngaftanga yejuana šmojarrepará y becá šmojenojuabó jinÿama chë Jesucristbe ichmónënga imomna ca tmojtsichamëngbiama; pero ndegombre chënga ndoñe chca quemásmëna; y chca šmojámayeca, tšëngaftanga mora šmontsetátšëmbo chënga bosterënga imomnama.

<sup>3</sup> Padecena soyënguiñe becá šmojoboyá y chca ora, Bëngbe Bëtsábeñe šmobátmana. Chë soyënguiñe šmojasufrí,

tšëngaftanga atše šmoservénama; y tšëngaftanga chca šmondëservena, ainaniñe añemo jtsebomnama ntjajbanacá.

4 Pero canye soye sëntsebomna tšëngaftangbe contra jayanama: Tšëngaftanga mora ya ndoñe cachca bonshánana quešmátsbomna ni atšbiana ni nyetsca entšangbiana, ntšamo átšbeñe jtsošbuáchiyama šmonjanbojatsé orcá.

5 Menójuabonga ntšamo chë tempo šmonjánbobonshanama, juabnayana motrocanga y cachiñe šmochtsama ntšamo chë átšbeñe jtsošbuáchiyama šmonjanbojatsé orcá. Ndoñe chcace, atše tšëngaftangbioye chanjá jabuache jetsacastígama, jtsapochócantscuana, mo chë tšëngaftangbe cuenta entsemna candelerëse chabe puestentsana cuaftsejuanacá. Chca chanjama, tšëngaftanga juabnayana ndoñe chašmonjatrocace.

6 Pero tšëngaftangbe pavor quem tšabe soye šmontsebomna: Tšëngaftanga šmonduábotena lempe ntšamo chë nicolaíta ca uabaina entšanga tmojtsamcá, ndayá átšnaca sënduábotena.

7 Chë jounama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsëtsnacá. Chë padecena soyënguentsana tšabá chamojábocana mo ayëñjanayëngcá, chëngbiana chanjama chë nyetsca tescama yomna tšabe vida chamotsebomnama, y chca chënga mochántsemna mo chë nyetsca tescama yomna tšabe vida jtsebomnama betiyeshentsana cuaftsesacá, chë entšanga sempre oyejuayënga mondbetsemnoca ca” —cha šonjaniyana.

*Esmirnoca ošbuachiyëngcá enefjuanënga jábuayenama*

8 Mëntšánaca cha šonjaniyana: “Esmirna bëts pueblentše ošbuachiyëngcá enefjuanëngbeñe chaotsemándama uámana ichmonábioynaca mëntšá mabobema:

Mëntšá entsichamo chë nyetsca soyënga bojatsayá y pochocayá, chë tonjanobaná y ndabiana Bëngbe Bëtsá tonjama cháuatayenama:

9 Atše sëndëtatšëmbo tšëngaftanga tša jabuache smojasufrima y ndbomnjëmënga šmomnama, pero ndegombre Bëngbe Bëtsábiocana bëtscá tšabe soyënga šmondëtsóbomñe. Y sëndëtatšëmbo tša bacá tšëngaftangbiana mondoyebuambná chë judiënga imomna ca ichámënga, pero ndoñe ntsamana mo chë Bëngbe Bëtsabe bocacana entšangcá; chca, chënga mondmëna mo Satanasbe entšangcá, nye chábioye jtseservënëse y jtsatschuanayëse.

10 Ndoñe matauatjëngana chë ndoñe yapa bën y tšëngaftanga šmochjasufrima, er Satanás echanjama tšëngaftanguentsënga báseftanga cárceloye inyënga chacmëtámiana, jinýama ntsachetšá Crístbeñe ošbuáchiyana

šmombomna, padecena soyënguiñe šmojtsemna ora; y entsamna baseftayté jasúfriana. Sempre bëtsca ošbuáchiyana, y ainaniñe bëts añemo šmochtsebmna, masque jobanámnaca chacmotsamna, Cristbiana trabájaye causa. Chca chašmojtsamëse, atše chanjama tšëngaftanga chašmotsebmna mo canye uacanana soycá, chë nyetsca tescama yomna tšabe vida.

11 Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsëtnacá. Chë padecena soyënguentšana tšabá chamojábocana mo ayëñjanayëngcá, ndegombre chënga ndoñe queochátamna játauatjana nyetsca tescama castigánënga jatsmënana ca” —cha šonjaniyana.

*Pérgamoca ošbuachiyëngcá enefjuanënga jábuayenama*

12 Mëntsánaca cha šonjaniyana: “Pérgamo bëts pueblentse ošbuachiyëngcá enefjuanëngbeñe chaotsemándama uámana ichmonábioynaca mëntsá mabobema:

Mëntsá entsichamo chë nyets utoicajana puerta efšana espadëja entsatbëná:

13 Atše sëndëtatšëmbo ntšamo yomna tšëngaftangbe oyenentse, canye luare ndayentse Satanás entšángbioye puerta iuamënda. Masque chca, tšëngaftanga sempre nye atše šmondétseservena, y ndocna te chešmáisayana átšbeñe ndoñe šmondošbuaché ca, ni mo Antipas, chë canye nyets tempo atšbe ustoná y atšbiana ndegombre oyebuambnayá, ínÿenga tmonjanóba ora. Y lempe chca tojopasá tšëngaftangbe pueblentse, ndayentse Satanás bëtscá entsana.

14 Pero básefta soyënga sëntsebmna tšëngaftangbe contra jayanama: Chentse tšëngaftangbeñe báseftanga montsemna, soyënga montsabuatambá ntšamo bayté entsemna Balaam enjanabuatambacá. Cha rey Balácbioye tbojanbuayená ntšamo jamana Israeloca entšángbioye jáingñama, chënga chë ntšamo ndoñe tšabá yomncá chamotsamama; y chca, Balac tojanma chë ínÿenga diosënga yojamna ca imojana-juabná soyënga jadórama uátšëmbona saná chë Israeloca entšanga chamosama, y shembása o boyabásaftaca bacna soyënga chamotsamama.

15 Chéntšnaca ínÿenga montsemna, y chëngna chë nicolaitëngbe buatëmbana soyënguiñe mondošbuaché, y chca bu-  
atëmbana soyënga ndoñe tšabá quenátsmëna.

16 Smochtsejuabnaye ntšamo šmojtsamama, chëngbioye tšëngaftangbeñe šmojtsëuantana ora, y chca jtsamana šmochjajbaná; er ndoñese, atše betscó tšëngaftangbioye chanjá, y chë chca buatëmbana soyënguiñe ošbuáchiyana

ndoñe tmonjajbanángaftaca chanjéntsja chë atšbe uayoicana endóbocana espadéjaca.

17 Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsëtsnacá. Chë padecena soyënguentsana tšabá chamojábocana mo ayënjanayëngcá, chëngbioye maná chanjátátaye chamosama, chë celoca tandëse, ndayá Bëngbe Bëtsá tempo entšángbioye ndoñe tonjinÿanyé; y canÿe fiantse ndëtsëtema chanjáyentsbuachiye, chënga oyejuayënga šmojábemama. Chiñe canÿe tsëm uabaina echantsábemana; ndocná chë uabaina quenátabatma, ndayá nÿe chë chamojóyëngacñënga ca” —cha šonjaniyana.

### *Tiatiroca ošbuachiyëngcá enefjuanënga jábuayenama*

18 Mëntsánaca cha šonjaniyana: “Tiatira bëts puebloca ošbuachiyëngcá enefjuanëngbeñe chaotsemándama uámana ichmonábioynaca mëntsá mabobema:

Mëntsá entsichamo Bëngbe Bëtsabe Uaquiñá, chë mo iñeshcá uafšná y mo entšëjuaca jojona puerte chaotsebuashinÿinÿanama bronca shecuatšënga bomná:

19 Atše sëndëtatšëmbo ntšamo tšëngaftanga šmoyenama; sëndëtatšëmbo ntsachetšá tšëngaftanga Bëngbe Bëtsábioye y nÿetscángbioye šmababuánÿeshanama, ntšamo tšëngaftanga Bëngbe Bëtsábeñe puerte šmošbuáchema, ntšamo chábioye šmoservénama, ntšamo tšëngaftanga ínÿenga šmojuabuache y ntšamo Bëngbe Bëtsábeñe jtsobátmanëse becá šmojoboyá padecena soyënguñe; y sëntsetatšëmbo mora más bëtscá tšabe soyënga šmojtsama, ntšamo tšëngaftanga átšbeñe jtsošbuáchiyama šmonjanbojatšë orscama.

20 Pero canÿe soye sëntsebmoma tšëngaftangbe contra jayanama: Tšëngaftangbeñe šmondëuantana chë shembása, mo chë bacna reiná Jezabelcá endmënábioye. Chë shembása entsichamo Bëngbe Bëtsabe juabna oyebuambnayá canmëna ca; pero chabe बातëmbana soyëngaca atšbe oservénënga entsaíngña, shembása o boyabásaftaca bacna soyënga chënga chamotsamama, y chë ínÿenga diosënga yojamna ca imojanajuabná soyënga jadórama uátšëmbona saná chamosama.

21 Cha sënjuená atše chjacastíga ca, chca juabnayana ndoñe tonjatrocasa, y canÿe boyabásaftaca bacna soyënga amana ndoñe tontsajbanase. Cha jacastígama batšá sënjobatma, nderado chca amana nanjatróca, pero ndoñe chenátšbošëna.

22 Mora atše chanjama bëtš šocana cha chaboshachama, y chë cháftaca bacna soye tmojamënga, juabnayana ndoñe

tmonjatrocá y chca jtsamana ndoñe tmonsajbanase, chëngbiana chanjama puerte chamosufrima;

<sup>23</sup> y chë shembásabe básenga chantsëbaye. Chca, nyetsquénache ošbuachiyëngcá enefjuanënga mochántsetatšëmbo, ndayá entsanga juabniñe y ainaniñe tmojuabnacá atše tsuábuatmama; y cada ona tšëngaftanguentšá, chca bacna soye cháftaca tojamá, ntšamo ibojtsomerecencá chanjacastiga.

<sup>24</sup> Pero tšëngaftangbentše, ínÿenga Tiatira pueblentše šmojtsemnënga, chë shembásabe buatëmbana soyënguiñe ndoñe šmontsošbuachenga, y chë ínÿenga imuábuatma Satanasbe soyënga, chë ndoñe paselo josértama soyënga ndoñe šmonjuabuátmanënga, tšëngaftanga ndoñe quebochatamënda inÿe más toto soye chašmotsamama.

<sup>25</sup> Pero nÿe sempre šmochtsama ntšamo mora šmojtsamcá, y šmochtsiyena ntšamo chë Bëngbe Bëtsábiocana šmojóyëngacñe soyënga yomncá, atše quem luaroye jesabámëntscuana.

<sup>26</sup> Chë padecena soyënguentsána tšabá chamojábocana mo ayëñanayëngcá y ntšamo atše sëndëmandacá chamojtsamënga, chë quem luarentše ya ndoñe más vida jesebomnámëntscuana, atšbe obenana chanjátšataye nyetsca mándayëngbentša entsángbeñe jtsemándayama,

<sup>27</sup> ntšamo atšbe Taitá chabe obenana šojatšetacá; y chënga entsángbioye puerte obenánaca mochántsamëndaye, mo canÿe hierro varëfjaquécá, y chëngbe contra chamojtsemnëngbioye mochántsapochocaye, mo nÿe matbajënga tmojtsëtsjanjncá.

<sup>28</sup> Y chë jabínÿnama ora bínÿnaye estréllnaca chanjátšataye.

<sup>29</sup> Chë jounama tmojtsobenënga, chamouena ndayá Espiritu chë ndayenache ošbuachiyëngcá enefjuanënga yojtsëtsëtsnacá ca” —cha šonjaniyana.

### 3

#### *Sardisoca ošbuachiyëngcá enefjuanënga jábuayenama*

<sup>1</sup> Mëntšánaca cha šonjaniyana: “Sardis bëts pueblentše ošbuachiyëngcá enefjuanëngbeñe chaotsemándama uámana ichmonábioynaca mëntšá mabobema:

Mëntšá entsichamo chë Bëngbe Bëtsabe canÿsëfta espíritënga y chë canÿsëfta estrellënga bomná: Atše lempe sëndëtatšëmbo ntšamo tšëngaftanga šmoyenama; atše sëndëtatšëmbo tšëngaftangbiana ínÿenga tša jtsichámuana Bëngbe Bëtsá jaserviama bëtscá šmojtsama ca, pero ndegombre tšëngaftanga nÿe batsatema šmotsama, y chca, chabiana mo obanëngcá šmondmëna.

<sup>2</sup> Botamana šmochjenóbobonÿe y más šmochtsama chë Bëngbe Bëtsá jaserviama cabá šmondama básefta soyënga. Ndoñe yapa quenátájamna chë tšabe soyëngnaca chašmotsajbanama, er atše sënjinÿe chë Bëngbe Bëtsábioye jaserviama ntšamo jtsamëse šmoyencá, atšbe Bëtsabiana ndoñe yapa tšabá quenátsmëna.

<sup>3</sup> Asna, šmochtsenójuabnaye ndayá Bëngbe Bëtsábiocana šmojóyëngacñama, y chabiana šmojouena soyënguíñnaca. Ntšamo chë soyënga yomncá šmochtsiyena, juabnayana šmochjatróca y šmochjóntša bëtscá jtsamana Bëngbe Bëtsá jaserviama. Ndoñe tšabá cach tšëngaftanga chašmonjenójuabose y juabnayana ndoñe chašmonjatrocace, nÿe ndeolpe chanjá tšëngaftangbioye, mo canÿe atbëbanacá, chabiana ndocná tontsejuabná ora, y ndegombre tšëngaftanga ndoñe quešmochátstatšëmbo mocna ora atše tšëngaftangbioye chjama.

<sup>4</sup> Masque chca, Sardisentše tšëngaftangbeñe básefta entšanga mondmëna, chënga ndoñe chematajbaná oyenana tšabe soyënga jtsamëse, bacna soyënga játamama. Chëngna átšeftaca mochántsjajna uafjantsëjuangá uichëtjonënga, chënga chca merecido montsebuajónayeca.

<sup>5</sup> Chë padecena soyënguentšana tšabá chamojábocana mo ayëñjanayëngcá, chca uafjantsëjuangá uichëtjonënga mochántsemna, y chëngbe uabaina ndoñe quichatsjuána chë tšabe vida mochjónÿenëngbe uabaina enduábemana librësentšana, ndayá atše, Bëngbe Bëtsabe delante y chabe angelëngbe delante, chënga atšbe entšanga imomna ca chanjayana.

<sup>6</sup> Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yo-jtsëtsëtsnacá ca” –cha šonjaniyana.

*Filadelfioca ošbuachiyëngcá enefjuanënga jábuayenama*

<sup>7</sup> Mëntšánaca cha šonjaniyana: “Filadelfia bëtš puebloca ošbuachiyëngcá enefjuanëngbeñe chaotsemándama uámana ichmonábioynaca mëntšá mabobema:

Mëntšá entsichamo chë uamaná y ndegombre oyebuambnayá, chë jtsemándayama puerta obenana bomná, ntšamo Rey David enjanbomncá, chë nda ndayá chaotsemnama tojamandá ora, ndocná ntsoybenana jamama chca ndoñe chaondëtsemnama, y ndayá ndoñe chaondëtsemnama tojamandá ora, ndocná ntsoybenana jamama aíñe chaotsemnama:

<sup>8</sup> Atše lempe sëndëtatšëmbo ntšamo tšëngaftanga šmoyenama. Minÿënga, atše sënjama tšëngaftanga bëtscá tšabe soyënga chašmotsebomnama, y ndocná quenátobena jamama

chca ndoñe chaondětsemnama; y chca entsemna mo atše tšëngaftangbiana canye bëshása cuafjatëfjá, y chëša jtatámiana ndocná quenátobena. Atše sëndëtatsëmbo tšëngaftanga batšatema obenana šmombomnama, pero šmojouena ntšamo jtsamama tčbonjauyancá, y ndocna te chešmátayana atšbe entšanga ndoñe šmondmëna ca.

<sup>9</sup> Atše chanjama, chë mo Satanasbe entšangcá imomnënga, nje chábioye jtseservënese y jtsatschuanayëse, chë judiënga imomna ca ichámënga, pero chë Bëngbe Bëtsabe bocacana entšangcá ndámënga y bosterënga, chënga tšëngaftangbioye chamua y tšëngaftangbe delante chamoshamentšé, tšëngaftangbiana respeto jinÿanÿiyama, y chca, chënga chamotsetátšëmbo atše sempre čbababuánÿeshanama.

<sup>10</sup> Atše tčbonjanamëndá, Bëngbe Bëtsábeñe jtsobátmanëse, lempe chašmotsoboyá padecena soyënguiñe, y tšëngaftanga chca šmonjama. Chíyeca, atše puerta tšabá čbochántsanÿena, chë quem luarentše oyenënga nÿetscanga jasúfriama y padecena soyënguiñe jtsemnama chaajtsemna ora, Bëngbe Bëtsábeñe aiñe o ndoñe mondošbuáchema jinÿanÿiyama.

<sup>11</sup> Cachiñe quem luaroye betesco chanjésabo. Sempre šmochtsama ntšamo mora šmondamcá, y Bëngbe Bëtsábocana šmojóyëngacñe soyënga šmochtsinÿena; chca ndocná chaondobená ndayá jamana, y chë sóyeca chaoma tšëngaftanga ndoñe chašmondóyëngacñe ndayá Bëngbe Bëtsá chë chábioye jtseservënema ndoñe tmontsajbanángbioye yochjatšataycá, chëngbe uacanana soye.

<sup>12</sup> Chë padecena soyënguentšana tšabá čamojábocana mo ayëñjanayëngcá, chëngbiana atše chanjama sempre Bëngbe Bëtsabe delante chamuesomñama, y chca, chënga mochántsemna mo chë Bëngbe Bëtsabe bëtš yebnentša ucuatjoniñcá; ndocna te Bëngbe Bëtsábentšana quemocháisebocana; y chëngbeñe atšbe Bëtsabe uabaina chanjuábema y atšbe Bëtsabe bëtš pueblentša uabaina, chë tsëm pueblo Jerusalén, chë celocana yobá pueblo, Bëngbe Bëtsábocana. Y chëngbeñnaca chanjuábema atšbe tsëm uabaina. Lempe chca chanjama jinÿanÿiyama chënga Bëngbe Bëtsábenga mochtsemnama.

<sup>13</sup> Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtšëtsëtsnacá ca” –cha šonjaniyana.

*Laodiceoca ošbuachiyëngcá enefjuanënga jábuayenama*

<sup>14</sup> Mëntšánaca cha šonjaniyana: “Laodicea bëtš pueblaca ošbuachiyëngcá enefjuanëngbeñe chaotsemándama uámana ichmonábioynaca mëntšá mabobema:

Měntšá entsichamo chě sempre Ndegombrá endmēná, chě Běngbe Bětsabe soyēngama ndegombre oyebuambnayá, y chě ndábeyeca Běngbe Bětsá quem luare tojanmá:

15 Atše lempe sēndētatsēmbo ntšamo šmoyenama. Atše sēntsetatsēmbo tšēngaftanga ndoñe yapa šmontseboše Běngbe Bětsá jaserviama, pero Běngbe Bětsabe buayenana soyēnga ndoñe lempe šmontsaboté. Y chca, nýe batšatema šmojtseboše Běngbe Bětsá jaserviama; chca, tšēngaftanga šmontsemna mo tibiye buyeshcá, ni ntšniñiye, ni shécbaniye. ¡Atše sēntseboše tšēngaftanga chašmotsemna mo ntšniñiye o shécbaniye buyeshcá, tšabá jtsamēse o tondaye!

16 Chca, tšēngaftanga tibiye buyeshcá šmondmēna, y ndoñe quešmátsboše bētscá jamama, pero Běngbe Bětsabe soyēnga ndoñe lempe šmontsaboté. Chíyeca atše sēntsejuabná jtsēbatena, mo nda tibiye búyeshche tojětsbuashětjácá, chcaye ndoñe bondogustana causa.

17 Er tšēngaftanga jtsichámuana bomnēnga šmomna ca, puerte tšabá šmojábocana y tondaye cmontsabuáshebena ca, pero ndoñe quešmátstatšēmbo Běngbe Bětsabe soyēnga bētscá cmojtsabuáshebenama. Chca, tšēngaftanga šmontsemna nýa ndoñe tšabá, inýenga ngmēnana chacmotsabamna, mo ndbomnějemēngcá, mo jtanēngcá, Běngbe Bětsabe soyēngama ntsoertancá, y mo enašēngcá, bētscá Běngbe Bětsabe soyēnga ntsebomncá.

18 Chíyeca cbabuayená, átšbentšana chašmuatsjinýe chě Běngbe Bětsabe soyēnga y uámana soyēnga, mo chě ena castelano jabemama, inějana fjěchnēnguēse castellano átšbioye šmojtsontšabuamnañcá. Tšēngaftanga Běngbe Bětsabe delante mo enašēngcá šmondmēna, er cha endonýá chě ba bacna soyēnga ntšamo tšēngaftanga šmojtsamcá. Smochjaleséncia atše chacbėjabuache tšēngaftanga Běngbe Bětsabe bominiñe tšábenga chašmotsemnama, mo juichětjuama uafjantse entšayá átšbioye šmojtsantšabuamnañcá. Chca smochjama, tšēngaftanga Běngbe Bětsabe delante ndoñe chašmondětsēuatjama. Smochjaleséncia atše chacbėjabuache tšēngaftanga Běngbe Bětsabe soyēngama chacmósertama, mo tšēngaftanga bominye šocanama shnana átšbioye šmojtsontšabuamnañcá. Chca smochjama, Běngbe Bětsabe soyēngama puerte tšabá chacmósertama.

19 Atše chě sēndábabuanýeshanēnga sēndbaucácana y sēndbábuayenaye. Chíyeca, lempe ntšamo šmojobenacá smochtsama Běngbe Bětsá jaserviama, y juabnayana smochjatróca, y nýets tempo puerte smochtseboše Běngbe Bětsá jtseservénana.

20 Nderado canýe tšabe amigo yebnoye tojabo



y tojachembo, tšëngaftanga šmojouenëse y bëshása šmojebiatëfjese, cha jamashënguana, y cányiñe cháftaca joyejuayana y jasana. Cachcá, atše entšanga sentsachembuana chašmolesenciá chëngbe ainaniñe jtsiyenama. Nderado nda šojóyeunase, atše chanjámashëngo chabe ainaniñe jtsiyenama, y nyets tempo cháftaca cányiñe mo canyáca chanjëftsemna.

<sup>21</sup> Chë padecena soyënguentsana tšabá chamojábocana mo ayëñjanayëngcá, atše chanjama chënga puerta bëtsësanga chamotsemnana ntšamo atše sëndmëncá, y átšeftaca chamótbemama, atšbe uámana tbemanentše jtsemándayama, ntšamo atše atšbe uayayëngbioye sënjayëñjanacá, y atšbe Taitáftaca chabe uámana tbemanentše tijotbemcá.

<sup>22</sup> Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yo-jtsëtsëtsnacá” —cha šonjaniana.

## 4

*Chë Ainënga Bëngbe Utabnabe uámana tbemanentša natsana imojtsechuanaye*

<sup>1</sup> Chentšana mo otjenayoquëcá sënjáninýe. Sënjanrrepará y sënjáninýe celoca canýe bëshása enjétsatëfjna, y chë natsana sënjanuena oyebuambnayana, chë enjamna mo canýe trompetëfjua cuafjuajatëtcá, mëntšá šonjétsatsaye: “Moye másëngo, atše cbochanjinýinýiye ntšamo más chcoye yochjopasacá ca.”

<sup>2</sup> Cachora, chë Uámana Espíritbeyeca, mo atšbe ainana celoca cuaftsemncá atše sënjanoquedá, y sënjáninýe celoca enjëtsemna canýe reybe uámana puesto, y chentše canýa enjëtsetbemana.

<sup>3</sup> Chentše enjëtsetbemaná enjamna, puerta tëshinýná mo jasje ndëtsbecá, puerta buanganá mo cornalina ndëtsbecá, y chë uámana puesto shëconana canýe tsëfcuácuatjo enjamna, y enjëtsebuashinýinýana mo canýe esmeralda ndëtsbecá.

<sup>4</sup> Chë reybe uámana puesto juachajana, inýe uta bnëtsana y canta puesto sënjáninýe, y chiñe uta bnëtsana y canta bëtsëjémënga amëndayënga monjëtsetbiamana, uafjantsëjuangá uichëtjonënga, y castellano coronëshangá monjëtstabestšajona.

<sup>5</sup> Chë uámana puententšana enjëtsohocana tcuinýejënga, becá shauenanana y juesasanana; y chë uámana tbemaniñentša natsanoicna, canýsëfta uajuinýanëshha enjëtšangbototjuana; chë uajuinýanëshangá entsayana chë Bëngbe Bëtsabe canýsëfta espíritënga.

<sup>6</sup> Y chë uámana puententša natsanoica enjëtsemna mo canýe mar bejaycá, tëshinýniye mo canýe cristal ca uabaina ndëtsbecá.

Chë luariñe tsëntsaca, chë uámana puesto enjëtsemnentšë y chë shëconánëjana monjëtsemna canta Ainënga, nyëtsañe fšñëbéngaca, natsanoica y stëtšoica.

<sup>7</sup> Chë natsana Ainá enjamna mo canýe leoncá, chë inýe Ainá mo canýe torošcá, chë inýe Ainá enjánbomna mo canýe entšabe jubiácá, y chë inýe Ainá mo canýe águila tojt-songüefjnacá.

<sup>8</sup> Chë canta Ainënga, cada ona chñënguana juatëngmiáša enjanábomna, y tsoicajana y shjoicajana nyëtsañe fšñëbénga monjánbomna. Y chënga nyëts tempo, ntjochnacá mëntšá monjánichamo:

¡Uamaná, Uamaná, Uamaná, Bëngbe Utabná,

Bëngbe Bëtsá nyëts obenana bomná,

nda enjamná, endmëná y sempre echanjëftsemná ca!

<sup>9-10</sup> Chca chë Ainënga Bëngbe Bëtsá bëtscá tmontanchuá, Bëngbe Bëtsá chë uámana puestentšë tbemaná, chë nyëts tempo y nyëtsca tescama oyená. Chënga puerte respeto chabiamá monjëtsebomna y bëtscá tmontanchuá. Cada ora chënga chca tmonjanma ora, chë uta bnëtsana y canta bëtšëjëmënga amëndayënga, chë uámana puestentšë tbemanabe shecuatšentšë joshamentšiyana y chábioye jtsatschuanayana, chë coronëshangá chë natsanoica jutšanana, y mëntšá jtsichámuana:

<sup>11</sup> Aca nyëts mercedo condëtsobuájoñe, Bëngbe Utabná y Bëngbe Bëtsá,

entšanga chamotsinýanýnama, aca puerte bëtšá comnama, y chamotsichamo aca nyëts respeto buajoná comna, y nyëts obenana bomná comna ca,

er aca nyëtsca soyënga tcojama;

aca icnabóšeyeca chë soyënga yojtsemna y aca chca tcojanma ca.

## 5

### *Chë uabemana uándmanana tsbuanácha y chë Oveshatema*

<sup>1</sup> Chë uámana puestentšë enjetsetbemanabe catšbioica cucuatšiče canýe uándmanana tsbuanáchanaca sënjáninýe, y nyëtsañe enjëtšabemana tsoicajana y shjoicajana, y canýšëfta tsengájaše sellëngaca enjëtšajandmanana.

<sup>2</sup> Y canýe ángel puerte obenana bomná sënjáninýe, y cha mëntšá enjëtšayebuache: “¿Nda mercedo yobuájona, quem uándmanana tsbuanácha jutëfjonama y chë sellënga jutsëcama ca?”

<sup>3</sup> Pero, ni celoca, ni quem luarentšë, ni quem luarentša jashenoye, ndocná quenjatsmëna obenánaca chë uándmanana tsbuanácha jutëfjonama, ni juinýama.

4 Y atše puerte sējánenobošachna, er ndocná ntjónýnana merecido buajoná chē uándmanana tsbuanácha chautéfjonama, ni chauinýama.

5 Pero canya chē bētsējēmēnguentsá sonjaniana: “Ndoñe más matenóbošachena; mouena, chē Judabe pamillentá, León ca uabobainá, mando y obenana bētsebomnama, chē rey Davídbentšana Entsá, tonjayēnjaná; cha entsobena chē uándmanana tsbuanácha jutéfjonama, y chē canýsēfta sellēnga jutsēcama ca.”

6 Chora sējáninýe, chē uámana puesto y chē canta Ainēnga y chē bētsējēmēngbe tsēntsaca, canýe Oveshatema tsanana, pero enjétsinýna mo cuaftsobacá. Chē Oveshatema enjánbomna canýsēfta tsētjonēse y canýsēfta fšněbé. Chē canýsēfta fšněbé monjaninýinýná chē Bēngbe Bētsabe canýsēfta espíritēnga, chē Bēngbe Bētsá nýets quem luarējana tojánichamonga.

7 Chē Oveshatema tonjanobeconá y chē uándmanana tsbuanácha tonjanaca, chē uámana puestentše tbemanabe catšbioica cucuatšentšana;

8 y chabe cucuatšinė tonjanaca ora, chē canta Ainēnga y chē uta bnētsana y canta bētsējēmēnga amēndayēnga chē Oveshatembe shecuatšentše tmonjanoshamentšé. Nýetscanga monjétsētbēna arpangá y castellano copbenga jútjena inciensiýeca; chē copbenga inciensiýeca enjamna chē Bēngbe Bētsabe entšanga tmojayana palabrēnga, cháftaca jencuéntama ora.

9 Y quem tsēm canto montsancántaye:  
Aca merecido condētsobuájoñe, chē uándmanana tsbuanácha chacuacama y chē sellēnga chacutsēcama;  
er acbe buiñe juabuáshanēse tconjanóbana, y chca enjamna mo crocénana cuafjētsjajocá, Bēngbe Bētsabiana chamotsemnama,  
entšanga nýetsca cachca buiñe bomnēnguentsana,  
nýetsca biyana bomnēnguentsana, nýetsca canýe entšanguentsana, y nýetsca mándayēngbentša entšanguentsana.

10 Aca tcojama chēnga chamotsobena ácaftaca jtsemándayama y uámanēnga chamotsemnama, Bēngbe Bētsábioye mo bachnangcá chamotseservénama,  
y quem luarentše chēnga montsemánda ca —chēnga monjētseversiaye.

11 Y chca sējétsonýaye ora, mallajta angelēngbe oyebuambnayana sēnjanuena, y chēnga monjētsemna chē uámana puestentše, chē Ainēnga y chē bētsējēmēnga amēndayēngbe shēconana. Nýetsá bētscá angelēnga monjētsemna, corente mallajta;

12 y chēnga mēntšá monjétsayebuache:

¡Chë Oveshatema cuafjobacá endmëná,  
 merecido endëtsobuájoñe, nÿets obenana, nÿets bomnana,  
 nÿets osertánana y nÿets añemo chaotsebomnama,  
 y entsanga chabiana chamotsichamo cha nÿets respeto bua-  
 joná yomna ca,  
 y chamotsinÿanÿnama cha puerte bëtsá y uamaná yomnama,  
 y nÿetscanga chamotsatschuanama ca! —chënga  
 monjétsayebuache.

13 Y sënjanuena, lempe ntšamo Bëngbe Bëtsá tojanmcá aina  
 soyënga, celoca, quem luarentše, quem luarentša jashenoye y  
 chë mar béjayoca, chëngnaca mëntšá monjétsichamo:

¡Chë uámana puestentše tbemanábioye y chë Oveshatema  
 nÿetscanga nÿets tempo y nÿetsca tescama  
 chamótsatacheuanaye

y chamotsichamo chata puerte uámanata y nÿets respeto bua-  
 jonata ibomna ca,

y chamotsinÿanÿná chata puerte bëtsëtsata y obenata  
 bëtsemnama ca!

14 Y chë canta Ainëngna monjétsichamo: “Chca chaotsemna  
 ca.” Y chë bëtsëjémënga amëndayëngna tmonjanoshamentšé  
 y chátbioye monjétsatacheuanaye.

## 6

### *Chë Oveshatema chë canÿsëfta sellënga tonjanëtsëcá*

1 Chentšana más sënjáninÿe; chë Oveshatema chë  
 canÿsëftentšana natsana sello tonjanëtsëcá ora, sënjanuena  
 canÿa chë canta Ainënguentshana puerte jabuache, mo  
 cuafjajuesascá, mëntšá enjétsichamo: “¡Mabo ca!”

2 Sënjanrrepará y sënjáninÿe canÿe fjantse couaye, y chábeñe  
 enjetsenjaquená canÿe arquëja enjétsatbëna. Chábioye  
 canÿe coronësha tmonjaniyé, y mo canÿe ayënjanayacá  
 tonjëftsanbocna, y cabá más jatsyënjanámnaca.

3 Chë Oveshatema chë inÿe sello tonjanëtsëcá ora,  
 sënjanuena chë inÿa chë canta Ainënguentshana mëntšá  
 enjétsichamo: “¡Mabo ca!”

4 Y inÿe couaye tonjánbocna, canÿe buanganá; y chë  
 enjetsenjaquená obenana tonjanóyëngacñe jamama chë  
 fshantsentša natjëmbana vida chaotsopochocama, entsanga  
 chamotsenóbama; y canÿe bëts espadëja tmonjanoyé.

5 Chë Oveshatema chë inÿe sello tonjanëtsëcá ora,  
 sënjanuena chë inÿa chë canta Ainënguentshana mëntšá  
 enjétsichamo: “¡Mabo ca!” Sënjanontješé y canÿe ftsenga  
 couaye sënjáninÿe, y chë enjetsenjaquená canÿe romanëša  
 enjétsëtbëna.

6 Y chë canta Ainëngbeñe canye oyebuambnayana mëntšá sënjanuena: “Nye canye kilo trigo canye tesca trabajuama, y unga kilo cebadá canye tesca trabajuama; pero chë aceitiye y chë vínoyna ndoñe cattsepochócase ca.”

7 Chë Oveshatema chë inye sello tonjanëtsécá ora, chë ústonoca Ainá enjëtsichamo: “¡Mabo ca!”

8 Sënjanontješé y canye shatsësiye couaye sënjáninye; chë enjetsenjaquená Obanana ca enjanabaina, y stëtsoica bonjëtsëstona canya, Obanënga imomna luare ca uabainá; y chátbioye obenana tmonjanatsatá cántañentsana cányëntše quem luarentše jtsepochócama, chentša entsanga jtsapochócase, entsanga tmojtsentsjanama, bëts shëntsänëngaca, šocanëngaca y quem luarentša tšátjaye bayëngaca.

9 Chë inye sello tonjanëtsécá ora, sënjáninye chë altarentša tajsoye chë tmojanóbanëngbe espíritënga, chë Bëngbe Bëtsabe palabra entsanga abuayinyayama tmojanóbanënga.

10 Chora chënga tmonjanontšé tša uayebuáchana: “Uamaná y ntšamo tojašebuachenacá lempe amá bëngbe Nduiño, ¿ntseco quem luarentša entsangbiama cochjayana ndoñe tšabá tmonjamama, y chë bëngbioye obanayama cochjácastigaye ca?”

11 Chentšana nyetscángbioye uafjantse entsáyá tmonjaniyé y tmonjanéyana batšatema más chamobatmá ca, chë cachëngcá Crístbeyeca catšátanga y oservënga, chë cachëngcá mochjanóbanënga, nyetscanga choca chamojtsemnëntscuana.

12 Y más sënjáninye; chë inye sello cha tonjanëtsécá ora, jabuache fshantse tontsanangmëmmana; shinye tontsanftsénganga, mo chë obaná tojtsemnana juichëtjuama entsayacá, y nyets juashcona mo buiñcá enjëtsinýna,

13 y estrellatëmënga celocana fshantsoye tontsantquëcjana, mo canye higo betiye jabuache bínýiaca tojtseshatíyeyna ora, chë nguëfshna higuëbenga cuafjatquëcjancá.

14 Y celoca luare tontsanenatjëmba mo canye tsbuanácha cuafjuandmanacá, y nyetsca tjañe y béjayoca fshantsënga, chë ndayentše enjamnentsana tontsanójuaná;

15 y nyetscanga, fshantsoca reyënga, uámanënga, soldadëngbe amëndayënga, bomnënga, obenana bomnënga, y nyetscanga chë nyets tempo nye ínýabiama oservënga y chë cachëngbiama trabájayëngnaca, chë cuevëshënguiñe y bëts ndëtšbenguenache tjañe tmontsanóitana;

16 y chë tjañëngoye y chë ndëtšbengoye montsanichamo: “¡Bëngbioye šmotsëtebuantsá y šmotsaitame, chë uámana puestentše tbemanabe bominýentsana, y chë Oveshatembe

uabouana castigo, cha bēngaftaca tbojetnama, bēngbeñe ndoñe chaondětsemnama!

<sup>17</sup> Er chē uachuana te chabe castigo jtsebínŷnama te tojóshjango; y mora ¿nda nanjobenaye chē sóyeca ndoñe chamondětsepochocama ca?” —chēnga montsanichamo.

## 7

*Chē Bēngbe Bētsábioye oservénēnga chē uabouana castigüentšana mochántsatsebacana*

<sup>1</sup> Chca tonjanopasá chentšana, canta angelēnga sēnjánanŷe, monjétsatsana chē quem luarentša canta opochócayenache; chēnga ndoñe quemēnjatanleséncia chē canta binŷiēnga jtsebínŷnama, ndoñe chaondětsebinŷiyama, ni fshantsentše, ni mar bėjayoca, ni ndocna betiyeshēnguiñe.

<sup>2</sup> Inŷe ángelnaca sēnjáninŷe, shinŷe bocana luaroicana enjetsabó, y chē Bēngbe Bētsá Ainabe sello enjétsiyēboye. Chē ángelna chē inŷe canta angelēngbioye, ndémuanŷengbioye obenana tmojanatsatá chē fshantsentše y mar bėjayoca lempe jtsepochócama, chēngbioye jabuache tonjánabachembo:

<sup>3</sup> “¡Tondaye šmatjapochóca, ni fshantsoca, ni mar bėjayoca, ni betiyeshēnguiñe, chē Bēngbe Bētsabiamama oservénēngbioye chē sélloca juentsaca fchayauinŷnanantscuana, ndoñe chamondětšapochocama ca!”

<sup>4</sup> Y sēnjanuena buétanga chē sélloca tmojánauinŷnanayama: canŷe patse, canta bnétsana y canta uaranga entšanga uinŷnanánēnga nŷetsca Israeloquentša bēts pamillanguentšana.

<sup>5</sup> Judabe pamillentšana, bnétsana uta uaranga uinŷnanánēnga;

Rubenbe pamillentšana, bnétsana uta uaranga;

Gadbe pamillentšana, bnétsana uta uaranga;

<sup>6</sup> Aserbe pamillentšana, bnétsana uta uaranga;

Neftalibe pamillentšana, bnétsana uta uaranga;

Manasesbe pamillentšana, bnétsana uta uaranga;

<sup>7</sup> Simeonbe pamillentšana, bnétsana uta uaranga;

Levibe pamillentšana, bnétsana uta uaranga;

Isacarbe pamillentšana, bnétsana uta uaranga;

<sup>8</sup> Zabulonbe pamillentšana, bnétsana uta uaranga;

Josebe pamillentšana, bnétsana uta uaranga;

y Benjaminbe pamillentšana, bnétsana uta uaranga entšanga.

*Chē mallajta entšanga uafjantsējuangá uichětjonēnga*

<sup>9</sup> Chentšana, sēnjanrepará y mallajta entšanga sēnjánanŷe, ndocná quentaisobenaye jacúntana, nŷetsca mándayēnguentsana, nŷetsca cachca buiñe bomnēnguentsana, nŷetsca canŷe entšanguentsana, y nŷetsca biyana

bomnënguentsana; chënga monjétsatsana chë uámana puesto chë Oveshatembe natsanentše, uafjantsëjuangá uichëtjonënga y ramëshangá monjétsëtbëna.

<sup>10</sup> Njëtscanga tša monjétsayebuache:

¡Bënga atsebacayana endobá, Bëngbe Bëtsá,  
chë uámana puestentše entsetbemanábentšana,  
y chë Oveshatémbentšana ca!

<sup>11</sup> Y njëtscá angelënga, chë uámana puesto y chë bëtšëjëmënga amëndayënga y chë canta ainëngbe shëconana monjétsatsanënga, chë uámana puestentša natsanoica tmonjanoshamentšé, fshantsóntscoñe jotsejbénase, y Bëngbe Bëtsá tmonjanadorá,

<sup>12</sup> mëntšá jayanëse:

¡Chca chaotsemna!

Bëngbe Bëtsábioye njëts tempo y njëtscá tescama chamotsado-  
rana

y njëts ainánaca cha chamotsatschuaná.

Entšanga chamotsinýanýná cha puerte bëtšá y uamaná  
bëtsemnama;

cha endmëna njëts osertánana bomná, y njëts respeto bua-  
joná, y njëts obenana y añemo bomná.

¡Chca chaotsemna ca! —chënga monjétsichamo.

<sup>13</sup> Chentšana, canya chë bëtšëjëmënguentsá tonjanoye-  
buambá y šonjantjá: “¿Ndëmuanýënga imomna chë  
uafjantsëjuangá uichëtjonënga, y ndëmocana tmojabo ca?”

<sup>14</sup> “Taita, aca chëngbiama cotátšëmbo ca” —atše sënjanjuá.

Y cha šonjanियana: “Chënga montsemna chë jabuache  
ngmenënguentsana tšabá tmojábocanënga; chë Oveshatema  
chëngbiama tojóbana y chëngbe bacna soyëngama perdonánënga  
montsemna; chëngbe uichëtjonëjuangá tmojtsaboshabé y chë  
Oveshatembe buíñeca tmojtabofjantsé.

<sup>15</sup> Chíyeca chënga chë Bëngbe Bëtsabe uámana puestentša nat-  
sanoica montsemna,

y chábioye njëts tempo chabe delante mondëservena,

y chë uámana puestentše entsetbemaná,

chëngbenache jtsemnëse, chënga echántsanyëna, mo cuafjut-  
sebotscá.

<sup>16</sup> Ya ndoñe más shëntsana, ni uajuendayana que-  
mochátsbomna;

shinýama, ni yapa jënýama ya ndoñe más quemochátssufrina;

<sup>17</sup> er chë Oveshatema, chë uámana puestentša natsana  
tsëntsaca entsemná,

chëngbioye mo oveshëngcá echantsabuajënýa,

y echanjunatse bėjaye vida bomniye yóbocana luaroye,

y Bëngbe Bëtsá echanjama ya ndoñe más ngmënana cha-  
mondëtsebomnama ca” —cha šonjanjuá.

## 8

*Chë ústonoca sello*

<sup>1</sup> Chë Oveshatema chë uándmanana tsbuanáchañe chë ústonoca sello tonjanëtsécá ora, celoca ndocá quentëtsënëna mo tsëntsa hora nyetsá.

<sup>2</sup> Chora sënjánanýe chë canýsëfta angelënga, chë Bëngbe Bëtsabe delante monjëtsatsanënga; chëngbioye canýsëfta trompetëfjuangá tmonjaníyé.

<sup>3</sup> Chentšana inýe ángel tonjánashjango, canýe castellano matbëtémaca incienso jajuinýiyama, y altar natsanoica tonjantsá; chábioye bëtská incienso tmonjanoyé chaojuinýema chë castellano altaroica, chë uámana tbemana natsanoica enjëtsemnoca. Chë ángel incienso tonjanjuinýé Bëngbe Utabná jëtschuayama, cánýiñe nyetsca chë Bëngbe Bëtsabe entsanga tmojoyebuambá palabréngaca, cháftaca jencuéntama ora.

<sup>4</sup> Y chë incienso juinýentša ngona, chë ángelbe cucuatšentšana Bëngbe Bëtsabe delante tonjanótsjua, cánýiñe chë Bëngbe Bëtsabe entsanga cháftaca jencuéntama palabréngaca.

<sup>5</sup> Chentšana chë ángel chë incienso jajuinýiyama matbëtema tonjanca, chë altarentša chebábengaca tonjanajutjé, y quem luaroye tonjanëtsana. Chora enjëtsemna tša juesasanana, corente shauenanana, bëtská tcuinýënga, y quem luare tontsanangmëmana.

*Chë trompetëfjuangá*

<sup>6</sup> Chora chë canýsëfta angelënga, chë canýsëfta trompetëfjua uabomnënga, tmonjanoprontá chëfjuangá juajatëtama.

<sup>7</sup> Chë natsana ángel chabe trompetëfjua tonjanájatëto, y quem luaroye tmonjanëtsana bëntstá y íñeshe, cánýiñe buiñeca. Ungañentšana cánýentše quem luarentše tontsanjuinýe, úngañentšana cánýentše betiyeshënguñe y nyetsca nguëfshna shacuanënguñnaca.

<sup>8</sup> Chë inýe ángel chabe trompetëfjua tonjanájatëto, y chora chë mar béjayoye tmonjanëtsana canýe soye mo canýe bëts tjañe tojtsangbototjuancá, y chë mar béjayiñe úngañentšana cánýentše buiñe tontsanóbema.

<sup>9</sup> Chë mar béjayiñe vida imobomnëngbeñe úngañentšana cánýentše tontsanopochocá, y chë barquënguëntsñaca úngañentšana cánýentše.

<sup>10</sup> Chentšana chë inýe ángel chabe trompetëfjua tonjanájatëto, y canýe bëts estrella, mo canýe uajuinýanëshacá enjëtsangbototjuana, celocana tonjanótsatše chë úngañentšana cánýentše béjayënguñe, y béjaye óbocanenache.

<sup>11</sup> Chë estrella enjanabaina Untjana ca; y chë úngañentšana cánýentše buyeshënguñe untjiye tontsanóbema, y chë untja búyeshe causa ba entsanga tmonjanóbana.



12 Chë inye ángel chabe trompetéjua tonjanátëto, y chora tontsanóndbema chë úngañentšana cányentse shinýiñe, y chë úngañentšana cányentse juashconiñe y chë estrellënguínaca. Chca, nyetsca chentša úngañentšana cányentse ibetiñe tonjanoquedá, y chë causa ndoñe quemëntétsebinynaye posufta horëntscuana, bnëtë canta hora y ibeta canta hora.

13 Chentšana, sënjanrrepará y sënjanuena canye águila, tsbanánoca celoca enjetsongüefjná, jabuache mëntšá enjétsichamo: “¡Tša lastema, tša lastema, tša lastema quem luarentša entsangbiama, chë inye trompetéjuangá chë inye unga angelënga chamojuátëto ora ca!”

## 9

1 Chentšana chë inye ángel chabe trompetéjua tonjanátëto, y sënjáninye canye ángel quem luaroye jastjanguana y enjétsinýna mo canye estrella celocana quem luaroye cuafstsatsatšancá; y moye tonjánashjango ora, tmonjanoyé chë uabouana tboca atëfjñentša llavëfja.

2 Chë uabouana tboca atëfjñentše tonjánatëfjo, y chentšana becá ngona tonjanótsjua, mo bëts hornentša ngoncá; y chë uabouana tboye atëfjñentše ngona causa shinýe tontsanibétata y nyets celoca ena ngona enjëtsemna.

3 Chë ngonentšana ba tsátjaye chapulinga tmonjánbocana, y nyets quem fshantsëjana tmonjanáshana; y chëngbioye obenana tmonjanatšatá, chánaca jándbemama, mo chë juetjuama alacranëngbe obenancá.

4 Chëngbioye tmonjanamëndá tondaye ntjándbemana chë shacuanënguiñe, ni ndocna nguëfshna matënguiñe, ni ndocna betiyeshiñe; nye chë juentsaca chë Bëngbe Bëtsabe sëlloca nduinýnanana entsangna aiñe.

5 Pero ndoñe chematanalesenciá entsángbioye jobáyana, ndayá nye jamama chënga shachna shinýentscuana tsetšanana chamotsebomnama; y chë chënga monjánama chamotsebomnama tsetšanana enjamna mo canye alacranbe uetjoniñcá.

6 Chca tempo chaojtsemna ora, entsanga mochántseenguaye ntšamo jtsóbanama, chë tsetšanënga jauántama ndoñe quemochátobena causa, pero ndoñe quemochátinýena ntšamo jamëse jtsóbanama; y masque tša mochántseboše jóbanama, chora chëngaftaca ndoñe chca queochatopása, mo jóbanama ndoñe tmonsobencá.

7 Chë tsátjaye chapulinga monjétsinýna mo couayëngcá prontánënga jama entsángaftaca jéntsjava; chëngbe bestšasiñe monjanábomna mo castellano coronëshangacá, y chëngbe jubíá enjamna mo entsabe jubiacá.

8 Stjēnashe monjánbomna mo shembásabe stjēnashacá, y chēngbe juatsašēnga mo leonbe juatsašēngcá.

9 Chēngbe cuerpēnga jenēuyanama cochaca monjánbomna morocho soyēnga, mo hierro soyēngcá, y chēngbe juatēngmiashangá tmojtsabonjná ora, chē shauenanana bētsacá enjamna, mo ba cochēshangá couayēnga cuaftsasjojnacá, chē inyēngaftaca jéntsama tmojēftsátjajo ora tojtseshauenancá.

10 Chēnga monjanábomna mo alacranbe uascuatšējuacá, ba uetotjēfjangaca, y chē uascuatšējuaca obenana monjánbomna shachna shinyēntscuana entšanga mal chamotsepasama.

11 Chē tsátjaye chapulinga canyē amēndayá monjánbomna, chē uabouana tboa mándaye ángel; hebreo biyaña cha uabainá Abadón ca y grieguiña Apolión o pochocayá ca.

12 Chē natsana pochócayana ya tocjochnēngo, pero más chcoye cabá inyē uta soye más pochócayana cachcá echántsemna.

13 Chentšana chē inyē ángel chabe trompetēfjua tonjanájetō, y canyē oyebuambnayana sēnjanuena, chē Bēngbe Bētsabe delante enjētsemna castellano altarentša juatsboica lado sibienache obocanentšana enjētsobocana.

14 Y chē oyebuambnayana, chē trompetēfjua tonjanájetō y enjētsētbēna ángelbioye tbonjanianyana: “Chē canta angelēnga chē Eufrates bēts fshájaye tsachoca utsbuanēnga mējafjoná ca.”

15 Y chē canta angelēnga tmonjanējafjoná; y nya chē ora, chē te, chē shinye y chē uatama chēngbioye tmojanaprontá, chē quem luarentša entšángbeñe úngañentšana cányentšēnga jtsēbáyama.

16 Atše sēnjanuena buétanga imojamna chē angelēngaftaca tmojána soldadēnga, couayēnguiñe: uta patse millonēnga ca.

17 Mēntšá sēnjánanyē mo otjenayoquēcá chē couayēnga y chē chēngbeñe enjaquenēnga: Chē enjaquenēnga monjánbomna morocho soyēnga cochaca, jenēuyanama, y chē soye buanganana enjáninyēna, mo iñcá, y fchendana mo chē uamana ndētsbé jacintcá y tsēsiyana inynana mo azufrcá; y chē couayēnga monjánbomna mo leonbe bestšašcá, y chēngbe uayoicana enjētsobocana iñe, ngona y azufrana.

18 Y chē úngañentšana cányentše entšanga tmonjanóbana quem unga uabouana pochócaye soyēngaca, chē couayēngbe uayoicana enjētsobocanana: iñe, ngona y azufrana.

19 Er chēngbe obenana entšanga japochócama monjánbomna uayáshañe y uascuatšējuañe; er chēngbe uascuatšējua enjuamna mo mētscuayēngcá, bestšašēngaca, y chējuanga causa entšanga mal montsanpásaye.

20 Pero chē inyē entšanga, chē uabouana pochócaye soyēngaca ndoñe tmonjanopochocanga, juabna ndoñe

chematantrocá, y ndoñe chematanajbaná amana chë bacna soyënga ntšamo monjanamcá; ndoñe chematanajbaná adórayana chë bacna bayëjënga, ni chë mo diosënga cuaftsemncá jtsejuabnayëse imojánadorana castellano soyënga, midio soyënga, bronce soyënga, ndëtsbé y niñëbé soyënga; y chca soyënga ndoñe quemënjatobena ni jinÿama, ni jouenama, ni jtsanama.

<sup>21</sup> Juabna ndoñe chematantrocá y ndoñe chematanajbaná entšanga obanayana, encjuanayana, bacna soyënga boyabása o shembásaftaca jtsamëse oyenana, ni atbëbanana.

## 10

### *Chë ángel base uándmanana tsbuanáchaca*

<sup>1</sup> Chentšana sënjaninÿe inÿe ángel, puerta obenana bomná; celocana enjétsastjajuana, y chabe shëconana canÿe jantšetëshe enjëtsemna; chabe bestšaše tatsëtsacá canÿe tsëfcuácuatjo. Chabe jubiá shinÿcá enjëtsebuashinÿinÿana, y chabe shecuatsënga mo úcuatjona niñëbenga cuaftsoiñcá.

<sup>2</sup> Chabe cucuatšinë enjëtsetbëna canÿe base uándmanana y utëfjna tsbuanácha. Chabe catšbioica shecuátšeca chë mar béjayoca tonjantsá, y chë uañicuayóicatšecna, quem fshantsentše.

<sup>3</sup> Y jabuache tonjanoyó, mo canÿe león cuaftseyocá; y tonjanoyó ora, canÿsëfta juesasanentša jabuache shauenanana sënjanuena.

<sup>4</sup> Chë canÿsëfta juesasana chca tmonjanoyebuambá ora, atše sënjanoprontá ntšamo chënga tmonjanayancá juabemama; pero canÿe oyebuambnayana celocana sënjanuena, mëntsá šonjétsatsaye: “Nÿe aca cochtsójuabnañe ntšamo chë canÿsëfta juesasana tmonjayancá, ndocnábioye catjauyana, y chë soye ndoñe catjuábema ca.”

<sup>5</sup> Chora chë ángel, chë mar béjayoca y quem fshantsentše atsaná sënjaninÿá, chabe catšbioica cucuatše celoye tonjanatsbaná,

<sup>6</sup> y tonjanjurá Bëngbe Bëtsabiamá, chë nÿets tempo y nÿetsca tescama oyenabiamá, chë celoca, quem luare, chë mar béjaye, y lempe chë luarënguiñe yobinÿncá tojanmabiamá. Tonjánayana: “Ya ndoñe más quemochatobatma; mora Bëngbe Bëtsá echanjama ntšamo tojašebuachenacá,

<sup>7</sup> er chë tempo chaojóshjango, chë ústonoye ángel chabe trompetëfjua juajatëtama chaojontsé ora, chora ya echanjochnëngo ntšamo Bëngbe Bëtsá jamama yojuabnacá; chë soye nÿetsca entšángbioye cha ndoñe chenatinÿanÿé, ntšamo tempo cha chabe oservénëngbioye, chë chabe juabna oyebuambnayëngbioye tojanabuayenacá ca” —cha tonjánayana.

8 Chë atše sënjanuena oyebuambnayana celocana enjétsobocanana, cachiñe šonjanatsëtsá y šonjaniyana: “Motsa y mauaca chë mar béjayoca y quem luarentše ángel entsemnabe catšbioica cucuatšíñe base uándmanana y utëfjna tsbuanácha ca.”

9 As atše chë ángelbioye sënjána; chë base uándmanana tsbuanácha chašuíyema sënjaniyana, y cha šonjanjuá: “Quemëcha, motsásañe. Acbe uayoye uamešquénëcha mo tjouangbe meloycá echántsamna, pero acbe uafsbioyna puerta uauntjëcha echantsábema ca.”

10 As chë base uándmanana tsbuanácha chë ángelbe cucuatšentsana sënjanaca, y sentsanásañe; y atšbe uayoye meloycá enjétsamna, pero sënjanabmuaná y atšbe uafsbioyna puerta uauntjëcha tontsanábema.

11 Chora šmonjaniyana: “Aca cmontsemna cachiñe jtëtabuayenana, ntšamo Bëngbe Bëtsá tojayancá chë ntšamo yochjopásama, ba canye luarentša entšángaftaca, ba mándayëngbentša entšángaftaca, ba biyana bomna entšanguentšëngaftaca y quem luarentša reyëngaftaca ca.”

## 11

### *Chë útata Bëngbe Bëtsabe juabna oyebuambnayata*

1 Chentšana canye medídaye niñëfja šmonjanoyé, mo jatšëmbonëfjcá, y šmonjaniyana: “Motsa y Bëngbe Bëtsabe bëts yebna y chentša altar cochjamedída, y cochjácuttaye bueta entšanga chentše Bëngbe Bëtsábioye imojtsadorana.

2 Pero chë Bëngbe Bëtsabe yebnentše más shjoica luarna cachcá cochjonýaye, ndoñe catjamedída, er chiñe chë ndoñe judiëngbiana endmëna; y chënga, chë uámana ca uabaina bëts pueblama, canta bnëtsana y uta shinýëntscuana soyënga mochántsama chiñe jtsepochócama, mo cuaftsebotajncá.

3 Pero atše, útata atšbiana tatšëmbuata y oyebuambnayata chanjichamuá atšbe cuenta entšángbioye jábuayenama, canye uaranga y uta patse y chnénguana bnëtsana tentscuana. Chatna uajojësha entšayangá uichëtjonata bochantsemna, chca, ngmena bomnama jinýanýiyama ca” —chata tbonjánayana.

4 Quem útata atšbiana tatšëmbuata y oyebuambnayata bontsinýinýena chë uta olivos betíyeca y chë uta candel-erëšeca, ntšamo Bëngbe Bëtsá, chë quem luarentše mandayabe delante endmëncá.

5 Nderado nda tojtseboše chatbiana bacna soye jamama, ndoñe quentatobenaye ntšámnaca jáborlana, er uayoicana ñeshe nanjóbcna y chë uayayëngbioye nantsapochócaye;

nderado nda tojábošena chatbiamama bacna soye jamama, cachcá cha buántsemna jóbanama.

<sup>6</sup> Chë útata obenana bondbomna celoca jtsachtama, ndoñe chaonduaftema, entšángbioye Bëngbe Bëtsabiamama chabojtsabuayiyiná tese; obenana béjayënga buiñe jtsebiama, y jamama quem luarentše chaotsóndbemama, nÿetscna pochócaye soyëngaca, bueta sóynaca ntšamo chata tbojtsebošcá.

<sup>7</sup> Pero ntšamo Bëngbe Bëtsabiamama ibotatsëmbcá entšángbioye jábuayenama chata chabojapochocá ora, chë uabouana bayá, chë corente bëts tboicana chaojabocná, chátbioye echántsatsjaye, echantsayëñaná y echantsëbaye.

<sup>8</sup> Y chatbe óbana cuerpo, chë corente bëts pueblentša tsáshenañe echanjoquéda, chë chatbe Utabná tmojanrucificá luarentše, y chë bëts pueblo inÿetšá juabáyamna nántsemna mo chë Sodoma y Egiptó luaroycá. Chentše endmëna mo chë bëts pueblënga Sodoma y Egiptcá, er chentše chë entšanga yapa bacna soyënga jtsamana.

<sup>9</sup> Y unga y tsëntsa tentscuana, chë obanatbe cuerpo mochantsonÿaye, nÿetsca canÿe luarentša entšanga, nÿetsca cachca buiñe bomna entšanga, ba biyana bomna entšanguentšana y ba mándayëngbentša entšanga; ndoñe quenátslesenciana chata jutabuantsama.

<sup>10</sup> Chata bochjóbanama, quem luarentše oyenënga mochanjóyejuaye; tša oyejuayënga mochántsemnama, ndayánaca mochanjénatsëtaye, er ntšamo chë Bëngbe Bëtsabe juabna oyebuambnayata tbojanayancá, tojanma quem luarentše oyenënga puerta chamosufrima.

<sup>11</sup> Pero chë unga y tsëntsa te tonjanochnëngo ora, Bëngbe Bëtsá tonjanma chë obanata chábuatayenama; chentšana tbonantsata, y chë monjétsantješnënga tša uatjana tonjanëbuache.

<sup>12</sup> Chora canÿe jabuache oyebuambnayana tbonjanuena, celocana mëntšá enjétsëtsësnaye: “Moye mašënguata ca.” Y chatna canÿe jantšetëshiñe tbonjántsjua, y chatbe uayayënga chca monjétsontÿaye.

<sup>13</sup> Cachora quem fshantse jabuache tontsanangmëmana, y chë bëts pueblentše bnëtsanentšana cánÿentše tontsanáshajaye, y canÿsëfta uaranga entšanga tmonjanóbana. Chë ainënga tmonjanoquedanga, tša auatjanánënga, chë celoca Bëngbe Bëtsábioye montsanadorana.

<sup>14</sup> Chë inÿe uabouana soye quem luare japochócama, mora tojochnëngo, pero betscó chë ústonoye uabouana pochócaye soye echanjóshjango!

*Chë ústonoye ángelbe trompetëjjua*

15 Chë ústonoye ángel chabe trompetéřjua tonjaná jatëto ora, celoca tša monjétsayebuache, mëntšá monjétsichamo:

Ora tocjobuache, Bëngbe Utabná y chabe Uámana Uabuayaná Jesucristbe amëndayana quem luarentše chaotsemnana,

y chë amëndayana echántsemna nÿets tempo y nÿetsca tescama ca.

16 Y chë uta bnëtsana y canta bëtsëjëmënga amëndayënga, chë chëngbe uámana puestiñe Bëngbe Bëtsabe delante monjétsëbiamanënga, tmonjanoshamentšé, fshantsóntscoñe jotsejbénase, y Bëngbe Bëtsá tmonjanadorá,

17 mëntšá jayanëse:

Bëngbe Utabná, Bëngbe Bëtsá nÿets obenana bomná, aca chë mora cha condmëná y chë tempo cha conjamná cbontsatschuaná,

er nÿa mora acbe bëts obenánaca soyënga cochjama, acbe amëndayana jóntšama.

18 Ba luarentša entšanga ácaftaca tmonjanotšatjayená; pero chëngaftaca cmojetnama chë uabouana castigo jtsebinÿnama te tocjóshjango,

chë tempo tmojanóbanëngbiana jayanama tšabá o ndoñe tšabá tmonjëftsemama.

Tonjóshjango chë hora, uacanánana jtatšatayama chë acbiana oservénëngbioye,

chë acbe juabna oyebuambnayëngbioye, chë acbe entšángbioye,

y chë acbe uabaina nÿetscangbiana más bëts uabainana yomnama juabnayëngbioye,

uámanënga y nduámanënga;

y chë tempo tonjóshjango, quem luare pochocayënga jt-sapochócyama ca —chënga tmonjánayana.

19 Chora, Bëngbe Bëtsabe bëts yebna celoca tonjantëřjo, y choye enjëtsëbinÿna chë cajontema, ndayëtëma yojaninÿanÿná ntšamo Bëngbe Bëtsá chabe entšángbioye tojanašëbuachenacá; y chora enjëtsëmna tcuinÿënga, tša shauenanana, juesasanana, quem fshantse tontsanangmëmana y bëtscá bëntstá tonjantquécjana.

## 12

### *Chë shembása y chë uabouana bayá*

1 Chentšana, canÿe bëts soye celoca tonjanonÿná entšanga canÿe soye jinÿanÿiyama: canÿe shembása, shinÿe mo chabe uichëtjoniaca, juashcona chabe shecuatšentša tajsoye, y chabe bestšašinë canÿe coronësha bnëtsana uta estrellëngaca.

<sup>2</sup> Chë shembása ngomamaná enjétsemna, y chë šešona jónýnama yojétsobecuama jabuache enjétseyoye, chë šešona jónýnama cha puerte jasúfriama ibojamna causa.

<sup>3</sup> Y chora inýe bëts soye celoca tonjanonýná, entsanga inýe soye jinýanýiyama: canýe uabouana dragón buanganá, canýsëfta bestšašëngaca y bnëtsana tsëtjonëšëngaca y chë bestšašënguiñe enjanábomna canýsëfta coronëshangá.

<sup>4</sup> Chabe uascuatšëjuaca úngañentsana cánýentse chë estrellatémënga celocana tontsansjojó, y quem fshantsoye chëtémënga tontsanëtšana. Y chë dragón chë šešona jtse-bomnama shembásabe delante tonjantsá, chë šešonatémbioye jtsósañama, cha tojonýná ora.

<sup>5</sup> Chora chë shembása canýe šešona boyabásetema bontsan-bomna, nda nýets luarenache entsángbioye yochtsamëndaye mo canýe hierro varëfjaquécá. Pero chë šešona chábentsana tmontsanjuaná y Bëngbe Bëtsábioye, chabe uámana puestoye tmontsanámbañe.

<sup>6</sup> Chë shembásana entsanga ndoyena luaroye tontsanachá, Bëngbe Bëtsá canýe luare ibojabopróna choye, chentse saná chamocaredadoma, canýe uaranga y uta patse y chnënguana bnëtsana tentscuana.

<sup>7</sup> Chentsana celoca canýe entsjanayana enjétsemna: Miguel, chë angelëngbe amëndayá, y chabe angelënga chë dragónaftaca monjétsentsjanaye. Chë dragón y chabe angelënga monjétsatsjanaye,

<sup>8</sup> pero ndoñe chematanobená jáyënjanama, y chëngbiamana ya ndoñe más luare celoca quentétsemna.

<sup>9</sup> Chcase, chë uabouana dragón chocana tmontanábocna, chë tempsca mëtscuaye, chë Diablo y Satanás ca uabainá, y chë bëtscá entsángbioye aingñayá; quem fshantsoye cha tmontsantsatše, y chë cha yojanamënda angelëngnaca.

<sup>10</sup> Chora canýe jabuache oyebuambnayana celoca sënjanuena, mëntšá enjétsichamo:

Chë Bëngbe Bëtsá entsanga játsebacama tempo ya tonjóshjango. Mora Bëngbe Bëtsá echanjínýanýiye chabe obenana y mándayana,

y chabe Uámana Uabuayaná Jesucristbe obenana jtsemándayama;

er chë Cristbe delante bëngbe catsátanga mal aquedayá ya tmontábocna,

nda nýets tempo Bëngbe Bëtsabe delante mal enjanaquedayá.

<sup>11</sup> Bëngbe catsátanga cha tmonjayëñaná, er Cristo, chë mo tmojóba Oveshatemcá, Bëngbe Bëtsá bacna soyëngama entsanga cháuaperdonama,

tonjanóbana, chabe buiñe juabuáshanëse,

y chë ndegombre soyëngama chënga monjanóyebuambnáyeca;

er chëngbe vida chëngbiama ndoñe quenjatámana;  
Jesucristo jaserviama jóbanama chënga monjanprontana.

<sup>12</sup> ¡Chcasna, celoca corente oyejuayana chaotsemna,  
y tsëngaftanga chë choca oyenëngbeñnaca!

¡Pero tša lastema chë fshantsoca y mar béjayoca oyenëngbiama,  
er chë diablo tsëngaftangbiye tonjástjango, corente tsatjayá,  
er cha entsetátšëmbo ya nje batsá vojtsábojamna chë chábioye  
mochjacastígama ca! —enjétsichamo.

<sup>13</sup> Chë dragón quem fshantsoye tmojtsantsatsama  
tonjáninje ora, chë šešona boyabásetema tbonjanëshjango  
shembásabioye tbontsanacmé.

<sup>14</sup> Pero uta juatëngmiáša, chë bëts aguilbeshá, chë  
shembásabioye tmonjaniyé, chabiama tmojanprontá  
luaroye chaongüefjoma, entšanga ndoyena luaroca, chë  
dragónbentšana bënoca; y chentše enjamna chë shembásabioye  
saná chamuájuatšema, unga y tsëntsa uatëntscuana.

<sup>15</sup> Chora chë dragón, chabe uayoicana bëts béjaye tonjan-  
buashëtjo chë shembásabe stëtsoica, chaobuama y chabot-  
sambama;

<sup>16</sup> pero quem fshantse chë shembásabioye tbonjanájabuache,  
er chë fshantse mo uayašacá tonjantëfjo, y chë dragonbe  
uayoicana béjaye obocniye tontsanobmuánañe.

<sup>17</sup> Y chë dragón chë shembásabioye tondaye jamana  
chenatanobená causa, corente cacháftaca tbonjánetna, y  
tonjána chë ínÿenga, chë shembásabe basengcá mondmënënga  
játšjayama, ntšamo Bëngbe Bëtsá yomandacá imobedecénënga,  
y ntšamo Jesucristo tonjanabuayená ndegombre soyëngaca  
sempre imoyenënga.

<sup>18</sup> Y chë dragón chë mar béjaye tsachañe tonjantsá.

## 13

*Chë dragón tonjanma, chë mar béjayoca uabouana bayá  
chabe obenana chaotsebomnama*

<sup>1</sup> Chentšana atše sënjaninje, canje uabouana bayá chë mar  
bejajoicana tonjánbocna; enjánbomna canysëfta bestšašënga y  
bnëtsana tsëtjonëšënga, y chëšënguiñe bnëtsana coronëshangá,  
y chë bestšašënguiñe bañe enjétsabemana Bëngbe Bëtsabiama  
contra oyebuambnaye uabaina.

<sup>2</sup> Chë uabouana bayá sënjaninÿá enjamna mo canje leop-  
ardcá, mo osbe shecuášangaca, y chë uayáshana mo leonbe-  
shacá. Chora chë dragón tonjanma chë uabouana bayá  
chaotsebomnama chabe obenana, y chabe uámana puesto  
jtsemándayama, y chabe bëts mando.



<sup>3</sup> Canýe chabe bestšašënguëntše enjëtsinýna mo jóbanama tëtšeniñcá; pero chentše tbontanóbema; y chora quem luarentša nýetsca entšanga ojnánánënga monjëtsemna, y chë uabouana bayábioye montsanëyeunana.

<sup>4</sup> Y chë dragón montsanadorana, chë uabouana bayábioye obenana tbojánatšetama; y chë uabouana bayábioynaca montsanadorana, mëntsá jayanëse: “Ndocná obenana quenátsbomna quem uabouana bayacá, y ndocná quenátobena chábioye jayénjanama ca.”

<sup>5</sup> Chë uabouana bayábioye tbonjanlesenciá corente podesca Bëngbe Bëtsabiana chaotsóyebuambnama, y obenana tbonjanatšetá, canta bnëtsana y uta shinýentscuana chaotsemándama.

<sup>6</sup> Y podesca Bëngbe Bëtsabiana tonjánayana, soyënga chabe contra, chabe bëts yebnama y chë celoca oyenëngbe contra.

<sup>7</sup> Chábioynaca tbonjanlesenciá chë Bëngbe Bëtsábënga imomnënga játsjayama, jáyénjanantscuana; y obenana tbonjanatšetá chaotsemándama nýetsca cachca buiñe bomna entšángbeñe, nýetsca canýe entšángbeñe, nýetsca biyañe bomnëngbeñe, y nýetsca mándayëngbentša entšángbeñe.

<sup>8</sup> Chë uabouana bayá nýetsca quem luarentša entšanga mochántadorana. Chë entšanga mondmëna ndëmuanýengbe uabaina ndoñe yontsábemana, chë Bëngbe Bëtsábioye jëtschuayama mo canýe oveshatemcá, tojanóbanabe librëšañe. Bëngbe Bëtsá quem luare cabá ndëma ora, quem librëšañe tojanábema nýetscanga chë tšabe vida mochjónýenëngbe uabaina.

<sup>9</sup> Chë jouenama obenënga, chamouena.

<sup>10</sup> Chë cárceloye jama ibomná, cárceloye bochanjotóca jama; chë espadëjaca jobanamá, espadëjaca echanjóbana.

Chíyeca quem luarentše entseyta, chë Bëngbe Bëtsábënga imomnënga padecena soyënguiñe tmojtsemna ora, puerte uantadënga jtsemnana y Bëngbe Bëtsábeñe jtsošbuáchiyana, mo chë Bëngbe Bëtsabe entšangcá.

<sup>11</sup> Chentšana inýe uabouana bayá sënjáninýe, quem fshantsentšana enjëtsebocana; uta tsëtjonëse mo oveshabešcá enjánbomna, pero mo canýe dragoncá, mo canýa Satanásbeyeca mandanacá enjëtsoyebuambnaye.

<sup>12</sup> Y enjánama soyënga chë natsana uabouana bayabe nýets obenánaca, chabe delante. Chë fshantsentša bayá tonjanma nýetsca luarentše oyenënga chamotsadoránama chë natsana uabouana bayábioye, chë jóbanama tëtšeniñe tbontanobemá.

<sup>13</sup> Cha ba bëts soyëgnaca enjánama chabe obenana entšanga jinýanýiyama, entšangbe delante jamana iñe celocana fshantsoye chaótsatšamnaca.

14 Y cha tbonjanlesenciá chaoma chabe obenana jinÿanÿiyama chë natsana uabouana bayabe delante. Chë soyëngaca entšanga tonjanaíngñé, y quem luarentša entšanga tonjanëyana canÿe soye chamopormá, y chë soye cháotsinÿna mo chë natsana uabouana bayacá, chë espadëjaca tëtšená enjamná, y chora tšabá enjetsatsmëná.

15 Y chë inÿe uabouana bayábioye tmonjanlesenciá obenana chaotsebomnama jamama, chë natsana uabouana bayábioye jadórama entšanga tmonjanma soye vida chaotsebomnama, y chë soye jóyebuambayama chaotsobenámnaca, y jamama chë chábioye ndoñe tmontsadoránënga chamóbanama.

16 Y tonjanma, nÿetscángbioye, básenga y bëtsëtsanga, bomnënga y ndbomnënga, cachëngbiamma trabájayënga y nÿe inÿabiamma nÿets tempo oservénënga, catšbioica cucuatšíñe o juentsaca chamuínÿnanama.

17 Y ndocná quenjátanobena ni jiyama, ni jobuámiñama, chë uinÿnanánana ndoñe tontsebomnëse; chë uabouana bayabe uabaina o chë chabe uabainama yomna número.

18 Chë número jinÿenamna bëtscá osertánana jtseytana. Chë becá osertánana bomná cháuinÿena ntšamo chë uabouana bayabe número iuayancá, er canÿe entšabe número endmëna. Chë número endmëna chë chnënguana patse y chnënguana bnëtsana y chnënguana.

## 14

*Chë canÿe patse y canta bnëtsana y canta uaranga entšangbe canto*

1 Y más sëntsanonÿá. Sënjaninÿe, chë Oveshatema, enjétsatsjabna Sión ca uabaina tjoca, y cháftaca monjëtsemna canÿe patse y canta bnëtsana y canta uaranga entšanga, y chëngbe juentsaca enjétsabemana chë Oveshatembe y chabe Taitabe uabaina.

2 Chora sënjanuena celocana canÿe shauenanana, mo bëtscá bëjayënga y bëts juesasana shauenanancá; y chë shauenanana enjamna mo chë arpësha uenanayënga chëngbe arpëshangá tmojtsabuastocá.

3 Chënga canÿe tsëm canto montsancánta Bëngbe Bëtsabe delante, chë chabe uámana puesto y chë cháftaca canta Ainënga y chë bëtsëjëmënga amëndayëngbe natsanentše. Y ndocná quenjátanobena chë canto juatsjinÿyana, nÿe chë canÿe patse y canta bnëtsana y canta uaranga quem luarentšëngbentsana atsebácanëngna aíñe.

4 Chënga monjanmëna chë shembásaftaca ndocna bacna soye tmonjanmënga, er chënga imojanenománda chca bacna soyënga ndoñe ntsamama; chë Oveshatema ndëmoye tojtsá

y chëngnaca choye jtsëstonana. Chënga imojamna chë nat-sanënga chë quem luarentša entšanguentše atsebácanënga jtsemnama, y chënga atsebácanënga imojtsemna Bëngbe Bëtsá y chë Oveshatema jtsaservënama.

<sup>5</sup> Chënga ndocna te tmonjanobosteró; ndocná quenátobena jayanama chënga bacna soye tmojanma ca.

*Ntsamo chë unga angelënga tmojánayana*

<sup>6</sup> Chentšana inye ángel sënjáninye, tsbanánoca celëjana enjétsongüefjnaye. Cha enjánbomna canye nyets tempscama oservena buayenana soye, entšángbioye jáuyanama, nyets quem luarentše oyenënga, nyetsca mándayëngbentša entšanga, nyetsca cachca buiñe bomna entšanga, nyetsca biyañe bomnëngbeñe y nyetsca canye entšangbiama.

<sup>7</sup> Y jabuache mëntšá enjétsichamo: “¡Bëngbe Bëtsabiama šmochjájuaboye cha nyetscangbiama chë más uamaná endmënama, y cha šmochtsatschuanaye, er ya tonjóshjango chë tempo ntšamo entšanga tmojamama tšabá o ndoñe tšabá bëtsemnama cha cháuyanama! ¡Chë celoca y quem luare, chë mar bėjaye y nyetsca chë fshantsentšana óbocana bėjayënga tojamá šmochtsadorana ca!”

<sup>8</sup> Chábentšana inye ángel mëntšá enjétsichamo: “¡Ya bëts castigo, ya bëts castigo chë Babilonia bëts puebloca entšángbeñe echántsemnal, ndëmuanyënga tmojinyanyé ntšamo puerta bacna soyënga shembása o boyabásaftaca jtsamama y inye corente bacna soyëngnaca, y chentšana nyets quem luarentša entšanga mo cach Babilonioquëngcá tmojama. Chë causa, Bëngbe Bëtsá echanjama chëngbiámncaca chabe uabouana castigo chaotsemnama ca.”

<sup>9</sup> Chë útatbentšana inye ángel jabuache mëntšá enjétsichamo: “Nderado nda chë uabouana bayábioye y chë chábioye jadórana pormana soye tojtsadorana, y tojalesenciá chabe uinýnanana soye juentsaca o cucuatšifne chamojajoma,

<sup>10</sup> chánaca bontsemna, chë Bëngbe Bëtsabe uabouana castigo jasúfrana. Entšanga puerta bacna soye tmojamama, Bëngbe Bëtsá puerta tbojetna, y chë causa echanjama chë castigo chëngbeñe chaotsemnama. Y chë uámana angelënga y chë Oveshatembe delante, chë bayá adorayábioye puerta mochanjatsetšená, iñeshe y azúfrecá.

<sup>11</sup> Chca chamojtsesufrina ora, becá ngona echantsóbocana, y chë ngona nyets tempo chca echantsótsjuaye; y chënga, chë uabouana bayá y chábioye jadórana pormana soye adórayënga, y chabe uinýnanana soye bomnëngbiama, ndocna te chë tsetšanana queochatëjbana ca” —cha enjétsichamo.

<sup>12</sup> Chíyeca quem luarentše entseyta, chë Bëngbe Bëtsabe mandënga obedecënënga y Jesúsbeñe puerta ošbuáchiyana

bomnënga, chë Bëngbe Bëtsabe entsanga, padecena soyëngüiñe tmojtsemna ora, puerte uantana jtsemnana.

<sup>13</sup> Chentsana canye oyebuambnayana celocana sënjanuena, mëntśá šonjétsatsaye: “Mëntśá mábema: ‘Tśa oyejuayënga mochántsemna chë mëntescana mochjóbanënga, Bëngbe Utabnáftaca cányiñe mo canyáca jtsomñëse ca.’”

“Aíñe ca” —chë Uamana Espíritu tonjayana—, “chënga ya ndoñe más queochátamna jatrabájana, ni jasúfriana, er chënga tmojama tśabe soyënga Jesús jasérviana, y chë soyëngama chënga tśabe bendicionënga mo uacanancá celoca mochanjóyëngacñe ca.”

### *Ndayá chë angelënga quem luarentse tmojanatbaná*

<sup>14</sup> Chora más sënjáninye; sënjáninye canye fjantse jantšetëshe, y chëshiñe canya enjésetbemana. Cha enjamna mo canye entsacá; chabe bestśašiñe enjanábomna canye castellano coronësha, y cucuatšiñe canye puerte efšana mëtśtá enjétsatbëna.

<sup>15</sup> Chentsana, chë celoca Bëngbe Bëtsabe bëts yebnentsana inye ángel tonjánbocna, y jabuache bonjétsatsaye chë jantšetëshiñe tbemanábioye: “¡Ache mëtśtaca machbonja y shajuanënga matbaná, er chë játbanamna tempo ya tonjóshjango; chë quem luarentśa shajuana ya tonjaboche ca!”

<sup>16</sup> Y chë jantšetëshiñe enjantbemaná chabe mëtśtaca quem luariñe tonjánachbonja, y nyets quem luarentse atbanániñe tonjanoquedá.

<sup>17</sup> Chentsana inye ángel chë celoca Bëngbe Bëtsabe bëts yebnentsana tonjánbocna; chánaca canye puerte efšana mëtśtaca.

<sup>18</sup> Y chë altarentśana inye ángel tonjánbocna, chë mando bomná iñesheca castigo entsangbiana jamama; y chë puerte efšana mëtśtá bomna ángelbioye jabuache tbonjaniyana: “¡Ache mëtśtaca machbonja y chë fshantsoca nyetsca uvas betiyeshënguentśa uvasëšangá mátabe, er ya uabochenëšangá entsamna ca!”

<sup>19</sup> Y chë ángelna chabe mëtśtaca quem luariñe tonjánachbonja, y nyetsca quem luarentśa uvasëšangá tonjanátabe, y lempe chë juantśëtetjiana luaroye tonjanëtšana. Chë soye entsinýinýná ntśamo yochtsemnana Bëngbe Bëtsabe uabouana castigo.

<sup>20</sup> Chë uvasëšangana, chë bëts pueblentsana chaboye tmonjanantsëtetje, y chë luarentśana tśa buiñe tonjanóbocna; tonjanojutjé couayëngbe uayashbenëshantscoñe y mo unga patse kilómetrënga tonjanábuashana.

## 15

*Chë angelënga chë canÿsëfta pochócaye soyëngaca*

<sup>1</sup> Chentsana, inÿe bëts soye entšanga inÿe soyama jinÿanÿiyama, celoca sënjáninÿe, canÿe puerte bëts soye: canÿsëfta angelënga canÿsëfta pochócaye soyëngaca, chë ústonoye pochócaye soyënga. Chë soyënga chaojtsemnentsana ya ndoñe inÿe pochócaye soye yochántsemna, er chëntscoñe Bëngbe Bëtsá yochjacistíga, lempe ntšamo cha jamama tojanjuabocá.

<sup>2</sup> Canÿe mar béjaynaca sënjáninÿe, mo cristalca enjétsinÿna íñeca enájuabniye; y chë béjaye juachaca monjétsatsana chë tšabá tmojanbocnënga, y ni chë uabouana bayá, ni chë chábioye jadórama pormana soye ndoñe tmonjánadoranga, y chë uabouana bayabe uabainama yomna número chëngbeñe chaotsemnama ndoñe tmonjanlesencianga. Nÿetscanga chënga monjétsabomna Bëngbe Bëtsá tojanëtsatá arpangá.

<sup>3</sup> Chënga, canÿe canto monjétssecantaye ntšamo Moisés, chë Bëngbe Bëtsabe oservená tojancantacá, y ntšamo chë Oveshatema tojancantacá. Mëntsá monjétssecantaye:

Puerte bëts soyënga y tšabe soyënga entsemna lempe ntšamo  
aca tcojamcá,

Bëngbe Utabná Bëngbe Bëtsá nÿets obenana bomná;  
lempe ntšamo jtsamëse aca icoyena, acbe bominÿiñe puerte  
tšabe y ndegombre soyënga yomna,  
nÿets luarënguenache entšangbe Rey.

<sup>4</sup> Bëngbe Utabná, ¿nda nanjájuaboye aca nÿetscangbiama ndoñe  
más bëtsá condmëna ca,  
o ndoñe cmantsatschuanaye?

Nÿe aca uamaná condmëna;  
nÿetsca mándayëngbentša entšanga ácbioye mochanjabo,  
ácbentše mochanjoshamentšiyeye aca jadórama,  
er ntšamo tcojamcá lempe entšangbioye mora tcojinÿanÿé,  
y lempe ntšamo aca tcojamcá tšabá jtsemnana ca —  
monjétssecantaye.

<sup>5</sup> Chca chentsana sënjanontješé y sënjáninÿe chë celoca Bëngbe Bëtsabe bëts yebna tonjantëfjo, chë Bëngbe Bëtsá Moisésbioye tbojaníyé leyënga uajajóntše.

<sup>6</sup> Y Bëngbe Bëtsabe bëts yebnentsana tmonjánbocna chë canÿsëfta angelënga, chë canÿsëfta pochócaye soyënga uambayënga, uafjantse lino entšëjuangá uabuashinÿinÿanëjuangá uichëtjonënga, y tëntša castellano uasnanëjëngaca cochóntscoñe.

<sup>7</sup> Chentsana, canÿa chë canta Ainënguentšá chë canÿsëfta angelëngbioye tonjanoyé canÿsëfta castellano copbenga jútjena

chë Bëngbe Bëtsabe uabouana castígoca; Bëngbe Bëtsá chë nyets tempo y nyetsca tescama vida bomná.

<sup>8</sup> Chorna, chë Bëngbe Bëtsabe bëts yebna celoca becá ngónaca tonjanojutjé, y chë ngona enjétsobocana Bëngbe Bëtsábentšana, chabe buashinÿinÿanana y obenana jtsinÿanÿnayëse; y Bëngbe Bëtsabe bëts yebnoye ndocná quenjátanobena jamashënguana, chë canÿsëfta angelëngbe canÿsëfta pochócaye soyënga can-dochnënguëntscuana.

## 16

### *Chë castígoca copbenga*

<sup>1</sup> Chentsana, canÿe jabuache oyebuambnayana sënjanuena, chë celoca Bëngbe Bëtsabe bëts yebnentšana enjétsobocana, y chë canÿsëfta angelëngbioye mëntsá enjétsëtsëtsnaye: “Mot-sajna y quem canÿsëfta copbenga, chë Bëngbe Bëtsábiocana endóbocana uabouana castígoca, fshantsoca šmochjabuashcja ca.”

<sup>2</sup> Chora chë natsana ángel tonjána y chabe copbé quem luariñe tonjanbuashcja, y nyetsca entsanga chë uabouana bayabe uinÿnanana soye bomnënga y chë chábioye jadórama pormana soye adórayëngbe cuerpiñe bañe bacna nguayanana tonjanóbocna, puerte tsetšénana.

<sup>3</sup> Chentsana, chë inÿe ángel chabe copbé mar béjayoca tonjanbuashcja, y choca búyeshe buiñcá tontsanóbema, mo canÿe entsá obanabe buiñcá, y nyetscanga chë mar béjayoca vida bomnënga tmonsanóbana.

<sup>4</sup> Chora chë inÿe ángel chabe copbé béjayënguiñe y béjaye obocanënguiñe tonjanbuashcja, y buiñe tontsanobiama.

<sup>5</sup> Chentsana sënjanuena, chë béjayënguiñe mando bomna ángel mëntsá enjétsichamo:

Aca nyetsca soyënguiñe tšabá amá condmëna,  
er aca tcojayana chë quem luarentša entsanga chca castigánënga chamotsemnama.

Bëngbe Bëtsá, Uamaná, mora chca condmëna y chca conjamna;

<sup>6</sup> er chënga tmonjama, chë acbe entsanga  
y acbe juabna oyebuambnayëngbe buiñe chauábuashanama,  
jtsëbáyëse;

y mora tconjama chënga buiñe chamofšema.

Nyets mercedo imobuájona chca japásama ca —cha enjétsichamo.

<sup>7</sup> Altarocánënaca canÿe oyebuambnayana sënjanuena, mëntsá enjétsichamo: “Aíñe, Bëngbe Utabná, Bëngbe Bëtsá, nyets obenana bomná condmëna, y ntšamo entsanga contsacastigacá, ndegombre y tšabá entsemna ca.”

8 Chentshana, chë inÿe ángel chabe copbé shinÿiñe tonjanbuashcja; chë shinÿe corente tontsanobonÿaná y chíyeca entsángbioye íñesheca tontsanajuinÿé.

9 Y nÿetscanga uabouancá juinÿnënga tmonjanoquedá; pero chënga ndoñe chemátanbošena bacna soyënga amana jtsajbanana, ni Bëngbe Bëtsabe benache jtishachana, ni chábioye quemëntétsatschuanaye, más chabe contra ba soyënga montsanichamo; cha nda obenana yobomna chëngbioye chë pochócaye soyënga jíchmuama, chënga chamosufrima.

10 Chentshana chë inÿe ángel chabe copbé chë uabouana bayabe uámana puestiñe tonjanbuashcja, y nÿets chabe amëndayiñe ibetiñe tonjanoquedá. Chë entsanga bichtaja montsanenójantsnaye, yapa tsetše causa;

11 pero ni chca, chë entsanga chematanajbaná bacna soyënga jtsamana, ndayá chë yapa tsetšama y chë chëngbe cuerpiñe bacna nguayanana causa, chë celoca Bëngbe Bëtsabe contra ba soyënga montsanichamo.

12 Chentshana chë inÿe ángel chabe copbé chë bëts fshájaye Eufrates ca uabáiniÿiñe tonjanbuashcja y chë bėjaye tontsanbuashjo, japróntama chë shinÿe bocanoica luarënguentsa reyënga y chëngbe soldadënga chëjana chámuachnëjnama.

13 Atše sënjáninÿe, chë dragonbe uayáshoicana, chë uabouana bayabe uayáshoicana y chë ndoñe ndegombre Bëngbe Bëtsabe juabna oyebuambnayabe uayoicana tmonjánbocna unga bacna espíritënga; mo sapošëngcá monjétsinÿna.

14 Chënga monjamna bayëjëngbe espíritënga; bëts soyënga monjánama obenana jinÿanÿiyama, y montsanbocana nÿets luarentša reyënga jáchembuama, chë uámana te, ndayté Bëngbe Bëtsá, chë nÿets obenana bomná yochjabo entsangbiamna jabáyanama ntšamo chënga tmojamama, chë te chënga chabe contra chamotsetsjama.

15 Bëngbe Utabná Jesucristo mëntsá tojayana: “Smochjinÿe, atše nÿe ndeolpe chanjabo, mo canÿe atbëbanacá, chabiamna ndocná tontsejuabná ora; chíyeca oyejuayënga mochántsemna atše jabama tmojtseprontanënga, mo nda tojtsefšna y chabe entsayá totsaboprontañacá, nÿe enašá ndoñe chaondëtsemnama, y entsanga chca tmojinÿe ora ndoñe chaondëtseuatjama ca.”

16 Y chë bacna espíritëngna chë reyëngbioye tmonjanënatse canÿe luare, hebreuñe Armagedón ca uabáinoye.

17 Chentshana, chë ústonoye ángel chabe copbé quem luarentša tsbanánoca tonjanbuashcja, y chë celoca Bëngbe Bëtsabe bëts yebnentša uámana puestentšana canÿe jabuache

oyebuambnayana tonjanóbocna, mēntšá enjétsichamo: “¡Chē jopásama enjamna soye ya tocjochnēngo ca!”

18 Chora enjétsamna tcuinýēnga, shauenanana y juesasanana, y quem luariñe tontsanangmémana, yapa jabuache quem luare tontsanēbanjó causa; quem luarentše entšanga imobinýna orscana, ndocna te nýa chca quem luare tontsanēbanjó.

19 Chē puerte bēts pueblo úngañe tontsanojatá, y nyets luarentša bēts pueblēnga tontsanáshajaye, y Bēngbe Bētsá tojanenujuabó chē puerte bēts pueblama, Babilonia ca uabaina pueblama, chentša entšanga chē uabouana castigo chamotsebomnama, Bēngbe Bētsá tša tbojáneta causa, tša bacna soyēnga chentše tmojanmama. Y chca, chē chēngbe bēts pueblo úngañe tontsanojatá ora, cha chēnga tonjanacastigá.

20 Mar béjayoca nyetsca fshantsēnga y quem luarentša nyetsca tjañe tontsanenatjēmba.

21 Celocana bētsētsa bēntstbēnga entšángbeñe tonjantquécjana, chēbēnga canta bnétsana kilama más utbēnga; y entšanga Bēngbe Bētsabe contra ba soyēnga tmonjánayana, er chēnga tša montsansufrina chē bēts pochócaye bēntstá causa, y chē pochócaye bēntstá chēngbiama puerte jabuache castigo enjamnama.

## 17

### *Chē puerte bacna vida bomna shembásabe castigo*

1 Canýa chē canýsēfta angelēnguentsá, chē canýsēfta codbēnga monjanatbēnēnguentsá, tonjánabo y šonjanianyana: “Mabo; cbochanjinýinýiye ntšamo yochtsemna chē puerte bacna vida bomna shembása, chē béjayēnguiñe entsetbemanabe castigo.

2 Quem luarentša mandadēnga cháftaca puerte bacna soyēnga tmojama, y quem luarentša oyenēnga puerte tmojóyejuanga chē cháftaca bacna soyēnga amama, mo chē bacna vida bomna shembásabe vínoyeca puerte cuafjotmenangca.”

3 Chentšana chē ángel, atše chē Uámana Espíritbeyeca corente mandaná jtsemnēse, šonjanánatse entšanga ndoyena luaroye. Choca sēnjáninýe canýe shembása, canýe uabouana buángana bayábeñe enjaquená; chē bayabe cuerpiñe nyétsañe Bēngbe Bētsabiamana puerte bacá oyebuambnaye uabaina enjétsabemana, y enjánbomna canýsēfta bestšaše y bnétsana tsétjonēse.

4 Chē shembása enjanichétjona uámana shbuenda uafjat-sēnga y buángana entšayá, y entsanbotamana castellánoca,



uámana botamana ndětšétémëngaca y pérlica. Chabe cucu-  
atšiñe canye castellano copbé enjétsatbëna, jútjena puerte  
uaboyënja soyëngaca, y chë boyabásengaftaca cha tojanma  
puerte bacna soyëngaca.

<sup>5</sup> Y chabe juentsaca canye uabaina enjétsabemana, ndoñe  
josérta soye, mëntšá: “Chë puerte bëts pueblo Babilonia, tša  
bacna entsanga chentše, mo chë puerte bacna vida bomna  
shembásengbe bebmá cuaftsemncá; chentšana tojanóbocna  
quem luarentša nyetsca puerte uaboyënja soyënga ca.”

<sup>6</sup> Atše sënjáninye chë shembása tēmiá, er cha tojanofšé chë  
Bëngbe Bëtsábenga imojamnëngbe buiñe, ndëmuanyëngbiöye  
tmojanëbaye Jesusbiana oyebuambnaye causa.

Chca sënjáninye ora, tša sënjanenjaná.

<sup>7</sup> Chora chë ángel šonjaniyana: “¿Ndáyeca tcojenjaná  
ca? Atše cbochanjauyana ntšamo yojsayana chë shembása  
y chë chábiöye bontsambá uabouana bayá, chë canyšëfta  
bestšaše bomná y bnëtsana tsëtjonëše; chë soye ndocná  
quenátstatšëmbo.

<sup>8</sup> Chë tconjinye uabouana bayá, tempo chca enjamna, pero  
mora ya ndoñe. Chë corente bëts tboicana cha echanje-  
setsjuá, pero lempe pochocaná jtsemnama chca echántsaye.  
Quem luarentše oyenënga, ndëmuanyëngbe uabaina quem  
luare jobojátšama orscana ndoñe yonduábemana, chë tšabe  
vida mochjónyëngbe uabaina iuábemana librëšañe, chënga  
mochanjenjaná, chë bayá chë tempo enjaniyená y mora ya  
ndoñe, pero cachiñe yochjésabama chamojinye ora.

<sup>9</sup> “Muentše canye soye entsemna chë chca josértama chamo-  
jobenangbiana: chë bayabe canyšëfta bestšaše endmëna  
canyšëfta tjañe ndayiñe chë shembása entsetbemana; chë  
bestšašëngnaca mondmëna canyšëfta mandadënga.

<sup>10</sup> Chentšana, shachnëngbe amëndayana ya tonjochnëgo,  
canya mora entsetbemana jtsamëndayama y chë inya cabá  
ndoñe tonjášhango. Y cha chaojášhango ora, ndoñe bënama  
cha queochaisemánda.

<sup>11</sup> Chë tempo enjaniyena uabouana bayá pero mora ya  
ndoñe, endmëna chë canyšëfta mandadënguentšana inye man-  
dado, pero chánaca chë inye canyšëftangcá endmëna y lempe  
pochocaná jtsemnama entsá.

<sup>12</sup> “Chë tconjinye bnëtsana tsëtjonëše mondmëna bnëtsana  
mandadënga, jamëndama cabá ndoñe tmonjójayenga; pero  
básefta tescama cányiñe chë uabouana bayáftaca, mando mo  
reyëngcá mochanjóyëngacñe.

<sup>13</sup> Quem bnëtsanënga nyetscanga cachcá mochántsejuabnaye,  
y chë uabouana bayáböye chëngbe obenana y mando  
mochanjátsetaye.

14 Chë Oveshatembe contra mochántsestsjanaye; pero chë Oveshatema echantsayëñaná, er chë Oveshatema endmëna nyetsca amëndayëngbiama chë más uámana Utabná y nyetsca reyëngbiama chë más uámana Rey. Chë bnëtsana mandadënga cháftaca mochántsestsjanaye ora, cha chentse chabe entsángaftaca cányiñe echántsemna. Chënga mondmëna chë cha tojáchembo y tojubuáyanënga y chábeñe sempre ošbuáchiyënga ca” —cha šonjaniyana.

15 Chë ángel mëntšánaca šonjaniyana: “Chë tconjinÿe béjayënga, ndayiñe chë bacna vida bomna shembása entsetbemana, mondmëna nyetsca canÿe luarentša entsanga, enutanana entsanga, nyetsca biyañe oyebuambnayënga y nyetsca mándayëngbentša entsanga.

16 Y chë uabouana bayábeñe tcojinÿe bnëtsana tsëtjonëse y chë uabouana bayá, chë bacna vida bomna shembásabioye mochantsáboyënja; enaşá cachcá mochanjesonÿaye; chabe cuerpentša mëntšena mochantsósañe y ñesheca mochántsejuinÿiye, chaopochocantscuana.

17 Bëngbe Bëtsá tojama chë bnëtsanënga ainaniñe tša chamotseboše, ntšamo cha yobošcá chamotsamama. Chca, chënga mochanjenóyeunaye chëngbe mando chë uabouana bayábioye jantšabuáchiyana, ntšamo Bëngbe Bëtsá tojayancá chaojopasantscuana.

18 Chë tconjinÿe shembása chë puerte bëts pueblo endmëna, chë ndayentša mandadënga nyets quem luarentša mandadëngbeñe mando mondbomna ca” —cha šonjaniyana.

## 18

### *Babilonia japochócoma*

1 Chentšana inÿe ángel sënjáninÿe, celocana enjétsastjajuana, puerte obenana bomná, y chabe buashinÿinÿanánaca nyets quem luariñe entsanbinÿna.

2 Chë ángel jabuache mëntšá enjétsichamo:  
¡Ya mochantsepochoá, ya mochantsepochoá chë uámana pueblo Babilonia!

¡Chentse tojtsóbema diablëngbe oyeniñe,  
nyetsca bacna espíritëngbe oyeniñe,  
y ndoñe tsabe y uaboyënja shloftšëngbe oyeniñe!

3 Er nyetsca quem luariñe mándayëngbentša entsanga puerte bacna soyënga tmojama chentša entsangbe causa, mo chë bacna vida bomna shembásaftaca bacna soyënga cuafjamcá,  
mo puerte cuafjotmenangcá chë bacna vida bomna shembásabe vínoyeca.

Njetsca luarënguentša mandadënga puerte bacna soyënga  
tmojama,  
mo chë shembásaftaca bacna soye cuafjamcá,  
y quem luarentša obuámnañënga y enënga, bomnënga  
tmojobiama chentša entšanga yapa crocénana nÿe  
ndayíñnaca ntsejuabnaycá gástaye causa ca –cha  
enjétsichamo.

4 Chentšana, celocana inÿe oyebuambnayana sënjanuena,  
mëntšá enjétsichamo:

¡Chë bëts pueblentšana maisebocana!, tšëngaftanga chë atšbe  
entšanga šmomnënga,  
chë chentša entšanga mondbétsama bacna soyënga ndoñe  
chašmondétsamama,  
ni chë chëngbioye japochócama soyënga tšëngaftangbiamama cach  
ndoñe chaondétsemnama.

5 Chënga tša bacna soyënga tmojama, tša bëtscá nÿa mo  
celóntscoñe cuafjojutjecá,

y Bëngbe Bëtsá mora entsejuabná chënga tša puerte bacna  
soyënga tmojama causa, chë soyëngama jácastigama.

6 Ntšamo chentša entšanga ínÿëngbiamama ndoñe tšabá tmon-  
jamcá,

chë entšangbiámna cachcá chaotsemna;  
ntšamo tmojamama, cabá uta soye más cachca soye  
chëngbiamama chaotsemna;

ntšamo chentša entšanga ínÿënga chamosufrima tmojamcá,  
chëngnaca cachcá uta soye más chamosufrí.

7 Chënga corente jtsenábotamnayana y yapa crocénana nÿe  
ndayíñnaca ntsejuabnaycá jtsegástayana;

chë causa, chënga entsamna puerte jasúfriama y becá  
tsetšanana jtsebomnama.

Er chëngbe ainaniñe mëntšá jtsejuabnayana:

“Muentše mo reyëngcá mondétbiámama.

Viudacá ngménaca ndoñe quemuátsmëna; tondayama que-  
mochátssufrina ca.”

8 Chíyeca, canÿe ora pochócaye soyënga chëngbiamama  
echanjóshjango:

jóbanama šocanënga, puerte ngménana y jabuache shëntsana,  
íñesheca lempe chëngbeñe echántsejuinÿe;

er Bëngbe Bëtsá corente obenana bomná endmëna,

Bëngbe Utabná chë chënga chca castigo chamotsebomnama  
tojayaná ca –cha enjétsichamo.

9 Quem luarentša mandadënga, chentša entšangtaftaca  
puerte bacna soyënga tmojamënga, y chëngaftaca nÿe  
ndayíñnaca yapa crocénana, ntsejuabnaycá tmojagastanga,  
mochanjošachna y puerte ngmenánaca mochántsemna, chë

bëts pueblo chaojtsangbototjuanentša ngona chamojinÿe ora.

<sup>10</sup> Chentšana bënoca mochanjoquéda antješna, chë uabouana castiguama auatja causa, y chentša entsangbiana mochanjayana:

¡Tša lastema, tša lastema tšëngaftanga chë uámana bëts pueblo, Babilonientše oyenëngbiana, chë tša obenana binÿnentše!

Canÿe ora tšëngaftangbe castigo tojóshjango ca — mochántsicamo.

<sup>11</sup> Chë quem luarentša obuámnañënga y enëngnaca mochanjošachna y ngmenánaca mochántsemna chë pueblentša entsangbiana, er chora ya ndocná queochátsmëna chë chënga tmojúshjango soyënga chamobuámiñama:

<sup>12</sup> tmojúshjango castellano soyënga, midio soyënga, uámana y botamana ndëtšbënga, perlënga, uámana lino y shbuenda uafjatsënga entsáyá y sedëjua y uámana uabuángana entsáyá; nÿetsca botamana uanguëtše betiyënga, marfiloca pormana soyënga, uámana niñëšëngaca pormana soyënga, bronce soyënga, hierro y marmol soyënga;

<sup>13</sup> bëts cá canela y inÿe botamana uanguëtše y tamna soyënga, botamana uanguëtše béjayënga, inciense y mirra; vínoye, aceitiye, uámana arninÿá, trigo; bayënga ndayánaca uasmëmnyënga, oveshënga, couayënga, cochëshangá y entsanga nÿets tempo nÿe ínÿabiana oservenëngnaca.

<sup>14</sup> Y chë pueblentša entsangbiana mochanjayana:

¡Chë tša cmonjanogúsetana jtsebomnama soyënga, mora ya ndoñe quešmátsbomna;

chë uámana y buashinÿinÿana soyënga y tša bomnana lempe šmojobuetše,

y ndocna te más cachca soye quešmochátsbomna ca!

<sup>15</sup> Chë soyënga enënga, chë bëts pueblentša entsángbeyeca bomnënga tmojanobiamënga, bënoca mochanjoquéda antješna, chë bëts pueblentša entsangbiana tša bëts castiguama auatja causa; mochanjošachna, puerte ngmenánaca mochántsemna.

<sup>16</sup> Y mëntšá chentša entsangbiana mochanjayana:

¡Tša lastema, tša lastema tšëngaftanga chë uámana bëts pueblentše oyenëngbiana!

Chë enjáninÿna mo canÿe shembasacá, uámana lino entsëjua uichëtjoná,

uámana shbuenda uafjatsënga y uabuángana entsáyá uichëtjoná,

botamananá castellanoca, perlënga y uámana botamana ndëtšbéngaca.

17 ¡Y canye ora chabe tša bomnana lempe tojtsopochocá ca!  
—mochanjayana.

Nyetsca chë barquënguentša mándayënga, chentša entsanga inye luaroye ajnënga y chentša trabájayënga, y nyetscanga chë vida onguayifne mar béjayoca trabájayëngnaca, chentšana bënoca mochanjoquéda antješna,

18 y chë bëts pueblo chaojtsangbototjuanentša ngona chamojinye ora, jabuache mochanjayana: “¡Quem uámana bëts pueblécá ndocna inye pueblo cachcá quenátsmëna ca!”

19 Chca chamojinye ora, ngménama bestšasiñe polvëshe mochántsenotboto, y mëntšá mochántseyona ošachiyënga y puerte cochtsetšenánënga:

¡Tša lastema, tša lastema tšëngaftanga chë uámana bëts pueblentše oyenëngbiama!

Chentša bomnánaca bomnënga tmojanobiama nyetscanga chë mar béjayoca barco bomnënga.

¡Canye ora lempe tojtsopochocá ca! —chënga mochántseyona.

Chora chë ángel tonjánayana:

20 ¡Celoca oyenënga móyejuanga chë pueblo chca tojapasama;

y tšëngaftángnaca móyejuanga, Bëngbe Bëtsabe entsanga, Jesu-  
cristbe ichmónënga y Bëngbe Bëtsabe juabna oyebuamb-  
nayënga,

er chca jacastígase, Bëngbe Bëtsá tojama chënga chamo-  
sufrima,

ntšamo tšëngaftanga chašmosufrima chënga tmojanmcá ca! —  
cha tonjánayana.

21 Chentšana, canye ángel puerte obenana bomná, canye ndëtsbé tonjanatsbaná, mo canye bëts nantsnëbé ndëtsbecá, mar béjayoye tonjanashbuetše y mëntšá tonjánayana:

Mëntšá, nye ndeolpe y jabuache, Babilonia chë uámana bëts  
pueblo mochántsetsatše,

y ndocna te más quem pueblo queochátsmëna.

22 Chentše, ndocna te más quemochátuenana  
arpangá uabuástoyana, ni cantayana, flautëfjënga y  
trompetëfjuangá cach ndoñe;

ndocna te más quemochátsmëna obrerënga,  
ni chë nantsnëbeñe trabájayana quemochátuenana.

23 Chentše, ndocna te más ndocna uajuinñanësha  
queochátšbinñnaye,

ni casamento fiestentša enbouenanana quemochátuenana.

Er chë bëts pueblo chca mochantsepochoáca,  
masque chentša obuámnañënga y enënga nyets quem luar-  
entše chë más bomnënga monjamna,

y chentša bocjuanánaca nyetsca luarënguentsä entsanga ingñénënga monjamna ca —cha tonjánayana.

<sup>24</sup> Bëngbe Bëtsá chca chë bëts pueblentše echanjama, er chentše tmojinýena chë Bëngbe Bëtsabiamá trabájaye causa tmojanóbanëngbe buiñe; chë chabe juabna oyebuambnayënga, chabe entsanga, y chë chábioye oservénama nyets quem luarentše tmojtsëbayëngbe buiñe.

## 19

<sup>1</sup> Chentšana celoca sënjanuena mo mallajta entsanga cuaftsayebuachcá, mëntšá monjétsichamo:

¡Bëngbe Utabná matschuanga!

Bëngbe Bëtsá endmëna nda chabe entsanga tojatsebacá; cha puerte uámanana, buashinýinýana y mando endbomna,

<sup>2</sup> er ndayama cha tojayancá ndegombre jtsemnana, y ntšamo tšabá chama tojtsemncá.

Cha chë uachuana bacna vida bomna shembásabioye tbojastigá.

Chë shembásabe puerte bacna soyënga causa,

nyets luarentša entsángnaca bacna soyënga tmojama.

Chábioye chca jacastígase,

Bëngbe Bëtsá tojama ntšamo jamama ibomerecencá,

chábioye oservénënga chë shembásabeyeca tmojóbana causa ca —chënga monjétsichamo.

<sup>3</sup> Y cachiñe mëntšá tmonjánayana:

¡Bëngbe Utabná matschuanga!

¡Chë bëts pueblo japochócama uangbototjuanentša ngona nyetsca tescama chca echanjótšjuaye ca!

<sup>4</sup> Y chora, chë uta bnëtsana y canta bëtsëjëmënga amëndayënga y chë canta Ainënga tmonjanoshamentsé, y Bëngbe Bëtsá, chë uámana tbemanentše enjëtsetbemanabioye tmonjanadorá, mëntšá jayanëse: “¡Chca chaotsemna! ¡Bëngbe Utabná matschuanga ca!”

<sup>5</sup> Y chë uámana puestentšana canýe oyebuambnayana tonjanóbocna, mëntšá:

Bëngbe Bëtsá matschuanga, nyetsca chabe oservénënga

y chë nyetscangbiamá cha chë más uamaná yomnama juabnayënga,

básenga y bëtsëtsanga ca.

### *Chë Oveshatembe casamento fiesta*

<sup>6</sup> Y sënjanuena mo mallajta entsangbe oyebuambnayancá, mo bëtsca béjaye cuaftsobonjncá y mo bëts juesasanana shauenanancá; mëntšá monjétsichamo:

¡Bëngbe Utabná matschuanga!

Er Bëngbe Utabná, Bëngbe Bëtsá nÿets obenana bomná to-  
jontsé jamándana.

<sup>7</sup> Puerte móyejuanga y mochjínÿanÿiye  
Bëngbe Bëtsá puerte bëtsá y uamaná bétsemnama,  
er mora entsemna mo chë Oveshatembe casamento te  
cuafjoshjangá;

chabe shema yochjabocná puerte tojtenobotamá;

<sup>8</sup> tmojalesenciá cha chauatíhëtjo uámana, nduatsenga uaf-  
jantse y uabuashinÿinÿana lino entšayá.

Chë shema entsinÿinÿná chë Bëngbe Bëtsabe entšanga;

y chë lino entšayá jtsichëtjonana entsinÿinÿná

chënga lempe ntšamo tšabá yomncá jtsamëse imoyena ca –  
chënga monjétsichamo.

<sup>9</sup> Chentšana chë ángel šonjaniyana: “Mëntšá mábema: ‘Oye-  
juayënga chë Oveshatembe casamento fiestama ófjanënga ca.’  
” Y mëntšánaca šonjaniyana: “Chca, ndegombre Bëngbe  
Bëtsabe palabrënga endmëna ca.”

<sup>10</sup> As chabe shecuatšentše sënjanoshamentsé cha jadórama,  
pero cha šonjaniyana: “Ndoñe, átšeftaca ndoñe chca  
mátamana, er atše Bëngbe Bëtsabe canÿe oservená sëndmëna,  
ntšamo aca condmëncá, y chë Crístbeyeca acbe catšátanga,  
ntšamo chabiana motatšëmbcá y chabe ndegombre  
palabrënga nÿets tempo imabuayiynanga mondmëncá. Aca  
cmontsemna Bëngbe Bëtsá jadórama ca.”

Ndayá Jesús tojanma y tojanayancá, endama chë Bëngbe  
Bëtsabe juabna oyebuambnayënga chëngbe ainaniñe  
osertánana y añemo chamotsebomnama, chë soyëngama  
entšángbioye jábuayenama.

### *Chë fjantse couayiñe enjaquená*

<sup>11</sup> Chora sënjáninÿe celoca atëfjniñe; canÿe fjantse couaye  
enjésemna y chë chábeñe enjaquená enjanabaina “Ntšamo  
tojašebuachenacá amá” y “Ndegombre oyebuambnayá  
ca”, er ntšamo tšabá yomncá cha tojanjuabó y tojanma  
entšángaftaca; y chca chabe uayayëngaftaca monjánentsjanaye.

<sup>12</sup> Chabe fšnëbenga mo iñeshcá enjáninÿna, bestšašifñe  
ba uabuashinÿinÿana coronëshangá enjanábomna, y canÿe  
uabaina chábeñe enjanábemana; nÿe cha chë uabaina  
yojanábuatma.

<sup>13</sup> Cha enjanichëtjona buiñeca unëtjona entšayá y chabe  
uabaina enjamna “Bëngbe Bëtsabe palabra ca”.

<sup>14</sup> Y chabe ústonoye monjétsajna mallajta soldadënga  
celoquënga, nduatsenga uafjantse y uámana lino entšayá  
uichëtjonënga, fjantse couayënguiñe enjaquenënga.

<sup>15</sup> Chë enjétebnatsanabe uayoicana enjanóbocana  
canÿe puerte efsana espadëja, chë Bëngbe Bëtsábeñe

ndošbuáchiyënga játatsetšama. Cha puerte obenánaca echántsamëndaye, mo canýe hierro varëfjaquécá. Cha echanjama entšángaftaca mo nda uvasëšangá juantsëtetjama tojtsabotajná ora cuafjamcá; y echanjama chënga chamotsebomnama chë puerte uabouana castigo, Bëngbe Bëtsá chë nýets obenana bomná tbojetna causa.

<sup>16</sup> Chabe uabonjaníyañe y chabe mëntjoca canýe uabaina enjanábemana: “Nýetsca reyëngbiama chë más uámana Rey, y nýetsca amëndayëngbiama chë más uámana Utabná ca”.

<sup>17</sup> Chentšana canýe ángel sënjáninýe, shinýiñe enjétsatsana, chë celoca tsbanánoca nýetsca monjanongüefjná shloftšënga jabuache mëntšá enjétsëtsësnaye: “¡Mabënga, menefjna chë Bëngbe Bëtsá tojaprontá bëts saná jasama;

<sup>18</sup> chašmosama reyëngbe mëntšena, soldadënga amëndayëngbe mëntšena y valente entšangbe mëntšena, couayënga y chëngbeñe enjaquenëngbe mëntšena, y nýetsca entšangbe mëntšena, cachëngbiama trabájayënga y nýe ínýabiama nýets tempo trabájayënga, básesenga y bëtsëtsanga ca!”

<sup>19</sup> Chora atše sënjáninýe chë uabouana bayá y quem luarentša reyënga chëngbe soldadëngaftaca tmojánenefjna, chë fjantse couayiñe enjaquená y chabe soldadëngaftaca jéntsama.

<sup>20</sup> Chë uabouana bayá tmonjanotbá, y cháftaca chë Bëngbe Bëtsabe ndoñe ndegombre juabna oyebuambnayá, chë bayabe delante ba bëts soyënga tonjanmá obenana jinýanýiyama; y cha chë soyëngaca tojanaingñé chë uabouana bayabe uinýnanana soye chamuayentšajoma tmojanlesencianga, y chë chábioye jadórana pormana soye adórayënga. Y chë útatbioyna ainata tmontsanatmetše chë íñesheca uafjajónayoye, chë azufre endëjuinýinýanentše.

<sup>21</sup> Chë ínýengbioyna tmontsanapochocá chë fjantse couayiñe enjaquenabe uayoicana enjanóbocana espadéjaca, y nýetsca shloftšënga chëngbe mëntšénaca yapa tmontanoshachá.

## 20

### *Chë uaranga uata*

<sup>1</sup> Chentšana canýe ángel sënjáninýe celocana entsanastjajuana chë corente asentoye tboça llavëfjaca, y canýe bëts cadenëjua entsanëtbena.

<sup>2</sup> Chë ángel tbontsantbá chë dragónbioye, chë tempsca mëtsçuaye, chë Diablo y Satanás endmëná, y canýe uaranga uatama tbontsanbátsëca.

<sup>3</sup> Chë corente asentoye tboye tbontsantsatše, chentše tbontsanëtame, y chentše bëšáša tsengájašeca tonjaninýnaná,



ndotatsëmbcá jatëfjuama ndocná chaondobenama; y chca, chë dragón ndoñe chaondobená jabocnama entsanga jáingñama, chë uaranga uata candochnënguëntscuana; y chora, básefta tescama chë dragón mochanjëtsboshjona.

<sup>4</sup> Uámana puestënga sënjáninÿe, y chiñe tmonjanotbiama chë entsanga tšabá o ndoñe tšabá tmonjamama jayanama obenana tmojanóyëngacñënga. Chë bestšaše jtsëstjanguëse tmojanóbanëngbe espíritëngnaca sënjánanÿe. Chënga chca tmojanóbana, Jesús tojánayana soyënguiñe y chë Bëngbe Bëtsabe buayenana soyënguiñe sempre ošbuáchiye causa. Chënga ndoñe tmonjanadorá ni chë uabouana bayá, ni chë chábioye jadórama pormana soye, y ndoñe tmonjanlesenciá chë bayabe uinÿnanana soye juentsaca o cucuatšinë chamuayentšajoma. Y sënjáninÿe chëngna tmontanayena y Crísoftaca canÿe uaranga uatama montsanmánda.

<sup>5</sup> Chë entsanga mondmëna chë natsanënga jtayenama, pero chë tempo chë inÿe obanënga ndoñe chemëntëtanayena, ndayá nÿe chë canÿe uaranga uata chentšana.

<sup>6</sup> ¡Oyejuayënga y Bëngbe Bëtsabe entsanga, chë tmojtanayenënga chë obanënga chámuatayenama Bëngbe Bëtsá tojanma ora! Chënga ndoñe quenátamna chë nÿetsca tescama castigo jtsebomnana, ndayá Bëngbe Bëtsá y Crístbioye mo bachnangcá chënga mochántseservena, y Crísoftaca chë uaranga uatama mochántsemandaye.

### *Satanás japochócama*

<sup>7</sup> Chë uaranga uata chaojochnëngo ora, Satanás chabe utámenocana mochanjëtsboshjona;

<sup>8</sup> y cha echanjábocna nÿets luarentša entsángbioye, chë Bëngbe Bëtsabe soyëngama contra imomnëngbioye jáingñama, chë ntšamo Bëngbe Bëtsabe contra Gog y Magog tempo ibojamncá imomnënga. Satanás, chë entsanga echanjáchembo Bëngbe Bëtsabe contra jéntsjava, y tša chëftanga cha echanjáchembo, nÿa mo chë mar béjaye chëñÿoca cascajcá mochántsemna.

<sup>9</sup> Chënga nÿetscanga nÿets luarëjana mochanjátsjua, y chë Bëngbe Bëtsabe entsanga oyenentše y chabe bonshana entsangbe bëts pueblo shëconana mochanjotsaye. Pero celocana iñe echanjatquëcjana y chë Bëngbe Bëtsabe contra imomnënga lempe echántsjuinÿe.

<sup>10</sup> Y Satanás, chë aingñayá, mochántsatmetše chë iñeshe y azúfrecá uafjajónayoye, ndayentše chë uabouana bayá y chë Bëngbe Bëtsabe ndoñe ndegombre juabna oyebuambnayá tmontsanatmetše. Chentše bëts castigo nÿets tempo, bnëté y ibeta mochanjasufrina.

*Chë obanëngbiana tmonjánayana ntšamo chëngaftaca jamama yojtsemnana*

<sup>11</sup> Chentsana sënjáninÿe canÿe bëts uámana fjantse puesto jamándama y nda chiñe enjetsetbemaná. Celoca y quem luare chabe delante lempe tonjanenatjëmbe, y ndócñentše más chenatanobinÿná.

<sup>12</sup> Y chë obanënga sënjánanÿe, bëtsëtsanga y básesenga, chë uámana puestentša natsanoica monjétsatsana; y chë librëšangá tmonjanëtëfjo, y inÿe librëšanaca, ndëmuanyënga nÿetsca tescama tšabe vida mochjónÿenëngbe uabaina uabemana librëša. Chë obanëngbiana tmonjánayana ntšamo chëngaftaca jamama yojtsemnana, cachënga vida imojábomna ora ntšamo tmojëftsema soyëngaca, ntšamo chë librëšangañe yojanabemancá.

<sup>13</sup> Chë mar béjayoye tmojanóbanënga choicana tmontanbocna, y chë obanënga tmojanoqueadanga luarënguentsana tmontanbocna, y cada cánÿabiana tmonjánayana ntšamo cháftaca jamama yojtsemnana, cachënga vida imojábomna ora ntšamo tmojëftsema soyëngaca.

<sup>14</sup> Chentsana ya ndoñe más obenana quentëtsemna entšanga chamóbanama chaomama, mo chë obenana chë iñesheca uafjajónayoye cuaftsëtsencá; quem iñesheca uafjajónaye endmëna chë nÿetsca tescama castigo jtsebomnama luare; chë choca castigánënga jtsamnama yojtsamnëngbiana entsemna mo chënga cachiñe cuafjatobancá;

<sup>15</sup> y ndëmuanyëngbe uabaina chë tšabe vida mochjónÿenëngbe uabaina iuábemana librëšañe ndoñe yonjanabemana, chë iñesheca uafjajónayoye tmontsanatmetše.

## 21

*Celoca tsmiñe y fshantse tsmiñe*

<sup>1</sup> Chentsana atše sënjáninÿe canÿe celoca tsmiñe y canÿe fshantse tsmiñe, ndoñe ntšamo tempo enjamncá, er chë tempo enjamna celoca y fshantse chora ya ndoñe quentëtsemna, y chë mar béjaye chora cach tondaye.

<sup>2</sup> Sënjáninÿe chë “uámana ca” uabaina bëts pueblo, chë tsëm bëts pueblo Jerusalén, Bëngbe Bëtsábiocana celocana enjétsostjajuana, puerte botamaniñe, mo canÿe shembása puerte botamananacá, chabe boyá jábocnabiana.

<sup>3</sup> Y chora canÿe jabuache oyebuambnayana Bëngbe Bëtsabe uámana puestentšana sënjanuena, mëntsá: “Mouena. Bëngbe Bëtsá entšangaftaca echántsemna y cha chëngbeñe echantsiyena. Chënga chabe entšanga mochántsemna, cach

Bëngbe Bëtsá chëngaftaca echántsemna, y cha chëngbe Bëtsá echántsemna.

<sup>4</sup> Cha echanjama chënga ndocna te más ngménënga chamondëtsemnama, y ndoñe más chamondóbanama, ndoñe más chamondošachema, ni ngménaca ndoñe chamondëtsóyebuambnama y ndoñe más tsetšanana chamondëtsebomnama; er ntšamo chënga entsangcá fshantsoca tempo imojëftsiyena ora enjamncá, chora ya ndoñe chca queochátsmëna ca.”

<sup>5</sup> Chë uámana puententše enjantbemaná šonjaniyana: “Atše lempe mo tsëm soyëngcá sëndbama ca.” Y mëntšánaca tonjánayana: “Chë soyënga mábema, er chë palabrënga endmëna ntšamo ndegombre yomncá, y nyetscanga mondobena chiñe corente jtsošbuáchiyana ca.”

<sup>6</sup> Chentsana šonjaniyana: “Lempe tonjochnëngo. Atše sëndmëna chë nyetsca soyënga bojatsayá y pochocayá, chë natsaná y chë ustonoyá. Mo nda tša uajuendayana tojtsebomná canye béjaye fshantsiñe obocanentšana cuafjofsecá, cachcá nda tša tojtseboše atšbe soyënga jtsebomnama, atše chanjama cha chë soyënga chaotsebomnama, y chë nyetsca tescama yomna tšabe vídnaca, chca jtsebomnama chábioye tondaye ntsojtañcá.

<sup>7</sup> Nda nyetsca soyënguentsana tšabá chaojabocná mo ayënjanyacá, lempe echanjóyëngacñe ntšamo atšbe entsángbioye jatšatayama tijašebuachenacá, y atše chabe Bëtsá chántsemna y cha atšbe uaquiñá.

<sup>8</sup> Pero chë auatja causa Crístbioye ndoñe mondëservénënga, chábeñe ndošbuáchiyënga, chë bacna soyënga causa Bëngbe Bëtsabiana puerte uaboyënjanënga imomnënga, chë ínÿëngbioye obánayënga, chë shembása o boyabásaftaca bacna soye amënga, chë bocjuana soyënga amënga, chë soyënga adórayënga diosënga yomna ca jtsejuabnayëse, y nyetscanga bosterënga imomnëngbiamna, chënga entsamna chë íñesheca uafjajónayoca jasúfriana, chë azufre yojuínÿinÿanentše. Chentše puerte castigánënga sempre mochanjëftsemna, mo uta soyama cuafjobancá ca.”

### *Chë tsëm bëts pueblo Jerusalén*

<sup>9</sup> Chentsana canya chë angelënguentsá, chë canÿsëfta codbenga bomnënga jútjena chë canÿsëfta ústonoye pochócaye soyëngaca, átšbioye tonjánabo y šonjaniyana: “Mabo, cbochanjinÿinÿiye chë tojobouamá shembása, chë Oveshatembe shema ca.”

<sup>10</sup> Y atše chë Uámana Espíritoftaca corente mandaná jtsemnëse, chë ángel šonjanánatse canye bëts y tsbanana tjoje, y šonjaninÿinÿé chë tsëm bëts pueblo Jerusalén, chë

“uámana ca” uabaina pueblo, celocana Bëngbe Bëtsábiocana enjétsostjajuana.

11 Chë bëts pueblo enjëtsebuashinÿinÿana Bëngbe Bëtsabe buashinÿinÿanána; enjëtsebuashinÿinÿana mo canÿe uámana botamana ndëtšbecá, mo jaspe ndëtšbecá, pero mo cristalca tëshinÿniñe.

12 Chë bëts pueblo shëconana canÿe bëts y tsbanana tapiëse enjamna, chë tapiësiñe bnëtsana uta bëshashangá y cada bëshashentse canÿe ángel, y chë bëshashangañe enjanábemana chë Israeloca bnëtsana uta bëts pamíllange uabaina.

13 Shinÿe bocanoica unga bëshashangá, shinÿe uenatjëmbambanoica ungashá, tsjuanoica unga bëshashangá, y tsmanoica ungashá.

14 Chë tapiëse enjanëcuatjona bnëtsana uta ndëtšbenguiñe, y chëbenguiñe enjanábemana Jesucristo chë Oveshatembe bnëtsana uta ichmónëngbe uabaina.

15 Chë ángel átseftaca oyebuambnayá canÿe castellano juinÿnanëshëfja enjánatbëna jamedídama chë bëts pueblo, chentsa bëshashangá y chentsa tapiëse.

16 Chë bëts pueblo cach medida enjánbomna nÿets can-toica, cach medida tëntsoye y nÿanëjoye. Chë ángel chabe juinÿnanëshëfjaca chë bëts pueblo tonjanmedidá: enjánbomna uta uaranga y uta patse kilómetrënga; tëntsoye, tsbanánoye y nÿanëjoye cach medida enjánbomna.

17 Chentsana chë tapiëse tonjanmedidá, enjánbomna chnënguana bnëtsana y shachna metrënga; ntšamo entsanga chca soyënga jamedídama mondëtatšëmbcá chë ángel tonjanmedidá.

18 Chë tapiëse enjanpormana jaspe ndëtšbeca, y chë bëts pueblo ena castellánoca, tša chca nÿa mo cristalca tëshinÿniñe enjáninÿna.

19 Chë ndëtšbenga ndayiñe chë tapiëse enjanëcuatjona enjánbotamanana nÿetsca uámana botamana ndëtšbéngaca: canÿebé jaspe ndëtšbeca, chë inÿebé zafíroca, chë inÿebé ágata ndëtšbeca, chë inÿebé esmeráldaca,

20 chë inÿebé ónice ndëtšbeca, chë inÿebé cornalina ndëtšbeca, chë inÿebé crisólito ndëtšbeca, chë inÿebé berilo ndëtšbeca, chë inÿebé topácioca, chë inÿebé crisoprasa ndëtšbeca, chë inÿebé jacíntoca y chë inÿebena amatista ndëtšbeca.

21 Chë bnëtsana uta bëshashangá enjuamna bnëtsana uta perlënga; cada bëshasha nÿe canÿe perlaca uapormanësha. Y chë más bëts tsáshenëjana enjamna ena castellánoca; mo cristalca tëshinÿniñe enjáninÿna.

22 Chë bëts pueblentše ndocna Bëngbe Bëtsabe bëts yebna chiyátaninye, er Bëngbe Utabná, chë Bëngbe Bëtsá nyets obenana bomná y chë Oveshatema chentše bonjamna, y chata nyetscangbiana chë bëts pueblentše ndayéntsna adoránata bonjëtsemna.

23 Chë bëts pueblentše ndoñe quenjatsiyta shinye o juashcona chaotsebínynaye, er Bëngbe Bëtsabe buashinýinýanana chentše enjëtsebinýnaye, y chë Oveshatembe buashinýinýanana mo uajuinýanëshacá enjamna chë bëts pueblama.

24 Chentša binýnayánaca, entsanga nyetsca mándayëngbentše mochantsiyena, y quem luarentša mandadënga chëngbe uámana y bëts soyënga chë bëts puebloye mochanjiyëbo.

25 Chë bëts pueblentša bëshashangá ndocna te quemochtëtatame, y chentše ndocna ora ibeta queochátsmëna.

26 Chë bëts puebloye mochanjiyëbo chë nyetsca luarënguentsa entsangbe uámana y bëts soyënga, y chë nyetsca luarënguentsa entsángbeñe bëtsëtsanga y uámanënga iuabianná soyëgnaca.

27 Pero ndocna te queochatómashëngo ndayánaca, y chë soye chaotsama entsanga ndoñe tsábenga chamotsemnama Bëngbe Bëtsá jadórama; ni ndocná queochátamashëngo, Bëngbe Bëtsabiana nýa tondayama ogustana soyënga amá o ínýengbloye jáingñama soyënga amá. Choye mochanjámashjna nye chë ndëmuanýengbe uabaina yojtsábemana chë Oveshatembe librësañe, chë nyetsca tescama tsabe vida mochjónyëngbe uabaina uábemanentše.

## 22

1 Chë ángel šonjaninýinýé chë enjanobëjna bëjaye vida bomniye. Chë býeshe enjamna ndëtsenguiye y tëshínýniye mo cristalcá. Enjanóbocana chë Bëngbe Bëtsá y chë Oveshatembe uámana puestocana,

2 y chë más bëts tsashená tsëntsajana enjanobëjna. Chë fshajayentsa catoica lado enjanójuajna betiyeshënga chë nyetsca tescama yomna tsabe vida jtsebomnama, canye uatiñe bnëtsana uta soye jashájonana, canye cada shinye; chë betiyeshentsa tsbuanáchënga josérviana nyetsca mándayëngbentša entsanga jáshnama.

3 Choca ndocna soye queochátsmëna chë ndayama Bëngbe Bëtsá tojayana ndoñe tsabá yondmëna ca, y ndaye bacna soye japásama chaotsemna soye. Chë Bëngbe Bëtsá y chë Oveshatembe uámana puesto chë bëts pueblentše echántsemna, y chatbe oservënënga mochántadorana.

4 Chënga mochanjinÿe Bëngbe Bëtsabe jubíá, y chabe uabaina chëngbe juentsaca mochantsambaye.

5 Chentše ndocna ora ibeta queochátmëna, y chentša oyenënga ndoñe queochátëjaboto canÿe uajuinÿanësha o shinÿe chaotsebínÿnaye, er Bëngbe Bëtsá Bëngbe Utabnabe buashinÿinÿanana chëngbiama echantsebínÿnaye, y chënga mochántsemna mo reyëngcá uámanënga, y Bëngbe Bëtsáftaca nÿetsca tescama mochántsemandaye.

### *Jesucristo jésabama entsobeco*

6 Chentšana chë ángel šonjaniyana: “Quem palabrënga endmëna ntšamo ndegombre yomncá, y nÿetscanga mondobena chiñe corente jtsošbuáchiyana. Bëngbe Utabná, cach Bëngbe Bëtsá, nda endbama chabe juabna oyebuambnayënga, chëngbe ainaniñe osertánana y añemo chamotse-bomnama jóyebuambayama, chabe ángel tbojichmó chabe oservénëngbioye jinÿanÿiyama ndayá betscó yojtsemna jopásama ca.”

7 Chora Jesús tonjánayana: “Mouena. ¡Atše cachiñe betscó chanjésabo! Oyejuayá nda quem buayenana soyënga, ntšamo ndegombre jopásama, chë Bëngbe Bëtsabe juábnaca oyebuambana soye tojoyeuná, chë ndayama quem librëšañe entsábemana ca.”

8 Atše Juan, chë soyënga sënjanuena y sënjáninÿe. Y chca sënjanuena y sënjaninÿentšana, chë chca šonjaninÿinÿé ángelbe delante atše sënjanoshamentšé, cha jadórama.

9 Pero cha šonjaniyana: “Ndoñe, átšeftaca ndoñe chca mátamana, er atše canÿe Bëngbe Bëtsabe oservená sëndmëna, ntšamo aca condmëncá, y ntšamo chë Crístbeyeca acbe catšátanga, chë Bëngbe Bëtsabe juabna oyebuambnayënga y nÿetscanga chë ndayá quem librëšañe endayanama tmojóyeunanga mondmëncá. Aca cmontsemna Bëngbe Bëtsá jadórama ca.”

10 Chora mëntsánaca šonjaniyana: “Ndoñe mo iytëmencá catjáboshjona ndayá quem librëšañe entsabemancá, chë ndegombre jochnënguama soyënga, er chca jopásama chë tempo ya entsobeco.

11 Cachcá monÿá chë bacna entsá bacna soyënga chaotsama; chë puerte bacna soyënguiñe jtсийenama bošá, cachca soyënga chaotsama; pero chë tšábiana ntšamo tšabá yomncá chaotsama, y chë Bëngbe Bëtsabe entsá, nÿets tempo nÿets ainánaca chábioye chabotseserverna ca” —cha šonjaniyana.

12 Chora Jesús cachiñe tonjánayana: “Mouena. Atše quem luaroye betscó chanjésabo, y átšeftaca chanjiyëbo chë uacanana soye, y cada ona tšëngaftanguentsábioye chanjoyiye ndayá tojamama ntšamo tbojtsomerecencá.

13 Atše sēndmēna chē n̄yetsca soyēnga bojatšayá y pochocayá, chē natsaná y ustonoyá, chē ndábeyeca y ndabiama lempe yomna ca” –šonjaniyana.

14 Oyejuayēnga chē bacna soyēngama perdonánēnga imo-jtsemnēnga, mo chēnga chēngbe entšayá botamana cuaftsa-boshabecá. Chca chēnga mochantsobena chē n̄yetsca tescama yomna tšabe vida jtsebomnama uacanánana jashjáchama, mo chē n̄yetsca tescama yomna tšabe vida jtsebomnama betiyeshentšana cuaftsesacá, y mochanjobenaye chē tsēm bēts puebløye bēšásajana tšabá jamashjnama.

15 Pero ndoñe quemochatobenaye jamashjnama chē ba ndoñe tšabe juabnēnga ainaniñe bomnēnga, chē bocjuanēnga, chē shembása o boyabásaftaca bacna soye amēnga, chē ín̄yēnga obánayēnga, chē soyēnga adórayēnga diosēnga yomna ca jtse-juabnayēse, y n̄yetscanga chē bostero soyēnga ogusetánēnga y chca jtsamēse oyenēnga.

16 Chora Jesús cachiñe tonjánayana: “Atše Jesús, atšbe ángel tijichmó chē ntšamo atše sēntsejuabnacá ndayenache ošbuachiyēngcá enefjuanēngbiøye lempe chámabuayenama. Atše sēndmēna chē Rey Davídbentšana Entšá. Atše sēndmēna mo chē bín̄yanøye puerte bín̄ynaye estrellcá ca.”

17 Chē Uámana Espíritu y chē Oveshatembe shema bondbésichamo: “¡Mabo ca!” Y nda chca chaojouená cháuyana: “¡Mabo ca!” Y mo nda tša uajuendayana tojtsebomna, tojabo y bētscá bėjaye cuafjofšecá, cachcá nda tša tojtseboše Jesusbe soyēnga jtsebomnama, chábioye chaobeconá y cha echanjama chē soyēnga cha chaotsebomnama y chē n̄yetsca tescama yomna tšabe vídnaca, chca jtsebomnama tondaye ntsotjañcá.

18 N̄yetscanga ntšamo quem librēšañe entsabemancá, chē ndegombre echanjopásama chamojouenēngbiøye šcuabuayená. Nderado nda chē soyēngama más chaojaboté, Bēngbe Bētsá echanjama cha chaosufrí chē quem librēšañe entsábemana pochócaye soyēnga.

19 Y nderado nda ntšamo quem librēšañe entsabemancá, chē ndegombre echanjopásama soyēnguiñe ndayánaca toja-juaná, Bēngbe Bētsá chábioye bochantsebojuána ntšamo chabi-ama yomncá chē n̄yetsca tescama yomna tšabe vida jtsebom- nama betiyeshentšana y chē tsēm bēts pueblentšana, chē ndayama quem librēšañe entsábemana.

20 Quem soyēnga oyebuambnayá, chē lempe ndegombre echantsemnama tonjayaná, atše, Jesús sēntsichamo: “Aíñe, betscø chanjésabo ca.”

Chca chaotsemna. ¡Cochjabo, Bēngbe Utabná Jesús!

21 Bëngbe Utabná Jesús chaoma tšabe bendicionënga  
tšëngaftangbeñe chaotsemnana.